


Tuhun cha sañahá ra
Jesucristo chi yo



New Testament in Mixtec, Jamiltepec (MX:mx:Mixtec,
Jamiltepec)

Tuhun cha sañahá ra Jesucristo chi yo New Testament in Mixtec, Jamiltepec (MX:mxt:Mixtec, Jamiltepec)

copyright © 1983 Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

Copyright Information

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Jamiltepec

© 1983, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Mar 2026 from source files dated 29 Jan 2022
7411d349-0f34-5963-987e-74457a7bad38

Contents

San Mateo	1
San Marcos	45
San Lucas	72
San Juan	120
Hechos	154
Romanos	196
1 Corintios	215
2 Corintios	232
Gálatas	244
Efesios	251
Filipenses	258
Colosenses	263
1 Tesalonicenses	268
2 Tesalonicenses	272
1 Timoteo	274
2 Timoteo	279
Tito	283
Filemón	285
Hebreos	286
Santiago	300
1 Pedro	305
2 Pedro	311
1 Juan	314
2 Juan	319
3 Juan	320
Judas	321
Apocalipsis	323

Tuhun Nyoo Cha Tyaa San Mateo

Ñáyivi vachi ra Jesucristo tata (Lc. 3.23-38)

¹ Ican ihya cuví sivi ñáyivi vachi ra Jesucristo tata. Tata ra David ta tata ra Abraham cuví chi ra.

² Sehe ra Abraham cuví chi ra Isaac, sutu ra Jacob. Ta sehe ra Jacob cuví chi ra Judá ta yañi ra.

³ Ta sehe ra Judá chihin cu Tamar cuví chi ra Fares ta ra Zara. Ta sehe ra Fares cuví chi ra Esrom sutu ra Aram.

⁴ Ta sehe ra Aram cuví chi ra Aminadab sutu ra Naasón. Ta sehe ra Naasón cuví chi ra Salmón.

⁵ Ta sehe ra Salmón chihin cu Rahab cuví chi ra Booz. Ta sehe ra Booz chihin cu Rut cuví chi ra Obed, sutu ra Isai.

⁶ Ta sehe ra Isai cuví chi rey David. Ta sehe rey David chihin ñaha cha cuví ñasihi ra Urías cuví chi ra Salomón.

⁷ Ta sehe ra Salomón cuví chi ra Roboam sutu ra Abías. Ta sehe ra Abías cuví chi ra Aza.

⁸ Sehe ra Aza cuví chi ra Josafat, sutu ra Joram. Ta sehe ra Joram cuví chi ra Uzías.

⁹ Sehe ra Uzías cuví chi ra Jotam, sutu ra Acáz. Ta sehe ra Acáz cuví chi ra Ezequías.

¹⁰ Sehe ra Ezequías cuví chi ra Manasés, sutu ra Amón. Sehe ra Amón cuví chi ra Josías.

¹¹ Sehe ra Josías cuví chi ra Jeconías ta yañi ra. Cacacü ra quívi catiñ ra ñuu Babilonia chi ñu Israel, cuahan coyo ñu cua sacuvi ñu tyiño nuu ñu.

¹² Cha yaha cuan, ta chicoo sehe ra Jeconías, ta ican cuví ra Salatiel sutu ra Zorobabel.

¹³ Ta sehe ra Zorobabel ican cuví chi ra Abiud sutu ra Eliaquim. Ta sehe ra Eliaquim cuví chi ra Azor.

¹⁴ Ta sehe ra Azor cuví chi ra Sadoc sutu ra Aquim. Ta sehe ra Aquim cuví chi ra Eliud.

¹⁵ Ta sehe ra Eliud cuví chi ra Eleazar sutu ra Matán. Ta sehe ra Matán cuví chi ra Jacob.

¹⁶ Ta ra Jacob cuví sutu ra José yii cu María. Ican ña cuví sihi ra Jesús ra cuví Cristo, o cuñi chi catyí, ra cha saquichi Nyoo vatyi cuví ra rey cuenda yo.

¹⁷ Ra Abraham chicoo uchi cumi tahan tata ra nyacua nya cacü ra David. Ta ra David chicoo uchi cumi tahan tata ra nyacua nya quívi tiñ ñu Babilonia chi ñu Israel. Ta nyacua nya quívi cuan chicoo

uchi cumi ca tahan tata ñu nyacua nya quívi cacü ra Cristo.

Nu cacü ra Jesucristo (Lc. 2.1-7)

¹⁸ Tyehe caa cacü ra Jesucristo: Cha yaha cundaa tyiño cha cutandaha cu María, sihi ra Jesús, chihin ra José. Ta cha ni cumañi ca coo ñu chihin tahan ñu, chicoñon sehe ña, soco cha cuenda maa Tatyí Ii Nyoo.

¹⁹ Ta ra José ra cua cuví yii ña, cuví ra noo ra vaha. Ta ña cuñi ra cuhva ra ticahan nuu chi ña, yucuan chaha tyaa ra cuhva cha sandoo xehe ra chi ña.

²⁰ Ta cha ni ri ca cha chicá xiñi ra tyicuan caa, tuví noo ángel Sutu Mañi yo nuu ra nu quixi ra. Ta yehę ra ñumahna ta catyí ángel cuan chi ra tyehe caa:

—Yoho José, tata ra David cuvún. Ma caca iñun quehun chi cu María cuví ña ñashun, vatyi sehe ña cha cua cacü, cuenda Tatyí Ii Nyoo cuví.

²¹ Ta cha yaha cacü cha lee cuan, cusacunañun chi cue: Jesús. Tyicuan caa cunañi ra vatyi cusacacu ra chi ñáyivi chihin cuatyí ñu.

²² Tandihí ihya cuví tacuhva nachino cava tuhun cha cahān Sutu Mañi yo chihin yuhu ra cacuví profeta ra ta cha naha, ra cachahá cuenda tuhun cahān ra.

²³ Ta catyí ra tyehe caa:

Ñaha tyivaa cha ta coo ca rayii chi, cucohon sehe ña.

Ta coo noo sehe ña. Ta cunañi cue: Emanuel.

Ta sivi cuan cuñi chi catyí: “Nyoo nyaá ra chihin yo.” Catyí ángel cuan chi ra José chichi ñumahna.

²⁴ Cuhva cha nducachí iñi ra José, sacuvi ra tari cuhva catyí ángel cuan chi ra. Ta quehęn ra chi cu María vatyi cuví ña ñasihi ra.

²⁵ Soco ña chiyō ra chihin ña cha numi ri. Nyacua nya cha yaha cacü sehe ña. Ta sacunañi ra chi cue: Jesús.

2

Nu cuahan coyo ra chiñi tuñi cua nyehe ra nu cacü ra Jesús

¹ Cacü ra Jesús noo ñuu cha nañi Belén. Ta ñuu cuan nyaá chi nu cuví Judea. Ta rey Judea cuan nañi ra Herodes. Tyicuan ta chaq coyo suhva ra nya ñuu Jerusalén. Quichí coyo ra ityi nu caña ñanyii. Ta ra cachiñi tuñi xaan cacuvi ra.

² Ta candaca tuhun ra chi ñáyivi tyehe caa:

—¿Nya nyaá ra cuví rey cuenda ñu Israel? Vatyi ityi nu caña ñanyii nyehe ndi tiño cha chahā cuenda tyi cacü ra ityi ihya. Ta vachi ndi vachi sacahnu ndi chi ra —cacatyí ra.

³ Ta quivi cha chito rey Herodes tuhun cuan cutoyoño cuñi ra. Ta tyicuan caa tucu tandihí ñáyivi ñuu Jerusalén cuan.

⁴ Tyicuan ta cana ra Herodes chi tandihí ra cacuvi nuu chi tata sutu ta ra casacuahá ley vehe ñuhu. Ta ndaca tuhun ra chi ra, nya maa maa tahán chi cacu ra Cristo.

⁵ Ta canacahan ra cuan ta cacatyí ra tyehe caa:

—Ñuu Belén ityi Judea, yucuan tahán chi cacu ra vatyí tyehe caa catyaa ra profeta Nyoo nu tutu ta cha naha:

⁶ Ta yoho ñuu Belén ityi Judá, vasi ñuu luhlu ri cuvún cha nuu ñuu nahnu ca iyó ityi Judá nu nyaún.

Soco cahnu ca cucuvun vatyí Belén chiña cucacu minoo ra cunyaca ñaha.

Ta cusaha cumi ra chi ñu Israel ñáyivi cuende.

Tyicuan caa catyí nu tutu Nyoo, —cacatyí ra cuan chi ra Herodes.

⁷ Tyicuan ta cana xehe ra Herodes chi ra chiñi tuñi cuan, ta ndaca tuhun ra chi ra ñáá cuhva ta ñáá quivi caña tiño cuan.

⁸ Tyicuan ta tachí ra chi ra nya ñuu Belén, ta catyí ra chi ra:

—Cuahan ndo, ta nducu tuhun vaha ndo tuhun cha lee cuan. Ta tatu nañihi ndo chi cue, ta quichi catyí ndo chii, tacuhva vatyí cuhun tucu yuhu cusacahni chi cue —catyí ra Herodes chi ra.

⁹ Cha yaha cachiñi ra chiñi tuñi cuan cha catyí ra Herodes, caquehen ra ityi ta cuahan coyo ra. Ta tiño cha canyehé ra ityi nu cañá ñanyii cuan, cuahan ti ityi nuu ra. Ta chicutiñi ti maa maa siqui nu catuvi cha lee cuan.

¹⁰ Ta cuhva cha canyehé ra chiñi tuñi cuan tyi chicutiñi tiño cuan, siñ xaan cacuñi ra.

¹¹ Ta caquihvi ra chichi vehe nu catuvi cha lee cuan. Ta cananyehé ra chi cue chihin cu María sihi cue. Ta chicutiñi chiti ra vatyí sacahnu ra chi cue. Tyicuan ta canuña ra yuhu caja cha canyisó ra. Ta catava ra regalo cha cuví xuhun cuahan, ta cutu vixi chahán, ta ndutya vixi chahán cha nañi mirra. Ta cachaha ra chi cue.

¹² Yaha cuan ta catahan ra ñumahna ta cutuñi iñi ra vatyí ña tahán chi canayaha ra ityi nu nyaá ra Herodes, yucuan chaha siñ ca ityi cuanuhu coyo ra.

Nu chinq xehe ra José ta cu María chihin cha lee nya Egipto

¹³ Cha yaha cuahan coyo ra chiñi tuñi cuan, tyicuan ta noo ángel Sutu Mañi yo tuví nuu ra José chichi ñumahna. Ta catyí ra chi ra:

—Ndicuita, quehen chi ra lee ihya, ta chi sihi ra, ta cuhun ndo nya Egipto. Ta yucuan cunyaa ndo nyacua nya sacote chi ndo.

Vatyí ra Herodes cunanducu ra chi cha lee ihya vatyí cahñi ra chi cue.

¹⁴ Tyicuan ta ndicuita ra José cha cuaa cuan. Ta quehen ra chi cha lee cuan ta chi sihi cue. Ta cuahan ñu nya Egipto.

¹⁵ Ta yucuan chinyaa ñu nyacua nya cha chihí ra Herodes. Tyehe caa cuví tacuhva na chino cava tuhun cahán Nyoo cha tyaa ra profeta ta cha naha. Tyehe caa catyí ra: “Nya ñuu Egipto cané chi Sehi”, catyí ra.

Nu tachí ra Herodes na cahñi ra chi ra cuatyaa

¹⁶ Cha tuví iñi ra Herodes vatyí ra cachiñi tuñi cuan sandaví ñaha ra chi ra, nduxaan vavaha ra. Ta tachí ra tyiño na cacahñi ra chi ra cuatyaa cha iyó ñuu Belén cuan ta ndaha ñuu ñandihí, ra cuatyaa cha ni cacu nyacua nya cha uvi cuiya. Tyicuan caa sacuvi ra vatyí nandichí xiñi ra vatyí tyicuan tahan cuiya ra Jesús tari cuhva catyí ra chiñi tuñi cuan chi ra.

¹⁷ Tyicuan caa chinq cava tuhun cahán Nyoo cha tyaa ra Jeremias profeta Nyoo ta cha naha, ta catyí ra tyehe caa:

¹⁸ Tyacú noo ndusu ñuu Ramá, cha chacú chaa ñáyivi, ta iyo tahan ñu.

Ta ican cuvi ñáyivi tata cu Raquel, ñáyivi Israel, chacú chaa ñu cha cuenda sehe ñu.

Soco ña cuñi ñu cha naquehen ndahvi ñu chi ñu cha cuenda cha cachiñi sehe ñu, catyí chi nuu tutu Nyoo.

¹⁹ Soco cha yaha cha chihí ra Herodes, tyicuan ta tuví tucu noo ángel cha tachí Sutu Mañi yo nuu ra José nu quixí ra ñuu Egipto. Ta catyí ra chi ra:

²⁰ —Ndicuita ta quehen chi cha lee chiña, ta chi sihi cue. Ta cuanuhu ndo nya ñuu Israel, vatyí cha chihí ra nducu cahñi chi cue.

²¹ Tyicuan ta ndicuita ra José, ta quehen ra chi cha lee cuan ta chi sihi cue. Ta cuanuhu coyo ñu nya Israel.

²² Soco quivi chito ra José vatyí ra Arquelao cuví ra rey tyiño nuu sutu ra, ra Herodes, nya Judea, nayuhvi ra ta ña cuñi ra cuhun ra yucuan. Ta vatyí sacoto Nyoo chi ra chichi ñumahna, yucuan chaha cuanuhu ñu nya Galilea.

²³ Cha chaq ñu yucuan, cuahan ñu nya ñuu Nazaret, cua coo ñu. Ta yucuan chiyo ñu. Tyehe caa cuví tacuhva chino cava tuhun cha cahán Nyoo, cha catyaa ra profeta ta cha naha. Vatyí catyí ra tyí ra Jesús ra ñuu Nazaret cucunañi ra.

3

Ra Juan ra sacondutya chi ñáyivi cahán ra tuhun Nyoo chihin ñu
(Mt. 1.1-8; Lc. 3.1-9, 15-17; Jn. 1.19-28)

¹ Quiví cuan ra Juan ra sacondutyá chi ñáyivi cuahan ra noo chiqui ndii ityi Judea. Ta quichahá cahan ra tuhun Nyoo chihin ñu.

² Ta catyí ra:

—Ndü uvi iñi ndo cuatyí ndo vatyí cha yatyin nyaá Nyoo ra cua cunyaca ñaha añima yo.

³ Ican tuhun ra Juan ihya cuví cha tyaa ra Isaías ra cuví profeta Nyoo ta cha naha. Tyehe caa tyaa ra:

Chiñí yo cha caná chaa noo ra noo nu chiqui ndii ta catyí ra:

“Tari sanduvahá ndo noo ityi, tyicuan caa sanduvaha ndo añima ndo, vatyí cua quichí Sutu Mañi yo.

Nuña ndo noo ityi ndoo chi ra naquihvi ra añima ndo.”

⁴ Ta ra Juan ñihnoó ra sahma chingo chihin ixi camellu. Ta sincho ra, ñii cuví. Ta maa maa ri pinchi chachí ra ta tyañuñu cuhu chihí ra.

⁵ Ñáyivi ñuu Jerusalén ta tandihí ñu ñuu cha nyicú Judea, ta ñu ca iyó yatyin ri ityi yuvi cahnu Jordán cuan, quichi coyo ñu, quichí tyasoho ñu tuhun cahán ra.

⁶ Ta cha yahá nahma ñu cuatyí ñu, ra Juan sacondutyá ra chi ñu yuvi cahnu Jordán cuan.

⁷ Soco ra Juan nyehe ra vatyí cuaha xaan ra fariseo, ra quichahá xaan ley vehe ñuhu, ta cuaha xaan ra saduceo, caquichí coyo ra vatyí condutya ra. Ta catyí ra chi ra:

—jNyoho, tari noo tata coo xaan cuví ndo! ¿Yóo cha sacoto chí ndo vatyí chihin cha condutya ri ndo ta ma tachi tuñi ca Nyoo chí ndo? Ña ndicha.

⁸ Coo ndo noo cha quetuví vaha tyi ndicha cha ndu uvi iñi ndo cuatyí ndo.

⁹ Ta ma cuyaa ndo catyí ndo vatyí tata ra Abraham vachi ndo. Vatyí nyacua nya chihin yuu ihya ta cuví savaha Nyoo ñáyivi tata ra Abraham.

¹⁰ Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñí Nyoo. Ta yutun cha ña chahá chiti, cahnya ñáyivi chí tun. Ta cahmí ñu chí tun. Tyicuan caa tucu nyoho, cuhun ndo nu cayú ñuhu.

¹¹ Cha ndicha vatyí yuhu sacondutyé chí ñáyivi chihin ndutya, tari noo seña vatyí cha ndü uvi iñi ñu cuatyí ñu. Soco cha yaha sacondutya yuhu chihin ndutya, vachí inga ra cusacondutya chí ñáyivi chihin Tatyí Ii Nyoo ta chihin ñuhú ihñi. Iyó ca tunyee iñi chí maa ra ta ñima ca yuhu. Ta ni cha cuise ndichan ra ta ña nañe, vatyí cahnu xaan ca ra cuví ra.

¹² Tari noo ra cha cua naquehen vaha trigo ta natyíhi vaha ra chichi yaca ta mihin cahmí ra, tyicuan caa cuví maa Sutu Mañi yo chihin yo. Tatu chinó iñi yo chí ra

cunaquehen vaha ra chí yo. Ta cunyicu yo chihin ra. Soco tatu ña chinó iñi yo chí ra cutyíhi ra chí yo anyaya nu cayu ñuhú cha ma ndahva ca maa —catyí ra Juan.

Nu condutya ra Jesús

(Mr. 1.9-11; Lc. 3.21-22)

¹³ Tyicuan ta quitá ra Jesús Galilea ta chaá ra yuvi cahnu Jordán nu ñohó ra Juan, vatyí cuñí ra cha sacondutya ra Juan chí ra.

¹⁴ Cha xihna ri ña cuñi ra Juan sacondutya ra chí ra, ta quichahá catyí ra chí ra Jesús tyehe caa:

—Yoho cuñún cha sacondutye chuun, soco ña tahán chí cha sacondutya yuhu chuun. Maun tahán chí sacondutyon chí —catyí ra.

¹⁵ Soco ra Jesús catyí ra chí ra:

—Cha vityin, na cuví chí cuhva catyí yuhu chuun. Vatyí cuñí chí cha sacuví yo tandihí cha cuñí Nyoo —catyí ra chí ra Juan. Tyicuan ta ndoo ra Juan vaha.

¹⁶ Cha yahá ri condutya ra Jesús ta quitá ra chichi ndutya. Ta nuña ri andiví, ta ra Jesús nyehe ra yoso caa vachi noó Tatyí Ii Nyoo, tari noo paloma, ta chaá chí siqui ra.

¹⁷ Tyicuan ta tyacu noo ndusu ityi andiví, ta catyí chí tyehe caa:

—Ican ra ihya cuví Sehi, ra cuñí xain chí. Ta sii xaan cuñí chihin ra —catyí ndusu cuan.

4

Nu nducú nyehe cuihna chí ra Jesús

(Mr. 1.12-13; Lc. 4.1-13)

¹ Tyicuan ta Tatyí Ii Nyoo chinyacá chí ra Jesús noo chiqui ndii, tacuhva nducu nyehe cuihna chí ra.

² Ña chachí ra uvi xico quiví ta uvi xico ñuu. Ta yahá cuan ta chaá soco chí ra.

³ Tyicuan ta tuhva cuihna chí ra, vatyí cuñí ra nducu nyehe ra chí ra. Ta catyí ra chí ra:

—Tatu ndicha cha Sehe Nyoo cuví chuun, sananduvi pan yuu ihya —catyí cuihna chí ra Jesús.

⁴ Soco ra Jesús nacahan ra ta catyí ra:

—Tuhun Nyoo catyí chí tyehe caa: “Ñima chihin cha cachi ri ñáyivi ta conyito ñu. Conyito tucu añima ñu chihin tuhun cahán Nyoo” —catyí ra Jesús chí cuihna cuan.

⁵ Tyicuan ta chinyacá cuihna cuan chí ra Jesús nya ñuu Jerusalén. Ta sandaa cuan chí ra xiñi vehe ñuhu cahnu cuan.

⁶ Ta catyí cuan chí ra:

—Tatu ndicha cha Sehe Nyoo cuvún, sandupehla nyacua nya nu sucun ihya ta nyacua nya nu ñuhú. Vatyí nyaá nu catyí chí nu tutu Nyoo tyehe caa: “Nyoo cusaquichi ra ángel, quichi saha cuenda chuun. Cunaquehen ra chuun chihin

ndaha ra ta ma cuhva ra cha taxin chahun chihin yuu” —catyí cuihna cuan chi ra.

⁷ Ta nacahan ra Jesús ta catyí ra:
—Soco catyí tucu chi nu tutu Nyoo tyehe caa: “Ma nducu nyehun chi Sutu Mañi yo Nyoo” —catyí ra Jesús chi cuihna.

⁸ Tyicuan ta chinyaca tucu cuihna cuan chi ra noo yucu sucun. Ta sañaha cuan tandihi cha cahnu cuví nu nyacá ñaha rey ta ra cuví tyiño chi ñáyivi iyó síqui ñuhu ñáyivi.

⁹ Ta catyí cuihna cuan chi ra tyehe caa:
—Yuhu cuhve tandihi maa ihya chuun, tatu yoho ta cuiñi chitun nui ta sacahnun chii —catyí cuan chi ra.

¹⁰ Tyicuan ta nacahan ra Jesús ta catyí ra chi cuihna cuan:

—Canyaha chuun nui, yoho cuihna.
Vatyí tuhun cahan Nyoo nyaá chi nu tutu ta catyí chi tyehe caa: “Noo ri chi maa Nyoo sacahnu yo. Ta in ri chi maa ra quichaha yo.”

¹¹ Tyicuan ta cuahan cuihna cuan, ta ndoo ra Jesús, ta cha coyo ángel ta tyinyee ra chi ra.

Nu quichaha saha tyiño ra Jesús ñuu cha nyicú ityi Galilea
(Mr. 1.14-15; Lc. 4.14-15)

¹² Quiví cha chito ra Jesús vatyí ra Juan ñohó ra vehe caa, cuahan ra nya Galilea.

¹³ Soco ña ndoo ra ñuu Nazaret, nu chahnú ra. Cuahan ra cua coo ra nya ñuu Capernaum, noo ñuu cha nyaá yatyin ri yuhu miñi, cha nyaá yatyin ñuhú cuenda ra Zabulón chihin ñuhú ra Neftalí.

¹⁴ Tyehe caa cuví tacuhva chino cava tuhun cha tyaá ra Isaías nu tutu Nyoo ta cha naha. Catyí chi tyehe caa:

¹⁵ Ñuhú ra Zabulón ta ñuhú ra Neftalí cha nyaá yuhu miñi inga chiyo yuvi cahnu Jordán, cha cuví Galilea nu iyó ñu ñima ñu Israel cuví.

¹⁶ Chinyicu añima ñu nu ñaa iñi vatyí chinyaca ñaha ra ña vaha chi ñu chihin tuhun chihi, soco sandundichín ñuhu Sutu Mañi yo añima ñu nu nyicú ñu, catyí ra Isaías.

¹⁷ Nyacua nya quivi cuan, ta quichaha cahan ra Jesús tuhun Nyoo chihin ñáyivi, ta catyí ra chi ñu:

—Ndú uvi iñi ndo cuatyí ndo vatyí yatyin ri nyaá Nyoo ra cua cunyaca ñaha añima ndo —catyí ra Jesús chi ñáyivi.

Nu cana ra Jesús chi cumi tahan ra catiñ tiyaca
(Mr. 1.16-20; Lc. 5.1-11)

¹⁸ Ra Jesús chicá noo ra yuhu miñi cha nañi Tyañuhu Galilea cuan. Ta nanyehé ra chi uvi tahan ra chihin yañi ra, ra Simón cha nañi tucu Pedro, ta ra Andrés. Ra catiñ

tiyaca cacuví ra. Ta cacañi ra yuhva ra nu ndutya.

¹⁹ Tyicuan ta quichaha catyí ra Jesús chi ninduvi ra tyehe caa:

—Cunyicon ndo chii. Ta yuhu cusacuvi vatyí tari ñihí ndo tiyaca, tyicuan caa cuñihi ndo anima ñáyivi (ta cutava ndo chi ñu nu quiñi caa na quihvi ñu cuenda Nyoo) —catyí ra Jesús chi ra.

²⁰ Caa cuhva ri cuan casandoo ra yuhva ra ta cuahan coyo ra chihin ra Jesús.

²¹ Chiin ri ca chicá ra Jesús ityi nuu ca ta nanyehé ra chi uvi ca ra chihin yañi ra, ra Jacobo ta ra Juan. Sehe ra Zebedeo cacuví chi ra. Canyicú ra chichi noo canoa chihin sutu ra canaquicú ra yuhva ra. Ta cana ra Jesús chi ra.

²² Ta caa cuhva ri cuan casandoo ra canoa cuan ta chi sutu ra, ta cuahan coyo ra chihin ra.

Nu sañaha ra Jesús chi cuaha ñáyivi
(Lc. 6.17-19)

²³ Cuahan ra Jesús chicá noo ra tandihi ñuu cha nyicú Galilea sañaha ra chichi vehe ñuhu tahan tahan ñuu. Cahan ra tuhun vaha yoso caa nyacá ñaha Nyoo añima yo. Ta sanduvaha ra chi ñu cuhvi chihin tandihi ri nuu cuehe cha iyó chi ñu.

²⁴ Cachitó tandihi ñáyivi ñuu cha nyicú Siria tuhun ra Jesús. Ta quichi nyaca ñu tandihi ñu cuhvi chi ra: tandihi ñu sün sün cuehe tahan. Ta suhva ñu yihí tatyí ña vaha chi ñu. Ta yihí ñu, yihí cuehe chihi tañi chi ñu. Ta yihí ñu ña cuví nacanda ñu. Ta ra Jesús sanduvaha ra chi tandihi ñu.

²⁵ Cuaha xaan ñáyivi nyicón chi ra Jesús: ñáyivi iyó ñuu cha nyicú Galilea, ñáyivi iyó ndi uchi ñuu Decápolis, ñáyivi iyó ñuu cha nyicú Judea, ta ñáyivi iyó inga chiyo yuvi cahnu Jordán ñandihí.

5

Nu cahan ra Jesús nuu ñáyivi nu chiqui
(Lc. 6.20-23)

¹ Cuhva cha nyehé ra Jesús tyi cuaha xaan ñáyivi, ndaa ra noo nuu yucu. Ta chicunyaá ra yucuan. Tyicuan ta ñu nyicón chi ra chicunyicu ñu nicachico nu nyaá ra.

² Tyicuan ta quichaha sañaha ra Jesús chi ñu tyehe caa:

³ —Tandihí ri ñu cha chitó vatyí chiñuhú Nyoo chí ñu, sñi xaan cucuvi chí ñu, vatyí tahan chí vatyí cunyaca ñaha Nyoo añima ñu.

⁴ Ta tandihí ri ñu nducuihya iñi vityin cha catyí cuatyí ñu, sñi xaan cucuvi chí ñu. Vatyí cusanaa Nyoo cha cuihya iñi ñu.

⁵ Tandihí ri ñu cha ña cahnu sahá chí, sñi xaan cucuvi chí ñu, vatyí cuquehen cuenda ñu ñuhu ñáyivi cha catyí Nyoo tyi cuhva ra chí ñu.

6 "Ta tandihí ri ñu cuñí xaan sacuvi cuhva catyí Nyoo, sîi xaan cucuvi chi ñu, vatyí Nyoo cutyinyee ra chi ñu tacuhva cuvi sacuvi ñu.

7 "Ta tandihí ri ñu cha iyó tucahnu iñi chi, sîi xaan cucuvi chi ñu, vatyí Nyoo, cucoo ticahnu iñi chi ra chihin ñu.

8 "Ta tandihí maa ñu ndundijí añima saha Nyoo, sîi xaan cucuvi chi ñu, vatyí ñu cuan, cunyehe ñu chi Nyoo.

9 "Ta ñu nducú cuhva cha coo taxi ri ñáyiví chihin Nyoo sîi xaan cucuvi chi ñu, vatyí Nyoo, cucatyí ra tyí sehe ra cuví chi ñu.

10 "Ta tandihí ñu cha tasi cuñí nyehe ñáyiví chi ñu cha catyí cha sacuví ñu tari cuhva catyí Nyoo, sîi xaan cuvi chi ñu, vatyí nyacá ñaha Nyoo añima ñu.

11 "Na cusîi cuñí ndo tatu cahán ña vaha ñáyiví siqui ndo. Ta sanyehé ñu tindoho chi ndo. Ta tavá ñu cuaha cuendu siqui ndo cha catyí yuhu.

12 Na cusîi cuñí ndo vatyí tatu tyehe caa sacuví ñu chihin ndo, sîi xaan cucuvi chi ndo, vatyí cahnu xaan ta tyaqúi xaan cha cutahan chi chi ndo, nachaa ndo andívi. Vatyí suri tyicuan caa chinyacuví tucu ñu cha ña vaha chihin ra cacuví profeta cuenda Nyoo ta cha naha.

Tatu sandihí yo cha chinó iñi yo chi Nyoo cuví yo tari ñîi cha ndihí cha uhva (Mr. 9.50; Lc. 14.34-35)

13 "Nyoho cha chinó iñi ndo chii, tari ñîi vaha cuví ndo. Soco tatu ñîi, ta ndihí cha uhva, ma sacu uhva ca chi cha cachi yo. Ña vaha ca ñîi cuan. Tyicuan ta sacuíta yo. Ta cuañi ñáyiví siqui chi.

Tatu vaha quichahá yo tuhun cahán Nyoo, cuví yo tari ñuhú cha sandundichín nu cuahan ñáyiví nu ñaa iñi

14 "Nyoho cuví ndo tari ñuhú cha sandundichín nu cuahan ñáyiví. Noo ñuu cha nyaá xiñi noo yucu, ma cuví quihi xehe. Tyicuan caa tahán chi cuví ndo.

15 Ta yori yo cha tyaá yo noo ñuhú tíma, ta tixehe yo chichi noo caja. Soco tyiso yo noo nu sucun vatyí sandichin chi chichi vehe tatu cua quihví ñáyiví, soco ndichin.

16 Ta tyicuan caa tahán chi sandundichin tucu nyoho chihin ñuhú Nyoo cha iyó añima ndo nu cuahan ñáyiví. Tyicuan ta nanyehé ñu cha vaha cha nyacuví ndo, ta sacahnu ñu chi Sutu yo Nyoo ra nyaá andívi.

Sañahá ra Jesús vatyí ñîi xaan sacuvi yo ta sañaha yo tandihí tuhun cha tachí Nyoo chí yo

17 "Ma cuñí ndo vatyí yuhu vachi sanai ley cha tachí Nyoo chí ra Moisés vatyí tyaá ra. Ta ní ri ña vachi sanai tuhun cha tyaá ra cacuví profeta cuenda Nyoo ta cha naha.

Yuhu ña vachi vatyí sanai yucuan. Soco vachi quichahi tandihí cha catyí tuhun cuan, ta sañahí ñáá cha cuñí chi catyí.

18 Cha ndicha catyí chí ndo vatyí cha ní ri ca cha iyó ca andívi chihin ñuhu ñáyiví ma naa ní chiin cha tyaá ra Moisés ta ra cacuví profeta Nyoo ta cha naha, nyacua nya yaha cuvi tandihí tari cuhva nyaá cha catyaá ra.

19 Yucuan chaha, tatu ña quichahá ñáyiví tuhun cha tachí Nyoo chí ñu, vasi noo tuhun luhlu ri cuví, ta tatu chasi ñu nu quichaha inga ñáyiví, luhlu xaan cucuvi ñu nu nyacá ñaha Nyoo. Soco ñu cha quichahá tandihí, ta sañahá tucu ñu chí inga ñáyiví. Ican ñu cuan cahnu xaan cucuvi ñu nu nyacá ñaha Nyoo.

20 Vatyí cuñí chí cha quichahá vaha ca ndo chí Nyoo ican saha ra sacuahá cuenda ley vehe ñuhu, ta ra cacuví fariseo. Yucuan ta cuví quihví ndo nu nyacá ñaha Nyoo.

Nu sañahá ra Jesús chí yo vatyí ma cuxaan yo chí ñáyiví

21 "Nyoho cha cuaha chaha chiñí ndo tuhun cha catyí Nyoo chí ñu chiyo ta cha naha. Catyí ra: "Ma cahñi ndo chí ñáyiví, vatyí tatu cahñi ndo ñáyiví, tahán chí cutuñi chí ndo."

22 Soco yuhu, catyí chí ndo, vatyí vasi cha cuxaan ri ndo chí noo ñáyiví, o vasi cha cahán uhvi ri ndo chí ñáyiví, o vasi cha cahán nyaá ri ndo chí ñáyiví, tahán chí cutuñi chí ndo. Ta siin ri saha cuenda ndo chí ndo coto cuhun ndo anyaya chihin cuatyí cuan.

23 "Ta yucuan chaha quívi cuahun vehe ñuhu, ta nyisón cha cucuhvon chí Nyoo, ta tatu cha nanyaun cha cua cuhvon ta nicohon iñun vatyí ña vaha iyó noo yañun chuhun.

24 Sandoo cha cua cuhvon chí Nyoo yucuan. Ta cuhun vatyí na coo vahun chihin yañun. Tyicuan ta ndichin nya vehe ñuhu, ta cuhva cuendon cha cua cuhvon chí Nyoo.

Sañahá ra Jesús vatyí cacan yo ticahnu iñi cuatyí yo coto cuhun yo anyaya (Lc. 12.57-59)

25 "Tatu yóo ra chicán cuatyí chahun, ta cuahan ra chuhun nya nu ra cuví tyiño, ñandacan ticahnu iñi chí ra ityí cuahun, coto cuhva cuenda ra chuun chí ra cuví tyiño. Ta ra cuví tyiño cua cuhva cuenda ra chuun chí policia. Ta policia cuan cutyihí ra chuun vehe caa.

26 Soco catyí chuun vatyí ma cuví quiton vehe caa cuan nyacua nya tyiyahvun tandihí cha tahán chí tyiyahvun.

Sañahá ra Jesús vatyí ní cha ndichi xiñi yo cha coo nonga ñusihi, o nonga rayí chí yo, ta ña vaha

27 Nyoho chiñi ndo tuhun vatyi catyi Nyoo ta cha naha vatyi nyoho cha iyó ñasihí ndo, ma coo inga ñasihí chi ndo.

28 Soco yuhu catyi chi ndo, vatyi nya nyoho cha nyehé ndo chi noo ñasihí ta quihvi iñi ndo chi ñu, catyi chi ndo vatyi chihin yucuan ri ta cha chicoo cuatyí ndo.

29-30 Vatyi tatu chiti nuu chiyo vahun sanacavá chuun nu cuatyí, vaha taxin ca tava ta sacuiton cañi. Vatyi vaha ca quihvun nu nyacá ñaha Nyoo chihin noo chiti nuun, ta ñima ca chihin cha ninduvi chiti nuun ta cuhun nu cayu ñuhú chichi anyaya. O tatu ndahun sanacavá chuun nu cuatyí, vaha taxin ca cahnya ta sacuiton cañi. Vatyi vaha ca cha quihvun nu nyacá ñaha Nyoo chihin cha luu ndahun, ta ñima ca cha naniun ta cuhun nu cayu ñuhú chichi anyaya.

Nu sañahá ra Jesús siqui ra sandoo ñasihí (Mt. 19.9; Mr. 10.11-12; Lc. 16.18)

31 Ta suri catyi tucu Nyoo chi ñáyivi chiyo ta cha naha vatyi yóo ra sandoo ñasihí, cuñi chi cuhva ra noo tutu cuenda cha sandoo ra chi ña.

32 Soco catyi yuhu chi ndo, ñahri ityi iyó chi noo ra cha sandoo ra chi ñasihí ra tatu ña natuvi ña chihin inga rayi. Vatyi tatu sandoo ra chi ña, ta ñima cha catyi cuatyí cuan, chicoo cuatyí ra nuu Nyoo. Ta siin ri saccoo ra cuatyí ña vatyi tatu quehen ña inga ra, chicoo cuatyí ña nuu Nyoo. Ta chicoo tucu cuatyí ra cha quehen chi ña cuan.

Ma catyi yo “chito vaha maa Nyoo” tacuhva chino iñi ñáyivi vatyi ndicha cha cahán yo

33 Ta chiñi tucu ndo, vatyi catyi tucu Nyoo chi ñu chiyo ta cha naha tyehe caa: “Tatu tyanaha ndo Nyoo tyi cusacuvi ndo noo cha cusacuvi ndo, tahan chi cha sacuvi ndo.”

34 Soco yuhu catyi chi ndo vatyi ma tyanaha ndo Nyoo tacuhva chino iñi ñáyivi vatyi ndicha cha cahán ndo. Ta ma tyanaha ndo ni tuhun andivi, vatyi yucuan nu nyaá maa Nyoo cuví.

35 Ta ni ri tuhun ñuhu ñáyivi ihya ma tyanaha ndo, vatyi yucuan cuví nu chañi Nyoo. Ta ni ri tuhun ñuu Jerusalén, ta ma tyanaha ndo, vatyi yucuan cuví ñuu Nyoo ra cuví Rey cha cahnu ca.

36 Ta ni ri tuhun xiñi ndo, ta ma tyanaha ndo, vatyi ma cuví sanducuichin ndo ni noo ixi xiñi ndo. Ta ni ma cuví sandutoon tucu ndo.

37 “Ican” catyi ndo, tatu ican. Soco tatu ñima, “ñima”, catyi ndo. Ta ma tyanaha ndo Nyoo vatyi ra ña vaha tyiyuhú chi ndo cuví cuan.

Nu sañahá ra Jesús vatyi tatu sacuvi ñáyivi cha ña vaha chihin yo, na sacuvi yo cha vaha chihin ñu (Lc. 6.29-30)

38 Ta chiñi tucu ndo cha catyi tuhun cha tyaa ra Moisés ta cha naha: “Vatyi tatu noo ñáyivi cañi ñu nuu ndo, ta tahvi noo noho ndo, o tivi noo chiti nuu ndo, o nya chi ndo sañicuehe ñu, tahan chi vatyi sañicuehe tucu ñáyivi chi maa ñu, tari cuhva cha sañicuehe ñu chi ndo.”

39 Soco yuhu catyi chi ndo, vatyi ma nasacuvi ndo cha ña vaha cha nyacuví ñu tasi iñi chi ndo. Vatyi tatu yóo cha cañi iin chiyo xitin ndo, ma nduxaan ndo chi ñu. Soco cuhva tucu ndo inga chiyo xitin ndo na cañi ñu.

40 O tatu chicán ñu cuatyí chaha ndo, ta cuñi ñu tinyaa ñu noo camisa ndo, ma cuxaan ndo chi ñu. Soco cuhva ndihi ndo chaqueta ndo chi ñu.

41 O tatu yóo cha catyi chi ndo na cuiso ndo cha chii ñu noo kilómetro, cuiso ndo uvi kilómetro.

42 Tatu yóo ñu chicán tumañi iñi chi ndo, cuhva ndo chi ñu. Ma catyi ndo cha ma saha ndo tumañi iñi cuan.

Na cuñi yo chi ñu xaan iñi chi yo (Lc. 6.27-28, 32-36)

43 Ta chiñi tucu ndo tuhun cha catyi ñu chiyo ta cha naha vatyi cuñi ndo chi ra tahan ndo. Ta chi ra xaan iñi chi ndo quihí tisihi iñi ndo chi ra.

44 Soco yuhu catyi chi ndo, cuñi ndo chi ñáyivi xaan iñi chi ndo. Ta sacuvi ndo cha vaha chihin ñáyivi cahán chi ndo, ta chi ñu ña cuñi nyehe chi ndo. Ta caçan tahvi ndo chaha ñu quiñi nyacuvi chihin ndo ta sanyehé tindoho chi ndo.

45 Ta tyicuan caa sacuvi ndo tacuhva coto ñáyivi vatyi cuví ndo sehe Sutu yo ra nyaá andivi. Vatyi maa ra sacañá ra ñanyii, ta saccoo ra savi siqui tyiño sahá ñáyivi vaha ta ñáyivi ña vaha ñandihí.

46 Tatu nyoho ta cuñi ndo chi ñáyivi cha vaha iyó chihin ndo ta ña cuñi nyehe ndo chi ñáyivi xaan iñi chi ndo, ñahri cha vaha cuñihí ndo. Vatyi suri tyicuan caa nyacuví tucu ra catavá xuhun cuenda gobiernu ñuu Roma. Ta quiñi ca iyó ra cuan cuñi maa ndo.

47 O tatu chahá ndo nocumi chi ra tahan ri ndo, ñahri cha vaha xaan nyacuví ndo. Vatyi suri tyicuan caa sacuvi tucu ñáyivi ña ñohó nuu Nyoo.

48 Tari Sutu yo cha nyaá andivi maa maa ri cha vaha sacuvi ra, tyicuan caa nyoho maa maa ri cha vaha sacuvi ndo.

6

Nu sañahá ra Jesús yoso caa sacuvi yo tumañi iñi

¹ Saha ndo cuenda ta ma cuyaa ndo ñáa tumañi iñi sacuvi ndo chi ñáyivi. Vatyí tatu cuyaa ndo nuu ñáyivi, ñahri cuñihi ndo nuu Sutu yo ra nyaá andivi.

² Cuhva cha sahá ndo tumañi iñi, ma sacoto ndo chi inga ñáyivi vatyí sahá ndo tumañi iñi. Ma sacuvi ndo tari sacuví ra sahá tyi vaha ta chicá noo ra nuyahví ta chíchí vehe ñuhu. Sahá ra tumañi iñi tacuhva na catyí ñáyivi vatyí vaha xaan ñáyivi cuví ra. Soco yucuan ri ñihí ra cuan ta ñahri ca cuñihi ra nuu Nyoo.

³ Soco nya quívi sahá ndo tumañi iñi chi ñu ndahví, ma sacoto ndo ni chi ra tahan cahnu ndo.

⁴ Xehe ri sacuvi ndo, tacuhva cha ma coto ñáyivi. Tyicuan ta Sutu yo Nyoo nyehe ra cha sacuvi ndo tyicuan caa. Ta cuaha ca cha vaha cucuhva ra chi ndo.

Nu sañahá ra Jesús yoso caa cahan yo chihin Sutu yo Nyoo (Lc. 11.2-4)

⁵ Ta cuhva cha chicán tahvi ndo chi Nyoo, ma cacán tahvi ndo tari cuhva sacuví ñu savahá chii. Vatyí ñu cuan tahán iñi ñu cacán tahvi ñu chi Nyoo nu tuvi ñáyivi, tacuhva catyí ñáyivi vatyí vaha xaan ñáyivi cuví ñu, vaha xaan chinó iñi ñu chi Nyoo. Soco catyí chi ndo cha ndicha vatyí ñahri ca cuñihi ñu nuu Nyoo. Vatyí ñima cha ndicha sacuví ñu.

⁶ Soco nyoho ñáa quívi cacán tahvi ndo chi Nyoo, ma cacán tahvi ndo tacuhva nyehe ri ñáyivi chi ndo. Soco quíhvi ndo chíchí vehe ndo ta ñacasi ndo yuvehe ta çacan tahvi ndo chihin tandihi añima ndo. Ta noo tuhun ri maa Nyoo Sutu yo nyehe ra cha sacuvi ndo tyicuan caa vatyí nuu maa ra chicán tahvi ndo, ta ñima nuu ñáyivi. Ta cuaha ca cha vaha cucuhva ra chi ndo.

⁷ Cuhva cha cahán ndo chihin Nyoo ñima susuri tuhun cha ñima ri tuhun çahan ndo. Vatyí tyicuan caa sacuví ñu cha ñahri tuhun Nyoo caá añima. Cuñi maa ñu vatyí tyicuan caa ta cuñi Nyoo cha cahán ñu. Vatyí cuaha xaan chaha cahán ñu susuri maa tuhun cuan.

⁸ Ma sacuvi ndo tyicuan caa. Vatyí Nyoo cha chitó ra ñáa cha chiñuhú chi ndo, cha ni ri ca cha cumañi ca cacán ndo chi ra.

⁹ Yucuan chaha nyoho, tatu cua cacán tahvi ndo chi Nyoo, tyehé caa çatyí ndo: Sutu Mañi yuhu, yoho cha nyaún andivi. Sacahnú xaan ndi chuun.

¹⁰ Na quichí quívi cha nyaca ñahun ihya siqui ñuhu ñáyivi, tari nyacá ñahun andivi.

Na sacuvi ñáyivi ihya siqui ñuhu ñáyivi tandihi cuhva cuñi maun, tari cuhva cuví gloria.

¹¹ Cuhva cha cachi ndi tacuhva cha yaha ndi noo noo quívi.

¹² Saha tucahnu iñi chi ndi ñáa ndihi cha ña vaha nyacuví ndi, tari maa ndi sahá ndi ticahnu iñi chi ñu sataśi iñi chi ndi.

¹³ Ma cuhvon cha nducu nyehe ra ña vaha chi ndi, tacuhva ma sacuvi ndi cuatyí nuun. Soco maun cuví ra sacacú chi ndi ndaha ra ña vaha.

Vatyí maun cuví ra nyacá ñaha tandihi. Ta maun cuaha xaan ca tunyee iñi iyó chuun. Ta tahán chi vatyí sacahnú tandihi ñáyivi chuun tyicuan ri maa. Ta na cuví chi tyicuan caa.

Tyicuan caa cuhva tahán chi cacán tahvi ndo chi Nyoo.

¹⁴ Vatyí tatu nyoho ta sahá ndo ticahnu iñi chi ñu nyacuví cha ña vaha chihin ndo, tyicuan caa ta Sutu yo ra nyaá andivi, cusaha ra ticahnu iñi chi maa ndo.

¹⁵ Vatyí tatu ma saha ndo ticahnu iñi chi ñu nyacuví cha ña vaha chihin ndo, tyicuan caa tucu Sutu yo, ma saha ra ticahnu iñi cuatyí maa ndo —catyí ra Jesús.

Ñáa quívi ña chachí yo ta nanducú yo chi Nyoo, ma sacoto yo chi inga ñáyivi

¹⁶ Ta catyí tucu ra Jesús chi ñu chicá noo chihin ra:

—Quívi cha ña chachí ndo ta nanducú ndo chi Nyoo, ma cuhva nyehe ndo, tari ñu savahá chii. Vatyí cuñi ñu cha coto ñáyivi vatyí ña chachí ñu ta nanducú ñu chi Nyoo. Soco catyí chi ndo vatyí yucuan ri ñihi ñu. Ñahri ca cuñihi ñu nuu Nyoo.

¹⁷ Soco tatu nya quívi ña chachí ndo ta nanducú ndo chi Nyoo, ñacatya ndo nuu ndo. Ta ñacuaca ndo cuca xiñi ndo,

¹⁸ tacuhva vatyí ma tuvi iñi ñáyivi vatyí ña chachí ndo ta nanducú ndo chi Nyoo. Tyicuan ta noo tuhun maa Nyoo nyehe ra cha sacuví ndo cha xehe ri cuan. Ta cuaha ca cha vaha cua cuhva ra chi ndo chihin nuu ñáyivi.

Nu sañahá ra Jesús vatyí ma sacaya yo cha iyó siqui ñuhu ñáyivi (Lc. 12.33-34)

¹⁹ Ma sacaya ndo cha tyayii ihya ñáyivi. Vatyí coto tiví cha tyayii cuan. O cuví tucu quíhvi ra suhu, ta suhu ra tandihi cha tyayii ndo.

²⁰ Vaha taxin ca sacaya ndo cha vaha chi ndo nu nyaá Nyoo gloria. Vatyí nuu Nyoo ña ndihi cha vaha cuan. Vatyí ni ri ra suhu, ni quiti, yori cha sativi iyó yucuan.

²¹ Ta catyí chi ndo vatyi nu nyaá cha tyayii ndo, yucuan cuví nu nyaá xiñi ndo. Ta yucuan cunyaa añima ndo.

Tari sandichín chiti nuu yo chi yo tacuhva nyehe yo nu cuahan yo, tyicuan caa tucu sandundichín tuhun Nyoo añima yo (Lc. 11.34-36)

²² Chiti nuu ndo noo cha sandundichin ityi cuahan ndo cuví. Ta tyicuan caa tucu añima ndo, tatu iyó cha ndichin Nyoo, vaha ñáyiví cuví ndo.

²³ Soco tatu ña vaha chiti nuu ndo, ña ndichin nyehe ndo nu cuahan ndo. Tandihí ri ta ñaa iñi. Ta tyicuan caa tucu tatu ñahri cha ndichin Nyoo nyaá añima ndo, tari noo ra cuaa cuví ndo. Ña cuví nyehe ndo ityi vaha cha cuahan nu nyaá Nyoo.

Sañahá ra Jesús vatyi ma cuví quichaha yo chi Nyoo tatu cuñi xaan ca yo cha tyayii (Lc. 16.13)

²⁴ Noo musu ma cuví coo uvi chitoho ra. Vatyi musu cuan cuñi ca ra chi noo ra ta ñima ca chi inga ra. Ta quichahá ra chi noo ra, ta chi inga ra ma quichaha ra. Ta tyicuan caa tucu nyoho, ma cuví cuñi ndo chi Nyoo, ta suri cuhva cuan cuñi ndo cha tyayii.

Sañahá ra Jesús vatyi ma caca xaan iñi yo ñáa ndihi cha chiñuhú chi yo (Lc. 12.22-31)

²⁵ Yucuan chaha catyí chi ndo vatyi ma caca xaan iñi ndo yoso caa ñihi ndo cha cachi ndo ta cha coho ndo. Ni ma caca iñi ndo ñáa cha cuihno ndo. Vatyi yahvi ca nyaá añima ndo ta coño ñuhu ndo nuu Nyoo, ican saha cha cachi ndo ta cha cuihno ndo. Vatyi maa ra chahá ra ñayiví coo ndo. Ta ña yíi cuhva ra inga cha chiñuhú chi ndo ñandihí.

²⁶ Saha ndo cuenda chi saa. Ña savahá ti itu. Ta ña sahá tyiño ti. Ni ri ña naquehén vaha ti tyiño sahá ti chichi yaca. Soco Sutu yo Nyoo chahá ra cha cachi ti. ¿Atu ña yahvi ca nyaá nyoho nuu Nyoo ta ñima ca saa cuan?

²⁷ Ni ri maa chicá xaan xiñi ndo ma cuví sandusucun ndo ni chiin ca chi ndo.

²⁸ Ta tatu ni chiin cuan ña cuví chi ndo, ¿ñáa tuhun cha chicá xaan xiñi ndo tuhun sahna ndo? Saha ndo cuenda yoso caa iyó tu ita nu chiquí. Vatyi ña taví tun. Ta ni ña conó tun isa.

²⁹ Soco catyí chi ndo vatyi ni rey Salomón cha tyayii xaan cuví ra, socio ña cuví cuihno ra cha tyaquí, tari cha sacuihnó Nyoo chi tu ita cuan.

³⁰ Ta tu ita cuan tyaquí xaan ñihno tun suhva ri quiví ta yaha cuan ta cuna ityi tun ta cucayu tun chichi horno. Ta nyoho, vaha

ca cusacuihno Nyoo chi ndo. Soco chiin xaan chinó iñi ndo chi ra.

³¹ Yucuan chaha ma caca xaan xiñi ndo ta catyí ndo: “¿Ñáa cha cachi ndi, o ñáa cha coho ndi, o ñáa cha cuihno ndi?”

³² Vatyi ñáyiví cha ñahri tuhun Nyoo caá añima, chicá xaan xiñi ñu tuhun ihya. Soco nyoho ma caca iñi ndo tuhun cuan vatyi iyó noo Sutu ndo, ra nyaá andiví. Ta chitó ra ñáa ndihi cha chiñuhú chi ndo.

³³ Yucuan chaha, cunyaa xiñi ndo maa maa ri maa tuhun maa Nyoo. Ta nducu ndo cuhva cunyaca ñaha ra añima ndo. Ta sacuvi ndo tari cuhva cuñi maa ra. Ta tyicuan caa ñihi ndo tandihí cuii maa cha chiñuhú chi ndo.

³⁴ Tandihí quiví ta iyó tindoho chi ndo. Ma caca xiñi ndo tuhun tindoho cha vachi. Vatyi Nyoo nyaá ra chihin ndo.

7

Ma cahan yo cha caá inga ñáyiví (Lc. 6.37-38, 41-42)

¹ Ma cahan ndo cha caá inga ñáyiví. Tyicuan caa ta ma tiin Nyoo cuenda cha caá ndo.

² Vatyi tari cuhva cahán ndo cha caá inga ñu, tyicuan caa cuhva cutachi tuñi Nyoo chi ndo.

³ ¿Yoso caa cha cuví nyehun cuatyí luhlu ra yañun ta ña cuví nyehún cuatyí cahnu cha iyó chi maun?

⁴ Tatu chiti nuu maun yihí noo vitu cahnu, ¿yoso caa cuví catyun chi ra yañun: “Nyaca, na tave mihin lee cha yihí chiti nuun?”

⁵ Yoho cha savahún chuun, tava xihna vitu cahnu cha yihí chiti nuu maun, tyicuan ta cuví nyehe vahun mihin lee cha cutavon chiti nuu ra yañun.

⁶ Ma sañihí nuu cahan ndo tuhun Nyoo chihin ñu ña cuñi coto, vatyi coto cañi ñu chi ndo. Tari ina cha tiin vavaha chi ndo, tyicuan caa cuví ñu. Ta tari quini cha chaca chaha ti cha yahvi nyaá, tyicuan caa cahán ña vaha ñu siqui tuhun Nyoo.

Ma cundihñi yo cacan yo chi Nyoo, tyicuan ta cuhva ra chi yo (Lc. 11.9-13; 6.31)

⁷ Cacan ndo cha chiñuhú chi ndo chi Nyoo. Ta cuhva ra chi ndo. Nanducu ndo, ta nañihi ndo. Sacachan ndo yuvehe, ta nuña.

⁸ Vatyi tandihí ndo cha chicán ndo, ñihi ndo. Tatu nanducú ndo, nañihi ndo. Ta tatu sacachán ndo yuvehe, cunuña yuvehe.

⁹ Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chaha ndo noo yuu chi sehe ndo, tatu chicán ndotyin pan chi ndo.

¹⁰ Ta ña tuhvá ndo chaha ndo noo coo chi sehe ndo tatu chicán ndotyin noo tiyaca chi ndo.

¹¹ Nyoho cha quiñi iyó ndo soco chitó ndo yoso caa cuhva ndo cha vaha chi sehe ndo. Ta vihi ca Sutu yo, ra nyaá andívi. Cuaha ca cha vaha cuhva ra chi ndo tatu cacán ndo chi ra.

¹² Tari cuñí maa ndo cha cunyacuvi ñáyivi cha vaha chihin ndo, tyicuan caa cunyacuvi tucu maa ndo cha vaha chihin ñu. Vatyí tyicuan caa catyí tuhun cha tachí Nyoo, cha tyaq ra Moisés ta ra cacuví profeta Nyoo ta cha naha.

Tihin yuvehe ta cuiñi ityi cha cuahan nu nyaá Nyoo
(Lc. 13.24)

¹³ Ndúcu ndo cuhva quihvi ndo yuvehe tihin. Vatyí quehen yuvehe, ta quehen ityi cha cuahan nya nu cunaa ñáyivi anyaya. Ta cuaha xaan ñu cuahan ityi cuan.

¹⁴ Soco tihin yuvehe ta cuiñi ityi cha cuahan ñáyivi cha ma naa ca maa nu cucoo ñáyivi vaha. Soco suhva ri ñáyivi nañihí ityi cuan.

Chihin cha sacuví ri ñáyivi, ta nichón nuu yo chí ñu tatu ñu vaha o ñu ña vaha cuví ñu
(Lc. 6.43-44)

¹⁵ Saha ndo cuenda chí ra cuendu. Vatyí cacatyi ra vatyí cuenda Nyoo cahán ra. Soco ña ndicha. Vatyí vachí coyo ra tari noo mbee nu nyicú ndo. Sahá ra tyi ra vaha cacuví ra. Soco tari noo ñaña xaan cacuví ra.

¹⁶ Nyoho cuví nichón nuu ndo chí ra chihin cha nyacuví ra. Tari noo yutun ña vaha, tyicuan caa cacuví ra. Vatyí noo tuñiyaca ma cuhva tun mango, ta ni ri noo iñu nduhva ma cuví cuhva chí tichaha ndívi.

¹⁷ Ta tyicuan caa tucu tandíhi yutun vaha. Chahá tun chíti vaha. Ta tandíhi yutun ña vaha, chahá tun chíti ña vaha.

¹⁸ Ta yutun vaha, ma cuví cuhva tun chíti ña vaha. Ta ni ri yutun ña vaha ma cuví cuhva tun chíti vaha.

¹⁹ Ta tandíhi yutun cha ña chahá chíti vaha, cahnya yo chí tun. Ta cahmi yo chí tun.

²⁰ Ta tyicuan caa, chihin cha nyacuví ñáyivi cuví nichón nuu ndo chí ñu tatu ñu vaha cuví ñu, o ñu ña vaha cuví ñu.

Nu catyi ra Jesús vatyí ña tandíhi ñáyivi quihvi ñu nu nyacá ñaha Nyoo
(Lc. 13.25-27)

²¹ Ma tandíhi ñu cha catyí chíi: “Sutu Mañi yuhu, Sutu Mañi yuhu”, cuquihi ñu nu nyacá ñaha Nyoo gloria. Ñu sacuví tandíhi cha catyí maa Nyoo Suti, ícan ñu cuan cuquihi nu nyacá ñaha ra.

²² Quiñi cha cucutuñi chí ñáyivi, cuaha xaan ñu cucatyi ñu chí tyehe caa: “Sutu Mañi yuhu. Yuhu cahin tuhun maun chihin ñáyivi. Ta chihin sivun tave tatyí ña vaha cha yihí añima ñáyivi. Ta cuaha xaan milagru savahí chihin sivun”, cucatyi ñu chíi.

²³ Tyicuan ta yuhu cucatyi chí ñu: “Ña ñohó nui chí nyoho. Çanyaha ndo nu nyaí. Vatyí nyoho sacuví ndo maa maa ri cha ña vaha.”

Nu sañahá ra Jesús yoso caa cucuvi chí ñu quichahá ta ñu ña quichahá tuhun cahán ra
(Lc. 6.47-49; Mr. 1.22)

²⁴ Ihya catyí chí ndo, yóo cha chíñi tuhun cahin ta sacuví tari cuhva catyí; cuví ra tari noo ra chíñi tuñi cha savahá ra vehe ra siqui cava.

²⁵ Ta quichahá coon savi. Ta cama xaan yuvi ndutya yaha. Ta ñihi xaan caq tatyí. Soco ña cuví sanduva chí vehe cuan. Vatyí ñihi nanyaá siqui cava cuan.

²⁶ Soco yóo cha chíñi tuhun cahin, ta ña sacuví ra tari cuhva catyí; cuví ra tari noo ra tondo, cha savahá ra vehe ra nu ñiti.

²⁷ Ta chaq savi. Ta cama xaan yuvi ndutya yaha. Ta ñihi xaan caq tatyí. Ta vehe cuan tañi tyehe ri nduva —catyí ra Jesús chí ñu.

²⁸ Cuhva cha ndíhi cahan ra Jesús chihin ñáyivi, iyo xaan cuñi ñu tuhun cha sañahá ra.

²⁹ Vatyí sañahá ra tari noo ra cha nyacá ñaha. Ta ña sañahá ra tari ra sacuahá cuenda ley vehe ñuhu.

8

Nu sanduvahá ra Jesús chí noo ra cuhvi cha tyahyú coño
(Mr. 1.40-45; Lc. 5.12-16)

¹ Cuhva cha noq ra Jesús yucu cuan, cuaha ñáyivi nyicón chí ra.

² Ta chaq noo ra cha tyahyú coño, ta chicuñi chíti ra nuu ra, ta catyí ra chí ra:

—Sutu Mañi yuhu, tatu yoho ta cuñún, cuví sanduvahun chíi —catyí ra chí ra.

³ Tyicuan ta sanacaq ra Jesús ndaha ra ta tijn ra chí ra, ta catyí ra:

—Cuñi sanduvahun chuun. Ta na nduvahun vityin ri —catyí ra.

Ta caa cuhva ri cuan ta nduvahá nu tyahyú cuan.

⁴ Tyicuan ta quichaha catyí ra Jesús chí ra:

—Nyehe, yori chihin cahun tuhun. Soco cuqhan, ta sañahun chuun chí tata sutu, ta cuhva cuendon ofrenda cha catyí ra Moisés nu ley chahnu vatyí tacuhva coto ñu vatyí cha nduvahun.

Nu sanduvahá ra Jesús chi musu noo ra capitán

(Lc. 7.1-10)

⁵ Cuhva cha chaá ra Jesús Capernaum, noo capitán, ra ñuu Roma, chaá ra nu nyaá ra Jesús ta chacu ndahvi ra nuu ra,

⁶ ta catyí ra:

—Sutu Mañi yuhu, musi catuví ra nu cama. Cuhví ra. Ña cuví nducuita ra vatyí ñihi xaan tahán ra.

⁷ Ta catyí ra Jesús chi ra:

—Cuhun mai ta cusanduvahi chi ra —catyí ra chi ra.

⁸ Nacahan capitán cuan ta catyí ra:

—Sutu Mañi yuhu, ña nañé cha cuhun vehi; soco tacuhva catyí run, ta musi nduvaha ra.

⁹ Vatyí suri iyó ra nyacá ñaha chi mai. Ta iyó sindaro nyacá ñaha tucu mai. Ta tatu cha tave tyiño chi noo ra, cuhun ra. Ta tatu cane chi inga ra, quichi ra. Ta tatu cha tave tyiño chi musi, sacuvi ra.

¹⁰ Ta cha chiñi ra Jesús cha cahan ra, iyo xaan cuñi ra. Ta catyí ra chi ñu nyicón chi ra:

—Cha ndicha catyí chi ndo, vatyí ñuu cha nyicú nicahnu Israel, ta nañihi que ni noo ñáyivi cha chinó xaan iñi ñu tari chinó iñi ra ihya.

¹¹ Ta catyí chi ndo vatyí cuaha ñu inga ñuu cuquichi coyo ityi nu caña ñanyii, ta ityi nu quee ñanyii, ta cunyicu ñu cachí ñu chihin ra Abraham ta ra Isaac ta ra Jacob nya andivi.

¹² Ta ñu Israel cha tahán chi cuhun andivi, yihí ñu, ma cuhun ñu, vatyí cuhun ñu nu ñaa iñi ityi chata. Ta yucuan cucuacu chaá ñu ta cucahñi noho ñu —catyí ra Jesús chi ñu.

¹³ Tyicuan ta quichaha catyí ra chi capitán cuan tyehe caa:

—Cuahan, ta na cuví chi tari cuhva catyün vatyí chinó xaan iñun chii —catyí ra.

Ta suri cuhva cuan nduvahá musu ra.

Nu sanduvahá ra Jesús chi maha tyiso ra Pedro

(Mr. 1.29-31; Lc. 4.38-39)

¹⁴ Ta cha yahá cuan, chaá ra Jesús vehe ra Pedro. Ta nanyehé ra chi maha tyiso ra Pedro, catuví ña nu chito chihin cahñi.

¹⁵ Ta tün ra ndaha ña, ta quitá cahñi cuan chi ña. Ta ndicuitá ña, ta quichahá tyiñuhu ña chi ra.

Nu sanduvahá ra Jesús cuaha ñu cuhví
(Mr. 1.32-34; Lc. 4.40-41)

¹⁶ Ta cuhva cha cuaa cuan, quichj nyaca ñu cuaha xaan ñáyivi yihí tatyí ña vaha chi chi ra Jesús. Ta chihin noo ri tuhun cahan ra, tavá ñehe ra chi tatyí ña vaha cuan, ta sanduvahá ra chi tandihi ñu cuhvi.

¹⁷ Tyicuan caa cuví tacuhva vatyí na chino cava tari cuhva catyí ra profeta Isaías, quivi catyí ra tyehe caa: “Maa ra quehen ra cuehe cha yihí chi yo, ta tinyaa ra cha uhvi chi yo.”

¿Yoso chiquihí chi yo tatu cuñi yo cunyicon yo chi ra Jesús?

(Lc. 9.57-62)

¹⁸ Tyicuan ta nanyehé ra Jesús vatyí nicachico nu nyaá ra nyicú ñáyivi. Ta catyí ra chi ñu vatyí cuyaha ra inga chiyo miñi.

¹⁹ Tyicuan ta chaá noo ra sacuahe ley vehe ñuhu ta catyí ra chi ra:

—Maestro, cuñi cunyiquen chuun tandihi ri ityi nu cuhun —catyí ra.

²⁰ Ta ra Jesús catyí ra chi ra:

—Ñaña, iyó vehe ti, ta saa cha chicó nu tatyí, iyó taka ti. Soco yuhu Rayi cha quichi nya gloria, ñahri vehi ta ni ri nu cava xiñi ta ñahri —catyí ra.

²¹ Inga tucu ra chicá noo chihin ra catyí ra chi ra:

—Tata, cuhva na cuhun xihne cutyihí chi suti chichi ñuhú, tyicuan ta quichi ta cunyiquen chuun —catyí ra.

²² Ta catyí ra Jesús chi ra:

—Ñaha yoho vatyí cunyicon chii. Saña chi ñu ña ñohó nuu chi Nyoo, na tyihí maa ñu chi tahan ñu chichi ñuhú —catyí ra.

Nu sacutaxín ra Jesús tatyí xaan

(Mr. 4.35-41; Lc. 8.22-25)

²³ Tyicuan ta quihvi ra chichi canoa, ta ra cachicá noo chihin ra, cuahan coyo ra chihin ra.

²⁴ Ta chaá noo tatyí ñihi xaan nu miñi cuan, ta nyacua chasi ndutya cuan canoa ra soco maa ra Jesús quixí ra.

²⁵ Ta ra cachicá noo chihin ra sandoyó ra chi ra, ta cacatyí ra:

—¡Sutu Mañi yuhu, sacacu chi yo, vatyí cuñi cunaa yo!

²⁶ Ta catyí ra Jesús chi ra:

—¿Ñáá tuhun cha yuhví xaan ndo? ¡Nyoho chiin xaan chinó iñi ndo chii!

Tyicuan ta nacandá ra ta sacutaxín ra tatyí nu miñi cuan, ta tandihi cutaxín.

²⁷ Ta iyo xaan cacuñi ra cuan ta cacatyí ra:

—¿Yóó ra cuví ra ihya? Vatyí nyacua nya tatyí ta nyacua nya ndutya ta quichahá chi ra —catyí ra.

Nu nduvahá uvi ra ñuu Gadara ra cayihí tatyí ña vaha chi

(Mr. 5.1-20; Lc. 8.26-39)

²⁸ Tyicuan ta chaá coyo ra inga chiyo miñi cha nyaá ñuhú cha nañí Gadara. Ta chaá coyo uvi tahan ra yihí tatyí ña vaha chii. Ta nu ñaña caquitá coyo ra cuan. Xaan vavaha ra, ta yori maa cuví yaha ityi cuan.

²⁹ Ta canachaá ra, ta cacatyí ra:

—¿Ñáá cha cuñún chihin ndi, yoho Jesús Sehe Nyoo? ¿Atu vachun vachi sanyehun tindoho chi ndi cha ni cumañi ca chaa quivi? —cacatyí ra cuan.

³⁰ Ta yatyin ri cuan nyicú cuaha quini cachachí ti.

³¹ Ta catyí tatyí ña vaha cuan chi ra Jesús: —Tatu cuatava ñehun chi ndi, cuhva cha quihvi ndi chichi quini cuan —cacatyí tatyí ña vaha cuan.

³² —Vaha. Quhvi ndo —catyí ra Jesús.

Ta caquita coyo tatyí ña vaha cuan, ta quihvi coyo chichi tandihi quini canyicú cuan. Ta tandihi quini cuan cachineo ti ta canacoyo ti noo xahva yuhu miñi cuan, ta chihj ti chihin ndutya cuan.

³³ Tyicuan ta ra casaha cumi chi ti cuan, cachineo vavaha ra cuahan coyo ra chichi ñuu, ta canacatyí ra tandihi cha cuví chi ra cayihí tatyí ña vaha cuan chi.

³⁴ Ta tandihi ñáyivi ñuu, chahan ñu chinyehé ñu chi ra Jesús, ta chacu ndahvi ñu nuu ra na quita ra yucuan.

9

Nu sanduvahá ra Jesús chi noo ra cuhvi cha ña cuví nacanda

(Mr. 2.1-12; Lc. 5.17-26)

¹ Tyicuan ta quihvi ra Jesús chichi canoa ta yaha sava ra inga chiyo miñi, ta nachaa ra nya ñuu nu iyó ra.

² Nu nyaá ra yucuan chinyaca ñáyivi chi noo ra cuhvi cha ña cuví nacanda catuvi ra nu chito. Ta cha nyehe ra Jesús vatyi chinó xaan iñi ñu chi ra, quichaha catyí ra chi ra cuhvi cuan:

—Sañi iñun, suti vatyi cha chicoo ticahnu iñi cuatyun —catyí ra chi ra.

³ Tyicuan ta quichaha chica xiñi suhva ra sacuahá ley vehe ñuhu cha nyicú yucuan tyehe caa: “Ra ihya chicoo cuatyí ra nu Nyoo chihin tuhun cahán ra”, cacticá xiñi ra.

⁴ Soco ra Jesús chitó ri ra ñáá cha cacticá xiñi ra, ta catyí ra chi ra:

—¿Ñáá tuhun cha ña vaha maa chicá xiñi ndo?

⁵ Vatyi ¿nya cha yii ca catyí yo: atu yii ca catyí yo “Cuatyun cha yaha ndachi”, o yii ca catyí yo: “Ndicuita ta çacon”?

⁶ Vaha. Cuasañahi chi ndo vatyi yuhu Rayi cha quichi nya gloria, iyó ityi chí siqui ñuhu ñayivi ihya vatyi sahi ticahnu iñi cuatyí —catyí ra Jesús.

Tyicuan ta catyí ra chi ra cuhvi cuan:

—Ndicuita, naquehen chiton ta cuanuhu nya vehun —catyí ra.

⁷ Tyicuan ta ndicuitá ra cuhvi cuan ta cuanuhú ra nya vehe ra.

⁸ Cuhva cha nyehe ñáyivi tuhun ihya, canayuhvi ñu. Ta casacahnú ñu chi Nyoo vatyi chaha ra tunyee iñi cuan chi ñáyivi.

Nu caná ra Jesús chi ra Mateo

(Mr. 2.13-17; Lc. 5.27-32)

⁹ Quita ra Jesús yucuan, ta nanyehé ra chi noo ra cha ñañi Mateo, nyaá ra quehen ra xuhun cha tyiyahvi ñu Israel chi gobiernu ñuu Roma. Ta catyí ra chi ra:

—Çoho chihin.

Tyicuan ta ndicuitá ra Mateo ta tyinyicon ra chi ra.

¹⁰ Tyicuan ta cuví chi noo chaha ra Jesús nyaá ra nya vehe ra Mateo, chachí ra. Ta cacha coyo cuaha ra catavá xuhun cuenda gobiernu ñuu Roma ta inga ca ra ca iyó cuatyí. Ta cachicunyicú tucu ra yucuan nu mesa iin ri chihin ra Jesús ta ra cacticá noo chihin ra.

¹¹ Soco cha canyehé ra fariseo cha tyicuan caa, candaca tuhun ra chi ra cacticá noo chihin ra Jesús, ta cacatyí ra:

—¿Ñáá tuhun cha vatyi ra sacuahá chi nyoho chachí ra chihin ra catavá xuhun cuenda ra nyacá ñaha nya Roma ta chihin ra ca iyó cuatyí? —cacatyí ra.

¹² Chiñi ra Jesús cha chahan ra, ta catyí ra chi ra:

—Ña chiñuhú doctor chi ñu iyó vaha, ñu ña cuhvi, soco chi ñu cuhvi chiñuhú ra.

¹³ Cuahan ndo ta cutuhva ndo cha cuñi chi catyí nu tutu Nyoo, nu catyí ra tyehe caa: “Yuhu cuñi vatyi cundahvi cuñi ndo chi ñáyivi, ta ñima ca cha cahñi ndo quiti ta cuhva cuenda ndo chii.” Ña vachi na cane chi ñu vaha, soco chi ñu iyó cuatyí, tacuhva na nasama ñu cuhva iyó ñu.

Nu catyí ra Jesús vatyi cha ni ri ca cha nyaá

ca ra chihin ra cacticá noo chihin ra ña tahán chi cha saha ra ayunar

(Mr. 2.18-20; Lc. 5.33-35)

¹⁴ Tyicuan ta ra canyicon chi ra Juan, ra sacondutya chi ñáyivi, catuhva ra chi ra Jesús ta candaca tuhun ra chi ra ta cacatyí ra:

—¿Ñáá tuhun cha nyuhu ta ra cacuvi fariseo, cuaha xaan chaha savaha ndi ayuno, ña chachí ndi ta nanducú ndi chi Nyoo? ¿Ta ra cacticá noo chihin yoho ñima tyicuan caa sacuvi ra? —cacatyí ra nyicon chi ra Juan.

¹⁵ Ta nacahan ra Jesús ta catyí ra:

—¿Atu cuví cunyaa cuihya ñu nyicú vico cha ni ri ca cha nyaá ra cua tandaha chihin ñu? Soco vachi quivi vatyi cucuachiyi ra nu nyicú ñu, tyicuan ndicha ta cusavaha ñu ayuno.

*Nu sañahá ra Jesús vatyi ña chachí tahan
tuhun chahnu cha iyó ñu chihin tuhun chaa
cha sañahá ra chí ñu*
(Mr. 2.21-22; Lc. 5.36-39)

¹⁶ Yori naquicú noo vestido chahnu
chihin noo sahma chaa vatyi coto cundiꝑi
nu naquicú ñu chihin cha chaa cuan, ta
cahnya chí cha chahnu cuan, ta nu tahnya
cuan nducahnu ca.

¹⁷ Ta ni ña tyihí yo vinu chaa chichi ñii
chahnu vatyi tatu sacuvi yo tyicuan caa,
tahnya ñii cuan, ta tari cunaa vinu, ta
cunaa ñii cuan. Yucuan chaha cuñí chí
tyihí yo vinu chaa chichi ñii chaa, ta
tyicuan ta nĩnduvi ta cusaha cuenda chí chí
tahan chí.

Sehe ra Jairo, ta ñaha cha tĩn sahma ra Jesús
(Mr. 5.21-43; Lc. 8.40-56)

¹⁸ Cha ni ri ca cha catyí ra Jesús tuhun
ihya, chaꝑ noo ra cuví nuu chí ñu Judea ta
chicuñí chíti ra nuu ra Jesús, ta catyí ra:

—Ni chíhĩ sehi, soco tatu yoho quichun
ta tyison ndahun síqui ña, cunandoto ña
—catyí ra chí ra Jesús.

¹⁹ Ndicuitá ra Jesús ta cuahan ra ñin ri
chihin ra ta ra cachicá noo chihin ra
ñandihí.

²⁰ Tyicuan ta noo ñaha, cuhví ña chihin
cha chati niñi ña. Ta cha uchi uvi cuiya
cuhví ña. Ta tuhva ña chí ra Jesús ityi chata
ra, ta tĩn ña yuhu sahma ra,

²¹ vatyi tyehe caa chicá xiñi ña: “Ma
chihin cha tĩn ri sahma ra ta nduvahi”,
chicá xiñi ña.

²² Soco ra Jesús nanyocavá ra nanyehe ra
chí ña, ta catyí ra chí ña:

—Nĩnduñi iñun síhi, cha nduvahun vatyi
chinó iñun —catyí ra.

Ta caa cuhva ri cuan ta nduvahá ña.

²³ Yahá cuan ta chaꝑ ra Jesús vehe ra cuví
nuu cuan, ta nyehe ra vatyi ra música
canyatú tuhva ra cha cuhun coyo ra nu
quihví cue chichi ñuhú. Ta ñáyivi cha nyicú
cuan chacú chaa ñu.

²⁴ Ta catyí ra chí ñu:

—Quita ndo ihya. Ñaha tyivaa ihya, ña
chihí ña, soco quixí ña —catyí ra.

Ta chacú cuehe ri ñáyivi nyehé ñu chí ra.

²⁵ Soco ra Jesús tavá ra chí ñu ityi chata
vehe, tyicuan ta quihví ra ta tĩn ra ndaha
ñaha tyivaa cuan, ta maa ña ndicuitá ña.

²⁶ Ta tandihí ityi cuan chityá tuhun cha
cuví yucuan.

Nu sanduvahá ra Jesús chí uvi ra cuaa

²⁷ Cuhva cha quitá ra Jesús yucuan, uvi
tahan ra cuaa canyicón chí ra suri caná
chaa ra ta cacatyí ra:

—jCundahvi cuñi chí ndi, yoho ra vachi
tata ra David! —cacatyí ra.

²⁸ Ta cuhva cha quihví ra Jesús chichi
vehe, ra cuaa cuan, catuhvá ra chí ra, ta

maa ra Jesús quichaha ndaca tuhun ra chí
ra:

—¿Atu chinó iñi nyoho vatyi cuví
sanduvahi chí ndo? —catyí ra.

Ta canacahan ra ta catyí ra:

—Ay, chinó iñi ndi chuun, Sutu Mañi
yuhu —cacatyí ra.

²⁹ Tyicuan ta tĩn ra Jesús chíti nuu ra ta
catyí ra chí ra:

—Na cuví maa yoso cuhva chinó iñi ndo
—catyí ra.

³⁰ Ta canduvahá chíti nuu ra. Ta catyí
vaha ra Jesús chí ra tyehe caa:

—Nĩndu ndo cuhva cha yori coto.

³¹ Soco quitá coyo cuiri ra ta quichaha
canacatyí ra cha sacuví ra Jesús chihin ra
chí ñáyivi tandihí ityi yucuan.

Nu sanduvahá ra Jesús chí noo ra ñihí

³² Cha ni ri ca cha caquitá coyo ra cucuaa
cuan, suhva ñáyivi quichí nyaca ñu chí noo
ra ñihí cha yihí noo tatyí ña vaha chí nu
nyaá ra Jesús.

³³ Ta caa cuhva ri cha tavá ñehe ra Jesús
tatyí ña vaha cuan, quichahá cuví cahan ra
cuan. Ta iyo xaan cuñi ñáyivi, ta catyí ñu:

—Ni noo chaha ta cuví ca cha tyehe caa
Israel Ihya —catyí ñu.

³⁴ Soco ra cacuvi fariseo, cacatyí ra:

—Ra ihya tavá ñehe ra tatyí ña vaha
chihin tunyee iñi chí cuihna ra cuví nuu
—catyí ra.

*Nu catyí ra Jesús vatyi ña cuaha maa ñu sahá
tyiño cuenda Nyoo iyó*

³⁵ Ra Jesús chahan ra tandihí ñuu sañahá
ra chí ñáyivi chíhí vehe ñuhu tahan tahan
ñuu. Cahán ra tuhun Nyoo yoso caa nyacá
ñaha Nyoo añima ñáyivi. Ta sanduvahá ra
tandihí nuu cuehe cha yihí ñu.

³⁶ Ta cha nanyehé ra chí ñáyivi, cundahvi
cuñi ra nyehé ra chí ñu, vatyi nyehé ñu
tĩndoho ta cuihya cuñi ñu, tari mbee quiti
cha yori sahá cumi chí.

³⁷ Tyicuan ta catyí ra chí ra cachicá noo
chihin ra tyehe caa:

—Cha ndicha, cuaha tyiño iyó, soco ra
sahá tyiño, ña cuaha ra.

³⁸ Yucuan chaha, caꝑan ndo chí chitoho
tyiño yucuan, na tachi ra chí ra saha tyiño
na sataca ra tyiño cuan.

10

*Nu cachí ra Jesús chí ndi uchi uvi ra caca
tyiño ra*

(Mr. 3.13-19; Lc. 6.12-16)

¹ Tyicuan ta caná ra Jesús chí ndi uchi uvi
ra chicá noo chihin ra ta chahá ra ityi chí ra
vatyi tava ñehe ra chí tatyí ña vaha cha yihí
añima ñáyivi, ta sanduvaha ra ndihí nuu
cuehe ta cha uhví ñandihí.

² Ican ihya cuví sivi ndi uchi uvi ra chicá tyiño ra: xihna ca, ra Simón, cha nañi tucu Pedro, ta yañi ra, ra Andrés, ra Jacobo ta yañi ra, ra Juan, sehe ra Zebedeo cacuví chi ra;

³ ta ra Felipe, ra Bartolomé, ra Tomás, ta ra Mateo ra tava xuhun cuenda gobiernu ñuu Roma, ra Jacobo sehe ra Alfeo, ra Lebeo cha nañi tucu Tadeo,

⁴ ta ra Simón cha yihí cuenda ityi ra cacuñi cahun cuatyi siqui gobiernu ñuu Roma cha nyacá ñaha chi ñu, ta ra Judas Iscariote, ra cha naxico tuhun chi ra Jesús.

Nu tachí ra Jesús chi ra cachicá noo chihin ra, na cucahan ra tuhun Nyoo
(Mr. 6.7-13; Lc. 9.1-6)

⁵ Ta tyehe caa tachí ra Jesús chi uchi uvi tahan ra cuan, ta catyi ra:

—Ma cahun ndo nu iyó ñu cha ñima ñu Israel cuví, ta ni ma quihvi ndo ñuu cha naxicu Samaria.

⁶ Cuahan ndo, soco nu nyicú mbee cha cuanaa cha cuví ñu ñuu Israel.

⁷ Cuahan ndo cucahan ndo tuhun vatyi cha chaá cha cunyaca ñaha Nyoo añima ñáyivi.

⁸ Sanduvaha ndo chi ñu cuhvi ñu tyahyú coño, ta ñu yihí inga cuehe chii. Sanandoto ndo ndiyi, tava ñehe ndo chi tatyí ña vaha cha yihí chi ñu. Nyoho, naquehén cuenda ndo tunyee iñi ihya chihin cha ñahri yahvi, ta cotyiño ndo soco ma quehen ndo yahvi.

⁹ Ma cuiso ndo ni noo xuhun, ni xuhun cuaan ni xuhun cuichin, ni xuhun cuaha.

¹⁰ Ma cuiso ndo ni yono cha cuenda cha caca ityi ndo. Noo ri camisa cha ñihnó ndo cahun chihin ndo. Ta ma cuiso ndo inga ityi ndichan, ni yutun ma tuvi ndo, vatyi ra sahá tyiño, iyó ityi chi ra cha coo yahvi ra.

¹¹ Cuhva cha chaa ndo noo ñuu, nducu ndo noo ñáyivi cachi iyó, ta ndogo ndo vehe ñu nyacua nya quita ndo ñuu cuan.

¹² Cuhva cha cua quihvi ndo noo vehe, cuhva ndo nocumi chi ñáyivi iyó vehe cuan. Ta catyi ndo chi ñu: Na coo cha taxi Nyoo añima ndo, catyi ndo chi ñu.

¹³ Ta tatu ñu ñuu cuan ta nacotó ñu tyi chihuhú cha taxi ri cuan chi ñu, cundoo cuan chihin ñu. Soco tatu ña nacotó ñu vatyi chihuhú cuan chi ñu, ma ndoo cuan chihin ñu.

¹⁴ Ta tatu ña cuñi ñu quehen cuenda ñu chi ndo, ta ni ña cuñi ñu cuiñi ñu tuhun cahán ndo, tyicuan ta quita ndo vehe yucuan, o ñuu yucuan, ta naquisí ndo ñiyaca chaha ndo.

¹⁵ Cha ndicha catyi chi ndo vatyi quivi cutuñi chi ñáyivi, ñihi ca cutachi tuñi Nyoo chi ñu cuan, ta ñima ca ñáyivi ñuu Sodoma ta ñuu Gomorra.

Nu sañahá chi ñáá ndihi tindoho cunyehe ñu chicá tyiño Nyoo

¹⁶ Nyehe ndo! Yuhu tachí chi ndo, tari mbee mahñu lobo. Quiyi saha ndo chi ndo, tari coo, soco masu saha ndo chi ndo tari paloma.

¹⁷ Saha ndo cuenda chi ndo vatyi ñáyivi cucuhva cuenda ñu chi ndo chi ra cuví tyiño, ta chichi vehe ñuhu cucañi ñu chi ndo.

¹⁸ Ta cha cuenda yuhu, nyacua cunyaca ñu chi ndo nuu gobiernu ta nuu rey. Ta tyicuan caa ta cuví cahan ndo tuhun nuu ra ta nuu ñu cha ñima ñu Israel cuví.

¹⁹ Soco tatu nacuhva cuenda ñu chi ndo chi ra cuví tyiño, ma caca xiñi ndo yoso caa cucahan ndo, vatyi tatu chaa cuhva cha cahan ndo, Nyoo cucuhva ra tuhun cha cucahan ndo.

²⁰ Vatyi ñima maa ndo cucahan, soco maa Tatyí Ii Sutu yo Nyoo cusacahan chi ndo.

²¹ Rayi cunaxico tuhun ra suri chi yañi ra tacuhva na cacahñi ra chi ra. Ta yihí ra cunaxico tuhun ra chi sehe ra. Ta yihí ñáyivi cunanuhu ñu siqui sutu ñu ta sihi ñu, ta cusacuví ñu, na cúvi ñu.

²² Tandihí ñáyivi, cucutasi cuñi nyehe ñu chi ndo cha catyi yuhu. Soco tatu ña ndu uvi iñi ndo chino iñi ndo chii, tyicuan ta cucacu añima ndo.

²³ Tatu chica nyicon ñu chi ndo noo ñuu, cono ri ndo inga ñuu. Vatyi cha ndicha catyi chi ndo ni cha ta ndihi ca cahan ndo tuhun Nyoo tandihí ñuu nu nyicu ñáyivi Israel ta yuhu Rayi cha quichi nya gloria cuquichi inga chaha.

²⁴ Ni noo ra cutuhvá, ña cahnu ca ra cuví ra ican saha ra sacuaaha chi ra. Ta ni noo musu, ña cahnu ca cuví ra ican saha chitoho ra.

²⁵ Ra cutuhva, cuñi chi ndoo ra vaha cha chaa ra cuví ra tari ra sacuaaha chi ra, ta musu tari chitoho ra. Tatu yuhu ra cuví chitoho vehe, catyi ñu chii vatyi Beelzebú, cuñna ra cuví nuu, cuví, suri tyicuan caa cucatyi tucu ñu chi ñáyivi cuende.

Yóo chi tahán chi cuyuhvi yo
(Lc. 12.2-7)

²⁶ Yucuan chaha ma yuhvi ndo chi ñáyivi, vatyi ni noo tuhun xehe ta cuñun, tyi ma natuvi. Ta ni ñahri cha ñohó xehe, ta cuñun tyi ma coto tandihí ñáyivi.

²⁷ Tandihí cha catyi chi ndo nu ñaa iñi, catyi nyoho nu ndichin. Ta tandihí cha catyi chi ndo nu xehe, çana chaa ndo nya xiñi vehe, na coto tandihí ñáyivi.

²⁸ Ma yuhvi ndo chi ñu चाहñi coño ñuhu yo, vatyi ma cuví cahñi ñu añima yo. Soco yuhvi ndo chi ra cuví sanaa coño ñuhu yo ta añima yo chichi anyaya ñandihí.

²⁹ ¿Atu ñima chihin noo xuhun luhlu ri, sata yo uvi tahan saa? Ican. Soco ni noo ti ña canacava ti nu ñuhú tatu ña catyí maa Nyoo Sutu yo.

³⁰ Vatyí nyacua nya ixi xiñi nyoho ta chitó Nyoo yoso tahan nyaá.

³¹ Ma yuhvi ndo. Nyoho, yahvi ca nyaá ndo ta ñima ca ticuítí saa.

Ma yuhvi yo cahan yo tuhun ra Jesucristo nuu ñáyivi
(Lc. 12.8-9)

³² Tandihí ñu cha cahán vaha tuhin nuu ñáyivi, yuhu tucu cucahan vahi cuenda ñu nuu Suti ra nyaá andivi.

³³ Soco ñu cahán nuu cahan tuhin, yuhu tucu ma cahin tuhin ñu nuu Suti ra nyaá andivi.

Cha cuenda ra Jesús cusin ñáyivi
(Lc. 12.51-53; 14.26-27)

³⁴ Ma cuñi ndo vatyí yuhu vachi cuhve cha taxi ri coo ndo siquí ñuhu ñáyivi ihya. Ña vachi cuhve cha taxi ri, soco cha cañi tahan ñáyivi.

³⁵ Vatyí sasiín chi ndo. Vatyí noo ra cuhun ra siquí sutu ra. Ta noo ña cuhun ña siquí sihi ña. Ta ñu cuví chono cucañi tahan ñu chihin tyiso ñu.

³⁶ Ta tyicuan caa suri ñáyivi chi ndo cucuví ñu ñu xaani iñi chi ndo.

³⁷ Ñu cha cuñi ca chi sutu o chi sihi ican saha chi yuhu, ña tahán chi cuví ñu ñu cuende. Ta ñu cuñi ca chi sehe, ican saha chi yuhu, ña tahán chi cuví ñu ñu cuende.

³⁸ Ta ñu cha ña cuñi nyehe tindoho ta cunyicon ñu chíi, ña tahán chi cuví ñu ñu cuende.

³⁹ Vatyí ñu ña cuñi nyehe tindoho cha cuenda yuhu, cunyehe ñu tindoho anyaya, soco ñu nyehé tindoho ta chahá ñáyivi cha catyí yuhu, cucacu aña ñu.

Yahvi cha tahán chi chí yo
(Mr. 9.41)

⁴⁰ Ñu quehén cuenda chi ndo, chi yuhu quehén cuenda ñu, ta ñu quehén cuenda chí yuhu, quehén cuenda ñu chí ra cha tachí chíi.

⁴¹ Ñu quehén cuenda noo ra profeta Nyoo cha cuenda vatyí cuenda Nyoo cahán ra, cuñihi ñu suri tahan yahvi cha cuñihi profeta cuan. Ta ñu quehén cuenda chí noo ra vaha cha cuenda tyí ra vaha cuví ra, suri tahán yahvi cha cuñihi ra vaha cuan cuñihi ñu.

⁴² Ta savahri ñu cha cuhva vasi noo vasu ndutya vichin coho ñu nyihí ihya cha cuenda cha nyicón ñu chíi, cuñihi ñu cha cucuhva Nyoo chí ñu —catyí ra Jesús.

11

Ra cha tachí ra Juan nu nyaá ra Jesús
(Lc. 7.18-35)

¹ Ndihi chahá ra Jesús tuhun chi uchi uvi ra chicá noo chihin ra, tyicuan ta quitá ra yucuan, vatyí cucahan ra tuhun Nyoo chihin ñáyivi cha iyó ñuu cha nyicú ityí cuan.

² Ta ra Juan nu ñohó ra vehe caa, ñihí ra tuhun cha sacuví ra Cristo. Tyicuan ta tachí ra chí uvi ra nyicón chí ra, cundaca tuhun ra noo tuhun chí ra Jesús. Ta cachaa coyo ra nu nyaá ra

³ ta cacatyí ra chí ra:

—¿Atu yoho cuvín ra Cristo cha tahán chí quichi sacacu chí ndi, o cuñi chí cha cuatu ndi chí inga ra? —cacatyí ra chí ra.

⁴ Nacahan ra Jesús ta catyí ra:

—Cuahan ndo ta catyí ndo chí ra Juan cha nyehé ndo, ta cha chíi ndo.

⁵ Nacatyí ndo chí ra yoso caa nanyehé ñu cuaa, yoso caa nacacá ñu coxo, ta ñu tyahyu coño yoso caa nduvahá ñu, ta yoso caa nacuíhi ñu soho, ta ñu ndiyí nandoto ñu, ta chihin ñu ndahvi cahán ndi tuhun Nyoo yoso caa sacacu ra aña ñu.

⁶ Sií xaani cuñi ñu ña chicá uvi iñi nyicón chíi.

⁷ Cuhva cha cuahan coyo ra, ra Jesús quichaha cahan ra tuhun ra Juan chihin ñáyivi, ta catyí ra:

—¿Ñáá cha chahan nyoho chinyehe ndo chiqui ndií cuan? ¿Atu chinyehe ndo noo ndoo cha naquisí tatyí? ¿Ñáá cha nyehe ndo?

⁸ ¿Atu nyehe ndo noo ra vaha ñihno?

Ñima. Nyoho chitó ndo vatyí ra ñihno vaha, nyaá ra vehe rey.

⁹ Tu tyicuan caa, ¿ñáá cha chahan ndo chí nyehe ndo? ¿Atu noo ra cuví profeta? Ican. Soco noo ra cha cahnú ca cuví ican saha noo profeta cuenda Nyoo.

¹⁰ Vatyí ican ra Juan ihya, cuví cha cahán tuhun nu tutu Nyoo tyehe caa: Yuhu cuví Nyoo ta tachí chí noo ra cahan tuhin ityí nuu nu cuhun.

Vatyí cucahan ra tuhun chihin ñáyivi nanasama ñu cuhva iyo ñu ta cuatu tuhva ñu quívi quichun.

¹¹ Cha ndicha catyí chí ndo, vatyí chíi chí tandihí ñáyivi, ni noo chaha ta coo ca noo ra cahnú ca cuví ican saha ra Juan ra sacondutí chí ñáyivi. Soco ra cha nyacá ñaha Nyoo aña, vasi cuví ra noo ra luhlu ca, soco cahnú ca ra ta ñima ca ra Juan.

¹² Nyacua nya quívi cha chaá ra Juan ta nya vityin, cuaha ñu ndachan sahá chíi nducú satívi ñu tuhun Nyoo, ña cuñi ñu cha cunyacá ñaha Nyoo aña ñáyivi.

¹³ Ra Moisés cahan ra tuhun yoso caa nyacá ñaha Nyoo aña ñáyivi, ta tyicuan

caa tucu tandihí ra profeta nyacua nya quiví quichí ra Juan.

¹⁴ Ta tatu cuñí nyoho chino iñi ndo tuhun cahín, catyí chí ndo vatyi profeta Elías cha tahan chí quichi, ra Juan cuví ra.

¹⁵ Yóó ñu cha cutuñi iñi, na tyasoho ñu tuhun cahín.

¹⁶ ¿Yóó chihin sandu inuu ri chí ñáyiví cha iyó tyembu ihya? Tari ra cuatyaa cuví ñu, vatyi chicunya ndotyin nuyahví nyasiqui ndotyin, ta canachaa ndotyin chí ra tahan ndotyin, ta catyí ndotyin tyehe caa:

¹⁷ “Tiví ndi flauta, soco ña chitá chaha ndo. Chitá ndi yaa cuihya soco ña chacu ndo.” Tyicuan caa tucu nyoho, ni noo cuhva ña tahán iñi ndo.

¹⁸ Vatyi quichí ra Juan, cha ña chachí ra ta ña chíhí ra, ta nyoho catyí ndo vatyi noo tatyí ña vaha yihí chí ra.

¹⁹ Yaha cuan ta quichí tucu yuhu Rayíi cha quichi nya gloria. Ta yuhu chachí ta chíhí tandihí, ta catyí ndo tyi ra cuahyí ra tuhvá chíhí cuví. Ta ña tahán iñi ndo cha cutahín chihin ra iyó cuatyí ta ra tavá xuhun. Soco vasi ni noo ndi ña naquehén cuenda ndo tuhun cahán ndi, soco Nyoo chahá ra cha chíhí tuñi ra chí ñu naquehén tuhun cahín ta tuhun cahán ra Juan, ta maa ñu cusañaha chí ndo vatyi vaha cha chíhí tuñi Nyoo —catyí ra Jesús.

Uvi ñuu nu ña tyasohó ñáyiví tuhun Nyoo (Lc. 10.13-15)

²⁰ Tyicuan ta quichaha cahan ra Jesús chí ñu ñuu nu sacuví ra cuaha milagru, vatyi ñáyiví cuan ña canasama maa ñu cuhva iyó ñu, ta catyí ra:

²¹ —¡Ndahvi nyoho, ñu ñuu Corazin!
¡Ndahvi nyoho ñu ñuu Betsaida! Vatyi nyehé ndo nyatu cahnu ta ña nasama ndo cuhva iyó ndo. Soco ñáyiví ñuu Tiro ta ñuu Sidón cha sanaq Nyoo ta cha naha cha cuenda cuatyí ñu ñahri nyatu cahnu nyehé ñu. Soco tyehe ta nyehé ñu nyatu cahnu quiví cuan tari cha nyehé nyoho vityin, tañi tyehe ri ndihví noo ñu sahma tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyi ndu uvi iñi ñu cuatyí ñu cuví cuan.

²² Soco catyí chí ndo vatyi quiví cutuñi chí nyoho nuu Nyoo, cahnu ca cha uhví cunyehe ndo ta ñima ca ñáyiví Tiro ta Sidón.

²³ Ta nyoho ñu ñuu Capernaum, cuñi maa ndo tyi cundaa ndo nya andiví, soco cunoo ndo nya nu nyicú ñu ndiyi. Vatyi tyehe ta cuví milagru ñuu Sodoma cuan, tahán cha cuví ñuu ndo, ñuu cuan coo ca nyacua nya vityin.

²⁴ Soco catyí chí ndo vatyi quiví cutuñi chí nyoho, yaha ca cunyehe ndo tindoho, ta ñima ca ñu ityí ñuu Sodoma cuan.

Cuhva ndo chí ndo chíi, ta cuhve cha nyitatu ndo, catyí ra Jesucristo (Lc. 10.21-22)

²⁵ Tyembu cuan catyí ra Jesús chí Nyoo tyehe caa:

—Sutu Mañi yuhu, Nyoo, ra nyacá ñaha andiví ta ñuhu ñayiví. Sacahni chuun vatyi sañahun tuhun maun chí ñu ñahri maa chitó. Ta tixehun tuhun maun chí ñu cha sahá tuhun tyi chitó xaan ta ñu chíhí tuñi ñandihí.

²⁶ Ndicha Sutu Mañi yuhu, vatyi tyicuan caa cuñi maun.

²⁷ Tyicuan ta catyí tucu ra:

—Suti nacuhva cuenda ra tandihí chíi. Yori maa ñohó nuu noo cha ndicha chíi, soco noo tuhun ri maa Suti ñohó nuu ra chíi. Ta yori ñohó nuu noo cha ndicha chí Suti, soco noo tuhun ri mai, cha cuví Sehe ra chíi, ñohó nui chí ra. Ta ñáyiví cha cuñi mai cha cohon nuu chí ra, ican ñu cuan caa cohon nuu chí ra.

²⁸ Tandihí nyoho cha chitatu ndo cha sahá tyiño ndo, ta chihin carga cha nyisó ndo, quíchi ndo nu nyaí, ta yuhu cuhve cha nyitatu ndo.

²⁹ Cuhva ndo cha cunyaca ñahi chí ndo ta cutuhva ndo cuhva iyó yuhu. Vatyi yuhu masu iñi ta cama iñi. Tyicuan caa ta ñihi ndo nu nyitatu añima ndo.

³⁰ Ña yíi cha cuhva ndo chí ndo cha cunyaca ñahi. Ta carga cha chahí chí ndo, ñahma.

12

Nu tohón ra cachicá noo chihin ra Jesús yoco trigu quiví nyitatu ñáyiví (Mr. 2.23-28; Lc. 6.1-5)

¹ Noo quiví nyitatu ñáyiví, yaha ra Jesús mahñu nu iyó cha tachí ñu. Ta chaq soco chí ra cachicá noo chihin ra. Ta quichaha catohon ra yoco trigu cuan ta quichaha cachachi ra chíti yoco cuan.

² Cuhva cha cananyehé ra fariseo cha tyicuan caa, cacatyí ra chí ra Jesús:

—Nyehe, ra cachicá noo chuhun sacuví ra noo cha ña tahán chí sacuví yo quiví nyitatu yo —catyí ra chí ra.

³ Soco maa ra Jesús catyí ra chí ra:

—¿Tutu ta sacuahá ca nyoho cha sacuví ra David chihin ra tahan ra quiví cha chisoco ra?

⁴ Quíhví ra chíhí vehe Nyoo. Ta quehen ra pan ii cha cha yaha catuví nuu Nyoo. Ta chachí ra ta ña tahán chí cachi ra, ni maa ra ní ra ndihí chihin ra, vatyi maa ri maa tata sutu tahán chí cachi pan cuan.

⁵ ¿O ta sacuahá ca ndo nu ley cha chaha Nyoo chí ra Moisés nu catyí chí vatyi ra cacuví sutu, ña canyitatu ra quiví nyitatu yo, soco sahá tyiño ra chíhí vehe ñuhu?

Yucuan nyehé yo vatyi ñima cuatyí cuví cuan.

⁶ Ta catyí chi ndo, vatyi ihya nyaá yuhu cha cuví noo ra cahnu ca ican saha vehe ñuhu.

⁷ Nyoho, ta cutuñi ca iñi ndo nu catyí chi tyehe caa nu tuhun Nyoo: “Cha cuñi yuhu, cha cundahvi cuñi ndo nyehe ndo chi tahan ndo, ta ñima ca cha cahñi ndo quití ta cuhva cuenda ndo chii.” Tyehe ta cutuñi iñi ndo tuhun ihya, ma tyaa ndo cuatyí siqui ñáyivi cha ñahri sacuvi.

⁸ Yuhu cuví Rayi cha quichí nya gloria. Ta iyó ityi chii vatyi catyí chi noo noo ndo ñáa cha sacuvi ndo quivi nyitatu yo —catyí ra Jesús.

Nu nduvaha ra cha ityi ndaha
(Mr. 3.1-6; Lc. 6.6-11)

⁹ Tyicuan ta quitá ra Jesús yucuan, ta cuahan ra vehe ñuhu.

¹⁰ Ta yucuan ñohó noo ra ityi inchiyo ndaha. Ta nyicú tucu suhva ra nducu cuhva yoso caa ta catyaa ra cuatyí siqui ra Jesús. Yucuan chaha candacá tuhun ra chi ra ta catyí ra:

—¿Atu cuví sanduvaha yo chi noo ñu cuhvi quivi nyitatu yo? —cacatyí ra chi ra Jesús.

¹¹ Ta nacahan ra Jesús ta catyí ra:

—¿Nya noo nyoho, tatu canacava noo mbee sana ndo chichi noo yavi quivi nyitatu yo, atu ma cuhun ndo ta tava ndo chi ti?

¹² Ta ¿atu ña yahvi ca nyaá noo ñáyivi ta ñima ca noo mbee? Yucuan chaha vatyi tahan chi sacuvi yo cha vaha quivi nyitatu yo —catyí ra.

¹³ Tyicuan ta catyí ra chi ra cha ityi ndaha cuan:

—Sanacaa ndahun —catyí ra.

Ta cuhva cha sanacaa ra, nduvaha ri ndaha ra tari inga chiyo cuan.

¹⁴ Tyicuan ta caquitá coyo ra fariseo cuandatuhun tahan ra yoso caa cacahñi ra chi ra Jesús.

Noo profeta, ra chahá cuenda tuhun cahán Nyoo, cahán ra tuhun ra Jesús cha ni cumañi ca cacu ra

¹⁵ Cha chitó ra Jesús tuhun tyi canducú ra chi ra, quitá ra yucuan ta cuaha ñáyivi chinyicón chi ra. Ta maa ra sanduvaha ra chi tandihí ñu cuhvi.

¹⁶ Ta catyí ra chi ñu tyi ma cahan ñu tuhun vatyi ican ra sanduvaha chi ñu.

¹⁷ Tyicuan caa cuví tacuhva nachino cava tuhun cha tyaa ra Isaías ra cuví profeta Nyoo ta cha naha. Tyehe caa tyaa ra:

¹⁸ Ican ra ihya cuví ra sacuvi tyiño nui, ra cha nacachí vahi.

Cuñi xain chi ra, ta si cuñi chihin ra.

Cusacuti chi ra chihin Tatyí Ii cha iyó chii. Ta cusacoto ra chi ñáyivi cha ñima ñu Israel cuví yoso caa sacuvahi chi ñu nui.

¹⁹ Ta ma xaan cahan ra ta ni ma cana chaa ra, ta ni yori cuiñi ndusu ra ityi cahnu.

²⁰ Ta ni noo ndoo yacua, ta ma cahnu ndihí ra.

Ta ni ma ndahva ndihí ra mecha cha caña ñuhma.

Nyacua nya cha sanicoo vaha ra chi ñáyivi chihin ra ta cunyaca ñaha vaha ra añima ñu.

²¹ Ta tandihí ñáyivi, ta chi ra cuquihi iñi ñu.

Nu catyí ñáyivi vatyi ra Jesús, tunyee iñi ra ña vaha iyó chí ra

(Mr. 3.20-30; Lc. 11.14-23; 12.10)

²² Tyicuan ta nu nyaá ra Jesús chinyaca ñu chi noo ra yihí tatyí ña vaha chi, cuaa ra ta ñihí ra. Ta ra Jesús sanduvaha ra chi ra. Ta cuví nacahan ra, ta cuví nanyeha ra.

²³ Iyo xaan cuñi tandihí ñáyivi, ta catyí ñu:

—¿Vasi ra vachi tata rey David cuví chi ra ihya? —catyí ñu.

²⁴ Soco cuhva cha cachiñi ra fariseo tuhun cuan, cacatyí ra:

—Chihin fuerza ra Beelzebú, ra cuví nuu chi cuihna, tavá ra ihya tatyí ña vaha —catyí ra.

²⁵ Soco ra Jesús chitó ra cha cacticá xiñi ra, yucuan chaha catyí ra chi ra:

—Tatu noo gobiernu ta cacusiñ ra, cuaha ri ityi nanduvi ra, cucañi tahan ra chihin tahan ra, ta cundihí tuhun cha canyacá ñaha ra. O tatu noo ñuu o tandihí ñáyivi noo vehe cacusiñ ñu chihin tahan ñu, cutivi nu nyicú ñu.

²⁶ Ta tyicuan caa tucu, tatu cuihna ta tava ra suri ra tahan maa ra, cuñi chi catyí vatyi ña iñ ri cacuví ra, ta cundihí fuerza cha iyó chi ra.

²⁷ Ta nyoho catyí ndo vatyi yuhu tavé tatyí ña vaha chihin fuerza ra Beelzebú. Tu tyicuan caa, ra nyicú chihin maa ndo, ¿yóo cha chaha fuerza vatyi tavá ra tatyí ña vaha? Maa ra na sacoto ra chi ndo cha ndicha, vatyi nyoho tondo ri chicá xiñi ndo.

²⁸ Yucuan chaha catyí chi ndo, vatyi yuhu tave tatyí ña vaha chihin fuerza Tatyí Ii Nyoo. Ta cuñi chi catyí vatyi ndicha cuii Nyoo ra nyacá ñaha añima ñáyivi cha chaq ra nu canyicú ndo.

²⁹ Chichi vehe noo ra ñihí xaan, tari cuihna, ma cuví quihvi noo ra ta quehen ra tandihí cha chii ra, soco tatu cuhñi xihna ra chi ra tyicuan caa ta cuví tinyaa ra tandihí cha chii ra.

³⁰ Ñáyivi cha ña nyaá tumañi iñi chii, ñáyivi xaan iñi chii cuví ñu. Ta tatu ña tyinyee ndo chii cha cahán ndo tuhun nuu

ñáyivi, cuñí chi catyí vatyí ña chahá ndo cha coto ñáyivi tuhun cahín.

³¹ Yucuan chaha catyí chi ndo vatyí Nyoo sahá ra ticahnu iñi cuatyí ñáyivi, ta ñáá cha ña vaha cahán ñu ñandihi, soco cha cahan ña vaha ñu siqui Tatyí Ii Nyoo, yucuan ndicha, ma coo ticahnu iñi cha cuenda ñu.

³² Ta yóo ri ñu cha cahán ña vaha siqui yuhu Rayíi cha quichí nya gloria, coo ticahnu iñi chi ñu cha cuenda cuan. Soco ñu cahán ña vaha siqui Tatyí Ii Nyoo, ma coo maa ticahnu iñi chi ñu cha cuenda cuatyí cuan, niri ihya ñáyivi, ta niri inga ñáyivi ñandihi.

Chihin cha sacuvi ri ñáyivi ta nichohon nuu ri yo chi ñu tatu ñu vaha o ñu ña vaha cuví ñu (Lc. 6.43-45)

³³ Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. Nichohón nuu ri yo tatu yutun vaha cuví tun chihin chiti cha chahá tun.

³⁴ ¡Nyoho, ñu quiñi iyó, tari tata coo xaan cuví ndo! ¿Yoso caa cuví quitá tuhun vaha yuhu ndo, ta ñáyivi quiñi caa añima cuví ndo? Vatyí cha quitá chichí añima yo ican cuan cahán yo.

³⁵ Noo ra vaha cahán ra tuhun vaha vatyí ñohó cha vaha añima ra. Ta ra quiñi iyó, maa maa ri tuhun quiñi caa cahán ra, vatyí cha quiñi caa ñohó añima ra.

³⁶ Ta yuhu catyí chi ndo vatyí quívi cutuñi chi tandihi ñáyivi, cucuhva ñu cuenda tandihi tuhun cha ña saha ñu cuenda ta cahan ñu.

³⁷ Vatyí yoso cuhva cahún, yucuan cuhva cucutuñi chuun, tatu iyó o ñahri cuatyun.

Ñu quiñi iyó cuñi ñu nyehe ñu seña milagru (Mr. 8.12; Lc. 11.29-32)

³⁸ Tyicuan ta suhva ra fariseo ta ra sacuahá ley vehe ñuhu cacatyí ra chi ra Jesús tyehe caa:

—Maestro, cuñi ndi vatyí sacuvun noo seña milagru vatyí nyehe ndi.

³⁹ Ta nacahan ra Jesús ta catyí ra:

—Ñu quiñi iyó ta ñu nyicón inga nyoo cuñi ñu nyehe ñu seña milagru. Soco ma nyehe ca ñu inga seña, noo ri seña ra Jonás ra profeta Nyoo, yucuan ri cunyehe ñu.

⁴⁰ Vatyí tari ñohó ra Jonás chichi tiyaca cahnu cuan uñi quívi ta uñi ñuu, tyicuan caa cucohon yuhu Rayíi cha quichí nya gloria chichi ñuhú uñi quívi ta uñi ñuu.

⁴¹ Ta quívi cucutuñi chi tandihi ñáyivi, cundicuita ñu chiyo ñuu Ninive ta cha naha ta cucatyí ñu na tachi tuñi Nyoo chi nyoho ñáyivi cha iyó vityin, ta cucatyí ñu vatyí cucunaa ndo, vatyí maa ñu cha cuví ñu ñuu Nínive, canasama ñu cuhva iyó ñu quívi cahan ra Jonás tuhun Nyoo chihin ñu. Ta ihya nyaá ra cahnu ca cuví ta ñima ca ra Jonás.

⁴² Vatyí tyicuan caa tucu ñaha cha cuví reina ityi Sur, cundicuita ña quívi cucutuñi chi ñáyivi ta cucatyí ña vatyí cucunaa nyoho ñu iyó vityin, vatyí maa ña, vasi cañi ñuu ña soco quichí ña, quichí tyasoho ña tuhun cha chihí tuñi ra Salomón. Ta ihya cahnu ca cuví ra cha cahán chihin ndo vityin ta ñima ca ra Salomón.

Yoso caa ndichi tucu tatyí ña vaha inga chaha añima ñáyivi tatu naa iñi ñu chi Nyoo (Lc. 11.24-26)

⁴³ Tatu noo tatyí ña vaha quita chi añima noo rayíi, chicá noo chi noo nu ityi, nanducú chi noo nu nyitatu chi, soco ña nañihi chi nu nyitatu chi. Tyicuan ta ndichi xiñi chi:

⁴⁴ “Cunuhu tiqui nya vehi nu quite.”

Yucuan ta nachaa chi añima ra nu quita chi. Ta nanyehé chi vatyí ndi xaan, ta yori nyaá.

⁴⁵ Tyicuan ta cuanaquehen chi ucha ca tahan tatyí ña vaha, cha yaha ca cuhva ican saha maa chi. Tyicuan ta quihvi tandihi tatyí ña vaha cuan añima ra cuan. Yucuan chaha, quiñi ca cunicoo ra ta ñima ca cuhva chiyo maa ra. Ta tyicuan caa cucuvi chi ñáyivi quiñi iyó ihya —catyí ra Jesús.

Tari yañi ra Jesús ta tari sihi ra cuví chi ñáyivi sacuvi cuhva catyí Nyoo (Mr. 3.31-35; Lc. 8.19-21)

⁴⁶ Ni cahán ca ra Jesús chihin ñáyivi, ta chaá sihi ra ta yañi ra, ta ndoo ñu chata vehe, ta cuñi ñu cahan ñu chihin ra.

⁴⁷ Tyicuan ta sacoto noo ñáyivi nyaá cuan chi ra Jesús, ta catyí ñu:

—Sihun ta yañun nyicú ñu chata vehe. Ta cuñi ñu cahan ñu chuhun.

⁴⁸ Tyicuan ta nacahan ra Jesús ta catyí ra chi ñu:

—¿Yóo cha cuví sihi ta yañi? —catyí ra.

⁴⁹ Tyicuan ta sañaha ndaha ra chi ra cachicá noo chihin ra, ta catyí ra:

—Ican ra ihya cuví sihi ta yañi.

⁵⁰ Vatyí tandihi ñáyivi cha sacuvi cuhva cuñi Suti ra nyaá andívi, ican ñu cuan cuví yañi, ta cuhve, ta sihi —catyí ra Jesús.

13

Tari noo ra chicá noo tachí, tyicuan caa cuví ra cahán tuhun Nyoo chihin ñáyivi (Mr. 4.1-9; Lc. 8.4-8)

¹ Quívi cuan quita ra Jesús vehe ra ta chicunyaá ra yuhu miñi.

² Ta chaha cha cuaha ñáyivi nataca nu nyaá ra, quihvi ra chichi noo canoa ta chicunyaá ra. Ta tandihi ñáyivi ndoo ñu nyicú ñu nu ñiti cuan.

³ Tyicuan ta cuaha ri cha quichaha sañahá ra chi ñu chihin noo cuhva ta catyí ra:

—Noo chaha quitā noo ra, tachī ra chiti trigu.

⁴ Ta nu cuahan ra quitī ra chiti cuan, canacoyo suhva chiti cuan yuhu ityi. Ta quichī coyo saa ta cachachī ti.

⁵ Ta suhva ca canacoyō ticu yuu, nu ña cuaha ñuhú yihí. Ta yucuan cañā chiti cuan cha numi ri vatyi ña cuaha ñuhú yihí chaha.

⁶ Soco cuhva cha cañā ñanyii iin na ityi ri tun, vatyi ña cono yihí yoho tun.

⁷ Suhva ca chiti canacoyō ticu iñu. Ta chahnū iñu cuan. Ta chasī chi nuu tun. Yucuan chaha ña chiyo chiti tun.

⁸ Soco suhva ca canacoyō nu ñuhú vaha. Ta quivi cachahnu tun, vaha xaan cachaha tun chiti, vatyi yihí tun noo cientu chiti chaha tun cha noo ri maa tun. Ta inga tun uñi xico, ta inga tun oco uchi chiti chaha tun.

⁹ jTatu cutuñi iñi ndo, tyasoho ndo!

Nu sacoto ra Jesús ñáá tuhun cha chihin cuhva ri cahan ra ta ña cahán cachi ra (Mr. 4.10-12; Lc. 8.9-10)

¹⁰ Tyicuan ta tuhva ra cacticá noo chihin ra Jesús, ta candacā tuhun ra chi ra, ta catyí ra:

—¿Ñáá tuhun cha chihin cuhva ri cahún chihin ñáyivi, ta ña cahán cachun chihin ñu? —cacityí ra.

¹¹ Ta nacahan ra Jesús ta catyí ra:

—Chi nyoho sacotó Nyoo tuhun xehe, yoso caa nyacá ñaha ra, soco chi maa ñu ña chahá ra cha coto ñu.

¹² Vatyí ñáyivi cutuñi iñi tuhun cahín ta sacuvi ñu, cuaha ca cucutuñi iñi ñu. Ta ñáyivi cha chiin ri cutuñi iñi, ta ña cuñi ñu sacuvi ñu, cutinyaa ndihi cha cutuñi iñi ñu.

¹³ Yucuan chaha vatyi chihin cuhva ri cahín chihin ñu, tacuhva nyehe ñu ta cuví chi tari cha ña ndichin nyehe ñu. Ta cuiñi ñu soco ma cutuñi iñi ñu, tari cha ña chiñi ñu cuví cuan.

¹⁴ Ta tyicuan caa ta chinó cava tuhun cha cahan ra Isaías ra profeta Nyoo ta cha naha, ta catyí ra:

Cha ndicha vatyi nyoho cuiñi ndo tuhun, soco ma cutuñi iñi ndo.

Ta cunyehe ndo cha sacuvi, ta ma cutuñi iñi ndo.

¹⁵ Vatyí cha ndundavā añima ñáyivi ihya, ta ña cachi vaha chiñi ñu.

Ta tahán nuu ñu,

Tacuhva cha ma nyehe ñu chihin chiti nuu ñu.

Ta ma cuiñi ñu chihin soho ñu.

Ta ni ma cutuñi iñi ñu chihin añima ñu.

Ta ni ma nanducu ñu chii, tacuhva sanduvahi chi ñu.

¹⁶ Soco si xaan cuví chi nyoho, vatyi nyehé ndo chihin chiti nuu ndo, ta chiñi ndo chihin soho ndo.

¹⁷ Cha ndicha catyí chi ndo, vatyi cuaha ra cacuvi profeta Nyoo ta cuaha ñáyivi vaha, cacuñi ñu nyehe ñu cha nyehé nyoho cha sacuvi, soco ña nyehe ñu. Cuñi ñu cuiñi ñu tandihi tuhun cha chiñi nyoho vityin, soco ña chiñi ñu.

Nu catyí ra Jesús ñáá cha cuñi chi catyí cuhva cha cahán ra (Mr. 4.13-20; Lc. 8.11-15)

¹⁸ Tyasoho ndo ñáá cha cuñi chi catyí noo cuhva cha catyí chi ndo tuhun ra cha tachí chiti trigu cuan:

¹⁹ Ñáyivi cha chiñi tuhun yoso caa cuñi Nyoo cunyaca ñaha ra añima ñu, ta ña cutuñi iñi ñu, tari nu canacoyō chiti yuhu ityi, tyicuan caa cuví ñu. Vatyi quichī cuihna ta tavā ra tuhun Nyoo cha caa añima ñu.

²⁰ Ta tari nu canacoyō chiti ticu yuu cuan, tyicuan caa cuví tucu ñáyivi cha chiñi tuhun Nyoo, ta si xaan cuví chi ñu naquehen cuenda ñu noo ri cuhva.

²¹ Vatyí nu cañā chiti ticu yuu cuan, chiin ri ñuhú yihí chaha. Yucuan chaha cañā soco ña cuví tyihí yoho chí. Ta tyicuan caa ñu cuan. Suhva ri quivi chinó iñi ñu. Soco quivi cha quichaha nyehe ñu tindoho, ta satasi iñi ñáyivi chi ñu cha cuenda tuhun Nyoo ta sandihi ri ñu tuhun cha chinó iñi ñu.

²² Ta tari nu canacoyō chiti chichi iñu cuan, tyicuan caa cuví tucu inga ñu cha chiñi tuhun Nyoo. Chiñi ñu, soco ña cuñi ñu sacuvi ñu tari cuhva chiñi ñu. Vatyí nyaá xaan ca xiñi ñu tuhun tindoho ñáyivi ican saha tuhun Nyoo. Ta nyiyo ca iñi ñu cha tyayii. Ta tandihi tuhun cuan sayanga chi chí ñu, ta ña chahá nanducu vaha ñu chí Nyoo.

²³ Soco tari nu canacavā chiti nu ñuhu vaha, tyicuan caa cuví ñu chiñi tuhun Nyoo, ta cutuñi iñi ñu, ta sacuvi ñu tandihi tuhun cahán ra. Yihí ñu cuví ñu tari yutun cha chaha noo cientu chiti, ta inga ñu tari yutun cha chaha uñi xico, o tari yutun cha chahá oco uchi chiti noo noo tun.

Nu catyí ra Jesús yoso caa cuahan tuhun trigu ta cuhu ña vaha

²⁴ Ta chahā tucu ra Jesús inga cuhva ihya chí ñu, ta catyí ra:

—Cha nyacá ñaha Nyoo añima ñáyivi cuví chí tari noo ra cha tachí chiti trigu nu noo ñuhú.

²⁵ Soco cuhva cha caquixi tandihi ra casahá tyiño cuan, quihvi noo ra xaan iñi chí ra, ta tachí ra chiti cuhu ña vaha, ta cuahan ra.

²⁶ Ta quivi cañā chiti trigu cuan, ta cañā yoco chí, ta yucuan na tuci tucu cuhu ña vaha cuan.

²⁷ Tyicuan ta ra cacuví musu, cachahān ra chicatyi ra chi chitoho ra: “Tata, tatu maa maa ri maa chiti trigu tachun, ¿nya quitā cuhu ña vaha cuan?” cacatyí ra.

²⁸ Ta nacahān ra cuan ta catyi ra: “Iyó noo ra xaan iñi chi yo tachí.” Tyicuan ta musu cuan, catyi ra chi chitoho ra: “¿Atu cuñun cha cuhun ndi ta tohon ndi cuhu ña vaha cuan?”

²⁹ Soco chitoho ra catyi ra: “Ma tohon ndo, coto cuhva cha tohon ndo cuhu ña vaha cuan, ta coyo ndihi trigu cuan.

³⁰ Saña ndo, na cuahnu maa chi ñin ri chihin trigo cuan, tyicuan ta quivi cunicoñehi tyiño sahi, cutachi chi ra casaha tyiño cutohon xihna ca ra cuhu ña vaha cuan ta cuhñi ra cuenda sucun, vatyí cahmi ra. Ta yaha cuan ta canaquehen vaha ra cha vaha cuan chichi yaque.”

Nu catyi ra Jesús vatyí tari chiti mostaza cuví cha nyacá ñaha Nyoo añima yo (Mr. 4.30-32; Lc. 13.18-19)

³¹ Tyicuan ta catyi tucu ra Jesús inga cuhva ihya chi ñu:

—Cha nyacá ñaha Nyoo añima ñáyivi cuví chi tari noo chiti yutun cha nañi mostaza cha tachí noo ra nu ñuhú ra.

³² Vatyí ican chiti cuan cuví cha luhlu ca ican saha tandihí ca chiti. Soco quivi chahnū tun cuví tun noo yutun cahnu vavaha. Ta quichí coyo saa, ta casavahá ti taca ti nuu tun —catyi ra Jesús.

Nu catyi ra Jesús vatyí tari yuchan iya cuví cha nyacá ñaha Nyoo añima ñáyivi (Lc. 13.20-21)

³³ Ta catyi tucu ra Jesús inga cuhva ihya: —Cha nyacá ñaha Nyoo añima ñáyivi cuví chi tari yuchan iya cha nasacā noo ñaha chihin uñi cuhva yutyí pan. Vatyí tari ndaa tandihí pan cuan chihin yuchan iya cuan, tyicuan caa cuahan nducuaha ca ñu nyacá ñaha Nyoo añima —catyi ra.

Yoso caa chotyíñō ra Jesús noo cuhva cha cahán ra (Mr. 4.33-34)

³⁴ Tandihí tuhun ihya cahan ra Jesús chihin ñáyivi chihin cuhva ri. Ta tandihí tuhun cha catyi ra chi ñu soco maa maa ri chihin noo cuhva ri.

³⁵ Tyehe caa sacuvi ra tacuhva chino cava tuhun cha cahán ra profeta ta cha naha ta tyaa ra tyehe caa: Chihin cuhva ri cucahin chihin ñáyivi. Cucatyí chi ñu tuhun cha ñohó xehe nyata savahā Nyoo ñuhu ñáyivi.

Nu catyi ra Jesús ñáá cha cuñi chi catyi tuhun cuhu ña vaha cha cañá mahñu chiti trigu cuan

³⁶ Tyicuan ta sacunuhū ra Jesús chi ñáyivi, ta ndihvi ra chichi vehe. Ta catuhva

ra cacticá noo chihin ra chi ra, ta catyi ra chi ra:

—Nacatyí chi ndi ñáá cha cuñi chi catyi tuhun cha cañā cuhu ña vaha cuan nu ñuhu cuan.

³⁷ Tyicuan ta quichaha catyi ra Jesús chi ra:

—Ra cha tachí chiti trigu cuan ican cuví yuhu Rayi cha quichí nya gloria.

³⁸ Ta ñuhú cuan, ican cuví añima ñáyivi iyó siqui ñuhu ñáyivi. Ta chiti trigu cuan ican cuñi chi catyi ñáyivi cha nyicón chi Nyoo, ta chiti cuhu ña vaha cuan cuñi chi catyi ñáyivi cha nyacuví cuhva cuñi ra ña vaha.

³⁹ Ra cha tachí cuhu ña vaha cuan, ican cuví cuñhna ra xaan iñi chi Nyoo. Ta quivi cunacoñehi ra tyiño saha ra, ican cuví quivi cunacaa ñuhu ñáyivi. Ta ra cha cunacoñehi chiti cuan, ican cuví ra cacuví ángel.

⁴⁰ Tari nasatacā ra cuhu ña vaha cuan vatyí cayu chi, tyicuan caa cucuvi quivi naa ñáyivi.

⁴¹ Yuhu Rayi cha quichi nya gloria cutachi chi ángel cunasataca ra chi ñu sacco cutyi inga ñu, ta ñu cha sacuví cha ña vaha.

⁴² Ta cutyihí ra chi ñu chichi horno nu cayú ñuhu. Ta cucuacu ñu ta cusacahñi ñu noho ñu.

⁴³ Ta ñu cha sacuví cuhva cuñi Nyoo cutuvi ñu nuu Nyoo Sutu yo. Ta tari cha ndichin ñanyii, tyicuan caa cucuvi ñu. Tatu cutuñi iñi ndo, tyasocho ndo tuhun cahín.

Noo xuhun cuaan cha ñohó xehe

⁴⁴ Cha nyacá ñaha Nyoo añima ñáyivi cuví chi tari noo xuhun cuaan ñohó xehe chichi ñuhú. Ta noo ra nañihí xuhun cuaan cuan, soco natyihí xehe tucu ra inga chaha ta sii xaan cuñi ra cuanuhū ra ta xicō ra tandihí cha iyó chi ra, ta satā ra ñuhu nu ñohó xehe xuhun cuaan cuan.

Noo cuhva cha cahan ra Jesús cuenda noo perla cha yahvi xaan nyaá

⁴⁵ Ta cha nyacá ñaha Nyoo añima ñáyivi, cuví tucu chi tari noo ra satā ta naxicō perla finu.

⁴⁶ Ta cuhva cha ñihí ra noo cha yahví vavaha nyaá, ta xicō ra ndi maa cha cumí ra, ta satā ra perla vaha cuan.

Nu sañahá ra Jesús noo cuhva cuenda tarraya

⁴⁷ Ta suri cuví tucu cha nyacá ñaha Nyoo añima ñáyivi tari tarraya cha cañi ra nu tyañuhu, ta ñihí ra ndihí nuu tiyaca chihin.

⁴⁸ Ta cuhva cha chitū tarraya cuan chihin tiyaca, catavā ra ityi nu ñiti, ta yucuan canacachí ra chi ti, canaquehen vaha ra chi quiti vaha chichi noo tica, ta sacuitā ra chi quiti ña vaha cuan.

⁴⁹ Ta tyicuan caa cucuvi quivi naa ñáyivi, quichichi coyo ángel, quichi tava siin ra chi ñu vaha ta ñu ña vaha.

⁵⁰ Ta cutyihira ra chi ñu ña vaha cuan chichi anyaya nu cayú ñuhu, nu cucuacu ñu ta cusacahñi ñu noho ñu.

Nu sañahá chi vatyi vaha tuhun chahnu ta tuhun chaa Nyoo

⁵¹ Tyicuan ta ra Jesús ndacá tuhun ra chi ra cachicá noo chihin ra, ta catyí ra:

—¿Atu cutuñi ñi ndo tandihira tuhun ihya?

Ta nacahan ra ta cacatyí ra:

—Ay, Sutu Mañi yuhu. Cutuñi ñi ndi.

⁵² Tyicuan ta catyí ra Jesús chi ra:

—Tatu noo ra sacuahá cuenda ley vehe ñuhu, ta cutuhva ra tuhun yoso caa nyacá naha Nyoo aña ñáyivi, cumi ra cha vaha tuhun chahnu Nyoo, ta cumi tucu ra tuhun chaa cha sañahí. Ta cuvi ra tari noo ra cuvi nuu, ra chitó ta sañahá ra tuhun chahnu ta tuhun chaa cha sañahí —catyí ra Jesús.

Nu ñohó ra Jesús Nazaret ñuu nu chahnu ra (Mr. 6.1-6; Lc. 4.16-30)

⁵³ Ndihi cahan ra Jesús cuhva ihya ta cuahan ra.

⁵⁴ Ta nachaa ra ñuu ra. Ta yucuan quichaha sañaha ra chichi vehe ñuhu ñuu cuan. Ta iyo cuñi ñáyivi ta catyí ñu:

—¿Nya maa maa cutuhva ra ihya cha chihira tuñi xaan ra? ¿Ta yoso caa cuvi sacuvi ra milagru?

⁵⁵ Vatyi sehe ra satya vitu cuan cuvi chi ra. Ta cu María cuvi sihi ra. Ta yañi ra cuvi chi ra Jacobo, ta ra José, ta ra Simón ta ra Judas.

⁵⁶ Ta cuhva ra ñandihira, iyó ñu ityi nu iyó yo. Tu tyicuan caa, ¿nya maa maa cutuhva ra tandihira tuhun ihya? —catyí ñu.

⁵⁷ Ta yucuan chaha ña cuñi ñu quichaha ñu chi ra. Soco ra Jesús catyí ra chi ñu:

—Tandihira ñáyivi tandihira ri ityi sahá ñu ñáyivi chi ra profeta. Soco ña quichahá ñu chi ra tatu ra ñuu ñu, o ra vehe ñu cuvi chi ra —catyí ra.

⁵⁸ Ta ña cuaha milagru sacuvi ra yucuan cha cuenda vatyi ña chinó ñi ñu chi ra.

14

Nu catyí chi yoso caa chihira Juan ra sacondutya

(Mr. 6.14-29; Lc. 9.7-9)

¹ Quivi cuan ra Herodes, ra cuvi gobiernu nicahnu nu cuvi Galilea, ñihira tuhun ra Jesús.

² Ta catyí ra chi ra nyicú chihin ra:

—Ican ra cuan cuvi ra Juan ra sacondutya chi ñáyivi, ra cha chihira ta vityin nandotó ra. Yucuan chaha iyó tunyee ñi chi ra cha sacuvi ra milagru.

³⁻⁴ Tyicuan caa catyí ra vatyi suri maa ra tyihira tyiño ta catiñ ra chi ra Juan. Ta

chahñi ra chi ra chihin cadena, ta tyihira ra chi ra vehe caa. Tyicuan caa sacuvi ra tyi xaan cuñi ra tyi catyí ra Juan tyi ña vaha cha nyaá ra chihin cu Herodías cha cuvi ña ñasihira yañi ra ra Felipe.

⁵ Ta yucuan chaha, ra Herodes, cuñi ra cahñi ra chi ra Juan, soco yuhvi ra chi ñáyivi, vatyi tandihira ñu chinó ñi ñu tyi ra Juan cuenda Nyoo cahan ra.

⁶ Soco noo quivi cha vico ra Herodes, ta quichahá chita chaha sehe cu Herodías nu nyicú ñu vico cuan. Ta tahañ xaan ñi ra Herodes.

⁷ Ta tyaa ra cuhva vatyi cuhva ra ñáá ri cha cacan ñaha tyivaa cuan, ta ma nacahnu ra tuhun cahan ra.

⁸ Tyicuan ta tyiyuhira sihi ña chi ña, na catyí ña chi ra Herodes tyeha caa:

—Cuhva xiñi ra Juan ra sacondutya ñáyivi chihira nu noo coho —catyí ña.

⁹ Cha chihira rey Herodes tuhun cahan ña, nducuihua cuñi ra. Soco cha cuenda cha tyaa ra cuhva vatyi cuhva ra ñáá ri cha cacan ña nuu ñu canyicú vico cuan ta ma cuvi nacahnu ra, yucuan chaha tachira ra nacuhva ra xiñi ra Juan chi ña.

¹⁰ Ta tachira ra tyiño na cutahnya sucun ra Juan nu ñohó ra vehe caa.

¹¹ Tyicuan ta caquichira nyaca ra xiñi ra, yihira noo nu coho. Ta cachahira ra chi ñaha tyivaa cuan. Ta maa ña nacuhva cuenda ña chi sihi ña.

¹² Tyicuan ta cha coyo ra canyicón chi ra Juan ta canaquehen ra coño ñuhu ra, ta catyihira ra chihira ñuhu. Ta yahá cuan ta chahan coyo ra chisacoto ra chi ra Jesús.

Nu chahá ra Jesús cha cachi ohon mil rayi (Mr. 6.30-44; Lc. 9.10-17; Jn. 6.1-14)

¹³ Cha chitó ra Jesús tuhun ihya, quehen ra noo canoa, ta cuahan noo tuhun ri maa ra noo nu taxi ri iyó. Soco chitó ri ñáyivi, ta quitá coyo ñu ñuu ñu, ta cuahan coyo ñu chata ra ityi nu ñuhú.

¹⁴ Cha quitá ra Jesús chihira canoa cuan, nanyehira ra cuaha xaan ñáyivi. Ta cundahvira xaan cuñi ra nyehira ra chi ñu. Ta sanduvahira ra chi ñu cuhira cha chaá chihin ñu.

¹⁵ Ta vatyi cha cua cuaa, ra cachicá noo chihin ra Jesús chaa coyo ra, ta catyí ra chi ra:

—Cha ñi xaan, ta yori ñáyivi iyó yatyin ri ihya. Yucuan cuenda natachi chi ñáyivi ihya na cunuhu coyo ñu nya ñuu cusata ñu cha cachi ñu —cacatyí ra chi ra Jesús.

¹⁶ Ta ra Jesús catyí ra:

—Ña tahañ chi cunhu ñu. Cuhva maa ndo cha cachi ñu.

¹⁷ Ta nacahan ra ta cacatyí ra:

—Noo tuhun ohon tahañ siin pan ta uvi tahañ siin tiyaca cumi ndi.

¹⁸ Ta catyí ra Jesús:

—Nyaca ndo chii.

¹⁹ Tyicuan ta tachí ra tyiño na cunyicu ñáyivi nu cuhu cuan. Yahá cuan ta quehen ra ohon tahan pan cuan, ta ni nduvi tiyaca cuan. Ta nanyehé ndaa ra andívi, ta nacuhvá ra tyahvi nyoo chí Nyoo ta tahví ra pan cuan. Ta चाहá ra chí ra cachicá noo chihin ra, na casacha ra chí ñáyivi cuan.

²⁰ Ta tandíhi ñu cachachí ñu ta ndaha íñi ñu. Yahá cuan ta canasataçá ra yíquin cha ndog. Ta quita uchi uvi tahan tica.

²¹ Ta cha tandíhi ñu cachachí cuan, quita ta cha ohon mil cha maa ri maa rayíi. Ta ña quihví cuenda ñusíhi ni ra cuatyaa.

Nu chicá ra Jesús nu ndutya
(Mr. 6.45-52; Jn. 6.16-21)

²² Ta cha yaha tuhun cuan ta catyí ra Jesús chí ra cachicá noo chihin ra, na quihví coyo ra chí chí canoa, vatyi cayaha sava ra miñi cuan ta cuhun coyo ra inga chiyo. Ta niri ca cha cuahan coyo ra cuan, ra Jesús ndoo ra natachí ra chí ñáyivi na cuhun coyo ñu.

²³ Cha yahá cha natachí ra chí ñu cuan, ta ndaq ra yucu cuan ca cacán tahví noo tuhun ri maa ra chí Nyoo. Ta yucuan ñohó ra ta cuaa ndíhi.

²⁴ Ta cha ni ri ca cha chicán tahvi ra cha cuahan vavaha canoa cuan nya mahñu miñi. Ta ndutya miñi cuan cañi chí chí canoa cuan cha cuenda vatyi ñíhi xaan caá tatyi nu cuahan coyo ra.

²⁵ Ta cuhva cha ñaa ca cuan cua tuhva ra Jesús nu cuahan coyo ra chihin canoa cuan suri chicá ra nu ndutya.

²⁶ Ta cuhva cha cananyehé ra chí ra, chicá ra nu ndutya cuan, canayuhví xaan ra. Ta cacana chaa vavaha ra, ta catyí ra:

—¡Noo cha sayuhví cuví!

²⁷ Soco nacahan ra Jesús chihin ra, ta catyí ra:

—¡Sañií ndo íñi ndo, yuhu cuví, ma yuhví ndo! —catyí ra.

²⁸ Tyicuan ta nacahan ra Pedro ta catyí ra:

—Sutu Mañi yuhu, tatu icon cuvún, catyi na quichi yuhu nu ndutya chiña nyacua nya nu vachun.

²⁹ Ta ra Jesús catyí ra chí ra:

—Ñaha.

Tyicuan ta noo ra Pedro nu canoa cuan, ta quichahá chica ra nu ndutya vatyi cuhun ra nu vachi ra Jesús.

³⁰ Soco cuhva cha tuví íñi ra tyi ñíhi xaan fuerza tatyi cuan, nayuhví ra ta quichaha nducu nyee ra, ta quichaha cana chaa ra ta catyí ra:

—¡Sácacu chii, Sutu Mañi yuhu!

³¹ Ta caa cuhva ri cuan, ta tñin ra Jesús ndaha ra, ta catyí ra chí ra:

—¡Chiin xaan chinó íñun chii! ¿Ñáa tuhun cha nacaca uvi íñun? —catyí ra Jesús chí ra.

³² Ta cuhva cha ndaq coyo ra nu canoa cuan, cutaxin ri tatyi cuan.

³³ Tyicuan ta ra cañohó chí chí canoa cuan cachicuiñi chí chí ra nuu ra Jesús, ta cacatyí ra chí ra:

—Ndicha ndicha cuii vatyi Sehe Nyoo cuví chuun —cacatyí ra.

Nu sanduvahá ra Jesús chí ñu cuhvi ñuu cha nyicú nicacahnu Genesaret
(Mr. 6.53-56)

³⁴ Cha cayaha sava ra miñi cuan, cachaa coyo ra nu cuví Genesaret.

³⁵ Ta cuhva cha canicoñon nuu ñáyivi iyó yucuan chí ra Jesús, sacoto ñu chí tandíhi ñáyivi ityi cuan. Ta quichí nyaca ñu tandíhi ñu cuhvi nu nyaá ra.

³⁶ Ta chacú ndahvi ñu nuu ra, na cuhva ra tñin ñu vasi chíin sahma ra. Ta tandíhi ñu tñin sahma ra, nduvahá ñu.

15

Nu sañahá chí ñáa cha sativí chí ñáyivi
(Mr. 7.1-23)

¹ Tyicuan ta suhva ra cacuví fariseo ta ra casacua ha ley vehe ñuhu quita coyo ra Jerusalén. Ta cha coyo ra nu nyaá ra Jesús ta candaca tuhun ra chí ra, ta catyí ra:

² —¿Ñáa tuhun cha ña sacuví ra cachicá noo chuhun costumbre cha sañahá ra cacuví mandoñi ñuu yo? Vatyi ña canacatyá ra ndaha ra tari cuhva cha tahán chí, tatu cuacachi ra xita —cacatyí ra.

³ Soco ndaca tuhun ra Jesús chí ra, ta catyí ra:

—¿Ñáa tuhun cha ña quichahá tucu nyoho tuhun cahán Nyoo ta ñíhi xaan ca quichaha ndo costumbre maa ndo?

⁴ Vatyi Nyoo catyí ra: “Saha ndo ñáyivi chí sutu ndo ta chí síhi ndo. Ta tandíhi ñu cha cahán ña vaha chí sutu o chí síhi, na cuví ñu”, catyí Nyoo.

⁵ Soco nyoho catyí ndo tyi noo ñáyivi cuví catyí ñu chí sutu ñu o chí síhi ñu tyehe caa: “Ma cuvi tyinyei chuun vatyi tandíhi cha iyó chí chí cha yahá chahá cuende chí Nyoo.”

⁶ Ta tatu cha catyi ndo tyicuan caa, ña cuñi ca chí cha tyinyee ca ndo chí sutu ndo o chí síhi ndo, catyí ndo. Ta tyicuan caa sacuachiyó xiin ndo tuhun cha catyi Nyoo tyi sacuví ndo, vatyi cuñi ndo sacuví maa ndo cuhva costumbre maa ndo.

⁷ ¡Nyoho cha sahá ndo tyi vaha ndo! Ndicha vaha tuhun cha tyaa ra Isaías, ra profeta Nyoo ta cha naha nu catyi Nyoo tuhun ndo tyehe caa:

⁸ Ñáyivi ihya, chihin yuhu ri ñu catyi ñu tyi cuñi ñu chí.

Soco ñima chihin tandíhi aña ñu, tyi siin nu nyaá xíñi ñu.

9 Ta ñahri maa tuhun cha sacahnú ñu chii. Vatyí cha sañahá ñu maa maa ri cuhva sañahá ñáyivi ri cuví, tyehe caa tyaa ra Isaías tuhun ndo, catyí ra Jesús.

10 Tyicuan ta cana ra chi ñáyivi ta catyí ra chi ñu: —Tyasoho ndo, ta cütuñi iñi ndo tuhun cahín.

11 Vatyí cha quihví yuhu ñáyivi, ñima cuan sativí chi ñu nuu Nyoo. Soco cha quitá yuhu ñu, ican cuan sativí chi ñu.

12 Tyicuan ta catuhvā ra cachicá noo chihin ra Jesús ta candaca tuhun ra chi ra, ta catyí ra:

—¿Atu chitón vatyí ra fariseo quiñi xaan cuñi ra cha cachiñi ra tuhun cahún?

13 Soco maa ra Jesús nacahan ra: —Tandihí yutun cha ña tachí Suti, ra nyaá andiví, cucoyo tun nya yoho tun.

14 Saña ndo chi ra vatyí ra cuaa cacuví ra, ta casañahá ra ityí chi inga ra cuaa. Ta tatu noo ra cuaa ta sañahá ra ityí chi inga ra cuaa, ni nduvi ra cucanacoyo ra chichi noo yavi.

15 Tyicuan ta quichaha catyí ra Pedro chi ra Jesús:

—Nacatyí chi ndi ñáá cha cuñi chi catyí cuhva cha cahun cuan.

16 Tyicuan ta ra Jesús catyí ra chi ra: —¿Atu ni nyoho ta ña cutuñi iñi ndo?

17 ¿Atu ña cutuñi iñi ndo vatyí cha quihví ityí yuhu yo, chichi yo cuahan? Yahā cuan ta quitá tucu.

18 Soco tuhun cha quitá yuhu yo, chichi añima yo quitá, ta ican cuan cuví cha sativí chi ñáyivi nuu Nyoo.

19 Vatyí nya chichi añima ñu quitá cha quiñi caá chicá xiñi ñu. Ta cuñun, cha chahñi ñu chi ñáyivi, cha quichi cuví iñi ñu coo ñu chihin inga ñu cha ñima ñasihí ñu cuví. Ta tandihí ca cha quiñi caa cha sacuvi ñu chihin coño ñuhu ñu. O yihí ñu cha suhu ñu cha chii ñáyivi. O sandaví ñaha ñu. O cahán ndasi ñu.

20 Ican cuan cuví cha sativí chi ñáyivi. Soco cha ma sacuvi ñu costumbre cha nacatyá xaan ñu ndaha ñu cha ni cumañi ca cachi ñu, ña sativí cuan chi ñu —catyí ra Jesús.

Nu nachingo iñi noo ñaha inga ñuu chi ra Jesús (Mr. 7.24-30)

21 Quitá ra Jesús ñuu cuan ta cuahan ra ityí ñuu Tiro ta ñuu Sidón.

22 Ta noo ñaha ñuu Canaan iyó ña ityí cuan, suri caná chaa ña vachí ña nu vachí ra Jesús, ta catyí ña:

—Sutu Mañi yuhu, ra vachí tata rey David cuvún. Cundahví cuñi nyehun chii,

vatyí sehi yihí noo tatyí ña vaha chi ña, ta nyehé xaan ña tindoho —catyí ña.

23 Soco ra Jesús ña nacahan ra nu cahán ña. Tyicuan ta tuhva ra cachicá noo chihin ra chi ra ta cachacu ndahví ra nuu ra ta catyí ra chi ra:

—Catyí chi ña na cunuhu ña vatyí caná chaa xaan ña vachí ña chata yo.

24 Tyicuan ta catyí ra Jesús chi ra:

—Nyoo noo ri nu tachí ra chii, cuenda mbee cha cuanaa. Ta mbee cuan ican cuví ñu ñuu Israel.

25 Soco ñaha cuan tuhva ña ta chicuñi chiti ña nuu ra ta catyí ña chi ra:

—Sutu Mañi yuhu, ¡tyinyee chii!

26 Ta ra Jesús catyí ra chi ña:

—Ña vaha cha tinyaa yo pan yuhu sehe yo ta cuhva yo cachi ina —catyí ra chi ña.

27 Soco maa ña ña quichaha ña ta catyí ña chi ra:

—Ndicha, Sutu Mañi yuhu. Soco nyacua nya ina ta chachí ti yiquin cha canacoyo nu mesa chitoho ti —catyí ña.

28 Tyicuan ta catyí ra Jesús chi ña:

—Sihi ¡ñana cha chinó xaan iñun chii!

Cua sacuvi tari cuhva cuñun.

Ta caa cuhva ri cuan ta nduvahā sehe ña.

Nu sanduvahā ra Jesús cuaha ñu cuhví

29 Quitá ra Jesús yucuan ta yahā ra yuhu miñi Galilea, ta ndaa ra noo yucu ta chicunyaā ra yucuan.

30 Ta cuaha ñáyivi chaa coyo nu nyaá ra ta quichi nyaca ñu cuaha ñu cuhví: ñu coxo, ñu cuaa, ñu luu, ñu ñiñi. Ta cuaha ca ñu cuhví quichi nyaca ñu nu nyaá ra. Ta chacun ñu chi ñu nuu ra, ta maa ra sanduvahā ra chi ñu.

31 Ta iyo cuñi ñáyivi nyehé ñu yoso caa nacahan ñu ñiñi ta yoso caa nduvahā ñu luu, ta yoso caa nacacá ñu coxo, ta yoso caa nanyehé ñu cuaa. Ta quichaha casacahnu ñu chi ra cuví Nyoo cuenda ñu, ñu Israel.

Nu chahā ra Jesús cha cachi cumi mil rayi (Mr. 8.1-10)

32 Tyicuan ta cana ra Jesús chi ra cachicá noo chihin ra, ta catyí ra chi ra:

—Ndahví xaan cuñi nyehi chi ñáyivi ihya, vatyí cha uñi quiñi nyicú ñu ihya chihin, ta ñahri maa cha cachi ñu nyisó ñu. Ta ña cuñi natachi chi ñu nya vehe ñu vatyí ta cachi ca ñu, coto coña ñu ityí cunuhu ñu —catyí ra Jesús.

33 Tyicuan ta ra cachicá noo chihin ra cacatyí ra chi ra:

—Soco ¿nya cuquehen yo cha cachi ñáyivi cuaha ihya, nu yori maa ñáyivi iyó ihya?

34 Tyicuan ta ra Jesús ndaca tuhun ra chi ra:

—¿Yoso tahan pan cumí ndo?

Ta maa ra catyí ra:

—Ucha tahan pan, ta uvi tahan tiyaca nyihi ri.

³⁵ Tyicuan ta tachj ra na cunyicu ñáyivi cuan nu ñuhú.

³⁶ Tyicuan ta quehen ra ndi ucha pan cuan ta tiyaca cuan, ta nacuhva ra tyahvi nyoo chi Nyoo. Tyicuan ta tahvj ra ta chaha ra chi ra cachicá noo chihin ra, ta maa ra cachicá noo chihin ra canasachá ra chi ñáyivi.

³⁷ Tandihí ñu chachi ñu, ta chitj chichi ñu. Ta yaha cuan casacutj ra ucha tica chihin yiquin cha ndoo cuan.

³⁸ Cumi mil rayii cachachj, ta ña quihvi cuenda ñusihi ni ri ra cuatya.

³⁹ Yaha cuan ta sacunuhu ra chi ñáyivi, ta quihvj ra nu canoa, ta cuahan ra ityi nu cuví Magdala.

16

Ra fariseo ta ra saduceo cachicán ra chi ra Jesús na sacuvi ra noo milagru
(Mr. 8.11-13; Lc. 12.54-56)

¹ Tyicuan ta ra fariseo ta ra saduceo chahan coyo ra nu nyaá ra Jesús. Vatyí cacuñi ra nducu nyehe ra chi ra yucuan chaha chicán ra na sacuvi ra noo milagru chihin tunyee iñi Nyoo.

² Soco nacahan ra Jesús ta catyj ra chi ra: —Cha cha iñi cuhva cha cuaa quee ñanyii, tuhvá ndo catyj ndo: “Vaha xaan cucuvi quivi tyaan, vatyí tyaqui xaan cuaha andivi.”

³ Ta cha ñaha ri catyj ndo: “Vityin ña tyaqui maa cucuvi quivi vatyí cuaha ta iñi ñaa xaan andivi”, catyj ndo. Nyoho vaha xaan chitó ndo ¿yoso caa nacotó ndo tuhun vico andivi soco ña cuví nacoto ndo yoso caa cuahan tuhun cha sañahá Nyoo chi ndo vityin?

⁴ Ñáyivi iyó vityin, quiñi iyó ñu ta ña chinó iñi ñu chi Nyoo. Cuñi ñu nyehe ñu noo cha iyo. Soco ma cuhve nyehe ñu vatyí cha yaha sañahá Nyoo cha iyó cha sacuvj ra chihin ra Jonás —catyj ra Jesús chi ra, ta sandoo ra chi ra, ta cuahan ra.

Tuhun cahán ra fariseo cuví chi tari yuchan iya
(Mr. 8.14-21)

⁵ Cuhva cha cayaha ra cachicá noo chihin ra Jesús inga chiyo miñi cuan, canaá iñi ra cacuiso ra pan.

⁶ Tyicuan ta catyj ra Jesús chi ra: —Saha ndo cuenda chi ndo chihin yuchan iya ra fariseo ta ra saduceo —catyj ra Jesús chi ra.

⁷ Tyicuan ta quichaha candatuhun ra chihin ra tahan ra ta catyj ra:

—Cha cuenda vatyí ñahri pan nyisó yo vachi, yucuan chaha catyj ra tyicuan caa chí yo —catyj ra.

⁸ Ta tuvj iñi ra Jesús tuhun candatuhún ra, ta catyj ra chí ra:

—Nyoho, chiin xaan chinó iñi ndo chii. ¿Ñáá tuhun cha catyj ndo vatyí ñahri pan nyisó ndo?

⁹ ¿Atu ta cutuñi ca iñi ndo? ¿Atu ña nicohón iñi ndo quivi sacachi chi ndi ohon mil rayii chihin ohon tahan ri pan? Ta ¿yoso tahan tica sacutj ndo chihin yiquin cuan?

¹⁰ ¿Atu ña nicohón iñi ndo quivi sacachj chi cumi mil ca ra chihin ucha tahan pan? Ta ¿yoso tahan tica sacutj ndo chihin yiquin cuan?

¹¹ ¿Yoso caa cha ña tuvj iñi nyoho vatyí ñima tuhun pan cahín, cuhva cha catyj vatyí na saha ndo cuenda chí ndo chihin yuchan iya ra fariseo ta ra saduceo? —catyj ra Jesús chí ra.

¹² Tyicuan ta cacutuñi iñi ra vatyí ñima tuhun yuchan iya pan cuan cahán ra, soco na casaha ra cuenda chí ra chihin tuhun cha casañahá ra fariseo ta ra saduceo.

Nu catyj cachi ra Pedro vatyí ra Jesús cuví Cristo ra cha quitá nu nyaá Nyoo
(Mr. 8.27-30; Lc. 9.18-21)

¹³ Cuhva cha chaá ra Jesús ityi ñuu Cesarea Filipino, ndaca tuhun ra chí ra cachicá noo chihin ra ta catyj ra:

—¿Ñáá catyj ñáyivi? ¿Yóó ra cuví Rayii cha quichi nya gloria? —catyj ra.

¹⁴ Ta canacahan ra ta catyj ra:

—Yihí ñu catyj ñu tyi ra Juan ra sacondutya chí ñáyivi cuvún. Ta inga ñu catyj ñu tyi ra Elías, ta yihí tucu ñu catyj ñu tyi ra Jeremías, o inga ra cuví profeta Nyoo ta cha naha.

¹⁵ Tyicuan ta catyj ra chí ra:

—Ta cha cuenda chí nyoho, ¿Yóó ra cuví yuhu?

¹⁶ Tyicuan ta nacahan ra Simón Pedro:

—Yoho cuvún ra Cristo, Sehe Nyoo nyitó —catyj ra.

¹⁷ Ta nacahan ra Jesús ta catyj ra:

—Sii xaan cuví chí yoho, Simón sehe ra Jonás, vatyí ni noo rayii ña sañahá ra chuun tuhun ihya, soco maa Suti ra nyaá andivi sañahá chuun.

¹⁸ Ta yuhu catyj chuun tyi yoho cuvún ra Pedro. Ta siquí cava ihya, savahí vehe ñuhi. Ta ma cuví chasaha tuhun chihí chí chi.

¹⁹ Yuhu cuhve ndaha ticu andivi nu nyacá ñaha Nyoo chuun. Ta cha cuñun ihya siquí ñuhu ñáyivi, cha nuññi sahá maa Nyoo nya andivi. Ta tandihí cha ndachun ihya siquí ñuhu ñáyivi, cha ndachi maa Nyoo nya andivi.

²⁰ Tyicuan ta catyj ra Jesús chí ra cachicá noo chihin ra tyi yori chihin cacahan ra tuhun vatyí ican ra cuví Cristo cha quitá nu nyaá Nyoo.

Nu sacotó ra Jesús tyi cucúvi ra (Mr. 8.31—9.1; Lc. 9.22-27)

²¹ Nya ndaha quívi cuan quichahaꝓ catyí ra Jesús chi ra cachicá noo chihin ra, vatyí cuñí chi cha cuhun ra ñuu Jerusalén. Ta ra cacuví mandoñi, ta ra cacuví nuu chi tata sutu, ta ra sacuaaha ley vehe ñuhu, cucasanyehe xaan ra tindoho chi ra. Ta catyí tucu ra vatyí cucahñi ra chi ra soco nu cu uñi quívi ta cunadoto ra.

²² Tyicuan ta quehen ra Pedro chi ra ta quitá siin ra chihin ra ta quichahaꝓ catyí ra chi ra Jesús vatyí ña vaha cha cahán ra ta catyí ra:

—Ña cuñí Nyoo ta cuvi chuun tyehe caa, Sutu Mañi yuhu.

²³ Soco nanyocavá ra Jesús, ta quichahaꝓ catyí ra chi ra Pedro:

—¡Canyaha chuun nui, cuihna! Vatyí cha cahún tyiña caa nducú sanacavon chíi. Vatyí ña chicá xiñun cuhva chicá xiñi Nyoo. Soco cuhva chicá xiñi ñáyivi chicá xiñun —catyí ra.

²⁴ Tyicuan ta ra Jesús catyí ra chi ra cachicá noo chihin ra:

—Tatu nya nyoho cuñí ndo cunyicon ndo chíi, cuñí chi sánaa ndo iñi ndo tuhun maa ndo. Ta ma ndu uvi iñi ndo cha nyicón ndo chíi, vasi nyehe ndo tindoho cha cuende vatyí yucuan cuví cruzi cha tahán chi cuiso ndo.

²⁵ Vatyí nya nyoho ña cuñí ndo nyehe ndo tindoho cha cuenda yuhu, cucúvi ndo ta cuhun ndo anyaya. Soco nya ndo cuhva ndo ñáyivi ndo cha cuende, cucacu añima ndo.

²⁶ Vatyí ñáá ri tuhun cha saha ganaa ndo tandihí cha tyayii cha iyó siqui ñuhu ñáyivi tatu cunaa añima ndo. Vatyí ñahri chihin catyiyahvi ndo ta cacu añima ndo.

²⁷ Vatyí yuhu Rayii cha quichí nya gloria, cuquichi tiqui soco chihin cha cahnu cuví Suti, ta cuquichi coyo ángel chihin. Tyicuan ta cutyiyahvi chi noo noo ndo yoso cuhva sacuví ndo.

²⁸ Cha ndicha catyí chi ndo, vatyí yihí nyoho cha nyicú ndo ihya cha ma cuví ñaha ndo nyacua nya nyehe ndo chi yuhu Rayii cha quichí nya gloria, cunyehe ndo yoso caa vachí cunyaca ñahi chí ndo —catyí ra Jesús.

17

Nu sañahá Nyoo yoso caa ra Jesús noo cha ndicha nu nyacá ñaha ra (Mr. 9.2-13; Lc. 9.28-36)

¹ Iñu quívi cha yaha, ta quehen ra Jesús chi ra Pedro ta ra Jacobo, ta ra Juan yañi ra Jacobo. Ta cuahan coyo ra noo yucu sucun xaan chihin ra.

² Ta yucuan nasamaꝓ cuhva caa ra Jesús nuu ra ndihi chihin ra. Ta xiño vavaha nanduví nuu ra tari ñanyii. Ta sahma ra cuichin xaan nanduví tari maa ñuhú cuichin.

³ Tyicuan ta cananyehe ra chi ra Moisés ta ra Elías, candatuhún ra chihin ra.

⁴ Ta quichahaꝓ catyí ra Pedro chi ra Jesús: —Sutu Mañi yuhu, vaha xaan cha nyicú ndi ihya. Tatu cuñun ra savaha ndi uñi tahan vehe. Noo chuun, noo chi ra Moisés, ta nonga chi ra Elías —catyí ra Pedro chi ra Jesús.

⁵ Cha ni ri ca cha cahán ra Pedro, quichí ri noo vico cha xiño vavaha siqui ra. Ta sahvi cuan chi ra. Ta chichi vico cuan quita noo ndusu cha catyí chi tyehe caa:

—Ican ra ihya cuví Sehi, ta cuñí xain chi ra. Ta sii xaan cuñí chihin ra. Tyasoho ndo tuhun cahán ra —catyí ndusu cuan.

⁶ Cha cachiñi ra cachicá noo chihin ra Jesús tuhun cuan, cachicavá ra nya ñuhu, ta cayuhví xaan ra.

⁷ Tyicuan ta tuhva ra Jesús nu cayucú ra, ta tiñ ra chi ra, ta catyí ra:

—Ndícuíta ndo. Ma yuhvi ndo.

⁸ Ta cuhva cha cananyehe ra, noo tuhun ri ca ra Jesús nanyaá, ta uvi ca ra cuan, yori ca ra.

⁹ Ta cuhva cha vachí noo coyo ra yucu cuan, catyí ra Jesús chi ra:

—Yori chihin cahán ndo tuhun cha nyehe ndo ihya. Cahán ndo tuhun soco nya yaha cuví ta nandoto yuhu Rayii cha quichí nya gloria —catyí ra.

¹⁰ Tyicuan ta candacaꝓ tuhun ra cachicá noo chihin ra chi ra,

—¡Ñáá tuhun cha catyí ra casacuahá ley vehe ñuhu vatyí xihna ca ra Elías tahán chí quichi?

¹¹ Ta nacahan ra Jesús ta catyí ra:

—Cha ndicha vatyí xihna ca ra Elías quichi ta cusanduvaha ra tandihí.

¹² Soco yuhu catyí chi ndo vatyí cha yaha quichí ra Elías, soco ña nicohon nuu ñáyivi chí ra, ta casacuví ñu chihin ra tandihí cuhva cuñí maa ñu. Ta tyicuan caa tucu yuhu Rayii cha quichí nya gloria, cusanyehe ñu tindoho chíi —catyí ra.

¹³ Tyicuan ta cacutuñi iñi ra vatyí tuhun ra Juan ra sacondutya cahán ra Jesús.

Nu sanduvahaꝓ ra Jesús chí noo ra tyivaa cha yihí noo tatyí ña vaha chí (Mr. 9.14-29; Lc. 9.37-43)

¹⁴ Cuhva cha cachaꝓ coyo ra nu nyicú ñáyivi, tuhva noo ra ta chicuiñi chíti ra nuu ra Jesús, ta catyí ra chi ra:

¹⁵ —Tata, cundahvi cuñi nyehun chí sehi, vatyí yihí noo cuehe chíti tañi chí ra, ta cuaha xaan tindoho nyehé ra chihin cuehe cuan. Ta cuaha xaan chaha nduvaꝓ ca nu

ñuhū ta cayū ra, ta nduvā ra nu ndutya ñandihī.

¹⁶ Ta quichī nyaque chi ra chi ra cachicá noo chuhun, soco ña cuvī sanduvahā ra chi ra —catyí ra.

¹⁷ Ta nacahañ ra Jesús ta catyí ra:

—¡Nyoho, ñu ña chinó iñi cuvī ndo! ¡Ta nicaa ni quifñi iyó ndo! ¿Yoso tahan ca quivī cunyai chihin ndo ta cunyei tisihi ndo nyacua nya cutuhva ndo ta chino iñi ndo chii? Nyaca ndo chi ra tyivaa chiña tyehe —catyí ra.

¹⁸ Tyicuan ta tavā ñehe ra Jesús chi tatyí ña vaha cuan, ta quita cuan chi ra tyivaa cuan. Ta caa cuhva ri cuan ta nduvahā ra.

¹⁹ Cha yahā cuan ta ndaca tuhun siin ra chicá noo chihin ra Jesús chi ra ta catyí ra:

—¿Ñáá tuhun cha ña cuvī tava nyuhu chi tatyí ña vaha cuan?

²⁰ Ta ra Jesús nacahañ ra ta catyí ra:

—Cha cuenda cha chiin xaan chinó iñi ndo chii. Cha ndicha catyí chi ndo vatyi tyehe ta chinó iñi ndo chii, tari cuhva cha cahnu noo chiti mostaza, cuvī catyí ndo chi yucu ihya na canyaha chi ta cuhun chi inga ityi, ta yucu ihya cuhun chi inga ityi. Ta ñahri cha ma cuvī sacuvi ndo tatu ndicha cha chinó iñi ndo chii.

²¹ Soco tahan tatyí ña vaha cuan, quita chi chihin cha ma cachi yo ta cacan tahvi yo —catyí ra Jesús chi ra.

Inga tucu chaha cahán ra Jesús tuhun yoso caa cucahñi ñáyivi chi ra
(Mr. 9.30-32; Lc. 9.43-45)

²² Cha ni ri ca cha iin ri cachicá noo ra ityi Galilea cuan, ra Jesús catyí ra chi ra cachicá noo chihin ra:

—Yuhu Rayi cha quichī nya gloria, cucuhva cuenda ñu chii chichi ndaha ra xaan iñi chii. Ta cucahñi ra chii.

²³ Soco nu cu uñi quivī ta canandote —catyí ra.

Ta canducuihya xaan iñi ra cachicá noo chihin ra cha cachiñj ra tuhun cuan.

Nu catyiyahví ra cuenda vehe ñuhu cahnu

²⁴ Cuhva cha chaā ra Jesús ta ra cachicá noo chihin ra ñuu Capernaum, ra catavá xuhun cuenda vehe ñuhu cuan, chahañ coyo ra chinyehe ra nu nyaá ra Pedro ta candaca tuhun ra chi ra:

—¿Atu ña tyiyahví ra sacuaaha chi nyoho xuhun cha tahán chi cuenda vehe ñuhu cahnu? —cacatyí ra chi ra Pedro.

²⁵ Ta nacahañ ra Pedro ta catyí ra:

—Tyiyahví ra.

Cuhva cha quihví ra Pedro chichi vehe nu ca iyó ra, xihna ca ra Jesús nacahañ ra ta catyí ra:

—¿Yoso caa catyí tucu yoho vityin Simón? Ra cuvī tyiño siqui ñuhu ñáyivi ihya, ¿yóó

chi caquehen ra yahvi? ¿Atu chi ñu ñuu maa ra o chi ñu inga ñuu?

²⁶ Nacahañ ra Pedro ta catyí ra:

—Chi ñu inga ñuu.

Ta catyí ra Jesús chi ra:

—Tu tyicuan caa, ñu ñuu maa ra ña tahán chi tyiyahvi ñu.

²⁷ Soco tacuhva vatyi ma cuhva yo tisihi chi ni noo ra, cuahañ miñi cuan, ta tyihun anzuelo, ta tiyaca cha tavon cha xihna ri, chichi yuhu ti cunañihun noo xuhun. Ta ñihi tyiyahvun cha cuende ta cha cuenda maun. Quehun ta cutyiyahvun —catyí ra Jesús chi ra Pedro.

18

Nu sañahá ra Jesús yóó ra cha cahnu ca cucuvi nu nyacá ñaha Nyoo
(Mr. 9.33-37; Lc. 9.46-48)

¹ Quivī cuan catuhvá ra cachicá noo chihin ra Jesús chi ra, ta candaca tuhun ra chi ra:

—¿Nya ndi cahnu ca cuvī nu nyacá ñaha Nyoo?

² Tyicuan ta ra Jesús canā ra chi noo ra cuehe luhlu, ta chinanyaā ra chi cue mahñu ra.

³ Ta catyí ra:

—Cha ndicha catyí chi ndo, vatyi tatu nyoho ta ma nasama ndo cuhva iyó ndo, ta tatu ma cuvī ndo tari ra cuatyaa, ma cuvī quihvi ndo nu nyacá ñaha Nyoo. Vatyi ra cuatyaa chahá ndotyin cunyaca ñaha sutu ndotyin chi ndotyin, ta tyicuan caa cuhva ndo chi ndo cunyaca ñaha Nyoo chi ndo.

⁴ Ta tyicuan caa ra cahnu ca cuvī nuu Nyoo, ican cuvī ñu ña cahnu sahá chi, ta cuvī ñu tari ra cuehe luhlu ihya.

⁵ Ta ñáyivi cha natiñ cuenda chihin sivi chi noo ra ña cahnu sahá chi, tari ra cuehe luhlu ihya, chi yuhu natiñ cuenda ñu.

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha
(Mt. 5.29-30; Mr. 9.42-48; Lc. 17.1-2)

⁶ Tatu yóó ñu sanacavá nu cuatyí chi noo ra nachinó iñi chii ta cuvī ra tari minoo ra luhlu, vaha taxin ca, cuhñi ñu noo yuu vee sucun ñu ta tuchi ñu chi ñu nu cono tyañuhu.

⁷ ¡Ñana cha ña vaha cha cuenda ñáyivi iyó siqui ñuhu ñáyivi, vatyi iyó tuhun cha sacco ñu cuatyí tahan ñu! Ta tyicuan ri coo tuhun cuan, soco indahvi ñu ndahvi cha sanacava nu cuatyí chi inga ñu!

⁸ Yucuan chaha tatu ndahun o tatu chahun sanacava chuun nu cuatyí, vaha taxin ca cahnya ta sacuiton cañi. Vatyi vaha ca quihvun nu coun chihin Nyoo chihin cha luu ndahun o luu chahun, ta ñima ca cha naniun ta tuchi Nyoo chuun nu cayú ñuhu cha ma ndahva ca maa.

⁹ Ta tatu noo chiti nuun sanacavá chuun nu cuatyí, vaha taxin ca tava ta saçuiton cañi. Vatyí vaha ca quihvun nu coun chihin Nyoo chihin noo chiti nuun, ta ñima ca chihin cha ñinduvi chiti nuun ta tuchi Nyoo chuun nu cayú ñuhu chichi anyaya.

Nu sañahá ra Jesús tyi tari noo mbee cha cuanaa, tyicuan caa cuví yo (Lc. 15.3-7)

¹⁰ Ma tava xiin ndo chi ni noo ra cha cuví tari noo ra luhlu, vatyí catyí chi ndo tyi ángel cha sahá cuenda chí ra, tyicuan ri sacuví ra tyiño nuu Suti, ra nyaá andivi.

¹¹ Vatyí yuhu Rayíi cha quichí nya gloria, vachi sacaquí chi ñáyivi cha cuanaa chihin cuatyí ñu.

¹² ¿Yoso caa catyí nyoho? Tatu noo ra cumí ra noo cientu mbee, ta cuanaa noo ti, çatu ma sandoo ra ndi cumi xico chahun cumi tahan ca ti cuan yucu cuan, ta cuhun ra cunanducu ra chí quití cha cuanaa cuan? Yuhu catyí tyi sandoo ra ta cuhun ra.

¹³ Ta tatu nañihi ra chí ti, cha ndicha vatyí cusí ca cuñi ra chihin quití cuan, ta ñima ca chihin cumi xico chahun cumi ca quití cha ña chinaa cuan.

¹⁴ Ta tyicuan caa tucu, Sutu ndo ra nyaá andivi ña cuñi ra cha cunaa ni noo ñu cuví tari noo ra luhlu.

Yoso caa tahan chi saha yo ticahnu iñi chi tahan yo (Lc. 17.3)

¹⁵ Tatu ra yañun ta sacuví ra cha ña vaha chuhun, çahan chihin noo tuhun ri maa ra ta çayun chí ra tyi ña vaha cuhva sacuví ra. Ta tatu quichaha ra tuhun चाहनु, cha saha ganaun chí ra cuví cuan.

¹⁶ Soco tatu ña quichahá ra chuun, tyicuan ta çanon chí uvi o uñi ra, tacuhva tandihi cha cahun cucuví ra testigu.

¹⁷ Tatu ña quichahá ra ni chí ra cha çahan coyo chuhun cuan, tyicuan ta çahan chihin ra chihin nuu ñáyivi nyicú vehe ñuhu. Ta tatu ña quichaha ra chí ñu vehe ñuhu, tyicuan ta cuví saha ndo tuhun tyi tari noo ra ña chinó iñi chí Nyoo cuví ra, o tari ra catavá xuhun cuenda gobiernu ñuu Roma.

¹⁸ Cha ndicha catyí chi ndo, vatyí tandihi cha cuhñi ndo ihya siqui ñuhu ñáyivi, ta cha nuhñi saha maa Nyoo nya andivi. Ta tandihi cha ndachi ndo ihya siqui ñuhu ñáyivi, cha ndachi maa Nyoo nya andivi.

¹⁹ Ta suri catyí tiquí chí ndo, vatyí tatu uvi nyoho ihya siqui ñuhu ñáyivi, ndu iin ri ndo ta cacan tahví ndo cuenda ñáá noo cha cuñi ndo cacan ndo, Suti, ra nyaá andivi cuhva ra chí ndo.

²⁰ Vatyí nu nyicú uvi o uñi ñu sacahnú chii, yucuan cunyai mahñu ñu —catyí ra Jesús.

²¹ Tyicuan ta çahan ra Pedro chindaca tuhun ra chí ra Jesús ta catyí ra:

—Sutu Mañi yuhu, tatu ra tahin ta sacuví ra ñáá noo cha ña vaha chihin, ¿yoso tahan çaha tahan chí sahi ticahnu iñi chí ra? ¿Atu ucha tahan çaha?

²² Ta nacahan ra Jesús ta catyí ra:

—Catyí chuun vatyí ñima ucha tahan ri çaha, soco tandihi ri çaha.

Nu çahán ra Jesús noo cuhva cuenda noo ra cha ña cuñi saha ticahnu iñi

²³ Yucuan çaha cha nyacá ñaha Nyoo añima ñáyivi cuví chí tari noo rey cha nacana chí tandihi musu vatyí cuanyehe ra yoso yosó yica ñu chí ra.

²⁴ Ta cuhva cha quichahá natava ra cuenda, ta quichí nyaca ñu chí noo musu cha cuaha millón pesu yosó yica chí ra.

²⁵ Ta musu cuan ñahri maa chihin tyiyahvi ra chí chitoho ra, ta chitoho ra catyí ra: “Cuaxico ndo chí ra iin cuenda ri chihin ñasihi ra, ta chihin sehe ra ta tandihi cha iyó chí ra tacuhva vatyí chihin xuhun cuan cunatyiyahvi ra cha yosó yica ra chii.”

²⁶ Tyicuan ta musu cuan chicuñi chí ra nuu chitoho ra, ta chacu ndahvi ra nuu ra, ta catyí ra: “Tata, çatu noo chiin chii, ta tyiyahvi mai tandihi chuun”, catyí ra.

²⁷ Ta cundahví cuñi chitoho ra chí ra, ta saha ra ticahnu iñi chí ra, ta sanaa ra tandihi cha yoso yica ra, ta saña ra chí ra.

²⁸ Soco cuhva cha quitá musu cuan, nañihí ra chí noo ra tahan ra cha cuví musu tari maa ra. Ta ra cuan yosó yica ra chiin ri chí ra. Ta tiñ ra chí ra cuan, ta quichahá quitu ra sucun ra, ta catyí ra chí ra: “Tyiyahvi cha yosó yicon chii.”

²⁹ Tyicuan ta chicuñi chí ra cuan nuu ra, ta chacu ndahvi ra nuu ra ta catyí ra: “Çatu noo chiin chii, ta tyiyahvi mai tandihi chuun”, catyí ra.

³⁰ Soco maa ra ña cuñi ra, ta çahan ra ta tyihí ra chí ra vehe caa nyacua nya cha tyiyahvi ra cha yosó yica ra chí ra.

³¹ Cha canyehe inga ca musu cha sacuví ra, uhvi xaan cacuví chí ra, ta çahan coyo ra chinacatyí ra chí chitoho ra cha sacuví ra cuan.

³² Tyicuan ta chitoho ra cuan tachí ra tyiño na quichi ra ta catyí ra chí ra: “Musu ña vaha cuvún. Yuhu sahi ticahnu iñi tandihi cha yosó yicon chii, vatyí chacu ndahvun nuí.

³³ Tyicuan caa tucu cuñi chí cundahvi cuñun chí ra tahan cuan tari cundahví cuñi nyehi chuun”, catyí ra chí ra.

³⁴ Ta cuxaan xaan chitoho ra, ta tachí ra tyiño na tachí tuñi ñu chí ra, nyacua nya cha tyiyahvi ra tandihi cha yosó yica ra.

³⁵ Ta nu ndihi çahan ra Jesús, ta catyí ra tyehe caa:

—Tyicuan caa tucu cusacuvi Suti, ra nyaá andívi, chihin ndo tatu ma saha ndo ticahnu iñi chihin cha tandihí añima ndo chi tahan ndo.

19

Nu sañahá ra Jesús tyi ña vaha sandoo ñáyivi chi ñasihi ñu o yíi ñu
(Mr. 10.1-12; Lc. 16.18)

¹ Cha yaha cha catyí ra Jesús tuhun ihya, ta quita ra Galilea cuan, ta cuahan ra ityi Judea cha nyaá inga chiyo yuvi cahnu Jordán, ityi nu caña ñanyii.

² Cuaha ñáyivi chinyicon chi ra, ta yucuan sanduvaha ra chi ñu cuhvi.

³ Tyicuan ta suhva ra fariseo catuhva ra chi ra Jesús, vatyi cacuñi ra nducu ra cuhva tyaa ra cuatyí siqui ra. Ta candaca tuhun ra chi ra ta catyí ra:

—¿Atu vaha cha sandoo rayii chi ñasihi ra cha cuenda ñáá ri tisihi luhlu chaha ña chi ra?

⁴ Ta nacahan ra ta catyí ra:

—¿Atu ta sacuha ca nyoho nu tutu Nyoo nu catyí chi vatyi ra cha savaha chi ndo nya quivi xihna ri, savaha ra rayii ta ñaha sihi?

⁵ Ta catyí tucu chi tyehe caa: “Tahán chi sandoo rayii chi sutu ra ta chi sihi ra, ta ndu iin ri ra chihin ñasihi ra. Ta chichi cha ninduvi ñu, cucuvi ñu tari cha noo ri ñáyivi.”

⁶ Yucuan chaha, ñima ca uvi tahan cuví ñu, soco cha nanduvi ñu noo ri ñáyivi. Yucuan chaha, cha sandu iin ri Nyoo ña tahán chi cha sasihi ñáyivi —catyí ra.

⁷ Tyicuan ta candaca tuhun ra chi ra Jesús ta cacatyí ra:

—¿Ñáá tuhun cha tyaa ra Moisés vatyi cuví cahnya noo rayii tutu chihin ñasihi ra ta sandoo ra chi ña?

⁸ Ta ra Jesús catyí ra chi ra:

—Cha cuenda cha ndavá añima ndo, yucuan chaha, chaha ra Moisés cha sandoo ra ñasihi ra. Soco quivi xihna ri ñima tyicuan caa cuvji.

⁹ Yuhu catyí chi ndo tyehe caa: Ra cha sandoo ñasihi, ta ñima cha cuenda cha natuvi ña chihin inga ra, ta tandaha ra chihin inga ñu, chicoo cuatyí ra nuu Nyoo. Ta ra cha tandaha chihin noo ñaha sihi cha sandoo yíi chi, suri chicoo tucu cuatyí ra cuan —catyí ra.

¹⁰ Tyicuan ta ra cachicá noo chihin ra, cacatyí ra chi ra:

—Tatu tyicuan caa tahán chi coo rayii chihin ñasihi ra, vaha taxin ca ma tandaha yo.

¹¹ Ta ra Jesús catyí ra chi ra:

—Soco ña tandihí ñáyivi cuví cutuñi iñi ñu tuhun ihya. Soco ñu cha chaha Nyoo cha cutuñi iñi, ican ñu cua cutuñi iñi.

¹² Cha ña tandaha ñáyivi, cuaha ri cuenda cuví. Yihí ñu ña quichi cuví iñi ñu tandaha ñu vatyi iin caa maa ñu cacu ñu. Ta inga ñu ña quichi cuví iñi ñu tandaha ñu vatyi cha yaha tava ñáyivi ñii ñu. Ta yihí ñu ña tandaha ñu cha cuenda cha cuñi ñu sacuvi ñu tyiño nuu Nyoo, na nducuaha añima cha nyacá ñaha Nyoo. Tandihí ñu cuví sacuvi tyehe caa, na sacuvi ñu —catyí ra Jesús.

Nu nasocó ra Jesús chi ra cuatyaa
(Mr. 10.13-16; Lc. 18.15-17)

¹³ Tyicuan ta quichi nyaca ñu suhva ra cuatyaa chi ra Jesús tacuhva na tyiso ra ndaha ra siqui ndotyin, ta cacan tahvi ra chaha ndotyin. Soco ra cachicá noo chihin ra quichaha cacahan ra chi ñu quichi nyaca chi ndotyin.

¹⁴ Soco ra Jesús catyí ra:

—Saña ndo chi ra cuatyaa, na quichi maa ndotyin nu nyaí. Ta ma casi ndo. Vatyi ñu nyacá ñaha Nyoo añima, cuví ñu tari ra cuatyaa ihya —catyí ra.

¹⁵ Tyicuan ta tyiso ra ndaha ra siqui ndotyin. Yaha cuan ta cuahan ra.

Nu cahan noo ra tyivaa tyayii chihin ra Jesús
(Mr. 10.17-31; Lc. 18.18-30)

¹⁶ Noo ra tyivaa chahan ra chindaca tuhun ra chi ra Jesús ta catyí ra:

—Maestro vaha xaun. ¿Ñáá cha vaha tahán chi sacuvi ta ñihi ñayivi cha ma naa ca maa coi?

¹⁷ Ta ra Jesús catyí ra chi ra:

—¿Ñáá tuhun cha catyun tyi vaha yuhu? Noo ri ra vaha iyó ta ican ra cuan cuví Nyoo. [Ta cha catyun tyi vahi, nacotón tyi Nyoo cuví.] Soco tatu cuñún quihvun ñayivi cha ma naa ca maa, sacuvun tandihí tuhun cha tachí Nyoo tyi sacuvi yo —catyí ra chi ra.

¹⁸ Ta ra tyivaa cuan catyí ra:

—¿Nya cha cuví cuan?

Ta ra Jesús catyí ra chi ra:

—Ma cahñun chi ñáyivi. Ma coo inga ñusihi chuun. Ma suhan cha chii ñáyivi. Ma cahun cuendu siqui ñu.

¹⁹ Saha ñáyivi chi sutun ta chi sihun. Ta cuñun chi ñáyivi, tari cha cuñun chi maun.

²⁰ Ta ra tyivaa cuan, catyí ra chi ra:

—Tandihí tuhun ihya ta quichahí nyata luhli ta nya vityin. ¿Ñáá ca cha cumañi chii?

²¹ Ta ra Jesús catyí ra chi ra:

—Tatu cuñún cuvun noo ra cuii nuu Nyoo, cuahan ta xicon cha iyó chuun, ta cuhvun chi ñu ndahvi, ta cunyicon chii. Tyicuan ta coo cha tyayii chuun nya gloria —catyí ra.

²² Soco cuhva cha chifi ra tyivaa cuan cha cahan ra Jesús tyehe caa, cuihya xaan cuanuhu ra vatyi tyayii xaan ra.

²³ Tyicuan ta ra Jesús catyí chi ra cachicá noo chihin ra:

—Cha ndicha catyí chi ndo vatyí yíi xaan cuhva ra tyayíi cha cunyaca ñaha Nyoo añima ra.

²⁴ Catyí chi ndo inga chaha, vatyí numi ca yaha noo camellu xiyu noo yiqui ticu, ta ñima ca noo ra tyayíi ta cuhva ra chi ra cha cunyaca ñaha Nyoo —catyí ra Jesús.

²⁵ Cha cachiñi ra cachicá noo chihin ra tuhun ihya, iyo xaan cacuñi ra, ta quichaha candaca tuhun ra chi ra tahan ra, ta cacatyí ra:

—Tu tyicuan caa, ¿yóo cha cuví cacu vii?

²⁶ Tyicuan ta nanyehę ra Jesús nu nyicú ra ta catyí ra:

—Ñáyivi ma cuvi sacuvi ñu tyehe caa, soco Nyoo cuví sacuvi ra tandihi.

²⁷ Tyicuan ta quichaha catyí ra Pedro chi ra:

—Sutu Mañi yuhu, nyuhu tandihi maa cha iyó chi ndi sandoo ndi ta nyicón ndi chuun. ¿Ñáa cha cuñihi ndi? —catyí ra chi ra.

²⁸ Ta nacahan ra Jesús ta catyí ra:

—Cha ndicha catyí chi ndo, vatyí quívi cha cunduchaa tandihi, yucuan quívi yuhu Rayíi cha quichí nya gloria cucunyai ta cunyaca ñahi, ta nyoho cha nyicón ndo chii, cunyaa tucu nyoho nu uchi uvi tahan tyayu tyaquí. Ta cunyaca ñaha ndo chi ndi uchi uvi tahan ityi ñáyivi Israel.

²⁹ Ta tandihi ndo cha sandoo ndo vehe ndo, o yañi ndo, o cuhva ndo, o sutu ndo, o sihi ndo, o ñasihi ndo o sehe ndo, o ñuhú ndo cha catyí yuhu, cunañihi ndo noo cientu ca chaha siquí cuan, ta cunañihi tucu ndo ñáyivi cha ma naa ca maa coo ndo.

³⁰ Cuaha xaan ñu cuahan ityi nuu vityin, ican ñu cuan, cuhun nya nu ndihi. Ta cuaha xaan ñu cuahan nu ndihi vityin, ican ñu cuhun ñu ityi nuu.

20

Nu sañhá ra Jesús noo cuhva cuenda ra casahá tyiño

¹ Cha nyacá ñaha Nyoo añima ñáyivi, cuví chi tari noo chitoho chaco yoho tichaha ndivi. Ta chitoho chaco cuan ñaha cuiri quita ra cuanducu ra cuaha ri musu cusaha tyiño nu tyiño saha ra.

² Ta sandaq ra tyiño chihin musu cuan vatyí cutiyahvi ra yahvi cha tahán chi chi ra cha noo quívi, ta tachí ra chi ra cusaha tyiño ra nu iyó tyiño sahá ra.

³ Yahq cuan ta quita tucu ra cuhva cha caa ñin cha ñaha ri. Ta nanyehę ra chi suhva ca ra canyicú ri maa nuyahvi cuan.

⁴ Ta catyí ra chi ra: “Cuahan tucu nyoho cua saha tyiño ndo nu iyó tyiño sahá, ta

tyiyahvi mai yahvi cha tahán chi chi ndo.” Tyicuan ta cuahan coyo tucu ra cuan.

⁵ Tyicuan ta chitoho chaco cuan quita tucu ra inga chaha cuhva cha ora. Yucuan ta quita tucu ra cuhva cha caa uñi cha cha ñi.

⁶ Ta yahq cuan ta quita tucu ra cuhva cha caa ohon cha cha ñi ta nanyehę ra canyicú ri maa suhva ca ra nuyahvi cuan. Ta catyí ra chi ra: “¿Ñáa tuhun cha canyicú ri maa nyoho ndiyaca ihya, ta ña sahá tyiño ndo?”

⁷ Ta canacahan ra cuan ta catyí ra: “Yori maa cahan chihin ndi cha cusaha tyiño ndi.” Tyicuan ta catyí ra chi ra: “Cuahan tucu nyoho cua saha tyiño ndo nu iyó tyiño sahá. Ta tyiyahvi mai chi ndo yoso cuhva cha tahán chi chi ndo”, catyí ra.

⁸ Ta cuhva cha cuaa cuan, chitoho tyiño cuan catyí ra chi ra cuví nuu chi musu cuan: “Na canon chi musu, ta tyiyahvun chi ra. Quichaha tyiyahvun chi ra cha caquihvi nu ndihi, ta nu ndihi ta tyiyahvun chi ra cha caquihvi cho xihna ri”, catyí ra.

⁹ Tyicuan ta chaq coyo ra cha caquihvi cuhva cha caa ohon cha cha ñi cuan. Ta tahan tahan ra quehen ra yahvi naní noo quívi.

¹⁰ Yahq cuan, ta cuhva cha tahán chi chi ra cha caquihvi coyo cha xihna ri cuan, cacuñi maa ra vatyí cuaha ca cutiyahvi ra chi ra. Soco suri ñin ri yahvi noo quívi caquehen ra.

¹¹ Ta cuhva cha caquehen ra, quichaha cacahan ra chi chitoho tyiño cuan.

¹² Ta catyí ra: “Ra cha cachaq coyo nu ndihi ihya, noo tuhun hora casaha tyiño ra. Ta ñin ri cuhva tyiyahvun chi ra chihin nyuhu cha saha tyiño ndi nu cahñi ndiyaca”, cacatyí ra.

¹³ Soco nacahan chitoho tyiño cuan, ta catyí ra chi noo ra cuan: “Amigo, ñahri cha ña vaha sacuví chuun. ¿Atu ñima yahvi cha noo quívi catyí vatyí tyiyahvi chuun?”

¹⁴ Quehen yahvun, ta cuanuhu. ¿Atu ñahri ityi iyó chii cha tyiyahvi chi ra cha quihvi nu ndihi ñin ri cuhva cha tyiyahvi chi yoho?

¹⁵ ¿Atu ñahri ityi iyó chii cha sacuvi cha cuñi mai chihin xuhin? ¿Atu quívi cuñin tyi vaha ñáyivi cuví chihin inga ra cuan?” catyí ra.

¹⁶ Ta tyicuan caa ñu quihvi nu ndihi, cuhun ñu ityi nuu. Ta ñu cuahan ityi nuu, nya nu ndihi cuhun ñu. Vatyí cuaha xaan ñu nacaná Nyoo chi. Soco chiin xaan ri ñu nacachí ra.

Inga chaha sacotó ra Jesús yoso caa cucahñi ñáyivi chi ra
(Mr. 10.32-34; Lc. 18.31-34)

¹⁷ Cuhva cha cuñí cahun ra Jesús nya Jerusalén, caná siin ra chi ndi uchi uvi ra cachicá noo chihin ra ta catyí ra chi ra:

¹⁸ —Ta cha nyehę maa ndo vatyi cuahan yo Jerusalén vityin. Ta yucuan cucuhva cuenda ñu chi yuhu Rayii cha quichí nya gloria chi ra cacuvi nuu chi tata sutu, ta chi ra casacuaaha ley vehe ñuhu, ta cucatyí ra tyi tahán chi cúvi.

¹⁹ Ta cucuhva cuenda ra chii chi ra ñuu Roma, ta cucuacu nyaa ra chii, ta cucañi ra chii, ta cucahñi ra chii nu cruzi. Soco nu cu uñi quivi cunandote —catyí ra Jesús chi ra.

Nu chicán sihi ra Jacobo ta ra Juan noo tumañi iñi chi ra Jesús
(Mr. 10.35-45)

²⁰ Tyicuan ta sihi ra Jacobo ta ra Juan sehe ra Zebedeo tuhvá ña nu nyaá ra Jesús chihin ninduvi sehe ña. Ta chicuiñi chiti ña nuu ra vatyi cacan ña noo tumañi iñi chi ra.

²¹ Ta quichaha ndaca tuhun ra Jesús chi ña:

—¿Ñáá cha cuñún?

Ta catyí ña:

—Quivi cha cunyaun nu nyacá ñahun nya andivi, cuhva cha cunyaa ninduvi sehi xiun. Na cunyaa noo ra chiyo vahun, ta inga ra cunyaa ra chiyo satyun.

²² Soco nacahan ra Jesús ta catyí ra:

—Nyoho ña chitó ndo cha chicán ndo.

¿Atu cuví nyehe nyoho tindoho cha cunyehe yuhu? ¿Atu cuví cahun ndo tuhun chihí tari cuhva cahun yuhu? —catyí ra.

Ta canacahan ra ta catyí ra:

—Cuví chi ndi.

²³ Ta catyí ra Jesús chi ra:

—Cha ndicha vatyi cunyehe ndo tindoho, ta cahun ndo tuhun chihí tari cahun yuhu tuhun chihí. Soco tuhun cha cunyaa ndo chiyo vahi ta chiyo satyin, ñima yuhu tahán chi cuhve chi ndo, soco maa Suti cucatyí ra yóo cha cuñihi nyatu cuan —catyí ra Jesús chi ra.

²⁴ Ta cha cachiñi uchi ca ra cachicá noo chihin ra Jesús tuhun cuan cacuxaḡan ra chihin ninduvi ra cuan.

²⁵ Soco canaḡ ra Jesús chi ra ta catyí ra chi ra:

—Cha chitó maa ndo, vatyi ra nyacá ñaha chi ñáyivi iyó siqui ñuhu ñayivi ihya, ñihi xaan nyacá ñaha ra chi ñu tari nyaca ñaha ra musu ra.

²⁶ Soco ñima tyicuan caa tahán chi sacuvi nyoho. Vatyi ra cha cuñi cuahnu ca nu Nyoo, cuñi chi cuví ra musu tandihí ca ndo.

²⁷ Ta nya nyoho cha cuñi ndo cuví ndo nuu, cuñi chi cuví ndo musu tandihí ca ñu.

²⁸ Tari yuhu Rayii cha quichi nya gloria, ña vachi vatyi sacuvi ndo tyiño nui, soco vachi sacuvi tyiño nuu ndo, ta cuhve ñayivi.

Vatyi chihin cuan ta cuvi sacaqui cuaha ñáyivi.

Nu sanduvahá ra Jesús chi uvi ra cuaa
(Mr. 10.46-52; Lc. 18.35-43)

²⁹ Cuhva cha cua quitá coyo ra ñuu Jericó, cuaha xaan ñáyivi cuahan chihin ra Jesús.

³⁰ Ta yuhu ityi cuan canyicú uvi tahan ra cuaa. Ta cuhva cha cachiñi ra vatyi cua yaha ra Jesús, quichaha canachaa ra. Ta catyí ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi! —cacatyí ra.

³¹ Ta ñáyivi quichaha cahan ñu chi ra na cacasi ra yuhu ra. Soco maa ra ñihi ca cacanaḡ chaa ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi!

³² Tyicuan ta chicuiñi ra Jesús ta canaḡ ra chi ninduvi tahan ra cuaa cuan, ta ndaca tuhun ra chi ra:

—¿Ñáá cha cuñi ndo cha sacuvi chihin ndo?

³³ Ta canacahan ra ta catyí ra:

—Sutu Mañi yuhu, cuñi ndi nyehe ndi.

³⁴ Tyicuan ta cundahvi cuñi ra Jesús nyehe ra chi ra, ta tiin ra chiti nuu ra. Ta caa cuhva ri cuan cananyeḡ ra, ta cananyicon ra chi ra Jesús.

21

Nu quihvi ra Jesús Jerusalén
(Mr. 11.1-11; Lc. 19.28-40; Jn. 12.12-19)

¹ Cuhva cha cua chaḡ coyo ra ñuu Jerusalén, ta cachaḡ ra ñuu Betfagé, yatyin ri nu cuví yucu yutun Olivo. Tyicuan ta tachí ra Jesús tyiño chi uvi ra chicá noo chihin ra.

² Ta catyí ra chi ra:

—Cuahan ndo ñuu cha nyaá ityi nuu ihya. Ta yucuan cunañihi ndo noo burru sihi, nuhñi ti. Ta nyacá ti noo burru luhlu. Ndachi ndo chi ti, ta quichi nyaca ndo chi ti chii.

³ Ta tatu yóo cha catyí ñáá cha catyí chi ndo, catyí ndo chi ñu: “Vatyi chihuhú ti chi maa ra nyacá ñaha, soco numi ri quichi nanyaca ndi chi ti”, catyí ndo chi ñu —catyí ra.

⁴ Tyehe caa cuví tacuhva na chino cava tuhun cha catyí ra profeta nu tyaḡ ra tyehe caa:

⁵ Catyí ndo chi ñu ñuu Sión:

“Nyehe ndo, vachi rey maa ndo nu nyaá ndo.

Ndahvi ri vachi ra yosó ra noo burru luhlu, sehe noo quiti cha tuhvá nyisó carga”, catyí ra profeta.

⁶ Tyicuan ta cuahan coyo ra cachicá noo chihin ra, ta casacuvj ra tari cuhva catyí ra Jesús chi ra.

⁷ Caquichí nyaca ra chi ti chíhin sihi ti. Ta catyiso ra sahma ra siqui ti, ta ndaa ra Jesús chi ti.

⁸ Ta cuaha xaan ñáyivi candicā ñu sahma ñu ityi nu cuahan ra, ta inga ñu catohon ñu numa yutun ta cachacun ñu ityi.

⁹ Ta ñáyivi cha cuahan ityi nuu ta ityi chata, quichahā cana chaa ñu ta catyi ñu:

—¡Cahnu xaan cuví ra vachi tata rey David! ¡Cahnu xaan cuví ra vachi cuenda Sutu yo Nyoo! ¡Ta sacahnú xaan yo chi Nyoo nu nyaá ra ityi andivi! —catyi ñu.

¹⁰ Cuhva cha chaā ra Jesús ñuu Jerusalén cuan, tandihi maa ñáyivi ñuu naquiqui, ta cuaha xaan ñu candacá tuhun ñu chí tahan ñu, ta catyi ñu:

—¿Yóo ra cuví ra ihya?

¹¹ Ta ñáyivi catyi ñu:

—Ra Jesús, ra chahá cuenda tuhun cahan Nyoo, ra ñuu Nazaret nu cuví Galilea cuví ra —catyi ñu.

Nu tavá ñehe ra Jesús chi ra caxicó chichi vehe ñuhu cahnu

(Mr. 11.15-19; Lc. 19.45-48; Jn. 2.13-22)

¹² Yahā cuan ta quihvi ra Jesús chichi vehe ñuhu cahnu Nyoo. Ta tavá ñehe ra chí tandihi ra casatá ta ra caxicó yucuan. Ta sanduvā ra mesa ra canasamá xuhun chí ñáyivi yucuan. Ta sanduvā ra tyayu ra caxicó paloma.

¹³ Ta catyi ra:

—Nu tutu Nyoo catyi chí tyehe caa: “Vehi, vehe nu chicán tahvi ñáyivi chíi cuví, ta tyicuan caa cucunañi chí. Soco nyoho cha nasahā ndo vehe nu nyicú ra suhu” —catyi ra.

¹⁴ Chichi vehe ñuhu cuan catuhvā suhva ra cuaa ta ra coxo chí ra Jesús. Ta maa ra sanduvahā ra chí ra.

¹⁵ Soco canyehē ra cacuví nuu chí tata sutu ta ra casacuahá ley vehe ñuhu cuan vatyi savahā ra Jesús milagru, ta canachā ra cuatyaa chichi vehe ñuhu, ta catyi ndotyin:

—¡Cahnu xaan cuví ra vachi tata rey David! —catyi ndotyin.

Tyicuan ta cacuxaā tata sutu ta inga ra cuan cha canyehē ra ta cha cachíñi ra.

¹⁶ Ta cacatyí ra chí ra Jesús tyehe caa:

—¿Atu chíñún cha cahán ndotyin?

Ta nacahan ra Jesús ta catyi ra:

—Chíñi. Soco ¿atu ta sacuahā ca ndo nu tutu Nyoo nu catyi chí tyehe caa? Sutu Mañi yuhu, sacuvun vatyi ra cuatyaa nyihí cata ndotyin.

Ta ra cuatyaa lee cha chaxín sacahnú ndotyin chuun, catyi chí, —catyi ra Jesús.

¹⁷ Tyicuan ta sandoo ra chí ra, ta quitā ra ñuu cuan ta cuahan ra ñuu Betania. Ta yucuan ndoo ra cha cuaa cuan.

Nu tyanahá ra Jesús chí tu higo vatyi ñahri higo iñi nuu tun

(Mr. 11.12-14, 20-26)

¹⁸ Tuvi inga quivi. Ta cha ñaha ri, cua ndichi ra Jesús nya Jerusalén, ta chaā soco chí ra.

¹⁹ Ta nanyehē ra noo tu higo yatyin ri yuhu ityi cuan. Ta tuhvā ra nu nanyaá tun, soco ñahri maa nañihi ra nuu tun. Maa maa ri maa numa ri iñi nuu tun. Tyicuan ta catyi ra chí tun tyehe caa:

—¡Ni nonga chaha ma cuhva con chíti!

Ta caa cuhva ri cuan ta na ityi tun.

²⁰ Ta cha nyehē ra cachicā noo chíhin ra cha sacuví ra, iyo cacuñi ra, ta ndacā tuhun ra chí ra ta catyi ra:

—¿Ñáa tuhun cha numi xaan na ityi tu higo cuan?

²¹ Ta nacahan ra Jesús ta catyi ra:

—Cha ndicha catyi chí ndo, vatyi tatu chinó iñi ndo ta ma nacaca uvi iñi ndo, ñima ihya ri cha sacuví chí tu higo ihya cuví sacuvi ndo, soco cuví catyi ndo chí yucu ihya tyehe caa: “Canyaha chuun ihya ta cuahan nya chichi tyañuhu.” Ta tyicuan caa cucuvi.

²² Ta tandihi cha cacan ndo nu chicán tahvi ndo, tatu chinó iñi ndo tyi cucuhva Nyoo, cuñihi ndo —catyi ra Jesús.

Nu sañahá chí yóo ra chahā tyiño chí ra Jesús

(Mr. 11.27-33; Lc. 20.1-8)

²³ Yahā cuan ta quihvi ra Jesús chichi vehe ñuhu cahnu, ta cha ni ri ca cha sañahá ra yucuan, tuhvā ra cacuví nuu chí tata sutu chí ra, ta ra cacuví mandoñi ñu ñuu Israel, ta candacā tuhun ra chí ra:

—¿Yóo cha tyaā tyiño vatyi sacuvun tyehe caa, ta yóo cha chahā tyiño cuan chuun?

²⁴⁻²⁵ Ta nacahan ra Jesús ta catyi ra:

—Yuhu tucu cua ndaca tuhun noo tuhun chí ndo. ¿Yóo cha tachí chí ra Juan vatyi sacondutya ra chí ñáyivi? ¿Atu Nyoo tachí chí ra, o ñáyivi? Tatu catyi ndo chíi, cucatyí tucu yuhu chí ndo yóo cha tyaā tyiño ihya chíi —catyi ra Jesús chí ra.

Tyicuan ta quichahā cacuvi yuhu ra chíhin ra tahan ra, ta cacatyí ra:

—Tatu catyi yo tyi Nyoo tachí chí ra, cucatyí ra chí yo: “Tu tyicuan caa, ¿ñáa tuhun ña chinó iñi ndo chí ra?”

²⁶ Ta tatu catyi yo tyi ñáyivi, ñáyivi cuví nacanda ñu siqui yo, vatyi tandihi ñu chinó iñi ñu tyi ra Juan, cuenda Nyoo cahan ra —catyi ra chí ra tahan ra.

²⁷ Tyicuan ta quichahā cacatyí ra chí ra Jesús tyehe caa:

—Ña chitó ndi.

Tyicuan ta ra Jesús catyi ra chí ra:

—Ni yuhu, ta ma catyi chí ndo yóo cha tyaā tyiño ihya chíi.

Nu cahán ra Jesús noo cuhva cuenda uvi tahan sehe noo ra

²⁸ Ra Jesús catyí ra chi ra:

—¿Yoso caa catyí ndo cuenda tuhun cha cua catyí ihya? Noo ra, iyó uvi tahan sehe ra. Ta catyí ra chi noo sehe ra: “Cuahān cua saha tyiño nu iyó tyiño sahi.”

²⁹ Ta nacahān sehe ra ta catyí ra: “¡Ma cuhin!” Soco yahā cuan ta nasamā cuhva chicá xiñi ra ta chahān ra chisaha tyiño ra.

³⁰ Yahā cuan ta sutu ra chahān ra nu nyaá inga sehe ra. Ta catyí tucu ra chi ra na cuhun ra cusaha tyiño ra. Soco ra yucuan numi ri quehen ra tuhun, ta catyí ra: “Vaha, Tata, cuhin.” Soco ña chahān ra.

³¹ Chichí cha ninduvi tahan ra, ¿nya ra sacuvj ra cha catyí sutu ra? —catyí ra Jesús.

Ta nacahān ra ta cacatyí ra:

—Ra cha cahān ra chihin cha xihna ri.

Ta catyí ra Jesús chi ra:

—Cha ndicha catyí chi ndo, vatyí xihna ca ra catavá xuhun cuenda gobiernu, ta ñu cata iñi cuquihvi ñu nu nyacá ñaha Nyoo, ican saha nyoho.

³² Vatyí ra Juan ra sacondutya quichí ra, quichí sañaha ra chi ndo yoso caa tahán chi coo ndo, soco nyoho ña chingo iñi ndo chi ra, soco ra catavá xuhun ta ñu cata iñi cachino iñi ñu chi ra. Ta nyoho vasi nyehe ndo ihya, soco ña nasamā ndo cuhva iyó ndo, tacuhva chino iñi ndo chi ra.

Nu catyí ra Jesús vatyí ra cacahñi chi ra cuví ra tari ra sahá tyiño ña vaha (Mr. 12.1-12; Lc. 20.9-19)

³³ Tyasoho ndo inga cuhva ihya: Chiyo noo chitoho noo ñuhú, ta tachí ra yoho tichaha ndivi, ta tyihj ra noo chacu. Ta savahā ra noo nu cuhñi ra tichaha ndivi cuan ta tava ra ndutya chi. Ta savahā tucu ra noo vehe sucun tacuhva vatyí cuví saha ra cuenda tandihi.

Yahā cuan ta chahā noo ra ñuhú cuan chi suhva ra casahá tyiño, ta cuahan ra inga ñuu.

³⁴ Ta cha chaq quivi cha iyó tichaha ndivi cuan, tachj ra chi suhva musu, na cucacan ra chi ra casahá tyiño cuan, na cuhva ra suhva tichaha ndivi cha tahán chi chi ra.

³⁵ Soco ra casaha tyiño cuan, catijn ra chi musu cuan, ta cacañj ra chi noo ra. Ta chi inga ra cachahñj ra, ta catuchj ra yuu chi inga ra.

³⁶ Tyicuan ta cha inga chaha, cuaha ca musu tachj chitoho chacu cuan ta ñima ca cha xihna ri. Soco tari casacuvj ra chi ra cha xihna ri, sacuvj tucu ra chí ra ihya.

³⁷ Nu ndihi tachj ra chi maa maa sehe ra, vatyí cuñí maa ra vatyí cusaha ra ñáyivi chi sehe ra.

³⁸ Soco cuhva cha cananyehe ra casahá tyiño cuan chí sehe ra, catyí ra chí ra tahan

ra tyehe caa: “Ican ra ihya cundoo chihin tandihi ihya. Na cahñi yo chi ra tacuhva ndoo maa yo chihin”, cacatyí ra.

³⁹ Tyicuan ta catijn ra chí ra, ta catava ra chí ra ityi chata chacu, ta cachahñj ra chí ra —catyí ra Jesús.

⁴⁰ Tyicuan ta ndaca tuhun ra Jesús chí ñu: —Quivi quichi chitoho ñuhú cuan, ¿ñáá cha cusacuvi ra chihin ra casahá tyiño quiñi iyó cuan?

⁴¹ Ta nacahān ra ta cacatyí ra:

—Ma cuatu ra, soco cahñi ra chí ra caquiñi iyó cuan. Ta cuhva ra ñuhú cuan chí inga ra casahá tyiño. Ta quivi coo tichaha ndivi, cunacuhva cuenda ra chí chitoho chacu cuan cha tahán chí chí ra.

⁴² Tyicuan ta quichaha catyí ra Jesús chí ñu:

—¿Tatu ta sacuahā ca nyoho nu tutu Nyoo nu catyí chí tyehe caa?

Yuu cha ña cuñj ra casavahá vehe cotyíño

ra,

ican cuan cuví yuu cha niñi ca.

Ican ihya cuví cha sacuvj Sutu yo Nyoo.

Ta tyaqui xaan tuhun cuan cha cuenda chí

yo, catyí chí.

⁴³ Yucuan chaha catyí chí ndo vatyí maa cuhva ca Nyoo cuhun ndo nu nyacá ñaha ra, ta cucuhva ra chí ñu cha ndicha nyacá ñaha ra añima. Vatyí maa ñu cunacuhva cuenda ñu cha vaha cha tahán chí chí ra.

⁴⁴ Ta cha cuenda yuu cuan, yóó ñu cha nduva siqui chí, yiquin maa cucuvi ñu. Ta tatu yuu cuan ta canacava siqui yóó ñu, cutaxin nyihni maa ñu —catyí ra Jesús.

⁴⁵ Cuhva cha catuvj iñi ra cacuvi nuu chí tata sutu cuan ta ra fariseo vatyí cuenda ra cahān ra Jesús cuhva ihya,

⁴⁶ cacuñi ra catijn ra chí ra, soco cayuhvi ra chí ñáyivi vatyí ñáyivi, chitó ñu vatyí ra Jesús cuenda Nyoo cahán ra.

22

Nu chahá ra Jesús noo cuhva cuenda vico tandaha

(Lc. 14.15-24)

¹ Quichahā cahan tucu ra Jesús chihin ñu inga chaha chihin cuhva, ta catyí ra:

² —Cha nyacá ñaha Nyoo añima ñáyivi cuví chí tari noo rey cha savahā noo vico cha cuenda cha cua tandaha sehe ra.

³ Ta tachj ra chí musu ra na cuhun ra cucana ra chí ñu cha nacatyí tuhun ra, soco ñu cuan, ña cacuñi ñu quichi coyo ñu.

⁴ Tachj ra inga chaha chí inga musu, ta catyí ra chí ra tyehe caa: “Catyí ndo chí ñu cha nacatyí tuhun, vatyí cha yahā chahñj sindiqui sane, ta inga quiti cha xahan ñandihí, ta cha nyaá vaha nyayu, ta tandihi cha nyatú tuhva. Na quichi ñu vico tandaha”, catyí ra.

⁵ Soco ñu nacatyj tuhun ra, ña caquichaha ñu chi ra. Noo ñu chahan coyo ñu nu iyó chacu ñu, inga ñu chahan ñu nu tyiño sahá ñu.

⁶ Ta inga ñu tijn ñu chi musu rey cuan ta cañi vavaha ñu chi ra nyacua chahñi ñu chi ra.

⁷ Tyicuan ta rey cuan cuxaan vavaha ra, ta tachj ra chi sindaro ra, cucahñi ra chi ra cachahñi cuan, ta cahmi ra ñuu ra.

⁸ Tyicuan ta quichaha catyj ra chi musu ra: “Tandihí ta cha iyó vaha cha cuenda vico tandaha, soco ñu nacatyj tuhun cuan, ña tahán chi cha quichi coyo ñu.

⁹ Cuahan ndo tandihí calle ta nacatyj tuhun ndo chi tandihí ri ñu cha nañihí ndo na quichi coyo ñu vico tandaha”, catyj rey cuan.

¹⁰ Musu cuan cuahan coyo ra tandihí calle, ta casandu ijin ri ra chi tandihí ñu canañihí ra: ñu quini iyó, ta ñu vaha. Ta tyicuan caa chitu chichi vehe ra chihin ñáyivi.

¹¹ Tyicuan ta quihvi rey cuan cua nyehe ra chi ñáyivi cha canacatyj tuhun musu cuan. Ta nanyehé ra chi noo ra ñohó yucuan, soco ñahri sahma vico tandaha ñihno ra.

¹² Ta catyj rey chi ra: “Amigo, ¿yoso caa cha quihvun ihya ta ñahri sahma vico tandaha ñihnon?” Soco ra cuan ña na cahan maa ra.

¹³ Tyicuan ta catyj rey cuan chi ra catyihí mesa cuan: “Cuhñi ndo chaha ra ta ndaha ra, ta tuchi ndo chi ra nu ñaa iñi ityi chata vehe, ta yucuan cucuacu ra, ta cusacahñi ra noho ra”, catyj ra.

¹⁴ Vatyí cuaha xaan ñu nacana Nyoo chii, soco chíin xaan ñu nacachi ra —catyj ra Jesús.

Nu candacá tuhun ra cuenda xuhun cha tavá gobiernu

(Mr. 12.13-17; Lc. 20.20-26)

¹⁵ Tyicuan ta catyihí tahan ra fariseo tuhun chihin tahan ra vatyí cusacahan ra chi ra Jesús noo cuhva cha ña tahán chí, vatyí tyicuan caa ta coo cuatyí catyaa ra siqui ra.

¹⁶ Ta tachj ra chi suhva ra cuenda ra, ijin ri chihin suhva ra cuenda ra Herodes. Ta cacatyí ra chi ra Jesús tyehé caa:

—Maestro, chitó ndi vatyí cha ndicha cahún. Ta chihin cha ndicha sañahún ityi Nyoo. Ta ña quichahún cha cahán ñáyivi, vatyí ña tijn cuendon cuhva caá ri ñu.

¹⁷ Catyj chi ndi yoso caa chicá xiñun: ¿Atu vaha cha tyiyahví yo cha chicán gobiernu ñuu Roma chí yo, o ma tyiyahví yo?

¹⁸ Soco tuvj iñi ra Jesús vatyí ña vaha cuhva cachicá xiñi ra, ta catyj ra chí ra:

—Nyoho sahá ndo tyi vaha ndo, soco ña ndicha ndo. ¿Ñáa tuhun cha nducu nyehe ndo chii?

¹⁹ Sañaha ndo xuhun cha tuhva ndo tyiyahví ndo chi gobiernu —catyj ra.

Ta caquichí nyaca ra noo xuhun cha nañi denariu chi ra.

²⁰ Ta cuhva cha nanyehé ra Jesús, ta quichaha ndaca tuhun ra chí ra:

—¿Yóó chi nuu ta yóó chí sivi nyaá ihya?

²¹ Ta nacahan ra ta cacatyí ra:

—Chi ra nyacá ñaha.

Tyicuan ta catyj ra Jesús chí ra:

—Cuhva ndo chí ra nyaca ñaha cha tahán chí chí ra, ta cuhva tucu ndo chí Nyoo cha tahán chí chí Nyoo —catyj ra.

²² Cuhva cha cachijí ra cha cahan ra Jesús, iyo xaan cacuñi ra. Ta cuahan coyo ra.

Nu canducu tuhun ra saduceo siqui tuhun cha nandotó ndiyi

(Mr. 12.18-27; Lc. 20.27-40)

²³ Suri quivi cuan suhva ra saduceo chahan coyo ra nu nyaá ra Jesús. Ta ra saduceo cuan ña cachino iñi ra cha cunandoto ndiyi quivi cu naa ñáyivi. Yucuan chaha candaca tuhun ra chí ra Jesús, ta catyj ra:

²⁴ —Maestro, ra Moisés catyj ra vatyí tatu noo ra tandaha ta chihj ra ta ña chiyo sehe ra, tahán chí cha tandaha yañi ra chihin ñaha chihj yí cuan. Tyicuan ta coo sehe ra chihin ña cha cuenda yañi ra cha chihj.

²⁵ Vaha. Vityin tyehé caa cuvj chí noo ra chiyo ucha tahan ra chihin yañi ra. Ra cha xihna ri tandaha ra. Yahá cuan ta chihj ra. Soco vatyí ña chiyo sehe ra, ndoo ñasihí ra chí yañi cu uvi ra.

²⁶ Ta suri tyicuan caa cuvj chí yañi ra ra cu uvi. Ta yahá cuan, ta ra cu uñi quehen ra chí ña, ta suri chihj tucu ra. Ta tyicuan caa cuvj chí ndi ucha ra.

²⁷ Ta cha yahá cuan nu ndihí tuhun chihj ndihí maa ña cuan.

²⁸ Ta cha tyicuan caa, quivi cunandoto ñu, chichi cha ucha ra chihin yañi ra, ¿nya ra cucuvi ñasihí chí ñaha cuan? ¿Vatyí tandihí ra tandaha ra chihin ña? —cacatyí ra.

²⁹ Nacahan ra Jesús ta catyj ra:

—Nyoho, cahán tondo ri maa ndo, cha cuenda vatyí ña chitó ndo cha nyaá nu tutu Nyoo, ni tunyee iñi Nyoo, ta ña chitó ndo.

³⁰ Vatyí quivi cunandoto ndiyi, ni ma tandaha ñu, ta ni ma cuhva ñu sehe ñu tandaha, vatyí tari ángel Nyoo ra nyaá andivi cucuvi ñu.

³¹ Soco tuhun cha nandotó ñu ndiyi, ¿atu ta sacuaha ca ndo tuhun cha catyj maa Nyoo chí ndo? Catyj ra tyehé caa:

³² “Yuhu cuví Nyoo cuenda ra Abraham, ta ra Isaac ta ra Jacob.”

Ihya nyehé yo vatyí canyito añima ra cuan, vasi cha naha chíhi ra vatyí Nyoo ñima Nyoo cuenda ñu ndiyí cuví ra, soco Nyoo cuenda ñu nyitó cuví ra —catyí ra.

³³ Iyo cuñí ñáyivi cha chíhi ñu tuhun sañahá ra Jesús.

Ley cha niñi ca cha chahá Nyoo

(Mr. 12.28-34)

³⁴ Cha cachitó ra fariseo vatyí ra Jesús chası́ ra yuhu ra saduceo, candu ñin ri ra.

³⁵ Ta noo ra cha cuví ra sacuahá ley vehe ñuhu, cuñí ra nducu nyehe ra chi ra Jesús. Ta quichaha ndaca tuhun ra chi ra, ta catyí ra:

³⁶ —Maestro, ¿nya mandamiento cha nyaa nu ley cuví cha niñi ca?

³⁷ Ta catyí ra Jesús chi ra:

—“Cuñun chí Sutu Mañi yo Nyoo chíhin cha ni ñhun ta chíhin cha tandihi añimon, ta chíhin cha tandihi cha chíhi tuñi xiñun.”

³⁸ Ican ihya mandamiento cha niñi ca, ta cha xihna ri ñandihí.

³⁹ Ta cha cu uvi cha yatyin ri tyicuan caa, ta catyí chí: “Cuñun chí ñáyivi tuhun tari cuñun chí maun.”

⁴⁰ Ican uvi tahan mandamiento ihya cuví cha nyisó chí ley cha chahá Nyoo chí ra Moisés ta tandihi tuhun cha casañahá ra profeta Nyoo ta cha naha.

Ra Cristo quichí ra tata ra David, ta suri cuví ra Sehe Nyoo

(Mr. 12.35-37; Lc. 20.41-44)

⁴¹ Cha ni ri ca cha canyicú ñin ri ca ra fariseo,

⁴² ra Jesús ndacá tuhun ra chi ra, ta catyí ra:

—¿Yoso caa chicá xiñi nyoho cuenda ra cuví Cristo? ¿Yóó chí tata vachi ra cuñi maa ndo?

Ta canacahan ra ta catyí ra:

—Tata ra David cuví chí ra.

⁴³ Tyicuan ta ra Jesús catyí ra chí ra:

—¿Ta yoso caa cha vatyí ra David cuan, maa Tatyí Ii Nyoo chotyíño chí ra? ta catyí ra vatyí ra cuví Cristo, ra nyacá ñaha chí ra cuví ra, vatyí catyí ra tyehe caa:

⁴⁴ Cahán Suti Nyoo chíhin Suti ra Cristo, ta catyí ra chí ra:

“Cunyaa chiyo vahi nyacua nya quívi cuhve chí ra xaan ñi chhuun vatyí cuaca chahun siqui ra” tyaá ra David.

⁴⁵ ¿Yoso caa cha ra vachi tata ra David cuví chí ra Cristo, tatu suri maa ra David catyí ra vatyí ra Cristo Sutu ra cuví chí ra? —catyí ra Jesús.

⁴⁶ Ta yori maa cuví nacahan ni noo tuhun. Ta nya ndaha quívi cuan, yori ca maa cañá ñi candaca tuhun ñáá ca cha candaca tuhun chí ra.

23

Nu cahán ra Jesús chí ra sacuahá ley vehe ñuhu ta ra fariseo

(Mr. 12.38-40; Lc. 11.37-54; 20.45-47)

¹ Tyicuan ta ra Jesús catyí ra chí ñáyivi, ta chí ra cachicá noo chíhin ra tyehe caa:

² —Ra sacuahá ley ta ra fariseo nyicú ra tyiño cha sañahá ra ley cha tyaá ra Moisés.

³ Ta cha tyicuan caa, quichaha ndo cha cahán ra ta sacuvi ndo tandihi cha cacatyí ra chí ndo. Soco ma quehen ndo cuhva iyó ra, vatyí maa ra, siin cha sañaha ra, ta siin cha sacuví ra.

⁴ Vatyí yori ndoyo carga cha tyaá ra siqui ñáyivi. Ta saniñi ra chí ñu na cuiso ñu, ta maa ra ni chíin nundaha ra ña nañi chata carga cuan.

⁵ Tandihí cha casacuví ra, cha cuñi ra na nyehe ñáyivi. Vatyí tahán ñi ra catyaa ra tuhun Nyoo tyaan ra ta soco ra chíhin letra nahnu. Ta tahán ñi ra cacuihno ra sahma chíhin adorno nañi.

⁶ Ta nu vaha ca, cuñi ra cunyicu ra vico, ta cachi ra. Ta nu vaha ca cuñi ra cunyicu ra chichi vehe ñuhu.

⁷ Ta nu chicá noo ra cacuñi ra vatyí cuhva ñáyivi nocumi chí ra chíhin cha sahá xaan ñu ñáyivi chí ra. Ta cuñi tucu ra cha catyí ñu chí ra vatyí chito xaan ra.

⁸ Soco nyoho, ma cuhva ndo ityi cha catyí ñáyivi vatyí chitó xaan ndo. Vatyí tandihí nyoho, yañi ndo cuví. Ta noo ri ra chitó iyó, ta ican ra cuví Cristo.

⁹ Ta ma catyí ndo Sutu ndo chí ninoo ra ñuhu ñáyivi ihya, vatyí iyó noo Sutu ndo, ta nyaá ra andívi.

¹⁰ Ta ma catyí ndo vatyí ra cuví nuu cuví ndo, vatyí noo ri maa ra Cristo cuví nuu.

¹¹ Ra cha sacuví tyiño nuu tandihí ca ra, ican ra cuan cuví ra cahnu ca nu nyicú ndo.

¹² Vatyí ra cahnu sahá chíi, cucucahnu ra. Ta ra ña cahnu sahá chíi cucucahnu ra.

¹³ ¡Ndahvi nyoho ra sacuahá ley vehe ñuhu, ta ra fariseo! ¡Ndahvi nyoho cha sahá ndo tyi vaha ndo! Vatyí chası́ ndo yuvehe nu nyacá ñaha Nyoo, tacuhva ma cuví quihvi ñáyivi. Ta ni ri maa ndo ña quihví ndo ta ni ña chahá ndo cha quihvi ñáyivi, ñu cuñi quihvi.

¹⁴ ¡Ndahvi nyoho ra sacuahá ley ta ra fariseo, nyoho cha sahá ndo tyi vahá ndo! Vatyí tinyaá ndo vehe ñu chíhi yí, tyi ña cuví tyiyahvi ñu ñáá xuhun tavá ndo siqui ñu. Ta yahá cuan, ta naha chicán tahvi ndo nu tuví vatyí sahá ndo tyi vaha ndo. Ta cuenda cha sacuví ndo tyehe caa, cahnu ca tindoho cunyehé ndo.

¹⁵ Ndahvi nyoho ra sacuahá ley vehe ñuhu, ta ra fariseo. ¡Sahá ndo tyi vaha ndo, soco ña ndicha ndo! Vatyí nducú xaan ndo cuhva na cunyicon ñáyivi chí ndo. Ta tatu

cha nandihvi ñu cuenda ndo, quiñi caa nicoo ñu saha ndo, ta ñima ca maa ndo. Ta cha tyicuan caa nyacuví ndo, ñihi ca sacuhún ndo chi ñu anyaya cha nuu maa ndo.

16 ¡Ndahvi nyoho ra ndahvi! Vatyi cuñí ndo saquehen ityi ndo chi ñáyivi, ¡soco cuaa ndo! Vatyi catyí ndo tatu noo ñu catyí ñu cha cusacuvi ñu noo cha cusacuvi ñu, ta tyanaha ñu chihin sivi vehe ñuhu, yucuan ña ñiñi cha sacuvi ñu. Soco tatu xuhun cuaan cha iyó vehe ñuhu cuan tyanaha ñu, yucuan ndicha, niñi cuñí chi cha sacuvi ñu, catyí ndo.

17 ¡Tondo xaan ndo ta cuaa ndo! ¿Nya cha niñi ca? ¿Atu niñi ca xuhun cuaan cuan, o vehe ñuhu cha sacu ii chi xuhun cuaan cuan?

18 Ta suri catyí tucu ndo: “Tatu yihi ñu catyí ñu cha cusacuvi ñu cha cusacuvi ñu, ta tyanaha ñu cuenda arta cha yoso cha chahá cuenda ñu chi Nyoo, ña niñi cha sacuvi ñu. Soco tatu tyanaha ñu cuenda ofrenda cha yosó siqui arta cuan, yucuan ndicha niñi cuñí chi sacuvi ñu, catyí ndo.”

19 ¡Tondo xaan ndo ta cuaa ndo! ¿Nya cha niñi ca? ¿Atu niñi ca ofrenda o arta cuan cha sacu ii chi ofrenda cuan?

20 Vatyi ñu tyanahá cuenda arta cuan, ñima cuenda ri cuan tyanaha ñu, soco cha cuenda tandihi cha yosó nuu ñandihí.

21 Ta ñu tyanahá cuenda vehe ñuhu cahnu, ñima cuenda vehe ñuhu ri cuan, soco cuenda Nyoo tyanahá ñu ñandihí, vatyi iyó ra yucuan.

22 Ta tyicuan caa tucu ñu tyanahá cuenda andivi, tyanahá tucu ñu cuenda tyayu Nyoo ta suri cha cuenda maa Nyoo ñandihí, tyi maa ra cuví ra nyaá nyacá ñaha yucuan.

23 ¡Ndahvi nyoho ra sacuahá ley vehe ñuhu ta ra fariseo! sahá ndo tyi vaha ndo vatyi chahá ndo diesmo chi Nyoo cha cuví menta, ta añii, ta comino. Soco ña quichahá ndo tuhun cha niñi ca cha nyaá nu ley cha tahán chi sacuvi yo. Ta cuñun, cha sacuví yo cha vaha chihin tandihí ñáyivi, cha cundahvi cuñi yo chi ñu, cha chinó ñi yo chi Nyoo ta ma sandoo yo chi ra. Ican ihya cuñí chi sacuvi ndo, ta ma sandihí ndo cha cuhva ndo diesmo cuan ñandihí.

24 Nyoho cuñí ndo casaquehen ityi ndo chi ñáyivi, soco cuaa ndo. Vatyi sacuíta ndo noo tiyucun luhlu, soco coco ndo noo camellu. Cuatyi luhlu ri nyehe ndo ta ña sahá ndo cuenda cuatyi cahnu cuví cuan.

25 ¡Ndahvi nyoho ra sacuahá ley vehe ñuhu ta ra fariseo, ra casaha tyi vaha! Vatyi ityi chata ri vasu ta ityi chata ri coho sanduví ndo, soco ityi chichi ña sanduví ndo. Vatyi chichi añima ndo tyitu ñohó cha quiñi caa. Chicá xiñi ndo cha ñihi ndo nu

cusuhu ndo, ta ña cuví chasaha ndo cha quiñi caa cha quichi cuví xaan ñiñi ndo.

26 ¡Ra fariseo cuaa cuví ndo! Sanduvii xihna ndo ityi chichi vasu ta coho, tyicuan ta cuvii tucu ityi chata.

27 ¡Ndahvi nyoho ra sacuahá ley vehe ñuhu ta ra fariseo, ra casavaha chí! Vatyi cuví ndo tari noo ñaña ndiyi cha nacahyu, vatyi ityi chata chi tyaqui xaan, soco ityi chichi tyitu ñohó yiqui ndiyi, ta tandihí nuu cha quiñi caa.

28 Tyicuan caa cuví nyoho. Vatyi ityi chata tari maa tyi vaha xaan ndo nuu ñáyivi, soco ityi chichi, tyitú ñohó cha cuendu ndo, ta cha quiñi caa.

29 ¡Ndahvi nyoho ra sacuahá ley vehe ñuhu, ta nyoho ra fariseo! Sahá ndo tyi vaha ndo ta ña ndicha. Nyoho samá ndo ñaña ra profeta Nyoo ra chiyo ta cha naha. Ta nyoho nacahyu ndo ñaña ñáyivi vaha ñu chiyo ta cha naha.

30 Ta yucuan ta catyí ndo! “Tyehe ta chiyo ndi quivi chiyo ñáyivi chahnu ndi, ma tyinyee ndi chi ra chahñi chi ra profeta Nyoo”, catyí ndo.

31 ¡Ma chihin yucuan ri! Suri maa ndo nacotó ndo vatyi vachi ndo tata ñu cachahñi chi profeta Nyoo.

32 ¡Vaha vityin, chaha chi cuhva savaha ndihí ndo cha quiñi caa cha quichaha savaha sutu chahnu ndo!

33 ¡Nyoho ñu quiñi iyó, ñu vachi tata coo! ¿Yoso caa cucacu nyoho tacuhva ma cahun ndo anyaya? Ma cuví.

34 Yucuan chaha cutachi chi ra profeta Nyoo nu nyicú ndo, cutachi tiqui chi ra chiñi tuñi, ta ra sacuahá nu nyicú ndo. Soco nyoho cucahñi ndo chi ra ta cutyaa ndo chi suhva ra nu cruzi. Ta chi inga ra cucañi ndo chi ra chichi vehe ñuhu. Ta cacanyicon ndo chi ra tahan tahan ñuu.

35 Yucuan chaha, siqui ndo cucunya cuatyi cha cuenda cha cachihí tandihí ra vaha cha cachahñi ñu nyacua nya ra Abel ta nyacua nya ra Zacarias sehe ra Berequías ra cha chahñi ndo chichi vehe ñuhu yatyin nu nyaá arta cha yosó cha chahá cuenda yo chi Nyoo.

36 Cha ndicha catyí chi ndo, vatyi tandihí cuatyi ihya cucoso siqui ñáyivi cha iyó vityin —catyí ra Jesús chi ra.

Nu nducuihyá iñi ra Jesús nyehe ra chi ñuu Jerusalén ta chacu ra (Lc. 13.34-35)

37 ¡Jerusalén, Jerusalén! ¡Ndahvi nyoho ñu iyó ñuu chiña! Vatyi chahñi ndo chi ra profeta Nyoo. Ta tuchi ndo yuu chi tandihí ra cha saquichí Nyoo nu nyicú ndo. Cuaha xaan chaha cuñi saha cuende chi ndo, tari noo ndivi cha sahá cuenda ti chi sehe ti, ta

naquehén ndahvi ti chi ti chichi ndichin ti, soco ña cuñi ndo.

³⁸ Nyehe ndo vityin, vatyi cha sandoo ndahvi chi ndo.

³⁹ Vatyi catyí chi ndo, vatyi ma nyehe ca ndo chii nyacua nya chaa chi quivi cucatyí ndo tyehe caa: “Cahnu xaan ra cuví ra vachí chihin tunyee ñi sivi Sutu yo Nyoo”, cucatyí ndo —catyí ra Jesús.

24

Nu catyí ra Jesús vatyi cutani vehe ñuhu cahnu

(Mr. 13.1-2; Lc. 21.5-6)

¹ Quita ra Jesús chichi vehe ñuhu cahnu cuan, ta cha cuñi cahun ra, ta catuhva ra cachicá noo chihin ra chi ra, ta quichaha casañaha ra vehe ñuhu cuan chi ra.

² Soco nacahan ra Jesús ta catyí ra: —¿Atu nyehé ndo tandihi ihya? Cha ndicha catyí chi ndo, vatyi ihya ni noo yuu ta ma ndoo coso nyitahan. Tandihi ta cutani —catyí ra.

Nu catyí ra Jesús ñáa ndihi seña cucuvi cha ni cumañi ca naa ñayivi

(Mr. 13.3-23; Lc. 21.7-24; 17.22-24)

³ Tyicuan ta cuahan coyo ra yucu yutun Olivo. Ta cuhva cha nyaá ra Jesús yucuan, ra cachicá noo chihin ra quichí coyo ra ta catyí xehe ra chi ra tyehe caa:

—Cuñi ndi cha catyun chi ndi, ama cucuvi tuhun cuan. ¿Ñáa seña cucuvi cha cuquichun inga chaha ta cha cunaa ñayivi?

⁴ Tyicuan ta nacahan ra Jesús: —Saha ndo cuenda chi ndo coto yóo cha sandahvi ñaha chi ndo.

⁵ Vatyi cuaha xaan ra cuquichi, ta cotyiño ra sivi, ta cucatyí ra tyehe caa: “Yuhu cuví Cristo ra cha saquichi Nyoo.” Ta cuaha ñu cusandavi ñaha ra.

⁶ Nyoho cuñihi ndo tuhun tyi iyó cuatyí ta cañi tahan ñayivi ityi cuan ityi ihya. Soco ma nayuhvi ndo, vatyi tyicuan caa tahn maa chi cuví. Soco ta chaa ca quivi cunaa ñayivi.

⁷ Vatyi ñayivi noo ñuu cahnu, cucañi tahan ñu chihin ñayivi inga ñuu cahnu. Ta cucoo cuatyí noo ñuu chihin inga ñuu. Ta cucoo soco, ta cucoo cuehe, ta cha taan nahnu cuaha ri ityi.

⁸ Tandihi ihya ta nu cua quichaha ñayivi nyehe ñu tindoho cuví.

⁹ Tyicuan ta cucuhva cuenda ñu chi nyoho vatyi sanyehe ra tindoho chi ndo. Ta cacahñi ra chi ndo. Ta tandihi ñu iyó siqui ñuhu ñayivi cutasi cuñi nyehe ñu chi ndo cha cuenda yuhu.

¹⁰ Quivi cuan cuaha xaan ñu cusandahi ñu cha chino ñi ñu chii, ta cutasi cuñi ñu nyehe ñu chi tahan ñu. Ta cunaxico tuhun ñu chi tahan ñu.

¹¹ Cuaha xaan ra cuendu cunatuyi, ta cucatyí ra vatyi cuenda Nyoo cacahan ra. Ta cuaha xaan ñayivi cucasandavi ñaha ra.

¹² Ta cuaha xaan cha quini caa cucoo. Yucuan chaha cuaha xaan ñu cusandahi ñu cha cuñi ñu chi tahan ñu.

¹³ Soco ñu cha ña ndu uvi ñi chino ñi chii nyacua nya nu ndihi, cucacu añima ñu.

¹⁴ Ta cucutyá nicahnu ñayivi tuhun vaha cha nyacá ñaha Nyoo añima ndo, tacuhva coto tandihi ñayivi iyó siqui ñuhu ñayivi, tyicuan ta cunaa ñayivi.

¹⁵ Tandihí nyoho cha sacuahá ndo ihya, na cutuñi ñi tuhun ihya: Ra Daniel, ra profeta Nyoo ta cha naha, tyaa ra tuhun noo cha sacuquiñi caa, noo cha sativi. Ta quivi nyehe ndo vatyi chaa ihya Nu Ii,

¹⁶ tyicuan ta ñu ñohó Judea, cuñi chi cono ñu ityi yucu.

¹⁷ Ta ñu yosó xiñi vehe, noo ñu, soco ma quihvi ñu chichi vehe ñu tava ñu cha iyó chichi vehe cuan.

¹⁸ Ta ñu ñohó nu chiqui, ni ma cunuhu ca ñu cunaquehen ñu ni sahna ñu.

¹⁹ ¡Ndahvi ñusihí cha cañohó sehe quivi cuan! O tatu iyó sehe ñu cha chaxín, ¡ndahvi ñu cuan!

²⁰ Cacan ndo chi Nyoo tacuhva cha ma tahan chi caca cono ndo quivi vichin, ni quivi nyitatu yo.

²¹ Vatyi cuaha xaan tindoho cucoo quivi cuan, noo tindoho cha ta coo ca maa nyata chino ñuhu ñayivi, ta ni ma coo ca cha yaha tuhun cuan.

²² Soco tatu Nyoo, ta ma sanducuiti ra quivi cuan, yori maa cacu. Soco cusanducuiti ra cha cuenda cha cuñi ra chi ñu nacachí maa ra.

²³ “Ta tatu yóo cha catyí chi nyoho: “Nyehe ndo, ma ra Cristo ihya” o “Nyehe ndo ma ra nyaá yucuan”, ma chino ñi ndo.

²⁴ Vatyi cuquichi coyo ra casandavi ñaha ta cucatyí ra vatyi ra Cristo cacuvi ra. Ta cucatyí ra vatyi ra profeta Nyoo cacuvi ra. Ta cusavaha ra seña ta milagru nahnu tacuhva casandavi ñaha ra. Nyacua nya ñu cha nacachí maa Nyoo ta cusandavi ñaha ra tatu cuví chi ra.

²⁵ Saha ndo cuenda vatyi cha yaha catyí chi nyoho cha ni cumañi ca cuví.

²⁶ Yucuan chaha tatu catyí ñu chi ndo tyehe caa: “Nyehe ndo, ma ra Cristo nyaá nu chiqui ndi cuan”, catyí ñu chi ndo, ma cahun ndo. O tatu catyí ñu chi ndo: “Nyehe ndo, ma ra nyaá chichi cuarto ihya”, ma chino ñi ndo.

²⁷ Vatyi tari noo cha quihvi tacha cha nyehé yo cuxiño nya nu caña ñanyii ta nya nu quee ñanyii, tyicuan caa cucuvi quivi quichi yuhu Rayi cha quichi nya gloria.

²⁸ Nu caá coño chihj, yucuan cuchaa coyo chii.

Yoso caa cuquichi ra Cristo inga chaha (Mr. 13.24-37; Lc. 21.25-33; 17.26-30, 34-36)

²⁹ Ta cha yahá ri cha nyehé ñu tindoho, ta cunduñaa ñanyii, ta yoo ma sacundichin ca chi. Ta tiñoo cucanacojo ti andivi, ta nyacua nya cha iyó andivi cunacanda.

³⁰ Tyicuan ta cuquetuvi noo seña ityi andivi nu vachi yuhu Rayii cha quichí nya gloria. Cuquichi nu vico ityi andivi chihin tunyee iñi cahnú ta chihin cha cahnú cuví Nyoo. Ta tandihi ñáyivi iyó síqui ñuhu ñáyivi, cucuacu chaa xaan ñu cha nanyehe ñu chii.

³¹ Ta cutachi ángel cuende tacuhva vatyi chihin cha ñihi tiví ra cutu ra ta cusandu iin ri ra chi ñu nacachj maa Nyoo chi, cuquita ñu nicacahnú nu ñuhu ñáyivi, nyacua nya nu ndihi ñuhu ñáyivi ta nyacua nya nu ndihi andivi.

³² Cútuñi iñi ndo noo cuhva yutun cha nañi higo: Tatu cha yutya soco tun, ta caña ndaha tun, nyoho cha chitó ndo vatyi cha vachi vico savi.

³³ Ta suri tyicuan caa, tatu cha nyehé ndo tandihi maa cha cucuvi ihya, cojo ndo vatyi cha cuyatyn quichi. Cha nyañai yuvehe cuví chi cuan.

³⁴ Cha ndicha catyí chi ndo vatyi tandihi tuhun ihya, cucuvi cha ni ri ca cha iyó ñáyivi.

³⁵ Andivi ta ñuhu ñáyivi cundihí chi, soco tuhun cahán yuhu, ma ndihí chi. Ta cuchino cava tandihí tuhun cahin chihin ndo ihya.

³⁶ Soco quivi ta cuhva cha cucuvi cuan, yori chitó, ni ángel andivi ta ña chitó ra. Ni yuhu Rayii cha quichí nya gloria ta ña chité. Noo tuhun ri maa Nyoo Suti chitó ra.

³⁷ Tari cuví quivi chiyó ra Noé, tyicuan caa cucuvi quivi quichi tucu yuhu Rayii cha quichi nya gloria.

³⁸ Quivi ta ni cumañi ca coon savi xaan, ñáyivi cuan, chachi ñu, ta chihí ñu, tandahá ñu, ta chahá ñu chi sehe ñu tandaha nyacua nya quivi quihvi ra Noé chichi barcu cuan.

³⁹ Ta sana iñi ñu ta chaq savi ta tyañi tandihí ñu. Ta tyicuan caa cucuvi tucu quivi quichi tucu yuhu Rayii cha quichí nya gloria.

⁴⁰ Quivi cuan, tu uvi ra ñohó ra nu chiqui. Noo ra cunaquehin, ta noo ra ndoo ra.

⁴¹ Tu uvi ñusihí nyicó ñu molinu. Noo ña cunaquehin, ta noo ña ndoo ña.

⁴² Cuatu tuhva vaha ndo vatyi ña chitó ndo ñáá cuhva cuquichi ra nyacá ñaha chi ndo.

⁴³ Soco cojo ndo tuhun ihya vatyi tatu noo chitoho vehe ta chitó ra ñáá cuhva cuquihvi ra suhu chichi vehe ra, cuatu

tuhva vaha ra ta ma cuhva ra cha quihvi ra suhu cuan.

⁴⁴ Yucuan chaha nyoho, cuatu tuhva ndo. Vatyi sana ri iñi ndo, ta cuquichi yuhu Rayii cha quichi nya gloria.

Ñu cha nyatú tuhva na ndichí ra Cristo, ican ñu cuví musu vaha ra (Lc. 12.41-48)

⁴⁵ Noo musu cha tyasohó tuhun cahán chitoho, ta tyicuan ri sacuví ra tyiño tyaq ra chi ra, yucuan cuví noo musu vaha. Ta sahá cuenda ra vehe chitoho ra. Ta chahá ra cha cachi inga musu cha vahri cuhva.

⁴⁶ Ta sii xaan cuví chi musu cuan tatu cuhva cha sahá tyiño ra ta nachaa chitoho ra. Vatyi quichahá ra tandihí cha tahán chi sacuví ra.

⁴⁷ Ta cha ndicha catyí chi ndo, vatyi chitoho ra cunatyaa ra tandihí cha cumí ra ndaha ra, vatyi vaha quichahá ra chihin tyiño sahá ra.

⁴⁸ Soco tatu noo musu quiñi iyó ta chicá xiñi ra vatyi naha cuahán chitoho ra,

⁴⁹ ta quichaha nyacuví ra cha ña vaha chihin inga musu cuan, ta quichaha chachi ra ta chihí ra ndixi chihin ra chiñi,

⁵⁰ tyicuan ta sana iñi ra ta ndichí chitoho ra quivi cha ña nyatú ra chi ra.

⁵¹ Tyicuan ta chitoho ra ñihi xaan cutachi tuñi ra chi ra chihin ñáyivi quiñi iyó cha savaha chii soco ña ndicha. Tyicuan ta cucuacu ra ta cusacahñi ra noho ra.

25

Nu chahá ra Jesús noo cuhva cuenda uchi tahan ñu tyivaa

¹ Cha nyacá ñaha Nyoo añima ñáyivi cuví chi tari uchi tahan ñu tyivaa cha quehen ñu lámpara cha yihí acetye ta cuahán coyo ñu noo vico tandaha cha quehen cuenda ñu chi ra cha cua tandaha.

² Ohon tahan ñu, tondo xaan ñohó iñi ñu, ta ohon tahan ñu cachi xaan ñohó iñi ñu.

³ Ñu cha tondo ñohó iñi cuan, canyisó ñu lámpara ñu soco ña quehen ñu suhva ca acetye vatyi natyihí ñu chichi lámpara ñu tatu ndihí.

⁴ Soco ñu cachi ñohó iñi cuan, canyisó sññ ñu yutyi acetye chihin lámpara ñu.

⁵ Ta vatyi cucuee ca chaa ra cha cua tandaha cuan, catiñ ñumahna chi tandihí ñu, ta caquixí ñu.

⁶ Tyicuan ta ñáá cuhva ñuu, ta chiñi ñu noo ndusu cha catyí tyehe caa: “¡Cha vachi ra cha cua tandaha! ¡Quita ndo, quehen cuenda ndo chi ra!” catyí ndusu cuan.

⁷ Tandihí ñu tyivaa cuan canducuitá coyo ñu ta quichaha casanduvaha ñu lámpara ñu.

⁸ Tyicuan ta quichaha catyí ohon ñu tondo ñohó iñi cuan chi inga ohon ñu cuan:

“Cuhva ndo suhva acetye ndo chi ndi, vatyí cuñí ndahva lámpara ndi”, catyí ñu.

⁹ Soco ñu tyivaa cha cachi ñohó iñi cuan nacahan ñu tyehe caa: “Ma cuhva ndi vatyí coto ma ñihi, ni cha cuenda maa ndi ta ni cha cuenda maa ndo. Cughan taxi ndo nya nu quiyahví chi, ta sata ndo cha cuenda ndo.”

¹⁰ Soco cha ni ri ca cha cuahan coyo ndi ohon ñu cha tondo ñohó iñi cuan, cua sata ñu acetye, ta chaq ra cha cua tandahá cuan. Ta ñu tyivaa cha nyatú tuhva cuan, quihví coyo ñu chihin ra chichi vehe nu cuacoo vico tandaha cuan. Ta nicunyasí ri yuvehe.

¹¹ Yahá cuan ta cachaq coyo tucu ñu chisatá acetye cuan, ta catyí ñu: “¡Tata! ¡Tata! ¡Ñuña yuvehe naquihví ndi!”

¹² Soco maa ra nacahan ra, ta catyí ra: “Cha ndicha vatyí ña ñohó nui chi nyoho.”

¹³ Tyicuan ta quichaha catyí ra Jesús: —Cuatu tuhva ri nyoho, vatyí ña chitó ndo nya quívi ta ñáá cuhva cuquichi yuhu Rayíi cha quichi Nya gloria.

Noo cuhva cuenda xuhun
(Lc. 19.11-27)

¹⁴ Cha nyacá ñaha Nyoo añima ñáyivi cuví chi tari noo ra cha cha nyaá cha cua quita cuhun inga ñuu. Ta caná ra chí musu ra, ta chaha cuenda ra xuhun chi ra.

¹⁵ Chí noo ra chahá ra ta cha ohon mil xuhun, ta chi inga ra chahá ra ta cha uvi mil, ta chi inga ra tari noo mil. Chahá ra chí noo noo ra yoso cuhva cha cuví saha tyiño ra chihin. Tyicuan ta cuahan ra.

¹⁶ Musu cha quehen cuenda ohon mil xuhun cuan, sahá ra lucha chihin xuhun cuan, ta sahá ganaa ra nonga ohon ca mil chihin xuhun cuan.

¹⁷ Ta suri tyicuan caa tucu ra cha quehen cuenda uvi mil cuan, sahá ganaa ra uvi ca mil chihin xuhun cuan.

¹⁸ Soco ra cha quehen cuenda noo ri mil cuan, chahan ra ta chatya ra noo yavi chichi ñuhú ta tixehe ra xuhun chitoho ra.

¹⁹ Cuaha quívi yahá ta nachaq chitoho musu cuan. Ta quichaha natava ra cuenda chihin noo noo ra.

²⁰ Xihna ca ra cha quehen cuenda ohon mil xuhun cuan chaq, ta nacuhva cuenda ra ohon ca mil síqui cuan, ta catyí ra: “Tata, ohon mil chahun chíi, ma inga ohon mil ihya cha sahá ganai.”

²¹ Ta chitoho ra catyí ra chi ra: “Vaha. Noo musu vaha xaan cuvún. Ta sacuvún tandihi cha catyí. Ta vasi chíin ri xuhun chahí chuun soco vaha xaan chotyíñon chi chí. Vityin cuaha ca cucuhva cuende chuun. Quíhvi nu vaha ihya, ta cusíi cuñun chihin.”

²² Yahá cuan ta chaq tucu musu cha quehen cuenda uvi mil xuhun cuan, ta

catyí ra: “Tata, uvi mil chahun chíi, ma uvi ca mil ihya cha sahá ganai síqui.”

²³ Ta catyí chitoho ra chi ra: “Vaha. Noo musu vaha xaan cuvún, ta sacuvún cha catyí. Vasi chíin ri xuhun chahí chuun soco vaha xaan chotyíñon chí chí. Vityin cuaha ca cucuhva cuende chuun. Quíhvi nu vaha ihya, ta cusíi cuñun chihin”, catyí ra.

²⁴ Soco cuhva cha chaq musu cha quehen cuenda noo mil ri xuhun cuan, catyí ra chí chitoho ra: “Tata, yuhu chité vatyí cuvún noo ra xaan ta cuñun naquehún xuhun noo nu ña sahá tyiñon, ta cuñun naquehún cosecha noo nu ña tachun.

²⁵ Yucuan chaha nayuhví ta chahin ta tyihí xehi xuhun chichi ñuhú. Soco ma xuhun ihya cha chahun chíi”, catyí ra.

²⁶ Tyicuan ta nacahan chitoho ra, ta catyí ra chí ra: “Musu quiñi iyó ta musu suchan cuví yoho. Tatu chitón vatyí cuñí naquehín nu ña sahá tyiñe, ta quehín cosecha noo nu ña tachí,

²⁷ ¿Ñáá tuhun ña chityihun xuhin banco? Ta cha ndichi ta, cunaquehin xuhun cuan chihin xuhun síqui cha sahá ganaa chí”, catyí ra.

²⁸ Tyicuan ta quichaha catyí ra chí ñu nyicú cuan: “Tinyaa ndo noo mil xuhun cha nyisó ra, ta cuhva ndo chi ra cha nyisó uchi mil.

²⁹ Vatyí ñu iyó chíi, cuhva que chí ñu, ta coo cuaha chí ñu, nyacua ndoo ca. Soco ñu ñahri chíi, nyacua nya cha chíin cha cumí ñu, cutinyaa ndihi chí ñu.

³⁰ Ta musu cha ña chíñuhú ihya, tuchi ndo chí ra nu ñaa iñi itiyi chata, ta yucuan cuacu chaa ra, ta cusacahni ra noho ra chihin cha nyehe ra tindoho.”

Nu catyí ra Jesús vatyí cucutuñi chí tandihi ñáyivi

³¹ Quívi cuquichi yuhu Rayíi cha quichi nya gloria, cuquichi chihin cuaha ángel cuende, ta cucunyai tyayu tyaquí ta cunyaca ñahi.

³² Ñáyivi tandihi ri ñuu cundu ñin ri ñu nui. Ta cusasiin chí noo noo ñu, tari ra sahá cumi mbee tavá siin ra chí mbee ta tava siin ra ndixihyu.

³³ Ta cucuatyai chí mbee cuan chiyo vahi, ta chí ndixihyu cuan, chiyo satyin.

³⁴ Tyicuan ta yuhu cha cuví Rey cucuatyi chí ñu nyicú chiyo vahi: “Ñaha nyoho vatyí nyoho ñáyivi cha nasocó Suti cuví ndo. Quehen cuenda ndo nu cuacunyata ndo nu nyacá ñaha Nyoo, vatyí cha cuenda maa ndo chingó ihya nyata quívi savahá Nyoo ñuhu ñáyivi.

³⁵ Vatyí quívi chisoque, ta nyoho chahá ndo cha cachi. Quívi cu itiyi ndutya ta chahá ndo cohi. Ta quívi chicá noi tari ra inga ñuu ta nyoho chahá ndo vehe coi.

³⁶ Quiví cumañi sahme, ta nyoho chaha ndo sahme. Quiví cuhvī ta nyoho chahan ndo chinyehē ndo chii. Ta quivī ñohī vehe caa, ta quichī nyehe ndo nu ñohī.”

³⁷ Ta ñu cha vaha cuan cundaca tuhun ñu chii, ta catyī ñu: “Sutu Mañi yuhu, ¿ama nyehe ndi chisocon, ta chaha ndi cha cachun? ¿Ama nyehe ndi ityun ndutya ta chaha ndi cohun?”

³⁸ ¿Ama nyehe ndi chuun chicá noun tari ra inga ñuu ta chaha ndi vehe coun? ¿Ama cumañi sahmon, ta chaha ndi chuun?

³⁹ ¿Ama nyehe ndi cuhvún, o ñohún vehe caa, ta chahan ndi chinyehē ndi chuun?” cucatyī ñu.

⁴⁰ Ta yuhu cha cuvī Rey cucatyī chi ñu: “Cha ndicha catyī chi ndo, vatyī tandihī tumañi iñi sacuvī ndo chihin ra ndahvi, ra yañi ihya, chi yuhu sacuvī ndo tumañi iñi cuan.” Tyicuan caa cucatyī yuhu chi ñu.

⁴¹ Tyicuan ta yuhu cha cuvī Rey cucatyī tiqū chi ñu nyicú chiyo satyin tyehe caa: “Canyaha ndo nuí, nyoho ñu tahán chi cuhún anyaya. Cuahan ndo nu ñuhū cha ma ndahva ca maa. Vatyī yucuan cuvī nu chingo cha cuenda cuihna ta cha cuenda tatyī ña vaha cuenda ra.

⁴² Vatyī chisoque, ta nyoho ña chaha ndo cha cachi. Cu ityī ndutya, ta ña chaha ndo ndutya cohi.

⁴³ Chicá noi tari chicá noo ra inga ñuu, ta ña chaha ndo nu coi. Cumañi sahme ta ña chaha ndo sahma cuihne. Cuhvī ta ñohī vehe caa, soco ña chahan ndo chinyehē ndo chii nu ñohī”, cucatyī chi ñu.

⁴⁴ Tyicuan ta cucatyī ñu chii tyehe caa: “Sutu Mañi yuhu, ¿ama nyehe ndi chisocon, o ityun ndutya, o chicán noun tari ra inga ñuu, o ñahri sahmon, o cuhvún, o ñohún vehe caa, ta ña tyinyee ndi chuun?” cucatyī ñu.

⁴⁵ Ta yuhu cha cuvī Rey cucatyī chi ñu tyehe caa: “Cha ndicha catyī chi ndo vatyī tandihī maa cha ña sacuvī ndo chi ñáyivi ndahvi ihya, suri ña sacuvī tucu ndo chi yuhu cuvī cuan”, cucatyī yuhu chi ñu.

⁴⁶ Tyicuan ta ñu cuan cuhun coyo ñu nu cayú ñuhū cha ma ndahva ca maa. Ta ñáyivi vaha cuan cuhun ñu cucoo ñu noo ñáyivi cha ma naa ca maa.

26

Nu canducū ra cuhva yoso caa catiñ ra chi ra Jesús

(Mr. 14.1-2; Lc. 22.1-2; Jn. 11.45-53)

¹ Cuhva cha ndihī catyī ra Jesús tuhun ihya, ta quichaha catyī ra chi ra cachicá noo chihin ra tyehe caa:

² —Nyoho chitó ndo vatyī uvi ca quivī ta sanducahnu yo vico pascua. Ta yuhu Rayii

cha quichī nya gloria cucuhva cuenda ñu chii vatyī tyaa ñu chii nu cruzi —catyī ra.

³ Quiví cuan ra cacuvī nuu chi tata sutu, ta ra casacuahá ley vehe ñuhu, ta ra cacuvī mandoñi ñu Israel, candu ñin ri ra nuquehe vehe tyiño ra Caifás, ra cuvī nuu chi tata sutu.

⁴ Yucuan casandaa ra tyiño yoso caa ta sandavi ñaha ra chi ra Jesús ta catiñ ra chi ra ta cacahñi ra chi ra.

⁵ Soco cacatyī ra:

—Ma cahñi yo chi ra cha ñi ri ca cha chichi vico, tacuhva cha ma naquiqui xaan ñáyivi —catyī ra.

Nu chosó noo ñaha sihi ndutya vixi chahan xiñi ra Jesús
(Mr. 14.3-9; Jn. 12.1-8)

⁶ Ra Jesús ñohó ra ñuu Betania, vehe ra Simón, cha catyī ñu Ra Tyahyu Coño chi, sivi saca ra cuvī cuan.

⁷ Ta tuhva noo ñaha nu nyaá ra Jesús, nyisó ña noo yutyi tyitú yihī ndutya vixi chahan. Ta yahvi xaan nyaá ndutya cuan. Ta ra Jesús nyaá ra yuhu mesa ta chosó ña ndutya cuan xiñi ra.

⁸ Cuhva cha cananyehē ra chicá noo chihin ra cacuxaan ra ta quichaha catyī ra:

—¿Ñáá tuhun cha sativī ña ndutya vixi chahan cuan?

⁹ Vaha ca tyehe ta xico ña, ta ñihi ña cuaha xuhun chihin ta tyinyee ña chi ñu ndahvi chihin xuhun cuan —catyī ra.

¹⁰ Tyicuan ta chiñi ra Jesús, ta catyī ra chi ra:

—¿Ñáá tuhun cha sayangá ndo chi ñaha ihya? Vatyī cha sacuvī ña chihin, noo cha vaha cuvī.

¹¹ Vatyī ñu ndahvi tyicuan ri cunyaa ñu chihin ndo, soco yuhu, ñima tyicuan ri cua cunyai chihin ndo.

¹² Chosó ña ndutya vixi chahan siqui coño ñuhi, vatyī sanduvahá ña cuenda cha cohin chichi ñuhú.

¹³ Cha ndicha catyī chi ndo, vatyī tandihī ri nu cahan ñu tuhun Nyoo nicahnu ñáyivi, cunacatyī tucu ñu cha sacuvī ñaha ihya, tacuhva nicohon iñi ñáyivi chi ña —catyī ra Jesús.

Nu naxico tuhun ra Judas Iscariote chi ra Jesús

(Mr. 14.10-11; Lc. 22.3-6)

¹⁴ Tyicuan ta noo ra chicá noo chihin ra Jesús, ra cha nañi Judas Iscariote, chahan ra chicahan ra chihin ra cacuvī nuu chi tata sutu.

¹⁵ Ta catyī ra chi ra:

—¿Yoso cuhva ndo chii tatu cuhva cuende chi ra Jesús chi ndo?

Tyicuan ta ra cacuvī nuu cuan cacatyī ra vatyī oco uchi tahan xuhun cuichin.

¹⁶ Ta nya cuhva cuan ta quichahā nducu ra Judas ñáá noo cuhva cuvi nacuhva cuenda ra chi ra Jesús chi ra cacuví nuu chi tata sutu cuan.

Nu cuxiñi ra Jesús chihin ra cachicá noo chihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Quivi xihna ri cha quichahā vico ta chachí ñu pan cha ñahri yuchan iya yihí chihin, ra cachicá noo chihin ra Jesús tuhva ra chi ra ta quichahā candaca tuhun ra chí ra:

—¿Nya cuñun cha sanduvaha ndi cha cuxiñun cuenda vico pascua ihya?

¹⁸ Ta catyí ra Jesús chi ra:

—Cuñan ndo chichi ñuu ta cháa ndo vehe noo ra cuan. Ta catyí ndo chí ra: “Ra Sacuaha catyí ra vatyí cha cuyatyn cua cúvi ra, ta vehun cusanducahnu ndi vico pascua”, catyí ndo chí ra —catyí ra Jesús.

¹⁹ Tyicuan ta casacuví ra tari cuhva catyí ra Jesús chi ra. Yahā cuan ta casanduvahā ra cha cacuxiñi ra cha vico pascua cuan.

²⁰ Cuhva cha cuaa, chicunyaā ra Jesús nu mesa chihin ndi uchi uvi ra chicá noo chihin ra.

²¹ Ta cha ni ri ca cha cachachí ra, catyí ra Jesús chi ra:

—Cha ndicha catyí chi ndo vatyí noo nyoho cucuhva cuenda ndo chii chi ra xaan iñi chii.

²² Ta canducuihya xaan iñi ra, ta quichahā candaca tuhun ñn ñn ra chi ra ta cacatyí ra:

—Sutu Mañi yuhu, ¿atu yuhu cuví?

²³ Ta nacahan ra Jesús ta catyí ra:

—Ra cha chachí ñn ri coho chihin, ican ra cuan cua na cuhva cuenda chii.

²⁴ Yuhu Rayi cha quichí nya gloria, cuahin ityí cha catyí nu tutu tuhun Nyoo. Soco ndahvi ra ndahvi cha cunacuhva cuenda chii. Quitá vihi ca cuenda chí ra, tyehe ta ña cacu taxin ra —catyí ra Jesús.

²⁵ Tyicuan ta nacahan ra Judas, ra cha cua cuhva cuenda chí ra, ta catyí ra:

—Maestro, ¿atu yuhu cuví?

Ta nacahan ra Jesús, ta catyí ra:

—Ican yoho cuvún.

²⁶ Cha ni ri ca cha cachachí ra, ra Jesús quehen ra pan ta nacuhvā ra tyahvi nyoo chí Nyoo, ta cha yahā tahvi sava ra, ta chahā ra chí ra cachicá noo chihin ra, ta catyí ra:

—Cachi ndo. Ican ihya cuví coñe.

²⁷ Yahā cuan ta quehen tucu ra copa, ta nacuhvā ra tyahvi nyoo chí Nyoo, ta sayahā ra chí tandihí ra ta catyí ra:

—Coho tandihí ndo ihya.

²⁸ Vatyí ican ihya cuví ñiñi. Ta chihin ñiñi natyihí tahan Nyoo tuhun chaa chihin ndo,

vatyí cucatí ñiñi cha catyí cha vaha chí cuaha ñu, vatyí chihin ñiñi coo ticahnu iñi cuatyí ñu.

²⁹ Soco catyí chí ndo, vatyí ma coho que tahan vinu ticahā ndivi ihya, nyacua nya cha cohi vinu chaa chihin ndo nya nu nyacá ñaha Suti andivi —catyí ra.

Nu catyí ra Jesús vatyí cucatyí ra Pedro vatyí ña ñohó nuu ra chí ra

(Mr. 14.26-31; Lc. 22.31-34; Jn. 13.36-38)

³⁰ Cha yahā cha cachitā ra yaa chí Nyoo, ta cuahan coyo ra yucu yutun Oliyo cuan.

³¹ Tyicuan ta quichahā catyí ra Jesús chí ra:

—Tandihí nyoho ta cucaca uvi iñi ndo cha nyicón ndo chii vityin cha cuaa. Vatyí nu tutu Nyoo catyí chí tyehe caa: “Cucañi chí ra sahá cumi mbee, ta mbee cuquiti cuatyí ti”, catyí chí.

³² Soco cha yahā nandote, xihna que cuhin Galilea, ican saha nyoho.

³³ Tyicuan ta nacahan ra Pedro ta catyí ra:

—Vasi tandihí ra ndu uvi iñi ra cha nyicón ra chuun, soco yuhu ma ndu uvi iñi.

³⁴ Tyicuan ta quichahā catyí ra Jesús chí ra:

—Cha ndicha catyí chuun vatyí suri maa cha cuaa ihya, cha ni cumañi ca cuacu loho, yoho cucatyun uñi chaha vatyí ña ñohó nuun chii —catyí ra.

³⁵ Ta ra Pedro catyí ra:

—Vasi cúvi chuhun, soco ma catyí cha ña ñohó nui chuun —catyí ra.

Ta suri tyicuan caa catyí tandihí ra chicá noo chihin ra.

Nu chicán tahvi ra Jesús chí Nyoo nu cuví Getsemaní

(Mr. 14.32-42; Lc. 22.39-46)

³⁶ Tyicuan ta chaā ra Jesús chihin ra cachicá noo chihin ra noo nu nañi Getsemaní, ta catyí ra chí ra:

—Cunyicu ndo ihya, cha ñiri ca cha cuahin yucuan, cua cacan tahvi.

³⁷ Ta quehen ra chí ra Pedro ta chí ni nduvi sehe ra Zebedeo, cuahan coyo chihin ra. Ta quichahā nducuihya cuñi ra, ta tyoño xaan cuñi ra.

³⁸ Tyicuan ta catyí ra chí ra:

—Cahnu xaan tucuihya iñi nyaá añime. Nyacua cuñi chí cahñi chí chii. Ndoño ndo ihya ri ta cnyito ndo chihin —catyí ra.

³⁹ Tyicuan ta cuahan ra Jesús chiin ca ityí nuu ca ta chicuñi chiti ra ta chacun ra nuu ra nu ñuhú, ta chican tahvi ra chí Nyoo ta catyí ra:

—Sutu Mañi yuhu, tu yoho ta cuñun, cuhva cha ma nyehi tindoho ihya. Soco ma cuví tari cuhva cha cuñi mai, soco tari cuhva cuñi maun na cuví —catyí ra.

⁴⁰ Tyicuan ta nachaa ra nu nyicú ra cachica noo chihin ra, ta nyehe ra vatyi caquixí ra. Ta catyí ra chi ra Pedro tyehe caa:

—¿Atu ni minoo hora ña cuví conyito ndo chihin?

⁴¹ Conyito ndo, ta caçan tahvi ndo tacuhva cha ma cuví chasaha cuihna chi ndo. Cha ndicha vatyi añima ndo, cuñí xaan chi nanducu chi Nyoo, soco coño ñuhu ndo vita cuñí chi —catyí ra Jesús chi ra.

⁴² Nu cu uvi chaha chahan ra, ta chican tahvi ra tyehe caa:

—Sutu Mañi yuhu, tatu ma cuví cha ma nyehi tindoho ihya, tu tyicuan caa, na cuví maa kuhva cuñún —catyí ra.

⁴³ Tyicuan ta nachaa ra inga chaha ta caquixí tucu ra cachicá noo chihin ra, vatyi nicunyasi maa chiti nuu ra chihin cha cacuñí ra cusu ra.

⁴⁴ Tyicuan ta sandoo ra chi ra, ta cuahan ra cha cu uñi chaha ca cacan tahvi ra. Ta catyí ra suri maa tuhun cha yaha çahan ra cha chican tahvi ra chi Nyoo.

⁴⁵ Tyicuan ta nachaa ra nu canyicu ra cachicá noo chihin ra, ta catyí ra chi ra:

—Vityin ndicha, çusu ndo ta nyítatu ndo. Vatyi cha chaa kuhva cha cua nacuhva cuenda ra chii chi ra quiñi iyó, ta Rayii cha chichí nya gloria cuví.

⁴⁶ Ndícuita ndo, ta çoho ndo. Vatyi cha vachi ra cha cunacuhva cuenda chii —catyí ra Jesús.

Nu catiñ ra xaan iñi chi ra Jesús cuahan ra vehe caa

(Mr. 14.43-50; Lc. 22.47-53; Jn. 18.2-11)

⁴⁷ Ni çahán ca ra Jesús tuhun ihya, ta chaa ra Judas, ta ra Judas cuví noo ra chicá noo chihin ra Jesús. Ta cuaha ra vachi coyo chihin ra, çanyisó ra mityi ta yutun. Ra cuví nuu chi tata sutu, ta ra cacuví mandoñi ñu Israel, ican tachí chi ra.

⁴⁸ Ra Judas, ra cha çahá cuenda chi ra Jesús, cha yaha çaha ra noo seña chi ra cuan, tacuhva coto ra yóo chi tñn ra. Ta catyí ra:

—Ra cha cutyayuhi chi, ican ra cuan cuví. Tñn ndo chi ra.

⁴⁹ Tyicuan ta tuhva ra chi ra Jesús ta catyí ra:

—Nocumi chuun, Maestro.

Ta tyayuhú ra chi ra.

⁵⁰ Tyicuan ta nacahan ra Jesús ta catyí ra chi ra:

—Amigo, saçuvi ñáá tyiño vachun.

Tyicuan ta catuhva ra ta catiñ ra chi ra Jesús.

⁵¹ Tyicuan ta noo ra ndihi chihin ra Jesús, tava ra mityi ra ta çahnya ra soho noo musu ra cuví nuu chi tata sutu cuan.

⁵² Ta catyí ra Jesús chi ra:

—Natyihí mityun chichi vena. Vatyi tandihi ñu cacañi tahan chihin mityi, suri chihin mityi cúvi ñu.

⁵³ ¿Atu ña chitón vatyi tatu yuhu ta cuñí, cuví caquen chi Suti, ta maa ra cutachi ra vityin vityin yaha ca uñi xico uchi mil ángel, ta sacacu ra chii?

⁵⁴ Soco tatu tyicuan caa, ¿yoso caa chino cava kuhva nyaá nu tutu Nyoo? Vatyi catyí chi tyi tahán maa chi cuví chi yuhu tyehe caa —catyí ra.

⁵⁵ Ta catyí tucu ra Jesús chi ñáyivi:

—¿Atu vachi coyo nyoho vachi tñn ndo chii chihin cha xaan ta chihin yutun? Tari cha noo ra suhu cuví yuhu sahá ndo. Ndiquivi çhinyaj sañahi nu nyicú ndo chichi vehe ñuhu çahnu, soco ña tñn ndo chii cha çuhin vehe caa.

⁵⁶ Vatyi tandihi cha cuví chii vityin, ta chicunyaq nu tutu Nyoo, cha catyaa ra profeta Nyoo ta cha naha.

Tyicuan ta ndii ra cachicá noo chihin ra, cachingo ra. Noo tuhun ca maa ra Jesús casandoo ra.

Nu cutuñi chi ra Jesús nuu ra cacuví tyiño cuenda ñu Israel

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ta ra cha catiñ chi ra Jesús cuan, çhinyaca ra chi ra nuu ra Caifás, ra cuví nuu chi tata sutu. Suri yucuan canyicú iñn ri ra sacuaaha ley vehe ñuhu ta ra cacuví mandoñi.

⁵⁸ Soco ra Pedro cuahan ra çata ra, nya sava ri nya nuquehe vehe ra cuví nuu chi tata sutu cuan. Ta quihvi ra ta ndoo ra nyaá ra chihin policia cuan, vatyi nyehe ra yoso caa quita tuhun cuan.

⁵⁹ Ra cacuví nuu chi tata sutu, ta ra cacuví mandoñi, ta tandihi ra cuví tyiño, canducu ra noo cuatyí catyaa ra siqui ra Jesús, vasi ña ndicha, tacuhva vatyi chihin cuatyí cuan ta cuví çahñi ra chi ra.

⁶⁰ Soco ña çañihj maa ra cuatyí ra, vasi cuaha ñáyivi çahan ñu chicatyí ñu cuendu siqui ra. Soco nu ndihi tuhun, chaa coyo uvi ca testigu cuendu.

⁶¹ Ta cacatyí ra:

—Ra ihya, catyí ra vatyi cuví satani ra vehe ñuhu çahnu Nyoo, ta chichi cha uñi quivi cunacananyaa ra inga chaha, na —cacatyí ra.

⁶² Tyicuan ta ra cuví nuu chi tata sutu cuan, ndicuita ra, ta catyí ra chi ra Jesús:

—¿Atu ña nacahun nu çahan ra ihya?

¿Ñáá cha cuví cha cacatyí ra ihya siçun?

⁶³ Soco ra Jesús taxi ri nanyaá ra.

Tyicuan ta quichaha catyí ra cuví nuu chi tata sutu cuan chi ra:

—Chihin sivi Nyoo nyitó, catyí chuun

vatyi çayun cha ndicha vaha. ¿Atu ra

Cristo Sehe Nyoo nyitó cuví chuun? —catyí ra.

⁶⁴ Ta catyí ra Jesús chi ra:

—Ican cuví, tari cuhva catyí maun. Ta suri catyí chí ndo, vatyí cunyehe ndo chi yuhu Rayií cha quichí nya gloria, cunyai chíyo vaha Nyoo ra iyó tandihí tunyee ifíi chíi, ta cunyehe ndo nu quichí tiquí nu vico ityi andívi —catyí ra.

⁶⁵ Tyicuan ta ra cuví nuu chí tata sutu cuan chahnya ra sahma ra tari noo seña tyi cuñí maa ra tyi ña vaha cha cahan ra Jesús, ta catyí ra:

—Ra ihya chicoo cuatyí ra nuu Nyoo chihin tuhun cahán ra. ¡Nyehe ndo vityin! Ña ñiñi cha tava yo cha ndaa. Nyoho cha chíiñi ndo tuhun ña vaha cahan ra.

⁶⁶ ¿Ñáa catyí ndo vityin?

Ta canacahan ra ta cacatyí ra:

—Iyó cuatyí ra, ta cuñí chí cha cúvi ra.

⁶⁷ Tyicuan ta catyicusí ra nuu ra ta cacañi ra chí ra. Inga ra cacatu ra nuu ra chihin chíqui ra.

⁶⁸ Ta cacatyí ra chí ra:

—Yoho, cha sahún Cristo chuun. ¡Nacoto yóo cha cañi chuun!

Nu catyí ra Pedro vatyí ña ñohó nuu ra chí ra Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Cha niri ca cha nyaá ca ra Pedro nuquehe ityi chata cuan, ta noo ñaha cha cuví musu tata sutu cuan, tuhva ña nu nyaá ra ta catyí ña chí ra:

—Yoho tucu chicá noun chihin ra Jesús, ra Galilea cuan.

⁷⁰ Ta ra Pedro catyí ra vatyí ña ñohó nuu ra chí ra nuu tandihí ñu nyicú cuan, ta catyí ra:

—Ña chité ñáa tuhun cahún.

⁷¹ Tyicuan ta cuahan ra Pedro ityi yuvehe, ta nyehe inga ña chí ra, ta catyí ña chí ra nyicú cuan:

—Suri chicá noo tucu ra ihya chihin ra Jesús, ra ñuu Nazaret cuan —catyí ña.

⁷² Ta inga chaha tucu tixehe ra Pedro cha ñohó nuu ra chí ra ta catyí ra:

—Cha ndicha vaha tyi ña ñohó nui chí ra cuan.

⁷³ Suhva ri ca cuhva cuan, ta ra canycú cuan catuhva ra nu nyaá ra Pedro ta cacatyí ra chí ra:

—Ra tahan ra cuan cuví chí yoho, ndicha. Vatyí quetuvi nyacua nya cuhva cahún.

⁷⁴ Tyicuan ta iyo xaan tyanaha ra ta catyí ra:

—Chitó vaha Nyoo tyi ña ñohó nui chí ra cuan, ta nacahñi Nyoo chíi tatu ña ndicha cha cahún —catyí ra.

Ta suri cuhva cuan nacua cu chaa noo loho.

⁷⁵ Tyicuan ta nichohon ifíi ra Pedro tuhun cha catyí ra Jesús chí ra: “Cha ni cumañi ca cuacu loho, yoho cha yaha catyun uñi chaha vatyí ña ñohó nuun chíi.” Tyicuan ta quitá ra Pedro yucuan, ta chacu vavaha ra cha cuihya ifíi ra cha sacuví ra tyicuan caa.

27

Nu cachahá cuenda ra chí ra Jesús chí ra Pilato

(Mr. 15.1; Lc. 23.1-2; Jn. 18.28-32)

¹ Cuhva cha cundichin, tandihí ra cacuví nuu chí tata sutu ta ra cacuví mandoñi ñuu cuan, catyihí tahan ra tuhun vatyí cacahñi ra chí ra Jesús.

² Ta nuñí ra. Ta chahan coyo ra chicuhva cuenda ra chí ra chí ra Poncio Pilato, ra cuví gobiernu cuenda ñuu Roma cha nyacá ñaha ñuu Israel cuan.

Nu chíi ra Judas

³ Cha nyehe ra Judas, ra cha naxico tuhun chí ra Jesús, vatyí cuacúvi ra, ta ndu uví ifíi ra cha sacuví ra, ta nacuhva ra ndi oco uchi xuhun cuichin cuan chí ra cacuví nuu chí tata sutu cuan, ta chí ra cacuví mandoñi ñuu cuan.

⁴ Ta catyí ra:

—Chicoo cuatyí yuhu, vatyí chaha cuende chí noo ra ñahri cuatyí na cúvi ra.

Soco maa ra canacahan ra ta cacatyí ra:

—Ta yucuan ¿ñáa cuenda nyuhu? ¡Nyehe maa yoho!

⁵ Tyicuan ta tuchí ra Judas xuhun cuan chichí vehe ñuhu cahnu, ta chahan ra ta chicuhñi ra yoho sucun ra ta suri maa ra chítacaá ra chí ra. Ta chíi ra.

⁶ Ra cacuví nuu chí tata sutu cuan canaquehen ra xuhun cuan ta cacatyí ra:

—Ma cuvi tyihi yo xuhun ihya chichí caja ofrenda vatyí yahvi cha chahñi ñu noo ñáyivi cuví.

⁷ Tyicuan ta catyihí tahan ra tuhun, ta chihin xuhun cuan casatá ra noo ñuhú cha nañi Ñuhú Ra Savahá Quisi. Vatyí coo nu cuchi ra chí ñu inga ñuu tu chíi ñu.

⁸ Yucuan chaha nañi ñuhú cuan nyacua nya vityin Ñuhú Sata Ñu Chihin Xuhun Yahvi Cha Chíi Ñáyivi.

⁹ Ta tyicuan caa chinqo cava cha tyaa ra Jeremías profeta Nyoo ta cha naha. Catyí chí tyehé caa: “Quehen ra ndi oco uchi xuhun cuichin, yahvi cha tyaa ñu Israel chí ra.

¹⁰ Ta chihin cuan, casatá ra Ñuhú Ra Savahá Quisi, tari cuhva catyí Sutu Mañi yo chíi”, catyí chí.

Nu nyehe ra Pilato vatyí ñahri maa cuatyí ra Jesús

(Mr. 15.2-5; Lc. 23.3-5; Jn. 18.33-38)

¹¹ Cachinyaca ra chi ra Jesús nuu gobiernu, ta ra cuan ndaca tuhun ra chi ra, ta catyí ra:

—¿Atu ican yoho cuví rey cuenda ñu Israel?

Ta ra Jesús catyí ra chi ra:

—Ican, yuhu cuví. Ndicha cha cahún.

¹² Ta cuhva cha catyaa ra cacuví nuu chi tata sutu cuan ta mandoñi cuatyí siqui ra, ra Jesús ña nacahan maa ra.

¹³ Tyicuan ta quichaha catyí ra Pilato chi ra:

—¿Atu ña chiñún tandihi cha cacahán ra sicun?

¹⁴ Soco ra Jesús ña nacahan ra. Ta nyacua iyo cuñi gobiernu cuan vatyí ña nacahan ra. Ta ña chitó ra ñáa cunyacuví ra.

Nu cutuñi chi ra Jesús ta cacatyí ñu vatyí cucúvi ra

(Mr. 15.6-20; Lc. 23.13-25; Jn. 18.38—19.16)

¹⁵ Soco cha vico pascua cuan, iyó noo tuhun chí ñu vatyí tuhva ra gobiernu saña ra noo ra ñohó vehe caa, nya ra cachi maa ñáyivi.

¹⁶ Ta quivi cuan ñohó noo ra cha nañi Barrabás vehe caa. Ta chitó tandihi ñáyivi tuhun ra.

¹⁷ Ta cuhva cha canyicú ñin ri ñu, ra Pilato ndaca tuhun ra chí ñu, ta catyí ra:

—¿Yóo chí cuñi nyoho cha sañe? ¿Atu chí ra Barrabás o chí ra Jesús, ra nañi Cristo? —catyí ra.

¹⁸ Vatyí chító ra vatyí cha cuenda cha tasi cuñi nyehe ñu chí ra Jesús, yucuan cuenda chaha cuenda ñu chí ra.

¹⁹ Cha ñi ri ca cha nyaá ra Pilato nu tyayu ra, nu cuví ra tyiño, tachí ñasihí ra noo tyiño chí ra ta catyí ña: “Ma tyihun chuun chihin ra vaha chiña. Vatyí cuñi tahín noo ñumahna cha cuenda ra. Ta quiñi xaan tahín chihin”, catyí ña.

²⁰ Soco ra cacuví nuu chí sutu ta mandoñi ñuu cuan, cacuñihi ra catyiyuhu ra chí ñáyivi na cacan ñu cha saña ra Pilato chí ra Barrabás, ta na cúvi ra Jesús.

²¹ Ta gobiernu cuan chahan ra chihin ñu inga chaha, ta catyí ra:

—Chichi cha ñanduvi ra, ¿nya ra cuñi ndo cha sañe?

Ta maa ñu nacahan ñu, ta catyí ñu:

—Chí ra Barrabás.

²² Ta ra Pilato ndaca tuhun ra chí ñu, ta catyí ra:

—¿Ta ñáa cha cusacuvi chihin ra Jesús cha nañi Cristo ihya?

Tandihí ñu nacahan ñu ta catyí ñu:

—¡Na cúvi ra nu cruzi!

²³ Tyicuan ta quichaha catyí ra Pilato chí ñu:

—Soco ¿ñáa cha ña vaha sacuví ra?

Soco maa ñu nacana chaa tucu ñu inga chaha ta catyí ñu:

—¡Cahñi chí ra nu cruzi!

²⁴ Cuhva cha nyehe ra Pilato vatyí ñahri maa cha cuví sacuví ra, vatyí quiñi xaan cacuví ñu, chican ra ndutya, ta nacatya ra ndaha ra chihin nuu ñáyivi cuan, ta catyí ra:

—Yuhu ñahri cuatyí cha cua cúvi ra ñahri cuatyí ihya. Na ndoo siqui maa ndo.

²⁵ Ta tandihí ñáyivi canacahan ñu, ta catyí ñu:

—Na ndoo chí siqui maa ndi ta siqui sehe ndi.

²⁶ Tyicuan ta ra Pilato saña ra chí ra Barrabás, ta tachí ra na ndoho ra Jesús, ta nacuhva cuenda ra chí ra na cúvi ra nu cruzi.

²⁷ Tyicuan ta sindaro cuenda gobiernu cuan chinyaca ra chí ra Jesús nya vehe tyiño, ta casandu ñin ri ra chí tandihí sindaro cuan nicachico.

²⁸ Tyicuan ta catava ra sahma ra ta casacuihno ra noo sahma cuaha chí ra.

²⁹ Ta catyihí ra noo corona cha chingó chihin iñu xiñi ra. Ta chaha ra noo yutun na quindaha ra chihin chiyó vaha ra. Tyicuan ta cachicuiñi chiti ra nuu ra, ta cachacu nyaa ra chí ra ta catyí ra:

—¡Nocumi chuun, yoho Rey cuenda ñu Israel!

³⁰ Ta catyicu sí ra chí ra ñandihí. Ta quehen ra yutun cuan ta cañi ra xiñi ra.

³¹ Cha yaha cha cachacu nyaa ra chí ra ta catava ra sahma cuaha cuan chí ra ta sandihvi noo tucu ra sahma maa ra chí ra. Tyicuan ta quehen ra chí ra cua cahñi ra chí ra nu cruzi.

Nu catyaa ra chí ra Jesús nu cruzi

(Mr. 15.21-32; Lc. 23.26-43; Jn. 19.17-27)

³² Cuhva cha caquita coyo ra yucuan, catahan ra chí noo ra ñuu Cirene, nañi ra Simón. Ta casaniñi ra chí ra na cuiso ra cruzi ra Jesús.

³³ Ta cacha coyo ra noo nu nañi Gólgota, ta cuñi chí catyí Nu Cuví Yiqui Xiñi Ndiyí.

³⁴ Ta yucuan cachaha ra vinu nasaca chihin cava uva coho ra Jesús. Soco cha yaha chí chihí ra chiin, ña cuñi ca ra coho.

³⁵ Ta cha yaha cha catyaa ra chí ra nu cruzi, tyicuan ta sindaro cuan caquehen ra sahma ra ta chahan ra noo síhva chihin. Ta nya ra saha ganaa, ñihí ra sahma cuan. Ta tyicuan caa chingó cava tuhun cha tyaa noo profeta Nyoo ta cha naha nu catyí chí tyeh caa: “Casacha ra sahme chihin cha chahan ra síhva”, catyí chí.

³⁶ Tyicuan ta cachicunyicu ra yucuan vatyí saha cuenda ra chí ra.

³⁷ Ta ityi xiñi ra catyaa ra noo letra cha catyí ñáa tuhun cua cahñi ra chí ra. Ta

catyí chi tyehe caa: “Ican ra ihya cuví ra Jesús, rey cuenda ñu ñuu Israel.”

³⁸ Tacoyó tucu uvi ra suhu chihin ra nu uvi ca cruzi cuan. Noo ra chiyo vaha ra, ta inga ra chiyo satyín ra.

³⁹ Ta ñu yahá coyo cuan, cacahán ñu chi ra, ta quisi xiñi ñu,

⁴⁰ ta catyí ñu chi ra:

—¡Yoho cha catyún tyi cusanduvon vehe ñuhu cahnu, ta chichi cha uñi quivi ta nacananyaa tucun! ¡Sacacu chuun vityin! ¡Tatu Sehe Nyoo cuví chuun, ño nu cruzi chiña! —catyí ñu chi ra.

⁴¹ Ta suri tyicuan caa cachacú nyaa tucu ra cacuví nuu chi tata sutu chi ra, ta ra sacuahá ley vehe ñuhu, ta mandoñi ñuu ñandihí. Ta cacatýí ra chi tahan ra tyehe caa:

⁴² —Sacacú ra chi inga ñu, soco ña cuví sacacu ra chi maa ra. Tatu Rey cuenda ñu Israel cuví ra, na noo ra nu cruzi cuan, tachuhva chino iñi yo chi ra.

⁴³ Itá iñi ra chi Nyoo, vityin na sacacu Nyoo chi ra, tatu ndicha cuñi ra chi ra. Vatyí catyí ra chi yo vatyí Sehe Nyoo cuví chi ra.

⁴⁴ Ta nyacua nya ra suhu cha tacaá nu cruzi xiin ra ta cacahan ra chi ra ñandihí.

Nu chihí ra Jesús

(*Mr. 15.33-41; Lc. 23.44-49; Jn. 19.28-30*)

⁴⁵ Tyicuan ta tandihí siqui ñuhu ñayivi nduñaa iñi, nyacua nya ora ta nyacua nya ca uñi cha cha iñi.

⁴⁶ Ta suri cuhva cuan, cana chaa ra Jesús chihin cha chaa ndusu ra. Ta catyí ra tyehe caa:

—Elí, Elí, ¿lama sabactani? —ta cuñi chi catyí: Nyoo Suti, Nyoo Suti, ¿ñáá tuhun cha sandoó ñihnon noo tuhun mai?

⁴⁷ Suhva ra canyicú cuan, cachiñi ra cha cahán ra, ta cacatýí ra:

—Chi ra Elías, ra profeta Nyoo ta cha naha, ican cana chaa ra.

⁴⁸ Ta caa cuhva ri cuan, cuahan vavaha noo ra cua quehen ra noo xixan, ta satyij ra chihin vinu iya, ta tyaá ra noo nu yutun, ta satuhrá ra yuhu ra Jesús tachuhva na coho ra.

⁴⁹ Soco inga ra cacatýí ra:

—Saña chi ra. Na nyehe yo tatu quichi sacacu ra Elías chi ra.

⁵⁰ Inga tucu chaha cana chaa ñihi ra Jesús, tyicuan ta chihí ra.

⁵¹ Ta caa cuhva ri cuan ndatá sava sahma cha tacaá chichi vehe ñuhu cahnu cuan, nyacua nya siqui ta nyacua nya yuvi ndatá. Ta tañ. Ta ndatá yuu.

⁵² Ta nuña yuhu ñaña. Ta nyacua canandoto cuaha ñu chinó iñi chi Nyoo, ñu cachiñi.

⁵³ Ta cha yaha nandoto ra Jesús caquita coyo ñu nu ñaña ta quihvi coyo ñu chichi ñuu Jerusalén, ta cuaha ñayivi nyehe chi ñu.

⁵⁴ Tyicuan ta capitán ta sindaro cha casahá cumi chi ra Jesús, cayuhvi xaan ra cuhva cha tañ. Ta cha canyehé ra inga ca cha cuví, ta cacatýí ra:

—Ndicha ndicha cuii, vatyí Sehe Nyoo cuví chi ra ihya.

⁵⁵ Cuaha ñusihí cha chinyicon chi ra Jesús nya Galilea ta tyinyee ñu chi ra, nyicú ñu canyehé ñu nya sava ri yucuan.

⁵⁶ Ta ican suhva ñu ihya cuví cu María ñaha Magdala, ta cu María sihi ra Jacobo ta ra José, ta sihi sehe ra Zebedeo.

Nu cua cuchi ra chi ra Jesús

(*Mr. 15.42-47; Lc. 23.50-56; Jn. 19.38-42*)

⁵⁷ Cuhva cha cua cuaa, quichi noo ra tyayii cha nañi José. Ra ñuu Arimatea. Ta suri chinó iñi ra chi ra Jesús.

⁵⁸ Ta chahan ra chinyehé ra nu nyaá ra Pilato, ta chican ra coño ñuhu ra Jesús. Tyicuan ta tyihí ra Pilato tyiño na cuhva ra coño ñuhu ra chi ra.

⁵⁹ Tyicuan ta quehen ra José coño ñuhu ra, tyihí ra chichi noo sinduhu ndii.

⁶⁰ Ta tyihí ra chi ra chichi noo ñaña nicaa chaa cha cuví noo yavi yuu cha tyihí ra tyiño cachatya ra. Ta cha yaha cha nacasi ra yuhu ñaña cuan chihin noo yuu cahnu, ta cuahan ra.

⁶¹ Soco cu María ñaha Magdala, ta inga cu María, ndoo ñu nyicú ñu yuhu ñaña cuan.

Nu casahá cumi sindaro ñaña ra Jesús

⁶² Ta cha inga quivi, quivi nyitatu ñu cuví, ta ra cacuví nuu chi tata sutu, ta ra fariseo chahan coyo ra chinyehé ra nu nyaá ra Pilato.

⁶³ Ta catyí ra chi ra:

—Tata, nicohón iñi ndi vatyí ra cuendu cuan, catyí ra ta nyitó ca ra vatyí cha yaha cha uñi quivi cunandoto ra.

⁶⁴ Yucuan chaha tyihí tyiño na casaha cumi vaha ra ñaña cuan, nya yaha cha uñi quivi, coto quichi coyo ra cachica noo chihin ra cha cha cuaa, ta casuhu ra coño ñuhu ra. Yaha cuan ta cucatýí ra chi ñayivi vatyí cha nandoto ra. Ta cha tyicuan caa nu ndihí tuhun ihya, yaha ca cuhva cucuvi —catyí ra.

⁶⁵ Ta ra Pilato catyí ra chi ra:

—Ma suhva sindaro chiña. Cuahan ndo, ta saha cumi vaha ndo ñaña cuan, yoso cuhva cha vaha cuví saha cumi ndo —catyí ra.

⁶⁶ Tyicuan ta cuahan coyo ra, ta casahá cumi vaha ra ñaña cuan, ta catyaa ra noo sellu chata yuu cha chasí cuan. Ta casandoo ra chi sindaro sahá cumi yucuan.

28

*Nu nandoto ra Jesús**(Mr. 16.1-8; Lc. 24.1-12; Jn. 20.1-10)*

¹ Cha yaha quivi cha nyitatu ñu, cuhva cha vachi cundichin, nu quichaha vitya cuví. Ta cu María ñaha Magdala cuan, ta inga cu María chahan coyo ñu nu ñaña.

² Ta quichi minoo cha taan vatyi quichi ángel Sutu Mañi yo noo ra nya ityi andivi, ta chaa ra nu ñaña cuan. Ta sacanyaha ra yuu cha nyasí yuhu cuan, ta chicunya ra síqui.

³ Ta xiño vavaha ra, tari cha quihvi tacha. Ta sahma ra cuichin vavaha.

⁴ Cuhva cha cananyehé sindaro cuan chi ra, canayuhví vavaha ra nyacua nihi ra, ta nyacua coñaa ra chihin cha yuhví ra.

⁵ Tyicuan ta quichaha catyí ángel cuan chi ñusihí cuan:

—Ma yuhvi ndo. Yuhu chité vatyi chi ra Jesús cha chihí nu cruzi nanducú ndo.

⁶ Yori ca ra ñohó ihya, vatyi cha nandoto ra, tari catyí ra. Ñaha ndo ta nyehé ndo nu catuví ra.

⁷ Ta cuhun ndo numi ri, ta catyi ndo chi ra cachicá noo chihin ra vatyi cha nandoto ra, ta cha cuahan ra Galilea, nyatú ra chi ra yucuan. Ican ihya cuví cha nyaa catyi chi ndo —catyí ángel cuan chi ñu.

⁸ Tyicuan ta numi ri quitá coyo ñu nu ñaña cuan. Suhva ri yuhví ñu, ta suhva ri síi vavaha cuñí ñu. Ta chinq vavaha ñu cua catyi ñu chi ra cachicá noo chihin ra Jesús.

⁹ Ta cuhva cuan tuví ra Jesús nuu ñu ta chaha ra nocumi chi ñu. Tyicuan ta catuhva ñu chi ra ta chicuñi chiti ñu nuu ra ta casacahnu ñu chi ra, ta suri numí ñu chaha ra.

¹⁰ Ta catyí ra chi ñu:

—Ma yuhvi ndo. Cuahan ndo cua sacoto ndo chí yañi vatyi na cuhun coyo ra Galilea, ta nyicuan cuñihi tahan ndi —catyí ra chi ñu.

Tuhun cha canacatyí sindaro

¹¹ Cha ni ri ca cha cuahan coyo ñu cuan, suhva sindaro cha casaha cumi yucuan, cuahan coyo ra nya ñuu, cua nacatyí ra cha cuví cuan chi ra cacuví nuu chi sutu.

¹² Tyicuan ta ra cacuví nuu cuan chahan coyo ra chicahan ra chihin ra mandoñi ñuu vatyi catyihí tahan ra tuhun yoso caa casacuví ra. Tyicuan ta cuaha xuhun cachaha ra chí sindaro cuan.

¹³ Ta cacatyí ra chi ra:

—Nyoho, catyi ndo vatyi cha cha cuaa cha ni ri ca cha quixí ndo, chahan coyo ra cachicá noo chihin ra Jesús ta chिकासuhú ra coño ñuhu ra.

¹⁴ Ta tatu chito gobiernu tuhun ihya, cua nyehé maa ndi yoso caa catyi ndi chí ra, ta

nyoho ma caca iñi ndo. Ñahri cucuvi chi ndo.

¹⁵ Tyicuan ta caquehen sindaro cuan xuhun, ta cuahan coyo ra cua casacuví ra cha cacatyí ra chí ra. Ta nya vityin ta tyicuan caa catyí ñáyivi ñuu Israel.

Nu tyaa ra Jesús tyiño chi ra cachicá tyiño ra

(Mr. 16.14-18; Lc. 24.36-49; Jn. 20.19-23)
¹⁶ Ta tyicuan caa, ndi uchi ñin ra cachicá noo chihin ra, cuahan coyo ra nya Galilea nya yucu nu catyí maa ra Jesús chí ra vatyi cuhun coyo ra.

¹⁷ Ta cuhva cha cananyehé ra chí ra Jesús, casacahnu ra chí ra soco suhva ra chica uvi iñi ra.

¹⁸ Tyicuan ta tuhva ra Jesús chí ra ta catyí ra chí ra:

—Nyoo chaha ra cha cunyaca ñaha yuhu tandihí andivi ta síqui ñuhu ñáyivi.

¹⁹ Yucuan chaha, cuahan ndo tandihí nu nyicú ñáyivi, tandihí ri ñuu, ta catyi ndo chí ñu na nanyicon ñu chii. Ta sacondutya ndo chí ñu chihin sivi Sutu yo Nyoo ta chihin sivi yuhu Sehe Nyoo, ta chihin sivi Tatyí Ii Nyoo.

²⁰ Ta sañaha ndo chí ñu na naquichaha ñu tandihí cha catyí yuhu tyi sacuvi ñu. Ta coto ndo vatyi yuhu cunyai chihin ndo tandihí quivi nyacua nya naa ñáyivi —catyí ra Jesucristo chí ra cachicá tyiño ra.

Tuhun Nyoo Cha Tyaa San Marcos

Nu sacondutyá ra Juan chi ñáyivi ta cahán ra tuhun Nyoo chihin ñu
(Mt. 3.1-12; Lc. 3.1-9, 15-17; Jn. 1.19-28)

¹ Tyehé caa quichahá tuhun vaha ra Jesuscristo Sehe Nyoo.

² Ra Isaías profeta Nyoo tyaa ra tuhun ra Cristo ta tuhun ra Juan. Tyehé caa catyí Nyoo chi ra Cristo:

Cumañi ca cahun siqui ñuhu ñayivi ta cutachi chi noo ra cusacoto chi ñáyivi vatyí nyaá cahun nu nyicú ñu, catyí Nyoo chi ra Cristo.

³ Chiñi yo ndusu noo ra cha canachaá nu chíqui ndii,

ta catyí ra: “Tari sanduvahá ndo noo ityi, tyicuan caa sanduvaha ndo aña ndo vatyí cua quichi Sutu Mañi yo.

Nuña ndo noo ityi ndoo chi ra na quihvi ra aña ndo.”

Tyicuan caa tyaa ra profeta Isaías nu tutu Nyoo ta cha naha.

⁴ Ta tyicuan caa quichi ra Juan sacondutyá ra chi ñáyivi nu chíqui ndii cuan. Ta catyí ra chi ñu na ndu uvi iñi ñu cuatyí ñu, ta na condutyá ñu tari noo seña tyi nasama ñu cuhva iyó ñu, ta tyicuan caa ta Nyoo cusaha ra ticahnu iñi cuatyí ñu.

⁵ Ta tandihi ñáyivi ityi Judea quichi coyo ñu tyasoho ñu tuhun cahán ra, ta ñu ñuu Jerusalén ñandihí. Ta cha yahá nahma ñu cuatyí ñu, sacondutyá ra Juan chi ñu yuvi cahnú Jordán.

⁶ Ta sahma cha ñihno ra Juan cuan chihin ixi camellu chino chí. Ta ñi cuví sinchu ra. Ta pinchi tuhvá ra chachi. Ta tyañuñu cuhu tuhvá ra chihí.

⁷ Ta cahán ra tuhun Nyoo ta catyí ra:

—Cha yaha yuhu ta vachi noo ra iyó xaan ca tunyee iñi chi ican saha yuhu. Ta ña nañé ni cha ndachi ñi xityin ndichan ra.

⁸ Yuhu sacondutyé chi ndo chihin ndutya. Soco maa ra cusacondutya ra chi ndo chihin Tatyí Ii Nyoo —catyí ra Juan.

Nu condutyá ra Jesús
(Mt. 3.13-17; Lc. 3.21-22)

⁹ Quivi cuan quita ra Jesús ñuu Nazaret, cha nyaá ityi Galilea, ta cuahan ra nya yuvi cahnú Jordán. Ta yucuan sacondutyá ra Juan chi ra.

¹⁰ Ta cha yahá condutyá ra Jesús, ta cuhva cha cua quita ra chichi ndutya, ta nanyehé ra andivi cuahan nuña. Ta nyehé ra Tatyí Ii Nyoo tari noo paloma, vachi noó siqui ra.

¹¹ Ta tyacú noo ndusu ityi andivi ta catyí ndusu cuan tyehé caa:

—Yoho cuvún Sehi ta cuñi xain chuun. Ta sii xaan cuñi chuhun —catyí ndusu cuan.

Nu nducú nyehé ra ña vaha chi ra Jesús
(Mt. 4.1-11; Lc. 4.1-13)

¹² Yahá cuan ta sacuhun Tatyí Ii Nyoo chi ra Jesús noo nu chíqui ndii.

¹³ Ta yucuan chinyaá ra uvi xico quiivi nu chíqui ndii cuan, nu yori ñáyivi iyó, maa ri quiiti iyó. Ta nducú nyehé cuihna chi ra. Ta yahá cuan ta chaá coyo ángel ta catyíñuhu ra chi ra.

Nu quichahá saha tyiño ra Jesús ityi Galilea
(Mt. 4.12-17; Lc. 4.14-15)

¹⁴ Cha yahá catyihí ñu chi ra Juan vehe caa, ta ra Jesús cuanuhu ra Galilea ta cahán ra tuhun vaha Nyoo chihin ñáyivi.

¹⁵ Ta catyí ra:

—Cha chaá cuhva cha cua cunyaca ñaha Nyoo aña ndo. Yatyin ri nyaá ra chihin ndo. Ndu uvi iñi ndo cuatyí ndo, ta chino iñi ndo tuhun Nyoo cha sacacu aña ndo —catyí ra Jesús.

Nu caná ra Jesús chi cumi tahan ra catiñ tiyaca

(Mt. 4.18-22; Lc. 5.1-11)

¹⁶ Chicá noo ra Jesús yuhu miñi cha nañi Tyañuhu Galilea. Ta nanyehé ra chi ra Simón ta chi yañi ra, ra Andrés, cacañi ra yuhva ra nu ndutya, vatyí ra catiñ tiyaca cacuvi ra.

¹⁷ Ta catyí ra Jesús chi ra:

—Cunyicon ndo chii, ta yuhu cusacuvi vatyí tari ñihí ndo tiyaca, tyicuan caa cuñihí ndo aña ñáyivi, tava ndo chi ñu nu quiñi caa, na quihvi ñu cuenda Nyoo —catyí ra Jesús chi ra Simón ta chi ra Andrés cuan.

¹⁸ Caa cuhva ri cuan casandoó ra yuhva ra, ta cuahan coyo ra chihin ra.

¹⁹ Yahá cuan ta chiin ri ca chicá ra Jesús, ta nanyehé ra chi ra Jacobo, sehe ra Zebedeo, ta chi yañi ra, ra Juan. Cañohó ra chichi noo canoa canaquicú ra yuhva ra.

²⁰ Caná ra Jesús chi ra. Ta ninduvi tahan ra casandoó ra sutu ra, ra Zebedeo, chichi canoa chihin ra catyinyeé chi ra. Ta cuahan coyo ra chihin ra Jesús.

Nu nduvahá noo ra yihí tatyí ña vaha aña
(Lc. 4.31-37)

²¹ Ta chaá coyo ra ñuu Capernaum. Ta cuví chi noo quiivi nyitatu ñáyivi, ta quihvi ra Jesús chichi vehe ñuhu, ta quichahá sañaha ra tuhun Nyoo chi ñáyivi.

²² Ta iyo cuñi ñu tuhun cahán ra, vatyí sañahá ra tari noo ra iyó vaha ityi chíi cha cahán. Ña cahán ra cuhva cahán ra casacuahá cuenda ley vehe ñuhu.

²³ Chichi vehe ñuhu cuan ñohó noo ra yihí tatyí ña vaha aña. Ta caná chaa ra ta catyí ra:

²⁴ —¿Ñáá tuhun cha tyihún chuun chihin ndi, yoho Jesús ra ñuu Nazaret? ¿Atu vachun vatyi sanaun chi ndi? Yuhu ñohó nui chuun, ta chité vatyi Sehe Ii Nyoo cuví chuun —catyí ra yihí tatyí ña vaha cuan chi ra Jesús.

²⁵ Nacahan ra Jesús ta catyí ra chi tatyí ña vaha cuan:

—¡Taxi ri! ¡Saña chi ra ndahvi chiña!
—catyí ra.

²⁶ Ta tatyí ña vaha cuan, chihí tañi ra cuhví cuan saha chi, ta iyo canachaa tatyí cuan quita chi ra.

²⁷ Tandihí ñáyivi yuhvi xaan ñu cuví, ta candaca tuhun ñu chi tahan ñu, ta catyí ñu:

—¿Ñáá cha cuví ihya? ¿Ñana vaha tuhun chaa sañahá ra ihya? ¡Vatyi iyo vaha tunyee iñi chi ra, nyacua nya tatyí ña vaha, ta quichahá chi ra! —catyí ñu.

²⁸ Ta numi ri cachito ñáyivi tandihí ñuu cha iyó Galilea cuan tuhun ra Jesús.

Nu sanduvaha ra Jesús chi maha tyiso ra Simón Pedro

(Mt. 8.14-15; Lc. 4.38-39)

²⁹ Cuhva cha quita coyo ra chichi vehe ñuhu, ta cuahan ra Jesús vehe ra Simón ta ra Andrés. Ta cuahan tucu ra Jacobo ta ra Juan chihin ra.

³⁰ Ta maha tyiso ra Simón catuví ña nu chito, cuhví ña chihin cahñi. Ta catyí ñu chi ra Jesús tyi cuhví ña.

³¹ Tyicuan ta tuhva ra Jesús, ta tijn ra ndaha ña. Ta nacoñehé ra chi ña. Ta caa cuhva ri cuan, tinyaa cahñi chi ña. Ta quichaha tyiñuhu ña chi ra.

Nu sanduvaha ra Jesús chi cuaha ñu cuhvi

(Mt. 8.16-17; Lc. 4.40-41)

³² Cuhva cha quee ñanyii ta cha cua cuaa, quichí nyaca ñu tandihí ñu cuhví ta ñu yihí tatyí ña vaha nu nyaá ra Jesús.

³³ Ta tandihí ñáyivi ñuu cuan candu ijin ri ñu yuvehe cuan.

³⁴ Ta cuaha ñu cuhví cha siin siin cuehe sanduvaha ra. Ta tava ñehe ra chi cuaha tatyí ña vaha, soco ña chaha ra cha cahan tatyí cuan, vatyi chitó cuan yóo ra cuví ra.

Nu cahán ra Jesús tuhun Nyoo ityi Galilea

(Lc. 4.42-44)

³⁵ Ta cha inga quivi cuhva cha ni ñaa ca, ndicuitá ra Jesús, ta cuahan ra ityi chata ñuu. Cuahan ra noo nu yori sayanga chi ra cua cacan tahvi ra chi Nyoo.

³⁶ Ta ra Simón ta ra tahan ra cuahan coyo ra cua nanducu ra chi ra.

³⁷ Ta cuhva cha canañihí ra chi ra cacatyí ra chi ra:

—Tandihí ñáyivi nanducú ñu chuun
—catyí ra chi ra Jesús.

³⁸ Soco maa ra catyí ra chi ra:

—Coho ndo inga ñuu cha nyicú yatyin ri ihya, vatyi cahan tiqui tuhun Nyoo yucuan, vatyi yucuan tyiño vachi —catyí ra Jesús chi ra.

³⁹ Yucuan chaha chica noo ra Jesús tandihí ri ñuu cha iyó Galilea, cahán ra tuhun Nyoo chichi vehe ñuhu tahan tahan ñuu. Ta tava ñehe ra tatyí ña vaha cha yihí añima ñáyivi.

Nu sanduvaha ra Jesús chi noo ra cha tyahyu coño

(Mt. 8.1-4; Lc. 5.12-16)

⁴⁰ Noo chaha tuhva noo ra cuhví cha tyahyu coño nu nyaá ra Jesús. Ta chicuñi chiti ra nuu ra, ta catyí ra chi ra:

—Tatu cuñún, cuví sanduvahun chii
—catyí ra.

⁴¹ Ta cundahvi cuñi ra Jesús nyehé ra chi ra, ta tyiso ra ndaha ra siqui ra, ta catyí ra:

—Cuñi sanduvahi chuun. Ta na nduvahun vityin ri —catyí ra chi ra.

⁴² Caa cuhva ri cha catyí ra tyehé caa, tinyaa cuehe cuan chi ra, ta nduvaha ra.

⁴³ Tyicuan ta catyí ra Jesús vatyi cha cuví cuhun ra, soco catyí xaan ra chi ra na sacuvi ra tyehé caa:

⁴⁴ —Nyehe. Yori chihin cahun tuhun.

Soco cuhan nu nyaá tata sutu. Ta sañahun chuun chi ra, ta cuhvon cha tahan chi cuhvon na ndundiun nu Nyoo tari cuhva catyí nu ley cha tyaa ra Moisés, vatyi tacuhva coto tandihí ñáyivi tyi cha nduvahun chihin cuehe cuan —catyí ra Jesús chi ra.

⁴⁵ Soco ra cuan chahan ra, ta quichaha nacatyí ra chi tandihí ñáyivi. Yucuan chaha ña cuví ca quihvi ndichin ra Jesús chichi ni noo ñuu. Ta ityi chata ri ñuu chica noo ra nu yori ñáyivi iyó, soco tandihí ri ityi quita coyo ñu, quichí nyehé ñu chi ra.

2

Nu sanduvaha ra Jesús chi noo ra cuhvi cha ña cuví nacanda

(Mt. 9.1-8; Lc. 5.17-26)

¹ Suhva quivi yaha ta quihvi ra Jesús inga chaha chichi ñuu Capernaum. Ta cachito ñáyivi tyi nyaá ra vehe.

² Ta numi ri candu ijin ri cuaha ñáyivi. Ta nyacua ña chitahan ñu, ni yuvehe. Ta maa ra Jesús cahán ra tuhun Nyoo chihin ñu.

³ Tyicuan ta cumi tahan ra canyisó chi noo ra cuhví cha ña cuví nacanda, caquichí nyaca ra chi ra nu nyaá ra Jesús.

⁴ Soco ña cuví caquihvi ra nya nu nyaá ra Jesús cha cuenda vatyi tuvi xaan ñáyivi.

Tyicuan ta candaq ra ityi xiñi vehe. Ta sacuachiyó ra suhva tyiyo. Ta sanoq ra chi ra cuhví cuan chihin chito.

⁵ Nyehe ra Jesús vatyi cachinó xaan iñi ra cuan. Ta catyí ra chi ra cuhví cuan:

—Cha ndachĭ cuatyun, suti —catyĭ ra Jesús chi ra.

⁶ Soco suhva ra sacuahá cuenda ley vehe ñuhu nyicú ra cuan, ta cachicá xiñi ra tyehe caa:

⁷ “¿Ñáá tuhun cha cañá iñi ra ihya cahan ra tyehe caa? Chicoḡ cuatyĭ ra nuu Nyoo chihin tuhun caḡan ra vatyĭ yori cuvĭ sandachi cuatyĭ, noo tuhun ri maa Nyoo cuvĭ sandachi ra cuatyĭ”, cachicá xiñi ra.

⁸ Soco ra Jesús chitó ra cha cachicá xiñi ra. Ta catyĭ ra chi ra:

—¿Ñáá tuhun cha chicá xiñi nyoho tyicuan caa?

⁹ ¿Ñáá cha yĭ ca, cha catyĭ yo chi ra cuhvĭ ihya vatyĭ cuatyĭ ra cha yahá ndachi, o cha catyĭ yo chi ra vatyĭ nducuita ra ta naquehen ra chito ra ta caca ra?

¹⁰ Vaha, vityin chihin cha sanduvahi chi ra ihya, cusañahi chi ndo vatyĭ yuhu ra cuvĭ Rayĭ cha quichĭ nya gloria, iyó ityĭ chii cha sandachi cuatyĭ ñáyĭvi —catyĭ ra Jesús chi ra.

Tyicuan ta quichaha catyĭ ra chi ra cuhvĭ cuan:

¹¹ —Catyĭ chi yoho, ndĭcuita, naquehen chiton, ta cuañuhu nya vehun —catyĭ ra Jesús chi ra.

¹² Ta ra cuhvĭ cuan ndĭcuita ra. Naquehen ra chito ra, ta cuañuhu ra. Ta tandĭhi ñu nyehe ñu, ta iyo cuñĭ ñu, ta sacahnú ñu chi Nyoo, ta catyĭ ñu:

—Ni noo chaha ta nyehe ca yo cha tyehe caa —catyĭ ñu.

Nu cana ra Jesús chi ra Levĭ

(Mt. 9.9-13; Lc. 5.27-32)

¹³ Yahá cuan ta cuahan tucu ra Jesús inga chaha yuhu miñi cuan. Ta cuhva cha natacá ñáyĭvi nu nyaá ra, quichaha cahan ra nuu ñu.

¹⁴ Tyicuan ta cuahan ra ta nu yahá ra nanyehe ra chi ra Levĭ sehe ra Alfeo, nyaá ra nu sahá tyiño ra, tavá ra xuhun cuenda gobiernu ñuu Roma. Ta catyĭ ra Jesús chi ra: —Cḡho chihin.

Tyicuan ta nducuitá ra Levĭ, ta cuahan ra chihin ra.

¹⁵ Yahá cuan ta tahan chi nyaá ra Jesús chihin ra cachicá noo chihin ra cachachĭ ra nu mesa vehe ra Levĭ. Ta nyicú tucu cuaha ra catavá xuhun chihin inga ñáyĭvi iyó cuatyĭ. Vatyĭ cuaha xaan ñu nyicón chi ra.

¹⁶ Soco ra casacuahá cuenda ley vehe ñuhu, ta ra cacuvĭ fariseo, ra cha quichahá xaan ley vehe ñuhu, cha canyehe ra vatyĭ chachĭ ra Jesús chihin ra catavá xuhun, ta ñu iyó cuatyĭ, ta cacatyĭ ra chi ra cachicá noo chihin ra Jesús:

—¿Yoso caa cha ra sacuahá chi nyoho chachĭ ra ta chihĭ ra chihin ra catavá xuhun ta ñu iyó cuatyĭ?

¹⁷ Chiñĭ ra Jesús cha cacahān ra ta catyĭ ra:

—Ña chiñuhú doctor chi ñu ña cuhvĭ, soco chiñuhú ra chi ñu cuhvĭ. Vachi yuhu soco ñima cha cuenda cha vaha chi ñu vaha, soco cha cuenda cha vaha chi ñu iyó cuatyĭ —catyĭ ra Jesús chi ra.

Nu sañahá ra Jesús vatyĭ nya cha yahá canyaha ra chi ñu nyicón chi ra, tyicuan ta cutahan chi savaha ñu ayuno
(Mt. 9.14-15; Lc. 5.33-35)

¹⁸ Noo chaha, ra canyicón chi ra Juan ta ra canyicón chi ra fariseo, ña chachĭ ra ta nanducú ra chi Nyoo. Ta suhva ñáyĭvi quichĭ coyo ñu nu nyaá ra Jesús, ta ndacá tuhun ñu chi ra, ta catyĭ ñu chi ra:

—¿Ñáá tuhun cha ra canyicón chi ra Juan ta ra canyicón chi ra fariseo tuhvá ra savaha ra ayuno, ta ra cachicá noo chuhun ña tuhvá ra? —catyĭ ñu.

¹⁹ Ta nacaḡan ra Jesús ta catyĭ ra:

—Noo vico tandaha, ¿atu cuvĭ cha ma cachi ra ñohó vico cha ni ri ca cha nyaá ra cha cua tandaha cuan chihin ra? Tatu nyaá ca ra cua tandaha cuan chihin ra, ma cuvĭ cha ma cachi ra.

²⁰ Soco vachi chi quĭvi cha cutinyaa ra chi ra tandaha cuan nu nyicú ra tahan ra. Yucuan ndicha quĭvi coo cuhva cha ma cachi ra ta nanducu ra chi Nyoo —catyĭ ra Jesús chi ñu.

Nu sañahá ra Jesús vatyĭ ña nacachi tahan tuhun chahnu cha iyó ñáyĭvi chihin tuhun chaa cha sañahá ra

(Mt. 9.16-17; Lc. 5.36-39)

²¹ Catyĭ ra Jesús:

—Yori naquicu noo sahma chahnu chihin noo sahma chaa, vatyĭ cha chaa cuan nandĭyi ta cahnya chi sahma chahnu, ta nu tahnya cuan cunducahnu ca.

²² Ta ni ri ña tuhvá yo tyihi yo vinu chaa chichi ñi chahnu, vatyĭ vinu chaa chahnyá chi ñi, ta chatĭ vinu, ta tivĭ ñi. Yucuan chaha cuñĭ chi cha tyihi yo vinu chaa chichi ñi chaa —catyĭ ra Jesús.

Nu catohon ra cachicá noo chihin ra Jesús yoco trigo quĭvi nyitatú ñáyĭvi

(Mt. 12.1-8; Lc. 6.1-5)

²³ Noo quĭvi cha tuhvá ñáyĭvi nyitatu, cuahan ra Jesús chicá ra mahñu nu iyó cha tachĭ ñáyĭvi. Ta ra cachicá noo chihin ra quichaha catohon ra yoco trigo cuan cuhva cha yahá coyo ra.

²⁴ Tyicuan ta quichaha cacatyĭ ra fariseo chi ra Jesús:

—¡Nyēhe xihna! ¿Ñáá tuhun cha sacuvĭ ra cachicá noo chuhun tyiño cha ña tahan chi sacuvĭ yo quĭvi nyitatú yo? —cacatyĭ ra.

²⁵ Soco maa ra Jesús catyĭ ra chi ra:

—¿Atu ni noo chaha ta sacuaaha ca nyoho cha sacuvi ra David chihin ra tahan ra noo quivi cha cachisoco vavaha ra?

²⁶ Quivi cha cuvi ra Abiatar tyiño cha cuvi ra nuu chi tata sutu, quihvi ra David chichi vehe Nyoo. Ta chachi ra pan ii, cha tahan chi cachi maa ri maa ra cuvi sutu. Ta chaha tucu ra cachi ra ndihi chihin ra —catyi ra Jesús.

²⁷ Ta catyi tucu ra Jesús chi ra: —Chicoo quivi nyitatu yo, cuenda cha vaha chi ñáyivi, soco ñáyivi ña chicoo ñu cha cuenda cha vaha chi quivi nyitatu yo.

²⁸ Yucuan chaha yuhu Rayi cha quichi nya gloria, iyó ityi chii cha catyi chi noo noo ndo ñáa cha sacuvi ndo quivi nyitatu yo —catyi ra Jesús.

3

Nu nduvaha noo ra na ityi inchiyo ndaha (Mt. 12.9-14; Lc. 6.6-11)

¹ Quihvi ra Jesús inga chaha chichi noo vehe ñuhu. Ta yucuan nyaá noo ra na ityi inchiyo ndaha.

² Ta cañañi ra fariseo chi ra Jesús nyehé ra tatu sanduvaha ra chi ra quivi nyitatu ñu, vaty tacuhva coo cuaty tyaa ra siqui ra.

³ Tyicuan ta ra Jesús catyi ra chi ra na ityi ndaha cuan:

—Ndicuita ta cujnanyaa mahñu ihya.

⁴ Yaha cuan ta ndaca tuhun ra chi inga ñu cha tayucú cuan, ta catyi ra:

—¿Ñáa cha tahan chi sacuvi yo quivi nyitatu yo? ¿Atu sacuvi yo cha vaha o cha ña vaha? ¿Atu tahan chi sanduvaha yo ñáyivi o cha cahñi yo? —catyi ra Jesús.

Tyicuan ta taxi taxi maa candoo ñu cuan.

⁵ Tyicuan ta xaan nanyehe ra Jesús chi ñu, ta cuihya cuñi ra vaty ña cuñi ñu cutuñi iñi ñu. Ta catyi ra chi ra cuan:

—Sanacaa ndahun.

Ta sanacaa ra, ta nduvaha ndaha ra.

⁶ Tyicuan ta quitá coyo ra fariseo, ta quichaha catyihí tahan ra tuhun chihin ra cuenda ra Herodes, yoso caa cacahñi ra chi ra Jesús.

Nu nyicú cuaha ñáyivi yuhu miñi

⁷ Soco ra Jesús cuahan ra chihin ra cachicá noo chihin ra yuhu miñi, ta cuaha ñáyivi ityi Galilea canyicón chi ra.

⁸ Ta cha chito ñáyivi tuhun nahnú cha sacuvi ra, cuaha xaan ñu quichi coyo ñu ñuu Jerusalén ta inga ñuu cha iyó ityi Judea, ta ñuu cha iyó Idumea, ta inga chiyo yuvi cahnu Jordán, ta ñuu Tiro ta ñuu Sidón ñandihí, vaty cuñi ñu nyehe ñu chi ra.

⁹ Yucuan chaha catyi ra Jesús chi ra cachicá noo chihin ra na casanduvaha ra noo canoa, tacuhva vaty tatu nduthin xaan chihin ñáyivi, cuvi quihvi ra chichi canoa cuan.

¹⁰ Vaty cuaha xaan ñu cha yaha sanduvaha ra, ta yucuan chaha tandihí ñu cuhvi cuahan ñu nu nyaá ra vaty cuñi ñu tiin ñu chi ra tacuhva nduvaha ñu.

¹¹ Ta ñu yihí taty ña vaha añima, chicuñi chiti ri ñu nuu ra, ta canachaa taty ña vaha cuan, ta catyi chi tyehe caa:

—¡Yoho cuvún Sehe Nyoo!

¹² Soco ra Jesús chasi ra yuhu taty cuan vaty ma catyi ca chi yóo ra cuvi ra.

Nu nacachi ra Jesús chi uchi uvi apóstol vaty cacaca ra tyiño ra (Mt. 10.1-4; Lc. 6.12-16)

¹³ Yaha cuan ta ndaa ra Jesús noo yucu ta cana ra chi ra cuñi maa ra nacachi ra. Ta quichi coyo ra nu nyaá ra.

¹⁴ Ta tyiso ra chi uchi uvi tahan ra vaty cundihí ra chihin ra, ta vaty tyatyño ra chi ra na cucahan ra tuhun Nyoo.

¹⁵ Ta chaha ra ityi chi ra vaty sanduvaha ra chi ñu cuhvi, ta tava ñehe ra chi taty ña vaha.

¹⁶ Ta ican ra ihya cacuvi ndi uchi uvi tahan ra: ra Simón cha sacunañi ra Jesús Pedro chi;

¹⁷ ra Jacobo ta yañi ra ra Juan, sehe ra Zebedeo. Ta Boanerges sacunañi ra chi ninduvi tahan ra ta cuñi chi catyi: ra ñihí cahán tari cahán savi,

¹⁸ ra Andrés, ra Felipe, ra Bartolomé, ra Mateo, ra Tomás, ra Jacobo sehe ra Alfeo, ra Tadeo, ta inga ra Simón cha yihí cuenda ityi ra cuñi cahun cuaty siqui gobiernu ñuu Roma cha nyacá ñaha chi ñu,

¹⁹ ta ra Judas Iscariote, ra cha naxico tuhun chi ra Jesús.

Nu tyaá ñáyivi cuaty siqui ra Jesús, ta catyi ñu vaty tunyee iñi cuihna iyó chi ra (Mt. 12.22-32; Lc. 11.14-23; 12.10)

Yaha cuan ta quihvi ra Jesús noo vehe chihin ra cachicá noo chihin ra.

²⁰ Ta inga chaha natacá cuaha ñáyivi, ta nyacua ni ña cuvi ca cachi ra.

²¹ Cha cachito ñáyivi chi ra Jesús vaty nyaá ra yucuan, quichi coyo ñu vaty cunahun ra chihin ñu, vaty catyi ñáyivi chi ñu tyi nduloco ra.

²² Ta suhva ra casacuahá cuenda ley vehe ñuhu Jerusalén cha quichi coyo suri tyicuan caa cacatyí ra:

—Ra ihya, ra Beelzebú ra cuvi nuu chi cuihna yihí chi ra. Ta chihin tunyee iñi cuihna tava ñehe ra taty ña vaha —cacatyí ra.

²³ Tyicuan ta cana ra Jesús chi ra, ta catyi ra chi ra:

—¿Yoso caa, atu tavá ñehe cuihna suri chi ra tahan maa ra? Ma sacuvi cuihna tyicuan caa.

²⁴ Tatu noo gobiernu cacusiin ra, ta cacañi tahan ra chihin tahan ra, gobiernu cuan ña naha cuacunyaca ñaha ra.

²⁵ O tatu ñáyivi noo vehe, ña iin ri cuví ñu chihin tahan ñu ta cañi tahan ñu, cutivi nu nyicú ñu.

²⁶ Ta tatu cuihna cacusiin ra ta canducuita ra siqui tahan ra, ¿yoso caa cucuvi chi ra? Cundihi tuhun ra.

²⁷ Yori cuví quihvi chichi vehe noo ra ñihi tari cuihna ta tinyaa ra cha chii ra, tatu ma cuhñi xihna ra chi ra. Yucuan ndicha ta cuví tinyaa yo cha chii ra.

²⁸ Cha ndicha catyi chi ndo vatyi cuví coo ticahnu iñi tandihi nuu cuatyí ñáyivi, ta tandihi cha quiñi caa cha cahán ñu.

²⁹ Soco ñu cahán ña vaha siqui Tatyí Ii Nyoo, ma cuví maa coo ticahnu iñi cuenda cuan, soco tyicuan ri maa coo cuatyí ñu —catyi ra Jesús.

³⁰ Tyicuan caa catyi ra Jesús chi ra casacuahá cuenda ley vehe ñuhu, vatyi maa ra cacatyí ra vatyi ñohó noo tatyí ña vaha chi ra.

Yóo ñu cuví sihi ra Jesús ta yañi ra (Mt. 12.46-50; Lc. 8.19-21)

³¹ Tyicuan ta chaq coyo sihi ra Jesús ta yañi ra, soco ndoo ñu ityi chata vehe, ta tachí ñu cucana chi ra.

³² Ta ra nyicú nicachico nu nyaá ra Jesús cacatyí ra chi ra:

—Sihun ta yañun ta cuhvon nyicú ñu ityi chata vehe, ta nanducú ñu chuun —catyi ra chi ra.

³³ Soco maa ra catyi ra:

—¿Yóo ñu cuví sihi ta yañi? —catyi ra.

³⁴ Tyicuan ta nanyehę ra chi ñu nyicú nicachico, ta catyi ra:

—Ican ñu ihya cuví sihi ta yañi.

³⁵ Vatyi savahri ñu sacuvi cuhva cuñí Nyoo, ican ñu cuan cuví yañi, ta cuhve, ta sihi —catyi ra Jesús.

4

Tari noo ra chicá noo tachí, tyicuan caa cuví ra cahán tuhun Nyoo (Mt. 13.1-9; Lc. 8.4-8)

¹ Inga chaha quichaha sañaha ra Jesús yuhu miñi, ta ndu iin ri cuaha ñáyivi nu nyaá ra. Yucuan chaha quihvi ra chichi noo canoa cha tacaá nu ndutya yuhu miñi cuan. Ta chicunyaq ra, ta tandihi ñáyivi ndoo ñu nu ñiti.

² Tyicuan ta cuaha cha sañaha ra chi ñu chihin cuhva ri. Ta nu sañahá ra chi ñu, ta catyi ra chi ñu:

³ —Tyasoho ndo tuhun ihya. Mínoo ra quita ra vehe ra, cuahan ra nu iyó tyiño sahá ra. Ta quichaha quiti ra chiti trigu nu ñuhú ra.

⁴ Ta ityi cuahan ra quiti ra, suhva chiti cuan canacoyo yuhu ityi, ta quichí coyo saa ta cachachí ti.

⁵ Suhva ca chiti canacoyo ticu yuu nu ña cuaha ñuhú yihí. Ta chiti cuan numi ri caña, vatyi ña cono xaan yihí ñuhú cuan.

⁶ Soco cuhva cha caña ñanyii, na ityi chi vatyi ña cono yihí yoho chi.

⁷ Ta suhva ca chiti canacoyo chichi tu iñu. Ta chahnu tu iñu cuan, ta chasj tun nuu trigo cuan. Yucuan chaha ña chiyo chiti tun.

⁸ Soco suhva chiti cha canacoyo nu ñuhú vaha. Ta caña ta chahnu. Ta vaha chaha tun chiti. Suhva tun chaha tun oco uchi chiti cha noo noo tun. Inga tun chaha tun uñi xico chiti. Ta inga tun chaha ciento chiti —catyi ra Jesús chi ñu.

⁹ Ta catyi tucu ra chi ñu:

—Tatu cutuñi iñi ndo, tyasoho ndo tuhun cahín.

Nu sacotó ra Jesús ñáá cuenda sañahá ra chihin cuhva ri chi ñáyivi (Mt. 13.10-17; Lc. 8.9-10)

¹⁰ Yaha cuan ta ndoo maa ri maa ra Jesús chihin ñu nyicón chi ra ta ndi uchi uvi tahan ra chicá noo chihin ra. Ta candaca tuhun ñu chi ra ñáá cha cuñí chi catyi tuhun cuan.

¹¹ Ta catyi ra chi ñu:

—Chi nyoho sacotó Nyoo tuhun xehe yoso caa nyacá ñaha ra añima ñáyivi. Soco chi ñu cha ña chinó iñi chi ra, maa maa ri chihin cuhva ri sañahí chi ñu.

¹² Vatyi tatu nyehé ñu soco cuví chi tari cha ña nyehé ñu, ta tatu chiñi ñu soco ma cutuñi iñi ñu. Tacuhva cha ma nasama ñu cuhva iyó ñu ta ni ma coo ticahnu iñi cuatyí ñu —catyi ra Jesús chi ñu.

Nu chaha ra Jesús cuenda yoso caa cuahan tuhun ra tachí chiti cuan (Mt. 13.18-23; Lc. 8.11-15)

¹³ Ta catyi tucu ra chi ñu:

—¿Atu ña cutuñi iñi nyoho tuhun ihya? Tatu tyicuan caa ña cutuñi iñi ndo, ¿yoso caa cuví cutuñi ini ndo tandihi inga tuhun sañahí chi ndo?

¹⁴ Ra cha tachí chiti trigu cuan cuví ra tari noo ra cahán tuhun Nyoo.

¹⁵ Yihí ñáyivi cuví ñu tari nu canacoyo chiti yuhu ityi: chiñi ñu tuhun Nyoo, soco cha yaha chiñi ñu, quichi cuhna ta tinyaa ra tuhun Nyoo cha tachí ra añima ñu.

¹⁶ Inga ñáyivi cuví ñu tari nu canacoyo chiti ticu yuu: chiñi ñu tuhun Nyoo ta sih cuñi ñu natiin cuenda ñu noo ri cuhva.

¹⁷ Vatyi nu caña chiti ticu yuu cuan, chiin ri ñuhú yihí chaha, yucuan chaha caña soco ña cuví tyihi yoho vaha chi. Ta tyicuan caa ñu cuan, suhva ri quivi chino iñi ñu. Soco

quíví vachi tindoho siqui ñu, o satasi iñi ñáyivi chi ñu cha cuenda tuhun Nyoo, sandihí ri ñu tuhun cha chinó iñi ñu.

¹⁸ Ta inga ñu cuví ñu tari nu canacoyo chiti chichi tu iñu: chihí ñu tuhun Nyoo,

¹⁹ soco cutyoño ca iñi ñu cha cuenda tindoho cha iyó siqui ñuhu ñáyivi ihya. Cha tyayii sandaví ñaha chi ñu, ta cuñí ñu tandihí ri nuu cha iyó. Tandihí ihya quihví xiñi ñu ta ña nyaá ca xiñi ñu tuhun Nyoo, ta ña chahá chi sacuvi ñu cha vaha cha cuenda cuan.

²⁰ Soco yihí ñu cha chihí ñu tuhun Nyoo ta naquehén cuenda ñu, ta vaha sacuví ñu, tari nu canacoyo chiti nu ñuhú vaha cuví ñu. Yihí ñu cuví ñu tari yutun cha caña ta chahá tun oco uchi tahan chiti tahan tahan tun. Ta inga ñu cuví ñu tari yutun cha chahá uñi xico. Ta inga ñu tari yutun cha chahá ciento.

Ma tyihí xehe yo ñuhú cha sandundichin Nyoo añima yo coto tinyaa ra (Lc. 8.16-18)

²¹ Ta catyí tucu ra chi ñu:

—¿Atu quichi nyaca yo noo tima vatyí cananyaa yo chichi noo cajón o xiu chito? Ñima. Tima cuan cuñí chi tyiso yo noo nu sucun vatyí na sacundichin chi chichi vehe.

²² Ta tyicuan caa tucu, ñahri cha ñohó xehe, ta cuñun, tyi ma natuvi. Ta ñahri noo tuhun xehe, ta cuñun, tyi ma coto yo.

²³ Nyoho cha cutuñí iñi ndo, tyasoho ndo tuhun cahín —catyí ra Jesús chi ñu.

²⁴ Catyí tucu ra tyehe caa:

—Tyasoho vaha ndo tuhun cahín. Yoso cuhva sacuví ndo chi ñáyivi, yucuan cuhva sacuví Nyoo chihin ndo. Ta cuaha ca cucuhva ra chi ndo tatu tyasohó ndo cha cahán ra.

²⁵ Vatyí ñu tyasohó cha cahín, cuaha ca cuhva Nyoo chi ñu. Soco ñu ña tyasohó, cutinyaa ndihí ra cha chiin cha cha yahá chahá ra chi ñu.

Nu sañahá ra Jesús cuhva chahnu noo chiti yutun

²⁶ Catyí tucu ra Jesús tyehe caa:

—Cha nyacá ñaha Nyoo añima ñáyivi cuví chi tari noo ra tachí noo chiti chichi ñuhú.

²⁷ Ta cuahan ra cua cusu ra. Yahá cuan ta ndicuita ra. Ta cuaha quívi yaha. Ta caña chiti cuan, ta chahnú yutun. Soco maa ra ña chitó ra yoso caa chahnú tun.

²⁸ Cha cuenda vatyí maa ñuhú cuan sacuvahá chi tun tyicuan ri caa. Xihna ca quitá xityin tun, ta yaha cuan yoco tun, yaha cuan ta quitá chiti nu yoco cuan.

²⁹ Ta tatu cha chityi chiti cuan, cutohon ra vatyí cha chaá quívi cha coyo —catyí ra Jesús.

Nu sañahá ra Jesús vatyí tari chahnu noo chiti mostaza, tyicuan caa nducua ha nu nyacá ñaha Nyoo (Mt. 13.31-32; Lc. 13.18-19)

³⁰ Ta catyí tucu ra Jesús:

—¿Ñáá chihin sanandiqui tahin cha nyacá ñaha Nyoo añima yo? ¿Ñáá chihin sandu inuu ri yo?

³¹ Cuví chi tari noo chiti mostaza cha tachí yo nu ñuhú. Ican chiti cuan, lee ca cha nuu tandihí chiti iyó siqui ñuhu ñáyivi.

³² Soco tatu tachí yo, cañá ta cuahnu. Ta cahnu vavaha cuví tun. Ta nahnu soco tun, ta nyacua nya saa cha chicó no vatyí cuví nyitatu ti nu vati tun.

Yoso caa sañahá ra Jesús chihin cuhva ri chi ñáyivi (Mt. 13.34-35)

³³ Tyehe caa sañahá ra Jesús chi ñu, chihin cuaha cuhva, nyacua nya nu cuví cutuñí iñi ñu.

³⁴ Ñahri maa cha catyí ra chi ñu tatu ñima chihin noo cuhva. Soco chi ra cachicá noo chihin ra, nacatyí vaha ra chi ra.

Nu sacutaxín ra Jesús tatyí ta miñi (Mt. 8.23-27; Lc. 8.22-25)

³⁵ Suri maa quívi cuan, cuhva cha cuaá, catyí ra chi ra cachicá noo chihin ra:

—Coho ndo inga chiyo miñi cuan.

³⁶ Tyicuan ta casandoq ra chi ñáyivi. Ta cuahan ra Jesús chihin ra chichi canoa cha catuvi cuan. Ta cuahan tucu inga canoa chihin ra.

³⁷ Ta quichaha caa noo tatyí ñihi xaan, ta quichaha quihví ndutya chichi canoa cuan, ta quichaha chitu.

³⁸ Ta ra Jesús quixí ra siqui noo cabecera cha nyaá inchiyo xiin canoa cuan. Ta casandoq ra chi ra, ta cacatyí ra:

—¡Maestro! ¿atu ñahri cuendon cha cuñí nyee yo?

³⁹ Tyicuan ta ndicuitá ra Jesús ta cahan ra chi tatyí cuan na cutaxin. Ta catyí ra chi ndutya miñi cuan tyehe caa:

—¡Taxi ri! ¡Taxi cunyaun! —catyí ra.

Ta tatyí cuan cutaxin, ta taxi taxi cuví.

⁴⁰ Tyicuan ta catyí ra Jesús chi ra cachicá noo chihin ra:

—¿Ñáá tuhun cha yuhví xaan ndo? ¿Atu ta chino ca iñi ndo? —catyí ra chi ra.

⁴¹ Soco maa ra cayuhví xaan ra cha cuví cuan. Ta cacatyí ra chi ra tahan ra:

—¿Yóó ra cuví ra ihya, vatyí nyacua nya tatyí ta miñi quichahá chi ra? —cacatyí ra.

5

Nu nduvahá ra yihí tatyí ña vaha chii ñuu Gadara (Mt. 8.28-34; Lc. 8.26-39)

¹ Chaḡ coyo ra yuhu miñi, inga chiyo nu nyaá ñuu Gadara.

² Ta quita ri ra Jesús chichi canoa, ta quita noo ra nu ñaña cuan ta chaḡ ra nu nyaá ra Jesús. Ta yihí noo tatyí ña vaha añima ra.

³ Ta nu ñaña cuan iyó maa ra cuan. Ta yori maa cuví chasaha chi ra, ni ri chihin cadena.

⁴ Cuaha xaan chaha chahñi ñu chaha ra ta ndaha ra chihin cadena, soco chahnya ra. Yiquin maa sacuvi ra. Ta yori maa cuví chasaha chi ra.

⁵ Ñicahñu ta cha cuaa chicá noo ra canachaá ra nya nu yucu ta nya nu ñaña. Ta sañicuehé ra suri chi maa ra chihin yuu.

⁶ Soco cañi ca nanyehe ra chi ra Jesús, ta chino vavaha ra chaa ra. Ta chicuñi chiti ra nuu ra.

⁷ Ta canḡ chaa ra ta catyí ra:

—¿Ñáá tuhun cha tyihún chuun chihin yuhu, yoho Jesús, Sehe Nyoo ra cuví nuu? Chacú ndahvi nuun chihin sivi Nyoo, ma sanyehun tindoho chii.

⁸ Catyí tatyí cuan tyehe caa vatyi ra Jesús cha catyí ra chi ra:

—¿Saña chi ra chiña, yoho tatyí ña vaha! —catyí ra.

⁹ Ta ra Jesús ndacaḡ tuhun ra chi ra, ta catyí ra:

—¿Ñáá nañún?

Ta nacahan tatyí ña vaha cuan:

—Legión nañi, vatyi cuaha xaan ndi —catyí chi chi ra Jesús.

¹⁰ Ta chacuḡ ndahvi tatyí ña vaha cuan nuu ra Jesús tacuhva cha ma tachi ra chi chi nu cañi.

¹¹ Ta yatyin ri yucu cuan nyicú cuaha xaan quini cachachí ti.

¹² Yucuan chaha catyí tatyí ña vaha cuan chi ra Jesús tyehe caa:

—Tachi chi ndi na quihvi ndi quini cuan —catyí tatyí cuan.

¹³ Tyicuan ta chahaḡ ra Jesús, ta tatyí cuan quitaḡ coyo chi ra cuan, ta quihvi chi quini cuan. Ta cha uvi mil quini nyicú cuan, cachino ti, ta canacoyoḡ ti chichi noo xahva yuhu miñi cuan, ta cachihí ti chichi ndutya cuan.

¹⁴ Tyicuan ta ra sahá cumi quini cuan, chinoḡ xaan ra chihin cha yuhví ra, ta chinacatyí ra chi ñáyivi ñuu cuan ta ñu ñohó nu chiqui. Ta quichí coyo ñáyivi, quichí nyehe ñu ñáá cha cuví.

¹⁵ Cuhva cha chaḡ coyo ñu nu nyaá ra Jesús, nanyehe ñu chi ra cha yihí tatyí ña vaha cuan chi. Ta vityin nyaá ra ñihnó ra sahma, ta cachi vaha iyó xiñi ra. Ta yuhví xaan ñu cuví.

¹⁶ Ta ñu cha nyehe cha cuví chi ra cuan ta chi quini cuan, canacatyí ñu chi tandihí ca ñu.

¹⁷ Tyicuan ta quichahaḡ chacu ndahvi ñu nuu ra Jesús, na quita ra ñuu ñu.

¹⁸ Ta cuhva cha cua quihvi ra Jesús chichi canoa, ra cha yihí tatyí ña vaha cuan chi chacuḡ ndahvi ra nuu ra Jesús na cuhva ra cuhun ra chihin ra.

¹⁹ Soco ra Jesús ña chahaḡ ra cuhun ra, ta catyí ra chi ra:

—Cuḡnuhu nya vehun, nu nyaá ñáyivi chuun, ta nacatyun chi ñu tandihí cha sacuvi Sutu yo Nyoo cuhun, ta yoso caa cundahvi cuñi ra nyehe ra chuun.

²⁰ Ta ra cuan cuahan ra ta quichaha nacatyí ra chi ñáyivi tandihí ñuu Decápolis tandihí cha sacuvi ra Jesús chihin ra. Ta tandihí ñu, iyo cuñi ñu.

Nu nduvahaḡ sehe ra Jairo ta ñaha sihi cha tñn sahma ra Jesús

(Mt. 9.18-26; Lc. 8.40-56)

²¹ Ta cuhva cha nachaḡ ra Jesús chihin canoa nya inga chiyo miñi cuan, chaḡ coyo cuaha ñáyivi nu nyaá ra. Ta ndoḡ ra yuhu miñi cuan.

²² Tyicuan ta chaḡ noo ra cuví nuu vehe ñuhu. Nañi ra Jairo. Ta cuhva cha nanyehe ra chi ra Jesús, chicuñi chiti ra nuu ra.

²³ Ta chacuḡ ndahvi ra nuu ra ta catyí ra:

—Cha cuñi cúvi sehi. Cḡho chihin ta tyison ndahun siqui ña na nduvaha ña ta ma cúvi ña.

²⁴ Tyicuan ta cuahan ra Jesús chihin ra, soco cuaha ñáyivi nyicón chi ra, ta nyacua nañi tahan ri ca maa ñu.

²⁵ Ta mahñu ñáyivi cuan ñohó noo ñaha cha cuhvi. Cha quita uchi uvi cuiya ndoho ña cuehe cha chatí niñi ña.

²⁶ Ta cuaha tindoho nyehe ña cha cuaha xaan doctor nyehe chi ña. Ta cha sanaḡ ña tandihí maa cha iyó chi ña, soco ñahri maa tyinyee chi chi ña. Soco ñihí ndihí ca nanduvi.

²⁷ Cuhva cha chitó ña tuhun milagru cha sacuvi ra Jesús, tuhvaḡ ña ityi chata ra ta tñn ña sahma ra.

²⁸ Vatyí chicá xiñi ña: “Ma chihin cha tñn ri sahma ra, ta nduvahi”, chicá xiñi ña.

²⁹ Ta caa cuhva ri cha tñn ña sahma ra ta cha chatí niñi ña cutaxin. Ta tuví iñi coño ñuhu ña tyi cha nduvahaḡ ña chihin cuehe cuan.

³⁰ Tyicuan ta tuví iñi ra Jesús vatyi nduvahaḡ noo ñáyivi chihin suhva tunyee iñi cha quitaḡ chi ra. Tyicuan ta nanyehe ra ityi chata ra ta quichaha ndacaḡ tuhun ra:

—¿Yóó cha tñn sahme? —catyí ra.

³¹ Tyicuan ta ra cacticá noo chihin ra quichahaḡ catyí ra chi ra:

—Cha nyehun vatyi ñáyivi tyandahá chuun tyi tñn xaan. ¿Yoso caa cha ndaca tuhun: “Yóó cha tñn chii”? —cacatyí ra chi ra.

³² Soco ra Jesús nyehe ra ityi cuan ityi ihya, vatyí cuñí ra nyehe ra yóo cha t̃in chi ra.

³³ Tyicuan ta ñaha cuan níhi ña chihin cha yuhví ña vatyí chitó ña ñáá cha cuví chi ña. Ta chahan ña chicuñiñ chiti ña nuu ra. Ta nacatyí ña tandihí cha ndicha chi ra.

³⁴ Ta catyí ra Jesús chi ña:
—Cha nduvahun, Sihi, vatyí chinó iñun. Cuahan, ta ma caca xiñun, vatyí cha nduvahun chihin cuehe cha ndohun —catyí ra Jesús chi ña.

³⁵ Ni cahán ca ra Jesús ta chaá coyo ñu vehe ra cuví nuu cuan, ta catyí ñu chi ra cha cuví sutu cha luhlu cuan:
—Sehun, cha chihí ña. Náá ri ca tuhun cha sayangon chi Ra Sacuaha chiña —catyí ñu.

³⁶ Soco ra Jesús ña quichahá ra cha cahán ñu, ta catyí ra chi ra cuví nuu vehe ñuhu cuan:
—Ma yuhvun. Chino iñun —catyí ra chi ra.

³⁷ Ta ña chahá ra yóo ca cha cuhun chihin ra, notuhun ri ra Pedro ta ra Jacobo ta ra Juan, yañi ra Jacobo.

³⁸ Ta cuhva cha cachaa coyo ra vehe ra cuví nuu vehe ñuhu, nyehe ra cha chacú chaa ñáyivi ta caná chaa ñu.

³⁹ Quihví ra ta catyí ra chi ñu:
—¿Náá tuhun cha iyo xaan cuví ndo, ta chacú ndo tyiña caa? Cuehe luhlu ihya, ña chihí cue, quixí cue —catyí ra chi ñu.

⁴⁰ Soco chacú cuehe ri ñu nyehe ñu chi ra. Tyicuan ta ra Jesús tavá ra chí tandihí ñu, ta quehen ra chí sutu cue ta sihi cue ta chí ra cha chaá coyo chihin ra, ta quihví coyo ra nu catuvi cue.

⁴¹ Ta t̃in ra ndaha cue, ta catyí ra chí cue:
—Talita cumi —ta cuñí chi catyí cuan: Catyí chuun, yoho cuehe luhlu, j̃ndicuita!

⁴² Ta caa cuhva ri cua ndicuitá cuehe luhlu cuan. Iyó uchi uvi cuiya cue. Ta cuví nacaca cue. Ta ñáyivi iyó xaan cuñí ñu.

⁴³ Soco ra Jesús ñihi chahá ra tuhun chi ñu, tyí ma cahan maa ñu tuhun, ta catyí ra chí ñu na cuhva ñu cha cachi cue.

6

Nu ñohó ra Jesús ñuu Nazaret (Mt. 13.53-58; Lc. 4.16-30)

¹ Tyicuan caa cuví ta quitá ra Jesús yucuan, ta cuanuhu ra nya ñuu ra. Ta ra cachicá noo chihin ra cuahan coyo ra chihin ra.

² Ta chaá quivi nyitatu ñáyivi, ta quichahá sañaha ra chichi vehe ñuhu. Ta cuaha ñáyivi chiñi tuhun cahán ra, ta iyo cuñí ñu, ta catyí ñu:

—¿Nya cutuhvá ra ihya tandihí tuhun ihya? ¿Yóo cha chahá cha chiñi tuñi ihya

chi ra? ¿Yoso caa cha cuví sacuvi ra milagru nahnu xaan ihya?

³ ¿Atu ñima ra satyá vitu cuan cuví ra? Sehe cu María cuví chi ra. Ta yañi ra Jacobo, ta ra José, ta ra Judas, ta ra Simón, ta cuhva ra iyó tucu ñu chihin yo ihya —catyí ñu.

Ta quiñi cuñí ñu nyehe ñu chi ra.

⁴ Soco catyí ra Jesús chi ñu:

—Tandihí ñu inga ñuu sahá ñu ñáyivi chi noo ra profeta Nyoo, soco ñu ñuu ra ña quichahá ñu chi ra, ni ñu vehe ra, ni ñáyivi chí ra —catyí ra Jesús.

⁵ Ta ña cuví sacuvi ra ni noo milagru yucuan, soco tyiso ra ndaha ra siqui suhva ri ñu cuhví, ta sanduvahá ra chí ñu.

⁶ Ta iyo cuñí ra vatyí ñu ñuu ra ña chinó iñi ñu chi ra. Ta chahan ra tandihí ñuu nyihi cha nyicú yatyin ri cuan, ta sañahá ra.

Nu tyatyíño ra Jesús chí ra cachicá noo chihin ra nu cucahan ra tuhun Nyoo (Mt. 10.5-15; Lc. 9.1-6)

⁷ Yahá cuan ta caná ra chí ndi uchi uvi ra chicá noo chihin ra, ta quichahá tachi ra chí uvi uvi ra. Ta chahá ra ityi chí ra vatyí tava ñehe ra chí tatyí ña vaha yihí añima ñáyivi.

⁸ Ta catyí ra chí ra vatyí ñahri maa cha cacuiso ra ityi. Ni yono, ni cha cachi ra, ni xuhun. Ñahri maa cuquindaha ra, noo ri yutun tuvi ra cuiso ra.

⁹ Ndichan ri quihí chaha ra. Ta noo ri sahma cuihno ra, ñima uvi tahan.

¹⁰ Ta catyí ra chí ra:

—Cuhva cha chaa ndo noo ñuu ta quihví ndo noo vehe, ndgo ndo yucuan ri nyacua nya cha quita ndo ñuu cuan.

¹¹ Ta tatu ñáyivi iyó noo ñuu, ña cuñí ñu t̃in cuenda ñu chí ndo, ta ña cuñí ñu tyasoho ñu tuhun cahan ndo, quita ndo yucuan ta naquisi ndo ñiyaca chaha ndo tari noo seña vatyí ña vaha sacuví ñu. Cha ndicha catyí chí ndo, vatyí quivi cucutuñi chí ñáyivi iyó siqui ñuhu ñáyivi, ñu cha ma cuñi t̃in cuenda tuhun cahan ndo, cuaha ca tindoho cunyehe ñu, ta ñima ca ñu ñuu Sodoma ta ñuu Gomorra —catyí ra Jesús chí ra.

¹² Tyicuan ta quitá coyo ra ta chicahan ra tuhun Nyoo chihin ñáyivi na ndu uvi iñi ñu cuatyí ñu, ta na nanducu ñu chí Nyoo.

¹³ Ta catavá ñehe ra cuaha tatyí ña vaha añima ñáyivi. Ta cahyú ra aceteye chí cuaha ñu cuhví ta casanduvahá ra chí ñu.

Nu catyí chí yoso caa chihí ra Juan ra sacondutyá chí ñáyivi (Mt. 14.1-12; Lc. 9.7-9)

¹⁴ Chitq rey Herodes tuhun ra Jesús vatyí tandihí ñáyivi cahán ñu tuhun cha sacuví ra, ta chicá xiñi ra tyeha caa:

—Ra Juan ra sacondutyā chi ñáyivi cuví ra cuan. Nandotoꝝ ra cha yaha chihí ra, yucuan chaha iyó tunyee iñi chi ra —chicá iñi ra.

¹⁵ Inga ñu catyí ñu:

—Ra Elías profeta Nyoo ta cha naha cuví ra ihya —catyí ñu.

Ta inga ñu catyí ñu:

—Inga profeta Nyoo cuví ra, tari ra profeta Nyoo ra chíyo ta cha naha.

¹⁶ Cuhva cha chiñi ra Herodes tuhun ihya, catyí ra:

—Ican ra cuan cuví ra Juan cha tyihí tyiño tahnya sucun, ta vityin nandotoꝝ ra —catyí ra Herodes.

¹⁷ Tyicuan caa catyí ra Herodes vatyi cha catyi cu Herodías, ta tyihí ra chi ra Juan vehe caa ta chahñi ra chi ra chihin cadena. Cu Herodías cuan, ñasihí ra Felipe, yañi ra Herodes, cuví chi ña. Soco ra Herodes quehen ra chi ña vatyi cuví ña ñasihí ra.

¹⁸ Ta ra Juan catyí ra chi ra Herodes vatyi ña vaha cha cunyaa ra chihin ñasihí yañi ra.

¹⁹ Yucuan chaha cu Herodías tasi xaan cuñi ña nyehe ña chi ra Juan, ta cuñi ña cahñi ña chi ra, soco ña cuví.

²⁰ Vatyi ra Herodes chító ra vatyi ra Juan cuví ra noo ra vaha, ra ii, ta yuhví ra chi ra. Yucuan chaha sahá cuenda vaha ra chi ra, ña chahā ra cha sacuvi ña cha cuñi maa ña chihin ra. Ta vasi ña cuaha cutuñi iñi ra Herodes cha cahán ra Juan soco vaha cuñi ra chiñi ra cha cahán ra.

²¹ Soco cu Herodías ñihí ña noo cuhva nu ndihi ra Herodes cuiya, vatyi sacooꝝ ra noo vico cha cuenda ra cacuvi tyiño, ta comandante cuenda sindaro, ta ra nahnu ca ityi Galilea cuan.

²²⁻²³ Ta quihví sehe cu Herodías vico cuan, ta quichaha chitā chaha ña. Ta tahañ xaan iñi ra Herodes ta ra cha nyicú cuxiñi chihin ra. Ta tyaa ra cuhva vatyi cuhva ra ñáá cha cacan ña chi ra. Ta catyi ra chi ña:

—Çacan ñáá cha cuñún chii, ta cuhve chuun —catyí ra chi ña.

Ta catyi ra vatyi cuhva ra ñáá ri cha cacan ña, vasi sava ñuhú ñuu nu nyacá ñaha ra.

²⁴ Quitā ña ta catyí ña chi sihi ña:

—¿Ñáá cha caquen chi ra? —catyí ña.

Ta catyí sihi ña:

—Çacan xiñi ra Juan ra sacondutyā —catyí ña chi sehe ña.

²⁵ Ta numi ri ndihví ñaha tyivaa cuan nu nyaá rey Herodes, ta catyí ña chi ra:

—Cuñi vatyi cahnyon xiñi ra Juan ra sacondutyā ta tyihun nuu noo coho ta cuhvon chii vityin vityin —catyí ña chi ra.

²⁶ Tyicuan ta nducuihya xaan iñi rey cuan. Soco cha tyaa ra cuhva vatyi cuhva ra chi ña, ta siin ri cachiñi ra canyicú chihin

ra, ta ña cuñi ra nacahnu ra cha catyi ra chi ña.

²⁷ Numi ri tachí rey cuan tyiño chi noo sindaro na quichi nyaca ra xiñi ra Juan.

²⁸ Chahañ sindaro cuan chichi vehe caa cuan, ta chahnyā ra xiñi ra Juan. Ta quichi nyaca ra, yihí nu noo coho. Tyicuan ta chahā ra chi ñaha tyivaa cuan, ta maa ña nacuhvā ña chi sihi ña.

²⁹ Cha chító ra canyicón chi ra Juan, chahañ coyo ra chinaquehen ra coño ñuhú ra, ta cachityihí ra chichi ñuhú.

Nu chahā ra Jesús cha cachi ohon mil rayii (Mt. 14.13-21; Lc. 9.10-17; Jn. 6.1-14)

³⁰ Yaha cuan ta ndu iñ ri ra cha tyatyíño ra Jesús chi chihin ra, ta canacatyí ra tandihi cha casacuvi ra, ta cha casañaha ra nu chahañ ra chicahan ra tuhun Nyoo.

³¹ Ta catyí ra Jesús chi ra:

—Ñaha ndo, na nyitatu yo chiin noo nu taxi ri iyó —catyí ra chi ra.

Tyicuan caa catyí ra vatyi cuaha ñáyivi cuahan ta vachi ñu, ta nyacua ña cacuyatyí ra cha cacachi ra.

³² Tyicuan ta maa ri maa ra Jesús ta ra cachicá noo chihin ra cuahan coyo ra chihin noo canoa noo nu yori maa ñáyivi nyicú, minoo nu taxi ri.

³³ Soco cuaha ñu nyehe nu quitā ra. Ta canicohon nuu ñu chi ra. Ta cuahan coyo vavaha ñu chihin chaha ñu, quitā ñu tandihi ñuu ta xihna ca maa ñu chaꝝ coyo.

³⁴ Cuhva cha chaꝝ ra Jesús, quitā ra chichi canoa ta nanyehē ra tyí cuaha xaan ñu nyicú yucuan. Ta cundahvi cuñi ra nyehé ra chi ñu, vatyi nyicú ñu tari mbee cha yori ra sahá cumi chi ti. Ta quichaha sañaha ra cuaha tuhun chi ñu.

³⁵ Cha cua iñi xaan, ta ra cachicá noo chihin ra catuhvā ra ta catyí ra chi ra:

—Cha iñi xaan, ta yucu taxin cuví ihya.

³⁶ Çatyí chi ñu, na cuhun ñu ñuu cha nyicú yatyin ihya, ta sata ñu pan, vatyi ñahri cha cachi ñu iyó ihya —catyí ra chi ra.

³⁷ Soco nacahañ ra Jesús, ta catyí ra:

—Cuhva maa ndo cha cachi ñu.

Canacahañ ra ta catyí ra:

—Vasi saha tyiño ndi iñu yoo, soco ma caña xuhun cha cusata ndi pan cachi tandihi ñu ihya.

³⁸ Ta catyí ra Jesús chi ra:

—¿Yoso tahan pan nyisó ndo? Cuñan ndo cua nyehe ndo.

Ta cuhva cha cachító ra yoso tahan, cacatyí ra chi ra:

—Ohon tahan pan ta uvi tiyaca.

³⁹ Tyicuan ta catyí ra na cunyicú noo noo ticuiti ñu nu cuhu cuiñ cuan.

⁴⁰ Ta chicunyicú ñu cuenda ciento ta cuenda uvi xico uchi ñu.

⁴¹ Tyicuan ta quehen ra Jesús ndi ohon tahan pan cuan ta ninduvi tiyaca cuan. Ta nanyehē ndaa ra andiví, ta nacuhvā ra tyahví nyoo chí Nyoo, ta tahví ra pan cuan, ta chahā ra chí ra cachicá noo chíhin ra na casacha ra. Tyicuan ta casachā ra chí ñáyivi cuan. Yaha cuan ta casachā tucu ra ninduvi tiyaca cuan chí ñu.

⁴² Tandihí ñu cachachí ta ndaha iñi ñu.

⁴³ Ta nyacua ndoo ca ta casacutū ra uchi uvi tica chíhin yiquin pan ta tiyaca.

⁴⁴ Ta ohon mil rayi cachachí pan cuan.

Nu chicá ra Jesús nu miñi
(Mt. 14.22-27; Jn. 6.16-21)

⁴⁵ Tyicuan ta catýi ra Jesús chí ra cachicá noo chíhin ra na quihví coyo ra chichi canoa vatyi cuhun coyo ra ityi nuu nya inga chiyo miñi cuan ñuu Betsaida. Vatyi maa ra Jesús cunasacha xihna ra ñáyivi, tyicuan ta cuhun ra catýi ra.

⁴⁶ Ta cha yahā cuahan coyo ra, ra Jesús cuahan ra nu yucu, cua cacan tahví ra.

⁴⁷ Ta cuhva cha cuaa, canoa nu ñohó ra cachicá noo chíhin ra cha cuahan nya mahñu miñi cuan, ta ndoq noo tuhun ri maa ra.

⁴⁸ Ta nyehē ra vatyi ña cacuví vaha casacaca ra canoa cuan vatyi ñihi xaan tatyi. Ta cha ñaa ca cuan tuhvā ra Jesús chicá ra nu ndutya cuan. Ta sahā ri ra cha cua yaha ra nu canoa cuan.

⁴⁹ Soco cananyehē ra chí ra, chicá ra nu ndutya. Ta cacuñj maa ra vatyi noo cha sayuhví cuví, ta cacana cha ra.

⁵⁰ Vatyi tandihí ra canyehē ra chí ra ta cayuhví ra. Soco maa ra cahān ra chíhin ra ta catýi ra:

—jSanyee ndo iñi ndo! jYuhu cuví! jMa yuhví ndo! —catýi ra.

⁵¹ Quihví ra chichi canoa nu canyicú ra, ta cutaxin tatyi cuan. Ta iyo xaan cacuñi ra

⁵² cha cuenda vatyi ta cutuñi ca iñi ra milagru cha sacuví ra chíhin pan, vatyi ni ndava ca añima ra.

Nu sanduvahā ra Jesús chí ñu cuhví ñuu Genesaret
(Mt. 14.34-36)

⁵³ Cayahā sava ra miñi cuan ta cachaa coyo ra ñuu Genesaret, ta cachahñi ra canoa cuan yuhu ndutya ri cuan.

⁵⁴ Ta cha quitā coyo ri ra chichi canoa cuan, nichon nuu ri ñáyivi chí ra Jesús.

⁵⁵ Ta cachinq vavaha ñu nichahnu ityi cuan sacotó ñu vatyi chaā ra. Ta quichí coyo ñu tandihí ri ñuu, quichí nyaca ñu chí ñu cuhví chíhin chito nya nu nyaá ra Jesús.

⁵⁶ Ta tandihí ri ityi nu quihví ra chichi ñuu luhlu o chichi ñuu nahnu, o chichi cuhu, chacun ñu chí ñu cuhví yuhu ityi. Ta chacu ndahví ñu nuu ra na cuhva ra cha

tñin ñu vasi chíin yuhu sahma ra. Ta tandihí ri ñu tñin chí ra, nduvahā ñu.

7

Nu sañahá ra Jesús ñáá cha sativí chí ñáyivi
(Mt. 15.1-20)

¹ Yahā cuan ta ra fariseo ta suhva ra sacuahá cuenda ley vehe ñuhu quichí coyo ra nya ñuu Jerusalén, ta catuhvā ra chí ra Jesús.

² Ta canyehē ra vatyi yihí ra cachicá noo chíhin ra Jesús cachachí ra ta ña nacatya ra ndaha ra tari cuhva cha tahán chí cha costumbre. Yucuan chaha cacahan nyaa ra chí ra.

³ Vatyi ra fariseo ta tandihí ñu Israel cuan nyicón ca ñu costumbre sutu chahnu ñu, vatyi ma cachi ra tatu ma ndoo ndaha ra cuaha chaha tari cuhva costumbre iyó chí ñu.

⁴ Ta tatu nachaa coyo ñu cha chahan ñu nuyahví, ma cachi ñu tatu ma sacuví ñu cuhva cuan cha canacatya xaan ñu ndaha ñu. Ta iyó cuaha ca costumbre cha canyicón ñu. Iyó noo cuhva cha tahán chí nacatya ñu vasu, jarra, ta tandihí ndaha tyiño caa cha iyó chí ñu ta cama ñu ñandihí.

⁵ Tyicuan ta ra fariseo ta ra sacuahá cuenda ley cuan candaca tuhun ra chí ra Jesús, ta catýi ra:

—¿Ñáá tuhun ña sacuví ra nyicón chuun cuhva costumbre sutu chahnu yo? Vatyi ña nacatya ra ndaha ra tari cuhva tahán chí tatu cuacachí ra xita —catýi ra chí ra.

⁶ Ta nacahan ra Jesús, ta catýi ra:

—Ndicha cha cahān ra Isaías tuhun ndo vatyi sahā ndo tyi vaha ndo ta ña ndicha ndo. Catýi ra tyehe caa:

Ñáyivi ihya, chíhin yuhu ri ñu catýi ñu tyi cuñí ñu chí.

Soco ñima chíhin cha tandihí añima ñu, tyi sñin nu nyaá xiñi ñu.

⁷ Ñahri maa tuhun cha sacahnú ñu chí, vatyi cha sañahá ñu chí tahan ñu, maa maa ri maa cuhva sañahá ñáyivi ri cuví, tyaa ra Isaías tuhun ndo.

⁸ Vatyi nyoho sandoó ndo cuhva catýi Nyoo, ta nanyicón ndo cuhva costumbre ñáyivi ri, tuhun cha nacatya xaan ndo ndaha tyiño ndo, ta cuaha cha tyicuan caa sacuví ndo.

⁹ Nyoho sanducaxijn ndo tuhun cha catýi Nyoo tyi sacuví ndo, tacuhva vatyi cuví sacuví ndo costumbre cha iyó ndo.

¹⁰ Soco ra Moisés catýi ra nu ley cha tyaa ra: “Saha ndo ñáyivi chí sutu ndo ta chí sñi ndo.” Ta catýi tucu ra: “Tandihí ñu cha cahán ña vaha chí sutu o chí sñi ñu, tahán chí cúvi ñu.” catýi ra Moisés nu ley Nyoo.

¹¹ Soco nyoho catýi ndo tyi noo ñáyivi cuví catýi ñu chí sutu ñu o chí sñi ñu tyi ma cuví tyinyee ñu chí ñu vatyi tandihí cha iyó chí

ñu Corbán cuví. (Cuñí chi catyí: “Cha चाहि चि Nyoo cuví.”)

¹² Ta tatu catyí ñu tyicuan caa, ña cuñí ca chi cha tyinyee ñu chi sutu ñu o chi sihi ñu catyí ndo.

¹³ Ta tyicuan caa sacuachiyó ndo tuhun cha catyí Nyoo tyi sacuvi ndo, vatyí cuñí ndo sacuvi ri maa ndo tuhun cha iyó ndo. Ta cuaha ca cha inuu ri caa sacuvi ndo —catyí ra Jesús.

¹⁴ Tyicuan ta cana tucu ra Jesús chi ñáyivi ta catyí ra chi ñu:

¹⁵ —Tyasoho vaha tandihi ndo tuhun cahín, ta natyihí tuñi iñi ndo. Cha quihví yuhu ñáyivi ta chachí ñu, ña cuví sativí chi chi ñu. Soco cha quitá añima ñu, ican cuan sativí chi ñu.

¹⁶ Nyoho cha cutuñi iñi ndo, tyasoho ndo tuhun cahín —catyí ra Jesús chi ñu.

¹⁷ Tyicuan ta sandoq ra Jesús chi ñáyivi cuan, ta quihví ra chichi vehe. Ta ra cachicá noo chihin ra candaca tuhun ra chi ra ñáa cha cuñí chi catyí tuhun cuan.

¹⁸ Ta catyí ra Jesús chi ra:

—Tu tyicuan caa, ni nyoho, ña cutuñi iñi ndo. ¿Atu ña cutuñi iñi ndo vatyí cha quihví chichi yuhu yo ña sativí chi chi yo?

¹⁹ Vatyí ñima añima yo quihví chi, soco chichi yo. Ta yaha cuan ta quita chi chichi coño ñuhu yo —catyí ra Jesús.

Chihin cuan cuñí ra catyí ra vatyí tandihi nyayu ta vaha cachi yo.

²⁰ Ta catyí tucu ra:

—Cha quitá añima ñáyivi, ican cuan sativí chi ñu.

²¹ Vatyí añima ñu quitá cha ña vaha chicá xiñi ñu, ta sacuvi ñu cha ña vaha. Yihí ñu iyó ñu chihin rayi o chihin ñusihi ta ñima ñasihi ra cuví, ta ñima yíi ñu cuví. Yihí ñu casuhú ñu. Yihí ñu cachahñi ñu.

²² Yihí ra iyó ñasihi ra ta chicá noo ra chihin inga ñu. Yihí ñu quichi cuví iñi ñu cha chi inga ñáyivi. Yihí ñu sacuvi ñu cha quiñi caa. Yihí ñu sandaví ñaha ñu. Yihí ñu iyó viciu chi ñu. Yihí ñu nyiyo iñi ñu. Yihí ñu ñii ñu cuendu. Yihí ñu cahnú sahá ñu chí ñu. Yihí ñu ña chaa cha chiñi tuñi xiñi ñu.

²³ Tandihí tuhun ña vaha ihya, quitá chi ityí chichi añima ñáyivi, ta sativí chi chi ñu —catyí ra chi ra.

Noo ñaha inga ñuu cha chino iñi chi ra Jesús (Mt. 15.21-28)

²⁴ Yaha cuan ta quitá ra Jesús yucuan, ta cuahan ra ityí ñuu Tiro ta Sidón. Quihví ra chichi noo vehe ta ña cuñí ra cha coto ni noo ñáyivi, soco ña cuví tixehe nuu ra.

²⁵ Ta sihi noo ñaha tyivaa cha yihí noo tatyí ña vaha añima, numi ri chitó ña tuhun

ra Jesús. Ta chaa ña ta chicuiñi chiti ña nuu ra.

²⁶ Ñaha cuan, ñaha inga ñuu cuví ña, ñaha ñuu Sirofenicia cuví ña. Quichí ña ta chacú ndahvi ña nuu ra Jesús na tava ra tatyí ña vaha cha yihí añima sehe ña.

²⁷ Soco catyí ra Jesús chi ña:

—Saña, ñacachi xihna ca ñu Israel ñu cuví sehe Nyoo, vatyí ña vaha cha tinyaa yo pan chi sehe yo ta cuhva yo cachi ina —catyí ra Jesús chi ña.

²⁸ Ta nacahan ña ta catyí ña:

—Ndicha, Tata, soco ina cuan chachí tucu ti yiquin cha canacoyo xiu mesa cuan —catyí ña chi ra.

²⁹ Tyicuan ta catyí ra Jesús chi ña:

—Vaha nacahun. Ta cha cuenda cuan cuví cahun, vatyí tatyí ña vaha cha yaha quitá chi añima sehun —catyí ra chi ña.

³⁰ Ta cuhva cha nachaa ña vehe ña, catuvi sehe ña nu chito, ta tatyí ña vaha cuan cha yaha quitá chi cue.

Nu sanduvahá ra Jesús chi noo ra soho ta ñihi

³¹ Ta quitá tucu ra Jesús ñuu Tiro, ta yaha ra ñuu Sidón, ta cuahan ra ityí ñuu cha canañi Decápolis, ta nachaa ra miñi Galilea.

³² Nu nyaá ra Jesús yucuan, quichí nyaca ñu chi noo ra soho ta ña cuví vaha cahán ra. Ta chacú ndahvi ñu nuu ra Jesús na tyiso ra ndaha ra siqui ra.

³³ Tava siin ra Jesús chi ra iin chiyo xiin, nu yori ñáyivi, ta tyihí ra nundaha ra chichi soho ra, ta tyaa si ra nu yaa ra.

³⁴ Yucuan ta nanyehé ndaa ra andivi. Ta naxita ra tatyí ra, ta catyí ra:

—¡Efatal! —ta cuñí chi catyí: ¡Nuñá! —catyí ra.

³⁵ Ta chihin cuan nuña soho ra soho cuan, ta nduvahá yaa ra, ta nacahan vaha ra.

³⁶ Ta catyí ra Jesús chi ñu tyi yori chihin cahan ñu tuhun, soco tatu catyí ra chi ñu tyicuan caa, ñihi ca canacatyí ñu.

³⁷ Ta iyo cuñí ñu ta catyí ñu:

—Tandihí ta vaha sacuvi ra. Nyacua cuví nacuiñi ñáyivi soho sahá ra ta cuví tucu nacahan ñáyivi ñihí ñandihí.

8

Nu chahá ra Jesús cha cachi cumi mil ñáyivi (Mt. 15.32-39)

¹ Quivi cuan nataca tucu cuaha xaan ñáyivi. Ta ñahri maa cha cachi ñu iyó. Tyicuan ta cana ra Jesús chi ra cachicá noo chihin ra, ta catyí ra:

² —Cundahvi cuñí nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu iyó.

³ Tatu natachi chi ñu nya vehe ñu cucachi ñu, coto coñaa ñu ityi, vatyí yihí ñu cañi quichí coyo ñu —catyí ra Jesús chi ra.

⁴ Ta nacahan ra cachicá noo chihin ra, ta catyí ra chi ra:

—¿Soco yoso caa cuhva yo cha cachi ñu ihya, ta yori maa ñáyivi iyó ta xico ñu chi yo?

⁵ Ta ndacá tuhun ra Jesús chi ra, ta catyí ra:

—¿Yoso tahan pan nyisó ndo?

Ta cacatyí ra:

—Ucha tahan.

⁶ Ta catyí ra na cunyicu ñáyivi cuan nu ñuhú. Ta quehen ra ucha pan cuan, ta nacuhva ra tyahvi nyoo chi Nyoo. Yahá cuan ta tahv́ sava ra pan cuan, ta chahá ra chi ra cachicá noo chihin ra, na casacha ra chí ñáyivi cuan.

⁷ Ta canyisó tucu ra suhva tiyaca nyihi. Ta nacuhva tucu ra Jesús tyahvi nyoo chi Nyoo, ta chahá ra chí ra na casacha ra.

⁸ Tandihí ñu cachachí ñu, ta chachitu chichi ñu. Ta casacutu ra ucha tahan tica chihin yiquin cha ndoo ca.

⁹ Ta cha cumi mil tahan ñu cachachí. Yahá cuan ta catyí ra Jesús chi ñu na cunuhu coyo ñu.

¹⁰ Ta quihví ra chichi noo canoa chihin ra cachicá noo chihin ra. Ta cuahan coyo ra ityi Dalmanuta.

Nu cacatyí ra fariseo chi ra Jesús na sacuvi ra noo milagru

(Mt. 16.1-4; Lc. 12.54-56)

¹¹ Tyicuan ta cachaá coyo ra fariseo, ta quichaha cuvi yuhu ra chihin ra Jesus. Ta cacatyí ra chi ra na sacuvi ra noo milagru tatu ndicha cha Nyoo tachí chi ra. Tyicuan caa catyí ra vatyí cuñí ra nducu nyehe ra chi ra.

¹² Ta ra Jesús uhvi uhvi naxitá ra tatyí ra, ta catyí ra:

—¿Ñáá tuhun cha chicán ñáyivi iyó vityin milagru? Cha ndicha catyí chí ndo vatyí ma sacuvi ni noo milagru nyehe ndo —catyí ra chi ra.

¹³ Tyicuan ta sandoo ra chi ra, ta nandihví ra chichi canoa ta cuahan ra inga chiyo miñi.

Cuhva iyó ra fariseo tari yuchan iya cuvi, catyí ra Jesús

(Mt. 16.5-12)

¹⁴ Naa iñi ra cachicá noo chihin ra Jesús cacuiso ra cha cacachi ra. Ta noo pan ri ñohó chihin ra chichi canoa cuan.

¹⁵ Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra Herodes —catyí ra chi ra.

¹⁶ Ta ra cachicá noo chihin ra quichaha cacatyí ra chí ra tahan ra:

—Cha cuenda vatyí ñahri pan nyisó yo, yucuan cuenda cahan ra tuhun cuan —catyí ra chí ra tahan ra.

¹⁷ Tuví iñi ra Jesús cha ndatuhún ra, ta catyí ra chí ra:

—¿Ñáá tuhun cha catyí ndo tyi ñahri pan nyisó ndo? ¿Atu ta cutuñi ca iñi nyoho? ¿Atu ta coto ca ndo? ¿Atu ni ndava xaan añima ndo?

¹⁸ Nyaá chiti nuu ndo, ¿atu ña nyehé ndo? Nyaá soho ndo. ¿Atu ña chifí ndo? ¿Atu ña nicohon iñi ndo

¹⁹ quivi cha saché ohon tahan pan cuan chi ndi ohon mil rayi? ¿Yoso tahan tica yiquin naquehen ndo? —catyí ra Jesús, ndacá tuhun ra chí ra cachicá noo chihin ra.

Ta maa ra cacatyí ra:

—Uchi uvi.

²⁰ Ta catyí tucu ra Jesús chi ra:

—Ta quivi saché ucha tahan pan chi cumi mil ñu, ¿yoso tahan tica tyitu nacoñehé ndo? Ta cacatyí ra:

—Ucha tahan.

²¹ Tyicuan ta catyí ra Jesús chi ra:

—¿Atu ta cutuñi ca iñi ndo? —catyí ra chi ra cachicá noo chihin ra.

Nu sanduvahá ra Jesús chi noo ra cuaa ñuu Betsaida

²² Yahá cuan ta chaá ra Jesús chihin ra cachicá noo chihin ra nya ñuu Betsaida. Ta quichí nyaca ñu chi noo ra cuaa. Ta cachacu ndahvi ñu nuu ra na tñn ra chí ra.

²³ Tyicuan ta tñn ra ndaha ra cuaa cuan, ta cuahan ra chihin ra ityi chata ñuu. Ta tyaá sii ra chiti nuu ra, ta tyiso ra ndaha ra siqui ra, ta ndacá tuhun ra chí ra tatu cuví nyehe ra chiin.

²⁴ Ra cuaa cuan nanyehé ra ta catyí ra:

—Nyehe in cahnu ri maa chí ñáyivi. Cuhva caa yutun caa ñu cahvi iñi, soco chicá ñu —catyí ra.

²⁵ Tyicuan ta tñn tucu ra Jesús chiti nuu ra inga chaha, ta maa ra nanyehé vaha ra ta nduvahá ra. Nanyehé cachi vaha ra tandihí.

²⁶ Tyicuan ta natachi ra Jesús chi ra ta catyí ra chí ra:

—Ma quihvun chichi ñuu ta ni yori chihin cahun tuhun.

Nu catyí ra Pedro vatyí ra Jesús cuví Cristo

(Mt. 16.13-20; Lc. 9.18-21)

²⁷ Yahá cuan ta chahan ra Jesús chihin ra cachicá noo chihin ra ñuu cha ca iyó Cesarea Filipino. Ta ityi cuahan ra, ta ndacá tuhun ra chí ra cachicá noo chihin ra, ta catyí ra:

—¿Ñáá catyí ñáyivi? ¿Yóo ra cuví yuhu? —catyí ra chí ra.

²⁸ Ta canacahan ra ta catyí ra:

—Yihí ñu catyí ñu tyi ra Juan ra sacondutyá chí ñáyivi cuvún. Inga ñu catyí ñu tyi ra Elías cuvún. Ta inga ñu catyí ñu tyi inga ra profeta Nyoo cuvún —catyí ra chí ra.

²⁹ Tyicuan ta ndaca tuhun ra chí ra, ta catyí ra:

—¿Ta nyoho, yóo ra cuví yuhu, cuñi tucu nyoho?

Ra Pedro catyí ra chí ra:

—Yoho cuví Cristo.

³⁰ Soco catyí ra Jesús chí tandihí ra tyi yori chíhin cacahan ra tuhun cuan.

Nu cahan ra Jesus tuhun tyi cucúvi ra
(Mt. 16.21-28; Lc. 9.22-27)

³¹ Tyicuan ta quichaha sañaha ra vatyí Rayii cha quichí nya gloria cunyehe ra cuaha xaan tindocho. Ta ra mandoñi ta ra cacuví nuu chí tata sutu ta ra casacuahá cuenda ley vehe ñuhu ma cuñi ra natiin cuenda ra chí ra. Catyí ra Jesús chí ra vatyí cucahñi ñu chí ra soco chíhí cha cu uñi quivi cunandoto ra.

³² Catyí cachi ra chí ra tuhun ihya. Tyicuan ta tava sijn ra Pedro chí ra ta quichaha catyí ra tyi ña vaha cha cahan ra cha tyicuan caa.

³³ Soco ra Jesús nanyocava ra, ta nanyehe ra chí inga ra cachicá noo chíhin ra. Ta quichaha cahan ra chí ra Pedro ta catyí ra:

—¡Cuachiyochuun nui, cuihna! Vatyí yoho ña chicá xiñun tari cuhva chicá xiñi Nyoo, soco tari chicá xiñi ñáyivi, chicá xiñun —catyí ra Jesús chí ra Pedro.

³⁴ Tyicuan ta cana ra Jesús chí ñáyivi ta chí ra cachicá noo chíhin ra ta catyí ra chí ra ñu:

—Tatu nya ndo cuñi ndo cunyicon ndo chíhí, cuñi chí cahnya ndo iñi ndo tuhun maa ndo. Ta ma ndu uvi iñi ndo cha yihí ndo cuende vasi nyehe ndo tindocho cha cuende. Vatyí yucuan cuví cruzi cha tahán chí cuiso ndo.

³⁵ Vatyí nya ndo ña cuñi ndo cúvi ndo cha cuende, suri cha cúvi maa ndo cuví, ta cuhun ndihí ndo anyaya. Soco nya ndo cuhva ndo ñáyivi ndo cha cuende ta cha cuenda tuhun Nyoo, cucacu añima ndo.

³⁶ Tatu sacunaa ndo añima ndo anyaya, ¿ñáá ri tuhun cha saha ganaa ndo tandihí cha tyayii cha iyó siqui ñuhu ñáyivi?

³⁷ Vatyí tatu sacunaa ndo añima ndo, ñahri maa cha iyó cha cuví cuhva ndo ta sacacu ndo añima ndo.

³⁸ Tatu nya noo ndo cucahan nuu ndo nyehe ndo chíhí, ta cucahan nuu ndo tuhun cahín nuu ñáyivi cha iyó cuatyí ta ña quichahá tuhun Nyoo, yuhu Rayii cha quichí nya gloria cucahan tucu nuu mai nyehi chí ndo quivi quichi tiqui chíhin

ángel cuenda Nyoo. Vatyí cuquichi chíhin cha tyaqui maa Suti.

9

¹ Cha ndicha catyí chí ndo, vatyí yihí ndo cha nyicú ndo ihya, ma cúvi ñaha ndo nyacua nya nyehe ndo yoso caa nyacá ñaha Nyoo. Vatyí cuquichi chíhin tunyee iñi ra —catyí ra Jesús.

Nu sañahá Nyoo yoso caa ra Jesús noo cha ndicha nu nyacá ñaha ra
(Mt. 17.1-13; Lc. 9.28-36)

² Iñu quivi yaha ta cuahan ra Jesús noo yucu sucun. Ta ra Pedro, ra Jacobo, ta ra Juan ri cuahan coyo chíhin ra. Ta yucuan nasama cuhva caa nuu ra Jesús.

³ Nduxiño xaan sahma ra ta cuichin xaan nanduví. Yori maa siqui ñuhu ñáyivi ihya cuví nacatya ta nducuichin tyicuan caa.

⁴ Ta cananyehe ra tyi nanyaá ra Elías ta ra Moisés, candatuhún ra chíhin ra Jesús.

⁵ Tyicuan ta ra Pedro catyí ra chí ra Jesús: —Maestro, ¡vaha xaan cha nyicú ndi ihya! Na savaha ndi uñi tahan tyahva: noo cha cuenda maun, ta noo cha cuenda ra Moisés, ta nonga cha cuenda ra Elías —catyí ra Pedro,

⁶ vatyí ña chitó ra ñáá tuhun cahán ra. Vatyí maa ra ta inga ra cayuhví ra.

⁷ Tyicuan ta noq xica noo vico siqui ra ta sahví chí ra. Ta chíhí vico cuan tyacu noo ndusu cha catyí:

—Ican ihya cuví Sehi, ta cuñi xain chí ra. Tyasoho ndo tuhun cahan ra —catyí ndusu cuan.

⁸ Ta cuhva cha cananyehe ra, yori ca ra tayucú chíhin ra, noo ri ca maa ra Jesús.

⁹ Cuhva cha cuanoo coyo ra yucu cuan, catyí ra Jesús chí ra tyi ma cacahan ra tuhun cha canyehe ra yucuan, soco nya yaha cha nandoto Rayii cha quichi nya gloria, tyicuan ta cuví cahan ra tuhun.

¹⁰ Yucuan chaha ña cacahan maa ra tuhun, vasi catyí ra chí tahan ra ñana vaha tuhun cuví cha cunandoto ra.

¹¹ Tyicuan ta quichaha candaca tuhun ra chí ra Jesús:

—¿Ñáá tuhun cha catyí ra casacuahá cuenda ley vehe ñuhu vatyí cuquichi xihna ca ra Elías?

¹² Ta nacahan ra, ta catyí ra:

—Cha ndicha vatyí xihna ca ra Elías nyaá quichi ta sanduvaha ra tandihí. ¿Ta yoso caa catyí tuhun Nyoo cuenda Rayii cha quichi nya gloria? Catyí chí tyi cunyehe ra tindocho, ta ma cuñi nyehe ñáyivi chí ra.

¹³ Soco yuhu catyí chí ndo tyi cha yaha quichí ra Elías. Ta sacuví maa ñáyivi cha cuñi ñu chíhin ra, tari cuhva catyí nu tutu Nyoo cha cucuvi chí ra —catyí ra Jesús chí ra.

Nu sanduvahā ra Jesús chi noo ra tyivaa cha yihí noo tatyí ña vaha chí
(Mt. 17.14-21; Lc. 9.37-43)

¹⁴ Yahā cuan ta nachaa coyo ra nu nyicú inga ra cachicá noo chihin ra Jesús. Ta canyehē ra tyi cuaha ñáyivi tayucú nicachico. Ta nyicú tucu ra sacuahá cuenda ley yucuan, ta cacuví yuhu ra chihin ra.

¹⁵ Tyicuan ta cha nanyehē ñu chi ra Jesús, tandihí ñu iyo cuñí ñu, ta cachino ñu chicuhva ñu nocumi chí ra.

¹⁶ Tyicuan ta ndaca tuhun ra Jesús chi ra cacuví yuhu cuan ta catyí ra:

—¿Ñáá cuenda cuví yuhu xaan ndo?
—catyí ra chí ra.

¹⁷ Ta noo ra nanyaá chichi cha cuaha ñáyivi yucuan, nacahan ra ta catyí ra:

—Maestro, ihya vachi nyaque chí sehi. Yihí noo tatyí ña vaha chí cue ta sacuñihí chí cue.

¹⁸ Vatyí tandihí ri nu tñn tatyí cuan chí cue, sanduva chí cue nu ñuhú, ta yucuan quita tññi yuhu cue ta cahñi noho cue. Ta ndundava cue. Cha catyí chí ra cachicá noo chuhun na tava ra tatyí ña vaha cuan, soco ña cacuví chí ra —catyí ra cuan chí ra Jesús.

¹⁹ Nacahan ra Jesús ta catyí ra:
—¡Nyoho ñu ña chinó iñi cuví ndo! ¿Yoso tahan ca quivi cunayi chihin ndo ta cunyei tisihi ndo nyacua nya cha cutuhva ndo ta chino iñi ndo chii?

Ta catyí ra chí ra cuan:
—Nyaca chí ra luhlu chiña tyehe —catyí ra.

²⁰ Quichí nyaca ra chí ra luhlu cuan. Ta cuhva cha nanyehē tatyí cuan chí ra Jesús, quehen tatyí cuan chí cue. Ta nduvā cue nu ñuhú, sacañuhú cue chí cue, ta quitā tññi yuhu cue.

²¹ Tyicuan ta ndaca tuhun ra Jesús chí sutu cue:

—¿Ama quichaha cuví chí ra tyehe caa?
—catyí ra chí ra.

Ta nacahan sutu cue, ta catyí ra:
—Nyata luhlu ra.

²² Ta cuaha chaha tyihí tatyí ña vaha ihya chí cue nu cayú ñuhú, o nu ndutya. Cuñí chí cahñi chí chí cue. Soco tatu cuví chuun, cundahvi cuñi nyehun chí ndí, ta tyinyeun chí ndí —catyí sutu cue chí ra Jesús.

²³ Ta catyí ra Jesús chí ra:
—Tatu chinó iñun, tandihí ta cuví cha cuenda ñu chino iñi —catyí ra Jesús.

²⁴ Tyicuan ta sutu cue canachaa ra ta catyí ra:

—¡Chinó iñi! ¡Tyinyee chii na chino ca iñi!
—catyí ra chí ra Jesús.

²⁵ Cuhva cha nyehē ra Jesús tyi cuaha ñáyivi candu iñn ri, ta tava ñehe ra chí tatyí ña vaha cuan, ta catyí ra:

—Yoho tatyí ña vaha cha sañihí ta sasohó chí cue ihya, catyí chuun, na quiton. Saña chí ra luhlu ihya, ta ma ndihvi con chí ra —catyí ra Jesús chí tatyí ña vaha cuan.

²⁶ Ta tatyí cuan quini xaan canachaa ta na quisi chí chí cue inga chaha ta quita. Ta sandog tatyí cuan chí cue tari noo ndiyi. Ta cuaha ñu catyí vatyí cha chí hī cue.

²⁷ Soco tññn ra Jesús ndaha cue, ta nacoñehē ra chí cue, ta nicuinanyaā cue.

²⁸ Tyicuan ta quihvi ra Jesús noo vehe, ta ra cachicá noo chihin ra candaca tuhun ra chí ra ta catyí ra:

—¿Ñáá tuhun ña cuví tava ndí chí tatyí ña vaha cuan?

²⁹ Ta tatyí ra Jesús:

—Cha cuenda vatyí tahan tatyí ña vaha ihya, quitā, soco chihin cha ma cachi yo ta cacan tahvi yo chí Nyoo —catyí ra chí ra.

Nu cahán ra Jesús tuhun inga chaha vatyí cucúvi ra
(Mt. 17.22-23; Lc. 9.43-45)

³⁰ Quivi cha quitā coyo ra yucuan, yahá coyo ra ityi Galilea. Ta ña cuñí ra Jesús cha coto ñáyivi.

³¹ Vatyí sañahá ra chí ra cachicá noo chihin ra. Ta catyí ra chí ra vatyí Rayñi cha quichi nya gloria cunacuhva cuenda ñu chí ra ndaha ñáyivi. Ta cacahñi ñu chí ra, soco cha cu uñi quivi cunandoto ra.

³² Soco ña cacutuñí iñi ra tuhun cahán ra chihin ra. Ta cayuhvi ra candaca tuhun ra chí ra.

¿Yóo ra cahnu ca?
(Mt. 18.1-5; Lc. 9.46-48)

³³ Tyicuan ta cachaa coyo ra ñuun Capernaum. Ta cuhva cha nyicú ra nya vehe, ra Jesús ndaca tuhun ra chí ra ta catyí ra:

—¿Ñáá tuhun cuví xaan yuhu nyoho ityi vachi yo? —catyí ra ndaca tuhun ra.

³⁴ Taxi taxi cacuví ra, vatyí ityi vachi coyo ra, ta cacuví yuhu ra nya ra cuví ra ra cahnu ca.

³⁵ Tyicuan ta chicunyaā ra Jesús ta cana ra chí ndí uchi uvi ra chicá noo chihin ra, ta catyí ra chí ra:

—¿Nya ndo cuñí ndo cuví ndo nuu, cuñí chí cha cuví ndo ra nu ndihí cha nuu tandihí ra, ta sacuví ndo tyiño nuu tandihí ra? —catyí ra Jesús chí ra.

³⁶ Tyicuan ta quehen ra chí noo ra cuehe luhlu ta chinanyaā ra chí cue mahñu ra. Ta tyihí sucun ndaha ra chí cue, ta catyí ra:

³⁷ —Ñáyivi cha natñn cuenda chí noo ra cuehe luhlu chihin siivi, chí yuhu natñn cuenda ñu. Ta ñu natñn cuenda chii, ñima chí yuhu ri natñn cuenda ñu, soco chí ra cha tachí chí ñandihí.

Tatu ña cuahan ñáyivi siqui yo, tumañi iñi chi yo cuahan ñu
(Mt. 10.42; Lc. 9.49-50)

³⁸ Tyicuan ta catyí ra Juan chi ra Jesús:

—Maestro, nyehe ndi chi noo ra cuan ta chihin sivun tavá ñehe ra chi tatyí ña vaha. Soco vatyí ñima chihin yo chicá noo ra, catyí ndi chi ra tyi ma sacuvi ca ra —catyí ra Juan chi ra Jesús.

³⁹ Soco catyí ra Jesús chi ra:

—Ma casi ndo. Vatyí ni noo ra cha casacuvi milagru chihin sivi ta yaha cuan ta caña iñi ra cahan ña vaha ra siqui.

⁴⁰ Vatyí ñu cha ña cuahan siqui yo, tumañi iñi chi yo cuahan ñu.

⁴¹ Tatu cuhva noo ñu, vasi noo vasu ndutya coho ndo chihin sivi, cha cuenda vatyí ñu cuenda yuhu ra Cristo cuví ndo, cha ndicha vatyí cuñihi ñu cha cuacuhva Nyoo chi ñu.

Yica xaan cha sanacava yo chi noo yañi yo nu cuatyí

(Mt. 13.6-9; Lc. 17.1-2)

⁴² Tatu yóo ñu sanacava nu cuatyí chi noo ñu chinó iñi chií, vaha taxin ca cuhñi ñáyivi noo yuu sucun ñu ta tuchi ñu chi ñu cuan nu tyañuhu.

⁴³ Tatu ndahun sanacavá chuun nu cuatyí, vaha taxin ca cahnya. Vatyí vaha ca cha quihvun nu coun chihin Nyoo chihin cha luu ndahun ta ñima ca chihin cha ninduvi ndahun ta cuhun anyaya nu cayú ñuhú cha ma ndahva ca maa.

⁴⁴ Ta yucuan ña chihí tindacu chachí chi ñu, ta ñuhú ña ndahva maa ni noo chaha.

⁴⁵ Ta tatu chahun ta sanacavá chuun nu cuatyí, vaha taxin ca cahnya. Vatyí vaha ca cuhun nu coun chihin Nyoo chihin cha luu chahun ta ñima ca chihin cha ninduvi chahun ta tuchi Nyoo chuun anyaya. Vatyí yucuan ma ndahva ca maa ñuhú.

⁴⁶ Ta ña chihí tindacu chachí chi ñu, ta ñuhú ni noo chaha ña ndahva.

⁴⁷ Ta tatu noo chiti nuu sanacavá chuun nu cuatyí, vaha taxin ca tava. Vatyí vaha ca cha quihvun nu nyacá ñaha Nyoo chihin noo chiti nuu ta ñima ca chihin ninduvi chiti nuun ta tuchi Nyoo chuun anyaya.

⁴⁸ Vatyí yucuan ña chihí tindacu chachí chi ñu, ta ni noo chaha ña ndahva ñuhú.

⁴⁹ Soco tandihi ñu nyicon chií, tari cha cayú ñu chihin ñuhú tatu nyehe ñu tindoho cha cuende, vatyí chihin cuan cua sanduvaha Nyoo chi ñu, tari nduvaha nyayu chihin ñu.

⁵⁰ Ñi vaha xaan. Soco tatu ndihi cha uhva, ¿yoso caa cuví cotyiño yo inga chaha? Tyicuan caa tucu nyoho, ma sandihi ndo cha coo tuhun Nyoo añima ndo cha cuví tari ñi vaha. Tyicuan caa ta coo taxi ri ndo chihin tahan ndo.

10

Nu sañahá ra Jesús tyi ña vaha sandoo rayii chi ñasihi ra
(Mt. 19.1-12; Lc. 16.18)

¹ Quita ra Jesús Capernaum ta cuahan ra ityi Judea nya inga chiyo yutya Jordán. Yucuan candu ñin ri ñáyivi inga chaha nu nyaá ra, ta quichahá sañaha tucu ra chi ñu tari tuhvá maa ra.

² Tyicuan ta suhva ra fariseo catuhva ra nu nyaá ra Jesús, vatyí nducu ra cuhva tyaa ra cuatyí siqui ra. Ta candaca tuhun ra chi ra tatu vaha cha sandoo noo rayii chi ñasihi ra.

³ Tyicuan ta nacahan ra Jesús ta catyí ra: —¿Ñáa cha catyí ra Moisés tyi sacuvi ndo?

⁴ Ta canacahan ra ta cacatyí ra:

—Ra Moisés chahá ra cha cuví cahnya noo ra tutu cha tandaha ra tyicuan ta cuví sandoo ra chi ñasihi ra —catyí ra chi ra.

⁵ Tyicuan ta catyí ra Jesús chi ra:

—Catyí ra Moisés cha sacuvi ndo tyicuan caa soco cha cuenda cha ndava añima ndo.

⁶ Soco quivi xihna ri, quivi savahá Nyoo tandihi maa, savahá ra rayii ta ñaha sihi.

⁷ “Yucuan cuenda sandoo rayii chi sutu ra ta chi sihi ra vatyí ndu ñin ri ra chihin ñasihi ra.

⁸ Ta chichi cha ninduvi tahan ñu cucuvi ñu tari cha noo ri ñáyivi.” Yucuan chaha ñima ca uvi tahan cuví ñu, soco cha nanduvj ñu noo ri ñáyivi.

⁹ Yucuan chaha, ña tahan chi cha sasiiñ ñáyivi cha sandu ñin ri Nyoo —catyí ra Jesús chi ra.

¹⁰ Yaha cuan ta nachaa coyo ra nya vehe, ta quichahá ndaca tuhun ra cachicá noo chihin ra inga chaha siqui tuhun cuan.

¹¹ Ta catyí ra Jesús chi ra:

—Ra cha sandoo ñasihi ta tandaha ra chihin inga ñu, chicoo cuatyí ra vatyí ña vaha sacuvj ra chihin ñasihi ra, ñaha cha xihna ri cuan.

¹² Ta tyicuan caa tucu ñusihi. Tatu sandoo ñu chi yii ñu ta tandaha ñu chihin inga ra suri chicoo tucu cuatyí ñu —catyí ra Jesús.

Nu nasoco ra Jesús chi ra cuatyaa
(Mt. 19.13-15; Lc. 18.15-17)

¹³ Tyicuan ta quichj nyaca ñu suhva ra cuatyaa chi ra Jesús tacuhva natyiso ra ndaha ra siqui ndotyin. Soco ra cachicá noo chihin ra ña chahá ca ra cha quichi nyaca ñu chi ndotyin.

¹⁴ Soco cuhva cha nanyehe ra Jesús, cuxaan ra. Ta catyí ra chi ra:

—Saña ndo. Na quichi nyaca ñu chi ra cuatyaa nu nyaí. Ta ma casi ndo. Vatyí ñu nyacá ñaha Nyoo añima, cuví ñu chinó iñi chi Nyoo tari chinó iñi ra cuatyaa ihya.

¹⁵ Cha ndicha catyí chi ndo vatyi tatu ma nacuhva cuenda ndo chi ndo chi Nyoo tari noo ra cuatyaa chihin sutu ndotyin, ma cuvi quihvi ndo nu nyacá ñaha Nyoo —catyí ra Jesús chi ra.

¹⁶ Ta quehen ra chi noo noo ndotyin ta tyihí sucun ndaha ra. Ta tyiso ra ndaha ra siqui ndotyin, ta chicān tahvi ra chaha ndotyin.

Nu ndatuhún minoo ra tyivaa tyayii chihin ra Jesús
(Mt. 19.16-30; Lc. 18.18-30)

¹⁷ Yahā cuan ta cuahan ra Jesús. Ta chingo vavaha noo ra cuan chata ra ta chicuñi chiti ra nuu ra, ta ndacā tuhun ra chi ra, ta catyí ra:

—Maestro, ra vaha cuvún. ¿Yoso caa sacuvi ta ñihi ñayivi cha ma naa ca maa coi? —catyí ra chi ra Jesús.

¹⁸ Ta catyí ra Jesús chi ra:
—¿Yoso caa chitón tyi vahi? Noo ri ra vaha iyó, ta ican ra cuan cuví Nyoo. (Ta cha catyín tyi vahi, nacotón tyi Nyoo cuví.)

¹⁹ Yoho cha chitón cha catyí Nyoo cha sacuvi yo: “Ma coun chihin inga ñusihí tatu ñima ñasihun cuví. Ma cahūn. Ma suhun. Ma cahun cuendu siqui ni noo ñu. Ma sandavi ñahun. Sahun ñayivi chi sutun ta chi sihun” —catyí ra Jesús chi ra.

²⁰ Ta nacahān ra cuan ta catyí ra:
—Maestro, tandihí ihya cha sacuvi nyata luhli —catyí ra.

²¹ Tyicuan ta cusii cuñi ra Jesús nanyehé ra chi ra. Ta catyí ra chi ra:
—Cumañi noo ri ca cha cumañi chuun. Cuahan ta xicon tandihí cha iyó chuun ta cuhvon chi ñu ndahvi. Tyicuan ta coo cha tyayiiun nya andivi. Yaha cuan ta quichun cunyicon chii vasi nyehún tindoho —catyí ra Jesús chi ra.

²² Soco cha chiní ra tuhun cahān ra Jesús tyehe caa, nducuihyā iñi ra, ta cuihya xaan cuanuhu ra vatyi tyayii xaan ra.

²³ Tyicuan ta nanyehé ra Jesús nicachico chata ra, ta catyí ra chi ra cachicá noo chihin ra:

—iÑana cha yii ta cuvi nacuhva cuenda ñu tyayii chi ñu na cunyaca ñaha Nyoo chi ñu! —catyí ra chi ra.

²⁴ Iyo cacuñi ra cachicá noo chihin ra tuhun cahān ra. Soco catyí ra Jesús chi ra inga chaha:

—Sehi, ñu cha tyaa xaan xiñi cha tyayii, iyii xaan quihvi ñu nu nyacá ñaha Nyoo!

²⁵ Tañi tyehe yaha noo camellu xiu noo yiqui ticu, ta ñima ca cha cuhva noo ñu tyayii cunyacá ñaha Nyoo chi ñu —catyí ra Jesús.

²⁶ Cha cachiñi ra tuhun ihya, iyo xaan cacuñi ra, ta candacā tuhun ra chi ra tahan ra, ta catyí ra:

—Tu tyicuan caa, ¿yóo cha cuví cacu añima? —catyí ra.

²⁷ Nanyehé ra Jesús chi ra ta catyí ra chi ra:

—Ñayivi ña cuví sacuvi ñu ihya. Soco Nyoo cuví chi ra. Vatyi cha cuenda Nyoo ñahri cha yii sacuvi ra.

²⁸ Tyicuan ta catyí ra Pedro chi ra:

—Sutu Mañi yuhu, nyuhu sandoq ndi tandihí cha iyó chi ndi, ta vityin nyicón ndi chuun.

²⁹ Nacahān ra Jesús ta catyí ra:

—Cha ndicha catyí chi ndo vatyi tandihí ñu sandoq vehe, o yañi, o cuhva, o sutu, o sihi, o ñasihí, o sehe, o ñuhú, cha cuenda yuhu ta cha cuenda cha sacoto ñu chi ñayivi tyi cuñi Nyoo sacacu ra chi ñu,

³⁰ cuañihi ñu ciento chaha siqui cha sandoq ñu ihya ñuhu ñayivi. Cuañihi ñu vehe ta yañi ñu, ta cuhva ñu, ta sihi ñu, ta sehe ñu, ta ñuhú, vasi sanyehé ñayivi tindoho chi ñu. Soco inga ñayivi cha vachi, cuñihi ñu ñayivi cha ma naa ca maa.

³¹ Soco cuaha xaan ñu cha cuvi nuu vityin, ñu nu ndihí cucuvi ñu. Ta cuaha xaan ñu cuví ñu nu ndihí vityin, ican ñu cucuvi nuu —catyí ra Jesús.

Nu cahán ra Jesús inga chaha tyi cucuvi ra
(Mt. 20.17-19; Lc. 18.31-34)

³² Cuahan coyo ra ndaa ra ityi cuahan ñuu Jerusalén, ta ra Jesús cuahan ra ityi nuu ñu nyicón chi ra. Ta maa ñu iyo cuñi ñu ta chihin cha yuhvi ñu cuahan coyo ñu chata ra. Tyicuan ta cana siñn ra chi ndi uchi uvi ra cachicá noo chihin ra. Ta quichahā catyí ra cha cucuvi chi ra.

³³ Ta catyí ra:

—Tari cuhva nyehé ndo vityin, cua ndaa yo ityi cuahan ñuu Jerusalén nu cucuhva cuenda ñu chi yuhu Rayii cha quichi nya gloria chi ra cuví nuu chi tata sutu, ta chi ra sacuahá cuenda ley vehe ñuhu. Ta cucatyí ra tyi cucuvi ta cucuhva cuenda ra chii chi ra inga ñuu.

³⁴ Ta cucuacu nyaa ra chii, cucañi ra chii, cutyicu sii ra chii. Ta cucahñi ra chii. Soco cha cu uñi quivi cunandote cha yaha cuví —catyí ra Jesús.

Nu cachicān ra Jacobo ta ra Juan noo tumañi iñi chi ra Jesús
(Mt. 20.20-28)

³⁵ Tyicuan ta ra Jacobo ta ra Juan, ra cacuvi sehe ra Zebedeo, catuhvā ra nu nyaá ra Jesús, ta catyí ra chi ra:

—Maestro, cuñi ndi cha sahun noo tumañi iñi chi ndi —catyí ra.

³⁶ Ta ndacā tuhun ra Jesús chi ra:

—¿Ñáá cha cuñi ndo cha sacuvi cha cuenda ndo?

³⁷ Ta canacahān ra ta catyí ra:

—Cuhva cha cunyaa ndi chuhun nu nyacá ñahun, noo ndi chiyo vahun, ta inga ndi chiyo satyun —catyí ra chi ra Jesús.

³⁸ Tyicuan ta catyí ra Jesús chi ra:

—Nyoho ña chitó ndo cha chicán ndo.

¿Atu cuví nyehé nyoho tindoho cha cuanyehe yuhu? ¿Atu cuví cuhun ndo tuhun chihi tari cuhun yuhu? —catyí ra chi ra.

³⁹ Ta canacahan ra:

—Cuví chi ndi.

Ta ra Jesús catyí ra:

—Cha ndicha vatyi cunyehe ndo tindoho ta cuhun ndo tuhun chihi tari cuhun yuhu.

⁴⁰ Soco tuhun cha cunyaa ndo chiyo vahi ta chiyo satyin, ñima yuhu tahán chí cuhve chí ndo, soco maa Nyoo cucatyí yóo cha cuñihi nyatu cuan —catyí ra Jesús chi ra.

⁴¹ Cha cachiñi uchi ca tahan ra chicá noo chihin ra Jesús tuhun cuan, cacuxaan ra chihin ra Jacobo ta ra Juan.

⁴² Soco cana ra Jesús chi ra ta catyí ra chi ra:

—Chitó nyoho vatyi ra canyacá ñaha chí ñáyivi siqui ñuhu ñáyivi, ñihi xaan yosó ra siqui ñu.

⁴³ Soco ñima tyicuan caa tahán chí sacuvi nyoho. Vatyi ra cuñi cucahnu ca, cuñi chí cuví ra musu tandíhi ca ñu.

⁴⁴ Ta nya nyoho cha cuñi ndo cuví ndo nuu, cuñi chí cuví ndo musu tandíhi ca ñu.

⁴⁵ Vatyi ni ri yuhu Rayi cha quichi nya gloria ta ña vachi vatyi sacuvi ñáyivi tyiño nui. Soco vachi vatyi sacuvi tyiño nuu ndo. Ta vachi vatyi cuhve ñáyivi tari noo cha cutiyahvi ta cusacaqui cuaha ñáyivi —catyí ra Jesús.

Nu sanduvahá ra Jesús chi ra Bartimeo ra cha cuaa

(Mt. 20.29-34; Lc. 18.35-43)

⁴⁶ Tyicuan ta cachaá coyo ra ñuu Jericó. Ta cua yaha ri ra ñuu cuan. Ta cuhva cha quitá ra Jesús ñuu cuan cuaha xaan ñáyivi cuahan chata ra, in ri chihin ra cachicá noo chihin ra. Ta yucuan nyaá noo ra cuaa cha nañi Bartimeo. Sehe ra Timeo cuví chi ra. Nyaá ra cuan yatyin ri yuhu ityi cuan, chicán ra caridaa.

⁴⁷ Ta cha chiñi ra cuaa cuan tyi cua yaha ra Jesús ra ñuu Nazaret, quichahá cana chaa ra, ta catyí ra:

—¡Yoho Jesús, ra vachi tata ra David, cundahvi cuñi chii! —catyí ra canachaá ra.

⁴⁸ Cuaha ñu chasi yuhu ra na cutaxin ra, soco maa ra ñihi ca cana chaa ra ta catyí ra:

—¡Yoho ra vachi tata ra David, cundahvi cuñi chii! —catyí ra.

⁴⁹ Tyicuan ta chicuiñi ra Jesús ta catyí ra: —Cana ndo chi ra.

Ta cacana ra chi ra cuaa cuan ta catyí ra chi ra:

—Sanii iñun. Ndücüita, vatyi caná ra chuun —cacatyí ra chi ra.

⁵⁰ Tyicuan ta tuchi ñihno ra sahna ndichi ra. Ta ndava ra noo ta tuhva ra nuu nyaá ra Jesús.

⁵¹ Tyicuan ta quichahá ndaca tuhun ra Jesús chi ra:

—¿Ñáa cha cuñun cha sacuvi chuhun?

Ta nacahan ra cuaa cuan ta catyí ra:

—Maestro, cuñi cha sanduvahun chiti nui —catyí ra.

⁵² Ta catyí ra Jesús chi ra:

—Cuahan. Cha nduvahun vatyi chinó iñun chí.

Ta caa cuhva ri cuan cuví nanyehe ra cuaa cuan. Ta cuahan ra chata ra Jesús ityi cuahan ra.

11

Nu quihvi ra Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

¹ Cachaá coyo ra yatyin ri ñuu Jerusalén, nu nyaá ñuu Betfagé ta ñuu Betania. Ta yucu yutun Olivo nyaá ityi nuu chiin ca. Tyicuan ta catyí ra Jesús chi uvi ra chicá noo chihin ra:

² —Cuahan ndo chichi ñuu cha nyaá ityi nuu chiña. Ta nu cua chaa ndo cunañihi ndo noo burru chaa nuñi ti, quiti ta quih ca tyayu cuví ti. Ndachi ndo chí ti, ta quichi nyaca ndo chí ti.

³ Ta tatu yóo cha ndaca tuhun ñáa tuhun sacuvi ndo tyicuan caa, catyi ndo chí ñu vatyi chiñuhú ti chí ra nyacá ñaha, ta numi ri cunanyaca ndo chí ti, catyi ndo chí ñu —catyí ra Jesús chi ra.

⁴ Tyicuan ta cuahan coyo ra, ta canañihí ra burru cuan nuñi ti ityi cahnu yatyin ri noo yuvehé, ta candachí ra chí ti.

⁵ Ta suhva ra canyicú cuan catyí ra chí ra:

—¿Ñáa cha nyacuvi ndo? ¿Ñáa tuhun cha ndachí ndo burru chiña? —catyí ra chí ra.

⁶ Tyicuan ta canacahan ra tari cuhva cha catyí ra Jesús chi ra. Ta cachahá ra cuhun coyo ra.

⁷ Tyicuan ta caquehen ra burru cuan ta chinyaca ra chí ra Jesús. Ta catyiso ra sahna ra siqui ti, ta ndaa ra Jesús chí ti.

⁸ Ta cuaha ñu ndica ñu sahna ñu ityi cuahan ra, ta inga ñu chahnu ñu soco numa ta cachacun ñu.

⁹ Tyicuan ta ñu cha cuahan ityi nuu ra ta ñu cha cuahan ityi chata, quichahá cana chaa ñu ta catyí ñu:

—¡Cahnu xaan cuví Nyoo! ¡Na sacahnu yo chí ra vachi cuenda Sutu yo Nyoo!

¹⁰ ¡Sacahnu yo chí ra vachi nyacá ñaha tari chinyaca ñaha sutu chahnu yo ra David! ¡Cahnu xaan ca cuví ra nyaá andivi! —catyí ñu.

¹¹ Tyicuan ta quihvi ra Jesús chichi ñuu Jerusalén, ta cuahan ra vehe ñuhu cahnu. Ta cha yahā nanyehē ra ityi cuan ityi ihya, ndaca chata ra ñuu Betania chihin ndi uchi uvi ra chicá noo chihin ra vatyi cha iñi.

Nu soco ra Jesús chi yutun higo cha ñahri chiti iñi nuu tun
(Mt. 21.18-19)

¹² Cha inga quivi quita coyo ra ñuu Betania cuan, ta cha ni ri ca cha cuahan ra chicá ityi ra chaā noo soco chi ra Jesús.

¹³ Ta nyasava ri nanyehē ra noo tu higo cha nyaá numa. Ta chahan ra chinyehē ra tatu iñi chiti nuu tun, soco maa maa ri numa ri iñi, vatyi ta cha ca quivi quita chiti tun.

¹⁴ Tyicuan ta cahan ra Jesús chihin tun, ta catyi ra chi tun tyehē caa:

—Ma coo ca chiti cachi ñáyivi nuun —catyi ra chi tun.

Ta ra cachicá noo chihin ra cachiñi ra cha cahán ra.

Nu tava ñehē ra Jesús chi ra caxicó chichi vehe ñuhu cahnu
(Mt. 21.12-17; Lc. 19.45-48; Jn. 2.13-22)

¹⁵ Yahā cuan ta nachaa coyo ra Jerusalén. Ta quihvi tucu ra Jesús chichi vehe ñuhu cahnu. Ta quichahā tava ñehē ra chi ra caxicó ta ra casatá yucuan. Sanduva ra mesa ñu canasamá xuhun chi ñáyivi. Ta suri tyicuan caa sacuvj ra chihin tyayu ra caxicó paloma.

¹⁶ Ta ña chahā ca ra ca cuiso ñu ñáá cha cuiso ñu ityi chichi vehe ñuhu cuan.

¹⁷ Ta quichaha sañahā ra chi ñu, ta catyi ra:

—Nu tutu Nyoo catyi chi: “Vehi, vehe nu chicán tahvi tandihi ñáyivi iyó siqui ñuhu ñáyivi cuvi”, catyi Nyoo. ¡Soco nyoho nasahá ndo vehe nu nyicú ra suhu! —catyi ra Jesús.

¹⁸ Ta ra cacuví nuu chi tata sutu ta ra casacuahá cuenda ley vehe ñuhu cachiñi ra cha cahán ra, ta quichahā canducu ra cuhva cha cacahni ra chi ra vatyí cayuhví ra chi ra tyi cha tandihi ñáyivi iyó cuñi ñu cha sañahá ra.

¹⁹ Soco cuhva cha cua cuaa ra Jesús quita ri ra ñuu cuan chihin ra cachicá noo chihin ra.

Nu na ityi tu higo cha soco ra Jesús
(Mt. 21.20-22)

²⁰ Cha ñaha ri cha inga quivi cuan, nayahā coyo ra nu nanyaá tu higo cuan. Ta cananyehē ra vatyí na ityi nyacua nya yoho tun.

²¹ Tyicuan ta nichohon iñi ra Pedro vatyí soco ra Jesús chi tun ta catyi ra chi ra Jesús:

—Maestro, nyehē tu higo cha socoñ, cha na ityi tun —catyi ra.

²² Nacahan ra Jesús, ta catyi ra:

—Chino iñi ndo chi Nyoo.

²³ Vatyí cha ndicha catyi chi ndo vatyí nya nyoho catyi ndo chi yucu ihya, “Na canyaha ta cuhun nu tyañuhu”, ta tatu ña chicá uvi iñi ndo, ta chinó iñi ndo, tuhun cahan ndo cua cuvi.

²⁴ Yucuan chaha catyi chi ndo vatyí tandihi cha chicán tahvi ndo, ta tatu chinó iñi ndo tyi cha naquehen ndo, tyicuan caa cucuvi.

²⁵ Ta tatu chicán tahvi ndo chi Nyoo ta cuxaán ndo chi inga ñu, saha ndo ticahnu iñi chi ñu, tacuhva vatyí Sutu ndo, ra nyaá andivi, saha tucu maa ra ticahnu iñi cuatyí ndo.

²⁶ Soco tatu ña sahá ndo ticahnu iñi chi ñu, ni ri Sutu ndo, ra nyaá andivi, ma saha ra ticahnu iñi cuatyí maa ndo.

Yóo cha chahā ityi chi ra Jesús vatyí sacuvi ra cha sacuvi ra
(Mt. 21.23-27; Lc. 20.1-8)

²⁷ Tyicuan ta nachaa coyo ra Jerusalén. Ta cha niri ca cha chicá noo ra Jesús chichi vehe ñuhu cahnu cuan, catuhvā ra cacuví nuu chi tata sutu, ta ra sacuahá cuenda ley, ta ra cacuví mandoñi nu nyaá ra.

²⁸ Ta candaca tuhun ra chi ra.

—¿Yóo cha tyaā tyiño chuun vatyí sacuvun tyehē caa? ¿Yóo cha chahā ityi chuun vatyí sacuvun? —catyi ra.

²⁹⁻³⁰ Ta nacahan ra Jesús, ta catyi ra:

—Cua ndaca tuhun tucu yuhu noo tuhun chi ndo. ¿Yóo cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi? Tatu catyi ndo chii, tyicuan ta cua catyi tucu yuhu chi ndo yóo cha tyatyíño ihya chii —catyi ra Jesús chi ra.

³¹ Tyicuan ta quichaha cacuví yuhu maa ra chihin tahan ra ta cacatyí ra:

—Tatu catyi yo tyi Nyoo tachí chi ra Juan, cucatyí ra chi yo: “Tu tyicuan caa, ¿ñáá tuhun ña chinq iñi ndo chi ra?”

³² ¿Ta yoso caa catyi yo tyi ñáyivi tachí chi ra? Ma cuvi —cacatyí ra, vatyí cayuhví ra chi ñáyivi, vatyí tandihi ñu cachinó iñi ñu vatyí cha ndicha cuenda Nyoo cahan ra Juan.

³³ Tyicuan ta quichaha cacatyí ra chi ra Jesús:

—Ña chitó ndi.

Tyicuan ta ra Jesús catyi ra chi ra:

—Ni yuhu ma catyi chi ndo yóo cha tyaā tyiño chii tyi sacuvi cha sacuvi —catyi ra Jesús chi ra.

12

Nu chahā ra Jesús noo cuhva yoso caa cucahni ñu chi ra
(Mt. 21.33-46; Lc. 20.9-19)

¹ Tyicuan ta chihin cuhva ihya quichaha cahan ra Jesús chihin ra, ta catyí ra chí ra: —Chiyó noo ra cha tachí ra yoho tichaha ndivi. Ta chasí ra chaha. Ta savahá ra noo nu cuhñi ra tichaha ndivi. Ta savahá ra noo vehe sucun tacuhva vatyí cuví saha ra cuenda tandihi.

² Yahá cuan ta chahá noo ra ñuhú cuan chí suhva ra casahá tyiño. Ta cuahan ra inga ñuu.

³ Ta cha chaq quivi iyó chiti yoho cuan, chitoho ñuhú cuan tachí ra noo musu nu nyicú ra casahá tyiño cuan vatyí cacan ra suhva chiti cha tahán chí chí ra.

⁴ Soco catiñ ra chí ra. Ta cacañi ra chí ra. Ta canatachí ra chí ra chihin nu ndaha nu ndi ra.

⁵ Tyicuan ta chitoho ñuhú cuan tachí ra chí inga musu, soco chí ra ihya catuchí ra yuu chí ra, catahví ra xiñi ra, ta cacahan uhvi ra chí ra.

⁶ Ta inga tucu musu tachí chitoho ñuhú cuan. Ta chí ra cuan cachahñi ra. Yahá cuan ta tachí ra cuaha ca ra. Soco cacañi ra chí suhva ra. Ta chí suhva ca ra cachahñi ra.

⁷ Ta ndoo noo ri ca ra cha cuví tachi chitoho ñuhú cuan. Ican cuví sehe ra cha cuñi xaan ra. Ta nu ndihi tachí ra chí sehe ra vatyí cuñi maa ra chicá xiñi ra: “Cucasaha ra ñáyivi chí sehi”, cuñi ra chicá xiñi ra.

⁸ Soco nu chaq sehe ra, ra casahá tyiño cuan catyí ra chí tahan ra: “Ican ra ihya cundoo chihin tandihi ihya. Na cahñi yo chí ra, ta ndoo maa yo chihin”, catyí ra.

⁹ Ta tyicuan caa catiñ ra chí ra ta cachahñi ra chí ra. Tyicuan ta cachituchí ra coño ñuhu ra itiyi chata chacu cuan —tyicuan caa cuhva cahan ra Jesús chihin ra cuan.

¹⁰ Tyicuan ta ndaca tuhun ra Jesús chí ra ta catyí ra:

—¿Ñáa cha cusacuvi ra cuví chitoho ñuhú cuan? Cuquichi ra ta cucahñi ra chí ra casahá tyiño cuan. Ta cuhva ra ñuhú cuan chí inga ra.

¹¹ ¿Atu ta sacuha ca nyoho nu tutu Nyoo nu catyí chí tyehe caa?

Yuu cha ña cacuñi ra casavaha vehe cotyiño ra,

ican cuan cuví yuu cha ñiñi ca.

¹² Ican ihya cuví cha sacuví Sutu yo Nyoo. Ta tyaqui xaan tuhun cha cuenda chí yo, catyí chí nu tutu Nyoo —catyí ra Jesús chí ra cacuví nuu chí tata sutu cuan.

¹³ Tyicuan ta canducu ra cuhva cha tyihi ra chí ra Jesús vehe caa vatyí cachitó ra vatyí cahan ra cuhva ihya soco cha cuenda maa ra. Soco vatyí cayuhví ra chí ñáyivi, casandoq ra chí ra, ta cuahan coyo ra.

Nu ndaca tuhun ra chí ra Jesús cha cuenda xuhun cha tavá gobiernu ñuu Roma (Mt. 22.15-22; Lc. 20.20-26)

¹⁴ Tyicuan ta catachí ra suhva ra cuenda ra Herodes ta suhva ra fariseo nu nyaá ra Jesús vatyí casacahan ra chí ra ta coo cuatyí catyaa ra siqui ra.

¹⁵ Chaa coyo ra ihya ta quichaha catyí ra chí ra Jesús:

—Maestro, chitó ndi vatyí cahún cha ndicha, ta ña quichahún cha cahán ñáyivi, ta ña natún cuendon cuhva caa ri ñu. Ta ndicha sañahún itiyi Nyoo. Yucuan chaha cuñi ndi coto ndi, ¿atu vaha cha tyiyahvi yo cha chicán gobiernu ñuu Roma chí yo, o ña vaha? ¿Atu tahán chí cha tyiyahvi yo, o ña tahán chí? —catyí ra chí ra Jesús.

¹⁶ Soco ra Jesús chitó ra vatyí ñima cha vaha chicá xiñi ra, ta catyí ra chí ra:

—¿Ñáa tuhun cha cuñi ndo sandavi ñaha ndo chii? Nyaca ndo noo xuhun chii, na nyehi —catyí ra.

¹⁷ Caquichí nyaca ra chí ra. Ta cuhva cha nanyehé ra ta ndaca tuhun ra chí ra, ta catyí ra:

—¿Yóo chí nuu ihya, ta yóo chí sivi nyaá ihya? —catyí ra chí ra.

Ta canacahan ra ta cacatyí ra:

—Chí gobiernu.

¹⁸ Tyicuan ta catyí ra Jesús chí ra:

—Cuhva ndo chí gobiernu cha tahán chí chí ra. Ta cuhva tucu ndo chí Nyoo cha tahán chí Nyoo —catyí ra Jesús chí ra.

Ta iyo cacuñi ra tuhun cha nacahan ra.

Nu canducu tuhun ra saduceo siqui tuhun cha nandotó ndiyi (Mt. 22.23-33; Lc. 20.27-40)

¹⁹ Tyicuan ta cuahan coyo suhva ra saduceo nu nyaá ra Jesús. Ican ra saduceo ihya catyí ra vatyí ña nandotó ndiyi. Yucuan chaha cacahan ra tyehe caa ta catyí ra chí ra Jesús:

²⁰ —Maestro, tyaq ra Moisés tuhun yoso caa tahán chí sacuvi yo tatu noo rayi ta chihí ra ta ndoo ñasihí ra soco ña chicoq sehe ra chihin ña. Catyí ra vatyí tahán chí tandaha yañi ra chihin ñaha cha chihí yíi cuan, tacuhva vatyí coo sehe ña cha cuenda ndi yañi ra.

²¹ Noo chaha chiyó ucha tahan ra chihin yañi ra. Ra cha xihna ri tandaha ra chihin noo ña, ta yori sehe ra chicoq.

²² Ta ra cu uvi tandaha ra chihin ñaha cha ndoq cuan. Ta suri chihí ra. Ta suri yori sehe ra chicoq. Ta tyicuan caa tucu cuví chihin ra cu uñi cuan.

²³ Ta tyicuan caa ndi ucha tahan ra tandaha chihin ña. Ta ni noo ra ña cachiyó sehe ra chihin ña. Ta nu ndihi tuhun, chihí ndihi maa ña.

²³ Ta vityin, quivi cunandoto ñáyivi, ¿nya ra cucuvi yii ña? Vatyí ndi ucha tahan ra cuan chiyo chihin ña —cacatyí ra chi ra Jesús.

²⁴ Tyicuan ta nacahan ra Jesús ta catyí ra chi ra:

—Nyoho cahán tondo ri maa ndo, vatyí ña chító ndo cha nyaá nu tutu tuhun Nyoo. Ta ni ña chító ndo yoso caa tunyee iñi Nyoo.

²⁵ Vatyí quivi cunandoto ndiyi, ni ma tandaha ñu ta ni ma cuhva ñu sehe ñu tandaha, vatyí tari ángel cha nyaá andivi tyicuan caa cucuvi ñu.

²⁶ Ta tuhun cha nandotó ndiyi cuan, ¿atu ta sacuahá ca ndo nu libro ra Moisés yoso caa cahan Nyoo chihin ra nu cayú taca iñu cuan? Ta tyehé caa catyí ra chi ra: “Yuhu cuví Nyoo cuenda ra Abraham, ta cuenda ra Isaac, ta cuenda ra Jacob”, catyí Nyoo chi ra Moisés.

²⁷ Ta cha catyí Nyoo tyicuan caa cuñí chi catyí vatyí vasi cha naha cachihí ra, soco canyitó añaime ra vatyí Nyoo ñima Nyoo cuenda ñu ndiyi cuví ra, soco Nyoo cuenda ñu nyitó cuví ra. Yucuan chaha catyí vatyí nyoho cahán tondo ri ndo —catyí ra Jesús chi ra.

Ley cha ñiñi ca cha chaha Nyoo
(Mt. 22.34-40)

²⁸ Chaa tucu noo ra sacuahá cuenda ley vehe ñuhu cuan, ta chihí ra cacuvi yuhu ra. Ta vatyí chító ra vatyí ra Jesús vaha nacahan ra nu cacahan ra yucuan, ta ndaca tuhun ra chi ra ta catyí ra:

—Chichi cha tandihí ley, ¿nya cha ñiñi ca sacuvi yo? —catyí ra.

²⁹ Ta nacahan ra Jesús ta catyí ra:

—Cha xihna ca sacuvi yo cha nuu tandihí, ican cuví ihya: “Cuñi ndo ñu Israel. Sutu yo Nyoo, noo ri maa ra iyó.

³⁰ Cuñun chi Sutu yo Nyoo chihin cha ñiñi iñun ta chihin cha tandihí añaime, ta chihin cha tandihí cha chihí tuñi xiñun, ta chihin cha tandihí tunyee iñun.” Ican ihya cuví cha xihna ca cha tahan chi sacuvi yo.

³¹ Ta cha cu uvi catyí chi: “Cuñun chi tahan tari cuñun chi maun.” Ñahri ca tuhun cha ñiñi ca ican saha nduvi tahan ihya —catyí ra Jesús.

³² Tyicuan ta ra sacuahá cuenda ley cuan catyí ra chi ra:

—Vaha xaan nacahun, Maestro. Ndicha cha cacyún vatyí noo ri Nyoo iyó, ta yori ca Nyoo iyó, noo tuhun ri maa ra.

³³ Ta cha cuñí yo chi Nyoo chihin cha ñiñi iñi yo ta chihin cha tandihí cha chihí tuñi xiñi yo, ta chihin cha tandihí añaime yo, ta chihin cha tandihí fuerza yo, ta cuñi yo chi tahan yo tari cha cuñí yo chi maa yo, vale ca cuan ta ñima ca tandihí quití cha chahá yo chi Nyoo cha chahí yo ta chahmí yo

—catyí ra sacuahá cuenda ley cuan chi ra Jesús.

³⁴ Nyehe ra Jesús vatyí vaha nacahan ra chihin cha cachi xiñi ra. Ta catyí ra chi ra:

—Chiin ri ca cuñí chi ta ñihún cuhva yoso caa nacuhvon añaime chi Nyoo na cunyaca ñaha ra —catyí ra Jesús chi ra.

Ta ni noo ca ñu ña cañá ca iñi ñu candaca tuhun ñu ñáá cha ndaca tuhun ñu chi ra Jesús.

¿Yóo chi tata vachi ra Cristo?
(Mt. 22.41-46; Lc. 20.41-44)

³⁵ Sañahá ra Jesús chichi vehe ñuhu cahnu, ta catyí ra:

—¿Yoso caa cha cacatyí ra sacuahá cuenda ley vehe ñuhu vatyí ra Cristo vachi ra tata ra David?

³⁶ Vatyí suri maa ra David chotyíño Tatyí li chi ra ta catyí ra:

Cahan Suti Nyoo chihin Suti ra Cristo, ta catyí ra:

“Cunyaa chiyo vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

³⁷ ¿Yoso caa cha ra vachi tata ra David cuví chi ra Cristo, ta suri maa ra David catyí ra vatyí ra Cristo cuví Sutu ra? —catyí ra Jesús.

Ta cuaha xaan ñáyivi nyicú yucuan sii xaan cacuñi ñu chihí ñu tuhun cahán ra.

Nu catyí ra Jesús vatyí iyó cuatyí ra casacuahá cuenda ley vehe ñuhu
(Mt. 23.1-36; Lc. 11.37-54; 20.45-47)

³⁸ Nu sañahá ra Jesús ta catyí ra tyehé caa:

—Saha ndo cuenda chi ndo chihin ra casacuahá cuenda ley vehe ñuhu, vatyí tahan iñi ra cacuihno ra sahna nañi ta chichá noo ra nuyahvi tacuhva saha ndo ñáyivi chi ra, ta cuhva ndo nocumi chi ra.

³⁹ Maa ra cananducú ra nu vaha ca cunyicu ra chichi vehe ñuhu. Ta nu vaha ca cacuñi ra cachi ra nyayu nu iyó vico.

⁴⁰ Ta ican ra catinyaá vehe ñu chihí yii, vatyí ña cuví tyiyahvi ñu ñáá xuhun tava ra siqui ñu. Ta cuñi ra sacuvaha ra chi ra nuu ñáyivi. Yucuan chaha naha chichán tahvi ra nu tuvi. Maa ra cuví cha cutachi tuñi ca Nyoo chii —catyí ra Jesús.

Noo cha chahá noo ñaha chihí yii
(Lc. 21.1-4)

⁴¹ Noo chaha nyaá ra Jesús chichi vehe ñuhu cahnu yatyin ri nu nyaá chatun nu cumí ñu xuhun cha chaha ñáyivi chi Nyoo. Ta nyehe ra yoso caa tyihí ñáyivi xuhun yucuan. Ta cuaha ñu tyayii chahá ñu cuaha xaan xuhun.

⁴² Tyicuan ta chaq tucu noo ñaha ndahvi chihí yii, ta tyihí ña uvi tahan xuhun cuatyí cha caha xaan nyaá.

⁴³ Tyicuan ta cana ra Jesús chi ra cachicá noo chihin ra, ta catyí ra chi ra:

—Cha ndicha catyí chi ndo vatyí ñaha ndahvi chihí yí ihya, cuaha ca chaha ña ta ñima ca inga ñu catyíhí xuhun chiña.

⁴⁴ Vatyí tandihí ñu cachaha ñu cha ndoo ri ca chí ñu. Soco maa ña chihin cha ndahvi ña chaha ña tandihí cha cumí ña —catyí ra Jesús.

13

Nu catyí ra Jesús vatyí cutani vehe ñuhu cahnu

(Mt. 24.1-2; Lc. 21.5-6)

¹ Cuhva cha cua quita ra Jesús chichi vehe ñuhu cahnu cuan, noo ra chicá noo chihin ra catyí ra chí ra:

—¡Maestro, nyehe ñana cha tyaqui yuu yihí vehe ihya! ¡Ñana cha nahnu vehe ihya! —catyí ra chí ra Jesús.

² Soco nacahan ra Jesús, ta catyí ra chí ra:

—¿Atu nyehún vehe nahnu ihya? Soco catyí chuun vatyí ma ndoo ni noo yuu coso siqui tahan, vatyí tandihí cutani —catyí ra Jesús.

Seña cha cucuvi cha ni cumañi ca naa ñayivi

(Mt. 24.3-28; Lc. 21.7-24; 17.22-24)

³ Tyicuan ta cuahan coyo ra nya yucu yutun Olivo cha nyaá inga chiyo xahva ityi nuu vehe ñuhu cahnu. Ta cuhva cha nyaá ra Jesús yucuan, ra Pedro, ra Jacobo, ra Juan, ta ra Andrés candaca tuhun xehe ra chí ra:

⁴ —Cuñí ndi cha catyun chi ndi ama cucuvi tandihí tuhun cha cahun tuhun. ¿Ñáá seña cucuvi tatu cha cua cuví? —cacatyí ra.

⁵ Nacahan ra Jesús ta catyí ra:

—Saha ndo cuenda chi ndo tacuhva yori sandavi ñaha chí ndo.

⁶ Vatyí cuaha xaan ra cuquichi coyo ra, ta cucotyíño ra sivi ta cucatyí ra: “Yuhu cuví ra Cristo.” Ta cusandavi ñaha ra chí cuaha xaan ñayivi.

⁷ Soco tatu chiñí ndo tuhun tyi iyó cuatyí ta cañí tahan ñayivi, ma nayuhvi ndo. Vatyí tyicuan caa tahán chi cucuvi, soco ta chaa ca quívi cunaa ñayivi.

⁸ Vatyí noo ñuu cucañi tahan chi chihin inga ñuu, ta ñayivi cuenda noo gobiernu cucañi tahan ñu chihin ñayivi cuenda inga gobiernu. Ta cucoo cha taan nahnu cuaha ri ityi. Ta cucoo tama. Ta cunaquiqui ñayivi. Ta tyehé caa cua quichaha cha nyehe ñayivi tindoho.

⁹ Soco saha ndo cuenda chi ndo. Vatyí cucuhva cuenda ñu chi ndo chí ra cacuví tyiño. Ta cucañi ñu chí ndo chichi vehe ñuhu. Cucuhva cuenda ñu chí ndo nuu gobernador ta nuu rey cha cuenda yuhu.

Ta tyicuan caa cuví cahan ndo tuhun nuu ra.

¹⁰ Vatyí cha ni cumañi ca naa ñayivi, cuñí chí cucutyia tuhun Nyoo yoso caa sacacú ra añima ñayivi tandihí ñuu.

¹¹ Ta cuhva cha cunyaca ñu chí ndo nuu ra cacuví tyiño, ma caa xiñi ndo ñáá tuhun cucahan ndo, ni ma ndichí xiñi ndo. Cahan ndo cha catyí Nyoo chí ndo cha cahan ndo cuhva cuan. Vatyí ñima nyoho cucahan, soco maa Tatyí Ii Nyoo.

¹² Yihí ra cunacuhva cuenda ra nyacua nya chí yañi maa maa ra. Ta sacuví ra na cacahñi ñu chí ra. Ta yihí ñayivi cunacuhva cuenda ñu chí sehe ñu. Ta yihí ñu cunaquiqui ñu siqui sutu ñu ta sihi ñu. Ta cunacuhva cuenda ñu chí ñu na cahñi ra chí ñu.

¹³ Tandihí ñayivi cutasi cuñi nyehe ñu chí ndo cha cuenda yuhu. Soco tatu cunyeé iñi ndo nyacua nya nu ndihi, cucacu ndo.

¹⁴ Ra Daniel, ra profeta Nyoo ta cha naha, tyaá ra yoso caa cuahan tuhun noo cha cusacaquíni nu ii xaan. Ta cusativi chí tandihí. Tatu nyehé ndo nanyaá yucuan nu ña tahán chí cuinanyaa, (nyoho cha sacuahá ndo ihya na cutuñi iñi ndo) cuñí chí cha cono tandihí ñu iyó Judea nya ityi yucu.

¹⁵ Ta ñu ñohó xiñi vehe quívi cuan, noo ñu, soco ma quíhvi ñu chichi vehe ñu tava ñu ñáá cha tava ñu.

¹⁶ Ta ñu ñohó nu chiqui, ma cunuhu ñu nya vehe ñu cha cunaquehen ñu sahna ñu.

¹⁷ ¡Ndahvi ñusihi cha cañohó sehe quívi cuan! ¡Ndahvi tucu cuví ñusihi cha chaxín sehe quívi cuan!

¹⁸ Cacan ndo chí Nyoo tacuhva cha ma tahan chí caca cono ndo quívi vichin.

¹⁹ Vatyí quívi tindoho cucuvi. Ta ni noo chaha ta cuví ca tyicuan caa nyata quívi chingó ñuhu ñayivi nyacua nya vityin. Ta ni ma coo ca tindoho tahán ihya nu cuahan ca chí.

²⁰ Tyehé ta ma sanducuiti Sutu Mañi yo tyembu cuan, yori maa cucacu. Soco cusanducuiti ra cha cuenda cha cuñí ra chí ñu cuenda ra, ñu cha nacachí maa ra.

²¹ Tatu yóo cha catyí chí ndo: “Nyehe ndo, ma ra Cristo ihya” o “Nyehe, ma ra nyaá yucuan”, ma chino iñi ndo.

²² Vatyí cuquichi ra casandavi ñaha, cucatyí ra tyi ra Cristo cuví ra. Ta yihí ra cucatyí ra vatyí profeta Nyoo cacuví ra. Ta cucasavaha ra seña, milagru, vatyí canducú ra cuhva sandavi ñaha ra nyacua nya chí ñu cha nacachí maa Nyoo tatu cuví chí ra.

²³ Soco saha vaha ndo cuenda vatyí yuhu cha sacote chí ndo cha ni cumañi ca cuví tyicuan caa —catyí ra Jesús.

Nu sacotq ra Jesús yoso caa cuquichi tucu ra inga chaha

(Mt. 24.29-35, 42-44; Lc. 21.25-36)

²⁴ Ta catyí tucu ra Jesús tyehe caa:

—Soco quivi cha yaha tindoho, cunduñaá ñanyii. Ma cundichin ca yoo.

²⁵ Tiñoo cunacoyo andivi. Ta nyacua nya tandihi cha iyó andivi ta cunacanda.

²⁶ Tyicuan ta cunyehe ndo chi yuhu Rayii cha quichí nya gloria inga chaha, vachi nu vico chihin cha ndicha ñuhu Nyoo, ta chihin cha cahnu cuví ra.

²⁷ Tyicuan ta cutachi chi ángel ta cusandu iin ri chí ñu nacachí nicahnu siquí ñuhu ñayiví, nyacua nya nu ndihi ñuhu ñayiví ta nyacua nya nu ndihi andivi.

²⁸ Cútuñi iñi ndo cuhva tu higo ihya: Tatu nduyutya soco tun ta caña numa tun cha chitó ndo vatyí cha cuñí chaa quivi coo chiti, cha vachi vico savi.

²⁹ Ta suri tyicuan caa tatu cha nyehe ndo tuhun ihya, coto ndo tyi cha nyaña yatyin quivi quichi tiqui. Cha nyañai yuvehe cuví cuan.

³⁰ Cha ndicha catyí chi ndo vatyí tandihi ihya cucuvi cha ni ri ca cha iyó ñáyiví.

³¹ Tyicuan ta cunaa andivi ta ñuhu ñayiví cha iyó cha vityin. Soco tuhun cahín tyicuan ri cucuvi tari cuhva catyí.

³² Soco yori chitó ñáá quivi ta ñáá cuhva cucuvi tandihi ihya, ni ángel Nyoo, ni yuhu Sehe Nyoo. Noo tuhun ri maa Nyoo Suti cuví ra chitó.

³³ Yucuan chaha conyito vaha ndo, ta saha ndo cuenda ta çacan tahvi ndo, vatyí ña chitó ndo ñáá quivi cuhva cuhva.

³⁴ Tari noo ra cha cua cuhun nu cañi. Ta cha ni cumañi ca cuhun ra, chahá cuenda ra vehe ra chi musu ra. Ta chahá ra tyiño chi noo noo ra. Ta tachí ra chi ra sahá cumi yuvehe cuan na saha ra cuenda.

³⁵ Yucuan chaha nyoho conyito ndo vatyí ña chitó ndo ñáá cuhva cuquichi ra cha cuví tari chitoho vehe cuan, an cha ni cua cuaa, an ñuu, an cuhva cha chacú chaa loho, an cha ñaha ri.

³⁶ Conyito ndo coto sana iñi ndo ta quichi ra, ta nañihi ra chí ndo quixí ndo.

³⁷ Cha catyí chí nyoho, catyí tiqui chí tandihi ñáyiví ñandihí. Na conyito ñu.

14

Nu canducy ra cuhva catiñ ra chi ra Jesús
(Mt. 26.1-5; Lc. 22.1-2; Jn. 11.45-53)

¹ Uvi ca quivi cumañi ta cua tahan chi vico cha nañi pascua ta vico cha tuhva ñu chachí ñu pan cha ñahri yuchan iya yihí. Ta ra cacuví nuu chi tata sutu ta ra casacuahá cuenda ley vehe ñuhu canducú ra cuhva catiñ xehe ra chi ra Jesús ta cacahñi ra chí ra.

² Soco cacatyí ra chí ra tahan ra:

—Ma tiin yo chí ra cha chichi vico vityin coto naquiqui ñáyiví —cacatyí ra.

Nu chosoq noo ñaha sihi ndutya vixi chahán chí ra Jesús

(Mt. 26.6-13; Jn. 12.1-8)

³ Ñohó ra Jesús ñuu Betania vehe ra Simón, cha catyí ñu: “Simón ra cha tyahyu coño.” Ta cha ni ri ca cha nyaá ra mesa, chaq noo ñaha sihi ndaha ña noo yutyí cha chingo chihin noo yuu cha nañi alabastro. Tyitu yihí chihin ndutya vixi chahán cha nañi nardo. Ta yahvi vavaha nyaá. Ta tahvi ña yutyí cuan ta chosoq ña ndutya vixi chahán cuan xiñi ra Jesús.

⁴ Soco suhva ra canyicú yucuan cacuxaan ra ta cacatyí ra chí tahan ra:

—¿Ñáá tuhun sativí ña ndutya vixi chahán cuan?

⁵ Tyehe ta quiyahví cuan, cuenda mil cuñihi yo chihin chí, ta tinyee chí chí ñu ndahví —catyí ra.

Ta cahán ra chí ña.

⁶ Soco ra Jesús catyí ra:

—¡Saña ndo chí ña! ¿Ñáá tuhun cha sayangá ndo chí ña? Cha chosoq ña chii tyehe caa, cha vaha cuví.

⁷ Vatyí ñu ndahvi tyicuan ri cua cunyaa ñu chihin ndo, ta cuví sacuvi maa ndo cha vaha chihin ñu ñáá ri quivi cuñí ndo. Soco yuhu ñima tyicuan ri cua cunyai chihin ndo.

⁸ Ñaha sihi ihya sacuví ña yoso cuhva cha cuví chí ña. Chosoq ña ndutya vixi chahán coño ñuhi, cha ni cumañi ca cucuvi ta quihvi chichi ñuhu.

⁹ Cha ndicha catyí chí ndo, vatyí tandihi ri nicahnu ñuhu ñayiví nu cahan ñu tuhun Nyoo, cunacatyí tucu ñu tuhun cha sacuví ñaha ihya, tacuhva nicohon iñi ñáyiví tuhun ña —catyí ra Jesús.

Nu nacuhva cuenda ra Judas chí ra Jesús chí ra xaan iñi chí ra

(Mt. 26.14-16; Lc. 22.3-6)

¹⁰ Yahá cuan ta ra Judas Iscariote, noo ra chichi cha uchi uvi tahan ra cacticá noo chihin ra Jesús, chahán ra chindatuhun ra chihin ra cacuví nuu chí tata sutu, vatyí casandaa ra noo tyiño ta nacuhva cuenda ra chí ra Jesús chichi ndaha ra.

¹¹ Cuhva cha cachiñi ra ihya, cusii xaan cacuñi ra, ta catyí ra vatyí cuhva ra xuhun chí ra. Tyicuan ta quichahá nducu ra Judas cuhva nacuhva cuenda ra chí ra Jesús.

Nu cuxiñi ra Jesús chihin ra cacticá noo chihin ra

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Cuví chí quivi quichaha vico cha chachí ñu pan cha ñahri yuchan iya yihí.

Yucuan quivi cha vico pascua tuhvá ñu chahñi ñu mbee luhlu cha chahá ñu chi Nyoo. Ta ra cachicá noo chihin ra Jesús candacá tuhun ra chi ra, ta cacatyí ra:

—¿Nya maa maa cuñún cha sanduvaha ndi cha cuxiñun cha vico ihya?

¹³ Tyicuan ta tachí ra chi uvi tahan ra ta catyí ra chi ra:

—Cuahan ndo chichi ñuu, ta yucuan cunañihi ndo chi noo ra cha nyísó noo quivi ndutya. Cuahan ndo chata ra.

¹⁴ Ta nu quihvi ra, catyí ndo chi ra cuví chitoho vehe yucuan tyehe caa: “Ra Sacuaha cuñi ra coto ra nya nyaá cuarto nu cusanducahnu ra vico chihin ra cachicá noo chihin ra”, catyí ndo chi ra.

¹⁵ Ta maa ra cusañaha ra noo cuarto cahnu nu piso sucun chi ndo. Cha yaha nduvi, ta yucuan cusanduvaha ndo cha cuxiñi yo —catyí ra Jesús chi ra.

¹⁶ Cuahan coyo ra. Ta chaq coyo ra chichi ñuu. Canañihi ra tari cuhva catyí ra Jesús chi ra, ta casanduvahá ra cha cuxiñi ra cha vico pascua cuan.

¹⁷ Ta cha cuaa cuan chaq ra Jesús chihin ndi uchi uvi ra chicá noo chihin ra.

¹⁸ Ta cuhva cha canyicú ra nu mesa cachachí ra, ra Jesús catyí ra:

—Cha ndicha catyí chi ndo vatyí noo nyoho cha chachí ndo chihin cunaxico tuhun ndo chii.

¹⁹ Tyicuan ta canducuihya iñi ra ta quichaha candacá tuhun tahan tahan ri ra chi ra, ta cacatyí ra:

—¿Atu yuhu?

²⁰ Ta nacahān ra Jesús ta catyí ra:

—Noo ra chichi cha uchi uvi ndo. Ra cha satyí pan in ri nu coho chihin, ican ra cuan cuví.

²¹ Vatyí yuhu Rayi cha quichí nya gloria cucuvi chí tari cuhva catyí nu tutu tuhun Nyoo. Soco jndahvi ra ndahvi ra naxicó tuhun chí! Vaha taxin ca cha cuenda ra, tyehe ta ña cacú ra —catyí ra Jesús.

²² Cha ni ri ca cha cachachí ra, ra Jesús quehen ra pan ta nacuhvá ra tyahvi nyoo chí Nyoo. Ta tahvi ra ta chahá ra chi tandihi ca ra, ta catyí ra:

—Quehen ndo. Ican ihya cuví coñe —catyí ra chi ra.

²³ Yahá cuan ta quehen ra vaso vinu. Ta cha yaha cha nacuhvá ra tyahvi nyoo chí Nyoo, chahá ra chi ra. Ta tandihi ra cachihí ra cha ñohó chichi vaso cuan.

²⁴ Ta catyí ra chi ra:

—Vinu cha yihí chichi vasu ihya tari niñi cuví. Ta chihin niñi tyihí tahan Nyoo tuhun chaa chihin ndo vatyí cucatí cha cuenda cha vaha chí cuaha ñayivi.

²⁵ Cha ndicha catyí chi ndo vatyí ma coho que vinu nyacua nya quivi nachai nu nyacá

ñaha Nyoo ta cohi vinu chaa —catyí ra Jesús chi ra.

Nu catyí ra Jesús tyi cucatyí ra Pedro tyi ña ñohó nuu ra chi ra

(Mt. 26.30-35; Lc. 22.31-34; Jn. 13.36-38)

²⁶ Cha yahá cha cachitá ra yaa, ta caquita ra cuahan coyo ra nya yucu yutun Olivo.

²⁷ Tyicuan ta catyí ra chi tandihi ra:

—Tandihí nyoho cusandoo notuhun maa ndo chíi vityin cha cuaa. Vatyí catyí chí nu tutu tuhun Nyoo tyehe caa: “Cucañi chí ra sahá cumi mbee, ta mbee cacacono ti ityí cuan ityí ihya”, catyí chí.

²⁸ Soco cha yaha cha nandote, xihna que cuhun ityí Galilea ican saha nyoho —catyí ra Jesús chí ra.

²⁹ Tyicuan ta quichaha catyí ra Pedro chí ra:

—Vasi tandihí ra sandoo ra chuun, soco yuhu ma sandoi chuun —catyí ra chí ra Jesús.

³⁰ Soco ra Jesús catyí ra chí ra:

—Cha ndicha catyí chuun, vatyí suri maa cha cuaa ihya, cha ni cumañi ca cuacu loho uvi chaha, yoho cucatyun tyi ña ñohó nuun chíi uñi chaha —catyí ra Jesús chí ra Pedro.

³¹ Soco saniñi ra Pedro ta catyí ra:

—Vasi cúvi chuhun, soco ma tixehi cha ñohó nui chuun —catyí ra Pedro.

Ta tandihí ra cacatyí ra tyicuan caa.

Nu chican tahvi ra Jesús nu cuví Getsemaní

(Mt. 26.36-46; Lc. 22.39-46)

³² Tyicuan ta cachahá coyo ra noo nu nañi Getsemaní. Ta ra Jesús catyí ra chí ra cachicá noo chihin ra:

—Cunyicu ndo ihya ni ri cuhin cucacan tahvi —catyí ra Jesús.

³³ Ta quehen ra chí ra Pedro, ta ra Jacobo ta ra Juan cuahan chihin ra. Ta quichahá chica xaan iñi ra ta cutyoño cuñi ra.

³⁴ Ta catyí ra chí ra:

—Tuví iñi añime noo tucuihya iñi, ta cuñi cahñi chí chíi. Ndqo nyoho ihya, ta cnyito ndo —catyí ra.

³⁵ Tyicuan ta cuahan ra chíi ca ityí nuu ca. Ta chicuiñi chíi ra nu ñuhú. Ta chican ra chí Nyoo tatu cuví cha ma nyehe ra tindoho cha cua cuví chí ra cuhva cuan, catyí ra chicán tahvi ra.

³⁶ Ta nu chicán tahvi ra, ta catyí ra:

—Sutu Mañi yuhu, cha cuenda yoho ñahri cha ma cuví chuun. Tu yoho ta cuñún na canyaha tindoho ihya chíi. Soco ma cuví tari cuhva cha cuñi mai, soco cuhva cha cuñi maun na cuví —catyí ra Jesús chicán tahvi ra.

³⁷ Yahá cuan ta nachahá ra nu nyicú ra. Ta nyehe ra tyi caquixí ra. Ta catyí ra chí ra Pedro:

—Yoho Simón, ¿atu quixún? ¿Atu ña cuví conyiton ni noo hora?

³⁸ Cɔnyito ndo ta caçan tahvi ndo tacuhva cha ma sanacava ra ña vaha chi ndo nu cuatyí. Cha ndicha, cuñí añima ndo sacuvi ndo cha vaha, soco coño ñuhu ndo vitya xaan cuñí chi —catyí ra Jesús chi ra.

³⁹ Tyicuan ta cuahan ra inga chaha. Ta chicãñ tahvi ra suri maa cha chicãñ ra cha xihna ri.

⁴⁰ Tyicuan ta nachaa tucu ra inga chaha, nyehẽ ra tyi caquixí ra. Vatyí nicunyasi maa chiti nuu ra chihin cha cacuñí xaan ra cusu ra. Ta ña cachitó ra ñáá cha nacahan ra chihin ra Jesús.

⁴¹ Ta chahãñ ra cha cu uñi chaha, ta nachaa ra, ta catyí ra:

—Vityin ndicha çusu ndo, nyitatu ndo. Cha iyó vaha ri vityin, cha chaã cuhva cha cucuhva cuenda ra chi yuhu Rayii cha quichi nya gloria ndaha ra ca iyó cuatyí.

⁴² Ndjicuita ndo, çoho ndo. Cha vachi ra naxicó tuhun chii —catyí ra Jesús chi ra.

Nu catiñ ra chi ra Jesús

(Mt. 26.47-56; Lc. 22.47-53; Jn. 18.2-11)

⁴³ Ni cahán ca ra Jesús ta chaã ri ra Judas, noo ra chichi cha uchi uvi tahan ra chicá noo chihin ra. Ta cuaha sindaro ta policia vachi coyo chihin ra canyisó ra mityi ta yutun. Vachi coyo ra cuenda ra cacuví nuu chi tata sutu, ta ra casacuaha cuenda ley vehe ñuhu, ta cuenda ra mandoñi.

⁴⁴ Cha ni cumañi ca cachaa coyo ra, ra Judas, ra cha naxicó tuhun chi ra, chahã ra noo seña chi ra ta catyí ra:

—Ra cha tyayuhi, ican ra cuan cuví. Tjññ vaha ndo chi ra na cuhna ra chihin ndo.

⁴⁵ Ta cuhva cha chaã ra tuhva ra nu nyaá ra Jesús ta catyí ra chi ra:

—Maestro.

Ta tyayuhu ra xitin ra.

⁴⁶ Tyicuan ta catiñ ra chi ra Jesús ta cuahan ra vehe caa.

⁴⁷ Soco noo ra cha nyaá yucuan tava ra mityi ra ta chahnyã ra soho musu ra cuví nuu chi tata sutu.

⁴⁸ Tyicuan ta ra Jesús catyí ra chi ra cachaa coyo cuan:

—¿Atu vachi tññ ndo chii chihin mityi ta chihin yutun, tari cha vatyí cuví yuhu noo ra suhu?

⁴⁹ Ndi quivi chinyaj chihin ndo sañahj chichi vehe ñuhu cahnu cuan. Ta ni noo chaha ña tjññ ndo chii. Soco cuví chi tyehe caa vityin, tacuhva chino cava tari cuhva catyí nu tutu tuhun Nyoo —catyí ra Jesús chi ra.

⁵⁰ Tyicuan ta tandihi ra cachicá noo chihin ra, cachinq ra ta casandoq noo tuhun maa ra chi ra Jesús.

⁵¹ Soco noo ri ca ra tyivaa nyicón ra chi ra, ndichí ra noo sinduhu ta catiñ tucu ra chi ra.

⁵² Soco sandoq ra sinduhu cuan ta cuahan vavaha ra vityiaa vityi cañi ra.

Nu cutuñi chi ra Jesús nuu ra cuví tyiño
(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Tyicuan ta cachinyaca ra chi ra Jesús nuu ra cuví nuu chi tata sutu, ta candu iññ ri tandihi ra chihin ra cacuví mandoñi, ta ra casacuaha cuenda ley vehe ñuhu.

⁵⁴ Ta ra Pedro cuahan ra chata ra nya sava ri, nyacua nya nuquehe vehe ra cuví nuu chi tata sutu cuan. Ta ndoq ra nyaá ra chihin policia sanasaá ra chi ra yatyin yunuhu.

⁵⁵ Ra cacuví nuu chi tata sutu, ta tandihi ra cuví tyiño canducu ra ñáá noo cuatyí tyaa ra siqui ra Jesús, tacuhva cuví cacahñi ra chi ra soco ña cañihj maa ra.

⁵⁶ Vasi cuaha ñáyivi cañãñ ñu cuendu siqui ra, soco ña nacachí tahan tuhun cahán ñu.

⁵⁷ Yihí ñu candicuitã ñu ta catyaa ri maa ñu cuendu siqui ra, ta cacatyí ñu:

⁵⁸ —Nyuhu chiñi ndi cha cañãñ ra vatyí cusatani ra vehe ñuhu cahnu cha savaha ñáyivi. Ta chichi cha uñi quivi cunacananyaa ra inga vehe ñuhu cha ñima ñáyivi savaha, na —catyí ñu.

⁵⁹ Soco ni tyicuan caa ña nacachj tahan cha catyí ñu.

⁶⁰ Tyicuan ta ra cuví nuu chi tata sutu ndicuitã ra mahñu nu nyicú tandihi ra yucuan, ta quichahã ndaca tuhun ra chi ra Jesús, ta catyí ra:

—¿Atu ña nacahan maun? ¿Ñáá cha cuví ihya cha cacahán ra sicun? —catyí ra chi ra.

⁶¹ Soco ra Jesús taxi ri nanyaá ra, ta ña nacahan maa ra. Ta ra cuví nuu chi tata sutu cuan ndaca tuhun ra chi ra inga chaha, ta catyí ra:

—¿Atu yoho cuvún Cristo, Sehe Nyoo ra cha iyó cha vaha chi?

⁶² Ra Jesús catyí ra chi ra:

—Ican, yuhu cuví. Ta nyoho cunyehe ndo chi yuhu Rayii cha quichj nya gloria, cucunyai chiyo vaha Nyoo ra cha iyó tandihi tunyee iñi chi. Ta cunyehe ndo chii quivi quichi nu vico andivi —catyí ra chi ra.

⁶³ Tyicuan ta ra cuví nuu chi tata sutu cuan, chahnyã ra sahna ra tari noo seña vatyí ña tahán iñi ra, ta catyí ra:

—¿Ñáá ca cha ndaa cuñi yo?

⁶⁴ Nyoho cha chiñi ndo vatyí chicoq cuatyí ra nuu Nyoo chihin tuhun cahán ra. ¿Yoso caa cuñi nyoho? —catyí ra.

Ta tandihi ra cacatyí ra vatyí tahán chi cúvi ra.

⁶⁵ Tyicuan ta suhva ra quichahã tyicu siñ ra chi ra. Ta chasj ra nuu ra, ta cañi ra chi ra chihin chiqui ra ta cacatyí ra chi ra:

—¡Nacoto yóo cha cañi chuuñ! —cacatyí ra chi ra.

Ta policia cacatu ra nuu ra.

Nu catyí ra Pedro vatyí ña ñohó nuu ra chi ra Jesús
(Mt. 26.69-75; Lc. 22.56-62; Jn. 18.15-18, 25-27)

⁶⁶ Ra Pedro nyaá ra ityi yuvi nuquehe. Tyicuan ta chaá noo ñaha sahá tyiño chihin ra cuví nuu chi tata sutu cuan.

⁶⁷ Ta cuhva cha nanyehé ña chi ra Pedro vatyí sanasaá ra chi ra yunuho cuan, ndoo ña nyehé vavaha ña chi ra, ta catyí ña chi ra:

—Yoho ñandihi, chica noun chihin ra

Jesús ra ñuu Nazaret cuan —catyí ña chi ra.

⁶⁸ Soco ra Pedro tixehé ra, ta catyí ra:

—Ña ñohó nui chi ra, ña chitè ñáá tuhun cahún —catyí ra chi ña.

Tyicuan ta quitá ra ityi yuvehe. Tyicuan ta chacu noo loho.

⁶⁹ Tyicuan ta ñaha cha nyaá tyiño yoo cuan, nanyehé tucu ña chi ra inga chaha ta quichaha catyí ña chi ra canyicú yucuan:

—Noo ra tahan ra cuan cuví ra ihya

—catyí ña.

⁷⁰ Soco tixehé ra inga chaha. Ta yaha suhva ri ca cuhva ta ra canyicú yucuan cacatyí tucu ra inga chaha chi ra Pedro:

—Cha ndicha vatyí noo ra yucuan cuví yoho, vatyí ra Galilea cuvún, vatyí tari cahán ñu, cahún —catyí ra chi ra.

⁷¹ Tyicuan ta iyo xaan tyanaha ra Pedro, ta catyí ra:

—¡Chitó vaha Nyoo tyi ña ñohó nui chi ra cha cahán nyoho tuhun! ¡Na cahñi Nyoo chií tatu ña ndicha cha cahán! —catyí ra.

⁷² Ta caa cuhva ri cuan chacu ri loho cha cu uvi chaha. Tyicuan ta nichohon iñi ra Pedro tuhun cha cahan ra Jesús chihin ra: “Cha ni cumañi ca cuacu loho uvi chaha, yoho cucatyun vatyí ña ñohó nuun chi yuhu uñi tahan chaha.” Nichohon iñi ra Pedro ta quichaha chacu chaa ra.

15

Nu nanyaa ra Jesús nuu ra Pilato
(Mt. 27.1-2, 11-14; Lc. 23.1-5; Jn. 18.28-38)

¹ Cuhva cha cundichin candu ñin ri ra cacuví nuu chi tata sutu chihin ra cacuví mandoñi ta chihin ra casacuahá cuenda ley vehe ñuhu ta tandihí ra cuví tyiño ñu Israel. Ta ra Jesús nuhñi ra, chinacuhva cuenda ra chi ra chi ra Pilato.

² Ta ndaca tuhun ra Pilato chi ra, ta catyí ra:

—¿Atu rey cuenda ñu Israel cuví yoho?

Ta nacahan ra Jesús ta catyí ra:

—Ican, yuhu cuví. Ndicha cha cahún.

³ Ta ra cacuví nuu chi tata sutu cuaha xaan cha catyaa ra siqui ra.

⁴ Tyicuan ta quichaha ndaca tuhun tucu ra Pilato inga chaha chi ra, ta catyí ra:

—¿Atu ña nacahan maun? Nyehe yoso cha cuaha cha tyaá ra sicun.

⁵ Soco ra Jesús ña nacahan maa ra.

Yucuan chaha ña chitó ra Pilato ñáá cha caca xiñi ra.

Nu cutuñi chi ra Jesús vatyí cucuvi ra
(Mt. 27.15-31; Lc. 23.13-25; Jn. 18.38—19.16)

⁶ Ta vico cuan tuhvá ra Pilato saña ra chi noo ra ñohó vehe caa, noo ra cha cacan maa ñáyivi.

⁷ Ta ñohó noo ra nañi Barrabás vehe caa cuan, ñin ri chihin inga ra cha cachahñi chi ñáyivi noo nu naquiqui ñáyivi siqui gobiernu.

⁸ Ta quichi coyo ñáyivi quichaha chican ñu chi ra Pilato na saña ra chi noo ra tari tuhvá maa ra.

⁹ Ta nacahan ra Pilato, ta catyí ra:

—¿Atu cuñi nyoho cha sañe chi Rey cuenda ñu Israel?

¹⁰ Tyicuan caa catyí ra vatyí tuví iñi ra vatyí ra cacuví nuu chi tata sutu cuan tasi cuñi ra chi ra Jesús tyi cuaha ñáyivi nyicón chi ra, yucuan chaha nacuhva cuenda ra chi ra.

¹¹ Soco ra cacuví nuu chi tata sutu cuan catyiyuhú ra chi ñáyivi na catyí ñu na saña ra chi ra Barrabás.

¹² Tyicuan ta ndaca tuhun ra Pilato chi ñu, ta catyí ra:

—¿Ta ñáá cha cuñi ndo sacuvi chihin ra cha catyí nyoho Rey cuenda ñu Israel chi? —catyí ra chi ñu.

¹³ Tyicuan ta nacanchaa ñu, ta catyí ñu:

—¡Na cúvi ra nu cruzi! —catyí ñu, canachaa ñu.

¹⁴ Ta catyí ra Pilato chi ñu:

—Soco ¿ñáá cha ña vaha sacuvi ra? —catyí ra.

Soco canachaa ca ñu ta catyí ñu:

—¡Na cúvi ra nu cruzi! —catyí ñu.

¹⁵ Tyicuan ta vatyí cuñi ra Pilato cuvaha ra nuu ñu, saña ra chi ra Barrabás. Tyicuan ta tyihí ra tyiño na ndoho ra Jesús, ta cha yaha cuan chaha cuenda ra chi ra vatyí cúvi ra nu cruzi.

¹⁶ Tyicuan ta chinyaca sindaro chi ra nuquehe vehe tyiño cuan. Ta casandu ñin ri ra tandihí sindaro.

¹⁷ Ta casacuihño ra noo sahma tyacu nyaá chi ra. Ta caquicu ra noo corona chihin iñu. Ta catyihí ra xiñi ra.

¹⁸ Yaha cuan ta quichaha cacana chaa ra siqui ra chacú nyaá ra chi ra, ta catyí ra:

—¡Nocumi chuun, yoho Rey cuenda ñu Israel! —catyí ra.

¹⁹ Ta cacañi ra xiñi ra chihin noo yutun, ta tyicú si ra chi ra. Ta cacticuiñi chiti ra casaha ra tyi sacahnu ra chi ra.

²⁰ Cha yahá cha chacu nyaa ra chi ra tyicuan caa, tinyaa ra sahma nyaa cuan chi ra, ta sandihvi noo ra sahma maa ra chi ra. Yahá cuan ta cuahan ra chihin ra vatyí cuatyaa ra chi ra nu cruzi.

Nu cuacúvi ra Jesús nu cruzi

(Mt. 27.32-44; Lc. 23.26-43; Jn. 19.17-27)

²¹ Yahá noo ra ñuu Cirene, nañi ra Simón. Sutu ra Alejandro ta ra Rufo cuví chi ra. Ni cua nachaa ra cha chahan ra nu chiqui. Ta cuhva cha cua yaha ra ityi cuan, casaniñi sindaro chi ra na cuiso ra cruzi ra Jesús.

²² Ta cachinyaca ra chi ra Jesús noo nu nañi Gólgota. Ta cuñi chi catyi: Nu Cuví Yiqui Xiñi Ndiyi.

²³ Ta cachaha ra vinu nasaca chihin noo tatan cha nañi mirra coho ra. Soco ra Jesús ña chihí ra.

²⁴ Cha yahá catyaa sindaro chi ra nu cruzi, cachahan ra sihva chihin sahma ra ta nya ra saha ganaa caquehen ra sahma ra.

²⁵ Caa iin cha ñaha ri catyaa ra chi ra nu cruzi.

²⁶ Ta letra cha catyaa ra xiñi cruzi cuan, catyi chi ñáa cuatyí ra. Ta catyi chi tyehe caa: “Ican ra ihya cuví Rey cuenda ñu ñuu Israel.”

²⁷ Ta chinanya ra uvi ca cruzi nu chitaca ra uvi tahan ra suhu, noo ra chiyo vaha ra, ta inga ra chiyo satyin ra.

²⁸ Ta tyicuan caa quitá chi tari cuhva catyi nu tutu tuhun Nyoo tyehe caa: “Sahá ñu tuhun tyi cuví ra noo ra quiñi iyó.”

²⁹ Ta ñu yahá coyo chacu nyaa ñu chi ra. Ta quisí xiñi ñu, ta catyi ñu chi ra:

—¡Jaan! ¡Yoho cha catyün tyi cusatanun vehe ñuhu cahnu, ta chichi cha uñi quivi cunacoñehun inga chaha!

³⁰ ¡Sacacu maun chuun ta ñoo nu cruzi chiña! —catyi ñu.

³¹ Ta tyicuan caa tucu ra cacuví nuu chi tata sutu ta ra casacuahá cuenda ley vehe ñuhu, cachacú nyaa ra chi ra, ta catyi ra chi tahan ra:

—¡Chi inga ñu sacacu ra, soco ña cuví sacacu ra chi maa ra!

³² Na noo ra nu cruzi vityin, na nyehe yo ta chino iñi yo tyi Cristo Rey cuenda ñu Israel cuví ra —catyi ra.

Ta nyacua nya ra tacaá inga cruzi inchiyo inchiyo xiin ra ta cacahan ra chi ra.

Nu chihí ra Jesús

(Mt. 27.45-56; Lc. 23.44-49; Jn. 19.28-30)

³³ Cuhva cha cua cu hora, tandihí ñuhu ñayivi nduñaa, nyacua nya caa uñi cha cha iñi.

³⁴ Ta suri cuhva cuan canachaa ra Jesús chihin tandihí fuerza ra, ta catyi ra:

—Eloi, Eloi, ¿lama sabactani? —ta cuñi chi catyi: Nyoo Suti, Nyoo Suti, ¿ñáa tuhun sandoq noo tuhun maun chii? —catyi ra.

³⁵ Suhva ra tayucu yucuan cachiñi ra ta catyi ra:

—¡Xihna! Caná chaa ra chi ra profeta Elías —catyi ra.

³⁶ Tyicuan ta chinq noo ra yucuan chiquehen ra noo tari caa xixan ta satyij ra chihin vinu iya. Ta tyaa ra noo nu yutun ta satuhva ra yuhu ra na coho ra, ta catyi ra:

—Cuatu ndo. Na nyehe yo tatu quichi ra Elías sanoo ra chi ra —catyi ra cuan.

³⁷ Tyicuan ta ñihi xaan canachaa ra Jesús, ta chihí ra.

³⁸ Ta sahma cha tacaá chichi vehe ñuhu cahnu ndata sava maa chi, nya siqui ta nyacua nya ityi yuvi.

³⁹ Ta noo capitán cuenda sindaro Roma nanyaá ra vatyin nuu ra Jesús cuan. Cha nyehe ra yoso caa cana chaa ra, ta yoso caa chihí ra, ta catyi ra:

—Cha ndicha ndicha cuii vatyí Sehe Nyoo cuví chi ra ihya —catyi ra.

⁴⁰ Ta nya sava ri tayucu tucu suhva ñusihí canyehé ñu. Ta mahñu ñu cuan nanyaá cu María ñaha Magdala, ta cu María sihi ra José ta ra Jacobo ra tyivaa ca. Ta nanyaá tucu cu Salomé.

⁴¹ Ican ñusihí ihya cachinyicón chi ra Jesús, ta tyinyeé ñu chi ra quivi chica noo ra ityi Galilea. Ta siin ri nyicú cuaha ca ñu cha chaa coyo chihin ra Jerusalén cuan.

Nu chicuchi ñu chi ra Jesús

(Mt. 27.57-61; Lc. 23.50-56; Jn. 19.38-42)

⁴² Cuví chi quivi cha sanduvaha ñu cha cachi ñu vatyí inga quivi tuhva ñu nyitatu.

⁴³ Ta cha cuaa cuan chaa ra José ra ñuu Arimatea. Noo ra cuví tyiño. Nyatú tucu maa ra nu cunyaca ñaha Nyoo. Ta ndachan cuñi ra ta quihvi ra nu nyaá ra Pilato, ta chican ra coño ñuhu ra Jesús chi ra.

⁴⁴ Iyo cuñi ra Pilato cha nacotó ra vatyí cha chihí ra Jesús. Ta cana ra chi capitán vatyí ndaca tuhun ra tatu cha yahá chihí ra.

⁴⁵ Ta cha catyi capitán vatyí cha yahá chihí ra, ra Pilato chaha ra coño ñuhu ra chi ra José.

⁴⁶ Tyicuan ta satá ra José noo sinduhu cha chinq chihin sahma finu cha nañi lino, ta sanoo ra coño ñuhu ra. Ta siqui noo ra chihin sinduhu cuan. Yahá cuan ta chityihí ra chi ra noo chichi ñaña cha cachatyá ra chichi noo yuu. Ta chasú ra yuhu ñaña cuan chihin noo yuu cahnu.

⁴⁷ Ta cu María ñaha Magdala cuan ta cu María sihi ra José, chaa coyo ñu nyehe ñu nu tyihí ra chi ra.

16

Nu nandoto ra Jesús

(Mt. 28.1-10; Lc. 24.1-12; Jn. 20.1-10)

¹ Yahá quivi nyitatu ñu. Tyicuan ta cu María ñaha Magdala ta cu María sihi ra

Jacobo, ta cu Salomé sata ñu ndutya vixi chahán ta cuahan coyo ñu cua tyihí ñu coño ñuhu ra Jesús.

² Ta timingu cuví, quívi quichaha vitya, ñaha cui ri cuhva cha vachi cundichin cuhva cha ni cua caña ñanyii, cha coyo ñu nu ñaña.

³ Ta catyí ñu chi tahan ñu:

—¿Yóo cha cusacanyaha yuu yuhu ñaña cuan? —catyí ñu chi tahan ñu.

⁴ Soco cuhva cha nanyehé ñu, yuu cahnu cha nyasi yuhu ñaña cuan cha cuachiyó chi nya sava.

⁵ Quihvi coyo ñu chichi ñaña yucuan. Ta nanyehé ñu chi noo ángel tari caa noo ra tyivaa, nyaá ra chiyo vaha. Ta ñihnó ra sahna cañi ta cuichin. Ta canayuhví ñu.

⁶ Soco catyí ra chi ñu:

—Ma yuhvi ndo. Nyoho nanducú ndo chi ra Jesús ra ñuu Nazaret, ra cha chihí nu cruzi. Soco cha nandotó ra. Ña ñohó ca ra ihya. Nyehé ndo nu chacun ra chi ra.

⁷ Cuahan ndo cua sacoto ndo chi ra Pedro ta chi inga ra cachicá noo chihin ra. Catyí ndo chi ra vatyi na cuhun coyo ra ityi Galilea vatyi yucuan nyatú ra Jesús chi ra, tari cuhva catyí ra chi ra. Vatyi ra Jesús cha cuahan ra ityi nuu —tyicuan caa catyí ángel cuan chi ñu.

⁸ Tyicuan ta cuahan coyo vavaha ñu, vatyi suri canihí ñu cha cuenda cha yuhví ñu. Ta yori maa chihin cahán ñu tuhun cha cuenda cha yuhví ñu.

Nu tuví ra Jesús nuu cu María ñaha Magdala (Jn. 20.11-18)

⁹ Cuví chi timingu quívi quichaha vitya cha nandotó ra Jesús. Yahá cuan ta xihna ca nuu cu María ñaha Magdala tuví ra. Maa ña cuví ñaha cha tavá ñehé ra ucha tahan tatyí ña vaha.

¹⁰ Ta chahan ña chisacoto ña chi ra cachicá noo chihin ra, vatyi canyicú cuihya ra ta cachacú chaa ra.

¹¹ Soco cuhva cha cachihí ra vatyi iyó ra Jesús ta vatyi nyehé ña chi ra, ña cachinó iñi ra.

Nu tuví ra Jesús nuu uvi tahan ra chicá noo chihin ra (Lc. 24.13-35)

¹² Cha yahá cuan, ra Jesús tuví ra nuu uvi tahan ra cha cuahan coyo chica ityi ityi nu chiqui. Soco siñ caa cuhva caá ra cananyehé ra chi ra.

¹³ Ta cuanuhu coyo ra ta sacoto ra chi tandihí ca ra. Soco suri ña cachinó iñi ra cha cacahan ra cuan.

Tuhun cha chahá ra Jesús chi ra cha tyatyihó ra chi (Mt. 28.16-20; Lc. 24.36-49; Jn. 20.19-23)

¹⁴ Ta cuee ca ta tuví ra Jesús nuu ndi uchi siñ ra cha cachicá noo chihin ra, cha ni ri ca cha canyicú ra nu mesa. Ta chahan ra chi ra cha cuenda cha ña cachinó iñi ra, ta cha cuenda cha candava añima ra vatyi ña cachinó iñi ra tuhun chahan ñu nyehé tyi nandotó ra.

¹⁵ Ta catyí ra chi ra:

—Cuahan ndo nicacahnu ñuhu ñayivi, ta chahan ndo chihin tandihí ñayivi, ta catyí ndo chi ñu yoso caa sacacú Nyoo añima ñu.

¹⁶ Ta ñu cha chinó iñi ta condutya ñu, cucacu añima ñu. Soco ñu cha ña chinó iñi cundoo cuatyi ñu siqui ñu ta cunaa ñu.

¹⁷ Ta tandihí seña ihya cusacuvi ñu cha chinó iñi chii: Chihin sivi cutava ñehé ñu tatyí ña vaha. Cucahan ñu inga sahan cha ña chitó ñu.

¹⁸ Cutiñ ñu coo, ta tatu coho ñu cha yihí venenu, ma saha cuehe chi ñu. Ta siñ ri cutyiso ñu ndaha ñu siqui ñu cuhvi, ta cunduvaha ñu.

Nu nandaq xica ra Jesús andivi (Lc. 24.50-53)

¹⁹ Nu ndihí chahan Sutu Mañi yo Jesús chihin ra, ta nandaq xica ra andivi, ta chicunyaq ra chiyo vaha Nyoo.

²⁰ Tyicuan ta ra cachicá noo chihin ra quitá ra ta chahan coyo ra chichahan ra tuhun Nyoo yoso caa sacacú ra añima yo tandihí ri ityi. Suri maa Sutu Mañi yo tyinyee chi ra vatyi chahá ra cha sacuvi ra cuaha milagru. Ta tyicuan caa nyehé ñayivi tyi ndicha tuhun cacahán ra.

Tuhun Nyoo Cha Tyaa San Lucas

Nu sacuhun ra Lucas noo tuhun chi ra Teófilo

¹⁻³ Cha chitón yoho Tata Teófilo, vatyi cha cuaha ñáyivi nducú ñu cuhva ta tyaa ñu nuu tutu tuhun cha cuvı nu nyicú ndi. Tyaa ñu tari maa cuhva nacatyı ñáyivi chi yo, ñáyivi cha nyehe ta cahán tuhun ra Jesús nya quıvi xihna ri. Ta vityin tahán tucu chi chí yuhu tyi sacote tuhun ra chuun. Vatyi cha yahá sacuahá ta nyehe vahi tandıhi nya nu quichahá. Ta vityin ñańi ñańi ri cuatyai tuhun ra.

⁴ Vatyi coto vahun tyi ndıcha cha sacoto ñáyivi chuun.

Nu sacoto noo ángel chi ra Zacarías ama cucacu ra Juan ra sacondutyá chi ñáyivi

⁵ Quıvi cha cuvı ra Herodes rey nicahnu Judea, chiyo noo tata sutu, chinańi ra Zacarías. Ta yihı ra cuenda ityi tata sutu cha chinańi Abías. Ta ñasihi ra chinańi ña Elisabet. Ta vachi ñu tata ra Aarón, ra chiyo ta cha naha.

⁶ Ta ñahri maa cuatyı ñu iyó nuu Nyoo. Vatyi vaha xaan quichahá ñu tuhun cahán Nyoo. Ta yori maa cuvı tyaa cuatyı siqui ñu.

⁷ Soco yori maa sehe ñu chicoq. Vatyi cu Elisabet, ña cuvı coo sehe ña. Ta siin ri nıduvı tahan ñu chahnu xaan ñu.

⁸ Ta noo quıvi tahan chí ityi cuenda ra Zacarías cha sacuvı ra tyińo nuu Nyoo.

⁹ Tari cuhva costumbre maa tata sutu, nyehe ra nya ra tahan chí nyatu chí. Ta tahan chí nyatu chí ra Zacarías cha quıvı ra chichi vehe ñuhu, vatyi cahmi ra cutu.

¹⁰ Cha ni ri ca cha ñohó ra chahmi ra cutu cuan, cuaha xaan ñáyivi chicán tahvi ñu ityi chata vehe.

¹¹ Yucuan ta tuvı noo ángel cuenda Nyoo nuu ra Zacarías. Ta chıcuinanyaá ra chiyo vaha arta nu chahmi ra cutu.

¹² Ta cha nanyehe ra Zacarías chí ángel cuan, iyo xaan cuńi ra. Ta yuhvi xaan ra.

¹³ Soco ángel cuan catyı ra chí ra:
—Zacarías, ma yuhvun. Vatyi Nyoo chífi ra tuhun cahún. Ta ñasihun cu Elisabet cucoo noo sehe ña. Ta Juan cusacunańun chí cue.

¹⁴ Siı xaan cucuvı chuun. Ta cuaha xaan ñu, cusıi cuńi quıvi cacu cue.

¹⁵ Vatyi sehun, cahnu xaan ra cucuvı ra nuu Nyoo. Ma coho ra vinu ta ni ndixi. Ta ñihı xaan cuquihı Tatyı Iı Nyoo chí ra nyata cumańi cacu ra ta tandıhi tyembu cha coo ra.

¹⁶ Ta cuaha xaan ñáyivi Israel cunyicon chí Sutu yo Nyoo cha cuenda ra.

¹⁷ Ta cucoo tunyee ińi Nyoo chí ra. Ta cuquihı xaan Tatyı Iı Nyoo chí ra. Vatyi cucuvı ra tari ra Elías, ra cuvı profeta Nyoo ta cha naha. Ta cusanıcoo vaha ra chí ñáyivi chihin sehe ñu. Ta cusańaha ra chí ñáyivi quıńi iyó na quichaha ñu tuhun cahán Nyoo. Tyicuan caa cusanduvaha ra chí ñáyivi ta cuatu tuhva ñu chí Nyoo —catyı ángel chí ra Zacarías.

¹⁸ Ta ndaca tuhun ra Zacarías chí ángel, ta catyı ra:

—¿Yoso caa ta cote noo cha ndıcha vaha? Vatyi yuhu cha chahnu xain. Ta ñasihi cha chahnu xaan ña ñandıhi —catyı ra.

¹⁹ Ta ángel cuan quichahá catyı ra:
—Yuhu Gabriel nańi. Ta chiqué tyińo Nyoo. Maa ra tachı chí vatyi cahin nuun ta sacote tuhun vaha ihya chuun.

²⁰ Ta vityin nduńihun. Vatyi ña chinó ińun tuhun cahın. Ta ma cuvı cahun nyacua nya chino cava tuhun cahın chuhun —catyı ángel cuan chí ra.

²¹ Ta ñáyivi cha nyatı chí ra Zacarías ityi chata vehe, iyo xaan cuńi ñu ñáá tuhun cha cucuee xaan ra chichi vehe ñuhu.

²² Soco cuhva cha quitá ra Zacarías, ña cuvı maa cahan ra chihin ñu. Tyicuan ta tuvı ińi ñu vatyi iyó cha nyehe ra chichi vehe ñuhu cuan. Ta quichahá cahan ra chihin ñu chihin seńa ri. Vatyi ña cuvı cahan ra.

²³ Ta quıvi cha ndıhı tyińo saha ra Zacarías vehe ñuhu cuan, ta cuanuhu ra nya vehe ra.

²⁴ Ta cha yahá tuhun cuan chicohon sehe ñasihi ra, cu Elisabet. Ta ña quitá maa ña chata vehe cha ni ri ca cha ohon yoo. Ta chicá xińi ña:

²⁵ “Tyeha caa sacuvı Sutu Mańi yuhu chihin, tacuhva ma cahan cuehe ca ñáyivi chíi”, chicá xińi ña.

Nu sacoto noo ángel chi cu María vatyi cucacu ra Jesús

²⁶ Nu cu ińu yoo cha ñohó sehe cu Elisabet, tachı Nyoo chí ángel Gabriel ñuun Nazaret ityi Galilea.

²⁷ Vatyi cucahan ra chihin noo ñaha tyivaa cha nańi María. Ta cha nyańaa cha tandaha ña chihin noo ra nańi José. Ta ra José cuan vachi ra tata rey David.

²⁸ Ta tuvı ángel cuan nu nyaá ña. Ta quichahá catyı ra chí ña:

—Nocumi chuun, María. Nihun tumańi ińi nuu Nyoo. Vatyi maa ra nyaá chuhun. Ta chí yoho nasocó xaan ca Nyoo nuu tandıhi ca ñusihı —catyı ángel cuan chí ña.

²⁹ Ta cuhva cha chíńi ña cha cahan ra, iyo xaan cuńi ña tuhun cahan ra. Ta ndıchı xińi ña: “¿Ñáá tuhun cha chahá ra ihya nocumi chí yo tyicuan caa?” ndıchı xińi ña.

³⁰ Ta catyı ángel cuan:

—Ma yuhvun, María, vatyí ñihún tumañi iñi nuu Nyoo.

³¹ Vatyí cuacohon noo sehun. Ta sacunañun Jesús chi ra.

³² Cahnu xaan ra cuacuvi ra. Ta cunañi ra Sehe Nyoo ra cuvi nuu. Ta Nyoo Sutu Mañi yo cusacuvi ra rey chi ra. Tari cuvı ra David, ra vachi ra tata.

³³ Vatyí cunyaca ñaha ra chi ñáyivi Israel tandihi maa tyembu. Ta ma ndihi maa cha cunyaca ñaha ra —catyí ángel cuan chi ña.

³⁴ Yucuan ta ndaca tuhun cu María chi ángel, ta catyí ña:

—¿Yoso caa cuahan tuhun ihya? Vatyí yuhu, ta coo ca yii.

³⁵ Ta nacahan ángel ta catyí ra:

—Maa Tatyí Ii Nyoo cuquichi sicun. Ta tunyee iñi Nyoo cahnu cuquichi tari noo vico ta casi chi sicun. Yucuan chaha ra ii cha cucacu cunañi ra Sehe Nyoo.

³⁶ Tyicuan caa tucu cu Elisabet ñáyivi chuun. Cucacu noo sehe ña vasi cha chahnu ña. Ñaha cha catyí ñáyivi vatyí ña cuvi maa coo sehe. Soco vityin cha ñohó sehe ña. Cha iñu yoo ñohó.

³⁷ Vatyí Nyoo ñahri cha ma cuvi sacuvi ra —catyí ángel chi ña.

³⁸ Ta quichaha catyí cu María:

—Yuhu cuvi musu Sutu yo Nyoo. Na sacuvi maa ra yoso cuhva catyún —catyí ña. Yucuan ta cuahan ángel cuan.

Cuahan cu María cuanyehe ña chi cu Elisabet

³⁹ Cuvı noo quivi cuan, numi xaan cuahan cu María noo ñuu ityi Judea nu maa ri maa yucu cuvı.

⁴⁰ Ta quihvi ña chichi vehe ra Zacarías. Ta chaha ña nocumi chi cu Elisabet.

⁴¹ Cuhva cha chiñi cu Elisabet tuhun cahan cu María, natyoño cha lee cha ñohó chichi ña. Ta chitu ña chihin Tatyí Ii Nyoo.

⁴² Ta chaa nacahan ña, ta catyí ña:

—Nyoo sahá ra tumañi iñi chuun cha nuu tandihi ñusihı. Ta nasocó ra chi sehun.

⁴³ ¿Ta yóó ñaha cuvi yuhu? Vatyí quichi sihi Sutu Mañi yo quichi nyehe ña nu nyai.

⁴⁴ Cuhva cha chiñi tuhun cahun, ta natyoño sehi cha ñohó chichi. Vatyí sii xaan cuvi chi ra.

⁴⁵ Ta sii xaan cuñi añimon vatyí chinó iñun cha cuacuvi tuhun cahan Nyoo chuhun —catyí cu Elisabet.

⁴⁶ Ta quichaha catyí cu María:

—Sacahnı chi Nyoo chihin tandihi añime.

⁴⁷ Ta sii xaan cuvi chii vatyí sacacú Nyoo añime.

⁴⁸ Vatyí cuvi yuhu noo ñaha ndahvi ta Nyoo tin cuenda ra chii. Ta vityin tandihi quivi cucatyí ñáyivi chii vatyí cahnu xaan tumañi iñi ñihı.

⁴⁹ Vatyí Nyoo, cahnu xaan cuvi ra. Ta cahnu cha sacuvi ra chihin. Ta ii xaan sivi ra.

⁵⁰ Ta tyicuan ri ndahvi cuñi ra chi tandihi ñáyivi cha sahá ñáyivi chi ra.

⁵¹ Cahnu xaan cha sacuvi ra chihin tunyee iñi iyó chi ra.

Sanaá ra cuhva chicá xiñi ñu cahnu sahá chi.

⁵² Sanocueé ra chi ñu sacahnú chii. Ta ra cha ña cahnu sahá chii, sacacahnú ra chi ra.

⁵³ Chahá Nyoo cha vaha chi ñu cuñi coto cha vaha,

ñu chitó vatyí chiñuhú Nyoo chi. Soco ñu tyayıi cha cuñi maa tyi ñahri chiñuhu chi, chihin nundaha nu ndıi ñu, sacuhún ra chi ñu.

⁵⁴ Tyinyee ra chi ñáyivi Israel cha cuvi musu ra.

Ta ña naá iñi ra chi ñu. Nyehé ndahvi ra chi ñu.

⁵⁵ Tari cuhva catyí Nyoo chi ra Abraham, sutu yo, ta chi sehe ra, tyicuan caa sacuvi Nyoo tyicuan ri maa —catyí cu María.

⁵⁶ Ta cu María ndoo ña chihin cu Elisabet uñi yoo. Ta cha yaha uñi yoo cuan ta cuanuhı ña nya vehe ña.

Quivi cacu ra Juan, ra cha sacondutya

⁵⁷ Ta chaa quivi cha cuacacu cha lee sehe cu Elisabet. Cacı cue ta rayıi cuvi cue.

⁵⁸ Ta cha chiñi ñáyivi cha nyicú yatyin yuvehe ña ta ñáyivi chi ña cha tyicuan caa, sii xaan cuvi chi ñu. Ta sii xaan cuñi tucu maa ña. Vatyí vaha xaan cha sacuvi Nyoo chihin ña.

⁵⁹ Ta nu cu uña quivi cha cacı cue, chahan ñu chihin cue vehe ñuhu. Vatyí cuhva cuenda ñu chi cue chi Nyoo. Ta saha ñu circuncidar chi cue tari cuhva iyó maa ñu. Chahnya ñu chiin ñıi cue nu cuvi cue rayıi. Ta cuñi ñu sacunañi ñu Zacarías chi cue tari sutu cue.

⁶⁰ Soco sihi cue catyí ña:

—Ma cuvi. Juan, cunañi cue.

⁶¹ Ta quichaha catyí ñu:

—¿Ñáá tuhun sacunañun Juan chi cue? Yori ñáyivi chi ndo cha nañi tyicuan caa —catyí ñu.

⁶² Ta quichaha ndaca tuhun ñu chihin seña ri chi sutu cue. Vatyí coto ñu ñáá sivi cuñi ra cha cunañi cue.

⁶³ Ta chican sutu cue noo vitu, ta nu vitu cuan tyaa ra tyehe caa: “Juan cuvi sivi cue”, tyaa ra.

Ta tandihi maa ñu cuan iyo xaan cuñi ñu tuhun cuan.

⁶⁴ Ta nacahan ra Zacarías caa cuhva ri cuan. Ta quichaha sacahnu ra chi Nyoo.

⁶⁵ Tandihí maa ñu iyó yatyin ri yuvehe ñu, yuhví xaan ñu tuhun ihya. Ta tandihí maa ñáyiví cha iyó yucu ityi Judea cuan nacatyí ñu chi tahan ñu tuhun ihya.

⁶⁶ Ta tandihí maa ñáyiví cha chitó tuhun cuan, ndichí xiñi ñu, ta ndaca tuhun ñu chi tahan ñu:

—¿Yóo ra cuví cha lee cuan? —catyí ñu.

Vatyí ndicha, Nyoo nasoco xaan ra chi cue.

Nu sacahnú ra Zacarías chi Nyoo

⁶⁷ Sutu cue, ra Zacarías, tyitú ra chihin Tatyí lí Nyoo. Tyicuan ta quichaha cahan ra tuhun cha chahá Nyoo chi ra, ta catyí ra:

⁶⁸ —Cahnu xaan ra cuví Sutu Mañi yo Nyoo cuenda yo ñu Israel.

Vatyí quichí ra nu nyicú yo, cha cuví yo ñáyiví chi ra.

Ta sacacu ra chi yo.

⁶⁹ Ta chaha ra noo ra cahnu chi yo, cha cusacacu chi yo.

Tata ra David ra cha sacuví tyiño nuu Nyoo vachi ra.

⁷⁰ Tyicuan caa cahan Nyoo chihin yuhu ra cacuví profeta cuenda ra ta cha naha.

⁷¹ Vatyí tyicuan caa cusacacu ra chi yo ndaha ra xaan iñi chi yo, ra cha tasi cuñi nyehé chi yo.

⁷² Tyicuan caa cundahví cuñi nyehé ra chi ñáyiví chi yo ta cha naha.

Ta ma sanaa ra iñi ra tuhun cahan ra.

⁷³ Ican ihya tuhun cahan Nyoo chihin ra Abraham sutu yo.

⁷⁴ Catyí ra vatyí cusacacu ra chi yo ndaha ra xaan iñi chi yo.

Vatyí ma yuhví ca yo sacahnú yo chi ra.

⁷⁵ Ta maa ra sanducachí ra iyó yo nuu ra.

Ta vaha coo yo nuu ra tandihí quiví cha cuacoo yo ñayiví —catyí ra Zacarías.

⁷⁶ Ta catyí ra Zacarías chi cha lee cuan tyehe caa:

—Ta yoho sehi, profeta Nyoo cahnu cucatyí ñáyiví chuun.

Vatyí cahun ityi nuu Sutu Mañi yo. ta cucahun tuhun ra chihin ñáyiví vatyí cha cuñi quichi ra.

⁷⁷ Ta cusacoton chi ñáyiví vatyí cunasaha Nyoo tucahnu iñi cuatyí ñu.

Ta tyicuan caa ta cacu añima ñu.

⁷⁸ Vatyí Sutu yo Nyoo cuñi ra chi yo. Ta cundahví cuñi ra chi yo.

Ta saquichí ra noo ra tyinyeé chi yo. Tari noo ñuhu ñanyii cucuvi ra.

⁷⁹ Vatyí chihin cha sañahá ra chi yo sacundichín ra nu nyicú yo nu ñaa iñi cha catyí cuatyí yo.

Ta cusañaha ra chi yo yoso caa quihví yo ityi vaha —catyí ra Zacarías.

⁸⁰ Ta cha luhlu cuan cuahan chahnu ra. Nyee cuñi ra chihin Tatyí lí Nyoo. Ta

chicoo ra noo chiqui ndii nyacua nya quiví cha chicohon nuu ñáyiví Israel chi ra.

2

Quiví cacu ra Jesús (Mt. 1.18-25)

¹ Ta quiví cuan iyó noo ra nyacá ñaha, nañi ra Augusto. Tachí ra tyiño natyaa ra sivi tandihí ñáyiví nicahnu ñuhu ñayiví.

² Ta quiví cuan ra Cirenio cuví ra ra nyacá ñaha tandihí ñuu ityi Siria.

³ Ta tahán chi cahun tandihí ñáyiví nya ñuu ñu. Vatyí cuhva ñu sivi ñu yucuan.

⁴ Yucuan chaha quitá ra José ñuu Nazaret ityi Galilea. Ta chahan ra ityi Judea ñuu Belén nu cacu ra David. Yucuan chahan ra vatyí tata ra David vachi ra.

⁵ Ta chahan ra chi cuhva ra sivi ra chihin cu María. Ta cha cuñi tandaha ña chihin ra. Ta ñohó sehe ña.

⁶ Ta chiquitahan chaa quiví cha cacu sehe ña cha ni ri ca cha ñohó ñu Belén cuan.

⁷ Ta yucuan cacu sehe nuu ña. Ta natyihí ña chi cue chichi sahma. Ta nandacun ña chi cue chichi noo nu chachí quiti. Vatyí cuaha xaan ñáyiví chaq coyo ñuu cuan. Ta ña nuña ca ni minoo vehe nu cunyaa ñu.

Nu cahnán ángel chihin ra sahá cumi mbee

⁸ Yatyin ñuu Belén cuan nyicú suhva ra casahá cumi mbee sana ra cha cha cuaa cuan.

⁹ Ta sana iñi ra ta tuví noo ángel Nyoo. Ta cha ndichin Nyoo Sutu Mañi yo ndundichin nicachico ri nu canyicú ra. Ta nayuhví xaan ra.

¹⁰ Ta quichaha cahnán ángel cuan, ta catyí ra tyehe caa:

—Ma yuhví ndo. Vatyí cuacatyí mai noo tuhun chi ndo. Noo tuhun cha sii xaan cuacuvi chi tandihí ñáyiví.

¹¹ Vatyí vityin cacu ra sacacú añima ndo ñuu ra David. Noo ra cuví Cristo, ra cuví Sutu Mañi yo.

¹² Ta ihya cuví seña chahi chi ndo, cunyehe ndo chi cha lee cuan, siqui noo cue sahma. Catuví cue chichi noo nu chachí quiti —catyí ángel chi ra casahá cumi mbee cuan.

¹³ Ta caa cuhva ri cuan chaq coyo cuaha xaan ca ángel casacahnú ra chi Nyoo, ta cacatyí ra:

¹⁴ Sacahnú yo chi Nyoo nu nyaá ra gloria. Ta ñáyiví iyó siqui ñuhu ñayiví cha ñihi tumañi iñi ra, na coo taxi añima ñu, catyí angel cuan.

¹⁵ Yucuan ta cuanuhi coyo ángel cuan gloria. Tyicuan ta ra casahá cumi mbee quichaha catyí ra chi ra tahan ra:

—Coho ndo Belén. Cunyehe yo ñáa cha cuví. Vatyí maa Sutu yo Nyoo sacotó chi yo.

¹⁶ Tyicuan ta numi xaan cuahan coyo ra Belén. Ta nañihí ra chi cue chihin cu María ta ra José. Ta catuví cue noo nu chachí quiti.

¹⁷ Ta yahá cha canyehe ra chi cue, ta canacatyj ra chi ñu ñáá ndihí tuhun cahán ángel chihin ra cuenda cha lee cuan.

¹⁸ Ta tandihí ñu chihíj tuhun cahán ra, iyo xaan cuñí ñu.

¹⁹ Soco cu María ta cuhva chicá ri xiñi ña tuhun cuan.

²⁰ Ta ra sahá cumi chi mbee cuan cuanuhú coyo ra. Ta casacahnú ra chi Nyoo cha cuenda cha cachihíj ra ta canyehe ra. Vatyí chinq cava tandihí cha catyj ángel chi ra.

Nu cuacuhva cuenda ñu chi ra Jesús chi Nyoo vehe ñuhu cahnu

²¹ Ta nu cu uña quivi, sahá ñu circuncidar chí cue, tari cuhva tuhva maa ñu. Ta sacunañij ñu chí cue, Jesús. Suri maa sivi cha catyj ángel chí cu María quivi cha cumañi ca cohon sehe ña.

²² Ta cha yahá quivi cha tahán chí vatyí ndundú ñu nuu Nyoo, tari cuhva catyj maa ley Nyoo cha tyaa ra Moisés, tyicuan ta cuahan ñu Jerusalén. Vatyí cuacuhva cuenda ñu chí cue chí Nyoo.

²³ Sacuvij ñu tyicuan caa vatyí ñin caa maa catyj ley tyehé caa: “Tandihí rayi chí cuví sehe nuu ñu, cucuhva cuenda ñu chí Nyoo”, catyj ley cuan.

²⁴ Ta chahán ñu chichuhva cuenda ñu uvi tahan quiti tari cuhva catyj maa ley Sutu yo Nyoo nu catyj chí tyehé caa: “Cuhva ndo uvi tahan cucu o uvi tahan ndicuiya”, catyj ley cuan.

²⁵ Ta quivi cuan iyó noo ra ñuu Jerusalén cha nañi Simeón. Ta cuví ra noo ra vaha, ra sacahnú chí Nyoo. Ta nyatú tuhva ra nya quivi cusacacu Nyoo chí ñáyivi Israel. Ta yihí ra Tatyí Ii Nyoo.

²⁶ Ta sacotó Tatyí Ii Nyoo chí ra vatyí ma cuví ra cha ni ri ca cha ta nyehe ca ra chí ra sacacú chí ñu Israel, ra cuví Cristo, ra cha cusaquichí Sutu yo Nyoo.

²⁷ Ta ra cuan chahán ra vehe ñuhu cuhva catyj maa Tatyí Ii Nyoo chí ra. Cuhva cuan chahán tucu sutu ta síhi cha lee cuan chinyaca ñu chí cue vehe ñuhu cahnu, vatyí sacuvi ñu tari cuhva catyj maa ley.

²⁸ Ta quehen ra Simeón chí ra Jesús. Ta tyihij sucun ndaha ra chí ra. Ta quichahá sacahnú ra chí Nyoo. Ta catyj ra:

²⁹ —Sutu Mañi yuhu. Na cuví mai vityin chihin cha vaha.

Vatyí cha sacuvun cha catyvun chí yuhu cha cuví sehun.

³⁰ Vatyí cha nyehij chihin nui chí ra cusacacu chí ndi.

³¹ Vatyí sañahun chí ra nuu tandihí ñáyivi.

³² Cha catyj ra ta cucahnú ñáyivi Israel nuu inga ñáyivi.

Ta ican ra cuví ra cha sacundichín añima tandihí inga ñáyivi cha ñima ñu Israel cuví. Vatyí cusacuvi ra na cutuñi iñi ñu tuhun Nyoo —catyj ra Simeón.

³³ Ta ra José chihin síhi ra Jesús, iyo xaan cuñij ñu cha cahán ra Simeón tuhun cha lee cuan.

³⁴ Yucuan ta chican tahvi ra Simeón chí Nyoo chaha ñu. Ta catyj ra chí cu María síhi ra Jesús:

—Nyehe chí cha lee ihya. Vatyí cuaha xaan ñáyivi cuchino iñi ñu chí ra quivi coto ñu tuhun ra, ta cucacu añima ñu. Soco cuaha ñu ma chino iñi ñu chí ra, ta cunaa ñu. Ta cuahan ñu chí ra.

³⁵ Ta cha tyicuan caa cusanutuvi ra cha caa añima noo noo ñáyivi. Soco cha cuenda yoho, María. tari cha uhvi cha yahá sava noo tyicaa añima ñáyivi, tyicuan caa cha uhvi cunyhún cha catyj cha lee ihya —catyj ra Simeón.

³⁶ Ta yucuan ñohó tucu noo ñaha cha cuví profeta Nyoo. Ta cha chahnú xaan ña. Nañi ña Ana. Ta sehe ra Faniel noo ra vachi tata ra Aser cuví chí ña. Luhlu xaan ña ta tandaha ña, ta ucha ri cuiya chiyó ña chihin yi ña ta chihij ri ra.

³⁷ Ta cha cumi xico cumi cuiya chihij yi ña. Ta vehe ñuhu cahnu ña quita ña, vatyí ndiyaca ta ñiyaca chican tahvi ña chí Nyoo. Ta iyó cuhva cha ña chachij ña cha ni ri ca cha chican tahvi ña.

³⁸ Ta cuhva cha ñohó ra José ta cu María chihin cha lee, chaq ña nu canyicú ñu. Ta nacuhvá ña tyahvi nyoo chí Nyoo. Ta quichahá cahan ña tuhun ra Jesús chihin tandihí ñáyivi cha nyatú tuhva cha quita ñuu Jerusalén chichi ndaha ra ñuu Roma.

Nu cuanuhu ñu nya Nazaret

³⁹ Cha yahá cha sacuvi ñu tandihí maa yoso caa catyj ley Sutu yo Nyoo, ta cuanuhu ñu nya Galilea nya ñuu ñu nu nañi Nazaret.

⁴⁰ Ta ra Jesús cuahan chahnú ca ra. Ta cuahan ndunyee ca ra ta cuahan chicoo ca cha chihí tuñi Nyoo. Vatyí nasoco Nyoo chí ra.

Nu ñohó ra Jesús chichi vehe ñuhu

⁴¹ Ra José chihin síhi ra Jesús ndihí cuiya ri tuhva ñu chahán nya Jerusalén cha vico pascua.

⁴² Ta quivi ndihij ra Jesús uchi uvi cuiya, chahán tandihí ñu Jerusalén tari tuhvá maa ñu chahán cha vico.

⁴³ Ta quivi ndihij vico ta cuandichí ñu, ta ra Jesús ndoo ra Jerusalén. Ta ña sahá ñu cuenda.

⁴⁴ Cuñi maa ñu vatyí cuandichí ra mahñu nu tuvi ñáyivi cuan. Yucuan chaha ñahri chicá iñi ñu chicá ityi ñu noo quivi. Tyicuan

ta nanducú ñu chi ra chichi nu tuvi ñáyivi cuan,

⁴⁵ ta ña nañihí ñu chi ra. Tyicuan ta cuanuhu chatá ñu cuananducu ñu chi ra nya Jerusalén.

⁴⁶ Cha yahá cha uñi quivi ta nañihí ñu chi ra chichi vehe ñuhu cahnu cuan. Nyaá ra chihin ra sacuahá cuenda ley vehe ñuhu. Ta tyasohó ra cuan tuhun cahán ra. Ta ndacá tuhun ra tuhun chi ra.

⁴⁷ Ta tandihí ñu chiñí tuhun cahán ra, iyo xaan cuñí ñu chihin cha chiñí tuñi ra, ta chihin tuhun cha nacahán ra.

⁴⁸ Cuhva cha nanyehé sutu ra ta sihi ra chi ra, iyo xaan cuñí ñu. Ta sihi ra catyí ña chi ra:

—Sehe luhli. ¿Ñáá tuhun cha sacuvun chi ndi tyehe caa? Sutun ta yuhu chicá xaan iñi ndi ta nanducú xaan ndi chuun —catyí ña.

⁴⁹ Tyicuan ta catyí ra Jesús:

—¿Ñáá tuhun cha nanducu ndo chii? ¿Atu ña chitó ndo vatyí niñi cuñí chi cha cahin tuhun Suti chihin ñáyivi? —catyí ra.

⁵⁰ Soco ña cutuñí iñi ñu tuhun cahán ra.

⁵¹ Tyicuan ta cuanuhu ra chihin ñu nya Nazaret. Ta quichahá ra tuhun cahán ñu. Ta sihi ra naquehen vaha ña tandihí tuhun ihya chichi añima ña.

⁵² Yucuan cuví nu cuacuahnu ca ra Jesús. Ta cuahan chaa ca cha chiñi tuñi xiñi ra. Ta sihi xaan cuví chi Nyoo chihin ra ta ñáyivi ñandihí.

3

Ra Juan, ra sacondutya, cahán ra tuhun Nyoo nuu ñáyivi

(Mt. 3.1-12; Mr. 1.1-8; Jn. 1.19-28)

¹ Nu ndihí chahun cuiya cha cuví ra Tiberio rey cahnu ñuu Roma, ta ityi Judea nyacá ñaha ra Poncio Pilato. Ta ra Herodes nyacá ñaha ra Galilea. Ta yañi ra, ra Felipe nyacá ñaha ra Iturea chihin Traconite. Ta ra Lisaniás nyacá ñaha ra Abilinia quivi cuan.

² Ta ra Anás chihin ra Caifás, ican ra cuví ra ra cacuví nuu chi tandihí tata sutu. Ta quivi cuan cahán Nyoo chihin ra Juan sehe ra Zacarías noo nu chiqui ndii.

³ Ta ra Juan chicá noo ra tandihí ñuu cha nyaá yatyn ri nu nyaá noo yuvi cahnu cha nañi Jordán cahán ra tuhun Nyoo chihin ñáyivi. Ta catyí ra chi ñu na ndu uvi iñi ñu cuatyí ñu ta na condutya ñu. Tyicuan caa ta Nyoo saha ra tucahnu iñi chi ñu, catyí ra.

⁴ Tyehe caa cuví tari cuhva catyí nu libru cha tyaa ra Isaías profeta Nyoo ta cha naha. Ta catyí ra:

Chiñí yo cha caná chaa noo ra noo nu chiqui ndii, ta catyí ra:

“Tari sanduvahá ndo noo ityi, tyicuan caa sanduvaha ndo añima ndo vatyí cuaquichi Sutu Mañi yo.

Nuñá ndo noo ityi ndoo chi ra na quihvi ra añima ndo.

⁵ Tari cha sanandutú ndo noo ticoho, ta tari sandundoá ndo noo yucu cahnu, ta tari sandundoó ndo cha yacua, ta tari sanduvii ndo nu quifi caa, tyicuan caa nasama ndo cuhva iyó ndo.

⁶ Tyicuan caa ta tandihí ñáyivi ta nyehe ñu vatyí Nyoo chaha ra cha cacú añima ñu.”

⁷ Ta tyicuan caa cahán ra Juan chihin ñáyivi. Yucuan ta cuhva cha chiñí ñu tuhun cahán ra, ta catyí ñu chi ra vatyí na sacondutya ra chi ñu. Yucuan ta quichaha catyí ra chi ñu:

—¡Nyoho tari noo tata coo xaan cuví ndo! ¿Yóo cha sañaha chi ndo vatyí chihin cha condutya ri ndo ta ma tachi tuñi ca Nyoo chi ndo?

⁸ Nasama ndo cuhva iyó ndo, na nyehe ñáyivi vatyí cha ndu uvi iñi ndo cuatyí ndo. Ta ma catyí ndo vatyí tata ra Abraham vachi ndo. Vatyí nyacua nya noo yuu ihya, Nyoo cuví sananduvi ra noo ñáyivi chi ra Abraham.

⁹ Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñí Nyoo. Ta yutun cha ña chaha chiti, cahnya ñáyivi chi tun. Ta cahmi ñu chi tun. Tyicuan caa tucu nyoho cha cuñi cuirí cuhun ndo nu cayu ñuhu —catyí ra Juan.

¹⁰ Yucuan ta quichaha ndaca tuhun ñáyivi chi ra:

—¿Yoso caa sacuvi ndi, cuñi yoho? —catyí ñu.

¹¹ Ta nacahan ra Juan, ta catyí ra:

—Yóo ra cha iyó uvi tahan camisa, tahan chi cuhva ra noo chi ra cha ñahri chi. Ta yóo ñu cha iyó cha cachí, tahan chi cuhva ñu cha cachí ñu ñahri chi —catyí ra.

¹² Ta chaq coyo tucu suhva ra catavá xuhun cuenda gobiernu Roma, ta cuñi ra condutya ra. Ta candacá tuhun ra chi ra Juan:

—Maestro, ¿yoso caa sacuvi tucu nyuhu? —catyí ra.

¹³ Ta catyí ra Juan chi ra:

—Tari cuhva catyí ley tava ndo xuhun. Ta ma tava ndo cuaha ca.

¹⁴ Yucuan ta quichaha candacá tuhun tucu suhva sindaro chi ra, ta catyí ra:

—Ta nyuhu tucu, ¿yoso caa sacuvi ndi? —catyí ra.

Ta nacahan ra Juan ta catyí ra:

—Ma tinyaa ca ndo cha chi ñáyivi. Ta ma tyanaha ndo chi ñu. Ma tyaa ndo cuatyí siqui ñu tatu ñahri cuatyí ñu. Ta ndoo ndo vaha yoso cuhva yahvi ndo —catyí ra Juan.

¹⁵ Iyo cuñí ñáyivi tuhun cahán ra Juan. Ta cuñí ñu tyi ican ra cuví Cristo, ra cha sacacú chi yo.

¹⁶ Soco ra Juan catyí ra chi tandihí ñu: —Cha ndicha vatyi sacondutyé chi ndo chihin ndutya. Soco cha yaha yuhu cuhin cuquichi inga ra cusacondutya chi ndo chihin Tatyí li Nyoo ta chihin ñuhu. Iyó ca tunyee iñi chi maa ra, ta ñima ca yuhu. Vatyi ña nañé cha cuví musu ra ta ñiri cha ndachi ñi xityin ndichan ra.

¹⁷ Tari noo ra cha cuanaquehen vaha niñi, ta natyihí vaha ra chichi yaca. Ta cahmi ra mihin. Tyicuan caa cuví maa Sutu Mañi yo chihin yo. Tatu chinó iñi yo chi ra, cunaquehen vaha ra chi yo, ta cunyicu yo chihin ra. Soco tatu ña chinó iñi yo chi ra cutyihí ra chi yo anyaya nu cayu ñuhu cha ma ndahva ca maa —catyí ra Juan.

¹⁸ Ta tyehe caa cahán ra Juan chihin ñu. Ta cuaha xaan ca tuhun cahan ra nuu ñu tyi cuaquichi Sehe Nyoo ta cua sacacu ra chi yo.

¹⁹ Ta cahán ra Juan chi ra Herodes cha cuenda tandihí cuii cha ña vaha nyacuví ra. Vatyi naquehen ra chi cu Herodías, ñasihi ra Felipe yañi ra. Ta cuaha ca cha ña vaha nyacuví ra.

²⁰ Soco ra Herodes tahán chi cha tyasoho ra tuhun ihya soco ña cuñí ra. Nu ndihí tuhun tyihí ndihí ra chi ra Juan vehe caa.

Quivi cua condutya ra Jesucristo (Mt. 3.13-17; Mr. 1.9-11)

²¹ Cumañi ca cha cohon ra Juan vehe caa sacondutya ra chi tandihí ñáyivi. Ta sacondutya tucu ra chi ra Jesús. Ta cha ni ri ca cha chicán tahvi ra Jesús chi Nyoo ta nuña andivi.

²² Ta nyehe ra Tatyí li Nyoo quichí siqui ra tari noo paloma. Ta tyacu noo ndusu andivi cha catyí tyehe caa:

—Yoho cuvún Sehi cha cuñí. Ta si xaan cuñí chuhun —catyí ndusu cuan.

Ñáyivi vachi ra Jesucristo tata (Mt. 1.1-17)

²³ Oco uchi cuiya ra Jesús ta quichaha saha tyiño ra tyiño Nyoo. Ta tandihí ñáyivi cuñí maa ñu vatyi sehe ra José cuví chi ra. Ta ra José, sehe ra Eli cuví chi ra.

²⁴ Ta ra Eli, sehe ra Matat cuví chi ra. Ta ra Matat, sehe ra Leví cuví chi ra. Ta ra Leví, sehe ra Melqui cuví chi ra. Ta ra Melqui, sehe ra Jana cuví chi ra. Ta ra Jana, sehe ra José cuví chi ra.

²⁵ Ta ra José, sehe ra Matatías cuví chi ra. Ta ra Matatías, sehe ra Amós cuví chi ra. Ta ra Amós sehe ra Nahum cuví chi ra. Ta ra Nahum, sehe ra Esli cuví chi ra. Ta ra Esli, sehe ra Nagai cuví chi ra.

²⁶ Ta ra Nagai, sehe ra Maat cuví chi ra. Ta ra Maat, sehe ra Matatías cuví chi ra. Ta ra

Matatías sehe ra Semei cuví chi ra. Ta ra Semei, sehe ra José cuví chi ra. Ta ra José, sehe ra Judá cuví chi ra.

²⁷ Ta ra Judá, sehe ra Joana cuví chi ra. Ta ra Joana sehe ra Resa cuví chi ra. Ta ra Resa, sehe ra Zorobabel cuví chi ra. Ta ra Zorobabel, sehe ra Salatiel cuví chi ra. Ta ra Salatiel, sehe ra Neri cuví chi ra.

²⁸ Ta ra Neri, sehe ra Melqui cuví chi ra. Ta ra Melqui, sehe ra Adi cuví chi ra. Ta ra Adi, sehe ra Cosam cuví chi ra. Ta ra Cosam, sehe ra Elmodam cuví chi ra. Ta ra Elmodam, sehe ra Er cuví chi ra.

²⁹ Ta ra Er, sehe ra Josué, cuví chi ra. Ta ra Josué, sehe ra Eliezer cuví chi ra. Ta ra Eliezer, sehe ra Jorim cuví chi ra. Ta ra Jorim, sehe ra Matat cuví chi ra.

³⁰ Ta ra Matat, sehe ra Leví cuví chi ra. Ta ra Leví, sehe ra Simeón cuví chi ra. Ta ra Simeón, sehe ra Judá cuví chi ra. Ta ra Judá, sehe ra José cuví chi ra. Ta ra José sehe ra Jonán cuví chi ra. Ta ra Jonán, sehe ra Eliaquim cuví chi ra.

³¹ Ta ra Eliaquim, sehe ra Melea, cuví chi ra. Ta ra Melea, sehe ra Mainán cuví chi ra. Ta ra Mainán, sehe ra Matata cuví chi ra. Ta ra Matata, sehe ra Natán cuví chi ra.

³² Ta ra Natán, sehe ra David, cuví chi ra. Ta ra David, sehe ra Isaí cuví chi ra. Ta ra Isaí, sehe ra Obed cuví chi ra. Ta ra Obed, sehe ra Booz cuví chi ra. Ta ra Booz, sehe ra Salmón cuví chi ra. Ta ra Salmón, sehe ra Naasón cuví chi ra.

³³ Ta ra Naasón, sehe ra Aminadab cuví chi ra. Ta ra Aminadab, sehe ra Aram cuví chi ra. Ta ra Aram, sehe ra Esrom cuví chi ra. Ta ra Esrom, sehe ra Fares cuví chi ra. Ta ra Fares, sehe ra Judá cuví chi ra.

³⁴ Ta ra Judá, sehe ra Jacob cuví chi ra. Ta ra Jacob, sehe ra Isaac cuví chi ra. Ta ra Isaac, sehe ra Abraham cuví chi ra. Ta ra Abraham sehe ra Taré cuví chi ra. Ta ra Taré, sehe ra Nacor cuví chi ra.

³⁵ Ta ra Nacor, sehe ra Serug cuví chi ra. Ta ra Serug, sehe ra Ragau cuví chi ra. Ta ra Ragau, sehe ra Peleg cuví chi ra. Ta ra Peleg, sehe ra Heber cuví chi ra. Ta ra Heber, sehe ra Sala cuví chi ra.

³⁶ Ta ra Sala, sehe ra Cainán cuví chi ra. Ta ra Cainán, sehe ra Arfaxad cuví chi ra. Ta ra Arfaxad, sehe ra Sem cuví chi ra. Ta ra Sem, sehe ra Noé cuví chi ra. Ta ra Noé, sehe ra Lamec cuví chi ra.

³⁷ Ta ra Lamec, sehe ra Matusalén cuví chi ra. Ta ra Matusalén sehe ra Enoc cuví chi ra. Ta ra Enoc, sehe ra Jared cuví chi ra. Ta ra Jared, sehe ra Mahalaleel cuví chi ra. Ta ra Mahalaleel, sehe ra Cainán cuví chi ra.

³⁸ Ta ra Cainán, sehe ra Enós cuví chi ra. Ta ra Enós, sehe ra Set cuví chi ra. Ta ra Set,

sehe ra Adán cuví chi ra. Ta ra Adán, sehe Nyoo cuví chi ra.

4

Nu nducú nyehe cuihna chi ra Jesús
(Mt. 4.1-11; Mr. 1.12-13)

¹ Ta chítú ra Jesús chihin Tatyí Ii Nyoo cha yahá condutya ra. Yucuan ta quita ra nu cuví yuvi cahnu Jordán ta cuanuhu ra. Ta Tatyí Ii Nyoo chinyaca chi ra noo nu chiquí ndii.

² Yucuan chinyaa ra uvi xico quívi. Ta nducú nyehe cuihna chi ra. Ña chachí maa ra quívi cuan. Yahá cuan ta quichaha chisoco ra.

³ Yucuan ta quichaha catyí cuihna chi ra: —Tatu ndicha cha Sehe Nyoo cuví chuun, catyí chi yuu cha catuví ihya, na nanduvi pan.

⁴ Ta ra Jesús nacahan ra, ta catyí ra: —Catyí tuhun Nyoo tyi ñima chihin cha cachi ri ñáyivi ta conyito ñu. Soco conyitó tucu añaima ñu chihin tandihi tuhun cahán Nyoo —catyí ra Jesús chi cuihna.

⁵ Yucuan ta quehen cuihna chi ra Jesús. Ta cuahan ra chihin ra noo nu sucun ca. Ta numi ri sañahá ra tandihi nu nyacá ñaha ñáyivi siquí ñuhu ñáyivi.

⁶ Ta cuihna catyí ra chi ra Jesús: —Ndaha yuhu nyaá tandihi ñáyivi ihya. Vatyí chahá Nyoo cha cunyaca ñahi tandihi ihya siquí ñuhu ñáyivi. Ta cuví cuhve yóó chí cuñí mai cuhve.

⁷ Cuhve tandihi ñáyivi cuan chuun tatu yoho ta cuiñi chitun nui, ta sacahnun chii —catyí cuihna cuan chi ra Jesús.

⁸ Soco ra Jesús catyí ra chi cuihna: —Canyaha chuun nui, cuihna. Vatyí nyaá tuhun cahán Nyoo ta catyí chi tyehe caa: “Noo ri chi maa Nyoo sacahnun yo. Ta ñin ri chi maa ra quichaha yo.”

⁹ Yahá cuan ta quehen tucu cuihna cuan chi ra Jesús. Ta chinyaca ra chi ra nya ñuu Jerusalén. Ta sandaa ra chi ra xiñi vehe ñuhu cahnu. Ta quichaha catyí ra chi ra Jesús:

—Tatu ndicha cha Sehe Nyoo cuví chuun, sandupehla nyacua nya nu ñuhú.

¹⁰ Vatyí nyaá nu catyí chi nu tutu Nyoo tyehe caa:

Nyoo cusaquichi ra ángel, quichi saha cuenda chuun.

¹¹ Cunaquehen ra chuun chihin ndaha ra. Ta ma cuhva ra cha taxin chahun chihin yuu —catyí ra chi ra.

¹² Tyicuan ta nacahan ra Jesús, ta catyí ra: —Soco catyí tucu nu tutu Nyoo tyehe caa: “Ma nducu nyehun chí Sutu Mañi yo Nyoo”, —catyí ra.

¹³ Ta cuihna ña cuví sandahvi ñaha ra chi ra Jesús. Ta cuahan ra suhva quívi.

Nu quichahá ra Jesús cahan ra tuhun Nyoo chihin ñáyivi
(Mt. 4.12-17; Mr. 1.14-15)

¹⁴ Cha yahá tuhun cuan, ta nachaa ra ityi Galilea. Ta tyitú ra yihí chihin tunyee iñi Tatyí Ii Nyoo. Ta cahán ñáyivi tuhun ra tandihi ri ityi.

¹⁵ Ta sañahá ra chi ñáyivi nu cuví vehe ñuhu tandihi ri ñuu. Ta tandihi ñu sacahnú ñu chi ra.

Nu nyaá ra Jesús Nazaret ñuu nu chahnú ra
(Mt. 13.53-58; Mr. 6.1-6)

¹⁶ Tyicuan ta nachaa ra Jesús nya Nazaret, ñuu nu chahnú ra. Ta noo quívi nyitatú ñáyivi, ta quihvi ra chichi vehe ñuhu, tari tuhva maa ra. Ta chicunanyaa ra vatyí cua sacuahá ra tuhun Nyoo.

¹⁷ Ta chahá ñu noo libru Nyoo chi ra cha tyaá ra Isaías ra profeta Nyoo ta cha naha.

Ta cuhva cha nuñá ra, nañihí ra noo nu catyí tyehe caa. Ta quichahá sacuahá ra: ¹⁸ Nyaá Tatyí Ii Nyoo chihin vatyí maa ra tachí chii.

Vatyí nacachí ra chii vatyí sañahi tuhun vaha ra chi tandihi ñáyivi ndahvi. Tachí ra chii vatyí sanduvahi chí ñu uhvi añaima.

Tachí ra chii vatyí sacote tuhun ra chí ñu nyaá ndaha ra ña vaha, vatyí cusacacu Nyoo chí ñu.

Tachí ra chii vatyí sanyehi chí ñáyivi cuaa. Ta sacote chí ñu nyehe tindoho vatyí cucacu ñu.

¹⁹ Ta sacote chí ñu vatyí cha chaa quívi cha chahá Nyoo tumañi iñi chí ñu.

²⁰ Ndiñi sacuahá ra ta nacasi ra nu libru cuan. Ta nacuhva ra chí noo ra cha nyaá vehe ñuhu cuan. Ta chicunyyaa ra. Yucuan ta tandihi ñáyivi cha nyicú cuan ndoo ñu nyehe ñu chí ra.

²¹ Yucuan ta quichaha catyí ra chí ñu: —Vityin quívi ihya chinqo cava tuhun cha nyaá nu libru cha sacuahí nuu ndo —catyí ra Jesús chí ñu.

²² Tandihí ñu, vaha cahán ñu tuhun ra Jesús. Ta iyo cuñi ñu tuhun cha cahán ra vatyí vaha xaan cha cahán ra. Ta quichaha ndaca tuhun ñu chí tahan ñu:

—¿Atu ñima ra ihya cuví sehe ra José?

²³ Ta quichaha catyí ra Jesús chí ñu:

—Chité cha nacacá iñi ndo. Vatyí tyehe caa cua catyí ndo chí: “Tatu ra sanduvahá cuvún, sanduvaha xihna ca chí maun. Tandihí cha chíñi ndi cha sacuvun ñuu Capernaum. Sacuvi tucu ñuu maun vityin.”

²⁴ Ta catyí tucu ra Jesús:

—Cha ndicha vatyí ni noo ra profeta Nyoo, ta ña quichaha ñáyivi ñuu ra chí ra.

²⁵ Ta cha ndicha catyí chí ndo vatyí cuaha xaan ñu chihí yí chiyó Israel ihya cuiya cha chicá noo ra Elías. Ta cuiya cuan

ña coḡn savi uñi cuiya sisava. Ta cuaha xaan tama chiyo.

²⁶ Soco ña tachĭ Nyoo chi ra Elías vatyĭ tyinyee ra chi ni noo ñu chihĭ yĭ Israel cuan. Soco tachĭ Nyoo chi ra nu nyaá noo ñaha chihĭ yĭ ñuu Sarepta cha nyaá yatyin ñuu Sidón.

²⁷ Ta tyicuan caa tucu cuaha ra yihĭ cuehe cha tyahyu coño chi chiyo Israel quivi chicá noo ra Eliseo, profeta Nyoo. Soco ña nduvahá ni noo ra Israel cuiya cuan. Minoo ri ra Naamán ra ñuu Siria nduvahá —catyĭ ra Jesús.

²⁸ Ta cha chiñĭ ñáyivi nyicú vehe ñuhu cuan tuhun cuan, cuxaan xaan tandihĭ cuiĭ ñu.

²⁹ Ta nducuita ñu. Ta tĭn ñu chi ra Jesús. Tava ñu chi ra xiñi noo yucu nya yuhu ñuu, vatyĭ tuchi ñu chi ra yucuan.

³⁰ Soco ra Jesús yahá ri ra mahñu ñu ta cuahan ra.

Noo ra cha yihĭ tatyĭ ña vaha chi
(Mr. 1.21-28)

³¹ Ta cuahan ra Jesús Capernaum cha nya Galilea quivi nyitatu ñáyivi. Ta quichaha sañaha ra chi ñáyivi.

³² Ta iyo cuñĭ ñu tuhun cahán ra. Vatyĭ ñihi cahán ra tari noo ra iyó vaha ityĭ chi cha cahán.

³³ Ta chichi vehe ñuhu cuan nyaá noo ra cha yihĭ tatyĭ ña vaha chi. Ta quichaha canachaa ra, ta catyĭ ra:

³⁴ —Saña chi ndi, yoho Jesús ra ñuu Nazaret. ¿Ñáá tuhun cha tyihun chuun chihin ndi? ¿Atu vachi sanaun chi ndi? Yuhu, ñohó nui chuun. Ta chité vatyĭ Sehe Nyoo cuvĭ chuun —catyĭ tatyĭ ña vaha cuan sacahan chi chi ra cuan.

³⁵ Ta cahan ra Jesús chihin tatyĭ ña vaha cuan, ta catyĭ ra:

—Taxi ri. Saña chi ra ndahvi chiña —catyĭ ra.

Tyicuan ta tatyĭ ña vaha cuan sanduva chi ra cuan nu ñuhú. Ta quita tatyĭ cuan chi ra ta cuahan. Ta ñahri ca sacuvi chi chi ra ndahvi cuan.

³⁶ Tandihĭ ñáyivi nayuhvĭ ñu. Ta quichaha catyĭ ñu chi tahan ñu:

—¿Ñáá tuhun cuvĭ ihya? Ra Jesús ihya chihin cha iyó ityĭ chi ra ta chihin tunyee iñi ta tachi ra chi tatyĭ ña vaha cuan na quita. Ta quichaha chi nu cahán ra —catyĭ ñu.

³⁷ Ta tandihĭ ri ityĭ cahán ñáyivi tuhun ra Jesús.

Nu sanduvahá ra Jesús chi maha tyiso ra Simón Pedro
(Mt. 8.14-15; Mr. 1.29-31)

³⁸ Ta quita ra Jesús chichi vehe ñuhu cuan. Ta chaá ra vehe ra Simón. Ta tyiso ra

Simón cuvĭ ña chihin cahñi. Ta quichaha cahán ñu chihin ra Jesús cha cuenda ña.

³⁹ Ta nanyehe noo ra nu catuvĭ ña. Ta quichaha catyĭ ra chi cahñi cuan vatyĭ na quita. Ta caa cuhva ri cuan ta quita cahñi cuan chi ña. Ta nducuita ri ña. Ta quichaha tyiñuhu ña chi ra.

Cuaha xaan ñu cuvĭ sanduvahá ra Jesús
(Mt. 8.16-17; Mr. 1.32-34)

⁴⁰ Ta cuhva cha quee ñanyĭ, tandihĭ maa ñu cha cumĭ chi ñu cuvĭ tandihĭ nuu cuehe, chinyacá ñu chi ra Jesús. Ta tyiso ra ndaha ra siqui noo noo ñu. Ta tyicuan caa ta sanduvahá ra chi ñu.

⁴¹ Ta chichĭ cha tandihĭ ñu yihĭ ñu cha yihĭ tatyĭ ña vaha chi, ta quita chi. Ta suri cana chaa chi cuahan coyo chi, ta catyĭ chi:

—Yoho Sehe Nyoo cuvĭ chuun —catyĭ chi.

Soco ña chaá ca ra Jesús cha cahan chi. Vatyĭ chitó chi vatyĭ ra Cristo, ra cha saquichĭ Nyoo cuvĭ ra.

Nu cahán ra Jesús tuhun Nyoo nuu tandihĭ cuiĭ ñáyivi ñuu cha iyó Galilea
(Mr. 1.35-39)

⁴² Cundichin cuan ta quita ra Jesús ñuu cuan. Ta cuahan ra noo nu taxi ri iyó. Soco ñáyivi nanducú ñu chi ra. Ta chaá ñu nya nu ñohó ra. Ta ña cuñĭ ñu cha cuhun ra.

⁴³ Soco catyĭ ra Jesús chi ñu:

—Cumañi sacote chi ñáyivi inga ñuu tuhun vaha yoso caa nyacá ñaha Nyoo aña ñu. Vatyĭ yucuan chaha vachi siqui ñuhu ñáyivi.

⁴⁴ Ta tyicuan caa chicá noo ra Jesús cahán ra tuhun Nyoo vehe ñuhu ityĭ Galilea.

5

Nu chaá ra Jesús noo nyatu cha ñihi ra cuaha xaan tiyaca
(Mt. 4.18-22; Mr. 1.16-20)

¹ Noo quivi nyaá ra Jesús yuhu miñi nu cuvĭ Genesaret. Ta chaá coyo cuaha xaan ñáyivi, vatyĭ cuñĭ ñu cuiñi ñu tuhun Nyoo. Ta tĭhin xaan ñohó ra Jesús mahñu ñu.

² Ta nanyehé ra uvi tahan canoa yatyin ri yuhu miñi cuan. Yori ñohó chichi. Vatyĭ cha quita coyo ra catĭn tiyaca cuan. Ta cha quichaha canacatya ra yuhva ra.

³ Yucuan ta quihvĭ ra Jesús chichi noo canoa cuan. Ta canoa cuan chi ra Simón cuvĭ. Ta catyĭ ra chi ra vatyĭ na tyandaha ra suhva ca cuhun nya mahñu ca cuan. Tyicuan ta chicunyaá ra Jesús chichi canoa cuan. Ta quichaha sañaha ra chi ñáyivi.

⁴ Cuhva cha ndihĭ cahan ra, catyĭ ra chi ra Simón:

—Sacuhun canoa nya nu cama ca ndutyá cuan. Ta tuchi ndo yuhva vatyĭ tĭn ndo tiyaca —catyĭ ra Jesús chi ra.

⁵ Ta nacahan ra Simón ta catyĭ ra:

—Maestro, cha saha tyiño xaan ndi ñiyaca maa ta ni noo tiyaca ña ñihí ndi. Soco tatu maun catyi, cuatuchi tucu ndi yuhva —catyi ra Simón.

⁶ Cuhva cha cacañi ra yuhva cuan, cuaha xaan tiyaca ñihí ra. Ta nyacua tahnya yuhva ra chihin cha vee ti.

⁷ Tyicuan ta cachaha ra seña chi ra tahan ra, ra cha canyicú chichi inga canoa cuan, na quichi coyo ra ta tyinyee ra chi ra. Yucuan ta chaq coyo ra cuan. Ta casacutu ra ninduvi canoa cuan chihin tiyaca. Ta nyacua cuñi nyee canoa cuan cha tyitu yihi tiyaca.

⁸ Cha nanyehé ra Simón Pedro cha tyicuan caa, ta chicuñi chiti ra nuu ra Jesús. Ta catyi ra chi ra:

—Cuachiyo chuun nui, Sutu Mañi yuhu, vatyi yuhu ra iyó cuatyí cuví —catyi ra.

⁹ Vatyí ra Simón iyo xaan cuñi ra chihin tandihi ra canyicu chihin ra. Vatyí cuaha xaan tiyaca catiñ ra.

¹⁰ Tyicuan caa tucu ra tahan ra Simón: ra Jacobo chihin ra Juan, sehe ra Zebedeo, iyo xaan cacuñi ra. Ta catyi ra Jesús chi ra Simón:

—Ma iyo xaan cuñun. Vatyí vityin ta nu cuahan ca chi quivi, ma tiin con tiyaca. Soco cunducun ñáyivi, tavon chi ñu nu quiñi caa na quihvi ñu cuenda Nyoo —catyi ra Jesús chi ra Simón.

¹¹ Yucuan ta casacunuhu ra canoa nya ñuhu ityi. Ta casandoq ra tandihi cha iyó chi ra nyacua nya tiyaca cha tiñ ra. Ta cuahan ra chihin ra Jesús.

Nu sanduvahaq ra Jesús chi noo ra tyahyu coño
(Mt. 8.1-4; Mr. 1.40-45)

¹² Noo quivi ñohó ra Jesús noo ñuu nu iyo noo ra cuhvi. Ta tyahyu xaan coño ra. Ta cha nanyehé ra chi ra Jesús, ta chicuñi chiti ra nuu ra. Ta nacañinoo ra xiñi ra nya nu ñuhu. Ta chacu ndahvi ra nuu ra, ta catyi ra:

—Sutu Mañi yuhu, tu yoho ta cuñún, cuví sanduvahun chíi —catyi ra.

¹³ Tyicuan ta tyisoq ra Jesús ndaha ra siqui ra. Ta catyi ra:

—Cuñi sanduvahi chuun. Ta na nduvahun vityin ri —catyi ra Jesús chi ra.

Ta caa cuhva ri cuan ta nduvahaq ra cuan.

¹⁴ Tyicuan ta catyi ra Jesús chi ra:

—Ma nacatyun chi ñáyivi. Noo ri catyi chuun, cuahan nu nyaá tata sutu. Ta sañahun chuun chi ra. Ta cuhva cuendon cha tahán chi cuhvon tari cuhva catyi nu ley ra Moisés tacuhva coto ñáyivi vatyi nduvahun —catyi ra Jesús chi ra.

¹⁵ Vasi ña cuñi ra cha coto ñáyivi, soco cuaha ca ñáyivi ñihí ñu tuhun ra. Ta cuaha xaan ñáyivi ndu iin ri ñu, vatyi cuñi ñu cuiñi

ñu tuhun cahán ra. Ta cuñi xaan ñu nduvaha ñu.

¹⁶ Soco ra Jesús, canyaha canyaha ri ra nu iyó ñáyivi. Ta cuahan ra noo nu yori ñáyivi iyó. Ta yucuan chicān tahvi ra chi Nyoo.

Nu sanduvahaq ra Jesús chi noo ra cuhvi cha ña cuví nacanda
(Mt. 9.1-8; Mr. 2.1-12)

¹⁷ Noo quivi sañahá ra Jesús chi ñáyivi. Ta chicunyicú suhva ra fariseo, ra quichahá xaan ley vehe ñuhu cha tyaq ra Moisés ta cha naha. Ta nyicú tucu suhva ra sacuahá cuenda ley vehe ñuhu cuan. Quichi coyo ra ñuu cha iyó Galilea, ta ñuu Jerusalén, ta tandihi ca ñuu cha iyó Judea. Ta iyó xaan tunyee iñi Nyoo chi ra Jesús, tacuhva vatyi sanduvaha ra chi ñu cuhvi.

¹⁸ Yucuan ta chaq coyo ra canyisó chihin noo chito chi noo ra ña cuví nacanda. Ta cuñi ra quihvi ra chichi vehe ta cacun ra chi ra nuu ra Jesús.

¹⁹ Soco ña cuví quihvi ra vatyi tuvi xaan ñáyivi. Tyicuan ta candaq ra ityi xiñi vehe. Ta sacuachiyq ra suhva tyiyo. Tyicuan ta sanoq ra chi ra cuhvi cuan maa maa nuu ra Jesús mahñu nu tuvi ñáyivi cuan.

²⁰ Yucuan cuví nu nyehe ra Jesús vatyi cachinó xaan iñi ra chi ra. Ta quichaha catyi ra chi ra cuan:

—Xaa, cha chicoq ticahnu iñi tandihi cuatyun —catyi ra Jesús.

²¹ Tyicuan ta ra casacuahá cuenda ley vehe ñuhu chihin ra fariseo quichaha nacuaan iñi ra: “¿Yóó ra cuví ra ihya? Vatyí cuñi maa ra vatyi cuví saha ra ticahnu iñi cuatyí yo. Noo ri maa Nyoo cuví saha ra ticahnu iñi cuatyí yo”, ndichi xiñi ra.

²² Soco ra Jesús chitó ra tuhun chicá xiñi ra. Ta quichaha catyi ra chi ra:

—¿Ñáá tuhun chicá xiñi ndo tyehé caa?

²³⁻²⁴ ¿Ñáá cha yii ca catyi yo? ¿Atu yii ca catyi yo: “Cuatyun cha yahá ndachi”, o yii ca catyi yo chi noo ñáyivi: “Ndícuíta ta cacon”? Soco vityin cua sañahi chi ndo vatyi iyó ityi chíi cha sahi ticahnu iñi cuatyí. Vatyí yuhu Rayii cha quichi nya gloria cuví. Ta vityin cua sanduvahi chi ra ña cuví caca ihya —catyi ra Jesús.

Tyicuan ta quichaha catyi ra chi ra cha catuvi cuan:

—Catyí chuun, ndícuíta. Naquehen chiton ta cuanuhu nya vehun.

²⁵ Ta caa cuhva ri cuan nducuita ra cha cuhvi cuan, ta naquehen ra chito ra. Ta cuanuhu ra vehe ra, suri sacahnú ra chi Nyoo.

²⁶ Tandihí ñáyivi iyo xaan cuñi ñu. Ta yuhvi xaan ñu. Ta sacahnú ñu chi Nyoo, ta catyi ñu:

—Vityin ndicha nyehé yo minoo tuhun cha iyo caa —catyi ñu.

*Nu canq̄ ra Jesús chi ra Leví
(Mt. 9.9-13; Mr. 2.13-17)*

²⁷ Yahá cuan ta quit̄a ra Jesús vehe cuan. Ta nanyeh̄e ra chi noo ra cha tavá xuhun cuenda gobiernu ñuu Roma. Ta nañi ra Leví. Ta nyaá ra nu tyiyahví ñáyivi. Ta catyí ra Jesús chi ra:

—Coho chihin —catyí ra.

²⁸ Tyicuan ta nducuit̄a ra Leví. Ta sandoo ra tandih̄i cha iyó chi ra. Ta cuahan ra chata ra Jesús.

²⁹ Tyicuan ta savah̄a ra Leví noo vico cahnu vehe ra cuenda ra Jesús. Ta cuaha vavaha ra catavá xuhun cuenda gobiernu ñuu Roma canyicú ra mesa. Ta canyicú tucu inga ñáyivi.

³⁰ Soco ra fariseo chihin ra sacuahá ley vehe ñuhu quichaha cahan nyaa ra chi ra cachicá noo chihin ra Jesús ta catyí ra:

—¿Ñáá tuhun chachí ndo ta chih̄i ndo chihin ra catavá xuhun ta chihin ra cahnu cuatyí? —catyí ra.

³¹ Ta ra Jesús nacahan ra, ta catyí ra:

—Ña chiñuhú doctor chi ra iyó vaha. Chi ra cuhví, yucuan ra chiñuhú doctor chi.

³² Yuhu ña vachi tyinyei chi ñu vaha sahá chi, soco vachi tyinyei chi ñu chitó vatyí iyó cuatyí, vatyí tacuhva nasama ñu cuhva iyó ñu —catyí ra Jesús chi ra.

*Nu sañahá ra Jesús vatyí cha yaha canyaha
ra chi ñu nyicón chi ra, cusavaha ñu ayuno
(Mt. 9.14-15; Mr. 2.18-20)*

³³ Tyicuan ta quichaha candaca tuhun ra chi ra Jesús, ta catyí ra:

—Ra canyicón chi ra Juan savahá ra ayuno, ña cachachí ra ta nanducú ra chi Nyoo, ta tyicuan caa tucu ra fariseo. Soco ra cachicá noo chihin yoho, ndi quívi maa chachi ra ta chih̄i ra. ¿Ñáá tuhun? —catyí ra.

³⁴ Ta nacahan ra Jesús, ta catyí ra:

—¿Atu cuví cha ma cuhva ndo cachi ñu canyicu vico tandaha tatu nyaá ra cha cua tandaha chihin ñu? Ma cuví. Vatyí s̄i cuñí ñu, ta cuñí ñu cachi ñu.

³⁵ Soco cuchaa quívi cuachiyo ra tandaha cuan nu nyicó ñu. Yucuan ndicha quívi, ta cusaha ñu ayunar.

*Nu sañahá ra Jesús vatyí ña nacachi tahan
tuhun chahnu cha iyó ñáyivi chihin tuhun
chaa cha sañahá ra
(Mt. 9.16-17; Mr. 2.21-22)*

³⁶ Tyicuan ta cahan ra Jesús noo cuhva chihin ñu, ta catyí ra:

—Yori cahnya noo sahma chaa, ta chihin cuan naquicu ñu noo sahma chahnu. Vatyí tatu sacuvi ñu tyicuan caa, cundiyo sahma chaa cuan. Ta s̄in ri ma cuhva chi chihin sahma chahnu cuan.

³⁷ Ta tyicuan caa tucu ma cuví tyih̄i ñáyivi vinu chaa chichi ñi chahnu. Vatyí cutahnya ñi cuan chihin vinu chaa cuan. Ta tiví vinu cuan ta tiví ñi chahnu cuan ñandih̄i.

³⁸ Yucuan chaha tahán chi tyih̄i yo vinu chaa chichi ñi chaa. Vatyí tyicuan ta ninduvi ta saha cuenda chi tahan.

³⁹ Ta yori ñu chih̄i vinu chahnu, ta cuñí ñu coho ñu cha chaa. Vatyí catyí ñu, vaha ca vinu chahnu. Cuñí ca ñu vinu chahnu cuan vatyí ican cuan cuví costumbre cha iyó maa ñu.

6

*Tohon ra cachicá noo chihin ra Jesús yoco
trigu quívi nyitatu ñáyivi
(Mt. 12.1-8; Mr. 2.23-28)*

¹ Noo quívi cha nyitatu ñáyivi, yahá ra Jesús mahñu cha tach̄i ñu. Ta ra cachicá noo chihin ra catohón ra yoco trigu. Ta casacoyó ra chihin ndaha ra. Ta cachachí ra chiti cuan.

² Tyicuan ta catyí suhva ra fariseo chi ra:

—¿Ñáá tuhun cha sacuvi ndo noo tyiño cha ña tahán chi sacuvi yo quívi nyitatu yo?

³ Ta nacahan ra Jesús, ta catyí ra:

—¿Atu ta sacuahá ca ndo cha sacuvi ra David chihin ra tahan ra quívi cha chisoco ra?

⁴ Quívi ra chichi vehe Nyoo. Ta quehen ra pan cha chacun ñáyivi nuu Nyoo. Ta chach̄i ra. Ta chah̄a ra chi ra candih̄i chihin ra. Ta maa ri maa tata sutu tahán chi cachi pan cuan —catyí ra Jesús.

⁵ Yucuan ta catyí tucu ra Jesús:

—Yuhu cuví Rayi cha quich̄i nya gloria. Ta iyó ityi chii vatyí catyí chi noo noo ndo ñáá cha sacuvi ndo quívi nyitatu yo —catyí ra.

*Nu sanduvah̄a ra Jesús chi noo ra cha ityi
ndaha
(Mt. 12.9-14; Mr. 3.1-6)*

⁶ Inga quívi cha nyitatu ñáyivi, quívi ra Jesús chichi vehe ñuhu. Ta quichaha sañaha ra chi ñáyivi. Ta yucuan nanyeh̄e ra chi noo ra cha na ityi chiyo ndaha vaha.

⁷ Ta ra casacuaha cuenda ley chihin ra fariseo, canducú nyeh̄e ra chi ra Jesús, tatu sanduvaha ra chi ra cuhví cuan quívi nyitatu ñu. Tyicuan caa ta cuví tyaa ra cuatyí siqui ra.

⁸ Soco ra Jesús chitó ra tuhun chicá xiñi ra. Ta catyí ra chi ra cha ityi ndaha cuan:

—Nducuíta. Ta cuinanyaun mahñu ihya.

Tyicuan ta ra cha ityi ndaha cuan nducuit̄a ra. Ta chicananyaq̄a ra mahñu.

⁹ Tyicuan ta catyí ra Jesús chi ra canyicú cuan:

—Cua nducu tuhun noo tuhun chi ndo.

¿Yoso caa cuhva tahán chi cha sacuvi yo

quivi nyitatu yo? ¿Atu tahañ chi vatyi sacuvi yo cha vaha, o cha ña vaha? ¿Atu tahañ chi vatyi sacacu yo chi ñáyivi, o cha cahñi ndihi yo chi ñu?

¹⁰ Tyicuan ta ra Jesús nanyehe ra chi noo noo ra canyicú cuan. Ta quichaha catyi ra chi ra cuhvi cuan:

—Sanacaa ndahun.

Tyicuan ta ra cuhvi cuan sanacaq ra ndaha ra. Ta nduvaha ndaha ra.

¹¹ Soco suhva ra canyicú cuan, cuxaqañ xaan ra. Ta quichaha candaca tuhun ra chi ra tahañ ra:

—¿Yoso caa sacuvi yo tacuhva cha ma cuvi ca cahan ra Jesús nuu ñáyivi?
—cacatyí ra.

Nacachi ra Jesús ndi uchi uvi tahañ ra tyi caca ra tyiño ra

(Mt. 10.1-4; Mr. 3.13-19)

¹² Quivi cuan ndaa ra Jesús noo yucu. Ta ñiyaca maa chicán tahvi ra chi Nyoo.

¹³ Cuhva cha cundichin, cana ra chi tandihi ri ñu nyicón chi ra. Ta nacachi ra uchi uvi tahañ ri ra. Ta sacunañ ra chi ra, apóstol ra, ta cuñi chi catyi, ra caca tyiño nuu ra.

¹⁴ Ta ihya nyaá sivi ndi uchi uvi tahañ ra: Ra Simón ra cha sacunañ ra Cristo Pedro chi, ta yañi ra, ra Andrés, ta ra Jacobo, ra Juan, ra Felipe, ra Bartolomé,

¹⁵ ra Mateo, ra Tomás, ra Jacobo sehe ra Alfeo, ta ra Simón ra yihí cuenda ityi ra cacuñi cahun cuatyí siqui gobiernu ñuu Roma cha nyacá ñaha chi ñu.

¹⁶ Ta ra Judas, yañi ra Jacobo, ta ra Judas Iscariote, ra cha naxico tuhun chi ra Jesús.

Nu sañahá ra Jesús chi cuaha xaan ñáyivi

(Mt. 4.23-25)

¹⁷ Noq ra Jesús yucu cuan chihin ndi uchi uvi tahañ ra. Ta chicutayucú ra nu ndaa cuan chihin ñu nyicón chi ra. Ta cuaha ri ityi quitá coyo ñáyivi. Quitá coyo ñu ñuu Jerusalén ta tandihi ca ñuu cha iyó Judea, ta ñuu Tiro chihin ñuu Sidón cha nyicú yuhu tyañuhu. Ta chaq ñáyivi cuan vatyi cuiñi ñu tuhun cahan ra Jesús. Ta tandihi ñu cuhvi cuñi ñu vatyi sanduvaha ra chi ñu.

¹⁸ Ta tandihi ñu cha yihí tatyí ña vaha chi, nduvaha ñu saha ra.

¹⁹ Ta tandihi ñu cuñi ñu tñin ñu chi ra. Vatyi nduvaha ñu chihin tunyee iñi Nyoo, vasí tacuhva tñin ri ñu chi ra.

Ñu ñihí tumañi iñi, ta ñu ña ñihí tumañi iñi

(Mt. 5.1-12)

²⁰ Tyicuan ta nanyehe ra Jesús chi ra cachicá noo chihin ra. Ta quichaha catyi ra chi ra:

—Tandihí nyoho cha ndahvi ndo, si xaan cuví chi ndo, vatyi tahañ chi cha cunyaca ñaha Nyoo añima ndo.

²¹ Tandihí nyoho cha chisocó ndo vityin, si xaan cuví chi ndo. Vatyi coo quivi cha ma nyehe ca ndo soco. Tandihí nyoho cha chacú chaa ndo cha cuihya iñi ndo, si xaan cuví chi ndo vatyi coo quivi ta ñahri ca tucuihya iñi coo chi ndo. Ta cuacu ndo chihin cha si cuñi ndo.

²² Si xaan cucuvi chi ndo, quivi cha tasi cuñi ñáyivi nyehe ñu chi ndo, quivi tavá ñehe ñu chi ndo nu nyaá ñu, quivi cahan ñu chi ndo, quivi catyi ñu vatyi ñáyivi ña vaha cuví ndo vatyi chinó iñi ndo chi yuhu Rayñi cha quichí nya gloria.

²³ Si xaan cucuvi chi ndo quivi nyehe ndo tindoho cuan vatyi tyicuan caa tucu sacuvi ñáyivi ta cha naha. Cahan vavaha ñu chi ra cacuvi profeta Nyoo. Caña ndava ndo chihin cha si cuñi ndo. Vatyi cahnú xaan cha cucuhva Nyoo chi ndo gloria.

²⁴ Soco ndahvi nyoho, ñu tyayí. Vatyi vityin si xaan cuñi ndo chihin tandihí cha tyayí ndo. Soco coo quivi maa maa ri tundoho cunyehe ndo. Vatyi ñahri cuñihi ndo nuu Nyoo.

²⁵ Ta ndahvi nyoho cha cuñi maa ndo vatyi ñahri cumañi chi ndo cha vityin, vatyi coo quivi cunyehe ndo soco. Nyoho cha si cuñi ndo cha vityin, ndahvi nyoho vatyi coo quivi cunyehe ndo tucuihya iñi. Ta cuacu chaa ndo.

²⁶ Ta ndahvi nyoho vatyi vaha cahan ñáyivi siqui ndo. Vatyi tyicuan caa tucu ñáyivi ta cha naha, vaha xaan cahan ñu siqui ra cha cahan cha ña ndicha.

Cuñi ndo chi ñu xaan iñi chi ndo

(Mt. 5.38-48; 7.12)

²⁷ Tandihí nyoho cha chiñi ndo tuhun cahní, catyi chí ndo tyehe caa: Cuñi ndo chi ñu xaan iñi chi ndo. Sacuvi ndo cha vaha chihin ñu cha tasi cuñi nyehe chi ndo.

²⁸ Cahan ndo cha vaha chihin ñu cha cahan ña vaha siqui ndo. Cacan tahvi ndo chaha ñu cahan chi ndo.

²⁹ Tatu yóo cha cañi inchiyo nuu ndo, cuhva tucu ndo inga chiyo nacafi maa ñu. Tatu yóo cha tinyaa chaqueta ñihno ndo, cuhva ndhi ndo camiseta ndo.

³⁰ Cuhva ndo ñáá ndhi cha chicán ñu chi ndo. Tatu tinyaa ñu ñáá cha iyó chi ndo, ma ndacan ndo chi ñu.

³¹ Tari cuhva cuñi ndo cha sacuvi ñáyivi cha vaha chihin ndo, tyicuan caa sacuvi ndo cha vaha chihin ñu.

³² Tatu cuñi ndo chi maa ri maa ñu cha cuñi chi ndo, ñahri cha vaha xaan sacuvi ndo. Vatyi tyicuan caa nyacuvi tucu ñu quiñi iyó, cuñi ñu chi ñáyivi ñohó nuu ri ñu.

³³ O tatu sacuvi ndo cha vaha chihin ñu cha sacuvi cha vaha chihin ndo, ñahri cha vaha xaan nyacuvi ndo. Vatyi tyicuan caa nyacuvi tucu ñu quiñi iyó.

³⁴ O tatu sacuví ndo tumañi ñiñi chi noo ñáyivi, ta yihí ñiñi ndo vatyi cusacuvi tucu ñu cuan tumañi ñiñi chi ndo, ñahri cha vaha nyacuví ndo. Vatyi tyicuan caa nyacuví tucu ñu quiñi iyó. Tatu ñáá noo tumañi ñiñi sacuvi ñu chi tahan ñu, nyatú ñu cha nacuhva tucu ñu cuan tumañi ñiñi chi ñu.

³⁵ Soco nyoho, cuñi ndo chi ñu xaan ñiñi chi ndo. Ta sacuvi ndo cha vaha chi ñu. Ta cuhva noo ndo chi ñu. Soco ma cuatu ndo ñáá tumañi ñiñi cunacuhva ñu chi ndo. Tyicuan ta cahnu xaan cha cuñihi ndo nuu Nyoo ta cucuvi ndo sehe vaha Nyoo cahnu. Vatyi Nyoo vaha ñáyivi cuví ra chihin ñu cha ña nacuhva tyahvi nyoo chi ra ta chihin ñu quiñi iyó.

³⁶ Vaha ñáyivi cuví ndo chihin ñáyivi, tari maa Nyoo Sutu yo, vaha ñáyivi cuví ra chihin ndo.

Ma cahan yo cha caa inga tahan yo
(Mt. 7.1-5)

³⁷ Ma cahan ndo cha caá tahan ndo, tyicuan ta Nyoo ma tiin cuenda ra cha caá maa ndo. Ma soco ndo chi ñáyivi cha cuhun ñu anyaya, tyicuan ta ma sacuhun Nyoo chi ndo anyaya. Saha ndo tucahnu ñiñi chi ñáyivi. Ta Nyoo cusaha ra tucahnu ñiñi chi maa ndo.

³⁸ Cuhva ndo cha chiñuhú chi ñáyivi. Ta tyicuan caa cuhva tucu maa Nyoo cha chiñuhú chi maa ndo. Noo ñáyivi vaha, tatu xicó ñu ñáá cha xicó ñu chi ndo, tyitu maa chahá ñu chi ndo, tyicuan caa tucu cuhva Nyoo chi ndo. Vatyi tari cuhva cuhva ndo chi ñáyivi, tyicuan caa cuhva cuhva Nyoo chi ndo —catyí ra Jesús.

³⁹ Ta chahá ra Jesús cuhva ihya chi ñu, ta catyí ra:

—Noo ra cuaa ña cuví sañaha ra ityi chi nonga ra cuaa. Vatyi ninduvi ra ña nyehé ra ityi cuahan ra. Ta cuví canacoyo ra chichi noo xahva. Tyicuan caa tucu noo ra ña chitó ityi Nyoo, vasi cuñi ra, soco ma cuví sañaha ra ityi Nyoo chi nonga ra.

⁴⁰ Ni noo ra cuatyaa sicuela ma cuví coto ra cha chitó ra cha sañaha chi ra. Vatyi nicaa ni quichaha sacuahara. Coto ra soco nya ndihi sacuahara.

⁴¹ ¿Yoso caa tyi nyehún cuatyí luhlu cha cuví tari mihin lee ri cha yihí chiti nuu tahan, ta ña sahan cuenda cuatyí cahnu cha iyó chuun cha cuví tari vitu cahnu cha yihí nuu maun?

⁴² Tatu chiti nuu maun yihí noo vitu cahnu, yoso caa cuví cатыun chi ra yañun: “Nyaca, natave mihin lee cha yihí chiti nuun.” ¡Yoho cha savahún chuun! Tava xihna vitu cahnu cha yihí chiti nuun. Tyicuan ta cuví nyehé vahun mihin lee cha cutavon chiti nuu yañun.

Chihin cha sacuví ñáyivi ta nicohon nuu ri yo chi ñu tatu ñu vaha, o ñu ña vaha cuví ñu
(Mt. 7.17-20; 12.34-35)

⁴³ Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha.

⁴⁴ Tandihí yutun nicohon nuu yo chi tun chihin chiti ri tun. Vatyi tuñiyaca, ma cuhva tun mangu. Ta ni ri noo ñu nduhva ma cuhva tun tichaha ndivi.

⁴⁵ Ta tyicuan caa tandihí ñáyivi vaha, tuhun vaha cahán ñu. Vatyi yihí cha vaha añima ñu. Soco ñáyivi ña vaha, maa maa ri maa tuhun ña vaha cahán ñu. Vatyi yihí cha caquiñi añima ñu. Chihin yuhu ñu cahán ñu tandihí cha quiñi caa cha quitá añima ñu.

Cacu añima ñu quichahá tuhun cahán ra Jesús, ta ñu ña quichahá tuhun cahán ra, ma cacu ñu
(Mt. 7.24-27)

⁴⁶ ¿Ñáá tuhun cha catyí ndo chii, “Sutu Mañi yuhu, Sutu Mañi yuhu”, tatu ña sacuvi ndo tari cuhva cha catyí chi ndo?

⁴⁷ Ihya cua catyí chi ndo yóó chi ndacu nyoho cha vachí ndo nu nyai, ta tyasohó ndo cha cahín, ta sacuvi ndo cha catyí.

⁴⁸ Tari noo ra chitó vaha savaha vehe cuví ndo. Vatyi xihna ca chatyá ra cono vavaha ta tahan ra yuu. Ta siqui yuu cuan savahá ra vehe ra. Ta quivi coon xaan savi, ta cama xaan ndutya yahá, ta ña nduva vehe cuan vatyi siqui yuu nanyaá chi.

⁴⁹ Soco ñu cha chiñi tuhun cahín ta ña sacuvi ñu tari cuhva catyí, cuví ñu tari minoo ra ña chitó savaha vehe. Vatyi ña chatyá ra nu quihí chaha vehe ra. Ta ñima nu yuu savahá ra vehe ra. Ta chaa quivi cha coon savi. Cama xaan ndutya yaha. Ta chatya chi chaha vehe ra vatyi ñuhu ri cuví. Ta nduva vehe ra vatyi ña cunye. (Ta tyicuan caa cuví ñáyivi, tatu sacuvi ñu tari cuhva catyí, tyicuan ta cacu ñu. Soco tatu ma sacuvi ñu, ma cacu ñu) —catyí ra Jesús.

7

Nu sanduvahá ra Jesús noo musu capitán sindaro
(Mt. 8.5-13)

¹ Cuhva cha ndihí cahan ra Jesús chihin ñáyivi, ta cuanuhu tucu ra inga chaha nya Capernaum.

² Ta yucuan iyó noo capitán cha nyacá ñaha noo cientu sindaro cuatyí. Ta iyó noo musu ra cha cuñi vavaha ra. Ta cuhví ra. Ta cha cuñi cúvi ra.

³ Quivi cha chitó capitán cuan tuhun ra Jesús, tachí ra chi suhva ra cacuvi mandoñi ñuu Israel na cucahan ra chihin ra Jesús, vatyi na quichi ra vatyi sanduvaha ra chi musu ra.

4⁵ Tyicuan ta chaꝯ coyo ra mandoñi cuan nu nyaá ra Jesús. Ta quichaha catýi ra chi ra:

—Iyó noo capitán cuenda ñuu Roma. Ta vaha xaan ñáyivi cuví ra chihin yo cha cuví yo ñáyivi Israel. Nyacua savaha ra noo vehe ñuhu yo. Ta tahañ chi vatýi tyinyeun chi ra. Vatýi cuhví xaan noo musu ra. Ta cuñi ra vatýi sanduvahun chi ra.

6 Tyicuan ta cuahan ra Jesús chihin ra. Soco cuhva cha cumañi ca chaa ra nya vehe capitán cuan, capitán cuan tachí ra chi suhva ra tahan ra. Ta quichaha catýi ra chi ra Jesús:

—Tata, catýi capitán vatýi ma sayangon chuun cha cuhun nya vehe ra na. Vatýi ña naña ra cha cuhun, na.

7 Yucuan chaha ña caña iñi ra quichi ra nu nyaún. ¿Atu ma sahun noo tumañi iñi chi ra vatýi noo tuhun cahan run ihya ri, ta nduvaha ri musu ra, na?

8 Vatýi maa ra capitán cuví ra. Ta nyacá ñaha rey chi ra. Ta maa ra nyacá ñaha ra chi ra cuatýi ca cha nuu ra. Tatu tava ra tyiño chi noo ra cuatýi cuan, na cuhun ra. Cuhun ra. O tatu catýi ra chí nonga ra na quichi ra, quichi ra. O tatu tachi ra chi inga ra na sacuví ra tyiño, sacuví ra. Ta tyicuan caa tucu yoho, tatu catýun na nduvaha musu ra, tyicuan ta nduvaha ra na —catýi ra tahan capitán cuan chi ra Jesús.

9 Cha chiñi ra Jesús cha catýi ra cuan ta iyo xaan cuñi ra. Ta nanyehé ra chí ñáyivi cha nyicú chihin ra, ta catýi ra:

—Ndicha ndicha cuii vatýi chinó xaan iñi capitán cuan. Ta nañihi que chí ni noo ra Israel cha chinó xaan iñi tari ra cuan —catýi ra.

10 Yucuan ta cuanuhu ra tahan capitán cuan. Ta cha nachaꝯ coyo ra nya vehe, ta nanyehé ra vatýi cha nduvahá musu cuan.

Nu sanandotoꝯ ra Jesús chi sehe noo ñaha ndahvi chihí yíi

11 Cha yahá tuhun cuan ta cuahan ra Jesús noo ñuu cha nañi Naín. Ta cuahan tucu ra cachicá noo chihin ra, ta cuaha xaan ñáyivi ñandihí.

12 Tyicuan ta cuhva cha cua chaa ra yatýin ñuu cuan, nanyehé ra cuaha ñáyivi quitá coyo ñuu cuan. Ta canyisó ñu noo ndiyi, cuacuchi ñu sehe noo ñaha ndahvi cha chihí yíi. Ta noo tuhun ri maa ra iyó chí ña, ta chihí ra.

13 Ta cha nanyehé ra Jesús chí ña, ta cundahvi cuñi nyehe ra chí ña. Ta quichahá catýi ra chí ña:

—Ma cuacun.

14 Tyicuan ta tuhva ra ta tñin ra chatun cha yihí ndiyi cuan. Tyicuan ta ra canyisó chí ndiyi cuan chicuitayucu ra. Ta catýi ra Jesús chí ndiyi cuan:

—Ndícuita, ra cuehe —catýi ra.

15 Tyicuan ta ndicuitá ndiyi cuan. Ta nicunyaá ra. Tyicuan ta quichaha cahan ra. Ta ra Jesús nacuhva cuenda ra chí ra chí sihi ra.

16 Cha nanyehé ñu cha tyicuan caa ta yuhvi xaan ñu cuví. Ta quichaha sacahnu ñu chí Nyoo. Ta catýi ñu:

—Cahnu xaan ra profeta Nyoo tuví nu nyicú yo ihya.

Ta catýi tucu ñu:

—Maa Nyoo, ican vachi nu nyicú yo, vachi tyinyee ra chí yo —catýi ñu.

17 Ta tandihí maa ñáyivi nicahnu ityi Judea, chitó ñu cha sacuví ra Jesús.

Nu tachí ra Juan uvi tahan ra chicá noo chihin ra nu nyaá ra Jesús
(Mt. 11.2-19)

18 Ta ra cachicá noo chihin ra Juan nacatýi ra tuhun cha sacuví ra Jesús. Tyicuan ta caná ra Juan chí uvi tahan ra.

19 Ta tachí ra chí ra nu nyaá ra Jesús, vatýi cundaca tuhun ra chí ra tatu ican ra cuví Cristo ra cha cusaquichi Nyoo. Vatýi tatu ñima ra, tyi cuatu ra inga ra.

20 Tyicuan ta ra cha tachí ra Juan, cuahan coyo ra. Ta chaꝯ ra nu nyaá ra Jesús. Ta quichaha catýi ra:

—Ra Juan, ra sacondutyá, tachí ra chí ndi vatýi ndaca tuhun ndi chuun tatu icon cuví Cristo ra cha cusaquichi Nyoo. Vatýi tatu ñimon, cuatu ndi chí inga ra —catýi ra.

21 Ta cuhva cha canyicú ra tachí ra Juan cuan, ra Jesús sanduvahá ra cuaha xaan ñu cuhví, ta cuaha xaan ñu yihí tatyí ña vaha chí. Ta sananyehé ra chí ñu cuaa.

22 Tyicuan ta catýi ra Jesús chí ra tachí ra Juan:

—Cuahan ndo. Ta ñacatýi ndo chí ra Juan tandihí cha nyehe ndo, ta tandihí cha chiñi ndo. Ta catýi ndo chí ra yoso caa nanyehé ra cuaa, yoso caa nacacá ra coxo, yoso caa nduvahá ra tyahyu coño, yoso caa nacuiñi ra soho, yoso caa nandotó ndiyi, yoso caa cahín tuhun Nyoo chihin ñu ndahvi yoso caa sacacú ra añima ñu. Ta catýi tucu ndo chí ra vatýi

23 sñi xaan cuví chí ñu ña chicá uvi iñi nyicón chíi —catýi ra Jesús chí ra.

24 Cuhva cha cuahan coyo ra cha tachí ra Juan, ta quichaha cahan ra Jesús tuhun ra Juan chihin ñáyivi. Ta catýi ra:

—¿Ñáá cha chahan ndo chinyehe ndo quívi chahan ndo chiqui ndñi cuan? ¿Atu chahan ndo chinyehe ndo noo ndoo cha naquisí tatyí?

25 ¿O noo ra cha ñihno sahma vaha chinyehe ndo vaha? Ñima. Vatýi chitó ndo vatýi ra ñihno sahma vaha iyó vaha ra ñayivi ta iyó ra vehe rey.

²⁶ ¿Atu ña chinyeha ndo chi noo profeta Nyoo? Ican. Ta cahnu ca ra cuví ra ican saha noo profeta.

²⁷ Ican tuhun ra Juan nyaá nuu tutu cha tyaa ra Isaías ta cha naha. Ta catyí Nyoo tuhun ra tyehe caa:

Yuhu tachí chi noo ra cahan tuhun ityi nuu nu cuahun.

Vatyí cucahan ra tuhun chihin ñáyivi na nasama ñu cuhva iyó ñu, ta cuatu tuhva ñu quívi quichun.

²⁸ “Ta catyí chi ndo vatyí chichi cha tandihi ra cha cacu, yori profeta cha cahnu ca ican saha ra Juan. Soco ra cha nyacá ñaha Nyoo añima, vasi cuví ra noo ra luhlu ca soco cahnu ca ra ican saha ra Juan ra sacondutyá —catyí ra Jesús.

²⁹ Cha chiñi ñu tuhun ihya, tandihi ñáyivi ta ra catavá xuhun cuenda gobiernu ñuu Roma cha sacondutyá ra Juan nacoto ñu vatyí cuhva sacuví Nyoo vaha xaan.

³⁰ Soco tandihi ra fariseo chihin ra sacuahá cuenda ley vehe ñuhu, maa ra cuví ra ña cuñi cha sacondutyá ra Juan chi ra, vatyí ña cuñi ra quehen ra cha chahá Nyoo.

³¹ Ta catyí ra Jesús:

—¿Ñáa chihin sandu inuu ri chi nyoho, ñu iyó quívi ihya? ¿Yóo cha tari caa caá ndo?

³² Tari ra cuatyaa cuví nyoho. Vatyí ra cuatyaa nyasiquí ndotyin nyuahvi. Ta caná chaa ndotyin chi tahan ndotyin, ta catyí ndotyin: “Tiví ndi tyoo ta ña chitá chaha ndo. Ta chitá ndi yaa cuihya, soco ña chachu ndo.” Ta tyicuan caa ni noo cuhva ña tahán iñi ndo.

³³ Vatyí ra Juan ra sacondutyá, quichí ra ta ña chachí vaha ra. Ta ña chihí ra vinu. Ta nyoho catyí ndo vatyí tatyí ña vaha yihí chi ra.

³⁴ Ta quichí tucu yuhu Rayii cha quichi nya gloria. Ta chachí ta chihí. Ta nyoho catyí ndo vatyí ra cuahyi cuví ta cuví noo ra tuhvá chihí. Ta ña tahán iñi ndo cha cutahín chihin ra iyó cuatyí, ta chihin ra tavá xuhun. Soco vasi ni noo ndi ña quehen cuenda ndo,

³⁵ soco catyí chi ndo vatyí cha chiñi tuñi Nyoo, chahá ra chi ñu naquehen tuhun cahín ta tuhun cahán ra Juan. Ta maa ñu cusañaha ñu chi ndo vatyí vaha cha chiñi tuñi Nyoo —catyí ra Jesús.

Nu nyaá ra Jesús vehe ra Simón ra cuví fariseo

³⁶ Noo ra fariseo cha nañi Simón nacatyí tuhun ra chi ra Jesús noo vico vehe ra. Ta chaá ra Jesús vehe ra, ta chicunyaa ra mesa.

³⁷ Tyicuan ta noo ñaha cata iñi ñuu cuan chitó ña vatyí nyaá ra Jesús yucuan. Ta

chaá ña chihin noo yutyí alabastro tyitu yihí ndutyá vixi chahán.

³⁸ Ta chicunyaa ña yatyin ri chaha ra. Ta quichaha chacu chaá ña vatyí ndu uvi iñi ña cuatyí ña. Ta quitá ndutyá nuu ña. Ta chihin ndutyá nuu ña nacatyá ña chaha ra. Yahá cuan ta sana ityi ña chaha ra chihin ixi xiñi ña. Ta tyayuhú ña chaha ra.

Tyicuan ta choso ña ndutyá vixi chahán cuan siqui chaha ra.

³⁹ Cuhva cha nyehe ra fariseo cuan cha tyicuan caa, ndichí xiñi ra: “Tatu ndicha ndicha cha Nyoo saquichi chi ra ihya, coto ra yóo ñaha tíin chaha ra, vatyí ñaha cuan, ñaha iyó cuatyí cuví ña.”

⁴⁰ Tyicuan ta ra Jesús catyí ra chi ra fariseo cuan:

—Yoho Simón, iyó noo tuhun cua catyí chuun —catyí ra chi ra.

Tyicuan ta nacahan ra Simón:

—Vaha, catyí chii, Maestro —catyí ra.

⁴¹ Ta quichaha catyí ra Jesús tyehe caa:

—Uvi tahan ra yosoyicá ra xuhun chi noo ra cha tuhva chahá noo. Ta noo ra cuan yosoyicá ra ohon ciento denario. Ta nonga ra yosoyicá ra uvi xico uchi ri denario (tari ohon ciento ri pesu).

⁴² Ta ninduvi tahan ra ña cuví tyiyahvi ra. Ta ra tuhvá chahá noo cuan, sahá ra ticahnu iñi chi ninduvi tahan ra. Ta vityin catyí chii, yoho Simón ¿nya ra cua cuñi ca chi ra cha chahá noo cuan? —catyí ra Jesús.

⁴³ Tyicuan ta nacahan ra Simón, ta catyí ra:

—Ra cha cuaha ca sahá ra tucahnu iñi chi —catyí ra.

Tyicuan ta catyí ra Jesús:

—Ndicha cha cahún.

⁴⁴ Tyicuan ta nanyehé ra Jesús chi ñaha sihi cuan, ta catyí ra chi ra Simón:

—¿Nyeहुn chi ñaha ihya? Yuhu quihvi chichi vehun. Ta ña chahun ndutyá cha ndoo chahi tari cuhva costumbre cha iyó chi yo. Ta ñaha ihya nacatyá ña chahi chihin ndutyá nuu ña. Ta yahá cuan, ta sana ityi ña chihin ixi xiñi ña.

⁴⁵ Yoho ña tyayuhun ndahi, tari costumbre cha iyó chi yo, soco maa ña nyacua nya cuhva cha quihvi ihya ta ña sandihi ña cha tyayuhú ña chahi.

⁴⁶ Ta yoho ña tyihun aceitye xiñi, soco ñaha ihya tyihí ña ndutyá vixi chahán chahi.

⁴⁷ Ta catyí chuun, yoho Simón, vasi cahnu xaan cuatyí ña, soco sahí ticahnu iñi chi ña. Yucuan chaha cuñi xaan ña chii. Ta ñu sahí tucahnu iñi chiin ri cuatyí, chiin ri cuñi ñu chii —catyí ra Jesús.

⁴⁸ Tyicuan ta quichaha catyí ra Jesús chi ña:

—Cuatyun cha yahā sandachi. Vatyí cha sahá Nyoo tìcahnu iñi chuun —catyí ra chí ñā.

⁴⁹ Tyicuan ta ra nyicú chihin ra quichaha ndichí xiñi ra: “¿Yóó ra cuví ra ihya? Vatyí sahá ra tucahnu iñi cuatyí ñáyivi.”

⁵⁰ Tyicuan ta quichaha catyí ra Jesús chí ñaha sihi cuan:

—Cuahan vityin, cha cacun vatyí chinó iñun chíi. Cuahan chihin cha vaha —catyí ra chí ñā.

8

Ñusihi cha tyinyeé chí ra Jesús

¹ Cha yahā tuhun cuan, ta cuahan ra Jesús chicá noo ra noo noo ñuu cahnú ta noo noo ñuu luhlu. Ta cahan noo ra nuu ñáyivi. Ta sacoto ra chí ñu tuhun vaha yoso cuhva cuñí Nyoo cunyaca ñaha ra chí ñu. Ta ndi uchi uvi tahan apóstol, ra cha tyatyíño ra chí, cuahan coyo ra chihin ra.

² Ta cuahan coyo tucu suhva ñusihi cha sanduvahā ra, ñu cuhvi ta ñu yihí tatyí ña vaha chí. Ta chihin ñu cuahan cu María noo ñaha ñuu Magdala, cha yihí ucha tahan tatyí ña vaha chí ta nduvahā ña.

³ Ta cuahan tucu cu Juana ñasihi ra Chuzá ra cuví tyiño cuenda ra Herodes, ta cu Susana chihin cuaha xaan ca ñu cha tyinyeé chí ra chihin ñáá cha iyó chí ñu.

Nu sañahá ra Jesús vatyí tari noo ra chicá noo tachí, tyicuan caa cuví ra cahán tuhun Nyoo

(Mt. 13.1-9; Mr. 4.1-9)

⁴ Ta cuaha xaan ñáyivi quitá noo noo ñuu, vatyí cua nyehe ñu nu cahan ra Jesús tuhun Nyoo. Ta tuvi xaan ñu nyicú ñu, ta quichaha catyí ra chí ñu chihin noo cuhva:

⁵ —Quitá noo ra vehe ra. Ta cuahan ra nu iyó tyiño sahá ra, vatyí cua quití ra chíti trigu nu ñuhú ra. Ta cuhva cha quití ra canacoyo suhva chíti cuan yuhu ityi. Ta chañi ñáyivi siqui. Ta quichí saa ta chachí ti.

⁶ Ta suhva ca chíti cuan canacoyo ticu yuu. Cañá chíti cuan. Soco na ityi ri vatyí chíin xaan ñuhu yihí chaha. Ta siñ ri ña cachin.

⁷ Ta suhva ca chíti canacoyo chichi chíti iñu, soco quivi cañá tun iñ ri, tu iñu cuan chahñi chí tun.

⁸ Soco suhva ca chíti canacoyo nu ñuhú vaha ta quivi chahnu tun, vaha xaan chahá tun chíti. Vatyí noo ri chíti cuan, cientu chíti quitá chihin —catyí ra Jesús.

Ta cha yahā catyí ra tuhun cuan. Ta quichaha cana chaa ra vatyí na cuiñi ñáyivi, ta catyí ra:

—Tatu cutuñi iñi ndo, tyasoho ndo tuhun cahín —catyí ra.

Nu sacotó ra Jesús ñáá cuenda sañahá ra chihin cuhva ri

(Mt. 13.10-17; Mr. 4.10-12)

⁹ Yahā cuan ta ra cachicá noo chihin ra, ndacá tuhun ra chí ra ñáá cha cuñi chí catyí tuhun cha nacatyí ra chí ñáyivi.

¹⁰ Tyicuan ta quichaha catyí ra:

—Chí nyoho sacotó Nyoo tuhun xehe, yoso caa nyacá ñaha ra. Soco chí tandihi ca ñu cuan, cuhva ri chahí chí ñu. Tacuhva nyehe ñu ta cuví chí tari cha ña ndichin nyehé ñu, ta cuiñi ñu soco ma cutuñi iñi ñu ñáá tuhun cuví.

Nu sacotó ra Jesús ñáá cha cuñi chí catyí tuhun ra tachí cuan

(Mt. 13.18-23; Mr. 4.13-20)

¹¹ Cuhva cha catyí chí ndo, cuñi chí catyí tyehe caa: chíti cuan tari tuhun Nyoo cuví.

¹² Ta tari nu canacoyo chíti trigu cuan yuhu ityi, tyicuan caa cuví noo ñu chíti tuhun Nyoo. Soco quichí cuhna ta tinyaa ra tuhun Nyoo chí ñu tacuhva cha ma chino iñi ñu. Ta ma ca ñu.

¹³ Ta tari nu canacoyo chíti cuan ticu yuu, tyicuan caa tucu inga ñáyivi cha chíti tuhun Nyoo. Ta siñ xaan cuví chí ñu suhva ri quivi. Soco vatyí ña yihí vaha yoho ñu, suhva ri quivi chingo iñi ñu, soco quivi cha quichaha nyehe ñu tindoho, ta sandihi ri ñu tuhun cha chinó iñi ñu.

¹⁴ Tari nu canacoyo chíti chichi iñu, tyicuan caa cuví tucu inga ñu chíti tuhun Nyoo. Chíti ñu tuhun Nyoo soco ña cuñi ñu sacuvi ñu tari cuhva chíti ñu. Vatyí yihí ñu, nyaá ca xiñi ñu tuhun tindoho ican saha tuhun Nyoo. Ta nonga ñu nyiyo ca iñi ñu cha tyayii. Ta nonga tucu ñu siñ ca cuñi ñu chica noo yanga ri ñu. Ta tari cha ña chicoo chíti nuu ñu cuví cuan.

¹⁵ Soco tari nu canacava chíti nu ñuhú vaha, tyicuan caa cuví noo ñu cha chíti tuhun Nyoo. Ta vaha añima ñu vatyí chinó iñi ñu chihin tandihi añima ñu. Ta vaha tyasohó ñu tuhun Nyoo, ta ña naa maa iñi ñu tuhun ra. Ta sacuvi ñu tandihi tuhun cahán ra.

Ma tyihi xehe yo ñuhú cha sandundichin Nyoo añima yo coto tinyaa ra

(Mr. 4.21-25)

¹⁶ Yori yo cha natyaa yo ñuhú tima ta tixehe yo xiu chito o nonga nu xehe. Natyaa yo ñuhú tima soco cha cananyaa yo noo nu sucun. Ta cuhva quihvi ñáyivi chichi vehe soco ndichin.

¹⁷ Vatyí ñahri noo cha ñohó xehe, ta cuñun, tyi ma natuvi. Ta ni noo tuhun xehe, ta cuñun, tyi ma quita nu ndichin ta coto yo.

¹⁸ Yucuan chaha tyasoho ndo tuhun cahín. Vatyí tatu quichaha ndo tuhun cahín, cuaha ca cusañahi chí ndo. Soco tatu ma tyasoho ndo, tyicuan ta cutinyaa Nyoo

tandihí maa chí ndo nyacua nya cha chíin ri cha cuñí maa ndo tyí cumí ndo.

Tari yañi ra, ta tari síhi ra, tyicuan caa cuví chí ñu quichaha tuhun Nyoo, catyí ra Jesús (Mt. 12.46-50; Mr. 3. 31-35)

¹⁹ Tyicuan ta chaq síhi ra Jesús chíin yañi ra nu nyaá ra. Soco ña cuví chaa ñu vatyi tuví xaan ñáyivi.

²⁰ Tyicuan ta sacoto ñáyivi canyicú cuan chí ra Jesús, ta catyí ñu:

—Sihun chíin yañun nyicú ñu chata vehe. Ta cuñí ñu cahan ñu chuhun.

²¹ Tyicuan ta nacahan ra Jesús, ta catyí ra:

—Tandihí maa ñáyivi cha chíni ta sacuví tuhun Nyoo cha cahín, ican ñu cuví síhi, ta ican ñu cuví yañi —catyí ra Jesús.

Nu sacutaxín ra Jesús tatyí ñihi vavaha nu miñi

(Mt. 8.23-27; Mr. 4.35-41)

²² Cuví chí noo quívi cuan quihví ra Jesús chíin noo canoa chíin ra cacticá noo chíin ra. Ta quichaha catyí ra chí ra:

—Coho ndo inga chiyo miñi ihya.

Yucuan ta cuahan coyo ra chíin canoa cuan.

²³ Ta cha ní ri ca cha cuahan ra mahñu miñi cuan, tíjn ñumahna chí ra Jesús.

Tyicuan ta sana iñi ra ta chaq noo tatyí ñihi vavaha. Ta quichaha tyihí chí ndutya chíin canoa cuan. Ta quichaha cuñi nyee canoa cuan vatyi cama xaan ndutya quihví.

²⁴ Tyicuan ta casandoyo ra chí ra Jesús. Ta quichaha catyí ra:

—¡Maestro! ¡Maestro! Cha cuñi nyee yo chíin ndutya —catyí ra.

Tyicuan ta nducuitá ra Jesús. Ta quichaha catyí ra chí tatyí cuan ta chí ndutya cuan, na cutaxín chí. Ta cutaxín ri.

²⁵ Tyicuan ta quichaha catyí ra chí ra cacticá noo chíin ra:

—¿Ñáá tuhun yuhví ndo? ¿Atu ña chinó iñi ndo vatyi yuhu sahá cuende chí ndo? —catyí ra.

Soco ra cuan, yuhvi xaan ra. Ta iyo xaan cuñi ra. Ta quichaha ndaca tuhun ra chí ra tahan ra:

—¿Yóó ra cuví ra ihya? Vatyi nyacua nya tatyí ta ndutya ta quichahá tuhun cahán ra.

Nu nduvahá noo ra yihí tatyí ña vaha ñuu Gadara

(Mt. 8.28-34; Mr. 5.1-20)

²⁶ Tyicuan ta chaq coyo ra ityi Gadara cha nyaá inga chiyo miñi ityi nuu Galilea.

²⁷ Ta quitá ra chíin canoa cuan. Ta yucuan chaq noo ra cha quichi noo ñuu ityi cuan chisatahan ra chí ra. Ta yihí tatyí ña vaha chí ra. Ta cha naha xaan ña ñihmó maa ra sahma. Ní ri ña iyó ra vehe ra. Chicá noo ri maa ra nu ñaña calavari cuan.

²⁸⁻²⁹ Ta tuhvá tatyí ña vaha cuan naquiqui chí ra. Ta yucuan chaha chahíi ñu ndaha ra ta chaha ra chíin cadena. Soco tatyí ña vaha cuan chahá fuerza chí ra cha cahnya ra. Ta sacono chí chí ra. Ta chinyacá chí chí ra noo nu yori maa ñáyivi iyó. Ta cuhva cha nyehé ra chí ra Jesús, chicuñi chíti ra nuu ra. Ta quichaha canachaa ra, ta catyí ra:

—¿Ñáá tuhun tyihún chuun chíin yuhu, yoho Jesús, Sehe Nyoo cahnu? Chiquén chuun vatyi ma sanyehun tundoho chí —catyí ra yihí tatyí ña vaha cuan chí ra Jesús.

Ta catyí ra tyehé caa vatyi ra Jesús tachí ra chí tatyí ña vaha cuan, na quita chí ra ndahvi cuan.

³⁰ Ta quichaha ndaca tuhun ra Jesús chí tatyí ña vaha cuan, ta catyí ra:

—¿Ñáá nañún?

Ta tatyí ña vaha cuan sacahan chí ra cuan, ta catyí ra:

—Nyuhu nañi ndi, Legión.

Tyicuan caa catyí ra vatyi cuaha xaan tatyí ña vaha yihí chí ra. Cuenda mil tatyí ña vaha cuan yihí chí ra.

³¹ Tyicuan ta tatyí ña vaha cuan catyí chí ra Jesús vatyi ma tuchi ra chí chí nu tindoho nu ma cuví maa quita chí.

³² Ta chicán tatyí ña vaha cuan chí ra Jesús nacuhva ra caquihví chí chíin quini cha canyicú yuhu miñi cuan. Tyicuan ta chaha ra Jesús permiso cha caquihví chí chíin quini cuan.

³³ Ta quitá tatyí ña vaha cuan chí ra ndahvi cuan. Ta caquihví chí chíin quini cuan. Tyicuan ta cachino quini cuan. Ta yatyi cuan nyaá noo xahva yuhu miñi cuan. Yucuan canacoyo ti chíin miñi cuan. Ta cachihi ti chíin ndutya cuan.

³⁴ Tyicuan ta ra casahá cumi chí quini cuan, yuhví xaan ra. Ta cuahan coyo vavaha ra cua nacatyí ra chí ñáyivi nya ñuu. Ta tandihí ri ñáyivi cha nyehé ra, ta nacatyí ra tuhun cuan.

³⁵ Tyicuan ta chaq coyo ñáyivi cua nyehé ñu ñáá cha cuví cuan. Tyicuan ta chaq ñu nu nyaá ra Jesús. Ta nañihí ñu chí ra cha yihí tatyí ña vaha cuan chí. Nyaá ra nuu ra Jesús. Ta ñihmó ra sahma ra. Ta vaha cuñi ra. Ta yuhví xaan ñu cuví.

³⁶ Tyicuan ta tandihí ñu cha nyehé cha cuví cuan, nacatyí ñu chí tandihí ca ñáyivi yoso caa quitá tatyí ña vaha chí ra ndahvi cuan, ta nduvahá ra.

³⁷⁻³⁹ Yucuan ta tandihí ñáyivi ityi Gadara cuan quichaha catyí ñu chí ra Jesús na cunuhu ra ityi nu quichi ra. Vatyi yuhví xaan ñu chíin cha sacuví ra chíin tatyí ña vaha cuan. Tyicuan ta ra cha quitá tatyí ña vaha cuan chí, catyí ra chí ra Jesús, na

cuhva ra cha cuhun ra chihin ra. Soco catyí ra Jesús chi ra:

—Cuanuhu nya vehun. Ta načuhva cuendon chi ñáyivi chuun ñáá cha sacuví Nyoo chuhun —catyí ra.

Yucuan ta ra Jesús nandíhvi ra chichi canoa cuan. Ta cuanuhu ra chihin ra cachicá noo chihin ra. Tyicuan ta ra ndahvi cha nduvaha cuan, cuanuhu ra nya ñuu ra. Ta ityi cuahan ra nacatyí ra chi tandihi ñáyivi ñuu cuan yoso caa sanduvahá ra Jesús chi ra.

Nu nduvahá sehe ra Jairo ta ñaha sihi cha tijn sahma ra Jesús

(Mt. 9.18-26; Mr. 5.21-43)

⁴⁰ Quívi cha nachaá ra Jesús cha chahan ra inga chiyo miñi cuan, cuaha xaan ñáyivi nyatú ñu chi ra. Ta sii xaan cuñí ñu vatyí nachaá ra.

⁴¹ Tyicuan ta chaá noo ra cha nañí Jairo, ra cuví nuu vehe ñuhu, ta chicuíñi chiti ra nuu ra. Ta quichaha chachu ndahvi ra nuu ra, na cuhun ra vehe ra.

⁴² Vatyí iyó noo tuhun ri sehe ra, ta iyó uchi uvi cuiya ña. Ta cha cuñí cúvi ña chihin cuehe. Ta cuahan ra Jesús vehe ra. Ta cuaha xaan ñáyivi cuahan chihin ra Jesús, ta tihin xaan cuahan ra mahñu ñu.

⁴³ Ta chihin ñáyivi cuan cuahan noo ñaha cuhvi. Cha iyó uchi uvi cuiya ndoho ña noo cuehe niñi. Ta cha ndihi maa xuhun ña sanaá ña, ta ña nduvahá ña.

⁴⁴ Soco chaá ña nu nyaá ra Jesús ityi chata ra. Ta tijn ña sahma ra. Ta caa cuhva ri cuan, ta chicunyasi cha chati niñi ña.

⁴⁵ Tyicuan ta quichaha catyí ra Jesús: —¿Yóó cha tijn sahme?

Ta tandihi ñu cuahan chihin ñu catyí ra: —Yori.

Ta catyí ra Pedro ta ra tahan ra chi ra Jesús:

—Maestro, cuaha xaan ñáyivi cuahan chuhun, ta tihin xaan cuahun. Ta suri maa ñu tyandahá ñu chuun. Ta ndacá tuhun con “¿Yóó cha tijn sahme?” —catyí ra.

⁴⁶ Soco ra Jesús catyí ra:

—Chitó mai vatyí iyó noo cha tijn sahme. Vatyí tuví iñi cuahan suhva tunyee iñi cha iyó chii —catyí ra.

⁴⁷ Tyicuan ta ñaha sihi cuan nyehe ña vatyí cha chitó ra. Ta quichaha nihi ña chihin cha yuhví ña. Ta chicuíñi chiti ña nuu ra. Ta quichaha nacatyí ña chi ra ñáá tuhun cha tijn ña sahma ra, ta yoso caa nduvahá ña caa cuhva ri cuan. Ta chiñí tandihi ñáyivi cuan cha nacatyí ña.

⁴⁸ Yucuan ta catyí ra Jesús chi ña:

—Yoho sihi, cha nduvahun vatyí chinó iñun chii. Cuhahan chihin cha vaha —catyí ra.

⁴⁹ Ni cahán ca ra Jesús tuhun ihya, ta chaá noo ra quitá vehe ra cuví nuu vehe ñuhu cuan. Ta quichaha catyí ra chi ra Jairo cuan:

—Sehun cha yahá chihi ña. Ma sayanga con chi Ra Sacuaha chiña —catyí ra.

⁵⁰ Soco cha chiñí ra Jesús tuhun cuan. Ta quichaha catyí ra:

—Ma yuhvun. Chino iñun. Ta sehun cua nduvaha ña —catyí ra.

⁵¹ Ta cuhva cha chaá ra Jesús vehe ra Jairo, ña chahá ra quihvi ñáyivi chichi vehe. Maa ri maa ra Pedro ta ra Jacobo ta ra Juan ta maa ra Jairo chihin ñasihi ra, quihvi ñu chichi vehe cuan nu catuví cuehe luhlu cha chihí cuan.

⁵² Ta tandihi ñu chacú chaa ñu cha cuenda vatyí chihí cue. Soco ra Jesús catyí ra chi ñu:

—Ma cuacu ca ndo. Vatyí ña chihí cue. Quixí cue —catyí ra.

⁵³ Soco chacú nyaa ñu tuhun cahan ra. Ta ña chinó iñi ñu. Vatyí chitó ñu tyi cha chihí cue.

⁵⁴ Tyicuan ta tijn ra Jesús ndaha cue. Ta ñihi cahan ra ta catyí ra chi cue:

—Ndücüita, cuehe luhlu —catyí ra.

⁵⁵ Tyicuan ta nandotó cue. Ta caa cuhva ri cuan ndücüita cue. Ta quichaha catyí ra Jesús:

—Cuhva ndo cha cachi cue.

⁵⁶ Ta sutu cue ta sihi cue, iyo xaan cuñí ñu. Soco catyí ra Jesús chi ñu vatyí yori maa chihin cahán ñu tuhun cha cuví cuan.

9

Nu tachí ra Jesús ndi uchi uvi tahan ra cachicá noo chihin ra vatyí cucahan ra tuhun Nyoo

(Mt. 10.5-15; Mr. 6.7-13)

¹ Sandu iin ri ra Jesús ndi uchi uvi tahan ra cachicá noo chihin ra. Ta chahá ra tunyee iñi chi ra vatyí cuví tava ra tatyí ña vaha, ta cuví sanduvaha ra chi ñu cuhvi.

² Ta tachí ra tyiño chi ra vatyí na sanduvaha ra chi ñu cuhvi, ta cahan ra tuhun Nyoo yoso caa nyacá ñaha ra añima ñáyivi.

³ Ta catyí ra chi tandihi ra cuan:

—Ñahri cha cuisón ndo ityi cuhun ndo, ni yutun ma tuvi ndo. Ni yitín, ta ni ri cha cachi ndo ta ma cuisón ndo. Ta ni ri xuhun ta ma cuisón ndo. Tacuhva ñihmó ri ndo cūhun ndo.

⁴ Ta savaha ri vehe cha chaa ndo, cūnyaa ndo yucuan nyacua nya cha chaa quívi cha cuhun ndo inga ñuu.

⁵ Ta nu ña cuñí ñu cuiñí ñu tuhun cahan ndo, quita ndo ñuu cuan. Ta naquisi ndo ñiyaca chaha ndo. Tyehé caa sacuvi ndo na cuví chi tari minoo seña chi ñu, vatyí ña

cuñi ñu tyasoho ñu tuhun Nyoo —catyí ra Jesús chi tandihi ra cuan.

⁶ Tyicuan ta cuahan coyo ra tandihi cuui maa ñuu. Ta cahán ra tuhun vaha Nyoo ta yoso caa cuñi chi ta cacu ñu. Ta sanduvaha ra chi ñu cuhvj.

Nu cuñi ra Herodes coto ra yóo ra chicá noo cahán tuhun Nyoo ta sanduvahá chi ñáyivi (Mt. 14.1-12; Mr. 6.14-29)

⁷ Ra Herodes ra cuví ra nyacá ñaha nicahnu ityi Galilea, ñihí ra tuhun cha sacuví ra Jesús. Ta ña ñihí vaha ra cuhva yóo ra cuví ra. Vatyí yihí ñu catyí ñu vatyí ra Juan, ican ra nandoto.

⁸ Ta yihí ñu catyí ñu vatyí ra Elías, ican ra nandoto. Ta yihí ñu catyí ñu vatyí inga ra profeta Nyoo ta cha naha, ican nandoto.

⁹ Soco catyí ra Herodes:

—Maa mai tyihí tyiño chicachya sucun ra Juan. ¿Tu tyicuan caa, yóo ra chiñi xain tuhun ihya? —catyí ra.

Ta ra Herodes cuan nducú xaan ra cuhva yoso caa nyehe ra chi ra cha chicá noo cuan.

Nu chaha ra Jesús cha cachi ohon mil rayii (Mt. 14.13-21; Mr. 6.30-44; Jn. 6.1-14)

¹⁰ Ta cuhva cha nachaa coyo ra chicá tyiño nuu ra Jesús, canacatyí ra chi ra Jesús tandihi cuui maa cha cuví nu chahan coyo ra. Tyicuan ta tava siin ra Jesús chi ra ta cuahan coyo ra yatyin ri noo ñuu cha nañi Betsaida.

¹¹ Soco cuhva cha ñihí ñáyivi tuhun vatyí cuahan ra Jesús nyicuan, ta cuahan coyo vavaha ñu nya nu nyaá ra. Tyicuan ta quichaha cahan ra chihin ñu tuhun yoso caa nyacá ñaha Nyoo añima ñáyivi. Ta sanduvaha ra chi ñu cuhvj.

¹² Ta cuhva cha cua iñi xaan, ndi uchi uvi tahan ra chicá noo chihin ra quichaha catyí ra chi ra:

—Catyí chi ñáyivi ihya na cunuhu ñu cunyitatu ñu, ta na cunducu ñu noo cha cachi ñu noo ñuu cha nyaá yatyin ri cuan. Vatyí ihya ñahri maa cha cachi yo iyó —catyí ra.

¹³ Tyicuan ta quichaha catyí ra Jesús chi ndi uchi uvi tahan ra cuan:

—Cuhva ndo cha cachi ñu —catyí ra.

Tyicuan ta quichaha catyí ra chicá noo chihin ra chi ra tahan ra:

—Ñahri maa cha iyó ihya. Ohon tahan ri pan, ta uvi tahan ri tiyaca iyó. Soco ma ñihí cha cachi tandihi ñáyivi ihya. Ni ri cusata ndi soco ma ñihí —catyí ra.

¹⁴ Vatyí ohon mil rayii nyicú yucuan. (Ta siin ri nyicú ñusihí chihin sehe ñu.) Yucuan ta ra Jesús catyí ra chi ra cachicá noo chihin ra:

—Na cunyicu ñáyivi cha uvi xico uchi tahan ñu noo noo nu cunyicu ñu.

¹⁵ Tyicuan ta chicunyicu tandihi ñu.

¹⁶ Tyicuan ta quehen ra Jesús ohon tahan pan cuan chihin uvi tahan tiyaca cuan. Ta nanyehé ndaa ra andivi, ta nacuhva ra tyahvi nyoo chi Nyoo. Tyicuan ta tahvi sava ra pan ta tiyaca cuan. Ta chaha ra chi ra cachicá noo chihin ra na casacha ra chi ñáyivi.

¹⁷ Tyicuan ta tandihi ñu chachj ñu. Ta chitu chichi ñu. Yaha cuan ta ndoq ca yiquin ta sacutu ra uchi uvi tahan tica chihin yiquin cuan.

Nu catyí ra Pedro tyi ra Jesús cuví ra Cristo, ra sacacú chiyo (Mt. 16.13-19; Mr. 8.27-29)

¹⁸ Noo quivi quita siin ra Jesús chihin ra cachicá noo chihin ra. Ta quichaha chicán tahvi ra chi Nyoo. Ta nu ndihí chicán tahvi ra, ta quichaha ndaca tuhun ra chi ra chicá noo chihin ra ta catyí ra:

—¿Ñáá catyí ñáyivi, yóo ra cuví yuhu?

¹⁹ Tyicuan ta nacahan ra cachicá noo chihin ra, ta catyí ra:

—Yihí ñu catyí ñu vatyí ra Juan ra sacondutya chi ñáyivi cuvún. Ta yihí ñu catyí ñu vatyí ra Elías cuvún. Ta yihí ñu catyí ñu vatyí inga ra profeta Nyoo ta cha naha cuvún —catyí ra.

²⁰ Tyicuan ta ndaca tuhun ra Jesús chi tandihi ra, ta catyí ra:

—Ta nyoho, ¿yóo ra cuví yuhu, cuhva cha cuñi nyoho?

Tyicuan ta nacahan ra Pedro, ta catyí ra:

—Yoho cuví ra Cristo ra cha quita nu nyaá Nyoo.

Nu sacoto ra Jesús yoso caa cucahñi ñáyivi chi ra (Mt. 16.20-28; Mr. 8.30—9.1)

²¹ Ta catyí ra Jesús chi ra cachicá noo chihin ra vatyí yori maa chihin cahan ra tuhun cuan.

²² Tyicuan ta catyí tucu ra chi ra:

—Yuhu Rayii cha quichí nya gloria cuví. Ta tahan chi vatyí cuaha xaan tundoho cunyehi. Ta ra cacuví mandoñi ta ra cacuví nuu chi tata sutu chihin ra casacaha cuenda ley, ma chino iñi ra chii. Ta cucahñi ra chii. Soco nu cu uñi quivi cunandote —catyí ra.

²³ Tyicuan ta quichaha catyí tucu ra chi tandihi ra:

—Tatu nya nyoho cuñi ndo cunyicon ndo chii, cahnya iñi ndo cha cuñi maa ndo sacuví ndo, tacuhva cuví sacuví ndo cha cuñi Nyoo. Ma ndu uvi iñi ndo cha yihí ndo cuende vasi ndiquivi nyehe ndo tundoho. Vatyí yucuan cuví cruzi cha tahan chi cuiiso ndo.

²⁴ Ta nya ndo ña cuñí ndo nyehe ndo tundoho cha catyi yuhu, cunyehe ndo tundoho anyaya. Soco nya ndo cuhva ndo ñayiví ndo cha catyi yuhu, cucacu añima ndo.

²⁵ ¿Ñáa cuenda quita chi ndo cha saha ganaa ndo tandihí cha iyó ñayiví, tatu cuhun añima ndo anyaya?

²⁶ Vatyí tatu cahan nuu ndo cha cahán ñayiví chi ndo cha catyi yuhu, ta cha catyi tuhun cahín, cucahan tucu nuu mai nyehi chi ndo nachaa quiví quichi inga chaha. Vatyí cuquichi chihin cha cahnu cuví, ta cha cahnu cuví Sutu yo Nyoo ta ángel cuenda ra. Vatyí yuhu cuví Rayíi cha quichí nya gloria.

²⁷ Ta catyí chi ndo vatyí yihí ndo cha nyicú ndo ihya vityin, ma cuví ndo nyacua nya nyehe ndo yoso caa cuví nu nyacá ñaha Nyoo.

Uñi tahan ra cachicá noo chihin ra Jesús nyehé ra yoso caa cuví nu nyacá ñaha Nyoo (Mt. 17.1-8; Mr. 9.2-8)

²⁸ Uña quiví yaha cha catyí ra Jesús tuhun cuan. Ta ndaa ra noo yucu vatyí cua cacan tahvi ra chi Nyoo. Ta cuahan ra Pedro, ra Jacobo ta ra Juan chihin ra.

²⁹ Ta cha ni ri ca cha chicán tahvi ra Jesús, nasama cuhva caá sahma ra ta nuu ra. Tyaqui xaan cuichin nanduvi sahma ra. Ta xiño xaan.

³⁰ Tyicuan ta tuvi uvi tahan ra candatuhún chihin ra, ra Moisés ta ra Elías.

³¹ Ta ndichin xaan nu tayucú ra. Ta cacahán ra tuhun yoso caa cunyehe ra Jesús tundoho Jerusalén ta cuví ra.

³² Ta vasi cuñí xaan ra Pedro chihin ra tahan ra cacusu ra, soco ña quixí ra. Ta nyehé ra cha ndichin xaan cuan nu nanyaá ra Jesús chihin ra cha tayucú chihin ra.

³³ Cuhva cha cuahan coyo ra tayucú chihin ra Jesús cuan, catyí ra Pedro:
—Maestro, vaha xaan cha nyicú ndi ihya. Na savaha ndi uñi tahan vehe, noo chuun, noo chi ra Moisés, ta noo chi ra Elías —catyí ra.

Soco ña chitó ra Pedro tuhun cahán ra.

³⁴ Ta cha ni ri ca cha cahán ra ta quichí noo vico siquí ra. Ta yuhví xaan ra cacuví cha caquihví ra chichi vico cuan.

³⁵ Tyicuan ta chichi vico cuan chiñi ra noo ndusu cha catyí:

—Ican ra ihya cuví Sehi, ta cuñí xain chi ra. Tyasoho ndo tuhun cahán ra —catyí ndusu cuan.

³⁶ Ta cha yaha cahan ndusu cuan, nanyehe ra Pedro ta ra ndihí chihin ra vatyí noo ri ca maa ra Jesús nanyaá yucuan. Ta yori maa chihin cacahan ra tuhun cha nyehe ra.

Nu sanduvahá ra Jesús chi noo ra cuehe luhlu cha yihí tatyí ña vaha chii (Mt. 17.14-21; Mr. 9.14-29)

³⁷ Ta cha inga quiví cha noo ra Jesús yucu cuan, cuaha xaan ñayiví chisatahan chi ra.

³⁸ Tyicuan ta chichi cha cuaha ñayiví cuan, noo ra cana chaa xaan ra, ta catyí ra:
—Maestro, saha tumañi iñi chii. Nyehe ndahví chi sehi. Vatyí noo tuhun maa ra iyó chii.

³⁹ Ta yihí ndihí tatyí ña vaha chi ra. Ta sacanachaa chi chi ra. Ta tuchí chi chi ra nyasava. Ta quitá tiñi yuhu ra. Ta quíñi xaan nyacuví chi chihin ra. Ta ña cuñí maa tatyí ña vaha cuan saña chi ra.

⁴⁰ Cha cahín chihin ra cachicá noo chuhun na tava ra tatyí ña vaha cuan, soco ña cuví chi ra —catyí ra.

⁴¹ Tyicuan ta nacahan ra Jesús ta catyí ra:
—Nyoho, ñu ña chinó iñi cuví ndo. Ta ni caa ni quíñi iyó ndo. ¿Yoso ca tahan quiví cunyai chihin ndo ta cunyehe iñi tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi sehun.

⁴² Ta cuhva cha cua tuhva ra cuehe cuan nu nyaá ra Jesús, ta tuchí tatyí ña vaha cuan chi cue nya sava. Soco ra Jesús tava ra chi tatyí ña vaha cuan. Ta sanduvahá ra chi cue. Tyicuan ta nacuhva cuenda ra chi cue chi sutu cue.

⁴³ Ta tandihí ñayiví, iyo xaan cuñí ñu cha cahnu cha sacuví Nyoo chihin ñu.

Inga chaha tucu cahan ra Jesús tuhun yoso caa cacahíi ñayiví chi ra (Mt. 17.22-23; Mr. 9.30-32)

Cha ni ri ca cha iyo cuñí ñayiví cha sacuví ra Jesús, ta quichaha catyí ra chi ra cachicá noo chihin ra:

⁴⁴ —Tyasoho vaha ndo tuhun cahín. Ta ma naa iñi ndo. Vatyí yuhu Rayíi cha quichí nya gloria, cucuhva cuenda ñu chii ndaha ra xaan iñi chii —catyí ra Jesús.

⁴⁵ Soco ra cachicá noo chihin ra ña cutuñí iñi ra ñáá tuhun cahán ra. Vatyí Nyoo ña chaha ra cha cacutuñi iñi ra. Ta cayuhví ra ndaca tuhun ra chi ra Jesús ñáá cha cuví cuan.

Nu sañaha ra Jesús yóo ra cha cahnu ca cucuví nu nyacá ñaha Nyoo (Mt. 18.1-5; Mr. 9.33-37)

⁴⁶ Yucuan ta ra cachicá noo chihin ra quichaha cacuví yuhu ra tuhun nya ra cahnu ca cuví chichi cha uchi uvi tahan ra.

⁴⁷ Tyicuan ta chitó ra Jesús cha chicá xiñi ra, ta quehen ra chi noo ra cuehe luhlu.

⁴⁸ Ta quichaha catyí ra chi tandihí ra cuan:

—Tatu chihin sivi natíin cuenda ndo chi noo ñayiví ña cahnu sahá chi tari ra cuehe

luhlu ihya, chi yuhu natiin cuenda ndo. Ta tatu natiin cuenda ndo chii, chi maa Nyoo cha saquichij chii, natiin cuenda ndo. Vatyí ra cha ñima ri tuhun sahá maa ndo tuhun, ican ra cuví ra cahnu nuu Nyoo —catyí ra Jesús.

Ñu cha ña cahán chi yo, ican ñu cuan tyinyee chi yo
(Mr. 9.38-40)

⁴⁹ Yucuan ta ra Juan catyí ra chi ra Jesús:
—Maestro, nyehé ndi chi noo ra cuan. Cahán ra sivun ta tavá ra tatyí ña vaha. Soco ña chahá ca ndi. Vatyí ñima chihin yo chicá noo ra —catyí ra.

⁵⁰ Tyicuan ta catyí ra Jesús chi ra:
—Ma casi ndo nu cahan ra. Vatyí yóo ra ña cahán chi yo, tumañi ifi chi yo cuahan ra —catyí ra.

Nu catyí ra Jesús chi ra Juan ta chi ra Jacobo vatyí ña vaha cha chicá xiñi ra

⁵¹ Tuví ifi ra Jesús vatyí cha nyañaa yatyin cha tahán chi cunuhu ra gloria, ta sandunii ra ifi ra. Ta quehen ra ityi ta cuahan ra Jerusalén nu cucuví ra.

⁵² Ta tachí ra tyiño na cahun coyo ra cachicá noo chihin ra ityi nuu ca noo ñuu ityi Samaria. Vatyí canducu ra nu nyitatu ra.

⁵³ Soco ñu Samaria cuan, ña cuñi ñu cha ndoo ra yucuan, vatyí tuví ifi ñu vatyí Jerusalén cuahan coyo ra, ta ñu Samaria ña cuví nyehé ñu chi ñu Jerusalén.

⁵⁴ Cuhva cha chitó ra Jacobo ta ra Juan cha ña chahá ñu Samaria cuan cha ndoo ra yucuan, cuxaan ra. Ta quichaha catyí ra chi ra Jesús:

—Sutu Mañi yuhu, ¿atu cuñun cha sacuvi yo tari sacuví ra Elias? cacan yo chi Nyoo na saquichi ra ñuhú andivi siqui ñáyivi Samaria cuan, vatyí cayu ñu vatyí ña cuñi ñu cha ndoo yo ñuu ñu —cacatyí ra.

⁵⁵ Tyicuan ta nanyehé ra Jesús chi ra. Ta cahan ra chi ra ta catyí ra:

—Taxi ri ndo. Vatyí ña cutuñi ifi ndo ñáá tyiño vachi yuhu.

⁵⁶ Vatyí yuhu Rayii cha quichí nya gloria, ña vachi vatyí sanai añima ñáyivi, Soco vachi vatyí sacaqui chi ñu —catyí ra.

Tyicuan ta cuahan coyo ra inga ñuu.

Ñu cha cuñi quihvi cuenda ra Jesús
(Mt. 8.19-22)

⁵⁷ Ta cuhva cha cachica ityi ra, quita noo ra, ta catyí ra chi ra Jesús:

—Sutu Mañi yuhu, cuñi cunyiquen chuun. Ta cuhin chuhun tandihi ri ityi cuahun —catyí ra.

⁵⁸ Yucuan ta catyí ra Jesús chi ra:
—¿Atu ndichon? Vatyí yuhu ñahri maa cha iyó chii. Ñaña iyó vehe ti. Ta saa iyó taca ti. Soco yuhu Rayii cha quichí nya

gloria ñahri maa nu cava xiñi iyó —catyí ra chi ra cuan.

⁵⁹ Tyicuan ta catyí ra Jesús chi inga ra:
—Coho chihin.

Tyicuan ta nacahan ra cuan ta catyí ra:
—Tata, cuatu noo chii, na cahun xihne cucuchi chi suti —catyí ra.

⁶⁰ Tyicuan ta ra Jesús nacahan ra ta catyí ra chi ra:

—Sandoo chi ñu ña ñohó nuu chi Nyoo natyihí maa ñu chi tahan ndiyi ñu chichi ñuhu. Soco yoho cuahan cua cahan tuhun Nyoo chihin ñáyivi nacuhva cuenda ñu chi ñu chi Nyoo na cunyaca ñaha ra chi ñu —catyí ra.

⁶¹ Tyicuan ta quichaha catyí inga ra chi ra Jesús:

—Tata, cuñi cunyiquen chuun. Soco cuhva xihna na cuhin cucahin chihin ñu vehi —catyí ra.

⁶² Tyicuan ta ra Jesús catyí ra:

—Tari noo ra tahví ñuhú chihin arado, tatu nanyehé chata ra ña quita vaha yucuan nu sahá tyiño ra. Ta tyicuan caa cuví noo ra nyicón chii, tatu yihí ifi ra cha sandoo ra, ña yihí vaha ifi ra cha cuví cunyaca ñaha Nyoo chi ra —catyí ra Jesús chi ra.

10

Nu tachí ra Jesús chi uñi xico uchi tahan ra cucahan tuhun Nyoo chihin ñáyivi

¹ Cha yaha tuhun cuan ta nacachí Sutu Mañi yo Jesús chi inga uñi xico uchi tahan ca ra. Ta tachí ra chi uvi uvi ra noo noo ityi cuahan ra tandihi ñuu ta tandihi ityi nu tahan chi cahun ra Jesús.

² Ta catyí ra chi ra:

—Tari noo itu cahnu vavaha, tyicuan caa nu tyiño sahí. Soco ña cuaha musu. Yucuan chaha cacan ndo chi Nyoo na saquichi ca ra musu. Vatyí tyinyee ra chi ndo cahan ndo tuhun ra chihin ñáyivi.

³ Ta cuahan ndo ta nyehé ndo vatyí cua sacuhin chi ndo tari mbee mahñu lobo. Vatyí lobo tuhvá ti chachí ti chi mbee. Ta tyicuan caa cucuñi ñáyivi satasi ifi ñu chi ndo.

⁴ Ta ma cuiso ndo ni yono ta ni cha quihí xuhun ndo, ni inga ityi ndichan ndo. Sanumi ndo. Ta ma cohon vaha ndo ityi ndatuhun ndo tuhun cha ñima ri tuhun.

⁵ Cuhva cha quihvi ndo chichi vehe noo ñáyivi, cahan vaha ndo chihin ñu. Ta catyí ndo, na coo cha vaha añima ñu.

⁶ Ta tyicuan caa tatu iyó ñáyivi vaha vehe cuan, ndoo cha vaha cuan chihin ñu. Soco tatu yori ñu vaha añima, ma ndoo cha vaha chihin ñu.

⁷ Ta ndogo ndo suri maa vehe cuan. Tatu chaha ñu cha cachi ndo, cachi ndo. Tatu chaha ñu cha coho ndo, coho ndo yucuan.

Vatyí ra sahá tyiño, iyó ityi chi ra cha cachi ra cha sahá ganaa ra. Hin ri maa vehe cuan cunyaa ndo nyacua nya cha chaa chi quivi cha tuhun ndo inga ñuu.

⁸ Ta nu chaa ndo noo ñuu ta vaha cahan ñu chihin ndo, çachi ndo ta çoho ndo tandihi cha cuhva ñu chi ndo.

⁹ Ta sanduvaha ndo chi ñu cuhvi ñuu cuan. Ta çatyí ndo chi ñu: “Cha nyaña yatyin Nyoo ra cunyaca ñaha añima ndo.”

¹⁰ Soco tatu chaa ndo noo ñuu ta ña cuñi ñu tyasoho ñu tuhun cahan ndo, quita ndo ityi cahnu. Ta çatyí ndo chi ñu:

¹¹ “Nyacua nya ñiyaca ñuu ndo cha iñi chaha ndi, ta cunaquisi ndi. Vatyí tari noo seña vatyí ndoo cuatyí ndo siqui ndo. Vatyí Nyoo nyaña yatyin ra chi ndo ta ña tyasoho ndo tuhun cahan ra yoso caa cuñi ra cunyaca ñaha ra añima ndo.” Tyicuan caa çatyí ndo chi ñu —catyí ra Jesús chi ra nyicón chi ra.

¹² Ta quichaha catyí tucu ra chi ra: —Quivi tachi tuñi Nyoo chi ñáyivi, yaha ca cuhva cunyehe ñáyivi ñuu cuan tundoho, ta ñima ca ñáyivi chiyo ta cha naha ñuu Sodoma, ñu chihí cha catyí cuatyí ñu —catyí ra Jesús.

Ñáyivi ña tyasohó tuhun cahan ra Jesús cunyehe ñu tundoho (Mt. 11.20-24)

¹³ Ta catyí ra: —jNdahvi nyoho, ñáyivi ñuu Corazín! Ta jndahvi nyoho, ñáyivi ñuu Betsaida! Vatyí nyehé ndo nyatu cahnu, ta ña nasamá ndo cuhva iyó ndo. Soco ñáyivi ñuu Tiro ta ñuu Sidón cha sana Nyoo ta cha naha cha cuenda cuatyí ñu, ñahri nyatu cahnu nyehé ñu. Soco tyehe ta nyehé ñu quivi cuan cha nyehé nyoho vityin, tañi tyehe ri ndihvi noo ñu sahma tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan.

¹⁴ Yucuan chaha, nyoho ñuu Corazín chihin ñuu Betsaida, ñihi ca cutachi tuñi Nyoo chi ndo ican saha ñáyivi Tiro ta ñáyivi Sidón cuan.

¹⁵ Ta nyoho ñu ñuu Capernaum, cuñi maa ndo vatyí cundaa ndo nyacua nya andivi. Soco cunoo ndo nyacua nya anyaya, vatyí ña quichahá ndo tuhun Nyoo —catyí ra Jesús.

¹⁶ Ta catyí ra chi ndi uñi xico uchi tahan ra cuan:

—Ñáyivi cha tyasohó tuhun cahan nyoho, tuhun cahan yuhu tyasohó ñu cuví cuan. Ta ñu ña quichahá tuhun cahan nyoho, tuhun cahan yuhu ña quichahá ñu cuví cuan. Ta ñu ña quichaha tuhun cahan yuhu, tuhun cahan ra cha saquichí chii, ña quichahá ñu cuví cuan —catyí ra Jesús chi tandihi ra.

Nu nachaq coyo ndi uñi xico uchi tahan ra cha chichahān tuhun Nyoo

¹⁷ Yucuan cuví nu nachaq coyo ndi uñi xico uchi ra cha chichahān tuhun Nyoo chihin ñáyivi. Ta sii xaan cacuvi chi ra. Ta cacatyí ra chi ra Jesús:

—Sutu Mañi yuhu, nyacua nya tatyí ña vaha ta quichahá tuhun cahan ndi tatu cahan ndi sivun —catyí ra.

¹⁸ Tyicuan ta catyí ra Jesús chi ra:

—Ay, yuhu nyehí andivi nu canā cava cuihna, ra nañi Satanás. Tari noo tacha, tyicuan caa canā cava ra.

¹⁹ Ta yuhu, chahí fuerza chi ndo vatyí cuví chasaha ndo chi ra ña vaha cuan. Ta cuví cuaca chaha ndo siqui coo ta tisuhma, ta ñahri cha cuví chi ndo.

²⁰ Soco ma sii xaan cuví chi ndo vatyí cuví tava ñehe ndo tatyí ña vaha cuan. Sii ca cuví chi ndo vatyí nyaá sivi ndo nu libro Nyoo —catyí ra Jesús.

Nu sacahnú ra Jesús chi Nyoo vatyí si cuñi ra vatyí sañahá Nyoo tuhun vaha chi ñu ndahvi (Mt. 11.25-27; 13.16-17)

²¹ Cuhva cuan sii xaan cuñi ra Jesús sahá Tatyí li Nyoo, ta catyí ra:

—Sacahní chuun, Sutu Mañi yuhu, vatyí nyacá ñahun andivi ta ñuhu ñáyivi. Vatyí maun sañahún tuhun maun chi ñu ndahvi ihya. Ta ña sañahún chi ra chitó ta ra cha chiñi tuñi. Tyicuan caa Sutu Mañi yuhu vatyí tyicuan caa cuhva cuñún —catyí ra Jesús.

²² Ta catyí ra Jesús chi tandihi ra sacuvi tyiño nuu ra:

—Tandihí maa tuhun cuan chahā Suti chii. Yori ñohó nuu chii, noo tuhun ri maa Suti ñohó nuu chii. Ta yori ñohó nuu chi Suti, noo tuhun ri mai ñohó nuu chi ra. Ta chi ñáyivi cuñi mai sacote tuhun ra, chi ñu cuan cusacote —catyí ra.

²³ Tyicuan ta nanyehé ra chi ra cachicá noo chihin ra. Ta catyí ra chi ra:

—Sii xaan cuñi nyoho ta ñáyivi cha iyó vityin vatyí nyehé ndo cha sacuvi.

²⁴ Vatyí cuaha xaan rey ta ra profeta Nyoo ta cha naha cuñi ra nyehé ra cha nyehé nyoho vityin. Soco ña nyehé ra. Ta cuñi ra cuñi ra tuhun cha chiñi nyoho vityin. Soco ña chiñi ra —catyí ra Jesús.

Nu sañahā ra Jesús chi yo vatyí tahān chi tyinyee yo chi ñáyivi savaha ri

²⁵ Tyicuan ta chaq noo ra sacuahá cuenda ley vehe ñuhu. Ta quichaha ndaca tuhun ra chi ra Jesús, Vatyí nducu nyehé ra chi ra. Ta catyí ra:

—Maestro, ¿yoso caa cunyacuvi ta cuhin nu coi noo ñáyivi cha ma naa ca maa?

²⁶ Tyicuan ta nacahān ra Jesús, ta catyí ra: —¿Ñáa catyí nu ley? ¿Yoso caa tuhun cha sacuahún?

²⁷ Tyicuan ta nacahañ ra sacuaaha cuenda ley cuan ta catyí ra:

—Catyí ley, cuñi yo chi Nyoo chihin tandihí añima yo ta chihin cha nñi iñi yo, ta chihin tandihí fuerza yo, ta chihin cha tandihí cha chiñi tuñi xiñi yo. Ta cuñi yo chi ñáyivi tahan yo tari cha cuñi yo chi maa yo. Tyicuan caa catyí chi —catyí ra cuan.

²⁸ Tyicuan ta catyí ra Jesús chi ra:

—Ndicha cha cahún. Tyicuan caa sacuvun ta cacu añimon ta coun ñáyivi cha ma naa ca maa —catyí ra Jesús.

²⁹ Soco ra sacuaaha cuenda ley cuan cuñi ra savaha ra chi ra, ta quichaha catyí tucu ra chi ra Jesús:

—¿Yóo cha cuví ñáyivi tahin? —catyí ra.

³⁰ Tyicuan ta nacahañ ra Jesús, ta catyí ra:

—Noo ra quitá ra Jerusalén ta cuahan ra nya ñuu Jericó. Ta tahan ra chi ra suhu. Ta suhú ra tandihí cuii maa cha nyiso ra, nyacua nya sahma ra. Ta cañi ra chi ra nyacua chacun taxin ra chi ra. Ta sandoo maa ra chi ra yucuan.

³¹ Tyicuan ta yaha noo tata sutu ityi cuan. Soco cuhva cha nanyehé ra chi ra catuví cuan nya sava ri yaha ra.

³² Tyicuan ta yaha tucu nonga ra cha yihí cuenda vehe ñuhu, cha nañi levita. Soco cha nanyehé ra chi ra catuví cuan suri nya sava ri yaha ra.

³³ Tyicuan ta quichi tucu noo ra Samaria. Ta cua yaha tucu ra suri ityi cuan. Ta nanyehé ra chi ra catuví yucuan, ta quichi nundahvi cuñi ra nyehe ra chi ra.

³⁴ Ta tuhva ra nu catuví ra, ta quichaha saha ra tatan chi ra. Ta tyihí ra aceitye ta vinu nu cahvi chi ra. Ta sahvi ra noo sahma chata ra. Yaha cuan ta sandaa ra chi ra burru sana ra, ta naquehen ra chi ra, ta cuahan ra chihin ra nu nyaá noo vehe. Ta yucuan saha cuenda ra chi ra.

³⁵ Ta cha inga quivi cha cuñi cuhun ra Samaria cuan. Ta tava ra uvi tahan xuhun. Ta chaha ra chi chitoho vehe cuan. Ta catyí ra chi ra: “Saha cuenda vahun chi ra ihya. Ta cuhvon cha cachi ra. Ta sañon tatan chi ra na nduvaha ri ra. Tatu cuñi ca chi xuhun, tyiyahví mai chuun nandichi”, catyí ra. Yucuan ta cuahan ra —catyí ra Jesús.

³⁶ Nu ndihí nacatyí ra Jesús tuhun ihya, quichaha ndaca tuhun ra chi ra sacuaaha cuan, ta catyí ra:

—Vaha. ¿Chichi cha uñi tahan ra cuan, nya ra cuví ra tahan ra ndahvi cuan? —catyí ra Jesús.

³⁷ Tyicuan ta quichaha catyí ra sacuaaha cuan:

—Ra cha cundahvi cuñi chi ra —catyí ra.

Tyicuan ta quichaha catyí ra Jesús:

—Cuahan ta sacuvi tucu yoho tyicuan caa chihin ñáyivi cha iyó tundoho chii —catyí ra.

Nu chinyaq ra Jesús vehe cu Marta chihin cu María

³⁸ Ta quehen ra Jesús ityi cuahan ra. Ta chaq ra noo ñuu. Ta yucuan iyó noo ñaha cha nañi Marta. Ta chaq ra vehe ña.

³⁹ Ta cu Marta iyó noo cuhu ña cha nañi María. Ta cu María chicunyaq ña yatyin ri chaha ra Jesús, vatyi cuñi ña tuhun cahán ra.

⁴⁰ Soco cu Marta cuaha xaan tyiño nyaá sacuvi ña. Ta chaq ña nu nyaá ra Jesús, ta quichaha catyí ña chi ra:

—Tata. ¿Atu ña chicá xiñi yoho vatyi cuhi sandoo maa ña chii chihin tyiño? Catyí chi ña na tyinyee ña chii —catyí ña chi ra.

⁴¹ Soco ra Jesús catyí ra chi ña:

—Marta, Marta, chicá xaan xiñun ta cutyiño xaan cuñun chihin tyiño chiña.

⁴² Soco iyó noo tuhun cha tahan chi caca xiñi yo. Ta cu María ihya nacachí ña tyiño vaha ca sacuvi ña cha tyasohó ña tuhun cahán. Ta yuhu ma cuví tinyai chi ña —catyí ra Jesús chi cu Marta.

11

Nu sañaha ra Jesús chi ra cachicá noo chihin ra yoso caa cacan tahvi ra chi Nyoo (Mt. 6.9-15; 7.7-11)

¹ Cuví noo chaha cha chicán tahvi ra Jesús. Ta cuhva cha ndihí chican tahvi ra, ta quichaha catyí noo ra chicá noo chihin ra chi ra:

—Sañaha chi ndi yoso caa cacan tahvi ndi chi Nyoo. Tari sañaha ra Juan chi ra chicá noo chihin ra —catyí ra.

² Tyicuan ta catyí ra Jesús chi ra:

—Cua cuhve cuhva chi ndo yoso caa.

Tyehe caa çacan tahvi ndo:

Sutu Mañi yuhu, yoho cha nyaun andívi.

Sacahnu xaan ndi chuun.

Na quichi quivi cha nyaca ñahun ihya siqui ñuhu ñáyivi.

Na sacuvi ñáyivi ihya siqui ñuhu ñáyivi tandihí cuhva cuñi maun, tari cuhva cuví gloria.

³ Cuhva cha cachi ndi tacuhva yoso cuhva yaha ndi noo noo quivi.

⁴ Saha tucahnu iñi chi ndi. Tari maa ndi sahá ndi tucahnu iñi chi ñu tasi iñi chi ndi.

Ma cuhvon cha nducu nyehe ra ña vaha chi ndi, soco sacacu chi ndi tacuhva ma sacuvi ndi cuatyí nuun.

Tyicuan caa cacan tahvi ndo —catyí ra Jesús.

⁵ Ta catyí tucu ra ñandihí:

—Saha yo tuhun tyi nyoho iyó noo amigon, ta chaa ra vehun cha ñuu ta catyí

ra chuun: “Xaa, s̄ha tumañi iñi chii, cuhva noo uñi tahan pan chii.

⁶ Vatyí noo ra tahin nichaa ra vehi. Ta cañi xaan quichi ra. Ta ñahri maa cha iyó chii cuhve chi ra.”

⁷ Ta yoho cunacahun ta catyun chi ra: “Ma sayangon chii, ndee. Vatyí nyasí yuvehi. Ta niqixi chihin sehi. Ta ña cuvi nducuite ta cuhve cha cuhve chuun cha vityin.” Tyicuan caa cucatyun chi ra.

⁸ Ta catyí yuhu chuun. Vasi ra tahun cuvi chi ra, ma nducuiton ta cuhvon chi ra cha numi ri. Soco tatu ndoo ra yucuan, ta ma cundihñi ra cacan ra chuun, sacachan ra yuehuhun ta cana chaa ra chuun tacuhva cha ma cuvi cusun, ta cundihñun cha sacachan ra yuehuhun, tyicuan ta nducuiton ta cuhvon chi ra, tacuhva cha ma sayanga ca ra chuun.

⁹ Ta tyicuan caa tucu nyoho, caçan ndo chi Nyoo. Ta cuhva ra chi ndo. Nanducun ndo ta ñihi ndo. Sacachan ndo yuvehe ta nuña.

¹⁰ Vatyí tatu chican ndo, ñihi ndo. Tatu nducun ndo, ñihi ndo. Ta tatu sacachan ndo yuvehe, nuña yuvehe.

¹¹ Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chahá noo yuu chi sehe ndo tatu chican ndotyin pan. Ta ña tuhvá ndo chaha ndo noo coo chi sehe ndo, tatu chicán ndotyin tiyaca.

¹² Ta ña tuhvá ndo chaha ndo noo tisuhma chi sehe ndo tatu chicán ndotyin ndivi cachi ndotyin.

¹³ Nyoho cha quiñi iyó ndo, soco chitó ndo yoso caa cuhva ndo cha vaha chi sehe ndo. Ta vihi ca Sutu Mañi yo cha nyaá andivi, cuaha ca cha vaha cuhva ra chi ndo tatu cacan ndo chi ra. Ta cuhva ra Tatyí Ii ra cunyaa añima ndo.

Ra xaan iñi chi ra Jesús catyí ra vatyí chihin fuerza cuihna sacuví ra milagru (Mt. 12.22-30; Mr. 3.20-27)

¹⁴ Ra Jesús tavá ra tatyí ña vaha cha yihí chi noo ra cha ñihi sahá cuihna. Ta cuhva cha quitá tatyí ña vaha cuan chi ra ñihi cuan, nacahan ra. Tyicuan ta ñáyivi, iyo xaan cuñi ñu.

¹⁵ Ta yihí ñu catyí ñu: —Ra ihya, tavá ra tatyí ña vaha soco chihin fuerza ra Beelzebú ra cuví nuu chi cuihna —catyí ñu.

¹⁶ Ta yihí ñu cuñi ñu nducu nyehe ñu chi ra, ta chicán ñu chi ra Jesús na savaha ra noo seña chi ñu chihin tunyee iñi Nyoo.

¹⁷ Soco ra Jesús chitó ra tuhun chicá xiñi ñu. Ta quichaha catyí ra chi ñu:

—Tatu gobiernu ta cacusin ra, cuaha ri ityi nanduvi ra, cucañi tahan ra chihin tahan ra, ta cundihí tuhun cha cunyaca

ñaha ra. Tatu noo vehe ta cacusin ñu chihin tahan ñu, cutiví nu nyicú ñu.

¹⁸ Ta tyicuan caa tucu cuihna. Tatu tandihí ra cacusin ra chihin tahan ra cundihí fuerza cha iyó chi ra. Ta ihya catyí chi ndo tyehe caa vatyí nyoho catyí ndo vatyí chihin fuerza ra Beelzebú tavé tatyí ña vaha.

¹⁹ Soco tyehe ta tavé tatyí ña vaha tari cuhva catyí ndo, ndaça tuhun ndo chi ra nyicú chihin ndo yóó chi fuerza tavá maa ra tatyí ña vaha. Maa ra sacoto ra chi ndo cha ndicha vatyí nyoho tondo ri chicá xiñi ndo.

²⁰ Soco catyí chi ndo vatyí yuhu tave tatyí ña vaha chihin fuerza Nyoo. Ta cuñi chi catyí cuan vatyí ndicha cuñi Nyoo ra nyacá ñaha añima ñáyivi cha chaá ra nu nyicú ndo.

Nu sañahá ra Jesús vatyí ñihi ca fuerza Nyoo ta ñima ca fuerza cuihna

²¹ Tatu noo ra iyó vavaha fuerza chi ra ta nyisó ra mityí ra, ta sahá cumi ra vehe ra. Ñohó xehe vaha ndaha tyiño ra chichi vehe ra tacuhva cha ma cuvi tinyaa ra suhu.

²² Soco tatu quichi inga ra cha cuaha ca fuerza iyó chi, ta cañi tahan ra chihin ra, ta cuvi chasaha ra chi ra, tyicuan ta tinyaa ra ndaha tyiño ra, ta sacha ra chi ra tahan ra.

²³ Ñáyivi ña sahá tyiño chihin, sativí ñu tyiño sahí. Ta ñu ña tyinyéé chii cha chahán ñu tuhun Nyoo chihin ñáyivi, cuñi chi catyí vatyí ña chahá ñu cha coto ñáyivi tuhun cahín.

Nu sañahá ra Jesús chi yo yoso caa ndichi tucu tatyí ña vaha inga chaha tatu naa iñi yo chi Nyoo (Mt. 12.43-45)

²⁴ Tatu noo tatyí ña vaha quitá chi noo ñáyivi, chicá noo chi noo ñuhu ityi, nanducú chi noo nu nyitatu chi. Soco ña nañihi maa chi nu nyitatu chi, tyicuan ta ndichi xiñi chi: “Cunuhu tiqui nya vehi nu quite.”

²⁵ Yucuan ta nachaa chi añima nu quitá chi. Ta nanyehé chi vatyí ndu xaan ta vii xaan.

²⁶ Tyicuan ta cua naquehen chi ucha ca tahan tatyí ña vaha cha yaha ca cuhva ta ican saha maa chi. Tyicuan ta in ri quihvi tandihí chi añima ñu cuan. Yucuan chaha yaha ca cuhva nanduvi ñu ican saha cha cuví maa ñu —catyí ra Jesús.

Ñu cha ndicha iyó vaha ñáyivi

²⁷ Cha ni ri ca cha chahán ra Jesús tuhun cuan, ta cana chaa noo ñaha cha ñohó mahñu ñáyivi cuan. Ta quichaha catyí ña:

—Ñana cha sií cuví chi ñaha cha sacacu chuun ñaha cha chaḡ caxun —catyí ña.

²⁸ Soco ra Jesús catyí ra:

—Sií ca cuñi ñu cha chiñí tuhun chahán Nyoo ta quichahá ñu —catyí ra.

Ñáyivi ña vaha, maa ri maa nyatu cahnu cuñí ñu nyehe ñu

(Mt. 12.38-42; Mr. 8.12)

²⁹ Tyicuan ta chaḡ coyo ñáyivi nu nyaá ra Jesús. Ta quichaha catyí ra chí ñu:

—Ñáyivi cha iyó vityin quiñi xaan iyó ñu. Ta nyiyo iñi ñu. Cuñí ñu nyehe ñu seña ta cha iyo. Soco noo ri cunyehe ñu, tahan cha sacuví Nyoo chihin ra Jonas.

³⁰ Tari ra Jonás cuví ra seña chi ñáyivi ñuu Nínive ta cha naha, tyicuan caa tucu yuhu Rayi cha quichi nya gloria, cuví tari noo seña chi ñáyivi cha iyó vityin.

³¹ Quiví tachi tuñi Nyoo chí ñáyivi cunandoto ñaha cuví reina itiyi sur ta cha naha, ta cucatyí ña vatyi cahun ndo anyaya, vatyi maa ña vasi cañi ñuu ña, soco quichi ña, quichi tyasoho ña tuhun cha chíñi tuñi cahan ra Salomón. Ta ihya cahnu ca cuví ra cha cahan chihin ndo vityin ta ñima ca ra Salomón.

³² Ta quiví cutuñi chi tandihí ñáyivi, cunducuita ñu chíyo ñuu Nínive ta cha naha, ta cucatyí ñu vatyi nyoho ñu cha iyó vityin cahun ndo anyaya, vatyi maa ñu ñu Nínive, canasama ñu cuhva iyó ñu quiví cahan ra Jonás tuhun Nyoo chihin ñu. Ta vityin yuhu ra cahnu ca cahan chihin ndo ta ñima ca ra Jonás.

Nu sañaha ra Jesús vatyi na saha yo cuenda añima yo coto vaha ñahri cha ndichin Nyoo nyaá

(Mt. 5.15; 6.22-23)

³³ Yori ndo tyaa ndo lámpara ta tyihí xehe ndo, o tyihí ndo chíchi noo caja. Vatyi ñuhu cuan tahán chi coso minoo nu sucun. Tacuhva quihvi ñáyivi vehe ndo, soco ndichin.

³⁴ Chíti nuu ndo noo cha sandichin chí ndo cuví. Ta tyicuan caa tucu añima ndo, tatu iyó cha ndichin Nyoo añima ndo, vaha ñáyivi cuví ndo. Tatu ñahri cha ndichin Nyoo nyaá tari noo ra cuaa cuví ndo, ña cuví nyehe ndo itiyi vaha cha cuahan nu nyaá Nyoo.

³⁵ Yucuan chaha saha ndo cuenda añima ndo. Tatu nyaá cha ndichin Nyoo chihin ndo, o nyaá cha ñaa iñi.

³⁶ Tatu tyitu añima ndo chihin cha ndichin Nyoo ñahri ca maa noo nu ñaa iñi iyó chí ndo, vatyi sandichin chí tandihí ndo. Tari cha nyaá noo lámpara sacatá chí ñuhu chí ndo cuví cuan —catyí ra Jesús.

Cahan ra Jesús chí ra casacuaha cuenda ley vehe ñuhu ta chí ra fariseo, ra caquichaha xaan ley cuan

(Mt. 23.1-36; Mr. 12.38-40; Lc. 20.45-47)

³⁷ Cuhva cha ndihí cahan ra Jesús nuu ñáyivi, noo ra fariseo, ra quichaha xaan ley vehe ñuhu, catyí ra chí ra Jesús, vatyi na cahun ra cucachi ra nya vehe ra. Ta chaḡ

ra Jesús vehe ra. Ta quihvi ra chicunyaa ra mesa.

³⁸ Tyicuan ta ra fariseo cuan iyo cuñí ra vatyi ña nacatya ra Jesús ndaha ra, tari cuhva costumbre maa ñu cha cumañi cachi ñu.

³⁹ Soco ra Jesús catyí ra chí ra:

—Nyoho, ra cacuví fariseo, tari cha chata ri vaso ta coho sanduvii nyoho. Soco itiyi chíchi, quiñi caa. Vatyi ña nacatya ndo. Tyicuan caa nyoho. Vatyi cuñí ñáyivi vatyi vaha ñáyivi cuví ndo. Soco xehe ri suhu ndo ta ña sacuví ndo cha vaha.

⁴⁰ Ndava xaan iñi ndo. ¿Atu ña chitó ndo vatyi ra cha savahá itiyi chata vaso, suri maa ra savahá itiyi chíchi? Vatyi tari vaso cuví ndo.

⁴¹ Tahán chí sahá ndo tumañi iñi chí ñáyivi, ta tyinyee ndo chí ñu. Sacuvi ndo cha vaha chihin ñu, tyicuan ta nduvii tucu itiyi chíchi ndo.

⁴² ¡Ndahvi nyoho ra fariseo! Vatyi nyoho vasi vaha chaha ndo diesmo chí Nyoo cuenda yucu cha nañi menta ta ruda ta ñáá ndihí ca yucu cha tachí ndo, soco ña quichahá ndo cuhva cha vaha cha cuñi Nyoo sacuvi yo, ta cha cuñi yo chí ra. Ta ican ihya cuví cha tahán chí sacuvi ndo, soco ma sandihí ndo cha cuhva ndo diesmo ñandihí.

⁴³ ¡Ndahvi nyoho cha cuví ndo fariseo! vatyi cuñi ndo cunyaa ndo nu tyayu vaha ca chíchi vehe ñuhu. Ta cuñi ndo cha saha ñáyivi ñáyivi chí ndo nuyahvi.

⁴⁴ ¡Ndahvi nyoho ra sacuaha cuenda ley, ta nyoho ra fariseo! Vaha sahá ndo chí ndo, soco cuví ndo tari noo ñaña ndiyi cha ña quetuví. Vatyi yahá ñáyivi siqui soco ña chitó ñu ñáá cha ñohó chíchi ñaña cuan. Vatyi ñahri seña catuví nu yihí ndiyi cuan. Cuñi maa ñu vatyi vaha ndo, soco ña chitó ñu vatyi ña vaha añima ndo —catyí ra Jesús.

⁴⁵ Tyicuan ta nacahan noo ra sacuahá cuenda ley vehe ñuhu, ta catyí ra:

—Maestro, cha cattyún tyehe caa, nañi tucu chihin chí nyuhu —catyí ra.

⁴⁶ Tyicuan ta quichaha catyí ra Jesús chí ra:

—¡Ndahvi tucu nyoho ra casacuaha cuenda ley vehe ñuhu! Vatyi sanducuaha ca ndo ley cha tachí Nyoo ta cha naha. Ta ña tahán chí. Ta yori ndoyó carga cuan, ta saniñi ndo na sacuvi ñu ta ni maa ndo ni chíñi ña tyinyee ndo chí ñáyivi.

⁴⁷ ¡Ndahvi nyoho! Vatyi sanduvahá vaha ndo ñaña nu ñohó yiqui ra profeta Nyoo cha cachahñi sutu chahnu ndo ta cha naha.

⁴⁸ Chihin cuan cuñi chí catyi vatyi ndoó ndo vaha cha sacuvi sutu chahnu ndo ta cha naha. Vatyi sutu ndo cachahñi ra chí ra profeta Nyoo. Ta nyoho sanduvahá ndo ñaña ra.

⁴⁹ Yucuan chaha catyí Nyoo ta cha naha vatyí cutachi ra suhva ra profeta ta ra caca tyiño ra nu nyicú ndo. Ta cucahñi ndo suhva ra ta inga ra cusacono ndo chi ra.

⁵⁰ Ta ndicha tyicuan caa sacuvi ndo. Nyoo cutachi tuñi ra chi ndo cha cuenda tandihí ra profeta ra cachahñi sutu chahnu ndo nyata chinq ñuhu ñayivi ta nyacua nya vityin.

⁵¹ Nyacua nya niñi ra Abel cha chati cha chahñi ra Caín yañi ra, ta nyacua nya niñi ra Zacarías cha cachahñi ñu chichi vehe ñuhu vatyin nu nyaá arta. Yucuan chaha catyí Nyoo vatyí cutachi tuñi ra chi ñayivi cha iyó vityin cha catyí cuatyí ñu chiyo ta cha naha.

⁵² ¡Ndahvi nyoho ra casacuaha cuenda ley vehe ñuhu! Vatyí tari cha tyihí xehe ndo ndaha ticu cuenda yuvehe nu quihvi ñayivi ityí Nyoo. Ta ni maa ndo ña quihvi ndo nu nyaá Nyoo. Ta ni ri ña chahá ndo cha quihvi inga ñayivi cha cuñi quihvi —catyí ra Jesús.

⁵³⁻⁵⁴ Ndihi cahan ra Jesús tuhun cuan, ta quita ra. Soco ra casacuaha ley vehe ñuhu chihin ra fariseo, nduxaan xaan ra ta quichaha cuquiñi cuñi ra nyehe ra chi ra Jesús. Ta canducu ra cuhva yoso caa cahan ra Jesús noo tuhun ña vaha, ta tyaa ra cuatyí siqui ra.

12

Nu sañahá ra Jesús vatyí ma cuvi tixehe yo cuatyí yo

¹ Cuenda mil ñayivi ndu iñ ri nyacua nañi tahan ñu, vatyí cuaha xaan ñu. Tyicuan ta ra Jesús catyí xihna ca ra chi ra cachicá noo chihin ra:

—Saha ndo cuenda chi ndo chihin ra fariseo coto sandahvi ñaha ra chi ndo. Vatyí tari ndaa pan chihin yuchan iya, tyicuan caa cuví cuatyí ra tyí sahá ra tyí vaha ra. Soco ma cuví tixehe ra cuatyí ra.

² Vatyí ñahri noo cha ñohó xehe ta cuñun, tyí ma natuvi, ta ñahri cha xehe ta cuñun, vatyí ma coto ñayivi.

³ Yucuan chaha ñáá ndihí tuhun cha cahán ndo nu xehe, cuquita chi nu ndichin. Ta ñáá ndihí tuhun cha cahan ndo chichi vehe ndo, cucuiñi tandihí ñayivi noo quivi.

¿Yóo chi tahán chi cuyuhvi yo, chi ñayivi o chi Nyoo?

(Mt. 10.28-31)

⁴ Ta catyí chi ndo cha cuví ndo ra tahn, vatyí ma yuhvi ndo chi ra chahñi coño ñuhu ri. Vatyí yahá tuhun cuan ta ñahri ca cha cuví sacuvi ra.

⁵ Soco cua catyí chi ndo yóo chi tahán chi cuyuhvi ndo. Yuhvi ndo ta quichaha ndo, soco chi maa Nyoo ra cuví tinyaa ñayivi ndo. Ta yaha cuan ta cuví tyihí ra añaime ndo anyaya.

⁶ 'Saa, ña yahvi nyaá ti. Cuví sata yo ohon tahan ti chihin uvi ri xuhun. Soco vasi nyihí ri ti, Nyoo ña naa iñi ra chi ni noo ti.

⁷ Ta nyoho, yahvi ca nyaá ndo nu Nyoo ta ñima ca cuaha saa ta nyacua nya ixí xiñi ndo ta chitó Nyoo yoso tahan nyaá. Yucuan chaha ma yuhvi ndo.

Ma yuhvi yo cahán yo tuhun ra Jesucristo nuu ñayivi
(Mt. 10.32-33; 12.32; 10.19-20)

⁸ Catyí chi ndo vatyí nya ndo cahán ndo tuhín chihin ñayivi, tyicuan caa tucu cucahin tuhun ndo nu ángel Nyoo gloria. Vatyí yuhu Rayi cha quichi nya gloria cuví.

⁹ Soco nya nyoho cha cahán nuu ndo cahán ndo tuhín chihin ñayivi, tyicuan caa tucu yuhu, ma cahin tuhun ndo nuu ángel cuenda Nyoo.

¹⁰ Ta vasi cahán ñayivi chi yuhu Rayi cha quichi nya gloria, Nyoo cusaha ra tuchanu iñi chi ñu. Soco yóo cha cahán ña vaha siqui Tatyí Ii Nyoo ma ñihí ñu tuchanu iñi cuenda cuan.

¹¹ 'Cuhva cha cunyaca ñayivi chi ndo chichi vehe ñuhu, o nu juez, o nuu ra cuví tyiño, ma caca xiñi ndo ñáá tuhun cunacahan ndo.

¹² Vatyí cuhva cha cua nacahan ndo, yucuan cuhva cuhva maa Tatyí Ii Nyoo ñáá tuhun tahán chi nacahan ndo —catyí ra Jesús.

Nu chahá ra Jesús cuhva vatyí ña tahán chi cunyicon yo cha tyayí

¹³ Noo ra cha ndihí chihin ñayivi cuaha cuan, catyí ra chi ra Jesús:

—Maestro, çatyí chi yañi vatyí natahvi sava ra cha tyayí cha sandoo sutu ndi chi ndi —catyí ra.

¹⁴ Tyicuan ta catyí ra Jesús chi ra:

—¿Yóo cha tyiso chi yuhu cha cuví juez ta catyí ndo vatyí tahvi sava yuhu cha chii ndo? —catyí ra.

¹⁵ Tyicuan ta quichaha catyí tucu ra:

—Saha ndo cuenda ta ma nyiyo iñi ndo cha tyayí. Vatyí ña chiñuhú ri cha coo cuaha ndaha tyiño yo tacuhva coo vaha yo ñayivi —catyí ra.

¹⁶ Tyicuan ta chahá ra Jesús noo cuhva ihya chi ñu:

—Chiyó noo ra tyayí. Ta cuaha xaan tyiño sahá ra iyó.

¹⁷ Tyicuan ta ndichi xiñi ra: “¿Yoso caa cusacuvi? Ñahri nu naquehen vahi tandihí tyiño sahi.

¹⁸ Soco cha chité yoso caa cunyacuvi.

Cusatani yaca nyihí nu yihí niñi, vatyí nyihí xaan. Ta cusavahi cha nahnu ca. Ta yucuan cunaquehen vahi tandihí maa niñi cha cuquita nu iyó tyiño sahi.

¹⁹ Tyicuan ta cuaha cuiya ma saha tyiño que. Cunyatati ta cusii cuñi. Ta cachi vahi. Ta cucoho vahi”, ndichi xiñi ra.

²⁰ Soco catyí Nyoo chi ra: “Tondo xaan iyón. Vatyí vityin cha cuaa cucúvun. Ta cha cumí vahun ¿yóó chi cua ndoo?”

²¹ Tyicuan caa cuví chi ñáyiví cha sacayá tandihí cha tyayíi soco ñahri maa iyó chi ñu nuu Nyoo —catyí ra Jesús.

Ma caca xaan iñi yo ñáá ndihí cha chiñuhú chiyó
(Mt. 6.25-34)

²² Tyicuan ta quichaha catyí ra Jesús chi ra cachicá noo chihin ra:

—Catyí chi ndo, vatyí ma caca xaan xiñi ndo yoso caa ñihi ndo cha cachi ndo, ta tuhun sahma cuihno ndo.

²³ Vatyí yahví ca nyaá ñayiví yo ican saha cha cachi yo. Ta yahví ca nyaá coño ñuhu yo ican saha cha cuihno yo.

²⁴ Saha ndo cuenda saa vatyí ña sahá tyiño ti. Ta ni ri ña naquehén vaha ti cha cachi ti. Soco chachí ti, vatyí Nyoo chahá ra cha cachi ti. Ta nuu Nyoo yahví ca nyaá nyoho ta ñima ca saa.

²⁵ Ta vasi chicá xaan xiñi ndo soco ma cuví sandusucun ca ndo ni chiin ca chi ndo.

²⁶ Tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun tandihí ca cha chiñuhu chi ndo?

²⁷ Saha ndo cuenda yoso caa iyó tu ita vatyí ña sahá tyiño tun. Soco catyí chi ndo vatyí ni rey Salomón chihin tandihí cha tyayíi ra ta ña tyaquí cha ñihno ra tari cha sacuihno Nyoo chi tu ita cuan.

²⁸ Tatu tyicuan caa sacuihno Nyoo chi tun ita cha iyó nu chiqui vityin, ta tyaan cucayu tun chichi horno, ta nyaca cuví chi nyoho ta ma sacuihno ra. Soco maa ndo ña chinó vaha iñi ndo chi ra.

²⁹ Ma caca xaan xiñi ndo tuhun cha cachi ndo ta cha coho ndo.

³⁰ Vatyí ñáyiví cha ña chinó iñi chi Nyoo chicá xiñi ñu tuhun ihya. Soco nyoho chinó iñi ndo chi Sutu yo Nyoo ta maa ra chitó ra ñáá cha chiñuhú chi ndo.

³¹ Vaha ca cha nanducu ndo yoso caa nacuhva cuenda ndo chi ndo chi Nyoo vatyí cunyaca ñaha ra añima ndo. Ta tyicuan caa ta ñihi ndo tandihí cha chiñuhú chi ndo.

Cha vaha cha iyó gloria
(Mt. 6.19-21)

³² Ma yuhví nyoho, mbee sane. Vasi ña cuaha ndo soco Sutu yo Nyoo cuñi ra chi ndo. Yucuan chaha cucuhva ra quihví ndo nu nyacá ñaha ra.

³³ Xico ndo cha iyó chi ndo. Ta cuhva ndo chi ñu ndahví. Tatu sacuví ndo tyehe caa, sacayá ndo cha vaha nuu Nyoo cuví cuan. Vatyí nuu Nyoo ña ndihí cha vaha cuan.

Vatyí ni ri ra suhu, ni quití, yori cha sativi iyó yucuan.

³⁴ Vatyí nuu cunyaa cha tyayíi ndo, yucuan cuví nu nyaá xiñi ndo. Ta yucuan cucunya añima ndo —catyí ra.

Nu sañahá ra Jesús chi yo yoso caa cuatu tuhva yo chi ra quivi quichi ra inga chaha

³⁵ Cuatu tuhva vaha ndo quivi quichi inga chaha.

³⁶ Ta cuví ndo tari musu cha canyatú tuhva chi chitoho ñáá cuhva ndichi ra cha cuahan ra noo vico tandaha. Ta nyatú tuhva ra, vatyí tacuhva tañi tyehe ri nuña ra yuvehe cuhva cha sacachan chitoho ra cha nachaa ra.

³⁷⁻³⁸ Ta caa cuhva ri cuan sii xaan cuñi ra nyehe ra chi ra. Vatyí nyatú tuhva ra chi ra nyacua nya nachaa ra, vasi cha cuaa, vasi ñaa ca. Ta cuatya ra chi musu cuan yuhu mesa ta cacachi ra. Tyicuan ta sii xaan cucuñi musu cuan. Vatyí tyicuan caa nyacuví chitoho ra chihin ra.

³⁹ Ta coto ndo tuhun ihya vatyí tatu noo chitoho noo vehe, ta coto ra ñáá cuhva cuquihví ra suhu vehe ra, saha ra cuenda vehe ra. Ta ma cuhva ra quihví ra suhu cuan chichi vehe ra. Vatyí coto quehen ra tandihí cha iyó chi ra.

⁴⁰ Ta tyicuan caa cuví tucu nyoho, cuatu tuhva ri ndo. Vatyí yuhu Rayíi cha quichi nya gloria, sana ri iñi ndo ta cuquichi —catyí ra Jesús.

Musu vaha ta musu ña vaha
(Mt. 24.45-51)

⁴¹ Tyicuan ta quichaha ndaca tuhun ra Pedro chi ra Jesús:

—¿Yóó chi cuenda cahun tuhun ihya? ¿Atu cha cuenda maa ri maa ndi, o cha cuenda tandihí ñáyiví?

⁴² Tyicuan ta nacahan ra Jesús, ta catyí ra chi ra:

—Musu cha tyasohó tuhun chahán chitoho, yucuan cuví musu vaha. Vatyí sahá cuenda ra vehe chitoho ra. Ta vaha ri cuhva chahá ra cha cachi tandihí ca musu cuan.

⁴³ Ta sii xaan cuví chi musu cuan tatu cuhva cha sahá tyiño ra, ta nachaa chitoho ra. Vatyí quichaha ra tandihí cha tahán chi sacuvi ra.

⁴⁴ Ta catyí chi ndo vatyí cha ndicha cuví. Vatyí chitoho ra cunatyaa ra tandihí cuii cha cumí ra ndaha ra. Vatyí vaha quichahá ra chihin tyiño sahá ra.

⁴⁵ Soco tatu chicá xiñi musu cuan vatyí naha xaan cuahan chitoho ra, ta quichaha nyacuvi ra cha ña vaha chihin ñu nyaá tyiño yoo, ta chihin ra canycú tucu sahá tyiño cuan. Ta ña cuñi ra sahá tyiño ra. Tyiño chachí ta tyiño chihí ndixi iyó ra.

⁴⁶ Tyicuan ta sana iñi ra ta ndichi chitoho ra quivi cha ña nyatú ra chi ra noo cuhva cha ña chito ra. Tyicuan ta cutachi tuñi chitoho ra chi ra, tari tuhva maa ra chihin musu cha ña quichahá tuhun cahán ra.

⁴⁷ Ta noo musu cha chitó yoso caa iyó chitoho ta ña sacuvi tari cuhva cuñi chitoho ra, cuaha xaan tundoho cunyehe ra.

⁴⁸ Soco tatu noo musu cha ña chitó ta sacuvi ra cha ña vaha, tachi tuñi chitoho ra chi ra. Soco chihin ri, vatyí ña chitó ra, ta chinyacuví ra. Tatu noo musu ta cuaha cha chaha chitoho ra chi ra, cuaha tahán chi nacuhva cuenda ra chi chitoho ra. Ta ra cha cuaha xaan nyaá ndaha, cuaha xaan tahán chi nacuhva cuenda ra chi chitoho ra.

Nu catyí ra Jesús vatyí cha catyí ra cucañi tahan ñáyivi chihin tahan ñu
(Mt. 10.34-36)

⁴⁹ Tari cha sanatahín ñuhu síqui ñuhu ñayivi, tyicuan caa cuví tyiño vachi. ¡Ñana cha cuñi cha nacayu catyín ri ñuhu ihya!

⁵⁰ Vatyí nyaá yahi noo tundoho cahnu, ta ñana cha nyehí tundoho nyacua nya ndihi tyiño sahí.

⁵¹ Cuñi maa ndo vatyí cha vachi cuhve cha taxi ri coo ndo síqui ñuhu ñayivi ihya. Soco yuhu vachi vatyí sasiín chi ndo.

⁵² Vatyí cha vityín ta ityí nuu ca, ohon ñáyivi noo vehe cucusín ñu. Uñi ñu cañi tahan chihin uvi ñu. Ta uvi ñu cucañi tahan chihin uñi ñu.

⁵³ Ta ra cuví sutu, cucañi tahan ra chihin sehe ra. Ta ra cuví sehe cucañi tahan ra chihin sutu ra. Ta ñu cuví síhi cucañi tahan ñu chihin sehe ñu. Ta ñu cuví sehe cucañi tahan ñu chihin síhi ñu. Ta ñu cuví tyiso cucañi tahan ñu chihin chono ñu. Ta ñu cuví chono cucañi tahan ñu chihin tyiso ñu —catyí ra Jesús.

Nu catyí ra Jesús chi ñáyivi vatyí ña nacotó ñu vatyí cha chaq quivi cha quichi Sehe Nyoo
(Mt. 16.1-4; Mr. 8.11-13)

⁵⁴ Catyí tucu ra Jesús chi ñáyivi cuaha cha nyicú yucuan:

—Tatu cha nyehe ndo vatyí cha ndihví vico, catyí ndo vatyí cua coon savi. Ta tyicuan caa cuví.

⁵⁵ Tatu cha nyehe ndo vatyí cha caá tatyí ityí tyañuhu, catyí ndo vatyí cha chaa quivi ihñi. Ta tyicuan caa cuví.

⁵⁶ Nyoho sahá ndo tyi chitó ndo, ta nacotó ndo tandihi tuhun andivi, ta tandihi tuhun ñuhu ñayivi. Soco ¿ñáá tuhun cha ña nacotó ndo ñáá tyembu nyaá ndo vityín?

Nducu yo cuhva yoso caa coo vaha yo chihin ra chicán cuatyí chaha yo coto cuhun yo vehe caa
(Mt. 5.25-26)

⁵⁷ ¿Ñáá tuhun ña sahá ndo cuenda nya cha vaha ta nya cha ña vaha?

⁵⁸ Tatu noo ra chicán cuatyí chahun ta cuahun chihin ra nu nyaá ra cuví tyiño, ityí cuahun ndycun cuhva ni coo vahun chihin ra cha cumañi cha ndo nu nyaá ra cuví tyiño. Coto nacuhva cuenda ra chuun chi juez. Ta juez cuan cunacuhva cuenda ra chuun chi policia. Ta policia cuan cutyíhi ra chuun chichi vehe caa.

⁵⁹ Tatu tyicuan caa cuví, catyí chuun vatyí ma quiton nyacua nya tyiyahvun tandihi cha tahán chi tyiyahvun —catyí ra Jesús.

13

Cuñi chi cha nasama yo cuhva iyó yo o cunyehe yo tundoho

¹ Tyicuan ta suri quivi cuan canyicu suhva ra. Ta quichaha canacatyí ra chi ra Jesús yoso caa cha nyacuví ra Pilato chihin suhva ra Galilea. Vatyí tyíhi ra tyiño na cucahñi sindaro chi ra Galilea cha cachahá ofrenda chi Nyoo vehe ñuhu. Ta nasacá ra ñiñi ra cuan chihin ñiñi quití cha cua cuví ofrenda cuan.

² Ta nacahán ra Jesús ta catyí ra chi ra:

—¿Atu chicá xiñi nyoho vatyí cahnu xaan ca cuatyí ra Galilea cuan cha nuu tandihi ra ityí ñuu ra. Ta yucuan chaha cachihí ra?

³ Ñima. Vatyí tatu nyoho ta ma nasama ndo cuhva iyó ndo, tyicuan caa tucu cunaa nyoho.

⁴ Ta ndi chahun uñi ra cachihí cha canacava torre Siloé cuan síqui ra. ¿Atu cuaha ca cuatyí ra ta ican saha inga ra cha iyó ñuu Jerusalén cuñi maa ndo?

⁵ Ñima. Vatyí tatu nyoho ta ma nasama ndo cuhva iyó ndo, cunaa tucu nyoho.

Nu catyí ra Jesús noo cuhva yoso caa nyatú Nyoo cha nasama yo cuhva iyó yo

⁶ Tyicuan ta chahá ra Jesús noo cuhva. Ta catyí ra:

—Noo ra iyó yutun cha nañi higo chi ra. Ta nanyaá tun nu ñuhú ra. Ta chahán ra chinyehe ra tatu iñi chiti tun. Ta nanyehe ra vatyí ñahri.

⁷ Ta quichaha catyí ra chi ra sahá cuenda chi tun: “Cha uñi cuiya tyito ri quichi nyehi tatu iyó chiti tun. Ta ñahri maa chiti tun iñi. Na cahnya yo chi tun. Vatyí ¿ñáá ri tuhun sayangá tun nu ñuhú ihya? Vatyí ñahri chiti chahá tun”, catyí ra.

⁸ Soco ra cha sahá cuenda ñuhú cuan quichaha catyí ra: “Tata, ma cahnya yo chi tun vityín. Na cuinanyaa maa tun nonga cuiya ihya. Cusanduvite ñuhú chaha tun ta cutyíhi ñuhú tyahyu.

⁹ Vasi tyicuan caa ta cuhva tun chiti. Soco tatu ña chaha tun chiti, tyicuan ta cahnya yo chi tun”, catyí ra.

Quivi nyitatuñ ñáyivi sanduvaha ra Jesús chi noo ñaha tihí chata

¹⁰ Noo quivi cha nyitatuñ ñáyivi sañahá ra Jesús chi ñu chichi vehe ñuhu.

¹¹ Ta yucuan nyaá noo ñaha cha yihí tatyí ña vaha chi. Ta cha chahun uñi cuiya cuhvi ña cha ndutihí chata ña. Ta ña cuví ndundoo ña.

¹² Tyicuan ta nanyehę ra Jesús chi ña. Ta cana ra chi ña. Ta quichaha catyí ra chi ña: —Cha nduvahun. Ñahri ca cuehe ndohún —catyí ra chi ña.

¹³ Tyicuan ta tyiso ra ndaha ra siqui ña. Ta caa cuhva ri cuan ta ndundoo ña.

Tyicuan ta quichaha sacahnu ña chi Nyoo.

¹⁴ Soco ra cuví nuu vehe ñuhu, cuxaan xaan ra. Vatyí quivi nyitatuñ ñáyivi sanduvaha ra Jesús chi ña. Ta quichaha catyí ra chi ñáyivi canyicú cuan:

—Iyó iñu tahan quivi tahanan chi saha tyiño yo. Yucuan quivi quichi ndo quichi cuví tatan chi ndo. Ta ma quichi ndo quivi nyitatu yo —catyí ra.

¹⁵ Tyicuan ta ra Jesús quichaha catyí ra chi ra:

—Nyoho cha sahá ndo tyi vaha ndo. ¿Atu ña ndachi tucu nyoho quiti sana ndo vatyí sacoho ndo ndutya chi ti quivi nyitatu yo?

¹⁶ Ta tyicuan caa tucu ñaha ihya, vachi ña tata ra Abraham. Ta cha chahun uñi cuiya nuñhí ña chihin cuehe ihya sahá ra ña vaha. Ta yori ndachi chi ña. ¿Atu ña tahanan chi ndachi yo chi ña vasi quivi nyitatu yo? —catyí ra Jesús.

¹⁷ Tyicuan ta cuhva cha catyí ra Jesús tuhun cuan, tandihí maa ra xaan iñi chi ra cahan cuví nuu ra. Soco tandihí maa ñáyivi cusii cuñi ñu chihin cha cahnu cha sacuví ra Jesús.

Nu catyí ra Jesús vatyí tari noo chiti mostaza cuví cha nyacá ñaha Nyoo añima yo (Mt. 13.31-32; Mr. 4.30-32)

¹⁸ Tyicuan ta quichaha catyí ra Jesús:

—¿Ñáa chihin sandiqui tahn cha nyacá ñaha Nyoo añima yo? ¿Ñáa chihin sandu inuu ri yo?

¹⁹ Tari noo chiti mostaza, tyicuan caa cuví. Vatyí noo ra tachí ra noo chiti nu ñuhú, ta chahnų tun. Ta cuví tun noo yutun cahnu vavaha. Tyicuan ta chaá coyo saa nuu yutun cuan. Ta yucuan savahá ti taca ti.

Nu catyí ra Jesús vatyí tari yuchan iya tyicuan caa cuví cha nyacá ñaha Nyoo añima yo (Mt. 13.33)

²⁰ Tyicuan ta quichaha catyí ra Jesús inga chaha:

—¿Ñáa ca chihin sandu inuu ri yo yoso caa nyacá ñaha Nyoo añima yo?

²¹ Cuví chi tari noo yuchan iya cha nasacá noo ñaha sihi chihin uñi cuhva yutyí pan. Vatyí tari ndaa pan cuan chihin yuchan iya cuan, tyicuan caa cuahan nducuaa ca ñu nyacá ñaha Nyoo añima —catyí ra.

Yuvehe tihin ta ityi cuiñi cha cuahan nu nyaá Nyoo (Mt. 7.13-14, 21-23)

²² Ityi cuahan ra Jesús Jerusalén cahan ra tuhun Nyoo chihin ñáyivi tandihí ñuu nu yaha ra.

²³ Ta quichaha ndaca tuhun noo ra chi ra: —¿Atu ña cuaha maa ñáyivi cucacu añima? —catyí ra.

Tyicuan ta nacahan ra Jesús, ta catyí ra:

²⁴ —Nanducu ndo cuhva quihvi ndo yuvehe tihin. Vatyí yí xaan quihvi ndo nu nyacá ñaha Nyoo. Vatyí cuaha xaan ndo cha cucuñi ndo quihvi ndo yucuan. Ta ma cuvi.

²⁵ Vatyí tari chitoho noo vehe tyicuan caa cuví Nyoo. Ta chitoho vehe cuan cunacasi ra yuvehe. Tyicuan ta nyoho cha nyicú ndo ityi chata cusacahan ndo yuvehe, ta cucatyí ndo: “Ñuñia yuvehe.” Ta ra cuan cucatyí ra chi ndo: “Ña chité nya ityi quichi nyoho.”

²⁶ Tyicuan ta nyoho cucatyí ndo: “Nyuhu chachí ndi ta chihí ndi chuhun. Maun sañahun tuhun Nyoo chi ndi ityi nu nyaá vehe ndi”, cucatyí ndo chi ra cuan.

²⁷ Soco ra cuan cunacahan ra chihin ndo ta cucatyí ra: “Cha catyí chi ndo vatyí ña chité nya ityi quichi nyoho. Canyaaha ndo nu nyaí, tandihí nyoho ñu nyacuví cha ña vaha”, cucatyí ra chi ndo.

²⁸ Yucuan ta cuacu ndo ta sacahni noho ndo cha nyehe ndo chi ra Abraham ta chi ra Isaac ta chi ra Jacob, ta chi tandihí ra profeta Nyoo cha chiyo ta cha naha. Vatyí canyicú ra nu nyacá ñaha Nyoo. Ta nyoho ndoo ndo ityi chata.

²⁹ Ta cuquichi ñáyivi ityi tyañuhu, ta ityi norte, ta ityi nu caña ñanyii, ta ityi nu quee ñanyii. Ta cunyicu ñu cachi ñu chihin Nyoo nu nyacá ñaha ra.

³⁰ Ta yóo ñu cha cuñi cuhun ityi nuu, ican ñu cuhun nu ndihí. Ta ñu cuahan nu ndihí, ican ñu cuhun ityi nuu —catyí ra.

Nu nducuihya iñi ra Jesús nyehé ra chi ñáyivi ñuu Jerusalén (Mt. 23.37-39)

³¹ Suri maa quivi cuan chaá coyo suhva ra fariseo. Ta catyí ra chi ra Jesús:

—Quita ihya vatyí ra Herodes cuñi ra cahni ra chuun —catyí ra.

³² Soco ra Jesús quichaha catyí ra chi ra:

—Cuahan ndo ta catyí ndo chi ra ñucuii quini iyó cuan, vatyí nyacua nya nu chaa maa chi quivi cha ndihí tyiño sahí cha tave

tatyí ña vaha ta cha sanduvahi chi ñu cuhví, tyicuan ta cundihi tyiño sahi.

³³ Soco nya tahán chi cha ndihi maa tyiño sahi, tyicuan ta cuhun mai cucúvi nya Jerusalén. Vatyí ma cuvi cha cúvi noo ra profeta Nyoo ityí chata Jerusalén.

³⁴ ¡Ndahví nyoho ñáyivi Jerusalén! vatyí chahñi ndo chi ra profeta ra cachahá cuenda tuhun cahán Nyoo chi ndo. Ta tuchi ndo yuu chi tandihi ra cha saquichí Nyoo nu nyicú ndo. Ta yuhu cuaha xaan chaha cuñi saha cuende chi ndo tari noo ndivi cha sahá cuenda ti chí sehe ti, ta naquehen vaha ti chí ti chichi ndichin ti. Soco maa ndo ña cuñi ndo.

³⁵ Nyehe ndo vityin vatyí cha sandoj chi ndo. Ta catyí chi ndo vatyí ma nyehe ca ndo chí nyacua nya chaa chí quivi cuacatyí ndo vatyí cahnu xaan ra vachi chihin sívi Nyoo —catyí ra Jesús.

14

Nu sanduvaha ra Jesús chi noo ra cuhví cha yihí cuiño chí

¹ Cuví chí noo quivi nyitatu ñáyivi. Ta ra Jesús cuahan ra cua cachi ra vehe noo ra cuví nuu chí ra fariseo. Ta suhva ca fariseo cuan cañañi ra chí ra Jesús tatu ñáá cha ña vaha cunyacuví ra.

² Yucuan ta nuu ra Jesús nyaá noo ra cuhví cha yihí cuiño chí.

³ Tyicuan ta quichaha catyí ra Jesús chí ra casacuaha ley vehe ñuhu ta chí ra fariseo:

—¿Atu vaha sanduvaha yo chí ñáyivi quivi nyitatu yo? —catyí ra.

⁴ Tyicuan ta tandihi ra cuan, taxi cacuví ra. Yucuan cuví nu tyiso ra Jesús ndaha ra síqui ra cuhví cuan. Ta sanduvaha ra chí ra. Ta natachi ra chí ra na cunuhu ra.

⁵ Tyicuan ta quichaha catyí ra Jesús chí ra fariseo:

—Tatu canacava noo burru sana ndo, o nonga quití sana ndo chichi noo xahva, ¿atu ma cutava ndo chí ti tañi tyehe ri, vasí quivi nyitatu yo cuví? —catyí ra.

⁶ Tyicuan ta inga chaha tucu taxi cuii ri nicunycu ra fariseo. Vatyí ña ñihi ca ra tuhun nacahan ra.

Nu sañaha ra Jesús chí yo vatyí ma cahnu saha yo chí yo

⁷ Cha nyehe ra Jesús vatyí tandihi ra canycú vico cuan nacachí ra tyayu vaha ca cunyaa ra. Tyicuan ta quichaha chaha ra tuhun ihya chí ra:

⁸ —Nya quivi cuhun ndo vico tandaha, ma nanducu ndo tyayu vaha ca cunyaa ndo. Vatyí coto quichi inga ra cha cahnu ca cuví ican saha ndo,

⁹ ta coto quichi ra cha nacatyí tuhun ta catyí ra chuun: “Cuhva tyayu chíña. Vatyí

cunyaa ra ihya.” Tyicuan ta yoho chihin cha cahán nuun, ta cuhvon. Yucuan ta cunyaun nu ndihi.

¹⁰ Soco catyí chí ndo, vatyí nya quivi nacatyí tuhun ra chí ndo, cunyaa ndo noo nu ñima ri tuhun. Vatyí quichí maa ra cha nacatyí tuhun chí ndo ta catyí ra chí ndo: “Ra tahin, ñaha, cunyaun nu tyayu vaha tyehe.” Ta tyicuan caa sacucahnu ra chuun nu ñáyivi nyicú yuhu mesa chuun.

¹¹ Vatyí yóo ra cha cahnu sahá chíi, cuquehen ra tichan nuu. Ta yóo ra cha ndahví sahá chíi, cahnu cucuvi ra —catyí ra Jesús.

¹² Tyicuan ta quichaha catyí tucu ra chí ra nacatyí tuhun chí ra:

—Nya quivi coo vico vehun, ma nacatyí tuhun chí ra tahun, ni chí yañun, ni ri chí ñáyivi chuun, niri chí ñu nyicú yuvehun ñu tyayíi. Vatyí ñu cuan cuví nacatyí tuhun ñu chuun, na coo tucu vico vehe maa ñu. Tyicuan ta nacahnya ñu cuenda cha chahan ñu vico vehun.

¹³ Soco cua catyí chuun vatyí nya quivi coo vico vehun, nacatyí tuhun chí ñu ndahví, chí ñu cuhví, chí ñu coxo, ta chí ñu cuaa.

¹⁴ Tyicuan ta síi cuví chuun, vatyí ñu cuan ma cuví natyiyahví ñu chuun. Soco cuñihun yahvun quivi cunandoton chihin ñáyivi vaha.

Nu chaha ra Jesús noo cuhva yoso caa nacatyí tuhun ra chí yo vatyí quihvi yo nu nyacá ñaha Nyoo (Mt. 22.1-10)

¹⁵ Ta chíñi noo ra cha nyaá yuhu mesa cuan tuhun cahán ra Jesús. Ta quichaha catyí ra chí ra:

—Síi xaan cuvi chí ñu cachi nu nyacá ñaha Nyoo —catyí ra.

¹⁶ Tyicuan ta catyí ra Jesús:

—Noo ra cuan savaha ra noo vico cahnu vavaha vehe ra. Ta nacatyí tuhun ra chí cuaha xaan ñáyivi.

¹⁷ Tyicuan ta chaq cuhva cha cuxiñi ñu, ta tachi ra chí musu ra nacana ra chí ñu. Vatyí cha chaq cuhva cha cuxiñi ñu.

¹⁸ Soco tandihi ñu cuan quichaha catyí ñu vatyí ma cuhun ñu. Ta noo ra cuan catyí ra: “Ni saté noo ñuhú. Ta cuñi chí cuhin cunyehi. Ican tuhun chiquén na saha ra tucahnu iñi chíi vatyí ma cuhin.”

¹⁹ Tyicuan ta inga tucu ra cuan catyí ra: “Ni sata cuiri ohon tahan yunta quití. Ta cuhin cunyehi tatu vaha ti. Ican tuhun chiquén tumañi iñi chí ra na saha ra tucahnu iñi chíi, vatyí ma cuví cuhin.”

²⁰ Tyicuan ta inga tucu ra cuan catyí ra: “Ni ndihi tandahi, ta ma cuví cuhin”, catyí ra.

²¹ Tyicuan ta musu ra cuan cuanuhu ra. Ta nacatyí ra tandihí tuhun cuan chi ra cha tachí chi ra. Cha chíñi ra savaha vico cuan cha tyicuan caa, ta cuxaan xaan ra. Ta catyí ra chí musu ra: “Cuñhan tandihí maa ityi. Ta quichi nyacon chí ñu ndahví, chí ñu cuhví, ta chí ñu coxó, ta chí ñu cuaa”, catyí ra.

²² Ta cha yahá nachaa musu cuan ta catyí ra chí ra cha tachí chí ra: “Cha sacuví tandihí maa cha catyún. Ta nuñá ca chichi vehe”, catyí ra.

²³ Tyicuan ta chitoho ra catyí ra chí ra: “Cuñhan ca nducu ca chí ñu tandihí maa ityi. Ta sanñun chí ñu na quichi coyo ñu, vatyí na cutu chichi vehi.

²⁴ Vatyí catyí chuun vatyí ni minoo ñu cha nacatyí tuhín cha xihna ri, ma cachi ñu chihin” —catyí ra Jesús.

Cuaha xaan tundoho nyehe yo tatu cuenda ra Jesús yihí yo
(Mt. 10.37-38)

²⁵ Cuaha xaan ñáyivi nyicón chí ra Jesús. Tyicuan ta nanyehe ra chí ñu, ta quichaha catyí ra:

²⁶ —Tandihí nyoho cha nyicón ndo chíi, tatu cuñí ca ndo chí ñáyivi chí ndo ican saha chí yuhu, ñima cuende yihí ndo. Ta tatu cuñí ca ndo chí maa ndo ican saha chí yuhu, ñima cuende yihí ndo.

²⁷ Vatyí nya nyoho cha ña cuñí ndo nyehe ndo tundoho cha cunyicon ndo chíi, ña tahán chí cuví ndo ñu cuende, vatyí cha nyehe ndo tindoho yucuan cuví cruzi cha tahán chí cuiso ndo.

²⁸ Vatyí tatu nya nyoho cuñí ndo savaha ndo noo vehe cahnu, xihna ca cunyaa ndo ta ndichi xiñi ndo tatu caña xuhun ndo cha cananyaa ndo vehe cuan.

²⁹ Vatyí tatu quichaha sacacu ndo vehe cuan, ta quichaha ña cuví sandihí ndo vatyí ñahri ca xuhun ndo, cuacu nyaa ñáyivi chí ndo.

³⁰ Ta cuacatyí ñu: “Ra cuan quichaha savaha ra vehe ra, ta ni ña cuví sandihí ra”, cucatyí ñu.

³¹ O tatu noo rey cha cuñí cañi tahan chihin inga rey çatu ña chicunyaa xihna ra ta ndichi xiñi ra tatu ñihí uchi mil sindaro cha cuahan chihin ra cua cañi tahan chihin inga rey cha vachi chihin oco mil sindaro cuan?

³² Tatu chitó ra vatyí ma cuví chasaha ra chí inga rey cuan, tyicuan ta cañi ca vachi rey cuan, ta tachi ra chí noo musu ra vatyí cucatyí ra chí rey cuan na ndihí tuhun yucuan ri.

³³ Ta tyicuan caa cuví chí nyoho. Tatu ma cahnya iñi ndo tandihí maa cha cuñi ndo ta cha cumi ndo, ma cuví cunyicon ndo chíi.

Nu sañahá ra Jesús vatyí tari ñi cha ndihí cha uhva, tyicuan caa cuví yo tatu ndu uvi iñi yo cha chino iñi yo chí ra
(Mt. 5.13; Mr. 9.50)

³⁴ Vaha ñi vatyí sacu uhva chí cha cachi yo. Soco tatu ndihí cha uhva chí, ña vaha ca chí.

³⁵ Ñahri ca tyiño cuví saha chí. Ta sacuita yo vatyí ña vaha ca. Nya nyoho cha cutuñi iñi ndo, tyasoho ndo tuhun cahín —catyí ra Jesús.

15

Nu sañahá ra Jesús vatyí tari mbee cha cuanaa tyicuan caa cuví yo
(Mt. 18.10-14)

¹ Tandihí ra tavá xuhun cuenda gobiernu ñuu Roma, ta ra iyó cuatyí, tuhva ra nu nyaá ra Jesús, tacuhva cuñi ra tuhun cahán ra.

² Tyicuan ta ra fariseo ta ra casacuaha ley vehe ñuhu quichaha cacahan nyaa ra, ta cacatyí ra:

—Ra ihya, cahán ra chihin ra iyó cuatyí. Ta chachi ra chihin ra —cacatyí ra.

³ Tyicuan ta ra Jesús cahán ra noo cuhva ihya, ta catyí ra:

⁴ —Ta nya nyoho cha iyó noo cientu mbee sana ndo, tatu cuanaa noo ti, çatu ma sandoo ndo chí tandihí ca ti cuan nu chíqui. Ta cunanducu ndo chí quiñi cha cuanaa cuan, nyaacua nya cha nañihí ndo chí ti?

⁵ Ta cuhva cha nañihí ndo chí ti, ta natyiso soco ndo chí ti. Ta si vavaha cuví chí ndo.

⁶ Ta cuhva cha nachaa ndo vehe ndo, ta ndu in ri ndo chihin ra tahan ndo ta chihin ñu nyicú yatyin yuvehe ndo, yucuan ta catyí ndo chí ñu vatyí na cusí cuñi ñu chihin ndo vatyí nañihí ndo chí mbee sana ndo cha chinaa.

⁷ Ta ihya catyí chí ndo, vatyí si xaan ca cuví chí ángel Nyoo andiví cha catyí noo ra cha iyó cuatyí ta nasama cuhva iyó ra, ta ñima ca cha catyí ndi cumi xico chahun cumi tahan ñáyivi cha ñahri cuatyí.

Ñaha sihi cha cuanaa xuhun ta nañihí ña

⁸ Ta catyí chí ndo, tatu iyó noo ñaha cha iyó uchi tahan xuhun ña, ta tatu cuanaa noo xuhun ña, tyaa ña noo candil. Ta tihví ña tandihí cuii maa chichi vehe ña. Ta nanducu ña tandihí cuii nyaacua nya cha nañihí ña xuhun cuan.

⁹ Ta cuhva cha yahá nañihí ña, cuahan ña cua nanducu ña chí ñaha tahan ña, ta ñáyivi cha nyicú yuvehe ña, ta catyí ña chí ñu: “Cusí cuñi ndo chihin vatyí cha nañihí xuhun cha chinaa”, catyí ña.

¹⁰ Ta catyí chí ndo vatyí tyicuan caa si cuví chí ángel Nyoo cha catyí noo ra iyó

cuatyí ta ndu uvi iñi ra cuatyí ra —catyí ra Jesús.

Nu sañahá ra Jesús yoso caa cuñi Nyoo chi noo ra ndu uvi iñi cuatyí

¹¹ Tyicuan ta quichaha catyí tucu ra Jesús cuhva ihya:

—Noo ra, chiyo uvi tahan sehe ra.

¹² Ta noo chaha, ra luhlu ca cuan catyí ra chi sutu ra vatyí nacuhva ra cha tahán chi chi ra. Tyicuan ta sutu ra chaha ra chi ninduvi sehe ra.

¹³ Ta ña cuaha ri quivi cuan ta ra luhlu ca cuan xico ra tandihí cuí maa cha chaha sutu ra chi ra. Ta sandu in ri ra xuhun ra, ta quehen ra ityí ta cuahan ra noo ñuu cañi. Ta yucuan chiyo ra, sanaa ra tandihí maa xuhun ra chihin tusi iñi. Ta quini xaan chicá noo ra.

¹⁴ Tyicuan ta chaa noo tama ityí nu iyó ra. Ta quichaha chisoco ra vatyí ndihí xuhun ra sanaa ra.

¹⁵ Tyicuan ta chahan ra chicacan ra tyiño chi noo ra ñuu cuan. Ta ra cuan tachí ra chi ra noo nu iyó quini sana ra, vatyí cusaha cuenda ra chi ti.

¹⁶ Ta cuví noo chaha cuan chisoco xaan ra. Ta ñahri maa cha cachi ra iyó, nyacua quichi cuví iñi ra cachi ra cha cachachí quini cuan soco yori maa chaha cha cachi ra.

¹⁷ Tyicuan ta nichon iñi ra tuhun sutu ra. Ta ndichi xiñi ra: “¿Atu chiin cuaha ra casahá tyiño chihin suti? Soco ñahri maa cha cumañi chi ra. Ta yuhu cuñi cúvi soco ihya.

¹⁸ Vityin cunihin nu nyaá suti. Ta catyí chi ra tyi chicoo cuatyí nuu Nyoo ta nuu maa ra.

¹⁹ Ta ña naña que cha cuví sehe ra chii, ta na saha ra tuhun vatyí noo musu ri ra cuví chii.” Tyicuan caa ndichi xiñi ra.

²⁰ Tyicuan ta quehen ra ityí cuanuhu ra nya vehe sutu ra. Cañi ca vachi ra ta nanyehé sutu ra chi ra, ta cundahvi cuñi ra nyehe ra chi ra. Ta chinq ra chisatahan ra chi sehe ra. Ta nanumj ra chi ra.

²¹ Tyicuan ta quichaha catyí ra chi sutu ra: “Tata, chicoo cuatyí nuu Nyoo ta chicoo cuatyí nu maun. Ta yucuan chaha ña naña que cha cuví sehe chii”, catyí ra chi sutu ra.

²² Soco sutu ra tyihi ra tyiño, ta catyí ra chi musu ra: “Tava ndo sahama vaha ca ta saçuihno ndo chi ra. Ta tyihi ndo noo xehe nundaha ra. Ta nyaca ndo zapato quihí chaha ra ñandihí.

²³ Ta siin ri cahñi ndo noo becerra cha xahan ca, vatyí cachi yo chi ti. Vatyí vityin cucoo yo noo vico.

²⁴ Vatyí ra sehi ihya cha chihí ra saha mai tuhun. Cuñi mai vatyí ma nyehé que chi ra,

soco natuvj ra”, catyí sutu ra. Tyicuan ta quichaha chicoo ñu vico. Ta si xaan cacuñi ñu vatyí natuvj ra cuan.

²⁵ Tyicuan ta inga sehe ra, ra cha chahnu ca, ñohó ra nu chiqui. Ta cuhva cha cuanachaa ra nya vehe ra, ta quichaha chihí ra yaa. Ta chihí ra vatyí si xaan cachitá chaha ñu.

²⁶ Tyicuan ta cuhva cha cuyatyn ra nya vehe ra ta cana ra chi noo musu ra. Ta ndaca tuhun ra ñáá cha cuví cuan.

²⁷ Tyicuan ta musu ra quichaha catyí ra: “Yañun, ican nachaa. Ta yucuan chaha tachí sutun vatyí na cahñi ra chi noo becerra xahan ca. Vatyí vaha ri nachaa yañun, ta ñahri cha cuví chi ra”, catyí ra.

²⁸ Tyicuan ta cuxaan xaan cuñi ra. Ta ña cuñi ra ndihvi ra chichi vehe. Soco sutu ra chahan ra chichahán ndahvi ra chihin ra, vatyí na ndihvi ra chichi vehe.

²⁹ Tyicuan ta nacahan ra ta catyí ra chi sutu ra: “¿Atu chiin cuiya sahá tyiño chuhun? Ta tyasohí tuhun cahún. Ta ni noo chaha ta ta nacahnu que nu cahún. Soco ni noo ndixihyu lee ta cuhva con chii vatyí coi vico chihin ra tahin.

³⁰ Soco vityin cha nachaa sehe ihya, ra cha sanaa xuhun chihin ñu cata iñi. Ta vityin chahun noo becerro quiti xahan ca chi ra”, catyí ra chi sutu ra.

³¹ Tyicuan ta nacahan sutu ra ta catyí ra chi ra: “Sehi, yoho tyicuan ri nyaún chihin. Ta tandihí cha cumi, chuun cuví.

³² Soco vityin tahán chi sacuvi yo vico ihya. Ta cusii cuñi yo. Vatyí nachaa yañun, ra cha saha mai tuhun vatyí chihí. Tari quivi nandoto ra cuví ihya. Ta chinaa ra, ta nañihí tucu yo chi ra inga chaha”, catyí ra chi sehe ra —catyí ra Jesús.

16

Nu sañahá ra Jesús chi yo yoso caa saha yo tumañi iñi chihin cha iyó chi yo

¹ Tyicuan ta quichaha catyí ra Jesús chi ra cachicá noo chihin ra:

—Iyó noo ra tyayi vavaha ra. Ta iyó noo ra yindaha tandihí tyiño sahá ra. Ta chahan coyo musu ra canacatyí ra chi ra tyayi cuan, vatyí ra yihí ndaha tyiño cuan, sanaa ra tandihí cha iyó chi ra.

² Tyicuan ta cana ra tyayi cuan chi ra yindaha tyiño cuan, ta catyí ra chi ra: “Cha cuaha xaan cuatyí chahún quichi nu nyaí. Nacuhva cuendon tandihí tyiño cha sacuvun chii. Vatyí ma saha tyiño con chihin”, catyí ra chi ra.

³ Tyicuan ta ra yindaha tyiño cuan ndichi xiñi ra: “¿Yoso caa cunyacuvi vityin? Chitohi ña cuñi ca ra cha sahá tyiño chihin ra. Ta ñahri fuerza iyó chii cha saha tyiño nu ñuhú. Ta cahán nui caye chichi ñuu.

⁴ Soco cha chité yoso caa cunyacuvi vityin, ta vaha coo ñáyiví chihin quiví cha ma coo ca tyiño sahi, ta vaha chai vehe ñu”, ndichi xiñi ra.

⁵ Tyicuan ta cana ra chi noo noo ra yosoyicá chi chitoho ra. Ta quichaha catyí ra chi noo ra cuan: “¿Yoso yosoyicón chi chitohi?” catyí ra.

⁶ Tyicuan ta nacahan ra cuan ta catyí ra: “Yuhu yosoyiqué noo cumi mil litru aceitye.” Tyicuan ta ra yindaha tyiño cuan catyí ra chi ra: “Quehen nonga tutu ihya. Ta natyaa uvi mil ri. Ta sacuiton tutu chahnu cuan”, catyí ra. Tyicuan caa sacuví ra. Ta cuahan ra.

⁷ Tyicuan ta chaq inga ra. Ta quichaha ndaca tuhun tucu ra chi ra cuan ta catyí ra: “¿Yoso yosoyicá yoho chi chitohi?” Ta nacahan ra cuan ta catyí ra: “Yosoyiqué noo mil arroba trigo”, catyí ra. Tyicuan ta quichaha catyí ra yindaha tyiño cuan: “Quehen inga tutu, ta natyauñ uña cientu ri arroba. Ta sacuita tutu chahnu chiña”, catyí ra.

⁸ Tyicuan ta chitó chitoho ra cha ña vaha cha chinyacuví ra. Ta iyo xaan cuñi ra vatyi yatyi xaan saha ra cuan chi ra —catyí ra Jesús.

Ta quichaha catyí tucu ra chi ra cachicá noo chihin ra:

—Ñáyiví ña vaha añima yatyi xaan ca sahá ñu chi ñu ican saha ñáyiví vaha añima.

⁹ Ta catyí chi ndo, vatyi cotyiño ndo cha tyayii cha iyó siqui ñuhu ñayiví ihya, ta saha ganaa ndo amigo. Ta quiví cha ndihi cha tyayii cuan, cuñihi ndo nu cunyicu ndo nya nu nyaá Nyoo tyicuan ri maa.

¹⁰ Tatu chitó ndo cotyiño ndo chiin cha iyó chi ndo cha cuenda cha vaha, tyicuan caa coto tucu ndo cotyiño ndo tatu cuaha iyó chi ndo. Soco tatu ña chitó ndo cotyiño ndo chiin cha iyó chi ndo, tyicuan caa ma coto tucu ndo cotyiño ndo tatu cuaha coo chi ndo.

¹¹ Ta catyí chi ndo, tatu ña sahá ndo tumañi iñi chihin cha iyó chi ndo siqui ñuhu ñayiví ihya, Nyoo ma cuhva ra noo cha tyayii cha ndicha chi ndo.

¹² Tandihí cha iyó chi ndo maa Nyoo chaha noo chi ndo. Soco tatu ña sahá ndo tumañi iñi chihin cuan, ma cuhva ra cha tahán chi chi ndo.

¹³ ‘Noo musu ma cuvi coo uvi tahan chitoho ra. Vatyi musu cuan cuñi ca ra chi noo ra, ta ñima ca chi inga ra. O chi noo ra, vaha quichahá ra tuhun cahán ra, ta chi inga ra, ma quichaha ra cha cahán ra. Ma cuvi cuñi ndo chi Nyoo ta suri cuhva cuan cuñi tucu ndo cha tyayii —catyí ra Jesús.

¹⁴ Tyicuan ta cha chiñi ra fariseo tandihí tuhun cahán ra Jesús. Tyicuan ta quichaha

chacu cuehe ra nyehe ra chi ra. Vatyi maa ra fariseo cuan cuñi xaan ra chi xuhun.

¹⁵ Tyicuan ta quichaha catyí ra Jesús chi ra:

—Vaha xaan sahá ndo chi ndo nuu ñáyiví. Soco chitó Nyoo vatyi añima ndo ña vaha. Ta tandihí cha catyí ñáyiví vatyi cahnu xaan ihya siqui ñuhu ñayiví, Nyoo ña cuñi nyehe ra.

Nu sañahá ra Jesús tuhun ley ra Moisés, ta tuhun yoso caa cunyaca ñaha Nyoo añima yo chi yo

¹⁶ Ley cha tachí Nyoo chi ra Moisés vatyi tyaa ra, ta tuhun cha tyaa ra profeta Nyoo ta cha naha, ican chi cuvi cha saquehen ityi chi ñáyiví nyacua nya quiví chaq ra Juan. Ta maa ra Juan quichaha cahan ra tuhun vaha vatyi cha cuñi quichi Nyoo vatyi cunyaca ñaha ra. Ta tandihí ñáyiví cha nducú cuhva yoso caa cunyaca ñaha Nyoo añima ñu, ican ñu quihví ndaha ra.

¹⁷ Soco catyí chi ndo, vasi cunaa andiví ta ñuhu ñayiví, soco cha cuví ley Nyoo cha tyaa ra Moisés, ma naa nyacua nya cha yahá cuvi tandihí.

Sañahá ra Jesús vatyi ña vaha cha sandoo rayii chi ñasihí ra
(Mt. 19.1-12; Mr. 10.1-12)

¹⁸ Tatu noo rayii iyó ñasihí ra, ta sanandoo ra chi ña, ta tandaha ra chihin inga ña, iyó cuatyí ra nuu Nyoo. Ta tatu tandaha noo rayii chihin noo ñaha cha sandoo yii chii, coo tucu cuatyí ra nuu Nyoo.

Nu sañahá ra Jesús tuhun noo ra tyayii chihin ra Lázaro

¹⁹ Chiyó noo ra tyayii. Ta vaha ñihnó ra. Ta tandihí quiví iyó ra vico ta chachí vaha ra.

²⁰ Ta chiyó tucu noo ra ndahvi cha nañí Lázaro. Ta cuaha xaan ndihyi iñi ra. Ta nyaá ra yuvehe ra tyayii cuan.

²¹ Ta ra ndahvi cuan, cuñi ra cachi ra, vasi cha canacoyo nu mesa ra tyayii cuan. Ta nyacua nya ina ta chaq ti nu nyaá ra, ta yuyaa ti nu cahvi chi ra.

²² Ta noo quivi cuan chihí ra ndahvi cuan. Ta ángel Nyoo quehen ra chi ra ta caa nyaca ra chi ra nya nu nyaá ra Abraham gloria. Tyicuan ta chihí tucu ra tyayii cuan. Ta chichucí ñu chi ra.

²³ Tyicuan ta ra tyayii cuan nyehé xaan ra tundoho nu ñohó ra anyaya. Ta nanyehé ra nu cañi. Ta nanyehé ra chi ra Abraham chihin ra Lázaro, nyaá ra chihin ra yucuan.

²⁴ Tyicuan ta canachaa ra ta catyí ra: “Tata Abraham, cundahvi cuñi chii. Tachi chi ra Lázaro na satyii ra chiin nundaha ra. Ta na satoo ra ñin titi ndutya nu yai. Vatyi

nyehé xain tundoho nu cayú ñuhú ihya”,
catyí ra.

²⁵ Soco ra Abraham catyí ra chi ra:
“Ñichohon iñun vatyi vaha chiyon ñuhu
ñayivi. Ta ra Lázaro, ña vaha chiyo ra. Vityin
vaha iyó ra ihya, ta yoho nyehún tundoho.

²⁶ Ta sñin ri, mahñu ihya cono xaan. Ta
ma cuvi yaha ra iyó tyehe cuhun ra chiña.
Ta ma cuvi yaha ra iyó chiña, quichi ra
tyehe”, catyí ra Abraham chi ra.

²⁷ Tyicuan ta quichaha catyí ra tyayii
cuan: “Tata Abraham, sahun tumañi iñi
chii. Ta tachun chi ra Lázaro nya vehe suti.

²⁸ Vatyi iyó ohon tahan yañi. Ta cuñi
vatyi nacatyí ra chi ra yoso caa iyé ihya nu
nyehí tundoho, coto quichi coyo tucu ra
cuan ihya”, catyí ra.

²⁹ Tyicuan ta quichaha catyí ra Abraham:
“Iyó ley cha tyaq ra Moisés. Ta iyó tuhun
cha tyaq ra profeta Nyoo ta cha naha. Na
quichaha ra tu cuñi ra”, catyí ra Abraham.

³⁰ Tyicuan ta quichaha catyí ra tyayii
cuan: “Tata Abraham. Ma quichaha ra.
Soco tatu yóo cha nandoto, ta cuhun
cucahan chihin ra, yucuan ta tyasoho ra ta
nasama ra cuhva iyó ra”, catyí ra cuan.

³¹ Soco ra Abraham catyí ra: “Tatu ña
cuñi ra quichaha ra tuhun tyaq ra Moisés
ta tuhun cha tyaq ra profeta Nyoo ta cha
naha, ma chino iñi ra tuhun cahan noo
ndiyi tatu nandoto ra ta cahan ra chihin
ra.”

17

*Nu sañahá ra Jesús chi yo yoso caa saha
cuenda yo chi yo coto sacuvi yo cha ña vaha
(Mt. 18.6-7, 21-22; Mr. 9.42)*

¹ Tyehe caa catyí ra Jesús chi ra cachicá
noo chihin ra:

—Tyicuan ri iyó cha quiñi caa cha sativi
chi ñáyivi. Soco ndahvi ra ndahvi ra sativi
chi ñáyivi.

² Vaha taxin ca cuhñi ra noo yuu sucun
ra. Ta cutuchi ra chi ra nu tyañuhu. Coto
sativi ra chi ñu ni nasama cuhva iyó ihya.

³ Saha ndo cuenda chi ndo. Tatu noo ra
tahan ndo ta sacuvi ra noo cha ña vaha
chihin ndo. Catyí ndo chi ra vatyi ña vaha
cha sacuvi ra. Tatu nasama ra cuhva iyó ra,
saha ndo tucahnu iñi chi ra.

⁴ Ta ni ri maa sacuvi ra cha ña vaha
chihin ndo ucha tahan chaha cha noo
quivi. Tatu ndi ucha tahan chaha ta catyí ra
chi ndo vatyi ndu uvi iñi ra cha sacuvi ra
chi ndo, ndi ucha tahan chaha saha ndo
tucahnu iñi chi ra.

*Nu sañahá ra Jesús chi yo vatyi tatu chinó iñi
yo chi ra, cuvi sacuvi yo cuaha cha vaha*

⁵ Tyicuan ta quichaha catyí ra cachicá
tyiño nuu ra Jesús chi ra:

—Cuhva cha chinó ca iñi ndi chuun
—catyí ra.

⁶ Tyicuan ta catyí ra Jesús chi ra:

—Tatu chinó iñi ndo chi yuhu vasi chiin
ri tari cuhva noo chiti mostaza luhlu, cuvi
catyí ndo chi yutun sicómoro cha nanyaá
ihya nacoyo tun, ta cucuinanyaa tun nu
tyañuhu. Ta cucuvi nu cahan ndo —catyí ra
Jesús.

Yoso caa tahán chi quichaha yo chi Nyoo

⁷ Ta catyí ra Jesús:

—Tatu noo nyoho ta iyó noo musu ndo.
Ta nachaa ra cha chahan ra nu chiqui chi
sahatyiño ra, o chi saha cumi ra quiñi sana
ndo, ¿atu catyí ndo chi ra: “Cunya ta
cachun”? Ña catyí ndo chi ra tyicuan caa.

⁸ Soco tyehe caa catyí ndo chi ra:
“Sanduvaha cha cuxiñi. Ta tyihun cha
cachi. Cha yaha cha cachi tyicuan ta cachi
tucu maun”, catyí ndo chi ra.

⁹ Ni ña tuhvá ndo nacuhva ndo tyahvi
nyoo chi ra vatyi sacuvi ra ñáá noo tyiño
tava ndo chi ra.

¹⁰ Tyicuan caa tucu nyoho chihin Nyoo.
Quiñi ndihi sacuvi ndo cha catyí Nyoo chi
ndo, tahán chi catyí ndo: “Nyuhu chiin ri
cha tachun chi ndi, yucuan ri sacuvi ndi.
Ta ña yaha ca.”

*Nu sanduvahá ra Jesús chi uchi tahan ra
tyahyu coño*

¹¹ Ityi cuahan ra Jesús ityi ñuu Jerusalén
yahá ra nu cuvi xahñi Samaria chihin
Galilea.

¹² Nu chaá ra noo ñuu, quiñi coyo uchi
tahan ra cuhvi chihin cha tyahyu coño ra.
Ta chicuitayucu ra nyasava ri.

¹³ Ta quichaha cacanchaa ra chi ra
Jesús, ta catyí ra:

—Yoho, Maestro Jesús, cundahvi cuñi chi
ndi —catyí ra.

¹⁴ Tyicuan ta nanyehé ra Jesús chi ra ta
catyí ra chi ra:

—Cuahan ndo. Ta cua sañaha ndo chi ndo
chi tata sutu vatyi cha nduvahá ndo.

Tyicuan ta cuahan coyo ra cuan. Ta ityi
cuahan coyo ra ta cananyehé ra vatyi
nduvahá ra.

¹⁵ Tyicuan ta cuhva cha nanyehé noo ra
cuan vatyi nduvahá ra, cuanuhu chata ra
nu nyaá ra Jesús. Ta caná chaa ra, ta
sacahnu ra chi Nyoo.

¹⁶ Ta chicuiñi chiti ra. Ta nacañi noo ra
xiñi ra nya nu ñuhu nuu ra Jesús. Ta
nacuhvá ra tyahvi nyoo chi ra. Ta ra cuan,
ra Samaria cuvi ra.

¹⁷ Tyicuan ta catyí ra Jesús chi ra:

—¿Atu ñima uchi tahan ndo nduvahá?
¿Nya nyaá inga ñin tahan ca ra?

¹⁸ ¿Ñáá tuhun cha noo tuhun ri maa ra
inga ñuu nandichi chata ra ta sacahnu ra
chi Nyoo? —catyí ra Jesús.

¹⁹ Tyicuan ta quichaha catyí ra chi ra cuan:

—Ndũcuita ta cuahan. Nduvahun vatyí chinó iñun —catyí ra Jesús chi ra.

Yoso caa cuquichi Nyoo cunyaca ñaha ra nu iyó yo ihya

(Mt. 24.23-28, 36-41)

²⁰ Candacá tuhun ra fariseo chi ra Jesús, ta catyí ra:

—¿Ama quichi Nyoo cunyaca ñaha ra?

Tyicuan ta ra Jesús quichaha catyí ra:

—Cha cunyaca ñaha Nyoo ihya siqui ñuhu ñayivi, ñima cha nyehé yo cuví.

²¹ Ma cuví catyí ñáyivi: “Ma ra nyaá ihya, o ma ra nyaá ityí cuan.” Vatyí Nyoo cha chaq ra mahñu ndo, ta nyacá ñaha ra añaima ñáyivi cuenda ra —catyí ra chi ra.

²² Yahá cuan ta catyí ra chi ra cachicá noo chihin ra:

—Cuchaa chi quivi vatyí cucuñi ndo nyehe ndo chi yuhu Rayíi cha quichí nya gloria. Soco ma nyehe ndo chii.

²³ Cuchaa tucu chi quivi ta cucatyí ñáyivi chi ndo: “Ihya nyaá ra”, o “Yucuan nyaá ra.” Soco ma cuhun ndo cunyehe ndo. Ta ma cunyicon ndo chi ra cuan vatyí ñime cuví.

²⁴ Vatyí tandihí ñáyivi cunyehe chi yuhu Rayíi cha quichí nya gloria quivi quichi inga chaha. Tari nyehé tandihí ñáyivi nu quihvi tacha nicahnu andivi, tyicuan caa cucuvi.

²⁵ Soco cunyehe xihne tundoho. Vatyí ñáyivi cha iyó cha vityin cua cutasi cuñi nyehe ñu chii.

²⁶ Tari cuví quivi ra Noé, tyicuan caa cucuvi quivi quichi yuhu Rayíi cha quichi nya gloria inga chaha.

²⁷ Quivi ra Noé, chachí ñu. Chihí ñu. Tandahá ñu. Ta chahá ñu sehe ñu tandaha. Nya quivi quihvi ra Noé chichi barcu ra, ta coon savi xaan. Ta tandihí ñu cachihí ñu.

²⁸ Tyicuan caa tucu cuví quivi ra Lot. Chachí ñu. Chihí ñu. Satá ñu. Xicó ñu. Tachí ñu. Ta savahá ñu vehe ñu.

²⁹ Soco quivi cha quitá ra Lot ñuu Sodoma cuan, coon ñuhú chihin azufre andivi. Ta chihí tandihí ñáyivi Sodoma.

³⁰ Ta tyicuan caa cucuvi quivi cha quichi tucu yuhu Rayíi cha quichi nya gloria inga chaha.

³¹ Ta quivi cuan tatu nyicú ndo nuquehe ndo, ma ndihvi ndo chichi vehe ndo vatyí tava ndo ndaha tyiño ndo. O tatu chicá noo ndo nu chiqui, ma cunuhu ndo nya vehe ndo.

³² Nícohon iñi ndo ñasihí ra Lot, ñáa cha cuví chii ña.

³³ Tandihí ndo cha cuñi ca ndo cha iyó siqui ñuhu ñayivi ihya, cucunaa ndo. Ta

tandihí ndo cha ña quichaha ndo cha iyó ñáyivi ihya, cucacu ndo.

³⁴ Ta catyí chi ndo vatyí cha cuaa cuan uvi tahan ra cucava noo nu chito. Noo ri ra cunaquehin. Ta nonga ra cundoo ra.

³⁵ Ta uvi tahan ñusihí ñn ri cu nyicó ñu quivi cuan. Noo ri ña, cunaquehin. Ta nonga ña cundoo ña.

³⁶ Ta catyí chi ndo vatyí uvi tahan ra cohon nu chiqui. Noo ra cunaquehin, ta nonga ra cundoo ra —catyí ra Jesús.

³⁷ Cuhva cha chihí ñu tuhun ihya, quichaha ndaca tuhun ñu chi ra Jesús.

—¿Nya maa maa cucuvi ihya Tata? —catyí ñu.

Tyicuan ta nacahan ra Jesús ta catyí ra:

—Nu catuvi coño ñuhu chihí, yucuan cundu ñn ri chii.

18

Nu sañaha ra Jesús vatyí tari chicán noo ñaha chihí yíi chii juez, tyicuan caa tahán chi cacan yo chi Nyoo

¹ Tyicuan ta chahá ra Jesús noo cuhva ihya. Vatyí na cacan tahvi ñu tyicuan ri maa, ta ma cundihñi ñu.

² Ta catyí ra:

—Iyó noo ñuu cha nyaá noo juez. Ta juez cuan ña sahá maa ra ñáyivi chi Nyoo. Ta ni ri ña quichaha maa ra chi ñáyivi.

³ Ta suri ñuu cuan iyó tucu noo ñaha ndahvi cha chihí yíi. Ta chahan ña chicahan ña chihin ra, vatyí chicá ña cuatyí chaha noo ra xaan iñi chi ña.

⁴ Ta juez cuan ña quichahá maa ra chi ña. Ña sandaq maa ra tyiño chicá ña. Ta cha naha xaan chicán ña. Tyicuan ta quichaha ndichí xiñi juez cuan: “Vasí ña yuhví chi Nyoo, ta ñahri cuende chi ñáyivi,

⁵ soco ñaha ihya sayanga xaan ña chii. Ta yucuan chaha cua sacaqui chi ña. Vatyí coto quichi ca ña, ta sanaquiqui ña tisihí”, ndichí xiñi ra.

⁶ Tyicuan ta catyí ra Jesús:

—Tyicuan caa catyí juez ña vaha cuan. Tu juez cuan cha quñi iyó ra ta tyinyee ra chi ñaha ndahvi cuan,

⁷ ta nyaca cuví Nyoo, ¿atu ma tyinyee ra chi ñáyivi cha chicán ndiyaca ta ndiquivi chí ra? ¿Atu cuatu xaan ra cha tyinyee ra chí ñu?

⁸ Catyí chi ndo, vatyí numi ri cutyinyee ra chí ñu. Soco quivi quichi yuhu, Rayíi cha quichí nya gloria, inga chaha, chitó Nyoo tatu ñañihí que chí ñu cha ndicha chinó iñi chii —catyí ra Jesús.

Noo cuhva cuenda ra tavá xuhun cuenda gobiernu ñuu Roma ta cuenda ra fariseo

⁹ Tyicuan ta chahá ra Jesús nonga cuhva cuenda ra savahá chii, ta ña cuñi nyehe ra chí inga ra. Ta quichaha catyí ra:

10 —Iyó uvi tahan ra chahan chichi vehe ñuhu chicaoñ tahvi ra chi Nyoo. Noo ra cuan ra fariseo cuví ra. Ta inga ra cuan ra tavá xuhun cuenda gobiernu ñuu Roma cuví ra.

11 Ta ra fariseo cuan chicuinanyaa ra, ta quichaha cahan ra chihin Nyoo. Ta cahnu saha ra chi ra. Ta catyí ra: “Sutu Mañi yuhu, nacuhve tyahvi nyoo chuun vatyi yuhu ñima tari inga ñáyivi cuví. Vatyi suhu ñu. Quiñi iyó ñu. Iyó ñasihí ra ta iyó inga ñusihí chi ra. Ta ni ri ñima tari ra tavá xuhun cuan cuví.

12 Vaha ca quichahí tuhun maun ta ñima ca inga ñáyivi. Vatyi uvi chaha cha noo vitya ña chachí. Ta chahí uchi siqui noo noo cientu cha sahá ganai chuun”, catyí ra.

13 Soco ra tavá xuhun cuenda gobiernu Roma cuan cha cañi ri chiin nanyaa ra. Ta ña caña iñi ra nanyehe ndaa ra. Ta cañi ra ndaha ra añima ra vatyi ndu uvi iñi ra cuatyí ra. Ta catyí ra: “Sutu Mañi yuhu. Nyehe ndahvi chii vatyi iyó xaan cuatyí”, catyí ra —catyí ra Jesús.

14 Ta catyí tucu ra Jesús tyehe caa:

—Catyí chi ndo vatyi Nyoo sahá ra tucahnu iñi chi ra tavá xuhun cuan. Sanaa Nyoo cuatyí ra ta cuanuhu ra nya vehe ra. Soco ra fariseo cuan, ñahri tucahnu iñi ñihi ra, vatyi yóo ñáyivi cha savahá xaan chi nuu Nyoo, cusanocuee Nyoo chi ñu, ta ñu sanocuee chi, Nyoo cusanducahnu ra chi ñu —catyí ra Jesús.

Nu nasocó ra Jesús chi ra cuatyaa
(Mt. 19.13-15; Mr. 10.13-16)

15 Tyicuan ta quichi nyaca ñáyivi chi ra cuatyaa chi ra Jesús vatyi na tyiso ra ndaha ra xiñi ndotyin. Soco cuhva cha nanyehe ra cachicá noo chihin ra vatyi tyicuan caa, ña chaha ca ra.

16 Tyicuan ta cana ra Jesús chi ra cachicá noo chihin ra, ta catyí ra chi ra:

—Saña ndo chi ra cuatyaa na quichi maa ndotyin nu nyai. Ta ma casi ndo, vatyi ñu nyacá ñaha Nyoo añima, cuví ñu tari ra cuatyaa ihya.

17 Ta catyí chi ndo vatyi tatu ña ita iñi ndo chi Nyoo, tari noo ra cuatyaa ita iñi ndotyin chi sutu ndotyin, ma cuví quihvi ndo nu nyacá ñaha Nyoo.

Nu chahá ra Jesús tuhun vatyi yii xaan nacuhva cuenda noo ra tyayii chi ra chi Nyoo
(Mt. 19.16-30; Mr. 10.17-31)

18 Tyicuan ta noo ra cha cuví nuu cuenda vehe ñuhu ndacá tuhun ra chi ra Jesús, ta catyí ra:

—Maestro, ra vaha cuvún. ¿Yoso caa cunyacuvi ta ñihi ñayivi cha ma naa ca maa coi? —catyí ra.

19 Tyicuan ta catyí ra Jesús chi ra:

—¿Ñáá tuhun catyún vatyi ra vaha cuví? Noo ri maa Nyoo cuví ra ra vaha. (Ta cha catyún tyi vahí, nacotón tyi Nyoo cuví.)

20 Yoho chitón tandihí tuhun cha tachí Nyoo tyi sacuvi yo: “Cha ma coo inga ñusihí chuun. Ma cahñun chi ñáyivi. Ma xuhun. Ma cahun cuendu siqui ñáyivi. Ta sañun ñáyivi chi sutun ta chí sihun” —catyí ra Jesús.

21 Tyicuan ta ra cuan catyí ra:

—Tandihí ihya ta quichahí nyata luhli ta nyacua nya vityin —catyí ra.

22 Nu chiñí ra Jesús cha catyí ra cuan, tyicuan ta catyí ra chi ra:

—Soco cumañi sacuvun nonga cha sacuvun. Xico tandihí cha iyó chuun. Ta cñhva chi ñu ndahvi. Ta quichun chate. Tyicuan ta coo cha tyayii chuun nya gloria —catyí ra.

23 Soco ra cuan nu chiñí ra tuhun cuan, nducuihya xaan iñi ra, vatyi tyayii xaan ra.

24 Cha nanyehe ra Jesús vatyi nducuihya iñi ra, ta quichaha catyí ra:

—Yii xaan ta cuví nacuhva cuenda ñu tyayii chi ñu na cunyaca ñaha Nyoo añima ñu.

25 Tañi tyehe yaha noo camello xiu noo yiqui ticu, ta ñima ca cha quihvi noo ñu tyayii nu nyacá ñaha Nyoo —catyí ra.

26 Ta ñu cha cachiñi tuhun ihya catyí ñu: —Tatu tyicuan caa, ¿yóo cha cuví cacu vii? —catyí ñu.

27 Tyicuan ta ra Jesús catyí ra:

—Tandihí cha ña cuví sacuvi rayii, Nyoo cuví sacuvi ra —catyí ra.

28 Tyicuan ta ra Pedro catyí ra:

—Sutu Mañi yuhu, nyuhu tandihí maa cha iyó chi ndi sandoo ndi, ta nyicón ndi chuun —catyí ra.

29 Tyicuan ta catyí ra Jesús chi ra:

—Cha ndicha catyí chi ndo. Vatyi tandihí ndo cha sandoo ndo vehe ndo, o ñasihí ndo, o yañi ndo, o sutu ndo, o sehe ndo cha catyí cha chaha ndo cha cunyaca ñaha Nyoo añima ndo,

30 cuaha xaan cha vaha cunañihí ndo ihya ñayivi ta cunañihí ndo inga ñayivi cha ma naa ca maa —catyí ra Jesús.

Inga chaha sacotó ra Jesús yoso caa cucañi ñáyivi chi ra

(Mt. 20.17-19; Mr. 10.32-34)

31 Ta cana siin ra Jesús chi ndi uchi uvi ra cachicá noo chihin ra, ta catyí ra chi ra:

—Vityin cahun yo nya Jerusalén. Vatyi yucuan cuchino cava tandihí tuhun cha tyaa ra profeta Nyoo ta cha naha. Vatyi yuhu Rayii cha quichí nya gloria cuví.

32 Vatyi cucuhva cuenda ra chii chi ra inga ñuu, ra cha ñima ra ñuu Israel cuví. Ta cucuacu nyaa ra chii. Ta cucahan ra chii. Ta cutyicusii ra nui.

³³ Ta cucañi ra chii, ta cucañi ra chii, soco nu cu uñi quivi ta cunandote —catyí ra Jesús.

³⁴ Ta ra cachicá noo chihin ra ña cutuñi iñi ra tuhun cuan ni ña cachitó ra ñáa tuhun cahán ra Jesús chihin ra. Vatyí ña chahá Nyoo vatyí cacutuñi iñi ra.

Nu sananyehé ra Jesús chi noo ra cuaa ñuu Jericó

(Mt. 20.29-34; Mr. 10.46-52)

³⁵ Cuhva cha cua cha ra Jesús ñuu Jericó. Ta yuhu ityi cuan nyaá noo ra cuaa. Ta chicán ra limuxtan.

³⁶ Tyicuan ta chiñi ra vatyí cuaha xaan ñáyivi cua yaha. Ta ndacá tuhun ra ñáa cha cuví cuan.

³⁷ Ta ñáyivi nacatyí ñu chi ra vatyí ra Jesús, ra ñuu Nazaret, ican cua yaha cuan.

³⁸ Tyicuan ta quichaha cana cha ra:

—¡Yoho Jesús, ra vachi tata rey David! ¡Cundahví cuñi nyehun chii! —catyí ra.

³⁹ Ta ra cha cuahan coyo ityi nuu cuan, quichaha cacatyí ra chi ra, nacasi ra yuhu ra. Soco cha ca caná cha ra, ta catyí ra:

—¡Yoho, ra vachi tata ra David! ¡Cundahví cuñi nyehun chii! —catyí ra.

⁴⁰ Tyicuan ta chicuñi ra Jesús yucuan. Ta tachí ra tyiño na cuquehen chi ra cuaa cuan. Ta cuhva cha chaá ra cuaa cuan nu nanyaá ra Jesús, ta ra Jesús quichaha ndaca tuhun ra chi ra, ta catyí ra:

⁴¹ —¿Ñáa cha cuñun vatyí sacuvi chuun?

Tyicuan ta ra cuaa cuan nacahan ra, ta catyí ra:

—Sutu Mañi yuhu, cuñi nanyehi —catyí ra.

⁴² Tyicuan ta catyí ra Jesús chi ra:

—Nanyehé. Cha nduvahá chiti nuun, vatyí chinó iñun chii —catyí ra.

⁴³ Ta caa cuhva ri cuan, ra cuaa cuan nanyehé ra. Ta cuahan ra chata ra Jesús. Ta sacahnú ra chi Nyoo. Ta tandihi ñáyivi cha nyehé ñu tyicuan caa, sacahnú ñu chi Nyoo.

19

Nu cuahan ra Jesús vehe ra Zaqueo

¹ Yucuan ta quihví ra Jesús ñuu Jericó cuan. Ta cua yaha ra chichi ñuu cuan.

² Ta yucuan iyó noo ra tyayii vavaha. Nañi ra Zaqueo. Ta ra cuví nuu cuenda ra catava xuhun cuenda gobiernu ñuu Roma cuví ra.

³ Ta cuñi xaan ra cohon nuu ra chi ra Jesús. Ta ña cuví nyehé ra chi ra vatyí cuaha xaan ñáyivi. Ta maa ra tyaha xaan ra.

⁴ Yucuan ta chino vavaha ra cuahan ra ityi nuu, ta ndacá ra nu noo yutun cha nañi sicómoro cha nanyaá yuhu ityi nu cua yaha ra Jesús, tacuhva cuví nyehé ra chi ra.

⁵ Ta cuhva cha yahá ra Jesús nanyehé ndaa ra ityi siqui ta nanyehé ra chi ra Zaqueo. Ta quichaha catyí ra chi ra:

—Zaqueo, sanumi ta ñon nu yutun chiña. Vatyí vityin cuhin vehun —catyí ra chi ra.

⁶ Tyicuan ta numi ri noq ra Zaqueo nuu yutun cuan. Ta sii vavaha cuví chi ra. Ta quehen cuenda ra chi ra Jesús. Ta cuahan ra chihin ra nya vehe ra.

⁷ Ta cha nyehé ñáyivi cha tyicuan caa, ta tandihi ñu quichaha cahán nyaá ñu chi ra Jesús. Ta catyí ñu vatyí ndoo ra vehe noo ra iyó cuatyí.

⁸ Nu canyicú ra chichi vehe cuan, ra Zaqueo nicuinanyaa ra. Ta quichaha catyí ra chi ra Jesús:

—Sutu Mañi yuhu, yuhu cua cuhve sava cha iyó chii chi ñu ndahví. O tatu suhi chi ñáyivi chihin cha sandavi ñahi chi ñu, vityin cunacuhva cuende nya cumi ca tahan chaha chi ñu —catyí ra chi ra.

⁹ Tyicuan ta catyí ra Jesús:

—Vityin cacu añimon, ta ñáyivi chi ra Abraham cuvún. Vatyí nacuhva cuendon chuun chi Nyoo tari nacuhva cuenda ra Abraham chi ra chi Nyoo.

¹⁰ Vatyí yuhu Rayii cha quichí nya gloria vachi nanduqui ta vachi sacaqui chi ñáyivi cha cua naa —catyí ra Jesús.

Nu sañahá ra Jesús na saha tyiño yo chihin cha chahá Nyoo chi yo
(Mt. 25.14-30)

¹¹ Ta cha ni ri ca cha chiñi ñáyivi tuhun cahán ra Jesús, quichaha cahan tucu ra inga cuhva ihya. Vatyí cha cuyatyin chaa ra Jerusalén. Ta ñáyivi cuñi maa ñu vatyí cha cua quichaha ra cunyaca ñaha ra yucuan.

¹² Tyicuan ta catyí ra:

—Chiyó noo ra vaha ta cuñi cuhun ra noo ñuu cañi. Vatyí yucuan cunanduvi ra rey tacuhva vatyí ndichi ra ñuu ra, soco cha cuví ra rey.

¹³ Ta cuhva cha cumañi cuhun ra, caná ra chi uchi tahan musu ra. Ta chahá cuenda ra noo xuhun chi noo noo ra. Ta catyí ra chi ra: “Saha tyiño ndo chihin xuhun chiña nyacua nya ndichi mai”, catyí ra.

¹⁴ Soco suhva ñáyivi ñuu ra, tasi cuñi ñu nyehé ñu chi ra ta ña cuñi ñu cha cuví ra rey chi ñu. Ta tachí ñu chi suhva ra cuhun chata ra, vatyí catyí ra vatyí ña cuñi ñu cha cuví ra rey chi ñu.

¹⁵ Soco ra cuan nduví ra rey. Tyicuan ta nachaa ra nya ñuu ra. Ta quivi cha nachaa ra, caná ra chi musu ra, ra cha sandoq ra xuhun chii. Vatyí coto ra yoso sahá ganaa xuhun ra cha ni ri ca cha chahan ra.

¹⁶ Ta chaá noo ra cuan. Ta catyí ra: “Tata, sahá ganai uchi ca tahan chaha siqui xuhun cha sandoun chii”, catyí ra.

17 Tyicuan ta quichaha catyí rey cuan chi ra: “Vaha xaan. Yoho vaha musu cuvún. Vatyí vaha saha tyiñon chihin chiin xuhun cha chahí chuun. Ta vityin cunyaca ñahun uchi tahan ñuu”, catyí rey cuan chi ra.

18 Tyicuan ta chaq tucu inga ra cha chaha ra xuhun chii. Ta quichaha catyí ra: “Ma xuhun ihya. Saha ganai ohon tahan ca chaha siqui xuhun cha sandoun chii”, catyí ra.

19 Tyicuan ta catyí rey chi ra: “Yoho cunyaca ñahun ohon tahan ñuu”, catyí ra.

20 Tyicuan ta chaq tucu inga ra cuan. Ta quichaha catyí ra: “Ma xuhun ihya cha chahun chii. Yuhu chicumí vahi chichi noo pañitu.

21 Vatyí yuhví xain chuun, vatyí yoho cuvún noo ra xaan. Vatyí naquehun cha ñima chuun cuví. Ta naquehun tyiño saha inga ñáyivi”, catyí ra cuan.

22 Tyicuan ta rey cuan catyí ra chi ra: “Yoho musu ña vaha cuvún. Vityin suri chihin tuhun cha catyín chii, cucatyí tucu yuhu chuun. Tatu chitón vatyí yuhu, xain, ta chitón vatyí naquehin cha ñima chii cuví, ta naquehin cha ña saha tyiñe,

23 ¿Ñáá tuhun ña chahun ta chityihun xuhin banco vatyí nachai soco cha nducuaha ca xuhin?” catyí rey cuan.

24 Ta quichaha catyí ra chi ra canyicú cuan: “Tinya ndo xuhun cha chahí chi ra, ta cuhva ndo chi ra cha saha ganaa uchi ca tahan cuan”, catyí ra.

25 Tyicuan ta quichaha catyí ra chi rey cuan: “Tata, soco ra cuan, cha iyó uchi tahan chi ra”, catyí ra.

26 Tyicuan ta rey cuan catyí ra: “Soco catyí yuhu chi ndo. Vatyí ra cha vaha ca sahá tyiño chihin cha chahí chi, cucuhva que chi ra. Ta ra cha chahí chiin ri, ta ña cuñí ra sahá tyiño ra chihin cuan, cutinyaa ndihi chi ra.

27 Ta tandihi ñu xaan iñi chii, ñu ña cuñí vatyí cunyaca ñahi chi ñu, nyaça ndo chi ñu tyehe vatyí cahñi ndo chi ñu nui”, catyí rey cuan —catyí ra Jesús.

*Nu cua chaa ra Jesús Jerusalén
(Mt. 21.1-11; Mr. 11.1-11; Jn. 12.12-19)*

28 Cha yahá cahan ra Jesús cuhva cuan, ta sañihi ra cuahan ra ityi Jerusalén.

29 Yucuan ta cua chaa ra ñuu Beftagé chihin ñuu Betania, yatyin ri noo yucu cha nañi Olivo, vatyí maa maa ri maa tun Olivo iyó yucuan. Ta tavá ra tyiño chi uvi tahan ra cachicá noo chihin ra.

30 Ta catyí ra chi ra:

—Cuhān ndo ñuu cha nyaá yatyin ri cuan. Ta yucuan cunañihi ndo noo burru luhlu, quití ta coto ca tyayu, nuñí ti. Ndachí ndo chi ti. Ta nyaça ndo chi ti tyehe.

31 Tatu yóó cha catyí chi ndo: “¿Ñáá tuhun cha ndachi ndo chi ti?” catyí ndo chi ñu: “Vatyí chihuhú ti chi maa ra nyaca ñaha chi yo.”

32 Tyicuan ta ra cachicá noo chihin ra, cuahan coyo ra. Ta nañihí ra chi ti tari cuhva catyí maa ra Jesús.

33 Ta cuhva cha candachi ra chi ti, chaq coyo chitoho ti. Ta candaca tuhun ra chi ra:

—¿Ñáá tuhun cha ndachi ndo chi burru chihñá? —catyí ra.

34 Tyicuan ta canacahan ra cuan ta cacatyí ra:

—Ndachí ndi chi ti vatyí chihuhú ti chi maa ra nyacá ñaha —catyí ra.

35 Tyicuan ta quehen ra chi ti. Ta chinyaca ra chi ti nu nyaá ra Jesús. Ta tyiso ra sahma ra siqui ti. Tyicuan ta casandaq ra chi ra Jesús siqui ti.

36 Tyicuan ta cuahan ra Jesús. Ta cuaha vavaha ñáyivi cachacun ñu sahma ñu ityi nu cua yaha ra, yosó ra burru cuan.

37 Tyicuan ta cha cua cuyatyin tandihi ñu chihin ra Jesús nu iñi noo yucu Olivo cuan. Ta quichaha canq chaa tandihi ñu chinó iñi chi ra chihin cha sii cuví chi ñu. Ta sacahnú ñu chi Nyoo vatyí cuaha xaan cha vaha nyehe ñu cha sacuví ra.

38 Yucuan chaha catyí ñu:

—¡Na sacahnú yo chi Rey ihya vatyí vachi ra chihin sivi Nyoo! ¡Na coo cha taxi ri andñivi! ¡Ta na sacahnú yo chi Nyoo! —catyí ñu.

39 Tyicuan ta suhva ra fariseo cha cuahan coyo chihin ñáyivi cuan quichaha cacatyí ra:

—Maestro, sacutaxin chi ñu nyicón chuun —cacatyí ra.

40 Nacahan ra Jesús ta catyí ra:

—Tatu ñáyivi ihya ta cu taxin ñu, nyacua nya yuu ta nacana chaa chí, ta sacahnú chi chii —catyí ra Jesús.

41 Yucuan ta cha cua chaa ra yatyin ri Jerusalén cuan. Ta nanyehe ra Jesús chi ñuu cuan ta quichaha chacu chaa ra vatyí cuihya iñi ra.

42 Ta catyí ra:

—Tyehe ta chitó nyoho, ta cutuñi iñi ndo yoso caa cha vaha cha vachi nyaque chi ndo quivi ihya. Soco xehe xaan ñohó cha chihñi tuñi cuan, ta ña nañihí maa ndo.

43 Soco cuhaa quivi ña vaha vatyí ra xaan iñi chi ndo cutyihí chacu ra chi ndo. Vatyí tandihi ri ityi cuquichi coyo ra siqui ndo. Ta cucañi tahan ra chihin ndo.

44 Ta cucacan ñuhú ra chi ndo ta cucahñi ra chi ndo. Ta ni noo yuu yoso nyitahan ta ma sandoo ra. Tyicuan caa cucuvi vatyí ña cuñí ndo nacoto ndo cha quichí Nyoo quichi sacacu ra chi ndo.

Nu tava ñehe ra Jesús chi ra caxico chichi vehe ñuhu cahnu

(Mt. 21.12-17; Mr. 11.15-19; Jn. 2.13-22)

⁴⁵ Tyicuan ta ra Jesús quihvi ra chichi nuquehe vehe ñuhu cahnu. Ta quichaha tava ñehe ra tandihi ra caxico ta casata yucuan.

⁴⁶ Ta catyí ra chi ra:

—Nu tutu Nyoo catyí chi vatyi vehe Nyoo, nu chicán tahvi yo chi ra cuví. Soco nyoho sananduví ndo vehe nu nyicú ra suhu —catyí ra.

⁴⁷ Ta tandihi quivi chahán ra Jesús chisañaha ra chí ñáyivi chichi vehe ñuhu cuan. Soco ra cacuví nuu chí tata sutu, ta ra casacuahá cuenda ley vehe ñuhu, ta ra cacuví nuu chí ñuu cuan, canducú ra cuhva yoso caa ta cahñi ra chi ra.

⁴⁸ Soco ña ñihí maa ra cuhva yoso caa sacuví ra. Vatyi tandihi ñáyivi ta vaha tyasohó ñu tuhun cahán ra Jesús.

20

Nu ndaca tuhun ra fariseo chi ra Jesús yóo cha tachí chi ra vatyi chahán ra nuu ñáyivi
(Mt. 21.23-27; Mr. 11.27-33)

¹ Noo quivi cuan cha ni ri ca cha sañahá ra Jesús chí ñáyivi chichi vehe ñuhu cahnu, ta cahán ra tuhun yoso caa sacacú Nyoo chí ñu. Ta chaq coyo ra cuví nuu chí tata sutu chihin ra casacuahá cuenda ley vehe ñuhu, iin ri chihin ra cacuví mandoñi.

² Ta cacatyi ra chi ra:

—Catyí chí ndi ¿yóo cha tyaq tyiño chuun vatyi sacuvun tyehe caa? —catyí ra.

³ Tyicuan ta ra Jesús quichaha catyí ra chí ra:

—Yuhu tucu cua ndaca tuhun noo tuhun chí ndo.

⁴ ¿Yóo cha tachí chi ra Juan vatyi sacondutya ra chí ñáyivi? ¿Atu Nyoo tachí chí ra, o ñáyivi?

⁵ Tyicuan ta cacatyi ra cuan chí ra tahan ra:

—Tatu catyí yo vatyi Nyoo tachí chí ra Juan cuan, cucatyi ra chí yo “Ñáá tuhun ña chinó iñi ndo tuhun cahán ra.”

⁶ Ta tatu catyí yo vatyi ñáyivi tachí chí ra, ñáyivi cahñi ñu chí yo chihin yuu. Vatyi tandihi ñu, ta cuñí ñu vatyi Nyoo tachí chí ra —cacatyi ra.

⁷ Tyicuan ta cacatyi ra chí ra Jesús vatyi ña cachitó ra yóo cha tachí chí ra Juan vatyi na sacondutya ra chí ñáyivi.

⁸ Tyicuan ta ra Jesús catyí ra chí ra:

—Ni ri yuhu, ta ma catyí chí ndo yóo cha tachí chí, cha sacuví tyehe caa.

Nu sañahá ra Jesús vatyi tari ra sahá tyiño ña vaha tyicuan caa cuví ra cha cucahñi chí ra
(Mt. 21.33-44; Mr. 12.1-11)

⁹ Tyicuan ta quichaha catyi ra Jesús noo cuhva ihya chí ñáyivi:

—Noo ra tachí ra cuaha yoho tichaha ndivi nu ñuhú ra. Yahá cuan ta chahá noo ra ñuhú cuan chí suhva ra casaha tyiño. Tyicuan ta naha cuahan ra inga ñuu.

¹⁰ Ta chaq quivi cha iñi chíti cuan.

Tyicuan ta tachí ra chí noo musu vatyi cuquehen ra suhva chíti cha tahán chí chí ra. Soco cacañi xaan ra casahá tyiño cuan chí musu cuan. Ta sacunuhu ra chí ra chihin nu ndaha nu ndi ra.

¹¹ Tyicuan ta chitoho yoho tichaha ndivi cuan tachí tucu ra chí inga musu. Suri cacañi xaan ra chí ra. Ta cacahan uhvi ra chí ra. Ta natachí ra chí ra. Soco suri ñahri cachaha ra cuiso ra cunuhu.

¹² Tyicuan ta chitoho cuan tachí tucu ra chí inga ra. Soco suri tyicuan caa chinyacuví tucu ra chihin ra. Ta sañicuehe ra chí ra. Ta tava ñehe ra chí ra yucuan.

¹³ Yahá cuan ta quichaha catyi chitoho ñuhu cuan: “¿Yoso caa cunyacuví vityin? Cua tachí chí sehi, ra cha cuñi vavahi. Ta cha nanyehe ra chí ra, vasi casaha ra ñáyivi chí ra, vatyi sehi cuví chí ra.”

¹⁴ Soco cuhva cha cananyehe ra casahá tyiño cuan chí ra, catyí ra chí ra tahan ra: “Ican ra ihya cundoo chihin ñuhú ihya tatu chíti sutu ra. Soco nacahñi yo chí ra. Vatyi ndoo maa yo chihin ñuhú ihya”, catyí ra.

¹⁵ Tyicuan ta tava ñehe ra chí sehe chitoho ñuhú cuan ityi chata chacu. Ta cachahñi ra chí ra —catyí ra Jesús.

Tyicuan ta catyí ra Jesús chí ñáyivi nyicú cuan:

—¿Ñáá cha cusacuví chitoho ñuhú cuan chí ra cachahñi chí sehe ra cha cuhva cha cuñi nyoho?

¹⁶ Catyí chí ndo vatyi quichi ra ta cahñi ra chí ra casahá tyiño cuan. Ta cuhva ra ñuhú cuan chí inga ra —catyí ra Jesús.

Ta cuhva cha chíti ñáyivi tuhun cuan, yuhvi xaan ñu cuví. Ta quichaha catyí ñu:

—iÑa cuñi Nyoo ta cuví tyicuan caa! —catyí ñu.

¹⁷ Soco ra Jesús nanyehe ra chí ñu ta catyí ra:

—Tyicuan caa cucuvi. Vatyi nyaá nu tutu Nyoo ta catyí chí tuhun tyehe caa:

Yuu cha ña cuñi ra casavahá vehe cotyiño ra,

Ican cuan cuví yuu cha niñi ca.

¹⁸ Tari tahnu noo ra cha canacava siqui yuu, tyicuan caa tiví ñu ña cuñi quichaha tuhun cahín. Ta sán ri, tari taxin nyihi noo ra cha canacava yuu siqui, tyicuan caa cunaa ñu ña cuñi quichaha tuhun cahín —catyí ra Jesús.

¹⁹ Ta ra cacuví nuu chí tata sutu ta ra casacuahá cuenda ley vehe ñuhu catuvi iñi ra vatyi tuhun cha catyí ra Jesús, chí maa ra

nañi cuan. Ta cuñi ra catiin ra chi ra Jesús vatyi cacahñi ra chi ra. Soco ña cachitó maa ra yoso caa. Vatyi yuhví ra chi ñáyivi.

Tuhun cha tyiyahví ñu xuhun chi gobiernu ñuu Roma

(Mt. 22.15-22; Mr. 12.13-17)

²⁰ Tyicuan ta catachí ra chi suhva ra vatyi cunducu nyehe ra chi ra Jesús. Ta casahá ra tyi ra vaha cacuvi ra. Vatyi coto ra ñáá noo tuhun ña vaha cahán ra Jesús tacuhva cuvi catiin ra chi ra. Ta cuhva cuenda ra chi ra chi gobernador.

²¹ Yucuan chaha candaca tuhun ra casavaha chii cuan chi ra Jesús:

—Maestro, chitó ndi vatyi vaha tuhun cahún. Ta sañahún cha vaha chi ñáyivi. Ta ñima cuhva iyó ri ñu nyehun soco añima ñu ñandíhi. Ta maa ri maa ityi Nyoo sañahún.

²² Catyi chi ndi ¿atu vaha cha tyiyahví yo cha chicán gobiernu ñuu Roma chi yo, o ña vaha? —catyi ra.

²³ Soco ra Jesús tuví ifni ra vatyi cuñi ra nducu nyehe ra chi ra. Ta catyi ra chi ra: —¿Ñáá tuhun cuñi ndo nducu nyehe ndo chii?

²⁴ Sañaha ndo noo xuhun chiña chii, na nyehi. ¿Yóó chi nuu ta yóó chi sivi nyaá nu xuhun ihya? —catyi ra.

Tyicuan ta nacahan ra cuan, ta catyi ra: —Nuu gobiernu, ta sivi ra ñandíhi —cacatyí ra.

²⁵ Tyicuan ta catyi ra Jesús:

—Tu tyicuan caa, cuhva ndo xuhun chiña chi ra cuvi gobiernu cuan vatyi chi maa ra tahán chi. Ta cuhva tucu ndo chi Nyoo cha tahán chi chi ra —catyi ra Jesús chi ra.

²⁶ Ta ña cuvi maa sandahvi ñaha ra chi ra Jesús chihin tuhun cahán ra nuu ñáyivi. Ta iyo xaan cacuñi ra tuhun cha nacahan ra. Ta taxi ri cuvi ra.

Nu cacuñi ra saduceo sandavi ñaha ra chi ra Jesús

(Mt. 22.23-33; Mr. 12.18-27)

²⁷ Cha yahá cuan ta chaá coyo suhva ra saduceo nu nyaá ra Jesús. Maa ra cuvi ra casañahá vatyi ña nandotó ndiyi.

²⁸ Tyicuan ta catyi ra chi ra Jesús: —Maestro, sandoq ra Moisés tuhun ihya vatyi tatu noo ra chihí ra ta ndoo ñasihí ra, tatu yori sehe ra chiyo chihin ña, tahán chi cha tandaha yañi ra chihin ña tacuhva cha ma cunaa tata yañi ra.

²⁹ Soco cuñi ndi coto ndi vatyi chiyo ucha tahan ra chihin yañi ra. Ta ra cha ñihi ca chicoq ñasihí ra, soco yori sehe ñu chiyo, ta chihí ra.

³⁰ Tyicuan ta naquehen ra cha cu uvi suri maa ña cuan. Ta yori tucu sehe ñu chiyo. Ta chihí tucu ra cuan.

³¹ Ta suri tyicuan caa cuvi chihin ra cu uñi cuan. Ta suri tyicuan caa cuvi chi ndi

ucha ra. Ni noo ra ta yori sehe ra chiyo chihin ña.

³² Ta nu ndihí tuhun chihí ndihí maa ña.

³³ Ta cuñi ndi coto ndi yóó ra cuvi ñasihí chi ña chichi cha ndi ucha tahan ra cuan nu cunandoto ñu nuu Nyoo —cacatyí ra saduceo cuan.

³⁴ Tyicuan ta nacahan ra Jesús, ta catyi ra: —Ihya ñáyivi, rayi ta ñusihí tandaha ñu.

³⁵ Soco ñu cha tahán chi nandoto inga ñáyivi nu nyacá ñaha Nyoo, ña tandaha ca ñu ta ni ma cuhva ca ñu sehe ñu tandaha.

³⁶ Ta ñahri tuhun chihí iyó nyicuan. Soco cucuvi ñu tari ángel. Ta cuvi ñu sehe Nyoo cha ndicha vaha vatyi nandotó ñu.

³⁷ Cha ndicha cuvi vatyi ra Moisés nu sacoto ra tuhun cha cayu taca ifnu cuan, yucuan sacotó ra chi yo vatyi ñu chihí nandotó ñu. Vatyi yucuan catyi ra vatyi Sutu Mañi yo Nyoo cuenda ra Abraham, ta Nyoo cuenda ra Isaac, ta Nyoo cuenda ra Jacob, cuvi chi ra.

³⁸ Vatyi Nyoo ñima Nyoo cuenda ñáyivi chihí cuvi ra. Nyoo cuenda ñu nyitó cuvi ra. Vatyi cha cuenda Nyoo tandíhi yo ta nyitó añima yo vasi chihí coño ñuhu yo —catyi ra Jesús.

³⁹ Tyicuan ta suhva ra casacuahá cuenda ley vehe ñuhu catyi ra:

—Vaha xaan nacahun Maestro —catyi ra.

⁴⁰ Yucuan ta ña caña ca maa ifni ra candaca tuhun ra ñáá ca tuhun chi ra Jesús.

Cristo vachi ra tata ra David, ta suri cuvi tucu ra Sehe Nyoo

(Mt. 22.41-46; Mr. 12.35-37)

⁴¹ Tyicuan ta ndaca tuhun ra Jesús chi ñu:

—¿Ñáá tuhun cha catyi ndo vatyi ra

Cristo tata ra David vachi ra?

⁴²⁻⁴³ Vatyi suri maa ra David catyi ra nu libru Salmo tyeha caa:

Cahán Suti Nyoo chihin Suti ra Cristo, ta catyi ra chi ra:

“Cunyaa chiyo vahi nyacua nya cuhve chi ra xaan ifni chuun vatyi cuaca chahun siqui ra”, catyi Nyoo chihin yuhu ra David ta cha naha.

⁴⁴ ¿Yoso caa cha ra vachi tata ra David cuvi chi ra Cristo, ta suri maa ra David catyi vatyi Sutu ra cuvi chi ra Cristo? —catyi ra Jesús.

Nu catyi ra Jesús vatyi cuaha xaan cuatyí ra casacuahá cuenda ley vehe ñuhu iyó

(Mt. 23.1-36; Mr. 12.38-40; Lc. 11.37-54)

⁴⁵ Tandíhi ñáyivi cachiñi ñu tuhun cahán ra Jesús chihin ra cachicá noo chihin ra nu catyi ra tyeha caa:

⁴⁶ —Saha ndo cuenda chi ndo chihin ra casacuahá ley vehe ñuhu. Tahán xaan ifni ra cuihno ra sahna cañi. Ta cuñi ra vatyi saha ndo ñáyivi chi ra nuyahvi ta cuhva ndo nocumí chi ra. Ta nanducú ra tyayu vaha

cunyaa ra chichi vehe ñuhu ta nu cuahan ra vico.

⁴⁷ Ta naha chicán tahvi ra chi Nyoo nu tuvi, cha cuñi ra cha catyi ñáyivi tyi vaha ñáyivi cuví ra. Soco suri maa ra tinyaá ra vehe ñu ndahvi cha chihí yíi vatyí ña cuví tyiyahvi ñu xuhun cha tavá ra síqui ñu. Yucuan chaha ñihi ca cutachi tuñi Nyoo chi ra —catyi ra Jesús.

21

Noo ofrenda cha chaha noo ñaha sihi cha chihí yíi

(Mt. 12.41-44)

¹ Ta nyehe ra Jesús vatyí cuaha xaan ñu tyayíi catyihí ra xuhun chichi caja cha nanyaá chichi vehe ñuhu cahnu.

² Ta nyehe tucu ra noo ñaha ndahvi cha chihí yíi. Ta tyihí ña uvi tahan ri xuhun cuatyí.

³ Ta catyí ra Jesús:

—Cha ndicha catyí chi ndo vatyí nuu Nyoo cuaha ca tyihí ñaha ndahvi ihya ta ñima ca tandihí ñu tyayíi cuan.

⁴ Vatyí cha ndoó ri síqui chi ñu catyihí ñu. Soco ñaha ihya tyihí ña tandihí cha iyó chi ña —catyí ra.

Nu catyí ra Jesús vatyí cucani ñáyivi vehe ñuhu cahnu

(Mt. 24.1-2; Mr. 13.1-2)

⁵ Tyicuan ta suhva ñu ndatuhún ñu tuhun vehe ñuhu cahnu cuan. Ta catyí ñu vatyí tyaquí xaan yuu. Tyaquí xaan tacaá cha chaha ñáyivi. Tyicuan ta quichaha catyí ra Jesús:

⁶ —Coo quívi ta tandihí cha nyehé ndo ihya cutani. Ni noo yuu ta ma coso ca síqui tahan. Vatyí cusanacoyo ra xaan iñi chi ndo.

Ñáá ndihí seña cha cucuvi cha ni cumañi ca naa ñáyivi

(Mt. 24.3-28; Mr. 13.3-23)

⁷ Tyicuan ta quichaha candaca tuhun ra chi ra Jesús, ta catyí ra:

—Maestro, ¿ama cucuvi tandihí tuhun cahun ihya? ¿Yoso caa ta coto ndi tatu cha cuyatyin cha naa ñáyivi? —catyí ra.

⁸ Tyicuan ta catyí ra Jesús:

—Saha vaha ndo cuenda, coto sandavi ñaha ra chi ndo. Vatyí cuaha xaan ra cuquichi, ta cucotyíño ra sívi, ta cucatyí ra: “Yuhu cuví Cristo ra cha saquichí Nyoo chi. Cha cuñi cunaa ñáyivi”, cucatyí ra. Soco ma cunyicon ndo chi ra. Ta ma chino iñi ndo chi ra.

⁹ Ta quívi ñihi ndo tuhun tyi iyó cuatyí ta cañi tahan ñáyivi, ma nayuhvi ndo. Vatyí tandihí cuan cutahan chí cuví xihna ca. Soco cumañi ca chaa quívi cha naa ñáyivi.

¹⁰ Ta catyí tucu ra:

—Ñáyivi iyó noo ñuu cucañi tahan ñu chihin ñáyivi inga ñuu. Ta cucoo cuatyí.

¹¹ Ta cutaan nahnu. Ta cucoo tama. Ta cucoo cuehe tandihí ri ityi. Ta cunyehe ñáyivi cuaha xaan cha yuhví andívi. Cuaha xaan seña nahnu cha ña tuhvá ñu nyehe cunyehe ñu.

¹² Soco cha cumañi ca cuví ihya, cutasi iñi ñáyivi chi ndo. Ta cucacan ñu cuatyí chaha ndo. Vatyí cucutuñi chi ndo ta cucuhva cuenda ñu chi ndo chi tata sutu. Ta cutyihí ñu chi ndo chichi vehe caa. Ta cunyaca ñu chi ndo nuu rey ta nuu ra cacuví tyiño cha catyí yuhu.

¹³ Tyicuan ta cuví cahan ndo tuhun chihin ñu.

¹⁴ Soco saha ndo cuenda ta ma caca xiñi ndo ñáá tuhun cunacahan ndo chihin ra cuví tyiño cuan.

¹⁵ Vatyí yuhu cucuhve tuhun cunacahan ndo. Ta cucuhve cha chiñi tuñi xiñi ndo.

Vatyí ni noo ra xaan iñi chi ndo ta ma cuví chasaha ra chi ndo chihin tuhun cahán ra.

¹⁶ Soco ñáyivi cunacuhva cuenda ñu chi ndo nuu ñu xaan iñi chi ndo. Nyacua nya sutu ndo ta sihi ndo, yañi ndo, tahan ndo, ta ra tahan ndo cunacuhva cuenda ra chi ndo chi ñu xaan iñi chi ndo. Ta yihí nyoho cucahñi ñu chi ndo.

¹⁷ Tandihí ñáyivi ta cutasi cuñi ñu nyehe ñu chi ndo cha catyí yuhu.

¹⁸ Soco ni noo ixí xiñi ndo ta ma cunaa.

¹⁹ Tatu ma ndu uvi iñi ndo chíi, cucacu añima ndo.

²⁰ Quívi nyehe ndo vatyí nicachico yuhu ñuu Jerusalén ihya nyicú sindaro, coto ndo vatyí cha cuñi chaa quívi cha sanaa ra ñuu ihya.

²¹ Ta ñáyivi cha nyicú ityi Judea, na cono ñu ta na tixehe nuu ñu ityi yucu. Ta ñu nyicú ñuu Jerusalén ihya, na quita ñu. Ta ñu nyicú nu chiqui, ma ndichi ñu ñuu ihya.

²² Vatyí yucuan quívi cutachi tuñi Nyoo chí ñáyivi ñuu ihya. Vatyí cuchino cava tandihí cuhva catyí maa nu tutu Nyoo.

²³ Ta ndahvi ñusihí cha ñohó sehe quívi cuan. Ta ndahvi ñu cha iyó cha lee sehe cha ni chaxín ca. Vatyí cuaha xaan tindoho cunyehe ñu ta tandihí ñáyivi. Vatyí cuxaan xaan Nyoo chihin ñáyivi ñuu Jerusalén ihya.

²⁴ Sindaro cucahñi ra chí suhva ñáyivi chihin mityí ra. Ta suhva ñu cutiin ra ta cunyaca ra chí ñu vehe caa inga ñuu. Ta ñáyivi cha ñima ñu Israel cuví, cucuaca chaha ñu Jerusalén nyacua nya quívi cha catyí maa Nyoo.

Yoso caa cuquichi Rayíi cha quichi nya gloria inga chaha

(Mt. 24.29-35, 42-44; Mr. 13.24-37)

²⁵ Tyicuan ta cuaha cha iyo cunyehe ñáyivi nu ñanyii, ta nu yoo, ta nu tiño. Ta

ihya siqui ñuhu ñayivi cunayuhvi ñáyivi chihin cha iyo cunacatyin tyañuhu.

²⁶ Ta cucoña ñu chihin cha yuhví ñu cha chicá xihí ñu ñáá ndihí cha cua cuvi ihya siqui ñuhu ñayivi. Vatyí nyacua nya cha iyó andívi cunacanda.

²⁷ Tyicuan ta cunyehe ñu chi yuhu Rayi cha quichí nya gloria vachi chichi noo vico tyaqui chihin tunyee iñi Nyoo, ta chihin cha cahnu cuví ra.

²⁸ Ta cuhva cha quichaha tuhun ihya, sanduní ndo iñi ndo ta cusí cuñi ndo vatyí numi xaan ta cucacu ndo —catyí ra.

²⁹ Tyicuan ta chahá ra Jesús noo cuhva ihya, ta catyí ra:

—Saha ndo cuenda noo yutun cha nañi higuera, o ñáá nonga yutun.

³⁰ Tatu cha cua cuyatyin cha coon savi cha nduyutya numa tun.

³¹ Ta tyicuan caa tucu nyoho, tatu cha nyehe ndo vatyí cha quichaha tandihí tuhun cha catyí chi ndo, çoto ndo vatyí cha cuyatyin quívi cha cunyaca ñaha Nyoo siqui ñuhu ñayivi ihya.

³² Soco catyí chi ndo vatyí tuhun ihya cucuvi cha ní ri ca cha iyó ñáyivi.

³³ Ta coo quívi cunacaa andívi ta ñuhu ñayivi, soco tuhun cahán yuhu, tyicuan ri cucuvi tari cuhva catyí.

³⁴ Ta saha ndo cuenda chi ndo coto ndundava añima ndo chihin vicio, ta coho xaan ndo ndixi, o caca xaan iñi ndo tuhun tundoho ñayivi ihya. Ta coto sana iñi ndo ta chaa quívi quichi yuhu ta quichi tundoho siqui ndo.

³⁵ Vatyí tyicuan caa cucuvi chí tandihí ñáyivi iyó siqui ñuhu ñayivi. Sana iñi ñu ta tari noo cha cua nacasi Nyoo nu ñohó ñu ta ma cuvi quita ñu.

³⁶ Soco nyoho cuatu tuhva ri ndo. Çacan tahvi ndo chí Nyoo tandihí quívi, tacuhva tyinyee ra chi ndo. Ta ma cunaa ndo quívi cuan, tacuhva cuvi chaa vaha ndo nuu yuhu Rayi cha quichi nya gloria —catyí ra Jesús.

³⁷ Ta cha ñucahñu sañahá ra Jesús chí tandihí ñáyivi chichi vehe ñuhu cahnu. Ta cha cha cuaa chahán ra yucu Olivo.

³⁸ Ta tandihí ñáyivi cha çoyo ñu chichi vehe ñuhu cahnu ndihí ñaha ri. Vatyí cuiñi ñu tuhun cahán ra.

22

Nu cua xico ra Judas Iscariote chi ra Jesús (Mt. 26.1-5, 14-16; Mr. 14.1-2, 10-11; Jn. 11.45-53)

¹ Ta cha nyaña yatyin quívi cha coo vico pascua vico nu tuhva ñu chachi pan cha ñahri yuchan iya yihí chihin.

² Ta ra cacuví nuu chí tata sutu chihin ra casacuahá cuenda ley vehe ñuhu, nducú

xaan ra cuhva yoso caa ta cacahñi ra chí ra Jesús. Soco cayuhví ra chí ñáyivi.

³ Tyicuan ta quihví cuihna chí ra Judas cha catyí ñáyivi Iscariote chí. Ta maa ra cuvi noo ra cha uchi uvi tahan ra cha nacachí ra Jesús.

⁴ Ta ra cuan, chahan ra chí cahan ra chihin ra cuví nuu chí tata sutu, ta chihin ra cuví nuu chí ra sahá cuenda vehe ñuhu cahnu. Ta candatuhun tahan ra yoso caa cunacuhva cuenda ra chí ra Jesús.

⁵ Ta ra cuan sñi xaan cacuví chí ra. Ta tyaa ra cuhva vatyí cuhva ra xuhun chí ra Judas.

⁶ Ta ra Judas ndoo ra vaha. Ta quichaha nducu ra cuhva yoso caa cuhva cuenda ra chí ra Jesús chí tata sutu cuan, cuhva cha yori ñáyivi nyicú chihin ra.

Nu cuxiñi ra Jesús chihin ra cachicá noo chihin ra

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ta cha quívi cha cuví vico nu chachi ñu pan cha ñahri yuchan iya yihí. Ta suri quívi cuan tuhva ñu chahñi ñu noo mbee luhlu cha vico pascua cuan. Vatyí cachi ñu chí ti.

⁸ Ta ra Jesús tachí ra chí ra Pedro chihin ra Juan, ta catyí ra chí ra:

—Cuahan ndo cua sanduvaha ndo mbee cha cuxiñi yo —catyí ra.

⁹ Tyicuan ta quichaha ndaca tuhun ra chí ra:

—¿Nya cuñun cha sanduvaha ndi cha cuxiñi yo? —catyí ra.

¹⁰ Tyicuan ta catyí ra Jesús chí ra:

—Cuahan ndo chichi ñuu. Ta yucuan cunañihi ndo chí noo ra nyisó noo quívi ndutya. Ta cuahan ndo chata ra nyacua nya nu quihví ra chichi vehe.

¹¹ Ta çatyí ndo chí chitoho vehe cuan: “Ra Sacuahá, cuñi ra coto ra nya nyaá cuarto nu sanduvaha ra cha cuxiñi ra chihin ra cachicá noo chihin ra, vatyí casanducahnu ra vico pascua.” Tyicuan caa çatyí ndo chí ra.

¹² Tyicuan ta maa ra cuan cusañaha ra cuarto cahnu ityi siqui nu cu uvi piso chí ndo. Ta cha yahá nduvii. Ta yucuan sanduvaha ndo cha cuxiñi yo —catyí ra chí ra.

¹³ Tyicuan ta cuahan çoyo ra. Ta nañihí ra tandihí tari cuhva catyí ra Jesús. Tyicuan ta casanduvahá ra cha cuxiñi ra cha vico pascua cuan.

¹⁴ Yucuan ta cha cha çuhva cha cuxiñi ra Jesús ta tandihí apóstol ra, cachicunyicu ra yuhu mesa.

¹⁵ Tyicuan ta ra Jesús quichaha catyí ra:

—Cuñi xain cuxiñi in caa ri chihin ndo cuenda vico pascua ihya cha ní ri ca cha cumañi ca cunyeñi tundoho ta cúvi.

16 Vatyí nya ri ca ihya cua cachi ta cucúvi. Yucuan ta cachi tiquí soco nya nu nyacá ñaha Nyoo —catyí ra.

17 Tyicuan ta quehen ra noo vasu vinu. Ta nacuhva ra tyiahvi nyoo chi Nyoo, ta sayaha ra chi tandihi ra nyicú chihin ra. Ta quichaha catyí ra:

—Quehen ndo ihya. Ta coho ndo suhva suhva.

18 Vatyí catyí chi ndo vatyí ma coho que vinu tichaha ndivi nyacua nya quichi cha nyacá ñaha Nyoo ñayivi ihya —catyí ra.

19 Ta yaha cuan ta quehen ra pan. Ta nacuhva ra tyahvi nyoo chi Nyoo. Ta tahvi sava ra. Ta chaha ra chi ra cachicá noo chihin ra. Ta quichaha catyí ra:

—Ican ihya cuví coñe. Vatyí cha catyí ndo ta cua cuhva cuende chii ta cúvi. Tyicuan ri ñicohon iñi ndo chii ta cuxiñi ndo tyehe caa —catyí ra.

20 Ta cha yaha cuxiñi ra, tyicuan ta quehen tucu ra vaso vinu tichaha ndivi, ta quichaha catyí ra:

—Chihin ihya natyihí tahan Nyoo tuhun chaa chihin ndo vityin. Vatyí vinu cha yihí chichi vaso ihya, tari ñiñi cuví. Ta cha catyí nyoho ta cucati ñiñi. Vatyí cucúvi cha catyí ndo.

21 Soco vityin, ra cha cua nacuhva cuenda chii chi ra xaan iñi chii, ñn ri yoso ndaha ra chihin ndahi nu mesa ihya.

22 Vatyí yuhu Rayi cha quichi nya gloria cua cuví chii tari cuhva cha nyaá maa tyi cuví chii. Soco jndahvi ra ndahvi, ra cha cunacuhva cuenda chii! —catyí ra Jesús.

23 Tyicuan ta ra cachicá noo chihin ra Jesús quichaha candaca tuhun ra chi tahan ra, nya ra cuví ra cua nacuhva cuenda chi ra chi ra xaan iñi chi ra.

Nu candatuhún ra cachicá noo chihin ra Jesús yóo ra cahnu ca cuví

24 Yaha cuan ta quichaha candatuhun ra cachicá noo chihin ra Jesús nya ra cahnu ca cuví.

25 Soco ra Jesús catyí ra:

—Chitó nyoho vatyí ra nyacá ñaha chi ñáyivi iyó siqui ñuhu ñáyivi, ñihi xaan yosó ra siqui ñu. Ta cacuñi ra vatyí catyí ñáyivi tyi tyinyee ra chi ñu.

26 Soco nyoho ña tahan chi sacuvi ndo tari sacuvi ra cuan. Vatyí tatu cuñi ndo cuví ndo ra cuví nuu, tahan chi sacuvi ndo tyiño nuu ñáyivi. Vatyí tatu sacuvi ndo tyiño nuu ñáyivi, ican ndo cuví ra cuví nuu.

27 Vatyí ihya siqui ñuhu ñáyivi ra cuví nuu cuví ra cha ña sahá tyiño. Ta nyaá ra yuhu mesa ta musu ra sacuvi ra tyiño nuu ra. Soco yuhu ra cuví nuu cuví, ta sacuvi tyiño nuu ndo.

28 Soco nyoho tyicuan ri ndihi ndo chihin, tandihi chaha cha nyehí tundoho.

29 Yucuan chaha, yuhu चाहि noo nu cunyaca ñaha ndo tari cha chaha Suti chii cha cunyaca ñahi.

30 Vatyí cucachi ndo cucho ndo yuhu mesa chihin nya nu nyacá ñahi. Ta yucuan cunyaa ndo nu tyayu tyaqui. Ta cunyaca ñaha ndo chi ndi uchi uvi tahan ityi ñáyivi vachi tata ra Israel.

Catyí ra Jesús vatyí cua catyí ra Pedro vatyí ña ñohó nuu ra chi ra

(Mt. 26.31-35; Mr. 14.27-31; Jn. 13.36-38)

31 Tyicuan ta catyí ra Jesús chi ra Pedro:

—Nyehé vahun, yoho Simón. Vatyí cuihna, ra nañi Satanás, cha chican ra chi Nyoo na cuhva ra ityi chi ra vatyí quisi ñihno ra chi ndo tari naquisi ñihno yo trigu, tacuhva ndu uvi iñi ndo chi Nyoo.

32 Soco chicán xain chi Nyoo cha catyun, vatyí ma ndihi cha chinó iñun chi ra. Ta quivi ndu uvi iñun cuatyun ta na chino vaha iñun chii cutyinyeun chi ra tahan cha ma sandihi ra cha cachino iñi ra chii —catyí ra Jesús chi ra Simón.

33 Ta ra Simón catyí ra chi ra:

—Sutu Mañi yuhu, cha iyó vahi vatyí cuhin chuhun vasi vehe caa, vasi tuhun chii —catyí ra.

34 Tyicuan ta catyí ra Jesús chi ra:

—Pedro, catyí chuun vatyí vityin cha ni ri ca cha cumañi ca cuacu chaa loho, yoho cha uñi tahan chaha cucatyun vatyí ña ñohó nuun chii —catyí ra Jesús chi ra.

Nu cha cuñi chaa cuhva cha cunacuhva cuenda ra Judas chi ra Jesús

35 Tyicuan ta ndaca tuhun ra Jesús chi ra cachicá noo chihin ra, ta catyí ra:

—Ñicohon iñi ndo quivi cha tachí chi ndo vatyí cucahan noo ndo nuu ñáyivi ta ñahri nyiso ndo, ni ri cha cachi ndo, ni ri xuhun, ni ri sahma ndo. ¿Atu chiyo cha cumañi chi ndo quivi cuan? —catyí ra Jesús.

Tyicuan ta canacahan ra, ta catyí ra:

—Ñahri cha cumañi chi ndi.

36 Tyicuan ta quichaha catyí ra Jesús chi ra:

—Soco vityin, tatu iyó cha cachi ndo ta iyó xuhun ndo, cuiso ndo. Ta tatu ñahri mityi ndo, xico ndo noo sahma ndo ta sata ndo.

37 Vatyí catyí chi ndo, vatyí tandihi tuhun cha nyaá nu tutu Nyoo cuchino cava vatyí tyehe caa catyí chi: “Sahá ñu tuhun tyi cuví ra noo ra quiñi iyó.” Tyicuan caa catyí tuhun nu tutu Nyoo. Ta tandihi cuan cuchino cava —catyí ra.

38 Tyicuan ta quichaha catyí ra cachicá noo chihin ra:

—Ihya nyaá uvi tahan mityi —catyí ra.

Tyicuan ta catyí ra Jesús:

—Cha iyó vaha ri —catyí ra.

Nu chican tahvi ra Jesús chi Nyoo Getsemani
(Mt. 26.36-46; Mr. 14.32-42)

³⁹ Tyicuan ta quitã ra Jesús vehe cuan. Ta cuahan ra nya yucu Olivo. Tari cuhva tuhvá maa ra chahan. Ta ra cachicá noo chihin ra cuahan coyo ra chata ra.

⁴⁰ Ta cuhva cha chaa ra yucuan, quichaha catyí ra chi ra cachicá noo chihin ra:

—Cacan tahvi ndo chi Nyoo tacuhva ma cuvi chasaha cuihna chi ndo.

⁴¹ Tyicuan ta cuahan ra Jesús cha cañi ca, tari cuhva cha chaa noo yuu tatu tuchi yo. Yucuan ta chicuñi chiti ra. Ta quichaha cahan ra chihin Nyoo,

⁴² ta catyí ra:

—Sutu Mañi yuhu, tu yoho ta cuñún, cuhva cha ma nyehi tundoho ihya. Soco ma cuvi tari cuhva cha cuñi mai. Soco na cuvi tari cuhva cha cuñi maun —catyí ra.

⁴³ Tyicuan ta tuví noo ángel, vatyí cuhva ca ra tunyee iñi chi ra.

⁴⁴ Ta cha ni ri ca cha nyehé xaan ra Jesús tundoho vatyí cuihya vavaha iñi ra, ta ñihi ca chicán tahvi ra chi Nyoo. Ta cuaha xaan tyeen ra quitã ta canacoyó nu ñuhú, ta tari caa niñi caa.

⁴⁵ Yucuan ta nducuitã ra cha ndihí cahan ra chihin Nyoo. Ta cuanuhu ra nu canyicu tandihí ra cachicá noo chihin ra. Ta nyehé ra vatyí caquixí ra, cha cuenda vatyí cacuihya xaan iñi ra, ña cacunyeé ra ñumahna ta caquixi ra.

⁴⁶ Tyicuan ta quichaha catyí ra Jesús chi ra:

—¿Ñáá tuhun cha caquixí ndo? Nducuita ndo. Ta cacan tahvi ndo chi Nyoo, tacuhva cha ma cuvi chasaha cuihna chi ndo.

Nu chaha cuenda ra Judas chi ra Jesús chi ra xaan iñi chi ra

(Mt. 26.47-56; Mr. 14.43-50; Jn. 18.2-11)

⁴⁷ Ni cahan ca ra Jesús tuhun ihya, ta cuaha xaan ra cachaa coyo. Ta ityi nuu vachi ra Judas, noo ra chicá noo chihin ra Jesús cuví ra. Ta tuhva ra chi ra Jesús vatyí cua tyayuhu ra xitín ra.

⁴⁸ Tyicuan ta catyí ra Jesús chi ra:

—Judas, ¿atu chihin cha cua tyayuhun chii, nacuhvá cuendon chi yuhu, Rayi cha quichi nya gloria, chi ra xaan iñi chii? —catyí ra Jesús.

⁴⁹ Ta ra canyicú chihin ra Jesús quichaha ndaca tuhun ra chi ra:

—Sutu Mañi yuhu, ¿atu sañicuehe ndi chi ra chihin mityí? —catyí ra.

⁵⁰ Yucuan ta noo ra, chahnyã ra soho chiyo vaha noo ra cha cuví musu ra cuví nuu chi tata sutu.

⁵¹ Soco ra Jesús catyí ra chi ra:

—Saña ndo. Vaha ri —catyí ra.

Tyicuan ta naquehen ra Jesús soho ra cuan. Ta natyaa ra, ta nduvaha.

⁵² Ta ra cacuví nuu chi tata sutu chihin ra cacuví nuu chi ra sahá cuenda vehe ñuhu, chihin ra cacuví mandoñi, ican ra cuví ra quichi coyo vatyí catín ra chi ra Jesús. Ta quichaha catyí ra Jesús chi ra:

—¿Atu vachi coyo nyoho siqui chihin cha xaan ta chihin yutun tari cha vatyí minoo ra suhu cuví yuhu sahá ndo?

⁵³ Ndiquivi chinyaj chichi vehe ñuhu cahnu, ¿ñáá tuhun ña cuví tñin ndo chii? Soco vityin chaã cuhva cha ñaa iñi vatyí ra ña vaha nyacá ñaha. Yucuan chaha vachi tñin ndo chii.

Nu catyí ra Pedro vatyí ña ñohó nuu ra chi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Tyicuan ta catín ra chi ra Jesús. Ta cua nyaca ra chi ra nya vehe ra cuví nuu chi tata sutu. Ta ra Pedro nyasava ri cuahan ra chata ra.

⁵⁵ Ta cha chaã coyo ra vehe ra cuví nuu chi tata sutu cuan, casanatahan ra ñuhu nuquehe. Ta chicunycú cutya ra nicachico ri nu cayú ñuhu cuan. Ta chicunyaã tucu ra Pedro mahñu ñáyivi cuan.

⁵⁶ Ta cuhva cha ndundichin cha cayu ñuhu cuan, tyicuan ta noo ñaha cha cuví musu tata sutu cuan nanyehé ña chi ra. Ta quichaha catyí ña:

—Ra ihya chicá noo ra chihin ra cuan —catyí ña.

⁵⁷ Soco ra Pedro catyí ra:

—Yuhu ña ñohó nuí chi ra cuan.

⁵⁸ Tañi ri cuan ta nyehé tucu inga ra chi ra, ta catyí ra:

—Yoho, ra cuenda ra cuan cuvún —catyí ra.

Ta ra Pedro catyí ra:

—Ñima —catyí ra.

⁵⁹ Ta cha yahã noo ora, ta nanyehé tucu inga ra chi ra ta catyí ra chi ra tahan ra:

—Cha ndicha cuí vatyí ican ra ihya cuví noo ra cha chicá noo chihin ra cuan. Vatyí suri ra Galilea cuví ra —catyí ra.

⁶⁰ Tyicuan ta catyí ra Pedro:

—Ña chité ñáá tuhun cahún —catyí ra.

Ta caa cuhva ri cuan, ni cahan ca ra Pedro tuhun cuan, ta chacu chaa ri noo loho.

⁶¹ Tyicuan ta ra Jesús nanyehé ra nuu ra Pedro. Ta ra Pedro nichon iñi ra tuhun cha catyí ra Jesús chi ra: “Cuhva cha ni cumañi ca cuacu chaa loho, yoho cha catyun tyi ña ñohó nuun chii uñi tahan chaha.”

⁶² Tyicuan ta quitã ra Pedro ityi chata vehe. Ta chacu vavaha ra cha cuihya iñi ra.

Nu cachacú nyaa ra chi ra Jesús ta cacañi ra chi ra

(Mt. 26.67-68; Mr. 14.65)

⁶³ Tyicuan ta ra casahá cuenda chi ra Jesús, quichaha chacu nyaa ra chi ra. Ta cacañi ra chi ra.

⁶⁴ Cachahñi ra sahma nuu ra, ta quichaha cacatu ra nuu ra. Ta cacatyí ra chi ra:

—Nacoto yóo cha cañi chuun —cacatyí ra chi ra.

⁶⁵ Ta cuaha vavaha ca cha cacahan ra chi ra.

Nu ndacá tuhun ra chi ra Jesús tatu Sehe Nyoo cuví chi ra

(Mt. 26.59-66; Mr. 14.55-64; Jn. 18.19-24)

⁶⁶ Ta cha cundichin inga quivi cuan. Ta candu ñn ri ra chahnu ñuu cuan chihin ra cuví nuu chi tata sutu, ta ra casacuahá cuenda ley vehe ñuhu. Ta caquehen ra chi ra Jesús. Ta cuahan coyo ra chihin ra nya nu cuví junta cahnu. Ta quichaha candaca tuhun ra chi ra:

⁶⁷ —Catyí chi ndi ¿atu ra Cristo ra cha saquichí Nyoo cuvún? —catyí ra chi ra.

Ta ra Jesús nacahan ra, ta catyí ra:

—Tatu catyí chi ndo vatyi ican, ma chino ñni ndo.

⁶⁸ O tatu ndaca tuhun ñáá cha ndaca tuhun chi ndo, ma nacahan ndo ni ma saña ndo chii.

⁶⁹ Soco vityin ta ityi nuu ca yuhu Rayii cha quichi nya gloria cucunyai chiyo vaha Nyoo ra cha iyó tandihí tunyee ñni chi —catyí ra.

⁷⁰ Tyicuan ta tandihí ra quichaha ndaca tuhun ra chi ra:

—Tu tyicuan caa, Sehe Nyoo cuví chuun —catyí ra.

Tyicuan ta nacahan ra Jesús ta catyí ra:

—Suri maa ndo catyí tyi ican cuví.

⁷¹ Tyicuan ta quichaha cacatyí ra cuan chi ra tahan ra:

—Nyehe nuu. Yuhu maa ra quitá. Ña niñi ca cha tava yo cha ndaa. Vatyi suri maa yo chiñi —cacatyí ra.

23

Nu nyehé ra Pilato vatyi ñahri cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

¹ Tyicuan ta tandihí ra nducuitá ra. Ta cua nyaca ra chi ra nya nu nyaá ra Pilato, ra cuví gobernador.

² Tyicuan ta quichaha cacatyí ra chi ra Pilato:

—Ra ihya, sativí ra chi ñáyivi chihin cha cahán ra nuu ñu, ta catyí ra vatyi ña vaha tyiyahvi ndi xuhun chí gobiernu ñuu Roma. Ta siin ri catyí ra vatyi ra Cristo ra cha saquichí Nyoo vatyi cuví ra rey cuví ra —cacatyí ra.

³ Tyicuan ta ra Pilato quichaha ndaca tuhun ra chi ra Jesús, ta catyí ra:

—¿atu ican yoho cuví Rey cuenda ñu Israel? —catyí ra.

Ta nacahan ra Jesús, ta catyí ra:

—Ican, suri maun catyí.

⁴ Tyicuan ta quichaha catyí ra Pilato chi ra cuví nuu chi tata sutu ta chi ñáyivi:

—Ñahri cuatyí ra ihya —catyí ra chi ñu.

⁵ Soco xaan ca nanduví ñu. Ta quichaha cacatyí ñu:

—Cahnu xaan cuatyí ra. Cuaha xaan tisihi chaha ra, vatyi cahán ra nuu ñáyivi.

Cha xihna ri quichaha cahán noo ra nuu ñáyivi ityi Galilea. Ta nicañi maa ityi vachi ra cahán ra chihin ñáyivi nyacua nya chaa ra Judea ihya —catyí ñu.

Nu tachí ra Pilato chi ra Jesús nuu ra

Herodes

⁶ Cuhva cha chihñi ra Pilato tuhun ihya, quichaha ndaca tuhun ra tatu ra Galilea cuví ra Jesús.

⁷ Ta catyí ñáyivi chi ra vatyi ican. Tyicuan ta sacuhun ra Pilato chi ra nya nu nyaá ra Herodes. Vatyi ra Herodes cuví ra gobernador nicañu Galilea. Soco quivi cuan ñohó ra ñuu Jerusalén.

⁸ Ta cuhva cha nanyehé ra Herodes chi ra Jesús, sii xaan cuví chi ra. Vatyi cha naha xaan cuñi ra nyehe ra chi ra. Vatyi ñihí ra tuhun vatyi cuaha xaan milagru sacuví ra. Ta cuñi xaan ra nyehe ra noo milagru cha sacuví ra Jesús.

⁹ Ta cuaha xaan tuhun ndaca tuhun ra chi ra. Soco ra Jesús ña nacahan maa ra.

¹⁰ Ta yucuan canyicú tucu ra cuví nuu chi tata sutu ta ra casacuahá ley vehe ñuhu. Ta catyaa xaan ra cuatyí siqui ra.

¹¹ Tyicuan ta ra Herodes chihin sindaro cuenda ra chacu nyaa ra chi ra. Ta sandihvi noo ra noo sahma yahvi ta tyaqui chí ra, tari cha tuhvá rey ñihno. Tyicuan ta natachí ra Herodes chi ra inga chaha nuu ra Pilato.

¹² Ta quivi cuan ra Pilato chihin ra Herodes nduvaha iyó ra chihin tahan ra. Vatyi nu quichi chí, ña cuví canyehe ra chí tahan ra.

Nu cutuñi chi ra Jesús vatyi cucuvi ra

(Mt. 27.15-26; Mr. 15.6:15; Jn. 18.39—19.16)

¹³ Tyicuan ta ra Pilato sandu ñn ri ra chí ra cuví nuu chi tata sutu, ta chí ra cuví tyiño, ta chí ñáyivi ñandihí.

¹⁴ Ta catyí ra chí ñu:

—Nyoho quichí nyaca ndo chi ra ihya chii. Ta catyí ndo vatyi sativí ra chí ñáyivi. Soco yuhu cha sacutuñi chí ra nuu ndo. Ta ñahri cuatyí ra nañihí tari cuhva catyí ndo.

¹⁵ Ta ni ri ra Herodes ña nañihí ra ni noo cuatyí ra. Yucuan chaha sandichí ra chí ra inga chaha nu nyai. Nyehe ndo vatyi ñahri

cha sacuví ra, ñahri cuatyí ra. Ta ña tahan chi cha cúvi ra.

¹⁶ Yucuan chaha cua tachi tuñi ri chi ra. Yahá cuan ta sañe chi ra —catyí ra Pilato.

¹⁷ Tyicuan caa catyí ra Pilato vatyí cha ñi ri ca cha iyó vico cuan, tahan chi cha saña ra noo ra ñohó vehe caa, tari cuhva cha tuhva maa ra.

¹⁸ Soco tandihi ñu ñin ri nacanachaa ñu, ta catyí ñu:

—Cahñi chi ra Jesús. Ta saña chi ra Barrabás —catyí ñu.

¹⁹ Ta ra Barrabás cuan ñohó ra vehe caa cha cuenda cha cuñi ra nacanda ra siqui ra cuví tyiño. Ta siin ri chahñi ra chi ñáyivi.

²⁰ Ta ra Pilato cuñi ra saña ra chi ra Jesús. Ta quichaha catyí ra chi ñáyivi cuan inga chaha vatyí cusaña ra chi ra.

²¹ Soco ñáyivi chaa ca caná chaa ñu, ta catyí ñu:

—Na cúvi ra nu cruzi.

²² Tyicuan ta cha cu uñi chaha catyí ra Pilato chi ñu:

—Soco ¿ñáa cha ña vaha sacuví ra ihya? Nyeñi tyi ña tahan chi cúvi ra. Tacuhva cutachi tuñi ri chi ra, ta sañe chi ra —catyí ra Pilato.

²³ Soco ñáyivi caná chaa ca ñu, ta catyí ñu vatyí tyaa ra chi ra nu cruzi. Ta cuví chasaha ñu. Vatyí maa ñu ta ra cacuví nuu chi tata sutu caná chaa ñu.

²⁴ Tyicuan ta sacuví ra Pilato tari cuhva catyí ñu.

²⁵ Ta tari cuhva catyí ñáyivi, saña ra chi ra Barrabás cha ñohó vehe caa cha cuenda cha cuñi ra nacanda ra siqui ra cuví tyiño ta cha cuenda cha chahñi ra. Ta sacuví ra chi ra Jesús tari cuhva catyí ñu.

Nu cua cunyaa ra Jesús nu cruzi

(Mt. 27.32-44; Mr. 15.21-32; Jn. 19.17-27)

²⁶ Yucuan ta quehen sindaro chi ra Jesús. Ta cuahan ra chihin ra. Ta catiñ tucu ra chi noo ra Cirene cha nañi Simón. Ra cuan ni cua ndichi ra cha chahan ra nu chiqui. Ta saniñi sindaro chi ra, na cuiso ra cruzi ra Jesús ta cuahan ra chata ra.

²⁷ Ta cuaha xaan ñáyivi cuahan chata ra. Ta cuaha xaan ñusihi chacú chaa ñu cha cuihya iñi ñu cha catyí ra.

²⁸ Soco ra Jesús nanyehé ra chi ñu. Ta quichaha catyí ra chi ñu:

—Tandihí nyoho ñusihi ñuu Jerusalén, ma cuacu ndo cha catyí yuhu. Cuacu ndo, soco cha catyí maa ndo ta cha catyí sehe ndo.

²⁹ Vatyí cuquichi quivi nu cunyehe xaan ndo tundoho. Ta cucahan ñáyivi chihin tandihí ndo cha cuví ndo ñusihi cha yori sehe ndo iyó. Ta cucatyí ñu chi ndo: “Vaha xaan vatyí yori sehe ndo iyó vatyí cuaha xaan tundoho nyehé yo vityin”, cucatyí ñu chi ndo.

³⁰ Vatyí quivi cuan cucuñi ñu vatyí na canacoyo yucu siqui ñu tacuhva sahvi chi chi ñu.

³¹ Vatyí tatu tyehe caa sacuví ñu chihin yuhu cha ñahri cuatyí. Yahá ca cuhva cunyacuví tucu ñu chihin maa ndo cha iyó cuatyí ndo —catyí ra Jesús.

³² Ta quehen tucu sindaro cuan chi uvi tahan ra quiñi iyó, vatyí cahñi ra chi ra ñin ri chihin ra Jesús.

³³ Tyicuan ta cachaa ra noo nu nañi Nu Cuví Yiqui Xiñi Ndiyí. Ta yucuan chitacaa ra chi ra Jesús nu cruzi. Ta tyicuan caa tucu chinyacuví ra chihin ninduvi tahan ra iyó cuatyí cuan. Noo ra chitacaa ra nuu cruzi chiyo vaha ra Jesús. Ta nonga ra cuan chitacaa ra nuu cruzi chiyo satyín ra.

³⁴ Ta cuhva cha tacaá ra Jesús nu cruzi cuan, quichaha catyí ra:

—Sutu Mañi yuhu, saha tucannu iñi chi ra. Vatyí ña chitó ra ñáa cha nyacuví ra chihin —catyí ra.

Tyicuan ta sindaro cuan chahan ra noo sihva chihin sahma ra Jesús. Nya ra saha ganaa caquehen ra sahma cuan.

³⁵ Ta ñáyivi tayucú ñu nyehé ñu. Ta nyacua nya ra cacuví nuu cuenda vehe ñuhu, ta chacú cuehe ra nyehé ra chi ra Jesús. Ta catyí ra:

—Sacacu ra chi inga ñáyivi. Soco vityin na sacacu tucu ra chi maa ra, tatu ndicha cha Cristo, ra cha saquichi Nyoo, cuví ra —cacatyí ra.

³⁶ Ta suri cahan cuehe tucu sindaro chi ra. Ta catuhva ra chi ra. Ta chaha ra vinu iya coho ra.

³⁷ Ta quichaha cacatyí ra chi ra:

—Tatu rey cuenda ñáyivi Israel cuvún. Sacacu chuun —cacatyí ra.

³⁸ Ta siqui cruzi ityí xiñi ra nyaá noo nu tyaa ra chihin griego, chihin latín, ta chihin hebreo. Tyehe caa quita cahan letra cuan: “Ican ra ihya cuví Rey cuenda ñu ñuu Israel” —catyí nu vitu cuan.

³⁹ Ta noo ra quiñi iyó cha tacaá xiin ra Jesús, quichaha cahan ra chihin ra, ta catyí ra:

—Tatu ndicha cha Cristo cuvún, sacacu chuun. Ta sacacu chi ndi ñandihí —catyí ra.

⁴⁰ Soco inga ra cuan catyí ra chi ra:

—¿Atu ña yuhvún chi Nyoo? Vatyí nyehún suri tundoho cha nyehé maa ra vityin.

⁴¹ Maa yo nyehé yo tundoho ihya vatyí iyó cuatyí yo. Soco ra ihya ñahri cuatyí ra iyó —catyí ra.

⁴² Tyicuan ta quichaha catyí ra chi ra Jesús:

—Yoho Jesús, ñicohon iñun tuhin quivi cunyaca ñahun —catyí ra.

⁴³ Tyicuan ta ra Jesús catyí ra chi ra:

—Cha ndicha catyí chuun vatyí tañi ri vityin ta cunyaun chihin nya paraíso nu

nyaá añima ñu chinó iñi chi Nyoo —catyí ra Jesús chi ra.

Nu chíhí ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tyicuan ta ñáá cuhva ora quichaha nduñaa ñayivi, nyacua nya caa uñi cha cha iñi.

⁴⁵ Vatyí nduñaa ñanyii. Ta sahma cha tacaá chichi vehe ñuhu cahnu cuan, tahnýa sava.

⁴⁶ Tyicuan ta quichaha cana chaa ra Jesús:

—Sutu Mañi yuhu, natyái añime chichi ndahun —catyí ra.

Ta cuhva cha catyí ra tuhun ihya, ta chíhí ra.

⁴⁷ Ta ra cuví nuu chí sindaro cuan, nyehe ra tandíhi cha cuví cuan. Ta sacahnú ra chí Nyoo, ta catyí ra:

—Ñahri ndicha cuii cuatyí ra iyó —catyí ra.

⁴⁸ Ta tandíhi ñáyivi cha canyicú yucuan canyehé ñu cha cuví cuan. Ta cuahan coyo ñu ta suri cacañi ñu ndaha ñu yiqui nyica ñu. Vatyí chitó ñu vatyí ña vaha cha chinyacuví ñu chíhin ra Jesús.

⁴⁹ Ta tandíhi ñu cha ñohó nuu chí ra Jesús, ta ñusihí cha chinyicon chí ra nya Galílea, canyicú ñu nya sava ri. Ta nyehe ñu tandíhi cha cuví yucuan.

Nu cua cuchi ra chí ra Jesús

(Mt. 27.57-61; Mr. 15.42-47; Jn. 19.38-42)

⁵⁰ Ta iyó noo ra vaha, ñañi ra José. Ta Arimatea ityi Judea cuví ñuu ra. Ta cuví ra noo ra cuví nuu cuenda Junta Cahnu ñu Israel.

⁵¹ Ta ra José cuan nyatú ra quivi cha cunyaca ñaha Nyoo. Ta ña ndoo ra vaha chíhin cha sacuví ra tahan ra, ra cacuví nuu cuenda tata sutu cuan.

⁵² Tyicuan ta चाहण ra chicacan ra coño ñuhu ra Jesús chí ra Pilato.

⁵³ Ta yahá cha sanoq ra José cuan coño ñuhu ra Jesús nu cruzi, ta natyihí ra chichi noo sahma cha cuví lino. Ta cuahan ra cua cuchi ra chí ra chíhi noo ñaña chaa cha cuví yavi yuu cha savahá ñu.

⁵⁴ Ta viarni cuví, quivi cha sanduvahá ñáyivi cha cachi ñu cha sabarú inga quivi, quivi nyitatu ñu. Ta cha cuñi cuví sabarú.

⁵⁵ Ta tandíhi ñusihí cha quichi chíhin ra Jesús nya Galílea, cuahan ñu chata ra. Ta nyehe ñu chíhi yavi yuu cuan. Ta nyehe ñu yoso caa chicava coño ñuhu ra.

⁵⁶ Ta cuanuhu coyo ñu nya vehe ñu. Ta sanduvahá ñu ndutya vixi चाहण vatyí cutyihí ñu coño ñuhu ra Jesús coto coo xico. Vatyí tyicuan caa cuví costumbre cuiya cuan. Tyicuan ta nyitatu ñu inga quivi cuan tari cuhva catyí maa tuhun cha tachí Nyoo chí yo.

24

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

¹ Cundichin timingu quivi nu quichaha vitya. Ta ñaha cui ri cuahan coyo ñusihí cuan nya nu ñaña ra Jesús. Ta nyisó ñu ndutya vixi चाहण cha sanduvahá ñu.

² Ta cuhva cha chaq coyo ñu, nanyehé ñu vatyí ña nyasí ca yavi yuu cuan tari cuhva chinyasí maa.

³ Ta quihví ñu chíhi, soco ña ñañihí ñu coño ñuhu Sutu Mañi yo Jesús.

⁴ Ta yucuan tayucú ñu chíhin cha yuhví ñu. Ta ña chitó ñu ñáá cunyacuví ñu. Ta tuví uvi tahan rayí nuu ñu. Ta xiño vavaha sahma cañihó ra.

⁵ Ta chíhin cha yuhví ñu, ta chicuñi chíti ñu chíhin nuu ñu nya nu ñuhú. Tyicuan ta quichaha cacatyí ra cuan chí ñu:

—¿Ñáá tuhun nanducú ndo chí ra Jesús ihya nu ñohó ndiyi?

⁶ Yori ra ñohó ihya, vatyí cha nandoto ra. Nícohon iñi ndo tuhun cha चाहण ra chíhin ndo quivi chicá noo ra Galílea.

⁷ Catyí ra vatyí tahán chí cucuhva cuenda ñu chí ra ndaha ra iyó cuatyí. Vatyí cuví ra Rayíi cha quichí nya gloria. Ta tahán chí cucañi ra chí ra nu cruzi. Soco nu cu uñi quivi cunandoto ra. Tyicuan caa catyí ra chí ndo —catyí ángel cuan chí ñu.

⁸ Tyicuan ta nicohon iñi ñu tuhun चाहण ra Jesús quivi cuan.

⁹ Ta cuanuhu coyo ñu. Ta nacatyí ñu chí ndi uchi ñin tahan ra apóstol ra Jesús chíhin tandíhi ca ñáyivi.

¹⁰ Ta ñu sacoto tuhun cuan chí ra cuan cuví ñu cu María, ñaha Magdala, ta cu Juana, ta cu María sihi ra Jacobo, ta suhva ca ñusihí.

¹¹ Soco ra cachicá noo chíhin ra Jesús cuñi maa ra vatyí चाहण ri maa ñu. Ta ña chinó iñi ra tuhun चाहण ñu.

¹² Soco ra Pedro nducuitá ra ta chinq vavaha ra cuahan ra cuanyehé ra nya chíhi ñaña ra Jesús tatu ndicha. Ta nanyehé ra chíhi yavi yuu cuan tyi sahma ri cayucú inchiyo xiin. Tyicuan ta cuanuhu ra nya vehe. Ta iyo cuñi ra vatyí ñahri ca coño ñuhu ra Jesús catuví chíhi ñaña cuan.

Noo cha cuví ityi Emaús

(Mr. 16.12-13)

¹³ Suri maa quivi cuan, uvi tahan ra chicá noo chíhin ra Jesús cuahan coyo ra nya ñuu cha ñañi Emaús, tari noo cha uchi ñin kilómetro cha quita yo Jerusalén.

¹⁴ Ta cuahan coyo ra ta ndatuhún ra tuhun ñáá ndíhi cha cuví.

¹⁵ Ta cha ní ri ca cha candatuhún ra, ta ra Jesús natahán ra chí ra nu cuahan coyo ra.

¹⁶ Soco ní ri maa nyehé ra chí ra Jesús, ña canícohon nuu ra chí ra. Vatyí tari cha iyó

noo cha chasi nuu ra tacuhva cha ma canicohon nuu ra chi ra Jesús.

¹⁷ Tyicuan ta quichaha ndaca tuhun ra Jesús chi ra:

—¿Ñáá tuhun ndatuhún xaan ndo? ¿Ñáá tuhun cha cuihya xaan iñi ndo? —catyí ra chi ra.

¹⁸ Ta ra cha nañi Cleofas, nacahan ra. Ta catyí ra:

—¿Atu ñima nya Jerusalén quichi yoho? ¿Atu ra inga ñuu cuvún? ¿Atu ña chitón cha cuví ñuu cuan? —catyí ra.

¹⁹ Tyicuan ta catyí ra Jesús chi ra:

—¿Ñáá cha cuví?

Ta quichaha canacatyí ra chi ra:

—Tuhun ra Jesús ra ñuu Nazaret. Vatyí cuví ra noo ra profeta Nyoo. Ta chihin tunyee iñi cahnu Nyoo sacuví ra cha vaha nuu Nyoo ta nuu ñáyivi.

²⁰ Soco ra cacuví nuu chi tata sutu ta ra cacuví nuu cuenda vehe ñuhu, nacuhva cuenda ra chi ra chi sindaro ñuu Roma. Ta cachahñi ra chi ra. Ta chihí ra nu cruzi.

²¹ Ta cha vityin cha iyó uñi quivi cuví tuhun cuan. Ta nyuhu cuñi maa ndi vatyí ican ra cuví ra cusacacu chi ñáyivi Israel.

²² Soco vityin iyo xaan cuñi ndi cha nacatyí suhva ñusihi chi ndi. Vatyí maa ñu, ñaha cuii ri chahan coyo ñu nu ñaña ra.

²³ Ta nacatyí ñu chi ndi vatyí ñahri ca coño ñuhu ra catuví. Ta nacatyí ñu vatyí nyehé ñu uvi tahan ángel. Ta catyí ángel cuan chi ñu vatyí ra Jesús nyitó ra.

²⁴ Yahá cuan ta chahan coyo tucu suhva ra tahan ndi nu ñaña. Ta nyehé ra vatyí cha ndicha cuví tari cuhva catyí ñusihi cuan. Vatyí ñahri ca coño ñuhu ra Jesús catuví —catyí ra chi ra.

²⁵ Tyicuan ta ra Jesús catyí ra chi ra:

—Chiin xaan cutuñi iñi ndo. Ta cuee xaan chinó iñi ndo tuhun tyaa ra profeta Nyoo ta cha naha.

²⁶ ¿Atu ña chitó ndo vatyí tahán chi cha cunyehe xihna ra Cristo tundoho? Yaha cuan ta tahán chi cuñihi ra tyiño cha cunyaca ñaha ra —catyí ra Jesús chi ra.

²⁷ Tyicuan ta quichaha nacuhva ra cuenda yoso caa cuahan tuhun ra nu tutu Nyoo. Ta quichaha cahan ra tuhun cha tyaa ra Moisés ta cha naha. Ta yahá cuan ta cahan ra tuhun tandihí libru cha tyaa ra profeta Nyoo.

²⁸ Ta cuhva cha chaá ra nya ñuu Emaús cuan nu cuahan coyo ra, ta sahá ra Jesús vatyí cañi ca cuahan ra.

²⁹ Tyicuan ta cacatyí ra chi ra na ndoo ra chihin ra. Ta catyí ra:

—Ndoo chihin ndi vatyí cha cua quee ñanyii —cacatyí ra.

Tyicuan ta cuahan ra Jesús nya vehe ninduvi ra cuan.

³⁰ Ta cuhva cha chicunyaá ra yuhu mesa chihin ra, quehen ra pan. Ta chahá ra tyahvi nyoo chi Nyoo. Ta chahnú sava ra, ta chahá ra chi ra.

³¹ Ta caa cuhva ri cuan nuña nuu ra canicohon nuu ra chi ra Jesús. Soco ra Jesús cuanaa ri ra.

³² Tyicuan ta quichaha catyí ra chi ra tahan ra:

—Yucuan chaha vaha xaan cuñi añima yo cuhva cha vachi ra chihin yo, ta nacatyí vaha ra yoso caa cuahan tuhun Nyoo cha nyaa nu tutu chi yo, ta nicohon nuu yo chi ra —cacatyí ra.

³³ Ñahri ca cha canyatyí ra, ta cuanuhu coyo ra nya Jerusalén. Ta yucuan nañihí ra chi ndi uchi iin ra chicá noo chihin ra Jesús, canyicú ra.

³⁴ Tyicuan ta quichaha canacatyí ndi uchi iin tahan ra chi ra cha nichaa coyo cuan:

—Ndicha vatyí Sutu Mañi yo, nandoto ra. Vatyí ra Simón nyehé ra chi ra —cacatyí ra.

³⁵ Tyicuan ta ra cha ni nachaa coyo cuan canacatyí tucu ra yoso caa ndatuhún ra Jesús chihin ra ityí cuahan ra ñuu Emaús, ta yoso caa canicohon nuu ra chi ra nu chahnú ra pan.

Nu tuvi ra Jesús nu canyicu ra cachicq noo chihin ra

(Mt. 28.16-20; Mr. 16.14-18; Jn. 20.19-23)

³⁶ Ni cahán ca ra tuhun cuan ta tuví ra Jesús nu canyicú ra. Ta chahá ra nocumi, ta catyí ra:

—Na coo cha taxi ri añima ndo.

³⁷ Tyicuan ta canayuhví xaan ra. Ta cacuñi maa ra vatyí noo tatyí ri cuví.

³⁸ Tyicuan ta catyí ra Jesús chi ra:

—¿Ñáá tuhun cha nayuhvi ndo? ¿Ñáá tuhun cha chicá uvi iñi ndo?

³⁹ Nyehé ndo ndahi. Ta nyehé ndo chahi. Vatyí suri mai cuví. Tjin ndo chii ta coto ndo. Vatyí tatyí, ñahri coño ñuhu. Ta ñahri yiqui tari cha nyehé ndo tyi yihí chi yuhu —catyí ra Jesús.

⁴⁰ Ta cuhva cha catyí ra tuhun ihya, sañahá ra ndaha ra ta chaha ra.

⁴¹ Soco maa ra chaha cha iyo cacuñi ra ta sii cacuñi ra nyacua ña chinó vaha iñi ra. Tyicuan ta catyí ra Jesús chi ra:

—¿Atu iyo cha cachi? —catyí ra.

⁴² Tyicuan ta chahá ra chiin yuhu tiyaca tyihyo chihin tyañuñu chi ra.

⁴³ Ta quehen ra. Ta quichaha chachi ra.

⁴⁴ Ta catyí ra chi ra:

—Tandihí cha cuví chii, ican ihya cuví cha catyí chi ndo quivi cuan. Ta catyí chi ndo vatyí tyicuan caa cucuvi, tari cuhva nyaá tuhun cha tyaa ra Moisés ta ra profeta Nyoo ta cha nyaá nu libru salmo —catyí ra chi ra.

⁴⁵ Tyicuan ta chaha ra Jesús vatyi na cutuñi iñi tandihi ra cuan yoso caa catyí nu tutu Nyoo.

⁴⁶ Tyicuan ta catyí ra Jesús chi ra vatyi tyicuan caa nyaá nu tutu Nyoo vatyi tahán chi cha cúvi ra Cristo. Ta nu cu uñi quivi nandoto ra.

⁴⁷ Ta tahán chi coto ñáyivi tuhun sivi ra Cristo ñuu Jerusalén, ta yaha cuan ta tandihi ñuu nicañnu ñuhu ñayivi. Tacuhva cuvi ndu uvi iñi ñu ta ndachi cuatyí ñu.

⁴⁸ —Ta nyoho cuví ndo cha ndaa tandihi tuhun ihya.

⁴⁹ Ta cusaquichi mai Tatyí Ii Nyoo siqui ndo tari catyí Suti tyi cuhva ra chi ndo. Soco çunyicu ndo Jerusalén ihya. Ta ma quita maa ndo nyacua nya quichi tunyee iñi Tatyí Ii Nyoo cuquihi chi ndo —catyí ra Jesús.

*Nu nandaq xica ra Jesús andivi
(Mr: 16.19-20)*

⁵⁰ Tyicuan ta ra Jesús cuahan ra chihin tandihi ra cachicá noo chihin ra ityi chata ñuu, nya ñuu Betania. Ta sandaa ra ndaha ra. Ta nasoco ra chi ra.

⁵¹ Ta cha ñi ri ca cha nasoco ra chi ra, nandaq xica ra andivi.

⁵² Tyicuan ta tandihi ra sacahnú xaan ra chi ra. Ta sii xaan cacuví chi ra, cuanuhu coyo ra Jerusalén.

⁵³ Ta tyicuan ri chinyicú ra chichi vehe ñuhu cañnu cuan, ta sacahnú xaan ra chi Nyoo.

Tuhun Nyoo Cha Tyaa San Juan

Tuhun Cahán Nyoo nanduví noo rayí, ta ican cuví ra Cristo

¹ Nyata quívi xihna ri, nyata ni cumañi ca coo tandihí cha iyó, ta cha iyó ra cuví Tuhun Cahán Nyoo. Nyaá ra chihin Nyoo. Ta Nyoo cuví ra.

² Ta chicoo ra chihin Nyoo nyata quívi xihna ri.

³ Ta chihin ra, savaha Nyoo tandihí cuíi maa cha iyó. Ta ñahri savaha Nyoo cha maa ri maa ra.

⁴ Ta chihin ra cuví Tuhun Cahán Nyoo nyaá ñayívi cha ma naa ca maa. Ta ñayívi cuan, ican cuví cha sacundichín añima ñayívi.

⁵ Ta cha ndichin ihya, sacundichín chi nu ñaa iñi. Ta cha ñaa iñi ña cuñihí chi ndahva chí cha ndichin cuan.

⁶ Chiyo noo ra cha tachí Nyoo chí. Ta nañí ra Juan.

⁷ Quichí ra cuví ra noo cha ndaa. Vatyí cahán ra tumañi iñi cuenda ra cuví cha ndichin cuan, tacuhva vatyí chino iñi tandihí ñayívi chí ra.

⁸ Ra Juan, ñima cha ndichin cuan cuví ra. Noo cha ndaa ri cuví ra cha cuenda cha ndichin cuan.

⁹ Vatyí cha ndichin cha ndicha vaha cuan, ni cuachaa chí siqui ñuhu ñayívi, tacuhva vatyí sacundichín chí añima tandihí ñayívi cha iyó siqui ñuhu ñayívi ihya.

¹⁰ Ra cuví Tuhun Cahán Nyoo quichí ra siqui ñuhu ñayívi. Ta ican ra cuví ra Cristo. Ta suri maa ra savaha ra ñuhu ñayívi. Soco ñayívi iyó siqui ñuhu ñayívi, ña nicohon nuu ñu chí ra.

¹¹ Quichí ra nu nyicú ñayívi cha savaha ra, soco ñayívi cha savaha ra ña natün cuenda ñu chí ra.

¹² Soco tandihí ñu natün cuenda chí ra, ta chinó iñi ñu chí ra, ican chí ñu cuan, chaha ra ityí vatyí nanduví ñu sehe Nyoo.

¹³ Vatyí nacacü chaa ñu. Soco ñima tari cacü ñu ta lee ñu cuenda coño ñuhu ñu. Ta ni ñima cha cuenda cha quichi cuví iñi noo rayí coo ra chihin noo ñaha sihi. Ñima cha cuenda cha cuñí ñayívi coo sehe ñu. Soco maa Nyoo sanacacü chaa chí ñu.

¹⁴ Ta ra cuví Tuhun Cahán Nyoo nanduví ra noo rayí. Ta chicoo ra chihin yo. Ta nyehé ndí cha cahnú cuví ra. Ta cahnú cuví ra vatyí Sehe mañi Sutu yo Nyoo cuví chí ra. Tyitu yihí ra chihin cha ndicha ta tumañi iñi cha cua cuhva ra chí yo.

¹⁵ Ta ra Juan cuan cahán ra tumañi iñi cuenda ra, ta catyí ra:

—Ican ra ihya cha cahín tuhun quívi cuan, vatyí ra cha vachí ityí chate, cahnú ca ra cuví ra ican saha yuhu. Vatyí nyata tyembu chahnú ta cha iyó maa ra —catyí ra Juan.

¹⁶ Tandihí yo naquehén cuenda yo tumañi iñi cahnú cha chaha ra chí yo, vatyí nasocó xaan ra chí yo.

¹⁷ Ra Moisés chaha cuenda ra ley Nyoo chí yo. Soco ra Jesucristo cundahví iñi ra chí yo ta saha ra ticahnú iñi cuatyí yo. Ta chaha ra cha ndicha coo chí yo.

¹⁸ Ta yori ca maa nyehé chí Nyoo. Notuhun ri maa Sehe mañi ra cha iyó iin ri chihin ra. Ican ra cuví ra chaha cha cohon nuu yo chí Sutu ra.

Nu cahán ra Juan, ra sacondutyá, tumañi iñi cuenda ra Jesucristo

(Mt. 3.11-12; Mr. 1.7-8; Lc. 3.15-17)

¹⁹ Ra cacuví nuu chí ñu Israel cha iyó ñuu Jerusalén, catachí ra chí tata sutu ta chí ra cacuví levita nu nyaá ra Juan na ndaca tuhun ra chí ra yóo ra cuví ra.

²⁰ Ta maa ra Juan catyí cachi ra:

—Yuhu ñima ra Cristo cuví.

²¹ Tyicuan ta candacá tuhun ra inga chaha chí ra:

—¿Yóo ra cuví yoho? ¿Atu ra Elías, ra cuví profeta Nyoo ta cha naha cuvún? —catyí ra chí ra.

Ta ra Juan nacahan ra:

—Ñima ra cuan cuví.

Ta sañihí ca ra candacá tuhun ra chí ra, ta catyí ra:

—Tu tyicuan caa, ¿atu icon cuví ra profeta Nyoo cha nyaá cha quichi?

Ta nacahan tucu ra Juan ta catyí ra:

—Ñima.

²² Ta inga tucu chaha candacá tuhun ra chí ra:

—¿Yóo ra cuví yoho? Vatyí cuñí chí cuiso ndí tyiño chí ra cha tachí chí ndí. ¿Yóo ra cuví yoho? —catyí ra chí ra.

²³ Ta ra Juan nacahan ra:

—Yuhu cuví ra cahán ta canachaa noo nuu chiqui ndí, ta catyí: “Nuña ndo noo ityí ndoo chichi añima ndo vatyí cha vachí Sutu Mañi yo.” Tari cuhva cahán ra Isaías profeta Nyoo tuhín ta cha naha —catyí ra Juan chí ra.

²⁴ Ra cha cacahán chihin ra Juan, ra cacuví fariseo tachí chí ra.

²⁵ Ta candacá tuhun tucu ra chí ra:

—Tatu ñima ra Cristo, ni ra Elías, ni ra profeta cuan cuvún, ¿ñáa tuhun cha sacondutyón chí ñayívi? —cacatyí ra chí ra Juan.

²⁶ Ta ra Juan catyí ra chí ra:

—Yuhu sacondutyé chihin ndutya. Soco mahñu ndo nanyaá noo ra cha ña ñohó nuu ndo.

²⁷ Ican ra cuví ra vachi chate. Soco cha iyó maa ra ta caqui. Ta ña ñaña mai ni cha cuví musu ra ta ndachi ñi xityin ndichan ra —catyí ra Juan.

²⁸ Tandihí tuhun ihya cuví noo nu nañí Betábara cha nyaá inga chiyo yuvi cahnu Jordán nu ñohó ra Juan sacondutyá ra.

Ra Jesucristo, Mbee Luhlu sana Nyoo cuví ra

²⁹ Cha inga quívi nanyehe ra Juan chi ra Jesús cuachaa ra nu nyaá ra, ta catyí ra Juan:

—Nyehe ndo, ican ra ihya cuví Mbee Luhlu sana Nyoo vatyí cucuhva ra ñayívi ra tacuhva cahnya ra cuatyí ñayívi iyó siqui ñuhu ñayívi.

³⁰ Tuhun maa ra cahin quívi cha catyí chi ndo vatyí cha yaha yuhu ta vachi nonga ra cha cahnu ca cuví ta ñima ca yuhu, vatyí nyata tyembu chahnu ta cha iyó ra.

³¹ Ni yuhu ta ña ñohó nui chí ra quívi cuan. Soco vachi sacondutyé chihin ndutya tacuhva vatyí ñu ñuu Israel cohon nuu ñu chí ra —catyí ra Juan.

³² Ta catyí tucu ra Juan ñandihí:
—Yuhu nyehí chí Tatyí li Nyoo quichí ityí andívi vachi chí tari noo paloma, ta ndoó chí siqui ra.

³³ Yuhu ta coto que yóo ra cuví ra quívi cuan. Soco Nyoo, ra cha tachí chii na sacondutye chihin ndutya, catyí ra chíi: “Quívi nyehun Tatyí li yuhu, vachi noó siqui noo rayíi, ican ra cuan cuví ra sacondutyá chihin Tatyí li yuhu”, catyí Nyoo chíi.

³⁴ Yuhu cha yaha nyehí chí ra. Ta cuví cha ndaa vatyí ican ra cuví Sehe Nyoo —catyí ra Juan.

Ra cha xihna ca nanyicon chi ra Jesús

³⁵ Cha inga quívi, ra Juan nyaá tucu ra yucuan inga chaha, ta nyicú tucu uvi ra nyicón chí ra.

³⁶ Ta cuhva cha nyehé ra, yahá ra Jesús, ta catyí ra:

—Nyehe ndo, ican ra cuan cuví Mbee Luhlu sana Nyoo —catyí ra Juan.

³⁷ Cha chíni ninduvi ra nyicon chí ra Juan tuhun cahán ra, ta cananyicon ra chí ra Jesús.

³⁸ Tyicuan ta nanyehe ra Jesús ityí chata ra, ta nyehé ra tyi canyicón ra chí ra, ta catyí ra:

—¿Ñáá cha nducú ndo?

Tyicuan ta canacahan ra ta catyí ra:

—Maestro, ¿nya iyón?

³⁹ Ta ra Jesús catyí ra chí ra:

—Coho ndo chihin. ta nyehe ndo —catyí ra chí ra.

Tyicuan ta cuahan coyo ra chihin ra. Ta canyehe ra nu iyó ra. Ta yucuan cuaa ndihí ra vatyí tari cha caa cumi cha cha ñi cuhva cha chaá ra yucuan.

⁴⁰ Chichi cha ninduvi ra cha chíni tuhun cahán ra Juan ta nanyicon ra chí ra Jesús, noo ra cuví ra ra Andrés yañí ra Simón Pedro.

⁴¹ Ta ra Andrés numi ri chinanducú ra chí yañí ra, ra Simón, ta catyí ra chí ra:

—Nañihí ndi chí ra cha cuví Mesías —catyí ra.

Ta tuhun Mesías cuan cuñí chí catyí, ra Cristo, o ra cha nacachí vaha Nyoo, vatyí cuví ra rey chí yo.

⁴² Tyicuan ta ra Andrés chinyaca ra chí ra Simón yañí ra nu nyaá ra Jesús. Ta cuhva cha nyehé ra Jesús chí ra Simón, ta catyí ra chí ra:

—Yoho Simón, sehe ra Jonás cuví chuun. Soco cunañun Cefas. —catyí ra chí ra.

Ta Cefas cuñí chí catyí Pedro chihin sahan griego, ta ninduvi tahan sivi cuan, cuñí chí catyí “yuu”.

Nu caná ra Jesús chí ra Felipe ta chí ra Natanael

⁴³ Cha inga quívi tyaa ra Jesús cuhva cuhun ra ityí Galilea. Tyicuan ta nañihí ra chí ra Felipe. Ta catyí ra chí ra:

—Cunyicon chíi —catyí ra.

⁴⁴ Ra Felipe ihya, ra ñuu Betsaida cuví ra. Ta yucuan iyó tucu ra Andrés ta ra Pedro.

⁴⁵ Tyicuan ta cahán ra Felipe chinanducú ra chí ra Natanael. Ta catyí ra chí ra:

—Nyehe ndi chí ra cha tyaa ra Moisés tuhun nu libru ley, ta suri tuhun ra catyaa tucu ra profeta Nyoo ta cha naha. Jesús nañí ra. Sehe ra José ra ñuu Nazaret cuví chí ra.

⁴⁶ Ta catyí ra Natanael:

—¿Atu cuví quita cha vaha ñuu Nazaret cuan? —catyí ra chí ra Felipe.

Ta nacahan ra Felipe ta catyí ra:

—Ñaha ta nyehun —catyí ra.

⁴⁷ Yaha cuan ta cuachaa ra Natanael nu nyaá ra Jesús. Ta cuhva cha nanyehe ra Jesús tyi vachi ra, ta quichaha catyí ra:

—Ihya vachi noo ra cha ndicha ndicha ra ñuu Israel cuví. Ta ña tuhvá ra sandaví ñaha —catyí ra Jesús tuhun ra Natanael.

⁴⁸ Tyicuan ta ra Natanael ndaca tuhun ra chí ra:

—¿Yoso caa cha ñohó nuun chíi?

Ta ra Jesús nacahan ra ta catyí ra:

—Yuhu nyehí chuun nyata ni cumañi ca cana ra Felipe chuun, cuhva cha nyaún chaha tun higo cuan —catyí ra Jesús chí ra.

⁴⁹ Tyicuan ta quichaha catyí ra Natanael:

—Sutu Mañi yuhu, yoho cuvún Sehe Nyoo. Yoho cuvún rey cuenda ndi ñu Israel.

⁵⁰ Ta ra Jesús catyí ra chí ra Natanael:

—¿Atu chinó iñun chíi cha cuenda vatyí catyí tyi nyehí chuun chaha tun higo? Soco

nahnu ca cha cunyeahun ican saha cuan
—catyí ra chí ra.

⁵¹ Ta catyí tucu ra Jesús:

—Cha ndicha catyí chí ndo vatyi nyoho
cunyehe ndo andivi cuitanufa ta cuaha
ángel Nyoo cundaa ra, ta cunoo ra siqui
yuhu ra cuví Rayi cha quichí nya gloria
—catyí ra Jesús chí ra.

2

Noo vico tandaha iyó ñuu Caná ityi Galilea

¹ Yaha uñi quivi ta chicoo noo vico
tandaha ñuu Caná ityi Galilea. Ta sihi ra
Jesús ñohó ña yucuan.

² Ta suri canacatyí tuhun ñu chí ra Jesús
ta chí ra cacticá noo chihin ra cha cuhun
coyo ra vico tandaha cuan.

³ Tyicuan ta cuahan coyo ra. Ta nyicú ñu
vico, ta ndihí vinu. Tyicuan ta catyí sihi ra
Jesús chí ra:

—Ñahri ca vinu ñu —catyí ña.

⁴ Ta catyí ra Jesús chí ña:

—¿Ñáá cha cuñun cha sacuvi yuhu,
Maha? Ta chaa ca cuhva cha sañahi chí ndo
yóo ra cuví yuhu —catyí ra chí ña.

⁵ Soco sihi ra catyí ña chí ra cha catyinyeé
vico cuan:

—Sacuvi ndo tandihí cha catyí ra chí ndo
—catyí ña chí ra.

⁶ Ta tayucú iñu tahan quisi yuu nahnu
cha quihí ndutya cha catuhvá ra Israel
chotyíño nu tuhvá ra canacatyá xaan ra
ndaha ra tari cuhva costumbre cha ca iyó
maa ra. Ta tahan tahan quisi cuan chitahan
tari uvi xico uchi o uñi xico uchi litru
ndutya.

⁷ Tyicuan ta catyí ra Jesús chí ra cha
catyinyeé vico cuan:

—Sacutu ndo quisi ihya chihin ndutya
—catyí ra chí ra.

Tyicuan ta sacuvj ra tari cuhva catyí ra.

⁸ Tyicuan ta catyí ra Jesús chí ra:

—Vityin tava ndo suhva ta cunyaca ndo
chí ra cuví nuu cuenda vico ihya —catyí ra
Jesús chí ra.

Ta tyicuan caa casacuvj ra.

⁹ Ra cuví nuu cuenda vico cuan chihj ra
ndutya cha nanduvj vinu cuan. Soco ña
chitó ra nya quichi. Maa ri maa ra
catyinyeé vico cuan cachitó ra, vatyi maa
ra catavá ndutya cuan. Tyicuan ta ra cuví
nuu cuenda vico cuan cana ra chí ra cha
tandaha cuan.

¹⁰ Ta catyí ra chí ra:

—Tandihí ñáyivi, xihna ca vinu vaha
tuhvá ñu tava. Yaha cuan ta tatu cha
cachihj xaan ñu, tyicuan ta tava ñu vinu
pehe ca. Soco yoho chicumj vahun vinu
vaha. Ta nya vityin tavon —catyí ra chí ra.

¹¹ Cha sacuvj ra Jesús ñuu Caná ityi
Galilea, ican cuan cuví milagru cha xihna

ri savaha ra vatyi sañaha ra cha cahnu cuví
ra. Ta ra cacticá noo chihin ra cachingo iñi
ra chí ra vatyi ican ra cuví ra cha tachí
Nyoo.

¹² Cha yaha cuan ta cuahan ra ñuu
Capernaum. Ta cuahan sihi ra, yañi ra ta ra
cacticá noo chihin ra. Ta yucuan chinyicu
ñu suhva quivi.

*Nu tava ra Jesús chí ñu caxico chichi vehe
ñuhu cahnu*

(Mt. 21.12-13; Mr. 11.15-18; Lc. 19.45-46)

¹³ Cha cuñi chaa quivi vico cha nañi
pascua cha sanducahnú ñu Israel. Yucuan
chaha cuahan ra Jesús ñuu Jerusalén.

¹⁴ Ta chaq ra ñuu cuan, ta quihvi ra
nuquehe vehe ñuhu cahnu cuan, ta
nanyehe ra chí ra caxico sindiqui, mbee, ta
paloma. Ta na nyehe tucu ra chí ñu nyicú
nasama xuhun chí ñáyivi.

¹⁵ Ta cha nyehe ra Jesús cha tyicuan caa,
savaha ra noo yoho. Ta chihin yoho cuan
tava ñehe ra chí tandihí ñu nuquehe vehe
ñuhu iñi ri chihin mbee ta chihin sindiqui
sana ñu. Ta ñu nasamá xuhun cuan, sacuita
ra xuhun ñu nu ñuhu ta sanduvá ra mesa
ñu.

¹⁶ Ta catyí ra chí ñu xico paloma cuan:

—¡Tava ndo paloma chiña ihya! ¡Ma
nasaha ndo vehe Suti tari noo nuyahvi!
—catyí ra chí ñu.

¹⁷ Tyicuan ta ra cacticá noo chihin ra,
canicohon iñi ra cha catyí nu tutu Nyoo
tyehe caa: “Cuiño xain chihin vehun”, catyí
chí, nichohon iñi ra.

¹⁸ Tyicuan ta quichaha candaca tuhun ra
cacuvi nuu chí ñu Israel chí ra:

—¿Ñáá seña cuhvon chí ndi ta sañahun
vatyi chaha Nyoo ityi chuun cha sacuvun
tyehe caa? —catyí ra chí ra.

¹⁹ Ta nacahan ra Jesús ta catyí ra:

—Satani ndo vehe ñuhu ihya, ta chichi
cha uñi quivi, yuhu cusanandai inga chaha
—catyí ra chí ra.

²⁰ Tyicuan ta quichaha cacatyí ra cuan
chí ra:

—Uvi xico iñu cuiya cañoño ra casavaha
ra vehe ñuhu ihya. Ta yoho catyún tyi
chichi cha uñi quivi cusanandaun inga
chaha —catyí ra chí ra.

²¹ Soco vehe ñuhu cha cahan ra Jesús
tuhun, ican cuví coño ñuhu ra.

²² Yucuan chaha ra cacticá noo chihin ra
canicohon iñi ra tuhun ihya quivi nandoto
ra Jesús. Ta cutuñj iñi ra vatyi tuhun cha
nyaá nuu tutu Nyoo cahan chí cuenda ra
Jesús. Ta canachingo iñi ra tuhun cahan ra
Jesús ta tuhun cha nyaá nu tutu Nyoo.

Ra Jesús chitó ra cha caá añima ñáyivi

²³ Quivi cha ñohó ra Jesús Jerusalén, quivi
vico pascua cuan, cuaha xaan ñu nachino

iñi ñu chi ra cha cuenda cha cuaha xaan milagru sacuvj ra.

²⁴ Soco ra Jesús ña cunii iñi ra nyehé ra chi ñu vatyí chitó ra cha caá añima tandihi ñu.

²⁵ Ña chiñuhú ri cha nacatyí yo chi ra yoso caa ñáyivi, vatyí maa ra chitó ra ñáá cha caá chichi añima ñu.

3

Nu ndatuhún ra Nicodemo chihin ra Jesús

¹ Chiyo noo ra fariseo cha nañi Nicodemo. Ta cuví ra noo ra cuví nuu chi ra ñuu Israel.

² Ra Nicodemo ihya, chahan ra nu nyaá ra Jesús noo cha cuaa. Ta catyí ra chi ra:

—Maestro, chitó ndi vatyí Nyoo tachj chuun quichi sañahun chi ndi. Vatyí yori ñáyivi cuví sacuví milagru tahan cha sacuvún, tatu yori Nyoo nyaá chihin ñu —catyí ra chi ra Jesús.

³ Tyicuan ta catyí ra Jesús chi ra: —Cha ndicha catyí chuun vatyí tatu ma nacacu chaa ñáyivi inga chaha, ma cuví nyehé ñu nu nyacá ñaha Nyoo —catyí ra.

⁴ Tyicuan ta ndacá tuhun ra Nicodemo ta catyí ra:

—¿Yoso caa cuví cacu noo rayi inga chaha tatu cha chahnu ra? ¿Atu cuví ndihvi ra chichi sihi ra ta nacacu chaa ra inga chaha? —catyí ra.

⁵ Nacahan ra Jesús ta catyí ra: —Cha ndicha catyí chuun vatyí ñima chihin cha cacu ri ñáyivi chihin coño ñuhu ñu ta cuví quihvi ñu nu nyacá ñaha Nyoo. Soco niñi tucu cuñi chi cha nacacu ñu chihin Tatyí Ii Nyoo.

⁶ Vatyí ñáyivi cha cacu chihin coño ñuhu, coño ñuhu ri nyisó ñu. Ta ñu cha nacacu chaa chihin Tatyí Ii Nyoo, iyó Tatyí Ii Nyoo añima ñu.

⁷ Ma iyo cuñun cha catyí chuun tuhun ihya vatyí tandihi ñu, cuñi chi nacacu chaa ñu.

⁸ Tari caá tatyí tandihi ri ityi nu cuñi chi ta chiñún cayú chi, soco ña chitón nya ityi quichi chi, ni nya ityi cuahan chi; ta tyicuan caa tandihi ñu nacacu chihin Tatyí Ii Nyoo —catyí ra Jesús chi ra.

⁹ Tyicuan ta ndacá tuhun tucu ra Nicodemo inga chaha chi ra:

—¿Yoso caa cuahan tuhun ihya? —catyí ra chi ra.

¹⁰ Nacahan ra Jesús ta catyí ra: —Yoho cha cuvún noo ra sacuaha cuenda ñu Israel, tahán chi coton tuhun ihya.

¹¹ Cha ndicha catyí chuun vatyí cahín cha chité ta cuví cha ndaa cha nyehj. Soco nyoho ña chinó iñi ndo cha catyí chi ndo.

¹² Tatu ña chinó iñi ndo chii nu cahín tuhun ñáyivi ihya chihin ndo, ¿yoso caa

chino iñi ndo tu cahin tuhun andivi chihin ndo?

¹³ Yori chahan andivi chinyehé yoso caa iyó. Noo ri yuhu Rayi cha quichj nya gloria nyehj, vatyí yucuan iyé.

¹⁴ Tari nacatacaá ra Moisés noo coo cha chino chihin caa nu noo chiqui ndii, tyicuan caa cunacataca tucu ñu chi yuhu Rayi cha quichi nya gloria,

¹⁵ tacuhva vatyí tandihi ñu cha chinó iñi chii, ma cunaa ñu. Soco coo ñu ñáyivi cha ma naa ca maa.

Nyoo cuñi xaan ra chi ñáyivi

¹⁶ Vatyí Nyoo cuñi xaan ra chi tandihi ñáyivi iyó siqui ñuhu ñáyivi. Yucuan cuenda chaha ra vatyí cúvi Sehe mañi ra nu cruzi cha cuenda ñu. Tacuhva vatyí tandihi ñu cha chinó iñi chi Sehe ra, ma cunaa ñu, soco coo ñu noo ñáyivi cha ma naa ca maa.

¹⁷ Nyoo ña tachj ra chi Sehe ra siqui ñuhu ñáyivi vatyí sacunaa ra chi ñáyivi, soco tachj ra chi ra na sacacu ra añima ñu tacuhva ma chuhun ñu anyaya cha catyí cuatyí ñu.

¹⁸ Vatyí ñu chinó iñi chi Sehe Nyoo ma cunaa ñu, soco ñu ña chinó iñi chi ra, cha cuanaa ñu cha cuenda cha ña chinó iñi ñu chi noo ri Sehe mañi Nyoo.

¹⁹ Ñu ña chinó iñi, cha cuanaa ñu. Vatyí quivi quichj ra cuví ñuhu ndichin cha sacundichin siqui ñuhu ñáyivi, ña natijn cuenda ñu chi ra tyi tahan ca iñi ñu nu ñaa iñi vatyí nyacuví ñu cha ña vaha.

²⁰ Tandihi ñu cha nyacuví cha ña vaha, ña tahan iñi ñu ñuhu ndichin, vatyí coto quetuyi cha ña vaha cha nyacuví ñu.

²¹ Soco ñu nyacuví cha ndicha, nanyitá ñu nu ndichin tacuhva na cundichin nyehé ñáyivi vatyí sacuví ñu cuhva cuñi Nyoo vatyí nyaá ra chihin ñu —catyí ra Jesús.

Nu cahán ra Juan, ra sacondutyá, tuhun ra Jesús inga chaha

²² Cha yahá tuhun ihya, ra Jesús chihin ra cachicá noo chihin ra cuahan coyo ra nu cuví Judea. Ta candoo ra suhva quivi yucuan, vatyí casacondutyá ra chi ñáyivi.

²³ Tyicuan caa tucu ra Juan cuan ñohó ra sacondutyá ra chi ñáyivi nu cuví Enón yatyin ri nu cuví Salim, vatyí yucuan ñohó cama ndutyá. Ta ñáyivi chaá coyo ñu ta condutyá ñu.

²⁴ Tuhun ihya cuvj ta ni cumañi ca catyí ra chi ra Juan vehe caa.

²⁵ Tyicuan ta suhva ra nyicón chi ra Juan quichaha cuví yuhu ra chihin noo ra ñuu Israel siqui yoso caa sandundii ñáyivi chi ñu nuu Nyoo.

²⁶ Tyicuan ta cuahan coyo ra nu nyaá ra Juan. Ta catyí ra chi ra:

—Maestro, ra cha ñohó chuhun inga chiyo yuvi cahnu Jordán, ra cha cahun

tuhun chihin ndi, vityin sacondutyá ra ta tandihí ñu nanyicón ñu chi ra —catyí ra chi ra.

²⁷ Tyicuan ta ra Juan catyí ra chi ra: —Ni noo yo ta ñahri cha cuví sacuvi yo, tyehe ta ña chahá Nyoo tunyee iñi ra chi yo.

²⁸ Suri maa ndo chiñi vaha ndo cha cahñ vatyi yuhu ñima ra Cristo cuví. Noo ra cha tachj ri Nyoo ityi nuu ra cuví yuhu.

²⁹ Vatyí noo vico tandaha, ra nyaá xiin ñaha tyivaa cuan, ican ra cuan cutandaha chihin ña. Ta ra tahan ra nyaá ra yatyin ri cuan. Ta cusii cuñí ra chiñi ra tuhun cahán ra cha cuatandaha. Ta tyicuan caa tucu yuhu, sii cuñí vatyi naquehen ñáyivi tuhun cahán ra Jesús ta nyicón ñu chi ra.

³⁰ Maa ra cahnu ca ra cuacuvi ra. Ta yuhu cucucuee que vatyi tyicuan caa tahán maa chi.

Ra quitá nya gloria ta quichi siqui ñuhu ñayivi

³¹ Ra cha quichj nya gloria, cahnu ca ra cuví ra cha nuu tandihí ñáyivi. Vatyí ra iyó siqui ñuhu ñayivi, cuenda ñuhu ñayivi cuví ra. Ta cahán ra tuhun ñuhu ñayivi. Soco ra quichj nya gloria, cahnu ca ra cuví ra.

³² Ta cahán ra cha nyehé ra ta cha chiñi ra, soco yori chinó iñi tuhun cahán ra.

³³ Soco tatu nya noo yo chinó iñi yo chi ra, cuví yo noo cha ndaa vatyi Nyoo ndicha cha cahán ra.

³⁴ Vatyí ra cha tachj Nyoo chii, tuhun Nyoo cahán ra vatyi Nyoo ña tyicuhvá ra Tatyí li ra chahá ra chí ra. Chahá ra nani Tatyí li ra chí ra.

³⁵ Nyoo Sutu yo cuñí ra chí Sehe ra. Ta natyaa ra tandihí ndaha ra.

³⁶ Ñu cha chinó iñi chí Sehe Nyoo, iyó ñu noo ñayivi chaa cha ma naa ca maa. Soco ñu ña cuñí chino iñi chí ra, ma coo ñu ñayivi cuan. Ta cutachi tuñi Nyoo chí ñu.

4

Nu ndatuhun ra Jesús chihin noo ñaha Samaria

¹ Cachitó ra cuví fariseo vatyi cuaha ca ñáyivi nyicón chi ra Jesús ican saha ra Juan. Ta cuaha ca ñu sacondutyá ra ñandihí.

² Vasi ñima maa ra Jesús sacondutyá, soco ra cachicá noo chihin ra, ican casacondutyá.

³ Ta quivi chitō ra Jesús vatyi cachitō ra tuhun ihya, ta quitá ra Judea cuan ta cuanuhu ra nya Galilea.

⁴ Ta ityi cuanuhu ra, tahan chí yaha ra nu cuví Samaria.

⁵ Yucuan ta chaq ra noo ñuu cha nyaá ityi Samaria cha nañi Sicar yatyin nu nyaá ñuhú ra Jacob nu chahá ra chí ra José sehe ra.

⁶ Ta yucuan nyaá noo yavi ndutya cha catyí ñu tyi chí ra Jacob cuví. Ta vatyi

chitatú xaan ra Jesús cha chica ityi ra, ta chicunyaq ra yuhu yavi cuan, ñáá cuhva hora cuví.

⁷⁻⁸ Ta ra cachicá noo chihin ra, yori ra canyicú vatyi cuahan coyo ra chichi ñuu, cuasata ra cha cacachi ra. Tyicuan ta chaq noo ñaha Samaria cuatava ña ndutya chichi yavi cuan. Ta quichaha catyí ra Jesús chí ña:

—Cuhva chiiñ ndutya cohi —catyí ra chí ña.

⁹ Tyicuan ta ñaha Samaria cuan catyí ña chí ra Jesús:

—Yoho cha cuvún noo ra ñuu Israel, ¿yoso caa cha chicón ndutya cohun chí yuhu cha cuví ñaha Samaria? —catyí ña vatyi ñu Israel ña vaha iyó ñu chihin ñu Samaria.

¹⁰ Tyicuan ta ra Jesús nacahañ ra ta catyí ra:

—Tyehe ta chitón cha chahá Nyoo, ta chitón yóo cha chicán ndutya chuun, maun cucacon ndutya chii. Ta yuhu cuhve ndutya nyitó chuun —catyí ra chí ña.

¹¹ Tyicuan ta catyí ña chí ra:

—Tata, ni ñahri vihi chihin tavon ndutya ihya. Vatyí yavi ihya cono xaan. ¿Nya cuquehun ndutya nyitó cuhvon cohi?

¹² Vatyí sutu chahnu yo, ra Jacob sandog ra yavi ihya chí yo. Ta suri ihya chihj tucu maa ra ndutya. Ta suri ihya chihj tucu sehe ra ta quití sana ra. ¿Atu cahnu ca ra cuví yoho ican saha ra cuan? —catyí ña chí ra.

¹³ Tyicuan ta nacahañ ra Jesús ta catyí ra chí ña:

—Tandihí ñu chihí ndutya ihya, cu ityi ca ñu ndutya.

¹⁴ Soco ñu chihí ndutya cha chahá yuhu, ma cu ityi ca ñu. Vatyí ndutya cha chahí chí ñu cucaña chí tari noo ndohyo chichi añima ñu tacuhva coo ñu ñayivi cha ma naa ca maa —catyí ra chí ña.

¹⁵ Tyicuan ta quichaha catyí ña chí ra:

—Tata, cuhva ndutya cuan cohi, tacuhva cha ma cu ityi que ndutya, ta ni ma quichi que quichi tave ndutya chichi yavi ihya —catyí ña chí ra.

¹⁶ Tyicuan ta ra Jesús catyí ra chí ña:

—Cuahñ cuacana chí yün ta quichun —catyí ra chí ña.

¹⁷ Ta nacahañ ña ta catyí ña:

—Yori yí iyó —catyí ña.

Tyicuan ta catyí ra Jesús chí ña:

—Ndicha cha cahun, vatyi yori yün iyó.

¹⁸ Vatyí cha ohon tahan yün chiyō, ta ra nyaá chuhun vityin ñima yün cuví chí ra. Ndicha tuhun cha cahún —catyí ra chí ña.

¹⁹ Cha chiñi ña tuhun cahñ ra, quichaha catyí ña chí ra:

—Tata, tuví iñi vatyi noo profeta cuenda Nyoo cuvún.

²⁰ Sutu chahnu ndi, ra Samaria, sacahnj ra chí Nyoo yucu ihya. Soco nyoho ñu Israel

catyi ndo vatyi Jerusalén yucuan tahán chi sacahnu yo chi Nyoo —catyi ña chi ra.

²¹ Tyicuan ta ra Jesús nacahan ra ta catyi ra chi ña:

—Chjno iñun tuhun cahín chuhun. Vatyi vachi cuhva vatyi cusacahnu ndo chi Sutu yo Nyoo. Soco ña chiñuhú ri cha quichi ndo yucu ihya o cahun ndo nya Jerusalén.

²² Nyoho ñu Samaria, ña chitó ndo yóó chi sacahnú ndo. Soco nyuhu chitó ndi yóó chi sacahnú ndi. Vatyi chitó ndi vatyi cuenda noo ra Israel cuasacacu Nyoo chi ñáyivi.

²³ Soco chaa chi cuhva ta cuhva cuan nyaa yo vityin vatyi ñáyivi cha ndicha sacahnú chi Sutu yo Nyoo, cusacahnu ñu chi ra chihin añima ñu ta cha ndicha. Tari cuhva saquehen ityi Tatyí Ii Nyoo chi ñu. Vatyi Sutu yo Nyoo tyicuan caa cuñí ra cha sacuvi ñu cha sacahnú chi ra.

²⁴ Vatyi Nyoo Tatyí Ii cuví ra. Ta ñu sacahnú chi ra cuñí chi sacahnú ñu chi ra chihin cha ndicha tari cuhva saquehen ityi Tatyí Ii chi ñu —catyi ra chi ña.

²⁵ Ta nacahan ña ta catyi ña chi ra:

—Yuhu chité vatyi cuquichi ra cuví Mesías, ra Cristo, ra cuví rey chi yo. Ta quívi quichi ra, maa ra cunacatyí tandihí chi yo —catyi ña chi ra.

²⁶ Tyicuan ta nacahan ra Jesús ta catyi ra chi ña:

—Ra cha cahún tuhun cuan, ican ra cahán chuhun —catyi ra chi ña.

²⁷ Tyicuan ta canachaá coyo ra cacticá noo chihin ra ta iyo cacuñí ra cha ndatuhún ra Jesús chihin noo ñaha sihi. Soco ni noo ra ña cañá iñi ra ndaca tuhun ra ñáá cha cuñí ra o ñáá cuenda ndatuhún ra chihin ñaha cuan.

²⁸ Tyicuan ta sandoq ña quiyí ña ta cuanuhu ña chichi ñuu. Ta catyi ña chi ñáyivi ñuu ña:

²⁹ —Ñaha ndo cunyehe ndo chi noo ra cha catyi tandihí cha cai. ¿Atu ñima ra Cristo cuví ra? —catyi ña chi ñu.

³⁰ Tyicuan ta quitá coyo ñu ñuu cuan ta cuahan coyo ñu nu nyaá ra Jesús.

³¹ Ta cha niri ca cha cumañi chaa ñu nu nyaá ra, ra cacticá noo chihin ra, saniñí ra chí ra na cachi ra chiin. Ta cacatyí ra chi ra:

—Maestro, cächi chiin —catyi ra.

³² Soco catyi ra Jesús chi ra:

—Yuhu iyó noo nyayu cuacachi, ta nyoho ña chitó ndo —catyi ra chi ra.

³³ Tyicuan ta ra cacticá noo chihin ra quichaha candaca tuhun ra chi ra tahan ra, ta catyi ra:

—¿O iyó yóó cha quichí nyaca cha cachi ra, vaha? —cacatyí ra.

³⁴ Soco ra Jesús catyi ra chi ra:

—Cha chachí yuhu ican cuví cha sacuvi cuhva cuñí ra cha tachí chii ta sacuvi tyiño chahá ra chii.

³⁵ Nyoho catyi ndo: “Soco cumañi ca cumi yoo ta naquehen yo cha tachí yo.” Soco yuhu catyi chi ndo vatyi nyehe ndo ta sgha ndo cuenda cha cuaha ñáyivi cuñí ñu quichi ñu chihin, cuví ñu tari noo itu cha cuan ta cuñí chi cha cahnu yo niñi.

³⁶ Ra cha naquehén niñi cuan ñihi ra yahvi ra. Ta niñi cha naquehen vaha ra cuví ñu cha ñihi noo ñáyivi cha ma naa ca maa. Ta tyicuan caa cuví tacuhva vatyi ra cha tachí, ta ra cha naquehén niñi cuan in ri cacusi cuñi ra.

³⁷ Ta iyó noo tuhun ñáyivi cha catyi vatyi siñ ñu tachí ta siñ ñu naquehén niñi. Ta ndicha tuhun cuan.

³⁸ Yuhu sacuhin chi ndo vatyi cucahnu ndo niñi cha iyó nu ña sahá tyiño ndo. Vatyi inga ra sahá tyiño. Ta nyoho nyari cucahnu ndo ta naquehen vaha ndo niñi cuan —catyi ra Jesús chi ra.

³⁹ Ta cuaha xaan ñu ñuu Samaria cuan canachinq iñi ñu chi ra Jesús cha cuenda cha catyi ñaha cuan, vatyi catyi ña: “Catyi ra tandihí cha cai chii”, catyi ña.

⁴⁰ Ta cuhva cha cachaá coyo ñu Samaria nu nyaá ra Jesús, cha cundahvi ñu nuu ra nandoo ra chihin ñu. Ta ra Jesús ndooq ra yucuan uvi quívi chihin ñu.

⁴¹ Ta cuaha ca ñu cachinq iñi ñu cha chiñí ñu tuhun cahán maa ra.

⁴² Tyicuan ta quichaha catyi ñu chi ñaha sihi cuan:

—Vityin chinó iñi ndi, ñima cha cuenda vatyi catyun chi ndi, soco vatyi chiñí maa ndi chihin soho ndi tuhun cahán ra, ta chitó vaha ndi vatyi ican ra cuví Cristo ra sacacú chi ñáyivi iyó siqui ñuhu ñáyivi ihya —catyi ñu.

Nu sanduvahá ra Jesús chi sehe noo ra cuví tyiño

⁴³ Cha yahá uvi quívi ta quitá ra Jesús ñuu Samaria cuan ta cuahan ra ityi nu cuví Galilea.

⁴⁴ Vatyi suri maa ra Jesús catyi ra vatyi ñáyivi ñuu noo ra cuví profeta, ra chahá cuenda tuhun cahán Nyoo, ña sahá ñu ñáyivi chi ra.

⁴⁵ Tyicuan ta cuhva cha chaá ra Galilea, ñu iyó yucuan vaha tyiñuhú ñu chi ra, vatyi chahan coyo tucu maa ñu Jerusalén vico cuan, ta nyehe ñu cha vaha cha sacuvi ra.

⁴⁶ Tyicuan ta cuanuhu tucu ra Jesús nya ñuu Caná nu cuví Galilea nu sananduví ra vinu chihin ndutya. Ta iyó noo ra cuví tyiño cuenda rey, ta iyó noo sehe ra cha cuhvi ñuu Capernaum.

⁴⁷ Quívi cha chitó ra cuan vatyi nachaá ra Jesús Galilea cha chahan ra Judea, chahan

ra chinyehę ra chi ra, ta chican ra tumañi iñi chi ra na cahun ra vehe ra ta sanduvaha ra chi sehe ra, vatyí cha cuñi cuii ri cúvi sehe ra.

⁴⁸ Tyicuan ta ra Jesús catyí ra chi ra:

—Nyoho ma chino iñi ndo tatu ma nyehe xihna ndo noo milagru —catyí ra chi ra.

⁴⁹ Soco ra cha vaha cuan catyí ra chi ra Jesús:

—Tata, coho chihin cha numi ri vityin cha ta cúvi ca sehi —catyí ra chi ra.

⁵⁰ Tyicuan ta ra Jesús catyí ra chi ra:

—Cuñuhu nya vehun. Sehun cha nduvaha ra —catyí ra chi ra.

Tyicuan ta ra cha vaha cuan chinó iñi ra tuhun cahan ra Jesús ta cuanuhu ra.

⁵¹ Ta cuhva cha cuanachaa ra nya vehe ra, quitá coyo musu ra ta cacatyí ra chi ra:

—¡Cha nduvaha sehan!

⁵² Tyicuan ta quichaha ndaca tuhun ra chi ra ñáa cuhva nduvaha ra. Ta cacatyí ra chi ra:

—Icu cuhva ca ñn cha yaha hora tinyaa cahni chi ra —cacatyí ra.

⁵³ Tyicuan ta tuví iñi ra cha vaha cuan, vatyí cuhva cuan catyí ra Jesús chi ra, “Cuñuhu vatyí sehan cha nduvaha ra.” Ta maa ra ta tandihí ñáyivi chi ra nachino iñi chi ra Jesús.

⁵⁴ Ican ihya cuví cha cu uvi milagru cha sacuví ra Jesús cha nachaa ra Galilea cha chahan ra Judea.

5

Nu sanduvaha ra Jesús chi noo ra ña cuví caca

¹ Cha yaha tuhun cuan ta ra Jesús cuahan ra Jerusalén inga chaha vatyí ñu ñuuo Israel sanducahnu ñu noo vico.

² Ta ñuuo cuan iyó noo yuvehe cha nañi Yuvehe Cuenda Mbee. Ta vatyin ri nyaa noo vehe cahnu. Ta chichi vehe cuan ñohó ndutya. Ta cha chihin sahan hebreo nañi chi Betesda. Ta iyó ohon tahan corredor.

³ Ta yucuan cayucu cuaha ñu cuhví: ñu cuaa, ñu coxo, ta ñu ña cuví nacanda. Canyatú ñu ñáa cuhva nacanda ndutya cuan.

⁴ Vatyí ña naha ña naha ri ta noó noo ángel sanacanda ra ndutya cuan. Ta yóo cha quihvi xihna ca cha yaha nacanda ndutya cuan, nduvaha ñu niri maa ñáa ca cuehe ndoho ñu.

⁵ Ta yucuan catuví noo ra cuhví cha iyó oco chahun uñi cuiya cuhví ra.

⁶ Cuhva cha nanyehę ra Jesús chi ra catuví ra yucuan, tuví iñi ra vatyí cha cañi xaan cuiya caá ra tyicuan caa. Ta ndaca tuhun ra chi ra, ta catyí ra:

—¿Atu cuñún nduvahun?

⁷ Ta ra cuhví cuan nacahan ra ta catyí ra:

—Tata, yori maa tyihí chii chichi tanque tatu cha nacandá ndutya. Vatyí tahan ri cha cuñi quihvi, inga ñu quihvi xihna ca —catyí ra cuhví cuan chi ra Jesús.

⁸ Tyicuan ta catyí ra Jesús chi ra:

—Ndícuita ta naquehen yuvun ta cacon —catyí ra chi ra.

⁹ Ta caa cuhva ri cuan nduvaha ra, naquehen ra yuvi ra, ta nacaca ra. Soco vatyí quiví nyitatu ñu cuví,

¹⁰ ra cacuví nuu chi ñu Israel catyí ra chi ra cha nduvaha cuan:

—Quiví nyitatu yo cuví vityin, ña tahan chi cuison yuvun —catyí ra chi ra.

¹¹ Ta ra cha nduvaha cuan nacahan ra ta catyí ra:

—Ra cha sanduvaha chii, ican ra catyí chii: “Naquehen yuvun ta cacon”, catyí ra chii.

¹² Tyicuan ta quichaha candaca tuhun ra chi ra, ta catyí ra:

—¿Yóo ra cha catyí chuun vatyí naquehun yuvun ta cacon?

¹³ Soco ra cha nduvaha cuan ña chitó ra yóo cha sanduvaha chi ra. Vatyí cuaha xaan ñáyivi yucuan, ta ra Jesús yori ca ra vatyí cha cuahan ra.

¹⁴ Yaha cuan ta nañihí ra Jesús chi ra chichi vehe ñuhu cahnu, ta catyí ra chi ra:

—Nyehę, vityin cha nduvahun, ma sacuví con cuatyí, coto ñáa ca cha cahnu ca cuvi chuun —catyí ra chi ra.

¹⁵ Tyicuan ta chahan ra chicatyí ra chi ra Israel cuan vatyí ra Jesús cuví ra cha sanduvaha chi ra.

¹⁶ Ta cha cuenda cha sacuví ra Jesús tyehe caa quiví nyitatu ñu, yucuan chaha cuxaan xaan ra cacuví nuu chi ñu Israel chi ra Jesús. Ta cuñi ra cahni ra chi ra.

¹⁷ Soco ra Jesús catyí ra chi ra:

—Maa Suti, nya vityin ta sahá tyiño ra. Ta yuhu tucu sahá tyiñe —catyí ra.

¹⁸ Ta cha cuenda cha cahan ra tuhun ihya, xaan ca cuñi ra Israel cuan. Ta ñihí ca cuñi ra cahni ra chi ra vatyí cuñi maa ra vatyí ña sahá ra ñáyivi quiví nyitatu ñu, ta siin ri tyi sahá ra tuhun tyi ñn ri cuví ra chihin Nyoo vatyí catyí ra tyi sutu ra cuví chi Nyoo.

Sehe Nyoo iyó xaan ityi chi ra cha cunyaca ñaha ra

¹⁹ Tyicuan ta ra Jesús catyí ra chi ra:

—Cha ndicha catyí chi ndo vatyí yuhu, cha cuví Sehe Nyoo, ñahri cha savahí cha maa ri mai. Soco sacuví cha nyehí sacuví Suti. Tandihí cha sacuví Suti ta sacuví tucu mai.

²⁰ Vatyí cuñi xaan Suti chii, vatyí Sehe ra cuví chii, yucuan chaha sañahá ra tandihí cha sacuví ra chii. Ta nahnu ca cha cusañaha ra, tacuhva cu iyo cuñi ndo.

²¹ Tari sanandotó Nyoo Suti chi ndiyi, ta chahá ra ñayiví coo ñu, tyicuan caa tucu yuhu cha cuví Sehe ra, chahí ñayiví chi ñu cuñí mai cuhve.

²² Ta Suti Nyoo ña sandaa ra cuatyí ni noo ñu, soco chi yuhu cha cuví Sehe ra chahá ra ityi na sandai cuatyí ñayiví.

²³ Tyicuan caa sacuví Suti Nyoo vatyí cuñí ra tyi sacahnu ñayiví chi Sehe ra tari sacahnú ñu chi maa ra. Ñu ña sacahnú chi yuhu Sehe Nyoo, niri chi Suti ta ña sacahnú ñu. Tyi maa ra tachí ra chi yuhu cha cuví Sehe ra.

²⁴ Ta cha ndicha catyí vatyí ñu tyasohó tuhun cahín ta chinó iñi ñu chi ra cha tachí chii, iyó ñu noo ñayiví chaa cha ma naa ca maa. Ta ma cuhun ca ñu anyaya cha catyí cuatyí ñu vatyí cha sacacú Nyoo añima ñu ndaha tuhun chihí, ta nacuhvá ra ñayiví chaa coo ñu.

²⁵ Ñayiví tari cha ndiyi cuví ñu soco cha ndicha catyí chi ndo vatyí vachi chi quiví vatyí cuiñi ñu ndusu Sehe Nyoo. Ta ñu cha quichahá cha cahán ra, cucoo ñu ñayiví cha ma naa ca maa. Ta vityin cuví quiví cha cahín tuhun.

²⁶ Vatyí Nyoo Suti iyó ra ñayiví cha ma naa ca maa. Ta chahá tucu ra ityi chi yuhu cha cuví Sehe ra vatyí cuhve ñayiví coo ñayiví.

²⁷ Ta Nyoo chahá ra vatyí sandai cuatyí ñayiví, vatyí Rayi cha quichi nya gloria cuví yuhu.

²⁸ Ma iyo cuñi ndo tuhun ihya, vatyí cuchaa chi quiví vatyí ñu ndiyi chichí ñaña cucuiñi ñu ndusu Sehe Nyoo.

²⁹ Ta cuquita coyo ñu chichi ñaña. Ta ñu cha sacuví cha vaha cunandoto ñu vatyí coo ñu noo ñayiví chaa. Soco ñu ña sacuví cha vaha cunandoto ñu vatyí cuhun ñu anyaya nu cutachi tuñi Nyoo chi ñu.

Nu sañahá chi vatyí ra Jesús iyó ityi chi ra cha cuhva ra ñayiví chaa coo ñayiví

³⁰ Yuhu ñima noo tuhun ri mai sacuví ñáá noo cha sacuví. Nyehí cha caá añima ñayiví yoso cuhva catyí Suti. Ta vaha cuhva nyehí vatyí ña sacuví cuhva cuñí mai, soco cuhva cuñí Suti, ra cha tachí chii.

³¹ Ta tatu suri mai cuví cha ndaa chi mai, ñahri yahví nyaá cha ndaa cuan.

³² Soco iyó inga ra cuví cha ndaa cuenda yuhu. Ta yuhu chité vatyí cha cahán ra cuende yucuan cuví noo cha ndaa ta cha ndicha.

³³ Nyoho chindaca tuhun ndo chi ra Juan. Ta tuhun cha cahán ra, ndicha vaha.

³⁴ Soco yuhu ña chiñuhú cha cuví rayi cha ndaa cuende. Soco catyí tuhun ihya chi ndo cha cuenda cha vaha chi ndo, tacuhva vatyí chino iñi ndo chii ta cacu añima ndo.

³⁵ Ra Juan cuví ra tari noo lámpara cha cayú ta sacundichín. Ta nyoho tahán iñi ndo cusí iñi ndo nu ndichin ñuhú ra suhva ri quiví.

³⁶ Soco yuhu iyó noo cha ndaa vaha ca cha nuu cha catyí ra Juan. Vatyí tandihí cha sacuví yuhu, maa Suti catyí chii na sacuví. Ta ican cuví cha ndaa cha nyehé ndo vatyí ndicha vatyí maa Suti tachí chii.

³⁷ Ta tyicuan caa tucu Suti, ra cha tachí chii, cuví ra cha ndaa cuende. Nyoho ta cuiñi ca ndo ndusu ra. Ta ni ta nyehe ca ndo chi ra.

³⁸ Ta tuhun ra cha cahín nuu ndo, ña ndoó chi añima ndo vatyí ña chinó iñi ndo vatyí Nyoo tachí ra chii.

³⁹ Nyoho chihin cuenda xaan sacuahá ndo nu tutu Nyoo, vatyí cuñí maa ndo vatyí nuu cuan cuanañihí ndo ñayiví chaá cha ma naa ca maa. Soco nu tutu Nyoo cuan, tuhun yuhu cahán chi.

⁴⁰ Ta nyoho ña cuñi ndo quichi ndo nu nyaí tacuhva vatyí cuhve ñayiví chaa cuan coo ndo.

⁴¹ Yuhu ña nduqui nu cuvahi nuu ñayiví.

⁴² Vatyí yuhu ñohó nui chi nyoho ta chité vatyí ña cuñi ndo chi Nyoo.

⁴³ Yuhu vachi cuenda Suti ta nyoho ña naquehén ndo tuhun cahín. Soco tatu inga ra vachi ra cuenda maa ra, chi ra cuan nachino iñi ndo.

⁴⁴ Nyoho ña cuví chino iñi ndo chii vatyí cuñi ndo cuvaha ndo nu tahan ndo. Ta ña nducú ndo nu cuvaha ndo nuu Nyoo cha noo tuhun ri maa iyó.

⁴⁵ Ma cuñi ndo vatyí cutyaa yuhu cuatyí chaha ndo nuu Suti. Ra Moisés cuví ra tyaa cuatyí chaha ndo vatyí ña sacuví ndo ley cha tyaa ra. Ta ley ra cuñi maa ndo vatyí cunyaca chi chi ndo andiví.

⁴⁶ Vatyí tyehe ta chinó iñi ndo tuhun cahán ra Moisés, chinó tucu iñi ndo tuhun cahán yuhu. Vatyí tuhun yuhu ican tyaa ra.

⁴⁷ Soco tatu ña chinó iñi ndo tuhun cha tyaa ra, ¿yoso caa cuchino iñi ndo tuhun cahán yuhu? —catyí ra Jesús chi ra cacuví nuu chi ñu Israel.

6

Nu chahá ra Jesús cha cachi ohon mil rayi (Mt. 14.13-21; Mr. 6.30-44; Lc. 9.10-17)

¹ Cha yahá cuan, ra Jesús cuahan ra inga chiyo miñi cahnu cha nañi Tyañuhu Galilea. Ta suri miñi cuan nañi chi Miñi Tiberias.

² Cuaha xaan ñayiví cuahan nyicon chi ra cha cuenda vatyí nyehé ñu milagru cha sacuví ra vatyí sanduvahá ra chi ñu cuhví.

³ Tyicuan ta ra Jesús ndaa ra noo yucu ta chicunyaá ra yucuan chihin ra cacticá noo chihin ra.

4 Ta cha nyaña quivi vico cha nañi pascua cha sanducahnú ñu Israel.

5 Cha nanyehę ra Jesús vatyí cuaha ñáyivi nycón chi ra, ta quichahę catyí ra chi ra Felipe:

—¿Yoso caa cusata yo cha cachi tandihi ñáyivi cuaha ihya? —catyí ra chi ra.

6 Soco catyí ri maa ra chi ra Felipe cha nducú nyehę ra chi ra ñáa catyí ra, vatyí ra Jesús chító vaha ra ñáa cha cuasacuví ra.

7 Tyicuan ta nacahan ra Felipe ta catyí ra: —Yahvi cha quehen yo cha saha tyiño yo ucha tahan yoo ta ma ñihi sata yo cha cachi ñu chiin chiin —catyí ra Felipe.

8 Ta ra Andrés nonga ra nycón chi ra Jesús, ta yañi ra Simón Pedro cuví chi ra, catyí ra chi ra Jesús:

9 —Ihya nyaá noo ra cuehe luhlu nyisó cue ohon tahan pan cebada ta uvi tahan tiyaca. Soco ¿nyata cuví ihya ta cuaha ñáyivi ihya? —catyí ra Andrés.

10 Tyicuan ta ra Jesús catyí ra chi ra:

—Catyí ndo chi tandihi ñu na cunyicu ñu —catyí ra.

Iyó vavaha cuhu yucuan ta chicunyicu ñu ta cha ohon mil rayi, ta siin ri ñushi chihin ra cuatyaa.

11 Tyicuan ta quehen ra Jesús pan cuan ta cha yahę nacuhva ra tyahvi nyoo chi Nyoo, chahę ra chi ra cachicá noo chihin ra. Ta ra cachicá noo chihin ra casachę ra chi tandihi ñu canyicú cuan. Suri tyicuan caa sacuví tucu ra chihin tiyaca cuan, chahę ra cachí ñu nyacua nya cha chitu chi ñu.

12 Ta cuhva cha ndaha iñi ñu, ra Jesús catyí ra chi ra cachicá noo chihin ra:

—Nacoñehę ndo yiquin cha ndoo tacuhva vatyí ñahri cha tivi —catyí ra chi ra.

13 Canacoñehę ra, ta casacutę ra uchi uvi tahan tica chihin yiquin cha ndoo cuan cha cuenda ohon tahan pan cuan.

14 Tyicuan ta cha yahę nyehę ñáyivi cuan milagru cha savahę ra Jesús, ta catyí ñu:

—Ican ndicha cuii ra ihya cuví profeta, ra chahá cuenda tuhun cahan Nyoo cha nyaá cha quichi siqui ñuhu ñáyivi ihya —catyí ñu.

15 Soco tuví iñi ra Jesús vatyí cuñi ñu quehen ñu chi ra chihin fuerza vatyí sacuví ñu rey chi ra. Ta cuahan ri ra nu sucun yucu cuan inga chaha vatyí cunyya notuhun maa ra.

Nu chicá ra Jesús nu ndutya (Mt. 14.22-27; Mr. 6.45-52)

16 Ta cha cuaa, ta noo coyo ra cachicá noo chihin ra Jesús yuhu miñi cuan.

17 Ta quihvi coyo ra chichi canoa ta cuayaha sava ra mahñu miñi cuan vatyí cuhcha ra Capernaum. Cha cuña ta ra Jesús suri cha ta ndichi ca ra.

18 Tyicuan ta chaę noo vatyí ñihi. Ta iyo ndicuitę ndutya miñi cuan.

19 Tyicuan ta cha cayahę ra chihin canoa cuan tari noo cha ohon o iñu kilómetro, ta cananyehę ra chi ra Jesús suri chicá ra nu ndutya cuan cuachaa ra nu nyaá canoa cuan, ta canayuhvi ra.

20 Soco ra Jesús catyí ra chi ra:

—¿Yuhu cuví, ma yuhvi ndo!

21 Tyicuan ta chihin cha casii cuñi ra caquehen cuenda ra chi ra Jesús chichi canoa. Tyicuan ta tañi ri ta cachaa ra yuhu miñi nu cuahan coyo ra.

Nu nanducú ñáyivi chi ra Jesús

22 Tuvi inga quivi cuan cha ñaha cuiri chító ñáyivi cha ndoo inga chiyo miñi cuan vatyí ra cachicá noo chihin ra Jesús cuahan coyo ra chihin noo canoa cha iyó cuan. Vatyí noo ri maa iyó. Ta chító ñu tyi ña cuahan ra Jesús chihin ra.

23 Soco chaę coyo ca canoa cha quita coyo ñuu Tiberias. Chaa chi yatyn ri ityi nu cachachi ñu pan, yahę cha nacuhva Sutu Mañi yo tyahvi nyoo chi Nyoo.

24 Tyicuan ta cha nanyehę ñu tyi yori ra Jesús yucuan ta ni ra cachicá noo chihin ra, quihvi coyo ñu chichi inga canoa cuan ta cuahan ñu nya Capernaum cuananducu ñu chi ra.

Ra Jesús cuví pan cha chahá ñáyivi chaa coo yo

25 Cha chaę coyo ñu inga chiyo miñi cuan, nañihí ñu chi ra Jesús. Ta ndaca tuhun ñu chi ra:

—Maestro, ¿ama chaun ihya? —catyí ñu chi ra.

26 Soco ra Jesús catyí ra chi ñu:

—Cha ndicha catyí chi ndo vatyí nyoho nanducú ndo chii soco cha cuenda vatyí chachí ñu ndo nyacua nya cha chity chi ndo. Soco ñima vatyí nyehę ndo milagru cha sacuví.

27 Ma saha tyiño ndo cuenda nyayu cha ndihi, soco saha tyiño ndo cuenda nyayu cha ña ndihí ta chahá chi noo ñáyivi chaa cha ma naa ca maa coo ndo. Ican ihya cuví nyayu cha cucuhve chi ndo vatyí Nyoo Suti tyaę tyiño cuan chii vatyí yuhu cuví Rayi cha quichi nya gloria —catyí ra Jesús.

28 Tyicuan ta quichahę ndaca tuhun ñu chi ra ta catyí ñu:

—¿Ñáa cha cuví sacuví ndi tacuhva sacuví ndi cuhva cuñi Nyoo? —catyí ñu.

29 Tyicuan ta ra Jesús catyí ra chi ñu:

—Cha cuñi Nyoo cha sacuví ndo ican cuví ihya: Cha chino iñi ndo chi yuhu, ra cha tachí ra chi —catyí ra Jesús chi ñu.

30 Ta candaca tuhun tucu ñu chi ra, ta catyí ñu:

—¿Ñáa seña cuhvon chi ndi tacuhva vatyí nyehę ndi ta chino iñi ndi chuun? ¿Ñáa cha cuasacuvun?

³¹ Sutu chahnu ndi chachí ñu maná chiqui ndi nu yori ñáyivi iyó quivi cuan, tari catyí tuhun Nyoo: “Nyoo chahá ra pan cha quichí ityi andivi cachi ñu” —catyí ñu chi ra Jesús.

³² Ta ra Jesús nacahan ra ta catyí ra:

—Cha ndicha catyí chi ndo. Ñima ra Moisés chahá pan cha quichí ityi andivi cachi ñu, soco Nyoo Suti cuví ra chahá pan cha ndicha vaha cha quichí ityi andivi.

³³ Vatyí pan cha chahá Nyoo, ican cuví ra cha noq ityi andivi. Ta ican cuví ra cha chahá noo ñáyivi chaa coo ñu iyó siqui ñuhu ñáyivi —catyí ra Jesús.

³⁴ Tyicuan ta quichahá cacatyí ñu chi ra:

—Tata, cuhva pan chiña cachi ndi tyicuan ri maa —catyí ñu.

³⁵ Ta nacahan ra Jesús ta catyí ra chi ñu:

—Yuhu cuví pan cha chahá cha conyito añima ndo. Ñu vachi nu nyaí ma cusoco ca añima ñu, ta ñu chino iñi chii ma cu ityi ca maa añima ñu.

³⁶ Soco cha yahá catyí chi ndo vatyí nyoho ña chinó iñi ndo vasi cha nyehé ndo chii.

³⁷ Tandihí ñáyivi cha chahá Nyoo Suti chii, vachi ñu nu nyaí, ta ñu vachi nu nyaí, naquehén cuende chi ñu.

³⁸ Vatyí yuhu quichí ityi andivi soco ñima cha cuenda cha sacuvi cuhva cuñí mai, soco sacuvi cuhva cuñí ra cha tachí chii.

³⁹ Ta cuhva cuñí ra cha tachí chii, ican cuví ihya: cha ma sacunai ni noo ñu cha chahá ra chii, tacuhva vatyí sanandote chi ñu nu cuandihí quivi.

⁴⁰ Suti, ra cha tachí chii, cuñí ra vatyí tandihí ñáyivi cha nyehé chi yuhu ra cha cuví Sehe Nyoo, ta chino iñi ñu chii, coo ñu noo ñáyivi chaa ma naa ca maa. Ta suri yuhu cusanandote chi ñu nu cuandihí quivi —catyí ra Jesús chi ñu.

⁴¹ Cha cuenda cha cahán ra Jesús tyehe caa, ñu Israel quichaha cacahan nyaa ñu chi ra vatyí catyí ra: “Yuhu cuví pan cha quichí ityi andivi”, catyí ra.

⁴² Tyicuan ta quichaha catyí ñu:

—¿Atu ñima ra cuví ra Jesús, sehe ra José vii? Yoó ñohó nuu yo chí sutu ra ta chí síhi ra. ¿Yoso caa cha catyí ra vatyí ityi andivi quichí ra? —catyí ñu.

⁴³ Tyicuan ta ra Jesús catyí ra chi ñu:

—Sándihí ndo tuhun cha cahan nyaa ndo.

⁴⁴ Yori maa ñu quichi nu nyaí tatu ñima Suti, ra cha tachí chii, cana chí ñu. Ta cusanandote chí ñu nu cuandihí quivi.

⁴⁵ Nu libru cha catyaa ra profeta Nyoo ta cha naha catyí chí tyehe caa: “Nyoo cusañaha ra chí tandihí ñáyivi.” Yucuan chaha vatyí ñu cha tyasohó tuhun cahan

Nyoo Suti ta cutuhvá ñu tuhun cahan ra, ican ñu vachi nu nyaí.

⁴⁶ Ñima cha cuenda vatyí nyehé ñu chí Nyoo Suti, vatyí yori nyehé chí ra. Soco noo ri mai nyehé chí ra. Ta iquen cuví ra cha quita ñu nyaá ra.

⁴⁷ Cha ndicha catyí chi ndo vatyí ñu chinó iñi chii coo ñu noo ñáyivi chaa cha ma naa ca maa.

⁴⁸ Yuhu cuví pan cha chahá cha conyito añima ndo.

⁴⁹ Sutu chahnu ndo chachí ñu maná chiqui ndi cuan, soco suri cachihí ñu.

⁵⁰ Soco yuhu, tuhun pan cha quichí ityi andivi cahín chihin ndo, vatyí nya ñu cachi pan cuan, ma cuví añima ñu.

⁵¹ Suri mai cuví pan nyitó cha quichí ityi andivi. Yoó cha cachi pan ihya coo ñu tyicuan ri maa. Pan cha cuhva yuhu, ican cuví coño ñuhi. Ta cuhve ñáyivi chaa cuenda tandihí ñáyivi iyó siqui ñuhu ñáyivi —catyí ra Jesús chí ñu.

⁵² Tyicuan ta ra Israel cuan quichahá candatuhun ra chihin tahan ra ta cacatyí ra:

—¿Yoso caa cuhva ra cha cachi yo coño ñuhu ra?

⁵³ Ta ra Jesús catyí ra:

—Cha ndicha catyí chí ndo, yuhu cuví Rayi cha quichí nya gloria, ta tatu nyoho ta ma cachi ndo coño ñuhi, ta tatu ma coho ndo niñi, ma cuví coo ndo ñáyivi chaa.

⁵⁴ Ñu chachí coño ñuhi ta chihí ñu niñi, iyó ñu noo ñáyivi chaa cha ma naa ca maa. Ta yuhu cusanandote chí ñu nu cuandihí quivi.

⁵⁵ Vatyí coño ñuhi ican cuví pan cha ndicha vaha cha tahán chí cachi ndo, ta niñi cuví vinu cha ndicha vaha cha tahán chí coho ndo.

⁵⁶ Ñu chachí coño ñuhi ta chihí niñi, ñin ri cuví ñu chihin. Ta mai ñin ri cuví chihin ñu.

⁵⁷ Suti ra tachí chii, Nyoo nyitó cuví ra. Ta yuhu iyé chihin tunyee iñi ra. Ta suri tyicuan caa tucu ñu chachí coño ñuhi, coo ñu chihin tunyee iñi iyó chí.

⁵⁸ Tuhun pan cha quichí ityi andivi cahín. Pan ihya ñima tari maná cha chachí sutu chahnu ndo, vatyí suri chihí ñu. Ñu chachí pan cha cuví coño ñuhi, coo ñu tyicuan ri maa —catyí ra Jesús.

⁵⁹ Ican tuhun ihya sañaha ra Jesús nu ndu ñin ri ñu chichi vehe ñuhu Capernaum.

⁶⁰ Cuaha xaan ñáyivi nyicón chí ra Jesús. Ta cuhva cha chihí ñu tuhun ihya catyí ñu:

—Tuhun cha cahán ra ihya, yí xaan cha natiñ cuenda yo. Yori cuví quichaha tuhun cahán ra —catyí ñu.

⁶¹ Tyicuan ta tuví iñi ra Jesús vatyí ña cuñí ñu naquehen ñu tuhun cuan. Ta ndaca tuhun ra chí ñu:

—¿Atu quiñi cuñí ndo cha cahín tuhun ihya?

⁶² Ta ζyoso caa sacuvi ndo tatu nyehe ndo chi yuhu Rayii cha quichi nya gloria nandaa xica tiqui inga chaha ityi nu quite quiñi xihna ri?

⁶³ Tatyí li Nyoo ican cuví cha chahá ñayivi chaa. Coño ñuhu, ña tyinyeé chi coo yo ñayivi cuan. Ta tuhun cha cahín chihin ndo, Tatyí li Nyoo cuví ta chahá chi cha conyito añima ndo.

⁶⁴ Soco yihí suhva ndo cha ña chinó iñi ndo chii —tyicuan caa catyí ra Jesús.

Vatyí nya quivi xihna ri ta chitó ra yóo cha ña chinó iñi chi ra ta yóo cha cunaxico tuhun chi ra.

⁶⁵ Ta catyí ra:

—Yucuan chaha catyí chi ndo vatyi yori ñu cuví quichi nu nyaí tatu ñima Nyoo Suti cana chi ñu —catyí ra Jesús.

⁶⁶ Nya ndaha quivi cuan cuaha xaan ñu nyicqñ chi ra Jesús sandoq ñu chi ra. Ta ña chicá noo ca ñu chihin ra.

⁶⁷ Tyicuan ta ra Jesús ndacq tuhun ra chi ndihi uchi uvi tahan ra chicá noo chihin ra, ta catyí ra:

—¿Atu cuñí tucu nyoho cuhun ndo? —catyí ra chi ra.

⁶⁸ Soco nacahan ra Simón Pedro ta catyí ra:

—Sutu Mañi yuhu, ζyóo chi cunyicon ndi? Ta noo tuhun yoho cahún tuhun ñayivi cha ma naa ca maa coo ndi.

⁶⁹ Nyuhu chinó iñi ndi, ta ñoho nuu ndi chuun vatyi yoho cuvún ra cuví Cristo Sehe Nyoo nyitó.

⁷⁰ Ta nacahan ra Jesús ta catyí ra:

—¿Atu ñima yuhu nacachí chi ndi uchi uvi nyoho? Ta noo nyoho cuví cuihna —catyí ra.

⁷¹ Tuhun cha cahán ra Jesús ihya, tuhun ra Judas Iscariote sehe ra Simón cuví. Vatyí ra Judas cuví ra cucuhva cuenda chi ra Jesús chi ra xaan iñi chi ra, vasi noo ra cha uchi uvi cuan cuví ra.

7

Nu ña cachinó iñi yañi ra Jesús chi ra

¹ Cha yahq tuhun ihya, ta ra Jesús chicá noo ra ityi Galilea. Ña cuñi ra cuhun ra Judea vatyi ra cacuvi nuu chi ñu Israel cuan cacuñi ra cacahni ra chi ra.

² Ta cha nyaña quivi vico cha sanducahnu ñu Israel ndi cuiya ri. Ta nañi chico Tabernáculo.

³ Yucuan chaha yañi ra Jesús cacatyí ra chi ra:

—Ma ndoun ihya. Cuqhan Judea tacuhva vatyi ñu naquehén tuhun cahún cha nyicú yucuan nyehe ñu tyiño cha sacuvún.

⁴ Vatyí tatu cuñi yo cha cohon nuu ñáyivi chi yo, ma xehe ri sacuvi yo cha sacuvi yo. Ta yoho tatu ndicha cha sacuvún tuhun ihya, sacuvi nuu tandihi ñáyivi —cacatyí yañi ra chi ra.

⁵ Tyicuan caa cacatyí ra vatyi ni yañi ra ta ña chinó iñi ra chi ra.

⁶ Tyicuan ta ra Jesús catyí ra chi ra:

—Ta chaa ca cuhva cha cuhun yuhu.

Soco nyoho savahri quivi cuví cuhun ndo.

⁷ Vatyí ñáyivi ña cutasi cuñi ñu nyehé ñu chi ndo, soco chi yuhu tasi cuñi ñu nyehé ñu cha cuenda vatyi cachi ri catyi chi ñu vatyi ña vaha cha nyacuví ñu.

⁸ Cuqhan nyoho vico cuan. Yuhu ma cuhin vatyi ta chaa ca cuhva cha tahán chi cuhin —catyí ra.

⁹ Yahq cuan ta ndooq ra nya Galilea.

Nu ñohó ra Jesús vico Tabernáculo

¹⁰ Cha yahq cuahan coyo yañi ra Jesús, cuahan tucu maa ra vico cuan, soco xehe ri.

¹¹ Ta ra cacuvi nuu chi ñu Israel cananducú ra chi ra vico cuan, ta cacatyí ra chi ra tahan ra:

—¿Nya nyaá ra cuan? —catyí ra.

¹² Ta ñáyivi ñohó vico cuan cacahán ñu tuhun ra. Ta yihí ñu catyí ñu: “Noo ra vaha cuví ra.” Ta inga ñu catyí ñu: “Ña vaha ra, sandaví ñaha ra chi ñáyivi”, catyí ñu.

¹³ Soco yori cahán ndichin tuhun ra cha cuenda cha yuhví ñu chi ra cacuvi nuu cuan.

¹⁴ Cha cusava iyó vico ta quihvi ra Jesús chichi vehe ñuhu cahnu quichahq cahan ra nuu ñáyivi.

¹⁵ Ta ra cacuvi nuu cuan iyó cacuñi ra ta cacatyí ra chi ra tahan ra:

—¿Yoso caa chitó ra ihya ta ña sacuahq ra? —catyí ra.

¹⁶ Ta nacahan ra Jesús ta catyí ra:

—Tuhun cha sañahí, ñima cha cuenda mai cuví, soco cuenda ra cha tachí chii cuví.

¹⁷ Tatu yihí nyoho cha cuñi ndo sacuvi ndo cuhva cuñi Nyoo, cua coto ndo vatyi cuenda Nyoo sacote ta ñima cha cuenda mai.

¹⁸ Ra cha cahán cuenda maa, cahán ra na sacahnu ñáyivi chi ra. Soco ra nanducú cha sacahnu ñu chi Nyoo, ra cha tachí chi ra, ican ra cuan cahán cha ndicha. Ta ñahri cha sandaví ñaha ra.

¹⁹ ¿Atu ña ndicha vatyi ra Moisés chahq ley chi ndo? Soco ni noo nyoho ña quichahá ndo ley cuan. ¿Náa tuhun cuñi ndo cahni ndo chii? —catyí ra.

²⁰ Ta nacahan ñáyivi ta catyí ñu chi ra:

—Noo tatyí ña vaha yihí chi yoho. Yori cuñi cahni chuun —catyí ñu chi ra.

²¹ Ta catyí ra Jesús:

—Cha catyi noo milagru cha sacuvi quivi nyitatu yo, iyo xaan cuñi nyoho.

²² Soco ra Moisés catyí ra chi ndo vatyí sacuvi ndo costumbre circuncisión. Vasi ñima ra quichaha chihin tuhun cuan, soco ñáyivi chi ra ityi chata, casacuvi tyicuan caa. Yucuan chaha nyoho sacuvi ndo costumbre cuan vasi tahán chi quivi nyitatu yo.

²³ Ta vityin, vaha tatu cha cuenda cha ña cuñi ndo nacahnu ndo ley ra Moisés sacuvi ndo tyicuan caa vasi quivi nyitatu yo tahán chi. Soco tatu tyicuan caa sacuvi ndo, ¿ñáá tuhun cha cuxaan ndo chii cha cuenda vatyí sanduvahj nan# coño ñuhu noo ra cuan quivi nyitatu yo?

²⁴ Ma tyaa ndo cuatyí siqui ñáyivi tatu ña chitó vaha ndo ñáá cha sacuvi ñu. Cuatu ndo nya nyehe vaha ndo, tyicuan ta cucoto ndo yoso caa sacutuñi ndo chihin cha ndaa ta chihin cha ndicha vaha.

Nu cahán ra Jesús tuhun maa ra

²⁵ Tyicuan ta suhva ñu iyó Jerusalén, quichaha ndaca tuhun ñu:

—¿Atu ñima chi ra ihya canducu ra cha cahñi ra?

²⁶ Ta maa ra nanyaá cuan cahán ra nuu ñáyivi. Ta yori maa catyí ñáá cha catyí chi ra. ¿O vasi ca chinó tucu iñi ra cacuvi nuu vatyí ra ihya ra Cristo ra cuvi rey cha saquichi Nyoo cuví ra?

²⁷ Soco yoó chitó yo nya quitá ra ihya. Soco quivi quichi ra Cristo yori coto nya ityi quichi ra cuan —catyí ñu.

²⁸ Chitó ra Jesús tuhun cha ndatuhún ñu ihya cuhva cha sañaha ra chichi vehe ñuhu. Ta ñihi cahán ra ta catyí ra:

—¡An ñohó nuu ndo chii ta chitó ndo nya ityi quichi, cuñi maa ndo! Soco yuhu vachí soco ñima cuenda mai. Vachí cuenda ra cha tachj chii, ra cha cuví cha ndicha. Ta nyoho ña ñohó nuu ndo chi ra.

²⁹ Yuhu ñohó nuu chi ra vatyí cuenda ra vachi, ta maa ra tachj chii —catyí ra Jesús.

³⁰ Tyicuan ta cuñi ñu tyihi ñu chi ra chichi vehe caa. Soco ni noo ñu ña tññ ñu chi ra cha cuenda vatyí ta chaa ca quivi cha tahán chi tññ ra chi ra.

³¹ Soco cuaha xaan ñu chinó iñi chi ra. Ta catyí ñu:

—Ican ra ihya cuví Cristo. ¿Atu cuaha ca milagru sacuvi inga ra tatu quichi ra? —catyí ñu.

Nu tachi ra cuví fariseo policia cuquehen chi ra Jesús cohon ra vehe caa

³² Cha chiñi ra fariseo cha cahán ñáyivi tuhun ra Jesús, maa ra ta ra cacuvi nuu chi tata sutu catachj ra chi policia cuenda vehe ñuhu cuan cuquehen ra chi ra tyi cohon ra vehe caa.

³³ Tyicuan ta ra Jesús catyí ra:

—Cunyai chihin ndo suhva ri ca quivi. Yahá cuan ta cunuhi nu nyaá ra cha tachj chii.

³⁴ Nyoho cunanducu ndo chii. Soco ma nañihi ndo chii. Vatyí ma cuvi cuhun ndo nu cuacunyai —catyí ra Jesús.

³⁵ Tyicuan ta quichaha candaca tuhun ra cacuvi nuu chi ñu Israel chi ra tahan ra:

—¿Nya cuhun ra ihya cha ma nañihi yo chi ra? ¿O cuhun ra nu nyaa ra Israel cha ca iyó ñuu Grecia vatyí sañaha ra chi ñu iyó yucuan, vaha?

³⁶ ¿Ñáá cha cuñi chi catyí tuhun cahan ra chihin yo? Vatyí catyí ra: “Cuananducu ndo chii soco ma nañihi ndo chii. Vatyí ma cuvi cuhun ndo nu cucunyai” —tyicuan caa cacuvi yuhu ra tuhun ra.

Ñu chinó iñi chi Nyoo cucohon Tatyí Ii ra añima ñu

³⁷ Quivi nu ndihi chiyo vico, yucuan quivi cha ñihi ca. Ta quivi cuan ndicuitá ra Jesús ta ñihi cahán ra ta catyí ra:

—Tatu nya noo ndo ityi añima ndo tuhun Nyoo, ñaha ndo ta naçhino iñi ndo chii.

³⁸ Ñu cha chinó iñi chii, chichi añima ñu cucono tari noo yuvi ndutya cha nyitó, tari cuhva catyí nu tutu Nyoo —catyí ra Jesús.

³⁹ Soco chihin cuan cuñi ra catyí ra vatyí ñu chinó iñi chi ra cunaquehen ñu Tatyí Ii Nyoo, vatyí quivi cuan ta quichi ca Tatyí Ii Nyoo vatyí ra Jesús, ta cunuhi ca ra nya gloria nu cusacahnu Sutu ra chi ra.

Nu cusññ ñáyivi cha ña tahán iñi tuhun cahan ra

⁴⁰ Suhva ñáyivi cha chiñi ñu tuhun ihya, catyí ñu:

—Ndicha vatyí ra ihya profeta Nyoo cha nyaá quichi cuví ra —catyí ñu.

⁴¹ Ta inga ñu catyí ñu:

—Ican ra cuví Cristo —catyí ñu.

Soco inga ñu catyí ñu:

—¿Yoso caa cha ra Galilea cuví ra Cristo?

⁴² Vatyí nu tutu Nyoo catyí chi vatyí ra Cristo cucuvi ra ñáyivi vachi tata rey David ta ra ñuu Belén cucuvi ra tari ra David —catyí ñu.

⁴³ Tyicuan ta ñáyivi cuan canatahvj sava ñu cha cuenda ra Jesús.

⁴⁴ Yihí ñu cuñi ñu quehen ñu chi ra cutyihí ñu chi ra chichi vehe caa. Soco yori tññ chi ra.

Ra cacuvi nuu vehe ñuhu ña cachinó iñi ra chi ra Jesús

⁴⁵ Tyicuan ta policia vehe ñuhu cahnu cuan, cuanuhu coyo ra nu nyicú ra fariseo ta ra cuví nuu chi tata sutu. Ta candaca tuhun ra chi policia cuan ta cacatyí ra:

—¿Ñáá tuhun ña quehen ndo chi ra?

⁴⁶ Ta policia cuan cacatyí ra:

—¡Ni noo chaha ta ni yori tuhva cahan tari cahán ra cuan! —cacatyí ra.

⁴⁷ Tyicuan ta ra fariseo catyí ra chi policia cuan:

—¿Atu sandaví ñaha ndihi ra chi nyoho ñandihí?

⁴⁸ ¿Nyehe ndo vatyi ni noo ra cuví nuu chi ndi cha cuví ndi fariseo ta ña chinó ñi chi ra cuan?

⁴⁹ Soco maa ri ñáyivi cha ña chitó nyicón chi ra. Soco ña vaha ñu nuu Nyoo —catyí ra.

⁵⁰ Tyicuan ta ra Nicodemo, ra cha chahan nu nyaá ra Jesús cha cha cuaa, cuví ra noo ra fariseo, ta catyí ra chi ra:

⁵¹ —Catyí ley vatyi ma cuví tachi tuñi yo chi noo ra tatu ma cuiñi xihna yo tuhun cahan ra, tacuhva coto yo ñáá cha sacuví ra —catyí ra chi ra.

⁵² Tyicuan ta canacahan ra ta cacatyí ra chi ra:

—¿Atu suri ra Galilea cuví tucu yoho? Sacuaha nu tutu Nyoo ta nyehun, vatyi ni noo ra chahá cuenda tuhun cahán Nyoo ta ña nyaá chi cha quichi ra ityi Galilea —cacatyí ra.

Ñaha sihi cha natuvi chihin rayii ta iyó yii ña

⁵³ Tyicuan ta tahan tahan ra cuanuhu coyo ra vehe ra.

8

¹ Soco ra Jesús cuahan ra yucu cha nañi Olivo.

² Ta cha inga quivi cuhva cha vachi cundichin, cuahan tucu ra inga chaha vehe ñuhu cahnu. Ta tandihí ñáyivi tuhva ñu nu nyaá ra. Ta maa ra chicunyaá ra ta quichaha cahan ra nuu ñu.

³ Tyicuan ta ra sacuahá cuenda ley ta ra cuví fariseo chaá coyo ra chihin noo ñaha iyó yii vatyi natijn ra chi ña nu cuatyí ña chihin inga rayii. Ta cuatyaa ra chi ña mahñu ñáyivi nyicú cuan.

⁴ Ta quichaha cacatyí ra chi ra Jesús: —Maestro, ñaha sihi ihya natijn ndi chi ña nu cuatyí ña chihin inga rayii.

⁵ Ta ley cha tyaa ra Moisés catyí chi vatyi nacahñi yo chihin yuu chi ñusihi cha sacuví tyehe caa. ¿Ta yoho, yoso caa catyun vityin? —catyí ra chi ra.

⁶ Cacatyí ra tuhun ihya chi ra Jesús cha cuenda cha nducú nyehe ra chi ra tacuhva tyaa ra noo cuatyí siqui ra. Tyicuan ta ra Jesús chicunyaá tyayii ra nu ñuhú ta quichaha tyaa ra letra nu ñuhú chihin nundaha ra.

⁷ Soco vatyi candacá tuhun ca ra chi ra, tyicuan ta nicuinanyaá ra ta catyí ra chi ra:

—Xihna ca nyoho cha ñahri cuatyí ndo quehen ndo yuu ta cañi ndo chi ña —catyí ra chi ra.

⁸ Ta nicunyaá tucu ra ta quichaha sañihi ra tyaa ra letra nu ñuhú.

⁹ Soco maa ra cha cachiñi ra tuhun ihya, tuví ñi ra tyi iyó tucu cuatyí maa ra. Ta quichaha quita coyo tahan tahan ri ra, quichaha xihna ca ra chahnu. Ta cuhva cha ndihi ra quita coyo ta ndoo noo tuhun ca maa ra Jesús chihin ñaha sihi cuan mahñu nu nyicu ñáyivi.

¹⁰ Tyicuan ta nicuinanyaá ra Jesús ta nyehe ra tyi cha cuahan coyo ra cuan ta ndoo noo tuhun ri ca ñaha. Tyicuan ta catyí ra chi ña:

—¿Nya nyaá ra tyaa cuatyí sicun vityin? ¿Yori ni minoo ca ra cuñi cahñi chuun? —catyí ra chi ña.

¹¹ Ta nacahan ña ta catyí ña:

—Ni nonga ra, Tata.

Tyicuan ta ra Jesús catyí ra chi ña:

—Ni yuhu ta ma cahñi chuun. Cuahan vityin. Ta ma sacuví con cuatyí —catyí ra chi ña.

Ra Jesús cuví cha ndichin cha sandichin añima ñáyivi

¹² Tyicuan ta cahan tucu ra Jesús nuu ñáyivi inga chaha, ta catyí ra chi ñu:

—Yuhu cuví ra cha sandichin añima ñáyivi iyó siqui ñuhu ñáyivi. Yó cha nyicón chii, coo ñu noo ñáyivi chaa nu ndichin. Ta ma caca noo maa ñu nu ñaa ñi —catyí ra Jesús chi ñu.

¹³ Tyicuan ta ra cacuví fariseo cacatyí ra chi ra:

—Yoho, cahún tumañi ñi cuenda maun. Ta yucuan ña ndicha —catyí ra chi ra.

¹⁴ Nacahan ra Jesús ta catyí ra:

—Vasi suri mai cahín tumañi ñi cuende, socio ndicha cha cahin vatyi yuhu chité nya ityi quichí ta nya ityi cuahin. Soco nyoho ña chitó ndo nya ityi quichí ni nya ityi cuahín.

¹⁵ Nyoho vatyin xaan cahan ndo cha caa ñáyivi. Soco yuhu, yori chi cahin cha caa.

¹⁶ Soco tatu catyí cha caa ñáyivi, catyí cha ndicha. Vatyi ñima noo ri mai nyehí, socio Suti ra cha tachi chii, ican ra nyehé chihin.

¹⁷ Nu ley nyoho nyaá vatyi tatu uvi ra chaha cha ndaa, cuñi chi chinó ñi yo cha ndaa cuan.

¹⁸ Ta vityin vaha, suri mai cuví cha ndaa cuenda mai. Ta Suti, ra cha tachí chii, cuví inga cha ndaa —catyí ra Jesús chi ra.

¹⁹ Tyicuan ta candacá tuhun ra chi ra:

—¿Nya nyaá sutun?

Ta ra Jesús catyí ra:

—Nyoho ña ñohó nuu ndo chi yuhu. Ta ni chi Suti ña ñohó nuu ndo. Tyehe ta ñohó nuu ndo chii, cohon nuu ndo chi Suti —catyí ra.

²⁰ Tuhun ihya cahan ra Jesús cha ni ri ca cha sañahá ra chichi vehe ñuhu cahnu, nu nyaá caja nu tyihí ñáyivi xuhun. Soco yori

tyihí chi ra vehe caa, vatyi ta chaa ca quivi cha tahán chi cohon ra.

“Nu cuhun yuhu ma cuvi cuhun ndo”, catyi ra Cristo

²¹ Ra Jesús catyi ra chi ra cacuvi fariseo inga chaha:

—Yuhu cuhin, ta nyoho cunanducu ndo chii, soco cucúvi ndo ta cundoo cuatyí ndo siqui ndo. Nu cuahan yuhu, nyoho ma cuvi cuhun ndo —catyi ra Jesús chí ñu.

²² Tyicuan ta ra cacuvi nuu chí ñu Israel cacatyí ra:

—¿Atu cucahñi maa ra chi ra? vatyi catyi ra vatyi ma cuvi cuhun yo nu cuahan ra —cacatyí ra.

²³ Tyicuan ta ra Jesús catyi ra:

—Nyoho ra cuenda ityi yuvi ihya cuvi ndo. Soco yuhu ra cuenda ityi siqui cuvi. Nyoho ñu ñuhu ñayivi ihya cuvi ndo. Soco yuhu ñima ra ñuhu ñayivi ihya cuvi.

²⁴ Yucuan chaha catyi chí ndo vatyi cucúvi ndo ta cundoo cuatyí ndo siqui ndo. Vatyi tatu ña chinó iñi ndo cha yuhu cuvi ra tinyaa cuatyí ndo, cundoo cuatyí ndo siqui ndo quivi cúvi ndo —catyi ra Jesús chí ra.

²⁵ Tyicuan ta quichaha candacá tuhun ra chi ra, ta catyi ra:

—¿Yóó ra cuvi yoho?

Ta ra Jesús nacahan ra ta catyi ra:

—Cha yaha catyi chí ndo nyata quivi xihna ri.

²⁶ Cuaha xaan ca cha nyaá cha catyi chí ndo, ta cuaha xaan ca nyaá catyi cha caá ndo. Soco tuhun cha catyi yuhu chí ñayivi iyó siqui ñuhu ñayivi, tuhun cha chíñi cha cahán ra cha tachí chii cuvi. Ta maa ra cahán ra cha ndicha —catyi ra.

²⁷ Soco maa ra cacuvi nuu chí ñu Israel ña cutuñi iñi ra vatyi tuhun Nyoo Sutu yo cahán ra chihin ra.

²⁸ Yucuan chaha catyi ra chi ra:

—Cutyaa ndo chi ra cuvi Rayi cha quichi nya gloria nu cruzi. Tyicuan ta cunacoto ndo vatyi yuhu cuvi, ta cucoto ndo vatyi tyiño sahí ñima cha cuenda mai sacuvi, soco cahín cha sañahá Suti chii.

²⁹ Vatyi Suti, ra cha tachí chii, nyaá ra chihin. Ta ña sandoo ra chíi cha maa ri mai. Vatyi yuhu tyicuan ri sacuvi cuhva cuñi ra —catyi ra Jesús.

³⁰ Cha cahán ra Jesús tuhun ihya, cuaha ra quichaha chino iñi ra chí ra.

Ñu cha cuvi Sehe Nyoo ta ñu cha sacuvi cha quiñi caa

³¹ Tyicuan ta catyi ra Jesús chí ra cacuvi nuu chí ñu Israel cha chinó iñi chí ra:

—Tatu nyoho ta sañihi ca ndo sacuvi ndo cuhva sañahí chí ndo, cuchaa ndo cuvi ndo noo ñu yihi cuende.

³² Ta cucoto ndo cha ndicha. Ta chihin cha ndicha cuan cundoo ndo libre —catyi ra.

³³ Ta canacahán ra ta catyi ra:

—Nyuhu ñayivi vachi tata ra Abraham cuvi ndi. Ta ni noo chaha ta cuvi ca ndi musu chí ni noo ñayivi. ¿Yoso caa cha catyi yoho tyi ndoo ndi libre? —catyi ra chí ra.

³⁴ Ta ra Jesús catyi ra:

—Cha ndicha catyi chí ndo vatyi tandihi ñu sacuvi cha quiñi caa, musu cuenda cha quiñi caa cuvi ñu.

³⁵ Noo musu ña nyaá ra vehe chitoho ra tyicuan ri. Soco noo sehe ra cuvi chitoho cuan, nyaá ra tyicuan ri chihin sutu ra.

³⁶ Yucuan chaha tatu yuhu cha cuvi Sehe Nyoo ta tave chí ndo ndaha ra ña vaha, ndicha cuii cucoo ndo libre.

³⁷ Cha chité vatyi ñayivi chí ra Abraham cuvi chí ndo. Soco yihi ndo cuñi ndo cahñi ndo chii, vatyi ña tñin cuenda ndo tuhun cahin.

³⁸ Yuhu cahín cha sañahá Suti chii. Ta nyoho sacuvi ndo cha catyi sutu ndo chí ndo —catyi ra chí ra.

³⁹ Ta canacahan ra ta catyi ra:

—Sutu ndi cuvi chí ra Abraham —catyi ra.

Soco ra Jesús catyi ra chí ra:

—Tyehe ta ndicha cha sehe ra Abraham cuvi chí ndo, sacuvi ndo cha sacuvi ra.

⁴⁰ Soco nyoho, vasi catyi chí ndo cha ndicha cha sañahá Nyoo chii, nyoho cuñi ndo cahñi ndo chii. ¡Ra Abraham ña sacuvi ra cha tyicuan caa!

⁴¹ Nyoho tari sacuvi sutu ndo, sacuvi ndo —catyi ra chí ra.

Tyicuan ta nacahan ra ta catyi ra:

—Nyuhu ñima sehe ndahvi ñu cuvi chí ndi. Iyó noo ri sutu ndi ta ican ra cuvi Nyoo —catyi ñu.

⁴² Tyicuan ta ra Jesús catyi ra:

—Tyehe ta ndicha cha Nyoo cuvi sutu ndo, nyoho cuñi ndo chii. Vatyi yuhu quite nu nyaá ra ta chaj nyehe. Ña vachi cuenda mai, soco Nyoo tachí chii.

⁴³ ¿Ñáa tuhun cha ña cutuñi iñi ndo tuhun cha catyi chí ndo? Cha cuenda tyi ña cuñi ndo tyasohó ndo tuhun cahín.

⁴⁴ Cuihna ican ra cuvi sutu ndo. Ta sehe ra cuvi chí ndo. Ta cuñi ndo sacuvi ndo cuhva cuñi ra. Ra cahñi ñayivi cuvi cuihna nyata quivi xihna ri. Ni noo chaha ña sacuvi ra cha ndicha. Ta ni noo chaha ña cahán ra cha ndicha. Cuhva cha cahán ra cuendu, cahán ra cuhva caá ra, vatyi cuendu ra. Ta sutu ñu cuendu cuvi chí ra.

⁴⁵ Ta yuhu vatyi cahín cha ndicha, ña chinó iñi ndo chii.

⁴⁶ ¿Nya noo nyoho cuvi catyi ndo vatyi yuhu iyó noo cuatyí? Ni noo ndo. Ta cha

tyicuan caa cahín cha ndicha, ¿ñáá tuhun cha ña chinó ñií ndo chii?

⁴⁷ Ñu cuenda Nyoo tyasohó ñu tuhun cahán Nyoo. Soco vatyi nyoho ñiima ñu cuenda Nyoo cuví ndo, yucuan chaha ña cuñí ndo tyasoho ndo tuhun cahín —catyí ra Jesús.

Ra Cristo, nyata nicumañi coo ra Abraham, ta cha iyó ra

⁴⁸ Tyicuan ta ra cacuvi nuu chi ñu Israel cacatyí ra chi ra:

—¿Atu ña ndicha vatyi yoho ra ñuu Samaria cuvún, ta ñohó noo tatyí ña vaha chuun? —cacatyí ra chi ra.

⁴⁹ Ta nacahan ra Jesús ta catyí ra:

—Ñahri tatyí ña vaha ñohó chi yuhu. Chi Suti sacahní. Ta nyoho cahán ña vaha ndo siqui.

⁵⁰ Yuhu ña nanduquí nu sacahnu ñáyivi chii, soco iyó noo ra nanducú cha sacahnu ñu chii. Ta maa ra cunyehe ra tatu sacahnú ndo chii.

⁵¹ Cha ndicha catyí vatyi ñu quichahá tuhun cahín ma chaa tuhun chihi añiima ñu —catyí ra Jesús chi ra.

⁵² Tyicuan ta ra Israel cuan canacahan ra ta catyí ra:

—Vityin chitó vaha ndi vatyi yihí noo tatyí ña vaha chuun. Vatyi ra Abraham ta tandihi ra cuví profeta Nyoo cachihí ra. Ta yoho catyún vatyi ñu quichahá tuhun cahún ma cúvi maa ñu.

⁵³ ¿Atu cahnu ca ra cuví yoho ican saha sutu ndi ra Abraham? Maa ra chihí ra ta ra cuví profeta Nyoo ñandihí. ¿Yóó ra cuví yoho cuñí maun? —catyí ra chi ra.

⁵⁴ Ta nacahan ra Jesús ta catyí ra:

—Tatu suri mai sacahní chii, ñahri maa vale cuan. Soco ra sacahnú chii, ican cuví Suti. Ta suri maa ra cuví cha catyí nyoho tyi Nyoo cuenda ndo cuví chi ra.

⁵⁵ Soco nyoho ña ñohó nuu ndo chi ra. Yuhu, ñohó nui chi ra. Ta tatu catyí tyi ña ñohó nui chi ra, cuví noo ra cuendu tari nyoho. Soco yuhu ndicha cha ñohó nui chi ra, ta quichahí tuhun cahán ra.

⁵⁶ Ra Abraham sutu chahnu ndo cusii xaan cuñí ra vatyi cunyehe ra quivi quichi yuhu siqui ñuhu ñáyivi. Ta nyehe ra ta cusii xaan cuñí ra —catyí ra Jesús chi ñu.

⁵⁷ Tyicuan ta ra Israel cuan cacatyí ra chi ra Jesús:

—Ni uvi xico uchi cuiya ta quita con, ta catyún tyi nyehun chi ra Abraham.

⁵⁸ Ta ra Jesús nacahan ra ta catyí ra:

—Cha ndicha catyí chi ndo vatyi nyata ni cumañi coo ra Abraham ta cha iyó yuhu —catyí ra Jesús chi ra.

⁵⁹ Tyicuan ta quehen ra yuu vatyi cañi ra chi ra Jesús. Soco maa ra quihvi xehe ra, ta

quita ra chichi vehe ñuhu cuan. Ta yahá ra mahñu ra ta cuahan ra.

9

Nu sanduvahá ra Jesús chi noo ra cha cuaa nyata cacu

¹ Cuhva cha yahá ra Jesús noo nu yahá ra, nyehe ra chi noo ra cha cuaa nyata cacu.

² Ta quichahá ndaca tuhun ra cachicá noo chihin ra Jesús chi ra:

—Maestro, ¿ñáá tuhun cha cacu cuaa ra ihya? ¿Atu cha cuenda cuatyí sihi ra ta sutu ra, o cha cuenda cuatyí maa ra? —cacatyí ra chi ra.

³ Ta ra Jesús nacahan ra ta catyí ra:

—Ñiima cuatyí maa ra, ta ni ñiima cuatyí sihi ra ta sutu ra. Soco cha cuenda vatyi cuví sañaha Nyoo tunyee ñií ra chihin ra.

⁴ Cha ni ri ca cha ñicahñu, cuñí chi cha sacuvi tyiño ra cha tachí chii. Vatyi vachi cha cuaa cha ma cuví ca saha tyiño yo.

⁵ Cha ni ri ca cha nyaí siqui ñuhu ñáyivi ihya, ñuhu ndichin cuenda ñáyivi iyó siqui ñuhu ñáyivi cuví.

⁶ Cha yahá cha catyí ra Jesús tuhun ihya, ta tyicu sii ra nu ñuhú. Ta savahá ra chiin nyahyu chihin sii ra ta tyaa ra chiti nuu ra cuaa cuan.

⁷ Tyicuan ta catyí ra chi ra:

—Cuahan cuanacatya nuun nya tanque Siloé cuan. —Sivi cuan cuñí chi catyí: “Tachí Chuun.”

Tyicuan caa ta ra cuaa cuan chahan ra chinacatya ra nuu ra. Ta kuhva cha nachaa ra, cha nyehe ra.

⁸ Tyicuan ta ñu nyicú yatyin yuvehe ra, ta ñu cha nyehe chi ra cha cucuaa ra ta caya ra, catyí ñu:

—¿Atu ñiima ra ihya cuví cha tuhva chinyaa chican caridaa? —catyí ñu.

⁹ Yihí ñu catyí ñu:

—Ican ra.

Inga ñu catyí ñu:

—Ñiima ra cuví ra, soco ndacú xaan ra chi ra.

Soco maa ra catyí ra:

—Ican yuhu cuví —catyí ra.

¹⁰ Tyicuan ta quichaha candaca tuhun ñu chi ra:

—¿Ta yoso caa cha cuví nyehun vityin? —catyí ñu.

¹¹ Ta catyí ra:

—Ra cha nañí Jesús cuan, ican savahá nyahyu ta tyaa ra chiti nui ta catyí ra chi: “Cuahan nya tanque Siloé ta nacatyon nuun.” Tyicuan ta chahin. Ta cha yahá nacatye nui ta nanyehi —catyí ra chi ñu.

¹² Tyicuan ta quichahá ndaca tuhun ñu chi ra:

—¿Nya nyaá ra cuan vityin?

Ta maa ra catyí ra:

—Ñá chité —catyí ra chi ñu.

Nu casanahmá ra cuví fariseo chi ra cha cucuaá ta nanyehé

¹³ Tyicuan ta chinyacá ñu chi ra cha cucuaá cuan nuu ra cuví fariseo.

¹⁴ Vatyí quiví cha savahá ra Jesús nyahyu ta sanduvahá ra chi ra cha cucuaá cuan, quiví nyitátú yo cuví.

¹⁵ Yucuan chaha ra fariseo candaca tuhun tucu ra chi ra yoso caa cha vatyí nanyehé ra. Ta maa ra catyí ra:

—Tyaá ra nyahyu chiti nui, ta nacatyé ta vityin ndichin nyehí —catyí ra chi ra.

¹⁶ Tyicuan ta suhva ra fariseo cacatyí ra: —Ra cha sacuví tyehe caa ñima ra cuenda Nyoo cuví ra, vatyí ña sahá ra ñáyiví quiví nyitátú yo —cacatyí ra.

Soco inga ra cacatyí ra:

—¿Yoso caa cha cuví sacuvi ra milagru ihya tatu ra iyó cuatyí cuví ra? —catyí ra.

Ta siin siin cha cacahan ra. Ta cacusiin ra.

¹⁷ Ta candacá tuhun tucu ra inga chaha chi ra cha cucuaá cuan, ta catyí ra chi ra:

—¿Ta yoho, ñáá catyún cuenda ra cha sanduvahá chiti nuun? —catyí ra.

Ta nacahan ra ta catyí ra:

—Yuhu catyí vatyí noo profeta cuenda Nyoo cuví ra —catyí ra.

¹⁸ Soco ra cacuví nuu chi ñu Israel ña cuñi ra chino iñi ra cha cucuaá ra cuan ta vityin nyehé ra. Ta nyacua nya cha cacana ra chi sihi ra ta chi sutu ra cha nduvahá cuan.

¹⁹ Ta candacá tuhun ra chi ñu, ta catyí ra:

—¿Atu ican ra ihya cha cuví sehe ndo cha catyí ndo tyi cuaá ra ta cacú ra? ¿Yoso caa cha cuví nyehé ra vityin? —catyí ra.

²⁰ Ta nacahan sutu ra ta sihi ra ta catyí ñu: —Chitó ndi vatyí ican ra ihya cuví sehe ndi. Ta cuaá ra nyata cacú ra.

²¹ Soco ña chitó ndi ñáá tuhun cha cuví nyehé ra vityin. Ta ni ña chitó ndi yóo cha sanduvahá chiti nuu ra. Ndáca tuhun ndo chi maa ra. Cha iyó cuiya ra. Ta cuví nacatyí maa ra chi ndo —catyí ñu chi ra.

²² Sutú ra sihi ra catyí ñu tyehe caa cha cuenda cha yuhví ñu chi ra cacuví nuu chi ñu Israel, vatyí cha catyihí tahan ra tuhun vatyí cutava ñehé ra chi ñu vehe ñuhu, yóo rí ñu cha catyí vatyí ra Jesús cuví Cristo.

²³ Yucuan chaha catyí ñu: “Cha ñihi ra. Ndáca tuhun ndo chi maa ra.”

²⁴ Tyicuan ta canacana tucu ra chi ra cha cucuaá cuan inga chaha. Ta cacatyí ra chi ra:

—Chihin nuu Nyoo catyí cha ndicha chi ndi. Vatyí nyuhu chitó ndi tyi rayi cuan, ra iyó cuatyí cuví ra —cacatyí ra.

²⁵ Tyicuan ta nacahan ra cha cucuaá cuan ta catyí ra:

—Yuhu ña chité tatu ra iyó cuatyí cuví ra, o ñima. Soco noo ri cha chité vatyí yuhu cucuaá, ta vityin ndichin nyehí —catyí ra.

²⁶ Ta candaca tuhun tucu ra chi ra inga chaha ta catyí ra:

—¿Ñáá cha sacuví ra chuun? ¿Yoso caa sacuví ra ta nanyehún? —cacatyí ra chi ra.

²⁷ Ta catyí ra:

—Cha catyí chi ndo, ta ña quichahá ndo chii. ¿Ñáá tuhun cha cuñi ndo cha catyí inga chaha? ¿Atu cuñi tucu nyoho cunyicon ndo chi ra?

²⁸ Tyicuan ta cacahan ra chi ra, ta catyí ra:

—Yoho yihún cuenda ra, soco nyuhu cuenda ra Moisés yihí ndi.

²⁹ Nyuhu chitó ndi tyi Nyoo cahan chihin ra Moisés. Soco ra cuan, ña chitó ndi nya quitá ra —cacatyí ra.

³⁰ Tyicuan ta nacahan ra cucuaá cuan ta catyí ra:

—¿Ñana vaha cha cuví ihya! Nyoho ña chitó ndo nya quitá ra, ta chi yuhu sananyehé ra.

³¹ Chitó vaha yo vatyí Nyoo ña tyasohó ra nu chicán ra iyó cuatyí. Soco ra cha sacahnú chi ra ta sacuví cuhva cuñi ra, tyasohó Nyoo nu chicán ra cuan.

³² Ni noo chaha ta cuiñi ca yo vatyí iyó noo ra sananyehé chi noo ra cuaá nyata cacú.

³³ Tyehe ta ra ihya ta ñima cuenda Nyoo vachí ra, ñahri cha cuví sacuvi ra —catyí ra chi ra.

³⁴ Tyicuan ta cacatyí ra chi ra:

—Yoho ra iyó cuatyí cuvún nyata cacún. ¿Ta cuñún sañahun chi nyuhu? —cacatyí ra. Ta catava ñehé ra chi ra vehe ñuhu.

Ñu cha ñahri tuhun Nyoo caa añima tari cha cuaa ñu

³⁵ Ra Jesús chitó ra vatyí catava ñehé ra chi ra cucuaá cuan vehe ñuhu. Ta cuhva cha nañihí ra chi ra ta catyí ra chi ra:

—¿Atu chinó iñi yoho chi Rayi cha quichi nya gloria? —catyí ra chi ra.

³⁶ Ta nacahan ra ta catyí ra:

—Tata, catyí chii, yóo ra cuví ra vatyí chino iñi chi ra —catyí ra chi ra.

³⁷ Ta ra Jesús catyí ra:

—Cha nyehun chi ra. Ta ican ra ndatuhún chuun —catyí ra chi ra.

³⁸ Tyicuan ta chicuiñi chiti ra chaha ra Jesús ta catyí ra chi ra:

—Chinó iñi chuun, Sutú Mañi yuhu —catyí ra chi ra Jesús.

³⁹ Ta ra Jesús catyí ra:

—Yuhu vachí vatyí catyí cha caá añima ñáyiví iyó siqui ñuhu ñáyiví ihya. Vatyí ñu cuaa, ñu ña chitó tuhun Nyoo cunanyehé ñu vatyí cucava tuhun Nyoo añima ñu. Ta ñu cuñi maa tyi ndichin nyehé tyi catyí ñu

tyi chitó ñu tuhun Nyoo, coto ñu tyi cuaa ñu tyi ña chinó iñi ñu chii —catyí ra Jesús.

⁴⁰ Tyicuan ta suhva ra cuví fariseo cha nyicú yucuan chiñi ra cha cahān ra Jesús, ta catyí ra chi ra:

—¿Atu cuaa tucu nyuhu ñandihí? —catyí ra.

⁴¹ Tyicuan ta catyí ra Jesús chi ra:

—Tyehe ta cuaa nyoho, nicohón nuu ndo tyi chiñuhó tuhun Nyoo chi ndo, ta ma coo cuatyí ndo. Soco vatyi catyí ndo tyi nyehé ndo ta chitó ndo, yucuan chaha ndoó cuatyí siqui ndo —catyí ra chi ra.

10

Mbee sana Nyoo cuví ñáyivi yihí cuenda ra, ta ñohó nuu ñu chi ra cha tachí Nyoo vatyi sahá cumi ra chi ñu

¹ Cahán ca ra Jesús ta catyí ra:

—Cha ndicha catyí chi ndo, tatu noo ra cuaquihvi chichi noo chacu mbee, ta cha nuu cha quihví ra yuhu chacu, quihví ra inga ityi, ra suhu cuví ra.

² Soco ra quihví ityi yuhu chacu, ra sahá cumi mbee cuan cuví ra.

³ Ra nyaá yuhu chacu cuan nuña ra na quihví ra sahá cumi mbee cuan. Ta mbee cuan nicohón soho ti ndusu ra. Noo noo ti ta iyó sivi ti sahá ra, ta cana ra chi ti ta tava ra chi ti ityi chata chacu.

⁴ Ta cha yahā tava ra chi ti, ta cuahan ra ityi nuu ti ta nyicón ti chi ra, vatyi nicohón soho ti ndusu ra.

⁵ Soco tatu ña ñohó soho ti ndusu ra, chinó ti chi ra ta ma cunyicon ti chi ra.

⁶ Tyehe caa tuhun cahān ra Jesús chihin ñu. Soco maa ñu ña cutuñi iñi ñu ñáá tuhun cuñi ra cahán ra cha tyicuan caa.

Ra Jesús cuví ra sahá cumi vaha mbee

⁷ Tyicuan ta catyí ra Jesús inga chaha chi ñu:

—Cha ndicha catyí chi ndo vatyi yuhu cuví tari noo yuhu chacu nu quihví coyo ñáyivi cuende cha cuví ñu tari mbee sane.

⁸ Tandihí ra cha yahā caquichí coyo, ra suhu cacuví ra. Soco mbee ña quichahā ti cha cacahān ra.

⁹ Yuhu cuví yuvehe gloria. Ñu quihví cuende, cacū ñu cha ma kuhun ñu anyaya. Ta cuví ñu tari noo mbee cha quihví ta quitá chichi chacu cuan. Ta ñihí ti huhu cachi ti.

¹⁰ Noo ra suhu vachí ra, soco vachí suhu ra, vachí cahñi ra, vachí sativi ra. Soco yuhu vachí vatyi coo ndo noo ñáyivi chaa cha ma naa ca maa.

¹¹ Yuhu cuví noo ra vaha sahá cumi mbee. Vatyi ra sahá cumi mbee chahá ra ñáyivi ra cuenda sana ra.

¹² Soco ra cuví musu, tatu nyehé ra vachí lobo cha cuví noo quití xaan, sandoo maa ra chi mbee sana chitoho ra. Ta chinó ra. Vatyi ñima sana maa ra cuví ti. Tyicuan ta tñin quití xaan chi mbee cuan. Ta saquicono ti chi ti ityi cuan ityi ihya.

¹³ Musu cuan chino ra cha cuenda vatyi cha cuenda xuhun ri sahá tyiño ra. Ta ñahri cuenda ra chi mbee, tyi ñima sana ra cuví.

¹⁴ Yuhu cuví ra sahá cumi vaha mbee sane. Ta ñohó nui chi ti. Ta maa ti ñohó nuu ti chii,

¹⁵ tari ñohó nuu Suti chii, ta yuhu ñohó nui chi ra. Yuhu chahí ñáyivi cuenda mbee sane.

¹⁶ Iyó tucu inga mbee sane cha ñima chichi chacu ihya iyó ti. Cuñi chi cha chuhin cunaquehin chi ti. Ta cuquichaha ti chii. Ta coo noo ri nu quihí tandihí ti. Ta noo ri ra sahá cumi chi ti cucoo.

¹⁷ Suti cuñi ra chii vatyi chahí ñáyivi cha catyí ñáyivi cuende. Soco yaha cuan, nacuhva tucu ra ñáyivi inga chaha.

¹⁸ Yori tinyaá ñáyivi, soco cha iyó vaha iñi mai ta chahí. Iyó ityi chii cha cuhve ñáyivi ta cúvi, ta iyó tucu ityi chii cha naquehin tiqui inga chaha vatyi cunandote. Ican ihya cuví tyiño cha tyaq Suti chii —catyí ra Jesús.

¹⁹ Cha cachiñi tucu ra cacuví nuu chi ñu Israel tuhun cha cahán ra Jesús ihya, cacusiñ tucu ra chihin tahan ra inga chaha.

²⁰ Ta cuaha xaan ra catyí ra:

—¿Ñáá tuhun cha quichaha ndo chi ra chiña? Ta yihí noo tatyí ña vaha chi ra, ta loco ra —cacatyí ra.

²¹ Ta inga ra catyí ra:

—Yori ñu ñohó tatyí ña vaha chi cahán tyehe caa. ¿Atu cuví sananyehe noo tatyí ña vaha chi noo ra cuaa? —catyí ra.

Nu ña cuñi ra cacuví nuu chi ñu Israel chi ra Jesús

²² Nya ñuu Jerusalén yoo vichin cuví. Ta sanducahnú ñu noo vico quivi nanduchin cuiya cha suññi ñu vehe ñuhu cahnú cuan.

²³ Ta ra Jesús chicá noo ra vehe ñuhu cuan ityi corredor ra Salomón.

²⁴ Ta ra cacuví nuu chi ñu Israel cachiuitayucú cutya ra nuu ra. Ta quichahā ndaca tuhun ra chi ra:

—¿Ama catyí cachun chi ndi tatu icon cuví Cristo? ingaña ri catyí cachi chi ndi.

²⁵ Ta ra Jesús catyí ra:

—Cha yahā catyí chi ndo, ta ña chinó iñi ndo chii. Tyiño sacuví nuu Suti ican cuví cha ndaa cuende.

²⁶ Soco nyoho ña chinó iñi ndo chii vatyi ñima mbee sane cuví chi ndo. Tari cuhva catyí chi ndo ndaa ri.

²⁷ Mbee sane nicohón soho ti ndusi, ta yuhu ñohó nui chi ti. Ta maa ti nyicón ti chii.

²⁸ Yuhu chahi ñayivi cha ma naa ca maa coo ti. Ta ma cunaa ti. Ta ni yori maa cuví tinyaa chi ti chichi ndahi.

²⁹ Maa Suti chaha chi ti chii. Ta cahnu ca cuví maa ra ican saha tandihi ca. Ta yori cuví tinyaa chi ti chichi ndaha ra.

³⁰ Yuhu ta Suti Nyoo, noo ri cuví ndi —catyí ra Jesús.

³¹ Tyicuan ta ra cacuví nuu chi ñu Israel cuan caquehen tucu ra yuu vatyi tuchi ra chi ra.

³² Ta ra Jesús catyí ra chi ra:

—Cuaha xaan cha vaha sacuvi yuhu nuu ndo chihin tunyee iñi Suti. ¿Ta nya cuenda cuan cua tuchi ndo yuu chii? —catyí ra Jesús chi ra.

³³ Ta ra cacuví nuu chi ñu Israel cuan cacatyí ra:

—Ñima cha cuenda noo cha vaha sacuvun cutuchi ndi yuu chuun, soco cha cuenda vatyi yahun nuu Nyoo chihin tuhun cahún. Noo rayi ri cuvún, soco sahún tari Nyoo chuun —cacatyí ra chi ra.

³⁴ Tatu ña sacuví cha sacuví ra Jesús chi ra:

—Nu tutu tuhun Nyoo nyaá vatyi Nyoo catyí ra: “Nyoho cuví ndo nyoo”, catyí Nyoo.

³⁵ Chitó yo vatyi cha cahán tuhun Nyoo, ma cuví catyí yo tyi ña ndicha. Ta Nyoo sacunañi ra nyoo chi ñu naquehen tuhun cahán ra.

³⁶ Ta tatu maa Nyoo nacachi chi yuhu ta tachi ra chii siqui ñuhu ñayivi ihya ¿yoso caa catyí nyoho vatyi yahá yuhu nuu Nyoo nu catyí tyi Sehe Nyoo cuví chii?

³⁷ Tatu ña sacuví cha sacuví Suti, ma chino iñi ndo chii.

³⁸ Soco tatu sacuví, vasi ma chino iñi ndo chii, soco chino iñi ndo tyiño sacuví.

Tyicuan ta cucoto cachi ndo vatyi Nyoo Suti ñn ri cuví ra chihin. Ta yuhu ñn ri cuví chihin Nyoo Suti —catyí ra Jesús.

³⁹ Inga tucu chaha cacuñi ra catyihí ra chi ra vehe caa, soco ra Jesús cuahan ri ra.

⁴⁰ Tyicuan ta cuanuhú ra ityi nu caña ñanyii inga chiyo yuvi cahnu Jordán cuan nu sacondutyá ra Juan ta xihna ri.

⁴¹ Cuaha ñayivi chahan chinyehe chi ra, ta catyí ñu:

—Ndicha, vasi ni noo milagru ña sacuvi ra Juan, soco tandihi tuhun cha cahan ra cuenda ra ihya ta ndicha —catyí ñu.

⁴² Ta cuaha xaan ñu cachino iñi ñu chi ra Jesús ityi cuan.

11

Nu chihí ra Lázaro

¹ Iyó noo ra cuhví cha nañi Lázaro ñuu Betania nu cuví ñuu cu María ta cu Marta cuhu ña.

² Ta cu María, cuhva ra Lázaro cuan ican ña cuví ñaha cha choso ndutya vixi chahán chaha Sutu Mañi yo, ta chihin ixi xiñi ña nacuhva ña.

³ Ta tyicuan caa ñinduvi tahan ñu, cu María chihin cuhu ña, tachi ñu tyiño na cucatyí ra chi ra Jesús tyehe caa;

—Sutu Mañi ndi, amigon cuhví ra —catyí ñu, tachi ñu tyiño.

⁴ Ta cha chiñi ra Jesús tuhun ihya ta catyí ra:

—Cuehe cuan ma cahni chi chi ra. Cuhví ra tyehe caa tacuhva vatyi quivi nduvaha ra cunyehe ñayivi tyi cahnu xaan ca ra cuví Nyoo ta tyicuan caa tucu Sehe ra —catyí ra Jesús tuhun maa ra.

⁵ Cuñi vavaha ra Jesús chi cu Marta ta chi cuhu ña, ta chi cuhva ña, ra Lázaro.

⁶ Soco cuhva cha catyí ñu chi ra tyi cuhví ra Lázaro, ndoq ra nu ñohó ra uvi ca quivi.

⁷ Tyicuan ta catyí ra chi ra cachicá noo chihin ra:

—Coho ndo inga chaha nya Judea —catyí ra.

⁸ Tyicuan ta ra cachicá noo chihin ra cacatyí ra chi ra:

—Maestro, ta cunaha ca cha cuñi ra cacuví nuu chi ñu Israel cahni ra chuun chihin yuu. Ta vityin, ¿inga chaha cuñin cuhan yucuan? ¿Ñáá tuhun?

⁹ Ta catyí ra Jesús:

—¿Atu ñima uchi uvi hora iyó noo quivi? Vatyi tatu cha ñicahñu chicá noo noo ra, ma nduva ra vatyi ndichin nyehé ra ta sacuví ra tyiño nuu Nyoo.

¹⁰ Soco tatu cha cha cuaa chicá noo ra, nduva ra vatyi ñahri ñuhu.

¹¹ Tyicuan ta quichaha catyí tucu ra Jesús:

—Amigo yo, ra Lázaro quixí ra. Soco cuhin cusandoye chi ra —catyí ra chi ra.

¹² Tyicuan ta catyí tucu ra cachicá noo chihin ra:

—Tata, tatu quixí ra, cuñi chi catyí vatyi cuanduvaha ra —cacatyí ra.

¹³ Soco ra Jesús cuñi ra catyí ra vatyi cha chihí ra Lázaro. Ta ra cachicá noo chihin ra, cuñi maa ra vatyi cha ndicha quixí ra cuan.

¹⁴ Tyicuan ta catyí cachi ra Jesús chi ra:

—Ra Lázaro cha chihí ra.

¹⁵ Ta cusii cuñi vatyi yori chinyaa yucuan. Vatyi tyicuan caa vaha ca cha cuenda nyoho, tacuhva chino iñi ndo chii. Coho ndo cunyehe ndo chi ra —catyí ra chi ra.

¹⁶ Tyicuan ta ra Tomás, cha catyí ñu: “ra tinihi cuan”, catyí ra chi inga ra cachicá noo chihin ra Jesús:

—Coho tucu yo vatyi cúvi yo ñn ri chihin ra —catyí ra.

Ra Jesús cuví ra sanandotó chi yo ta chahá ra ñáyivi coo yo

¹⁷ Cha chaq ra Jesús Betania, ñihí ra tuhun vatyi ra Lázaro cha cumi quivi ñohó ra chichi ñuhú.

¹⁸ Ñuu Betania cuan nyaá chi yatyin ri nu nyaá ñuu Jerusalén, tari noo uvi kilómetro sisava.

¹⁹ Ta cuaha ra cacuví nuu chi ñu Israel cuahan ra cuanyehe ra nu nyaá cu Marta ta cu María vatyi chihí cuhva ñu.

²⁰ Ta ñihí cu Marta tuhun vatyi cha cuachaa ra Jesús. Ta cuahan ña cuasatahan ña chi ra. Soco cu María ndoo ña vehe.

²¹ Ta cu Marta catyí ña chi ra Jesús:
—Sutu mañi yuhu, tyehe ta nyaun ihya, ma cúvi cuhve.

²² Soco yuhu chité vatyi Nyoo cusacuvi ra tandihí cha cacon chi ra —catyí ña chi ra.

²³ Ta ra Jesús catyí ra chi ña:

—Cuhvon cunandoto ra.

²⁴ Ta cu Marta catyí ña:

—Ndicha, chité vatyi cunandoto ra quivi nandoto ndiyi nu cuandihí quivi —catyí ña.

²⁵ Tyicuan ta catyí ra Jesús chi ña:

—Yuhu cuví ra sanandotó chi ndiyi. Ta chahí cha conyito ñáyivi. Ñu chinó ñi chii, vasi cha chihí ñu soco coo tucu ñu.

²⁶ Ta tandihí ñu nyitó ca ta chinó ñi ñu chii, ma cúvi maa ñu. ¿Atu chinó ñiun tuhun ihya? —catyí ra chi ña.

²⁷ Ta maa ña catyí ña:

—Chinó ñi, Sutu Mañi yuhu, vatyi yoho cuvún Cristo Sehe Nyoo, ra cha nyaá cha quichi siqui ñuhu ñáyivi ihya —catyí ña.

Nu chacu ra Jesús nu ñaña ra Lázaro

²⁸ Cha yaha cha catyí cu Marta tuhun ihya, ta chahan ña chíquehen ña chi cuhu ña, cu María, ta catyí xehe ña chi ña:

—Cha chaq Ra Sacuaha. Ta tachí ra tyiño nacuhun nu nyaá ra —catyí ña.

²⁹ Ta cha chiní cu María tuhun ihya, nducuitá ri ña, ta cuahan ña nu nyaá ra Jesús,

³⁰ Ta ra Jesús ta quihvi ca ra chichi ñuu cuhva cuan, nyaá ra nu nañihí cu Marta chi ra.

³¹ Ta nya vehe cu María, nyicú ra cacuví nuu chi ñu Israel tyinyeé ra chi ñu. Ta nyehe ra vatyi numi ri quitá ña. Ta cuñi maa ra tyi cuahan ña nu ñaña cuacuacu ña. Ta cuahan coyo ra chata ña.

³² Ta cuhva cha chaq cu María nu nyaá ra Jesús chicuñi chiti ña chaha ra, ta catyí ña:

—Sutu Mañi yuhu, tyehe ta chinaun ihya, cuhve ma cúvi ra —catyí ña.

³³ Nyehe ra Jesús cha chacú cu María chihin ra Israel cha vachi coyo chihin ña, ta nducuihya xaan cuñi añima ra.

³⁴ Ta ndacaq tuhun ra chi ñu:

—¿Nya maa maa tyihí ndo chi ra? —catyí ra.

Ta catyí ñu:

—Tata, coho ta nyehun —catyí ñu chi ra.

³⁵ Ta ra Jesús chacu ra.

³⁶ Tyicuan ta catyí ra Israel cuan:

—Nyehe ndo yoso cha cuñi ra chi ra —catyí ra.

³⁷ Soco suhva ñu catyí ñu:

—Ican ra ihya cha sananyehe chi ra cuaa cuan. ¿Atu ña cuví sanduvaha tucu ra chi ra Lázaro ihya? —catyí ñu.

Nu sanandotó ra Jesús chi ra Lázaro

³⁸ Nducuihya cuñi ra Jesús inga chaha ta tuhva ra nu ñaña cuan. Noo chichi yuu cuví. Ta nyasi noo yuu yuhu chi.

³⁹ Ta catyí ra Jesús:

—Sacyanya ndo yuu chiña —catyí ra.

Ta cu Marta, cuhva ndiyi cuan, catyí ña:

—Soco cha caña xico, Sutu Mañi yuhu, vatyi cha cumi quivi cha chihí ra —catyí ña.

⁴⁰ Soco ra Jesús catyí ra chi ña:

—¿Atu ña cha catyí chuun vatyi tatu chinó ñiun, cunyehe yoso cha cahnu cuví Nyoo? —catyí ra chi ña.

⁴¹ Tyicuan ta sacanyaha ñu yuu cuan. Ta ra Jesús nanyehe ndaa ra ityi andivi, ta catyí ra:

—Sutu Mañi yuhu, tyahvi nyoo chuun tyi chinun cha cahín.

⁴² Yuhu chité vatyi tyicuan ri chinún tuhun cahín. Soco tyehe caa cahín cha cuenda cha vaha chi ñáyivi nyicú ihya, tacuhva nachino ñi tyi yoho tachí chii —catyí ra Jesús chi Nyoo.

⁴³ Cha yaha cha catyí ra tuhun ihya, canachaq ra, ta catyí ra:

—¡Lázaro, quita chiña!

⁴⁴ Ta quitá ra cha chihí cuan, nuñi ndaha ra ta nuñi chaha ra chihin sahma. Ta nuñi nuu ra chihin noo sahma. Ta ra Jesús catyí ra chi ñáyivi nyicú yucuan:

—Ndachi ndo chi ra. Ta saña ndo chi ra nacuhun ra —catyí ra Jesús chi ñu.

Nu nducú cahni ñu chi ra Jesús

(Mt. 26.1-5; Mr. 14.1-2; Lc. 22.1-2)

⁴⁵ Ta cuaha xaan ra cacuví nuu chi ñu Israel cha chahan coyo chihin cu María nachino ñi ñu cha nyehe ñu cha sacuvi ra Jesús.

⁴⁶ Soco suhva ra chahan ra chisacoto ra chi ra fariseo cha sacuvi ra Jesús.

⁴⁷ Tyicuan ta ra fariseo ta ra cacuví nuu chi tata sutu sacoo ra noo junta ta cacatyí ra:

—¿Ñáa cha sacuvi yo? Vatyi cuaha xaan milagru sacuvi ra cuan.

⁴⁸ Tatu cuhva yo cha sacuvi ca ra tyicuan caa, tandihí ñáyivi cuchino ñi ñu chi ra. Ta ra cacuví tyiño nya ñuu Roma cuquichi ra

ta cusatani ra vehe ñuhu yo ta ñuu yo
—catyí ra chi ra tahan ra.

⁴⁹ Soco ra cuví nuu cahnu ca chi tata sutu
cuiya cuan, ra nañi Caifás cahñ ra ta catyí
ra chi ra:

—Nyoho ñahri maa cha chító ndo.

⁵⁰ Ni ña cutuñi iñi ndo vatyi vaha ca cha
cúvi noo ri rayi cha cuenda tandihi ñáyivi
ñuu, ta ñima ca cha cúvi tandihi yo —catyí ra
Caifás.

⁵¹ Soco ra Caifás cuan ñima cha cuñi maa
ra ta cahán ra, soco vatyi ra cuví nuu cahnu
ca chi tata sutu cuiya cuan cuví ra, yucuan
chaha maa Nyoo sacahñ chi ra. Vatyi catyí
ra vatyi ra Jesús cucúvi ra cha cuenda
tandihi ñáyivi ñuu Israel.

⁵² Ta ñima cha cuenda ri ñu cuan, soco
vatyi cusandu iñi ra chi tandihi ñu cuví
sehe Nyoo cha iyó inga ñuu ñandihí.

⁵³ Yucuan ta nyacua nya quívi cuan ta ra
cacuví nuu chi ñu Israel cuan, nducu ra
cuhva yoso caa cahñi ra chi ra Jesús.

⁵⁴ Yucuan chaha tyi ra Jesús ña chicá noo
ndichin ca ra nu nyicú ñu Israel. Ta quita
ra ityi Judea cuan. Ta cuahan ra noo ñuu
cha nañi Efraín cha nyaá yatyin ri ñuhu ityi.
Ta yucuan ndoó ra chihin ra cachicá noo
chihin ra.

⁵⁵ Na cuaha ri ca quívi ta chaá vico
cuenda ñu Israel, vico cha nañi pascua. Ta
cuaha xaan ñáyivi quita ñu ñuu ñu ta
cuahan ñu Jerusalén cuasacuvi ñu cha
tuhvá maa ñu sacuví cha sandundí ñu chi
ñu nuu Nyoo cha ni cumañi ca cha quívi
vico cuan.

⁵⁶ Nanducú ñu chi ra Jesús. Ta cuhva cha
nyicú ñu chichi vehe ñuhu cahnu cuan ta
ndacá tuhun ñu chi tahan ñu, ta catyí ñu:

—¿Yoso caa cuñi nyoho? ¿Atu cuquichi ra
vico ihya, o ma quichi ra? —catyí ñu chi
tahan ñu.

⁵⁷ Ta ra cacuví fariseo ta ra cacuví nuu
chi tata sutu, catyí ra vatyi tatu nya noo ñu
chító ñu nya nyaá ra Jesús, nacatyí ñu. Vatyi
cutiñ ra chi ra vatyi cohon ra vehe caa.

12

*Nu chosó cu María ndutya vixi chahán
chaha ra Jesús*
(Mt. 26.6-13; Mr. 14.3-9)

¹ Cumañi iñu ca quívi cha cuatahan chi
vico pascua, ta chaá ra Jesús ñuu Betania nu
iyó ra Lázaro, ra cha sanandotó ra Jesús chi.

² Yucuan savahá ñu cha cuxiñi ra Jesús.
Cu Marta tyihí ña coho nu mesa. Ta
chicunyaá ra Jesús nu mesa. Ta nyaá tucu
ra Lázaro chihin ra.

³ Tyicuan ta cu María quehen ña ta cha
sava litro ndutya vixi chahán cha chinq
chihin maa ri nardo, noo cha yahvi xaan
nyaá. Ta cuhví ña chaha ra Jesús chihin

ndutya vixi chahán cuan. Yahá cuan ta
sana ityi ña chihin ixi xiñi ña. Tandihí
chichi vehe cuan chitú chihin xico ndutya
vixi chahán cuan.

⁴ Ta yucuan nyaá tucu ra Judas Iscariote,
sehe ra Simón. Cuví ra noo ra chicá noo
chihin ra Jesús. Ta suri maa ra cuví ra cha
naxico tuhun chi ra Jesús nuu ra xaan iñi
chi ra. Ta quichaha catyí ra Judas cuan chi
ñu cuan:

⁵ —¿Ñáa tuhun ña xico ndo ndutya vixi
chahán ihya chi ñáyivi, cuhva ñu cuenda
mil chi ndo chihin, ta tyinyee ndo chi ñu
ndahvi? —catyí ra.

⁶ Soco ra Judas ña catyí ra tuhun ihya cha
cuenda cha ndahvi cuñi ra nyehe ra chi ñu
ndahvi, soco vatyi ra suhu cuví ra. Ta vatyi
ndaha maa ra nyaá yitin xuhun ta tuhvá ra
suhu ra cha tyihí ñu chichi yitin cuan.

⁷ Tyicuan ta catyí ra Jesús chi ra:

—Saña chi ña, vatyi ñaha ihya sacuví ña
tyehe caa cha cuenda cha cuquihvi coño
ñuhí chichi ñuhu.

⁸ Ñu ndahvi tyicuan ri cu cunyicú ñu
chihin ndo, soco yuhu ña tyicuan ri —catyí
ra Jesús chi ra Judas cuan.

Nu nducu cahñi ra chi ra Lázaro

⁹ Cuaha xaan ñu Israel ñihí ñu tuhun tyi
ra Jesús ñohó ra Betania, ta chahñ coyo ñu
nyicuan. Ñima cha cuñi ñu nyehe ñu chi ra
Jesús ri, soco cuñi tucu ñu nyehe ñu chi ra
Lázaro, ra cha sanandotó ra Jesús chi.

¹⁰ Tyicuan ta ra cacuví nuu chi tata sutu
catyihí tahan ra tuhun vatyi cucahñi tucu
ra chi ra Lázaro ñandihí.

¹¹ Vatyi cha cuenda ra ta cuaha xaan ñu
Israel cacusñ ñu chihin ra ta nachino iñi
ñu chi ra Jesús.

Nu quihvi ra Jesús ñuu Jerusalén
(Mt. 21.1-11; Mr. 11.1-11; Lc. 19.28-40)

¹² Cuaha xaan ñáyivi cuahan ñu
Jerusalén cha vico pascua. Ta cha inga
quívi cachitó ñu tyi ra Jesús cuachaa ra.

¹³ Tyicuan ta chahnyá ñu ndaha
tunducaha ta cuahan coyo ñu cuasatahan
ñu chi ra Jesús. Ta canachaa ñu, ta catyí ñu:
—¡Cahnu xaan ca cuví maa Nyoo! ¡Nasoco
xaan Nyoo chi ra vachi ihya chihin tunyee
iñi Nyoo! ¡Nasoco xaan Nyoo chi Rey cuenda
yo ñu Israel! —cacatyí ñu, canachaa ñu.

¹⁴ Ta ra Jesús ñihí ra noo burru ta chicosó
ra chi ti tari cuhva catyí maa nu tutu Nyoo
tyehe caa:

¹⁵ Ma yuhvi ndo ñáyivi ñuu Sión
Nyehe ndo, vachi Rey ndo.
Yosó ra noo burru —catyí chi nu tutu Nyoo.

¹⁶ Quívi cuan ra cachicá noo chihin ra
Jesús, ña cacutuñi iñi ra tuhun cuan cha
nyaá nu tutu Nyoo. Soco cha yahá cuanuhu
ra Jesús gloria, canicohon iñi ra vatyi
tandihí tuhun cuan ta nyaá nu tutu Nyoo

tyi tyicuan caa cucuvi chi ra. Ta tyicuan caa cuví chi ra.

¹⁷ Ta ñáyivi cha nyehe quivi cha cana ra Jesús chi ra Lázaro chichi ñaña, quivi sanandoto ra chi ra, nacatyí ñu cha nyehe ñu.

¹⁸ Ta yucuan chaha cuaha xaan ñáyivi chisatahan ñu chi ra Jesús, vatyí chito ñu milagru cha sacuvi ra.

¹⁹ Tyicuan ta ra cuví fariseo cacatyí ra chi ra tahan ra:

—Cha nyehé maa ndo tyi ñahri maa cuví sacuvi yo, vatyí tandihi ñáyivi nyicón chi ra —cacatyí ra.

Nu nducú suhva ra ñuu Grecia chi ra Jesús

²⁰ Ñohó tucu suhva ra ñuu Grecia mahñu ñáyivi cha chahan coyo chisacahnu vico ñuu Jerusalén cuan.

²¹ Tyicuan ta catuhva ra ñuu Grecia cuan nu nyaá ra Felipe, ra ñuu Betsaida nu cuví Galilea, ta cachacu ndahvi ra nuu ra ta cacatyí ra:

—Tata, cuñí ndi cahan ndi chihin ra Jesús —cacatyí ra.

²² Ta ra Felipe chahan ra chicatyí ra chi ra Andrés. Ta ninduvi ra chinacatyí ra chi ra Jesús vatyí ra Grecia cuan cuñí ra cahan ra chihin ra.

²³ Ta nacahan ra Jesús, ta catyí ra:

—Chaa cuhva vityin vatyí yuhu cha cuví Rayíi cha quichi nya gloria, cuananuhu tiqúi nya gloria, ta cusacahnu Suti chii.

²⁴ Cha ndicha catyí chi ndo vatyí tatu noo chiti ta ma quíhi chichi ñuhú ta ma tyahyu chi, noo ri chiti cucuvi chi tyicuan ri maa. Soco tatu tyahyu chi, nduchaa chi inga chaha ta coo cuaha ca chiti chi.

²⁵ Ñu cuñí xaan ñáyivi iyó ñu, cucunaa ñu. Soco ñu ña cuñí ñáyivi ñuhu ñáyivi ihya, cunañihi ñu noo ñáyivi cha ma naa ca maa cucoo ñu.

²⁶ Tatu yihí ndo cuñí ndo sacuvi ndo tyiño nuí, cunyicon ndo chii. Ta nu cuacunyai, yucuan cucunya tucu ñu sacuvi tyiño nuí. Tatu nya nyoho sacuvi ndo tyiño nuí, Suti cusacahnu ra chi ndo.

Nu cahan ra Jesús tuhun yoso caa cucuvi ra

²⁷ Vityin chicá xaan xiñi. Ta ñáa cha cacatyí? ¿Atu catyí chi Suti na sacanyaha ra tindoho cha nyaá cunyehe vityin? Ma catyí cha tyicuan caa vatyí cha cuenda cuan vachi siqui ñuhu ñáyivi ihya.

²⁸ Vaha ca catyí chi Suti: “Sutu Mañi yuhu, sacahnu sivun” —catyí ra Jesús.

Tyicuan ta cahan noo ndusu ityi andivi ta catyí chi tyehe caa:

—Cha yaha sacahni sivi, ta cusacahni inga chaha —catyí ndusu cuan.

²⁹ Ta ñu nyicú yucuan, chiñí ñu ndusu cuan, ta catyí ñu vatyí savi cahan. Ta inga ñu catyí ñu:

—Noo ángel cahan chihin ra.

³⁰ Tyicuan ta ra Jesús catyí ra chi ñu:

—Ñima cha cuenda cha vaha chi yuhu cahan ndusu cuan soco cha cuenda cha vaha chi maa ndo cuví.

³¹ Vityin cuví cuhva cutachi tuñi Nyoo chi ñáyivi iyó siqui ñuhu ñáyivi. Ta vityin cuhva cutava ñehe Nyoo chi ra nyacá ñaha siqui ñuhu ñáyivi ihya.

³² Ta cuhva cha cuitacai nu cruzi, yucuan cuhva cunaxite chi tandihi ñáyivi —catyí ra Jesús.

³³ Cahan ra tyehe caa cha cuñí ra na cutuñi iñi ñu tyi tyicuan caa cuhva cucuvi ra.

³⁴ Ta ñáyivi nacahan ñu ta catyí ñu chi ra:

—Tuhvá ndi chiñi ndi sacuahra ra nu libru ley yo vatyí ra cuví Cristo tyicuan ri maa cucoo ra. ¿Yoso caa cha catyí yoho tyi cusandaa ñu chi Rayíi quichi nya gloria nu cruzi? ¿Yóo ra cuví Rayíi cha quichi nya gloria cha cahun tuhun? —catyí ñu, ndacá tuhun ñu chi ra.

³⁵ Tyicuan ta ra Jesús catyí ra chi ñu:

—Iyó cha ndichin nu nyicu ndo, soco suhva ri ca quívi. Caca ndo ityi nu ndichin cha ni ri ca cha ndichin. Coto sana ri iñi ndo ta nduñaa iñi, vatyí ñu chicá noo nu ñaa iñi ña chito ñu nya ityi cuahan ñu.

³⁶ Chino iñi ndo chi yuhu ra cuví ñuhu ndichin cuan, cha ni ri ca cha nyaá que chihin ndo. Tyicuan ta cuví ndo ñáyivi iyó nu ndichin.

Cha yaha catyí ra Jesús tuhun ihya tixehe nuu ra chi ñu.

Nu catyí chi ñáa tuhun cha ña cacinó iñi ra cacuvi nuu chi ñu Israel chi ra Jesús

³⁷ Vasi cuaha xaan milagru sacuvi ra Jesús nuu ñu soco ña chinó iñi ñu chi ra.

³⁸ Vatyí tahán chi cha cuví tari catyí ra Isaías profeta Nyoo, nu cahan ra tyehe caa: Sutu Mañi yuhu, yori cuñí chino iñi tuhun cahan ndi.

Yori cutuñi iñi tunyee iñi iyó chuun, Sutu Mañi yuhu, catyí ra Isaías ta cha naha.

³⁹ Ta cha cuenda tuhun ihya cha nyaá nu tutu, yucuan chaha vatyí ña cuví chino iñi ñu vatyí suri tyaq tucu ra Isaías tyehe caa:

⁴⁰ Nyoo sanducuaq ra chi ñu. Ta sandundava ra aña ñu, tacuhva cha ma nyehe ñu chihin chiti nuu ñu,

ta ma cutuñi iñi aña ñu, ta ni ma nacuhva cuenda ñu chi ñu chi ra tacuhva sanduvaha ra chi ñu.

⁴¹ Ra Isaías catyí ra tyehe caa vatyí nyehe ra nu nyacá ñaha Sutu Mañi yo Jesús ta cahan ra tuhun ra.

⁴² Soco cuaha ñu Israel chinó iñi chi ra Jesús, ta nyacua nya suhva ra cacuvi nuu,

soco ña saquetuví ra nuu ñáyivi vatyi yuhví ra chi ra cacuví fariseo coto tava ñehe ra chi ra vehe ñuhu.

⁴³ Vatyí cuñí ca ra cuvaha ra nuu ñáyivi ta ñima ca cha cuvaha ra nuu Nyoo.

Tuhun cahq̄n ra Jesús cusacutuñi chi ñáyivi

⁴⁴ Ñihi cahán ra Jesús, ta catyí ra:

—Ñu chinó iñi chii, ñima chi maa ri mai chinó iñi ñu, soco chinó tucu iñi ñu chi ra cha tachí chii.

⁴⁵ Ta ñu nyehé chii, nyehé tucu ñu chi ra cha tachí chii.

⁴⁶ Yuhu cha cuví tari noo cha ndichin vachi ñuhu ñáyivi ihya, vatyi tacuhva vatyi ñu chinó iñi chii ma ndoo ñu nu ñaa iñi.

⁴⁷ Soco tatu yihí ndo chiñí ndo tuhun cahín, ta ña sacuví ndo cha cahín, ñima yuhu tachi tuñi chi ndo. Vatyí ña vachi yuhu ñuhu ñáyivi ihya vatyi tachi tuñi chi ñáyivi. Soco vachi sacaquí aña ñu.

⁴⁸ Ñu ña cuñí naquehen tuhun cahín ta ña cuñí ñu sacuví ñu tari kuhva cuñí, iyó cha cutachi tuñi chi ñu. Tuhun cha cahín, ican cuan cutachi tuñi chi ñu nu cundihi quivi.

⁴⁹ Vatyí ñima cuenda mai cahín. Suti ra cha tachí chii, chahq̄ ra tuhun chii ñáá cha cucahin ta ñáá cha cusañahi.

⁵⁰ Ta chité vatyi tuhun cha chahq̄ ra, chahá chi noo ñáyivi cha ma naa ca maa coo ñáyivi. Yucuan chaha, tuhun cha cahín, cahín soco kuhva catyí maa Suti cha cahín cuví.

13

Nu nacatyá ra Jesús chaha ra cachicá noo chihin ra

¹ Nonga quivi cumañi ta chaa vico pascua chitó ra Jesús vatyi cha chaa kuhva cha cuaquita ra ñuhu ñáyivi ihya ta cunuhu ra nu naxico Sutu ra. Tyicuan ri cuñí xaan ra chi ñu cuenda ra cha iyó siqui ñuhu ñáyivi ihya. Ta vityin cua sañahá ra chi ñu tyí cuñí xaan ra chi ñu vatyi cuacúvi ra cha cuenda ñu.

² Ta cuxiñi ra Jesús chihin ra cachicá noo chihin ra. Ta cha quihvi cuihna aña ra Judas Iscariote sehe ra Simón tyiyuhú ra chi ra, naxico tuhun ra chi ra Jesús ta nacuhva cuenda ra chi ra chi ra xaan iñi chi ra.

³ Soco ra Jesús chitó ra vatyi chahq̄ cuenda Sutu ra tandihi chi ra vatyi cunyaa ndaha ra. Ta chitó ra vatyi nu nyaá Nyoo quita ra ta suri yucuan cunanuhu ra. Ta nyaá ra Jesús cuxiñi ra.

⁴ Tyicuan ta nicuinanyaq̄ ra ta tavá ra sahma chata ra, ta chahñi ra noo toalla chichi ra.

⁵ Tyicuan ta tyihí ra ndutya chichi noo caa ta quichaha nacatya ra chaha ra

cachicá noo chihin ra. Ta quichaha nacuhva ra chihin toalla cuan.

⁶ Ta cha cuanacatya ra chaha ra Simón Pedro ta catyí ra Simón chi ra:

—Sutu Mañi yuhu, ¿atu yoho cuanacatyon chahi?

⁷ Tyicuan ta catyí ra Jesús:

—Vityin ña cutuñi iñun cha sacuví. Soco cucutuñi maa iñun nu cuahan ca chi.

⁸ Soco ra Pedro catyí ra chi ra:

—Ni noo chaha ta ma nacatyon chaha yuhu.

Ta catyí ra Jesús chi ra:

—Tatu ma nacatye chahun, ñima ra cuende cuvún.

⁹ Tyicuan ta catyí ra Pedro chi ra Jesús:

—Tu tyicuan caa, Sutu Mañi yuhu, ñima chaha ri nacatyon, soco nacatya tucun ndahi ta xiñi ñandihi —catyí ra.

¹⁰ Soco ra Jesús catyí ra chi ra:

—Ñu cha ni chityi, ña cuñí chi cha ndoo tandihi coño ñuhu ñu. Chaha ri ca ñu cuñí chi, vatyi cha ndi maa nani ñu. Nyoho cha ndi ndo, vasi ña tandihi ndo —catyí ra Jesús.

¹¹ Ta catyí ra vatyi ña tandihi ra ndi ra vatyi chitó ra yóo cha cunaxico tuhun chi ra chi ra xaan iñi chi ra.

¹² Ta cha yahá cha nacatya ra Jesús chaha ra cachicá noo chihin ra, ndihvi noo ra sahma ra, ta nicunyaq̄ tucu ra inga chaha nu mesa ta catyí ra chi ra:

—¿Atu cutuñi iñi nyoho cha sacuví chi ndo?

¹³ Nyoho catyí ndo chii, Maestro ta Sutu mañi yuhu, ta ndicha vatyi ican cuví.

¹⁴ Yuhu cha cuví Ra Sacuaha ta Sutu Mañi ndo, nacatye chaha ndo, tyicuan caa cuñí tucu chi cha nacatya ndo chaha tahan ndo.

¹⁵ Yuhu chahí noo kuhva chi ndo vatyi sacuví ndo tari kuhva sacuví mai.

¹⁶ Cha ndicha catyí chi ndo vatyi ni noo musu ta ña cahnu ca ra ican saha chitoho ra. Ta ni noo ra cha cuahan tyiño, ña cahnu ca ra ican saha ra cha tachí chi ra.

¹⁷ Tatu cutuñi iñi ndo tuhun ihya, ta sacuví ndo, si xaan cucuví chi ndo.

¹⁸ Ñima cha cuenda tandihi ndo cahín. Yuhu chité yóo chi nacachí mai. Soco cuñí chi cha cucuví tari catyí tuhun Nyoo tyehe caa: “Ra cha chahí pan chihin, ican ra cuan cunaxico tuhun chii chi ra xaan iñi chii”, catyí chi nu tutu Nyoo.

¹⁹ Catyí chi ndo tuhun ihya cha ni cumañi ca chino cava tacuhva vatyi quivi nacuví tyehe caa, chino iñi ndo tyi iquen cuví ra cha tinyaa cuatyi ndo.

²⁰ Cha ndicha catyí chi ndo vatyi ñu tiñ cuenda chi ñu tachí yuhu chi, chi yuhu tiñ cuenda ñu cuví cuan. Ta ñu cha tiñ cuenda

chi yuhu, tñn cuenda tucu ñu chi ra cha tachí chii —catyí ra Jesús.

Nu sacotó ra Jesús vatyí cunaxico tuhun ra Judas chi ra chi ra xaan iñi chi ra
(Mt. 26.20-25; Mr. 14.17-21; Lc. 22.21-23)

²¹ Cha yahá cha catyí ra Jesús tyehe caa, quichahá nducuihya xaan cuñi añima ra, ta catyí cachi ra:

—Cha ndicha catyí chi ndo, vatyí noo nyoho cunaxico tuhun ndo chii nuu ra xaan iñi chii —catyí ra Jesús.

²² Tyicuan ta ra cachicá noo chihin ra, quichahá canyehe ra nuu tahan ra, ta ña cachitó ra yóó chi tuhun cahán ra Jesús.

²³ Noo ra chicá noo chihin ra nyañaá ra chi ra Jesús nu cuxiñí ra. Ta ican ra cuví ra cha cuñi xaan ra Jesús chi.

²⁴ Ta ra Simón Pedro savahá ra seña chi ra, na ndaca tuhun ra yóó chi tuhun cahán ra.

²⁵ Tyicuan ta nyañaá ra chi ra Jesús, ta ndaca tuhun ra chi ra:

—Sutu Mañi yuhu, ¿yóó ra cuví ra cha cahún tuhun?

²⁶ Ta nacahan ra Jesús ta catyí ra:
—Cuasatyí chiiñ pan, ta ra cha cuhve chi, ican ra cuan cuví ra —catyí ra.

Tyicuan ta quehen ra chiiñ pan ta satyí ra, ta chahá ra chi ra Judas Iscariote, sehe ra Simón.

²⁷ Ta cha quehen ra Judas pan cuan ta quihví ra ña vaha añima ra. Tyicuan ta ra Jesús catyí ra chi ra:

—Tuhun cha yihí iñun sacuvun, sacuvi cha numi ri —catyí ra Jesús chi ra Judas.

²⁸ Soco ni noo ra canyicú nu mesa cuan, ña cacutuñi iñi ra ñáá tuhun cha catyí ra chi ra tyicuan caa.

²⁹ Soco cha cuenda vatyí ndaha ra Judas nyaá yitin xuhun, yucuan chaha yihí ra cuñi maa ra vatyí cuñi ra Jesús cha cusata ra cha chiñuhú chi ra cha cuenda cha vico cuan, o nacuhva ra suhva xuhun cuan chi ñu ndahvi, cacuñi maa ra.

³⁰ Cha yahá chachí ra Judas pan, tyicuan ta quitá ra. Ta cha cuaa cuví cuan.

Ley cha chahá ra Jesús cha cuñi yo chi tahan yo

³¹ Cha yahá cha cuahan ra Judas, ra Jesús catyí ra:

—Vityin cunyehe ñáyivi yoso cha cahnu yuhu cha cuví Rayíi cha quichí nya gloria. Ta cuanyehe ñu yoso cha cahnu Nyoo cha cuende.

³² Ta tatu Rayíi cha quichí nya gloria sacahnú ra chí Nyoo, tyicuan ta Nyoo cusacahnú ra chí ra. Ta cha cha quívi cuasacahnú ra chí ra.

³³ Sehe luhli, ña naha ca cuacunyaí chihin ndo. Nyoho cunanducu ndo chii, soco tari catyí chi ra cacuví nuu chi ñu

Israel cuan, catyí chi ndo vityin, vatyí ma cuví cuhun ndo nu cuahin.

³⁴ Chahí noo tuhun chaa chi ndo. Cuñi ndo chi tahan ndo. Tari cuñi yuhu chi ndo, tyicuan caa cuñi chi cha cuñi ndo chi tahan ndo.

³⁵ Tatu cuñi ndo chi tahan ndo, tandihí ñáyivi ta coto ñu vatyí ñu nyicón chii cuví ndo.

Nu catyí ra Jesús vatyí ra Pedro cucatyí ra vatyí ña ñohó nuu ra chí ra
(Mt. 26.31-35; Mr. 14.27-31; Lc. 22.31-34)

³⁶ Ra Simón Pedro ndaca tuhun ra chí ra Jesús ta catyí ra:

—Sutu Mañi yuhu, ¿nya cuhun? —catyí ra.

Ta ra Jesús nacahan ra ta catyí ra:

—Nu cuahan yuhu, vityin ma cuví cunyicon chii. Soco nu cuahan ca chi, ta cunyicon chii —catyí ra Jesús.

³⁷ Tyicuan ta catyí ra Pedro chi ra:

—Sutu Mañi yuhu, ¿ñáá tuhun ma cuví cunyiquen chuun vityin? Nyai cha cuhve ñáyivi cha cuendon —catyí ra.

³⁸ Ta nacahan ra Jesús ta catyí ra:

—¿Atu ndicha cha cuhvon ñáyivun cha cuende? Cha ndicha catyí chuun, vatyí cha ni cumañi ca cuacu chaa loho, yoho cucatyun uñi chaha tyi ña ñohó nuun chii —catyí ra Jesús chi ra Pedro.

14

Ra Jesús cuví ityi cuhun yo ta chaa yo nu nya Sutu yo Nyoo

¹ Ta catyí ra Jesús:

—Ma caca xaan xiñi ndo. Chino iñi ndo chí Nyoo, ta chino iñi ndo chii.

² Vehe Suti cuaha xaan nuu coo ndo iyó. Tyehe ta ñima tyicuan caa, cha naha catyí yuhu chi ndo. Ta cuhin cusanduvahi noo nu coo ndo.

³ Ta cha yaha cha cuhin ta sanduvahi nu coo ndo, ta cuquichi inga chaha, quichi naquehin chí ndo. Tacuhva cunyaa ndo nu cuacunyaí.

⁴ Nyoho chitó ndo nya cuhin, ta chitó ndo ityi.

⁵ Ta catyí ra Tomás chí ra:

—Tata, ña chitó ndi nya cuhun. Ta ¿yoso caa coto ndi ityi? —catyí ra.

⁶ Ta ra Jesús catyí ra:

—Yuhu cuví ityi cha cuahan gloria. Ta yuhu cuví cha ndicha. Ta suri yuhu cuví ra chahá ñáyivi coo ndo. Noo tuhun ri cha cuenda yuhu, cuví chaa ndo nu nyaá Suti.

⁷ Ñohó nuu ndo chii, ta cha cuenda cuan ñohó nuu tucu ndo chí Suti. Ta nya vityin ta nu cuahan ca chí, ñohó nuu ndo chí ra, vatyí cha nyehé ndo chí ra —catyí ra Jesús.

⁸ Tyicuan ta catyí ra Felipe chí ra:

—Tata, *cuhva* cha *nyehe* ndi *chi Sutu* yo *Nyoo*, ta *chihin* *yucuan* ri ta *ndoo* ndi *vaha*.

⁹ Ta *nacahan* ra *Jesús*, ta *catyí* ra:

—*Yoho Felipe*, *cha naha* *nyai* *chihin* *ndo*, ta *zyoso* *caa* *cha* *catyún* *cha* ta *cohon* *nuu* *con* *chii*? *Ñu* *cha* *nyehé* *chii*, *nyehé* *tucu* *ñu* *chi* *Nyoo* *Suti*. Ta *zñáá* *tuhun* *catyún* *chii*: “*Cuhva* *cha* *nyehe* *ndi* *chi* *Sutu* *yo* *Nyoo*?”

¹⁰ *¿Atu* *ña* *chinó* *iñun* *tyi* *ñin* *ri* *cuví* *yuhu* *chihin* *Suti* *Nyoo*? Ta *maa* *ra* *ñin* *ri* *cuví* *ra* *chihin*. *Tuhun* *cha* *catyí* *chi* *ndo*, *ñima* *yuhu* *ri* *catyí*, *soco* *Suti* *cha* *nyaa* *chihin*, *ican* *ra* *sacuví* *tyiño* *ra* *chihin*.

¹¹ *Chino* *iñi* *ndo* *chii* *vatyí* *ñin* *ri* *ra* *cuví* *chihin* *Nyoo* *Suti*. Ta *Nyoo* *Suti* *ñin* *ri* *ra* *cuví* *ra* *chihin*. O *cuví* *tucu* *chino* *iñi* *ndo* *chii* *cha* *cuenda* *tyiño* *Nyoo* *Suti* *cha* *sacuví*.

¹² *Cha* *ndicha* *catyí* *chi* *ndo* *vatyí* *ñu* *chinó* *iñi* *chii*, *cusacuví* *tucu* *ñu* *cha* *sacuví* *yuhu*. Ta *cahnu* *ca* *cusacuví* *ñu*, *vatyí* *yuhu* *uhin* *nu* *nyaa* *Nyoo* *Suti*.

¹³ Ta *tandihí* *cha* *cacan* *ndo* *chihin* *sivi*, *yuhu* *cusacuví* *tacuhva* *vatyí* *sacahnu* *ñáyivi* *chi* *Suti* *Nyoo* *cha* *cuenda* *cha* *cuví* *Sehe* *ra*.

¹⁴ *Yuhu* *cusacuví* *ñáá* *cha* *cacan* *ndo* *chihin* *sivi*.

Nu *catyí* *ra* *Jesús* *vatyí* *cuhva* *ra* *Tatyí* *Ii* *ra* *chi* *yo*

¹⁵ *Tatu* *cuñí* *ndo* *chii*, *quichaha* *ndo* *tuhun* *cahín*.

¹⁶⁻¹⁷ Ta *cacan* *tahvi* *mai* *chi* *Nyoo* *Suti* *na* *saquichi* *ra* *noo* *ra* *naquehen* *ndahvi* *chi* *ndo*. Ta *ican* *ra* *cuan* *cuví* *Tatyí* *Ii* *Nyoo*, *ra* *cha* *cahán* *maa* *ri* *cha* *ndicha*. Ta *cucunyaa* *ra* *chihin* *ndo* *tyicuan* *ri* *maa*. *Soco* *ñáyivi* *cha* *tahán* *ca* *iñi* *cha* *iyó* *siqui* *ñuhu* *ñáyivi* *ihya* *ma* *cuví* *naquehen* *ñu* *Tatyí* *Ii* *Nyoo* *vatyí* *ña* *cuví* *nyehe* *ñu* *chi* *ra*. Ta *ni* *ña* *caá* *ra* *añima* *ñu*. Ta *ni* *ña* *ñohó* *nuu* *ñu* *chi* *ra*. *Soco* *nyoho* *ñohó* *nuu* *ndo* *chi* *ra* *vatyí* *nyaa* *ra* *chihin* *ndo* *ta* *cuandoo* *ra* *chihin* *ndo*.

¹⁸ *Ma* *sandoo* *maa* *ri* *mai* *chi* *ndo*. *Quichi* *tiqui* *nu* *nyaa* *ndo*.

¹⁹ *Chiin* *ri* *ca*, *ta* *ñáyivi* *cuenda* *ñuhu* *ñáyivi* *ma* *nyehe* *ca* *ñu* *chii*. *Soco* *nyoho* *nyehé* *ndo* *chii*. *Vatyí* *yuhu* *iyé*, *yucuan* *chaha* *nyoho* *coo* *ndo* *ñandihí*.

²⁰ *Quivi* *cuan* *cucoto* *ndo* *tyi* *yuhu* *ñin* *ri* *cuví* *chihin* *Suti*. Ta *nyoho* *ñin* *ri* *cuví* *ndo* *chihin*. Ta *yuhu* *ñin* *ri* *cuví* *chihin* *ndo*.

²¹ *Ñu* *cha* *cumí* *vaha* *tuhun* *cahín*, *ta* *sacuví* *ñu* *cuhva* *catyí*, *ican* *ñu* *cuan* *cuví* *ñu* *cha* *cuñí* *chii*. Ta *ñu* *cha* *cuñí* *chii*, *Suti* *cucuñi* *ra* *chi* *ñu*. Ta *cuñí* *tucu* *yuhu* *chi* *ñu* *ta* *cusañahi* *chi* *ñu* *yóo* *ra* *cuví* *yuhu* —*catyí* *ra* *Jesús*.

²² Ta *catyí* *ra* *Judas*, *ñima* *ra* *Judas* *Iscariote*, *inga* *ra*.

—*Sutu* *Mañi* *yuhu*, *zyoso* *caa* *cha* *chi* *nyuhu* *cusañahun* *chuun*, *ta* *ñima* *chi* *ñu* *cuenda* *ñuhu* *ñáyivi*?

²³ *Nacahan* *ra* *Jesús* *ta* *catyí* *ra*:

—*Ñu* *cuñí* *chii*, *sacuví* *ñu* *tuhun* *cahín*. Ta *Suti* *cuñí* *ra* *chi* *ñu*. Ta *quichi* *ndi* *nu* *nyaa* *ñu* *ta* *coo* *ndi* *chihin* *ñu*.

²⁴ *Ñu* *ña* *cuñí* *chii*, *ña* *sacuví* *ñu* *cha* *catyí*. Ta *tuhun* *cahín* *cha* *chiñi* *ndo*, *ñima* *tuhun* *mai* *cuví*, *tuhun* *cahán* *Suti*, *ra* *cha* *tachí* *chii* *cuví*.

²⁵ *Catyí* *tandihí* *tuhun* *ihya* *chi* *ndo* *cha* *ni* *ri* *ca* *cha* *nyai* *chihin* *ndo*.

²⁶ *Soco* *nu* *cuahan* *ca* *chi* *cutachi* *Suti* *Tatyí* *Ii* *ra* *tyiño* *nuu*. *Maa* *ra* *cuví* *ra* *cutyinyee* *chi* *ndo* *ta* *cunaquehen* *ndahvi* *ra* *chi* *ndo* *ta* *cusañaha* *ra* *tandihí* *chi* *ndo*. Ta *cusanicohon* *ra* *iñi* *ndo* *tuhun* *cha* *yaha* *cahín* *chihin* *ndo*.

²⁷ *Sandoi* *noo* *cha* *taxi* *coo* *añima* *ndo*, *tari* *cha* *taxi* *cuñí* *añime*. *Ican* *chahí* *chi* *ndo*. *Ñima* *tari* *cha* *taxi* *cha* *ñihí* *ndo* *siqui* *ñuhu* *ñáyivi* *ihya*. *Ma* *caca* *xaan* *iñi* *ndo* *ta* *ma* *yuhvi* *ndo*.

²⁸ *Chiñi* *ndo* *tuhun* *cha* *cahín* *nu* *catyí* *vatyí* *cuahin* *ta* *quichi* *tiqui* *nu* *nyicú* *ndo*. *Tatu* *cuñí* *ndo* *chii*, *cucusi* *cuñí* *ndo* *tyi* *catyí* *vatyí* *cuahin* *nu* *nyaa* *Suti*. *Vatyí* *cahnu* *ca* *cuví* *Suti* *ican* *saha* *yuhu*.

²⁹ Ta *vityin* *catyí* *tiqui* *chi* *ndo* *cha* *ni* *cumañi* *ca* *cahin*, *tacuhva* *quivi* *cahin*, *cunachino* *iñi* *ndo* *chii*.

³⁰ *Ma* *cahan* *cuaha* *que* *chihin* *ndo*. *Vatyí* *vachi* *ra* *nyacá* *ñaha* *siqui* *ñuhu* *ñáyivi* *ihya*. *Vasi* *ña* *nyacá* *ñaha* *ra* *chii*.

³¹ *Soco* *cuñí* *chi* *nacoto* *ñáyivi* *iyó* *siqui* *ñuhu* *ñáyivi* *vatyí* *yuhu* *cuñí* *chi* *Nyoo* *Suti*, *ta* *sacuví* *tyiño* *tyaa* *ra* *chii*.

³² *Ndicuita* *ndo*. *Coho* *ndo*, *naquita* *yo* *ihya*.

15

Tari *noo* *yoho* *tichahá* *ndivi* *cha* *ndicha* *vaha* *cuví* *ra* *Jesucristo*

¹ *Yuhu* *cuví* *yoho* *tichaha* *ndivi* *cha* *ndicha* *vaha*. Ta *Suti* *cuví* *ra* *sahá* *cumi* *chi* *yoho* *cuan*.

² *Chahnyá* *ra* *soco* *cha* *ña* *chahá* *chiti*. Ta *soco* *cha* *chahá* *chiti* *nacahnyá* *ra* *nuu* *chi*, *ta* *sanduví* *ra*, *tacuhva* *nacuhva* *ca* *chi* *cuaha* *ca* *chiti*.

³ *Suti* *cha* *sandundi* *ra* *chi* *ndo* *chihin* *tuhun* *cha* *cahín* *chihin* *ndo*.

⁴ *Sañihi* *ca* *ndo* *cu* *ñin* *ri* *ndo* *chihin*, *tari* *yuhu* *ñin* *ri* *cuví* *chihin* *ndo*. *Tari* *noo* *soco* *yoho* *cuan* *ma* *cuví* *cuaha* *chi* *chiti* *cha* *maa* *ri* *maa* *chi* *tatu* *ña* *nyañaá* *chi* *chata* *yoho* *cahnu*, *tyicuan* *caa* *nyoho*, *ma* *cuví* *sacuví* *ndo* *cha* *vaha* *tatu* *ña* *ñin* *ri* *cuví* *ndo* *chihin*.

⁵ *Yuhu* *cuví* *yoho* *cahnu* *cuan*. Ta *nyoho* *cuví* *ndo* *soco* *yoho* *cuan*. *Ñu* *cha* *nyañaá* *chii*, *ta* *yuhu* *nyañaí* *chi* *ñu*, *cuaha* *cha* *vaha*

sacuví ñu, vatyi ñahri cha cuví sacuvi ndo tatu yori yuhu nyaá chihin ndo.

⁶ Ñu cha ña nyaña chii, cusacuita Suti chi ñu, tari sacuitá yo soco yoho cha chahnya yo vatyi ña चाहá chiti. Ta na ityi ta nasataca yo, ta cacuyau nu ñuhu.

⁷ Tatu nyoho ta tyicuan ri nyaña ndo chii, ta ña naa iñi ndo tuhín, cacan ndo ñáa cha cuñi ndo, ta yuhu cuhve.

⁸ Tatu cuaha cha vaha sacuví ndo, sacahnú xaan ndo chi Suti. Ta tyicuan caa sañahá ndo tyi cuví ndo noo ñu ndicha cha nyicón chii.

⁹ Yuhu cuñi chi ndo, tari cuñi Suti chii. Ma naa iñi ndo cuhva cuñi chi ndo.

¹⁰ Tatu quichahá ndo tuhun cahín, cuacuñi que chi ndo. Tari yuhu quichahí nu cahán Suti, ta cuñi xaan ra chii.

¹¹ Cahín tyehe caa chihin ndo tacuhva na cusii cuñi ndo chihin. Ta cucusii vavaha cuñi ndo.

¹² Tuhun cha catyí chi ndo, ican cuví ihya: na cuñi ndo chi tahan ndo, tari cuñi yuhu chi ndo.

¹³ Tatu yaha xaan cuñi yo chi tahan yo, caña iñi yo cuhva yo nyacua nya ñayiví yo cha cuenda ñu.

¹⁴ Nyoho cuví ndo amigue, tatu sacuví ndo cha catyí chi ndo.

¹⁵ Ña catyí que vatyi musi cuví chi ndo, vatyi noo musu ña chitó ra ñáa cha sacuví chitoho ra. Amigue, catyí chi ndo vatyi sacote chi ndo tandihí maa cha catyí Suti chii.

¹⁶ Nyoho ña cachí ndo chii. Mai nacachí chi ndo. Ta catyí chi ndo na cuhun ndo ta sacuvi ndo tyiño nui. Ta tyiño sahá ndo cucuvaha xaan tari cuvaha noo itu. Ta cuaha vavaha ñiñi cucoo, ta ma tiví maa chi. Ta tyicuan caa ta Suti cuhva ra tandihí cha cacan ndo chihin sivi.

¹⁷ Ican ihya cuví cha catyí chi ndo: Cuñi ndo chi tahan ndo.

Ñáyiví cuenda ñuhu ñayiví tasi cuñi nyehé ñu chí ra Jesús ta chi ñu nyicón chi ra

¹⁸ Tatu ñu cuenda ñuhu ñayiví ña cuñi nyehé ñu chi ndo, coto ndo vatyi xihna ca chí yuhu ña cuñi nyehé ñu.

¹⁹ Tyehe ta cuví ndo ñu cuenda ñuhu ñayiví, cucuñi ñu chi ndo tari cuñi ñu chi tahan ñu. Soco yuhu nacachí chi ndo mahñu ñu. Ta yucuan chaha tasi cuñi nyehé ñu chi ndo, vatyi ñiima ca ñu cuenda ñuhu ñayiví cuví ndo.

²⁰ Nyicohon iñi ndo tuhun cha catyí chi ndo, tyi ni noo musu ta ña cahnú ca ra ican saha chitoho ra. Ta tatu quichahá ñu tuhun cahín chihin ñu, tyicuan caa cuquichaha tucu ñu tuhun sañaha ndo chí ñu. Ta tatu sataśi iñi ñu chii, cusatasí iñi tucu ñu chí nyoho.

²¹ Tandihí ihya cusacuví ñu chí ndo cha catyí yuhu, vatyi ña ñohó nuu ñu chí ra cha tachí chii.

²² Tyehe ta ña quichí cahín chihin ñu, yucuan ndicha ñahri cuatyi ñu. Soco vityin ñahri siqui tyaa ñu cuenda cuatyi ñu, vatyi cha yahá catyí chí ñu.

²³ Ñu cha tasi cuñi nyehé chii, tasi cuñi nyehé ñu chí Suti ñandihí.

²⁴ Ñahri cuatyi ñu, tyehe ta ña sacuví milagru cha ni nonga ñáyiví ta sacuví ca. Soco cha nyehé ñu tandihí ihya. Ta vasi cha nyehé ñu soco tasi cuñi nyehé ñu chii, ta chí Suti ñandihí.

²⁵ Soco tandihí tuhun ihya cuví chí tyehe caa, vatyi cuñi chí cha chino cava tari cuhva catyí nu tutu ley cha sacuaña ñu nu catyí chí tyehe caa: “Ñahri vihi tuhun, ta cutasi cuñi ñu nyehé ñu chii”, catyí chí.

²⁶ Soco cuquichi Tatyí Ii, ra cha cahán maa ri cha ndicha. Maa ra cuví ra cha naquehen ndahvi chí ndo. Nachai nu nyaá Suti ta cusaquichi ndi chí ra nu nyicú ndo. Ta quiví quichi ra, cucahan ra tumañi iñi cuende.

²⁷ Ta nyoho tucu cucahan ndo tumañi iñi cuende, vatyi nyaá ndo chihin nyata quiví quichahá sahatyiñe.

16

¹ Catyí tuhun ihya chí ndo tacuhva cha ma sandihí ndo cha chinó iñi ndo chii.

² Cutava ñehe ñáyiví chí ndo vehe ñuhu. Ta cuchaa chí quiví vatyi ñu cahñi chí ndo, cucuñi ñu vatyi tyiño nuu Nyoo sacuví ñu.

³ Tyehe caa cusacuví ñu cha cuenda vatyi ni chíin maa ta cohon nuu ca ñu ni chí Suti ta ni chí mai.

⁴ Catyí tuhun ihya chí ndo tacuhva vatyi quiví chaa chí tari cuhva catyí chí ndo, nicohon iñi ndo vatyi cha yahá catyí chí ndo.

Tyiño sahá Tatyí Ii Nyoo

⁵ Ña catyí tuhun ihya chí ndo quiví xihna ri cha cuenda tyi nyaá que chihin ndo.

⁶ Soco vityin cuhin vatyi cunyaí chihin ra cha tachí chii. Ta ni noo nyoho ña ndaca tuhun ndo chíi nya cuhin.

⁷ Soco nducuihya ndihí iñi ndo cha catyí tuhun ihya chí ndo.

⁸ Soco catyí cha ndicha chí ndo: vaha ca cha cuhin cha cuenda cha vaha chí ndo. Vatyi tatu ma cuhin, ma quichi Tatyí Ii cha naquehen ndahvi chí ndo. Soco tatu cuhin, cutachi mai chí ra.

⁹ Ta quiví quichi ra cusacoto ra chí ñáyiví iyó siqui ñuhu ñayiví vatyi iyó cuatyi ñu. Ta cusañaha ra chí ñu vatyi iyó noo cuhva vaha tahán chí coo ñu. Ta cusacoto ra chí ñu vatyi cutuñi chí ñu nuu Nyoo.

⁹ Cusacoto ra chi ñu tyi iyó cuatyí ñu cha cuenda cha ña chinó iñi ñu chii.

¹⁰ Cusacoto ra chi ñu tyi iyó noo cuhva vaha cha tahán chi coo ñu, vatyí yuhu cuhin nu nyaá Suti ta ma nyehe ca ndo chii.

¹¹ Ta cu coto ñu tyi cusandaa Nyoo cuatyí ñu vatyí cha yaha cundaq cuatyí ra cuví cuihna, ra nyacá ñaha siqui ñuhu ñayiví ihya.

¹² Ta cuaha ca tuhun nyaá catyí chi ndo, soco ma cutuñi iñi ndo vityin.

¹³ Soco quivi quichi Tatyí Ii cha cahán maa ri cha ndicha, maa ra cusañaha tandihi cha ndicha chi ndo. Vatyí ñima cuenda maa ra cucahan ra, soco cucahan ra tandihi cha chiñi ra. Ta cusacoto ra tuhun ñáa cha cucuvi nu cuahan ca chi.

¹⁴ Cusacahnu ra chii, vatyí cunaquehen ra tuhun ta cusañaha ra chi ndo.

¹⁵ Tandihí cha iyó chi Suti, chi mai cuví ñandihí. Yucuan chaha vatyí Tatyí Ii cuquehen cuenda ra cha iyó chii, ta cusañaha ra chi nyoho.

Ra cha cachicá noo chihin ra Jesús cuihya iñi ra, soco nu cuahan ca chi cucusiñi cuñi ra, catyí ra Jesús

¹⁶ Ña naha ca ta ma nyehe ca ndo chii, soco yaha cuan ta cunyehe tucu ndo chii, vatyí yuhu cuhin nu nyaá Suti —catyí ra Jesús.

¹⁷ Tyicuan ta suhva ra cachicá noo chihin ra, candaca tuhun ra chi tahan ra ta catyí ra:

—¿Ñana vaha tuhun cahán ra ihya? Catyí ra chi yo vatyí ña naha ca ta ma nyehe ca yo chi ra, ta yaha cuan ta cunyehe tucu yo chi ra inga chaha vatyí cuhin ra nu nyaá Sutu ra.

¹⁸ ¿Ñáa cha cuñi chi catyí cha ña naha ca cuan? Ña cutuñi iñi yo ñáa túhun cahan ra —catyí ra.

¹⁹ Ra Jesús tuví iñi ra vatyí cacuñi ra candaca tuhun ra chi ra, ta catyí ra:

—Yuhu catyí chi ndo vatyí ña naha ca ta ma nyehe ca ndo chii, soco yaha cuan ta nanyehe tucu ndo chii. ¿Atu ican ihya cuví cha ndacá tuhun ndo chi tahan ndo?

²⁰ Cha ndicha catyí chi ndo vatyí nyoho cucuacu ndo ta cunducuihya iñi ndo, soco ñu cuenda ñuhu ñayiví cusii cuñi ñu. Soco vasi cuihya iñi ndo vityin, tucuihya iñi cha iyó chi ndo cunanduví chi tusii iñi.

²¹ Cuhva cha cuacacu sehe noo ñaha sihi nyehé ña cha uhvi. Soco cha yaha cha cacu cha lee cuan, ni tuhun cha uhvi cuan ña nicohon ca iñi ña cha cuenda cha siñi cuñi ña vatyí cacu noo cha lee sehe ña.

²² Tyicuan caa tucu nyoho vityin, nducuihyá iñi ndo. Soco cunanyehe tiqui chi ndo inga chaha. Tyicuan ta cundusii

tucu iñi añaima ndo. Ta yori cuví tinyaa tusii iñi cuan chi ndo.

²³ Quivi cuan ñahri ca cha cundaca tuhun ndo chii. Cha ndicha catyí chi ndo vatyí Nyoo Suti cucuhva tandihí cha cacan ndo chi ra chihin sivi.

²⁴ Nya vityin ta ta ñaha ca cha cacan ndo chihin sivi yuhu. Cacan ndo ta cuñiñi ndo tacuhva na cusii xaan cuñi ndo.

Ra Jesucristo cuví chasaha ra chi cha ña vaha iyó ñayiví

²⁵ Maa maa ri chihin cuhva ri sañahí chi ndo. Soco nu cuahan ca chi, ñima ca chihin cuhva cuasañahi chi ndo, soco cuacatyí cachi chi ndo tuhun Suti.

²⁶ Quivi cuan chihin sivi cucacan ndo cha cacan ndo chi ra. Ta ña chiñuhú ca cha cucuacu ndahvi nuu Suti cha cuenda ndo.

²⁷ Vatyí maa Nyoo Suti suri cuñi ra chi ndo. Cuñi ra chi ndo vatyí nyoho cuñi ndo chii. Ta nachinó iñi ndo vatyí nu nyaá Nyoo quite.

²⁸ Nu nyaá Suti quite vatyí quichi siqui ñuhu ñayiví ihya. Soco vityin cusandoi ñuhu ñayiví ihya vatyí cunuhi nu nyaá ra —catyí ra Jesús.

²⁹ Tyicuan ta ra cachicá noo chihin ra cacatyí ra:

—Vityin ndicha catyí cachun chi ndi.

³⁰ Vityin nyehe ndi vatyí chitón tandihí maa tuhun, ta ña nyatun cha ndaca tuhun ndi chuun, vatyí cha chitón nyacua nya tandihí cha chicá xiñi ndi. Yucuan chaha chinó iñi ndi vatyí nu nyaá Nyoo quiton —cacatyí ra chi ra Jesús.

³¹ Ta catyí ra Jesús:

—Ta vityin ¿atu chinó iñi ndo chii?

³² Soco catyí chi ndo vatyí cha vachi chi cuhva ta vityin cuví cuhva vatyí nyoho cuquiti cuatyí ndo siñ siñ ityi, ta cusandoo ndo notuhun mai. Soco ñima notuhun ri mai nyaá, vatyí nyaá Suti chihin.

³³ Catyí tuhun ihya chi ndo tacuhva na coo cha taxi ri añaima ndo cha cuenda cha iñi ri cuví ndo chihin. Ñuhu ñayiví ihya cunyehe ndo tindoho, soco sanyee ndo iñi ndo vatyí yuhu cha cuví chasahí chi cha ña vaha cha iyó ñuhu ñayiví ihya.

17

Nu chicán tahvi ra Jesús cuenda ra cachicá noo chihin ra

¹ Cha yaha cha catyí ra Jesús tuhun ihya, nanyehe ndaa ra ityi andiví ta catyí ra:

—Sutu Mañi yuhu, cha chaq cuhva vityin. Sacahnu chi yuhu cha cuví sehun, tacuhva sacahnu tucu yuhu chuun.

² Vatyí tyaun tyiño chii siqui tandihí ñayiví, vatyí cuhve ñayiví cha ma naa ca maa chi tandihí ñu chahun chii.

³ Ta ihya cuví cuhva coo ñu ñayiví cha ma naa ca maa: Cha cohon nuu ñu chuun vatyí noo tuhun ri maun cuví Nyoo cha ndicha vaha, ta cohon nuu ñu chí yuhu ra Jesucristo ra cha tachun chí.

⁴ Cha sacahnj chuun ihya siqui ñuhu ñayiví ta cha sandihj tyiño cha chahun chíi.

⁵ Ta vityin, Sutu Mañi yuhu, cua ndichi nu nyaun, nacuhva cha cahnun cuví maun chíi, tari cuhva cha chiyo chíi nyata ni cumañi ca chino ñuhu ñayiví.

⁶ Tandihí ra cha chahun chíi ra cha natava vahun mahñu ñu iyó siqui ñuhu ñayiví ihya sacote chí ra yóo ra cuví yoho. Chí maun cuví chí ra ta chahun chí ra chíi. Ta quichahá ra tuhun cahún.

⁷ Vityin cachtó ra vatyí tandihí cha chahun chíi, nu nyaún quitá.

⁸ Vatyí catyj chí ra tuhun cha catyun chíi, ta maa ra canatín cuenda ra. Ta tuví ñi ra vatyí ndicha cha quite nu nyaún, ta chinó ñi ra tyi maun tachí chíi.

⁹ Yuhu chiquén cha cuenda ra chuun. Ña chiquén cha cuenda ñayiví ña ñohó nuu chuun, soco chiquén cha cuenda ra cha chahun chíi, vatyí chí maun cuví chí ra.

¹⁰ Tandihí cha iyó chíi, chí maun cuví. Ta tandihí cha chuun, chí mai cuví. Ta tandihí cuan sacahnú chíi.

¹¹ Yuhu ma ndoo que ñuhu ñayiví ihya, soco maa ra cundoa ra ñuhu ñayiví ihya. Ta yuhu chuhin tyi cunyai chuhun. Sutu Mañi yuhu, saha cumi chíhin cha ndicha ñuhu chí ra cha chahun chíi, tacuhva na cu ñin ri ra chíhin ra tahan ra, tari yoho chíhin yuhu, ñin ri cuví yo.

¹² Quiví chinyai ñuhu ñayiví ihya chíhin ra, saha cumi chí ra cha chahun chíi chíhin cha ndicha ñuhun. Ta sahí cuenda chí ra. Ta ni noo ra ña cuanaa soco noo tuhun ri ra cha cha nyaá maa cunaa, ican ra cuan cunaa, tacuhva chino cava tari cuhva catyj nu tutu maun.

¹³ Vityin cha vachi nu nyaún, soco cha ni ri ca cha nyaí siqui ñuhu ñayiví ihya, catyj tuhun ihya tacuhva na cusíi cuñi ra tari mai.

¹⁴ Yuhu catyj chí ra tuhun cahún, soco ñayiví cuenda ñuhu ñayiví tasi cuñi nyehe ñu chí ra nyicón chí yo, cha cuenda vatyí ñima ra cuenda ñuhu ñayiví cuví ra, tari yuhu, ñima ra cuenda ñuhu ñayiví cuví.

¹⁵ Ña chiquén chuun cha tavon chí ra nyicón chí yo nu ñuhu ñayiví ihya, soco saha cumun chí ra coto ñáá cha saha ra ña vaha chí ra.

¹⁶ Tari yuhu ñima ra cuenda ñuhu ñayiví cuví, tyicuan caa tucu ra ihya, ñima ra cuenda ñuhu ñayiví cuví ra.

¹⁷ Cuhva cha ndicha chí ra nasacuvi ra maa maa ri cuhva cuñi maun. Tuhun cahún, ican cuví cha ndicha.

¹⁸ Tari tachun chí yuhu nu nyicú ñu iyó siqui ñuhu ñayiví, tyicuan caa tachí tucu yuhu chí maa ra nyicón chí yo nu nyicú ñu iyó siqui ñuhu ñayiví.

¹⁹ Ta cha cuenda cha vaha chí ra, sacuvi yuhu maa maa ri cuhva cuñi maun, tacuhva vatyí chíhin cha ndicha, cuví sacuvi tucu maa ra maa maa ri cuhva cuñi maun.

²⁰ Soco ñima cha cuenda ri ra ihya chiquén chuun, soco chicán tiquí cha cuenda ñayiví cha cuchino ñi chíi chíhin tuhun cahán ra ihya nu cuahan ca chí.

²¹ Chiquén chuun na tandihí ñu ta ñin ri na cuví ñu chíhin tahan ñu. Ta noo ri na cuví ñu chíhin yo, Sutu Mañi yuhu. Tari yoho nyaún chíhin ta yuhu nyaí chuhun, na cu ñin ri cuví ñu chíhin yo, tacuhva vatyí tandihí ñayiví iyó siqui ñuhu ñayiví chino ñi tyi maun tachí chíi.

²² Yuhu चाहि cha ndicha ñuhu chí ñu nyicón chí yo, suri cha ndicha ñuhu cha chahun chíi. Vatyí chíhin cuan na ñin ri cuví ñu tari yoho chíhin yuhu noo ri cuví yo.

²³ Yuhu nyaí chíhin ñu ta yoho nyaún chíhin, tacuhva na cuví yo noo ri chíhin ñu. Tyicuan caa ta coto tandihí ñayiví iyó siqui ñuhu ñayiví tyi maun tachí chíi, ta cuñi xaun chí ñu nyicón chí yo tari cuñún chí yuhu.

²⁴ Sutu Mañi yuhu, maun chahun chí ñu chíi. Ta cuñi cha cunyaa ñu chíhin nu cuacunyai, tacuhva nanyehe ñu cha ndicha ñuhu cha chahun chíi vatyí cuñún chíi nyata ni cumañi ca chino ñuhu ñayiví.

²⁵ Sutu Mañi yuhu, ra vaha cuvún, ta ñu cuenda ñuhu ñayiví ña ñohó nuu ñu chuun, soco yuhu ñohó nuu chuun. Ta ra nyicón chí yo ihya chitó ra tyi maun tachí chíi.

²⁶ Cha catyj chí ra yóo ra cuvún, ta cucatyí tiquí inga chaha, tacuhva vatyí tari cuhva cuñún chíi, tyicuan caa cuhva cuacuñi tucu maa ra chí ra tahan ra. Ta yuhu cunyai aña ma ra.

18

Nu cuahan ra Jesús vehe caa

(Mt. 26.47-56; Mr. 14.43-50; Lc. 22.47-53)

¹ Cha yahá cha catyj ra Jesús tuhun ihya, quitá ra ta cuahan ra chíhin ra cacticá noo chíhin ra inga chiyo yuhu yuvi Cedrón. Ta yucuan nyaá noo chacu yutun yucu. Ta yucuan quihví ra Jesús chíhin ra cacticá noo chíhin ra.

² Ta ra Judas, ra cha naxicó tuhun chí ra, chitó ra nu cuahan ra Jesús. Vatyí tuhvá ra Jesús चाहán ra yucuan chíhin ra cha cacticá noo chíhin ra.

³ Ta yucuan chaq̄ ra Judas chihin cuaha sindaro ta cuaha policia cuenda vehe ñuhu cha tach̄i ra cuv̄i nuu chi tata sutu ta ra cuv̄i fariseo. Chaq̄ coyo ra yucuan, canyisó ra mityi, ta canyiso ra lámpara ta ñuhu yiti.

⁴ Ta vatyi ra Jesús cha chitó ra tandih̄i cha cucuvi chi ra, quit̄a ra ta ndacā tuhun ra chi ra:

—¿Yóó chi nanducú ndo? —catȳi ra.

⁵ Ta cacatȳi ra chi ra:

—Chi ra Jesús ra ñuu Nazaret.

Ta catȳi ra Jesús:

—Yuhu cuv̄i —catȳi ra.

Ta ra Judas, ra cha naxicó tuhun chi ra Jesús nuu ra xaan if̄i chi ra, nanyaá ra chihin ra yucuan.

⁶ Ta cuhva cha catȳi ra Jesús: “Yuhu cuv̄i”, tandih̄i ra canandacā chata ra ta canduv̄a ra nu ñuhú.

⁷ Tyicuan ta inga tucu chaha ndacā tuhun ra Jesús chi ra, ta catȳi ra:

—¿Yóó chi nanducú ndo?

Ta cacatȳi ra:

—Chi ra Jesús ra ñuu Nazaret.

⁸ Ta catȳi ra Jesús:

—Cha catȳi chi ndo tyi yuhu cuv̄i. Tatu chii nanducú ndo, saña ndo chi ra chica noo chihin ra cunuhun coyo ra —catȳi ra Jesús chi ra.

⁹ Ican tyeh̄e caa catȳi ra Jesús tacuhva na chino cava cha catȳi maa ra ta ityi chata ca nu catȳi ra: “Ra cha chah̄a Suti chii, ni noo ra ña cuanaá.”

¹⁰ Tyicuan ta ra Simón Pedro nyisó ra noo mityi. Ta tav̄a ra ta chahnȳa ra soho chiyo vaha noo ra cha nañi Malco. Cuv̄i ra cuan musu ra cuv̄i nuu chi tandih̄i tata sutu.

¹¹ Soco ra Jesús catȳi ra chi ra Pedro:
—Natȳih̄i mityun chichi veno. Tatu Nyoo Suti ta cuñi ra cha nyehi tindoho, tahán chi cha nyehi —catȳi ra Jesús chi ra.

Nu nanyaq̄ ra Jesús nuu ra cuv̄i nuu chi tata sutu

(Mt. 26.57-58; Mr. 14.53-54; Lc. 22.54)

¹² Tyicuan ta sindaro cuan chihin capitán ra, ta policia cuenda vehe ñuhu, cat̄iñ ra chi ra Jesús, ta chahñi ra chi ra vatyi cahun ra vehe caa.

¹³ Tyicuan ta chinyacā ra chi ra vehe ra Anás, vatyi ra Anás cuan tyiso ra Caifás cuv̄i chi ra. Ta cuiya cuan cuv̄i ra Caifás ra cuv̄i nuu chi tata sutu.

¹⁴ Ican ra Caifás ihya cuv̄i ra cha catȳi chi ra cacuv̄i nuu chi ñu Israel vatyi vaha ca cha cuv̄i noo ri raȳi cha cuenda tandih̄i ñâyivi ñuu.

Nu catȳi ra Pedro tyi ña ñohó nuu ra chi ra Jesús

(Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro ta nonga ra cha chic̄a noo chihin ra Jesús, canyicón ra chi ra Jesús

nu cuahan ra nuquehe vehe ra Anás cuan. Ta ra cuv̄i nuu chi tata sutu cuan ñohó nuu ra chi inga ra cuan. Yucuan chaha quihv̄i ra cuan chihin ra Jesús nuquehe ra cuv̄i nuu cuan.

¹⁶ Soco ra Pedro ndoq̄ ra yuvehe chata vehe. Yucuan chaha quit̄a ra cha ñohó nuu chi ra cuv̄i nuu chi tata sutu cuan, ta cah̄an ra chihin ñaha cha nyaá yuvehe cuan. Ta tyih̄i ra chi ra Pedro chichi nuquehe cuan.

¹⁷ Tyicuan ta ñaha cha nyaá yuvehe cuan ndacā tuhun ña chi ra Pedro, ta catȳi ña:
—¿Atu ñima noo ra chic̄a noo chihin raȳi cuan cuv̄in?

Ta ra Pedro catȳi ra:

—Ñime cuv̄i —catȳi ra chi ña.

¹⁸ Tyicuan ta musu ta policia cha tayucú yucuan, casanatah̄an ra ñuhu vatyi vichin xaan. Ta tayucú ra casanasaá ra chi ra. Ta ñohó tucu ra Pedro cuan yunuhu cuan, sanasaá ra chi ra.

Nu sanahm̄a ra cuv̄i nuu chi tata sutu chi ra Jesús

(Mt. 26.59-66; Mr. 14.55-64; Lc. 22.66-71)

¹⁹ Tyicuan ta ra cuv̄i nuu chi tata sutu quichah̄a ndacā tuhun ra chi ra Jesús, yóó ra cuv̄i ra cachicá noo chihin ra, ta ñáá chaha sañah̄a ra chi ñâyivi.

²⁰ Ta ra Jesús catȳi ra chi ra:

—Yuhu chihin nuu tandih̄i ñâyivi cah̄in.

Ta sañah̄i chichi vehe ñuhu tahan tahan ñuu ta chichi vehe ñuhu cahnu ñuu ihya nu ndu ñn ri tandih̄i ñu Israel. Ta ñahri tuhun xehe cah̄in.

²¹ ¿Ñáá tuhun cha ndacā tuhun chii?

Vaha taxin ca ndacā tuhun chi ñu cha chiiñi tuhun cah̄in, ta maa ñu nacatȳi ñu ñáá tuhun cah̄in chihin ñu. Maa ñu chitó ñu ñáá tuhun cah̄in —catȳi ra Jesús chi ra.

²² Cuhva cha catȳi ra Jesús tuhun ihya, noo policia vehe ñuhu cha nanyaá cuan, cañi ra noo nuu ra Jesús ta catȳi ra:

—¿Atu tyiña caa nacah̄un nu cah̄an ra cuv̄i nuu chi tata sutu? —catȳi ra chi ra Jesús.

²³ Ta ra Jesús catȳi ra:

—Tatu cah̄in noo tuhun ña vaha, catȳi chii nya maa maa ña vaha cah̄in. Soco tatu cah̄in tuhun vaha, ¿ñáá tuhun cha cañun chii? —catȳi ra Jesús chi ra cuan.

²⁴ Yah̄a cuan ta nuhñi ra Jesús, ta tach̄i ra Anás chi ra nu nyaá ra Caifás, ra cuv̄i nuu chi tata sutu.

Nu catȳi ra Pedro inga chaha vatyi ña ñohó nuu ra chi ra Jesús

(Mt. 26.71-75; Mr. 14.66-72; Lc. 22.58-62)

²⁵ Ta ra Pedro nanyaá ca ra yunuhu cuan sanasaá ra chi ra. Ta catȳi ñu chi ra:

—¿Atu ñima noo ra chic̄a noo chihin ra cuan cuv̄i yoho? —catȳi ñu chi ra.

Ta ra Pedro tixeh̄e ra, ta catȳi ra:

—Ñime.

²⁶ Tyicuan ta noo musu ra cuví nuu chi tata sutu, noo ra cha cuví ñáyiví chi ra cha chahnyá ra Pedro soho, quichahá ndaca tuhun ra ta catyí ra:

—Ta caa cuiri tyi nyehí chuun chíhin ra chichi chacu cuan —catyí ra chi ra Pedro.

²⁷ Ta ra Pedro tixehe ra inga chaha, ta caa cuhva ri cuan ta chacu noo loho.

Nu nanyaá ra Jesús nuu ra Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yahá cuan ta quita coyo ra chíhin ra Jesús vehe ra Caifás ta chinycá ra chi ra vehe tyiño gobernador. Cha vachi cundichin ta ra Israel ña caquihví ra chichi vehe tyiño cuan vatyí ñima vehe ñu Israel cuví. Ta vatyí catyí ñu tyi yica cha quihví ñu vehe savahri vatyí coto ma cuví cuxiñi ñu quiví vico pascua cuan.

²⁹ Yucuan chaha quita ra Pilato vatyí cahan ra chíhin ra, ta catyí ra:

—¿Ñáá cuatyí tyaá ndo siqui ra ihya? —catyí ra Pilato chi ra ñuu Israel.

³⁰ Ta canacahan ra Israel ta catyí ra:

—Tyehe ta ñima noo ra iyó cuatyí cuví ra, ma nacuhva cuenda ndi chi ra chuun —cacatyí ra chi ra Pilato.

³¹ Tyicuan ta ra Pilato catyí ra chi ra:

—Quehen maa ndo chi ra, na cutuñi chi ra nuu maa ndo tari cuhva catyí ley maa ndo.

Ta nacahan ra ñuu Israel cuan ta cacatyí ra:

—Soco nyuhu ñu Israel ñahri ityi iyó chi ndi cha cahñi ndi chi ni noo ñáyiví —catyí ra.

³² Tyicuan caa chinq cava cha catyí ra Jesús yoso caa cucúvi ra.

³³ Tyicuan ta nandihví tucu ra Pilato chichi vehe tyiño cuan inga chaha. Ta cana ra chi ra Jesús ta ndaca tuhun ra chi ra:

—¿Atu yoho cuvún rey cuenda ñu Israel? —catyí ra chi ra.

³⁴ Ta ra Jesús catyí ra:

—¿Atu cha cuenda maun ndaca tuhun, o inga ñu nacatyí ñu tuhín chuun? —catyí ra Jesús chi ra Pilato.

³⁵ Ta catyí ra Pilato:

—Ñima ra ñuu Israel cuví yuhu. Suri ra ñuu maun ta ra cuví nuu chi tata sutu ñuu maun cuví ra canacuhvá cuenda chuun chii. ¿Ñáá cha sacuvún? —catyí ra chi ra Jesús.

³⁶ Tyicuan ta nacahan ra Jesús ta catyí ra:

—Nu nyacá ñahi ñima cuenda ñuhu ñayiví ihya cuví. Tyehe ta ican, ra nyicón chii cañi tahan ra tacuhva ma cunyai ndaha ra Israel. Soco nu nyacá ñahi, ñima cuenda ihya cuví —catyí ra Jesús chi ra Pilato.

³⁷ Tyicuan ta ra Pilato catyí ra chi ra:

—¿Tu tyicuan caa, rey cuvún vii? —catyí ra Pilato chi ra Jesús.

Ta nacahan ra Jesús ta catyí ra:

—Rey cuví tari catyun chiña. Yucuan cuenda caquj ta vachi ñuhu ñayiví ihya, vatyí catyí ñáá cha cuví cha ndicha. Tandihí ñu quichaha cha ndicha, tyasohó ñu tuhun cahín —catyí ra Jesús.

³⁸ Ta ra Pilato catyí ra chi ra:

—¿Ta ñáá cha cuví cha ndicha? —catyí ra.

Nu cuacacahñi ra chi ra Jesús

(Mt. 27.15-31; Mr. 15.6-20; Lc. 23.13-25)

Cha yahá cha ndaca tuhun ra tuhun ihya, quita ra Pilato chichahán ra chíhin ra Israel inga chaha ta catyí ra:

—Yuhu ña nañihí mai ni noo cuatyí ra ihya.

³⁹ Soco nyoho iyó noo costumbre chi ndo cha chican ndo na sañe chi noo ra ñohó vehe caa cha vico pascua ihya. ¿Atu cuñí ndo cha sañe chi ra cha cuví rey cuenda ndo ñu Israel? —catyí ra Pilato chi ra.

⁴⁰ Tyicuan ta tandihí ra quichahá canachaa ra ta catyí ra:

—¡Ma sañon chi ra chiña! ¡Chi ra Barrabás sañon! —catyí ra.

Ta ra Barrabás cuví ra noo ra suhu.

19

¹ Tyicuan ta quehen ra Pilato chi ra Jesús ta tachí ra na cucañi sindaro chi ra.

² Ta sindaro savahá ra noo corona chíhin iñu ta catyihí ra xiñi ra Jesús. Ta sacuihño ra chi ra chíhin noo sahma tyacu nyaa tari cha tuhvá rey cañihno.

³ Tyicuan ta catuhvá ra nu nanyaá ra ta chacú nyaa ra chi ra, ta cacatyí ra:

—¡Nocumi chuun yoho Rey cuenda ñu Israel! —cacatyí ra, ta cacatu ra chi ra.

⁴ Tyicuan ta quita tucu ra Pilato inga chaha ta catyí ra chi ra:

—Nyehé ndo cuatave chi ra ityi nuu ndo tacuhva nanyehé ndo vatyí ni noo cuatyí ra ña nañihí —catyí ra Pilato chi ra.

⁵ Ta quita ra Jesús yihí corona iñu cuan xiñi ra, ta ñihno ra sahma tyacu nyaa cuan. Tyicuan ta ra Pilato catyí ra chi ra:

—¡Ma ra ihya! —catyí ra chi ra.

⁶ Cuhva cha cananyehé ra cacuví nuu chi tata sutu ta policia chi ra, quichahá cacana chaa ra ta catyí ra:

—¡Cahñi chi ra nu cruzi! ¡Cahñi chi ra nu cruzi! —cacatyí ra.

Soco ra Pilato catyí ra chi ra:

—Quehen maa ndo chi ra ta cahñi maa ndo chi ra nu cruzi. Vatyí yuhu ni noo cuatyí ra ña nañihí.

⁷ Soco nacahan ra Israel cuan ta cacatyí ra:

—Iyó noo ley chi ndi, ta cuhva catyí ley ndi, cuñí chi cha cúvi ra vatyí nasahá ra Sehe Nyoo chi ra —cacatyí ra.

⁸ Cha chiñi ra Pilato tuhun ihya, nayuhví ca ra.

⁹ Ta ndihví tucu ra inga chaha chichi vehe tyiño, ta ndacá tuhun ra chi ra Jesús:

—¿Nya quitá yoho? —catyí ra chi ra.

Soco ra Jesús ñahri cha nacahan ra.

¹⁰ Tyicuan ta ra Pilato catyí ra chi ra:

—¿Náá tuhun ña nacahún nu cahán yuhu? ¿Atu ña chitón vatyí ra cuví tyiño cuví ta iyó ityi chíi cha tyai chuun nu cruzi, ta iyó tucu ityi chíi cha sañe chuun? —catyí ra Pilato chi ra Jesús.

¹¹ Ta nacahan ra Jesús ta catyí ra:

—Tyehe ta ña chahá Nyoo tyiño cuan chuun, ñahri ityi iyó chuun cha tachi tuñun chíi. Yucuan chaha, ra cha cachahá cuenda chíi chuun, cahnu ca cuatyí ra ican saha yoho —catyí ra Jesús chi ra Pilato.

¹² Nya cuhva cuan ta nducu ra Pilato cuhva saña ra chi ra Jesús, soco ra Israel cacana chaa ra siqui ra, ta catyí ra:

—¡Tatu sañon chí ra, ñima amigo rey cahnu cuví chuun! Vatyí tandihí ri ra cha catyí tyi rey cuví ra, ra xaan iñi chí rey cahnu cuví ra —cacatyí ra.

¹³ Tyicuan ta cha chiñi ra Pilato tuhun ihya, tachí ra na quita ra Jesús ityi chata vehe. Ta chicunyaá ra Pilato nu tyayu ra nu tuhvá ra sandaa cuatyí ñáyivi nu nañí chi Gabata chihin sahan hebreo, ta cuñí chí catyí: “Nu yihí yuu”.

¹⁴ Ta cuví chí noo quívi cha ni cumañi ca vico pascua, ñáá cuhva ora. Tyicuan ta ra Pilato catyí ra chi ra Israel cuan:

—¡Ma rey ndo chiña!

¹⁵ Soco maa ra Israel canachaa ra ta cacatyí ra:

—¡Na cúvi ra! ¡Na cúvi ra! ¡Cahñi chí ra nu cruzi! —cacatyí ra.

Ta ra Pilato catyí ra chi ra:

—¿Atu cahñi nu cruzi chí rey ndo?

Soco ra cacuví nuu chí tata sutu cacatyí ra:

—Yori ca rey iyó. Noo tuhun ri ra César, cha cuví rey cahnu —catyí ra.

¹⁶ Tyicuan ta ra Pilato chahá cuenda ra chí ra Jesús chí ra na cunyaa ra nu cruzi. Ta quehen sindaro chí ra, ta cuahan ra chihin ra.

Nu chihí ra Jesucristo nu cruzi

(Mt. 27.32-44; Mr. 15.21-32; Lc. 23.26-43)

¹⁷ Ta nyisó ra Jesús cruzi ra, cuahan ra noo nu nañi: “Yiqui Xiñi Ndiyí”. Ta chihin sahan hebreo nañi chí Gólgota.

¹⁸ Ta yucuan catyaa ra chí ra nu cruzi chihin clavu. Ta ñin ri chihin ra catyaa ra uvi ca ra. Noo ra tacaá ra noo nu cruzi

inchiyo xiin ra ta inga ra inga chiyo xiin ra. Ta ra Jesús tacaá ra mahñu.

¹⁹ Ta ra Pilato tachí ra tyiño na cunyaa letra xiñi cruzi cuan. Ta catyí chí tyehe caa: “Ra Jesús ra ñuu Nazaret, Rey cuenda ñu ñuu Israel.”

²⁰ Ta cuaha ñu Israel sacuahá ñu tuhun cuan, vatyí yatyin ri ñuu ñu cuví nu chinanyaá ra cruzi ra Jesús. Ta letra cuan nyaá chihin sahan hebreo, ta sahan griego, ta sahan latín.

²¹ Yucuan chaha ra cacuví nuu chí tata sutu cacatyí ra chí ra Pilato:

—Ma tyaun: “Rey cuenda ñu ñuu Israel”, vaha ca tyaun: “Ican ra ihya cha catyí vatyí rey cuenda ñu ñuu Israel cuví ra” —cacatyí ra.

²² Soco ra Pilato catyí ra:

—Noo cha yahá tyai, nandoo maa tyicuan caa —catyí ra chí ra.

²³ Cha yahá cha catyaa sindaro cuan chí ra Jesús nu cruzi, canaquehen ra sahna ra ta cha cumi tahan ra quehen ra noo noo sahna ra. Ta ndoo nonga sahna ra cha ña quicu ñu. Noo ri savahá ñu nyacua nya siqui ta nya yuvi.

²⁴ Ta sindaro cuan cacatyí ra chí ra tahan ra:

—Ma cahnya yo. Cuhun yo noo sihva, nyehe yo yóo chí tahán chí sahna cuan —cacatyí ra.

Tyicuan caa cuví tari cuhva catyí nu tutu Nyoo nu catyí chí tyehe caa: “Casachá ra sahme ta chahan ra noo sihva chihin chí, nyehe ra yóo ra saha canaa.” Ta ican ihya casacuví sindaro cuan.

²⁵ Ta chaha cruzi ra Jesús nanyaá sihi ra. Ta nanyaá tucu cuhu ña, ta cu María ñasihí ra Cleofas, ta cu María ñaha Magdala.

²⁶ Ta nanyehe ra Jesús chí sihi ra, nanyaá ña yatyin ri. Ta nanyehe tucu ra chí ra cha chica noo chihin ra, ra cha cuñi xaan ra chí. Ta catyí ra chí sihi ra:

—Ma sehun nanyaá chiña —catyí ra.

²⁷ Tyicuan ta catyí ra chí ra cha cuñi xaan ra chí:

—Ma sihun nanyaá chiña —catyí ra chí ra.

Ta nya quívi cuan ta naquehen cuenda ra chí ña cuanuhu ña vehe ra.

Nu chihí ra Jesús

(Mt. 27.45-56; Mr. 15.33-41; Lc. 23.44-49)

²⁸ Cha yahá tuhun ihya, cha nyehe ra Jesús vatyí cha ndihí tyiño saha ra. Tyicuan ta catyí ra:

—Ityi ndutya —catyí ra.

Ta chihin tuhun cuan nachino cava tuhun cha nyaá nu tutu Nyoo.

²⁹ Ta yucuan nanyaá noo quívi tyitú chihin vinagre. Tyicuan ta casatyí ra chí ra chí noo xixan ndutya iya cuan. Ta tyaá

ra noo nu soco yutun cha nañi hisopo, ta catyaña ra nya yuha ra.

³⁰ Chihj ra Jesús ndutya cuan ta catyí ra: —Cha iyó vaha tandihi vityin —catyí ra. Tyicuan ta nacañi noo ra xiñi ra ta chihj ra.

Nu quiñi lanza yiqui naha ra Jesús

³¹ Noo ri ca quivi cumañi ta cuvi quivi cahnu ca vico pascua cuan, ta ra cacuvi nuu chi ñu Israel ña cuñi ra cha ndoo coño ñuhu cuan nu cruzi quivi nyitatu ñu, vatyi quivi nyitatu ñu quivi ii cuvi. Yucuan chaha chican ra tumañi iñi chi ra Pilato na tachi ra na cucahnu sindaro sihin ra cha catacoyo nu cruzi cuan tacuhva na cacuvi ra cha numi ri, ta cañehe ra coño ñuhu ra.

³² Tyicuan ta cuahan coyo sindaro nu tayucu cruzi cuan. Ta chahnü ra sihin noo ra cha tacaá yucuan. Tyicuan ta chahnü tucu ra sihin inga ra cha tacaá xiin ra Jesús.

³³ Soco cuhva cha cuatuhva ra nu tacaá ra Jesús, cananyehe ra vatyi cha chihj ra. Ta yucuan chaha ña cachahnü ca ra sihin ra.

³⁴ Soco suvita ri noo sindaro cuan quiñi ra lanza yiqui naha ra Jesús. Ta quitá niñi ta ndutya.

³⁵ Ra cha nacatyí tuhun ihya, noo ra cha nyehe cuví ra. Ta cha ndicha cahán ra, vatyi maa ra chitó ra vatyi cha ndicha cahán ra, tacuhva nachino tucu iñi nyoho.

³⁶ Vatyi tuhun ihya cuvi chi tyehe caa tari cuhva catyí tuhun Nyoo nu catyí chi: “Ni noo yiqui ra ta ma tahnü.”

³⁷ Ta iyó nonga tucu nu catyí chi nu tutu Nyoo tyehe caa: “Cunyehe ñu chi ra cha quiñi ra lanza chi.”

Nu quihvi ra Jesús chichi ñuhú

(Mt. 27.57-61; Mr. 15.42-47; Lc. 23.50-56)

³⁸ Cha yahá tuhun ihya, ra José ra ñuu Arimatea chican ra chi ra Pilato nacuhva ra cha naquehen ra coño ñuhu ra Jesús. Ta ra José cuan cuvi ra noo ra yihí cuenda ra Jesús vasi xehe ri cha cuenda cha yuhví ra chi ra cacuvi nuu chi ñu Israel. Tyicuan ta chahá ra Pilato permisú chi ra, ta ra José chahan ra chinaquehen ra coño ñuhu cuan.

³⁹ Chahan tucu ra Nicodemo, ra cha chahan chichah chihin ra Jesús cha cha cuaa. Chahá ra chihin ndutya vixi chahán. Ta noo ndutya vixi chahán cha nañi mirra nasacá ñu chihin inga cha nañi áloe. Ta quitá chi tari noo oco uchi kilu cha tandihi.

⁴⁰ Yucuan ta ra José ta ra Nicodemo caquehen ra coño ñuhu ra Jesús ta canasiquí noo ra chi ra chihin sahma cuiñi cahyü ra ndutya vixi chahán cuan, tari cuhva noo tuhun cha iyó chi ñu Israel tu cuatyihí ñu noo ndiyi chichi ñuhú.

⁴¹ Yatyin nu cachahñi ra chi ra Jesús nu cruzi nyaá noo chacu yutun yucu vixi. Ta

chichi chacu cuan nyaá noo ñaña chaa nu ta cohon ca ni noo ndiyi.

⁴² Yucuan tyihj ra coño ñuhu ra Jesús vatyi yatyin ri cuan nyaá ñaña cuan ta vatyi cha cua quichaha quivi nyitatu ñu Israel.

20

Nu nandoto ra Jesús

(Mt. 28.1-10; Mr. 16.1-8; Lc. 24.1-12)

¹ Cha timingu cha ñaa ca, cu María ñaha Magdala cuan chahan ña nu ñaña. Ta nyehe ña tyi ñahri ca yuu nyasi yuhu ñaña cuan.

² Tyicuan ta chinó vavaha ña cuahan ña nu nyaá ra Simón Pedro ta inga ra chica noo chihin ra Jesús, ra cha cuñi xaan ra Jesús chi. Ta catyí ña chi ra:

—Quehen ñáyivi coño ñuhu Sutu Mañi yo chichi ñaña, ta ña chitó yo nya chinyaca ñu —catyí cu María chi ra Pedro ta chi inga ra cuan.

³ Tyicuan ta ra Pedro ta inga ra cuan cuahan coyo ra nu ñaña.

⁴ Ninduvi ra iñ ri cuahan coyo ra cachino ra. Soco chino ca inga ra cuan ican saha ra Pedro, ta xihna ca ra chahá nu ñaña.

⁵ Quichahá nyehe ñihñi ra chichi ñaña, ta nyehe ra sahma cuiñi cha yihj coño ñuhu ra Jesús, catuvi cuan. Soco ña quihvi ra chichi ñaña.

⁶ Yahá cuan ta chahá ra Simón Pedro chata ra, ta quihvi ra chichi ñaña cuan. Suri nyehe tucu ra cuan sahma cuan catuvi.

⁷ Ta suri nyehe tucu ra vatyi sahma cha siquí noo xiñi ra Jesús, ña iñ ri cayucu chihin inga sahma cuan, soco catuvi siñ.

⁸ Tyicuan ta quihvi tucu inga ra chica noo chihin ra Jesús cuan, ra cha chahá cha xihna ri nu ñaña cuan. Ta nyehe ra cha cuvi cuan, ta chino iñi ra.

⁹ Vatyi cha cuvi maa ta cutuñi ca iñi ra cha catyí nu tutu Nyoo, vatyi ra Jesús cuiñi chi cha nandoto ra cha yahá chihri ra.

¹⁰ Tyicuan ta ra cachica noo chihin ra Jesús cuanuhu coyo ra nya vehe.

Nu tuyi ra Jesús nuu cu María ñaha ñuu Magdala

(Mr. 16.9-11)

¹¹ Soco cu María ndoo ña chata yatyin ri yuhu ñaña, chacú chaa ña. Cha niri ca cha chacú ña, nyehe ñihñi ña chichi ñaña.

¹² Ta nyehe ña uvi tahan ángel ñihno ra sahma cuichin, nyicú ra nu catuvi coño ñuhu ra Jesús. Noo ra nyaá ityi nu catuvi xiñi ra, ta nonga ra ityi nu catuvi chaha ra.

¹³ Ta ángel cuan ndaca tuhun ra chi ña ta catyí ra:

—Maha, ¿ñáá tuhun chacú chaun?

Ta catyí ña:

—Vatyi quehen ñu chi Sutu Mañi yuhu, ta ña chité nya tyihj ñu chi ra —catyí ña chi ángel cuan.

¹⁴ Ni cahán ña tuhun ihya ta nanyocava ña ta nanyehé ña chi ra Jesús yucuan. Soco ña chitó ña cha ra Jesús cuví ra.

¹⁵ Tyicuan ta ra Jesús ndacá tuhun ra chi ña:

—¿Ñáá tuhun chacún? ¿Yóó chi nanducún? —catyí ra chi ña.

Cuñí maa ña vatyí ra sahá cumi chacu cuan cuví ra. Ta catyí ña:

—Tata, tatu yoho quehún chi ra Jesús, catyí chii nya sandoun chi ra, vatyí naquehin chi ra —catyí ña chi ra.

¹⁶ Tyicuan ta catyí ra Jesús chi ña:

—¡María! —catyí ra chi ña.

Maa ña nanyehé ña ta cahán ña chihin ra chihin sahan hebreo, ta catyí ña:

—¡Raboni! —Ta cuñí chi catyí: “Maestro”.

¹⁷ Ta catyí ra Jesús chi ña:

—Ma tiun chii, vatyí ta nandaa que nu nyaá Suti. Soco cuahán ta catyún chi tandihí yañi vatyí cuahin nu nyaá Suti, ta suri Sutu ndo cuví chi ra. Cuahin nu nyaá Nyoi, ta suri Nyoo ndo cuví chi ra —catyí ra Jesús chi ña.

¹⁸ Tyicuan ta chahán cu María ñaha Magdala cuan chisacotó ña chi ra cachicá noo chihin ra Jesús vatyí nyehé ña chi ra Jesús ta catyí ra tuhun cuan chi ña.

Nu tuví ra Jesús nuu ra cachicá noo chihin ra (Mt. 28.16-20; Mr. 16.14-18; Lc. 24.36-49)

¹⁹ Suri maa quiví cuan cha quichaha vitya, cha cuacuaa ta candu iñ ri ra cachicá noo chihin ra Jesús. Ta nyasí vaha yuvehe nu nyicú ra cha cuenda cha yuhví ra chi ra cacuví nuu chi ñu Israel. Ta ra Jesús tuví ra ta chichunanyaa ra mahñu. Ta chaha ra nocumi chi ra, ta catyí ra:

—Na coo cha taxi ri añima ndo —catyí ra.

²⁰ Cha yaha cha catyí ra tuhun ihya ta sañaha ra ndaha ra ta yiqui naha ra. Ta maa ra cacusiñ cuñi ra cha nanyehé ra chi Sutu Mañi yo.

²¹ Ta catyí tucu ra Jesús inga chaha chi ra: —Na coo cha taxi ri añima ndo. Tari tachí Suti tyiño chii, tyicuan caa tachí tyiño chi nyoho —catyí ra chi ra.

²² Tyicuan ta tiví ra siqui ra ta catyí ra chi ra:

—Naquehen ndo Tatyí Ii Nyoo.

²³ Ñu cha sahá ndo tucahnu iñi chi, iyó tucahnu iñi chi ñu. Ta ñu cha ña sahá ndo tucahnu iñi chi, ñahri tucahnu iñi iyó chi ñu —catyí ra Jesús chi ra.

Nu nyehé ra Tomás chi Sutu Mañi yo cha yaha nandoto ra

²⁴ Soco ra Tomás, noo ra chica noo chihin ra Jesús, ra cha catyí ñu: “ra tñihí”, yori ra nyaá chihin ra cuhva cha quichí ra Jesús.

²⁵ Yaha cuan ta canacatyí ra cachicá noo chihin ra Jesús chi ra:

—Nyehe ndi chi Sutu Mañi yo —cacatyí ra chi ra.

Soco ra Tomás catyí ra:

—Tatu ma nyehi ndaha ra nu cahví nu yihí clavú, ta tatu ma tyihi ndahi nu yihí clavú cuan, ta tatu ma tyihi ndahi yiqui naha ra, ma chino iñi —catyí ra Tomás.

²⁶ Uña quiví yaha ta canyicú tucu ra cachicá noo chihin ra Jesús noo vehe. Ta nyaá ra Tomás chihin ra. Tyicuan ta vasi nyasí vaha yuvehe soco quihví ra Jesús ta chichunanyaa ra mahñu ra. Ta chaha ra nocumi ta catyí ra:

—Na coo cha taxi ri añima ndo.

²⁷ Tyicuan ta quichaha catyí ra chi ra Tomás:

—Tyihí nu ndahun nu cahví ndahi. Ta tyihí ndahun yiqui nahi. Ta ma caca uvi iñun, soco chino iñun —catyí ra Jesús chi ra Tomás.

²⁸ Tyicuan ta nacahan ra Tomás ta catyí ra:

—¡Sutu Mañi yuhu! ¡Nyoo Suti cuví chuun! —catyí ra Tomás.

²⁹ Ta catyí ra Jesús chi ra:

—Yoho Tomás, vityin chinó iñun tyi nyehún chi. Si ca cuñí ñu cha ña nyehé ta chinó iñi ñu —catyí ra Jesús chi ra Tomás.

Nu sacoto ra Juan ñáa cuenda chinó libru ihya

³⁰ Ta cuaha ca milagru sacuví ra Jesús nuu ra cachicá noo chihin ra, ta ñahri chichunya nu libru ihya.

³¹ Soco chichunya tuhun ihya vatyí tacuhva chino iñi ndo vatyí ra Jesús cuví Cristo, ra cuví Sehe Nyoo, ta vatyí coo ndo ñayiví cha ma naa ca maa tatu chinó iñi ndo chi ra.

21

Nu tuví ra Jesús nuu ucha tahan ra cachicá noo chihin ra

¹ Cha yaha cuan ta tuví tucu ra Jesús nuu ra cachicá noo chihin ra inga chaha. Tyehe caa tuví ra yuhu miñi Tiberias.

² Iñ ri nyicú ra Simón Pedro ta ra Tomás cha catyí ñu: “ra tñihí” chi, ta ra Natanael, ra ñuu Caná nu cuví Galilea. Nyicú tucu sehe ra Zebedeo ta uvi ca ra cachicá noo chihin ra Jesús.

³ Ta catyí ra Simón Pedro chi ra:

—Cuahin cuatiin tiyaca —catyí ra.

Ta cacatyí ra chi ra:

—Cuhun tucu nyuhu chuhun —cacatyí ra.

Cuhan coyo ra ta quihví coyo ra chichi noo canoa, soco cha cuaa cuan ni noo tiyaca ña catiñ ra.

⁴ Cha vachi cundichin cuan tuví ra Jesús nu ñiti yuhu miñi cuan. Soco ra cachicá noo chihin ra, ña canicohón nuu ra chi ra.

⁵ Tyicuan ta catyí ra chi ra:
—Yoho ra tahan yo, ¿atu ta ñihi ca ndo tiyaca?

Ta canacahan ra ta catyí ra:
—Ta ñihi ca ndi.
⁶ Tyicuan ta nacahan ra Jesús ta catyí ra:
—Tyihi ndo tarraya chiyo vaha canoa chiña, ta ñihi ndo —catyí ra Jesús chi ra.

Tyicuan caa casacuví ra, ta yaha cuan ta nyacua ña cuví tava ra tarraya cuan nu ndutya chaha cha cuaha tiyaca yihí.

⁷ Ta ra cha cuñi xaan ra Jesús chii catyí ra chi ra Pedro:

—¡Sutu Mañi yo cuví! —catyí ra chi ra Pedro.

Cha chiñi ra Simón Pedro vatyí Sutu Mañi yo cuví, ndihví noo ra sahna ra, vatyí tava ra cha cuatiin ra tiyaca, ta quiñi ra cuahan ra chichi ndutya cuan.

⁸ Ta inga ra cachicā noo chihin ra Jesús chaq coyo ra nya yuhu miñi cuan chihin canoa, caxitá ra tarraya cuan tyitú yihí tiyaca, vatyí yatyin ri yuhu miñi cuan cañohó ra ta cha noo cientu metru ri.

⁹ Cuhva cha canoó ra nu ñuhú, cananyehé ra noo nu caá titi ñuhú. Ta catuví noo tiyaca siqui titi ñuhú cuan, ta pan ñandhi.

¹⁰ Ta ra Jesús catyí ra chi ra:
—Nyaca ndo suhva tiyaca cha ni tñin ndo —catyí ra Jesús chi ra.

¹¹ Ta ra Simón Pedro ndaq ra nu canoa ta quichaha xita quiñoho ra tarraya tyitú yihí tiyaca nahnu. Cientu uvi xico uchi uñi tahan ti ñohó. Ta vasi cuaha ti, ña tahnya tarraya cuan.

¹² Tyicuan ta catyí ra Jesús chi ra:
—Ñaha ndo ta curumusa ndo —catyí ra Jesús chi ra.

Ta ni noo ra cachicā noo chihin ra ña cacaña iñi ra candaca tuhun ra yóo ra cuví ra vatyí cachitó ra vatyí Sutu Mañi yo cuví ra.

¹³ Tyicuan ta tuhva ra Jesús ta quehen ra pan, ta chaha ra chi ra. Ta suri tyicuan caa sacuví ra chihin tiyaca.

¹⁴ Ican ihya cuví chaha cu uñi cha tuví ra Jesús nuu ra cachicā noo chihin ra cha yahā cha nandoto ra.

Nu cahán ra Jesús chihin ra Simón Pedro

¹⁵ Cha yahā cha curumusa ra Jesús, ndaca tuhun ra chi ra Simón Pedro:
—Simón, sehe ra Jonás, ¿atu cuñi con chii incan saha ra ihya?

Ta nacahan ra Pedro ta catyí ra:
—Ay, Sutu Mañi yuhu, maun chitón tyi cuñi chuun —catyí ra Pedro.

Ta catyí ra Jesús chi ra:
—Cuhva cha cachi mbee nyihi sane —catyí ra Jesús chi ra Pedro.

¹⁶ Ta ndaca tuhun ra Jesús chi ra inga chaha:

—Simón sehe ra Jonás, ¿atu cuñún chii? —catyí ra Jesús chi ra.

Ta nacahan ra Pedro ta catyí ra:
—Sutu Mañi yuhu, maun chitón tyi cuñi chuun —catyí ra Pedro chi ra.

Ta catyí ra chi ra:
—Saha cumi mbee sane —catyí ra Jesús chi ra Pedro.

¹⁷ Ta chaha cu uñi ndaca tuhun ra chi ra:
—Simón Pedro, sehe ra Jonás, ¿atu cuñún chii? —catyí ra Jesús chi ra.

Cuhva cha ndaca tuhun ra chi ra cha cu uñi chaha tatu cuñi ra chi ra, ra Pedro nducuihya iñi ra, ta catyí ra chi ra:
—Sutu Mañi yuhu, maun chitón yoso caa añime ta maun chitón tyi cuñi chuun —catyí ra Pedro.

Ta ra Jesús catyí ra chi ra:
—Saha cuenda mbee sane.

¹⁸ Cha ndicha catyí chuun vatyí ta tyivaun ndihví noun sahmon ta chahun nu cuñún. Soco na cuchahnun, cusanacaun ndahun ta inga ra cusandihví noo chuun. Ta cunyaca ra chuun nu ña cuñún huhun —catyí ra Jesús chi ra Pedro.

¹⁹ Cha catyí ra Jesús tuhun ihya cuñi ra catyí ra yoso caa cucuvi ra Pedro ta cusacahnu ra chi Nyoo cha cuenda cuan. Yahā cuan ta catyí ra Jesús chi ra Pedro:
—¡Cunyonicon chii! —catyí ra chi ra.

Nu cahán ra Juan tuhun maa ra

²⁰ Tyicuan ta nyocava ra Pedro ta nanyehé ra vatyí nyicón inga ra cha chica noo chihin ra Jesús, ra cha cuñi xaan ra Jesús chi. Suri maa ra chinyañaa ra chi ra Jesús cha cuxiñi ra quivi cuan. Ta ndaca tuhun ra ta catyí ra: “Sutu Mañi yuhu, ¿yóo ra cunaxico tuhun chuun?” catyí ra, ndaca tuhun ra quivi cha ni cumañi cuví ra Jesús.

²¹ Cuhva cha nanyehé ra Pedro chi ra, ndaca tuhun ra chi ra Jesús:

—Sutu Mañi yuhu, ta ra ihya, ¿ñáá cha cucuvi chi ra? —catyí ra chi ra.

²² Nacahan ra Jesús ta catyí ra:
—Tatu cuñi mai cha coo ra nyacua nya ndichi inga chaha, ¿ñáá cha cuenda yoho? Yoho cunyonicon chii —catyí ra Jesús chi ra Pedro.

²³ Tyicuan ta chityā tuhun ihya nu canyicú yañi yo vatyí ra cuan, ma cuví ra. Soco ña catyí ra Jesús cha ma cuví ra. Catyí ra: “Tatu cuñi yuhu cha coo ra nyacua nya quichi inga chaha, ¿ñáá cha cuenda yoho?”

²⁴ Yuhu cuví ra yucuan, ra cha cahán ra Jesús tuhun. Ta nyehi tandihi cuii maa cha cuví ta tyai nu libro ihya. Yuhu chite vatyí tandihi cha tyai, ndicha.

²⁵ Iyó cuaha ca cha sacuví ra Jesús. Tyehe ta chicunyaq tahan tahan tuhun cuan nu

libru, cahví iñi tyi naniñ ñuhu ñayiví ma
cutahan tandihí libru cuan.

Tyiño Cha Casacuví Ra Apóstol: Ra Cha Tyatyíño Ra Jesucristo Chi

Nu catyí ra Jesús tyi cuaquichi Tatyí Ii Nyoo

¹Yoho Teófilo, yuhu ra Lucas sacuhín tutu chuun quivi cuan. Ta nu sacuhín tutu cha xihna ri cuan, tyaj tandihí cha quichaha sacuvi ra Jesús ta tandihí cha sañaha ra nya quivi xihna ri

²ta nya quivi nandaq xica ra andivi. Ta cha cumañi ca nanda ra andivi, nacachí ra chi ra apóstol cuenda ra. Ta tyatyíño ra chi ra chihin Tatyí Ii Nyoo tyi cacaca ra tyiño ra.

³Ta maa ra Jesús nyehe ra tindoho ta chihí ra. Ta cha yaha cuan, nandoto ra ta tuví ra nu canyicú ra apóstol. Ta chichi cha uvi xico quivi, cuaha xaan chaha tuví ra nu canyicú ra, vatyí na cacoto ra vatyí ndicha cha nyitó ra. Ta cahan ra tuhun yoso caa nyacá ñaha Nyoo chi yo.

⁴Cuhva cha nyaá ca ra chihin ra, ra Jesús catyí ra chi ra:

—Ma quita ndo Jerusalén ihya, nyacua nya naquehen ndo Tatyí Ii cha catyí Suti tyi cuhva ra chi ndo, tari catyí chi ndo quivi cuan.

⁵Chihin ndutya sacondutya ra Juan chi ñáyivi. Soco nyoho ña cuaha ca quivi ta cucondutya ndo chihin Tatyí Ii —catyí ra Jesús.

Nu nandaq xica ra Jesús andivi

⁶Cuhva cha canyicú ra apóstol ñin ri chihin ra Jesús, ta candaca tuhun ra chi ra:

—Sutu Mañi yuhu, ¿atu vityin ri cusacacun chi ñuu yo Israel ihya ndaha ra ñuu Roma? —catyí ra.

⁷Ta nacahan ra Jesús ta catyí ra:

—Ña tahní chi coto nyoho nya quivi. Noo tuhun ri maa Nyoo Sutu yo cuacatyí ra ama.

⁸Soco cuhva cha quichi Tatyí Ii siqui ndo cunaquehen ndo tunyee ñi, ta cuquita ndo vatyí cahan ndo tuhun Jerusalén ihya ta tandihí ñuu cha nyicú Judea ta Samaria, ta nichahnu ñuhu ñáyivi.

⁹Ta cha yaha cha catyí ra Jesús tuhun ihya, ta cha ni ri ca cha canyehé ra chi ra, nandaq xica ra andivi, ta quihví ra chichi noo vico. Ta ña canyehé ca ra chi ra.

¹⁰Ta cuhva cha canyehé ndaa ra andivi, ta tuví uvi tahan ángel yatyin nu canyicú ra. Ñihnó ra sahma cuichin.

¹¹Ta cacatyí ra cuan chí ra:

—Nyoho ra Galilea, ¿ñáa tuhun cha ndoo ndo nyehé ndaa ndo andivi? Suri maa ra

Jesús cha nyehe ndo nandaq xica ihya, tyehe caa cuquichi tucu ra inga chaha.

Nu canacachi ra apóstol chi ra Matías vatyí ndihvi ra tyiño nuu ra Judas

¹²Tyicuan ta quita coyo ra apóstol nu chinyicu ra yucu nu iyó yutun olivo cuan. Ta cuanuhú coyo ra ñuu Jerusalén. Ta yatyin ri nyaá ñuu cuan, tari sava hora ri. Ta sava ri hora cuví caca ñáyivi quivi nyitatu ñu, vatyí tyicuan caa catyí ley cha tyaa ra Moisés.

¹³Cuhva cha nachaa coyo ra Jerusalén cuan, candaq ra nu cu uvi piso noo vehe nu ca iyó ra. Ta tandihí ra cuan, ican ra cuví, ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, ta ra Simón cuenda ra cacuñí naquiqui siqui gobiernu Roma, ta ra Judas yañi ra Jacobo.

¹⁴Ta nyita ri ndu ñin ri ra ta ñin ri cuhva cachicá xiñi ra ta cachicán tahvi ra chi Nyoo. Ta nyicú tucu yañi ra Jesús ta cu María sihi ra, ta inga ñusihí ñandihí.

¹⁵Tari noo ciento oco ñáyivi ndu ñin ri ñu quivi cuan. Ta nicuinaryaa ra Pedro. Ta catyí ra chi ñu:

¹⁶—Nyoho yañi, cuñi chi cha cuví tari cuhva catyí nu tutu Nyoo. Vatyí cahan Tatyí Ii chihin yuhu ra David yoso caa cucuhva cuenda ra Judas chi ra Jesús chi ra xaan ñi chi ra.

¹⁷Ta ra Judas cuví ra noo ra chindihí chihin yo. Ta ñin ri chica ra tyiño Sutu Mañi yo chihin yo.

¹⁸Soco chahan ra, ta satá ra noo ñuhú chihin xuhun cha ñihí ra cha chaha cuenda ra chi ra Jesús. Yaha cuan ta canacava ra chihin xiñi ra, ta ndata chichi ra ta quita tandihí chiti yihvi ra.

¹⁹Ta quivi cha cachito ñu ca iyó Jerusalén ihya cha chihí ra, casacunañi ñu chi ñuhu cuan Acéldama. Ta cha chihin sahan maa ñu cuñi chi catyí Nu Catuvi Niñi.

²⁰Vatyí nu libru Salmo catyí chi tuhun ra Judas tyehe caa:

Na ndoo maa ri maa vehe ra.

Ta yori coo chichi.

Ta catyí tucu chi:

Inga ra cunanduvi tyiño nuu ra.

²¹⁻²²Ta vityin nyicú ra cachica noo chihin yo quivi chinyaq Sutu Mañi yo Jesús chihin yo; nya quivi sacondutya ra Juan chí ra, ta nya quivi nandaq xica ra andivi. Ta vityin cuñi chi cha ndu ñin ri noo ra chihin yo, vatyí cuví ra cha ndaa cha cuenda cha nandoto ra Cristo —catyí ra Pedro.

²³Tyicuan ta cacana ra chi uvi tahan ra, chi ra José cha nañi Barsabás, ta suri nañi tucu ra Justo; ta cacana tucu ra chi ra Matías.

²⁴Ta cachican tahvi ra tyehe caa:

—Sutu Mañi yuhu, yoho chitón cha caa añima tandihí ndi. Sañaha chí ndi chichí cha uvi tahan ra ihya, nya ra cha nacachí maun,

²⁵ Vatyí sacuvi ra tyiño cha sacunaq ra Judas cha cuenda cuatyí ra, ta cuahan ra nu tahán chí cahun ra —cacatyí ra, chicán tahvi ra.

²⁶ Tyicuan ta cachahan ra noo sihva, tacuhva nyehe ra nya ra tahán chí nyatu cuan chí. Ta tahan chí chí ra Matías. Ta yucuan cuví nu ndu ñin ri ra chihin ndi uchi ñin apóstol.

2

Nu chaq Tatyí Ii

¹ Ta ñin ri nyicú ñáyivi yihí cuenda ra Jesús ta chaq ñáyivi vico Pentecostés cha sanducahnú ñáyivi Israel. Ta ñin ri cuhva chicá xiñi ñu.

² Ta sana iñi ñu ta nacuiñi ñu noo cha cayu vachi ityi andivi. Tari cha cayu yahá noo tatyí ñihi. Ta iyo cuví tandihí chichí vehe nu canyicú ñu.

³ Tyicuan ta tuví tari yaa ñuhú quití cuatyí siqui noo noo ñu.

⁴ Ta tandihí ñu chitu ñu chihin Tatyí Ii. Ta quichaha cahan ñu inga sahan yoso cuhva saquehen ityi maa Tatyí Ii chí ñu.

⁵ Ta quivi cuan cuaha xaan ra Israel ra vaha chicá chihin Nyoo canyicú ra ñuu Jerusalén cuan. Cuaha xaan ra ca iyó inga ityi ñicahnu siqui ñuhú ñáyivi chaq coyo vatyí casanducahnu ra vico Pentecostés.

⁶ Ta cha cachihí ra cuan cha iyo xaan cuví nu canyicú ñu, ta cuahan coyo ra ta natacaq ra yatyin ri nu nyicú ñu. Ta ña cutuñi iñi ra ñáá cha cuví cuan, vatyí noo noo ra cachihí ra cahan ñu cuhva sahan cha cacahán maa ra.

⁷ Iyo cuñi ra ta catyí ra chí ra tahan ra: —¿Atu ñima ñu Galilea cuví tandihí ñu cha cahan ihya?

⁸ ¿Ñáá tuhun cha chíñi yo cahan ñu cuhva sahan noo noo yo?

⁹ Ihya nyicú yo cha cuví yo ñu Partia, ta ñu Media, ta ñu Elam, ta ñu Mesopotamia, ta ñu Judea, ta ñu Capadocia, ta ñu Ponto, ta ñu Asia.

¹⁰ Ta ñu Frigia ta ñu Panfilia, ta ñu Egipto, ta ñu iyó ityi nuu ca Cirene ityi Africa. Ta nyicú tucu ñu ñuu Roma cha iyó ñuu ihya. Ta suhva ñu cuví ñu ñu Israel nya quivi cacú ñu. Ta inga ñu cuví ñu ñáyivi nanduvi cuenda ñu Israel ta nyicon ñu ley ra Moisés.

¹¹ Iyó tucu ñáyivi ñuhú Creta ta ñu Arabia. Soco tandihí yo ta chíñi yo cahan ñu chihin sahan cha cahan yo. Ta nacatyí ñu cha cahnú cha sacuví Nyoo —cacatyí ra.

¹² Tandihí ra, iyo xaan cacuñi ra, ta yihí ra ndacá tuhun ra chí tahan ra:

—¿Ñáá cha cuñi chí catyí chí tandihí tuhun ihya? —catyí ra.

¹³ Soco inga ra cahan nyaa ra ta cacatyí ra vatyí cachihí ñu.

Nu cahan noo ra Pedro nuu ñáyivi

¹⁴ Tyicuan ta nicuinanyaaq ra Pedro chihin inga uchi ñin tahan apóstol. Ta chihin cha chaa cahan ra ta catyí ra:

—Nyoho yañi, cha cuví ndo ra Israel, ta tandihí nyoho cha iyó ndo Jerusalén ihya. Coño ndo tuhun ihya. Ta cuñi vaha ndo tuhun cha cuacatyí chí ndo.

¹⁵ Vatyí cuñi maa ndo tyi chíñi ndi. Soco ña chíñi ndi, vatyí ña tuhva ñáyivi chíñi cha cuhva ihya, vatyí ni ca ñin cha ñaha ri cuví.

¹⁶ Soco ihya cuví tuhun cha cahan ra Joel, ra cuví profeta Nyoo ta cha naha. Vatyí catyí ra:

¹⁷ Nu cuandihí ca quivi, catyí Nyoo, cusaquichi Tatyí Ii siqui tandihí ñáyivi. Ta cucahan sehe ndo cuende. Ta ra tyivaa ta ñu tyivaa cunyehe ñu cha sañaha Nyoo chí ñu. Ta ra chahnu cunyehe ra ñumahna.

¹⁸ Cusaquichi Tatyí Ii siqui ñu sacuví tyiño nui. Ta cucahan ñu cuende, catyí Nyoo.

¹⁹ Ta catyí ra vatyí cusañaha ra cha iyo cucuvi ityi andivi. Ta ityi nu ñuhu ñáyivi cusañaha ra seña, seña ñihi, seña ñuhú, ta vico ñuhma.

²⁰ Cunduña ñanyii. Ta yoo tari caa tyacu ñihi cunanduvi. Tyicuan caa cucuvi cha ñiri ca cha chaá quivi quichi Sutu Mañi yo. Ta cucuvi noo quivi cahnú vatyí cucutuñi chí yo nuu ra.

²¹ Ta tandihí ñu chicán tahvi sivi ra cacucu ñu. Tyicuan caa catyí ra Joel.

²² Cuñi ndo nyoho ra Israel. Cuñi ndo tuhun cha cuacatyí ihya. Ra Jesús ra Nazaret cuví ra noo ra cha cachí Nyoo chí vatyí quichi ra nu nyicu yo. Ta chitó yo vatyí ndicha vatyí cuaha xaan cha iyo, ta cuaha xaan milagru ta seña sacuví Nyoo nu canyicú yo cha cuenda ra Jesús. Ta nyoho chitó vaha ndo tuhun ihya.

²³ Soco quivi quehen cuenda ndo chí ra, sacuví ndo tari cuhva tyaaq maa Nyoo cuhva nyata quivi xihna ri. Vatyí chahaq cuenda ndo chí ra chí ra quiñi iyó. Ta chitacaq ra chí ra nu cruzi. Ta tyicuan caa chahñi ndo chí ra.

²⁴ Soco Nyoo sanandoto ra chí ra vatyí sacacu ra chí ra ndaha tuhun chihí. Vatyí tuhun chihí ña cuví cunyaca ñaha chí ra.

²⁵ Vatyí ra David cahan ra tuhun ra Cristo ta cha naha, ta catyí ra:

Tyicuan ri nyehí chí Sutu Mañi yo ityi nui. Maa ra nyaá ñin chiyo vahi ta ñahri maa cha cuví sayuhvi chíi.

26 Yucuan chaha cusii xaan cuñi añime. Ta chité yaa chihin cha sii cuñi. Ta siin ri coño ñuhi cunyitatu chi vatyi chité tyi cunandote.

27 Vatyí yoho Nyoo Suti, ma sandoun añime nu nyicu ñu chihí, ta ni ma cuhvon cha tyahyu coño ñuhi.

Vatyí sehe iun cuví chii.

28 Sañahún ityi cha cuahán nu coi ñáyivi chaa cha ma naa ca maa. Ta sacutún chii chihin tusii iñi vatyi nyaún chihin, catyí ra David ta cha naha.

29 Nyoho yañi, chitó cachi yo vatyi ra David sutu chahnu yo chihí ra ta quihvi ra chichi ñuhu. Ta ñaña ra nyaá ca chi ihya nya vityin.

30 Soco ra David cuví ra noo profeta cuenda Nyoo. Ta chitó ra vatyi Nyoo tyaa ra cuhva ta iin ri tuhun cahan ra chihin ra vatyi suri tata maa ra ican cuacacu ra Cristo. Ta ra Cristo, ican ra cunyaca ñaha.

31 Ta tyicuan caa ra David tari cha vatyi nyehę ra cha cuacuvi nu cuahan ca chi quivi. Ta cahan ra tuhun cha cunandoto ra Cristo. Ta catyí ra vatyi ma ndoo añima ra nu nyicu ñu chihí. Ta ni ma tyahyu coño ñuhu ra, catyí ra.

32 Ta ra Jesús ihya sanandoto Nyoo chi ra. Ta tuhun ihya tandihí maa ndi cuví ndi cha ndaa.

33 Nyoo sacahnú ra chi ra Jesús, ta cuatyaá ra chi ra chiyo vaha ra andivi. Ta ra Jesús naquehen cuenda ra Tatyí li cha catyí Sutu yo Nyoo ta cha naha vatyi cuhva ra chi yo. Ta ican cuví cha chahá ra chi ndi vityin. Ican cuví nyehé ndo ta chihí ndo.

34 Vatyí ñima ra David nandaá ra andivi. Vatyí suri maa ra David cahan ra tuhun ra Jesús, ta catyí ra: Catyí Suti Nyoo chi Suti ra Cristo: “Cunyaá chiyo vahi

35 cha niri ca cha caquin chi ra xaan iñi chuun chahun”, catyí Nyoo chi ra Cristo chihin yuhu ra David.

36 Nyoho ta tandihí ca ñu Israel, coto vaha ndo vatyi tuhun ra Jesús ican cahní ihya. Chitacaá ndo chi ra nu cruzi. Soco Nyoo cuatyaá ra chi ra tyi cuví ra Sutu Mañi yo, ra nyaca ñaha chi yo —catyí ra Pedro.

37 Cuhva cha chihí ñu tuhun cahan ra Pedro ihya, nducuihya iñi ñu. Ta ndaca tuhun ñu chi ra Pedro ta chi tandihí ca ra apóstol, ta catyí ñu:

—Nyoho yañi, çyoso caa sacuví ndi vityin? —catyí ñu chi ra.

38 Yucuan ta catyí ra Pedro chi ñu:

—Noo noo ndo ndų uvi iñi ndo cuatyi ndo ta ñasama ndo cuhva iyó ndo nuu Nyoo. Ta condutya ndo chihin sivi ra Jesucristo. Tacuhva na saha ra ticahnu iñi cuatyi ndo. Tyicuan caa ta cua cuhva Nyoo Tatyí li ra chi ndo.

39 Vatyí cha naha catyí Nyoo vatyi cuhva ra Tatyí li ra chi maa ndo, ta chi sehe ndo, ta chi ñu cha cañi nyaa ñandihí. Vatyí tandihí ñu cha nacana Sutu Mañi yo Nyoo chii cucuhva ra Tatyí li ra chi ñu.

40 Chihin tuhun ihya ta chihin inga tuhun, ra Pedro chahá ra tuhun chi ñu ta catyí ra chi ñu:

—Nducu ndo cuhva na sacacu Nyoo chi ndo, tacuhva cuví sandoo ndo cha caa ñáyivi quini iyó ihya —catyí ra chi ñu.

41 Tyicuan ta tandihí ñu cha natijn cuenda tuhun cahan ra Pedro condutya ñu. Ta quita tari noo uñi mil ñu, ta ndu iin ri ñu chihin ñu yihí cuenda ra Jesucristo.

42 Ta tyicuan ri ndu iin ri tandihí ñu, ta chihin cha ñi iñi ñu tyasoho ñu cha sañahá ra apóstol chi ñu. Ta iin ri cuví ñu chihin tahan ñu, ta chican tahvi ñu ta chachí ñu pan ta chihí ñu vinu vatyi nicohón iñi ñu tyi chihí ra Cristo tyiño nuu ñu.

Cuhva iyó ñu yihí cuenda Sutu Mañi yo Jesucristo quivi cuan

43 Ta cuaha milagru ta seña sacuví Nyoo chihin ndaha ra apóstol. Ta tandihí maa ñáyivi iyo cuñi ñu.

44 Tandihí ñu yihí cuenda ra Cristo iin ri cacuvi ñu chihin cha iyó chi ñu.

45 Xicó ñu cha tyayii ñu ta cha iyó chi ñu. Ta sachá ñu xuhun ñu chi tahan ñu yoso cuhva cha chihuhú chi noo noo ñu.

46 Nduquivi ta ndu iin ri ñu nya vehe ñuhu cahnu. Ta ndu iin tucu ri ñu noo noo vehe tahan ñu ta chachí ñu pan ta chihí ñu vinu. Ta iin ri cachachí ñu chihin cha sii cuñi añima ñu. Ta chahá ñu cha cachi tahan ñu chihin cha ñi iñi ñu.

47 Ta sacahnú ñu chi Nyoo. Ta vaha cahan tandihí ñáyivi siqui ñu. Ta tahan tahan quivi cuahan sanducuahá ca Sutu Mañi yo chi ñu cha cuahán sacacu ra.

3

Nu nduvahá noo ra coxo

1 Noo quivi cuahán coyo ra Pedro chihin ra Juan vehe ñuhu cahnu. Cuví chi cuhva caa uñi cha cha iñi, cuhva cha tuhvá ñáyivi Israel cachicán tahvi ñu chi Nyoo.

2 Ta ndi quivi maa nyaá noo ra ndahvi, ra coxo nyata cacų, yuvehe ñuhu cahnu cuan. Vatyí chinyacá ñu chi ra na cacan ra limuxtan chi ñáyivi quihvi yuvehe cuan, ta nañi chi: Yuvehe Tyaqui.

3 Tyicuan ta nanyehę ra coxo cuan chi ra Pedro ta chi ra Juan cha cuaquihvi ra chichi vehe ñuhu cahnu. Ta chican ra noo limuxtan chi ra.

4 Ta cananyehę ra Pedro ta ra Juan chi ra. Ta ra Pedro catyí ra chi ra:

—Nyehę chi ndi —catyí ra.

⁵ Tyicuan ta quichaha nyehe ra coxo cuan chi ra. Cuñi maa ra vatyí iyó cha cuacuhva ra chi ra.

⁶ Soco ra Pedro catyí ra chi ra:

—Ñahri maa xuhun cuichin ta xuhun cuaan iyó chii, ta cuhve chuun. Soco nonga cha iyó chii cua cuhve chuun. Chihin sivi ra Jesucristo ra Nazaret, catyí chuun, ndicuita ta caçon —catyí ra Pedro chi ra.

⁷ Tyicuan ta tiñ ra Pedro ndaha chiyo vaha ra ta nacoñehę ra chi ra. Ta caa cuhva ri cuan nicog fuerza chaha ra ta tatu chaha ra.

⁸ Tyicuan ta ra coxo cuan ndava ra noo, ta nicuinanya ra. Ta quichaha chica ra. Ta quihvi ra chihin ra chichi vehe ñuhu. Ta chicá ra. Ta caña ndava ra. Ta sacahnú ra chi Nyoo.

⁹ Tandihí ñáyivi nyehe ñu chicá ra ta sacahnú ra chi Nyoo.

¹⁰ Ta iyo xaan cuñi ñu ta yuhvi ñu cha cuenda cha nduvaha ra cuan. Vatyí nicohón nuu ñu chi ra. Ta chitó ñu vatyí suri maa ra cuví cha tuhva chinyaq Yuvehe Tyaqui cuan chican ra limuxtan.

Nu cahán noo ra Pedro tuhun ra Cristo nuu ñáyivi nu cuví corredor ra Salomón

¹¹ Ra coxo cha nduvaha cuan, ña saña maa ra chi ra Pedro ta ra Juan. Ta tandihí ñáyivi iyo cuñi ñu ta chingó ñu nataca ñu nu nyicú ra, nya nu cuví corredor ra Salomón chichi vehe ñuhu.

¹² Cha nanyehę ra Pedro cha tyicuan caa, catyí ra chi ñáyivi:

—Nyoho ra Israel, ¿ñáá tuhun cha iyo xaan cuñi nyoho? ¿Ñáá tuhun cha nyehe xaan ndo chi nyuhu? Tari cha vatyí chihin tunyee iñi maa ndi, o cha cuenda cha cachi iyó ndi nuu Nyoo, sanduvaha ndi chi rayi ihya, cuñi maa ndo.

¹³ Nyuhu ña cuví sanduvaha ndi chi ñáyivi. Nyoo cuenda sutu chahnu yo, ra Abraham, ra Isaac, ta ra Jacob, ican ra sacahnú xaan ca ra chi Sehe ra, ra Jesús. Ta maa ndo chaha cuenda ndo chi ra chi ra Pilato, ra cuví tyiño. Ta maa ra cuñi ra saña ra chi ra. Soco nyoho ña chaha ndo.

¹⁴ Cha nuu cha cacan ndo cha saña ra chi ra vaha, ra ii cuan, nyoho chican ndo cha saña ra chi noo ra tuhva chahñi ñáyivi.

¹⁵ Tyicuan caa chahñi ndo chi ra cha chahá ñáyivi chaa coo yo chihin Nyoo. Soco Nyoo sanandoto ra chi ra. Ta ña ndo ra chihin ñu chihí. Ta nyuhu cuví ndi cha ndaa.

¹⁶ Ta suri maa ra Jesús cuví ra chaha fuerza chaha ra coxo ihya. Vatyí chinó iñi ndi tyi iyó tunyee iñi chi ra Jesús. Yucuan chaha ndunyeę chaha ra ihya, ta ñohó nuu vaha ndo chi ra ihya. Ta nduvaha ra vatyí

chinó iñi ndi chi ra Jesús. Ta tandihí nyoho cha nyehe maa ndo vityin.

¹⁷ Chité yañi —catyí ra Pedro— vatyí quivi cha chahñi ndo chi ra Jesús, ña chito ndo tyi ña vaha cha nyacuví ndo. Ta tyicuan caa tucu ra cuví nuu chi ndo, ña cachtó ra.

¹⁸ Soco tyehe caa chingó cava tuhun chahan Nyoo chihin yuhu ra profeta cuenda ra ta cha naha, vatyí catyí ra vatyí ra Cristo cunyehe ra tindoho.

¹⁹ Yucuan chaha ndu uvi iñi ndo cuatyí ndo. Ta ñacuhva ndo añima ndo chi Nyoo, tacuhva na ndachi catyí ndo. Tyicuan ta Sutu Mañi yo sandunyeę ra añima ndo vatyí cohon ra añima ndo.

²⁰ Tyicuan ta cutachi ra chi ra Jesús ra cuví Cristo na quichi ra inga chaha. Vatyí quivi xihna ri tyaq Nyoo cuhva tyi quichi ra cha cuenda ndo.

²¹ Tahán chi cha ndoó ra Jesucristo andivi cha vityin nyacua nya sanduchaa Nyoo tandihí maa. Tari cuhva catyí maa ra chihin yuhu ra profeta cuenda ra ta cha naha.

²² Vatyí tyicuan caa catyí ra Moisés chi sutu chahnu yo: “Cusaquichi Sutu yo Nyoo chi noo ra cahan cuenda ra. Ta suri ñáyivi chi yo cucuvi ra. Ta cuacahan ra tuhun Nyoo chihin ndo tari cahán yuhu. Quichaha ndo tandihí cha catyí ra chi ndo.

²³ Vatyí tandihí ñu cha ma tyasoho tuhun cahan ra, cunaa ñu, vatyí ma cu iñ ri ñu chihin ñáyivi cachi Nyoo chii”, catyí ra Moisés.

²⁴ Ta tyicuan caa tucu tandihí profeta cuenda Nyoo nya quivi ra Samuel ta nyacua nya vityin, casacotę ra tuhun cha cuví vityin.

²⁵ Tandihí promesa cha chaha Nyoo cha chahan ra profeta tuhun ta cha naha, chi maa ndo cuví. Ta tuhun cha natyihí tahan Nyoo chihin sutu chahnu yo, chihin ra Abraham, suri cha cuenda maa ndo cuví. Vatyí catyí Nyoo chi ra Abraham: “Tandihí ñáyivi cha iyó siqui ñuhu ñáyivi cunasoque chi ñu cha cuenda ñáyivi chuun.”

²⁶ Ta quivi sanandoto Nyoo chi Sehe ra, xihna ca nu nyicú ndo tachj ra chi ra, vatyí nasoco ra chi ndo. Tacuhva vatyí tahan tahan ndo sandoo ndo cha quíñi caa —catyí ra Pedro chi ñu.

4

Nu catiñ ra cacuvi nuu vehe ñuhu cahnu chi ra Pedro ta chi ra Juan

¹ Ni cahán ca ra Pedro ta ra Juan chihin ñáyivi, ta chaq coyo tata sutu cuenda ñu Israel chihin ra cuví nuu chi ra sahá cumi vehe ñuhu, ta chihin ra cuví saduceo.

² Cacuxaan xaan ra vatyi ra Pedro ta ra Juan sañahá ra chi ñáyivi ta catyi ra vatyi ndicha cha nandotó ñu chihí, vatyi ra Jesús nandotó ra.

³ Tyicuan ta catiñ ra chi ra. Ta catyihí ra chi ra vehe caa. Ta candoo ra nyacua nya inga quivi vatyi cha iñi xaan cuhva cuan.

⁴ Soco cuaha ñu cha chiñi tuhun cahán ra Pedro nachinó iñi ñu. Ta candu ñin ri ñu chihin ñu yihí cuenda ra Jesús. Ta cha tandihí ñu vasi quita ohon mil ñu cha maa ri maa rayii ri.

⁵ Tuvi inga quivi ta candu ñin ri ra cacuvi tyiño chi ñu Israel, ra chahnu, ta ra casacuaaha cuenda ley cha tyaq ra Moisés, nya Jerusalén cuan.

⁶ Ta ñohó tucu ra Anás ra cuví nuu chi tata sutu. Ta ra Caifás, ta ra Juan, ta ra Alejandro. Ta nyicú tucu tandihí ñáyivi chi ra cacuví nuu chi tata sutu.

⁷ Tyicuan ta catachi ra tyiño chiquehen chi ra Pedro ta chi ra Juan. Ta chitayucu ra chi ra mahñu. Ta candaca tuhun ra chi ra:

—¿Yóó cha chaha ityi chi ndo vatyi sanduvahá ndo chi ra cuan? ¿Yóó chi cha cuenda nyacuví ndo tyehe caa? —cacatyi ra chi ra.

⁸ Ta ra Pedro tyitu ra yihí Tatyí li Nyoo. Ta catyi ra chi ra:

—Nyoho ra nyacá ñaha Israel ñuu yo ihya. Ta nyoho ra chahnu.

⁹ Vityin ndacá tuhun ndo chi ndi tuhun vaha cha cuví chi noo ra coxo ihya, vatyi cuñí ndo coto ndo yoso caa nduvahá ra.

¹⁰ Yucuan chaha cunacatyi ndi chi ndo tacuhva nacoto tandihí ñáyivi Israel. Vatyi ra ihya nanyaá ra nuu tandihí ndo. Vatyi nduvahá ra chihin tunyee iñi ra Jesucristo ra ñuu Nazaret, ra cha chaha cuenda ndo vatyi cúvi ra nu cruzi. Soco Nyoo sanandotó ra chi ra.

¹¹ Ta suri ra Jesús ihya cuví yuu cha chiñuhú ca cha ña cuñí ra savahá vehe cotyíño ra, tari cuhva catyi nuu tutu Nyoo. Ta ícan ndo cuví tari ra savahá vehe ta ña cuñí ndo yuu cha chiñuhu ca cuan.

¹² Vatyi yori inga ra cuví sacacú chi yo. Vatyi noo tuhun ri maa ra chaha Nyoo vatyi sacacu ra chi yo. —catyi ra Pedro chi ñu.

¹³ Tyicuan ta cachiñi ra cacuvi tyiño cuan vatyi ñii xaan iñi ra Pedro ta ra Juan cacahán ra. Ta ñima ra cañoho vaha sicuela cacuví ra. Ta iyo xaan cuñi ra. Tyicuan ta nicohon nuu ra chi ra vatyi ícan ra cuví ra cha cachicá noo chihin ra Jesús.

¹⁴ Ta siin ri, ra cha nduvahá cuan, nanyaá ra chihin ra yucuan. Yucuan chaha ña cuví cahan ña vaha ra cacuvi tyiño cuan siqui ra Pedro ta ra Juan.

¹⁵ Tyicuan ta catyi ra chi ra naquita coyo ninduñi ra chata vehe. Ta candoo maa ra cacuví tyiño cuan candatuhun tahan ra.

¹⁶ Ta catyi ra:

—¿Yoso caa cunyacuví yo chihin ra ihya? Vatyi tandihí maa ñu Jerusalén chitó ñu seña cha casacuví ra ihya. Ta ma cuví catyi yo vatyi ña ndicha.

¹⁷ Soco tacuhva cha ma cono tuhun ihya nicahnu chichi ñuu ihya, cutyanaha yo chi ra, tacuhva vatyi ma cahan ca ra tuhun ra Jesús chihin ñáyivi —cacatyi ra.

¹⁸ Tyicuan ta cacana ra chi ra Pedro ta ra Juan. Ta catyi ra chi ra vatyi ni chiin ca maa ta ma cahan ca ra tuhun ra Jesús. Ta ma sañaha ca ra chi ñáyivi.

¹⁹ Soco ra Pedro ta ra Juan canacahan ra ta catyi ra:

—Ndíchi xiñi nyoho ta nyehe ndo tatu vaha ca cha quichaha ndi chi maa ndo o vaha ca cha quichaha ndi chi Nyoo.

²⁰ Vatyi nyuhu ma cuví cha sandihí ndi cha nacatyi ndi tuhun cha nyehe ndi ta chiñi ndi —cacatyi ra.

²¹ Tyicuan ta nacatyanahá tucu ra chi ra. Soco saña ra chi ra vatyi ña ñihí ra cuhva tachi tuñi ra chi ra. Vatyi tandihí ñáyivi sacahnú ñu chi Nyoo cha cuenda cha cuví cuan.

²² Vatyi rayii cha nduvahá cuan, yaha ca uvi xico cuiya ra, ta tyicuan cuiya nyehe ra tindoho ta nduvahá ra saha Nyoo.

Nu chican ñu yihí cuenda ra Cristo tunyee iñi Nyoo

²³ Ta casaña ra chi ra Pedro ta chi ra Juan. Tyicuan ta cuahan coyo ra nu nyicú ra tahan ra. Ta canacatyi ra tandihí cha cacatyi ra chahnu ta ra cacuví nuu chi tata sutu chi ra.

²⁴ Cuhva cha cachiñi ñu tuhun ihya tandihí ñu ta ñin ri quichahá chican tahvi ñu chi Nyoo. Ta catyi ñu:

—Sutu Mañi yuhu, yoho savahun andivi ta ñuhu ñayivi. Savahun tyañuhu. Ta tandihí ca cha iyó, maun savaha.

²⁵ Ta yoho chihin Tatyí Iun savahun chi ra David ta cha naha. Ta catyi ra:

¿Ñáá tuhun cha naquiqui ñáyivi ña ñohó nuu Nyoo? ¿Ñáá tuhun chicá xiñi ñu cha ñima ri tuhun?

²⁶ Rey ta inga cha nyacá ñaha siqui ñuhu ñayivi ihya candu cuita ra sicun Sutu Mañi yuhu, ta siqui ra Cristo, catyi ra David.

²⁷ Sutu Mañi yuhu, ndicha vatyi ra Herodes, ta ra Poncio Pilato candu ñin ri ra ñuu Jerusalén ihya chihin ra ñuu Roma ta chihin ra Israel vatyi cahñi ra chi ra Jesús Sehe iun cha cachí vahun.

²⁸ Ta tyicuan caa ta casacuví ra, tari cuhva cha catyi maun ta cha naha tyi cucuvi.

²⁹ Ta vityin, Sutu Mañi yuhu, nyehe cha tyanahá ra chi ndi. Ta cuhva cha cuni ca

iñi ndi tyi tyiño nuu maun sacuvi ndi, Sutu Mañi yuhu. Ta cuhva cha cahan ndi tuhun chihin cha ña yuhví ndi.

³⁰ Ta chihin fuerza maun ta cunduvaha ñu cuhvi, ta cunyehe ndi seña ta milagru cha cuenda tunyee iñi ra Jesús Sehe iun —catyí ñu chicán tahvi ñu.

³¹ Ta cuhva cha ndihi savaha ñu oración ta tañ nu nyicu ñu. Ta tandihi ñu chitu ñu chihin Tatyí Ii ta cahan ñu tuhun Nyoo chihin cha ñi iñi ñu.

Ñahri cha cumañi chi ñu yihí cuenda Nyoo

³² Tandihí ñu cha chinó iñi, iin ri cuví ñu, ta iin ri cuhva chicá xiñi ñu. Ni noo ñu ta ña catyí ñu vatyí chi maa ñu cuví cha iyó chi ñu, soco chi tandihí ñu cuví, catyí ñu. Vatyí iin ri nyicu ñu.

³³ Ta chihin tunyee iñi cahnu, cacahán ra apóstol tuhun cha nandoto Sutu Mañi yo Jesús. Ta Nyoo nasocó xaan ra chi tandihí ra.

³⁴ Ta ni noo ñu ta ñahri cumañi chi ñu vatyí tandihí ñu cha iyó vehe o ñuhú, xicó ñu. Ta quichi nyacá ñu xuhun,

³⁵ ta chahá cuenda ñu chi ra apóstol. Ta maa ra nasachá ra chi noo noo ñu yoso cuhva cha chiñuhú chi ñu.

³⁶ Tyicuan caa sacuví noo ra cha ñañi José. Ra cuan vachi ra tata ra Levi. Ta cacu ra ñuhú Chipre cha nyaá mahñu tyañuhu. Ta ra apóstol sacunañi ra Bernabé chi ra. Ta cuñi chi catyí sivi cuan: Ra Naquehen Ndhavi.

³⁷ Ta ra Bernabé cuan xico ra ñuhú ra. Ta chahá ra xuhun cuan chi ra apóstol.

5

Cuatyí ra Ananías ta cu Safira

¹ Soco noo ra cha ñañi Ananías chihin cu Safira ñasihi ra, xico ñu noo ñuhú.

² Soco tixehe ñu suhva xuhun. Tyicuan ta chinyacá ra Ananías suhva xuhun chi ra apóstol. Ta catyí ra vatyí tandihí xuhun cha quiyahví ñuhú cuví cuan.

³ Tyicuan ta catyí ra Pedro chi ra:

—Yoho Ananías, ¿ñáá tuhun cha chahun cha quihvi ra ña vaha añimon, vatyí cuñún sandavi ñahun chi Tatyí Ii, ta catyún vatyí tandihí xuhun cha quiyahví ñuhu cuví ihya ta ndoún chihin suhva?

⁴ Chuun cuví ñuhú, ta chuun cuví xuhun cha ñihun cuenda ñuhú cuan. ¿Ñáá tuhun cha cuñún sandavi ñahun chi Nyoo ta catyún tyi tandihí xuhun chahun? Ñima chi nyuhu sandavi ñahun, chi Nyoo sandavi ñahun —catyí ra Pedro chi ra Ananías.

⁵ Cha chiñi ra Ananías tuhun cha cahan ra Pedro, nduva ra ta chihí ra. Ta quichi noo cha yuhvi cuñi ñáyivi cha chitó ñu tuhun ihya.

⁶ Tyicuan ta quichí coyo suhva ra tyivaa ta tyihí ra coño ñuhu ra chichi noo sahma. Ta chahan ra chityihí ra chi ra chichi ñuhú.

⁷ Yahá noo uñi hora ta chaq ñasihi ra Ananías ta quihvi ña nu nyicu ra apóstol. Soco ña chitó ña cha cuví cuan.

⁸ Ta quichahá ndaca tuhun ra Pedro chi ña ta catyí ra:

—¿Atu tyehe cuví yahvi cha quiyahví ñuhú ndo? —catyí ra.

Ta nacahan ña ta catyí ña:

—Ay, tyehe cuví yahvi chi —catyí ña chi ra.

⁹ Tyicuan ta catyí ra Pedro chi ña:

—¿Ñáá tuhun cha ñoho naha ndo tuhun ta sandavi ñaha ndo chi Tatyí Ii Sutu Mañi yo Nyoo? Cha cuandichi coyo ra cha chahan chityihí chi yun chichi ñuhú. Ta vityin cuhun tucu ra cutiyihí ra chi yoho —catyí ra Pedro chi ña.

¹⁰ Caa cuhva ri cuan ta nduva ña chaha ra Pedro, ta chihí ña. Ta caquihvi coyo ra tyivaa cuan, ta nyehe ra vatyí chihí ña. Ta canacoñehé ra chi ña ta chityihí ra chi ña xiin yí ña.

¹¹ Ta tandihí ñáyivi yihí cuenda ra Cristo, ta tandihí ca ñu chitó tuhun cuan, canayuhvi xaan ñu.

Cuaha milagru ta seña sacuvi ra apóstol

¹² Cuaha seña ta milagru sacuví ra apóstol sahá Nyoo nu nyicu ñáyivi. Ta tandihí ñu yihí cuenda ra Cristo ndu iin ri ñu nu cuví corredor ra Salomón.

¹³ Ta ni nonga ñu cha inga cuenda ta ña cañá iñi ñu cutahan ñu chihin ñu yihí cuenda ra Cristo. Soco vaha cahan ñáyivi siqui ñu.

¹⁴ Ta cuaha xaan ñáyivi nachinó iñi chi Sutu Mañi yo Jesús, tari rayi ta ñusihi.

¹⁵ Ta nyacua tavá ñu chi ñu cuhvi ityi cahnu, chacún ñu chi ñu nu chito. Vatyí tatu yaha ra Pedro soco vasi xiñahñu ra yaha siqui ñu, ta nduvaha ñu.

¹⁶ Tyicuan tucu ñu iyó yatyin ri Jerusalén cuan, quichí nyaca ñu chi ñu cuhvi ta ñu cha yihí tatyí ña vaha chi. Ta nduvahá tandihí ñu.

Nu nyehé ra Pedro ta ra Juan tindoho

¹⁷ Tyicuan ta ra cuví nuu chi tata sutu, ta ra cayihí cuenda ra cuví saduceo, quíni cuñi ra nyehe ra chi ra apóstol cha cuenda cha vaha cha casacuví ra chihin tunyee iñi chahá Nyoo chi ra.

¹⁸ Tyicuan ta catiñ ra chi ra apóstol. Ta catyihí ra chi ra vehe caa.

¹⁹ Soco cha cuaa cuan quichí noo ángel cha tachi Sutu Mañi yo, ta nuñá ra yuvehe caa cuan. Ta tavá ra chi ra. Ta catyí ra chi ra:

²⁰ —Cughan ndo ta cujnanyaa ndo chichi vehe ñuhu cahnu. Ta ñacatyí ndo chi ñáyivi yoso caa cuví coo ñu ñáyivi chaa cha iyó ndo —catyí ángel cuan chi ra.

²¹ Cha cachiñi ra tuhun cahan ángel cuan, ta cuahan coyo ra. Ta ñaha cuii ri quihvi coyo ra chichi vehe ñuhu cahnu. Ta quichaha sañaha ra chi ñáyivi. Ta cha ni ri ca cha sañahá ra apóstol cuan, ndu iin ri ra cuví nuu chi tata sutu ta ra ndihi chihin ra. Ta cana ra chi ra cacuví tyiño cuenda ñáyivi Israel vatyí coo ra junta. Tyicuan ta tachí ra na cuquehen chi ra apóstol nu cañohó ra vehe caa cuan.

²² Soco cuhva cha chaq coyo policia chichi vehe caa cuan, ña nañihí ra chi ra apóstol. Ta cuanuhu coyo ra cuanacatyí ra chi ra cuví nuu chi tata sutu.

²³ Ta cacatyí ra chi ra:
—Nyasi yuvehe caa cuan ta chaq ndi. Ta sindaro, tayucú ra yuvehe casahá cumi ra. Soco cuhva cha nuñá ndi, ña nañihí ndi chi ni noo ra chichi vehe caa cuan —catyí ra chi ra.

²⁴ Cuhva cha cachiñi tata sutu chihin ra cuví nuu chi ra, ta ra cuví nuu chi ra casaha cuenda vehe ñuhu tuhun ihya, iyo xaan cuñi ra. Ta candatuhun tahan ra yoso caa sacuvi ra ta cundihi tuhun cuan.

²⁵ Tyicuan ta chaq noo ra ta catyí ra:
—Ra cha tyihí ndo vehe caa cuan, nyicú ra chichi vehe ñuhu sañahá ra chi ñáyivi —catyí ra.

²⁶ Tyicuan ta ra cuví nuu chi ra casahá cuenda vehe ñuhu, chahan ra chihin policia, ta chiquehen ra chi ra chihin cha vii ri ta ña cañi ra chi ra, vatyí yuhví ra chi ñáyivi coto tuchi ñu yuu chi ra.

²⁷ Chinyaca ra chi ra nuu ra cacuvi tyiño vehe ñuhu cahnu. Ta ra cuví nuu chi tata sutu catyí ra chi ra:

²⁸ —Nyuhu catyí cachi ndi chi ndo vatyí ma cahan ca ndo tuhun ra Jesús. Soco nyoho ña tyasohó maa ndo. Cha ndihi maa chichi ñuu Jerusalén sacotó ndo tuhun ra. Ta cuñi ndo natyaa ndo siqui ndi vatyí nyuhu chahñi ndi chi ra cuan —catyí ra cuví nuu chi tata sutu chi ra apóstol.

²⁹ Tyicuan ta nacahan ra Pedro ta inga ra apóstol, ta catyí ra:

—Nyaá siqui ndi cha quichaha xihna ca ndi chi Nyoo ta ñima ca chi rayi.

³⁰ Nyoo cuenda sutu chahnu yo ican sanandotó chi ra Jesús, ra cha chitacaq ndo nu cruzi ta chahñi ndo chi ra.

³¹ Ta ra Jesús ican ra cuví ra cha sacahnu xaan Nyoo chi, ta cuatyaq ra chi ra chiyo vaha ra, vatyí cunyaca ñaha ra tandihi. Ta noo tuhun ri maa ra cuví ra sacacú chi yo. Vatyí tyicuan caa chahá ra cuhva chi yo cha cuví yo ñu Israel na ndu uvi iñi yo cuatyí yo tachuha saha ra ticahnu iñi cuatyí yo.

³² Ta nyuhu cuví ndi cha ndaa cuenda ihya. Ta tyicuan caa tucu Tatyí Ii cha chaha Nyoo cunyaa aña ñu quichahá chi ra —catyí ra Pedro chi ra.

³³ Ta cha cachiñi ra cha catyí ra Pedro, nduxaan xaan ra. Ta cuñi ra cahñi ra chi ra.

³⁴ Soco mahñu ra cacuví tyiño cuan ñohó noo ra cuví fariseo cha nañi Gamaliel. Ta cuví ra ra sacuahá cuenda ley ra Moisés. Ta ñáyivi sahá xaan ñu ñáyivi chi ra. Ta ra Gamaliel cuan, nicuinanyaq ra. Ta tachí ra naquita coyo ra apóstol cuan noo cuhva ri. Tyicuan ta quita coyo ra.

³⁵ Ta quichaha catyí ra Gamaliel cuan chi inga ra cacuví tyiño:

—Nyoho ra nyacá ñaha ñu Israel, saha ndo cuenda chi ndo chihin cha cua cunyacuvi ndo chihin ra chiña.

³⁶ Nicohon iñi ndo vatyí cha iyó suhva quivi ndicuita noo ra cha nañi Teudas. Ta catyí ra vatyí cuví ra noo ra vaha. Ta tari cha cumi cientu rayi chinyicon chi ra. Soco yaha cuan chahñi ñáyivi chi ra. Ta tandihi ra chinyicon chi ra nacutya cuatyí ra. Ta ndihi tuhun.

³⁷ Yaha cuan ta nu cuahan ca chi, quivi nacahvi ra gobiernu chi ñáyivi, ta ndicuita ra Judas ra ityi Galilea cuan. Ta cuaha ñu chinyicon chi ra. Soco suri chahñi ñáyivi chi ra. Ta tandihi ñu cha chinyicon chi ra chitya cuatyí ñu.

³⁸ Yucuan chaha saña ndo chi ra chiña. Ta ma tyihi ndo chi ndo chihin ra vatyí tatu tuhun ñáyivi ri cuví cha chicá noo ra, cundihi tuhun.

³⁹ Soco tatu ndicha tyi tuhun Nyoo cuví, ma cuví chi nyoho sativi ndo. Saha ndo cuenda chi ndo coto vaha chihin Nyoo cañi tahan ndo —catyí ra Gamaliel chi ra.

⁴⁰ Tandihí ra ndoq ra vaha. Tyicuan ta cana ra chi ra apóstol. Cacañi policia chi ra. Ta chasi ra nu cahan ca ra tuhun ra Jesús. Tyicuan ta saña ra chi ra.

⁴¹ Ta quita coyo ra apóstol nuu ra cuví tyiño. Ta sii xaan cacuñi ra vatyí chaha Nyoo cuhva vatyí nyehé ra tindoho cha cuenda ra Jesús.

⁴² Ta ña casandihí ra cha cacahán ra. Ta ndiquivi ri sañahá ra tuhun ra Jesucristo vehe ñuhu ta vehe ñáyivi ñandihí.

6

Nu nacachí ñu yihí cuenda ra Jesús ucha tahan ra vatyí saha cuenda ra ñáa cha chiñuhu chi ñu

¹ Ta nu cuahan ca chi quivi cuaha xaan nanduví ñáyivi cha yihí cuenda ra Cristo. Tyicuan ta ñu cha cahán sahan griego quichaha cahan ñu siqui ñu cha cahán sahan hebreo cuan. Vatyí catyí ñu tyi ña tyiñuhú vaha ra cha cahán sahan hebreo

chi ñu chihj yí cuenda ñu, cuhva cha sachá ra cha cacachi ñu ndiquivi ri.

² Tyicuan ta ndi uchi uvi tahan apóstol sandu ñin ri ra chi tandihí ñu yihí cuenda ra Cristo. Ta cacatý ra chi ñu:

—Ña vaha cha sandihí ndi cha cahan ndi tuhun Nyoo ta sachá ndi cha cachi ndo.

³ Yucuan chaha yañi, nanducu ndo ucha tahan ra nu canyicú ndo ihya, ra vaha iyó chihin Nyoo, ra chiñi tuñi, ra tyitú yihí chihin Tatyí Ii. Ta cuhva yo tyiño ihya chi ra.

⁴ Ta nyuhu sañihí ndi cacan tahvi ca ndi. Ta cuasañaha ca ndi tuhun Nyoo —catý ra apóstol.

⁵ Tandihí ñu ndoó ñu vaha. Ta nacachí ñu chi ra Esteban. Vatyí chinó xaan iñi ra chi Nyoo. Ta tyitu ra chihin Tatyí Ii. Ta nacachí tucu ra chi ra Felipe, ta chi ra Prócoro, ta chi ra Nicanor, ta chi ra Timón, ta chi ra Parmenas, ta chi ra Nicolás cha cuví ra noo ra ñuu Antioquía, ta nanduví ra noo ra Israel.

⁶ Tyicuan ta quichí nyaca ra chi ra nu nyicu ra apóstol. Tyicuan ta catýso ra ndaha ra xiñi noo noo ra ta cachican tahvi ra chi Nyoo cha cuenda ra.

⁷ Ta cuahan chitya ca tuhun Nyoo. Ta nducuahá ca ñu yihí cuenda ra Cristo ñuu Jerusalén. Ta na chingo iñi tucu cuaha tata sutu cuenda ñu Israel ñandihí.

Nu catyihí ra chi ra Esteban vehe caa

⁸ Ra Esteban cuví ra noo ra cha tyitú chihin tunyee iñi Nyoo. Ta vaha xaan ñáyivi cuví ra vatyí tyitu añima ra chihin cha vaha Nyoo. Ta cuaha xaan milagru ta seña sacuví ra nu nyicú ñáyivi.

⁹ Tyicuan ta suhva ra vehe ñuu ñuu Israel cha nañi Vehe Ñuhu Cuenda Ñáyivi Ndoó Libre, candu ñin ri ra chihin ra ñuu Cirene, ta ra ñuu Alejandría, ta ra ityí Cilicia, ta ra ityí Asia. Ta quichahá cuví yuhu ra chihin ra Esteban.

¹⁰ Soco ña cacuví chasaha ra chi ra, vatyí ra Esteban cahán ra chihin cha chiñi tuñi cha chaha Tatyí Ii chi ra.

¹¹ Tyicuan ta catýyahví ra cuan chi suhva ra vatyí canducu ra cuendu chaha ra Esteban ta catý ra cuendu cuan vatyí ra Esteban cahán ña vaha ra siquí ra Moisés, ta siquí Nyoo.

¹² Yucuan chaha tandihí ñáyivi cuan naquiquí ñu. Tyicuan ta ra chahnu ta ra sacuahá cuenda ley ra Moisés, catin ra chi ra Esteban. Ta chahan ra chinyaca ra chi ra nu ndu ñin ri ra cuví tyiño cuenda vehe ñuhu ñu Israel.

¹³ Ta canducu ra chi ra cahan cuendu chaha ra. Ta maa ra catý ra tyehe caa:

—Ra Esteban ihya, ña sandihí ra cha cahan cuehe ra siquí vehe ñuhu yo ta siquí ley ra Moisés.

¹⁴ Ta chiñi ndi cahan ra vatyí ra Jesús ra Nazaret cuan cusatani ra vehe ñuhu cahnú ihya. Ta cunasama ra costumbre cha sandoo ra Moisés chi yo na —catý ra cuendu cuan siquí ra Esteban.

¹⁵ Tyicuan ta ra cacuví tyiño ta ra canyicú yucuan canyehé ra chi ra Esteban vatyí tari maa nuu ángel tyicuan caa nuu ra cuhva cuan.

7

Nu cahán ra Esteban tuhun Nyoo chihin ñáyivi nducú cahñi chi ra

¹ Tyicuan ta ra cuví nuu chi tata sutu ndaca tuhun ra chi ra Esteban, ta catý ra: —¿Atu ndicha cha catý ra ihya?

² Tyicuan ta nacahan ra Esteban ta catý ra:

—Nyoho yañi, ta nyoho tata, cuiñi ndo tuhun cahín. Sutu yo Nyoo cha cahnú ca tuví ra nuu sutu chahnú yo, ra Abraham quivi nyaá ra ityí Mesopotamia cha niri ca cha cumañi cuoco ra nya ñuu Harán.

³ Ta catý ra chi ra: “Sandoo ñuun, ta chi tandihí ñáyivi chuun. Ta cunuhu inga ñuu cha cusañahi chuun”, catý Nyoo chi ra Abraham.

⁴ Tyicuan ta ra Abraham quitá ra ñuu Caldea ityí Mesopotamia cuan, ta cuanuhu ra nya ñuu Harán. Ta yucuan cuví nu chihí sutu ra. Yaha cuan saquichí Nyoo chi ra ñuhú nu iyó yo vityin.

⁵ Soco ñahri ñuhú chahá Nyoo chi ra quivi cuan. Ni noo nu cuinanyaa chaha ra ta ña chahá ra. Soco catý Nyoo chi ra vatyí cucuhva ra. Ta cutahan chi chi sehe ra chata cha yaha cuví ra. Tyicuan caa catý Nyoo chi ra Abraham, vasi ta coo ca sehe ra quivi cuan.

⁶ Ta siin ri catý Nyoo chi ra vatyí ñáyivi chi ra cuoco ñu inga ñuu. Ta cusacuví ñu tyiño nuu ñáyivi ñuu cuan, ta ma tyiyahví ñu chi ñu. Ta cunyehe ñu tindoho cumi cientu cuiya.

⁷ Soco catý tucu Nyoo chi ra tyehe caa: “Ñáyivi ñuu cuan cusanyehé ñu tindoho chi ñáyivi chuun. Yucuan cuenda cuatachi tuñi yuhu chi ñu. Ta yahá cuan ta cuquita ñáyivi chuun ñuu cuan ta cuquichi ñu ihya. Ta cusacuví ñu tyiño nuu mai ihya”, catý Nyoo chi ra Abraham.

⁸ Tyicuan caa natyihí tahan Nyoo tuhun chihin ra. Ta chahá Nyoo noo costumbre cha cuasacuví ñu coto naa iñi ñu. Chahá ra tyi cutahnya chiin ñi xiñi ndivi cha lee sehe ñu, o cha sahá ñu circuncidar chi sehe ñu cuví cuan. Ta cha yahá uña quivi cha cacú ra Isaac sehe ra Abraham, tyicuan caa

chinyacuví ra chihin ra. Ta suri tyicuan caa sacuví tucu ra Isaac chihin ra Jacob sehe ra. Ta ra Jacob tucu chihin uchi uvi tahan sehe ra, tyaa ra noo seña cuan chi noo noo sehe ra. Ta ican ra cuan cacuví sutu chahnu yo.

⁹ Ta ican uchi iin tahan ra sehe ra Jacobo ihya catasi cuñi ra nyehe ra chi ra José yañi ra cha cuenda vatyi vaha ca ra nuu sutu ra. Yucuan chaha caxico ra chi ra na cuhun ra Egipto. Soco Nyoo ña sandoó ra chi ra José.

¹⁰ Ta sacacú ra chi ra nu nyehé ra tindoho. Ta chahá ra cha chiñi tuñi ra chi ra. Ta chahá ra cha vaha coo ra nuu ra Faraón, ra cuví rey Egipto. Ta rey cuan chahá ra cha cuví ra José gobiernu Egipto cuan. Ta chinyacá ñaha tucu ra vehe maa rey ñandihí.

¹¹ Tyicuan ta chiyo tama nicahnu ityi Egipto ta ityi Canaán. Ta nyehe xaan ñáyivi tindoho. Ta tandihí sutu chahnu yo cha chicoo tyembu cuan ña cañihí ra cha cachi ra.

¹² Soco quívi chito ra Jacob vatyi iyó trigu nya Egipto, ta tachí ra chi sehe ra na cuquehen ra. Ta chahán coyo ra noo chaha.

¹³ Ta cha cu uvi chaha cha chahán coyo ra, ra José sacoto ra chi ra vatyi yañi ra cuví chi ra. Yucuan quívi chito ra Faraón yóo chi tata vachi ra José.

¹⁴ Tyicuan ta tachí ra José tyiño na quichi sutu ra, ra Jacob, chihin tandihí ñáyivi chi ra, uñi xico chahun tahan ñu.

¹⁵ Ta tyicuan caa cuví cha cuahan ra Jacob cuacoo ra Egipto cuan. Yahá cuan ta chihí ra yucuan. Ta chihí tucu sehe ra, ra cacuví sutu chahnu yo.

¹⁶ Tyicuan ta chaá quívi cha chinanyaca ñu yiqui ra Jacob ta yiqui sehe ra nya Siquem. Ta yucuan quihvi ra chichí ñuhú nu satá ra Abraham noo ñaña chi sehe ra Hamor ta cha naha.

¹⁷ Soco cha ni cumañi ca quita ñu Egipto, ñáyivi chi ra Abraham cha iyó Egipto cuan cuaha xaan nanduví ñu. Ta cha nyañaaa yatyin quívi cha cuacuhva Nyoo ñuhú chi ñu tari cuhva catyi cachi ra chi ra Abraham.

¹⁸ Tyicuan ta quichahá nyaca ñaha noo rey cha ña ñohó nuu chi ra José.

¹⁹ Rey cuan sandaví ñaha ra chi ñáyivi chi yo cuan. Ta sanyehe xaan ra tindoho chí ñu, ta saníñi ra chí ñu na sanandoo ñu chí sehe ñu cha ni cacu vatyi na cúvi ndotyín.

²⁰ Ta suri quívi cuan cacú ra Moisés. Ta tahan xaan iñi Nyoo chí ra lee cuan. Ta uñi yoo sacuahnu síhi ra chí ra nya vehe ña.

²¹ Yaha cuan ña cuví ca tixehe síhi ra chí ra. Ta sandoo ña chí ra chichí noo tica yuhu yutya. Tyicuan ta sehe maa rey Egipto cuan nañihí ña chí ra. Ta naquehen ña chí

ra. Ta sacuahnu ña chí ra, tari cha sehe ña cuví chí ra.

²² Yucuan chaha cutuhva ra Moisés tandihí cha chitó ñu Egipto. Ta sin ri nyee xaan cuhva cahan ra, ta cuhva sacuví ra ñandihí.

²³ Ta quívi cha chaá uvi xico cuiya ra Moisés quichi cuví iñi ra cuhun ra cunyehe ra nu nyicú ñu Israel, ñáyivi chí ra.

²⁴ Tyicuan ta noo quívi nyehe ra nu cañi noo ra Egipto cuan chí noo ra Israel cuan. Tyicuan ta chahñi ra Moisés chí ra Egipto cuan vatyi satai iñi ra chí ra Israel ra ñuu ra.

²⁵ Cuñi maa ra Moisés cuan vatyi ñáyivi Israel cuan cutuñi iñi ñu tyi Nyoo tachí chí ra vatyi cusacacu ra chí ñu. Soco maa ñu ña tuví iñi ñu cha tyicuan caa cucuvi.

²⁶ Tyicuan ta cha inga quívi cuan nyehé ra Moisés chí uvi tahan ra Israel cha cacañi tahan ra. Ta ra Moisés, cuñi ra cha ma cacañi tahan ca ra, ta quichaha catyi ra: “Ña vaha cha cacañi tahan nyoho, vatyi suri yañi ndo cuví”, catyi ra chí ra.

²⁷ Tyicuan ta ra cha cañi chí tahan cuan tyandahá ra chí ra Moisés, ta catyi ra chí ra: “¿Yóo cha tyatyño chí yoho vatyi cunyaca ñahun ta cvun juez chí ndi?”

²⁸ ¿Atu cuñun cahñun chí tari chahñun chí ra Egipto cuan icu?” catyi ra chí ra Moisés.

²⁹ Cuhva cha chiñi ra Moisés cha catyi ra, chinó ra. Ta cuahan ra nya ñuu Madián. Yucuan ñihí ra ñasihí ra. Ta yucuan chiyo uvi tahan sehe ra.

³⁰ Yahá uvi xico cuiya. Tyicuan ta noo quívi chicá noo ra Moisés chiqui ndi yatyin noo yucu cha nañi Sinaí. Ta nyehe ra noo taca iñu cha cayú. Tyicuan ta tuvi noo ángel chichí ñuhú cha cayu cuan.

³¹ Iyo xaan cuñi ra Moisés cha nyehé ra yucuan. Ta cuhva cha tuhva yatyin ca ra vatyi tacuhva nyehe vaha ra, chiñi ra noo ndusu Sutu Mañi yo. Ta catyi ra tyehe caa:

³² “Yuhu cuví Nyoo cuenda sutu chahnu, Nyoo cuenda ra Abraham, ta ra Isaac, ta ra Jacob”, catyi Nyoo chí ra. Tyicuan ta ra Moisés quichahá nihi ra chihin cha yuhvi ra. Ta ña caña iñi ra nanyehe ra.

³³ Ta quichaha catyi tucu Sutu Mañi yo chí ra: “Tava ndichan chahun vatyi ñuhú nu chañun, ñuhú ii cuví.

³⁴ Yuhu nyehí tandihí tindoho cha nyehé ñáyivi cuende ñuu Egipto chíña. Ta chíñi ndusu ñu cha chacú chaa ñu. Yucuan chaha noó xique vityin vatyi sacaqui chí ñu. Ñaha, vatyi cutachi chuun nya Egipto”, catyi Nyoo chí ra Moisés.

³⁵ Quívi cuan ña cuñi ñáyivi Israel chí ra Moisés cha cunyaca ñaha ra chí ñu, ta catyi

ñu chi ra: “¿Yóó cha tyatyíño chi yoho vatyí cunyaca ñahun ta cuvun juez chi ndi?”, catyí ñu chi ra. Ta vasi ña cuñí ñu cha cunyaca ñaha ra chi ñu, soco Nyoo tachí chi ra vatyí cuvi ra nuu, ta sacacu ra chi ñu. Vatyí tyicuan caa catyí ángel cha tuví nuu ra nu taca íñu cha cayu cuan.

³⁶ Ta ican ra Moisés cuan tava chi ñáyivi Israel Egipto cuan. Ta cha yaha savaha ra milagru ta seña ñuu cuan, ta sacuví tucu ra nu yahá ñu Tyañuhu Cuaha. Ta nu chica noo ñu ñuhú ityi chichi cha uvi xico cuiya sacuví tucu ra ñandihi.

³⁷ Ta suri maa ra Moisés cuan cuví ra cha catyí chi ñu Israel ta cha naha tyehe caa: “Nyoo cutachi ra noo profeta ra tari tachí ra chi mai. Ta cucuvi ra noo ra Israel tari maa ndo. Quíchaha ndo chi ra”, catyí ra.

³⁸ Ta suri maa ra Moisés cuan ndihi ra chihin ñáyivi chahnu yo nu chica noo ñu ñuhú ityi cuan. Ta ican ra cuví ra cha chahan ángel cuan chihin nya yucu Sinaí. Ta ican ra quehen cuenda ra tuhun yoso caa coo ñáyivi ta sañaha ra chi yo.

³⁹ “Soco ñáyivi chahnu yo ña quichaha ñu chi ra. Tava xiin ñu chi ra. Ta cacuñí ñu cunuhu coyo ñu nya Egipto.

⁴⁰ Yucuan chaha cuhva cha nyaá ca ra Moisés yucu Sinaí ta chahan ñáyivi chihin ra Aarón ta catyí ñu: “Savahun suhva nyoo cha cahun coyo ityi nuu ndi. Vatyí ña chitó ndi ñáá cha cuví chi ra Moisés, ra cha tava ndi Egipto”, catyí ñu.

⁴¹ Tyicuan ta casavaha ñu noo becerru xuhun cuaan. Tyicuan ta cachahñí ñu quiti vatyí cuhva cuenda ñu chi xitohyo cuan. Ta sií xaan cuñí ñu cachiyó ñu vico cuenda xitohyo cha casavaha ñu chihin ndaha ñu.

⁴² Tyicuan ta Nyoo cuachiyó ra chi ñu. Ta saña ndaha ra chi ñu vatyí cusacahnu ñu chi ñanyii, chi yoo, ta ñáá ndihi tiñoó cha iyó ityi andivi. Vatyí tyehe caa catyaá ra profeta cuenda Nyoo nu libro ta cha naha: Nyoho ñáyivi Israel, ¿atu chahñí ndo quiti vatyí cuhva cuenda ndo chi yuhu chichi cha uvi xico cuiya cha chica noo ndo ñuhu ityi? Ñima.

⁴³ Soco sacahnu ndo chi nyoo cha nañí Moloc, ta sacahnu tucu ndo chi nyoo cha nañí Renfán cha caá tari caá tiñoó andivi.

Suri maa ndo savaha xitohyo cuan, vatyí sacahnu ndo.

Yucuan chaha yuhu cuatave chi ndo ñuu ndo, ta cuasacuhin chi ndo noo nu cañi ityi nuu ca Babilonia, catyí Nyoo chi ñu.

⁴⁴ “Nu chicá noo sutu chahnu yo ñuhú ityi cuan, chicumi ra noo vehe ñuhu cha chingó chihin ñu quiti. Ta chichi vehe cuan chicumi ra tabla yuu cha nyaá ley Nyoo nuu. Ta ra Moisés tachí ra tyiño na savaha

ñu vehe ñuhu cuan ta ityi chata ca tari cuhva sañaha maa Nyoo chi ra.

⁴⁵ Yucuan ta ra Josué nanduví ra nuu chi ñu. Ta quehen ñu vehe ñuhu ta chicoo ñu chihin nu nyaá yo ihya vityin. Vatyí Nyoo tava ñehe ra chi ñáyivi chiyó ñuhu ihya ta nacuhva cuenda ra chi ñu Israel ñáyivi chi yo. Ta chotyíño ñu vehe ñuhu cuan nyacua nya quivi chiyó rey David.

⁴⁶ Ta rey David ñihí ra tumañi íñi nuu Nyoo. Ta cuñí ra savaha ra noo vehe vaha nu coo Nyoo. Suri Nyoo ihya sacahnu ra Jacob ta cha naha.

⁴⁷ Soco ra Salomón savaha vehe Nyoo.

⁴⁸ Vasi ña iyó Nyoo chichi vehe ñuhu cha savaha ñáyivi. Tari catyí ra chihin yuhu ra profeta ta cha naha tyehe caa:

⁴⁹ Andivi cuví tyayu nu nyaí ta nyacá ñahi tandihi. Ta ñuhu ñáyivi, yucuan cuví nu chañí chahi.

¿Atu cuví savaha ndo vehi ta coi chichi, cuñí maa ndo?

¿Ta nya maa maa cuvi nyitati, cuñí maa ndo?

⁵⁰ ¿Atu ña chitó ndo vatyí mai savahi andivi ta ñuhu ñáyivi? catyí Nyoo.

⁵¹ “Soco nyoho —catyí ra Esteban— tyicuan ri tuhva ndo sandava ndo íñi ndo. Ta ña cuñí ndo naquehen ndo tuhun cahán Nyoo. Tyicuan ri ña quichahá ndo chi Tatyí Ii. Inuu ri caa ndo chihin sutu chahnu ndo.

⁵² Sutu chahnu ndo sataşí íñi ra ta cachahñí ra chi tandihi ra profeta cuenda Nyoo ta cha naha. Ta ican ra cuan cacatyí vatyí quiquichi noo ra vaha. Ta cha quichí ra vityin, nyoho ña cuñí nyehé ndo chi ra, ta cachahñí ndo chi ra.

⁵³ Nyoho naquehen cuenda ndo ley Nyoo cha chahá ángel chi ndo, soco ña cuñí ndo sacuvi ndo cuhva catyí ley cuan —catyí ra Esteban.

Nu chihí ra Esteban

⁵⁴ Cuhva cha chihí ra cacuví tyiño vehe ñuhu cahnu tuhun ihya, xaan xaan cuñí ra, nyacua casacahñi noho ra nyehé ra chi ra Esteban.

⁵⁵ Soco ra Esteban tyitú cuii maa ra chihin Tatyí Ii ta nanyehé ra ityi andivi. Ta nyehé ra cha cahnu cuví Nyoo. Ta suri nyehé ra chi ra Jesús nanyaá ra chiyo vaha Nyoo.

⁵⁶ Tyicuan ta catyí ra Esteban:

—¡Nyehé ndo! Nyehí tanuña andivi. Ta nyehí chi ra Jesús, Rayíi cha quichí nya gloria, nanyaá ra chiyo vaha Nyoo —catyí ra Esteban.

⁵⁷ Soco ra cuan cachasi ra soho ra, cha ma cuñi ra tuhun cahán ra Esteban. Tyicuan ta vaa ri cananduvi ra. Ta tandihi ra cuahan coyo ra siqui ra Esteban.

⁵⁸ Tycuan ta catavá ra chi ra yuhu ñuu. Ta ca chahñi ra chi ra chihin yuu. Ta ra cha casacuví cha ña vaha cuan, casandoꝝ ra sahma cha nyaa chata ra vatyi sahadumi noo ra tyivaa cha nañi Saulo.

⁵⁹ Cha niri ca cha cacañi ra yuu chi ra Esteban, quichahá chican tahvi ra Esteban chi Nyoo, vatyi tuvi iñi ra cuacúvi ra. Ta catyi ra tyehe caa:

—Sutu Mañi yuhu Jesús, naquehen añime —catyi ra.

⁶⁰ Yahá cuan, tycuan ta chicutiñi chiti ra, ta chaa canachaá ra ta catyi ra:

—Sutu Mañi yuhu, ma tiin cuendon cuatyí cha sacuví ñu —catyi ra.

Ta cha yahá catyi ra tyehe caa, ta chihj ri ra.

8

Nu chicá nyicon ra Saulo chi ñáyivi yihí cuenda ra Cristo

¹ Ta ra Saulo ña chinó iñi ra chi ra Jesús, ta ndoó ra vaha cha chahñi ra chi ra Esteban.

Ta suri quivi cuan quichaha nducu xaan ñáyivi chi ñu yihí cuenda ra Cristo ñuu Jerusalén cuan vatyi cacahñi ñu chi ñu. Soco ra apóstol ña caquita ra. Candoo ra nyicú ra Jerusalén. Ta tandihí ca ñu cachino ñu, cuahan coyo ñu cuacoo ñu ityi Samaria, ta ityi Judea.

² Ta suhva ra cha nyicón vaha chi Nyoo Jerusalén cuan, catyihj ra coño ñuhu ra Esteban chichi ñuhú. Ta cachacu xaan ra cha cuenda ra.

³ Cha niri ca cha tycuan caa, ra Saulo chicá nyicon vavaha ra chi ñáyivi yihí cuenda Cristo. Ta tahan tahan vehe ñu chahan ra. Ta suri quiñoño ñaa ra chi ñu, ta chahá cuenda ra chi ñu vatyi cohon ñu vehe caa, rayi ta ñusihi.

Nu cacahán ñu tuhun ra Cristo ityi Samaria

⁴ Soco tandihí ñu cha quita ñuu Jerusalén, cahán ñu tuhun yoso caa sacacú ra Cristo añima ñu tandihí ri maa ityi nu chaá coyo ñu.

⁵ Minoo ra cha nañi Felipe chaá ra noo ñuu ityi Samaria. Ta quichahá cahan ra tuhun ra Cristo chihin ñu.

⁶ Ta tandihí ri ñáyivi ta tyasohó ñu tuhun cha cahán ra. Ta nyehé ñu milagru ta seña cha savahá ra.

⁷ Vatyi cuaha vavaha ñáyivi cha yihí tatyí ña vaha chi nduvaha ñu. Vatyi tatyí ña vaha cha yihí chi ñu, quita chi ta suri canachaá chi cuahan chi. Ta cuaha vavaha ñáyivi coxo ta ñáyivi cha ña cuví nacanda, nduvaha ñu.

⁸ Yucuan chaha ñáyivi ñuu cuan, siñ xaan cacuví chi ñu.

⁹ Soco ñuu Samaria cuan iyó noo ra tasi cha nañi Simón. Ta sandaví ñaha ra chi

ñáyivi cuan. Catyi ra vatyi cuví ra noo ra cahnu.

¹⁰ Ndiñ cuii maa ñáyivi tyasohó ñu tuhun cahan ra, nya ñu tyayii, ta nya ñu ndahvi. Ta cacatyi ñu:

—Ndicha ndicha cuii, vatyi tunyee iñi Nyoo nyaá chihin ra ihya —catyi ñu.

¹¹ Quichahá xaan ñu tuhun cahán ra vatyi cha naha xaan sandaví ñaha ra chi ñu chihin tuhun tasi.

¹² Tycuan ta quichj ra Felipe. Ta sacoto ra chi ñu yoso caa nyacá ñaha Nyoo añima ñáyivi. Ta yoso cuhva cha cahnu cuví ra Jesucristo. Ta yucuan ta chino iñi ñu chi ra Cristo, rayi ta ñusihi. Ta condutya ñu.

¹³ Nyacua nya ra Simón cuan, ta naching iñi ra chi ra Cristo, ta condutya ra. Ta quichahá chica noo ra chihin ra Felipe. Ta iyo xaan cuñj ra nyehe ra milagru, ta seña cha sacuví ra Felipe cuan.

¹⁴ Tycuan ta ra apóstol cha canyicú ñuu Jerusalén cuan ñihj ra tuhun cha canachinó iñi ñáyivi ityi Samaria cuan tuhun Nyoo. Ta catachj ra chi ra Pedro ta chi ra Juan.

¹⁵ Cuhva cha chaá coyo ra yucuan, ta chican tahvi ra chaha ñu quihvi cuenda ra Cristo vatyi tacuhva tyi naquehen ñu Tatyí li.

¹⁶ Vatyi ñu cuan, ta naquehen ca ñu Tatyí li. Tacuhva condutya ri ñu chihin siñi Sutu Mañi yo Jesús.

¹⁷ Tycuan ta ra Pedro ta ra Juan catyiso ra ndaha ra siqui ñu, ta naquehen ñu Tatyí li.

¹⁸ Ta ra Simón cuan nyehe ra cuhva cha catyiso ra apóstol ndaha ra siqui ñu cuan, ta naquehen ñu Tatyí li.

¹⁹ Ta quichahá catyi ra tyehe caa:

—Yoso xuhun cuñi ndo ta cuhva ndo tunyee iñi chiña chi, vatyi tacuhva cuví tyise ndahi siqui ñáyivi, ta naquehen tucu ñu cuan Tatyí li —catyi ra Simón cuan chi ra apóstol.

²⁰ Tycuan ta nacahan ra Pedro ta catyi ra:

—Na cunaun in ri chihin xuhun chiña. Vatyi chicá iñun tyi cuví sata yo chihin xuhun nyatu cha chahá maa Nyoo chi yo.

²¹ Yoho, ña tahan chi tyihun chuun chihin tuhun ihya. Vatyi añimon ña vaha nuu Nyoo.

²² Ndu uvi iñun cuhva chicá xiñun chiña, vatyi cahnu cha quiñi caa cuví cuan nuu Nyoo. Ta çacan tahvi chi ra na nyehe yo tatu saha ra ticahnu iñi chuun cha cuenda cha caa chichi añimon.

²³ Vatyi nyehí tyi chichi añimon tyitú maa yihí cha quiñi caa cha cuví tari cha uva. Ta cha quiñi caa cuan, ña chahá coton cha vaha. —catyi ra Pedro chi ra Simón cuan.

²⁴ Tyicuan ta nacahan ra Simón ta catyí ra:

—Caçan tahvi maa ndo cha cuende nuu Nyoo, ta cuhva cha ma quichi tandihi tuhun cha catyún chiña siqui —catyí ra Simón chi ra Pedro.

²⁵ Cha yahá cuan ta ra apóstol nacatyí ra tandihi cha nyehé ra cha sacuví ra Cristo. Ta cahan ra tuhun Nyoo. Tyicuan ta cuanuhu coyo ra nya Jerusalén. Ta suri sacoto ra tuhun yoso caa sacuví yo ta cacu añima yo tandihi ñuu ityi Samaria nu yahá ra.

Nu cahán ra Felipe tuhun Nyoo chihin noo ra Etiopía

²⁶ Cha yahá tuhun cuan tyicuan ta cahan noo ángel Nyoo chihin ra Felipe, ta catyí ra:

—Ndícuíta ta cuhun ityi sur, ityi quita nya Jerusalén ta cuahan nya Gaza —catyí ángel cuan chi ra.

Yucuan cuvi ityi cha yahá noo ñuhú ityi.

²⁷ Tyicuan ta ra Felipe ndícuíta ra ta cuahan ra. Ta ityi cuahan ra ta ñihi tahan ra chihin noo ra ñuu Etiopía. Ta cuvi ra eunuco. Cuví ra noo ra cuví tyiño cahnu ñuu Etiopía, vatyí sahá cuenda ra xuhun cu Candace, ñaha cha cuví reina ñuu Etiopía cuan. Ta chahan ra Etiopía cuan chisacahnü ra chi Nyoo nya Jerusalén.

²⁸ Ta ityi cuanuhú ra nya ñuu ra nyaá ra siqui carru ra. Ta sacuahá ra libru cha tyaa ra Isaías ra profeta cuenda Nyoo ta cha naha.

²⁹ Tyicuan ta Tatyí li catyí chi ra Felipe:

—Sätuhva ca nu cuahan carru cuan.

³⁰ Ta cuhva cha tuhva ra Felipe, chiñi ra vatyí sacuahá ra cuan nu libru cha tyaa ra Isaías. Ta ndaca tuhun ra chi ra:

—¿Atu cutuñí iñun cha sacuahún? —catyí ra.

³¹ Tyicuan ta nacahan ra cuan ta catyí ra:

—¿Yoso caa cutuñí iñi ta yori sañahá chii? —catyí ra chi ra.

Ta chican ra chi ra Felipe na ndaa ra ta cunyaa ra chihin ra.

³² Ta nu cuahan sacuahá ra, catyí chi tyehe caa:

Chahñi ra chi ra tari chahñi ra noo mbee.

Vatyí tari ña chacú mbee tatu cuasatyá ra ixi ti, ta tari ña chacú ti tatu chahñi ra chi ti, tyicuan caa cuví ra cuan tyi nyehé ra tindoho ta ñahri maa catyí ra.

³³ Sanocuee ñu chi ra ta yori cuñí sacacu chi ra.

¿Yóo ra cuvi nacatyí tuhun sehe ra cha cuacoo?

Yori, vatyí chihí ra.

Catyí chi nu tutu cha sacuahá ra cuan.

³⁴ Tyicuan ta ra cuan quichahá ndaca tuhun ra chi ra Felipe, ta catyí ra:

—Saha tumañi iñi chii, ta catyún chii chii yóo chi tuhun cahán ra profeta ihya. ¿Atu tuhun maa ra, o yóo chi tuhun cahán ra? —catyí ra chi ra Felipe.

³⁵ Tyicuan ta ra Felipe quichahá cahan ra siqui tuhun cha cha yahá sacuahá ra cuan, ta nacatyí ra chi ra vatyí tuhun ra Jesús cahán ra cuan. Ta nacatyí ra vatyí ra Jesús cuví ra cha sacacú chi yo.

³⁶ Tyicuan ta cha cuayaha ra noo nu ñohó ndutya. Ta ra cuan quichahá catyí ra chi ra Felipe:

—Ihya ñohó ndutya. ¿Atu ma cuvi condutye vityin? —catyí ra.

³⁷ Tyicuan ta nacahan ra Felipe, ta catyí ra:

—Tatu chinó iñun chihin cha tandihi añimon, cuví condutyon —catyí ra chi ra.

Tyicuan ta nacahan ra cuan, ta catyí ra:

—Chinó iñi yuhu vatyí Sehe Nyoo cuví chi ra Jesucristo —catyí ra.

³⁸ Tyicuan ta ra cuan catyí ra chi musu ra na sacucuiñi ra carru cuan. Tyicuan ta canoo nduvi tahan ra. Ta caquihvi ra chi ndutya. Tyicuan ta sacondutya ra Felipe chi ra.

³⁹ Ta cuhva cha caquita coyo ra chichi ndutya cuan, Tatyí li Sutu Mañi yo naquehen chi chi ra Felipe. Ta ra cuan ña nyehé ca ra chi ra. Soco si xaan cuví chi ra, cuanuhu ra.

⁴⁰ Ta ra Felipe chaá ra ñuu Azoto. Ta cuahan ra tahan tahan ñuu, ta cahan ra tuhun ra Cristo chihin ñáyivi nyacua nya cha chaá ra ñuu Cesarea.

9

Nu nachinó iñi ra Saulo chi ra Cristo (Hch. 22.6-16; 26.12-18)

¹ Cha ni ri ca cha chicá noo ra Felipe cahán ra tuhun ra Cristo chihin ñáyivi, ra Saulo ña sandihí ra tuhun cha nducú cahñi ra chi ñu yihí cuenda Sutu Mañi yo. Ta chahan ra nu nyaá ra cuví nuu chi tata sutu,

² chícacàn ra noo tutu chi ra, tacuhva nacuhva ra cuhan ra vehe ñuhu ñuu Damasco, ta tñin ra chi ñu cuahan ityi ra Cristo, ta quichi nyaca ra chi ñu vehe caa Jerusalén, rayií o ñusihi.

³ Ñihí ra Saulo tutu cuan ta cuahan ra. Ta cuhva cha cuachaa ra ñuu Damasco cuan, sana cuí ri iñi ra, ta quichí noo nduva ñuhu ityi andivi, sacundichin nicachico maa nu cuahan ra.

⁴ Tyicuan ta ra Saulo nduva ra nu ñuhú. Ta chiñi ra noo ndusu cha catyí tyehe caa:

—Saulo, Saulo, ¿ñáá tuhun cha chicá nyicon chi yuhu? —catyí ndusu cuan chi ra.

⁵ Tyicuan ta nacahañ ra Saulo ta ndaca tuhun ra chi ra ta catyí ra:

—¿Yóo yoho Tata? —catyí ra.

Tyicuan ta nacahañ ndusu cuan chihin ra, ta catyí:

—Yuhu cuví ra Jesús, ra chicá nyicon chi. Suri chi maun sañicuehún, tari sañicuehé sindiqui quiti tahví ñuhu chi ti cha chañí nyaa ti nu noo cha xaan cha saquehen ityi ra chi ti —catyí ra Jesús chi ra.

⁶ Tyicuan ta ra Saulo suri nihi ra chihin cha yuhví ra. Ta catyí ra:

—Sutu Mañi yuhu, ¿ñáá cha cuñún tyi sacuvi? —catyí ra.

Tyicuan ta Sutu Mañi yo catyí ra chi ra tyehe caa:

—Ndicuita ta quihvun chichi ñuu Damasco chiña. Ta yucuan cucatyí noo ra chuun ñáá cha cusacuvun —catyí ra Jesús chi ra Saulo.

⁷ Ra cha candihi chihin ra Saulo, yuhvi xaan ra cacuvi. Ta ña cañihí ra tuhun cahan ra vatyi cachiñi ra ndusu cuan soco yori chi nyehe ra.

⁸ Tyicuan ta ra Saulo ndicuita ra. Soco cuhva cha nuña ra chiti nuu ra, ña cuví ca maa nyehe ra vatyi nducuaa ra. Yucuan chaha, ra tahan ra cayindaha ra ndaha ra ta chinyaca ra chi ra ñuu Damasco cuan.

⁹ Yucuan chinyaa ra uñi tahan quivi. Ta ña cuví nyehe ra. Ta niri ña chachí ra, ta ña chihí ra ndutya.

¹⁰ Ñuu Damasco cuan iyó noo ra chinó iñi chi Nyoo. Ta nañi ra Ananías. Ta nyehe ra noo visión nu catyí Sutu Mañi yo chi ra tyehe caa:

—¡Ananías! —catyí ra chi ra.

Tyicuan ta nacahañ ra Ananías, ta catyí ra:

—Ma yuhu ihya, Sutu Mañi yuhu —catyí ra chi ra.

¹¹ Tyicuan ta Sutu Mañi yo catyí ra:

—Ndicuita, ta cahun noo ityi cahnu cha nañi Ndo. Ta nanducun vehe noo ra cha nañi Judas. Ta ndaca tuhun sivi noo ra cha nañi Saulo, ra ñuu Tarso. Vatyi chicán tahvi ra chi Nyoo.

¹² Ta nyehé ra noo visión, ta nyehé ra chi noo ra nañi Ananías. Ta chaá ra nu nyaá ra, ta tyisó ra ndaha ra siqui ra tacuhva cuví nanyehe ra inga chaha —catyí Sutu Mañi yo chi ra Ananías.

¹³ Tyicuan ta nacahañ ra Ananías ta catyí ra:

—Sutu Mañi yuhu, cuaha xaan ñáyivi nacatyí chii vatyi cuaha xaan cha ña vaha chinyacuví ra Saulo cuan chihin ñu yihí cuendon nya ñuu Jerusalén.

¹⁴ Ta vityin vachi tucu ra ihya vatyi chaha ra cacuví nuu chi tata sutu ityi chi ra cha tyihí ra chi ñáyivi chicán tahvi chihin

sivun vehe caa —catyí ra Ananías chi Sutu Mañi yo.

¹⁵ Soco Sutu Mañi yo catyí ra chi ra:

—Cuahañ vatyi yuhu cha nacachí vahí chi ra Saulo cuan, vatyi cahan ra tuhun chihin ñáyivi inga ñuu, ta chihin rey inga ñuu, ta suri cahan tucu ra chihin ñáyivi Israel ñandihí.

¹⁶ Yuhu cusañahi chi ra yoso caa cha cuaha tindoho cunyehe ra cha cuenda —catyí Sutu Mañi yo chi ra Ananías.

¹⁷ Tyicuan ta cuahan ra Ananías vehe nu nyaá ra Saulo. Chaq ra vehe cuan ta quihví ra chichi vehe. Ta tyisó ra ndaha ra siqui ra Saulo, ta catyí ra chi ra tyehe caa:

—Yañi Saulo, Sutu Mañi yo ra Jesús ra tuví nuun ityi vachun, ican ra tachí chii vatyi tacuhva cuví nanyehun inga chaha. Ta cusacutu ra chuun chihin Tatyi Ii ra —catyí ra Ananías chi ra Saulo.

¹⁸ Caa cuhva ri cuan ta cana coyo noo cha tari caa soo tiyaca cha yihí chiti nuu ra Saulo. Tyicuan ta cuví nanyehe ra inga chaha. Yaha cuan ta condutya ra.

¹⁹ Yaha cuan ta chachí ra. Ta ndunyege coño ñuhu ra inga chaha. Ta ndoo ra suhva quivi chihin ñu yihí cuenda ra Cristo ñuu Damasco cuan.

Nu quichahañ cahan ra Saulo tuhun ra Cristo chihin ñáyivi ñuu Damasco

²⁰ Tyicuan ta numi ri quichahañ cahan ra Saulo tuhun ra Cristo chihin ñáyivi tandihí vehe ñuhu ñu Israel ñuu Damasco cuan. Ta catyí cachi ra vatyi ra Jesús, Sehe Nyoo cuví chi ra.

²¹ Ndii cuui maa ñáyivi cha chihí tuhun cahan ra, iyo vavaha cuñi ñu. Ta catyí ñu chi tahan ñu:

—¿Atu ñima ra ihya cuví ra cha chica nyicon chi ñu chicán tahvi chihin sivi ra Jesús ityi ñuu Jerusalén cuan? ¿Atu suri ñima ra cuví cha vachi tün chi ñu ityi tyehe vatyi cucuhva cuenda ra chi ñu chi ra cacuví nuu chi tata sutu? —catyí ñu.

²² Soco ra Saulo nihi ca cahan ra tuhun ra Cristo chihin cha ni ca iñi ra. Ta sañahá ra vatyi ra Jesús cuví ra Cristo, Sehe Nyoo. Nyacua ña cutuñi iñi ra Israel nyicú Damasco cuan nya ityi chino iñi ra.

Nu chinq xehe ra Saulo chi ra Israel

²³ Cha yahañ suhva quivi, ta ra Israel cha ña chinó iñi chi ra Cristo catyihí tahan ra tuhun cha cahní ra chi ra Saulo.

²⁴ Ta ndiyaca ta ñiyaca canyatú ra chi ra yuvehe cahnu ñuu cuan. Soco ra Saulo cuan numi ri chito ra tuhun cuan.

²⁵ Tyicuan ta ñáyivi cha chinó iñi chi ra Cristo ñuu cuan catyihí ñu chi ra chichi noo tica cahnu. Ta noo cha cuaa casanoq ñu chi ra ityi ventana noo vehe cha cacú chihin

barda cha nyaá nicachico yuhu ñuu cuan. Ta tyicuan caa chingo ra cuahan ra.

Nu ñohó ra Saulo Jerusalén

²⁶ Quiví cha chaá ra Saulo Jerusalén, cuñi ra ndu ñn ri ra chihin ñu yihí cuenda ra Cristo. Soco tandihí maa ñu cuan ta yuhví ñu chi ra. Vatyí ña chinó iñi ñu cha yihí ra cuenda ra Jesús.

²⁷ Soco noo ra cha nañi Bernabé, naquehen ra chi ra. Ta chahá cuenda ra chi ra chi ra apóstol. Ta nacatyí ra chi ra yoso caa nyehe ra Saulo chi Sutu Mañi yo ra Cristo ityi ñuu Damasco; ta nacatyí ra yoso caa cahan Sutu Mañi yo chihin ra. Ta yoso caa cahan ra tuhun ra Cristo chihin cha ña yuhví ra nya ñuu Damasco cuan.

²⁸ Tyicuan ta ndoq ra Saulo Jerusalén chihin ñu yihí cuenda ra Cristo.

²⁹ Ta cahan ra tuhun Sutu Mañi yo chihin cha ña yuhví ra. Ta ndatuhún xaan ra tuhun ra Cristo chihin ra Israel cha cahan sahan griego. Soco ra cuan cananducú ra cuhva yoso caa ta cacahñi ra chi ra.

³⁰ Soco cachitó ra hermano cuan vatyí tyicuan caa yihí iñi ra cuan. Yucuan chaha chinyaca ra chi ra Saulo nya ñuu Cesarea. Ta yucuan ta natachí ra chi ra nya Tarso ñuu ra.

³¹ Tyicuan ta ñu yihí cuenda ra Cristo cha nyicú tandihí ityi Judea, ta ityi Galilea, ta ityi Samaria, vii xaan nyicu ñu vatyí ña cuxaan ca ñáyivi chi ñu. Ta ndunyeé ca iñi ñu chihin fuerza Nyoo vatyí quichahá vaha ñu cuhva catyí Nyoo, vatyí yuhví ñu coto ma sacuvi ñu cuhva cuñi ra. Iyó ñu chihin cha tyinyeé Tatyí Ii chi ñu. Ta cuaha xaan ñu cuahan nanduvi.

Nu nduvahá ra Eneas

³² Tyicuan caa cuví ta ra Pedro tuhvá ra chica noo ra nyehe ra yoso caa canyicu hermano noo noo ñuu. Ta chahan tucu ra chinyehe ra nu nyicu ñu yihí cuenda ra Jesucristo noo ñuu cha nañi Lida.

³³ Yucuan nañihí ra chi noo ra cuhvi. Nañi ra Eneas. Ta cha uña cuiya catuvi ra ña cuvi nacanda ra vatyí ndundava coño ñuhu ra.

³⁴ Soco ra Pedro catyí ra chi ra: —Yoho Eneas, ra Jesucristo sanduvahá ra chuun. Ndícuita ta naṭuvi yuvun —catyí ra chi ra.

Tyicuan ta caa cuhva ri cuan ndícuita ra Eneas.

³⁵ Ta nyehe tandihí ñáyivi ñuu Lida cuan tyi nduvahá ra. Ta ñáyivi ñuu Sarón ñandihí. Tyicuan ta ñu cuan nachingo iñi ñu chi Sutu Mañi yo. Ta sandoq ñu tuhun chahnu cha chingo iñi ñu ta cumañi ca coto ñu tuhun ra Cristo.

Nu nandotq cu Dorcas

³⁶ Quiví cuan chiyó noo ñaha chinó iñi chi ra Cristo ñuu Jope. Ta nañi ña Tabita, soco chihin sahan griego, Dorcas nañi ña. Ta tyicuan ri sacuvi ña cha vaha chihin ñáyivi. Tyinyeé ña chi ñu ndahvi.

³⁷ Ta quiví cuan cu Dorcas quehen noo cuehe chi ña ta chihí ña. Ta cha yahá sacutyí ñu chi ña, chicacun ñu chi ña chichi noo cuarto nu cu uvi piso.

³⁸ Ñuu Jope cuan yatyin ri nyaá chihin ñuu Lida, nu nyaá ra Pedro. Ta ñu cha yihí cuenda ra Cristo ñuu Jope cuan chitó ñu vatyí nyaá ra Pedro ñuu Lida cuan. Tyicuan ta tachí ñu chi uvi tahan ra na cucatyí ra chi ra Pedro vatyí naquichi ra cha numi ri. Cuahan ra cuan ta catyí ra chi ra Pedro:

—Coho nya Jope. Sañumi ta ma cucueun —catyí ra chi ra.

³⁹ Tyicuan ta ra Pedro ndícuita ra ta cuahan ra chihin ra. Ta cuhva cha cha ra, chinyaca ra chi ra nya cuarto nu caa ndiyi cuan. Ta tandihí maa ñu chihí yí catuhva ñu nicachico chata ra. Suri chacú cha ñu. Ta sañahá ñu sahma cha quicú cu Dorcas ta chinyito ña.

⁴⁰ Tyicuan ta ra Pedro tava ra chi tandihí ñáyivi cuarto cuan. Tyicuan ta chícuiñi chiti ra ta quichaha chican tahvi ra chi Nyoo. Tyicuan ta nanyehe ra chi ñaha chihí cuan catuvi ña. Ta quichahá catyí ra chi ña:

—Hermana Tabita, ndícuita —catyí ra chi ña.

Tyicuan ta nandica ña chiti nuu ña. Ta cuhva cha nanyehe ña chi ra Pedro, nicunyaá ña.

⁴¹ Tyicuan ta ra Pedro tiñn ra ndaha ña ta sandicuita ra chi ña. Tyicuan ta cana ra chi ra hermano, ta chi ñu chihí yí. Ta nacuhva cuenda ra chi ña chi ñu vatyí nandotq ña.

⁴² Yahá cuan ta ndi cuii maa ñu Jope chitó ñu cha nandotq ña cuan. Ta cuaha vavaha ñu nachingo iñi chi Sutu Mañi yo.

⁴³ Ta ra Pedro ndoq ra cuaha ri quiví ñuu cuan. Nyaá ra vehe noo ra satyahyu ñi. Nañi ra Simón.

10

Ra Pedro ta ra Cornelio

¹ Ñuu Cesarea iyó noo ra cha nañi Cornelio. Ta cuví ra capitán cuenda noo ciento sindaro. Ta ityi sindaro cuan, Italia nañi.

² Ta ra Cornelio cuan yuhví ra chi Nyoo ta vaha sacahnú ra chi ra, maa ra ta ñáyivi chi ra ñandihí. Ta siñ ri cuaha vavaha xuhun chahá ra chi ñu ndahvi ñu Israel. Ta tyicuan ri chicán tahvi ra chi Nyoo.

³ Ta cuví noo quiví cuan cuhva cha caa uñi cha cha iñi, nyehe ra noo visión. Ta yucuan cuví nu cachi xaan nyehe ra vatyí

noo ángel cha tachĭ Nyoo quihvĭ nu nyaá ra, ta catyĭ ra chí ra:

—ĭYoho Cornelio! —catyĭ ángel cuan chí ra.

⁴Tyicuan ta nanyehĕ ra Cornelio chí ángel cuan. Ta yuhvi xaan ra cuvĭ. Ta quichahā ndaca tuhun ra ta catyĭ ra:

—¿Ñáá cha cuvĭ ihya, Tata? —catyĭ ra chí ángel cuan.

Tyicuan ta ángel cuan quichaha catyĭ ra chí ra:

—Nyoo chíñĭ ra ndĭ cuiĭ maa cha chicón chí ra. Ta tahán ĭñi ra vatyi tyinyeé xaun chí ñu ndahvĭ.

⁵Ta vityin cuñĭ chí cha tachun tyiño nya ñuu Jope na cuquehen chí noo ra cha nañĭ Simón Pedro.

⁶Ta maa ra cuan cuacatyĭ ra chuun ñáá cha tahán chí sacuvun. Ta iyó ra vehe noo ra cha nañĭ tucu Simón, cuvĭ ra noo ra satyahyú ñii. Ta iyó vehe ra yuhu tyañuhu —catyĭ ángel cuan chí ra Cornelio, ta cuahan ángel cuan.

⁷Ta cha yahā cuahan ángel cuan, ra Cornelio canā ra chí uvi tahan musu ra, ta chí noo sindaro cha chinó xaan ĭñi chí Nyoo. Ta cuvĭ tucu ra noo ra sahá cuenda chí ra Cornelio ñandihĭ.

⁸Ndĭ cuiĭ tuhun cahān ángel cuan chihin ra Cornelio ta nacatyĭ ra chí nduñĭ tahan ra cuan. Ta tachĭ ra chí ra ñuu Jope.

⁹Tuvĭ inga quivi ta cuahan coyo ra cuan. Ta cuhva cha cuachaa coyo ra yuhu ñuu Jope cuan, ra Pedro ndaā ra xiñĭ vehe vatyi cuacacan tahvi ra chí Nyoo, ta cha cuñĭ hora cuvĭ cuhva cuan.

¹⁰Ta chaā noo soco chí ra ta chisocó vavaha ra. Soco cha niri ca cha sanduvahá ñu cha cachi ra, quichahā nyehe ra noo visión.

¹¹Ta nyehe ra vatyi ñicuitacoho andivĭ. Ta nyehe ra cua noo noo sahma cahnu vavaha ityi andivĭ. Ta tari quivĭ nuhñĭ noo noo tutun sahma cuan ta cuahan noo ityi nu ñuhu.

¹²Ta chichi sahma cuan ñohó tandihĭ maa nuu quiti cha cumi tahan chaha. Ta tandihĭ nuu coo, ta tandihĭ nuu saa.

¹³Tyicuan ta chíñĭ ra noo ndusu cha catyĭ chí ra:

—Pedro, ndĭcuita ta cahñĭ quiti ihya, ta caçhun —catyĭ ndusu cuan chí ra.

¹⁴Soco ra Pedro nacahān ra ta catyĭ ra: —Ma cachi, Sutu Mañĭ yuhu. Yuhu ña tuhvé chachi quiti cha catyĭ ley tyĭ yica cha cachi ndĭ —catyĭ ra Pedro.

¹⁵Tyicuan ta quichaha catyĭ tucu ndusu cuan chí ra inga chaha:

—Ma catyun vatyi yica cha cachun noo cha cha yahā sanduvijĭ yuhu —catyĭ ndusu cuan chí ra Pedro.

¹⁶Uñĭ tahan chaha sañahā Nyoo visión ihya chí ra. Tyicuan ta sahma cahnu cuan nandaā cuanuhu tucu ityi andivĭ.

¹⁷Cha niri ca cha chicá xiñĭ ra Pedro ñáá cha cuñĭ chí catyĭ visión cuan, chaā coyo musu cha tachĭ ra Cornelio. Ta candaca tuhun ra nya nyaá vehe ra Simón.

¹⁸Ta cha chaa coyo ra ityi yuvehe candaca tuhun ra tatu yucuan iyó noo ra cha nañĭ Simón Pedro.

¹⁹Ta ra Pedro suri cha chicá xiñĭ ra ñáá cha cuñĭ chí catyĭ visión cha nyehe ra. Tyicuan ta Tatyĭ ĭi quichahā catyĭ chí ra: —Nyehe Pedro, uñĭ tahan ra nanducú chuun.

²⁰Ndĭcuita ta cuhun chihin ra, ta ma quihĭ uvi ĭñun vatyi mai tachĭ chí ra ihya —catyĭ Tatyĭ ĭi chí ra.

²¹Tyicuan ta ra Pedro noo ra nu canyicu ra cha tachĭ ra Cornelio, ta catyĭ ra chí ra:

—Yuhu cuvĭ ra nanducú ndo. ¿Ñáá tyiño vachi ndo?

²²Tyicuan ta canacahān musu ra Cornelio ta catyĭ ra:

—Ra Cornelio, ra cuvĭ capitán chí ndĭ ican tachĭ chí ndĭ. Noo ra vaha xaan ñáyivi cuvĭ. Ta vaha xaan quichahá ra na cahán Nyoo. Ta tandihĭ maa ra Israel ityi Judea ihya cacuñĭ ra chí ra chaha cha cuenda cha vaha ñáyivi cuvĭ ra. Ta noo ángel Nyoo catyĭ chí ra vatyi na cana ra chuun, vatyi cuhun vehe ra vatyi tacuhva cuiñĭ ra tuhun cha cuacahun —cacatyĭ musu ra Cornelio chí ra Pedro.

²³Tyicuan ta chahā ra Pedro quihvĭ coyo ra chichi vehe. Ta candoo ra chihin ra cha cuaa cuan. Ta cha inga quivĭ cuan ta cuahan ra Pedro chihin ra. Ta cuahan suhva ra hermano cha iyó Jope cuan ñandihĭ.

²⁴Cha inga quivi chaā coyo ra nya Cesarea nu nyatú ra Cornelio chí ra chihin ñáyivi chí ra, ta chihin tandihĭ ra tahan ra.

²⁵Cuhva cha chaā ra Pedro vehe ra, ra Cornelio quitā ra ta cahan ra chihin ra. Ta chicuñĭ chiti ra nuu ra ta quichaha sacahnu ra chí ra.

²⁶Soco ra Pedro nacoñehĕ ra chí ra, ta catyĭ ra chí ra:

—Ndĭcuita vatyi noo rayĭ ri cuvĭ yuhu tari yoho, ta ñima Nyoo cuvĭ —catyĭ ra chí ra.

²⁷Ta cha niri ca cha cahán ra chihin ra, quihvĭ ra ta nanyehĕ ra cuaha ñáyivi candu ĭñ ri.

²⁸Tyicuan ta catyĭ ra Pedro chí ñu:

—Nyoho chitó ndo vatyi ley nyuhu cha cuvĭ ndĭ ñu Israel, ña chahá chí cha cu ĭñ ri ndĭ chihin ñáyivi inga ñuu. Ta ñi ri chichi vehe ñu ta ma cuvĭ quihvĭ ndĭ. Soco Nyoo sañahā ra chí, ta catyĭ ra: “Yoho, ma catyun

chi ni noo ñáyivi tyi ña vaha ñu”, catyí Nyoo chíi.

²⁹ Yucuan chaha quivi cha cana ndo chíi, numi ri vachi. Ta vityin cuñi cote ñáá cuenda cana ndo chíi —catyí ra Pedro chi ra Cornelio.

³⁰ Tyicuan ta nacahan ra Cornelio, ta catyí ra:

—Cha iyó cumi quivi vityin, suri maa cuhva ihya cha nyaí vehi ta ña chachj ta chicán tahvi chi Nyoo cha cha íñi. Ta tuvj noo ra nui. Ñihnó ra noo sahma xiño vavaha.

³¹ Ta catyí ra chíi: “Yoho Cornelio, Nyoo chíñi ra cha chicán tahvun. Ta nicohón íñi ra cha sacuvún vatyi tyinyeún chí ñu ndahvi.

³² Tachj tyiño nya ñuu Jope na quichi ra Simón Pedro. Nyaá ra vehe inga tucu ra cha nañi Simón, noo ra cha satyahyu ñii. Ta vehe ra nyaá yatyin ri yuhu tyañuhu. Ta na quichi ra Simón Pedro ta cahan ra chuhun”, catyí ángel cuan chíi.

³³ Tyicuan ta numi ri tachj tyiño vatyi cuquehen chuun. Ta vaha vatyi vachun. Ta vityin tandihi yo nyicú yo nuu Nyoo. Ta cuñi ndi cuñi ndi tandihi cuii maa cha tachj Sutu Mañi yo chuun vatyi nacatyun chí ndi.

Nu cahan ra Pedro tuhun ra Cristo vehe ra Cornelio

³⁴ Tyicuan ta quichaha cahan ra Pedro ta catyí ra:

—Vityin cutuñi íñi vatyi Nyoo cuñi ra chí tandihi ñáyivi. Cuví ri yo ñu Israel, o cuví ri yo ñu inga ñuu.

³⁵ Soco naquehen ra chi yo tatu quichaha yo chí ra, ta sacuví yo cha vaha.

³⁶ Cahan ra chihin nyuhu ñu vachi tata ra Israel, ta sacotó ra vatyi nduvaha coo yo chihin ra cha cuenda ra Jesucristo. Maa ra nyacá ñaha tandihi maa yo.

³⁷ Nyoho chitó vaha ndo tandihi cha cuví ñuu Israel ñui, yoso caa quichaha chí nu cuví Galilea cha yaha cha cahan noo ra Juan nuu ñáyivi, ta sacondutyá ra chí ñu.

³⁸ Chitó ndo yoso caa chaha Nyoo tunyee íñi Tatyí Ii ra chí ra Jesús, ra Nazaret. Ta chicá noo ra sacuvj ra cha vaha, sanduvaha ra chí tandihi ñu cha nyehé tindoho sahá ra ña vaha. Tyehe caa sacuví ra Jesús vatyi Nyoo nyaá ra chihin ra.

³⁹ Nyuhu cuví ndi cha ndaa tandihi cha sacuvj ra Jesús nicahnu Judea ta ñuu Jerusalén. Yaha cuan ta chahñi ñu chí ra nu cruzi.

⁴⁰ Soco sanandotó Nyoo chí ra nu cu uñi quivi. Ta tuvj ra nuu ndi.

⁴¹ Ña tuvj ra nuu tandihi ñáyivi. Soco tuvj ra nuu nyuhu vatyi nacachj ra chí ndi nyata ityi chata ca vatyi cuví ndi cha ndaa

cuenda ra. Nyuhu chachj ndi ta chihj ndi chihin ra cha yaha cha nandoto ra.

⁴² Ta tachj ra chí ndi vatyi cahan ndi tuhun ra chihin ñáyivi. Ta cuví ndi cha ndaa vatyi Nyoo cuatyaá ra chí ra Jesús tyi cuví ra juez chí ñu cha nyitó ta ñu cha chihj.

⁴³ Ta tyicuan caa tucu nyata ityi chata ca, cacahan tandihi ra profeta Nyoo tuhun ra Jesús. Ta cacatyí ra vatyi tandihi ñu cha chinó íñi chí ra Jesús, cusandachi Nyoo cuatyi ñu cha cuenda maa ra.

Nu naquehén ñu Tatyí Ii ta ñima ñu Israel cuví ñu

⁴⁴ Ni cahan ca ra Pedro ta noq xica ri Tatyí Ii síqui tandihi ñu tyasohó tuhun cahan ra.

⁴⁵ Ta ra Israel cha cayihí cuenda ra Jesús cha chaa coyo chihin ra Pedro iyo xaan cuñi ra vatyi chaha tucu Nyoo Tatyí Ii ra chí ñu cha ñima ñu Israel cuví.

⁴⁶ Chitó ra tyi tyicuan caa cuví vatyi chíñi ra cahan ñu inga sahan, ta sacahnú ñu chí Nyoo.

⁴⁷ Tyicuan ta quichaha catyí ra Pedro chí ra cha chaa coyo chihin ra:

—Ma cuví casi yo nu condutya ñáyivi ihya. Vatyi cha naquehen tucu maa ñu Tatyí Ii tari maa yo —catyí ra chí ra.

⁴⁸ Tyicuan ta tachj ra Pedro chí ñu ni ñihí Tatyí Ii na condutya ñu chihin sívi ra Jesucristo. Tyicuan ta chacú ndahvi ñu nuu ra Pedro vatyi cuñi ñu cha ndoo ra suhva quivi chihin ñu.

11

Nu nacatyí ra Pedro chí ñu yihí cuenda ra Cristo Jesús nya Jerusalén yoso caa cuahan chitya tuhun ra inga ñuu

¹ Ra apóstol ta inga ra hermano cha nyicú Judea, ñihí ra tuhun vatyi nyacua nya ñu cha ñima ñu Israel cuví ta naquehén ñu tuhun Nyoo.

² Tyicuan ta nachaa ra Pedro Jerusalén. Ta ra cha catyí vatyi cuñi chí cha sacuví yo costumbre circuncisión ta cuhva yaci cacu yo, xaan xaan cuñi ra nyehe ra chí ra Pedro.

³ Ta cacatyí ra chí ra tyehe caa:

—¿Ñáá tuhun cha chahun vehe ñu cha ñima ñu Israel cuví ta chachun chihin ñu? —catyí ra.

⁴ Tyicuan ta ra Pedro nacatyí ra nya nu quichaha tandihi cha cuví chí ra ta catyí ra:

⁵ —Yuhu nyaí ñuu Jope. Ta cuhva cha chicán tahvi chí Nyoo ta nyehj noo visión. Ta nyehj tari noo sahma cahnú cha noó ityi andivi. Tari cha nuhñi noo noo tutun ta cuahan noo ityi nu ñuhú nu nyaí.

⁶ Ta nanyehé vahí ñáá cha ñohó chichi. Ta nyehj quití cha cumi chaha, quití cuhu, ta coo, ta saa.

⁷ Ta chihñi noo ndusu cha catyí chii: “Ndĩcuita Pedro. Cahñi quiti ihya ta cachun”, catyí ndusu cuan chii.

⁸ Ta nacahin ta catyí tyehe caa: “Sutu Mañi yuhu, ma cuvi, vatyí ni noo chaha ta ta cachi que coño quiti quiñi caa.”

⁹ Tyicuan ta ndusu andivi nacahan chi chihin inga chaha, ta catyí chi: “Ma catyí yoho vatyí ma cachun noo cha yahā sanduvij”, catyí ndusu cuan chi.

¹⁰ Uñi chaha cuví tyehe caa. Yahā cuan ta nandaā tandihí chihin sahma cuan ityí andivi.

¹¹ Ta caa cuhva ri cuan chaā coyo uñi tahan ra vehe nu nyaí, quitā ra ñuu Cesarea ta nanducu ra chii.

¹² Ta Tatyí li tachí chii na cuhin chihin ra. Ta catyí ra chii tyi ma caca iñi cha ñima ñu Israel cuví ñu. Ta chahan coyo tucu iñu tahan ra yañi yo ihya chihin. Ta cha chaā ndi nya Cesarea quihvĩ ndi chichi vehe noo ra.

¹³ Ta nacatyí ra cuan chi ndi yoso caa nyehē ra chi noo ángel chichi vehe ra. Nanyaá ángel cuan ta catyí ra chi ra vatyí na tachi ra musu ra ñuu Jope na cana ra chi noo ra cha nañi Simón Pedro.

¹⁴ Vatyí ican ra cucatyí ra chi ra yoso caa cacu añima ra ta añima tandihí ñáyivi chi ra, catyí ángel cuan chi ra cuan na.

¹⁵ Ta sacuví ra cuan tari cuhva catyí ángel cuan chi ra. Ta cuhva cha chaí vehe ra quichaha cahín chihin ñu. Ta quichí ri Tatyí lí siqui ñu tari quichí siqui yo cha xihna ri.

¹⁶ Tyicuan ta nichohon iñi cha catyí Sutu Mañi yo quivi cuan. Ta catyí ra tyehe caa: “Ndicha vatyí ra Juan sacondutya ra chi ñáyivi chihin ndutya. Soco nyoho cucondutya ndo chihin Tatyí lí”, catyí ra.

¹⁷ Nyoo chahā tucu ra Tatyí lí ra chi ñu cuan tari chahā ra chi maa yo quivi chino iñi yo chi Sutu Mañi yo Jesucristo. Ta cha tyicuan caa zyóo ra cuví yuhu vatyí casi cha sacuví Nyoo? —catyí ra Pedro chi ra.

¹⁸ Tyicuan ta cuhva cha cachiñi ra yañi yo ra Jerusalén tuhun cuan ña nacahan ca ra. Ta casacahnū ra chi Nyoo. Ta cacatyí ra:

—Tu tyicuan caa cuví, cuñi chi catyí vatyí Nyoo chahā tucu ra chi ñu cha ñima ñu Israel cuví vatyí ndu uvi iñi tucu maa ñu cuatyí ñu, ta coo ñu ñayiví cha ma naa ca maa —cacatyí ra.

Ñu yihí cuenda ra Cristo ñuu Antioquía

¹⁹ Quivi cha cachahñi ra chi ra Esteban, quichaha chica nyicon ra chi inga ñu yihí cuenda ra Cristo. Ta yihí ñu cachino ñu ta cuahan coyo ñu ityí Fenicia. Ta inga ñu nya noo ñuhú cha nyaá mahñu tyañuhu cha nañi Chipre. Ta yihí ñu chaā coyo ñu ñuu Antioquía. Ta suri cahan ñu tuhun ra Cristo soco iin ri maa chihin ñu Israel.

²⁰ Ta chihin ñu cha cuahan coyo cuan, ndihí suhva ñáyivi ñuhú Chipre. Ta yihí tucu suhva ñu ñuu Cirene. Ta cha chaā coyo ñu ñuu Antioquía, ta quichaha cahan tucu ñu cuan chihin ñu cha ñima ñu Israel cuví. Ta sacoto ñu tuhun Sutu Mañi yo Jesús, ra cha sacacu añima yo.

²¹ Ta tunyee iñi Sutu Mañi yo nya chihin ñu. Ta yucuan chaha cuaha ñáyivi casandoo ñu tuhun chahnū cha chino iñi ñu. Ta nachino iñi ñu chi Sutu Mañi yo.

²² Tyicuan ta chaā tuhun cuan nya Jerusalén. Ta ñu yihí cuenda Cristo tachí ñu chi ra Bernabé na cunhan ra nya Antioquía.

²³ Ta cha chaā ra Bernabé Antioquía cuan, nyehē ra yoso caa nasocó Nyoo chi ñu. Ta ndusií xaan cuñi ra. Ta cahan ra nuu ñu na cunyicon ñu chi Sutu Mañi yo chihin cha ñi iñi ñu.

²⁴ Tyicuan caa sacuví ra Bernabé vatyí cuví ra noo ra vaha. Tyitú ra chihin Tatyí lí. Ta chinó xaan iñi ra chi Nyoo. Ta tyicuan caa ta cuaha ñáyivi quihvĩ ñu cuenda Sutu Mañi yo.

²⁵ Cha yaha cuan ta cuahan ra Bernabé cuananducu ra chi ra Saulo nya ñuu Tarso. Ta cha nañihí ra chi ra, chinyaca ra chi ra nya ñuu Antioquía.

²⁶ Ta cachinyicu ra chihin ñu yihí cuenda Nyoo ñuu cuan noo cuiya nanií ta sañahā ra tuhun Nyoo chi cuaha ñáyivi. Ta suri ñuu Antioquía cuan cuví nu quichaha catyí ñáyivi: Cristiano chi ñu, o ñu yihí cuenda ra Cristo cuví cuan.

²⁷ Ta quivi cuan chaā coyo ra cachahā cuenda tuhun cahan Nyoo, ra cacuví profeta. Quitā ra ñuu Jerusalén ta chaā coyo ra Antioquía.

²⁸ Ta noo ra cuan nañi ra Agabo chicuinyaa ra nu nyicú ra yihí cuenda ra Cristo ta cahan ra tuhun cha chahā Tatyí lí chi ra. Ta catyí ra vatyí cuquichi noo tama nicacahnū ñayiví. Ta tyicuan caa cuví quivi chinyaa ra Claudio cuví ra rey chahnū.

²⁹ Tyicuan ta ñu yihí cuenda Cristo nya Antioquí tyihí tahan ñu tuhun vatyí cucuhva ñu yoso cuhva cundaa iñi maa noo noo ñu, vatyí cutyinyee ñu chi ñu yihí cuenda Cristo cha iyó ityí Judea.

³⁰ Tyicuan caa sacuví ñu ta sacahnū ñu xuhun chi ra cuví nuu chi ñu yihí cuenda Cristo nya Jerusalén. Ta ra Bernabé ta ra Saulo chinyacā ra xuhun cuan.

12

Nu chihí ra Jacobo ta nu quihvĩ ra Pedro vehe caa

¹ Ta quivi cuan quichahā chica nyicon rey Herodes chi suhva ñu yihí cuenda ra Cristo.

² Ta tachj ra tyiño vatyí na cahñi ra chi ra Jacobo yañi ra Juan chihin mityi.

³ Ta nyehe ra Herodes vatyí tahan xaan iñi ñu Israel cha sacuvj ra tyicuan caa, ta tyihj ra tyiño vatyí tñin ndihi ra chi ra Pedro. Ta cuví chi noo quivi vico pascua nu tuhva ñu chachi ñu pan cha ñahri yuchan iya yihi chihin.

⁴ Cha yaha cha tñin ra chi ra Pedro, tyihj ra chi ra vehe caa. Ta cumi ityi sindaro sahá cumi chi ra. Ta cumi sindaro cha noo ityi ra ta sahá cuenda ra suhva suhva cuhva chi ra. Ta tyaq ra Herodes cuhva vatyí nayahá vico cuan ta cucuhva cuenda ra chi ra chi ñáyivi.

⁵ Ta tyicuan caa ñohó ra Pedro vehe caa. Ta sindaro cuan sahá cumi vaha xaan ra chi ra. Soco cha ni ri ca cha ñohó ra yucuan, ñu yihi cuenda ra Cristo chicán tahvi xaan ñu nyita cuui ri maa cha cuenda ra.

Nu sacacj Nyoo chi ra Pedro vehe caa

⁶ Ta tyaá ra Herodes cuhva vatyí cha ñaha ri inga quivi cuan cutava ra chi ra Pedro nuu ñáyivi. Ta suri cha cuaa cuan ra Pedro quixi vavaha ra mahñu uvi sindaro cuan. Ta nuhñi ra chihin uvi cadena. Ta uvi ca sindaro canyicú ra yuvehe casahá cumi ra.

⁷ Ta tañi ri ta tuvj noo ángel cha tachj Sutu Mañi yo. Ta ndundichin ri chichi vehe caa cuan. Ta ángel cuan tñin ra xiin ra Pedro. Ta sandoyo ra chi ra. Ta catyí ra chi ra:

—Sanumi. Ndícuita —catyí ángel cuan chi ra.

Tyicuan ta ndachj cadena cha nuhñi ndaha ra Pedro.

⁸ Ta ángel cuan catyí ra chi ra:

—Nacuhñi vaha chichun ta natyihj ndichan chahun —catyí ángel cuan.

Tyicuan caa sacuvj ra Pedro. Ta catyí ángel chi ra:

—Quehen sahmon ta tyaun chaton ta qujchun chate —catyí ángel cuan chi ra Pedro.

⁹ Ta ra Pedro quitá ra chata ángel cuan. Soco ña chitó ra tatu cha ndicha o cha ña ndicha cuví cuan, ta cuñi maa ra vatyí visión nyehé ra.

¹⁰ Soco cuahan ra chata ángel cuan ta cayaha ra noo nu sahá cumi sindaro. Tyicuan ta cayaha ra inga tucu nu casahá cumi sindaro cuan. Yaha cuan ta chaq coyo ra yuvehe caa cahnu nu quita ñáyivi ta quihvi ñu chichi ñuu. Ta yuvehe cuan nuña ri maa. Ta quitá coyo ra. Ta cha yaha yaha ra noo ityi cahnu, ta sandoq ángel cuan chi ra.

¹¹ Tyicuan ta nacotq ra Pedro vatyí ndicha ta quichaha catyí ra:

—Ndicha, ñima visión cuví. Soco maa Sutu Mañi yo tachj ra noo ángel vatyí

sacacj ra chii ndaha ra Herodes ta ndaha ra Israel —catyí ra Pedro.

¹² Chicá xiñi ra tuhun ihya ityi cuahan ra. Ta chaq ra vehe cu María sihi ra Juan Marcos. Ta cuaha xaan ñu canyicú cuan chicán tahvi ñu chi Nyoo.

¹³ Ta cuhva cha sacachan ra Pedro yuvehe nuquehe, quitá noo ñaha tyivaa cha nañi Rode chinyehe ña yóo cha sacachan cuan.

¹⁴ Soco cuhva cha nicohon soho ña ndusu ra Pedro, ña nuña ña yuvehe. Vatyí sii xaan cuñi ña, ta chino ña cua nacatyí ña. Ta catyí ña vatyí ra Pedro nanyaá ra yuvehe.

¹⁵ Tyicuan ta quichaha catyí ñu chi ña: —Loco yoho —catyí ñu chi ña.

Soco ña cuan catyí ña vatyí ndicha cha cahán ña. Soco ñu cuan catyí ñu tyi ñima ra Pedro cuví ra, soco ángel cuenda ra cuví, catyí ñu.

¹⁶ Ta ra Pedro sañihi ca ra sacachan ra yuvehe. Ta cuhva cha nuña ñu ta nanyehe ñu chi ra, iyo xaan cuñi ñu ta yuhvi ñu cuví.

¹⁷ Soco savaha ra seña chihin ndaha ra nacutaxin ñu. Ta nacatyí ra chi ñu yoso caa tavá Sutu Mañi yo chi ra vehe caa. Ta catyí ra chi ñu:

—Nacatyí ndo chi ra Jacobo ta chi inga yañi yo —catyí ra.

Ta quitá ra ta cuahan ra inga ityi.

¹⁸ Cuhva cha cundichin, iyo cacuvi sindaro cha sahá cumi chichi vehe caa cuan, vatyí ña cachitó ra yoso caa quitá ra Pedro.

¹⁹ Tyicuan ta tachj ra Herodes cunanducu chi ra. Ta vatyí ña nañihj ra chi ra, tyicuan ta tachj ra na cacahñi ra chi ra sahá cumi vehe caa cuan. Yaha cuan ta quitá ra Herodes ityi Judea cuan ta cuahan ra ñuu Cesarea cuacoo ra.

Nu chihj ra Herodes

²⁰ Ta ra Herodes cuxaan xaan ra chihin ñáyivi ñuu Tiro ta ñáyivi ñuu Sidón. Soco cuñi ñu cuan nduvaha coo ñu chihin ra vatyí ñuu cha nyacá ñaha ra yucuan quitá cha cachi ñu. Tyicuan ta ndu ijin ri ñu ta cuahan coyo ñu cuacutahan ñu chihin noo ra cha nañi Blasto. Ican ra sahá cuenda chi ra Herodes. Ta chican ñu cha nduvaha coo ra Herodes chihin ñu.

²¹ Tyicuan ta catyí ra Herodes vatyí cuhun ñu nu nyaá ra noo quivi. Ta chaq quivi cuan ta ndihvi noo ra sahma tyiño ra. Ta chicunyaa ra nu tyayu cahnu ra. Ta cahán noo ra nuu ñu.

²² Tyicuan ta quichaha canachaa ñáyivi, ta catyí ñu:

—Ra cha cahán ihya ñima noo rayii ri cuví ra. Nyoo cuví ra —catyí ñu.

²³ Ta caa cuhva ri cuan noo ángel Sutu Mañi yo chaha ra noo cuehe chi ra Herodes

vatyí chahá ra cha catyí ñáyivi tyi Nyoo cuví ra. Ta quihví tindacu chí ra, ta chihí ra.

²⁴ Soco tuhun Nyoo cuahan chítaya ca. Ta cahan ñu tuhun Nyoo tandihí ri ityí.

²⁵ Quívi cha ndihí tyiño saha ra Bernabé ta ra Saulo nya Jerusalén, cuanuhu coyo ra ñuu Antioquia. Ta cuahan tucu ra Juan Marcos chihin ra.

13

Nu quichaha cachicá ra Saulo ta ra Bernabé tyiño Nyoo

¹ Vehe ñuhu Antioquia cuan iyó ra cacuví profeta Nyoo. Ta iyó tucu ra cha sañahá tuhun Nyoo chí ñáyivi. Ta sivi ra cuan ican cuví ihya: Ra Bernabé, ra Simón Toon, ra Lucio ra ñuu Cirene, ra Manaén cha chahnu in ri chihin ra Herodes cha cuví rey ityí Galilea, ta ra Saulo.

² Ta noo quívi nyicú tandihí ra ta casacahnú ra chí Sutu Mañi yo. Ta casahá ra ayunar: ña cachachi ra ta cananducu ra chí Nyoo cuví cuan. Tyicuan ta catyí Tatyí Ii chí ra:

—Tava siin ndo chí ra Bernabé ta ra Saulo cha cuenda tyiño cha cané chí ra —catyí Tatyí Ii chí ra.

³ Tyicuan ta cha ndihí saha ra ayunar, ta catyiso ra ndaha ra siquí ra, ta cachican tahví ra chí Nyoo cha cuenda ra. Ta cacahan ra chihin ra tahan ra ta cuahan coyo ra.

Nu cahan ra apóstol tuhun Nyoo ñuhu Chipre

⁴ Yahá cuan tachí Tatyí Ii chí ra Bernabé ta chí ra Saulo noo ñuu cha nañí Seleucia. Tyicuan ta cuahan coyo ra. Ta yucuan caquihví ra chichí noo barcu ta cuahan ra nya ñuhú Chipre cha nya mahñu tyañuhu.

⁵ Yucuan ta cachaá coyo ra noo ñuu yuhu tyañuhu cha nañí Salamina. Ta quichahá cahan ra tuhun Nyoo vehe ñuhu ra Israel. Cuahan tucu ra Juan chihin ra vatyí tyinyee ra chí ra.

⁶ Tyicuan ta cuahan coyo ra cahan ra tuhun Nyoo noo noo ñuu cha nya Chipre cuan nyacua nya chaa coyo ra ñuu cha nañí Pafos. Ta yucuan nañihi ra chí noo ra Israel cha nañí Barjesús. Ta chitó ra tuhun tasí. Cuví ra noo ra cuendu vatyí catyí ra vatyí cuenda Nyoo cahan ra.

⁷ Ta ra tasí cuan nyaá ra chihin gobernador Sergio Paulo. Ta ra Sergio cuví ra noo ra cachi iñi. Ta caná ra chí ra Bernabé ta chí ra Saulo, vatyí cuñí ra cuñi ra tuhun Nyoo.

⁸ Ta ra tasí cuan nañí tucu ra Elimas, ta chasí ra nu chino iñi gobernador cuan chí ra Cristo.

⁹ Tyicuan ta ra Saulo cha nañí tucu Pablo, tyitú ra chihin Tatyí Ii. Ta nyehe vavaha ra chí ra Elimas cuan.

¹⁰ Ta catyí ra chí ra:

—Yoho ra sandaví ñaha, cuendu xaun. Sehe cuihna cuví chuun. Ta cuñún sativun tandihí cha vaha. Ta tyicuan ri chasún ityí vaha Sutu Mañi yo.

¹¹ Ta vityin Sutu Mañi yo cutachi tuñi ra chuun, vatyí cunducuaun. Ta ma cuví nyehun ñuhu ñanyii suhva quívi —catyí ra Pablo chí ra Elimas.

Tyicuan ta caa cuhva ri cuan ta nducuaa ra. Ta ndoo ra nu ñaa iñi. Ta nducu ra noo ra tiin ndaha ra vatyí ña ndichin ca nyehé ra.

¹² Cuhva cha nyehe gobernador cuan cha cuví chí ra Elimas, chinq iñi ra chí ra Jesucristo. Vatyí iyo cuñi ra nyehe ra cha sañahá Sutu Mañi yo.

Cuahan ra Pablo ta ra Bernabé nya ñuu Antioquia ityí Pisidia

¹³ Ra Pablo ta ra tahan ra quihví ra chichi noo barcu ñuu Pafos. Ta cuahan coyo ra nya ñuu Perge ityí Panfilia. Soco ra Juan Marcos sandoq ra chí ra ta cuanuhu ra nya Jerusalén.

¹⁴ Yahá cuan ta caquitá ra Perge cuan, ta cuahan coyo ra ñuu Antioquia cha nyaá ityí Pisidia. Yucuan quihví coyo ra chichi vehe ñuhu ñu Israel ta cuví chí noo quívi nyitatu ñu. Ta chicunyicu ra.

¹⁵ Tyicuan ta quichahá sacuaaha ñáyivi nu libru ley cha tyaá ra Moisés. Ta sacuaahá tucu ñu libru cha tyaá ra cacuví profeta Nyoo ta cha naha. Yahá cuan ta ra cacuví nuu vehe ñuhu catyí ra chí ra hermano nyicú cuan, vatyí tatu iyó noo tuhun cuñí ra cahan ra chihin ñáyivi, cuví cahan ra.

¹⁶ Tyicuan ta ndicuitá ra Pablo ta sacuví ra noo seña chihin ndaha ra vatyí na cutaxin ñu. Ta catyí ra:

—Cuiñi ndo nyoho ra Israel, ta nyoho cha quichahá ndo chí Nyoo.

¹⁷ Nyoo cuenda yo, ñu Israel, nacachí vaha ra chí sutu chahnu yo. Ta quívi cha iyó ca ñu ityí Egipto sacuví ra noo ñuu cahnu chí ñu. Vasi ñima ñáyivi ñuu cuan cuví ñu, soco sanducuaaha ra chí ñu. Yahá cuan ta tava ra chí ñu ityí cuan chihin tunyee iñi chí ra.

¹⁸ Ta cunyeq iñi Nyoo tandihí cuhva chiyó ñu nu chicá noo ñu ñuhú ityí chichi cha uvi xico cuiya.

¹⁹ Ta sanaa ra ucha tahan ñuu nahnu cha chiyó ñicahnu Canaán, vatyí chahá ra ñuhú cuan chí sutu chahnu yo.

²⁰ Yahá cuan ta sacuví Nyoo vatyí cunyaca ñaha maa maa ri juez chí ñáyivi cuan. Tari noo cumi ciento sisava cuiya chinyacá ñaha juez chí ñu nyacua nya quívi chinyacá ñaha ra profeta Samuel chí ñu.

²¹ Tyicuan ta maa ñu chicān ñu noo rey cha cunyaca ñaha chí ñu. Ta Nyoo chahá ra

chi ra Saúl sehe ra Cis chi ñu, vaty cunyaca ñaha ra chi ñu. Ta ra Saúl vachi ra tata ra Benjamín. Ta uvi xico cuiya chinyacá ñaha ra chi ñu.

²² Yaha cuan ta Nyoo tavá ra chi ra Saúl cha cuví ra rey. Ta chaha ra vaty cuan ra David rey. Ta catyí ra: “Nehí vaty ra David sehe ra Isaí cuví ra noo rayíi cha tahán iñi cuhva iyó. Ta cusacuví ra tandihí cha cuñí yuhu”, catyí Nyoo tuhun ra David.

²³ Ta minoo ra vachi tata ra David cuan ican cuví ra Jesús. Ta maa Nyoo tachí chi ra vatyí sacacu ra chi yo ñu Israel, tari catyí ra chí sutu chahnu yo.

²⁴ Ta cumañi ca quichi ra Jesús, ra Juan ra sacondutya chí ñáyivi cahan ra nuu tandihí ñáyivi Israel. Ta catyí ra chí ñu vatyí cuñí chí cha ndu uvi iñi ñu cuatyí ñu, ta condutya ñu.

²⁵ Ta cha cuandihí tyiño saha ra Juan ta catyí ra: “¿Atu cuñí maa ndo vatyí yuhu cuví noo ra cahnú cha saquichí Nyoo? Soco ñima yuhu cuví ra cahnú cuan. Vatyí chata cha yaha yuhu ta vachi nonga ra. Ta ni ndichan nyaá chaha ra ta ña nañé cha ndachi. Vatyí cahnú xaan ra cuví ra”, catyí ra Juan.

²⁶ Hermano —catyí ra Pablo— nyoho ñu vachi tata ra Abraham, ta nyoho cha quichahá ndo chí Nyoo. Cha cuenda nyoho cuví tuhun ihya tyi sañahá Nyoo chí yo yoso caa cacu añima yo.

²⁷ Ñáyivi ñuu Jerusalén ta ra cuví nuu chí ñu cuan, ña chitó ñu vatyí ra Jesús cuví ra cha sacacú chí yo. Ta ni ña cutuñí iñi ñu tuhun cha catyaa ra profeta Nyoo ta cha naha, vasi sacuha vavaha ñu tuhun cuan tandihí quivi cha nyitatu ñu, soco ña cutuñí iñi ñu. Ta quivi chahñí ñu chí ra Jesús chingo cava tari cuhva catyí ra profeta Nyoo cuan.

²⁸ Vatyí vasi ñahri cuatyí ra nañihí ñu, soco chican ñu chí ra Pilato na tyihí ra tyiño cucahñi chí ra.

²⁹ Ta cha yaha sacuví ñu chí ra tari cuhva catyí maa tuhun ra nu libru Nyoo ta chihí ra. Tyicuan ta sanoo ñu chí ra nu cruzi. Ta tyihí ñu chí ra chichí ñuhú.

³⁰ Soco Nyoo sanandotó ra chí ra.

³¹ Ta chichí cha cuaha quivi tuví ra nuu ra cha quichi coyo chihin ra quivi quitá ra ityí Galilea, ta quichi ra Jerusalén. Ta ican ra cuan cacahan tuhun ra chihin ñáyivi vityin.

³² Ta yucuan chaha nyuhu cahan ndi tuhun vaha cha catyí Nyoo chí sutu chahnu yo vatyí cuhva ra chí yo.

³³ Vatyí cha cuenda cha vaha chí maa yo cha cuví yo ñáyivi vachi tata ñu cuan, sacuví maa Nyoo cha catyí ra. Vatyí sanandotó ra chí ra Jesús tari cuhva nyaá nu cu uvi salmo nu catyí Nyoo tyehe caa:

“Sehi cuví chuun, ta yuhu चाहि ñáyivi coun vityin”, catyí Nyoo.

³⁴ Nyoo tyaá ra cuhva vatyí sanandoto ra chí ra, tacuhva cha ma tyahyu coño ñuhu ra. Vatyí catyí nu tutu Nyoo: “Cuhve chí nyoho cha vaha cha catyí chí ra David.”

³⁵ Yucuan chaha catyí tucu nu inga salmo tyehe caa. “Ma cuhvon cha tyahyu coño ñuhu Sehe iun”, catyí chí.

³⁶ Ra David sacuví ra tyiño nuu ñu cha chiyó quivi chiyó ra, yoso cuhva cha catyí Nyoo chí ra tyi sacuví ra. Yaha cuan ta chihí ra ta chichuchí ñu chí ra tari chichuchí ñu chí sutu ra. Ta tyahyu coño ñuhu ra.

³⁷ Soco ra cha sanandotó Nyoo chí, ña tyahyu coño ñuhu ra.

³⁸ Yañi, cuñí chí coto ndo vatyí cha cuenda cha chihí ra Jesús tyiño nuu yo, Nyoo sahá ra ticahnu iñi cuatyí yo.

³⁹ Ta cha cuenda ra Jesús sahá Nyoo ticahnu iñi chí tandihí ñu cha chinó iñi chí ra, tyi ley ra Moisés ña cuví sacuvaha chí yo nuu Nyoo.

⁴⁰ Saha ndo cuenda coto ndoo siqui ndo cha catyaa ra profeta Nyoo nu catyí ra tyehe caa:

⁴¹ Nyehe nyoho, ra chacú nyaá, tahán chí cha iyo cuñi ndo ta cunaa ndo. Vatyí yuhu cuví Nyoo, ta sacuví minoo cha cahnú quivi cha iyó ndo vityin.

Soco ma chino iñi ndo tandihí cha sacuví yuhu vasi nacatyí ñáyivi chí ndo, catyí Nyoo.

⁴² Ndihi cahan ra Pablo ta cuaquita ra chata vehe ñuhu cuan chihin ra tahan ra. Tyicuan ta ñu cha ñima ñu Israel cuví quichaha catyí ñu chí ra, vatyí na cahan tucu ra tuhun ihya chihin ñu inga vitya quivi cha nyitatu ñu.

⁴³ Cuhva cha ndihí ndu ñn ri ñu, cuaha xaan ñu Israel ta ñu cha yihí cuenda ñu Israel, cachinyicon ñu chí ra Pablo ta chí ra Bernabé. Ta chahá ra tuhun chí ñu vatyí na cahun ca ñu ityí nuu ca chihin Nyoo. Ta naquehen vaha ñu tumañi iñi cha chahá Nyoo chí ñu.

⁴⁴ Cha inga vitya quivi nyitatu ñu, ndu ñn ri ñu. Ta cha yatyin cha tandihí ñáyivi ñuu cuan ndu ñn ri ñu vatyí cuñí ñu tuhun Nyoo.

⁴⁵ Soco cuhva cha canyehe ra Israel, cuxaan ra vatyí nyehe ra vatyí cuaha ñáyivi nyicón chí ra cuan. Ta quichaha cacuví yuhu ra chihin ra Pablo, ta cacahan ra chí ra.

⁴⁶ Soco ña yuhví ra Pablo ta ra Bernabé. Ta quichaha cacatyí ra chí ra:

—Cuñí chí cha cahan xihna ndi tuhun Nyoo chihin nyoho cha cuví ndo ñu Israel. Soco ña cuñí ndo naquehen ndo. Ta cuñí maa ndo vatyí ña naña ndo cha ñihí ndo ñáyivi chaa cha ma naa ca maa. Yucuan

chaha cuhun ndi cucahan ndi chihin ñu cha ñima ñu Israel cuví.

⁴⁷ Vatyí tyicuan caa tachí Sutu Mañi yo chi ndi ta catyí ra tyehe caa:

Tyaj̄ chuun tari ñuhu chi ñáyivi nicañnu ñuhu ñáyivi.

Tacuhva vatyí cusañahun ityí chi ñu yoso caa cacu añima ñu, catyí Nyoo.

⁴⁸ Cuhva cha cachiñj̄ ra cha ñima ra Israel cuví, ndusiñ cuñi ra. Ta quichaha catyí ra vatyí tuhun Nyoo vaha xaan. Ta nachino iñi tandihí ñu cha nacachí maa Nyoo chíi, vatyí coo ñu ñáyivi chaa cha ma naa ca maa.

⁴⁹ Ta tyicuan caa chitya tuhun Nyoo tandihí ityí ñuu cuan.

⁵⁰ Soco ra Israel cacahan ra chihin suhva ñusihi tyayii cha nyicón ley ra Moisés. Catyí ra chí ñu vatyí ña vaha tuhun cahán ra Pablo. Ta cahán tucu ra chihin ra cuví nuu chí ñuu cuan. Ta yucuan cuví nu quichaha chica nyicon ñu chí ra Pablo ta chí ra Bernabé, nyacua nya cha tavá ñehe ñu chí ra ñuu cuan.

⁵¹ Tyicuan ta canaquisi ra ñiyaca chaha ra tari noo seña vatyí ndoo cuatyí ñáyivi cuan siqui maa ñu. Ta cuahan coyo ra ñuu Iconio.

⁵² Soco ñu yihí cuenda Nyoo ñuu Antioquia cuan siñ xaan cacuví chí ñu. Ta tyitu ñu chihin Tatyí li.

14

Nu ñohó ra Pablo ta ra Bernabé ñuu Iconio

¹ Ñohó ra Pablo ta ra Bernabé ñuu Iconio. Ta caquihvi ra chichi vehe ñuhu ñu Israel. Ta vaha xaan cacahan ra tuhun Nyoo chihin ñáyivi. Ta cuaha xaan ñu nachino iñi ñu chí ra Cristo, ñu Israel ta ñu cha ñima ñu Israel cuví ñandihí.

² Soco ra Israel cha ña chinó iñi chí ra Cristo catyiyuhú ra chí ñu cha ñima ñu Israel cuví vatyí caca ña vaha iñi ñu nyehe ñu chí ra yihí cuenda ra Cristo.

³ Yucuan chaha ra Pablo ta ra Bernabé candoo ra yucuan cuaha quivi. Ta chihin cha nñi iñi ra cacahan ra tuhun ra Cristo. Ta chinó xaan iñi ra chí Sutu Mañi yo. Ta Sutu Mañi yo tyinyee ra chí ra cha cacahan ra tuhun ra yoso caa cuñi ra chí yo. Ta chaha Sutu Mañi yo cha casacuví ra seña ta milagru tacuhva coto ñáyivi tyi ndicha cha cahan ra.

⁴ Soco ñáyivi ñuu, ña ñn ri cuví ñu. Yihí ñu cuahan ñu tumañi iñi chí ra Israel. Ta inga tucu ñu cuahan ñu tumañi iñi chí ra apóstol.

⁵ Tyicuan ta ra Israel ta ra cha ñima ra Israel cuví, catyihj̄ tahan ra tuhun chihin ra cuví tyiño, vatyí cahan ña vaha ra siqui ra, ta catuchj̄ ra yuu chí ra.

⁶ Soco ra Pablo ta ra Bernabé ñihj̄ ra tuhun vatyí cusacuví ra tyicuan caa, ta cuahan coyo ra nya ñuu Lистра, ta nya ñuu

Derbe ityí Licaonia. Ta cachica noo ra ityí cuan.

⁷ Ta cacahan tucu ra tuhun Nyoo yoso caa sacacu ra añima yo.

Nu cañi ñáyivi yuu chí ra Pablo nya ñuu Lистра

⁸ Nya Lистра iyó noo rayii cha pehe chaha. Ta nya ndaha cacu ra ta ña cuví caca ra. Vatyí pehe ninduvi chaha ra.

⁹ Ta suri maa ra pehe chaha cuan tyasohó vavaha ra nu cahán ra Pablo. Ta ra Pablo, tuvj̄ iñi ra vatyí chinó iñi ra cuan vatyí cuví nduvaha ra.

¹⁰ Tyicuan ta ra Pablo cahan ra chihin cha chaa ndusu ra, ta catyí ra:

—Ñicuinyaa ndoo —catyí ra Pablo chí ra.

Ta ra cuan, noo ri caña ndava ra, ta nicuinyaa ra. Ta quichaha chica ra.

¹¹ Cha nyehé ñáyivi cha sacuví ra Pablo, quichaha cana chaa ñu chihin sahan Licaonia, ta catyí ñu:

—Nyoo cha tari caá rayii chaá coyo nu nyicú yo —catyí ñu.

¹² Ta catyí ñu tyi ra Bernabé cuví ra noo nyoo cha nañi Júpiter, ta ra Pablo cuví nyoo cha nañi Mercurio, vatyí ican ra cuví ra cahán.

¹³ Ta iyó noo tata sutu cuenda Júpiter cuan, saha cumí ra vehe ñuhu cha nyaá yuhu ñuu ri cuan. Ta quichj̄ nyaca ra toro ta ita vatyí maa ra ta ñáyivi cuñi ñu sacahnu ñu chí ra Pablo ta chí ra Bernabé. Ta cuacahñi ñu toro tyi cuacuhva cuenda ñu chí ra, vatyí cuñi ñu tyi nyoo cacuví ra.

¹⁴ Soco cuhva cha catuvj̄ iñi ra apóstol, ra Bernabé ta ra Pablo, cha chicá xiñi ñu, quichaha chahnya ra sahma ra. Ta casacuví ra tyicuan caa tari noo seña vatyí ña ndoo ra vaha. Ta quihj̄ coyo ra mahñu nu tuví ñáyivi, ta cacana chaa ra,

¹⁵ ta catyí ra:

—Nyoho tata, ¿ñáá tuhun cha nyacuví ndo tyehe caa? Nyuhu rayii ri cuví ndi tari maa ndo. Ta vachi ndi vatyí catyí ndi chí ndo vatyí na saña ndo cha sacuví ndo tyehe caa. Vatyí ña chiñuhu maa cha tyehe caa. Ta na cunyicon ndo chí Nyoo nyitó. Vatyí ican ra savaha andivi ta ñuhu ñáyivi. Ta savaha ra tyañuhu ta tandihí cha iyó chichi tyañuhu cuan.

¹⁶ Ta tyiembu chahnu ta nya vityin, Nyoo saña ndaha ra chí ñáyivi na sacuví maa ñu yoso cuhva cuñi ñu,

¹⁷ vasi tyicuan ri sañahá ra chí ñu yóo ra cuví ra, chihin cha vaha cha sacuví ra. Maa ra sacoon ra savi nu canyicú yo. Chahá ra cha vaha coo tyiño saha yo quivi tahan chí. Ta chahá ra cachi yo. Ta chahá ra cha cusii cuñi añima yo —catyí ra Pablo chí ñu.

¹⁸ Soco vasi catyí ra tyicuan caa, yíi xaan ta chasi ra cha cahñi ñu toro cuan, vatyí cuñí ñu sacahnu ñu chi ra chihin cuan.

¹⁹ Tyicuan ta chaq coyo suhva ra Israel, ra ña chinó iñi chi ra Cristo, ra ñuu Antioquía, ta ra ñuu Iconio. Ta tyiyuhu ra chí ñáyivi, ta catyí ra vatyí na tuchi ñu yuu chí ra Pablo. Ta tyicuan caa sacuví ñu. Ta cuñi maa ñu vatyí cha chíhi ra. Ta xita quíño ñu chí ra ityi chata ñuu.

²⁰ Soco candu ñin ri ra cayihí cuenda Nyoo nu catuví ra Pablo. Ta ndicuita ri ra. Ta quíhví ra inga chaha chichi ñuu. Ta cha inga quívi cuahan ra ñuu cha nañi Derbe ta cuahan ra Bernabé chihin ra.

²¹ Ta cahan tucu ra tuhun Nyoo nya ñuu Derbe yoso caa sacacu Nyoo aña yo. Ta cuaha ñáyivi nacuhvá ñu chí ñu chí Nyoo. Yahá cuan ta cuanuhu coyo ra ityi quichi ra. Ta yahá ra ñuu Lистра ta ñuu Iconio inga chaha, ta nachaq ra nya Antioquía.

²² Ta tandihí ñuu cuan sanduní ca ra iñi ñu yihí cuenda Nyoo. Ta catyí ra chí ñu na cuhun ñu ityi nuu ca chihin cha chino iñi ñu Nyoo. Ta catyí tucu ra chí ñu vatyí tatu cuñí yo cha cunyacá ñaha Nyoo chí yo, cuñí chí cha nyehe yo tindo.

²³ Ta canatyiso ra chí ra ca quíhi ndaha chí ñu yihí cuenda Nyoo noo noo vehe ñuhu. Ta cananducu ra Nyoo chihin cha ña chachi ra xita ta cachican tahvi ra chí Nyoo cha cuenda ra. Yahá cuan ta catyí ra chí ra: —Chino iñi ndo chí Sutu Mañi yo. Maa ra na cocumi ra chí ndo —catyí ra chí ra.

Nu cuanuhu coyo ra Pablo ta ra Bernabé Antioquía ityi Siria

²⁴ Yahá cuan ta yahá coyo ra Pablo ta ra Bernabé ityi Pisidia, ta chaq coyo ra ityi Panfilia.

²⁵ Cacahan ra tuhun Nyoo ñuu Perge. Yahá cuan ta chahan ra ñuu Atalia.

²⁶ Yucuan quíhví coyo ra chichi noo barcu ta cuanuhu coyo ra Antioquía. Yucuan cuví ñuu nu natyaa ñu chí ra ndaha Nyoo tyi cusacuvi ra tyiño nuu ra, ta vityin cha nachaq coyo ra.

²⁷ Cuhva cha nachaq coyo ra Antioquía sandu ñin ri ra chí ñu yihí cuenda Nyoo. Ta nacatyí ra chí ñu tandihí cha sacuví Nyoo chihin ra. Ta yoso caa nuña Sutu Mañi yo ityi vatyí chinó tucu iñi ñu cha ñima ñu Israel cuví.

²⁸ Ta naha xaan ndoo ra Pablo ta ra Bernabé chihin ñu yihí cuenda Nyoo ñuu cuan.

15

Nu casandaa ra apóstol tyiño nya Jerusalén

¹ Nyaá ca ra Pablo ta ra Bernabé Antioquía, ta chaq coyo ra quita coyo ityi Judea. Ta quichaha sañahá ra chí ra yihí

cuenda Nyoo. Ta catyí ra vatyí cuñí chí sacuvi ra costumbre circuncisión tari cuhva catyí ra Moisés, tyicuan ta cacu ra.

²⁻³ Ta ñihi xaan cahan ra Pablo ta ra Bernabé chihin ra cuan cha cuenda cuan. Tyicuan ta catyiso ñu hermano Antioquía cuan chí ra Pablo ta ra Bernabé chihin suhva ca ra vatyí cuhun coyo ra Jerusalén. Vatyí cusandaa ra tyiño ihya chihin ra apóstol ta ra yihí ndaha ñu nyicu vehe ñuhu ñuu Jerusalén cuan. Tyicuan ta cuahan coyo ra. Ta ityi cuahan ra, yahá ra ityi Fenicia ta Samaria. Ta canacatyí ra chí ñu yihí cuenda Nyoo yoso caa saña ñu cha ñima ñu Israel cuví tuhun chahnu cha chino iñi ñu. Vatyí nacuhvá cuenda ñu chí ñu chí Nyoo. Ta tandihí ñu hermano cusí xaan cuñí ñu cha chitó ñu tuhun cuan.

⁴ Quívi chaq coyo ra Pablo ta ra Bernabé Jerusalén, cuahan ra nu ndu ñin ri ñu yihí cuenda Nyoo. Ta tandihí ñu chihin ra apóstol, ta ra yihí ndaha chí ñu, chaha ñu lugar chí ra. Ta canacatyí ra tandihí cha sacuví Nyoo chihin ra.

⁵ Soco suhva ra fariseo cha cacinó iñi chí ra Cristo, nicuinanyaa ra ta catyí ra:

—Tandihí ra cha ñima ra Israel cuví ta chinó iñi ra chí ra Jesús, ñiñi cuñí chí cha sacuvi ra costumbre circuncisión. Ta cuñí tucu chí cha sacuví ra cuhva catyí ley cha tyaa ra Moisés —catyí ra.

⁶ Tyicuan ta candu ñin ri apóstol ta ra yihí ndaha chí ñu vehe ñuhu vatyí candatuhun vaha ra tuhun cuan.

⁷ Cha yahá cha cuviyuhu vavaha ra ta ndicuita ra Pedro, ta catyí ra:

—Yañi, chitó ndo vatyí chichi cha tandihí yo cachí Nyoo chí yuhu ra ndahvi quívi cuan, vatyí chihin tuhun yoso caa cacu aña yo chihin ñu cha ñima ñu Israel cuví, vatyí nachino iñi ñu chí Sutu Mañi yo.

⁸ Ta Nyoo, ra chitó aña tandihí ñáyivi, sañahá ra chí yo vatyí cuñí ra chí ñu cuan. Ican tuhun chaha ra Tatyí li ra chí ñu, tari chaha ra chí yo.

⁹ Nyoo ña sahá ra tyi vaha ca yoó cha nuu ñu cuan. Soco sanduví tucu ra aña maa ñu cha cuenda cha chinó iñi ñu chí ra.

¹⁰ Vityin naqaca xiñi yo cuhva cuñí Nyoo. Vatyí ña vaha cha tyiso yo ley ra Moisés siqui ñu. Vatyí niri maa sutu chahnu yo ta niri maa yo ta ña cuví naquehen vaha yo ley cuan.

¹¹ Ñima tyicuan caa cacú yo. Yoó chitó yo vatyí cacú yo chihin tumañi iñi cha sacuví Sutu Mañi yo Jesús chihin yo. Ta tyicuan caa tucu ñu cuan —catyí ra Pedro chí ra.

¹² Tyicuan ta taxi ri cacuví tandihí ra. Ta tyasohó ra tuhun cahan ra Bernabé ta ra Pablo. Vatyí canacatyí ra seña ta milagru

cha sacuví Nyoo nu cacahan ra tuhun Nyoo nu nyicú ñu cha ñima ñu Israel cuví.

¹³ Cuhva cha ndihí cahan ra, quichaha cahan ra Jacobo, ta catyí ra:

—Nyoho yañi, cuñi ndo tuhun chahín.

¹⁴ Cha nacatyí ra Simón Pedro chí yo yoso caa quichaha chahá Nyoo tumañi iñi chí ñu cha ñima ñu Israel cuví. Vatyí cachí tucu ra chí suhva ñu vatyí cuví ñu noo ñáyivi cuenda ra.

¹⁵ Ta ñin ri nanduvi tuhun ihya chihin tuhun cha cahan ra profeta cuenda Nyoo ta cha naha, tari cuhva nyaa nu tutu Nyoo tyehe caa:

¹⁶ Yaha tandihí tuhun ihya cuquichi tiquí nu nyaá ndo.

Quívi chíyo ra David, vaha sacahnu ñáyivi chíi.

Soco yahá cuan sandihí ñu tuhun cha sacahnu ñu chíi.

Soco cuquichi tiquí ta tari cha cunacoñehi vehe ñuhu ra David inga chaha.

Vatyí cusacahnu tucu ñáyivi chíi.

¹⁷ Tacuhva cuví nanducu tandihí ca ñáyivi chíi, tandihí ñu cha ñima ñu Israel cuví cha chicán tahví chihin sívi.

¹⁸ Tyicuan caa catyí Sutu Mañi yo ta sañaha ra tuhun ihya chí ñáyivi chíyo ta cha naha ta chí ñáyivi cha iyó vityín.

¹⁹ Yucuan chaha catyí yuhu vatyí ña vaha sayanga yo chí ñáyivi cha ñima ñu Israel cuví cha sandoo ñu tuhun cha chíyo ñu ta quihvi ñu cuenda ra Cristo. Ña vaha catyí yo tyi cuñi chí cha quichaha ñu ley chahnu.

²⁰ Vaha ri maa chihin cha sacuhun yo tutu chí ñu. Ta catyí yo chí ñu vatyí ma cachi ñu coño cha chahá cuenda ñáyivi chí xitohyo. Ta ni noo ñu ta ma coo ri maa ñusihí o rayí chí ñu, tatu ñima ñasihí o yí ñu cuví. Ta ma cachi ñu coño quití chihí cha cava ñu sucun ta ña chatí ñiñi. Ta ma cachi ñu ñiñi.

²¹ Vatyí nyata tyembu ta chíyo ra cha sañaha ley ra Moisés vehe ñuhu ñu Israel ta sañaha ra tuhun cuan tahan tahan ñuu. Ta tahan uña quívi quívi nyitatú ñu, sacuaaha ra tuhun cha tyaá ra Moisés —catyí ra Jacobo chí ra.

²² Tyicuan ta ra apóstol ta ra cayihí ndaha chí ñu nyicú vehe ñuhu chihin tandihí ñu yihí cuenda Nyoo nacachí ñu chí suhva ra. Ta yaha cuan ta tachí ñu chí ra vatyí cahun ra Antioquía chihin ra Pablo ta ra Bernabé. Ta ra cha canatyiso ñu ican cuví ra Judas cha nañi Barsabás, ta ra Silas. Ican ra cacuví ra ra cananyisó tyiño vehe ñuhu ñuu Jerusalén cuan.

²³ Ta chihin ra tachi ñu noo carta. Ta catyí carta cuan tyehe caa:

“Nyuhu ra apóstol, ta ra yihí ndaha chí ñu nyicú vehe ñuhu ta yañi ndo cuenda Nyoo, tandihí ri ndi chahá ndi nocumi chí nyoho cha ñima ra Israel cuví ndo vatyí yañi ndi cuví chí ndo vasi ñima ñu Israel cuví ndo. Tandihí ri ndo cha iyó ndo Antioquía ta nyoho ñu Siria, ta ñu Cilicia ñandihí, sacuhún ndi carta ihya chí tandihí ri ndo.

²⁴ Chitó ndi vatyí quitá suhva ra itiyí nu nyicú ndi ihya. Ta cuahan ra nu nyicu ndo. Soco ña catyí nyuhu chí ra tyi cahun ra cusayanga ra chí ndo chihin tuhun cahan ra. Satondó ra cuan xiñi ndo vatyí catyí ra chí ndo tyi cuñi chí cha sacuví ndo costumbre circuncisión ta naquehen vaha ndo ley ra Moisés. Soco ñima nyuhu catyí tyi cahun ra cucatyí ra chí ndo tyicuan caa.

²⁵ Yucuan chaha ndu ñin ri ndi ta nacachí tahan tuhun cahan ndi ta vaha cuñi ndi cha tachi ndi chí ra hermano ihya chihin ra Pablo ta ra Bernabé nu nyicu ndo.

²⁶ Nduvi tahan ra ihya nyehé xaan ra tindoho cha cuenda Sutu Mañi yo. Ta vasi cuñi ñáyivi cahñi ñu chí ra soco ña sandihí ra tuhun cha sacoto ra tuhun Sutu Mañi yo Jesucristo.

²⁷ Ta yucuan chaha tachí ndi chí ra Judas ta chí ra Silas. Ta maa ra cucahan ra chihin yuhu ra chihin ndo, vatyí nacatyí ra tandihí cha tyaá ndi nu tutu ihya.

²⁸ Vatyí niri Tatyí Ii ta niri nyuhu ta ña cuñi ndi tyiso ca ndi carga síqui ndo, soco ihya ri cha ñiñi ca tahán chí cha naquehen vaha ndo.

²⁹ Ma cachi ndo coño cha chahá cuenda ñu chí xitohyo. Ta suri ma cachi ndo ñiñi, ni coño quití cha chihí ta ña chatí ñiñi ti. Ta ma coo ñusihí o rayí chí ndo tatu ñima ñasihí ndo o yí ndo cuví. Tatu ma sacuví ndo tyicuan caa, vaha xaan cuacoo ndo. Ta Nyoo na cocumi ra chí ndo”, catyí ra nu carta cuan.

³⁰ Ta cuahan coyo ra cha catachi ra chí cuan. Ta chaá coyo ra Antioquía. Ta sandu ñin ri ra chí tandihí ñu, ta nacuhva cuenda ra carta cuan.

³¹ Cuhva cha sacuaaha ñu carta cuan ndusií xaan cuñi ñu vatyí vaha xaan cahán chí.

³² Ta ra Judas ta ra Silas cuví tucu ra cuan profeta cuenda Nyoo. Ta sandunií ra iñi ra hermano chihin tuhun cahan ra.

³³ Ta cha yahá chinyicu ra cuan suhva quívi ta cuanuhu coyo ra nya nu nyicú ñu catachi chí ra. Ta tandihí ñu yihí cuenda ra Cristo catyí ñu vatyí na cahun vaha ra.

³⁴ Soco ra Silas natyaá ra cuhva vatyí cundoo ra.

³⁵ Ta ra Pablo ta ra Bernabé candoó tucu ra Antioquía yucuan. Ta maa ra chihin cuaha ca ra casañaha ca ra chí ñáyivi. Ta

cacahan ca ra tuhun Sutu Mañi yo chihin ñu.

Nu cu uvi chaha cuahan ra Pablo tuhun Nyoo ta nu cusin ra chihin ra Bernabé

³⁶ Ta cha yahá suhva quivi ta catyí ra Pablo chi ra Bernabé:

—Coho inga chaha cunyehe yo nu nyicú ñu yihí cuenda ra Cristo tandihi ri ñuu nu cahan yo tuhun Sutu Mañi yo. Vatyí nyehe yo yoso caa canyicu ñu —catyí ra chi ra.

³⁷ Ta ra Bernabé cuñi ra cha cahun tucu ra Juan Marcos chihin ra.

³⁸ Soco ra Pablo ña tahán iñi ra cha cahun ra Juan chihin ra, vatyí sandoq ra chi ra nya Panfilia quivi cuan. Ta ña cacahan ca ra chisaha tyiño ra chihin ra.

³⁹ Ta ña chitahan iñi ni noo ra, ta cacusiin ra. Ra Bernabé cuahan ra chihin ra Juan Marcos. Ta quihvi ra chichi noo barcu ta cuahan coyo ra Chipre.

⁴⁰ Ta ra Pablo cachí ra chi ra Silas. Ta cha yahá chican tahvi ra hermano chi Nyoo na tyinyee ra chi ra, ta cuahan coyo ra.

⁴¹ Ta yahá ra ityi Siria, ta ityi Cilicia, ta sanduní ca ra iñi ñu yihí cuenda Nyoo noo noo ñuu.

16

Nu cuahan ra Timoteo chihin ra Pablo ta ra Silas

¹ Ra Pablo ta ra Silas chaq coyo ra ñuu Derbe, ta ñuu Lистра. Ta yucuan nañihí ra chi noo ra yihí cuenda Cristo. Nañi ra Timoteo. Ta sihi ra cuví ña noo ñaha Israel. Ta suri yihí tucu ña cuenda ra Cristo. Soco sutu ra ra Grecia cuví ra.

² Vaha xaan chicá ra Timoteo chihin Nyoo catyí ñu yihí cuenda Cristo ñuu Lистра ta ñuu Iconio.

³ Ta ra Pablo cuñi ra cha cahun ra Timoteo chihin ra. Ta saha ra circuncidar chi ra Timoteo. Vatyí coto ma cuiñi ñu Israel cha iyó ityi cuan tuhun ra Cristo cha cahán ra. Vatyí tandihi ñu chitó ñu vatyí sutu ra cuví ra ra ñuu Grecia.

⁴ Tyicuan ta cuahan coyo ra noo noo ñuu. Ta nacatyí ra chi ñu yihí cuenda ra Cristo tuhun cha chaha ra apóstol ta ra yihí ndaha chi ñu nyicu vehe ñuhu Jerusalén chi ra.

⁵ Ta tyicuan caa ta ndunij ca iñi ñu yihí cuenda ra Cristo ta chino ca iñi ñu chi Nyoo. Ta tahan quivi ta cuahan nducuaha ca ñu.

Nu nyehé ra Pablo noo visión chi noo ra Macedonia

⁶ Ña chaha Tatyí Ii cha cahan ra tuhun Nyoo ityi Asia. Yucuan chaha yahá sava ra ityi Frigia nu iyó xahñi ñuhu chihin ityi Galacia.

⁷ Ta chaq coyo tucu ra ityi Misia. Ta cuñí tucu ra cahun coyo ra ityi Bitinia, soco

Tatyí Ii ra Jesucristo ña chaha cahun coyo ra.

⁸ Tyicuan ta nya sava ri yahá ra ñuu Misia ta canoq coyo ra ñuu Troas cha nyaá yuhu tyañuhu.

⁹ Cañohó ra ñuu Troas cuan, ta noo cha cuaa nyehe ra Pablo noo visión. Nyehe ra chi noo rayii ityi Macedonia. Nanyaá ra ta chacú ndahvi ra nuu ra, ta catyí ra chi ra: “Ñaha, vatyí tyinyeun chi ndi”, catyí ra.

¹⁰ Ta cha nyehe ra Pablo visión cuan, yuhu ra Lucas chihin ra Pablo ta inga ra sanduvaha ndi chi ndi ta cuahan ndi nya Macedonia cuan. Vatyí chitó vaha ndi vatyí Nyoo cana chi ndi, vatyí cahan ndi tuhun ra yoso caa sacacú ra añima yo chihin ñáyivi ityi cuan.

Nu ñohó ra Pablo ta ra Silas ñuu Filipos

¹¹ Quihvi ndi noo barcu ñuu Troas. Ta cacahan ndoo ityi ri ndi nya Samotracia noo ñuhú luhlu iyó mahñu tyañuhu. Ta cha inga quivi chaq ndi ñuu Neápolis.

¹² Ta yucuan quita ri ndi ta cuahan ndi ñuu Filipos cha cuví noo ñuu cuenda ñu Roma. Ta cuví chi noo ñuu cahnú ca cha nuu tandihi ñuu ityi Macedonia cuan. Ta yucuan chinyicu ndi suhva quivi.

¹³ Noo quivi cha nyitatu ñáyivi ta quita ndi ityi chata ñuu, yatyin noo yutya nu tuhvá ñu chican tahvi ñu chi Nyoo. Chicunyaq ndi yucuan ta cacahan ndi tuhun Nyoo chihin ñusihí cha candu in ri yucuan.

¹⁴ Noo ñaha nañi ña Lidia. Ta ñuu ña cuví Tiatira. Ta tuhvá ña xico ña sahana ñuu, tyacu nyaa. Yucuan cuví tyiño sahá ña. Ta sacahnú ña chi Nyoo tari ñu Israel. Ta chihí ña cha cahán ra Pablo. Ta Nyoo nuña ra añima ña na quichaha ña cha cahan ra.

¹⁵ Ta condutyá ña chihin ñáyivi chi ña. Ta yahá cuan ta chacú ndahvi ña nuu ndi, ta catyí ña:

—Tatu nyehé ndo vatyí ndicha cha chinó iñi chi Sutu Mañi yo, ñaha ndo, cgo ndo vehi —catyí ña chi ndi.

Ta saniñi ña chi ndi cha ndoo ndi vehe ña.

¹⁶ Ta cuví noo chaha cha cuahan ndi nu chican tahvi ndi. Ta cha niri ca cha cuahan ndi, tahan ndi chi noo ñaha tyivaa. Yihí noo tatyí ña vaha chi ña. Yucuan chaha cuví nacoto ña ñáá ndihi cha cucuvi ityi nuu. Ta cuví ña noo ñaha iyó chitoho. Ta cuaha xaan cahun sahá ganaa ña cuenda chitoho ña, vatyí cuví nacotó ña.

¹⁷ Ta ñaha tyivaa cuan quichaha nyicon ña chi ndi, ta chi ra Pablo ñandihí. Ta cana chaa ña ta catyí ña:

—Rayii ihya ra casacuví tyiño nuu Nyoo cahnú cuví ra. Ta cahán ra tuhun yoso caa cuví cacu añima yo —catyí ña.

¹⁸ Cuaha quivi sacuví ñaha tyivaa cuan tyicuan caa. Tyicuan ta ra Pablo ña cunye

ca iñi ra, ta nanyocava ra ta catyí ra chi vatyí ña vaha cha yihí chi ña:

—Chihin sivi ra Jesucristo catyí chuun vatyí quíton chi ñaha tyivaa ihya —catyí ra.

Ta tatyí ña vaha cuan quita chi chi ña caa cuhva ri cuan.

¹⁹ Soco cuhva cha canyehé chitoho ña vatyí ma cuvi ca saha ganaa ra xuhun chihin ña, catiñ ra chi ra Pablo ta ra Silas chinyaca ra chi ra nya vehe tyiño.

²⁰ Ta cachican ra cuatyí chaha ra nuu ra cacuví tyiño. Ta catyí ra:

—Ra Israel ihya sanaquiquí ra chi ñáyivi ñuu yo.

²¹ Ta sañahá ra costumbre cha ña cuví naquehen yo, niri ña cuví sacuví yo vatyí ñu cuenda ñuu Roma cuví yo —catyí ra.

²² Tyicuan ta nduxaagn ñáyivi chi ra Pablo ta ra Silas. Ta ra cacuví tyiño cuan chahnya ra sahma ra Pablo ta ra Silas ta tachí ra tyiño nacañi ra chi ra chihin yutun.

²³ Cha yaha cha cañi vavaha ra chi ra, ta catyihí ra chi ra vehe caa. Ta tachí ra chi ra sahá cumi chi ra na saha vaha ra cuenda chi ra.

²⁴ Cuhva cha quehen ra sahá cumi cuan tuhun, tyihí ra chi ra nya chichi cuvi vehe caa. Ta tyihí vaha ra chaha ra ticu vitu.

²⁵ Soco ñáa cuhva hora ñuu cuan cachitá vavaha ra Pablo ta ra Silas. Ta cachicán tahvi ra chi Nyoo. Ta ra cañohó vehe caa cuan cатыasohó ra.

²⁶ Ta saná iñi ra ta quichí noo cha taan ñihi vavaha. Ta naquisi chí cimientu vehe caa cuan, ta caa cuhva ri cuan nuña tandihí yuvehe, ta ndachi cadena tandihí ra ñohó vehe caa cuan.

²⁷ Ta cha ndoyó ra sahá cumi cuan, nyehe ra vatyí tacoho yuvehe. Tyicuan ta tava ra mityí ra vatyí cahñi maa ra chi ra. Vatyí chicá xiñi ra vatyí ndihí ra ñohó vehe caa cuan cachinq.

²⁸ Soco ra Pablo cana chaa ra chi ra, ta catyí ra:

—Ma cahñun chuun, vatyí tandihí ndi nyicú ndi ihya —catyí ra chi ra.

²⁹ Tyicuan ta ra sahá cumi cuan chican ra noo ñuhu. Ta quicono ra quihvi ra nu cañohó ra. Ta nihí ra chihin cha yuhví ra. Ta chicuñi chiti ra nuu ra Pablo ta ra Silas.

³⁰ Numi ri tava ra chi ra nu ñoho ra yucuan. Ta ndacá tuhun ra chi ra ta catyí ra:

—¿Nyoho Tata, yoso caa sacuví ta cacu añime? —catyí ra chi ra.

³¹ Ta ra cuan canacahan ra ta cacatyí ra:

—Chino iñi chí Sutu Mañi yo Jesucristo ta cacun, maun ta ñáyivi chuun ñandihí —catyí ra.

³² Ta cacahan ra tuhun Sutu Mañi yo chihin ra ta chihin tandihí ñu nyicu vehe ra.

³³ Ta suri maa cha cuaa cuan ra sahá cumi vehe caa cuan nacatyá ra nu cahvi chi nduvi tahan ra nu cañi ra chi ra. Yaha cuan ta maa ra ta tandihí ñáyivi chi ra condutyá ñu suri cha cuaa cuan.

³⁴ Tyicuan ta chinyaca ra chi ra nya vehe ra. Ta chaha ra cha cachi ra. Ta maa ra chihin ñáyivi chi ra si xaan cuñi ñu vatyí chinó iñi ñu chi Nyoo. [Tyicuan ta cuanuhu coyo ra nya vehe caa cuan coto cuxaan ra cuví tyiño chihin ra saha cumi chi ra.]

³⁵ Tuví inga quivi ta catachí ra cacuví tyiño chí policia nu nyaá ra sahá cumi cuan, ta catyí ra vatyí na saña ra chi ra Pablo.

³⁶ Tyicuan ta ra sahá cumi vehe caa cuan catyí ra chi ra Pablo:

—Chaa tyiño chii saha ra cuví tyiño, vatyí sañe chi ndo. Ican tuhun cha cuví quita ndo vityin —catyí ra chi ra.

³⁷ Soco ra Pablo catyí ra:

—Chi nyuhu cha cuví ndi ra cuenda ñuu Roma ican cañi ra nu tuví. Ta ni ña cutuñi chi ndi tari cuhva tahan chí. Ta tyihí ra chi ndi vehe caa. Ta vityin cuñi ra saña xehe ra chi ndi. Soco ma cuví. Naquichi tava maa ra chi ndi —catyí ra Pablo chi ra sahá cumi cuan.

³⁸ Ta ra policia nacatyí ra chi ra cacuví tyiño. Ta ra cuan cayuhvi ra cuví cha cachitó ra vatyí ra cuenda ñuu Roma cuví ra Pablo.

³⁹ Ta chahan coyo ra chinandacan ra ticahnu iñi chi ra Pablo ta chi ra Silas. Tyicuan ta catava ra chi ra ta cacacu ndahvi ra nuu ra na quita ra ñuu cuan.

⁴⁰ Ta cha quita coyo ra vehe caa, chahan coyo ra vehe cu Lidia. Ta yaha cuan ta chinyehé ra chi ra hermano ta sanduni ra iñi ra ta cuahan coyo ra.

17

Nu naquiquí ñáyivi ñuu Tesalónica

¹ Nu cuahan coyo ra Pablo ta ra Silas, cayaha coyo ra ñuu Anfípolis, ta ñuu Apolonia. Yaha cuan ta chaa coyo ra ñuu Tesalónica nu nyaá noo vehe ñuhu ñu Israel.

² Ta chahan ra Pablo vehe ñuhu cuan tari cuhva tuhva maa ra chahán noo noo ñuu. Ta chahan ra tuhun Nyoo chihin ñáyivi chichi vehe ñuhu cuan uñi tahan quivi nyitatu ñu.

³ Quehen ra libru tuhun Nyoo ta sañaha ra tuhun ra Cristo chí ñu yoso caa catyí chí vatyí cunyehe ra tindoho ta cucuvi ra. Yaha cuan cunandoto ra. Ta catyí ra chí ñu vatyí suri maa ra Jesús cha cahán ra tuhun chihin ñu cuví ra Cristo.

⁴ Ta suhva ñáyivi Israel cuan nachinq iñi ñu. Ta candu in ri ñu chihin ra Pablo ta ra Silas. Ta cachinq tucu iñi cuaha ñu Grecia

cha sacahnú chi Nyoo. Ta cuaha ñusihí tyayii ñuu cuan ñandihí.

⁵ Soco ra Israel cha ña chinó iñi, quiñi cacuñi ra cha nyehé ra vatyí nyicón ñáyivi chí ra Pablo. Ta sandu iñ ri ra chí noo ityi ra quiñi iyó cha cachicá noo yanga ri maa. Ta sanaquiqui ra ñuu cuan. Ta quihvi ra vehe ra Jasón, nanducú ra chí ra Pablo ta chí ra Silas, vatyí tava ra chí ra, ta nacuhva cuenda ra chí ra chí ñáyivi.

⁶ Soco cha cuenda cha ña nañihj ra chí ra Pablo ta ra Silas yucuan, ta quehen ra chí ra Jasón. Ta xitá quiñoño ra chí ra ta chí suhva ca ra hermano ta cuahan coyo ra nuu ra cuví tyiño ñuu cuan. Ta caná chaa ra ta catyí ra:

—Ra ihya cuví ra cachicá noo satondó chi tandihí ñáyivi nicahnu ñuhu ñáyivi. Ta vityin chaq coyo tucu ra ihya.

⁷ Ta ra Jasón chiña chahá ra vehe ra cunyicu ra. Ta tandihí maa ra ña sahá ra ñáyivi chí ra cuví rey cahnú nya Roma. Vatyí catyí ra vatyí iyó nonga rey ta nañi ra Jesús.

⁸ Cha cachihj ñu tuhun cuan, ñáyivi ta ra cacuví tyiño canaquiqui ñu.

⁹ Soco ra Jasón ta inga ra cachahá ra xuhun ta caquita yica ra.

Nu cuahan coyo ra Pablo ta ra Silas ñuu Berea

¹⁰ Ta suri cha cuaa cuan quiyi cuii ri casacuhun ra hermano chí ra Pablo ta ra Silas ityi ñuu Berea. Ta cha chaq coyo ra yucuan ta chahan coyo ra vehe ñuhu ñu Israel.

¹¹ Ta ra Israel cha iyó ñuu Berea cuan vaha ca ñáyivi cacuví ra ta ñima ca ra Tesalónica. Vatyí chihin cha ñi iñi ra naquehen ra tuhun Nyoo. Ta ndiquivi nanducú ra nuu tutu Nyoo, nyehé ra tatu ndicha cha cacatyí ra Pablo ta ra Silas ta ra Timoteo chí ra.

¹² Yucuan chaha cuaha vavaha ñu nachino iñi ñu chí ra Cristo. Ta ñu Grecia nachino tucu iñi ñu cuan, tari ñusihí tyayii ta rayii ñandihí.

¹³ Soco cha cachito ra Israel cha ca iyó ñuu Tesalónica vatyí ra Pablo ñohó ra Berea cahná ra tuhun Nyoo, ta chahan coyo ra ta sanaquiqui ra chí ñáyivi yucuan.

¹⁴ Soco ra hermano numi cuii ri tachj ra chí ra Pablo nya ityi yuhu tyañuhu. Soco ra Silas ta ra Timoteo candoq ra Berea.

¹⁵ Ta ra cha cuahan coyo chihin ra Pablo chinyaca ra chí ra nya ñuu Atenas. Tyucuan ta cuanuhj coyo ra nya Berea cuanacuhva ra tyiño cha tachj ra Pablo chí ra Silas ta chí ra Timoteo, na sanumi ra ta chuhun ra nu nyaá ra.

Nu ñohó ra Pablo ñuu Atenas

¹⁶ Cha niri ca cha nyatú ra Pablo chí ra Silas ta ra Timoteo ñuu Atenas cuan quiñi cuñi añima ra cha nyehé ra vatyí cuaha xaan xitohyo iyó ñuu cuan.

¹⁷ Yucuan chaha cahan ra chihin ra Israel, ta chihin inga ra cha tuhvá sacahnú chí Nyoo chichi vehe ñuhu cuan. Ta ndi quivi cahná ra chihin ñu cha nyicu nuyahvi ñandihí.

¹⁸ Ta ñihj tahan ra chihin ñu cha sacuahá tuhun sañahá noo ityi ñáyivi cha nañi ñu epicúreo. Ta ñihí tahan tucu ra chihin ñu cha sacuahá tuhun sañahá ñáyivi estoico.

Ta cacahan ñu chihin ra. Ta yihí ra catyí ra:

—¿Ñáá tuhun cahan xaan ra ihya? —catyí ra.

Ta inga ra catyí ra:

—Tuhun inga nyoo cahná ra ihya —catyí ra.

Tyehe caa catyí ra vatyí ra Pablo cahná ra tuhun ra Jesús, ta cahná tucu ra tuhun cha nandoto ñáyivi chíhí.

¹⁹ Tyucuan ta chinyaca ra chí ra Pablo noo nu nañi Areópago, nu tuhva ra cacuví tyiño ndu iñ ri ra. Ta cacatyí ra chí ra:

—Cuiñi ndi coto ndi tuhun chaa cha vachi sañahún.

²⁰ Vatyí sacotón tuhun cha ña chitó ndi. Ta cuiñi ndi coto ndi ñáá cha cuiñi chí catyí tandihí tuhun ihya —cacatyí ra chí ra.

²¹ Vatyí tandihí ñu Atenas ta ñu inga ñuu cha iyó yucuan tahan xaan iñi ñu tyasoho ñu ta nacatyí ñu ñáá ndihí tuhun chaa.

²² Tyucuan ta ra Pablo nicuinanyaq ra mahñu nu nyicu ñu yucu Areópago, ta catyí ra:

—Nyoho Tata ñuu Atenas, yuhu nyehí vatyí chinó xaan iñi ndo chí cuaha nyoo.

²³ Vatyí chahin chinyehi nu tuhvá ndo savaha ndo culto. Ta nañihj noo arta nu nyaá letra cha catyí: “Cuenda Nyoo cha ña ñohó nuu yo”, catyí letra cuan. Nyoho sacahnú ndo chí Nyoo cuan vasi ña ñohó nuu ndo chí ra. Ican Nyoo cuan cuví cha cahnin tuhun chihin ndo.

²⁴ Nyoo cha savahá ñuhu ñáyivi ta tandihí cha iyó siqui ñuhu ñáyivi. Chí maa ra cuví andivi ta ñuhu ñáyivi. Ta ña iyó ra chichi vehe ñuhu cha savahá ñáyivi.

²⁵ Ta ña itá iñi ra cha tyinyee ñáyivi chí ra. Vatyí suri maa ra chahá ra ñáyivi coo tandihí yo. Ta chahá ra vatyí cha xitá yo. Maa ra chahá tandihí chí yo.

²⁶ Cha xihna ri savahá Nyoo chí noo tuhun ri rayii. Ta maa ra cuví sutu tandihí yo. Yucuan chaha noo ri ñiñi nyisó tandihí yo. Ta chahá Nyoo cha coo yo nicahnú ñuhu ñáyivi. Cha ni cumañi ca savahá ra chí yo ta catyí ra ñáá cuiya coo noo noo yo siqui ñuhu ñáyivi ihya. Ta catyí tucu ra nya cucoo noo noo yo.

²⁷ Tyicuan caa sacuvj ra vatyi tacuhva quichaha nanducu yo chi ra. Tari nanducú minoo ra cuaa noo cha nanducú ra chihin ndaha ra, vasi tyicuan caa ta cuvi nañihí yo chi ra. Soco cha ndicha, Nyoo ña cañi nyaá ra chihin noo noo yo.

²⁸ Vatyi cha cuenda Nyoo iyó yo ta candá yo. Tari catyí tucu noo ra ñuu ndo, vatyi catyí ra: “Ñáyivi chi Nyoo cuví chi yo”, catyí ra.

²⁹ Tatu ñáyivi chi Nyoo cuví yo, ña tahán chi caca xiñi yo vatyi Nyoo cuví ra noo xitohyo cha chingó chihin xuhun cuaan, o xuhun cuichin, o chihin yuu vaha cha savahá ñáyivi cuhva chicá xiñi maa ñu.

³⁰ Nyoo sahá ra ticahnu iñi chí ñu chiyo ta cha naha, vatyi ña chitó ñu. Soco vityin catyí ra chí tandihí ñáyivi tandihí ri ityí vatyi na ndu uvi iñi ñu cuatyí ñu.

³¹ Vatyi Nyoo tyaá ra cuhva vatyi coo noo quivi cha cucutuñi chí ñáyivi iyó siqui ñuhu ñáyivi nuu noo ra cha nacachí vaha maa ra chí. Ta sañahá ra chí tandihí yo vatyi tyicuan caa cuví vatyi sanandotó ra chí ra cuan cha yahá chihí ra —catyí ra Pablo.

³² Cuhva cha chíñi ñu tuhun cha nandotó ñu chihí, yihí ñu chacu nyaá ñu, ta inga ñu catyí:

—Quichun inga quivi ta cahun tuhun ihya chihin ndi —catyí ñu.

³³ Tyicuan ta cuahan ra Pablo.

³⁴ Soco yihí ñu chinyicon ñu chí ra, ta nachino iñi ñu chí Nyoo. Ta noo ra nañí ra Dionisio, ta cuví ra noo ra cuví tyiño ñuu cha tuhvá ndu iñi nya Areópago cuan. Ta noo ñaha sihi cha nañí Dámaris chino tucu iñi ña, ta inga tucu ñu ñándihí.

18

Nu ñohó ra Pablo ñuu Corinto

¹ Yahá cuan ta quitá ra Pablo ñuu Atenas ta cuahan ra ñuu Corinto.

² Ta yucuan nañihí ra chí noo ra Israel tari maa ra. Nañí ra Aquila. Ta ñuu Ponto cacú ra. Ta maa ra chihin ñashi ra, cu Priscila quitá ñu Italia. vatyi ra Claudio, ra cuví rey cahnu yucuan, tavá ra tandihí ra Israel. Catyí ra na quita ra ñuu Roma. Ta ra Pablo cuahan ra nu nyaá ñu ñuu Corinto cuan.

³ Ta iñ ri tyiño sacuví ra chihin ñu. Savahá ñu vehe sahma. Ta ndoo ra chihin ñu vatyi sahá tyiño ñu iñ ri.

⁴ Ta quivi nyitatu ñu Israel tahan vitya, ra Pablo chahan ra vehe ñuhu ñu. Ta ndatuhun tahan ra chihin ñu Israel ta chihin ñu cha ñima ñu Israel cuví. Vatyi nducú ra cuhva cha chino iñi ñu chí ra Jesucristo.

⁵ Ta quivi chaq coyo ra Silas ta ra Timoteo cha quitá ra Macedonia, ra Pablo sandoq ra

tyiño sahá ra ta iñ ri ca tyiño cha cahán ra tuhun Nyoo nicunyaq ra. Ta catyí cachi ra chí ñu Israel vatyi ra Jesús cuví Cristo ra cha nyatú xaan ñu.

⁶ Soco ñu cuan xaan cuñi ñu. Ta quichaha cahan ña vaha ñu siqui Sutu Mañi yo.

Tyicuan ta ra Pablo naquisí ra sahma ra tari noo seña vatyi cuandoo cuatyí ñu siqui ñu. Ta catyí ra chí ñu:

—Cuatyí maa ndo cuví tatu cuhun ndo anyaya. Ñahri ca nyaá siqui. Vityin ta ityí nuu ca cuhin cucahin chihin ñu cha ñima ñu Israel cuví —catyí ra chí ñu.

⁷ Ta quitá ra vehe ñuhu cuan. Ta cuahan ra vehe noo ra cha nañí Justo. Noo ra cha sacahnú chí Nyoo. Ta nyaá vehe ra ityí xiin vehe ñuhu cuan.

⁸ Ta noo ra cha nañí Crispo, ra cuví nuu vehe ñuhu cuan nachingó iñi ra chí Sutu Mañi yo, ta ñáyivi chí ra ñándihí. Ta cuaha ca ñáyivi iyó Corinto cuan, cha yahá cha chíñi ñu tuhun cahán ra Pablo, nachingó tucu iñi ñu chí ra Jesús, ta condutya ñu.

⁹ Tyicuan ta noo cha cuaa nyehe ra Pablo noo visión. Ta cahán Sutu Mañi yo chihin ra, ta catyí ra:

—Ma yuhvun. Cahán ca tuhín ta ma sandihun cha cahun.

¹⁰ Vatyi yuhu nyaí chuhun. Ta yori cuví satasi iñi chuun. Vatyi cuaha xaan ñáyivi nyaá sacaqui ñuu ihya —catyí Sutu Mañi yo chí ra Pablo.

¹¹ Yucuan chaha ra Pablo ndoo ra noo cuiya sisava ñuu Corinto cuan. Sañahá ra tuhun Nyoo chí ñáyivi.

¹² Soco quivi cha cuví ra Galión gobernador nicahnu ityí Acaya cuan, candu iñ ri ra Israel siqui ra Pablo. Ta cachican ra cuatyí chaha ra nuu ra gobernador.

¹³ Ta cacatyí ra chí gobernador cuan:

—Ra ihya tyiyuhú ra chí ñáyivi na sacahnu ñu chí Nyoo noo cuhva cha ñahri nyaá nu ley ndi —cacatyí ra.

¹⁴ Tyicuan ta cuhva cha cuanacahan ra Pablo, nacahan ri ra Galión, ta catyí ra chí ra Israel cuan:

—Nyoho ra Israel, tatu cuenda noo cuatyí cahnu o cuatyí ndiyí cuví sandai yoso cuhva tahán chí.

¹⁵ Soco maa maa ri tuhun cahán ri cuví ihya. Ta yuhu ña cuñi sandai tyiño ihya, ta siin ri cuenda ley maa ndo cuví. Nyehe maa ndo. Sandaa ndo tyiño vatyi yuhu ña cuñi cuví juez cuenda ihya —catyí gobernador cuan.

¹⁶ Ta tavá ra chí ra nu cuví vehe tyiño ra.

¹⁷ Tyicuan ta tandihí ra Grecia catiñ ra chí ra Sóstenes, ra cuví nuu vehe ñuhu ñu Israel. Ta cacañi ra chí ra suri maa nuu ra Galión, ra cuví gobernador cuan. Soco ra Galión cuan ña cahán ri ra.

Nu cuanuhu ra Pablo ñuu Antioquía. Yahq cuan ta cuahan tucu ra tuhun Nyoo, cha cu uñi chaha

18 Ta ra Pablo ndoo ca ra ñuu Corinto cuaha quivi. Yahq cuan ta catyí ra chi ra hermano vatyí cahun ra. Ta cuahan ra Aquila chihin cu Priscila chihin ra Pablo. Tyicuan ta chaq coyo ñu Cencrea. Ta ra Pablo satya ndii ra xiñi ra vatyí sacuví ra noo cha tyaa ra cuhva tyi sacuví ra nuu Nyoo. Tyicuan ta caquihvi ñu chichi noo barcu cha cuahan ityí Siria.

19 Ta cha chaq barcu cuan nya ñuu Éfeso, ta caquita ñu. Ta ra Aquila chihin cu Priscila ndoo ñu yucuan. Ta ra Pablo cuahan ra vehe ñuhu ñu Israel. Ta cahan ra chihin ñu Israel cha ndu iñ ri yucuan.

20 Ta chacu ndahvi ñu nuu ra na ndoo ra cuaha ca quivi. Soco ña cuñí ra.

21 Ta catyí ra chi ñu vatyí cha cuahan ra, ta catyí tucu ra tyehe caa:

—Cuñí chi cha cuhin ñuu Jerusalén vatyí sanducahni vico cha vachi cutahan. Soco cuquichi inga chaha nu nyicu ndo tatu Nyoo ta cuñí ra —catyí ra chi ñu.

Tyicuan ta cuahan ra quihvi ra chichi noo barcu cha cuahan ityí Siria.

22 Quivi nachaa ra ñuu Cesarea ityí Siria cuan, cahan ra chichuva ra nocumi chi ñu yihí cuenda Nyoo Jerusalén. Yahq cuan ta cuahan ra Antioquía.

23 Ta cha yahq chinyaq ra suhva quivi yucuan, quita ra ta cuahan ra tahan tahan ñuu ityí Galacia ta Frigia. Ta sandunij ra iñi tandihi ñu yihí cuenda Nyoo.

Nu cahán ra Apolos tuhun Nyoo ñuu Éfeso

24 Quivi cuan chaq noo ra Israel ñuu Éfeso. Nañi ra Apolos. Ta ñuu ra cuví Alejandría. Ta cuví ra minoo ra vaha cahán tuhun Nyoo. Ta chitó xaan ra tuhun Nyoo tuhun chahnu cha nyaá nu libro.

25 Ta vaha xaan cutuhva ra tuhun Sutu Mañi yo. Ta cahán ra chihin cha ñi iñi ra. Ta vaha xaan nyicón ra chi Nyoo. Ta cachi xaan sañahá ra tuhun ra Jesús. Vasi cuhva cha sacondutyá ra Juan ri chitó ra.

26 Ta quichahaq cahan ra chichi vehe ñuhu chihin cha ñi iñi ra. Ta cuhva cha chiñi ra Aquila ta cu Priscila, tava sñ ñu chi ra ta nacatyí cachi ca ñu tuhun ityí Nyoo chi ra.

27 Tyicuan ta quichaha cuñi ra Apolos cahun ra ityí Acaya. Ta ra hermano catyinyeé ra chi ra. Ta catyaaq ra noo carta chi ñu yihí cuenda Nyoo ityí cuan, ta catyí ra chi ñu vatyí na vaha cahan ñu chihin ra tatu chaa ra. Tyicuan ta cuahan ra. Ta cuhva cha chaq ra Acaya cuan tyinyeé xaan ra chi ñu chinó iñi chi Nyoo cha cuenda tumañi iñi cha chahaq ra chi ñu.

28 Vatyí nu tuvi sañahq cachi xaan ra yoso caa cuhva ña vaha cha sacuví ñu Israel. Ta sañahq ra cha catyí nu tutu Nyoo vatyí ra Jesús cuví Cristo, ra cha nyatú xaan ñu chi.

19

Nu cuahan tucu ra Pablo ñuu Éfeso

1 Cha ni ri ca cha ñohó ra Apolos ñuu Corinto, ra Pablo yahq ra ityí yucu ta chaq ra nya ñuu Éfeso. Ta yucuan nañihij ra chi cuaha ri ra yihí cuenda Nyoo.

2 Ta ndacaq tuhun ra chi ra:
—¿Atu naqueheñ ndo Tatyí Ii quivi nachinoq iñi ndo? —catyí ra Pablo chi ra.

Ta canacahan ra cuan ta catyí ra:

—Ni chiin ña chitó ndi cha iyó Tatyí Ii.

3 Tyicuan ta ra Pablo ndacaq tuhun ra chi ra:

—¿Ñáá chihin condutyá nyoho? —catyí ra.

Ta nacahan ra ta catyí ra:

—Chihin cuhva sacondutyá ra Juan yucuan cuhva condutyá ndi —catyí ra.

4 Tyicuan ta catyí ra Pablo chi ra:

—Ra Juan sacondutyá ra chi ñáyivi cha ndu uvi iñi cuatyí. Soco catyí tucu ra chi ñu vatyí cuñi chi cha chino iñi ñu chi ra cha cuaquichi ta ican ra cuan cuví ra Cristo Jesús —catyí ra Pablo chi ra.

5 Cuhva cha cachiñij ra cha catyí ra Pablo tuhun ihya, tyicuan ta nacondutyá ra inga chaha chihin sivi Sutu Mañi yo Jesús.

6 Ta cuhva cha tyisoq ra Pablo ndaha ra siqui ra, quichij Tatyí Ii siqui ra. Ta quichaha cahan ra inga sahan. Ta sahaq ra profetizar, o chahaq cuenda ra tuhun chahaq Tatyí Ii Nyoo chi ra cuví cuan.

7 Ta uchi uvi tahan ra cha tandihi ra.

8 Tyicuan ri chicaq ra Pablo vehe ñuhu ñuu cuan chichi cha uñi yoo. Ta cahan ra tuhun Nyoo chihin cha ñi iñi ra. Ta ñihi cahán ra chihin ñu yoso caa nyacá ñaha Nyoo añima yo.

9 Soco yihí ñu sandavaq ñu añima ñu. Ta ña cuñi ñu chino iñi ñu. Ta cahán ña vaha ñu siqui tuhun ra Cristo nuu ñáyivi, ta catyí ñu vatyí ña vaha ityí Sutu Mañi yo. Tyicuan ta ra Pablo canyahq ra nu nyicu ñu. Ta chinyaq ra chi ñu chinó iñi chi ra Cristo noo sicuela ra cha nañi Tiranno. Ta yucuan cahán ra tuhun ra Cristo chihin ñáyivi ndiquivi ri.

10 Ta tyicuan caa chinyacuvij ra chichi cha uvi cuiya. Ta tandihi ñáyivi nicahnu ityí Asia cuan chiñij ñu tuhun Sutu Mañi yo Jesús, tari ñu Israel ta ñu cha ñima ñu Israel cuví ñándihi.

11 Ta nahnu milagru sacuvij Nyoo chihin ndaha ra Pablo.

12 Vatyí nyacua nya pañitu ta sahna cha tain ra Pablo, ta chinyaq ñu chi ñu cuhvi ta

nduvahā űu. Ta űu yihí tatyí űa vaha chi, quítā chí chí űu.

¹³ Ta iyó suhva ra Israel cha cachica noo tahan tahan űuu. Catava ra tatyí űa vaha chí ñáyivi. Ta cacuñí ra cotyíño ra sivi Sutu Mañi yo Jesús vatyí tava ra chí tatyí űa vaha. Ta catyí ra chí tatyí űa vaha cuan:

—Chihin sivi ra Jesús cha cahán ra Pablo tuhun catyí chí ndo vatyí quítā ndo —catyí ra.

¹⁴ Tyehe caa chinyacuvj ndi ucha tahan sehe noo ra Israel cha nañi Esceva. Ta ra Esceva cuan cuví ra noo ra cuví nuu chí tata sutu.

¹⁵ Ta cha cacahan ra cuan chihin tatyí űa vaha cuan, nacahan tatyí űa vaha cuan chihin ra ta catyí chí tyehe caa:

—Ñohó nui chí ra Jesús. Ta chité yóó ra cuví ra Pablo. Soco nyoho zyóó ra cuví nyoho? —catyí tatyí űa vaha cuan chí ra.

¹⁶ Tyicuan ta ra cha yihí tatyí űa vaha cuan chí, ndava ra siqui ra cuan. Ta chihin cha cuaha fuerza ra cuvj chasaha ra chí tandihi ra. Ta chahnya cuatyí ra sahma ra. Ta sanduvityaa ra chí ra. Ta sañicuehe ra chí ra. Yucuan ta chihin cha cayuhvi ra ta cachingo ra ta cuahan coyo ra.

¹⁷ Tyicuan ta tandihi űu Éfeso, űu Israel, ta űu cha ñima űu Israel cuví ñandihí, chító űu tuhun cuan. Ta yuhvi xaan űu cuví. Ta sacahnú űu sivi Sutu Mañi yo Jesús.

¹⁸ Ta cuaha xaan űu chinó iñi űu chí ra. Ta chaā coyo űu ta nahmā űu cuatyí űu, tandihi cha űa vaha cha chinyacuvj űu ta ityí chata ca.

¹⁹ Ta cuaha űu cha sacuahā tuhun tasi, quichj nyaca űu libru űu. Ta chahmj űu libru cuan nuu tandihi ñáyivi. Ta natava űu cuenda yoso yahvi libru cuan. Cha tandihi quítā ta cha uvi xico uchi mil xuhun cuichin.

²⁰ Ta tyicuan ri ta cuahan chitya ca tuhun Sutu Mañi yo. Ta nducuahā ca űu yihí cuenda ra. Ta tyicuan caa nyehé ñáyivi yoso cha cahnu tunyee iñi iyó chí ra.

²¹ Ta cha yahā tuhun ihya, ra Pablo natyaa ra cuhva cha chuhun ra ityí Macedonia, ta ityí Acaya. Yahā cuan ta cunuhū ra nya Jerusalén tyaa ra cuhva. Ta catyí ra vatyí yahā cuan ta cuñi chí cha chuhun ra nya űuu Roma.

²² Tyicuan ta tachj ra chí uvi tahan ra tyinyeé chí ra nya Macedonia, ra Timoteo ta ra Erasto. Soco ndoq maa ra suhva ca quívi ityí Asia cuan.

Nu naquiquí ñáyivi Éfeso siqui tuhun Nyoo

²³ Ta suri quívi cuan naquiquí ñáyivi űuu Éfeso siqui tuhun Nyoo,

²⁴ vatyí noo ra cha nañi Demetrio sanaquiquí. Vatyí maa ra tuhvá ra saha

tyiño chihin xuhun cuichin. Savahá ra vehe űuhu nyihi nyoo Diana chihin xuhun cuichin cuan. Ta cuaha sahá ganaa ra chihin ra casahá tyiño chihin ra.

²⁵ Ta canā ra Demetrio cuan chí ra cha sahá tyiño chihin ra. Ta canā tucu ra chí ra cha casahá tyiño iñi ri tyiño cuan. Ta catyí ra chí ra:

—Nyoho ra tahan yo, chító ndo vatyí chihin tyiño ihya iyó cha tyayí yo.

²⁶ Soco nyoho nyehé ndo ta chíñi ndo yoso caa sacuví ra Pablo űuu yo Éfeso ihya, ta nicahnu ityí Asia. Vatyí catyí ra tyi nyoo cha savahá ñáyivi ñima Nyoo cuví. Ta cuaha xaan ñáyivi nachino iñi sahá ra.

²⁷ Ta űa vaha cha sacuví ra vatyí ma quiyahvi ca xitohyo cha savahá yo. Ta siñ ri ma sacahnu ca ñáyivi chí nyoo Diana ta ma saha ca űu ñáyivi vehe űuhu űa, ta űa vaha tyicuan caa, vatyí ñaha cuan cahnu xaan cuví űa. Ta tandihi ñáyivi ityí Asia chihin űu nicahnu ñáyivi sacahnú űu chí ña. Ta nu cuahan ca chí quívi ma sacahnu ca ñáyivi chí ña tatu chino iñi űu cha cahán ra Pablo —catyí ra Demetrio.

²⁸ Ta cuhva cha cachijj ra cha catyí ra, Xaan xaan cacuñí ra. Ta quichaha cacanaā chaa ra ta cacatyí ra:

—Cahnu xaan cuví cu Diana, nyoo cuenda ñáyivi Éfeso ihya —catyí ra.

²⁹ Ta cutondo xiñi tandihi űu űuu cuan. Ta catijj űu chí ra Gayo, ta chí ra Aristarco, uvi ra Macedonia cha chicá noo chihin ra Pablo. Ta caxitā quiñoho ra chí ra nyacua nya nu tuhva űu candu iñi ri űu.

³⁰ Ta ra Pablo cuñi ra quihvi ra nu nataca ñáyivi vatyí cahán ra chihin űu. Soco ra hermano, űa chahā ra.

³¹ Ta tyicuan caa tucu suhva ra cuví tyiño ityí Asia, ra cuví amigo ra Pablo, tachj ra tyiño vatyí űa tahán chí tyihi ra chí ra yucuan.

³² Ta nu ndu iñi ri űu yucuan, suhva űu caná chaa noo tuhun. Ta inga űu caná chaa űu inga tuhun. Vatyí naquiquí űu. Ta cuaha xaan űu cha ni űa chító űu ñáá tuhun cha natacá űu.

³³ Tyicuan ta űu Israel, tyatyíño űu chí noo ra cha nañi Alejandro na quita ra ityí nuu. Ta suhva űu tayucú yucuan nacatyí űu chí ra yoso caa cucahan ra. Tyicuan ta sacuvj ra seña chihin ndaha ra vatyí na taxi ri cuví űu vatyí cuñi ra catyí ra vatyí ñahri cuatyí űu Israel.

³⁴ Soco cuhva cha chító űu vatyí ra Israel cuví ra, tandihi maa űu canā chaa űu. Ta chichi cha uvi hora caná chaa űu, ta catyí űu:

—Cahnu xaan cuví cu Diana nyoo cuenda űu Éfeso —catyí űu, caná chaa űu.

³⁵ Tyicuan ta secretario ñuu cuan cuhva cha cuví sacutaxin ra ñáyivi, ta catyí ra:

—Nyoho tata ñuu Éfeso ihya. Tandihí ñáyivi chító ñu vatyi nyaá siqui yo ñu Éfeso cha saha cumi yo vehe ñuhu cu Diana tyi cahnu xaan cuví ña. Ta cumi yo xitohyo ña cha cana cava ityi andivi.

³⁶ Ta yori cuví catyí tyi ña ndicha. Taxi ri ndo, ta ma cunyacuvi ri maa ndo tatu ña chító ndo ñáa cha cuacunyacuvi ndo.

³⁷ Vatyi ra cha quichí nyaca ndo ihya ñahri cha suhu ra vehe ñuhu ndo. Ta ni ña cahán ña vaha ra siqui nyoo cuenda ndo.

³⁸ Tatu ra Demetrio ta ra cha sahá tyiño chihin ra chicán ra cuatyí chaha noo ra, na cahun ra nu nyaá juez. Cuví cacan ra cuatyí nuu ra cuan, ta maa ra cusandaa ra cuatyí cuan.

³⁹ Ta tatu inga tuhun chicán ndo, cuñí chi sacuví ndo nu nyicu ra cuví tyiño, tari cuhva catyí ley.

⁴⁰ Vatyi tatu coto gobiernu ta cana ra chi yo cha cuenda cha cuví ihya, ta ma ñihi yo tuhun cahan yo tatu ndacá tuhun ra chí yo ñáa cuenda naquiquí yo —catyí ra cuví secretario cuan.

⁴¹ Ta cha yahá catyí ra tuhun cuan catyí ra vatyi na cunuhu ñu nya vehe ñu.

20

Nu yahá ra Pablo ityi Macedonia ta cuahan ra Grecia

¹ Cha yahá tuhun cha naquiquí ñáyivi ñuu Éfeso cuan, cana ra Pablo chí tandihí ñu yihí cuenda Nyoo, vatyi cahan ra suhva nuu ñu ta cuhva ca ra tunyee iñi chí ñu. Vatyi maa ra chaá chí quivi cha cahun ra inga ityi. Ta cahan ra chihin ñu. Tyicuan ta cuahan ra Macedonia.

² Ta chahan ra tandihí ityi cuan ta sanduní ca ra iñi tandihí ñu yihí cuenda ra Cristo cha iyó ityi cuan chihin tuhun cahán ra. Tyicuan ta chaá ra ityi Grecia.

³ Ta yucuan ndoo ra uñi yoo. Ta cha nyaá ra cha cuaquehen ra barcu ta cahun ra Siria, ta chító ra vatyi nducú ñáyivi Israel chí ra vatyi cahñi ñu chí ra. Yucuan chaha natyaa ra iñi ra cha cahun ra chihin chaha ra ityi nu ñuhu ri. Ta nayaha ra inga chaha ityi Macedonia.

⁴ Ta cuahan ra Sópater, ra ñuu Berea chihin ra. Ta cuahan ra Aristarco ta ra Segundo, ta uvi tahan ra ihya, Tesalónica cuví ñuu ra. Ta cuahan ra Gayo, noo ra ñuu Derbe, ta ra Timoteo, ta uvi tahan ra ityi Asia, ra Tíquico ta ra Trófimo.

⁵ Ra hermano ihya cayaha ra ityi nuu ta canyatú ra chí ndi ñuu Troas.

⁶ Ta nyuhu nyatú ndi na yaha vico pascua nu tuhvá ñu Israel chachí ñu pan cha ñahri yuchan iya yihí. Tyicuan ta quitá ndi ñuu

Filipo chihin barcu. Ta nu cu ohon quivi ta natahan ndi chí ra cha cuahan ityi nuu nya ñuu Troas. Ta yucuan ndoo ndi ucha quivi.

Nu cahán ra Pablo tuhun Nyoo ñuu Troas

⁷ Ta cha timingu cuan ndu iñ ri ndi chihin ñu yihí cuenda Nyoo ñuu Troas cuan. Ta quivi cuan cuacachi ndi pan ta coho ndi vinu vatyi nicohon iñi ndi tyi chihí ra Cristo cha cuenda cuatyí yo. Ta ra Pablo cahán ra nuu ñu ta cuví ora ñuu, vatyi cha nyaá cha cahun ndi inga quivi cuan.

⁸ Canyicú ndi noo cuarto nu cu uñi piso. Ta ndichin xaan nu canyicú ndi chichi vehe cuan vatyi cuaha xaan ñuhu candel cayú.

⁹ Ta noo ra tyivaa cha nañí Eutico nyaá ra ventana tyasohó ra, soco ña cunyeé ra ñumahna vatyi ra Pablo, cha vehe xaan cahan ra. Quixí ra Eutico, ta ña chító ra canacava ra nya nu ñuhu. Ta nacoñehé ra chí ra soco cha chihí ra.

¹⁰ Tyicuan ta ra Pablo noo ra ta chaá ra nu catuvi ra tyivaa cuan. Ta natyihí nundaha ra chí ra tyivaa cuan, ta catyí ra chí ndi hermano:

—Ma yuhvi ndo. Nyitó ra —catyí ra.

¹¹ Tyicuan ta nandaq tucu ra Pablo ta chachí ndi pan ta chihí ndi vinu cha cuenda Sutu Mañi yo. Tyicuan ta cahan ca ra Pablo tuhun Nyoo nyacua nya cundichin. Tyicuan ta cuahan ra.

¹² Ta ra tyivaa cuan nandoto ra ta cuanuhu ra nya vehe ra. Ta sii xaan nanduvj cuñi ñu.

Nu quitá ra Pablo ñuu Troas ta cuahan ra nya ñuu Mileto

¹³ Nyuhu yahá ndi ityi nuu ta cuahan ndi chihin barcu nya ñuu Asón. Vatyi yucuan cuñihi tahan ndi chihin ra Pablo, vatyi tyicuan caa sandaa maa ndi tyiño chihin ra. Vatyi maa ra cuñi ra cahun ra ityi nu ñuhú ri chihin chaha ra.

¹⁴ Ta cuhva cha nañihí tahan ndi chihin ra nya ñuu Asón cuan, quihvi ra chichi barcu chihin ndi ta cuahan ndi nya ñuu Mitilene.

¹⁵ Quitá ndi yucuan ta yahá ndi ityi nuu noo ñuhú luhlu cha nañí Quío nyaá mahñu tyañuhu. Ta cha inga quivi cuan chaá ndi inga ñuhú luhlu cha nañí Samos. Yahá ndi yucuan ta nyitatú ndi ñuu Trogilio. Ta cha inga quivi chaá ndi nya ñuu Mileto.

¹⁶ Tyicuan caa cuví vatyi ra Pablo ña cuñi ra cunyaá ca ra cuaha quivi ityi Asia. Ña cuñi ra cahun ra Éfeso vatyi numi ri cuñi ra chaá ra ñuu Jerusalén, vatyi tatu cuhva chí cuhva cunyaa ra quivi vico Pentecostés cha sanducahnú ñu Israel.

Nu cahán ra Pablo chihin ra ñuu Éfeso vatyi cahun ra ta ma quichi ca ra

¹⁷ Ta cuhva cha nyicu ndi ñuu Mileto, cana ra Pablo chi ra yihí ndaha chi ñu yihí cuenda Nyoo Éfeso.

¹⁸ Ta cuhva cha chaq coyo ra, catyí ra tyehe caa chi ra:

—Maa ndo chitó ndo yoso caa cuhva chica noi nyata quivi xihna ri cha chaj Asia ihya.

¹⁹ Tandihí quivi cha chinyaj chihin ndo ta sacuví tyiño nuu Sutu Mañi yo chihin cha nduquí cuhva cha ma cahnú sahi chii, vasi cuaha tindoho chihin cha cuaha tucuihya iñi. Ta cuaha tindoho quichi siqui sacuví ñáyivi Israel.

²⁰ Soco ña sandihí cha cahán noi tuhun Nyoo nuu ndo. Vatyí ihya cuví tandihí cha chiñuhú chi ndo tacuhva coo vaha ndo. Ta sañahí tuhun Nyoo chi ndo nu ndu in ri ndo ta nya vehe ndo ñandihí.

²¹ Ta sañahí tuhun ihya chi ñu Israel ta chi ñu cha ñima ñu Israel cuví. Sañahí chi ñu na nasama ñu cuhva iyó ñu nuu Nyoo ta nachino iñi ñu chi Sutu Mañi yo Jesucristo.

²² Ta vityin cuhin nya ñuu Jerusalén vatyí maa Tatyí li catyí. Ta ña chité ñáá cha cucuví chii yucuan.

²³ Soco noo ri cha chité vatyí tandihí ri nu cuahín Tatyí li catyí chii vatyí nyatú vehe caa chii, ta cuaha tindoho ñandihí.

²⁴ Soco ni noo ihya ta ña chicá xiñi. Ta ni ñáyivi ta ña vale cha cuenda mai, tacuhva vatyí chihin tusi iñi ta cuví sañihí sahatyiñe tyiño cha chahá Sutu Mañi yo Jesú chii, cha sañahí tuhun vaha yoso cuhva cuñi Nyoo chi yo.

²⁵ Ta vityin chitó vahi vatyí tandihí nyoho cha cahín tuhun Nyoo chihin ndo, ma nyehe ca maa ndo chii.

²⁶ Yucuan chaha cuñi catyí chi ndo vityin vatyí ñahri ca cuatyí yuhu cha cuenda ni noo nyoho.

²⁷ Vatyí chihin cha niñi cuñi ta cahin tuhun Nyoo chihin ndo ta ñahri cha tixehí.

²⁸ Yucuan chaha saha ndo cuenda chi ndo. Ta saha tucu ndo cuenda chi tandihí ñu yihí cuenda Nyoo. Vatyí maa Tatyí li tyatyíño chi ndo vatyí saha cuenda ndo chi ñáyivi iyó vehe ñuhu Sutu Mañi yo. Maa ra sata ra chi ñu chihin niñi ra.

²⁹ Vatyí chité vatyí quivi cuhin, cuquichi inga ra. Ta cuñi ra sativi ra chi ñu yihí cuenda Sutu Mañi yo. Tari lobo xaan cha chahñi chi mbee, tyicuan caa cuquichi ra cuan sativi ra aña ndo.

³⁰ Ta suri nu nyicu ndo, cundicuita suhva ra. Ta cusañaha ra cha ña ndicha tacuhva cunyicon ndo chi ra.

³¹ Yucuan chaha saha vaha ndo cuenda. Njochon iñi ndo vatyí chichi cha uñi cuiya ña sandihí cha cahín tuhun Nyoo nuu ndo. Cha ñicahñu ta cha cuaa cahín chihin noo

noo nyoho, ta chihin cha cuihya iñi coto sandihí ndo tuhun Nyoo.

³² Ta vityin nyoho yañi, natyai chi ndo ndaha Nyoo. Saha ndo cuenda ndi tuhun cahan ra chihin yo. Sacotó ra chi yo tyi cuñi xaan ra chi yo. Ta yucuan sandunyeé xaan chi iñi yo tacuhva cuví yo ñáyivi yihí vaha cuenda ra chihin tandihí inga ñu cha nacuhva cuenda ñu chi ñu chi ra.

³³ Yuhu ña nyiyó iñi ni minoo cha iyó chi ndo. Ni ri xuhun ndo, ni ri sahna ndo.

³⁴ Nyoho chitó vaha ndo vatyí sahá tyiño xain chihin ndahi tacuhva ñihí cha chiñuhú chii chihin ra chicá noo chihin.

³⁵ Tyicuan ri sañahí chi ndo vatyí cuñi chi cha saha tyiño ndo ta tyinyee ndo chi ñu iyó cha chiñuhu chi. Ta njochon iñi ndo tuhun cahán Sutu Mañi yo Jesús nu catyí ra tyehe caa: “Si ca cuñi noo ñáyivi ñu chahá, ta ñima ca ñu ita iñi”, catyí Sutu Mañi yo.

³⁶ Cha yahá cha catyí ra Pablo tuhun ihya, chicuñi chiti ra. Ta chicán tahvi ra chihin tandihí ñu.

³⁷ Ta tandihí ñu cuihya xaan nduvi iñi ñu ta chacu xaan ñu. Ta nanumi ñu chi ra.

³⁸ Vatyí ra Pablo catyí ra tyi cuhan ra inga ñuu ta ma cuhan ca ra nu nyicu ñu. Tyicuan ta chinyaca ñu chi ra nyacua nya nu quihvi ra chichi barcu.

21

Nu cuahan ra Pablo ñuu Jerusalén

¹ Tyicuan ta sandoq ndi chi ra hermano ta quihvi ndi chichi barcu. Ta cuahan ndi in ndoo ityi ri nya Cos noo ñuhú luhlu mahñu tyañuhu. Ta cha inga quivi chaq ndi nya Rodas inga ñuhú luhlu ri. Yucuan ta cuahan ndi nya Pátara.

² Ta ñuu Pátara cuan nañihí ndi nonga barcu cha cuahan nya Fenicia. Ta quihvi ndi chichi inga barcu cuan ta cuahan ndi.

³ Ta cha cuahan ndi nyehe ndi ñuhú Chipre chiyó satyin ndi. Ta yahá ri ndi cuahan ndi ityi nu ca, ityi Siria. Ta chaq ndi nya ñuu Tiro vatyí yucuan cuatava ra carga cha nysisó barcu cuan.

⁴ Ta cha nañihí ndi chi ñu yihí cuenda Nyoo ñuu cuan, ndoo ndi chihin ñu ucha quivi. Ta catyí ñu chi ra Pablo vatyí ña tahán chi cha cuhan ra Jerusalén vatyí tyicuan caa sañahá Tatyí li chi ñu.

⁵ Soco cha ndihí ucha quivi cuan quita ndi ñuu cuan. Ta nu cuaquita ndi tandihí ra hermano chihin ñasihí ra ta sehe ra chinyaca ñu chi ndi nyacua nya ityi chata ñuu. Ta nu ñiti yuhu tyañuhu cuan nicuñi chiti ndi, ta chicán tahvi ndi chi Nyoo.

⁶ Tyicuan ta nanumi ndi chi tahan ndi. Tyicuan ta quihvi ndi chichi barcu. Ta maa ñu cuanuhu coyo ñu vehe ñu.

⁷ Ta quita ndi ñuu Tiro cuan ta cuahan ndi nya ñuu Tolemaida. Ta yucuan chaha ndi nocumi chi ñu hermano. Ta ndoq ndi chihin ñu noo quivi.

⁸ Ta cha inga quivi quita ndi ta cuahan ndi ñuu Cesarea. Ta yucuan chahan ndi vehe ra Felipe ra cha sacotó xaan chi ñáyivi yoso caa sacacu Nyoo añaima ñu. Cuví ra noo ra chichi cha ucha tahan ra nyisó tyiño vehe ñuhu. Ta yucuan ndoq ndi chihin ra.

⁹ Ra Felipe, iyó cumi tahan ñu tyivaa sehe ra cha ta tandaha ca. Ta tuhvá ñu chahá cuenda ñu tuhun cahán Nyoo. O cuvi chi cuan sahá ñu profetizar.

¹⁰ Ta cha cuaha ri quivi cha chaq ndi yucuan, tyicuan ta chaq noo profeta Nyoo cha nañi Agabo. Quichi ra ityi Judea.

¹¹ Quichj nyehe ra nu nyicu ndi. Ta quehen ra sincho ra Pablo, ta cháhñi ra chaha ra ta ndaha ra, ta catyi ra:

—Tatyí Ii Nyoo catyi chii vatyi tyehe caa cunuhñi chitoho sincho ihya nya Jerusalén. Ta cucuhva cuenda ñáyivi Israel chi ra chi ra inga ñuu —catyi ra Agabo.

¹² Cha chiñi ndi tuhun ihya, nyuhu ta ra ñuu Cesarea chacú ndahvi ndi nuu ra Pablo vatyi ma cuhun ra Jerusalén.

¹³ Soco ra Pablo catyi ra:

—¿Ñáá tuhun chacú ndo ta sanducuihyá ndo iñi? Yuhu ñahri cuende. Ñima cha cunuhñi ri, vasi cahñi ra chii soco cha cuenda Sutu Mañi yo Jesús —catyi ra chi ndi.

¹⁴ Ta cha nyehe ndi tyi ña cuví chasaha ndi chi ra, saña ndi. Ta catyi ndi:

—Na cuvi maa cuhva cuñi maa Sutu Mañi yo.

¹⁵ Cha yaha tuhun ihya sanduvaha ndi chi ndi ta cuahan ndi nya Jerusalén.

¹⁶ Ta cuahan suhva ra Cesarea ra yihí cuenda ra Cristo chihin ndi. Ta cuahan tucu noo ra ñuhu Chipre. Mnasón nañi ra. Cuaha xaan cuiya chinó iñi ra chi ra Cristo. Maa ra chinyaca ra chi ndi nya vehe ra cha nyaá Jerusalén vatyi yucuan cunyata ndi.

Nu cuanyehe ra Pablo nu nyaá ra Jacobo

¹⁷ Cuhva cha chaq ndi Jerusalén, ñu yihí cuenda ra Cristo chihin cha sñi cuñi ñu cahán ñu chihin ndi.

¹⁸ Ta inga quivi cuan cuahan ndi chihin ra Pablo cuanyehe ndi nu nyaá ra Jacobo. Ta yucuan nyicú tucu tandihí ra yihí ndaha vehe ñuhu.

¹⁹ Chaha ra Pablo nocumi chi ra. Yaha cuan ta nacatyí ra tahan tahan ri tuhun yoso caa chotyíño Nyoo chi ra nu cahan ra tuhun Nyoo chihin ñu cha ñima ñu Israel cuví.

²⁰ Cuhva cha cachiñi ñu tuhun ihya, casacahnú ñu chi Nyoo, ta catyi ñu chi ra Pablo:

—Vaha yañi yo, soco cha nyehun vatyi cuaha xaan mil ñu Israel chinó iñi ñu chi ra Cristo. Ta tandihí ñu catyi ñu vatyi niñi cha cunyicon yo ley ra Moisés.

²¹ Ta ñihí ñu tuhun vatyi yoho sañahún chi tandihí ñu Israel cha iyó inga ñuu vatyi ma quichaha ca ñu ley cha sañaha ra Moisés, ta catyún chi ñu vatyi ña tahán chi sacuvi ñu costumbre circuncisión chihin cha lee sehe ñu, ta ni ma sacuvi ca ñu costumbre chahnu yo.

²² ¿Yoso caa sacuvi yo vityin? Vatyi ñáyivi cuañihí ñu tuhun tyi chaún ihya.

²³ Vaha taxin ca cha sacuvun tyehe caa. Ihya iyó cumi tahan rayñi cha nyaá sacuvi ra noo cha tyaa ra cuhva tyi sacuvi ra nuu Nyoo.

²⁴ Cuahan chihin ra na ndundiun nuu Nyoo chihin ra. Ta yoho tyiyahvun cha tahán chi tyiyahvi ra. Tyicuan ta maa ra cuvi satya ndñi xiñi ra cuhva catyi ley. Ta cha sacuvun tyicuan caa ta coto tandihí ñáyivi vatyi ña ndicha cha cahán ñu sicun, soco cunyehe ñu vatyi quichahá tucu yoho ley ra Moisés.

²⁵ Ta cha cuenda ñu cha ñima ñu Israel cuví, ta nachinó iñi ñu tuhun Nyoo, cha sacuhun ndi tutu chi ñu, ta catyi ndi chi ñu vatyi ña tahán chi caca xiñi ñu tuhun ihya. Soco noo cha ma cachi ñu coño cha chahá ñáyivi chi xitohyo. Ni ma cachi ñu niñi ni coño quiti cha cava ñu sucun ta ña chati niñi. Ta ni noo ñu ta ma coo ñusivi o rayñi chi ñu tatu ñima ñasihí o yñi ñu cuví —catyi ra chahnu vehe ñuhu chí ra Pablo.

Nu nacandá ñu Israel siqui ra Pablo

²⁶ Tyicuan ta tuví inga quivi ta cuahan ra Pablo chihin ndi cumi tahan ra cuan. Ta sandundñi ra chi ra nuu Nyoo ñin ri chihin ra cuan. Tyicuan ta quihvi ra chichi vehe ñuhu cahnu vatyi sacoto ra chi tata sutu ama cundihí cha ucha quivi cha ndundñi ndi cumi tahan ra cuan, ta cuacuhva ra ofrenda cha cuenda noo noo ra.

²⁷ Soco cha cuñi cuii ri ndihí ucha quivi cuan, ta suhva ra Israel cha quichí nya Asia canyehe ra chi ra Pablo chichi vehe ñuhu. Ta casanaquiqui ra chi tandihí ñáyivi, ta catiñ ra chi ra Pablo.

²⁸ Ta cacanachaá ra ta cacatyí ra:

—Nyoho ñáyivi Israel, tyinyee ndo chi ndi. Ican ra ihya cuví ra cha chicá noo tandihí ri ityi. Ta sañahá ra chi tandihí ñáyivi. Catyi ra vatyi cha ñima ri tuhun cuví yo ñu Israel. Ta catyi ra tyi ña vaha ley cha tyaa ra Moisés, ta ña vaha vehe ñuhu ihya. Ta sñin ri vityin tyihí ra chí suhva ra Grecia chichi vehe ñuhu sativi ra nu ii ihya —catyi ra canachaá ra.

²⁹ Tyehe caa cacatyí ra vatyi ta ityi chata ca canyehe ra chí ra Pablo chichi ñuu, chicá

22

noo ra chihin ra Trófimo, noo ra ñuu Éfeso. Ta cacuñi maa ra vatyi ra Pablo chinyaca chi ra chichi vehe ñuhu.

³⁰ Ta tandihi ri ñáyivi ñuu naquiquí ñu. Ta ñáyivi chinó vavaha ñu vachi coyo ñu.

Tyicuan ta catiñ ñu chi ra Pablo. Ta caxita quiñoño ñu chi ra nya ityi chata vehe ñuhu, ta numi ri nacasi ñu yuvehe.

³¹ Cha cuñi ñu cahñi ñu chi ra, ta chaq tyiño chi comandante cuenda sindaro vatyi tandihi ñu Jerusalén iyó xaan naquiquí.

³² Tyicuan ta comandante cuan sandu ñin ri ra capitán ta sindaro. Ta cachino ra cuahan coyo ra nu nyicó ñáyivi. Cuhva cha nanyehé ñu chi comandante chihin sindaro, sandihí ñu cha cañi ñu chi ra Pablo.

³³ Tyicuan ta tuhva comandante nu nyaá ra Pablo. Ta tachí ra tyiño natiin sindaro chi ra, ta cháhñi ra chi ra chihin uvi tahan cadena. Yahá cuan ta ndaca tuhun ra chi ra yóo ra cuví ra, ta ñáá cha sacuví ra.

³⁴ Soco ñáyivi siin siin tuhun canachaá ñu. Ta comandante cuan ña cutuñi maa iñi ra cha cuenda cha quiñi cuvaa ñu. Ta tachí ra cha cunyaca sindaro chi ra Pablo nya cuartel.

³⁵ Cuhva cha cachaá ra nu cuayi yuvehe cuartel cuan, quiñi xaan nanduví ñáyivi ta ña chahá ca ñu caca ra Pablo. Yucuan chaha catyaa soco sindaro cuan chi ra.

³⁶ Vatyi tandihi ñu nyicón ñu chi ra, ta canachaá ñu ta catyí ñu:

—¡Cahñi ndo chi ra! —cacatyí ñu.

Nu sacacú ra Pablo chi ra nuu ñáyivi

³⁷ Cuhva cha cuatyihí ra chi ra Pablo chichi cuartel, ta quichaha catyí ra chi comandante:

—¿Atu cuhvon cha catyí noo tuhun chuun? —catyí ra chi ra.

Ta comandante cuan catyí ra:

—¿Atu cuví cahún griego?

³⁸ Tu tyicuan caa, ñima yoho cuví ra ñuu Egipto cha quichí quivi cuan ta sacañi tahan ra chí ñáyivi siqui gobiernu ta chinyaca ra chí cumi mil tahan ñáyivi ityi ñuhu ityi —catyí comandante cuan chi ra Pablo.

³⁹ Tyicuan ta ra Pablo catyí ra chi ra:

—Yuhu noo ra Israel cuví ta caquí noo ñuu cha nañi Tarso cha cuví minoo ñuu cahnu ityi Cilicia. Soco saha noo tumañi iñi chii vatyi cuhvon nacahin chiin chihin ñáyivi —catyí ra Pablo chi comandante cuan.

⁴⁰ Tyicuan ta chahá comandante cuan permiso chi ra. Tyicuan ta nicuinanyaa ra nu cuayi ta chaha ra noo seña chí ñu na cutaxin ñu. Ta cahán ra chihin sahan hebreo, ta catyí ra:

¹ —Nyoho tata, ta nyoho yañi, cuiñi ndo cha catyí chí ndo tyi coto ndo vatyi yuhu ñahri cuatyí —catyí ra Pablo chí ñáyivi cuan.

² Cha cachiñi ñu vatyi cahán ra chihin ñu chihin sahan hebreo, taxi ri cacuví ñu. Ta ra Pablo catyí ra:

³ —Yuhu ra Israel cuví tari maa ndo. Ta caquí ñuu Tarso ityi Cilicia. Soco Jerusalén ihya chahní. Ta ra Gamaliel sañaha chii tandihi maa cuhva yoso caa quichahi ley sutu chahnu yo. Ta tyicuan ri nduquí cuhva sacuví tyiño nuu Nyoo chihin cha tandihi añime, tari maa cuhva nyacuví nyoho quivi vityin.

⁴ Yuhu, nu quichi chí chica nyiquen ta satasi iñi chí ñu yihí cuenda ra Cristo. Ta nacuhva cuende chí ñu na cacahñi ra chí ñu. Ta tyihí chí ñu chichi vehe caa, rayi ta ñusihi.

⁵ Ra cuví nuu chí tata sutu chihin ra cacuví mandoñi, cacuví ra cha ndaa vatyi ican ra chahá tutu vatyi cuví tiin chí yañi yo, ra yihí cuenda ra Cristo ñuu Damasco. Chahin nyicuan chinanduquí chí ñu chinó iñi chí ra Cristo, vatyi tacuhva cunuhñi ñu chihin cadena, ta quichi nyaque chí ñu nya Jerusalén ihya vatyi cutachi tuñi ra chahnu chí ñu.

Nu nacatyí ra Pablo yoso caa nanduví ra cuenda ra Cristo (Hch. 9.1-19; 26.12-18)

⁶ Soco cuhva cha cuahin ityi cha cuachaa ndi Damasco, ñáá cuhva ora cuví cuan. Ta sana iñi ta ndundichin nicachico nu cuahin chihin noo nduva ñuhu cha quichi ityi andivi.

⁷ Tyicuan ta nduve nu ñuhú. Yahá cuan ta chiñi noo ndusu cha catyí chii: “Saulo, Saulo, ¿ñáá tuhun cha chicá nyicon chii tyehe caa?” catyí ndusu cuan chii.

⁸ Tyicuan ta ndacá tuhun chí ra ta catyí: “¿Yóo yoho tata?” Ta catyí ra chii: “Yuhu cuví ra Jesús, ra ñuu Nazaret, ra chicá nyicon chí”, catyí ra.

⁹ Ndi ra cha cuahan coyo chihin canyehé ra ñuhu cuan, ta nayuhví ra. Soco ña cachiñi ra ndusu ra cha cahán chihin.

¹⁰ Tyicuan ta quichahá catyí yuhu chí ra: “Sutu Mañi yuhu, ¿ñáá cha tahán chí sacuví?” Ta catyí ra chii: “Ndícuita ta cuahan nya Damasco. Ta yucuan cucatyí noo ra chuun tandihi cha tahán chí sacuvun”, catyí Sutu Mañi yo chii.

¹¹ Ta vatyi nducuai saha ñuhu cuan, ra tahin cayindahá ndahi ta cachinyaca ra chii nya Damasco.

¹² Ta yucuan iyó noo ra cha nañi Ananías. Ta sacahnú xaan ra chí Nyoo cuhva catyí ley cha tyaa ra Moisés Ta

tandihí ñu Israel cha iyó Damasco catyí ñu vatyi vaha xaan ñáyivi cuví ra Ananías.

¹³ Quichí nyehę ra cuan chii. Ta cuhva cha chaą ra, catyí ra chii: “Yañi Saulo, nanyehę inga chaha”, catyí ra chii. Ta caa cuhva ri cuan nanyehi. Ta cuví nyehi chi ra Ananías cuan.

¹⁴ Ta catyí ra chii: “Nyoo cuenda sutu yo nacachí ra chuun nyata ityi chata ca, vatyi coton cuhva cuñi ra, ta nyehun chi ra Jesucristo vatyi vaha ra, ta cuiñun ndusu ra.

¹⁵ Vatyi yoho cuacahun tuhun ra nuu tandihí ñáyivi. Cuanacatyun cha nyehun ta cha chiñun.

¹⁶ Ta vityin, ma cuatu con. Ndícuita ta condutyon. Ta çacan tahvun chí Sutu Mañi yo tyi cuasandachi ra cuatyun”, catyí ra Ananías chii.

Nu nacatyí ra Pablo yoso caa chaha Nyoo tyiño chí ra vatyi cuhun ra inga ñuu cuacahan ra tuhun ra Cristo

¹⁷ Yahą cuan ta cuanuhin Jerusalén ta cuhva cha nachaj, चाहिन वेहे ñuhu cahnu chiacacan tahvi. Ta nyehi noo visión.

¹⁸ Nyehi chí Sutu Mañi yo. Ta catyí ra chii: “Sanumi. Qujta cha numi ri Jerusalén vatyi ma chino iñi ñu tuhun cha cuacahun”, catyí ra chii.

¹⁹ Tyicuan ta quichaha catyí yuhu chi ra: “Sutu Mañi yuhu, maa ñu chító ñu vatyi yuhu चाहिन tandihí vehe ñuhu. Ta tjin chi ñu chinó iñi chuun, ta tyihí chí ñu vehe caa ta cañj chí ñu.

²⁰ Ta quivi çatj niñi ra Esteban ra cha cahan cuendon, yuhu ñandihí nyaí yucuan. Ta ndoj vaha cha चाहिं ñu chí ra. Ta sahumj sahma ra cha cachahñi chí ra”, catyí yuhu chí Sutu Mañi yo.

²¹ Tyicuan ta catyí ra chii: “Cuahan, vatyi tachí chuun nu cañi, nu nyicu ñu cha ñima ñu Israel cuví”, catyí Sutu Mañi yo chii.

Nu nyaá ra Pablo ndaha ra comandante cuenda ñuu Roma

²² Ihya ri tyasohó ñu tuhun cahan ra Pablo. Tyicuan ta quichahá canachaá ñu ta catyí ñu:

—¡Cahñi ndo chí ra chiña! Ña tahán chi coo ra ñáyivi —catyí ñu.

²³ Ta canachaá ca ñu. Ta sacaá ñu sahma ñu. Ta sacaá ñu ñiyaca nu tatyí cha cuenda cha xaan xaan cuñi ñu.

²⁴ Yucuan chaha comandante cuan catyí ra na cutyihí sindaro chí ra chichi cuartel. Ta tachí ra tyiño na cañi ra chí ra, vatyi cuñi ra cha quita cha ndaa ñáá tuhun cha canachaá ñáyivi siqui ra cha tyicuan caa.

²⁵ Soco cha yahą cachahñi ra chí ra ta cuacañi ra chí ra, tyicuan ta ra Pablo nacatyí ra chí capitán cha nanyaá yucuan:

—¿Atu iyó ityi chí nyoho cha cañi ndo chí? Vatyi yuhu ra cuenda ñuu Roma cuví

ta siin ri ta cutuñi ca chí nu juez —catyí ra Pablo chí ra.

²⁶ Cuhva cha chíñi capitán cha cahan ra Pablo, चाहन ra chisacoto ra chí comandante. Ta catyí ra chí ra:

—Saha cuenda chuun chihin cha nyacuvún. Vatyi ra cuan, ra cuenda ñuu Roma cuví ra —catyí ra chí ra.

²⁷ Tyicuan ta comandante cuan cuahan ra nu nyaá ra Pablo. Ta ndacá tuhun ra chí ra tatu ndicha vatyi ra cuenda ñuu Roma cuví ra. Ta ra Pablo catyí ra vatyi ican.

²⁸ Tyicuan ta catyí comandante cuan chí ra:

—Yuhu cuaha xaan xuhun tyiyahvi ta nanduvj noo ra cuenda Roma.

Ta ra Pablo catyí ra:

—Soco yuhu ra cuenda Roma cuví nyata caquj —catyí ra.

²⁹ Ta tyicuan caa ta sindaro cha cuacañi chí ra canyaha ra ta cuahan coyo ra. Ta nyacua nya comandante ta nayuhvi ra cha cuenda cha चाहिं ra chí ra chihin cadena. [Vatyi cuatyí cuví cha sacuví ra cha tyicuan caa chihin noo ra cuenda ñuu Roma.]

Nu nanyaá ra Pablo nu candu iin ri ra Israel

³⁰ Tuvj inga quivi ta comandante cuan cuñi ra coto ra ñáá cuatyí tyaá ñu Israel chaha ra Pablo. Ta ndachí ra cadena cha nuhñi ra. Ta tachí ra tyiño na ndu iin ri ra cuví nuu chí tata sutu, ta tandihí ra cuenda junta. Tyicuan ta tava ra chí ra Pablo vehe caa ta chinyacą ra chí ra nu iyó junta cuan.

23

¹ Ta ra Pablo nyehę ra chí tandihí ra chihin cha ña cahan nuu ra, ta catyí ra chí ra:

—Nyoho ra yañi yo, nyacua nya quivi ihya iyó vahi nuu Nyoo ta ñahri cha ña vaha sacuví nuu ra —catyí ra Pablo.

² Tyicuan ta ra Ananías ra cuví nuu chí tata sutu tachí ra chí ra nyicú yatyin ri nu nyaá ra Pablo, na nacañi ra ndaha yuhu ra.

³ Soco ra Pablo nacañan ra nu cahan ra ta catyí ra:

—¡Xihna ca chí maun cucañi Nyoo, vatyi sahá xaun tyi ra vaha cuvún nyaún chiña! ¿atu cutuñi chí nuun tari cuhva catyí ley? ¿Ñáá tuhun cha tachun nacañi ra chí? ta ñima tyicuan caa catyí ley —catyí ra Pablo.

⁴ Tyicuan ta ra canyicu yucuan catyí ra chí ra:

—Ña vaha cha cahún chí ra cuví nuu chí tata sutu cuenda Nyoo —catyí ra chí ra Pablo.

⁵ Tyicuan ta ra Pablo catyí ra:

—Yañi yuhu, ña chite tatu ra cuví nuu chí tata sutu cuví ra. Vatyi catyí tuhun Nyoo tyi ma cahan ña vaha yo siqui ra cuví tyiño ñuu yo —catyí ra.

⁶ Tyicuan ta tuvji iñi ra Pablo vatyi suhva ra cuenda junta cuan, yihí ra cuenda ityi ra cuví saduceo. Ta inga ra yihí ra cuenda ra cuví fariseo. Tyicuan ta cahán ra chihin cha ñihi ndusu ra ta catyí ra:

—Nyoho yañi, yuhu ra fariseo cuví tari sutí. Ta cutuñi chi nuu ndo vatyi chinó iñi tyi nandotó ñu chihí —catyí ra Pablo.

⁷ Cuhva cha catyí ra tuhun ihya, ra fariseo ta ra saduceo, quichaha candatuhun tahan ra suri chihin tahan maa ra, ta cacusiñ ra.

⁸ Vatyi ra saduceo catyí ra vatyi ña nandotó ndiyi. Ta ni yori ángel ta ni yori tatyí ña vaha iyó catyí ra. Soco ra fariseo chinó iñi ra tandihí ihya.

⁹ Tandihí ra vaa ri ca cananduví ra. Ta ndicuitá ra fariseo, ra sacuahá cuenda ley ra Moisés, ta catyí ra:

—Nyehé xihna ndo, ñahri cha ña vaha sacuví ra ihya. Soco tatu noo ángel cahán chihin ra, saha yo cuenda coto vaha siqui Nyoo cahán ña vaha yo —catyí ra.

¹⁰ Cha chihí ra tuhun ihya, vaa ri ca cananduví ra. Nyacua nayuhví comandante cuan coto cahnya cuatyí ra chi ra Pablo. Yucuan chaha tachí ra tyiño na tava sindaro chi ra Pablo nu nyicú ra, ta cunanyaca ra chi ra nya cuartel.

¹¹ Ta cha cuaa cuan tuvji Sutu Mañi yo nuu ra Pablo ta catyí ra chi ra:

—Sandunii iñun, Pablo. Vatyi tari cahún tuhun Jerusalén ihya, tyicuan caa tucu cucahan tucun nya ñuu Roma —catyí Sutu Mañi yo chi ra Pablo.

Nu tyaá ra Israel cuhva cahñi ra chi ra Pablo

¹² Cha inga quivi, suhva ra Israel catyihí tahan ra tuhun. Catyí ra vatyi ni ma cacachi ra, ni ma coho ra nyacua nya cahñi ra chi ra Pablo. Ta nya noo ra ma sacuvi tyicuan caa na sanaa Nyoo chi ra siqui ñuhu ñáyivi, cacatyí ra.

¹³ Yaha ca uvi xico ra catyihí tahan tuhun ihya nuu Nyoo.

¹⁴ Chahan coyo ra nu nyicu ra cuví nuu chi tata sutu ta ra cacuví mandoñi cuenda ñu Israel. Ta catyí ra chi ra:

—Nyuhu iñ ri tuhun cahan ndi nuu Nyoo vatyi ma cachi ndi ta ni ma coho ndi cha ni ri ca cha ma cahñi ndi chi ra Pablo. Ta na sanaa Nyoo chi ndi tatu ma sacuvi ndi tari cuhva catyí ndi.

¹⁵ Ta vityin nyoho sacuhun ndo tuhun chi comandante. Catyí ndo chi ra na quichi nyaca ra chi ra Pablo nuu ndo ityaan. Saha ndo tuhun vatyi cuasandaa vaha ndo tyiño, ta nyuhu cuatu tuhva ri ndi nu yahá ra ta cucahñi ndi chi ra —catyí ra chi ra.

¹⁶ Soco sehe cuhva ra Pablo chihí cue cha cahán ra. Ta chahan cue chisacotó cue chi ra Pablo nya cuartel.

¹⁷ Tyicuan ta ra Pablo caná ra chi minoo capitán. Ta catyí ra chi ra:

—Cuanyaca chi ra cuehe luhlu ihya nuu comandante vatyi iyó noo tuhun cuñi cue sacoto cue chi ra —catyí ra Pablo chi ra.

¹⁸ Tyicuan ta chinyaçá capitán cuan chi cue nuu comandante. Ta catyí ra chi ra:

—Ra Pablo cha ñohó vehe caa caná ra chii ta catyí ra chii vatyi quichi nyaque chi ra cuehe luhlu ihya vatyi cuñi cue cahan cue chuhun —catyí ra chi ra.

¹⁹ Tyicuan ta tiñ comandante ndaha ra cuehe luhlu cuan ta tava siñ ra chi cue ta catyí ra chi cue:

—¿Ñáá túhun cuñún cattyun chii?

²⁰ Ta ra cuehe luhlu cuan catyí cue chi ra:

—Ra Israel catyihí tahan vaha ra tuhun vatyi catyí ra chuun na sacuhun chi ra Pablo nu iyó junta tyaan. Vatyi casaha ri maa ra cha cuñí ra cha cutuñi vaha ca chi ra.

²¹ Soco ma chino iñun chi ra vatyi yaha ca uvi xico tahan ra nyatú xehe chi ra ityi. Ta tyanaha ra chihin nuu Nyoo vatyi ma cachi ra ta ma coho ra nyacua nya cahñi ra chi ra Pablo. Ta tatu ña cuví cahñi ra chi ra, vaha taxín ca nacúvi noo noo maa ra na. Ta vityin nyatú tuhva ra coto ra ñáá cucatyí maun —catyí cue.

²² Tyicuan ta catyí comandante chi ra cuehe luhlu cuan vatyi yori chihin cahán cue tuhun cha catyí cue chi ra. Yaha cuan ta natachí ra chi cue.

Nu cacú ra Pablo ndaha ra Israel ta cuahan ra nuu ra gobernador cha nañi Félix

²³ Tyicuan ta comandante caná ra chi uvi capitán, ta catyí ra chi ra:

—Sanduvaha ndo chi ndo vatyi cuhun ndo Cesarea cuhva caa iñ cha cha cuaa. Cuacuhun uvi ciento sindaro chihin chaha ra, ta uñi xico uchi ra chihin caballo, ta uvi ciento ra cuiso ra lanza.

²⁴ Sanduvaha ndo caballo coso ra Pablo. Ta saha cuenda vaha ndo chi ra ityi cuahan ndo na chaa vaha ra nu nyaa ra Félix gobernador —catyí comandante chi capitán cuan.

²⁵ Tyicuan ta tyaá ra noo tutu quindaha ra cuhun ra. Ta tuhun cha tyaá ra nu carta, ican cuví ihya:

²⁶ “Yuhu ra Claudio Lisias sacuhin noo carta ihya chi yoho, tata gobernador Félix, vatyi vaha ñáyivi cuvun. Ihya vachi nocumi chuun.

²⁷ Ra Pablo ihya, catiñ ra Israel chi ra. Ta cacuñi ra cacahñi ra chi ra. Soco cuhva cha chite vatyi ra cuenda ñuu Roma cuví ra, chahin chihin sindaro ta sacaquí chi ra.

²⁸ Ta vatyi cuñi cote ñáá cuatyí tyaá ñu siqui ra, chinyaque chi ra nu iyó junta ra cacuví mandoñi ñu Israel.

²⁹ Soco cuenda ley ri maa ñu cuví. Ta cha cuenda ley yoó, ñahri cuatyí ra ta cahñi yo chí ra. Ta ni ri ña tahán chí cohon ra vehe caa.

³⁰ Soco vatyi ñihí tuhun vatyi ra Israel canducu cahñi ra chí ra, yucuan chaha tachí chí ra nuu yoho. Ta catyi tíqui chí ra cha tyaá cuatyí siquí ra, na huhun ra nu nyaun na cacan ra cuatyí ra nuu maun”, catyi ra Claudio chí ra Félix nu tutu cha tyaá ra.

³¹ Tyicuan ta quehen sindaro chí ra Pablo tari huhva catyi ra Claudio chí ra, ta chinyaca ra chí ra nya Antipatris suri maa cha cuaa cuan.

³² Cha inga quivi sindaro cha cuahan chihin chaha, canandichí coyo ra nya cuartel. Ta ra cha cayosó caballo cuahan coyo ca ra chihin ra Pablo.

³³ Ta huhva cha chaq coyo ra ñuu Cesarea, cachaha ra carta cuan chí ra Félix, gobernador, ta cachaha cuenda ra chí ra Pablo chí ra ñandihí.

³⁴ Cha yaha cha sacuaḡa ra Félix carta cuan, quichaha ndacá tuhun ra chí ra Pablo nya ñuu ra. Ta cha chitó ra vatyi ra Cilicia cuví ra

³⁵ ta catyi ra chí ra:

—Na quichi xihna ra tyaá cuatyí chahun. Tyicuan ta cusandai tyiñon —catyi ra chí ra.

Tyicuan ta tachí ra tyiño na casaha cumi sindaro chí ra nya vehe tyiño cha savaha ra Herodes ta cha naha.

24

Nu cutuñí chí ra Pablo nuu ra Félix

¹ Yaha ohon quivi ta ra Ananías, ra cuví nuu chí tata sutu, chaq ra ñuu Cesarea cuan chihin huhva ra cacuví mandoñi, ta chihin noo ra cahan chaha ñáyivi cha nañi Tértulo. Chaá coyo ra nuu ra gobernador Félix vatyi cacan ra cuatyí chaha ra Pablo.

² Tyicuan ta tachí ra Félix na quichi nyaca sindaro chí ra Pablo. Tyicuan ta quichaha chican ra Tértulo cuatyí chaha ra Pablo. Ta catyi ra chí ra Félix:

—Tyahvi nyoo chuun, tata gobernador. Vatyi taxi ri iyó ñuu ndi, ta vaha iyó ndi vatyi yindaha vahun ñuu ndi.

³ Nacuhvá xaan ndi tyahvi nyoo chí yoho tata Félix, vatyi yoho, vaha ñáyivi cuvún.

⁴ Soco ña cuñi sayangue chuun chihin cha cuaha tuhun cahin, yucuan chaha chiquén noo tumañi ñi chuun na cuiñun huhva tuhun cuacahan ndi.

⁵ Vatyi chitó ndi tyi rayi ihya ñima ra vaha cuví ra, noo cuehe cuví ra. Ta tandihí ri ityi sanaquiquí ra chí ñu Israel. Ta ican ra cuví xiñi noo ityi ñáyivi nyicón chí ra Jesús ra ñuu Nazaret.

⁶ Nyacua cuñi ra sacuvi ra noo cha ña tahán chí vatyi ña sahá ra ñáyivi vehe ñuhu

cahnu. Ta nyuhu tiñ ndi chí ra, tacuhva tachi tuñi ndi chí ra tari huhva ley maa ndi.

⁷ Soco comandante Licias chasi ri ra ta chihin cuaha fuerza ta tinyaa ra chí ra chí ndi.

⁸ Ta catyi ra vatyi tatu cuñi ndi cacan ndi cuatyí chaha ra, cuñi chí cha cacan ndi nuu maun. Nyehe maun. Sanaḡmon chí ra ta coton tyi ndicha cha catyi ndi —catyi ra Tértulo.

⁹ Tyicuan caa tucu ra Israel cha canyicu yucuan, catyi ra vatyi ndicha tandihí tuhun cahan ra Tértulo.

¹⁰ Tyicuan ta ra Félix savaha ra seña chí ra Pablo vatyi nacahan ra. Ta ra Pablo quichaha catyi ra:

—Chité tyi cha cuaha xaan cuiya nyacá ñahun ñuu ihya. Ta yucuan chaha si vavaha cuñi vatyi nuu maun cuacutuñi chí yuhu vityin.

¹¹ Tatu ndaca tuhun cuacoton tyi cha iyó ri noo uchi uvi quivi cha chahin Jerusalén. Chahin yucuan vatyi sacahni chí Nyoo.

¹² Ta yori chihin cuví yuhi. Ni ña sanaquiquí chí ñáyivi chichi vehe ñuhu cahnu. Ñahri maa sacuví, ni ri chichi vehe ñuhu, ni ri chichi ñuu.

¹³ Ta cuatyí cha tyaá ra ihya siquí, ña ndicha maa.

¹⁴ Soco noo cha catyi chí ndo vityin vatyi yuhu sacahni chí Nyoo cha sacahnú sutu chahni. Sacahni chí ra huhva sañahá ra Jesucristo. Ta catyi maa ra ihya tyi ña vaha. Soco yuhu chinó ñi ndi maa tuhun cha nyaá nu libru ley cha tyaá ra Moisés. Ta chinó ñi tandihí tuhun catyaa ra profeta cuenda Nyoo ñandihí.

¹⁵ Ta suri chinó ñi vatyi Nyoo cusanandoto ra ñáyivi chíhí, ñu vaha ta ñu quíñi iyó, tari chinó ñi tucu maa ra ihya.

¹⁶ Ta yucuan chaha tyicuan ri nduquí huhva cha cachí coí nuu Nyoo, ta nuu ñáyivi ñandihí.

¹⁷ Cuaha cuiya chica noj inga ityi. Yaha cuan ta cuanuhí nya Jerusalén ñui vatyi nacuhva cuende xuhun chí ñu ndahvi ñu yiñi cuenda Nyoo, ta vatyi huhve noo cha huhve chí Nyoo.

¹⁸ Yuhu tyicuan caa sacuví chichi vehe ñuhu cahnu, ta huhva ra Israel ityi Asia, nyehe ra chíhí yucuan cha yaha cha sandundij chí nuu Nyoo huhva catyi maa nu ley ndi. Soco ña cuaha ñáyivi nyicu, ta ni ña naquiquí ñu.

¹⁹ Ican ra cha nyeḡe chíhí cuan, cuñi chí cha quichi ra ta huhva ra cuenda tatu iyó cha sacuví.

²⁰ O nacatyi maa ra cha canyicu ihya tatu nañihí ra cuatyí yuhu quivi cutuñi chíhí nuu ra nu chiyo junta ra cacuví nuu chí ñu Israel.

²¹ O vasi cuví chi cha cuenda noo ri tuhun चाहिं चिहिन nuu ra nyicú junta cuan tyehe caa: “Nyoho nducú ndo cuatyí चाहिं cha cuenda tyi chinó iñi cha nandotó ñáyivi chihí” —catyí ra Pablo.

²² Ta ra Félix chitó vaha ra yoso caa cuahan tuhun ñu nyicón chi ra Cristo. Ta catyí ra chi ra canyicu cuan:

—Vaha ri vityin. Na quichi xihna comandante Lisias. Tyicuan ta cusandai tuhun ndo —catyí ra.

²³ Tyicuan ta tachí ra Félix chi capitán na cunatyihí ra chi ra Pablo vehe caa. Soco ma ñihi xaan saha cumi ra chi ra. Ta na cuhva ra cuhun ra tahan ra nu ñohó ra, ta cahan ra chihin ra.

²⁴ Yahá suhva quivi ta nachaá ra Félix inga chaha chihin cu Drusila ñasihi ra. Ta cuví ña ñaha Israel. Ta tachí ra na quichi ra Pablo vatyí cuñí ñu tyasoho ñu yoso caa tuhun cha chinó iñi ra chi ra Jesucristo.

²⁵ Ta ra Pablo cahan ra tuhun yoso caa tahán chi sacuvi yo cha vaha, yoso caa cunyaca ñaha maa yo chi yo ta ma sacuvi yo cha quiñi caa. Ta cahan tucu ra yoso caa cucutuñi chí yo nuu Nyoo quivi tahan chí. Ta ra Félix yuhví xaan ra cuvi, ta catyí ra chi ra:

—Cuhān vityin. Ta na nanuña xihne, ta cana mai chuun inga chaha —catyí ra chi ra.

²⁶ Ta ra Félix cuñí maa ra tyi ra Pablo cucuhva ra xuhun chí ra, tacuhva vatyí numi ri saña ra chi ra. Yucuan chaha vatyí tyito tyito ri canā ra chi ra, vatyí ndatuhun ra chihin ra.

²⁷ Uvi cuiya yaha, tyicuan ta nicunyaa ra Porcio Festo cuví ra gobernador tyiño nuu ra Felix. Ta ra Felix cuñí ra cuvaha ra nuu ra Israel ta sandoo ra chi ra Pablo vehe caa.

25

Nu cutuñí chi ra Pablo nuu ra Festo

¹ Tyicuan ta cha cu uñi quivi cha cuví ra Festo tyiño, quita ra ñuu Cesarea cuan ta cuahan ra nya ñuu Jerusalén.

² Chaá ra Jerusalén, tyicuan ta chaá coyo ra cuví nuu chi tata sutu ta ra cuví tyiño ñu Israel ta cachican ra cuatyí chaha ra Pablo.

³ Ta chican ra noo tumañi iñi cahnú chí ra Festo. Cuñí ra vatyí tachí ra Festo tyiño na quichi nyaca sindaro chí ra Pablo nya Jerusalén. Vatyí maa ra cuñí ra cahñi ra chi ra ityi vachi ri ra.

⁴ Soco ra Festo nacahan ra, ta catyí ra: —Ra Pablo ñohó ra vehe caa nya Cesarea. Ta yuhu tyai cuhva cha cunuhi yucuan cha numi ri.

⁵ Yucuan chaha, nyoho cha cuví ndo tyiño ñuu ihya, cuhun maa ndo chihin. Tyicuan ta cuví cacan ndo cuatyí chaha ra tatu iyó cha sacuví ra —catyí ra Festo chí ra.

⁶ Uña o uchi ri quivi chi nyaa ra Festo Jerusalén, ta cuanuhú ra Cesarea. Ta cha inga quivi chaá ra chichi vehe tyiño ra vatyí cutuñi chí ra ca iyó cuatyí nuu ra. Tyicuan ta canā ra chí ra Pablo.

⁷ Cuhva cha quihví ra Pablo, catuhvá ra Israel cha quichí coyo nya Jerusalén, ta quichaha catyaa ra cuatyí cahnú siqui ra. Soco ñahri maa cha ndaa catavá ra.

⁸ Tyicuan ta cahan ra Pablo ta catyí ra: —Yuhu ni noo cuatyí ta sacuvi que, ni siqui ley ñu Israel, ni siqui vehe ñuhu cahnú Jerusalén, ni siqui rey cahnú Roma —catyí ra.

⁹ Soco vatyí cuñí ra Festo ndoo vaha ra chihin ra Israel, ndacá tuhun ra chí ra Pablo:

—¿Atu cuñun cuhun Jerusalén vatyí sandai tyiñon nyicuan? —catyí ra chí ra.

¹⁰ Ta ra Pablo catyí ra:

—Cha nyaí nu maun. Ta maun cuví ra cuví tyiño cuenda rey cahnú Roma. Ihya cuví nu tahán chi cutuñi chí, vatyí ra cuenda ñuu Roma cuví. Ta chitó vahun tyi ñahri maa sacuví chí ñu Israel.

¹¹ Tatu sacuví noo cuatyí cahnú cha tahán chi cahñi ndo chí, ma nduqui cuhva caqui. Soco tatu ña ndicha tuhun cha cahán ra Israel ihya, yori cha iyó ityi chí cha cuhva cuenda chí chí ra cuñí cahñi chí. Chiquén vatyí cuhin nuu rey cahnú vatyí cutuñi chí nuu maa ra —catyí ra Pablo chí ra Festo.

¹² Tyicuan ta ra Festo cha yaha cha cahan tahan ra chihin ra tyinyeé chí ra chihin tyiño, ta catyí ra chí ra Pablo:

—Chicón cha cutuñi chuun nuu rey cahnú. Vaha. Cua cuhun nuu maa ra —catyí ra chí ra.

Nu nacatyí ra Festo tuhun ra Pablo chí ra Agripa

¹³ Yahá suhva quivi, tyicuan ta chaá rey Agripa chihin cu Berenice nya Cesarea, vatyí cuacuhva ñu nocumi chí ra Festo.

¹⁴ Quita suhva quivi chinyicu ñu yucuan, ta nacatyí ra Festo tuhun ra Pablo chí rey. Ta catyí ra:

—Iyó noo rayi ihya cha sandoo ra Félix vehe caa.

¹⁵ Ta cha चाहिं Jerusalén, ra cuví nuu chí tata sutu, ta ra cacuví mandoñi ñu Israel chaha cuenda ra noo tutu cuatyí ra, ta chicán ñu na cúvi ra.

¹⁶ Ta catyí yuhu chí tandihí ra vatyí ña tuhvá ra cuví tyiño cuenda Roma cahñi chí noo ñáyivi tatu ta cahan tahan ca ñu ta nducu ñu cuhva sacacu ñu chí ñu.

¹⁷ Yucuan chaha, quivi quichi coyo ra cacuví nuu chí ñu Israel cuan, ña sacunaj cuhva. Ta cha inga quivi चाहिं vehe tyiño

vatyí cutuñi chi ra cha cacahán ra tuhun. Ta tachi tyiño na quichi ra cuan.

¹⁸ Soco ra catyaá cuatyí síqui ra, ña cuaha maa tuhun cacahán ra. Ta cuñi maa yuhu vatyí cahnu cuatyí cuatyaá ra síqui ra.

¹⁹ Cuñi ra cuan cuatyí chihin ra cha cuenda tuhun costumbre, cuhva chinó iñi ñu Israel. Cahán ra tuhun noo ra cha nañi Jesús cha chihí. Ta ra Pablo catyí ra vatyí iyó ra.

²⁰ Ta ña chité yoso caa sacuvi chihin tuhun cha tyicuan caa, ta ndaca tuhin chi ra Pablo tatu cuñi ra cuhan ra Jerusalén, vatyí cutuñi chi ra cuenda tuhun ihya.

²¹ Soco maa ra chicán ra cha cutuñi chi ra nuu rey cahnu Augusto nya Roma. Yucuan chaha ñohó ca ra vehe caa nyacua nya cuví tachi chi ra nuu ra Augusto —catyí ra Festo chi rey Agripa.

²² Tyicuan ta ra Agripa catyí ra chi ra Festo:

—Cuñi tucu yuhu cuiñi cha cahán ra cuan —catyí ra.

Ta ra Festo catyí ra chi ra:

—Tyaan cuiñun cha cahán ra —catyí ra chi ra.

²³ Tuví inga quivi ta chaq ra Agripa chihin cu Berenice. Iyo xaan caa ñu quihvi coyo ñu chichi vehe vatyí rey cuví ñu. Quihvi tucu comandante ta ra cacuví tyiño ñuu cuan. Tyicuan ta ra Festo catyí ra na quichi ra Pablo.

²⁴ Tyicuan ta quichaha catyí ra Festo:

—Yoho Rey Agripa, ta nyoho tata, cha nyicu ndo ihya. Nyehe ndo chi ra ihya. Tandihí ñu Israel ñuu Jerusalén ta ñu Cesarea cahan ñu síqui ra. Ta ña sandihí ñu cha catyí ñu chii vatyí tahán chi cuví ra.

²⁵ Soco cha cuenda yuhu ñahri cuatyí ra cha tahán chi cuví ra. Ta suri maa ra chicán cha cutuñi chi ra nuu ra Augusto. Yucuan chaha cutachi chi ra.

²⁶ Soco vatyí ñahri cuatyí ra ñihí, yucuan chaha ña ñihí tuhun tyai nu tutu cha cusacuhin chi ra nyacá ñaha chi yo. Yucuan chaha canq chi ra Pablo nuu ndo, ta nuu yoho Rey Agripa, tacuhva tyi ndaca tuhun chi ra ta cote ñáá cha tahán chi sacote chi rey cahnu.

²⁷ Vatyí ña vaha cha sacuhín chi ra tatu ñahri tuhun cahín ñáá cuatyí ra.

26

Nu quichaha cahán ra Pablo nuu rey Agripa

¹ Tyicuan ta ra Agripa catyí ra chi ra Pablo:

—Cuví cahun vityin —catyí ra chi ra.

Ta ra Pablo sandaq ra ndaha ra ta catyí ra tyehé caa:

² —Sii xaan cuñi vatyí cuví cahin nuu yoho, rey Agripa, ta cuví catyí mai chuun

yoso caa tandihí cuatyí cha tyaá ra Israel síqui.

³ Vatyí, yoho chitón tandihí costumbre cha iyó chi yo ñu Israel. Ta chitón tuhun tuhva yo cuví yuhu. Yucuan chaha chiquén chuun nacuiñi vahun cha cahín.

Nu catyí ra Pablo chi ra Agripa yoso caa ñayivi ra cha ni cumañi ca quihvi ra cuenda ra Cristo

⁴ Tandihí ñu Israel chitó ñu yoso caa chiye nyata ni luhli nya ñui. Ta chitó ñu cuhva chiye nya Jerusalén.

⁵ Ta suri chitó ñu vatyí nyata luhli cuví noo fariseo. Ta ra fariseo vaha xaan caquichahá ra costumbre yo. Ta na catyí maa ñu tatu ña ndicha cha cahín.

⁶ Ta vityin nanyaí ihya ta cutuñi chii cha cuenda vatyí chinó iñi cha sanandotó Nyoo chi ñáyivi chihí, tari cuhva catyí ra chi sutu chahnu yo ta cha naha.

⁷ Ndi uchi uvi tahan ityi ñáyivi Israel ñu vachi tata sutu chahnu yo nyatú tucu ñu nyehe ñu tyi ndicha cusandoto Nyoo chi ñáyivi chihí. Ta yucuan chaha nyita ri sacuví ñu tyiño nuu Nyoo sacahnu ñu chi ra ñicahñu ta cha cuaa. Vatyí suri cha cuenda tuhun ihya tyaá ra Israel cuatyí síqui vityin, yoho rey Agripa.

⁸ ¿O ña chinó iñi nyoho vatyí Nyoo sanandotó ra chi ñu chihí?

⁹ Ta quivi cuan suri mai chica xiñi vatyí vaha cha tachi tuñi chi ñáyivi chinó iñi chi ra Jesús ra ñuu Nazaret.

¹⁰ Ta tyicuan caa chinyacuví nya Jerusalén chihin ndusu yuhu ra cacuví nuu chi tata sutu. Ta cuaha ñu cha chinó iñi chi ra Cristo tyihí vehe caa. Ta tatu cachahñi ra chi ñu, vaha xaan cuñi.

¹¹ Cuaha chaha sanyehí tindoho chi ñu ta sahí fuerza chi ñu nacahan ña vaha ñu síqui ra Jesús. Tyehé caa chinyacuví tandihí ri vehe ñuhu ñu Israel. Ta xaan xaan cuñi nyehi chi ñu. Ta chica nyiquen chi ñu nyacua nya inga ñuu.

Nu nacatyí tucu ra Pablo yoso caa nanduví ra, ra cuenda ra Cristo (Hch. 9.1-19; 22.6-16)

¹² Ta yucuan chaha cuahin quivi cuan nya ñuu Damasco chihin ndusu yuhu ra cuví nuu chi tata sutu.

¹³ Soco yoho Rey, ityi cuahin ñáá cuhva ora, nyehí noo nduva ñuhu quichí andivi, ñihi ca ican saha ñuhu ñanyii. Sandundichin chi nicachico nu cuahin ta ra cuahan coyo chihin.

¹⁴ Tyicuan ta tandihí ndi nduva ndi nu ñuhú. Ta chihí noo ndusu cha cahán chihin, chihin sahan yo hebreo, ta catyí chi chii: “Saulo, Saulo, ¿ñáá tuhun cha chicá nyicon chii? Tari noo quiti chañi nyaa ti chata cha xaan cha saquehén ityi ra chi ti, tyicuan caa

cuñún sañicuehun suri chi maun”, catyí ndusu cuan chii.

¹⁵ Tyicuan ta catyí yuhu: “¿Yóo yoho tata?” Ta Sutu Mañi yo catyí ra chii: “Yuhu cuví ra Jesús, ra cha chicá nyicon chi.

¹⁶ Ndicuita ta cuñanyaun, vatyi yuhu tuví nuun tacuhva vatyi cuasacuvun tyiño nuí, vatyi cuacuvun cha ndaa cha nyehun vityin. Ta cucuvun cha ndaa cha nyehun chii nu cuahan ca chi.

¹⁷ Cusacaqui chuun ndaha ra Israel, ta ndaha ra cha ñima ra Israel cuví. Nu nyicú ñu tachí chuun vityin.

¹⁸ Vatyi na nuñon nuu ñu, ta sañahun chi ñu cha ndicha, ta ma sacuvi ca ñu cha ña vaha. Soco sacuvi ñu cha vaha nu ndichin Nyoo vatyi quita ñu chichi ndaha ra ña vaha ta ndihvi ñu ndaha Nyoo tacuhva vatyi tyicuan caa cusahi ticahnu iñi cuatyí ñu ta cunaquehen ñu cha vaha cha चाहá Nyoo chi ñáyivi yihí cuenda ra”, catyí Sutu Mañi yo chii.

¹⁹ Yucuan chaha rey Agripa, sacuvi cha catyí Sutu Mañi yo ra Jesucristo chii nu sañaha ra chí ra chii.

²⁰ Ta cahin tuhun ra xihna ca chihin ñu nyicu ñuu Damasco. Yaha cuan ta cahin chihin ñu ñuu Jerusalén ta tandihí ityi Judea. Ta cahin chihin ñu cha ñima ñu Israel cuví ñandihí. Sacote chi ñu nandu uvi iñi ñu cuatyí ñu, ta nandihvi ñu chichi ndaha Nyoo cha ndicha cuí. Na nasama ñu cuhva iyó ñu chihin cha sacuvi ñu cha vaha.

²¹ Cha cuenda ihya catiñ ra Israel chii chichi veye ñuhu cahnu. Ta cacuñi ra cahñi ra chii.

²² Soco maa Nyoo tyinyeé chii. Ta iyó que nya vityin. Ta cahin tuhun Nyoo chihin tandihí ñáyivi, ñu ndahvi ta ñu tyayii. Ta ña cahin inga tuhun cha ña catyí ra Moisés ta ra profeta, vatyi cucuvi nu cuahan ca chi.

²³ Vatyi catyí ra vatyi tahán chi cha cunyehe ra Cristo tindoho. Ta cha yaha cúvi ra, cunandoto ra. Ta ican ra cuví ra cunandoto xihna ca. Ta cusacata ra tari noo ñuhu ityi cuahan ñáyivi vatyi sacotó ra yoso caa cacu añima ñu, ñu Israel ta ñu cha ñima ñu Israel cuví —catyí ra Pablo.

Ra Pablo cuñi ra cha nachino iñi rey Agripa ta cunyicon ra chí ra Cristo

²⁴ Cuhva cha catyí ra Pablo tuhun ihya, ra Festo canacha ra, ta catyí ra:

—¡Loco yoho Pablo! cha cuenda cha cuaha xaan sacuahún ta ndulocon —catyí ra Festo chí ra.

²⁵ Soco ra Pablo catyí ra chí ra:

—Ña loco yuhu, yoho tata Festo. Soco cha cahin, maa maa ri tuhun ndicha cuví.

²⁶ Ihya nyaá rey Agripa. Ta chitó vaha ra tuhun ihya. Yucuan chaha cahin chihin cha

ña cahán nuí. Vatyi chité tyi chitó tucu maa ra tuhun ihya, vatyi ñima tuhun xehe cuví.

²⁷ Yoho rey Agripa, çatu chinó iñun tuhun cha catyaa ra profeta cuenda Nyoo ta cha naha? Yuhu chité vatyi chinó iñun —catyí ra Pablo chí ra Agripa.

²⁸ Tyicuan ta ra Agripa catyí ra chí ra:

—Suhva cuí ri ca ta nachino iñi tuhun cahun ta quihvi cuenda ra Jesús —catyí rey Agripa chí ra Pablo.

²⁹ Tyicuan ta ra Pablo catyí ra:

—Cuví ri suhva, o cuví ri cuaha soco chi Nyoo chiquén vatyi na nduvi ndihun ñáyivi cuenda ra Jesús tari mai. Ta ñima yoho ri, soco tandihí ri ñáyivi, ñu chihí tuhun cahin. Noo ri cha ña cuñi, cha quihí cadena ndaha ndo tari mai vityin —catyí ra Pablo.

³⁰ Cha yaha cha catyí ra Pablo tuhun ihya, ndicuita rey ta gobernador ta cu Berenice, ta tandihí ra canyicú yucuan.

³¹ Ta cha yaha quita coyo ñu, ta cacatyí ñu chí tahan ñu:

—Ñahri cuatyí ra ihya cha ñihi xaan. Ña tahán chí cuví ra. Ta ni ña tahán chí cohon ra vehe caa —catyí ñu.

³² Ta ra Agripa catyí ra chí ra Festo:

—Cuví saña yo chí ra, tyehe ta ñima maa ra chicán cha cutuñi chí ra nuu ra cuví rey cahnu —catyí ra.

27

Nu tachí ra Festo chí ra Pablo nya ñuu Roma

¹ Quivi cha catyaa ra Festo ta ra Agripa cuhva tyi tachí ra chí ndi nya ñuu Roma ityi Italia, nacuhva cuenda ra chí ra Pablo ta suhva ca ra chí noo capitán cha nañi Julio. Yihí ra noo batallón sindaro, cha nañi Cuenda Ra Augusto.

² Ta cuahan tucu ra Aristarco chihin ndi ñandihí. Ra ñuu Tesalónica cha nyaá ityi Macedonia cuví ra. Tyicuan ta quihvi ndi chichi noo barcu cha quichi ityi ñuu Adramitio ta cuhan chí ñuu cha nyicú yuhu tyañuhu ityi Asia.

³ Cha inga quivi cha ndi puerto Sidón. Ta ra Julio vaha ñáyivi cuví ra chihin ra Pablo. Ta chaha ra cha cunyehe ra chí ra tahan ra ñuu cuan.

⁴ Yaha cuan ta quita ndi Sidón ta casandaa ra sahma barcu cuan ta chihin fuerza tatyí ri cuahan ndi. Ta vatyi caa tatyí siqui ndi yaha ndi chiyo xehe ca ñuhu Chipre. Vatyi ña ñihi xaan caa tatyí chiyo cuan.

⁵ Yaha sava ndi tyañuhu ityi nuu Cilicia ta Panfilia, ta cha ndi noo ñuu cha nañi Mira ityi Licia. Ta noo ndi barcu cuan.

⁶ Yucuan nañihí capitán cuenda sindaro nonga barcu cha quichi nya ñuu Alejandría ta cuahan chí Italia. Ta catyí capitán na

quihvi ndi barcu cuan vatyi cahun ca ndi nu cuahan ndi.

⁷ Cuaha quivi chica ndi cuee ri. Ta chihin cha cuaha tindoho ta chaq ndi yatin ri ñuu Gnido. Ta cha cuenda cha ñihi xaan caá taty, ña chahá chi cha cahun ndi ityi nuu, ta yaha ndi yatin ri ñuu Salmón. Ta nacuíco ndi ityi yuhu ñuhú Creta.

⁸ Nducú ndi cuhva cha cahun ndi yuhu tyañuhu cuan ta chaq ndi nu nañi Buenos Puertos yatin ri ñuu Lasea.

⁹ Cha cuaha xaan quivi yaha ta cha yica xaan nanduví cha cacá noo ndi ityi nu tyañuhu. Vatyi cha yaha quivi vico ayuno nu ña chachi ñu Israel. Ta cha cuyatin yoo vichin. Yucuan chaha ra Pablo chahá ra tuhun chí ra sacaca barcu cuan,

¹⁰ ta catyí ra:

—Nyoho ra canyicú ihya, cuiñi ndo tuhun cahín. Nyehí vatyi yica xaan cuhva cuahan yo. Ta tuví iñi vatyi cuaha xaan cusacunaá yo. Cunaá barcu ta cha nyisó chí ta nyacua nya maa yo ñandihí. Vaha taxin ca nandoo yo ihya —catyí ra chí ra.

¹¹ Soco capitán cuenda sindaro cuan quichahá ca ra chí ra sacacá barcu chihin chitoho barcu ta ñima ca chí ra Pablo.

¹² Na cuví yaha ndi yoo vichin yucuan tyi ñihi xaan tuhvá caa taty, ta yica xaan cuenda barcu. Yucuan chaha tandihí ra ta catyí ra:

—Vaha ca cha quita yo ihya ta nducú yo cuhva chaá yo nya ñuu Fenice suri ñuhú Creta ihya. Yucuan cuví noo nu vaha cunyaa barcu vatyi nyaa ñuu cuan chiyo caña ñanyii —catyí ra.

Nu ñihi xaan caá taty nu tyañuhu

¹³ Tyicuan ta quichahá caa chiin taty cha quichi ityi sur. Ta cuñi maa ra vatyi vaha xaan vatyi ñima taty ñihi cuví, ta cuví cahun ra chihin barcu ra nicañi ri yuhu tyañuhu ñuhú Creta cuan.

¹⁴ Ña cuaha ri chicá ra ta quichahá caa noo taty xaan cha quichí ityi norte. Ta tyandahá chí barcu inga ityi.

¹⁵ Ta ña cuví ca cahun ndi ityi nuu ca cha cuenda taty cuan. Ta saña ndaha ndi nacuhun maa barcu chihin taty nya ityi cuñi maa chí.

¹⁶ Ta tyandahá taty chí ndi ityi chiyo satyin noo ñuhú luhlu cha nañi Clauda. Ta chihin cha yii xaan naquehen ndi lancha luhlu cha xitá quiñoho barcu, ta natyihí ndi ityi chichi barcu coto nyee chí.

¹⁷ Ta cha yaha natyihí ra lancha cuan, yucuan ta chahñi vaha ra yoho nicachico barcu vatyi coo fuerza chí. Ta yuhví ra coto tahan ra nu yaxin ndutya ta quihvi barcu cuan chichi ñiti vita iyó yuhu tyañuhu nu nañi chí Sirte, yucuan chaha sanoq ra

sahma barcu ta chahá ra cha cahun barcu yoso cuhva tyandahá taty.

¹⁸ Ta cha inga quivi suri ñihi xaan caá taty. Yucuan chaha quichahá catuchi ra carga nu tyañuhu.

¹⁹ Ta cha cu uñi quivi quehen ndi ndaha tyiño barcu ta tyihí ndi nu tyañuhu.

²⁰ Ta cuaha quivi ña nyehe ndi ni ñanyii ta ni tiño. Ta ñihi taty nañi chí ndi. Yucuan chaha ña tyaa ca ndi cuhva cha cacú ndi.

²¹ Cuaha quivi yaha ta ña chachi ndi. Tyicuan ta catyí ra Pablo chí tandihí ra:

—Nyehé ndo, vaha ca tyehe ta quichahá ndo chí quivi cuan, ta ndoo taxin yo Creta cuan. Ta vityin nyehé xaan yo tindoho ihya ta cuaha ndaha tyiño sacunaá yo.

²² Soco vityin ma cacá xaan iñi ndo vatyi ni noo yo ta ma cuví yo. Barcu ihya cuví cha cunaá.

²³ Vatyi Nyoo nyacá ñaha ra chí, ta sacuví tyiño nuu ra, sanyehé ra noo visión chí cuñi. Ta tuví noo ángel nuí.

²⁴ Ta catyí ángel cuan chí: “Ma yuhvun, Pablo. Vatyi cuñi chí cha cahun tuhun Nyoo nuu rey cahnu Augusto nya Roma. Ta cha cuendon cusacacu Nyoo tandihí ra canyicu chuhun chichi barcu”, catyí ángel cuan chí.

²⁵ Yucuan chaha nyoho cha ñohó ndo chichi barcu, sanñi ndo iñi ndo. Vatyi yuhu chinó iñi chí Nyoo. Ta chitó vahi vatyi cuví tari cuhva catyí ángel cuan chí.

²⁶ Vasi cuanyee barcu soco cuachaa yo noo ñuhú luhlu —catyí ra Pablo chí tandihí ndi.

²⁷ Noo cha cuaa quivi ndihí chahun quivi chica ityi ndi nu tyañuhu, ñohó ndi nu tyañuhu Adria. Ta chata cuan chata ihya tyandahá taty chí barcu ndi nu tyañuhu. Ta vasi ora ñuu cuví cuhva cuan ta tuví iñi ra sacacá barcu cuan tyi cuachaa ndi noo ñuhú.

²⁸ Tyicuan ta tyicuhva ra cha cono ndutya. Ta nyehe ra tyi oco chahun iñi tahan metro iyó. Cuahan ndi chíin ca ityi nuu ca. Ta tyicuhva tucu ra inga chaha. Ta iyó oco ucha metro.

²⁹ Ta cayuhví ra coto nañi barcu cuan chata yuu. Yucuan chaha casanoq ra cumi tahan caa vee cha nyaa gancho nuu, ityi chata barcu. Ta ña iñi ca ra cha cundichin.

³⁰ Ta ra sacacá barcu cuan catyaa ra cuhva cacono xehe ra. Ta yucuan chaha quichaha casanoq ra lancha cuan nu ndutya ityi nuu barcu cuan. Ta sahá ri maa ra tyi inga caa casanoq ra.

³¹ Soco ra Pablo sacotoq ra chí capitán ta chí sindaro ta catyí ra:

—Tatu ma ndoo ra cuan chichi barcu. Nyoho ma cuvi cacú ndo —catyí ra chí ra.

³² Tyicuan ta sindaro cachahnyá ra yoho lancha. Ta casanacavaꝯ ra nu ndutya.

³³ Ta cha ñaa ca cuan ra Pablo catyí ra chi tandihí ra:

—Cha iyó uchi cumi quiví cha ta cachi ca yo.

³⁴ Catyí chi ndo, na cachi yo vityin. Níñi xaan cuñi chi cha cachi yo ta ndunye coño ñuhu yo. Vatyí cucacu yo ta ni noo ixí xiñi yo ta ma cunaa.

³⁵ Ta cha catyí ra tuhun ihya, ra Pablo quehen ra noo pan ta nacuhvaꝯ ra tyahví nyoo chí Nyoo nuu tandihí ra. Tyicuan ta tahví ra ta quichahaꝯ chachi ra.

³⁶ Tyicuan ta tandihí ca ra canduniꝯ ca iñi ra ta cachachí ra ñandihí.

³⁷ Ta cha tandihí ndi cha ñohó ndi chichi barcu cuan, quita uvi ciento uñi xico chahun iñn tahan ñáyiví.

³⁸ Cuhva cha ndihí ca chachí ra ta tuchí ra yitín cha yihí trigu nu tyañuhu na nduñahma ca barcu.

Nu nyeé barcu

³⁹ Yahá cuan ta cundichin. Ta canyeheꝯ ra cha sacacá barcu noo ñuhú, soco ña canicohon nuu ra nya cuví cuan. Nyeheꝯ ra noo nu iyó ñiti. Ta catyaa ra cuhva nyehe ra tatu cuví sacuhun ra barcu yucuan.

⁴⁰ Cachahnyá ra yoho cha nuhñi caa vee cuan. Ta sandoꝯ ra chichi tyañuhu. Ta casandutayaꝯ ra vitu cha sanacuico barcu. Tyicuan ta casandaꝯ ra sahma cha tuhvá chitacaá ityi nuu barcu. Ta quichahaꝯ quehen tatyí sahma cuan, ta sacuhún chi barcu nya nu iyó ñiti cuan.

⁴¹ Ta chaꝯ barcu cuan noo nu nañi tahan ndutya. Ta nyee xiñi chí chichi ñiti. Ta ña cuví ca natava ra. Ta suhva ca cha ña quihví chichi ñiti, ñihí xaan cañi tyañuhu chí chí, nyacua tahví cuatyí chí.

⁴² Tyicuan ta sindaro cacuñi ra cahñi ra chí ndii cuí maa ra cuahan cuacutuñi chí nuu ra cuví rey cahnu, coto cacono ra.

⁴³ Soco capitán sindaro cuñi ra sacacu ra chí ra Pablo. Yucuan chaha ña chahaꝯ ra cahñi ra chí ra, soco catyí ra vatyí nya ra cachitó sutya, na cuhun cuee ra nu ndutya ta quita ra nya ñuhú ityi.

⁴⁴ Ta tandihí ca ra cha ña cacuví sutya, na quehen ra vitu cha nyisó barcu, ta suhva ra chíhin yiquín vitu barcu cha tahví tyañuhu. Ta tyicuan caa cacacu tandihí ndi ta quitaꝯ ndi ñuhú ityi.

28

Nu ñohó ra Pablo ñuhú Malta

¹ Cuhva cha cha yahá cacu ndi ta catyí ñáyiví iyó ñuhú cuan vatyí nu nyaá ndi nañi chí Malta, o Melita.

² Ta vaha xaan tyiñuhuꝯ ñu chí ndi. Ta sanatahan ñu ñuhuꝯ vatyí coón savi ta vichin

xaan. Ta catyí ñu chí tandihí ndi, natuhva ndi yuhu ñuhuꝯ cuan natava ndi cha vichin ndi.

³ Tyicuan ta ra Pablo naquehen ra suhva nducu tyihí ra nu ñuhuꝯ. Ta noo coo quitaꝯ chichi nducu cuan, cha cuenda cha ihñi. Ta chachí yihí ti ndaha ra Pablo ta ndooꝯ ti tacaꝯ ti ndaha ra.

⁴ Cuhva cha canyehe ñáyiví ñuhú cuan tyi tacaá coo cuan ndaha ra, quichaha catyí ñu chí tahan ñu:

—Ra ihya vasi noo ra chahñi ñáyiví cuví ra, vatyí vasi cacu ra nu tyañuhu soco ña chahá Nyoo cha coo ca ra cha cuenda cuatyí ra —catyí ñu.

⁵ Soco ra Pablo naquisí ra chí coo cuan, ta canacava ti nu ñuhú, ta ñahri cuví chí ra.

⁶ Tandihí ñu nyatú ñu ñáá cuhva ndaa nu tyaꝯ ti, o ñáá cuhva cúvi ra. Soco cha yahá nyatu xaan ñu, ta nyeheꝯ ñu vatyí ñahri maa cuví chí ra. Tyicuan ta nasamaꝯ ñu cuhva chicá xiñi ñu, ta quichaha catyí ñu:

—Mínoo nyoo cuví ra —catyí ñu.

⁷ Yatyin ri cuan nyaá ñuhú ra cha cuví nuu ñuhú cuan. Publio nañi ra. Ta vaha xaan cahán ra chíhin ndi. Ta tyiñuhuꝯ xaan ra chí ndi, ndooꝯ ndi vehe ra uñi quiví.

⁸ Ta cuhví xaan sutu ra chíhin cahñi ta cha chíyó ra. Ta ra Pablo chahan ra chinyeheꝯ ra nu catuví ra. Ta chícan tahvi ra chaha ra. Ta tysiꝯ ra ndaha ra siqui ra ta nduvaha ra.

⁹ Yahá cuan ta quichaha caquichí tucu inga ñu cuhví cha iyó ñuu cuan. Ta nduvahaꝯ tucu ñu.

¹⁰ Ta tandihí ñu tyiñuhuꝯ xaan ñu chí ndi. Ta quiví quihví ndi chichi barcu cha cuacuhun ndi, chahaꝯ ñu tandihí cha cuchíñuhu chí ndi ityi cuhun ndi.

Nu chaꝯ ra Pablo ñuu Roma

¹¹ Uñi yoo ñohó ndi Malta cuan. Tyicuan ta ñihí ndi noo barcu cha quichi nya ñuu Alejandría ityi Egipto. Ta ndooꝯ chí Malta nya yahá yoo vichin. Ta nya noo cha natava ñu, noo xiñahñu nyoo Cástor ta nyoo Pólux, xiñi chí. Quihví ndi barcu cuan ta cuahan ndi.

¹² Ta chaꝯ ndi ñuu Siracusa. Ta yucuan ndooꝯ ndi uñi quiví.

¹³ Ta yucuan ta quitaꝯ ndi ta cuahan ndi ityi yuhu tyañuhu nyacua nya chaꝯ ndi ñuu Regio. Ta cha inga quiví cuan caa xaan tatyí cha quichi ityi sur ta chicá ndi uvi quiví ta chaꝯ ndi ñuu Puteoli.

¹⁴ Yucuan ñihí tahan ndi chíhin suhva ra hermano. Ta catyí ra chí ndi cha ndooꝯ ndi noo vitya chíhin ra. Yahá cuan ta quitaꝯ ndi ta cuahan ndi nya ñuu Roma.

¹⁵ Ta ñu yihí cuenda Nyoo ñuu Roma cuan ñihí ñu tuhun tyi cua chaa ndi. Ta chahan coyo ñu chisatahan ñu chí ndi ityi. Suhva

ñu nyatú ñu chi ndi Nuyahví Apio. Ta inga ñu ñihj tahan ñu chihin ndi nya nu nañi Tres Tabernas. Ta cha nanyehe ra Pablo chi ñu, nacuhva ra tyahvi nyoo chi Nyoo. Ta ndunii ca iñi ra.

¹⁶ Cuhva cha chaq ndi Roma cuan, capitán cuan nacuhva cuenda ra chi ra ca iyó cuatyí cuan chi noo ra cuví nuu chi ra sahá cumi vehe caa. Ta chaha ra cuan cha coo siin ra Pablo. Ta noo ri sindaro sahá cumi chi ra.

Nu cahán ra Pablo tuhun Nyoo ñuu Roma

¹⁷ Uñi quivi cha yaha chaq ndi yucuan. Tyicuan ta tachj ra Pablo tyiño naquichí coyo ra cacuví nuu cuenda ñayivi Israel cha iyó ñuu Roma cuan. Ta cuhva cha ndu iin ri ra, quichaha catyj ra chi ra:

—Nyoho yañi, vasi ñahri sacuvj chi ñu Israel tahan yo, ta ni ñahri sacuvj siqui costumbre sutu chahnu yo, soco chaha cuenda ra Israel chii chi ra ñuu Roma. Ta ñohj vehe caa Jerusalén ndaha ra ñuu Roma.

¹⁸ Ta cha cutuñi chi, ta cuñi ra nyacá ñaha casaña ra chii. Vatyí ñahri cuatyí cha cahnu cha tahán chi cuví.

¹⁹ Soco cha cuenda cha nduxaán xaan ra Israel siqui, chican taxin cha cutuñi chii nuu maa rey cahnu. Vasi ñahri cuatyí cuacaquen siqui ñu ñui nuu ra.

²⁰ Yucuan chaha cané chi nyoho vatyí cohon nui chi ndo, ta sacoté chi ndo vatyí nuhñi yuhu chihin cadena vityin cha cuenda cha yihí iñi yo, ñu Israel, chi Nyoo —catyj ra Pablo.

²¹ Tyicuan ta catyj ra Israel chi ra Pablo:

—Ña chitó maa ndi tuhun yoho. Ta yori casacoté chi ndi, ni chihin carta, ta ni ta yori ca quichj ityi Judea sacoto cha caun, o cahán ña vaha ñu sicun.

²² Soco cuñi ndi cuiñi ndi tuhun chicá xiñi yoho. Vatyí chitó ndi vatyí tandihí ri ityi cahán ña vaha ñayivi siqui tuhun chaa ihya —catyj ra Israel chi ra Pablo.

²³ Tyicuan ta catyihj tahan ra tuhun nya quivi quichi coyo ra inga chaha. Ta cha chaq quivi cuan, chaq coyo cuaha ñayivi nu iyó ra Pablo. Ta nya ñaha ri ta nya cha cuaa cahán ra Pablo tuhun yoso caa nyacá ñaha Nyoo añima yo. Ta chihin ley ra Moisés ta tuhun cha catyaa ra profeta Nyoo ta cha naha, sañahá ra chi ñu vatyí ra Jesús cuví ra cha sacacú chi yo, vatyí cuñi ra tyi nachino iñi ñu chi ra.

²⁴ Yihí ñu chinó iñi ñu cha catyj ra Pablo. Ta inga ñu ña chinó iñi ñu.

²⁵ Ta vatyí ña iin ri chino iñi ñu ta siin siin tuhun cahán ñu, ta quichaha cuahan coyo ñu. Ta ra Pablo catyj ra chi ñu:

—Ndicha xaan cha catyj Tatyí Ii chi sutu chahnu yo chihin yuhu ra profeta Isaías ta cha naha. Vatyí catyj ra tyehe caa:

²⁶ Cuahan ta catyj chi ñayivi ihya tyehe caa:

Nyoho cucuiñi ndo tuhun Nyoo.

Soco ma cutuñi iñi ndo.

Ta cunyehe ndo chihin chiti nuu ndo cha sacuví Nyoo.

Ta ma tuvi iñi ndo.

Tyicuan caa catyj chi ñu.

²⁷ Vatyí añima ñu cha ndundava xaan.

Ta chiñi ri maa ñu tuhun Nyoo.

Ta natahán chiti nuu ñu, tacuhva cha ma cuví nyehe ñu.

Ta nicunyasí soho ñu.

Yucuan chaha ña chiñi ñu, ta ndundava añima ñu.

Yucuan chaha ña cuñi ñu quihvi ñu chichi ndahi na sanduvahi chi ñu, catyj Tatyí Ii chihin yuhu ra Isaías ta cha naha.

²⁸ Coto vaha nyoho vatyí vityin ta ityi nuu ca cuhin cusacote chi ñu cha ñima ñu Israel cuví vatyí sacacú Nyoo chi ñu. Ta maa ñu cuatyasoho ñu, —catyj ra Pablo chi ñu.

²⁹ Cuhva cha catyj ra Pablo tyehe caa, ra Israel cuahan coyo ra suri cuví yuhu ra chihin ra tahan ra tuhun cha cahan ra Pablo chihin ra.

³⁰ Uvi cuiya nanii ndoo ra Pablo vehe nu nyaá ra cuenda yoo ñuu Roma cuan. Ta vaha cahán ra chihin tandihí ñu chahan vehe ra.

³¹ Ta chihin cha nii iñi ra ta cahan ra tuhun yoso caa nyacá ñaha Nyoo añima yo. Ta sañahá ra tuhun Sutu Mañi yo ra Jesucristo. Ta yori chasí cha cahán ra.

Carta Cha Sacuhun Ra Apóstol Pablo Chi Ñáyivi Ñuu Roma Cha Yihí Cuenda Nyoo

*Nu sacuhun ra Pablo tutu chi ñu cuenda
Nyoo ñu Roma*

¹ Yuhu ra Pablo cuví noo ra sacuví tyiño nuu ra Jesucristo. Nacanã ra chii, ta nacachí ra chii vatyi cuví apóstol chi ra, tacuhva vatyi sacote chi ñáyivi yoso caa sacacú Nyoo añima yo.

² Ihya cuví tuhun cha catyí Nyoo chi yo tyi cusacuvi ra, ta chicunyaã nu tutu tuhun ra tandihí cha tyaa ra profeta ta cha naha.

³ Ican ihya cuví tuhun Sutu Mañi yo Jesucristo Sehe Nyoo cha cahán chi tuhun, vatyi quichí ra siqui ñuhu ñáyivi chihin coño ñuhu ra tari coño ñuhu maa yo. Tata rey David cuví chi ra.

⁴ Ta Nyoo chihin Tatyí li ra sacotó cachi ra chi yo vatyi Sehe ra cuví chi ra, vatyi sanandotó ra chi ra chihin cha ndicha ñuhu ra.

⁵ Ta cha cuenda maa ra Jesucristo chaha Nyoo tumañi iñi chi nyuhu cha cahun ndi cucaca ndi tyiño ra, tacuhva nachino iñi ñáyivi chi ra nichahnu ñuhu ñáyivi, ta quichaha ñu chi ra.

⁶ Ta mahñu ñu cuan, ñohó tucu nyoho vatyi suri nacanã tucu ra Jesucristo chi nyoho.

⁷ Sacuhín tutu ihya chi tandihí nyoho cha iyó ndo ñuu Roma. Cuñí Nyoo chi ndo ta nacanã ra chi ndo vatyi coo ndo noo ñáyivi cachi cha sacahnu ndo chi ra. Na naquehen ndo cha vaha ta cha taxi ri cuñí añima ndo cha chahá Sutu yo Nyoo ta Sutu Mañi yo Jesucristo chi yo.

*Nu catyí ra Pablo vatyi cuñí ra cahun ra ñuu
Roma*

⁸ Cha xihna ri chahí tyahvi nyoo chi Nyoi chihin sivi ra Jesucristo, cha cuenda tandihí nyoho. Vatyi tandihí ri ityi cahán ñu tuhun vatyi chinó xaan iñi ndo chi ra Jesucristo.

⁹ Ta tyiño nuu Nyoo sacuví yuhu chihin cha tandihí añime. Ta cahín tuhun yoso caa sacacú ra chi yo cha cuenda Sehe ra. Ta Nyoo cuví ra testigu vatyi chitó ra tyi tyicuan ri nichohón iñi chi ndo cuhva cha chicán tahvi chi ra. Ta chicán tahvi cha cuenda ndo.

¹⁰ Chiquén chi Nyoo na cuví cuhva cuñí ra, ta cahun nu nyicú ndo, vatyi cha naha xaan cuñí cuhin.

¹¹ Vatyi cuñí tyinyei chi ndo, ta naquehen ndo cha vaha cha chahá Nyoo ta cuní ca iñi ndo.

¹² O cuñí chi catyí vatyi saní yo iñi tahan yo chihin cha chinó iñi yo, tari chinó iñi nyoho ta yuhu ñandihí.

¹³ Yañi, cuñí tyi coto ndo vatyi cuaha xaan chaha cuñi cunyehi nu nyicú ndo, soco nya vityin ta ña chahá chi cuhva chii. Cuñí vatyi cuní ca iñi ndo tari nduní ca iñi ñu vehe ñuhu inga ñuu nu chahín. Vatyi tatu nduní iñi ndo, nduní tucu iñi yuhu.

¹⁴ Vatyi nyaá siqui cha cahin tuhun Nyoo chihin tandihí ñáyivi, an cuví ri ñu ñuu Grecia, an cuví ri ñu inga ñuu, an cuví ri ñu chihí tuñi, an cuví ri ñu ña cutuñi iñi. Tahán chi cha cahin chihin tandihí ri ñu.

¹⁵ Yucuan chaha, cha cuenda yuhu, cuñí xain cahan tiqui tuhun Nyoo chihin nyoho cha iyó ndo ñuu Roma chiña.

Tuhun Nyoo iyó xaan cha ndicha ñuhu chi

¹⁶ Yuhu ña cahán nui cahín tuhun Nyoo, vatyi ihya cuví fuerza Nyoo cha sacacú chi tandihí ñáyivi cha chinó iñi chi ra. Ta cha xihna ri chi ñu Israel. Ta cha cu uvi, ñu inga ñuu.

¹⁷ Vatyi tuhun Nyoo ihya, sañahá chi chi yo yoso caa sacuvahá Nyoo chi yo nuu ra chihin cha chinó iñi yo chi ra. Ta suri cha cuenda cha chinó iñi yo, coo yo ñáyivi chaa chihin ra. Tyehe caa nyaá nu tutu tuhun Nyoo: "Ñu cha nduvahá añima saha Nyoo, coo ñu noo ñáyivi chaa chihin cha chinó iñi ñu chi ra."

Tandihí ñáyivi ta iyó cuatyí ñu

¹⁸ Ta nyehé yo vatyi nya nu nyaá Nyoo nya andivi ta tachi tuñi ra chi ñáyivi quíñi iyó, ñáyivi ña vaha. Ta cha quíñi iyó ñu, ña chahá chi coto ñu cha ndicha.

¹⁹ Chitó vaha ñu tyi tuhun vaha cuví tuhun Nyoo vatyi suri maa Nyoo sañahá ra chi ñu.

²⁰ Vatyi vasi ña nyehé yo chi ra, cuví coto yo vatyi iyó ra vatyi nyehé yo tandihí cha savaha ra. Nyata chingó ñuhu ñáyivi ta tandihí cha savaha ra ta sañahá chi chi yo vatyi maa ra cuví Nyoo, ta tunyee iñi cha iyó chi ra ma ndihí maa. Yucuan chaha ma cuví catyí ñáyivi tyi yori Nyoo iyó.

²¹ Ta vasi cha chitó ñu tyi iyó noo Nyoo cahunu, soco ña sacahnú ñu chi ra tari cuhva tahán chi cha sacahnu yo chi ra. Ni ña nacuhva ñu tyahvi nyoo chi ra. Soco maa maa ri tuhun cha ñima ri tuhun chicá xiñi ñu. Ta cha cuenda cha ndava añima ñu, cutondó cha chiñi tuñi xiñi ñu ta ndoq ñu nu ñaa iñi.

²² Vasi catyí ñu tyi chitó xaan ñu soco ñu tondo cuví ñu.

²³ Vatyi cha nuu cha sacahnú ñu chi Nyoo ra cahunu ca cuví, ra ña tuhva chihí; sacahnú ñu chi xitohyo cha caá tari caá ñáyivi tuhva chihí. Ta nyacua nya xitohyo

cha tari caá saa, ta coo, ta quití cha cumi tahan chaha, ta sacahnú ñu.

²⁴ Yucuan chaha saña ndaha ndihi Nyoo chí ñu na sacuví ñu tandihí cha quíñi caa cha quichí cuví iñi ñu. Yucuan chaha maa maa ri tuhun cha cahán nuu yo nyacuví ñu chihin tahan ñu.

²⁵ Vatyí ña chinó iñi ñu cha ndicha vaha Nyoo. Vatyí noo cha ña ndicha, yucuan chinó iñi ñu. Ta sacuvahá ca ñu, ta casacahnú ca ñu cha savaha Nyoo ta ña cuñí ñu sacahnú ñu chí maa maa ra. Vatyí chí maa ra tahán chí sacahnú yo tyicuan ri maa. Ta na cuví chí tyicuan caa.

²⁶ Yucuan chaha saña ndaha Nyoo chí ñu na sacuví ca ñu cha chahá ticahan nuu chí ñu. Vatyí nyacua nya ñusihí nasamú ñu cuhva nyacuví ñu, vatyí ca iyó ñu chihin tahan sihi ñu, ta ña tahán chí tyicuan caa.

²⁷ Ta tyicuan caa tucu rayí, casandihí ra cha ca iyó ra chihin ñasihí ra, ta quichí cuví iñi ra cacoo ra chihin tahan yí ra. Ta canyacuví ra chihin ra tahan ra, tuhun cha chahá ticahan nuu chí ra. Ta cha cuenda cuan tachí tuñi Nyoo chí ra ta tiví ra cha cuenda cha quíñi caa cha canyacuví ra.

²⁸ Ta chaha cha ña cuñí ca ñáyivi nacoto nuu ñu chí Nyoo, yucuan chaha saña ndaha ra chí ñu na caca maa xiñi ñu cha quíñi caa, ta sacuví ñu cha ña tahán chí sacuví ñu.

²⁹ Vatyí tandihí nuu cha ña vaha sacuví ñu. Iyó ñu chihin inga rayí ta ñima yí ñu cuví. Ta iyó ra chihin inga ñusihí ta ñima ñasihí ra cuví. Quíñi xaan iyó ñu. Quichí cuví xaan iñi ñu coo ca chí ñu. Nyacuví ñu cha quíñi caa. Nyiyó xaan iñi ñu cha chí inga ñáyivi. Chahñí ñu. Iyó ñu tisihi chihin tahan ñu. Sandaví ñaha ñu chí tahan ñu. Ta quíñi xaan ca iyó ñu. Ta ñiñi ñu cuendu.

³⁰ Cahán ña vaha ñu siqui inga ñáyivi. Ta tasi cuñí ñu nyehe ñu chí Nyoo. Tyityi iñi ñu. Ta cahnu sahá ñu chí ñu.

Casanducuahá ca ñu cha quíñi caa. Ta ña quichahá ñu chí sutu ñu, ta chí sihi ñu.

³¹ Ña cuñí ñu tyasoho ñu tuhun vaha. Ña sacuví ñu tuhun cahán ñu. Yori maa chí cuñí ñu. Ta ña casahá ñu ticahnu iñi chí tahan ñu. Ña ndahví cuñí ñu nyehe ñu chí tahan ñu.

³² Maa ñu chitó vaha ñu ñáá cha catyí Nyoo tyi sacuví ñu, chitó ñu vatyí ñu casacuví cha ña vaha, tahán chí tuhun chíhi chí ñu ta cuhnu ñu anyaya. Soco maa ñu sañihí ca ñu sacuví ñu. Ta nyacua sñi cuñí ñu tatu sacuví inga ñáyivi cha quíñi caa.

2

Tachí tuñi Nyoo chí ñáyivi soco chihin cha ndicha

¹ Yucuan chaha ñahri siqui tyaá ndo, nyoho ñu cha nyehé cha caá inga ñu ta

cahán ndo. Ñahri saha, savahri ñu, yóo ri ñu cuví ndo. Vatyí tatu nyehún cha caá inga ñu ta cahún, suri maun sacouñ cuatyun. Vatyí suri ñn ri cha sacuvún chihin ñu nyehún ta cahún.

² Vatyí chitó yo vatyí Nyoo tachí tuñi ra chí ñu nyacuví tyehe caa, soco chihin cha ndicha ta chihin cha ndaa, tachí tuñi ra.

³ Ta yoho cha cahán nyaun chí inga ñu, suri ñn ri cha sacuvún chihin ñu. Cutachi tuñi Nyoo chuun cha cahún tyehe caa.

⁴ ¿Ñáá tuhun ña quichahún cha cundahví cuñí Nyoo nyehé ra chí yo ta cunyeé xaan ra cha sacuví yo? Vaha xaan ñáyivi cuví ra chihin yo. ¿Atu ña tuví iñun vatyí cha cuenda cha cundahví cuñi ra nyehé ra chuun, ta nyatú ra cha nasamon cuhva iyón?

⁵ Soco yoho ndava xaan añimon. Ta ña cuñún nasamon cuhva iyón. Ican cuan cuví cuatyun cha sacayá xaan, ta cuxaan ca cuñí Nyoo nyehé ra chuun ta ñihi ca cutachi tuñi ra chuun quívi cutachi tuñi ra chí ñáyivi. Ta cunyehe yo tyi chihin cha ndaa ta chihin cha ndicha tachí tuñi ra chí yo.

⁶ Tatu sacuví yo cha ña vaha, cutahan chí cha ña vaha chí yo. Tatu sacuví yo cha vaha cutahan chí cha vaha chí yo quívi cutachi tuñi ra chí yo.

⁷ Ta cuhva ra ñáyivi cha ma naa ca maa coo ñu cha nanducú cha vaha ta cha cahnu cuví Nyoo, ñu nanducú cuvaha nuu ra, ñu cha cuñí coo tyicuan ri maa. Cuhva ra tandihí cuan chí ñu cha cuenda vatyí sacuví ñu maa maa ri cha vaha chihin cha cama iñi ñu.

⁸ Soco ñihi xaan cutachi tuñi ra chí ñáyivi sacuví cuhva cuñí maa, ta ña cuñí ñu quichaha ñu tuhun ndicha Nyoo, ta sacuví ñu cha ña vaha.

⁹ Cuaha xaan tñdoho ta tucuihya iñi cunyehe tandihí ñu casacuví cha ña vaha. Ta cha xihna ri cutachi tuñi ra chí ñu ñuu Israel, ñáyivi cuenda ra. Ta tyicuan caa tucu cutachi tuñi ra chí ñu cha ñima ñu Israel cuví.

¹⁰ Soco chí tandihí ñu cha sacuví cha vaha, Nyoo cucuhva ra cha cucahnu ñu chihin ra, cha xihna ri chí ñu Israel, tyicuan ta chí ñu cha ñima ñu Israel cuví. Ta cucatyí ra tyi sñi cuñi ra chihin ñu. Ta cucuhva ra cha taxi ri coo añima ñu.

¹¹ Vatyí Nyoo ña cachí ra chí yo. Cuví ri yo ñu chitó, o cuví ri yo ñu ña chitó, ñn ri cuhva cuñí maa ra chí yo.

¹² Vatyí tandihí ñu casacuví cuatyí ta ña chitó ñu ley cha chahá Nyoo chí ra Moisés, cunaa ñu nuu Nyoo soco ñima cha cuenda tuhun cha catyí ley cuan. Ta ñu casacuví cuatyí ta chitó vaha ñu ley cha chahá Nyoo chí ra Moisés, cutachi tuñi Nyoo chí ñu yo soco cuhva catyí suri maa nuu ley cuan.

¹³ Vatyí ñu cha chiñí ley, ta ña nyacuví ñu cuhva catyí Nyoo, ñima ñáyivi vaha cuví ñu nuu ra. Soco tyehe ta iyó noo ñu sacuví cuhva catyí ley, ican ñu cuan, vaha ñu nuu Nyoo.

¹⁴ Tatu ñima ñu Israel cuví ñu ta ña chitó ñu ley cuan, soco tuví iñi ñu yoso caa coo ñu; cha tuví iñi ñu chichi añima ñu, ican cuví ley ñu.

¹⁵ Vatyí chihin cuhva iyó ñu, sañahá ñu vatyí añima ñu ñohó ley Nyoo. Cha chiñi tuñi ñu cuví cha ndaa cuenda ñu, vatyí suri maa ñu tuví iñi ñu tatu vaha o ña vaha cha nyacuví ñu.

¹⁶ Cha tyaq Nyoo tyiño chi ra Jesucristo vatyí coo quívi cusandaa ra cuatyí tandihí ñáyivi iyó siquí ñuhu ñáyivi cha cuenda tandihí tuhun xehe cha sacuví ñu. Tari cuhva catyí tuhun Nyoo cha cahín chihin ndo, tyicuan caa cusandaa ra cuatyí yo.

Ñu Israel nyicón ñu ley cha chahq Nyoo chi ra Moisés

¹⁷ Soco yoho catyún tyi ra Israel cuvún. Ta catyún tyi sacuvún cuhva catyí ley cha chahq Nyoo chí ra Moisés, ra cuví nuu chí ñu Israel quívi cuan. Ta cahnu sahún chuun tyi catyún tyi caá tuhun Nyoo añimon.

¹⁸ Ta chitón cuhva cuñí Nyoo ta ley cuan sañahá chí chuun cha nacachún cha vaha, catyún.

¹⁹ Ta vaha xaan sañahún ityi chí ñu cuaa, cuñí maun. Vaha xaan sacatón ñuhú chí ñu cuahan nu ñaa iñi, cuñí maun.

²⁰ Ta cuñí maun vatyí chitón saquehen ityun chí ñu cha ña chitó. Ta vatyí chitón tandihí cuií ley ta cha ndicha, chitón yoso caa sañahun chí ñu ña chitó, cuñí maun.

²¹ Tatu tyicuan caa yoho sañahún chí inga ñáyivi, ¿ñáá tuhun ña sañahún chí maun? Tatu suri maun catyún vatyí ña tahán chí suhu yo, ¿ñáá tuhun cha tyi maun suhún?

²² Tatu suri maun catyún vatyí ña tahán chí coo inga ñusihi chí noo rayíi, o inga rayíi chí noo ñaha síhi, ¿ñáá tuhun cha vatyí maun tyicuan caa sacuvún? Tatu tasi cuñún chí xitohyo, ¿ñáá tuhun cha suhún cha tyayíi cha iyó noo nyicú chí chichi vehe ñuhu?

²³ Cahnu sahún chuun vatyí chitón ley Nyoo, soco ticahan nuu chahún chí Nyoo cha cuenda cha ña sacuvún ley cuan.

²⁴ Yucuan chaha vatyí nu tutu tuhun Nyoo catyí chí tyehe caa: “Ñu cha ñima ñu Israel cuví, cahán ña vaha ñu siquí Nyoo cha catyí nyoho”, catyí chí.

²⁵ Ndicha vatyí cha sacuví ñu tuhun cha tahnya chíin ñi xiñi ndivun ta leun, cha saha ñu circuncidar chuun cuví cuan, tari noo seña cha sañahá vatyí ñáyivi chí Nyoo cuvún. Tuhun cuan tyinyeé chí chuun soco tatu quichahún tandihí ley cha chahq Nyoo

chí ra Moisés ñandihí. Soco tatu ña sacuvún cha catyí ley cuan, tari quívi cha ña sacuvún costumbre circuncisión cuví cuan.

²⁶ Soco tatu ñu cha ña sacuví tuhun cuan, ta sacuví ñu cuhva catyí ley Nyoo, cusaha Nyoo tari cha sacuví ñu costumbre circuncisión cuan, vasi ña sacuví ñu.

²⁷ Ra cha ña sacuví costumbre cuan, soco quichahá ra cuhva catyí ley, cusanatuví ra chí yoho cha ña quichahún, ta yoho, ra chitó ley ta ra sacuví costumbre circuncisión cuvún.

²⁸ Vatyí ñima cha cuenda vatyí ñu Israel cuví ndo ta chihin cuan ta cuví ndo ñáyivi chí Nyoo. Ta ni ñima cha cuenda cha sacuví ndo tuhun circuncisión.

²⁹ Vatyí ñáyivi nyaá ley Nyoo añima, ican ñu cuví ñu ñu Israel cha ndicha vaha. Tari quívi tyaq Tatyí li seña cuan añima ñu, ta ñima ñi ri ñu. Tatyí li Nyoo sacuví cuan, ñima ley cha nyaá nuu tutu. Ta ñáyivi ihya cucuvi ñu ñu vaha nuu Nyoo, ta ñima nuu ñáyivi ri.

3

¹ Tatu tyicuan caa, ¿ñáá cha tyinyeé chí yo cha cuví yo ñu Israel? ¿o atu tyinyeé chí chí yo cha sacuví yo tuhun circuncisión?

² Cuaha cuhva tyinyeé chí. Cha xihna ri, Nyoo chahq ra ley maa ra chí yo ñu Israel.

³ Soco yoso caa tatu yihí ñu Israel ta ña chinó iñi ñu cuhva catyí Nyoo, ¿atu cha catyí ñu cuan ta ma sacuví ca Nyoo cuhva catyí ra?

⁴ ¡Ñima! Soco na saha yo cuenda vatyí Nyoo ndicha ra. Sacuvi ra tandihí cuhva cha catyí ra. Vasi tandihí ñáyivi cahán ñu cuendu. Vatyí nu tutu Nyoo catyí chí tuhun ra tyehe caa:

Sutu Mañi yuhu, cunyehe ñáyivi vatyí ñahri cuendu cahún.

Ta cunyehe vaha ñu chuun vatyí ndicha cha cahún.

⁵ Chitó yo vatyí vaha ca quetuví noo cha ndií tatu nyaá noo cha mecu xiin. Ndií xaan ca nyehe cuan. Cha ndicha cuví cuan. Soco catyí ñáyivi vatyí tyicuan caa tucu maa Nyoo chihin yo, ndií xaan ca natuvi ra tatu yoó ta cunyacuvi ca yo cha quiñi caa. Sacahnú yo chí ra cuví cuan, catyí ñu. Tyicuan ta ña tahán chí tachi tuñi ra chí yo, catyí ñu. Soco tatu tachi tuñi ra chí yo, ña vaha ra vatyí yoó sacahnú yo chí ra, catyí ñu.

⁶ Ña vaha cuhva cahán ñu, vatyí tyehe ta ña vaha Nyoo ma cuví tachi tuñi ra chí yo. Soco chitó yo tyi tahán chí tachi tuñi ra chí yo cha cuenda cuatyí yo.

⁷ Tatu nyehé yo tyi vaha Nyoo chihin cuatyí sacuví ñáyivi, ¿atu tahán chí tachi

tuñi ra chi ñu? Catyí ñu tyi ña tahán chi, soco ña ndicha.

⁸ Tyehe ta ndicha cha cahán ñu cuan, vaha taxín ca sacuví yo maa maa ri cha quiñi caa tacuhva nyehe ñáyivi tyi Nyoo vaha ra. Yihí ñu catyí ñu tyi tyicuan caa sañahá ndi. Ta cutachi tuñi Nyoo chi ñu chaha cha catyí tyi cahán ñu cuendu síqui ndi.

Tandihí yo ta iyó cuatyí yo

⁹ Ta yoso caa ¿atu vaha ca yoó ñu Israel ta ñima ca inga ñáyivi? ¡Ñima! Vatyí cha yaha sañahi chi ndo vatyí iyó cuatyí tandihí yo. An cuví ri yo ñu Israel, an cuví ri yo ñu cha ñima ñu Israel cuví, soco iyó maa cuatyí yo.

¹⁰ Tyicuan caa catyí nu tutu Nyoo, nu catyí chi tyehe caa: Yori maa ñáyivi vaha iyó, cha ni ña noo maa.

¹¹ Yori ñu cutuñi iñi tuhun Nyoo.

Yori maa nanducú chi Nyoo.

¹² Tandihí ñu sandoó ñu chi Nyoo, ta tandihí ñu ta sacunaá ñu chi ñu.

Yori maa ñu sacuví cha vaha.

Cha ni ña noo maa.

¹³ Tari noo ñaña ndiyi cha tacohó yuhu cuví sucun ñu.

Vatyí quiñi xaan cahán ñu.

Ta cahán ñu cuendu. Tari cha venenu coo yihí yuhu ñu vatyí cahán uhvi ñu chi tahan ñu.

¹⁴ Maa maa ri ca maa cha quiñi caa cahán ñu.

¹⁵ Yatyí xaan ñu cha cacahñi ñu chi tahan ñu.

¹⁶ Chahá xaan ñu tundoho ta tucuihya iñi chi ñáyivi chihin cuhva iyó ñu.

¹⁷ Ta ña chitó ñu yoso caa cuhva coo taxi ri ñu chihin Nyoo, ni chihin tahan ñu.

¹⁸ Ni ña chicá iñi ñu tatu tachi tuñi Nyoo chi ñu noo quiñi, catyí chi nu tutu Nyoo.

¹⁹ Chitó yo vatyí tandihí cha catyí ley chahnu cha quehen cuenda ra Moisés, catyí chi cha cuenda ñu nyicón ley cuan, tacuhva vatyí ma cuví catyí ñu tyi ñahri cuatyí ñu. Soco coto ñu vatyí cutahan chi cutachi tuñi Nyoo chi ñu vatyí iyó cuatyí ñu. Ta tyicuan caa tucu tandihí ñáyivi iyó síqui ñuhu ñáyivi.

²⁰ Ni minoo ñáyivi ma cuví cuvaha ñu nuu Nyoo cha cuenda tyi sacuví ñu cuhva catyí ley. Soco ley cuan nyaá chi cha cuenda vatyí sacotó chi chi yo tyi iyó cuatyí yo.

Cha cuenda cha chinó iñi yo chi Nyoo ta cuvaha yo nuu ra

²¹ Soco vityin sandoó yo inchiyo xiin ley cuan ta cua nyehe yo vatyí iyó noo cuhva cuvaha yo nuu Nyoo. Suri maa Nyoo sañahá ra chi yo nu tutu tuhun ra cha tyaá profeta ta cha naha. Tatu sacuahá yo yucuan, coto yo noo cha ndicha.

²² Vatyí cha cuenda cha chinó iñi yo chi ra Jesucristo ta cuvaha yo nuu ra, ta sahá ra tuhun tyi ñahri cuatyí yo. Ta ña cachí ra chi yo tatu ñu Israel cuví yo o ñima.

²³ Tandihí ri ñáyivi sacuví ñu cuatyí, ta cañi xaan nyaá ñu chihin cuhva cuñi Nyoo, ta cha tyaquí Nyoo ma cuví cunyaa chihin ñu.

²⁴ Soco cha cuenda cha vaha ñáyivi cuví Nyoo chihin yo, chahá maa ra cha cuvaha yo nuu ra, ta ña tñin cuenda ca ra cuatyí yo. Vatyí chahnya ra Cristo Jesús cuatyí yo.

²⁵ Nyoo saquichí ra chi ra Cristo vatyí cati ñiñi ra ta cuví ra nu cruzi cha catyí cuatyí yo. Ta vityin cuví saha Nyoo tucahnu iñi chi yo tatu chinó iñi yo chi ra Cristo. Ta cuví chi tyehe caa, tacuhva nyehe ñáyivi tyi Nyoo vaha ra. Ta tyembu chahnu, Nyoo ña tñin cuenda ra cuatyí ñáyivi cha cuenda vatyí cuchaa chi noo quiñi cha cuquichi ra Cristo ta sanaa ra cuatyí ñu.

²⁶ Ta tyicuan caa cuví tacuhva vatyí nyehe ñáyivi vatyí Nyoo tyicuan ri vaha ra, ta sahá ra tuhun tyi vaha tandihí ñu chinó iñi chi ra Jesús.

²⁷ ¿Atu cuví sacahnu yo chi yo vityin? Ma cuví. ¿Ñáá tuhun? Cha cuenda vatyí ma cuví catyí yo vatyí sacuví yo cha catyí ley, ta yucuan chaha vaha yo nuu Nyoo. Vatyí cha cuenda cha chinó ri iñi yo chi ra ta cuvaha yo nuu ra.

²⁸ Cha chitó vaha yo vityin vatyí Nyoo sacuvahá ra chi yo nuu ra chihin cha chinó iñi yo chi ra, ta ñima chihin cha sacuví yo cha catyí ley ta cuvaha yo nuu ra.

²⁹ ¿Atu Nyoo cuenda ñu Israel ri cuví ra? ¿Atu ñima suri ra cuví Nyoo ñu cha ñima ñu Israel cuví? Suri Nyoo tucu ñu cuan cuví chi ra.

³⁰ Vatyí noo tuhun ri maa ra iyó. Ta ican ra sacuvahá ra chi yo nuu ra cha cuenda cha chinó iñi yo chi ra. Cuví ri yo ñu sacuví tuhun circuncisión cuan, o cuví ri yo ñu ña sacuví.

³¹ Tatu tyicuan caa, ¿atu ña vaha ca ley chahnu cuan? ¡Ñima cha ña vaha ca! Vaha. Soco vityin chihin fuerza maa ra Cristo sañahá yo vatyí ndi maa cha catyí ley cuan ta ndicha.

4

Cuhva chiyo ra Abraham sañahá chi chi yo yoso caa cuvaha yo nuu Nyoo

¹ ¿Ñáá cha catyí yo cha cuenda ra Abraham sutu chahnu yo? ¿Ñáá cuenda catyí Nyoo vatyí vaha ra?

² Tyehe ta cuvahá ra nuu Nyoo cha cuenda cha sacuví ra cha vaha, yucuan ndicha, cuví sacahnu ra chi ra, soco ñima nuu Nyoo.

³ Vatyí çñáá catyí nu tutu tuhun Nyoo? Catyí chi vatyí ra Abraham chinó iñi ra chi Nyoo, ta cha cuenda cha chinó iñi ra chi Nyoo, Nyoo sahá ra tuhun tyi vaha ra.

⁴ Vaha, vityin cuacuhve noo cuhva chi ndo: Tatu minoo ra sacuví ra noo tyiño, yahvi cha quehén ra ñima cha ñihi caha ra cuví, soco yahvi tyiño sahá ra, ican cuví.

⁵ Soco tatu noo ra cha ña saha tyiño ta ñihi ra cha ñihi ra, noo cha ñihi caha ra cuví. Ta tyicuan caa cuví chihin noo ra cha ña nducu cuhva cacu cha cuenda cha sacuví ra ley, soco chinó iñi ra vatyí Nyoo sahá ra tucahnu iñi chi ñu iyó cuatyí, Nyoo cusaha ra tuhun tyi vaha ra cha cuenda cha chinó iñi ra chi ra.

⁶ Ra David cahán ra tuhun tusii iñi cha iyó chi ñáyivi cha sahá Nyoo tuhun vatyí vaha ta ña tiín cuenda ra cuatyí cha sacuví ñu.

⁷ Tyehe caa catyí ra David: Ñáyivi cha sahá Nyoo tucahnu iñi cuatyí, sii xaan cuñí ñu, vatyí Nyoo ña tiín cuenda ra cuatyí ñu.

⁸ Sii xaan cuñí ñu ña tiín cuenda Nyoo cuatyí.

⁹ ¿Atu cha cuenda ri ñu sacuví tuhun cha tahnya ñii cuví tusii iñi ihya, o cuví tucu chi cha cuenda ñu ña sacuví cuan? Cha yahá sañahi chi ndo vatyí Nyoo sahá ra tuhun tyi vaha ra Abraham cha cuenda cha chinó iñi ra chi ra.

¹⁰ Soco ¿ama sahá ra tuhun tyi vaha ra? ¿Atu cha ni cumañi ca sacuví ra Abraham tuhun circuncisión cuan, o cha yahá? Ñima nya cha yahá, soco cha ni cumañi ca.

¹¹ Yahá cuan ta sacuví ra Abraham tuhun cuan, tari noo seña ri o sellu vatyí Nyoo cha yahá sahá ra tuhun tyi vaha ra cha cuenda cha chinó iñi ra chi ra. Ta cha cuenda ihya cuví ra Abraham tari noo sutu tandihi yo ñu chinó iñi Nyoo vasi ña sacuví yo tuhun circuncisión. Ta tyicuan caa, Nyoo sahá ra tuhun vatyí vaha yo.

¹² Ndicha vatyí ra Abraham cuví tucu ra sutu ñu casacuví tuhun cuan, soco tatu chinó tucu iñi ñu chi Nyoo tari chinó iñi tucu maa ra Abraham sutu chahnu yo, quívi cha ta sacuví ca ra tuhun cuan.

Chihin cha chinó iñi yo ta ñihi yo cha chahá Nyoo chi yo

¹³ Vatyí Nyoo catyí ra chi ra Abraham ta chi sehe ra vatyí cuhva ra cha cunyaca ñaha ñu ñuhu ñáyivi chihin ra. Soco savahá Nyoo promesa cuan, ñima cha cuenda vatyí ra Abraham sacuví ra cha catyí ley, soco cha cuenda vatyí chinó iñi ra chi Nyoo, ta Nyoo sahá ra tuhun vatyí vaha ra.

¹⁴ Tyehe ta maa maa ri ñu cha sacuví cuhva catyí ley, cuñihi ñu noo cha cucuhva Nyoo, ñahri yahvi nyaá cha chinó iñi yo chi

Nyoo, ta ni ñahri yahvi nyaá cha catyí ra tyi cuhva ra chiyo.

¹⁵ Vatyí ley cuan sañahá chi vatyí tahán chi tachi tuñi Nyoo chi yo tatu ña sacuví yo cuhva catyí chi. Soco tyehe ta ñahri ley iyó, ñahri cuatyí yo coo.

¹⁶ Yucuan chaha cuñihi yo promesa Nyoo cha cuenda cha chinó iñi yo chi ra, tacuhva vatyí cuví chi noo tumañi iñi cha chahá ra chi tandihi yo cha cuví yo ñáyivi chi ra Abraham. Ñima ñu chinó ri iñi chi Nyoo ta quichahá ley cuan cuñihi, soco cuñihi tucu ñu cha ña ita iñi ley, soco chi Nyoo ri chinó iñi ñu tari chinó iñi ra Abraham. Ican ra cuví sutu tandihi ñáyivi cha chinó iñi chi Nyoo.

¹⁷ Vatyí tari catyí Nyoo nu tutu ra tyehe caa: “¿Yoho cucuvun tari noo sutu cuaha xaan ñáyivi?””, coo siqui ñuhu ñáyivi”, catyí ra chi ra Abraham. Ta cha catyí ra tyicuan caa, cuñi chi catyí vatyí cuví yo sehe ra Abraham nuu Nyoo. Chinó iñi ra Abraham chi Nyoo, vatyí Nyoo sanandotó ra ndiyi, ta chihin tuhun cahán ra sacóo ra cha cumañi ca coo.

¹⁸ Ra Abraham chinó iñi ra chi Nyoo vasi ma cuví ñihi ra promesa cuan tyaa maa ra cuhva, vatyí cha chahnu xaan ra. Soco yihí iñi ra cha cuñihi ra. Ta tyicuan caa, ñihi ra promesa Nyoo ta cuví ra sutu cuaha ñáyivi, tari cuhva catyí Nyoo chi ra: “Tyehe caa cucucuaaha ñáyivi chuun”, catyí ra chi ra.

¹⁹ Ra Abraham ña sandihí ra cha chinó iñi ra, vasi cha noo cientu cuiya ra ta tuví iñi ra vatyí cha cuñi cuví ra. Tari maa ra ta tari cu Sara ñasihí ra, ma cuví ca coo sehe ñu, tyi cha chahnu xaan ñu.

²⁰ Soco ña ndu uvi iñi ra cha cuñihi ra cha catyí Nyoo tyi cuhva ra chi ra. Soco chinó iñi ra chihin cha ñii iñi ra. Ta yihí ca iñi ra chi Nyoo. Ta sacahnú ra chi ra,

²¹ cha cuenda vatyí chitó vaha ra vatyí Nyoo iyó tunyee iñi chi ra cha cusacuví ra cha catyí ra chi ra.

²² Yucuan chaha Nyoo sahá ra tuhun tyi vaha ra cha cuenda cha chinó iñi ra chi ra.

²³ Sahá Nyoo tuhun vatyí vaha ra Abraham chaha cha chinó iñi ra chi ra. Ña chicunyaá nuu tutu vatyí noo ri ra Abraham cuvaha ra,

²⁴ soco chicunyaá tucu nuu tutu cha cuenda yoó. Vatyí sahá Nyoo tuhun tyi vaha tucu yo vatyí chinó iñi yo chi ra, vatyí ican ra sanandotó chi ra Jesús, Sutu Mañi yo.

²⁵ Ta maa ra chahá cuenda chi ra Jesús tyi cuví ra cha cuenda cuatyí yo, ta nandoto ra tacuhva vatyí cuví cuvaha yo nuu ra.

5

Vityin cha nicoo vaha yo chihin Nyoo, cuaha

cha vaha cucuhva ra chi yo

¹ Ta cha yaha nduvaha añima yo nuu Nyoo cha cuenda cha chinó iñi yo chi ra, nicoo vaha yo chihin ra cha cuenda Sutu Mañi yo Jesucristo.

² Vatyí cha cuenda ra Cristo ñihí yo cha vaha Nyoo cha cuenda cha chinó iñi yo chi ra. Yucuan chaha ñi iñi yo ta sii cuñí yo, ta yihí vaha iñi yo vatyí cucuhva ra cha cucahnu cuví yo chihin ra.

³ Ta ñima yucuan ri cusii cuñí yo, tahán tucu chí cusii cuñí yo quiví nyehé yo tindoho. Vatyí chitó yo vatyí cha nyehé yo tindoho cuan cutuhva ca yo coo cha cama iñi yo.

⁴ Ta tatu chihin cha cama iñi yo, yaha yo tindoho, quita vaha yo nuu Nyoo. Ta yucuan ta chitó vaha yo tyi cuñihi yo ndii maa cha cucuhva ra chi yo.

⁵ Tatu yihí iñi yo chí maa ra, ma cucahan nuu yo nyehé yo chí ra, vatyí cuñi xaan ra chí yo cha cuenda Tatyí Ii ra cha chaha ra cunyaa añima yo.

⁶ Vatyí quiví cha ña ñihí ca yo yoso caa sacuví yo chihin cha cuaha cuatyí yo, quiví cuan quichí ra Cristo, quichí cúvi ra cha cuenda yo ñu iyó cuatyí.

⁷ Chitó yo vatyí yori caña iñi cúvi tyiño nuu noo ñáyiví. Vasi xityí ri caña iñi ñu cuhva ñu ñáyiví ñu cha cuenda noo ñu vaha xaan.

⁸ Soco yucuan cuví nu sañaha Nyoo vatyí cuñí ra chí yo, vatyí quichí cúvi ra Cristo cha cuenda yo vasi iyó xaan cuatyí yo.

⁹ Ta vityin cha cha yaha cuvaha yo nuu Nyoo cuenda cha chihí ra Cristo, yucuan chaha chitó vaha yo tyi ma cuhun ca yo anyaya nu cutachí tuñi Nyoo chí ñáyiví ña chinó iñi chí ra.

¹⁰ Quiví cuan xaan cuví iñi yo chí Nyoo, soco sanicoo vaha ra chí yo chihin ra cha cuenda cha chihí Sehe ra. Yucuan chaha chitó vaha yo tyi cusacacu ndihí ra chí yo vatyí iyó ñáyiví ra Cristo añima yo vityin cha iyó vaha yo chihin ra.

¹¹ Ta ñima ihya ri, soco cusii tucu cuñí yo chihin Nyoo cha cuenda Sutu Mañi yo Jesucristo, vatyí cha cuenda ra nicoo vaha yo chihin Nyoo.

Ra Adán ta ra Cristo

¹² Cha cuenda noo rayii quihví cuatyí siqui ñuhu ñáyiví ta chicoo tuhun chihí. Ta tuhun chihí cuan chicoo chí siqui tandihí ñáyiví vatyí tandihí ñu sacuví ñu cuatyí cha cuenda ra Adán.

¹³ Nyata ni cumañi ca cuhva Nyoo ley chí ra Moisés ta cha iyó cuatyí siqui ñuhu ñáyiví, soco ña tñn Nyoo cuenda cuatyí ñáyiví ta ni cumañi ca cuhva ra ley cuan.

¹⁴ Soco nyacua nya quiví ra Adán ta nyacua nya quiví ra Moisés, chinyaca ñaha

tuhun chihí chí ñu cha sacuví cuatyí, vasi ñima tahan cuatyí ra Adán cuví, cha ña quichaha ra chí Nyoo. Ta ra Adán cuví ra tari noo xiñahñu noo ra cha cua quichi.

¹⁵ Soco cuatyí ra Adán ña ndiquí tahan chí chihin tumañi iñi cha chaha Nyoo chí yo. Vatyí cha cuenda cuatyí noo rayii cuan, cuaha xaan ñáyiví chihí. Soco sacacú Nyoo chí yo cha caha ri, cha cuenda noo ri rayii ta ican ra ihya cuví ra Jesucristo. Ta cahnú xaan ca cuví cuan. Ta cha cuenda cha vaha chí cuaha ñáyiví cuví.

¹⁶ Cuatyí noo ri rayii ra Adán cuan, ma cuví ndiquí tahan chí chihin cha sacacú Nyoo chí yo. Vatyí cha cuenda cuatyí noo ri ra cuan, Nyoo tachí tuñi ra chí ñáyiví. Soco vityin chihin cha ñahri tyiyahví yo, Nyoo sacacú ra chí yo ta sahá ra tuhun tyi vaha yo nuu ra, vasi cuaha xaan cuatyí sacuví yo.

¹⁷ Ndicha vatyí quichaha nyaca ñaha tuhun chihí siqui ñuhu ñáyiví cha cuenda cuatyí noo ri rayii. Ta cha tyicuan caa chitó yo vatyí cahnú ca cuví cha vaha cha sacuví nonga ra, ra Jesucristo. Vatyí tandihí ñu cha ñihí cha vaha cha chahá Nyoo, cha cuvaha ñu nuu ra, ta iyó ñu ñáyiví chaa chihin tunyee iñi ra Jesucristo.

¹⁸ Tari cha catyí cuatyí ra Adán ta tachí tuñi Nyoo chí tandihí ñáyiví iyó siqui ñuhu ñáyiví, tyicuan caa tucu cha cuenda cha vaha cha sacuví ra Jesucristo, Nyoo saha ra tuhun tyi vaha ñáyiví nuu ra ta chahá ra noo ñáyiví vaha coo tandihí ñu.

¹⁹ O cuñí chí catyí tyehé caa: Cha cuenda cha ña quichaha ra Adán cuan nu cahán Nyoo, cuaha xaan ñu chicoo cuatyí ñu. Ta suri tyicuan caa tucu cha catyí cha quichaha ra Cristo nu cahán Nyoo, cuaha xaan ñu cucuvaha ñu nuu Nyoo.

²⁰ Vatyí Nyoo chaha cuenda ra ley cuan chí ra Moisés tacuhva nacoto ñáyiví tyi iyó cuatyí ñu. Ta vasi quetuví xaan cuatyí yo cha cuenda ley cuan, soco Nyoo cahnú ca tucahnú iñi iyó chí ra chihin yo vatyí cuñi xaan ca ra chí yo.

²¹ Tari chinyaca ñaha cuatyí chí yo ta chaha chí tuhun chihí chí yo, tyicuan caa tucu nyacá ñaha tumañi iñi Nyoo chí yo vityin ta sacuvaha ra chí yo nuu ra vatyí coo yo noo ñáyiví cha ma naa ca maa cha cuenda Sutu Mañi yo Jesucristo.

6

Ma sacuví ca yo cuatyí soco sacuví yo cuhva catyí ra Cristo

¹ ¿Yoso caa catyí yo vityin? ¿Atu cusacuví ca yo cuatyí tacuhva vatyí sañaha Nyoo vatyí cuaha xaan tucahnú iñi iyó chí ra?

² Ma sacuví ca yo. Yoó cha yaha ndú uvi iñi yo cuatyí yo. Tari quiví chihí cuatyí yo

cuví cuan. Ta ζyoso caa cuví sacuvi ca yo vityin? Ma cuví ca.

³ ζAtu ña chitó nyoho vatyi cha ndu ñin ri yo chihin ra Cristo Jesús cha cuenda cha condutyá yo? Tari quívi chihí yo chihin ra cuví cuan.

⁴ Vatyi cha cuenda cha condutyá yo, tari quívi cha quihví yo chichi ñuhú ñin ri chihin ra Cristo quívi chihí ra cuví cuan. Ta tari nandotó ra Cristo chihin cha ndicha ñuhu Sutu yo Nyoo, tyicuan caa tucu maa yo, tacuhva vatyi coo yo noo ñayiví chaa chihin ra.

⁵ Ta ñin ri coño ñuhu nanduví yo chihin ra, tari quívi chihí yo ñin ri chihin ra cuví cuan, ta cha tyicuan caa, cunandoto tucu yo tari nandotó ra.

⁶ Ta chitó yo vatyi tandihí cuhva chiyo yo ta ityi chata ca, cha yaha chihí chi nu cruzi chihin ra Cristo, tacuhva vatyi coño ñuhu cuatyí yo ma cuví ca cunyaca ñaha chi chi yo.

⁷ Vatyi ñu cha yahá chihí, ma cuví ca sacuvi ñu cuatyí.

⁸ Ta tatu cha yahá chihí yo chihin ra Cristo, chinó ñi yo vatyi cucoo tucu yo chihin ra.

⁹ Ta chitó yo vatyi cha yahá chihí ra Cristo, noo ri chaha nandotó ra, ta ma cúvi ca ra. Ñahri ca tunyee ñi yo chí tuhun chihí cha cunyaca ñaha ca chí chi ra.

¹⁰ Yahá cha chihí ra Cristo cha catyi cuatyí ñáyiví, nandotó ra cha ma cúvi ca maa ra. Ta vityin iyó ra cha cuenda maa Nyoo.

¹¹ Ta tyicuan caa tucu maa yo, ma sacuvi ca yo cuatyí. Saha yo tuhun tyi cha yahá chihí yo cha cuenda cuatyí cuan. Soco coo yo cuhva cuñí Nyoo cha cuenda cha ñin ri cuví yo chihin ra Cristo Jesús Sutu Mañi yo.

¹² Yucuan chaha yoó ma cuhva yo ityi cha cunyaca ñaha ca cuatyí chí coño ñuhu yo. Ma cuhva yo ityi chí coño ñuhu yo cha saniñi chí chí yo cha sacuví yo noo cha ña vaha cha cuñi chí.

¹³ Ma cuhva yo ityi chí coño ñuhu yo cha sacuví chí cha quíni caa. Soco cuhva cuenda yo chí yo chí Nyoo, tari noo ñáyiví cha chihí ta nandotó. Cuhva cuenda yo coño ñuhu yo chí Nyoo tacuhva vatyi sacuvi yo cha vaha.

¹⁴ Vatyi cuatyí yo ma cuví ca chasaha chí chí yo. Vatyi ley cha tyag ra Moisés, ña nyacá ñaha ca chí chí yo, soco cha cacu añima yo ta iyó yo cha cuenda tumañi ñi cha chahá Nyoo chí yo.

Cuví yo tari noo musu cha sacuví cha vaha

¹⁵ Iyó yo cha cuenda tumañi ñi cuan, ta vityin ña nyacá ñaha ca ley chí yo. ζTa tatu ña nyaca ñaha ca ley chí yo, atu tahán chí sacuví ca yo cuatyí? Ña tahán chí.

¹⁶ Nyoho chitó vaha ndo vatyi tatu cuví ndo musu noo ra, tahán chí sacuví ndo cha catyí ra cuan. Ta tyicuan caa cuví yo musu ra cha tuhvá yo quichahá chí. Yucuan chaha tatu quichahá yo cha cuñi cuatyí cha sacuvi yo, tari noo chitoho yo cuví cuatyí cuan, vatyi quichahá yo chí cuan. Ta cunaa yo chihin cuan. Soco tatu quichahá yo chí Nyoo, cusaha ra tuhun tyi vaha yo.

¹⁷ Soco tyahvi nyoo chí ña Nyoo, tyi nyoho nu quichi chí cuví ndo noo musu chí cuatyí vatyi quichahá ndo chí cuan. Soco vityin chihin cha ñi ñi ndo quichahá ndo tuhun Nyoo cha sañahá ñu chí ndo.

¹⁸ Cha yahá cundaq cuatyí ndo, ta vityin ña nyacá ñaha ca chí chí ndo. Ta vityin cuví ndo noo musu cha cua sacuvi cha vaha.

¹⁹ Cahín noo cuhva cha ña yí ri chihin ndo vatyi ta cutuñi vaha ca ñi ndo tuhun Nyoo. Quívi cuan chahá cuenda ndo coño ñuhu ndo chí cha quíni caa ta cha ña vaha vatyi sacuví ndo cha ña vaha. Vityin ñacuhva cuenda ndo coño ñuhu ndo chí Nyoo tacuhva vatyi coo ndo noo ñayiví cachi, ta maa maa ri cha vaha sacuvi ndo nuu ra.

²⁰ Quívi cuví ndo musu cha quíni caa, ña cuví sacuví ndo cha vaha.

²¹ Soco ζñáá cha ñihí ndo chihin cuan? Maa ri ticahan nuu chahá cuan chí ndo. Ta ña tuví ñi ndo. Maa ri tuhun chíhi ta anyaya nyisó cuan.

²² Soco vityin ña nyacá ñaha ca cuatyí chí ndo. Ta vityin cha sacuví ndo tyiño nuu Nyoo. Ta ihya ndicha tyinyee chí chí ndo vatyi chihin ihya cuví coo ndo noo ñáyiví cachi. Ta nu ndihí tuhun tyicuan ri maa cucoo ndo chihin Nyoo.

²³ Cha sacuví yo cuatyí, ican cuan chahá tuhun chíhi chí yo. Soco tumañi ñi cha chahá Nyoo chí yo, ican cuan cuví ñáyiví cha ma naa ca maa. Ta ican cuan chahá ra ta ñahri tyiyahvi yo, cha cuenda cha ñin ri cuví yo chihin ra Cristo Jesús, Sutu Mañi yo.

7

Ña nyacá ñaha ca ley chahnu chí ñu yihí cuenda ra Cristo

¹ Yañi, nyoho ñu chitó ley cuví ndo, chitó ndo vatyi ley nyacá ñaha chí chí noo ñáyiví cha ní ri ca cha iyó ñu.

²⁻³ Ta cuñun, noo ñaha tandaha, catyí ley vatyi coo ña chihin yí ña nyacua nya cúvi ra. Ta tatu iyó ña chihin inga rayi cha ní ri cha iyó yí ña, chicoo cuatyí ña nuu Nyoo. Soco tatu cha yahá chíhi yí ña, ña nyacá ñaha ca ley cuenda ñu tandaha chí ña, ta cuví tandaha ña chihin inga ra, ta ma coo cuatyí ña nuu Nyoo.

⁴ Ta tyicuan caa tucu nyoho yañi. Cha chíhi ndo cha cuenda ley chahnu ta cuví

ndo ñu cuenda ra Cristo vatyi ican ra cuví yíi ndo vityin. Ta ican ra cuví ra cha nandoto, tacuhva vatyi cuví cotyíño Nyoo chí yo ta sacuvi yo cha vaha.

⁵ Quiví chiyó yo cuhva cuñí coño ñuhu yo, ley chahnu cha tyaq ra Moisés, tacuhva sanaquiquí ri chí chí yo cha sacuvi yo cha quiñi caa, vatyi catyí chí tyi ma sacuvi yo. Soco sacuví yo, ta yucuan cuví cha chaha tuhun chíhi chí añima yo.

⁶ Soco vityin ña nyacá ñaha ca ley chahnu cuan chí yo, vatyi cha yahá chíhi cha quiñi caa yo chíhin ra Cristo. Ta vityin cuví sacuvi yo tyiño nuu Nyoo vatyi iyó yo ñayiví chaa cha chahá Tatyí Ii Nyoo chí yo, ta ña sacuví ca yo tari sacuví yo quiví nyicón xaan yo ley chahnu cuan.

Ley Nyoo, ican sañahá vatyi iyó cuatyí yo

⁷ Ta vityin yoso caa, ¿atu ña vaha ley cuan? Ñima cha ña vaha. Vaha. Soco tyehe ta ña tuví ley cuan, ma cote ñáá cha cuví cuatyí. Ni ma cote tyi ña vaha cha quichi cuví iñi cha chíhi inga ñáyiví, tyehe ta ña catyí ley cuan vatyi ña vaha.

⁸ Tyehe ta ñahri ley cuan, ma cote ñáá cha cuví cuatyí, ta ma cuñí xain sacuvi, soco quiví cha chité ñáá cha cuví cuatyí, yucuan quiví quichí cuví xaan iñi sacuvi, vatyi naquiquí cha quiñi caa cha iyó chí. Soco tyehe ta ñahri ley, ma coto yo tyi iyó cuatyí.

⁹ Ta quiví cha ña chité ñáá tuhun cahán ley cha chahá Nyoo chí ra Moisés, chica iñi vatyi ñahri cuatyí iyó nuu Nyoo. Soco quiví chité ley cuan, ta chité vatyi tahán chí cunai nuu Nyoo vatyi iyó cuatyí.

¹⁰ Catyí ley cuan tyi tatu quichahí chí chí, cucoi tyicuan ri maa. Soco cha nuu cha ñihi tahví añime chíhin ley cuan, cunaa ndihi nuu Nyoo.

¹¹ Ta cuatyí cha iyó chíhi, sandaví ñaha chí chíhi vatyi chotyíño chí ley chahnu cuan tacuhva vatyi tahán chí cunai nuu Nyoo, vatyi ña quichahí nu cahán ley cuan.

¹² Ley cha chahá Nyoo chí ra Moisés, vaha xaan, vatyi tuhun cha chahá maa Nyoo cuví, ta tandihí cha catyí ra vatyi sacuvi yo, vaha xaan ta cuñi xaan.

¹³ Ta ley vaha cuan, ¿atu ican cuan sativí chíhi? Ñima. Cuatyí cha sacuví, ican sativí chíhi, yucuan chaha tahán chí cunai nuu Nyoo. Vatyi ley vaha cuan, ican cuví cha sañahá chíhi vatyi cuatyí cuví cha sacuví. Ta cha tyicuan caa, sañahá ley vatyi quiñi xaan caa cha sacuví yo cuatyí.

¹⁴ Ta chitó yo vatyi ley cuan, Nyoo chaha. Ta ñahri cuatyí ley cuan. Soco mai iyó cuatyí vatyi sacuví cha quiñi caa ta nyacá ñaha cuatyí cuan chíhi.

¹⁵ Ña cutuñí iñi ñáá cha tahin. Vatyi cuñí sacuvi cha vaha, ta ña cuví sacuvi. Ta cha

ña vaha cha ña cuñí sacuvi, ican cuan sacuví.

¹⁶ Cuñí xain sacuvi cha vaha, soco ña cuví sacuvi, ta cha tyicuan caa tiin cuenda vatyi ley chahnu Nyoo, vaha chí.

¹⁷ Ñima ca mai sacuví cha ña vaha, soco cuatyí cha iyó chíhi, ican cuan sacuví cha ña vaha.

¹⁸ Vatyi chité vatyi iyó cuatyí cha cuenda coño ñuhi. Yucuan chaha ñahri cha vaha sacuví, vatyi quichí cuví iñi sacuvi cha vaha, soco ña cuví.

¹⁹ Cuñí sacuvi cha vaha, soco ña sacuví ta sañihí que sacuvi cha ña vaha.

²⁰ Ta tatu sacuví cha ña cuñí sacuvi, ñima ca mai sacuví, soco cuatyí cha iyó chíhi, ican cuan sacuví.

²¹ Ta tyehe caa iyó noo cha tahin, tatu cuñí sacuvi cha vaha, maa ri cha ña vaha sacuví.

²² Vatyi chíhi añime tahán xaan iñi ley Nyoo.

²³ Soco iyó inga ley chíhi coño ñuhi, ta ña tahán iñi chí cuhva cha tahán iñi añime. Ta chahá chí cha cunyaca ñaha cuatyí cha iyó chíhi coño ñuhi chíhi.

²⁴ ¡Ndahví yuhu ra ndahví! ¿Yóo ra cusacacu chí tacuhva ma cunai nuu Nyoo chíhin cuhva ña vaha cha nyacuví coño ñuhi?

²⁵ Noo tuhun ri maa Nyoo sacacú ra chíhi cha cuenda ra Jesucristo. ¡Tyahví nyoo chí Nyoo cha cuenda cuan! Ta vityin nyehí vatyi chíhin añime cuñí sacuví ley Nyoo, soco coño ñuhi cuñí chí sacuví chí ley cuatyí.

8

Tatyí Ii Nyoo tyinyéé chí chí yo ta cuví coo yo noo ñayiví chaa

¹ Soco vityin, Nyoo ma tachi tuñi ca ra chí ñu ndú in ri chíhin ra Cristo Jesús, ta ña iyó ca ñu cuhva cuñí coño ñuhu ñu, soco iyó ñu cuhva cuñí Tatyí Ii ra.

² Ta tyicuan caa tucu yuhu, Tatyí Ii Nyoo nyacá ñaha chíhi vityin vatyi ndachí chí chíhi, ta chahá chí noo ñayiví chaa coi cha cuenda cha in ri cuví chíhin ra Cristo Jesús. Ta vityin ña nyacá ñaha ca ley cuatyí ta tuhun chíhi chíhi.

³ Nyoo sacuví ra noo cha ña cuví sacuvi ley cha quehen cuenda ra Moisés, vatyi ña cuví chasaha chí coño ñuhu cuatyí yo cha nyacá ñaha chí yo. Yucuan chaha Nyoo saquichí ra chí Sehe ra. Quichí ra chíhin noo coño ñuhu tari maa yo, ta chíhi ra cha cuenda cuatyí yo, ta sandihí ra tuhun cha nyacá ñaha cuatyí chí yo.

⁴ Sacuví Nyoo tyehe caa tacuhva cuví sacuvi yo cuhva catyí ley ra, vatyi ñima ca

cuhva cuñí coño ñuhu yo iyó yo, soco iyó yo cuhva cuñí Tatyí Ii Nyoo.

⁵ Vatyí ñu iyó cuhva cuñí coño ñuhu, cuhva cuñí chí chicá xiñi ñu, soco ñu iyó cuhva cuñí Tatyí Ii Nyoo, cuhva cuñí Tatyí Ii Nyoo chicá xiñi ñu.

⁶ Ta ñu chicá xaan xiñi maa maa ri tuhun cha cuñí coño ñuhu ñu, cunaa ñu nuu Nyoo. Soco ñu chicá xiñi cuhva cuñí Tatyí Ii. Iyó cha taxi ri añima ñu ta cucoo ñu ñáyivi tyicuan ri maa chihin Nyoo.

⁷ Ñu cha maa maa ri cuhva cuñí coño ñuhu chicá xiñi, ñu xaan iñi chí Nyoo cuví ñu, vatyí ni ña cuñí ñu ta ni ña cuví sacuví ñu cha catyí ley ra.

⁸ Yucuan chaha ñu iyó cuhva cuñí coño ñuhu, ña cuví sacuví ñu cuhva tahán iñi Nyoo.

⁹ Soco nyoho ña iyó ca ndo cuhva cuñí coño ñuhu, vatyí tatu ndicha cha iyó Tatyí Ii Nyoo añima ndo, iyó ndo chihin cha ñin ri cuví ndo chihin Tatyí Ii Nyoo. Ñu cha yori Tatyí Ii ra Cristo ñohó añima, ñima ñu cuenda ra Cristo cuví chí ñu.

¹⁰ Soco ñu iyó ra Cristo añima, nyitó añima ñu vatyí sanduvahá Nyoo. Soco coño ñuhu ñu chíhi chí cha catyí cuatyí.

¹¹ Nyoo sanandoto ra chí ra Jesús cha yahá cha chíhi ra. Ta tyicuan caa tucu nyoho, tatu iyó Tatyí Ii Nyoo añima ndo, cusanandoto tucu Nyoo chí coño ñuhu ndo chihin Tatyí Ii ra.

¹² Ta tyicuan caa yañi, nyaá noo cha nyaá siqui yo cha sacuví yo, soco ñima cha sacuví yo cuhva cuñí coño ñuhu yo.

¹³ Vatyí tatu iyó ndo maa maa ri cuhva cuñí coño ñuhu ndo, cunaa ndo nuu Nyoo. Soco tatu iyó ndo cuhva cuñí Tatyí Ii Nyoo chihin tunyee iñi ra, cuví chasaha ndo chí cha quiñi caa cha cuñí coño ñuhu ndo ta cuconyito ndo cha ndicha cuii.

¹⁴ Vatyí tandihi ñu sacuví cuhva saquehén ityí Tatyí Ii Nyoo, sehe Nyoo cuví chí ñu.

¹⁵ Nya quivi cha tijn cuenda yo Tatyí Ii Nyoo ta ña yuhví ca yo chí ra, vatyí ñima tari noo ra nyacá ñaha chihin cha xaan cuví ra, ta vityin nanduví yo sehe ra. Tatyí Ii sacahán chí yo na cahan yo chihin Nyoo tyehé caa: “Sutu Mañi yuhu”, catyí yo chí ra.

¹⁶ Ta suri maa Tatyí Ii cuan ndú ñin ri chí chihin cha chíhi tuñi yo ta sacoto chí chí yo vatyí cha cuví yo sehe Nyoo.

¹⁷ Ta cha cuenda cha cuví yo sehe ra, iyó ityí chí yo cha ñihi yo cha vaha cha catyí Nyoo tyí cuhva ra chí yo, ñin ri chihin ra Cristo. Vatyí tatu ñin ri nyehé yo tindoho chihin ra Cristo, suri ñin ri cucahnu yo chihin ra.

¹⁸ Chité vatyí tindoho cha nyehé yo vityin, noo cha luhlu ri cuví cha nuu cha tyaqui cha cunyehe yo nachaa yo nuu nyaá Nyoo.

¹⁹ Tandihí cha savahá Nyoo cuñí xaan chí nyehé chí, ta nyatú chí quivi cha cusañaha ra yóo cha cuví tandihí sehe ra.

²⁰ Vatyí tandihí cha savahá Nyoo tiví chí. Vasi ña cuñí chí tiví chí soco Nyoo chahá ra cha tiví chí cha cuenda cuatyí cha sacuví ñáyivi. Soco catyí Nyoo tyí coo quivi ta cunduchaa tucu chí inga chaha.

²¹ Tandihí cha savahá Nyoo ta cunduchaa tucu chí inga chaha, ta ma cutiví ca, quivi cha cunasama Nyoo cuhva iyó chí vityin. Ta cucusi cuñí chí ñin ri chihin tandihí sehe Nyoo vatyí ma tiví ca chí.

²² Chitó yo vatyí tandihí cha savahá Nyoo ta nyehé xaan chí tindoho. Cahnu xaan tindoho nyehé chí tari cha uhvi cha nyehé noo ñaha sihi cha cacú sehe ña.

²³ Ta ñima maa ri maa chí nyehé tindoho, soco nyehé tucu yóo. Vasi cha natijn cuenda yo Tatyí Ii cha chahá quivi Nyoo chí yo, soco cahnu xaan tindoho nyehé yo, vatyí cuñí xaan yo cha tahán ri chí quivi cha cunanduví yo sehe ra. Vatyí cunasama ra cuhva iyó coño ñuhu yo.

²⁴ Vasi ta ñihi ca yo tandihí cuan soco chitó yo tyí cuñihi yo vatyí chino iñi yo ta chihin cuan cacu yo. Tatu nyatú yo cha cutahan chí chí yo, cuñí chí catyí vatyí ta ñihi ca yo. Tatu cha yahá ñihi yo chí chí, ma cuatu ca yo.

²⁵ Soco tatu yihí iñi yo cha ñihi yo noo cha ta nyehe ca yo, cuñí chí cha cuatu yo chihin cha cama iñi yo.

²⁶ Ta suri tyicuan caa tyinyeé tucu Tatyí Ii chí yo chihin cha vita cuñí yo vatyí ña chitó yo yoso caa cacan tahvi yo chí Nyoo cuhva tahán chí. Ta Tatyí Ii cuan chicán tahvi chí chí Nyoo cha cuenda yo chihin noo tuhun cha ña cuví nacatyí yo.

²⁷ Chitó maa Nyoo ñáá cha caá añima yo, ta chitó ra ñáá cha cuñí Tatyí Ii ra cacan chí, vatyí chicán chí cuhva cuñí maa ra cha cuenda ñáyivi cuenda ra.

²⁸ Chitó yo vatyí ñáyivi, ñu cuñí vavaha chí Nyoo, tandihí cha cuví chí ñu ta tyinyeé chí chí ñu, vatyí maa ñu cuví ñu nacachí ra, tari cuhva tyaq ra cuhva chí ñu.

²⁹ Vatyí nya quivi xihna ri, ta cha ñohó nuu Nyoo yóo cuví ñu cucunyicon chí ra. Ta tyaq ra cuhva chí ñu vatyí cucuví ñu tari Sehe ra, ra Jesucristo, tacuhva vatyí cucuví ra ra cha ñihi ca cha nuu tandihí ca yañi ra, ñu yihí tuhun Nyoo.

³⁰ Ta ñu cha tyaq Nyoo cuhva tyí cuví ñu sehe ra, nacana tucu ra chí ñu. Ta ñu cha nacana ra, suri sacuvahá ra chí ñu nuu ra.

Ta ñu cha sacuvaha ra chi, chahã ra cha cucahnu cuví ñu chihin ra.

³¹ ¿Ñáá cha catyí yo cha tyicuan caa? Tatu Nyoo ta nyaá ra tumañi iñi chi yo, ¿yóo cha cuví tyaa cuatyí siqui yo? Yori.

³² Nyoo ña catyí ra cha ma cuhva cuenda ra sehe ra, soco chahã cuenda ra chi ra vatyi cúvi ra cha cuenda tandihí yo. Ta tatu tyicuan caa, ¿atu ma cuhva tucu ra tandihí ca cha chiñuhú chi yo ñn ri chihin Sehe ra? Cuhva ra.

³³ ¿Yóo cha cuví tyaa cuatyí siqui ñu cha nacachí Nyoo? Yori. Vatyi Nyoo ican ra cuví ra sahá ra tuhun tyi vaha ñu nuu ra.

³⁴ ¿Yóo cha cuví catyí tyi cahun yo anyaya? Yori. Vatyi ra Cristo cuví ra chihí cha cuenda cuatyí yo, ta nandoto ra ta vityin nyaá ra chiyo vaha ndaha Nyoo, ta chícán tahvi ra nuu Nyoo cha cuenda yo.

³⁵ Ñahri cha cuví sacuachiyo chi yo chihin cuhva cuñi xaan ra Cristo chi yo. Vatyi vasi nyehé xaan yo tindoho, vasi iyó tisihi, vasi cahán ñáyivi chi yo cuenda tuhun Nyoo, vasi iyó tama, o ñahri sahna yo, vasi uhví yo, vasi chihí yo, soco ma cuví sacuachiyo tandihí tindoho cuan chi yo chihin cuhva cuñi ra chi yo.

³⁶ Vatyi tyehe caa cahán chi nu tutu Nyoo tuhun tindoho cha cunyehe yo:

Cha cuendon, Sutu Mañi yuhu, ta cuñi cahñi ñáyivi chi ndi tandihí quivi.

Ta tari noo mbee cha cua cahñi ñu, tyicuan caa sacuví ñu chi ndi, catyí chí.

³⁷ Soco vasi yahá yo tandihí tindoho cuan, soco cucuvi vaha ca chasaha yo cha cuenda ra cha cuñi xaan chi yo.

³⁸ Yucuan chaha chitó vahi vatyi ñahri maa cha cuví sacuachiyo chi yo chihin cuhva cuñi xaan Nyoo chi yo. Ni tuhun chihí, ni ñáyivi iyó yo, ni ángel, ni tatyi ña vaha, ni cha cuví vityin, ni cha cucuvi ityi nuu ca, ni noo cuan, ta ma cuví sacusin chí chi yo chihin Nyoo.

³⁹ Ni cha iyó nu sucun, ni cha iyó nu cono xaan, ni nonga cha savahã Nyoo, ma cuví sacusin chí chi yo chihin Nyoo, ra cuñi xaan chí yo cha cuenda ra Cristo Jesús Sutu Mañi yo.

9

Nyoo nacachí ra chi ñu ñu Israel

¹ Cahán cha ndicha, tari tuhvã cahán noo ra chinó iñi chi ra Cristo. Ña sandaví ñahi, vatyi Tatyí Ii Nyoo ican saquehén ityi cha chiñi tuñi xiñi. Yucuan chaha chitó vahi vatyi cha ndicha cahán nu catyí tyi

² cuihya xaan cuñi ta tyicuan ri uhvi cuñi añime

³ cha cuenda ñu ñui ñu Israel. Cuñi xain chí ñu. Ta nyacua cuhve añime na cahun

maa nu uhvi, tyehe ta cuví cacu añima ñu cha tyicuan caa.

⁴ Ta maa ñu, tata ra Israel vachi ñu. Ta Nyoo naquehén cuenda ra chi ñu tari cha sehe ra. Ta sañahã ra cuhva caá ra chi ñu, tyi cahnu xaan ra cuví ra, vatyi chinyaa ra chihin ñu. Ta natyihí tahan ra tuhun chihin ñu, ta chahã ra ley ra chí ra Moisés vatyi cuhva ra chí ñu. Ta sañahã ra cuhva cuñi ra cha sacahnú ñu chí ra. Ta catyí ra chí ñu yoso caa cusacuví ca ra cha vaha chihin ñu nu cuahan ca chi.

⁵ Tata ñu sutu chahnu yo cuví chí ñu, ta tata ñu, ican cuví chí ra Cristo cuenda coño ñuhu ra. Ican ra cuví Nyoo. Ta ican ra cuví ra nyacá ñaha tandihí cha iyó. ¡Na sacahnu yo chí ra tyicuan ri maa! ¡Ta na cuví chí tyicuan caa!

⁶ ¿Atu catyí vatyi ña sacuví Nyoo tari cuhva catyí ra chí ñu Israel ta cha naha? Ñima. Soco cuñi chí coto yo tyi ña tandihí ñáyivi Israel cuví ñu ñu Israel cha ndicha.

⁷ Ña tandihí ñu tata ra Abraham ta cuví ñu sehe ra cha ndicha. Vatyi tuhun cha cahán maa Nyoo chihin ra, cahán chí cha cuenda noo ri sehe ra. Vatyi catyí Nyoo chí ra tyehe caa: “Cha cuenda ra Isaac sehun cucoo ñáyivi chuun.”

⁸ Ihya sañahá chí yo vatyi ñima cha cuenda tata cha vachi ñáyivi ta cuví ñu ñáyivi cuenda Nyoo. Soco tandihí ñáyivi chinó iñi tuhun catyí Nyoo tyi cusacuví ra, ican ñu cuví ñu sehe ra cha ndicha.

⁹ Vatyi cha catyí Nyoo tyi cuhva ra chí ra Abraham, ican cuví ihya: “Quivi cha tahán chí, cuquichi nu nyicú ndo ta cu Sara cucoo noo sehe ña”, catyí Nyoo chí ra.

¹⁰ Ta ñima yucuan ri. Vatyi ni nduvi sehe cu Rebeca, ñn ri sutu ra, sutu chahnu yo, ra Isaac.

¹¹⁻¹² Soco cha ni cumañi ca cacu ndotyin, ta sacuví ca ndotyin ni cha vaha, ni cha ña vaha, ta catyí Nyoo chí cu Rebeca: “Sehun cha ñihi ca cucuvi ra musu ra cha luhlu ca.” Sacuví Nyoo tyicuan caa vatyi cachí ra chí ñáyivi cha cuñi maa ra, ta ñima cha cuenda cha sacuví ñu.

¹³ Tari catyí ra nu tutu ra tyehe caa: “Cuñi que chí ra Jacob, ta chí ra Esaú ña cuñi.”

¹⁴ ¿Tu tyicuan caa ñáá cha cucatyí yo? ¿Atu cuví catyí yo tyi ña vaha cha sacuví Nyoo? ¡Ma cuví!

¹⁵ Vatyi catyí ra chí ra Moisés tyehe caa: “Cu cundahvi cuñi yóo ñáyivi cuñi mai cundahvi cuñi!”

¹⁶ Ta tyicuan caa chitó yo vatyi ma cundahvi cuñi Nyoo nyehe ra chí ñáyivi cha cuenda cuhva cuñi maa ñu, o cha cuenda cha sacuví ñu. Soco cuhva cuñi maa Nyoo cucuvi. Vatyi maa ra cuví ra cundahvi iñi yóo chí cuñi maa ra.

¹⁷ Vatyí nu tutu ra, catyí ra chi rey Egipto tyehe caa: “Sacuví rey chuun tacuhva sañahí tunyee íñi cha iyó chíi chí ndo, ta tandíhi ñáyivi cucoto ñu yóo ra cuví yuhu”, catyí Nyoo.

¹⁸ Ta tyicuan caa Nyoo cundahvi cuñí ra yóo ñáyivi cuñí maa ra. Ta suri sandundavá tucu ra añima ñu cuñí maa ra sandundava ra.

¹⁹ Ta cu catyun chíi: “Tatu tyicuan caa, ¿ñáá tuhun cha tyaa Nyoo cuatyí siqui ñáyivi? Vatyí ¿yóo cha cuví nacahnu cuhva cuñí ra? ¡Yorí!”

²⁰ Soco ña vaha cuhva chicá íñun cha tyicuan caa. Vatyí yorí cuví catyí tyí ña vaha cha sacuví Nyoo. ¿Yóo ra cuví yoho vatyí nacahun nu cahán Nyoo? ¿Atu cuví catyí quisi ñuhú cuan chí ñu cha savahá chí chí vatyí ña tahán íñi chí cuhva cha savahá ñu chí chí? Ma cuví.

²¹ Vatyí ñu cha savahá ndaha tyíño iyó ityí chí ñu savahá maa ñu ñáá cha cuñí ñu chíhin nyahyu cuan. Chíhin nyahyu cuan cuví savaha ñu noo quisi ñnu xaan. Ta cuví savaha tucu ñu noo cha ndahvi ri.

²² Tyicuan caa tucu Nyoo, iyó ityí chí ra cha tachi tuñi ra chí ñáyivi quiñi iyó cha cuenda cha sacuví ñu cha ña vaha. Ta cuví sañaha ra chí ñu tyí iyó xaan tunyee íñi chí ra. Soco sanyee xaan ra íñi ra chíhin ñáyivi cuan. Ta chí maa ñu tahán chí tachi tuñi ra. Ta tahán chí sanaa ra chí ñu.

²³ Ta iyó tucu ityí chí ra cha saha ra tucahun íñi chí ñu savahá maa ra vatyí sañahá ra tyí cahnu ra cuví ra. Maa ñu cuví ñu ñu cachí ra vatyí cuñihi ñu tandíhi cha vaha, ta cucuo ñu gloria chíhin ra.

²⁴ Ta suri maa yo cuví ñu cuan. Vatyí Nyoo caná ra chí yo. Yihí yo cuví yo ñu Israel, ta yihí yo cha ñima ñu Israel cuví yo.

²⁵ Tari catyí Nyoo nu tutu cha tyaa ra Oseas tyehe caa:

Ñu cha ñima ñu ñui cucatyí yuhu tyí ñáyivi chíi cuví chí ñu.

Ñu cha ña cuñí, cunacuñi chí ñu, catyí Nyoo.

²⁶ Ta suri nu catyí Nyoo chí ñu tyehe caa: “Nyoho ñima ñáyivi chíi cuví ndo.” Ta suri yucuan cunacatyí tucu ra chí ñu: “Sehe yuhu, ra cuví Nyoo nyito, cuacuví ndo.”

²⁷ Soco cha cuenda ñu Israel catyí ra Isaias tyehe caa: “Vasi cuaha xaan ñáyivi ñu Israel tari cha cuaha niyiti iyó yuhu tyañuhu, soco suhva ri ñu cucacu.”

²⁸ Vatyí Sutu Mañi yo numi ri cusacuví ra tandíhi cha catyí ra tyí cusacuví ra siqui ñuhu ñáyivi chíhin cha cachi.”

²⁹ Tari catyí tucu ra Isaias ta ityí chata ca tyehe caa:

Tyehe ta Sutu Mañi yo ra nyacá ñaha tandíhi cha iyó andívi, ta ma sacacu ra chí suhva yo, cunaa tandíhi yo,

Tari naa ñáyivi Sodoma ta ñu Gomorra ta cha naha.

Ñu Israel nducú ñu cuhva cuvaha ñu nuu Nyoo soco ña ñihí ñu cuhva

³⁰ ¿Tatu tyicuan caa, ñáá cha catyí yo?

Ñáyivi cha ñima ñu Israel cuví, ña nanducu ñu cuhva cuvaha ñu nuu Nyoo, ta ican ñu cuví ñu cuvahá nuu ra cha cuenda cha chinó íñi ñu chí ra.

³¹ Ta ñu Israel nyicón xaan ñu ley, tyí cuñí maa ñu tyí cuvaha ñu nuu Nyoo chíhin cuan, soco ña cuví.

³² ¿Ñáá tuhun? Vatyí cuñí ñu cuvaha ñu nuu Nyoo chíhin cha sacuví ñu ley cuan, ta ña cuñí ñu cuvaha ñu nuu ra chíhin cha chinó íñi ñu chí ra. Yucuan chaha vatyí tari cha catyihí chaha ñu chíhin noo yuu cuví chí cuan.

³³ Yuu cuan cahán Nyoo tuhun nu tutu ra tyehe caa:

Ñuu Sión, yucuan tyají chí noo rayíi cha cuví tari noo yuu.

Noo yuu cha sanduvá chí ñáyivi cuví ra.

Soco ñu chinó íñi chí ra ma cucahan nuu ñu, catyí Nyoo nu tutu ra.

10

¹ Yañi, cuñi xain chíhin cha tandíhi añime cha cacu ñu Israel. Ta cha chicán tahvi xain cha cuenda ñu.

² Cha ndicha cuví vatyí cuñí xaan ñu sacahnú ñu chí Nyoo, soco ña ñihí ñu cuhva yoso caa tahán chí sacuví ñu.

³ Vatyí ña chitó ñu yoso caa sacuvahá Nyoo chí ñáyivi nuu ra. Ta nducú ñu cuhva sacuvaha maa ñu chí ñu, ta ña nacuhvá cuenda ñu chí ñu chí ra tacuhva sacuvaha maa ra chí ñu.

⁴ Vatyí ra Cristo cha quichí ra ta sacuví ra tandíhi cha catyí ley, ta sacuví ra vatyí tandíhi ñu chinó íñi chí ra, cuvaha ñu nuu Nyoo.

⁵ Catyí ra Moisés vatyí cuví cuvaha ñáyivi, soco tatu quichahá ñu cha catyí ley, vatyí catyí ra tyehe caa: “Ñu cha quichahá tandíhi cha catyí ley, coo ñu noo ñáyivi cha ma naa ca maa.”

⁶ Soco cha cuvaha yo nuu Nyoo cha cuenda cha chinó íñi yo chí ra Cristo, catyí nuu tutu Nyoo tyehe caa: “Ma caca xiñun vatyí cuñí chí cha cundaa noo ra andívi ta cusanoo ra chí ra Cristo tacuhva sacacu ra chí yo.” Ma caca xiñun tyicuan caa vatyí cha yahá quichi ra Cristo.

⁷ Ni ma caca xiñun vatyí cuñí chí cha cunoo noo ra chíhi ñuhú vatyí sanandoto ra chí ra Cristo, vatyí cha yahá nandoto ra.

⁸ Ma caca xiñun tyicuan caa vatyí tyehe caa catyí nu tutu Nyoo: “Tuhun Nyoo yatyin nyaá chí chíhin ndo, yuhu ndo ta añima ndo nyaá chí.” Ta suri tuhun cuan

sacoto ndi chi ndo, tuhun cha quichĩ ra Cristo ta nandotoŕa. Ican cuvĩ tuhun cha tahán chi chinó iñi yo.

⁹ Tatu chihin yuhun catyún vatyĩ ra Jesús cuvĩ Sutu Mañi yo, ta chihin añimon chinó iñun tyi Nyoo sanandotoŕa ra chi ra cha yaha chihĩ ra, cucacu añimon.

¹⁰ Vatyĩ chihin añima yo cuñĩ chi chino iñi yo chi ra Cristo tacuhva cuvĩ cuvaha yo nuu Nyoo, ta chihin yuhu yo tahán chi catyĩ yo tyi chinó iñi yo, tyicuan ta cacu añima yo.

¹¹ Tuhun Nyoo catyĩ chi: “Ni noo ñu cha chinó iñi chi ra ta ma tahan ñu ticahan nuu.”

¹² Vatyĩ Nyoo ñn ri cuhva nyehé ra chi ñu Israel ta chi ñu inga ñuu. Vatyĩ suri maa ra cuvĩ ra ra nyacá ñaha chi tandihĩ yo. Ta nasocó xaan ra chi tandihĩ yo cha chicán tahvi yo chi ra.

¹³ Vatyĩ tyehe caa catyĩ tuhun Nyoo: “Tandihĩ ñu cha chicán tahvi chi ra Jesús cucacu añima ñu.”

¹⁴ Soco ¿yoso caa cucacan tahvi ñu chi ra tatu ta chino ca iñi ñu chi ra? Ta ¿yoso caa cuchino iñi ñu chi ra tatu ta cuiñĩ ca ñu tuhun ra? Ta ¿yoso caa cuiñĩ ñu tuhun ra tatu ta yori ca cahán tuhun ra chihin ñu?

¹⁵ Ta ¿yoso caa cucahan ñu yihĩ tuhun Nyoo chihin ñu, tatu yori tachĩ chi ñu? Tari catyĩ nu tutu Nyoo: “Ñana cha tyaquĩ nu chaa ñu cahán tuhun vaha nuu ñáyivĩ.”

¹⁶ Soco ña tandihĩ ñu ta quichahá ñu tuhun cha sacacú Nyoo añima yo. Vatyĩ tyehe caa catyĩ ra Isaías: “Sutu Mañi yuhu, yori cuñĩ chino iñi tuhun cahán ndi”, catyĩ ra.

¹⁷ Yucuan chaha cha chiñĩ xihna yo tuhun ra Cristo, tyicuan ta chino iñi yo chi ra.

¹⁸ Soco ndacá tuhun ihya: ¿Atu ña chiñĩ ñu Israel tuhun Nyoo? ¿Chiñĩ ñu! Vatyĩ nu tutu Nyoo catyĩ chi tyehe caa:

Sutu Mañi yuhu, cha sacotó ñáyivĩ tuhun maun nicahnu siqui ñuhu ñáyivĩ, catyĩ chi nu tutu Nyoo.

¹⁹ Soco ndacá tuhun inga chaha tyehe caa: ¿Atu ña chinó iñi ñu Israel cha cuenda tyi ta nacoto ca ñu tuhun Nyoo? ¿Chitó ñu! Vatyĩ cha xihna ri ra Moisés tyaq ra tuhun cahán Nyoo chihin ñu Israel tyehe caa:

Nyoho, cucuquiñĩ cuñĩ ndo vatyĩ cucuhve cha vaha chi noo itya ñáyivĩ cha ñima ri tuhun, ñáyivĩ cha ña cutuñĩ iñi.

Ta cunaquiqui tisihi ndo nyehé ndo chí ñu, catyĩ Nyoo.

²⁰ Ta ra Isaías caña iñi ra catyĩ ra tyi ñu cha ña nanducú chi Nyoo, nañihĩ ñu chí ra. Ta sañahá ra chi ra chí ñu cha ña ndacá tuhun tuhun ra.

²¹ Ta tyaq tucu ra Isaías tuhun cahán Nyoo chihin ñu Israel tyehe caa: “Ndiyaca canq

chi ñáyivĩ chii, nacuhva cuenda ñu chí ñu chí, soco ña quichahá ñu. Ndava xaan iñi ñu”, catyĩ Nyoo.

11

Yihĩ ñu Israel cha ñihĩ ñu cuhva cacu añima ñu

¹ ¿Atu ña cuñĩ ca Nyoo chí ñu Israel? Ñima cha ña cuñĩ ca ra chí ñu, vatyĩ suri ra Israel cuvĩ tucu yuhu. Vatyĩ tata ra Abraham ta tata ra Benjamín cuvĩ.

² Nyata cha naha cachĩ Nyoo chí ñu Israel tacuhva cuvĩ ñu ñáyivĩ chí ra. Ta vityin ñima cha sacuachiyó ndihĩ ra chí ñu, vatyĩ chitó ndo cha catyĩ nu tutu Nyoo nu chicán tahvi ra Elías, profeta Nyoo, ta catyĩ ra tyi ña vaha sacuvĩ ñu Israel, ta catyĩ ra tyehe caa:

³ “Sutu Mañi yuhu, chahñĩ ñu chí ra cuvĩ profeta maun, ta satani ñu arta vehe ñuhu maun. Noo tuhun ri ca mai ndoo, ta cuñĩ ñu cahñĩ ndihĩ ñu chí”, catyĩ ra.

⁴ Soco nacahan Nyoo ta catyĩ ra chí ra Elías: “Ñima maa ri maun ndoo. Ucha ca mil ñáyivĩ naquehen vahi cha ña chicutiñĩ chiti ñu nuu xitohyo nyoo Baal”, catyĩ Nyoo chí ra.

⁵ Ta suri tyicuan caa vityin, ndoo suhva ñu sachanú chí Nyoo. Ican ñu nacachĩ Nyoo chí tyi cusaha ra tucahnu iñi chí ñu.

⁶ Vatyĩ cha cuenda cha vaha ñáyivĩ cuvĩ Nyoo ta sahá ra ticahnu iñi chí yo. Tyehe ta chihin cha vaha ñáyivĩ cuvĩ maa yo ta sahá Nyoo tucahnu iñi chí yo, cuñĩ chí catyĩ tyi ñima ca chihin cha vaha maa ra ta sacacú ra chí yo.

⁷ Ta ¿yoso caa? Ñu Israel nanducú xaan ñu cuhva cuvaha ñu nuu Nyoo soco ña ñihĩ ñu cuhva. Soco ñu cha nacachĩ maa Nyoo chí, ñihĩ ñu cuan cuhva. Ta inga ñu Israel cuan ndundava xaan añima ñu.

⁸ Tari catyĩ nu tutu Nyoo tyehe caa: “Nyoo chahá ra noo cuhva chí ñu cha ma cutuñĩ iñi ñu. Ta chahá ra chiti nuu cha ña cutuñĩ iñi ñu cha nyehe ñu. Ta chahá ra soho ñu soco ña cutuñĩ iñi ñu cha chiñĩ ñu, ta nyacua nya vityin ta tyicuan caa ñu.”

⁹ Ta suri catyĩ tucu ra David tyehe caa: Si xaan cuñĩ ñu chihin vico cha iyó ñu, soco yucuan cuvĩ trampa cha sanacava chí ñu. Ta cha cuenda cuan ta cutachi tuñi Nyoo chí ñu.

¹⁰ Ta tari cha cunducuaa ñu vatyĩ ma ndichin ca nyehe ñu cha ndicha. Ta tyicuan ri cucoso cha vee chata ñu, catyĩ ra David tuhun ñu Israel cha ña chinó iñi chí Nyoo.

Yoso caa cuvaha ñu cha ñima ñu Israel cuvĩ nuu Nyoo

¹¹ Ta vityin ndaca tuhun ihya: ¿Atu cha cuenda cha ña quichahá ñu Israel cuan nu cahán Nyoo, ta ndoo ri maa ñu cha ma cacu ca añima ñu? Ñima. Vatyĩ cha cuenda cha ña

quichahā ñu chi ra cha saquichi Nyoo, yucuan chaha sacacu Nyoo chi inga ñu cha ñima ñu Israel cuví. Ta tyicuan caa ta cuquiñi cuñí ñu Israel vatyí nachino iñi inga ñáyivi. Ta cha tyicuan caa ta cuquichi cuví tucu iñi ñu cha cacu añima ñu.

¹² Tatu cha cuenda cha ña quichahā ñáyivi Israel cuhva cha chahā Nyoo chi ñu, cuví chi cha vaha cha cuenda tandihí ca ñáyivi, vatyí chahá chi cuhva, ta cuaha xaan ñu nachino iñi ñu chi ra Cristo, nyaca cuví quívi cundihví tucu ñu Israel cuenda Nyoo inga chaha. Yucuan quívi, vaha xaan ta tyaquí xaan cucuvi.

¹³ Ta iyó suhva cha cuñí catyí chi nyoho cha ñima ñu Israel cuví ndo, vatyí ra Jesús tyatyíñō ra chíi cha cuhin nu iyó ñáyivi cha ñima ñu Israel cuví. Ta chíté vatyí ñiñi xaan cuví tyiño cha chahā maa Nyoo chíi.

¹⁴ Ta cuñí tiquí vatyí cunyehe ñáyivi Israel ñu ñui cuhva chinó iñi ndo chi Nyoo, ta cuquichi cuví iñi tucu suhva maa ñu sacuvi ñu tyicuan caa. Ta tyicuan caa ta cacu añima ñu.

¹⁵ Vatyí cha cuenda cha ña natíin cuenda Nyoo chí ñu Israel cuví cuvaha inga ñáyivi nuu ra. Vaha xaan cha tyicuan caa ta nyaca cuví quívi cunatíin cuenda tucu ra inga chaha chí ñu Israel, cucuvi tari cha cunandoto ñu nu chíhí ñu.

¹⁶ Tatu vaha noo pan cha savahā yo cha xihna ri chíhin yuchan pan cuan, vaha tandihí ca yuchan cuan. Ta tatu vaha yoho noo yutun, tandihí ca soco tun, ta vaha. Ta tyicuan caa tucu ñu Israel, cuñí Nyoo chí ñu cha cuenda cha vaha ra cha vachí ñu tata.

¹⁷ Ta ñu Israel cuví ñu tari noo soco noo tu olivo vaha cha cumí Nyoo. Ta chahnyā Nyoo chí suhva ñu vatyí ña chinō iñi ñu chí ra. Ta chaha tu olivo cuan natyaa tahan ra soco noo tu olivo cuhu. Ta maa ndo cuví tari tu olivo cuhu cuan. Ta tari cha natyaa tahan ra chí ndo chaha tu olivo cha xihna ri cuan. Ta tyicuan caa ndū iin ri ndo chíhin tu olivo Nyoo ta naquehén ndo tandihí cha vaha cha iyó chí ra.

¹⁸ Soco ma saha ndo tyi vaha ca ndo ican saha inga ñu cha cuví soco tu olivo cha chahnyā Nyoo. Vatyí tatu cuñí maa ndo tyi vaha ca ndo, cuñí chí nichon iñi ndo vatyí ñima maa ndo nyisó ndo chí yoho yutun cuan, soco maa yoho yutun cuan nyisó chí ndo.

¹⁹ O catyí ndo: “Ican, soco chahnyā Nyoo soco yutun cuan tacuhva nicunyya maa ndi chaha tun.”

²⁰ Vaha. Soco chahnyā Nyoo soco cuan cha cuenda tyi ña chinō iñi ñu chí ra. Ta nyoho nicunyya ndo yucuan, soco cha cuenda cha chinó ri iñi ndo chí ra. Yucuan chaha ma sacahnu ndo chí ndo, soco saha ndo cuenda chí ndo.

²¹ Vatyí tatu ña saha Nyoo ticahnu iñi chí ñu cha cuví soco vaha cuan, ni chí nyoho ta ma saha ra ticahnu iñi tatu ña chinó vaha iñi ndo chí ra.

²² Nyēhe yoso cha vaha Nyoo, soco tyicuan tucu xaan ra chíhin ñu cha ña natíin cuenda tumañi iñi chahá ra. Soco chíhin nyoho, vaha xaan ñáyivi cuví ra. Soco cuñí chí cha naquehén vaha ndo tumañi iñi cha chahá ra vatyí tatu ña naquehén vaha ndo, cucahnyā tucu ra chí nyoho.

²³ Soco tatu nachino tucu iñi ñu Israel inga chaha, cu nicunyya tucu ñu nu coyō ñu. Vatyí Nyoo iyó yunyeē iñi chí ra cha natyatahan tucu ra chí ñu cuan inga chaha.

²⁴ Vatyí tatu nyoho cha ñima ñu Israel cuví ndo, ta quehēn Nyoo chí ndo cha cuví ndo tari soco noo yutun olivo cuhu, ta natyaa tahan ra chí ndo chíhin tu olivo vaha cha cumí ra, ¡ta nyaca cuví ñu Israel cha cuví ñu soco tu olivo vaha! ¡Cunatyya tahan chaa ra chí ñu inga chaha chaha tu olivo nu coyō ñu!

Nu ndihí ta cucacu tucu ñu Israel

²⁵ Vatyí yañi, cuñí cha coto ndo noo tuhun xehe cha sacuvi Nyoo, tacuhva vatyí ma caca xiñi ndo vatyí chító xaan ndo. Vatyí ñu Israel ndundava añima ñu suhva quívi, nyacua nya cha cuví nachino iñi inga ñáyivi chí Nyoo.

²⁶ Ta cha yahā quihvi inga ñu cuenda Nyoo, tyicuan ta tandihí ñu Israel cucacu añima ñu, vatyí nu tutu Nyoo catyí chí tyehe caa:

Ra cha cusacacu chí ñáyivi, ityí Sión cuquichi ra.

Ta cusacanyaha ra cuatyí cha iyó chí ñáyivi chí ra Jacob.

²⁷ Ta ihya cuví tuhun cha cunatyihí tahin chíhin ñu, quívi na sacuachiye cuatyí ñu, catyí Nyoo nu tutu ra.

²⁸ Cuxaán xaan ñu Israel chíhin Nyoo cha cuenda tuhun vaha ra Cristo cha cacu añima yo. Ta tyicuan ta cuví chinó iñi maa ndo. Soco Nyoo tacuhva cuñí ri maa ra chí ñu Israel tata ra Abraham, ta ra Isaac, ta ra Jacob vatyí cachino iñi ra chí ra quívi cachiyō ra, ta yucuan chaha chahí ra chí ra.

²⁹ Vatyí noo cha cha yahā chaha Nyoo ña natinyaa ra. Ni ña ndu uvi iñi ra cha yaha nacana ra chí yo.

³⁰ Nyoho, ta ityí chata ca, nacahnū ndo nu cahán Nyoo. Soco vityin, Nyoo cundahví cuñí ra nyehé ra chí ndo cha cuenda vatyí ñu Israel nacahnū ñu nu cahán ra.

³¹ Nacahnū ñu nu cahán Nyoo vityin tari nacahnū maa ndo quívi cuan. Ta tari cundahví cuñí Nyoo nyehé ra chí ndo vityin, tyicuan caa tucu cucundahví cuñí ra nyehé ra chí ñu Israel ñandihí.

³² Vatyí Nyoo chaha ra ityi chí tandihí ñáyivi cha nacahnú ñu nu cahán ra, tacuhva vatyí cundahvi cuñi ra nyehé ra inuu ri chí tandihí yo.

³³ ¡Ñana cha cahnu cuví cha tyayii Nyoo! ¡Ñana cha vaha cha chitó xaan ra, ta cha chiñi tuñi ra! Ma cuví nacatyí yo kuhva chicá iñi ra, ni ma chaa yo cutuñi iñi yo kuhva sacuví ra.

³⁴ Vatyí ¿yóó cha cutuñi iñi kuhva chicá xiñi Sutu Mañi yo? ¿O yóó cha sañaha chí ra? Yori.

³⁵ Vatyí yori cha cuví kuhva xihna ca noo cha vaha chí Nyoo ta cha cuenda cuan ta quihí iñi ñu vatyí na kuhva tucu Nyoo chí ñu.

³⁶ Vatyí tandihí maa cha iyó, maa Nyoo savaha, ta chinq chí ta iyó chí cha cuenda ra. ¡Cahnu xaan ca cuví Nyoo tyicuan ri maa! Ta na cuví chí tyicuan caa.

12

Na coo yo noo ñayivi cha sacuvi yo kuhva cuñi Nyoo

¹ Yucuan chaha yañi, chacú ndahvi nuu ndo cha cuenda cha ndahvi cuñi Nyoo nyehé ra chí yo, na nacuhva cuenda yo coño ñuhu yo chí ra, tari noo ofrenda cha nyitó, ta cachi coo yo nuu ra, vatyí yucuan cuví kuhva tñin cuenda ra cha sacahnú yo chí ra.

² Ta ma coo ca yo kuhva iyó ñáyivi iyó siqui ñuhu ñayivi ihya. Soco na nasama yo kuhva iyó yo chihin cha nduchaa kuhva chicá xiñi yo. Ta tyicuan caa ta coto yo yoso kuhva cuñi Nyoo chihin yo vatyí coto yo nya cha vaha, ta nya cha tahán iñi ra. Ta coto yo ñáá ndihí cha tahán chí sacuvi yo.

³ Nyoo, cha catyí cha vaha ñáyivi cuví ra, ta tyatyíño ra chí vatyí cuví apóstol chí ra, yucuan chaha catyí chí tandihí nyoho vatyí ni noo ndo ta ma caca xiñi ndo tyi vaha ca ndo. Soco caca vaha xiñi ndo yoso kuhva iyó ndo chihin yoso kuhva cha vaha chaha Nyoo chí ndo ñin ri chihin cha chinó iñi ndo chí ra.

⁴ Vatyí cha noo coño ñuhu, cuaha xaan kuhva iyó chí, ta ña ñin ri maa tyiño saha chí. Chiti nuu yo, noo tyiño sahá chí, ta soho yo inga tyiño sahá chí.

⁵ Ta tyicuan caa tucu yoó vasi cuaha yo, soco noo ri coño ñuhu ra Cristo cuví yo, cha cuenda cha ñin ri cuví yo chihin ra, ta ñin ri cuví yo chihin tahan yo. Tari cha noo ri coño ñuhu cuví tandihí ri yo.

⁶ Sñin sñin tyiño chaha Nyoo chí yo, yoso kuhva cha cuñi maa ra kuhva ra chí noo noo yo. Ta cuñi chí cotyíño vaha yo cha vaha cuan. Tatu chaha Nyoo cha vaha cha sahá yo profetizar, na chino iñi yo tyi ícan cuan chaha ra chí yo, ta na naquehen yo

tuhun sacoto ra chí yo ta nacatyí yo chí ñáyivi.

⁷ Tatu chaha ra cha vaha cha sacuví yo tyiño nuu inga ñu, cuñi chí sacuví vaha yo. Tatu chaha ra cha cuví sañaha yo chí inga ñu, cuñi chí cunyaa yo tyiño cuan.

⁸ Tatu chaha ra cha cuví kuhva yo tuhun chí ñáyivi na ndu nñi iñi ñu, cuñi chí cunyaa yo tyiño cuan. Ta ñu cha chaha Nyoo xuhun chí, cuñi chí kuhva ñu chihin cha nñi iñi ñu. Tatu chaha Nyoo cha saquehen ityun chí ñu yihí cuenda ra, chihin cha nñi iñun sacuvun. Tatu chaha Nyoo cha tyinyeé yo chí ñu chiñuhú cha chiñuhú chí, cuñi chí sacuví yo chihin cha sñi cuñi yo.

Nu catyí ra Pablo yoso caa sacuvi yo cha yihí yo cuenda ra Cristo

⁹ Cuñi ndo chihin cha ndicha chí tahan ndo. Ta cutasi cuñi ndo chí cha ña vaha. Ta cunyicon ndo cha vaha.

¹⁰ Cuñi chí cha cuñi ndo chí tahan ndo cuenda Nyoo tari cha tahan ndo cha ñin ri sihi ñin ri sutu ndo. Ta quichaha ndo chí ñu ta saha ndo ñáyivi chí ñu.

¹¹ Sañihí ndo iñi ndo. Ma cusuchan ndo. Ta sacuví ndo tyiño nuu Sutu Mañi yo chihin cha nñi añima ndo.

¹² Sñi cuñi ndo coo ndo ñayivi, vatyí chitó ndo vatyí cucoo ndo chihin Nyoo nu cuahan ca chí. Sañyee ndo iñi ndo tatu nyehé ndo tñdoho. Ta ma sandihí maa ndo cha cacan tahvi ndo chí Nyoo nyita ri.

¹³ Tyinyee ndo chí ñu yihí cuenda Nyoo chihin ñáá cha chiñuhú chí ñu. Vaha tyiñuhu ndo chí ñu chaa vehe ndo.

¹⁴ Vaha cañan ndo siqui ñu cha cahán chí ndo. Ta ma soco ndo chí ñu. Caçan tahvi ndo cha cuenda ñu nuu Nyoo tacuhva na nasoco ra chí ñu.

¹⁵ Cusi cuñi ndo chihin ñu sñi cuñi, ta cuçan ndo chihin ñu chacú chaa cha cuihya cuñi ñu.

¹⁶ ñin ri cuví ndo chihin tahan ndo. Ta ma cahnu saha ndo chí ndo. Inuu ri saha ndo chí ndo chihin ñu ndahvi. Ma saha ndo cha chitó xaan ndo.

¹⁷ Ma sacuvi ndo cha ña vaha chihin ñu sacuví cha ña vaha chihin ndo. Soco sañiñi ndo sacuví ndo cha vaha nuu tandihí ñáyivi.

¹⁸ Sañiñi ndo cha coo taxi ri ndo chihin tandihí ñáyivi.

¹⁹ Yañi luhli, tatu yoó cha satañi iñi chí ndo, ma tachi tuñi ri maa ndo chí ñu, soco saña ndo ta natyaa ndo ndaha Nyoo na tachi tuñi maa ra chí ñu. Vatyí nu tutu Nyoo catyí chí tyehe caa: “Yuhu tahán chí tachi tuñi, yuhu cutyiyahvi chí ñu”, catyí Sutu Mañi yo.

²⁰ Ta suri catyí tucu ra: “Tatu ra xaan iñi chuun ta chisocó ra, cuhva cha cachi ra, ta

tatu ityi ra ndutya, cūhva coho ra. Vatyi cha sacuvún tyehe caa, sacuvún cha nyacua nducuaaha soho ra chihin tícahan nuu.”

²¹ Ma cuhvon cha cunyaca ñaha cha ña vaha chuun, soco sãñiñun ta cuvi chasahun chi cha ña vaha chihin cha sacuvún cha vaha.

13

¹ Tandihí ñáyivi cuñí chi cha quichaha ñu chi ra cacuví tyiño cuenda gobiernu. Vatyí yori ra cuvi tyiño cha ñima Nyoo tyaa tyiño chi ra. Ta ra cuvi tyiño cha iyó, maa Nyoo tyiso chi ra.

² Yucuan chaha, ñu cha ña quichahá chi ra cacuví tyiño, cuñí chi catyi vatyí ña quichahá ñu cuhva catyi Nyoo. Ta ñu cha sacuví tyicuan caa, chicoo cuatyí ñu cha cuenda cuan, ta cucutuñi chi ñu.

³ Vatyí ra cacuví gobiernu, ña nyaá ra cha cuenda cha sayuhví ra chí ñu cha sacuví cha vaha, soco nyaá ra vatyí tachi tuñi ra chí ñu sacuví cha ña vaha. ¿Atu cuñún coun chihin cha ña yuhvun chi ra cacuví tyiño? Cachi coun, ta cunyehe ra tyi vaha ñáyivi cuvún.

⁴ Vatyí nyaá ra tyiño vatyí sacuví ra tyiño nuu Nyoo cha cuenda cha vaha chuun. Soco tatu ña cachi iyón, yucuan ndicha cuñí chí cuyuhvun chí ra. Vatyí ña nyaá ri maa ra, soco nyaá ra vatyí tachi tuñi ra chí ñáyivi cha sacuví cha ña vaha, vatyí tyiño cuan tyaa Nyoo chí ra.

⁵ Yucuan chaha niñi cuñí chi cha quichaha ndo chí ra cacuví tyiño, ñima cha cuenda cha yuhví ndo coto tachi tuñi ra chí ndo, soco cha cuenda vatyí chitó ndo tyi tyicuan caa tahán chí sacuví ndo.

⁶ Ta siin ri cha cuenda cuan tyiyahví ndo xuhun cha tava ra cuvi tyiño cha cuenda cha sanduvahá ra ñuu ndo. Vatyí yucuan cuvi tyiño tahán chí cunyaa ra, ta cha tyicuan caa tyiño nuu Nyoo sacuví ra.

⁷ Cūhva ndo cha tahán chí chí minoo minoo ñáyivi. Tyiyahvi ndo cha cuenda ñáa cha tahán chí tyiyahvi ndo cha cuenda cha vaha chí ñuu ndo. Ta quichaha ndo chí ñu cha tahán chí quichaha ndo. Ta saha ndo ñáyivi chí ñu cha tahán chí saha ndo ñáyivi.

⁸ Ma coso yica ndo chí ni noo ñáyivi. Soco cuñi ndo chí tahan ndo, vatyí tatu cuñi ndo chí tahan ndo sacuví ndo tandihí cha catyi ley Nyoo cha tyaa ra Moisés vatyí sacuví yo.

⁹ Catyi ley Nyoo tyehe caa: “Ma coo inga ñusihi o rayii chuun tatu ñima ñasihun o yiu cuvi. Ma cahñun chí ñáyivi. Ma suhun. Ma cahun cuendu siqui ni noo ñáyivi. Ma quichi cuvi iñun cha chí ñáyivi.” Tatu ndicha cha cuñún chí tahun, tari cha cuñún chí maun, sacuví tucun tandihí ihya ta tandihí ca inga ca ley.

¹⁰ Tatu cuñún chí tahun, ñahri cha ña vaha cua sacuvun chí ñu. Chihin cha cuñí yo chí tahan yo, sacuví yo tandihí cha catyi ley Nyoo cha tyaa ra Moisés.

¹¹ Chihin tuhun ihya saha yo cuenda quivi iyó yo. Vatyí cha chaq chí cuhva cha ndoyo yo ta ma cundihñi yo. Vatyí quivi nachino iñi yo chí ra Cristo, naha xaan ca nyaá quichi quivi cucacu ndihí añima yo, soco vityin cha cuyatyin.

¹² Cha cua vaha cha cha cuaa. Ta cha cua cundichin. Yucuan chaha cuñí chí sandihí yo cha sacuví yo cha sacuví ñu iyó nu ñaa iñi. Ta tahán chí sacuví yo cuhva sacuví ñáyivi iyó nu ndichin.

¹³ Cachi cuñí chí coo yo. Vatyí nu ndichin Nyoo iyó yo. Ta ma coho yo ndixi, ta ma coo yo vico nu chihí xaan ñu ndixi. Ta ni ma coo yo chihin savaha ri ñusihi o rayii. Ni ma coo viciu chí yo. Ta ma cutasi cuñi yo nyehe yo chí tahan yo. Ta ma nyiyo iñi yo nyehe yo chí ñu.

¹⁴ Soco cõo yo chihin tunyee iñi Sutu Mañi yo Jesucristo, tari noo sahna cuvi tunyee iñi ra tyi ndihvi noo yo. Ta ma quihí iñi ndo cha sacuví ndo cuhva cuñí coño ñuhu ndo.

14

Ma cahan nyaun chí tahun

¹ Tatu noo ñáyivi yihí cuenda Nyoo ta chiin ri chinó iñi ñu chí ra, ña vaha cha ma tiin cuenda ndo chí ñu. Vaha nqñin cuenda ndo chí ñu soco ma cuvi yuhu ndo chihin ñu siqui tuhun cha chicá uvi iñi ñu.

² Vatyí yihí ñáyivi cuñí maa ñu vatyí cuvi cachi ñu tandihí. Ta yihí tucu ñu cha ña chinó vaha iñi ñu, ta maa maa ri yucu chachí ñu.

³ Soco ñu chachí tandihí cuan, tahán chí cha tiin cuenda ñu chí ñu cha chachí yucu ri. Ta ñu chachí yucu ri, ma cahan nyaa ñu chí inga ñu cuan. Vatyí Nyoo tiin cuenda ra chí ñu cuan.

⁴ Vatyí çyóo ñu cuvi yoho vatyí cahan nyaun chí ñu cha sacuví tyiño nuu inga ra? Vatyí tatu vaha o ña vaha sacuví ñu soco nyehe maa ra cuvi nuu chí ñu chihin ñu. Ta vaha cuquita ñu vatyí Sutu Mañi yo iyó tunyee iñi chí ra ta cutinyee ra chí ñu tacuhva quita vaha ñu.

⁵ Inga tucu cuhva: Yihí ñu cha sacahnú ca ñu chí noo quivi ta ñima ca inga quivi. Ta yihí tucu ñu cha cuñí maa ñu vatyí inuu ri tandihí quivi. Tahan tahan yo cuñí chí coto vaha yo yoso cuhva chicá xiñi yo.

⁶ Ñu cha naquehén vaha noo quivi, naquehén vaha ñu cha cuenda cha sacahnú ñu chí Sutu Mañi yo. Ta ñu cha ña naquehén vaha cuan, suri cha cuenda cha sacahnú ñu chí Nyoo cuvi. Ta ñu cha chachí

tandihí cuan, suri chachí tucu ñu cha cuenda cha sacahnú ñu chi Sutu Mañi yo, ta nacuhva ñu tyahvi nyoo chi Nyoo tyi chaha ra cha cachi ñu. Ta ñu cha ña chachí tandihí, ña chachí ñu cha cuenda cha sacahnú ñu chi Sutu Mañi yo ta suri nacuhva tucu ñu cuan tyahvi nyoo chi ra.

⁷ Vatyí ni noo yo ña iyó yo chihin fuerza maa yo. Ni ñima maa yo catyí ama cúvi yo.

⁸ Vatyí tatu iyó yo, iyó yo tacuhva sacuvi yo tyiño nuu Nyoo, ta tatu chihí yo, chihí yo tyi Sutu Mañi yo naquehen cuenda ra añaíma yo. Yucuan chaha tatu iyó yo, o chihí yo soco chi Sutu Mañi yo cuví chi yo.

⁹ Vatyí ra Cristo chihí ra ta nandotó tucu ra vatyí tacuhva cunyaca ñaha ra chí ñu nyitó ta chí ñu chihí.

¹⁰ Soco yoho, ¿ñáá tuhun cha nyehé nyaun chí yañun? ¿o ñáá tuhun cha ña natáin cuendon chí ra? Vatyí tandihí yo cutahan chí cucuhva cuenda yo chí yo nuu Nyoo vatyí cutuñi chí yo nuu ra.

¹¹ Vatyí nu tutu Nyoo catyí chí tyehe caa: Cha ndicha ndicha cuii vatyí yuhu nyité, catyí Sutu Mañi yo.

Ta tandihí cuii ñáyivi cunacuiñi chíti ñu nui. Ta tandihí ñu cunacoto nuu ñu chíi cha cuví Nyoo.

Ta cusacahnú ñu chíi chihin nuu tandihí ñáyivi, catyí Nyoo.

¹² Yucuan chaha noo noo maa yo ta cunacuhva yo cuenda cha sacuvi yo chí Nyoo.

Ma sanacavon nu cuatyí chí yañun

¹³ Yucuan chaha, ña tahán ca chí cahan nyaa yo chí tahan yo. Soco nducu yo cuhva cha ma sanacava yo chí ñu nu cuatyí coto sandihí ñu tuhun cha chino iñi ñu.

¹⁴ Yuhu chité vatyí ñahri cha ma cuví cachi, vatyí chinó vaha iñi chí Sutu Mañi yo Jesucristo, ta maa ra sañahá chíi. Soco tatu yihí ñu chicá xiñi ñu tyi yihí cha ña vaha cachi ñu, cha cuenda maa ñu, ña vaha.

¹⁵ Soco tatu cha cuenda cha chachún ta quiñi cuñi yañun, ña ndicha cha cuñún chí ra, ñima ca cuhva cuñi Nyoo sacuvún. Ma cuhvon cha tiví noo ñu chihin cha chachún vatyí ra Cristo chihí ra cha cuenda ñu.

¹⁶ Ma cuhva ndo cha cahan ña vaha ñu siqui noo cha chaha Nyoo ityi chuun tyi cachun.

¹⁷ Vatyí cha nyacá ñaha Nyoo chí yo cuví chí noo cha cachi coo yo nuu ra. Cusí cuñi yo ta taxi ri cuñi añaíma yo cha cuenda Tatyí lí Nyoo cha nyaá añaíma yo. Ta ña niñi tuhun cha chachi yo o cha chíi yo.

¹⁸ Ñu sacuví tyiño nuu ra Cristo tyehe caa, si cuñi Nyoo nyehé ra chí ñu, ta catyí tucu ñáyivi tyi vaha ñáyivi cuví ñu.

¹⁹ Yucuan chaha cuñi chí cha sañihi ca yo cha coo taxi ri yo chihin ñáyivi. Ta tyucuan

caa ta cuví tyinyee yo chí noo noo tahan yo na cuahnu yo chihin tuhun Nyoo.

²⁰ Ma sativun tyiño sahá Nyoo añaíma inga ñáyivi cha cuenda noo cha chachí run. Ndicha vatyí tandihí cha chachí yo ta vaha. Soco ña vaha cha cachi yo tatu chihin cuan sanacavá yo nuu cuatyí chí inga ñu.

²¹ Yucuan chaha, vaha ca cha ma cachi yo coño, ni cha ma coho yo vinu, tatu quiñi cuñi yañi yo chihin cuan. Ma sanacava yo chí ñu nu cuatyí. Ma casi yo chihin noo cha sacuvi yo nu chinó iñi ñu chí Nyoo.

²² Tatu chinó iñun vatyí cuví cachun tandihí, vaha. Soco ma cahun tuhun cuan chihin inga ñu. Noo tuhun ri maun chihin Nyoo coto tuhun cuan. Sií xaan cuñi yo tatu ña chicá uvi iñi yo noo cha chaha Nyoo ityi chí yo cha sacuvi yo.

²³ Soco ñu cha chachí ñáá cha chachí ñu, ta chicá uvi iñi ñu, chicoo cuatyí ñu, vatyí ña chinó vaha iñi ñu tyi cuví cachi ñu. Ta tandihí cha sacuvi yo chihin cha ña chiño iñi yo tyi chaha Nyoo ityi chí yo tyi sacuvi yo, cuatyí cuví.

15

Na sacuvi yo cha tahán iñi tahan yo, ta ñima cha tahán iñi ri maa yo

¹ Yoó cha ñihi nyaá yo chihin Nyoo, cuñi chí cha tyinyee yo chí ñu cha ña ñihi nyaá chihin Nyoo. Ta ma nducu yo cha tahán iñi ri maa yo.

² Tahan tahan yo cuñi chí cha sacuvi yo cuhva tahán iñi inga ñu cha cuenda cha vaha chí ñu, tacuhva cuví cuahnu ca ñu chihin tuhun Nyoo.

³ Vatyí ni ri ra Cristo ña sacuvi ra cuhva tahán iñi maa ra, soco cuví chí ra tari catyí nu tutu Nyoo tyehe caa: “Tandihí cha cahán ñáyivi chí Nyoo, chí ra Cristo cahán ñu”, catyí chí.

⁴ Vatyí tandihí cha chicunyaá nu tutu Nyoo ta ityi chata ca, chicunyaá chí cha cuenda cha cutuhva yo, tacuhva cuví cuatu yo cha cuñihi yo chihin cha cama iñi yo. Ta vaha cuñi añaíma yo cha cuenda cha sacuahá yo nu tutu Nyoo.

⁵ Ta Nyoo ican ra chahá cha cama iñi yo, ta chahá ra cha vaha cuñi añaíma yo. Na tyinyee ca ra chí yo cha coo yo chihin cha iin ri cuví yo chihin tahan yo tari cuhva iyó ra Cristo Jesús.

⁶ Vatyí tacuhva tandihí yo iin ri noo cuhva sacahnú yo chí Nyoo Sutu ra Jesucristo ra nyacá ñaha chí yo.

Ñáyivi ñima ñu Israel cuví, cucuiñi ñu tuhun Nyoo

⁷ Yucuan chaha tñin cuenda vaha yo chí tahan yo tacuhva vatyí sacahnú yo chí Nyoo tari tñin cuenda vaha ra Cristo chí

maa yo cha cuenda vatyi sacahnú ra chi Nyoo.

⁸ Vatyi catyí yuhu chi ndo vatyi ra Cristo quichí tyinyee ra chi yo cha cuví yo ñu Israel, tacuhva sacuví ra cha catyí Nyoo chi sutu chahnu yo tyi cusacuví ra. Ta tyicuan caa ta sañaha ra Cristo vatyi Nyoo sacuví ra cha catyí ra tyi sacuví ra.

⁹ Ta quichí tucu ra Cristo tacuhva vatyi ñu cha ñima ñu Israel cuví sacahnu tucu ñu cuan chi Nyoo, vatyi Nyoo ndahvi cuñí ra nyehe ra chi ñu, tari catyí nu tutu Nyoo tyehe caa:

Yucuan chaha cusacahni chuun chihin nuu ñu cha ñima ñu Israel cuví, tandihí ityi ñu iyó siquí ñuhu ñáyivi.

Ta cucate yaa cha cuenda cha sacahni chuun nuu ñu, catyí chí.

¹⁰ Ta inga tucu nu catyí chí nu tutu Nyoo tyehe caa:

Cusií cuñí nyoho ñu cha ñima ñu Israel cuví. Cusií cuñí ndo chihin ñu Israel cha cuví ñu ñáyivi cuenda Nyoo.

¹¹ Ta inga tucu nu catyí chí nu tutu Nyoo tyehe caa:

Sacahnu ndo chi Sutú Mañi yo, nyoho ñu cha ñima ñu Israel cuví.

Tandihí ñáyivi sacahnú ñu chí ra cha cuenda cha cahnu xaan cuví maa ra.

¹² Tyaá tucu ra Isaías nu tutu Nyoo tyehe caa:

Cuacu minoo ra vachi tata ra Isaí. Cuquichi ra vatyi cunyaca ñaha ra chí ñu cha ñima ñu Israel cuví.

Ta maa ñu cuquihí iñi ñu chí ra vatyi cusacacu ra chí ñu.

¹³ Nyoo ican ra chahá tunyee iñi chí yo ta chitó yo tyi cuhva ra cha cuhva ra chí yo. jNa sacutu ra chí ndo chihin tusí iñi! Ta coo cha taxi ri cuñí añima ndo cha cuenda cha chinó iñi ndo chí ra, tacuhva vatyi chihin tunyee iñi Tatyí Ii ra ta quihí vaha iñi ndo cha cucuhva ra chí ndo.

¹⁴ Yañi luhli, chitó vahi vatyi nyoho vaha xaan ñáyivi cuví ndo ta chitó ndo tandihí, ta chitó vaha ndo cuhva ndo tuhun chí tahan ndo.

¹⁵ Soco nu carta ihya ñihí xaan cahín siquí tandihí tuhun cha tyaá, tacuhva cha ma naa iñi ndo. Tyehe caa sacuví cha cuenda tyi Nyoo chahá ra tumañi iñi chí

¹⁶ cha sacuví tyiño nuu ra Jesucristo nu nyicu ñu cha ñima ñu Israel cuví. Ta tyiño cha sacuví, ican cuví cha cahín tuhun Nyoo yoso caa sacacú ra añima ñáyivi. Tyehe caa sacuví tacuhva vatyi ñu cha ñima ñu Israel cuví, cuví nacuhva cuende chí ñu chí Nyoo tari noo ofrenda cha tahan iñi ra, vatyi cha ndundí ñu nuu ra cha cuenda Tatyí Ii ra.

¹⁷ Cha cuenda cha nacuhva cuende chí chí ra Cristo Jesús, yucuan cuenda cuví

cusií cuñí ta chité tyi vaha quitá tyiño sacuví nuu Nyoo.

¹⁸ Vatyi ña cañá iñi cahin cha ña nyehí. Soco nacatyi cha sacuví ra Cristo nu chicá noi cahín tuhun Nyoo tacuhva vatyi ñu cha ñima ñu Israel cuví quichaha ñu chí Nyoo. Ta ihya ndicha cha cahín.

¹⁹ Vatyi chihin seña ta milagru ta chihin tunyee iñi Tatyí Ii ra sacuví ra. Ta tyicuan caa cahín tuhun cha cacu añima ñu sahá ra. Quichahí nya Jerusalén ta tandihí ityi ta nyacua nya Ilírico.

²⁰ Ta tyicuan caa saniñí cahin tuhun cha cacu añima yo maa maa ri nu ta cuiñí ca maa ñáyivi tuhun ra Cristo, tacuhva vatyi ma saha tyiñe nu quichaha saha tyiño inga ra.

²¹ Tari catyí nu tutu Nyoo tyehe caa: Cucoto ñáyivi cha ta coto ca maa tuhun ra. Ta cucutuñi iñi ñu cha ta ñaha ca maa cuiñí tuhun ra, catyí chí.

Nu tyaá ra Pablo cuhva cha cuhun ra ñuu Roma

²² Yucuan chaha ña cuví maa tuhun cha cuhin cunyehi nu nyicú ndo, vasi cuaha xaan chaha cuñí cuhin.

²³ Soco vityin cha ndihí tyiño sahí ityi ñuu ihya. Ta cha cuaha xaan cuiya cuñí cuhin cunyehi nu nyicú ndo ta cunyai suhva quívi chihin ndo.

²⁴ Nyehí tatu cuhin cunyehi nu nyicú ndo quívi cuhin España. Ta cha yaha cha cunyehi chí ndo, nyehí tatu cuví tyinyee ndo chíi ta cuchaa ndihí nu cuahín.

²⁵ Soco vityin cuahin ñuu Jerusalén ta nyisé suhva cha cutyinyee chí ñu cuenda Nyoo yucuan.

²⁶ Vatyi ñu vehe ñuhu ityi Macedonia ta ityi Acaya nacuaan iñi ñu cha tava ñu suhva xuhun vatyi sacuhun ñu chí ñu ndahvi ñu cuenda Nyoo cha iyó Jerusalén.

²⁷ Tyehe caa quichí cuví iñi ñu sacuví ñu. Ta ndicha vatyi tahan chí sacuví ñu. Vatyi tari maa ñu Israel, ñu chinó iñi chí ra Cristo, chahá ñu tuhun Nyoo chí ñu cha ñima ñu Israel cuví, tyicuan caa tahan chí chí ñu cuan tyinyee tucu ñu chí ñu Israel chihin cha iyó chí ñu.

²⁸ Yucuan chaha, tatu cha yaha sandai tyiño ihya, ta cha yaha nacuhva cuende xuhun ihya chí ñu Jerusalén, tyicuan ta cuhin nya España ta yahi nu nyicú ndo.

²⁹ Chitó vahi vatyi na cuhin nu nyicú ndo, cuhai chihin cha tyitu añime chihin cha vaha Nyoo cha chahá ra Cristo chíi.

³⁰ Yañi, chacú ndahvi nuu ndo na cu ñn ri ndo chihin, chihin tñdoho cha nyehí, ta çacan tahvi ndo chí Nyoo cha cuende vatyi cuñí ndo chí Sutú Mañi yo Jesucristo, ta vatyi chahá Tatyí Ii Nyoo cha cuñí ndo chíi.

³¹ Çacàn ndo cha cuende, na sacacu Nyoo chii ndaha ñu ña chinó iñi chi ra Cristo ityi Judea cuan. Ta çacàn ndo cha cuenda cha nyisé ihya cha cuenda ñu cuenda Nyoo ñu Jerusalén cuan, na nat̄in cuenda vaha ñu.

³² Vatyí tatu Nyoo ta cuñi ra, chihin cha s̄i cuñi quichi nyehi chi ndo ta cuví nyitati ñin ri chihin ndo.

³³ Ta Nyoo ra chahá cha taxi ri coo añima yo, na cunyaa ra chihin tandihí ndo. Ta ñacuvi tyicuan caa.

16

Nu sacuhún ra Pablo nocumi chi ñu amigo ra

¹ Sacoté chi ndo cha cuenda hermana Febe vatyí tyinyée xaan ña chi ñu yihí cuenda Nyoo ñuu Cencrea.

² T̄in cuenda vaha ndo chi ña tari t̄in cuenda Sutu Mañi yo, tari tahán chi sacuvi ñu yihí cuenda Nyoo. Ta tyinyee ndo chi ña chihin tandihí cha chiñuhu chi ña, vatyí cuaha xaan ñu tyinyee ña chi, ta chi yuhu ñandihí.

³ Cuhva ndo nocumi chi cu Priscila ta chi ra Aquila ñu cha cutahan chihin ndi nu tyiño cha sacuví ndi cuenda ra Cristo Jesús.

⁴ Chahnya iñi ñu ñayiví ñu quivi cuan cha cuenda cha sacacú ñu chii, yucuan chaha vatyí nacuhvé tyahvi nyoo chi ñu. Ta ñima yuhu ri, soco tandihí tucu ñu cha ñima ñu Israel cuví, ta yihí tucu ñu cuenda Nyoo.

⁵ Cuhva tucu ndo nocumi chi ñu yihí cuenda Nyoo cha candú ñin ri vehe cu Priscila ta ra Aquila. Vachi tucu nocumi chi ra tahin, ra Epeneto. Ican ra cuví ra cha xihna ca chino iñi chi ra Cristo ityi Acaya.

⁶ Cuhva ndo nocumi chi cu María. Sahá tyiño xaan ña nu nyicú ndo.

⁷ Cuhva ndo nocumi chi ñu ñui, ra Andrónico ta ra Junias, ra tahin cha ñohq chihin vehe caa. Cahnu tyiño casahá ra cuenda Sutu Mañi yo chihin tandihí ca ra sahá tyiño cuenda Nyoo. Ta xihna ca ra cachino iñi chi ra Cristo ican saha yuhu.

⁸ Cuhva ndo nocumi chi ra Amplias ra tahin cuenda Sutu Mañi yo.

⁹ Cuhva ndo nocumi chi ra Urbano, ra tahan yo cuenda tyiño ra Cristo Jesús, ta chi ra Estaquis ra tahin ñandihí.

¹⁰ Cuhva ndo nocumi chi ra Apeles. Nyehé yo tyi ndicha cha chinó iñi ra chi ra Cristo. Ta nocumi chi ñayiví chi ra Aristóbulo ñandihí.

¹¹ Cuhva ndo nocumi chi ra ñui, ra Herodión, ta chi ñayiví chi ra Narciso ñu cha chinó iñi chi Sutu Mañi yo.

¹² Vachi nocumi chi cu Trifena ta chi cu Trifosa, ñu casahá tyiño chihin Sutu Mañi yo. Ta chi hermana yo cu Pérsida, ñaha cha sahá tyiño xaan nu tyiño Sutu Mañi yo.

¹³ Cuhva ndo nocumi chi ra Rufo, noo ra cahnu cuví ra nuu Nyoo vatyí chinó vaha iñi ra chi Sutu Mañi yo. Ta vachi tucu noo cumi chi sihi ra Rufo. Cuví ña tari sihi.

¹⁴ Cuhva ndo nocumi chi ra Asíncrito, chi ra Flegonte ta chi ra Hermas, ta chi ra Patrobas, chi ra Hermes ta chi ra hermano cha canyicú chihin ra.

¹⁵ Cuhva tucu ndo nocumi chi ra Filólogo ta chi cu Julia ta chi ra Nereo chihin cuhva ra, ta chi ra Olimpás ta chi tandihí ñu cuenda Nyoo cha nyicú chihin ñu.

¹⁶ Ñacuhva ndo noo cumi chi noo noo tahan ndo cuenda Nyoo. Tandihí ñu yihí cuenda ra Cristo saquichí ñu nocumi chi ndo.

¹⁷ Yañi, chacú ndahvi nuu ndo, na saha ndo cuenda chi ñu cuñi sas̄in chi ndo, ta nducú ñu cuhva cha nduva ndo chihin tuhun Nyoo, vatyí ñima tyicuan caa cutuhva ndo tuhun ra Cristo. Ma cutahan ndo chihin ñu cuan.

¹⁸ Vatyí ñu cuan ñima tyiño nuu Sutu Mañi yo Jesucristo sacuví ñu, soco cuhva cuñi maa ñu sacuví ñu. Ta sandahví ñaha ñu añima ñayiví ndahvi chihin tuhun víta cahán ñu.

¹⁹ Tandihí ñayiví chitó yoso caa quichahá vaha ndo chi Nyoo. Yucuan chaha cus̄i xaan cuñi chihin ndo, ta cuñi vatyí natyihí tuñi vaha iñi ndo sacuvi ndo cha vaha. Ta ñaha cutuhva ndo sacuvi ndo cha ña vaha.

²⁰ Nyoo ra iyó tandihí cha taxi ri añima, numi ri cuhva ra cha saha ganaa ndo chi ra ña vaha, ta cuhva ra cha cuañi ndo siqui ra. Na nasoco Sutu Mañi yo Jesucristo chi ndo.

²¹ Ra Timoteo ra cuví ra tahin nuu tyiño sacuví ndi nuu Nyoo, saquichí ra nocumi chi ndo. Ta tyicuan caa tucu ra Lucio, ta ra Jasón, ta ra Sosípater, tandihí ra ñui cuan casaquichí ra nocumi chi ndo.

²² Yuhu ra Tercio savahi tutu ihya cha cuenda ra Pablo, suri saquichí tiqui nocumi chi ndo tyi ñin ri yihí yo cuenda Sutu Mañi yo.

²³ Saquichí ra Gayo nocumi chi ndo ñandihí. Vehe ra nyaí suri ihya ndú ñin ri ndi tandihí ñu yihí cuenda Nyoo. Ra Erasto ra cuví tesoreru ñuu ihya, saquichí ra nocumi chi ndo, ta yañi yo ra Cuarto ñandihí.

²⁴ Na cocumi Sutu Mañi yo Jesucristo chi tandihí ndo. Ta na cuví chi tyicuan caa.

Nu ndihí cahán ra Pablo ta sacahnú ra chi Nyoo

²⁵ Ta vityin na sacahnú yo chi Nyoo, vatyí maa ra cuví ra cucuhva cha cun̄i iñi ndo, ta ma sandihí ndo cha chinó iñi ndo tuhun ra cha sacacú ra añima yo. Ican cuví tuhun cahín ta tuhun cha sañahí cha cuenda ra Jesucristo. ñin ri cuví chi chihin tuhun cha

ñohō xehe ta cha naha nyata ni cumañi
chinq ñuhu ñayiví.

²⁶ Soco vityin sañahá Nyoo chi yo cha
cuenda tutu cha casandoq ra profeta, ra
cachahā cuenda tuhun ra ta cha naha.
Catyí Nyoo, ra iyó tyicuan ri maa, tyi vityin
tahán chi coto tandihí ñáyiví tacuhva chino
iñi ñu chi ra ta quichaha ñu tuhun cahán ra.

²⁷ Nyoo noo tuhun maa ra, ta chiñi tuñi
xaan ra. Na sacahnu yo chi ra cha cuenda
ra Jesucristo tyicuan ri maa. Ta na cuvi chi
tyicuan caa.

Carta Cha Xihna Ri Sacuhun Ra Apóstol Pablo Chi ñáyivi Ñuu Corinto Cha Yihí Cuenda Nyoo

Nu tyaá ra Pablo noo tutu chi ñáyivi ñuu Corinto cha yihí cuenda Nyoo

¹ Yuhu ra Pablo, nacana Nyoo chii vatyi cuñi ra cha cuvi noo apóstol ra Jesucristo, o cuñi chi catyi vatyi tachi ra chii nacaque tyiño ra. Yuhu chihin ra Sóstenes yañi yo

² saquichí ndi noo carta ihya chi ndo cha nyicú ndo vehe ñuhu cuenda Nyoo cha nyaá ñuu Corinto. Ñáyivi chi Nyoo cuvi ndo vityin, cha cuenda cha ndu ñin ri ndo chihin ra Cristo Jesús. Nyoo nacana ra chi ndo vatyi nanduvi ndo noo ñáyivi vaha cuenda ra, chihin tandihi ñáyivi cha sacahnú chi Sutu Mañi yo Jesucristo tandihi ri itiyi. Vatyi cuvi ra Nyoo cuenda ñu ta cuenda maa yo ñandihí.

³ Nyoo Sutu yo ta Sutu Mañi yo Jesucristo na nasoco ra chi ndo, ta nacuhva ra cha taxi ri coo aña ndo.

Yoso caa nasoco Nyoo chi ñu yihí cuenda ra

⁴ Tyicuan ri nacuhvé tyahvi nyoo chi Nyoo cha catyi maa ndo, vatyi chahá ra cha vaha chi ndo cuenda ra Cristo Jesús.

⁵ Ta cha ñin ri cuvi ndo chihin ra Cristo, Nyoo chahá ra tunyee ñiñi ra chi ndo tacuhva cuvi cahán ndo tuhun ra. Ta chahá ra cha chiñi tuñi vaha chi ndo.

⁶ Ta tandihí cha catyi chi ndo, tuhun ra Cristo, cuahán chino cava ñáyivi ndo vityin.

⁷ Yucuan chaha ñahri cha cumañi chi ndo. Chahá Nyoo tandihí cha vaha chi ndo cha ni ri ca cha nyatú ndo quivi quichi Sutu Mañi yo Jesucristo.

⁸ Nyoo cusaha cuenda ra chi ndo nyacua nya naa ñáyivi tacuhva yori cuvi catyi ñáá cha catyi chi ndo quivi quichi Sutu Mañi yo Jesucristo.

⁹ Nyoo tyicuan ri sacuvi ra tari cuhva catyi ra. Ta maa ra cuvi ra nacana chi ndo tyi cu ñin ri ndo chihin Sehe ra, ra Jesucristo, Sutu Mañi yo.

Tatu yihí yo cuenda Sutu Mañi yo, ña vaha cha cusin yo

¹⁰ Yañi, chiquén chi ndo chihin sivi Sutu Mañi yo Jesucristo, na ñin ri cuvi ndo ta ma cusin ndo. Ta ñin ri cuhva çaça xiñi ndo. Ta ñin ri tuhun quihí ñiñi ndo.

¹¹ Catyi chi ndo tyehé caa, yañi, tyi catyi ñáyivi chi ra Cloé chii, vatyi iyó tisihi nu nyicú ndo.

¹² Vatyi nyoho sin sin cuhva cahán ndo. Noo ndo catyi ndo: “Yuhu, cuenda ra Pablo

yihí.” Inga ndo catyi ndo: “Yuhu, cuenda ra Apolos yihí.” Inga ndo catyi ndo: “Yuhu, cuenda ra Pedro yihí.” Inga ndo catyi ndo: “Yuhu cuenda ra Cristo yihí.”

¹³ ¿Atu tahvi sava ra Cristo? ¿Atu chihj yuhu ra Pablo nu cruzi cha catyi ndo? ¿Atu condutyá ndo chihin sivi yuhu? Ñima.

¹⁴ Tyahvi nyoo chi Nyoo vatyi yuhu ña sacondutyé chi ni noo nyoho. Soco noo ri sacondutyé chi ra Crispo ri chihin ra Gayo ri.

¹⁵ Tyicuan caa ta ni noo ndo ta ma cuvi catyi ndo vatyi condutyá ndo chihin sivi.

¹⁶ Aan, ta suri sacondutyá tiqui chi ñáyivi chi ra Estéfanos. Soco ña nicohón ñiñi cha sacondutyé chi inga ndo.

¹⁷ Vatyi ra Cristo ña tachj ra chii tyi sacondutyé. Soco tachj ra tyiño chii vatyi cahin tuhun ra yoso caa sacacú ra chi yo. Soco ña cahin chihin cha chiñi tuñi ñáyivi ihya, coto catyi ñáyivi chii tyi ñahri yahvi nyaá cha chihj ra Cristo cuenda cuatyi yo.

Vaha ca cha chiñi tuñi Nyoo ta ñima ca cha chiñi tuñi ñáyivi ihya

¹⁸ Tuhun cha chihj ra Cristo nu cruzi cha catyi cuatyi yo, ñima ri tuhun cuvi cuan cha cuenda chi ñáyivi cha cunaan nu cuvi anyaya. Soco cha cuenda chi maa yo cha cuvi yo ñáyivi cacú aña, tunyee ñiñi cha chahá Nyoo chi yo cuvi cuan.

¹⁹ Vatyi tyicuan caa tucu catyi maa tuhun Nyoo:

Cusanai cha chiñi tuñi ra cuñi maa tyi chitó xaan.

Ta cha chitó xaan ra chiñi tuñi cutave ñin chiyo xiin, catyi Nyoo.

²⁰ Ñahri tuhun cha chitó xaan ra chiñi tuñi, ta ra sacuahá, ta ra chitó xaan nacahan ñáá ndihí tuhun iyó siqui ñuhu ñáyivi ihya. Vatyi cha chiñi tuñi cha iyó siqui ñuhu ñáyivi ihya, cha ñima ri tuhun nasahá Nyoo chi cuan.

²¹ Nyoo chihin cha chiñi tuñi ra tyaá ra cuhva vatyi ma cuvi cohon nuu ñáyivi chi ra chihin cha chiñi tuñi cha iyó siqui ñuhu ñáyivi ihya, soco tyaá ra cuhva vatyi sacacú ra chi ñu chinó ñiñi tuhun cha cahan noo ñáyivi nuu ñu. Vasi ñima ri tuhun cuvi tuhun cuan cha cuenda ñu cha ña ñohó nuu chi Nyoo.

²² Vatyi ñáyivi Israel cuñi ñu nyehe ñu milagru. Ta ñu Grecia maa maa ri maa cha chiñi tuñi ñáyivi ihya nanducú ñu.

²³ Soco yoó sacotó yo tuhun ra Cristo, ra chihj nu cruzi. Ta ñáyivi Israel cahán nuu ñu chiñi ñu tuhun ihya. Ta ñu cha ñima ñu Israel cuvi, cuñi maa ñu tyi tuhun cha ñima ri tuhun cuvi ihya.

²⁴ Soco cha cuenda chi ñu nacana Nyoo, an cuvi ri ñu ñu Israel, o ñu Grecia, ra Cristo cuvi tunyee ñiñi ta cha chiñi tuñi Nyoo.

²⁵ Vatyí cuñí maa ñáyiví vatyí noo cha ñíma ri tuhun cuví cha sacuví Nyoo. Soco chiñi tuñi xaan ca Nyoo ta ñíma ca ñáyiví iyó siqui ñuhu ñáyiví ihya. Ta cuñí maa ñáyiví tyi ña ñihí fuerza Nyoo. Soco ican cuan cuví fuerza cha ñihí ca cha nuu fuerza tandihí ñáyiví.

²⁶ Yañi, cuñí chi coto ndo vatyí Nyoo nacaná ra chi ndo vasi maa ri ñáyiví soho cuví ndo, ta mañi ndo cuví ndo ñáyiví tyayii o ñáyiví chító xaan cha chiñi tuñi ñáyiví ihya.

²⁷ Soco Nyoo nacachí vaha ra chi ñáyiví soho. Vatyí cuhvá ñu tichan nuu chi ñu cuñí maa tyi chiñi tuñi xaan. Ta nacachí vaha ra chi ñáyiví ñahri fuerza vatyí cuhva ñu tichan nuu chi ñu cuñí maa tyi iyó xaan fuerza.

²⁸ Nyoo nacachí vaha ra chi ñáyiví ndahví cha cuñí maa ñáyiví tyi ña chiñuhú ñu. Nacachí ra chi ñáyiví cha ña cuñí nyehe ñáyiví chii, vatyí sanocuee ra chi ra cuví tyiño nahnu.

²⁹ Tyicuan caa sacuví Nyoo tacuhva tyi yori sacahnú chii nuu ra.

³⁰ Soco maa maa Nyoo sacu ñin ri ra chi yo chihin ra Cristo Jesús. Ta sacuví ra tyi ra Cristo cuhva ra cha chiñi tuñi chi yo, ta sacuvahá ra chi yo ta sandundí ra chi yo nuu Nyoo vatyí tyiyahví ra chihin ñihí ra cha catyí cuatyí yo, tacuhva cuví cacu yo.

³¹ Yucuan chaha sacuví yo tari cuhva catyí nuu tutu Nyoo tyehe caa: “Tatu yóo cha cuñí cuyaa, vaha na cuyaa maa soco chihin Nyoo.”

2

Tuhun ra Cristo, ra chihí nu cruzi

¹ Soco yañi, quiví cahin chichahin tuhun Nyoo chihin ndo, ña cahin tuhun cha chiñi tuñi ñuhu ñáyiví ihya.

² Soco maa ri maa tuhun ra Jesucristo, yoso caa chihí ra nu cruzi cha catyí cuatyí yo tyaj xiñi ta nacatyí chi ndo.

³ Ta chaj nu nyicu ndo tari cha ñahri fuerze. Ta ñihí chihin cha yuhví.

⁴ Ta cuhva cha cahin nuu ndo, ña cahin chihin tuhun tyaqui tuhun cha chiñi tuñi tari cahán noo ra chító xaan. Ñíma. Soco chihin fuerza maa Tatyí Ii Nyoo cahin chihin ndo.

⁵ Tacuhva vatyí nachino ñi ndo chi Nyoo soco cha cuenda fuerza maa Nyoo. Ta ñíma cha cuenda cha chiñi tuñi ñáyiví ihya.

Nyoo chahá ra cha cohon nuu yo chí ra chihin Tatyí Ii ra

⁶ Soco suvita ri tyi cahán ndi tuhun cha chiñi tuñi chihin ñu cha ñihí ca nyaá chihin tuhun Nyoo. Soco cha chiñi tuñi Nyoo, ta ñíma cha chiñi tuñi ñuhu ñáyiví ihya, ni ri

cha chiñi tuñi ra nyacá ñaha siqui ñuhu ñáyiví. Vatyí maa ra cucunaa ra.

⁷ Soco tuhun xehe cha chiñi tuñi maa Nyoo cahán ndi. Vatyí Nyoo chicumí xehe ra minoo tuhun vaha nya ta ni cumañi chino ñuhu ñáyiví ihya. Vatyí tyaq ra cuhva tyi cucacu añíma yo ta cunyaa yo noo nu vaha chihin ra tyicuan ri maa.

⁸ Ta tuhun ihya ta cutuñi ca ñi ni noo ra nyacá ñaha ñuhu ñáyiví ihya. Vatyí tyehe ta cutuñí ñi ra, ma catyaa ra chi Sutu Mañi yo, ra nyacá ñaha gloria, nu cruzi.

⁹ Soco tari cuhva catyí maa tuhun Nyoo: Nyoo sanduvahá ra noo cha vaha xaan tyi cuhva ra chi ñáyiví cha cuñi chi ra. Ta ni noo ñáyiví ta nyehe ca ñu, ta ta cuiñi ca ñu, ta ta ndichi ca xiñi ñu yoso cuhva cha vaha cha chahá Nyoo chi yo, catyí tuhun Nyoo.

¹⁰ Soco Nyoo chahá ra Tatyí Ii ra vatyí cutuñi ñi yo tuhun ihya. Vatyí Tatyí Ii ra sañahá chí tandihí chí yo nyacua nya tuhun cha xehe ca cha cumí maa Nyoo.

¹¹ Ma cuví coto noo ra cha chicá xiñi inga ra. Soco suri maa ra chító ra cha chicá xiñi maa ra. Ta tyicuan caa tucu noo ri Tatyí Ii Nyoo chító cha yihí ñi maa Nyoo.

¹² Yoó ñíma cha chiñi tuñi ñuhu ñáyiví naquehen yo, soco maa Nyoo chahá ra Tatyí Ii ra chí yo vatyí sacoto chí chí yo yoso caa cha tyaqui cha chahá Nyoo chí yo.

¹³ Tuhun cha cahán ndi chihin ndo ihya, tuhun cha sañahá maa Tatyí Ii Nyoo chí ndi cuví. Ñíma tuhun cha cutuhva ri maa ndi chihin cha chiñi tuñi xiñi ndi. Nacatyí ndi tuhun cha sañahá Tatyí Ii Nyoo chí ndi chí ñu cha yihí Tatyí Ii Nyoo chí.

¹⁴ Soco ñu cha ña yihí Tatyí Ii Nyoo chí, ña cutuñí ñi ñu ta ña cuñí ñu cuiñi ñu cha sañaha Tatyí Ii Nyoo chí ñu, vatyí cuñí maa ñu tyi tuhun cha ñíma ri tuhun cuví cuan. Vatyí ñin ri maa ñu cha yihí Tatyí Ii Nyoo cuví cutuñí ñi ñu tuhun cuan.

¹⁵ Soco ñu yihí Tatyí Ii Nyoo cuví cutuñi ñi ñu. Ta chító ñu tatu vaha o ña vaha ñáá noo tuhun. Soco ma cuví catyí inga ñáyiví tatu vaha o ña vaha cha caá añíma maa ñu.

¹⁶ Vatyí tuhun Nyoo catyí chí: “Yori chító tuhun cha chicá xiñi Sutu Mañi yo. Yori cuví sañahá chí Nyoo”, catyí tuhun Nyoo. Soco yoó cha yihí yo Tatyí Ii Nyoo, chító yo cha chicá xiñi ra Cristo.

3

Ña tahán chi cunyicon yo chí noo ra yañi yo, chí Nyoo na cunyicon yo

¹ Soco yañi, quiví cuan ña cuví cahin chihin ndo tari cahin chihin ñu saquehén ityí Tatyí Ii Nyoo chí, soco cahin chihin ndo tari cahin chihin ñu ni nachino ñi chí

Nyoo, tari cha vatyi ni nyihi ndo chihin tuhun ra Cristo cuví cuan.

² Cahin chihin ndo chihin tuhun cha ña yii ri cutuñi iñi ndo. Tari chahá yo sicui coho cha lee cha ta cuví ca cachí nyayu, tyicuan caa sacuví chihin ndo. Vatyi nyoho, quívi cuan ta cuví ca chi ndo. ¡Ta ni vityin ta ta cuví ca chi ndo!

³ Vatyi ni chicá ca xiñi ndo cuhva chicá xiñi ñáyivi iyó siqui ñuhu ñáyivi ihya. Nyiyó iñi ndo. Iyó tisihi nu nyicú ndo. Cacusiin ndo. Ni chicá ca xiñi ndo tuhun ñuhu ñáyivi ihya. Ta nyacuví ndo tari nyacuví ñáyivi cha ña ñohó nuu Nyoo.

⁴ Vatyi yihí ndo catyi ndo: “Yuhu cuenda ra Pablo yihí.” Ta inga ndo catyi ndo: “Yuhu cuenda ra Apolos yihí.” Cuñi chí catyi tyi nyacuví ndo tari nyacuví ñáyivi ña ñohó nuu chi Nyoo.

⁵ Vatyi ¿yóo ra cuví yuhu, ra Pablo? Ta ¿yóo ra cuví ra Apolos? vatyi cañi tahan ndo cha catyi ndi. Vatyi noo ra casacotó tuhun Nyoo chi ndo cuví ndi. Ta yucuan chaha nachino iñi ndo chi Sutu Mañi yo. Ta noo noo ndi sacuví ndi tyiño cha catyi maa Nyoo tyi sacuví ndi.

⁶ Yuhu tachí chiti tuhun Nyoo añima ndo. Ta ra Apolos chosó ra. Soco Nyoo sacuahnu ra tuhun ra añima ndo.

⁷ Ta yucuan chaha ni ri ra cha tachí ta ni ri ra cha chosó, ñahri ra cuví ra. Soco Nyoo cuví ra tandihi. Vatyi maa ra sacuahnú ra tuhun ra añima ndo.

⁸ Ra cha tachí ta ra cha chosó, ñin ri ra cuví ra. Ta cuñihi ra nu vaha sahá Nyoo yoso cuhva tyiño sahá noo noo ra.

⁹ Ta tyicuan caa nyuhu, sahatyiño ndi soco tyiño nuu Nyoo. Ta nyoho cuví ndo tari noo ñuhú nu sahá tyiño Nyoo.

Cuví tucu ndo tari noo vehe cha cuahán savaha Nyoo.

¹⁰ Catyi Nyoo tyi yuhu cuví tari noo ra cuví nuu cha sama vehe. Vatyi chaquín cuhva vehe cuan ta tyihí chaha chí ñuhú. Ta inga ra samá ityi siqui. Soco cuñi chí sahá ra cuenda yoso cuhva samá ra siqui cuan.

¹¹ Ta yori cuví cacun inga cuhva vatyi cha caá cuhva cuan. Vatyi suri maa ra Jesucristo cuví cuhva cuan.

¹² Ta siqui cuhva cuan cuví sama yo chihin xuhun cuaan, chihin xuhun cuichin, chihin yuu tyaqui, o chihin vitu, o chihin tuñama o chihin ndaha numa.

¹³ Soco quívi cutuñi chí ñáyivi, cunyehe ra Cristo tyiño sahá noo noo yo. Vatyi cuquichi ra chihin ñuhu. Ta ñuhú cuan cucahmi chí nya cha ña vaha.

¹⁴ Ta tatu yihí ñu sacuví ñu tyiño vaha, ma cayu chí. Cuñihi ñu cha cuhva Nyoo chí ñu.

¹⁵ Soco tatu tyiño sahá ñu ta ndii cayu, cunaa tandihi tyiño sahá ñu. Cacu maa ñu soco tari noo ra cha cuyatyi ca quita nu ñuhu. Vatyi chiin cuí ri ca ta cayu ra.

¹⁶ ¿Atu ña chitó ndo vatyi vehe ñuhu Nyoo cuví chí ndo, ta Tatyí li Nyoo iyó ra añima ndo?

¹⁷ Tatu nya noo ñu sativí vehe ñuhu Nyoo, Nyoo cusanaa ra chí ñu, vatyi vehe ñuhu Nyoo, cha ii cuví. Ta vehe ñuhu cuan ican cuví maa yo.

¹⁸ Ni noo ndo ta ma sandavi ñaha ndo chí ndo. Tatu nya nyoho cuñi maa ndo tyi chitó xaan ndo cha chiñi tuñi ñáyivi ihya, ndahvi sáha ndo chí ndo tari noo ra cha ña chitó maa. Tyicuan ta Nyoo cuhva ca ra cha chiñi tuñi vaha chí ndo.

¹⁹ Vatyi cha chiñi tuñi ñáyivi ihya cuví chí noo cha ñima ri tuhun nuu Nyoo. Vatyi tuhun Nyoo catyi chí: “Nyoo sanacavá ra chí ra chitó, suri maa nu trampa cha savaha ra.”

²⁰ Ta catyi tucu chí: “Sutu Mañi yo chitó ra vatyi cha chicá xiñi noo ra chitó, cha ñima ri tuhun cuví.”

²¹ Yucuan chaha ni noo ndo ña tahán chí sachahnú ndo chí ndo tatu nyicón ndo chí noo rayii. Vatyi tandihi cha iyó ta chí maa ndo cuví, tyi maa Nyoo chahá ra chí ndo.

²² Yuhu ra Pablo, ra Apolos, ra Pedro, maa Nyoo chahá ra chí ndi chí ndo tyi nacatyi ndi tuhun ra chí ndo. Ta ñuhu ñáyivi ihya, ñáyivi iyó yo, tuhun chihi, cha cuví vityin, cha cuví nu cuahan ca chí, tandihi ta chí maa ndo cuví.

²³ Ta ñin ri, maa ndo, chí ra Cristo cuví chí ndo, ta ra Cristo, chí Nyoo cuví chí ra.

4

Ma sachahnu yo chi yo ta ni chi noo yañi yo

¹ Cuñi chí vatyi nyehé ndo chí ndi tari noo ra sahá tyiño chihin ra Cristo. Vatyi tyaá Nyoo tyiño chí ndi vatyi sañaha ndi tuhun xehe ra cha ña chitó ñáyivi nu quichi chí.

² Ta cuñi chí vatyi nyuhu cha cuví ndi musu Nyoo nyita ri quichahá ndi tandihi cha catyi ra chí ndi.

³ Soco cha cuenda yuhu, ña quichahí tatu cahán ndo chí. O tatu cutuñi chí nuu noo ra cuví tyiño, ñahri cuende. Ta ni ri mai ta ña catyi tyi vahi.

⁴ Vasi tuví iñi mai tyi ñahri ca cuatyi, soco ña cuñi chí catyi vatyi ñahri cuatyi nuu Nyoo. Vatyi nuu maa Sutu Mañi yo cucutuñi chí yo.

⁵ Ican tuhun, nyoho ma cahan ndo chí ndi. Cuatu ndo quívi quichi ra Cristo. Ta maa ra cutava nu ndichin cha ñohó xehe nu ñaa iñi. Vatyi cusanatuví ra cha caá añima

noo noo yo. Tyicuan ta Nyoo cutiyahvi ra yoso cuhva sacuvj noo noo yo.

⁶ Yañi, cahin tuhun ihya chihin ndo cuenda cha vaha chi maa ndo. Vaty nyehé ndo cuhva iyé, ta cuhva iyó ra Apolos. Vaty ña cahnu sahá ndi chi ndi. Ta tyicuan caa tucu maa ndo, cutuhva ndo sacuvi ndo tari catyí nu tutu Nyoo: Ma cahnu saha ndo chi ndo. Ta ñima chi noo ri ra cuñi ndo. Soco inuu ri cuhva cuñi ndo chi tandihi ñáyivi.

⁷ Ni noo ndo ta ña cahnu ca ra cuví ndo ican saha inga ndo. Vaty cha iyó chi ndo maa ri maa cha chahá Nyoo cuví. Yucuan chaha ña tahán chi cha sacahnú ndo chi ndo, vaty ñima maa ndo ñihj.

⁸ Cha cuhva cha cuñi maa ndo vaty tandihi tuhun Nyoo chitó ndo, ta ñahri ca cha cumañi chi ndo. Ta cuñi maa ndo tyi Rey cuví ndo. Ta ña chiñuhú ca nyuhu chi ndo, cuñi maa ndo. Vaha tyehe ta tyicuan caa, tacuhva vaty cuví tucu nyuhu rey chihin ndo.

⁹ Nyuhu cha cuví ndi apóstol, tari maa cha sandoq Nyoo chi ndi nya chata ca, cahvi iñi. Vaty nyehé xaan ndi tindoho. Cuví ndi tari noo ra iyó cuatyí, ta tari quivi cha yahá policía chihin ndi ityi cahnu vatyí tacuhva tyi nyehe ñáyivi ta ángel chi ndi.

¹⁰ Sahá ñáyivi tyi ra tondo cuví ndi cha cuenda ra Cristo. Ta nyoho cuñi maa ndo tyi chitó xaan ndo tuhun ra Cristo. Nyuhu cuví ndi tari noo ra cha ñahri fuerza, cha ni ri ca cha nyoho cuñi maa ndo tyi cuaha xaan fuerza ndo iyó. Tasi cuñi nyehe ñáyivi chi ndi, ta chi nyoho sahá ñu ñáyivi.

¹¹ Nya vityin, nyehé ndi tindoho. Chisocó ndi. Ityi ndi ndutyta. Cumañi sahama ndi. Ñahri vehe ndi iyó. Ta ñáyivi, tasi iñi ñu chi ndi.

¹² Ta chitatú ndi cha sahá tyiño ndi chihin ndaha ndi. Cahán ñáyivi chi ndi. Soco nacahán ndi chihin cha vaha nu cahan ñu. Chicá nyicon ñu chi ndi soco cunyeé ndi.

¹³ Cahán ña vaha ñu siqui ndi. Soco ña yatyin iñi ndi, vita ri chaha ndi tuhun chi ñu. Sahá ñu tari noo mihin chi ndi. Sahá ñu tari noo cha ña chiñuhú ca chi ñáyivi chi ndi. Tyicuan caa sacuví ñu nyacua nya vityin.

¹⁴ Sacuhin tuhun ihya chi ndo, soco ñima ticahan nuu chahí chi ndo. Soco chahí tuhun chi ndo tari chahí tuhun chi sehi tyi cuñi chi ndo.

¹⁵ Soco vasi uchi mil ra sacuahá sañahá tuhun ra Cristo chi ndo, soco ña cuaha sutu ndo iyó. Yuhu cuví sutu ndo cha cuenda tuhun ra Cristo Jesús. Vatyí sañahí chi ndo yoso caa cacú añima ndo.

¹⁶ Ta tyicuan caa catyí chi ndo na cunyicon ndo cuhva iyé.

¹⁷ Yucuan chaha tachí chi ra Timoteo, sehi cuenda Sutu Mañi yo, nu nyicu ndo. Nii xaan iñi ra nyicón ra chi Nyoo. Ta cuñi xain chi ra. Maa ra cuasanicohon ra iñi ndo yoso cuhva iyé, vatyí chinó iñi chi ra Cristo. Cusañaha ra chi ndo yoso cuhva sañahí tandihi ri vehe ñuhu.

¹⁸ Yihí nyoho cahnu sahá ndo chi ndo. Cuñi maa ndo vatyí ma cuhun que nu nyicú ndo.

¹⁹ Soco tyai cuhva tyi cunyehe nu nyicu ndo cha numi ri, tatu Sutu Mañi yo ta cuñi ra. Tyicuan ta cunyehe tatu ndicha cha iyó fuerza Nyoo chi ra cahnu sahá chii chiña, o tatu cacahán ri maa ra.

²⁰ Vatyí tatu ndicha cha chahá ra cha cunyaca ñaha Nyoo chi ra, ma cahan ri ra. Soco cuatuvi iñi yo vatyí nyaá fuerza Nyoo chihin ra.

²¹ ¿Ñáa cha cuñi nyoho vii? ¿Atu cha quichi tachí tuñi chi ndo, o cha quichi nyehi chi ndo chihin cha vita iñi?

5

Nu cutuñi chi noo ra chiyo chihin sihi queen

¹ Catyí ñu chii vatyí iyó noo nyoho cha iyó ndo chihin sihi queen ndo. Ilya cuví noo cuatyí cha cahnu xaan, vatyí ni ñu ña ñohó nuu chi Nyoo ta ña nyacuví ñu tari nyoho.

² ¡Ta tyicuan caa ta cahnu sahá ndo chi ndo cha nuu cha cucuihyá iñi ndo! Cuñi chi vatyí catyí ndo chi ra cha nyacuví cha quiñi caa cuan vatyí ma cutahan ca ra chihin ndo.

³⁻⁴ Vasi ña nyaí chihin ndo chihin coño ñuhi, soco cohon iñi ndo vatyí ñohó iñi tuhun ndo, tari cha nyaá mai chihin ndo cuví cuan. Ta cha sandaj tyiño ra cha sacuví cuatyí cuan chihin sivi maa Sutu Mañi yo Jesucristo. Cuñi chi tyi ndu in ri ndo. Ta saha ndo tuhun tyi nyaí chihin ndo. Ta cunyaa fuerza maa Sutu Mañi yo Jesús chihin ndo ñandihí.

⁵ Tyicuan ta cuñi chi vatyí nacuhva cuenda ndo chi ra cuan chi cuihna, tacuhva nativi ndihí coño ñuhu ra. Ta cuhva cuví cacu añima ra quivi quichi Sutu Mañi yo Jesucristo.

⁶ Ña tahán chi sacahnu ndo chi ndo chihin cha sacuví ndo. Vatyí nyehé ndi ndo nyacuví ra cuan cha quiñi caa. ¿Atu ña chitó ndo noo tuhun cha catyí chi vatyí chihin chiin ri yuchan iya ta nandaa nanii yuchan pan?

⁷ Tava ñehe ndo yuchan iya chahnu cha cuví cha ña vaha cha sativí chi ndo. Tyicuan ta cuví ndo tari pan cha ñahri yuchan iya yihí chihin, cha tuhva yo chachí cha vico pascua. Ta pan cuan, ican cuví ndo vatyí ra Cristo cuví mbee cha chihí cha catyí cuatyí yo.

⁸ Yucuan chaha tahán chi cachi coo yo cuenda cha chihí maa ra Cristo cha catyi yo. Ta sandoó yo cha quiñi caa cha sacuvi yo itiy chata cha cuví tari yuchan iya chahnu. Ta चाहं yo maa maa ri cha ndicha chihin cha ni iñi yo. Vatyí cuví chi tari pan cha ñahri yuchan iya yihí.

⁹ Nu inga carta cha yahá saquichi chi ndo, catyi chi ndo vatyí nyoho ma cohon naha ndo tuhun chihin ñu cha sacuvi cha iyó ri maa chihin ñusihí o rayíi.

¹⁰ Ta cha catyi chi ndo tyehe caa, ñima cha cuachiyó ndo ingaña ri nu nyicú ñu cha iyó chihin rayíi o ñusihí, ta ñima yíi ñu o ñasihí ra cuví, o ñu nyiyó iñi, o ñu nhuu, o ñu sacahnú xitohyo. Vatyí tatu tyicuan caa, cuñi chi cha quita ndo ingaña ri ñuhu ñayiví.

¹¹ Soco cha cuñi catyi chi ndo vatyí ma cohon naha ndo tuhun chihin noo ñu cha catyi vatyí hermano cuví ñu, ta iyó ri maa ñu chihin rayíi o chihin ñusihí ta ñima yíi ñu o ñasihí ra cuví, o nyiyó iñi ñu, o sacahnú ñu xitohyo, o cuendu ñu, o chihí ñu ndixí, o suhú ñu. Ñu cha caá tyehe caa, ni cha ma cunyaa ndo cachi ndo chihin ñu.

¹²⁻¹³ Vatyí yoó ña tahán chí sahá yo cuenda chí ra ña ñohó nuu chi Nyoo. Nyoo cuví ra sahá cuenda chí ñu cuan. Soco nyoho cuñi chí sahá ndo cuenda chí ñu yihí cuenda Nyoo. Yucuan chaha tavá ñehe ndo chí ra iyó cuatyí chiña nu nyicu ndo.

6

Ma cacan yo cuatyí chaha noo yañi yo cuenda Nyoo nuu ra cuví tyiño

¹ ¿Yoso caa quichi cuví iñi nyoho chicán ndo cuatyí chaha tahan ndo nuu ra cuví tyiño cha ña yihí cuenda Nyoo chihin ndo, cha nuu cha sacotó ndo chí ra yihí cuenda Nyoo, tacuhva canyehé ra nya ra iyó cuatyí?

² ¿Atu ña chitó ndo vatyí suri maa ndo cusandaa ndo cuatyí ñáyiví iyó siqui ñuhu ñayiví ihya nu cuahan ca chí? Ta tatu maa ndo cusandaa ndo cuatyí cuan, ¿atu ma cuví sandaa ndo noo tyiño cha ñima ri tuhun ihya?

³ ¿Atu ña chitó ndo vatyí nyacua nya ángel ta cutuñi chí ra nuu yo? ¿Ta nyaca cuví noo tuhun luhlu ñayiví ihya!

⁴ Yucuan chaha tatu iyó tisihi nu nyicú ndo, ¿ñáá tuhun cuahan ndo nuu ra cuví tyiño cha ña chitó tuhun Nyoo?, ta ñahri tyiño cuví ra cuan vehe ñuhu nu nyicú ndo.

⁵ Ihya ndicha tuhun catyi chí ndo, na coo chiin ticahan nuu nuu ndo. ¿Atu yori ndicha cuí noo ra cuví sandaa noo tyiño yañi yo nu canyicú nyoho chiña?

⁶ Vatyí cuahan ndo cua cacan ndo cuatyí chaha yañi yo cuenda Nyoo nuu noo ra cuví tyiño cha ña chiño iñi chí Nyoo.

⁷ Cha iyó tisihi nu nyicú ndo, ña vaha. Vaha taxin ca cunyeer ri ndo tatu sacuvi ñu cha ña vaha chihin ndo. Saña ndo, na suhu maa ñu cha chíi ndo.

⁸ ¿Soco nyoho suri maa ndo sataśi ndihi ca iñi ndo chí ñáyiví, ta nyacua nya cha chíi yañi ndo ta suhú ndo!

⁹⁻¹⁰ ¿Atu ña chitó ndo vatyí ñu quiñi iyó ma quihvi ñu nu nyacá ñaha Nyoo? Ma sandavi ñaha ndo chí ndo. Ma quihvi tandihi ñu iyó ri maa chihin ñusihí o chihin rayíi cha tyicuan ri caa. Ta ni ri ñu cha sacahnú xitohyo, ni ri ñáyiví cha iyó ñasihí o yíi, ta cavá noo ñu chihin inga ñaha o chihin inga rayíi, ni ra iyó chihin tahan yíi, ni ra suhú, ni ra nyiyó iñi cha tyayíi, ni ra chíi, ni ri ñu cuendu, ni ri ñu chitó yoso caa sacuvi cha quiñi caa, ma ñihi ñu cha vaha nu nyacá ñaha Nyoo.

¹¹ Vatyí tyicuan caa cuví suhva nyoho. Soco Nyoo cha sandundú ra añaima ndo chihin Tatyí Ii ra. Cha sacuvahá Sutu Mañi yo Jesucristo chí ndo nuu Nyoo.

Coño ñuhu yo cuví vehe ñuhu Nyoo

¹² Catyi chí tuhun vatyí libre iyó yo cha sacuvi yo tandihi cha cuñi yo. Cha ndicha cuví. Soco ña tandihi ta cuví chí cha vaha chí yo. Ndicha libre iyó yo cha sacuvi yo tandihi, soco saha yo cuenda tatu cha vaha cuví o cha ña vaha. Ta ma cuhva yo cha cunyaca ñaha chí chí yo.

¹³ Catyi ñáyiví vatyí चाहं Nyoo nyayu cha cuenda chichi yo. Ta चाहं ra chichi yo cha cuenda cha cachi yo nyayu. Cha ndicha cuví. Soco nanduvi cuan cusanaa Nyoo quivi naa ñayiví. Ta ña ndicha cha coño ñuhu yo cuví cha cuenda cha sacuvi yo cha ña vaha chihin ñusihí o chihin rayíi. Vatyí coño ñuhu yo cuenda Sutu Mañi yo cuví. Ta maa Sutu Mañi yo cuví ra cuenda coño ñuhu yo.

¹⁴ Tari sanandoto Nyoo chí ra Cristo Jesús, tyicuan caa cusandoto ra chí yo chihin tunyee iñi ra.

¹⁵ ¿Atu ña chitó ndo vatyí tandihi yo cha yihí yo cuenda ra Cristo nanduvi yo noo coño ñuhu chihin ra? Ta noo noo yo cuví tari suhva ri coño ñuhu ra. ¿Atu quehen yuhu chiin coño ñuhu ra Cristo ta sativí chihin noo ñaha cata iñi? Ña tahán chí cunyacuvi yuhu tyicuan caa.

¹⁶ ¿Atu ña chitó ndo vatyí tatu noo rayíi ndu ñn ri ra chihin noo ñaha cata iñi, noo ri coño ñuhu nanduvi ra chihin ña? Vatyí nu tutu Nyoo catyi chí tyehe caa: “Cha nanduvi ñu, noo ri nanduvi ñu.” Ta ña tahán chí cu ñn ri ra yihí cuenda Nyoo chihin ñaha cata iñi.

¹⁷ Soco tatu noo ñáyiví nacuhvá cuenda ñu añaima ñu chí ra Cristo, yucuan cuví nu

quihví Tatyí lí ra añima ñu ta noo ri nanduví ñu chihin ra.

¹⁸ Sanaa ndo ifi ndo tatu quichi cuví ifi ndo chi ñusihí o rayíi tatu ñima ñasihí ndo o ñima yíi ndo cuví. Vatyí tandihí inga nu cuatyí cha nyacuví ñáyiví ña sativí chi coño ñuhu ñu. Soco ñu nyacuví cuatyí chihin cha iyó ñu chihin ñusihí o rayíi cha tyicuan ri caa, sativí ñu coño ñuhu ñu.

¹⁹ ¿Atu ña chitó ndo vatyí coño ñuhu yo cuví vehe Tatyí lí cha chahá Nyoo chí yo, vatyí cunyaa ra chihin yo? Yoó ñima maa yo nyacá ñaha yo chí yo, Nyoo cuví ra nyacá ñaha chí yo.

²⁰ Vatyí Nyoo satá ra chí yo ta yahví xaan chahá ra chí yo. Yucuan chaha cuñí chí vatyí sacahnú yo chí Nyoo chihin coño ñuhu yo, ta chihin cha chiñí tuñí yo vatyí ninduví cuan, chí maa Nyoo cuví.

7

Chahá ra Pablo tuhun yoso caa coo ñu tandahá noo ñáyiví vaha

¹ Ta vityin cuacatyí tuhun cha ndaca tuhun ndo chíi nu tutu cha sacuhun ndo chíi. Ndicha vatyí vaha cha ma tandaha yo.

² Soco vatyí iyó xaan tuhun cha quichí cuví ifi ñáyiví cha coo ñu chihin ñáyiví cha tyicuan ri caa. Yucuan chaha cuñí chí vatyí tahan tahan rayíi coo noo ñasihí ra, ta tahan tahan ñusihí coo noo yíi ñu.

³ Na sacuví rayíi cuhva tahán chí chihin ñasihí ra. Ta tyicuan caa tucu maa ñusihí, na sacuví ñu cuhva tahán chí chihin yíi ñu.

⁴ Ñaha sihi cuan ma cuví cunyaca ñaha ri maa ña coño ñuhu ña. Vatyí chí yíi ña cuví coño ñuhu ña. Tyicuan caa tucu maa yíi ña, ma cuví cunyaca ñaha ri maa ra coño ñuhu ra vatyí chí ñasihí ra cuví coño ñuhu ra.

⁵ Coto ñaha ma cuhva ndo chí ndo chí tahan ndo. Tatu cuñí ndo nanducu ndo chí Nyoo chihin oración, ñin ri cuhva caca xiñí ninduví ndo. Ta ma cuhva ndo chí ndo chí tahan ndo suhva quívi. Yaha cuan tyicuan ta cuhva tucu ndo chí ndo chí tahan ndo coto ma cunyeé ndo. Ta coto nducu nyehe ra ña vaha chí ndo ta cuhun ndo cunducu ndo inga ñusihí o inga rayíi. Ta ña vaha cha tyicuan caa.

⁶ Cha catyí chí ndo tyehe caa ñima cha catyí tyi tandaha ndo. Ña saniñí chí ndo cha tandaha ndo. Soco cuví tandaha ndo tatu cuñí ndo.

⁷ Cha cuenda chí yuhu, vaha ca coo maa ri maa ndo tari mai. Soco Nyoo siin siin fuerza chahá ra chí noo noo yo. Yihí yo chahá ra fuerza chí yo vatyí cuví coo maa ri maa yo. Ta yihí yo ña chaha ra fuerza cha coo maa ri maa yo.

⁸ Chí ñu tyivaa ta chí ñu chíhí yíi, चाहí tuhun chí ñu. Vaha ca cha ma coo yíi ñu tari mai.

⁹ Soco tatu ma cunyeé ñu cha ma coo yíi ñu, vaha ca cha tandaha ñu ta ñima ca cha quichi ri cuví ifi ñu tandaha ñu, ta ña tandaha ñu.

¹⁰ Soco ñu cha yaha tandaha, catyí chí ñu vatyí ma sanandoo ñu chí yíi ñu. Cha ndicha cuví vatyí mandamiento ihya ñima cha ndichí xiñí ri cuví soco maa Sutu Mañí yo catyí.

¹¹ Soco tatu noo ñaha sihi ta sanandoo ña yíi ña, cuñí chí vatyí ndoo ña cunyaa ña cha ma tandaha ca ña. O naquehen ña chí yíi ña. Ta suri tyicuan caa, ña tahán chí sanandoo rayíi chí ñasihí ra.

¹² Ta cha cuenda chí yuhu catyí chí inga ndo tuhun ihya. Vatyí tatu ñasihí noo hermano ta ña chinó ifi ña chí Nyoo, soco ndoo ña vaha cha cunyaa ña chihin ra, ñahri ityí iyó chí ra cha sanandoo ra chí ña.

¹³ O tatu yíi noo hermana, ta ña chinó ifi ra chí Nyoo, soco ndoo ra vaha cha cunyaa ra chihin ña, ñahri ityí iyó chí ña cha sanandoo ña chí ra.

¹⁴ Vatyí cha yaha nasoco Nyoo chí rayíi cha ña chinó ifi cuan cha cuenda cha ñin ri cuví ra chihin ñaha cha chinó ifi cuan. Ta cha yaha nasoco tucu Nyoo chí ñaha cha ña chinó ifi chí Nyoo cha cuenda cha ñin ri cuví ña chihin ra chinó ifi. Tatu ña nyacuví ndo tyicuan caa, sehe ndo cucuvi ndotyin tari sehe ñu cha ña chinó ifi chí Nyoo. Soco cha cuenda cha sacuví ndo tyicuan caa, nasoco Nyoo chí sehe ndo.

¹⁵ O tatu rayíi o ñusihí cha ña chinó ifi chí Nyoo, ta cuñí ñu sanandoo ñu chí tahan ñu cha chinó ifi chí Nyoo, na sanandoo maa ñu. Tyicuan ta ra hermano o ñaha hermana ndoo ñu libre. Vatyí maa Nyoo cuñí ra vatyí coo vaha yo chihin cha ñahri tisihi.

¹⁶ Vatyí ña chitó minoo ñaha sihi tatu cacu añima yíi ña saha ña. Ta ñi ri noo rayíi ña chitó ra tatu cacu añima ñasihí ra saha ra.

¹⁷ Ta tyicuan caa catyí chí ndo vatyí coo ndo yoso cuhva catyí Sutu Mañí yo chí ndo. Ta yoso cuhva iyó ndo quívi nacana Nyoo chí ndo. Ta tyicuan caa catyí chí tandihí ñu yihí cuenda Nyoo noo noo vehe ñuhu.

¹⁸ Tatu Nyoo ta nacana ra chí noo nyoho ta cha yaha sacuví ñu costumbre circuncisión chí ndo, ma caca ifi ndo. Soco tatu nacana ra chí noo ndo cha ña sacuví ñu costumbre cuan chihin ndo, ña tahán ca chí sacuví ndo vityin.

¹⁹ Ña niñí xaan cha sacuví yo, o cha ma sacuví yo costumbre circuncisión cuan. Soco cha niñí ca cha quichahá yo tuhun cahn Nyoo.

²⁰ Tahan tahan ndo cuñí chi ndoó ndo yoso cuhva cha iyó ndo quivi cha nacana Nyoo chi ndo.

²¹ Vatyí tatu iyó chitoho ndo cha nyacá ñaha chi ndo quivi cha nacana Nyoo chi ndo, ma caca iñi ndo, soco tatu chahá chi cuhva cha ndoó ndo libre, cuñí chi nducu ndo cuhva ta ndoó ndo libre.

²² Vatyí quivi nacana Nyoo chi noo ra cha iyó chitoho, nduvi ra tari noo ra cha libre iyó, vatyí sacuví ra tyiño nuu Sutu Mañi yo. Ta suri tyicuan caa tucu ra cha iyó libre quivi cha nacana Nyoo chi ra. Vityin ra Cristo nyacá ñaha chi ra.

²³ Satá Nyoo chi nyoho. Ta yahvi xaan chahá ra chi ndo. Yucuan chaha ma cuhva ndo cha cunyaca ñaha rayi chi ndo. Ta ma sacuvi ndo tyiño nuu ra.

²⁴ Ta tyicuan caa catyí chi ndo yañi, coo ndo tari cuhva chiyo ndo quivi nacana Nyoo chi ndo.

²⁵ Ta tyicuan tucu ñu cha ta tandaha ca. Ñahri tuhun chahá Sutu Mañi yo chii cha cuenda ndo. Soco catyí chi ndo yoso cuhva ndichí xiñi. Ta cuví naquehen ndo tuhun cahín tyi cha chitó ndo vatyí cha ndahvi cuñí Nyoo nyehe ra chii ta chahá ra tyiño ihya chii.

²⁶ Cha cuenda chi yuhu, vaha taxin ca ma tandaha ndo. Vatyí cuaha xaan tindocho ñayivi cha iyó yo vityin.

²⁷ Soco tatu cha iyó ñasihi noo hermano, ma nducu ra cuhva cha sanandoo ra chi ña. O tatu ta coo ca ñasihi ra, ma nducu ra chi ña.

²⁸ Soco tatu tandaha ra, ñima cuatyí cuví. O tatu noo ñaha tyivaa tandaha ña, suri ñima cuatyí cuví. Soco ñu tandaha cuaha xaan tindocho cunyehe ñu ñayivi ihya. Ta yucuan chaha catyí chi ndo vatyí vaha ca cha ma tandaha ndo. Vatyí ña cuñí cha nyehé ndo tindocho ta tisihi cuan.

²⁹ Yañi, cha vityin ta ityi nuu ña cuaha ca quivi nyaá. Cuñí chi vatyí ra cha iyó ñasihi cuví ra tari noo ra cha yori ñasihi. Vatyí nyita ri tahán chi caca xiñi ra tuhun Nyoo.

³⁰ Ta tatu nyaá ndo tucuihya iñi, ma quichaha ndo tucuihya iñi cuan, o tatu nyaá ndo tusi iñi, soco ma quichaha xaan ndo tusi iñi cuan. Ta tyicuan caa tucu tatu iyó xuhun ndo, ma quichaha xaan ndo xuhun cuan. Nacuhva ndo tandihí cuan chi Nyoo.

³¹ Ta ra iyó xaan cha chii ñayivi ihya, ma quichaha xaan ra chi cuan, soco cotyiño ra tyiño Nyoo. Vatyí ñayivi cha nyehé yo ihya cha cuahán sandihí xaan chi.

³² Cuñí vatyí nyoho ma caca xaan xiñi ndo tuhun cha iyó ñayivi ihya. In ri maa tuhun Nyoo caca xiñi ndo. Noo ra tyivaa cha ta tandaha ca chicá xiñi ra yoso caa sacuvi ra cuhva cuñí maa Sutu Mañi yo.

³³ Soco tatu cha tandaha ra, chicá xiñi ra yoso caa coo vaha ra ñayivi cuhva tahan iñi ñasihi ra.

³⁴ Ta siin cuhva iyó noo ñusihi cha cha yaha tandaha, ta siin cuhva iyó tucu noo ñusihi cha cumañi ca tandaha. Ñaha cha cumañi ca tandaha chicá xiñi ña in ri maa tuhun Sutu Mañi yo. Ta chicá xiñi ña yoso caa sacahnú ña chi Nyoo chihin coño ñuhu ña ta chihin cha ñi añima ña. Soco ñaha cha cha yaha tandaha chicá xiñi ña yoso caa coo vaha ña ñayivi ihya cuhva tahan iñi yí ña.

³⁵ Catyí tuhun ihya chi ndo cuenda cha vaha chi maa ndo. Ñima cha saniñí chi ndo. Soco vatyí coo vaha ndo noo ñayivi chihin cha ñahri sayangá chi ndo. Ta in ri tyiño Nyoo sacuvi ndo.

³⁶ Soco nya nyoho chicá xiñi ndo vatyí vaha cha tandaha ndo vatyí cha cuayaha quivi ndo; vaha, tandaha ndo tatu cuñí ndo. Ñima cuatyí cuví cuan.

³⁷ Soco tatu inga ndo cha nacuañ vaha iñi ndo vatyí cuandoo ndo cha ma tandaha ndo, vaha tucu.

³⁸ Tu tandaha ndo, vaha. Tu ma tandaha ndo, vaha ca.

³⁹ Soco catyí nu ley Nyoo chi yo vatyí tahán chi cunyacá ñaha rayi chi ñasihi ra cha ni ri ca cha iyó ra. Soco tatu chihí ra, iyó ityi chi ña cha tandaha ña yóo chihin cuñí maa ña. Soco tatu ra yihí cuenda Nyoo cuví ra.

⁴⁰ Soco vaha ca coo ña ñayivi tatu ma tandaha ña inga chaha. Ihya cuví cha chicá xiñi yuhu. Ta chahí tuhun ihya chi ndo chihin Tatyí Ii maa Nyoo, cahvi iñi.

8

Nu sañahá ra Pablo vatyí ma sacoo yo cuatyí inga ñayivi

¹ Ta vityin cuanacatyí chi ndo cuenda nyayu cha chahá ñu chi xitohyo. Tandihí yo cha ñohó nuu ca yo chi Nyoo, chitó yo tatu vaha o ña vaha cachi yo nyayu cuan. Ta cha cuenda cha chitó yo, yucuan chaha cahnu xaan sahá yo chi yo ta sativí cuan chi yo. Soco cha cuñí yo chi tahan yo sandunyeé cuan chi yo.

² Tatu yihí ndo cha cuñí maa ndo tyi chitó ndo, cha cuenda vatyí ta coto ca ndo yoso cuhva cuñí chi cuví cuan.

³ Soco Nyoo ñohó nuu ra chi ñu ni vaha iñi cuñí chi ra.

⁴ Ta vityin cha cuenda cha cachi yo nyayu cha iyó vico xitohyo: cha chitó vaha yo vatyí noo xitohyo ñahri maa vale chi, vatyí noo ri maa Nyoo iyó.

⁵ Vasi cuñí maa ñayivi vatyí cuaha xaan Nyoo iyó nu ñuhu ñayivi ihya ta andivi,

⁶ Soco cha cuenda chi maa yo noo ri Nyoo Sutu yo iyó. Ta maa ra savaha ra tandihi cuii maa cha iyó. Ta yoó iyó yo cha cuenda maa ra. Ta iyó tucu noo ri Sutu Mañi yo Jesucristo. Ta maa ra savaha tandihi maa cha iyó, nyacua nya chi maa yo.

⁷ Soco ña tandihi yo chitó yo tuhun ihya. Vatyí suhva ñu tahan yo cuenda Nyoo, ta ni cumañi ca quihvi ñu cuenda Nyoo, sacahnu ñu xitohyo. Ta cha cañ ñu sacahnu ñu chi cuan ta cuñi maa ñu tyi nyitó xitohyo cuan. Vatyí ña ni vaha iñi ñu nyicón ñu chi Nyoo. Ta tatu chachí ñu nyayu cha chahá ñáyivi chi xitohyo cuan, cuñi maa ñu vatyí chicoó cuatyí ñu cuenda xitohyo cuan nuu Nyoo.

⁸ Soco Nyoo ñahri cuenda ra tatu chachí yo, o ña chachí yo. Ñima vatyí chachí yo ta ña vaha ca yo nuu Nyoo, ta ñima cha cuenda cha ña chachí yo ta vaha ca yo.

⁹ Soco saha ndo cuenda nya ndo chachi nyayu cuan ta chitó ndo vatyí ñahri cuatyí ndo chicoo. Cuví sanacava ndo nuu cuatyí chi ñu ni quihvi ri cuenda Nyoo, vatyí ñu cuan cuñi maa ñu tyi chicoo cuatyí ñu tatu chachí ñu nyayu cuan.

¹⁰ Vatyí tatu yoho cha chiton tuhun ihya, ta cunyaun ta cachun noo cha iyó vehe xitohyo, ta noo ra yañi yo cha ña ñihi vaha cuahán ra chihin Nyoo nyehé ra chuun yucuan, ra yañi yo cuan cucachi ndihi ra chuhun.

¹¹ Ta ra yañi yo cutivi añima ra vatyí cuñi maa ra tyi chicoo cuatyí ra. Ta ra cuan chihí ra Cristo cha cuenda ra. Ta vityin chicoo cuatyí ra cuñi maa ra. Ta yoho cha chitón, sicun cuhun cuatyí cuan.

¹² Yucuan chaha tatu sanacavá yo chi noo yañi yo cha ña ñihi vaha cuahán chihin Nyoo, chicoó cuatyí yo nuu ra Cristo.

¹³ Yucuan chaha tatu sanacavé chi noo yañi yo nuu cuatyí cha cuenda cha chachí, vaha taxin ca ma cachi ca mai coño, tacuhva cha ma sanacave chi ra nuu cuatyí.

9

Cha tahán chi sacuví ra apóstol Nyoo

¹ Yuhu cuví noo ra apóstol Nyoo. Ta yori ñáyivi nyacá ñaha chii. Vatyí nyehí chi ra Jesús Sutu Mañi yo. Ta suri maa ndo cuví cha ndaa tyi ndicha cuví yuhu noo apóstol Nyoo, vatyí chinó iñi ndo tuhun Nyoo cha sacote chí ndo.

² Vasi ña cuñi ñáyivi chinó iñi ñu cha apóstol Nyoo cuví, soco cha cuenda nyoho ican cuví. Vatyí cha cuenda cha chinó iñi ndo chí Sutu Mañi yo, cuví ndo cha ndaa vatyí ndicha cha apóstol cuví.

³ Ihya cuví tuhun cuacahin cuenda ñu cha cahán nyaa chii.

⁴ Iyó chi ityi chii cha quehín tandihi cha chahá ñu cachi ta cha chahá ñu cohi.

⁵ Ta siin ri cha coo noo ñasihi cha chinó iñi chí Nyoo, tari yañi ra Jesús, ta ra Pedro ta tandihi ca ra apóstol.

⁶ O chicá xiñi ndo vatyí yuhu ri ta ra Bernabé tahán chí saha tyiño ndi chihin ndaha ndi ta sata ndi cha chiñuhú chí ndi. ¿Atu ña tahán chí chí nyuhu sandoo ndi tyiño cuan ta cahan ndi tuhun Nyoo?

⁷ Ra cha cuví sindaro tyiyahví gobiernu chí ra ta chotyíño ra xuhun cuan. Ta ra cha tachí yoho tichaha ndivi, chachí ra tichaha ndivi cha quita nu iyó tyiño saha ra. Ta ra cha sahá cuma mbee chihí ra sicu ti.

⁸ Ta ma cuñi ndo vatyí tuhun ihya cha ndichi xiñi ri mai cuví. Vatyí nu ley cha tyaá ra Moisés catyí chí tyehe caa:

⁹ “Ma tyihi ndo yoho yuhu quiti cha sandundí trigo, vatyí tahán maa chí cachi ti suhva trigu nu sahá tyiño ti.” Ndicha vatyí Nyoo catyí ra tyehe caa soco ñima vatyí cuniñi xaan cuñi ra chihin quiti.

¹⁰ Soco na cutuñi ca iñi yo vatyí tari ra tahví ñuhu ta ra cha tachí, tahán chí vatyí cuita iñi ra vatyí cunaquehen ra cha quita nu saha tyiño ra.

¹¹ Ta tyicuan caa, tatu nyuhu quichi cahan ndi tuhun Nyoo chihin ndo, tari quivi cha quichi tachí ndi chí cuví cuan. Ta tahán chí tyi tyinyeé ndo chí ndi cha cuenda cha sacotó ndi tuhun Nyoo chí ndo.

¹² Tatu tyinyeé ndo chí inga ra cha ña quichí tyihí tuhun Nyoo nu nyicú ndo, tahán ca chí cha tyinyee ndo chí nyuhu, vatyí nyuhu tyihí ndi tuhun Nyoo nu canyicú ndo.

Soco ña cahán ri ndi, ta cunyeé ndi tandihi. Ta ña sayangá ndi chí ndo chihin cha chiñuhú chí ndi. Tacuhva cha ma sandihi ndo tuhun ra Cristo.

¹³ Chitó ndo tyi ra sahá tyiño vehe ñuhu ñáyivi Israel, iyó ra chihin cha iyó vehe ñuhu cuan. Vatyí tahán chí tavá siin ra suhva coño quiti vatyí cachi ra. Ta tandihi ca coño cuan cuahmi ra tari cuhva catyí maa Nyoo chí ra.

¹⁴ Ta suri tyicuan caa catyí Sutu Mañi yo, vatyí tahán chí tyinyeé ñu yihí cuenda Nyoo chí ra cahán tuhun Nyoo chihin ñu.

¹⁵ Soco yuhu ni noo chaha ña chiquen cha tahán chí chii. Ta ni ña tyai tuhun ihya vatyí cuñi cha cuhva ndo cha cuhva ndo chii. Vatyí tatu chiquen cha tahán chí chii, ña si cuñi cahín tuhun Nyoo. Vaha taxin ca cuñi cha cúvi ta ñima ca cha caquen xuhun chí ndo.

¹⁶ Cha cuenda chí yuhu ñima cha cahnu sahí chii cha cahín tuhun Nyoo. Soco vatyí nyaá síqui cha sacuví. Soco ndahvi cuví

yuhu ra ndahvi tatu ma cahin tuhun Nyoo ihya.

¹⁷Yucuan chaha tatu sacuví chihin cha iyó iñi, cuñihi yahvi. Soco tatu sacuví chihin fuerza, suri cuví chí, vatyi noo tyiño cha tachí maa Nyoo chíi tyi sacuví, tahán chí cha sacuví.

¹⁸Ta tyicuan caa, yahvi cha ñihi, ican cuví cha sii cuñi cahin tuhun ra Cristo. Ta ña chiquén cha tahán chí chíi cha cuenda cha cahín tuhun ra.

¹⁹Vasi ñima musu cuví yuhu. Soco nanduví musu tandíhi ñáyivi. Vatyi tyicuan caa saha ganaí cuaha ca ñáyivi cuenda ra Cristo.

²⁰Tatu ñohí nu nyicú ra Israel, nanduví tari maa ra tacuhva vatyi tyasoho ra tuhun cahin. Vatyi cuñi saha ganaí chí ra cuenda ra Cristo. Vatyi ra cuan iyó ra cuhva catyí ley ra Moisés. Ta yuhu sacuví tari cuhva catyí ley cuan. Soco ñima ley cuan nyacá ñaha chíi.

²¹Soco tatu cuñi saha ganaí chí ñu ña quichahá ley ra Moisés, sacuví tari cuhva sacuví ñu. Vatyi tacuhva saha ganaí chí ñu. Soco ley maa Nyoo nyacá ñaha chíi vatyi chihin ley ra Cristo chicá noi ta ña cuví cunyacuví cha quiñi caa tari nyacuví maa ñu.

²²Tatu nyaí chihin noo ra cha ta coo vaha ca fuerza Nyoo chíi, nanduví tari maa ra, vatyi tacuhva cahan que tuhun Nyoo chihin ra. Ta ndunyeé ca iñi ra chihin tunyee iñi Nyoo. Nanduví yuhu tari cuhva caa noo noo ñáyivi, vatyi tacuhva tyasoho ñu tuhun Nyoo cha cahín ta cacú ñima ñu.

²³Tyicuan caa sacuví tacuhva cuví sacoté tuhun Nyoo chí ñáyivi. Vatyi tacuhva ñihi tumañi iñi cha chahá maa Nyoo chí yo.

²⁴Chitó ndo vatyi noo sihva cha chinó ñu, tandíhi ñu chinó, soco noo ri ñu sahá ganaa. Tyicuan caa tucu maa yo, cuñi chí cha ñihi cunyicon yo chí Nyoo tacuhva sahá ganaa yo nu vaha cha chahá ra chí yo.

²⁵Tandíhi ñu cuahan sihva, sandoo ñu tandíhi cha satyoño chí ñu vatyi cuñi ñu sahá ganaa ñu. Ta ñu cuan, cusaha ganaa ñu, soco noo corona numa cha tañi tyehe ri na ityi. Ta yoó nducú yo cuhva soco cha sahá ganaa yo noo cha ma tiví ca maa.

²⁶Cha cuenda yuhu ña chinó tondo ri mai, ni ña cañi tahan tondo ri mai.

²⁷Soco ñihi nyacá ñahi chí coño ñuhi. Ta saniñi quichahí chí Nyoo. Coto suri mai cha yaha sañahí chi inga ra ta ndoi.

10

Nu sañahá ra Pablo vatyi ma tyaa xiin yo Nyoo

¹⁻²Yañi, ña cuñi cha naa iñi ndo cha cuví chí sutu chahnu yo ta cha nahá. Nyoo

tyinyee ra chí ñu, ta tachí ra noo vico vatyi cuhun ityi nu ñu coto cunaa ñu. ñn ri nanduví ñu chihin ra Moisés, ra cuví nuu chí ñu, ta yaha sava ñu tyañuhu. Ta cha tyicuan caa, tari cha condutya ñu chihin vico cuan ta chihin tyañuhu cuví cuan.

³Ta tandíhi ñu chachí ñu ñn ri nyayu cha chahá maa Nyoo.

⁴Ta tandíhi ñu chíhí ñu ñn ri ndutya cha chahá maa Nyoo. Vatyi ndutya cuan tava ra chata noo yuu cha cuahan chihin ñu. Ta yuu cuan ra Cristo cuví.

⁵Soco vasi nyehe ñu cuaha milagru cha sacuví Nyoo, cuaha ñu ña quichahá ñu tuhun cahan ra chihin ñu. Ta chíhí ñu chíqui ndi cuan, ta yucuan ndoo ñu.

⁶Tandíhi tuhun ihya chahá chí noo cuhva chí yo. Vatyi tacuhva ma cuñi yo sacuví yo cha ña vaha tari sacuví ñu cuan.

⁷Yucuan chaha ma sacahnu nyoho chí xitohyo, tari chinyacuví suhva ñu cuan ta cha naha, tari catyí nu tutu Nyoo tyehe caa: “Ta cachiyó ñu vico, ta cachachí ñu, ta cachihí ñu.”

⁸Ta ma coo ri maa yo chihin inga ñusihí o chihin inga rayíi tatu ñima ñasihí yo cuví, o yíi ñu cuví, tari chinyacuví suhva ñu cuan. Ta noo ri quiñi chíhí oco uñi mil ñu cha cuenda cha chinyacuví ñu cha quiñi caa cuan.

⁹Ta Sutu Mañi yo cama iñi ra, soco ña tahán chí nducú nyehe yo chí ra. Tari chinyacuví suhva ñu cuan. Ta cachihí ñu cha tyaq coo chí ñu, cha cuenda cha cuñi ñu nducú nyehe ñu chí ra.

¹⁰Ta ni ma cahan ña vaha ndo siqui Nyoo, tari cahan ña vaha suhva ñu cuan siqui ra. Ta saquichí ra ángel cuenda ra ta chahñi ra chí ñu.

¹¹Tandíhi ihya cuví chí sutu chahnu yo cha chíyo ta cha naha. Ta chicunyaa chí nu libru Nyoo tari noo cuhva vatyi sacotó ra chí yo cha iyó yo ñáyivi ihya vityin, nu cuahán sandíhi chí.

¹²Ta tyicuan caa tatu tuví iñi maa ndo tyi vaha cuahán ndo chihin Nyoo, ñasaha ndo cuenda coto canacava ndo saha ra ña vaha.

¹³Tindoho cha nyehé ndo, cuñi maa ndo tyi noo ri maa ndo nyehé tindoho cuan. Soco inuu ri nyehé tandíhi ca ñu. Soco cuví cunyeé iñi ndo chí Nyoo, ta maa ra ma cuhva ra nyehé ndo tindoho cha ma cunyeé ca ndo. Soco tatu chaa tindoho chí ndo, tyicuan ta Nyoo cunducu ra cuhva cha quita ndo chíhí tindoho cuan ta cuví cunyeé ndo.

¹⁴Yucuan chaha yañi, ma sacahnu ndo chí xitohyo.

¹⁵Cahín chihin ndo tari cahín chihin noo ra tyihí tuñi iñi. Yucuan chaha saha ndo cuenda cha catyí chí ndo. Ta nyehe ndo

tatu ndicha o ña ndicha tuhun cahín chihin ndo.

¹⁶ Quiví cha nicohón iñi yo tyi chihí ra Cristo nu cruzi, chihí yo vinu ta chachí yo pan. Ta vinu cuan cuñí chi catyí vatyí ñin ri cuví yo chihin ra Cristo cuenda ñiñi ra. Ta chachí yo pan ta cuñí chi catyí vatyí ñin ri cuví yo chihin ra cuenda coño ñuhu ra.

¹⁷ Vatyí vasi cuaha yo, soco tandihí yo chachí yo noo ri pan. Ta yucuan chaha tandihí yo nduví yo noo ri coño ñuhu ra.

¹⁸ ¿Atu nicohón iñi ndo yoso caa iyó ñu Israel? Chachí tucu maa ñu quiti cha chahá ñu chi Nyoo, ta cha cuenda cha nyacuví ñu cha tyicuan caa, ñin ri cuví ñu chihin cuan.

¹⁹ Ñima cha catyí chi ndo tyi vale xitohyo cha sacahnú ñu ña ñohó nuu chi Nyoo. Ña vale, ni ri coño cha chahá ñu chi xitohyo cuan ta ña vale.

²⁰ Soco catyí chi ndo vatyí ñu ña ñohó nuu chi Nyoo chahá ñu cha chahá ñu, soco chi ra ña vaha. Ta ñima chi Nyoo. Ta ña tahán chi cha ndu ñin ri ndo chihin ra ña vaha.

²¹ Vatyí ma cuví coho yo copa Nyoo ta suri cuhva cuan ta coho tucu yo copa ra ña vaha. Ta ma cuví cachi yo nu mesa Nyoo. Ta suri cuhva cuan cachi yo nu mesa ra ña vaha.

²² Ma cuhva yo tisihi chi Nyoo vatyí maa ra iyó ca fuerza chi ra ta ñima ca maa yo.

Sacuvi yo ñáa cha sacuvi yo, soco cha cuenda cha vaha chi tahan yo

²³ Catyí chi tuhun: “Cuví sacuvi yo ñáa cha cuñí yo. Soco ña tandihí ta cuví chi cha vaha chi yo.” Ta ndicha cuví sacuvi yo cha cuñí yo. Soco ña tandihí ta tyinyeé chi chi yo cha cuahnu yo chihin tuhun Nyoo.

²⁴ Ma nanducu yo cha vaha chi maa ri maa yo, soco na nducu tucu yo cha vaha chi inga ñu.

²⁵ Cachi ndo ñáa coño cha xicó ñu nuyahví. Ta ma ndaca tuhun ndo ta ma ndichi xiñi ndo yóo chi cuenda cuví.

²⁶ Vatyí ñuhu ñayiví ta tandihí cha iyó nuu chi, chi maa Nyoo cuví.

²⁷ O tatu noo ñu ña chinó iñi chi Nyoo, catyí ñu chi ndo cha cucachi ndo vehe ñu, ta tatu cuñí ndo cuhnu ndo, cuhnu ndo ta cachi ndo tandihí cha chahá ñu cachi ndo. Ta ma ndaca tuhun ndo ñáa cuenda cuví.

²⁸ Soco tatu nya noo ñu catyí ñu chi ndo: “Nyayu ihya nyayu cha chahá cuenda ñu chi xitohyo cuví”, catyí ñu. Ma cachi ca ndo tacuhva cha ma nducuihya cuñi ñima ñu cha catyí chi ndo tyicuan caa.

²⁹ Cahín tuhun ihya cuenda inga ñu ta ñima cuenda maa ndo.

Soco yihí ndo catyí ndo: “¿Ñáa tuhun cha sahá xaan ra ihya cuenda chi yuhu cha catyí inga ñáyiví?”

³⁰ Tatu nacuhvé tyahví nyoo chi Nyoo cuhva cha cuacachi, ñáa tuhun catyí inga ra cuan tyi ña vaha cachi”, catyí ndo.

³¹ Cuacatyí chi ndo tyehe caa, tatu chachí ndo, o chihí ndo, o sacuví ndo ñáa ca cha sacuví ndo, sacuví ndo soco chi maa Nyoo sacahnu ndo chihin cha sacuví ndo.

³² Ta ma cuhva ndo cuhva cha canacavá noo tahan ndo, ni ra Israel, ni ñáyiví cha ñima ñu Israel cuví, ni ñu yihí cuenda Nyoo.

³³ Tari yuhu, nanduquí cha vaha cuví chi ñáyiví. Ña nanduquí cha vaha chi mai, soco cha vaha chi inga ñáyiví nanduquí. Vatyí tacuhva cacu ñima ñu.

11

¹ Cuñí vatyí cunyicon ndo cuhva nyacuví. Tari mai nyiquén cuhva nyacuví ra Cristo.

Yoso caa coo ñusihí nu ndu ñin ri yo

² Yañi, sií xaan cuñí vatyí tyicuan ri nicohón iñi ndo chii. Ta quichahá ndo cha sañahí chi ndo.

³ Soco cuñí tyi coto ndo vatyí ra Cristo cuví xiñi noo noo rayii, ta rayii cuví xiñi ñasihí ra, tari Nyoo cuví ra xiñi ra Cristo.

⁴ Tatu noo rayii, nyasí xiñi ra ta chicán tahvi ra o cahán ra tuhun cha chahá Nyoo chi ra, ticahan nuu chahá ra chi ra cuví xiñi ra.

⁵ Soco tatu noo ñaha sihi ña chasí ña xiñi ña cuhva cha chicán tahvi ña, o cuhva cha cahán ña tuhun cha chahá Nyoo chi ña, tari cha satya ndi xiñi ña cuví cuan. Ta ticahan nuu chahá ña chi ra cuví xiñi ña.

⁶ Tatu noo ñaha sihi ña chasí ña xiñi ña, vaha taxin ca nacahnya ña tandihí ixi xiñi ña. O tatu cahán nuu ña cha satya ndi ixi xiñi ña, nacasi ña xiñi ña.

⁷ Ña tahán chi casi rayii xiñi ra. Vatyí cuhva caá Nyoo caa ra, vatyí nyacó ñaha ra chi ñasihí ra, tari nyacó ñaha Nyoo chi ra. Soco noo ñaha sihi chahá ña cha cunyaca ñaha yii ña chi ña.

⁸ Vatyí quiví savahá Nyoo chi rayii, ña savahá ra chi ra chihin yiquí naha ñaha sihi. Soco chihin yiquí naha rayii savahá Nyoo chi ñaha sihi.

⁹ Ta cha catyí rayii, ta chingo ñaha sihi.

¹⁰ Yucuan chaha ñusihí cuñí chi cunyasi xiñi ñu. Vatyí ican cuan cuví noo seña vatyí nyacó ñaha yii ñu chi ñu. Ta cha cuenda cha vaha chi ángel cuví.

¹¹ Soco tyagá maa Nyoo cuhva vatyí chiñuhú rayii chi ñusihí. Ta chiñuhú ñusihí chi rayii.

¹² Vatyí ndicha ñaha sihi chingo ña chihin yiquí naha rayii, tari quiví cha sacacu ra chi ña cuví cuan. Soco nya cua nya quiví cuan ta maa ña quichaha sacacu ña chi rayii. Ta nya cua nya vityin ñusihí ta rayii maa Nyoo chahá cha coo ni nduví tahan ñu.

¹³ Nyehe maa ndo. ¿Atu vaha quetuví cha ña nyasí xiñi ñusihí ta chicán tahví ñu chichí vehe ñuhu?

¹⁴ Vatyí cha chitó ndo vatyí ticahan nuu cuví chí rayíi tatu nañi xiñi ra.

¹⁵ Soco ñusihí, vaha cha cunañi xiñi ñu vatyí Nyoo chahá ra íxi nañi chí ñu vatyí casí chí xiñi ñu.

¹⁶ Soco tatu yóo cha cuñi cuví yuhu cha catyí tuhun ihya, cuñi chí coto ndo vatyí ni nyuhu ta ni vehe ñuhu Nyoo, ñahri inga costumbre iyó chí ndi.

Nu sañahá ra Pablo chí ñu vatyí ña vaha cuhva chachí ñu Santa Cena

¹⁷ Yañi, nonga tuhun cuacatyí chí ndo.

Vatyí ña sii cuñi chíhin ndo, vatyí ndu ñin ri ndo, soco ña chahá chí cha vaha chí ndo. Ta sativí chí chí ndo.

¹⁸ Ta cuaha xaan ñáyivi nacatyí chí vatyí cuhva cha ndu ñin ri ndo cha cuacoo culto, iyó ndo cha tavá siin ndo chí ndo. Ta suhva ri chinó iñi, ta suhva ña chinó tucu iñi. Soco vasi ndicha.

¹⁹ Vasi cuñi chí coo tisihi nu nyicú ndo tacuhva coto yo nya ndo ndicha cha yihí cuenda Nyoo.

²⁰ Soco tatu tyicuan caa iyó tisihi nu nyicú ndo, ñima Santa Cena chachí ndo cuví cuan.

²¹ Vatyí cuhva cha cuacachi ndo, chachí ri ndo cha nyisó ndo. Ta ña nyatú ndo nya ndu ñin ri tahan ndo. Ta yihí ndo cuaha chachí ndo. Ta chihí ndo chíhin vinu. Ta yihí ndo ña ñihí ndihí ndo cha cachi ndo.

²² ¿Atu ñahri vehe ndo cachi ndo ta coho ndo? Vatyí cha nyacuví ndo tyehe caa, ña cuñi nyehé ndo vehe ñuhu Nyoo cuví cuan. Ta chahá ndo ticahán nuu chí ñu ñahri maa iyó chí. ¿Atu tahán chí catyí chí ndo vatyí vaha cuhva nyacuví ndo, cuñi maa ndo? Ña tahán chí tyi ñahri noo cha cachi caa nyacuví ndo.

Ra Pablo chahá ra tuhun chí ñu, ñáá tuhun quehén ñu Santa Cena
(Mt. 26.26-29; Mr. 14.22-25; Lc. 22.14-20)

²³ Vatyí yuhu suri maa Sutu Mañi yo sañaha tuhun ihya chí. Ta suri maa tuhun ihya sañahi chí ndo. Cha cuaa cha ni cumañi ca cuhva cuenda ra Judas chí Sutu Mañi yo chí ra xaan iñi chí ra, ra Jesús quehén ra noo pan.

²⁴ Ta cha yahá nacuhvá ra tyahví nyoo chí Nyoo ta tahví sava ra. Ta catyí ra: “Cachi ndo. Vatyí tari coño ñuhi cuví pan ihya. Ta cha catyí ndo ta cucúvi yuhu. Sacuvi ndo tyehe caa vatyí nicohon iñi ndo chí”, catyí ra Jesús.

²⁵ Ta cha yahá cha cacuxiñi ra ta quehén ra Jesús copa ta catyí ra: “Chihin copa vinu ihya natyihí tahan Nyoo tuhun chaa chíhin ndo vityin. Vatyí vinu cha yihí chichí copa

ihya, niñi cuví. Tahan ri cuacoho ndo, coho ndo cha cuenda cha nicohon iñi ndo chí”, catyí ra Jesús cha cuaa cuan.

²⁶ Ta tahan ri cha ndu ñin ri yo ta chachí yo pan ta chíhi yo vinu sacotó yo chí ñáyivi vatyí cha catyí cuatyí yo chíhi Sutu Mañi yo. Ta tyicuan caa sacotó yo chí ñáyivi nyacua nya quívi quichi tucu ra.

Ra Pablo chahá ra tuhun chí yo yoso caa saccoó yo Santa Cena

²⁷ Tatu chachí yo pan ta chíhi yo vinu noo cuhvá cha ña chitahán iñi Nyoo, chicoó cuatyí yo. Vatyí ña sahá yo ñáyivi coño ñuhu ta niñi ra Cristo.

²⁸ Yucuan chaha cuñi chí sahá yo cuenda tatu vaha cuahán yo chíhin Nyoo cha ni ri ca cha cumañi cachi yo pan ta coho yo vinu.

²⁹ Vatyí tatu chachí yo ta chíhi yo chíhin cha ña sahá yo cuenda ñáá tuhun chíhi ra Cristo, Nyoo cutachi tuñi ra chí yo.

³⁰ Yucuan chaha cuaha xaan nyoho cuhví ndo, ta ñahri vaha fuerza ndo. Ta yihí ndo cha chíhi ndo.

³¹ Soco tatu sahá vaha yo cuenda chí yo, Sutu Mañi yo ma tachi tuñi ra chí yo.

³² Soco tatu Sutu Mañi yo ta tachi tuñi ra chí yo tyicuan caa, vatyí tacuhva ma cunaa yo chíhin ñáyivi iyó siqui ñuhu ñáyivi ihya.

³³ Ta tyicuan caa nyoho yañi, tatu cuandu ñin ri ndo cha cuacoo Santa Cena, cuatu ndo chí noo noo tahan ndo ta cachi ndo ta coho ndo ñin ri.

³⁴ Soco tatu nya noo nyoho chisocó ndo, cachi ndo nya vehe ndo tacuhva cha ma tachi tuñi Nyoo chí ndo.

Ta inga tuhun cusandaa mai quívi cha quichi nyehi nu nyicu ndo.

12

Cha vaha cha chahá Tatyí Ii Nyoo chí yo

¹ Yañi, cuñi vatyí coto ndo ñáá ndihí cha vaha cha chahá Tatyí Ii Nyoo chí noo noo yo.

² Chitó ndo vatyí quívi cha ña ñoho nuu ndo chí Nyoo, chahá ndo chí ndo cha cunyaca ñaha xitohyo cha ña cuví cahan.

³ Yucuan chaha cuñi tyi coto ndo vatyí tatu noo ra catyí tyi ña vaha ra Jesús, ñima Tatyí Ii Nyoo yihí chí ra. Soco tatu noo ra cha catyí tyi ra Cristo cuví Sutu Mañi yo, Tatyí Ii Nyoo yihí chí ra.

⁴ Siin siin cha vaha naquehén noo noo yo, soco maa Tatyí Ii Nyoo ican chahá.

⁵ Siin siin cuhva sahá tyiño yo soco tyiño nuu noo ri maa Sutu Mañi yo sacuvi yo.

⁶ Siin siin tunyee iñi chahá ra chí noo noo yo. Soco noo ri maa Nyoo cuví ra chotyíño chí tandihí yo.

7 Chi noo noo yo chaha ra tunyee iñi Tatyí li ra, tacuhva tyi tyinyeé yo chi tandihí ñu yihí cuenda ra.

8 Chi suhva ñu chaha Tatyí li Nyoo vatyí cahán ñu chihin cha chiñi tuñi maa ra. Ta chi inga ñu chahá ra cha nacoto ñu ta cahan ñu tuhun cha sacotó Nyoo chi ñu.

9 Ta chi inga ñu chaha ra cha chinó vavaha iñi ñu chi ra. Ta suri maa Tatyí li ra chaha ra tunyee iñi chi inga ñu vatyí cuví sanduvaha ñu chi ñu cuhví.

10 Ta chi inga ñu chaha ra tunyee iñi vatyí cuví sacuví ñu milagru. Ta inga ñu chahá cuenda ñu tuhun cahán Nyoo. Ta chi inga ñu chaha ra vatyí cuví cohon nuu ñu Tatyí li Nyoo ta tatyí ña vaha. Ta chi inga ñu chaha ra tunyee iñi ra vatyí cuví cahan ñu inga sahan cha ña chitó ñu. Ta chi inga ñu chaha ra tunyee iñi vatyí cuví nacoto ñu ta nacatyí ñu inga sahan cha cahán tahan ñu.

11 Soco tandihí tuhun ihya, noo ri maa Tatyí li Nyoo chahá. Soco siin siin cuhva chahá ra chi noo noo yo, yoso cuhva cuñí maa ra.

Chichi cha tandihí yo ta nduví yo noo ri coño ñuhu ra Cristo

12 Ra Cristo cuví ra tari noo coño ñuhu. Vatyí cuaha cha nyaá chi coño ñuhu. Nyaá xiñi. Nyaá ndaha. Nyaá chaha. Ta chichi cha tandihí cuan nanduví chi noo ri coño ñuhu.

13 Ta tyicuan caa tucu tandihí yo, an cuví yo ñu Israel, o ñu Grecia, o ñu iyó chitoho, o ñu yori chitoho, condutyá yo vatyí cuví yo noo ri coño ñuhu cuenda ra Cristo. Vatyí noo ri maa Tatyí li ra chahá ra tyi quihí chi tandihí yo.

14 Noo coño ñuhu cuaha xaan cuenda yihí tahan. Ñima minoo ri cuenda.

15 Tyehe ta cuví cahan chaha yo ta catyí chi: “Yuhu ñima coño ñuhu cuví vatyí ñima ndaha cuví.” Ñima vatyí catyí chi tyicuan caa ta ñima coño ñuhu cuví chi.

16 O tyehe ta cuví cahan soho yo ta catyí chi: “Yuhu ñima coño ñuhu cuví vatyí ñima chiti nuu cuví.” Ñima tyi catyí chi tyicuan caa ta cusandihí chi cha cuví chi coño ñuhu.

17 Tyehe ta tandihí coño ñuhu yo cuví chiti nuu yo, yoso caa cuví cuiñi yo. O tyehe ta tandihí coño ñuhu yo cuví soho yo, yoso caa cuví tahñi yo.

18 Soco Nyoo tyaq ra noo noo cuan nu cuñí maa ra.

19 Tatu in cahnu ri caa coño ñuhu yo, ñima coño ñuhu cuví. Ta ña vaha quetuví.

20 Soco vasi cuaha cha nyaá chi yo, vaha quetuví vatyí nyaá tandihí cha cuví coño ñuhu chi yo.

21 Tyehe ta cuví cahan chiti nuu yo, ñahri ityi iyó chi chi cha catyí chi chi ndaha yo:

“Ña chiñuhú yoho chii.” Ta ni xiñi yo ta ñahri ityi iyó chi chi cha catyí chi chi chaha yo: “Ña chiñuhú yoho chii.”

22 Ña vaha cha catyí chi tyicuan caa. Vatyí vasi luhlu ri noo coño ñuhu yo cha cuñí maa yo tyi ña chiñuhú chi yo, ican cuan cuví cha chiñuhú ca chi yo.

23 Ta nu cuñí vaha yo, ican cuan sacuihnó vaha ca yo. Ta nu cuñí maa yo tyi ña tyaqui, ican cuan sacuví ca yo.

24 Ta nu tyaqui ca, ña cuñí chi sacuví yo. Soco maa Nyoo sandu in ri ra coño ñuhu yo, tacuhva vatyí nu cuñí maa yo tyi ña tyaqui, sacahnú ca yo.

25 Tacuhva cha ma cusiiñ coño ñuhu, tahan tahan chi cuñí chi quihí iñi chi cha catyí inga tahan chi.

26 Tatu suhva coño ñuhu yo nyehé chi tindoho, tandihí ri chi nyehé, ñima noo ri chi. Ta tatu suhva chi cusiiñ cuñí chi, tandihí ri chi ta cusiiñ cuñí chi, ñima noo ri chi.

27 Ta maa yo cuví yo coño ñuhu ra Cristo. Ta suhva suhva coño ñuhu ra cuví noo noo yo.

28 Ta Nyoo cuatyaa ra chi noo noo yo vehe ñuhu tacuhva tyinyeé yo chi tahan yo. Cha xihna ca cuatyaa ra chí ra apóstol. Cha cu uvi, chí ra profeta, o ra cachahá cuenda tuhun cahán Nyoo cuví cuan. Ta cha cu uñi, chí ra casañahá. Ta yaha cuan, ra cha casacuví milagru, ta ra cha casanduvahá chi ñu cuhví, ta ra cha catyinyeé chi ñáyivi, ta ra casahacuendá vehe ñuhu, ta ra cha cacahán inga sahan cha ña chitó ra.

29 Ña tandihí yo cuví yo apóstol. Ña tandihí yo cuví yo noo profeta. Ña tandihí yo cuví yo ra sañaha. Ña tandihí yo sacuví yo milagru.

30 Ña tandihí yo chahá Nyoo vatyí sanduvahá yo ñu cuhví. Ña tandihí yo cahán yo inga sahan cha ña chitó yo. Ña tandihí yo cuví nacoto yo ta nacatyí yo ñáa cha cuñí chi catyí noo cha cahán yo chihin inga sahan.

31 Ta nducu ndo cuhva ñaquehen ndo cha vaha ca cha chahá Nyoo. Soco cuasañahi noo ityi cha vaha ca chi ndo.

13

Chahá ra Pablo tuhun chi yo yoso caa tahán chi cha cuñí yo chi ñáyivi

1 Tatu yuhu ta cuví cahnin cuaha ri nuu sahan iyó siqui ñuhu ñáyivi ihya, ta cuví cahnin tiqui sahan ángel ñandihí, soco tatu ñahri cha cuñí chi Nyoo ta chi ñáyivi, cuví tari noo tambu cha ñañi ri maa o noo caa cha chacú ndaxin ri maa.

2 Tatu cuví cuhva cuende tuhun cahan Nyoo, o tatu cutuñí iñi tandihí tuhun xehe ca, ta chité tandihí, ta ña cuñí chi Nyoo ta

chi ñáyivi, ñahri maa tuhun. Tatu chinó vavaha iñi chi Nyoo nyacua cuví catyi chi ra na tohon ra noo yucu cuan ta natyaa ra inga ityi, ta sacuví ra cha chiquén, soco tatu ña cuñí chi Nyoo ta chi ñáyivi, ñahri ra cuví.

³ O tatu cuhve tandihi cha iyó chii chi ñu ndahvi, ta nyacua cuhva cuende ñáyivi tyi cayu coño ñuhi, soco tatu ña cuñí chi Nyoo ta chi ñáyivi, ñahri maa tuhun.

⁴ Tatu cuñí yo chi Nyoo ta chi ñáyivi, ña ihñi tisihi yo. Vaha ñáyivi cuví yo. Ña nyiyó iñi yo cha chahá Nyoo chi inga ñu, ña cahnu sahá yo chi yo, ta ña yaá yo.

⁵ Tatu cuñí yo chi Nyoo ta chi ñáyivi, ña quiñi iyó yo. Ña nanducú yo maa ri cha vaha chi maa yo. Ña cuxaán yo. Ña ndoó tisihi añima yo.

⁶ Tatu cuñí yo chi Nyoo ta chi ñáyivi, ña cusú cuñí yo ñáá ndihi cha ña vaha sacuví ñáyivi. Soco cusú cuñí yo cuenda cha vaha ta cha ndicha.

⁷ Tatu cuñí yo chi Nyoo ta chi ñáyivi, cunyeé yo nyehe yo tindoho sahá ñáyivi. Chinó iñi yo tyi cusacuvi ñu cha vaha. Nyatú yo cha nasama ñu cuhva iyó ñu. Chihin cha cama iñi yo ta cunyeé yo tandihi.

⁸ Cha cuñí yo chi Nyoo ta chi ñáyivi ma ndihi maa, soco coo quivi cha ma coo ca tuhun cha sahá yo profetizar. Ta ma cahán ca yo inga sahan cha ña chitó yo, ta tandihi tuhun cha chitó xaan yo cundihi.

⁹ Vityin chiin ri chitó yo ta chiin ri sahá yo profetizar.

¹⁰ Soco quivi quichi ra Cristo, cunduvaha tandihi ta cucoto yo tandihi, ta cundihi tuhun cha chitó yo chiin ri.

¹¹ Quivi cu luhlj cahin ta chica xiñi tari ra cuatyaa. Soco quivi chahnj sandoj cha nyacuvj tari ra cuatyaa.

¹² Ta tyicuan caa tucu, cuví yo tari ra cuatyaa vityin. Tari cha nyehé yo nu ino cha ña ndichin vaha. Soco quivi quichi ra Cristo ta cunyehe vaha yo chihin nuu yo chi ra. Chiin ri chitó yo cha vityin. Soco quivi cuan tandihi cuii ta cucoto yo, tari ñohó nuu Nyoo chi yo.

¹³ Iyó uñi tahan cha ma ndihi maa: cha chinó iñi yo chi Nyoo, cha cuatu yo cha ñihí yo cha cuenda ra Cristo, ta cha cuñí yo chi Nyoo ta chi ñáyivi. Soco chichi cha ninduñi tahan cuan, cha chiñuhú ca chi yo, cha cuñí yo chi Nyoo ta chi ñáyivi.

14

Nu sañahá ra Pablo yoso caa cahán yo inga sahan cha ña chitó yo

¹ Na sañihi yo cuñí yo chi Nyoo ta chi ñáyivi. Ta na nducu yo cuhva naquehen yo tunyee iñi cha chahá Tatyí li Nyoo chi yo. Na nducu xihna yo cha cuhva cuenda yo

tuhun cahán Nyoo, o sahá yo profetizar cuví cuan.

² Vatyí tatu cahán yo inga sahan cha ña chitó yo, cahán yo soco chihin Nyoo. Ñima chihin ñáyivi. Vatyí ni noo ñu ta ña cutuñí iñi ñu. Vatyí tuhun xehe cuví tuhun cha cahán yo cha cuenda Tatyí li Nyoo.

³ Soco tatu sahá yo profetizar, cutuñí iñi ñu. Ta chahnu ca ñu chihin tuhun Nyoo. Ta tyicuan caa sanduní yo ta sandunyeé ca yo iñi ñáyivi.

⁴ Tatu cahán yo inga sahan cha ña chitó yo, maa ri maa yo ndunyeé yo. Soco tatu sahá yo profetizar, ndunyeé cuñi tandihi ñu yihí cuenda Nyoo.

⁵ Yuhu cuñí vatyí tandihi ndo cahán ndo inga sahan cha ña chitó ndo. Soco vaha ca cha saha ndo profetizar. Vatyí tyinyee ca chi chi ñu nyicú vehe ñuhu ta ñima ca cha cahán yo inga sahan. Soco tatu noo ndo cuví nacoto ndo ñáá tuhun cahán noo tahan ndo chihin inga sahan, ñacatyí ndo. Tyicuan ta cuví tyinyee chi chi tandihi ndo.

⁶ Yucuan chaha yañi, tatu yuhu ta chai nu nyicu ndo, ta cahán inga sahan, ña tyinyee chi chi ndo. Soco tatu cahán noo cha sanyehe Nyoo chii, o noo cha sacotó ra chii, o noo profesia, o noo cha sañahi chi ndo, tyinyee chi chi tandihi cuii maa ndo.

⁷ Tatu tiví yo noo cutu, o sacua cu yo noo guitarra ta ña quita vaha nducan cuan sahá yo, ma coto yo ñáá yaa cuví.

⁸ Ta tatu nu iyó cuatyí ta ña tyacú vaha trompeta, yori coto ñáá cuhva tahan chi cañi tahan ra.

⁹ Ta tyicuan caa yoó, tatu cahán yo inga sahan cha ña cutuñí iñi ñáyivi, ma coto ñu ñáá tuhun cahán yo. Tari cha cuví yuhu ri maa yo cuví cuan.

¹⁰ Cuaha xaan nuu sahan iyó ñáyivi ihya. Ta noo noo nuu sahan ta iyó iyó ri cha cuñí chi catyi.

¹¹ Soco tatu ña cutuñí iñi sahan cha cahán inga ñáyivi chihin, ma cuví ndatuhin chihin ñu. Ta ni ri maa ñu ma cuví ndatuhun ñu chihin yuhu. Cuví ñu tari ñu inga ñuu cha cuende.

¹² Yucuan chaha nyoho cha cuñí xaan ndo naquehén ndo tunyee iñi cha chahá Tatyí li Nyoo, nducu ndo noo tunyee iñi cha vaha ca cutyinyee chi ñáyivi vehe ñuhu.

¹³ Yucuan chaha nyoho cha cahán ndo inga sahan, çacan ndo chi Nyoo vatyí cuví nacoto ndo ta nacatyí ndo chi tahan ndo.

¹⁴ Vatyí tatu nacuatí chi Nyoo chihin noo sahan cha ña cutuñí iñi, espíritu mai cha yihí chichi coño ñuhi ican nacuatú soco cha chiñi tuñi xiñi ña cutuñí iñi chi.

¹⁵ Yucuan chaha cuñí chi çacan tahvi chi Nyoo chihin inga sahan. Soco cuñí tucu chi cha çacan tahvi chi ra chihin sahan cha

cutuñi iñi. Ta cuñi tucu chi cha cate chihin sahan cha ña cutuñi iñi, Soco cuñi tucu chi cha cate chihin sahan cha cutuñi iñi yo ñandihí.

¹⁶ Vatyí tatu maa maa ri chihin sahan cha chahá Tatyí li Nyoo chuun, sacahnún chi ra, ma cutuñi iñi ñáyivi cha ña chitó ñáa cha cuví cuan. Ta ma cuví sacahnu ñu Nyoo chuhun.

¹⁷ Vasi vaha tuhun cahún, cuhva cha nacuhvón tyahvi nyoo chí Nyoo tyicuan caa, soco ña tyinyeé chí chi inga ñáyivi vatyí ña cutuñi iñi ñu tuhun cahún.

¹⁸ Soco yuhu nacuhvé tyahvi nyoo chí Nyoo vatyí cuaha ca chaha cahin inga sahan ta ñima ca tandihí nyoho.

¹⁹ Soco chichi vehe ñuhu tahan ca iñi cahín vasi ohon tahan tuhun cha cutuñi iñi ndo vatyí sañahi chí inga ndo, ta ñima ca cha cahín uchi mil tuhun cha ña cutuñi iñi ndo.

²⁰ Chahnu cuhva caça xiñi ndo, yañi. Ta ma lee xaan cuhva caca xiñi ndo. Soco lee cuhva cunyacuví ndo. Vatyí cha lee ña nyacuví chí cha quíñi caa.

²¹ Catyí Nyoo nu libru ley ra tyehé caa: “Cucahín chihin ñáyivi ihya chihin yuhu ñáyivi inga ñuu ta chihin inga sahan. Cha ña cutuñi iñi ñu. Soco ni ri tyicuan caa ta ma quichaha ñu chíi”, catyí Sutu Mañi yo.

²² Yucuan chaha tuhun cha cahán yo inga sahan cuví chí tari noo seña chí ñu cha ña chino iñi tuhun ra Cristo. Soco tuhun cha sahá yo profetizar, cuví chí cuenda ñu cha chinó iñi chí ra.

²³ Vatyí tatu ndu ñin ri ndo, ta tandihí ndo cahán ndo inga sahan ta quihví noo ñu cha ña yihí cuenda Nyoo, cucatyí ñu tyi ña vaha cuñi xiñi ndo.

²⁴ Soco tatu tandihí ndo sahá ndo profetizar, ta quihví noo ñu cha ña yihí cuenda Nyoo, o noo ñu ña cutuñi vaha iñi tuhun Nyoo, coto ñu tyi iyó cuatyí ñu cha cuenda tyi cutuñi iñi ñu cha cahán ndo.

²⁵ Ta tandihí cha caa chichi añima ñu cunacoto ñu. Ta nicuñi chiti ñu ta sacahnu ñu chí Nyoo. Ta catyí ñu vatyí ndicha ndicha cuíi cha nyaá Nyoo chihin ndo.

Yoso caa saccoó yo culto minoo cha cachi minoo cha ndaa

²⁶ Yucuan chaha yañi, tatu cuandu ñin ri yo, cujo noo noo yo yaa cha cata yo, o cha sañaha yo, o ñáa cha sanyehe o sacoto Nyoo chí yo, o cahan yo inga sahan, o cha nacoto yo ta nacatyí yo yoso caa cuahán tuhun inga sahan cuan. Soco tandihí ihya nacuví chí noo cha chahá tunyee iñi maa Nyoo chí tandihí yo cha yihí yo cuenda ra.

²⁷ Tatu cuacahan yo inga sahan nu ndu ñin ri yo, cuñi chí cahan uvi yo o uñi ri yo, soco noo noo ri yo cahan. Ma cahan yo ñin

ri. Ta ñin ri cuñi chí cha nacatyí noo yo tuhun cahán tahan yo.

²⁸ Soco tatu yori cuví nacatyí ñáa tuhun cahán yo, vaha taxin ca ma cahan ca yo chihin inga sahan nu ndu ñin ri yo. Çahan yo inga sahan soco xehe ri chihin Nyoo tacuhva cuñi ri maa yo.

²⁹ Tyicuan caa tucu tatu sahá yo profetizar, çahan uvi yo, o uñi ri yo. Ta tandihí ca yo saha yo cuenda tatu vaha cha cahán tahan yo.

³⁰ Soco tatu sacoto Nyoo ñáa noo ca tuhun chí inga ñu cha canyicú chiñi tuhun cuan. Tyicuan ta ñu cha xihna ri, cuñi chí sandihí ñu cha cahán ñu tacuhva cuví cahan inga ñu cuan.

³¹ Ta tyicuan caa tandihí ndo cha naquehén ndo tuhun cha chahá Nyoo chí ndo cuví nacatyí noo noo ndo. Vatyí tacuhva cutuhva tandihí ca ndo ta cuní ca iñi ndo.

³² Ñu cha sahá profetizar cuví cuatu noo ñu nya ndihí cahán inga ñu. Vatyí noo ri Nyoo cuví ra cha nyacá ñaha chí noo noo yo.

³³ Vatyí Nyoo cachi iyó ra ta ña iñi ndaa iñi noo nyacuví ra.

Quehen ndo cuhva vaha nyacuví inga hermano nu ca ndu ñin ri ra.

³⁴ Nusihi taxi ri na coo ñu. Cuñi chí quichaha ñu chí yí ñu tari catyí ley Nyoo.

³⁵ Tatu ñáa cha cuñi ñu coto ñu, na ndaca tuhun ñu chí yí ñu nya vehe ñu. Vatyí ña vaha quetuví cha cahán ñusihi nu ndu ñin ri yo.

³⁶ Tatu ñin cuhva chicá xiñi ndo, cuñi chí nicohón iñi ndo vatyí ñima chihin ndo quichaha tuhun Nyoo. Ta ñima nyoho ri naquehén tuhun Nyoo.

³⁷ Tatu nya noo ndo cuñi maa ndo vatyí profeta cuví ndo, o tatu cuñi maa ndo tyi Tatyí li saquehén ityi ra chí ndo, cunacoto ndo vatyí cha catyí chí ndo ihya, mandamiento Sutu Mañi yo cuví.

³⁸ Soco tatu ña cuñi ndo naquehén ndo tuhun ihya, ni nyuhu ta ma naquehen ndi tuhun cahán ndo.

³⁹ Ta tyicuan caa yañi, na nducu ndo cuhva saha ndo profetizar. Ta ma casi ndo cha cahán ñu inga sahan.

⁴⁰ Soco sacuví ndo tandihí chihin cha ndaa ta chihin cha cachi.

15

Yoso caa nandoto ra Cristo

¹ Vityin yañi, cuñi vatyí nicohon iñi ndo tuhun ra Cristo, cha sacacú chí yo, cha cahín nuu ndo quívi cuan. Ta ican naquehen ndo ta ni iñi ndo chinó iñi ndo.

² Ta suri cha cuenda tuhun ra Cristo cacú añima ndo tatu cuahán ndo tari cuhva

sañahí chi ndo. Soco tatu natyihí caxiin ndo cuahan ndo, ñahri maa tuhun cha chinó iñi ndo chi Nyoo.

³ Cha xihna ri sacote tuhun cha cutuhve chi ndo. Ta sañahí chi ndo vatyi ra Cristo chihj ra cha catyi cuatyí yo, tari catyi nu libru Nyoo vatyi cuatyí.

⁴ Tyicuan ta chicuchj ñu chi ra. Soco nu ndu uñi quivi nandoto ra tari catyi tucu nu libru Nyoo.

⁵ Tyicuan ta tuvj ra Cristo nuu ra Pedro ta yahá cuan ta nuu ndi uchi uvi tahan ra chicá tyiño ra.

⁶ Yahá cuan ta noo chaha tuvj ra nuu yaha ca ohon cientu yafi yo. Ta cuaha ca ñu cuan iyó ca ñu vityin. Soco suhva ñu cha yahá chihj ñu.

⁷ Yahá cuan ta tuvj ra nuu ra Jacobo. Yahá cuan ta nuu tandihí ra apóstol.

⁸ Ta nu ndihí tuvj tucu ra nuu yuhu, cha cuví tari noo ra cuatyaa cha cacu ta ta chaa ca yoo cacu. (Vatyí ta cutuñi ca iñi tuhun Nyoo cuví cuan.)

⁹ Vatyí cha nuu tandihí ca ra apóstol cuví yuhu noo cha ñima ri tuhun. Ta ni ña nañé cha cuví apóstol vatyi chicá nyicon xain chi ñu ñohó cuenda Nyoo.

¹⁰ Soco Nyoo vaha xaan ñáyivi cuví ra chihin. Ta ñima cha caha ri sahá ra tumañi iñi chii cha cuví noo ra chicá tyiño ra. Ta ñihi ca sahá tyiñe ican saha inga ra. Soco ñima mai sahá tyiñe vatyi maa Nyoo nyaa chihin. Ta ican ra sacuví tandihí cuan.

¹¹ Soco ñahri saha, an yuhu, an inga ra cuan. Soco tuhun cahán ndi chihin ndo, ican ihya cuví tuhun cha chinó iñi ndo.

Nu sañahá ra Pablo vatyi cha ndicha cuví vatyi cunandoto ñu ndiyi

¹² Tatu cahán ndi tuhun cha nandoto ra Cristo mahñu ñu ndiyi chihin ndo, ¿ñáá tuhun cha yihí ndo catyi ndo vatyi ma nandoto ñu ndiyi?

¹³ Vatyí tatu ma nandoto ñu ndiyi, ni ri ra Cristo ta ña nandoto ra cuví cuan.

¹⁴ Tyehe ta ña nandoto ra Cristo, tuhun cha cahán ndi chihin ndo ñahri maa vale. Ta ni ri cha chinó iñi ndo, ñahri maa tuhun.

¹⁵ Tatu tyehe ta ña ndicha cha sanandoto Nyoo chi ra Cristo, cuví ndi noo ra cuendu tyi catyi ndi vatyi sanandoto Nyoo chi ra. Ta tatu ña ndicha cha nandoto ñu ndiyi, ña ndicha cha sanandoto Nyoo chi ra Cristo.

¹⁶ Vatyí tyehe ta ma nandoto ñu ndiyi, ni ri ra Cristo ta ña nandoto ra.

¹⁷ Ta tatu ña nandoto ra Cristo, ñahri maa tuhun cha chinó iñi ndo cha sandachí ra cuatyí ndo. Ta tacuhva iyó ri maa cuatyí ndo.

¹⁸ Ta ñu yihí cuenda ra ta cachihj ñu, cuanaa ri maa ñu cuví cuan.

¹⁹ O tyehe ta ihya ri ñáyivi tyinyeé ra Cristo chi yo, ta ma nandoto yo quivi quichi ra, cuví yo noo ñu tondo cha nuu tandihí ca ñáyivi.

²⁰ Soco chitó vaha yo vatyi cha ndicha cuví cha nandoto ra Cristo. Ta ican ra cuví cha nandoto xihna ca mahñu ñu ndiyi.

²¹ Vatyí cha catyi cuatyí ra Adán ta chicoó tuhun chihí. Yucuan chaha tahán chi cuví yo. Soco cha catyi cha nandoto ra Cristo tahán chi nandoto tucu ñu yihí cuenda ra.

²² Ta tari tandihí ñáyivi chihj cha cuenda ra Adán, tyicuan caa tucu cunandoto tandihí ñu cuenda ra Cristo.

²³ Soco noo noo yo cunandoto yo quivi tahan chi chi yo. Xihna ca ra Cristo nandoto. Yaha cuan ta quivi quichi tucu ra inga chaha cunandoto tucu ñu yihí cuenda ra.

²⁴ Yaha cuan ta cundihí tuhun ñuhu ñáyivi ihya ta ma cunyaca ñaha ca ra cuví tyiño nahnu, ta tatyí ña vaha. Vatyí ra Cristo cuatinyaa ra fuerza chi ra cuan. Ta cunacuhva cuenda ra chi Nyoo Sutu ra.

²⁵ Vatyí ra Cristo cunyaca ñaha ra nyacua nya quivi cuhva Nyoo cha cuví chasaha ra chi tandihí ra xaan iñi chi ra.

²⁶ Ta nya nu ndihí, cusanaa ra tuhun chihí.

²⁷ Vatyí cha yahá nacuhva cuenda Nyoo tandihí chi ra Cristo vatyi cunyaca ñaha ra. Soco nu catyi chi vatyi tandihí natyaa Nyoo ndaha ra, cuñi chi catyi vatyi ma cunyaca ñaha ra chi maa Nyoo vatyi ican maa Nyoo natyaa tandihí cuan ndaha ra.

²⁸ Soco quivi saha ganaa ra Cristo tandihí, tyicuan ta maa ra cha cuví ra Sehe Nyoo, cunacuhva cuenda ra tandihí chi Nyoo Sutu ra. Vatyí Nyoo cucuvi ra Nyoo cuenda tandihí maa cha iyó.

²⁹ Tatu tyehe ta ña nandoto ñu chihj, ¿ñáá tuhun yihí ñu condutyá ñu tyiño nuu ñu chihj?

³⁰ Ta tyicuan caa tucu mai, tatu ma nandote, ¿ñáá tuhun ndoi vaha cha ndi quivi nyatí tuhun chihí?

³¹ Tandihí quivi nyatí tuhun chihí. Soco ñahri caa vatyi sii cuñi chihin ndo. Vatyí chinó iñi ndo chi Sutu Mañi yo Jesucristo.

³² Ñáá ri tuhun nyehj tindoho ñuu Éfeso tatu tyehe ta ma nandoto ca yo. Vaha taxin ca sacuvi yo tari catyi ñáyivi: “Na cachi yo, na coho yo vatyi tyaan isa cuví yo”, catyi maa ñáyivi cha ña chitó.

³³ Ma cuhva ndo cha sandavi ñaha ñu chi ndo. Vatyí iyó tucu tuhun cha catyi: “Tatu ñu tahan yo quiñi iyó ñu, cuví sativi ñu cuhva vaha cuahan yo.”

³⁴ Saha ndo cuenda cuhva iyó ndo. Ta ma sacuvi ca ndo cha quiñi caa. Vatyí chihin cuhva iyó suhva ndo chité tyi ña ñohó nuu

ndo chi Nyoo. Catyí chi ndo tyehe caa vatyi nacoo ticahan nuu nuu ndo.

Nu sañahá ra Pablo yoso caa cusandoto Nyoo chi yo quivi quichi ra Cristo

³⁵ Soco yihí ndo ndacá tuhun ndo: “¿Yoso caa cunandoto ñu chihí? ¿Ñáá coño ñuhu cucuiso ñu?”

³⁶ ¡Tondo xaan xiñi ndo! ¿Atu ña chitó ndo vatyi tatu tachí yo noo chiti yutun, cuñi chí cha tyahyu soo chiti cuan? Tyicuan ta cañá noo yutun. (Chihí chiti cuan tacuhva na coo yutun cuan ñayiví.)

³⁷ Vatyi cha tachí yo ñima maa tun tachí yo. Soco chiti tun, an cuví ri nuñi, o trigu, o ñáá ndihí ca chiti.

³⁸ Ta cha cañá cuan Nyoo sacuví ra yoso cuhva cuñi maa ra chí noo noo cha cañá cuan. Vatyi siin siin cuhva caa noo noo nuu chiti.

³⁹ Ta tyicuan caa tucu tandihí coño ñuhu, ña in ri caá chí. Siin caa coño ñuhu ñáyivi. Siin caa coño ñuhu cuiñi. Siin caa coño ñuhu saa. Siin caa coño ñuhu tiyaca.

⁴⁰ Ta tyicuan caa tucu cha iyó andívi. Siin caa cha iyó yucuan. Ta siin caa tucu cha iyó ñuhu ñayiví ihya. Ta cha iyó nya andívi tyaquí xaan, ta cha iyó siqui ñuhu ñayiví tyaquí tucu cuan soco siin caa.

⁴¹ Cha ndichin ñanyii, ña inuu ri chihin cha ndichin yoo. Ta ña inuu ri chihin cha ndichin tiño. Ta tiño ña inuu ri chihin inga tucu tiño.

⁴² Ta tyicuan caa tucu tuhun cha nandoto yo. Vatyi chicuchi yo noo coño ñuhu yo cha tuhva tyahyu. Ta cunandoto yo soco chihin noo cha ma cuví ca maa.

⁴³ Chicuchi yo noo cha numi ri tyahyu. Soco cunandoto noo cha tyaquí. Tyihí yo noo coño ñuhu pehe chichi ñuhú. Ta cunandoto noo cha nyee.

⁴⁴ Vatyi chicuchí yo coño ñuhu yo cuenda ñayiví ihya chichi ñuhu. Ta cunandoto noo cha ñima ca cuenda ñayiví ihya cuví, soco cuenda Nyoo andívi. Tatu iyó coño ñuhu yo ñayiví ihya. Suri coo tucu noo cha ñima ca cuenda ñuhu ñayiví, soco cuenda andívi.

⁴⁵ Catyí tuhun Nyoo vatyi ra Adán ra cha chiyo cha xihna ri, chahá Nyoo ñayiví coo ra. Soco ra Adán cu uvi, ra cuví Cristo, cuví ra Tatyí lí ta chahá ra noo ñayiví cha ma naa ca maa chí yo.

⁴⁶ Yucuan chaha, cha xihna ri tahán chi coo yo chihin coño ñuhu cuatyi yo. Ta yaha cuan ta coo yo cuenda Tatyí lí Nyoo.

⁴⁷ Rayí cha chinq cha xihna ri, chihin ñuhú chinq ra. Ra cuenda ñuhu ñayiví cuví ra. Ta rayí cu uvi cha cuví Sutu Mañi yo, ra cuenda andívi cuví ra.

⁴⁸ Tandihí yo nyisó yo coño ñuhu cha chinq chihin ñuhú, tari coño ñuhu ra Adán.

Ta cha cucuiso yo andívi cuví chí tari nyisó ra Cristo ra quichí nya andívi.

⁴⁹ Tari ndacú yo chí rayí, ra cha chinq chihin ñuhú, tyicuan caa tucu cundacu yo chí ra Cristo ra quichi nya andívi.

⁵⁰ Ta cuñi catyi chí ndo yañi, vatyi coño ñuhu yo ma cuví quihvi chí andívi nu nyacá ñaha Nyoo. Noo cha tañi tyehe ri tiví ma cuví quihvi noo nu ña tiví.

⁵¹ Soco cuñi tyi coto ndo noo tuhun xehe cha yori maa chitó. Vatyi ña tandihí yo cucúvi yo. Soco tandihí yo ta cunasama cuhva caa yo.

⁵² Ta in yaha cui ri, tari noo cha ndahvá nuu ri yo, nu ndihí tiví ángel trompeta. Vatyi cutiví ángel trompeta ta ñu ndiyí cunandoto ñu cha ma cuví ca maa ñu. Ta Nyoo cunasama cuhva caá ñu.

⁵³ Vatyi cuñi chí tyi nasama Nyoo coño ñuhu yo chihin noo cha ma naa ca maa.

⁵⁴ Ta quivi cuan nasama coño ñuhu yo ta quehen yo cha ma tiví maa. Cua cuví tari catyí nu libru Nyoo tyehe caa:

“Nyoo cuví chasaha ra chí tuhun chihí.”

⁵⁵ Yoho, Tuhun Chihí, ¿Nya nyaa tunyee iñi chuun vityin vatyi cahñun chí ndí?

¿Nya nyaa cha cua saha ganaun vityin, yoho Tuhun Chihí?

⁵⁶ Vatyi cuatyi yo ican chahá cha cahñi tuhun chihí chí yo. Ta ley chahnu, ican cuví cha chahá fuerza chí chí.

⁵⁷ Soco tyahví nyoo chí Nyoo, yañi. Vatyi sahá ganaa yo siqui cuan cha catyi Sutu Mañi yo Jesucristo.

⁵⁸ Yucuan chaha yañi, na cuinanyaa yo chihin Nyoo chihin cha ñi iñi yo. Tyicuan ri na saha tyiño yo nu tyiño Sutu Mañi yo. Vatyi tyiño sahá yo chihin Sutu Mañi yo, ñima cha sahá tyiño caha ri maa yo cuví.

16

Chahá ra Pablo tuhun chí ñu Corinto yoso caa tyinyee ñu chí tahan ñu cuenda Nyoo

¹ Ta tuhun cha tyinyee ndo xuhun chí ñu ndahvi, ñu yihí cuenda Nyoo. Cunyacuví ndo tari catyí chí ñu nyicú tandihí vehe ñuhu ityi Galacia.

² Ma cuatu ndo nya quichi ta cuhva ndo xuhun. Soco tahan tahan nu ndihí vitya ri ta tyihí siin ndo cha tahán chí cuhva ndo chí ñu, yoso cuhva cha chahá Nyoo chí ndo.

³ Ta quivi cha quichi, cutachi nya ra cha cuñi maa ndo vatyi cunyaca ra xuhun cuan chihin carta chí tahan yo cha canyicú nya Jerusalén.

⁴ Ta tatu tahan tucu chí kuhin, kuhun coyo ra chihin.

Yihí iñi ra Pablo nya ndihí nu cucahan ra tuhun ra Cristo

⁵ Cuhin nu nyicu ndo Corinto chiña, soco cuhun xihne ityi Macedonia. Vatyí ityi cuan cuyahi.

⁶ Ta tatu chahá chi cuhva cundoi chihin ndo nyacua nya yahá yoo vichin. Tyicuan ta cuví tyinyeé ndo chiin chíi ta cuhin inga ñuu.

⁷ Ña cuñi cha ñn yaha ri yahi nu nyicu ndo. Vatyí cuñi ndoi suhva quivi chihin ndo tatu Sutu Mañi yo ta cuñi ra.

⁸ Soco cunyai ñuu Éfeso ihya, nyacua nya yaha quivi cha sanducahnú ñu Israel vico Pentecostés. Tyicuan ta quichi nu nyicu ndo.

⁹ Cundoi suhva ihya vatyí vasi cuaha xaan ñáyivi ña cuñi nyehe ñu tuhun Nyoo, soco chahá xaan chi cuhva cahín tuhun Nyoo chihin ñáyivi ñuu ihya.

¹⁰ Tatu chaa ra Timoteo, na cunyaa ra chihin ndo. Ta vaha tyiñuhu ndo chi ra. Vatyí sahá tyiño tucu maa ra cuenda Sutu Mañi yo tari mai.

¹¹ Ta vaha cõo ñni ndo nyehé ndo chi ra. Ta tyinyee ndo chiin chíi ra tyi quichi ra nu nyai. Vatyí nyatí chíi ra chihin inga yañi yo.

¹² Ta yañi yo, ra Apolos, chacu ndahvi xain nuu ra nacuhun ra chihin inga yañi yo nu nyicu ndo. Soco ña cuñi ra. Soco cuhun maa ra nacuhva chi cuhva chi ra, na.

Chahá ra Pablo nocumi chi tandihí ñu yihí cuenda Nyoo ñuu Corinto

¹³ Sañihi ndo chinó ca ñni ndo chi Nyoo. Ta cunii ñni ndo ta nacoo vaha fuerza Nyoo chíi ndo.

¹⁴ Tandihí cha sacuví ndo, sacuvi ndo cha cuenda cha cuñi ndo chíi Nyoo ta chíi tahan ndo.

¹⁵ Chitó ndo yañi vatyí ñáyivi chíi ra Estéfanos xihna ca ñu chinó ñni tuhun ra Cristo ityi Acaya chiña. Ta vityin sacuví ñu tyiño nuu ra hermano.

¹⁶ Ta catyí chíi ndo vatyí saha ndo ñáyivi chíi ñu cha iyó tari iyó ñu chiña, ta chíi tandihí ñu cha tyinyeé ta sahá tyiño cuenda Nyoo.

¹⁷ Ta cusii xaan cuñi cha quichí coyo ra Estéfanos ta ra Fortunato ta ra Acaico. Vatyí maa ra catyinyeé ra chíi ndi. Vatyí tandihí ndo ña cuví quichi ndo vatyí cañi xaan ñuu ndo.

¹⁸ Soco maa ra quichí coyo ra. Ta sandunyeé ca ra ñni chihin tuhun Nyoo. Tari sandunii ra ñni nyoho ñandihí. Ta vaha cõo ñni ndo nyehé ndo tyiño casacuví ra. Vatyí maa ra ñn ri chíi Nyoo canyicón ra.

¹⁹ Ta vachí nocumi chíi ndo sahá tandihí yañi yo ta tahan yo cha ndu ñn ri ityi Asia ihya. Ta vachi tucu nocumi chíi ndo sahá ra Aquila ta cu Priscila, ta ñu yihí cuenda Nyoo cha ndu ñn ri vehe ñuhu nu cuví vehe ñu.

²⁰ Vachi nocumi chíi ndo sahá tandihí yañi yo, ta nacuhva maa ndo nocumi chíi noo noo ndo nu nyicú ndo chiña.

²¹ Nocumi cha vachí chíi ndo ihya, yuhu ra Pablo tyaj chihin ndahi.

²² Tatu nya ñáyivi ña cuñi chíi Sutu Mañi yo Jesucristo, nacuhun ñu anyaya. Soco yuhu catyí: ¡Sutu Mañi yuhu, ñaha!

²³ Ta nasoco Sutu Mañi yo Jesucristo chíi tandihí ndo.

²⁴ Ta catyí chíi ndo vatyí yuhu cuñi chíi tandihí ndo cha cuenda ra Cristo Jesús. Ta nacuví chíi tyicuan caa.

Carta Cha Cu Uvi Sacuhun Ra Apóstol Pablo Chi Ñáyivi Ñuu Corinto Cha Yihí Cuenda Nyoo

*Nu sacuhún ra Pablo noo tutu chi ñu ñuu
Corinto cha yihí cuenda Nyoo*

¹ Yuhu ra Pablo, cuví noo ra apóstol ra Jesucristo vatyi Nyoo nacachí vaha ra chii. Ta yuhu ta ra Timoteo yañi yo tyaá ndi noo tutu ihya chi ndo cha cuví ndo ñáyivi ñuu Corinto cha yihí cuenda Nyoo, ta chi tandihi ñu yihí cuenda Nyoo nicacahnu ityi Andaya chiña.

² Nyoo Sutu yo ta Sutu Mañi yo Jesucristo na nasoco ra chi ndo ta nacuhva ra cha taxi ri coo añima ndo.

*Nu chicá noo ra Pablo sacotó ra tuhun ra
Cristo nyehé xaan ra tindhó*

³ Na sacahnu yo chi Nyoo Sutu Sutu Mañi yo Jesucristo. Vatyi ican ra cuví Nyoo Sutu yo. Ta cundahvi xaan cuñi ra nyehé ra chí yo. Ta maa ra tyicuan ri naquehén ndahvi ra chí yo.

⁴ Ta cuhva cha nyehé yo tindhó maa ra naquehén ndahvi ra chí yo. Vatyi tyicuan caa ta cuví naquehen ndahvi tucu maa yo chí ñu nyehé tindhó tari naquehén ndahvi tucu maa ra chí yo.

⁵ Vatyi cha cuenda ra Cristo, nyehé xaan ndi tindhó ta suri cha cuenda ra Cristo naquehén ndahvi xaan Nyoo chí ndi.

⁶ Tatu nyehé ndi tindhó cha cuenda cha sacotó ndi tuhun ra Cristo chí ndo, soco cha cuenda cha vaha chí ndo cuví vatyi tyicuan ta Nyoo naquehen ndahvi tucu ra chí ndo, ta sacacu ra chí ndo. Ta tatu Nyoo ta sandunyeé ra iñi ndi, cuví tucu chí cha cuenda cha sandunyeé tucu ra iñi maa ndo ta cacu ndo, ta siin ri tacuhva cha cunyeé ndo tindhó cha nyehé ndo. Vatyi iin ri tindhó nyehé yo.

⁷ Vatyi chitó vaha ndi tatu nyehé ndo tindhó cha cuenda ra Cristo tari cha nyehé nyuhu, maa ra cunaquehen ndahvi ra chí ndo, tari naquehén ndahvi tucu ra chí nyuhu.

⁸ Yañi, cuñi ndi tyi coto ndo vatyi cuaha xaan tindhó nyehé ndi ta chinyaá ndi ityi Asia. Ñihi xaan chiyo tindhó nyacua cha ñahri ca fuerza ndi cahvi iñi ndi. Ta tyaá ndi cuhva vatyi cha yahá chihí ndi ta quita ndi yucuan.

⁹ Cuñi maa ndi vatyi cha cha cuacúvi ndi. Ta ña cuví sacacu ndi chí ndi. Soco yucuan sañahá chí chí ndi na nachinó ca iñi ndi chí Nyoo ra sanandotó ndiyi.

¹⁰ Nyoo sacacú ra chí ndi ndaha tuhun chihí quivi cuan, ta sacacú ca ra chí ndi nya vityin. Ta chitó ndi vatyi tyicuan ri cusacacu maa ra chí ndi.

¹¹ Tatu tyinyeé ndo chí ndi chihin cha chicán tahvi ndo chaha ndi, ta tatu cuaha ñáyivi chicán tahvi chaha ndi, cunacuhva ñu tyahvi nyoo chí Nyoo cha cuenda tyi ñihí ñu tuhun tyi Nyoo chahá ra cha vaha chí ndi, vatyi chicán tahvi ñu chaha ndi.

*Nu nacatyí ra Pablo ñáá tuhun ña chaq ñaha
ra ñuu Corinto*

¹² Iyó noo tuhun cha cusii xaan cuñi ndi, vatyi yoso ri sandavi ñaha ndi. Vatyi cachi cuhva iyó ndi. Ta ndaa cuhva iyó ndi xihna ca chihin tandihi ri ndo, ta chihin inga ñáyivi ñandihí. Ta ñima chihin cha chiñi tuñi maa ndi iyó ndi tyehe caa, soco cha cuenda tyi tyinyeé xaan maa Nyoo chí ndi.

¹³⁻¹⁴ Ta nu tutu cha sacuhún ndi chí ndo, maa maa ri tuhun cha cuví sacuahá ndo, ta cha cuví cutuñi iñi ndo, tyaá ndi. Vityin cuahán cutuñi iñi ndo suhva. Ta nyatú ndi na cutuñi vaha ca iñi ndo tandihi tuhun cuan. Tacuhva cusii cuñi ndo chihin ndi quivi quichi Sutu Mañi yo. Ta cusii cuñi tucu maa ndi chihin ndo.

¹⁵⁻¹⁶ Ta cha cuenda cha cusii iñi yo tyehe caa, tyaí cuhva quivi cuan cha cuhun xihne nu nyicú ndo. Yihí iñi cha cuhin nu nyicú ndo, quivi cha yahí cha cuahín nya Macedonia ihya. Ta quivi cha nayaha tiqui cha chahín Macedonia, cuhin inga chaha nu nyicú ndo. Tyicuan caa ta cuví cusii iñi ndo chihin yuhu uvi chaha, tyaí cuhva. Ta tyicuan caa ta cuví tyinyee ca ndo chíi ta cuhin ityi Judea.

¹⁷ O cuñi maa ndo vatyi ña tyaí cuhva cha cuhin nu nyicú ndo. Ta vasi cuñi maa ndo vatyi sacuví tari ñáyivi iyó siqui ñuhu ñayivi ihya. Vatyi catyi ñu tyi cuhun ñu, ta ña sacuví ñu.

¹⁸ Maa Nyoo chitó ra vatyi ndicha cha cahín. Ta ña tuhvé sandavi ñahi.

¹⁹ Vatyi yuhu ta ra Silvano ta ra Timoteo cahán ndi chihin ndo. Vatyi tuhun maa ra Cristo maa maa ri tuhun ndicha cuví.

²⁰ Tyi cha cuenda maa ra ñihí yo tandihi cha vaha cha catyi Nyoo tyi cucuhva ra chí yo. Yucuan chaha cuhva cha sacahnú yo chí Nyoo, o chicán tahvi yo chí ra, catyi yo: “Amén”. Vatyi chitó yo tyi cuacuhva ra cha vaha chí yo cha cuenda ra Cristo.

²¹ Ta Nyoo sanduní ca ra iñi yo nu sandu iin ri ra chí yo chihin ra Cristo. Ta nacachí ra chí yo.

²² Ta tari cha tyaá ra tuñi ra chí yo cuví cuan. Vatyi chaha ra Tatyí Ii ra quihí añima yo cha cuenda cha cuñihi ca yo ñáá ca cha cucuhva ra chí yo.

²³ Na naquehen Nyoo chii vityin ri tatu ña ndicha tuhun cua catyi chi ndo. Ta cuhun que nu nyicú ndo Corinto chiña vatyi tatu cuhin tyái cuhva cha cahin chiin chi ndo. Yucuan chaha ña cuñí ñahi cuhin vatyi nacuaan iñi nyehí chi ndo. Ta Nyoo chiñí ra vatyi ndicha cha cahín.

²⁴ Ñima cha cuñí ndi cunyaca ñaha ndi chi ndo yoso cuhva chinó iñi ndo chi Nyoo. Vatyi chinó vaha iñi ndo. Soco cha cuñí ndi tyinyeé ca ndi chi ndo na coo ca tusii iñi maa Nyoo aña ndo.

2

¹ Yucuan chaha ña cuñí quichi tiqui nu nyicu ndo coto cuhva que tucuihya iñi chi ndo.

² Vatyi tatu yuhu ta sanducuihyé iñi ndo, yori ca cuví sandusii iñi mai. Vatyi ma cuví ca sandusii ndo iñi tatu cha yaha sanducuihye iñi ndo.

³ Yucuan chaha sacuhin tuhun cuan chi ndo. Vatyi tatu cuhin soco ma sanducuihya ndo iñi chihin cuhva iyó ndo. Vatyi tahán chí sandusii ndo iñi. Ta tatu sii cuñí yuhu, chité tyi tandihí yo ta cusii iñi yo.

⁴ Quivi cha tyái carta cuan chi ndo, chica xaan xiñi. Ta nducuihya xaan iñi nyacua chaqui. Soco ñima cha sacuhin carta cuan chi ndo vatyi cuñí cha nducuihya iñi ndo. Soco vatyi coto ndo vatyi yaha xaan cuñí chi ndo.

Nu chahá ra Pablo tuhun chi ñu yoso caa saha ñu ticahnu iñi

⁵ Tucuihya iñi cha chahá ra chiña, ñima iin ri chi yuhu chahá ra. Chahá tucu ra chiin chi tandihí nyoho ñandihí. Catyí tyehe caa tacuhva cha ma yaha xaan cahín.

⁶ Vaha ri, cha iyó vaha. Ma cahan ca ndo chí ra. Ma tachi tuñi ca ndo chí ra.

⁷ Ta vityin tahán chí vatyi saha ndo ticahnu iñi chí ra. Ta naquehen ndahvi ndo chí ra, coto yaha xaan nducuihyá iñi ra.

⁸ Yucuan chaha catyí chi ndo sañaha ndo cha cuñí ndo chí ra.

⁹ Sacuhin carta cuan chi ndo quivi cuan vatyi cuñí cote tatu sacuví ndo cuhva chahí chi ndo.

¹⁰ Ta vityin tatu sahá ndo ticahnu iñi, sahá tucu yuhu ticahnu iñi yóo cha chahá tisihi chí yo. Tatu ndicha cha chahá ra tisihi chí. Soco sahí ticahnu iñi chí ra cha cuenda cha vaha chí nyoho. Vatyi yucuan cuhva cuñí maa ra Cristo.

¹¹ Vatyi chitó yo vatyi tatu ma saha yo ticahnu iñi chí tahan yo, cuihna cutyihí ra cha quíni caa aña yo. Vatyi maña xaan ra. Ta cuví sacaani tahan ra chí yo.

Ña ndoo ra Pablo ñuu Troas vatyi ña nañihí ra chí ra Tito

¹² Quivi chají ñuu Troas cha cuacahin tuhun ra Cristo, chahá chí cuhva cha sahá tyiñe tyiño nuu Sutu Mañi yo yucuan.

¹³ Soco ña sii maa cuñí añaime. Vatyi ña nañihí chí yañi yo, ra Tito. Yucuan chaha ña ndoo que ñuu cuan cahin chihin ñu. Ta vachi ityi Macedonia ihya.

Cahán ra Pablo tuhun ra Cristo chihin cha ñu iñi ra

¹⁴ Soco tyahvi nyoo chí Nyoo vatyi tyicuan ri sahá ganaa yo chihin fuerza ra Cristo Jesús. Vatyi sacotó yo tuhun ra chí ñayivi. Ta tuhun ra cha cahán yo, cuví chí tari noo xico vixi chahan cha caña tandihí ri ityi nu cuahán yo.

¹⁵ Ta yóo cuví yo tari noo xico vixi cha chahá cuenda ra Cristo chí Nyoo. Ta caña xico cuan mahñu ñu cha cucacu añaime, ta mahñu ñu cha ma cacu añaime ñandihí.

¹⁶ Soco cha cuenda ñu cha ma cacu añaime cuan, quíni chahán, tari noo xico ndiyí cuví tuhun cha sacotó yo chí ñu, cuñí maa ñu. Vatyi sacotó yo yoso caa cucuví ñu vatyi ña chinó iñi ñu chí ra Cristo. Soco cha cuenda ñu cha cacú añaime, vixi xaan chahán, Vatyi sacotó yo yoso caa coo ñu ñayivi cha ma naa ca maa. Soco ¿yóo cha cuví sacuví tyiño ihya?

¹⁷ Nyuhu ña sacuví ndi tari sacuví cuaha ra cachicá noo. Ra cuan cuñí ra xuhun. Tuhun ra Cristo ñima noo cha xicó yo cuví. Soco cahán ndi chihin cha ñu iñi ndi tuhun ra vatyi iin ri cuví ndi chihin ra, ta Nyoo ta ra Cristo tachí ra chí ndi.

3

Tuhun chaa cha quichi cacun ra Cristo

¹ Ta cha cahán ndi tuhun ihya, ¿atu cha cuñí ndi sayaa ndi chí ndi, cuñí maa ndo? Ñima tyicuan caa. Ta yóo ¿atu chiñuhú cha cuiso yo tutu cha catyí chí vatyi vaha ñayivi cuví yo, tari tuhva inga ra canyiso? Ñima.

² Vatyi nyoho cuví ndo carta ndi cha tyaa Nyoo añaime ndi. Vatyi cuví nyehé ñayivi yoso caa nasama Nyoo cuhva iyó ndo. Ta coto ñu tyi maa maa ri cha vaha sañahá ndi chí ndo.

³ Ta cachi nyehé ñu tyi cuví ndo carta cha tyaa ra Cristo vatyi nyehé ñu, ta nyuhu nacuhva cuenda ndi carta cuan chí ñu. Ta ñima chihin tinta tyaa Tatyí Ii Nyoo nyitó añaime ndo. Ta ni ñima nu yuu chucunyaa.

⁴ Cahán ndi tyehe caa vatyi chitó ndi vatyi Nyoo cuacuhva ra cha quita vaha tyiño sahá ndi. Vatyi tyinyeé ra Cristo chí ndi.

⁵ Ma caña iñi ndi caca xiñi ndi tyi iyó tunyee iñi maa ndi cha sacuví ndi ñáa cha sacuví ndi. Soco tandihí cha sacuví ndi maa Nyoo sacuví.

⁶ Maa Nyoo chahá ra tunyee ifi ra chi ndi, ta sacotó ndi tuhun chaa cha natyihí tahan ra tuhun chihin yo. Vatyí Tatyí lí ra chahá ñayiví chaa coo yo. Ta ley chahnu cuan cha chahá Nyoo chi ra Moisés, sacuhún chi chí yo anyaya vatyí ña cuví quichaha yo tandihí ley cuan.

⁷ Ley chahnu cuan, chicunyaa chihin letra chata yuu ta cha naha. Ta cuhva cha chaa ra Moisés chihin cuan, tyaquí xaan xiño nuu ra nyacua nayuhví ñu Israel nanyehé ñu nuu ra. Soco suvita ri tyí cha tyaquí cuan numi ri ndihí. Soco tatu tyaquí cuví cuan,

⁸ tyaquí ca cuví tuhun chaa cha quichí nyaca Tatyí lí Nyoo chi yo. Tyaquí xaan ca cuan.

⁹ Tatu ley chahnu cha sacuhún chi yo anyaya, tyaquí xaan cuví, nyaca cuví tuhun cha saváha chi yo nuu Nyoo. Tyaquí xaan ca cuví cuan.

¹⁰ Vatyí ley chahnu tyaquí xaan cuví quiví cuan, cuñí maa ñáyiví. Soco vityín chitó yo tyí ña tyaquí xaan cuví. Vatyí tyaquí xaan ca maa tuhun ra Cristo cha sacacú chi yo nuu Nyoo.

¹¹ Vatyí tatu tyaquí xaan cuví cha ñin yaha ri chiyo, nyaca cuví noo cha ma ndihí ca maa.

¹² Chitó ndi tyí ma naa cuan. Yucuan chaha cahán ndi chihin cha ñi ifi ndi. Ña cahán nuu ndi ta ña yuhví ndi.

¹³ Ña sacuví ndi tari sacuví ra Moisés. Vatyí chasí ra nuu ra chihin noo sahma, tacuhva cha ma nyehe ñu Israel nu cunaa cha xiño cuan.

¹⁴ Soco quiví cuan ña cutuñí ifi ñu. Ta nyacua nya vityín ta ña cutuñí ifi ñu. Vatyí tatu sacuahá ñu ley cuan tari quiví cha nyasí nuu ñu. Vatyí ña cutuñí ifi ñu. Soco noo tuhun ri maa ra Cristo nuñá ra nuu yo.

¹⁵ Ta nyacua nya vityín tatu sacuahá ñu Israel ley ra Moisés, ña cuví cutuñí ifi ñu. Vatyí tari noo cha nyasí nuu ñu.

¹⁶ Soco tatu nacuhvá ñu añima ñu chi Sutu Mañi yo, maa ra cunuñá ra nuu ñu.

¹⁷ Vatyí Sutu Mañi yo, Tatyí lí cuví ra. Ta tatu nyaá Tatyí lí Sutu Mañi yo añima yo, sacotó ra chi yo tyí ña nyacá ñaha ca ley chahnu chi yo.

¹⁸ Yucuan chaha tandihí yo ña nyasí ca nuu yo. Ta vityín cuví yo tari noo ino, tacuhva cuví nyehe ñáyiví cha vaha Sutu Mañi yo. Ta cuahán nduvaha ca yo yoso cuhva sacuví Tatyí lí Sutu Mañi yo chí yo.

4

¹ Yucuan chaha ma ndu uvi maa ifi ndi, vatyí Nyoo nyehé ndahví ra chí ndi. Ta tyaá tyiño ra chí ndi tyí cahan ndi tuhun ra chihin ñáyiví.

² Ña sacuví ndi cha xehe vatyí tícahan nuu cuví cuan. Ña chicá noo ndi sandaví ñaha ndi chí ñáyiví. Maa maa ri tuhun Nyoo sañahá ndi. Ña nasacá noo ndi tuhun Nyoo chihin inga tuhun. Soco chihin nuu Nyoo chacú ndahví ndi nuu tandihí ñáyiví, na saha vaha ñu cuenda vatyí maa maa ri cha ndicha sañahá ndi.

³ Nyuhu ña tyihí xehe ndi tuhun Nyoo. Soco cha cuenda chí ñu cha cua cunaa ñohó xehe.

⁴ Cuihna, ra nyacá ñaha cha quifií caa ñuhu ñáyiví ihya, ican ra chasí cha chiñi tuñi xiñi ñu cha ña chinó ifi chí Nyoo. Vatyí coto nyehe ñu cha ndichin Nyoo. Ta coto cutuñi ifi ñu yoso caa sacacú ra Cristo chí yo. Vatyí ra Cristo nyitó ra ta cuví ra xiñahñu Nyoo.

⁵ Cuhva cha cahán ndi chihin ñáyiví, ña cahán ndi tuhun maa ndi. Soco sacotó ndi tyí ra Jesucristo cuví ra Sutu Mañi yo. Ta nyuhu cuví ndi noo musu ndo cha catyí cha cuñí ndi chí ra.

⁶ Vatyí suri maa Nyoo catyí vatyí na ndundichin nu ñaa ifi quiví chingo ñuhu ñáyiví. Ican ra chahá ra cha ndichin coo añima yo, tacuhva vatyí chihin cha ndichin cha chahá ra Cristo chí yo, cuví cutuñi ca ifi yo tyí cahan xaan ca cuví maa Nyoo.

Chihin cha chinó ri ifi yo chí Nyoo coo yo noo ñáyiví chaa

⁷ Coño ñuhu yo cuví tari noo quisi ñuhú, vatyí noo cha ñima ri tuhun cuví. Vatyí tyicuan caa ta cuví nyehe ñáyiví tunyee ifi cha cahnú xaan cha iyó chí yo, maa Nyoo chahá, ta ñima tunyee ifi maa yo cuví.

⁸ Yucuan chaha vasi iyó tisihi tandihí ri ityí nu cuahán ndi, soco ña ndu uvi ifi ndi. Vasi ña cutuñí ifi ndi tandihí cha cuví chí ndi, soco chitó ndi tyí quitá vaha ndi.

⁹ Vasi chicá nyicon ñu chí ndi soco ñima maa ri maa ndi nyicu. Vatyí Nyoo nyaá ra chihin ndi. Vasi cha chacun taxin ñu chí ndi soco ña chihí ndi.

¹⁰ Tandihí ri ityí nu cuahán ndi ta nyatú ndi tuhun chíhi cha catyí tuhun ra Jesús. Vatyí yucuan cuhva nyehé ñu tyí iyó ndi ñáyiví chaa cha chahá ra chí yo.

¹¹ Vatyí nyuhu tandihí quiví, cha yatyín cuví ndi cha cuenda ra Cristo tacuhva cuví nyehe ñáyiví vatyí yihí ñáyiví ra Cristo añima ndi.

¹² Nyatú ndi tuhun chíhi cha cuenda cha cahán ndi tuhun Nyoo. Soco cha tyehe caa, nañihí ndo ñáyiví chaa.

¹³ Chinó ifi ndi chí Nyoo tari chingo ifi ra David. Ta tyaá ra nu libro Salmos: “Chinó ifi chí Nyoo, yucuan chaha cahín tuhun ra”, catyí ra David. Ta tyicuan caa tucu nyuhu. Chinó ifi ndi chí Nyoo. Ta yucuan chaha cahán ndi tuhun ra.

¹⁴ Vatyí chitó ndi vatyí Nyoo ra sanandoto chí Sutu Mañi yo Jesucristo, cusanandoto tucu ra chí yo. Ta ñin ri chíhin nyoho, cunyaca ra chí yo nya gloria nu nyaá ra.

¹⁵ Tandihí ihya cuví cha vaha chí maa ndo ta chí inga ñáyivi. Vatyí cuaha cha vaha Nyoo cuñihí ndo. Ta cuaha ndo nacuhvá ndo tyahvi nyoo chí ra, ta sacahnú ndo chí ra.

¹⁶ Yucuan chaha ña ndu uví maa ñini ndi. Vasi coño ñuhu ndi cha cuahán sandihí xaan chí. Soco ñáyivi chaa cha iyó ndi cuahán nduchaa chí tahan tahan quívi.

¹⁷ Tindoho cha nyehé ndi ñáyivi ihya, tindoho ñin yaha ri cuví. Vatyí chahá chí cha cunañihí ndi noo nu vaha ca cha ma ndihí maa nu nyaá Nyoo.

¹⁸ Vatyí ñima cha cuví nyehe yo sahá ndi cuenda. Sahá ndi cuenda soco cha ña nyehé yo. Vatyí cha cuví nyehé yo ñáyivi ihya, ña naha maa chíyo. Soco cha ña cuví nyehé yo, yucuan cuví cha ma ndihí ca maa.

5

¹ Ta chitó ndi vatyí quívi cúvi yo, coño ñuhu yo cunaa chí. Vatyí cuví chí tari noo vehe cha ña naha maa chíyo. Soco Nyoo cumí ra noo nu cunyata añima yo, noo cha ma naa ca maa nya andívi. Ta ñima cha cacu chíhin ndaha rayí ñáyivi ihya cuví.

² Ndicha, cha ni ri ca cha iyó yo chíchi coño ñuhu yo, nducuihyá xaan cuví yo, vatyí nyatú tuhva yo nicoo yo chíchi cha chahá Nyoo chí yo nya andívi.

³ Vatyí cohon añima yo chíchi cha chahá Nyoo tacuhva cha ma cuvityiaá yo.

⁴ Cha ni ri ca cha iyó yo chíchi coño ñuhu yo cha cuví tari noo vehe ri, nducuihyá ñini yo vatyí ña cuví yo quita ra maa añima yo chíchi coño ñuhu cuan ta cuvityiaá chí. Soco cuví yo cha coo añima yo chíchi cha ma naa ca maa nya andívi ta tyicuan ri maa cuaco yo.

⁵ Ta Nyoo tyaa ra cuhva vatyí tyehe caa cucuvi chí yo. Ta chahá quívi ri ra Tatyí lí ra chí yo. Vatyí tacuhva coto yo tyí cuví naquehen ca yo tandihí ca cha cuacuhva ra chí yo.

⁶ Ta yucuan chaha ma yuhvi yo cha cúvi yo. Vatyí chitó yo tyí cha ni ri ca cha iyó yo chíchi coño ñuhu ihya ñáyivi, ña yatyin nyaá yo chíhin Sutu Mañi yo andívi.

⁷ Vityin ña cuví nyehe yo chí ra, soco chíhin cha chíñó ri ñini yo chí ra, iyó yo ñáyivi ihya.

⁸ Soco yihí vaha ñini yo chí ra ta cha cuví yo quita yo chíchi coño ñuhu ihya vatyí cuhun yo cucunyata yo chíhin Sutu Mañi yo.

⁹ Yucuan chaha sañihí ca ndi nducú ndi cuhva yoso caa cha tahan ñini Sutu Mañi yo

sacuví ndi. Cuví ri cha iyó ca ndi chíhin coño ñuhu ñáyivi ihya. O cuví ri cha yori ca ndi, vatyí cha nyaá ndi chíhin Sutu Mañi yo nya andívi.

¹⁰ Vatyí tahan tahan yo ta cuhun yo nuu ra Cristo cucuhva yo cuenda nu nyaá cutuñi chí yo nuu ra. Ta cuñihí yo cha tahán chí chí yo, yoso cuhva cha vaha o cha ña vaha cha sacuví noo noo yo quívi chíyo yo chíhin coño ñuhu yo ñáyivi ihya.

Nu sacotó ra Pablo yoso caa nicoo vaha yo chíhin Nyoo

¹¹ Vatyí chitó ndi vatyí Sutu Mañi yo cutachí tuñi ra chí ndi tatu ma sacuví ndi tuhun cahán ra. Yucuan chaha nducú ndi cuhva cahán ndi chíhin ñáyivi na nacuhva cuenda ñu chí ñu chí Nyoo. Ta Nyoo chitó ra vatyí tyicuan ri sacuví ndi. Ta chitó tucu maa ndo ñandihí.

¹² Ñima cha cuví ndi cuyaa ndi chíhin cha cahán ndi tyehe caa, soco cha cuví ndi vatyí nicohón ñini ndo vatyí tuhun ndicha sacotó ndi, ta cuví cusí ñini ndo chíhin ndi. Ta cuñihí ndo cuhva cahán ndo chíhin inga ra cha sacahnú chí. Catyí ra tyí vaha iyó ra, soco ñima cha ndicha caa añima ra.

¹³ Tatu ña vaha cuví xiñi ndi, cuví maa ñáyivi tyí cahán tuhun tyehe caa, soco cha cuenda maa Nyoo. Soco tatu vaha cuví xiñi ndi, ta cachí tuhun cahán ndi, soco cha cuenda tyí cuví ndi tyinyeé ndi chí ndo.

¹⁴ Soco saniñí ndi chí ndi cha sacotó ndi tuhun ra Cristo chí ñáyivi. Vatyí chitó ndi tyí cuví xaan ra chí ñu. Ta chitó ndi tyí chíhí ra cha catyí cuatyí tandihí cuí maa ñáyivi. Ta yucuan chaha chíhi tucu yo cha ma sacuvi ca yo cha ña vaha cha chinyacuví yo nu quíchí chí.

¹⁵ Ra Cristo chíhí ra cha catyí tandihí yo vatyí tacuhva cha ma coo ca yo cuhva cuví maa yo. Cqo yo soco cuhva cuví maa ra. Vatyí chíhí ra ta nandotó ra cha cuenda yo.

¹⁶ Cha cuhva cha vityin, tatu nyehé yo chí noo ñáyivi, ma caca xiñi yo nyehe yo chí ñu tari chíca xiñi ñáyivi cha ña ñohó nuu chí Nyoo. Noo quívi tyicuan caa chíca xiñi vatyí ra Cristo cuví ra noo ra ñuhu ñáyivi ri. Vityin ña chíca ca xiñi tyicuan caa.

¹⁷ Vatyí quívi nacuhva cuenda yo chí yo chí ra Cristo, maa ra sanduchaa ra añima yo. Ta tandihí tuhun cha chíca xiñi yo nu quíchí chí, ña chíca ca xiñi yo vityin. Vatyí maa ra nacuhva ra nonga cha chíñi tuñi chaa chí yo.

¹⁸ Ta tandihí ihya maa Nyoo sacuví, vatyí sanicoo vaha ra chí yo chíhin ra cha cuenda maa ra Cristo Jesús. Ta catyí ra chí yo vatyí na sacotó yo chí ñáyivi vatyí Nyoo cuví ra cha nicoo vaha ñu chíhin ra.

¹⁹ Vatyí chíhin cha chíhí ra Cristo cha catyí cuatyí yo, ñáyivi nicoo vaha ñu chíhin

Nyoo. Ta Nyoo sahá ra tuhun tyi ñahri ca cuatyí ñu. Ta chi nyuhu, catyí ra vatyí sacotó ndi tuhun ihya chi ñu.

²⁰ Ta vityin cuví ndi ra chicá tyiño ra Cristo. Ta tari cha maa Nyoo chacú ndahvi nuu ndo, vatyí tyiño maa ra chicá ndi. Ta yucuan chaha chacú ndahvi ndi nuu ndo chihin sivi ra Cristo, na nicoo vaha ndo chihin ra.

²¹ Ra Cristo ña sacuví ra ni minoo cuatyí. Soco Nyoo tachí ra chi ra siqui ñuhu ñáyivi ihya, quichí cuví ra tari noo ra iyó cuatyí cahnu. Tacuhva vatyí cuví sacacu ra chi yo. Ta cha cuenda maa ra Cristo sahá Nyoo tuhun tyi vaha yo nuu ra.

6

¹ Yañi, ñin ri tyiño Nyoo sacuví yo. Yucuan chaha chacú ndahvi xaan ndi nuu ndo vatyí ma coo ndo tari cha ña ñohó nuu ndo Nyoo. Cotyiño ndo tandihí cha vaha cha chahá ra chi noo noo ndo.

² Vatyí catyí Nyoo nu tutu tyehe caa: Quivi tahan chi tyi sacaquí chuun, yuhu chihí nu chahan ta tyinyej chuun, catyí Nyoo.

Saha ndo cuenda tyi vityin cuví quivi tahan chi. Vityin cuví quivi sacacú Nyoo chi yo.

³ Nducú xaan ndi cuhva cha ma nyehe nyaa ñáyivi tyiño Nyoo cha sacuví ndi, coto ma chino iñi ñu chi Nyoo.

⁴ Soco cuñí ndi vatyí nyehé ñu vatyí ndicha cha cuví ndi musu Nyoo vatyí cunyeé ndi ñáá ndihí cha cuví chi ndi, tandihí tindoho, tandihí tisihi.

⁵ Vasi cañi ñáyivi chi ndi, vasi tyihí ñu chi ndi vehe caa, vasi canachaá ityi ñu siqui ndi, socio cunyeé xaan ndi. Ta ñihí xaan sahá tyiño ndi nyacua ña quixí ndi. Ta yahá ndi socio.

⁶ Ta tandihí maa ihya cunyeé ndi vatyí ndicha ndicha cuii cha cuví ndi musu Nyoo. Yucuan chaha cachi iyó ndi. Ta chitó ndi cha ndicha. Ta cunyeé ndi chihin cha ña chihí ndi tisihi tandihí cha cuví chi ndi. Ta vaha ñáyivi cuví ndi. Ta cuñí ndi chi ñáyivi. Ta nyaá maa Tatyí Ii Nyoo chihin ndi.

⁷ Cahán ndi maa ri tuhun ndicha maa Nyoo. Ta nyaá fuerza ra chihin ndi. Ta chotyíño ndi tandihí cha vaha cha chahá maa ra chi ndi, tacuhva cuví chasaha ndi chí ra ña vaha.

⁸ Iyó quivi cuñí nyehe ñáyivi chi ndi. Ta iyó quivi ña cuñí nyehe ñu chi ndi. Iyó quivi vaha cahán ñu siqui ndi. Ta iyó quivi quihí cahán ñu siqui ndi. Iyó chaha catyí ñu vatyí ra cuendu cuví ndi. Soco maa maa ri cha ndicha cahán ndi.

⁹ Sahá ñu chí ndi tari noo ra ña ñohó nuu ñu. Soco ñu yihí vaha cuenda Nyoo ñohó nuu vaha ñu chí ndi. Iyó quivi cha vatyin ri

cúvi ndi, socio iyó ca ndi. Ta iyó quivi tachí tuñi ñu chí ndi, socio ña chihí ndi.

¹⁰ Vasi iyó quivi cha nducuihyá iñi ndi, socio tyicuan ri si cuñí ndi. Vatyí tyiño Nyoo sacuví ndi. Vasi ndahvi ndi, socio cuaha ñáyivi ñihí ñu cha vaha chihin tuhun cha chahá Nyoo chí ndi. Vasi ñahri maa iyó chí ndi, socio iyó tandihí cha vaha Nyoo chí ndi.

¹¹ Cahán ndi chihin ndo yañi, cha cuví ndo ñáyivi ñuu Corinto chihí. Catyí cachi ndi chí ndo chihin cha ña ña ña ndi vatyí ndicha cha cuñí ndi chí ndo.

¹² Nyuhu, ña quihí cuñí ndi nyehe ndi chí ndo. Maa ndo cuví ñu ña vaha cuñí nyehe chí ndi.

¹³ Chacú ndahvi ndi nuu ndo tari chacú ndahvi noo rayi nuu sehe ra, nuña ndo ña ña ndo, ta ma quihí cuñí ndo nyehe ndo chí ndi, vatyí maa ndi ña quihí cuñí ndi nyehé ndi chí ndo.

Cuví yo vehe Nyoo vatyí ñohó ra ña ña

¹⁴ Ma ndu ñin ri ndo chihin ñu ña chinó iñi chí Nyoo. Vatyí ña nacachí tahan ña ña chihin ñu cuan. Vatyí cha vaha ma cuví ndu ñin ri chihin cha ña vaha. Ta cha ndichin ma cuví ndu ñin ri chihin cha ña ña iñi.

¹⁵ Vatyí ra Cristo ña ndu ñin ri ra chihin ra cuví cuhna. Ta tyicuan caa tucu ñu chinó iñi chí ra Cristo, ña nacachí tahan chí tatu ndu ñin ri ñu chihin ñu ña chinó iñi chí ra.

¹⁶ Ña chahá chí cha sacahnú yo Nyoo ta sacahnú tucu yo chí cha cuví xitohyo. Vatyí maa yo cuví yo vehe Nyoo nyitó. Tari catyí maa ra tuhun ihya ta cha naha:

Coi ta caca noi chihin ñu.

Ta yuhu cucuvi Nyoo ñu,

ta maa ñu cucuvi ñu ñáyivi chii, catyí Nyoo.

¹⁷ Yucuan chaha catyí tucu ra quivi cuan:

Quita ndo mahñu ñu ña chinó iñi chii.

Ta ma cutahan ndo chihin ñu.

Ta ma sacuvi ndo cha ña vaha.

Tyicuan ta cunaquehin chí ndo.

¹⁸ Ta sutu ndo cucuvi chí.

Ta maa ndo cucuvi ndo sehi, catyí Sutu

Mañi yo, ra iyó tandihí tunyee iñi chí.

7

¹ Ican ihya cuví cha chahá Nyoo chí yo. Yucuan chaha yañi, cuñí chí nducu yo cuhva cuvaha yo nuu Nyoo. Ma sacuvi yo cha quihí caa ni ri ma caca xiñi yo cha ña vaha. Na ndu cuiti coo yo vatyí sahá yo ñáyivi chí Nyoo.

Nu nacatyí ra Pablo yoso caa nasama ñu cuhva iyó ñu

² Yañi, chacú ndahvi ndi nuu ndo, na cuvaha coo iñi ndo nyehé ndo chí ndi vatyí ñahri cha sacuví ndi chí ni noo ndo. Ta ni ña

sativí ndi chí ndo. Ni noo ndo ta ña sandaví ñaha ndi chí ndo.

³ Cha catyí chí ndo tyehe caa ñima cha cahín chí ndo. Vatyí cha yaha catyí tiquí chí ndo ta ityí chata ca, vatyí ndicha cha cuñí chí ndo. Vatyí ñn ri ñu cuví yo chíhin Nyoo. Tatu iyó yo soco ñn ri cuví yo. O tatu cuví yo soco ñn ri cuví tucu yo.

⁴ Ñahri maa cha chica íñi chíhin nyoho. Sií xaan cuñí nyehi chí ndo. Ta yucuan chaha vasi nyehé ndi tindoho ihya, cuní ca íñi ndi. Ta cusí xaan ca cuñí ndi.

⁵ Nya quiví chaá ndi Macedonia ihya, ta ta nyitatu ca maa ndi. Vatyí cuaha xaan tisihi ta tindoho nyehe ndi tandíhi ri ityí chahan ndi. Ta cañí tahan ñu chíhin ndi. Ta yuhví ndi.

⁶ Soco Nyoo, tyicuan ri sanduní ca ra íñi yo tatu cuihyá cuñí yo. Ta sanduní ra íñi ndi cuhva cha chaá ra Tito.

⁷ Ta ñima cha cuenda cha chaá ri ra. Soco cha cuenda cha nduní íñi ra sahá nyoho. Nacatyí ra chí ndi vatyí cuñí xaan ndo nyehe ndo chí ndi. Ta chacu xaan ndo cha cuihya íñi ndo. Ta cuñí ca ndo chí, na. Ta cha cuenda cuan ndusí xaan ca cuñí vityin.

⁸ Soco quiví cuan chica xaan xiñi vatyí चाहि tucuihya íñi chí ndo chíhin tutu cha sacuhín chí ndo. Ta ndu uví íñi cha sacuhín tutu cuan chí ndo. Soco suhva ri quiví, nducuihya íñi ndo. Ta vityin ña chicá ca xiñi cha cuenda tucuihya íñi cha चाहि chí ndo.

⁹ Ta vityin cusí xaan cuñí, ñima cha cuenda tucuihya íñi cha chíyo ndo, soco cha cuenda vatyí tucuihya íñi cuan sanandichí chí ndo ndaha Nyoo. Nyoho cunyeé ndo tucuihya íñi cuan yoso cuhva tahan íñi Nyoo, yucuan chaha cha vaha sacuví ndi chíhin ndo chíhin tucuihya íñi cuan.

¹⁰ Iyó tucuihya íñi cha maa Nyoo चाहá, tacuhva ndu uvi íñi yo cuatyí yo ta nañihí yo ityí vaha cuhun yo nu nyaa ra. Ta ña tahan chí cha cuxaan yo chí Nyoo cha cuenda cuan. Soco tucuihya íñi cha iyó chí ñu cha ña ñohó nuu chí Nyoo, ñima tucuihya íñi chí Nyoo cuví cuan. Vatyí ña tyinyeé chí chí ñu tacuhva cha ma cuhun ñu anyaya.

¹¹ Nyoho cunyeé ndo tucuihya íñi yoso cuhva tahan íñi Nyoo. Soco vityin nyehé ndo vatyí cuaha xaan cha vaha nañihí ndo cuenda cha cucuihya íñi ndo. Ta sandaá vaha ndo tyiño ra cuan. Cuxaan ndo chí ra. Ta nyacua cuñí ndo tachí tuñi ndo chí ra. Tandíhi cuan, ta nayuhví ndo chí Nyoo. Ta nacatyí vaha ndo yoso caa cuahan. Yaha cuan ta nyacua quichí cuví íñi ndo nyehe ndo chí. Ta cha cuenda cha sacuví ndo tari cuhva cuñí Nyoo, cuñí chí catyí vatyí ñahri cuatyí ndo cha cuenda cuan.

¹² Yucuan chaha quiví sacuhín carta cuan chí ndo ñima cha cuenda cha chicá xaan xiñi cuenda ra cha sacuví cuatyí cuan. Ta ni ñima cuenda ra cha nyehe tisihi cuan. Soco cha cuenda maa ndo, vatyí cuñí tyi coto ndo yoso cuhva chicá xiñi ndo tuhun ndi nuu Nyoo vatyí cuñí ndo tyinyeé ndo chí ndi.

¹³ Yucuan chaha nduvaha cuñí añima ndi. Ta sií xaan cuñí ndi vatyí chitó ndi tyi cuñí ndo chí ndi.

Ta sií ca cuñí ndi cha nyehé ndi vatyí चाहá xaan ndo tunyeé íñi añima ra Tito. Vatyí vaha xaan tyiñuhú ndo chí ra.

¹⁴ Catyí chí ra Tito cha cumañi ca cuhun ra nu nyicú ndo vatyí vaha cutyasoho ndo tuhun cha sacuhín chíhin ra. Ta vityin sií cuñí vatyí chinó cava tuhun cahín chíhin ra. Maa maa ri cha ndicha cahín chíhin ndo. Ta tyicuan caa ndicha tucu tuhun cha catyí chí ra Tito.

¹⁵ Ta cuñí xaan ra chí ndo vatyí nichón íñi ra vatyí nyoho sacuví ndo tandíhi cuií cha catyí ra chí ndo. Ta cuhva cha chaá ra, ndahví sahá ndo chí ndo nuu ra. Ta vaha xaan चाहन ndo chíhin ra. Ta vaha xaan quichahá ndo chí ra.

¹⁶ Ta sií xaan cuñí vatyí chité tyi tyicuan ri sacuví ndo cha vaha.

8

Tahán chí tyinyeé yo chí ñu yihí cuenda Nyoo chíhin cha iyó vaha íñi yo

¹ Ta vityin yañi, cuñí ndi nacatyí ndi chí ndo vatyí cuaha xaan tyinyeé Nyoo chí ñu yihí cuenda ra, ityí Macedonia ihya.

² Vasi cuaha xaan tindoho nyehé ñu, soco sií xaan ca cuñí ñu chíhin Nyoo. Ta vasi ndahví ñu soco cuaha cha iyó chí ñu चाहá ñu, tari maa cha tyayí ñu.

³ Ta yuhu cuví noo cha ndaa vatyí nyehí tyi chíhin cha iyó vaha íñi ñu चाहá ñu yoso cuhva cha iyó chí ñu. Ta nyacua yaha ca चाहá ñu.

⁴ Chacú ndahví xaan ñu nuu ndi tyi nacuhvá ndi cha tyinyeé tucu maa ñu chí ñu tahan yo nya Jerusalén.

⁵ Cuaha ca sacuví ñu cha nuu cha yihí íñi ndi. Vatyí cha xihna ca cha sacuví ñu, nacuhvá cuenda ñu chí ñu chí Nyoo chíhin cha ñu vaha íñi ñu. Ta quichahá vaha ñu tuhun Nyoo cha sacoté chí ñu, vatyí yucuan cuhva cuñí maa Nyoo.

⁶ Ta cha nyehí tyi tyehe caa chinyacuví ñu Macedonia ihya, yucuan chaha catyí chí ra Tito vatyí na sandíhi ndíhi ra tyiño vaha cha quichahá ra cha nacaya ra xuhun nu nyicú ndo.

⁷ Nyoho vaha xaan sacuví ndo tandíhi ri. Chinó xaan íñi ndo chí Nyoo. Vaha xaan sañahá ndo tuhun ra. Ta vaha cutuñí íñi

ndo. Ta nñi xaan iñi ndo sacuví ndo tyiño nuu ra. Ta vaha xaan ñáyivi cuví ndo chihin ndi. Ta tyicuan caa tucu tahán chi cha tyinyeé ndo chi ñu ndahvi ñu yihí cuenda Nyoo noo cuhva vaha xaan.

⁸ Ñima tyi catyí chi ndo tyehe caa ta cuñi ndo tyi cha saniñi chi ndo. Soco cha cuñi vatyí nyehé ndo cha vaha cha nyacuví ñu yihí cuenda Nyoo inga ityi. Ta tyicuan caa tucu maa ndo sañahá ndo chi inga ñáyivi tyi ndicha vaha ñáyivi cuví ndo chihin tahan ndo.

⁹ Vatyí cha chító maa ndo yoso cha cuñi Sutu Mañi yo Jesucristo chi yo. Vatyí maa ra tyayñi xaan ra. Soco sandundahví ra chi ra cha catyí yo tacuhva vatyí cuví sandutyayñi ra chi yo.

¹⁰ Chahi tuhun ihya chi ndo cha cuenda cha vaha chi maa ndo. Na saniñi ndo chihin tuhun cha quichaha ndo quiyava. Ñima tacuhva sacuví ri ndo, soco sacuví ndo chihin cha iyó vaha iñi ndo.

¹¹ Ta tari chahá ndo chihin cha iyó vaha iñi ndo, tyicuan caa sacuvi tucu ndo vityin. Ta cuhva ndo yoso ri cuhva cha iyó chi ndo.

¹² Vatyí tatu noo ñáyivi nñi vaha iñi ñu, cuñi ñu cuhva ñu yoso ri cuhva cha iyó chi ñu, Nyoo naquehén ra cha chahá ñu. Vatyí Nyoo ña chicán ra cha ñahri iyó chi yo.

¹³ Ñima cha cuñi vatyí nyehe ndo tindoho cha cuenda cha tyinyeé ndo chi inga ñu tacuhva ma nyehe ca ñu cuan tindoho.

¹⁴ Soco vityin cha iyó chiin chi ndo, tahan chi cha tyinyee ndo chi ñu ndahvi cuan. Ta inga chaha maa ñu cucuhva cha chiñuhú chi maa ndo. Tyehe caa tahán chi tyinyeé chi tahan ri yo tacuhva tyi ninoo yo ta ni inga yo ma nyehe yo tindoho.

¹⁵ Vatyí tyehe caa catyí chi tuhun Nyoo: “Ra cha cuaha xaan cumí, ña ndoó ca chi ra. Ta ra cha chiin ri cumí, ña cumañi chi ra”, catyí tuhun Nyoo.

Ra Tito chihin ra tahan ra tyaá ra cuhva cahun ra ñuu Corinto

¹⁶ Soco tyahvi nyoo chi Nyoo vatyí chahá ra cha vaha coo añima ra Tito tyi chicá xiñi ra tuhun ndo tari chicá xiñi yuhu.

¹⁷ Ta quehén ra tuhun cha catyí chi ra cha cahun ra nu nyicú ndo. Tyi cha yihí xaan iñi tucu maa ra tuhun ndo. Ta yucuan chaha vityin vachí ra nu nyicú ndo chihin cha iyó vaha iñi maa ra.

¹⁸ ñin ri chihin ra Tito tachí ndi chi noo ra yañi yo. Ta vaha xaan hermano cuví ra, ta tyicuan caa catyí tandihi ñáyivi yihí cuenda Nyoo.

¹⁹ Ta sñin ri nacachí vaha maa ñu yihí cuenda Nyoo chi ra yañi yo ihya vatyí cahun ra chihin ndi cunyaca ndi xuhun chi ñu ndahvi nya Jerusalén. Ta cuñi ndi

sacahnú ndi chi Sutu Mañi yo cha sacuví ndi tyiño ihya. Ta suri sañahá ndi vatyí cuñi xaan ndi tyinyee ndi chi tandihi ñu yihí cuenda Nyoo.

²⁰ Ta cuñi ndi sacuví ndi tyehe caa tacuhva cha ma quihí yuhu ñáyivi tuhun ndi cha cuenda cha nacayá ndi xuhun cha cuacuhva ndi chi ñu ndahvi.

²¹ Ta nducú xaan ndi cuhva sacuví ndi noo cuhva cachi. Tatu ñáá noo cha cuasacuví ndi soco chihin cha cachi iyó ndi chihin nuu Sutu Mañi yo ta chihin nuu ñáyivi ñandihí.

²² Ta chihin ra Tito ta inga yañi yo cuan, vachí inga tucu ra yañi yo, vatyí nyehé ndi vatyí nñi xaan iñi ra. Ta vityin yaha ca cuhva, vatyí vaha cuñi ra nyehé ra chi ndo cha cuenda cha chinó xaan iñi ra tyi cuñi ndo sacuví ndo cha vaha nuu Nyoo.

²³ Tatu yóó cha ndaca tuhun tuhun ra Tito, catyí ndo chi ñu tyi ra tahin cuví chi ra. Ta sahá tyiño ra chihin, ta tyinyeé ra chi ndo chihin tuhun Nyoo. Ta tatu ndaca tuhun ñu tuhun inga uvi ca ra yañi yo ihya, catyí ndo chi ñu vatyí maa ñu yihí cuenda Nyoo saquichí chi ra. Ta vaha xaan sacuvi ra tyiño nuu ra Cristo.

²⁴ Yucuan chaha sañaha ndo chi ra ihya vatyí ndicha ndo cha cuñi ndo chi ra. Tyicuan ta coto tandihi ñu yihí cuenda Nyoo vatyí tahán chi cha cahín tuhun ndo tyicuan caa.

9

Nu chahá ra Pablo tuhun yoso caa cuatyinyee ñu chi ñu ndahvi ñu yihí cuenda Nyoo nya Jerusalén

¹ Ta cuenda xuhun cha nacayá ndo cuenda ñu ndahvi ñu yihí cuenda Nyoo, ña cuñi chi cha sacuhin tuhun chi ndo.

² Vatyí cha chité cha vaha caá añima ndo. Yucuan chaha chihin cha sñi cuñi nacatyí chi ñu ityi Macedonia ihya, vatyí nyoho ñu ityi Acaya, nya ta quiyava quichaha cuñi ndo tyinyeé ndo. Ta cuaha xaan ñu Macedonia cunñi ca iñi ñu cha tyinyeé tucu maa ñu.

³ Soco suvita ri yuhu cutachi chi yañi yo ihya nu nyicú ndo. Vatyí sanumi ndo ta sacaya ndo xuhun, tari cuhva catyí vatyí yihí iñi ndo sacuví ndo. Vatyí tacuhva cha ma catyí ñu Macedonia ihya vatyí ña ndicha cha cahín siqui ndo cha cuenda cuan.

⁴ Vatyí coto cahun nya noo ra Macedonia chihin, ta nyehe ra vatyí ñahri maa nacayá ndo. Ta cuquehin ticahan nuu cha cuenda cha ñahri cumi ndo. Ta vihi ca maa ndo. Vatyí cha yaha catyí vatyí cuatyinyee ndo.

⁵ Yucuan chaha cuñí mai vatyi vaha cha cuhun xihna ca ra yañi yo ihya nu nyicú ndo tacuhva tyinyeé ra chi ndo cha sacañá tahan ndo xuhun cha yihí iñi ndo tyi cuhva ndo. Tacuhva tyi quivi quichi soco tandihi ta cha iyó vaha. Vatyi cha iyó vaha iñi maa ndo cuví, ta ñima noo cha saniñi ndi chi ndo.

⁶ Ta ñichon iñi ndo tuhun ihya: Ra cha chiin ri tachí, chiin ri tyiño sahá ra chicoó. Ta ra cuaha tachí, cuaha tyiño sahá ra chicoó.

⁷ Ta tahan tahan yo cuñí chi cuhva yo yoso cuhva quichi cuví añima yo. Ñima chihin cha ña ñi iñi yo o chihin fuerza. Vatyi Nyoo cuñí ra chi ñu cha chahá chihin cha sii cuñí.

⁸ Nyoo cuví cuhva ra cuaha, ndihí ndoo ndihí cuiti nuu cha vaha chi ndo. Vatyi tyicuan ta coo tandihi ri cha chiñuhú chi ndo. Ta ndoo ca ta cuví tyinyee ndo chi ñáyivi chihin tandihi ri nuu chiñuhú chi ñu.

⁹ Tuhun Nyoo catyí chi tyehe caa: Mínoo ra vaha, chahá ra cha iyó chi ra chi ñu ndahvi.

Ta tumañi iñi cha sacuví ra cuan, yucuan cuví cha ña chinaá nuu Nyoo, catyí chi.

¹⁰ Nyoo chahá ra chiti tachí yo. Ta chahá tucu ra cha cachi yo. Cuhva tucu ra cuaha ca chiti tachí ndo ta cuhva ra cuvaha chi. Ta chihin cha chahá ndo, cusacuví ra tyi cuaha cha vaha cucunyaa añima ñáyivi.

¹¹ Tyicuan caa ta coo tandihi ri nuu cha tyayii chi ndo, tacuhva cuví tyinyee ndo chi tahan ndo. Ta maa ñu cuan, cuanacuhva ñu tyahvi nyoo chi Nyoo cha cuenda cha tyinyeé yo chi ñu.

¹² Vatyi cha tyinyeé yo tyehe caa chi ñu yihí cuenda Nyoo, uvi tahan cha vaha sacuví yo. Noo cha chahá yo cha chiñuhú chi ñu. Ta inga cha nacuhvá xaan ñu tyahvi nyoo chi Nyoo.

¹³ Maa ñu cusacahnu ñu chi Nyoo. Vatyi chihin cha tyinyeé ndo chi ñu, nyehé ñu vatyi ndicha cha quichahá ndo tuhun ra Cristo. Ta cuhva ñu gloria chi Nyoo cha tyinyeé xaan ndo chi ñu ta chi tandihi ñáyivi.

¹⁴ Ta cucacan tahvi ñu chaha ndo. Ta cucuñi ca ñu chi ndo cha cuenda cha vaha cha chahá Nyoo chi ñu cha cuenda ndo.

¹⁵ Tyahvi nyoo chi Nyoo vatyi chahá ra noo cha vaha xaan chi yo. Nyacua ña ñihí yo cuhva nacatyí yo.

10

Iyó ityi chi ra Pablo tyi saha ra cuenda chi ñu cha sacotq ra tuhun Nyoo chii

¹ Yuhu ra Pablo chiquén noo tumañi iñi chi ndo chihin cha vita iñi. Tari cha vita iñi

ra Cristo. Vatyi yihí ndo catyí ndo vatyi tatu ñáá tuhun sacoté chi ndo chihin tutu, ñihí xaan cahín chihin ndo. Soco tatu nyaí chihin ndo, vita xaan cahín, catyí ndo.

² Vaha. Soco quivi cuhin nu nyicú ndo, ma saniñi ndo chii cha cahin chi ndo. Soco chité tyi cuñí chi cha sañahí chi suhva ndo yoso cuhva cha ñihí cahín. Vatyi yihí ndo catyí ndo vatyi sacuví tari sacuví noo ra ña yihí cuenda Nyoo.

³ Ndicha vatyi ñáyivi cuví ndi. Soco ña cañi tahan ndi tari cañi tahan ra ñáyivi ihya.

⁴ Vatyi cha xaan cha cañi tahan ndi chihin, ñima cha xaan ñáyivi ihya cuví. Soco maa tunyee iñi Nyoo cuví, vatyi cuví chasaha ndi tandihi maa fuerza nyacua nya fuerza tatyí ña vaha.

⁵ Ta tyicuan caa cuví chasaha ndi chi tandihi tuhun cha cahán ñáyivi siqui tuhun Nyoo, ta tandihi cha cahnu sahá chii cha chasi nu quichahá yo tuhun Nyoo. Tandihi cuhva chicá xiñi yo siqui ñuhu ñáyivi ihya, chahá yo na cunyaca ñaha ra Cristo vatyi quichahá yo chi maa ra.

⁶ Ta quivi cuquichaha vaha tandihi ndo chi ra Cristo, tatu nya nonga ndo ña cuñí ndo quichahá ndo, tyaá ndi cuhva cha tachí tuñi ndi chi ndo.

⁷ Soco nyoho sahá ndo cuenda cuhva caá ri noo ñáyivi. Ta ña sahá ndo cuenda cuhva caá añima ñu. Ta tatu nya noo nyoho chitó vaha ndo vatyi cuenda ra Cristo yihí ndo, cofo tucu ndo vatyi yihí tucu nyuhu cuenda ra.

⁸ Vatyi vasi yaha cuhva cahín, ña tahán chi cha cucahan nui. Vatyi maa Sutu Mañi yo chahá ra ityi chii cha cunyaca ñahi cha cuenda cha vaha chi maa ndo, tacuhva ñihí ca ndo tunyee iñi Nyoo. Ta ñima cha sativí chi ndo.

⁹ Ña cuñi vatyi catyí ndo vatyi sayuhvi chi ndo chihin cha cahín nu tutu cha sacuhín chi ndo.

¹⁰ Vatyi yihí ndo catyí ndo vatyi nu tutu cha saquichí chi ndo ñihí xaan cahín chihin ndo. Soco tatu mai chaa nu nyicú ndo cuví noo ra ña ñihí tuhun cahan, catyí ndo. Ta tuhun cha cahín, maa maa ri tuhun cha ña chiñuhú cuví, catyí ndo.

¹¹ Soco ñu cha catyi tyehe caa cuñí chi cha coto ñu vatyi tari cuhva cahín nu tutu, tyicuan caa cusacuví tiqui nachai nu nyicú ndo.

¹² Ndicha ña cañá iñi ndi sandu inuu ri ndi chi ndi chihin ra casayaá chi tyi cahán ra tuhun maa ra. Vatyi casacuví ra cha ña tahán chi. Vatyi nyehé ra cuhva chicá xiñi maa ra ta cuhva cuahan inga ra, ta cuñí maa ra tyi vaha cuahan ra. Ta ña cutuñí iñi

ra tyi tahán chi nanducú ra cuhva cuñi Nyoo.

¹³ Nyuhu ma sacahnu ndi chi ndi chihin cha ña tahán chi chi ndi. Nyoo cuví ra sañahá ñáá cuví tyiño cha tahán chi cha sacuví ndi. Ta maa ra chahá cha quichi ndi nya nu nyicú ndo Corinto chiña.

¹⁴ Tyehe ta ñima xihna ca ndi sacoto tuhun Nyoo chi ndo, ña tahán chi sahá ndi cuenda chi ndo. Soco tahán maa chi vatyi xihna ca maa ndi chaq ndi nu nyicú ndo chihin tuhun ra Cristo.

¹⁵ Soco nyuhu ña sayaá ndi chi ndi chihin tyiño sahá inga ra. Ña catyí ndi tyi tyiño maa ndi cuví. Soco yihí ñi ndi vatyi cunachino vaha ca ñi ndo chi Nyoo. Tyicuan ta cuví sañaha ca ndi tuhun ra Cristo chi ndo, soco yoso cuhva tahán chi chi ndi.

¹⁶ Ta yihí ñi ndi cha cahan ndi tuhun ra Cristo chihin ñáyivi nya ndihi ñuu nu cañi ca cha nuu nu nyicú ndo chiña, nu ta coto ca ñu tuhun ra. Tacuhva cha ma catyi ñáyivi vatyi cuyaa ndi chihin tyiño sahá inga ra.

¹⁷ Soco tatu nya noo yoó cuñi yo cuyaa yo, na cuyaa yo soco chihin Sutu Mañi yo.

¹⁸ Vatyi nuu Nyoo ña quitá vaha ra catyí tyi vaha maa. Soco tatu cahán Nyoo tuhun noo ra ta catyí ra tyi vaha sacuví ra, ican ra cuan cuví ra quitá vaha nuu Nyoo.

11

Nu chahá ra Pablo tuhun chi ñu Corinto na saha ñu cuenda coto sandaví ñaha ra cuendu chi ñu

¹ Vaha tyehe ta cunyeé ndo chiin cha ñima ri tuhun cha cuacatyí chi ndo. (Vasi ña tahán chi cha sacoté tuhun mai, soco cuñi chi cha nacotó ndo yoso caa cuñi ra cuan sandaví ñaha ra chi ndo.) Ta yucuan chaha vasi yoso ca caa soco cunyeé ndo cha cuacatyí chi ndo.

² Vatyi cuiñó xain chi ndo. Ta maa Nyoo chahá cha cuiñe chi ndo, vatyi mai ican tyihí chi ndo ityi ra Cristo. Ta cuñi tyi cuñi ndo chi ra tari noo ñaha tyivaa cha cuñi xaan ña chi noo ri maa ra cha cuatandaha ña chihin.

³ Soco chicá xiñi cha cuenda ndo, coto cuví chi ndo tari cuví chi cu Eva. Vatyi sandaví ñaha coo chihin maña ti chi ña. Ta coto casandaví ñaha ra cuan chi ndo. Ta coto ndusiin caa cuhva nacacá xiñi ndo tuhun ra Cristo. Ta sandihí ndo tuhun cha sacahnú ndo chi noo tuhun ri maa ra.

⁴ Ta nyoho tañi tyehe xaan ri tyasohó ndo nu cacahán ra tuhun ra Jesús soco ña ndicha ra. Vatyi ñima tuhun ra Jesús cha sacotó ndi chi ndo cuví. Ta vaha xaan cuñi ndo nacacá xiñi ndo siin ca tuhun cha ña

chachí tahan chihin tuhun Tatyí Ii Nyoo cha naquehen ndo quivi xihna ri. Ñima tuhun ra Cristo cha sacacú chi yo cacahán ra cuan. Ta nyoho tañi tyehe xaan ri tyasohó ndo chi ra.

⁵ Soco tuví ñi tyi ra cha cacatyí tyi apóstol Nyoo cacuví ra, ñima ra vaha xaan cuví ra cuan cha nuu yuhu. Soco nyoho, nyicón ndo chi ra.

⁶ Vasi ña ñihí vahi cuhva cahín, cuñi maa ndo. Soco cutuñi vaha ñi tuhun Nyoo. Ta yucuan sañahá ndi chi ndo chihin tandihí cuhva sacuví ndi.

⁷ O cuñi maa ndo vatyi ña vaha cuhva sacuví quivi cha cahín tuhun ra Cristo chihin ndo. Vatyi ña quehín yahvi chi ndo. Ta sandundahví chii cha cuenda cha cuñi cha cacu ndo.

⁸ Ñáyivi inga vehe ñuhu tyinyee ñu chii. Vatyi maa ñu chahá xuhun chii. Ta yuhu quehín xuhun cuan ta sacuví tyiño nuu ndo.

⁹ Ta quivi cha chinyaj chihin ndo ña chahj tindoho chi ni noo ndo vasi iyó cha chiñuhú chii. Vatyi ra hermano cha quichi coyo nya ityi Macedonia, ican ra chahá tandihí cha chiñuhú chii. Ta sahá vavahi cuenda chii vatyi ña cuñj cuhve tindoho chi ndo. Ta tyicuan ri sacuví que.

¹⁰ Vatyi chitó vahi tyi maa maa ri tuhun ndicha ra Cristo cahín, ta chité tyi ma cuhve cha tinyaa ni noo ndo, cha cuví ndo ñu ityi Acaya chiña, cha vaha cuñi cha ña chiquén cha coo yahvi chi ndo.

¹¹ ¿Ñáá tuhun cha cahín tyehe caa? ¿Atu cha cuenda cha ña cuñi chi ndo? Ñima. Nyoo chitó ra yoso cha cuñi chi ndo.

¹² Ta cuasacuví que tari cuhva sacuví mai. Vatyi ña cuñi cuhve ityi chi ra cacticá noo yanga vatyi cacatyí ra tyi sacuví ra tari cuhva sacuví ndi soco ña ndicha.

¹³ Vatyi cacatyí ra cuan vatyi apóstol cuví ra. Soco ña ndicha ra. Vatyi cuví ra noo ra sandaví ñaha ta nasahá ra chi ra tari noo ra apóstol ra Cristo.

¹⁴ Ta ihya ñima cha iyo cuñi yo cuví. Vatyi cuihna cuví nasaha ra chi ra tari noo ángel cha xiño tuví chihin cha ndichin Nyoo.

¹⁵ Yucuan chaha ra cha nyicón chi ra ña vaha, nasahá tucu maa ra chi ra tari noo ra cha sacuví cha vaha. Soco coo quivi cutachi tuñi Nyoo chi ra cha cuenda cha ña vaha cha sacuví ra.

Tindoho cha nyehé ra Pablo nu chicá noo ra tyiño Nyoo

¹⁶ Inga chaha catyí tiqui chi ndo vatyi ni noo ndo ta ma caca xiñi ndo vatyi loque cha cahín tyehe caa. Soco tatu tyicuan caa chicá xiñi ndo, saña ndo chi na cahín chihin ndo tari noo ra loco. Vatyi tyicuan caa ta cuví sacahnu tucu yuhu chiin chii.

¹⁷ Ñima Sutu Mañi yo catyí chii vatyi sacahní chii tyehe caa. Soco cahín tari cahán noo ra loco.

¹⁸ Vatyi cuaha ra cha cacatyí vatyi tyiño Nyoo cachicá ra, ta ñuma, vatyi cahnu xaan casahá ra chi ra. Yucuan chaha cusacahnu tucu yuhu chii ñandihí.

¹⁹ Nyoho, chitó xaan ndo, cuñí maa ndo. Ta quiyi ri tyasohó ndo nu cahán ra cuan. Ta tondo xaan cacuví ra.

²⁰ Soco nyoho ñahri cuenda ndo cha saniñí ra chi ndo cha sacuví ndo tyiño nuu ra. Suhú ra chi ndo ta ña tuví iñi ndo. Sandaví ñaha ra chi ndo. Ta ña cuñí nyehe ra chi ndo. Ta nyacua cañi chihin ndaha ra chi ndo. Ta maa ndo cunyeé xaan ndo cha sacuví ra chi ndo.

²¹ Vasí cahán nuu ndi soco cua catyi ndi, nyuhu vita xaan cuñí ndi yucuan chaha ña cañá iñi ndi sacuví ndi chi ndo tyicuan caa.

Soco inga ra cuan cañá ndicha cuíi iñi ra sacotó ra tuhun maa ra. Ta yuhu tucu cañá iñi vasí cahín tari noo ra loco.

²² Tatu ñáyivi hebreo cuví ra, suri cuví tucu yuhu. Ta tatu ñáyivi Israel cuví ra, ican cuví tucu yuhu. Ta tatu vachi ra tata ra Abraham, suri vachi tucu yuhu.

²³ Ta tatu ra sacuví tyiño nuu ra Cristo cuví ra, vihi ca yuhu. Vatyi yaha ca cuhva sacuví tyiño nuu ra Cristo. Vasí cahín tari noo ra loco vatyi catyí tyicuan caa. Soco ndicha. Vatyi ñihi ca sahá tyiñe ican saha ra cuan. Ta cha cuaha ca chaha ndohí chihin ñii ican saha ra cuan. Ta cuaha ca chaha ñohí vehe caa ican saha ra cuan. Ta cuaha chaha cha cha yatyin cúvi, soco ña chihí.

²⁴ Ta ohon tahan chaha cacañi ra Israel chii chihin ñii. Cha noo chaha cañi ra chii, oco chahun cumi tahan chaha sahvi ra ñii chate.

²⁵ Ta uñi chaha cañi ra chii chihin yutun. Ta noo chaha cacañi ra chii chihin yuu. Ta uñi tahan chaha nyeḡ barcu cha yihí. Ta chichí cha uñi tahan chaha cuan, noo chaha ndoj nu tyañuhu noo ñuu ta noo quivi.

²⁶ Cha cuaha xaan cha cuví chii nu chica noi. Ta cha cuaha chaha cuñi tyañi chihin yuvi ndutya. Ta cuaha cha cuví chii. Quita ra suhu nu cuahin. Nyacua nya ra ñui, ra Israel, ta sataśi iñi ra chii. Ta ra inga ñuu ñandihí. Ta cuaha cha cuví chii tyi chichí ñuu, ityi nu chiqui, ityi nu tyañuhu. Ta cuaha cha cuví chii mahñu ra cha catyí vatyi hermano cuví ta ñima hermano cuví ra.

²⁷ Ta ñihi sahá tyiñe ta chitati. Ta cuaha xaan chaha ña quixi. Yahí soco: soco xita ta soco ndutya. Cuaha chaha sahí ayunar, o ña chachí ta nanduqui chi Nyoo cuví cuan.

Cuaha chaha yahí cha vichin. Ta ni sahme ta ñahri.

²⁸ Ta siin ri nyaá siqui vatyi sanií que iñi tandihí ndo: nyoho ta ñu inga ñuu cha yihí cuenda Nyoo.

²⁹ Vatyi tatu noo ndo vita cuñí ndo, yuhu tari cha vita cuñí cha cuenda ndo. O tatu sacotó ñu cuatyi nya noo ndo, yuhu quehín tisihi ta ticahan nuu.

³⁰ Tatu cuñí chi cha sacote tuhín tacuhva nacoto ndo tyi ndicha cuví yuhu noo musu Nyoo, cusacote soco cha cuví chii. Vatyi sañahá chi tyi ñahri maa fuerza mai iyó chii.

³¹ Nyoo sutu Sutu Mañi yo Jesucristo, tahán chi cha sacahní yo chi ra tyicuan ri maa. Ta chitó maa ra vatyi ndicha cha cahín, ñima cuendu cahín.

³² Quivi chinyaí Damasco (ñuu nu nicachico yihí barda) ra cha cuví gobernador cha sacuví tyiño nuu rey Aretas ñuu Damasco cuan, cuatyaḡ ra chi sindaro yuvehe cahnu ñuu cuan, tyi casahá cuenda ra. Vatyi tatu quite yuvehe ñuu cuan catiin ra chii ta cunyaca ra chii vehe caa.

³³ Soco ñáyivi iyó chaha barda cuan iyó ventana ñu. Ta ityi ventana sanog ñu chii. Yihí chichí noo tica cahnu. Ta tyicuan caa sacacu Nyoo chii ndaha gobernador cuan.

12

Noo cha chaha Nyoo vatyi nyeḡ ra Pablo

¹ Ñahri maa ñihi chihin cha cahín tuhun mai, soco cuanacatyí cha sañahá Sutu Mañi yo chii.

² Ñohó nui chi noo ra cha yihí cuenda ra Cristo. Ta cha iyó uchi cumi cuiya quehen Nyoo chi ra ta chahan ra nya nu cu uñi toto andivi. Soco ña chité tatu chahan ra chihin coño ñuhu ra o chihin cha chiñi tuñi xiñi ra. Ña chité. Nya ri ca maa Nyoo chitó ra.

³⁻⁴ Soco chité vatyi ra cuan chinyaca Nyoo chi ra nya nu iyó ñáyivi vaha, ñu cha chihí. Ña chité tatu chahan ra cuan chihin coño ñuhu ra o chihin cha chiñi tuñi xiñi ra. Noo tuhun ri ca maa Nyoo chitó. Ta nu chahan ra cuan chiñi ra tuhun xehe. Ta ñahri ityi iyó chi ñáyivi cha nacatyí ñu tuhun xehe cuan.

⁵ Tahán chi sacahní chii chihin cha sañahá Nyoo chii quivi cuan. Soco ña sacahní chii cha cuenda cuan. Sacahní chii, soco chihin cha ñahri fuerza mai iyó chii.

⁶ Tatu cuñí tiqui cahín tuhun mai, ñima noo tuhun tondo ri cuví. Vatyi maa maa ri cha ndicha cuacatyí. Soco ma catyi vatyi coto cahnu xaan sahá ñáyivi chii. Vaha ca nyehe ñu cuhva vaha iyé ta cuhva vaha sañahí, tyicuan ta coto ñu tatu ra vaha o ra ña vaha cuví.

⁷ Ña cuñi Nyoo cha sacahnú xain chii chihin cha sañahá ra chii. Yucuan chaha chahá ra cha sanyehé xaan cuihna tindocho chii. Tari uhvi nu quiñi noo iñu cahnu, tyicuan caa uhvi chii. Vaty tyicuan caa ta ma cuvi cuyai chihin cha sañahá Nyoo chii.

⁸ Ta cha uñi chaha chiquen chi Sutu Mañi yo na tinyaa ra tindocho cuan siqui.

⁹ Soco maa Sutu Mañi yo catyí ra chii tyehe caa: “Chahí tandihi cha vaha cha iyó chii chuun. Vaty yucuan cuví cha chiñuhú chuun. Vaty tatu ñáyivi ta ñahri maa tunyee iñi maa ñu iyó chi ñu, yucuan ta cuví cunyaa maa maa ri tunyee iñi mai chihin ñu”, catyí ra. Yucuan chaha sií xaan cuñi cha ñahri fuerza mai iyó chii. Vaty tyicuan caa ta cuví cunyaa tunyee iñi ra Cristo chihin.

¹⁰ Yucuan chaha sií xaan cuñi cha ñahri tunyee iñi mai iyó chii. Vasi cahán ñáyivi chii, vasi chicá nyicon ñu chii, vasi ñahri cha iyó chii, vasi cuaha cha cuví chii, soco sií xaan cuñi cha nyehí tindocho cha cuenda maa ra Cristo. Vaty tatu ñahri fuerza mai iyo chii, soco ñihi ca cuñi chihin fuerza maa Nyoo.

Chicá xiñi ra Pablo tuhun ñu yihí cuenda Nyoo ñuu Corinto cuan

¹¹ Cahín tari noo ra loco. Soco maa ndo cuñi ta cahín tyicuan caa vatyí ña sahá ca ndo ñáyivi chii. Vatyí maa ndo tahán chi cuyaa ndo chihin. Vasi noo ra cha ñima ri tuhun cuví yuhu, soco nyaca cuvi ra cha catyí tyi apóstol cuví ra, ta ña ndicha ra. Cuñi maa ra tyi vaha xaan ca ra cha nuu inga ra chicá tyiño Nyoo.

¹² Nyehe ndo yoso caa tyiño Nyoo cha sacuví mahñu ndo. Ta chihin cha cama iñi ta cunyej tandihi tindocho cha nyehi. Ta cuaha xaan milagru sañahá Nyoo chi ndo tacuhva coto ndo vatyí ndicha cha cuvi yuhu noo ra chicá tyiño maa ra.

¹³ ¿Atu vaha ca cuhva tyiñuhí chi yañi yo inga ñuu cha nuu nyoho? Ñima. Inuu ri cuhva tyiñuhí chi tandihi ndo. Noo ri cha ña sacuví chihin nyoho cha ña cuñi cuhve tindocho chi ndo. Saha ndo ticahnu iñi chii tatu ña vaha cuhva sacuví.

¹⁴ Ta vityin cha iyó vahí cha quichi nyehi nu nyicu ndo. Cha cu uñi chaha vityin. Ta ñahri tindocho tyai siqui ndo. Vatyí ñima cha iyó chi ndo vachí nanduquí. Chi maa ndo cuví cha cuñi yuhu. Vatyí sutu, ican tahan chi cuhva cha chiñuhú chi sehe. Ta ñima sehe nducú cha chiñuhú chi sutu.

¹⁵ Yucuan chaha yuhu nyacua sií cuñi cusanaí cha iyó chii cha cuenda cha vaha chi ndo. Ta nyacua sií cuñi cuhve ñáyivi cha cuenda ndo. Soco ta caa ri vatyí tatu cuñi que chi ndo, maa ndo ña cuñi vaha ndo chii.

¹⁶ Ta vasi chitó cachi ndo vatyí ña chahí tindocho chi ndo, soco yihí ndo catyí ndo vatyí sandaví ñahi chi ndo ta ña tuví iñi ndo.

¹⁷ ¿Atu sandaví ñahi chi ndo chihin nya noo ra cha tachí nu nyicu ndo quivi cuan?

¹⁸ ¿Atu sandaví ñaha ra Tito chi ndo quivi tachí chi ra chihin inga yañi yo cuan nu nyicu ndo? Ña sandaví ñaha ra chi ndo. Vatyí nyuhu ña tuhvá ndi sandaví ñaha. Vatyí iñ ri cuhva iyó ndi. Ta iñ ri cuhva sacuví ndi.

¹⁹ Vasi chicá xiñi ndo vatyí cuahan ndi tumañi iñi chi ndi cha cuenda tuhun cha cahán ndi ihya, soco ñima tyicuan caa. Vatyí tandihi tuhun ihya cahán ndi cha cuenda cha vaha chi maa ndo tacuhva cohon nuu ca ndo chi Nyoo. Vatyí ndicha cha cuñi ndi chi ndo. Ta cahán ndi soco chihin nuu Nyoo ta cha cuenda maa ra Cristo.

²⁰ Chicá xiñi coto iñi ndaa iñi noo nyicu ndo ta chaí. Ta ma cutahan iñi cuhva nyicu ndo. Ta maa ndo ma cutahan iñi ndo cuhva cucahin chi ndo. Yuhví coto coo tisihi, coto nya ndo quichi cuvi iñi ndo cha chii noo tahan ndo, coto nya ndo cuxaán ndo chi tahan ndo, coto nducú ndo maa maa ri cha vaha chi maa ndo, coto nya ndo ñi ca ndo cuendu, coto cahán cuehe ndo chi tahan ndo, coto nya ndo cahnu sahá ndo chi ndo. Yuhví coto nyehi tyi ña cachi ña ndaa nyicu ndo.

²¹ Ta yuhví coto cha cuhin inga chaha nu nyicu ndo, Nyoí cuhva ra cha cucahan nui cha cuenda nyoho. Ta chicá xiñi coto quita ndutya nui cha cuenda cha nyacuví ndo. Vatyí yihí ndo sacuví ndo cuatyí nu quichi quivi. Ta nya vityin ta ña ndu uvi iñi ndo cha ca iyó ndo chihin ñusihi ta ñima ñasihi ndo cuví, ta iyó ndo chihin rayi ta ñima yíi ndo cuví. Ta ña sandihí ndo tuhun cha sacuví ndo ñáá ndihi cha ña vaha.

13

Chahá ra Pablo tuhun chi ñu Corinto, na saha vaha ñu cuenda chi ñu tatu vaha cuahán ñu chihin Nyoo

¹ Quivi cha cuquichi inga chaha nu nyicu ndo cuvi chi chaha cu uñi. Yucuan ta cuvi cundaa tyiño ñu cha sacuví cuatyí. Soco cuñi chi uvi o uñi cha ndaa.

² Vatyí quivi chahin nu nyicu ndo cha cu uvi chaha, catyí chi ra sacuví cuatyí cuan, na sandihí ra tuhun. Ta vityin catyí tiqui inga chaha chi ra, ta chi tandihi ndo. Vatyí tatu cha quichi inga chaha, ta sacuví ca ndo cuatyí cuan, ma cundahvi cuñi nyehi chi ndo.

³ Tyicuan ta coto ndo cha cuñi xaan ndo coto ndo. Vatyí ndicha ndicha cha chihin fuerza maa ra Cristo cahín. Vatyí ra Cristo

ñima noo ra ñima ri tuhun cuví ra. Yucuan chaha sañahá ra tunyee ñi ra chi ndo.

⁴Ndicha vatyi chihí ra nu cruzi tari noo ra cha ñahri tunyee ñi iyó chii. Soco nandoto ra ta iyó ra chihin tunyee ñi Nyoo. Ta tyicuan caa tucu maa ndi vasi ñahri fuerza maa ndi iyó chi ndi. Soco ñn ri cuví ndi chihin ra Cristo. Ta iyó ndi chihin tunyee ñi maa Nyoo vatyi tyicuan caa ta cuví tyinyee tucu nyuhu chí nyoho.

⁵Saha ndo cuenda chi ndo tatu ñi vaha ñi ndo cuahán ndo chihin Nyoo. Saha ndo cuenda vatyi ra Cristo ñohó ra añima ndo tatu chinó vaha ñi ndo chi ra. Soco tatu ñima chihin cha ñi ñi ndo cuahán ndo chata Nyoo, ra Cristo ña nyaá ra chihin ndo.

⁶Soco chitó vahi tyi coo quivi cunacoto ndo tyi vaha cuhva tyinyee ndi chi ndo tacuhva cuví cahun vaha ndo chihin ra Cristo.

⁷Ta chicán tahvi xaan ndi chi Nyoo chaha ndo, tacuhva vatyi ma sacuvi ndo cha ña vaha. Ñima cha cuñi ndi tyi catyi ñáyivi tyi vaha ndi. Soco cha cuñi ndi vatyi nyoho sacuví ndo maa maa ri cha vaha. Ñahri saha vasi catyi ñáyivi, an vaha, an ña vaha cuhva cha sacuví ndi.

⁸Vatyi nyaá sigui ndi cha sacuví ndi cha vaha. Ma cuvi tixehe ndi tuhun ndicha. Noo ri cha cuví sacuvi ndi, cha sañahá ndi tuhun ndicha.

⁹Yucuan chaha cusii xaan cuñi ndi cha ñahri fuerza maa ndi iyó chi ndi, ta cuhva tyi nyee cuñi ndo chihin fuerza maa Nyoo. Ta tyicuan ri chicán tahvi ndi chaha ndo na vaha ca cahun ndo chihin Nyoo nyacua nya cha ñahri ca cumañi chi ndo.

¹⁰Sacuhín carta ihya chí ndo cha ni ri ca cha cumañi quichi nu nyicú ndo. Vatyi sanduvaha ndo chí ndo. Tyicuan ta ma cuñi ca chí cha cahín chí ndo quivi chai nu nyicu ndo. Vatyi ndicha cha chaha Nyoo ityi chii cha sahí cuenda chí ndo. Soco chaha ra tyiño ihya chii vatyi sandunyeé que ñi ndo. Ta ñima cha sanducuihyá ndihi que ñi ndo.

¹¹Ta nu ndihi cahín, yañi, catyi chí ndo, na nducu ndo cuhva nicoo vaha ndo ta sii cuñi ndo. Nanducu ndo cuhva coo cuñi ndo nuu Nyoo cha ñahri cumañi chí ndo. Na cunii ñi ndo, na coo vaha ndo chihin tahan ndo. Ta Nyoo ra cuñi xaan chí ndo, ta ra chahá cha taxi coo añima ndo na cunyaa ra chihin ndo.

¹²Ta nacuhva maa ndo nocumi chí noo noo tahan ndo chihin cha sii cuñi ndo nyehé ndo chí ñu.

¹³Ta vachí nocumi chí ndo sahá tandihi ñu yihí cuenda Nyoo ñuu ihya.

¹⁴Ñacuhva Sutu Mañi yo Jesucristo cha vaha coo añima ndo. Ta ñacoto ndo tyi

Nyoo cuñi xaan ra chí ndo. Ta na cunyaa Tatyí li ra chihin ndo. Ta nacuvi chí tyicuan caa.

Carta Cha Sacuhun Ra Apóstol Pablo Chi ñáyivi Ityi Galacia Cha Yihí Cuenda Nyoo

Ra Pablo tyaá ra noo carta chi ñu ityi Galacia cha yihí cuenda Nyoo

¹ Yuhu ra Pablo cuví noo apóstol. Soco ñima ñáyivi tachí chii. Ta ñima rayi catyi vatyi ñihí yuhu tyiño ihya. Soco maa ra Jesucristo ta maa Nyoo Sutu yo chaha ra tyiño ihya chii. Vatyí ican Nyoo sanandoté chii ra Cristo mahñu ñu chihí.

² Yuhu ta tandihí yañi yo cha nyicú chihin, tyaá ndi carta ihya chi nyoho ñu yihí cuenda Nyoo tandihí vehe ñuhu Galacia.

³ Nyoo Sutu yo ta Sutu Mañi yo Jesucristo nasoco ra chi ndo ta nacuhva ra cha taxi ri coo añima ndo.

⁴ Vatyí maa ra Jesucristo chaha ra ñáyivi ra tyiño nuu yo cha catyi cuatyí yo. Vatyí tacuhva sacacú ra chi yo mahñu ñu quíñi iyo cha iyó síqui ñuhu ñáyivi ihya vityin. Vatyí tyicuan caa tyaá maa Nyoo Sutu yo cuhva tyi sacuvi ra Cristo.

⁵ Yucuan chaha na sacahnu yo chi maa Nyoo tyicuan ri maa. Ta na cuví chi tyicuan caa.

Ñahri ca inga cuhva cuví cacu añima yo

⁶ Iyo xaan cuñí vatyí nyoho numi xaan cuahan sandoó ndo chi Nyoo, ra nacana chi ndo tyi nicoo vaha ndo chihin ra cha cuenda tumañi iñi cha sahá ra Cristo chi yo. Ta vityin sin caa ityi natyihí ndo cuahan ndo. Ta cuñi maa ndo tyi cucacu ndo chihin cuan.

⁷ Soco ñahri ca inga cuhva cuví cacu añima yo. Soco iyó ra cuñí satondo xiñi ndo. Ta cuñí ra sativi ra tuhun cha sacacu ra Cristo chi yo.

⁸ Ñahri saha, an cuví ri nyuhu, an cuví ri noo ángel cha quichi nya andivi, soco tatu tyehe ta cahán noo ndi tuhun ra Cristo nuu ndo, ta sin caa, ta ñima tari cuhva sañaha ndi chi ndo quivi cuan, Nyoo cutachi tuñi ra chi ndi.

⁹ Cha catyi tuhun ihya chi ndo quivi cuan soco cuacatyí tiqui inga chaha chi ndo vityin. Tatu yóo cha cahán tuhun cha cacú añima yo chihin ndo ta sin caa, ta ñima cuhva cha chihí ndo quivi xihna ri, Nyoo cutachi tuñi ra chi ra cahán tyicuan caa.

¹⁰ Cha catyi tuhun ihya chi ndo, ñima cha nduquí cuhva savahi chii nuu ñáyivi. Soco nduquí cuhva savahi chii nuu Nyoo. Tyehe

ta nduquí cuhva savahi chii nuu ñáyivi, ñima noo ra sacuvi tyiño nuu ra Cristo cuví.

Yoso caa cha nanduvi ra Pablo noo ra chicá tyiño Nyoo

¹¹ Soco çoto ndo tuhun ihya yañi, vatyi tuhun ra Cristo cha cahán yuhu, ñima tuhun cha ndichí xiñi ñáyivi cuví.

¹² Ñima ñáyivi sañaha chii. Yori sañaha chii. Soco suri maa ra Cristo sacotó chii.

¹³ Vatyí nyoho chihí ndo yoso caa chinyacuví quivi cuan, quivi ñohí cuenda ñu Israel. Ta chitó ndo yoso caa cha xaan chicá nyiquen chi ñu yihí cuenda Nyoo. Ta nduquí cuhva sativi cuhva chinó iñi ñu.

¹⁴ Ta ñohí cuenda ñu Israel, yuhu cuví ra cuahan ityi nuu ca ta ñima ca suhva ca ra tahin cha in ri cuiya ndi. Vatyí cuñi xaan que sacuvi yoso cuhva chinyacuví maa sutu chahni ta ityi chata ca.

¹⁵ Soco nya ta ni cumañi caqui ta tyaá Nyoo cuhva tyi cusaha ra tumañi iñi chii. Ta nya cha chaa maa chi quivi cha tyaá ra cuhva, yucuan ta nacana ra chii. Vatyí cuñi xaan ra chii.

¹⁶ Ta tyicuan caa sacuvi ra vatyí cohon nui chi Sehe ra. Tacuhva vatyí cahin tuhun Sehe ra, ra Cristo, chihin ñáyivi cha ñima ñu Israel cuví, tacuhva cacu añima ñu. Ta quivi cha cuví tyehe caa, ña nduquí cuhva cha catyi ñáyivi chii ñáa cha tahán chi sacuvi.

¹⁷ Ta ni ña chahin nya Jerusalén nu canyicu ra apóstol, vasi cha chicha ca ra chihin tuhun Nyoo, vatyí maa ra cha naha cana Nyoo chi ra ta ñima ca yuhu. Soco chahin nya Arabia. Tyicuan ta cuanuhu tiqui inga chaha nya Damasco.

¹⁸ Cha yaha uñi cuiya tyicuan ta chahin nya Jerusalén, ta chicohon nui chi ra Pedro. Ta ndoj chihin ra chahun quivi.

¹⁹ Soco ña nyehí chi inga apóstol. Noo ri ra Jacobo yañi Sutu Mañi yo nyehí.

²⁰ Ta chihin nuu Nyoo ta catyi chi ndo vatyi tuhun cha catyi chi ndo nu tutu ihya, cha ndicha cuví.

²¹ Cha yaha cha chahin Jerusalén ta chahin ityi Siria ta ityi Cilicia.

²² Soco ra yañi yo cha canyicu vehe ñuhu ra Cristo cha nyaa nicacahnu Judea, ña ñoho nuu maa ra chii.

²³ Tacuhva cha cachiñi ri ra cahán ñu tuhun, vatyi catyi ñu: “Ra cha chicá nyicon chi yo quivi cuan, vityin cahán noo ra nuu ñáyivi na nachino iñi ñu chi ra Cristo. Ta quivi cuan cuñi ra sativi ra tuhun ra Cristo”, catyi ñu.

²⁴ Ta ra canyicu vehe ñuhu ra Cristo casacahnu ra chi Nyoo cha cuenda cha sacuvi Nyoo chihin tyicuan caa.

2

Ra myisó tyiño vehe ñuhu Jerusalén, ndoó ra vaha cuhva sahá tyiño ra Pablo

¹ Cha yaha cha uchi cumi cuiya, chahin Jerusalén inga chaha chihin ra Bernabé. Ta chahan ra Tito chihin ndi.

² Chahin nyicuan vatyí maa Nyoo sañaha chii vatyí tahán chí cuhin Jerusalén. Ta nacatyí chí ñu yoso caa sañahí tuhun ra Cristo chí ñu cha ñima ñu Israel cuví. Quita siin chihin ra cha canyiso tyiño vehe ñuhu, ta chahí cuenda chí ra yoso caa tuhvé cahn chihin ñu. Coto ma candoo ra vaha ta cacatyí ra vatyí yuhu sahá tyiño caha ri mai.

³ Soco candoo ra vaha. Vatyí ni ri chí ra Tito ta ña saniñi ra cha sacuví ra costumbre circuncisión. Ta ra Tito ñima ra Israel cuví ra.

⁴ Ndicha vatyí quihví xehe suhva ra cha catyí vatyí yañi yo cuví chí ra, soco ñima. Vatyí cuñí ra nyehe nyaa ra cuhva iyó yo. Vatyí libre iyó yo cha cuenda ra Cristo Jesús. Soco cuñí ra cuan tyi cunyaca ñaha tucu ley chahnu chí yo.

⁵ Soco ni noo cuhva ta ña chaha ndi cha cunyaca ñaha ra cuan chí ndi. Vatyí cuñí ndi vatyí nyoho ma saña ndo cha ndicha tuhun ra Cristo cha cacu añima yo.

⁶ Soco maa ra canyisó tyiño vehe ñuhu, ñahri tuhun chaa chaha ra chii. Ta vasi cahnu tyiño canyisó ra cuan, soco cha cuenda chí yuhu, ñahri saha. Vatyí Nyoo ña sahá ra cuenda cuhva tyiño nyisó yo. Soco añima yo sahá ra cuenda.

⁷ Cha nuu cha catyí ra canyiso tyiño vehe ñuhu cuan chii ñaá ndihi tuhun, maa ra canacoto ra vatyí maa Nyoo tachí chii vatyí cahn tuhun ra Cristo chihin ñu cha ñima ñu Israel cuví. Tari tachí ra chí ra Pedro vatyí cuahan ra suri tuhun ra Cristo cuan chihin ñu Israel.

⁸ Vatyí suri maa Nyoo tachí chí ra Pedro tyi cuví ra apóstol cuenda ñu Israel. Ta tachí tucu ra chí yuhu tyi cuví apóstol ra Cristo cuenda ñu cha ñima ñu Israel cuví.

⁹ Yucuan chaha ra Jacobo, ra Pedro ta ra Juan ra cacuví nuu yucuan, nichón nuu ra vatyí Nyoo chahá ra tunyee iñi chí chaha cahn tuhun ra Cristo chihin ñayivi. Ta chaha ra ndaha ra chii, ta chí ra Bernabé vatyí candoo ra vaha cha sahatyíño ndi mahñu ñu cha ñima ñu Israel cuví. Ta maa ra casahatyíño ra mahñu ñu Israel.

¹⁰ Noo ri vatyí catyí ra chí ndi vatyí na nichon iñi ndi ta natyinyee ndi chí ñu ndahvi. Ta ican cuví cha nanducú xain cuhva sacuví tandihí quivi.

Ra Pablo cahn ra chí ra Pedro vatyí ña vaha cha nyacuví ra

¹¹ Soco quivi chahan ra Pedro ñuu Antioquia, cahan vavahi chí ra chihin nuu ra vatyí ña vaha cha nyacuví ra.

¹² Vatyí cha xihna ri vaha sacuví ra vatyí chachí ra chihin ñu cha ñima ñu Israel cuví, nyacua nya cha chaq suhva ñayivi Israel cha tachí ra Jacobo. Tyicuan ta quichaha ña chachí ca ra chihin ñu. Tyicuan caa sacuví ra vatyí yuhví ra coto cahan ra itá iñi costumbre circuncisión cha chaq coyo cuan chí ra.

¹³ Tyicuan ta inga ra Israel cha yihí cuenda ra Cristo ndu in ri ra chihin ra Pedro. Ta sacuví ra cha ña vaha cuan. Vatyí ndu uví yuhu ra tari ndu uví yuhu ra Pedro. Ta nyacua nya ra Bernabé ta ndutahan ra chihin ra.

¹⁴ Soco nyehí vatyí ña vaha cuahán nyacuví ra. Ñima tari cuhva catyí tuhun ra Cristo. Yucuan chaha catyí chí ra Pedro chihin nuu tandihí ñu canyicu cuan: “Yoho cuvún noo ra Israel. Ta iyón tari iyó ñayivi cha ñima ñu Israel cuví. ¿Yoso caa cha cuñún saniñun chí ñu tyi sacuví ñu costumbre cha sacuví ñu Israel? Ta ni maun ta ña sacuví con”, catyí yuhu chí ra.

¹⁵ Maa yo cha cuví yo ra Israel nya ta cacu yo, ña sacuví yo cuatyí tari sacuví ñu cha ñima ñu Israel cuví.

¹⁶ Soco chitó yo vatyí ma cuví saváha yo chí yo nuu Nyoo chihin cha nanducú yo cuhva sacuví yo ley chahnu cha tyaq ra Moisés. Soco nduvahá yo nuu Nyoo cha cuenda cha chinó ri iñi yo chí ra Jesucristo. Yucuan chaha chinó tucu iñi maa yo chí ra. Vatyí tyicuan caa ta nicoo vaha yo chihin Nyoo. Ta ñima cha cuenda cha nducú yo cuhva sacuví yo cha catyí ley. Vatyí ni noo yo ta ña nduvahá yo nuu Nyoo chihin cha nanducú yo cuhva sacuví yo cuhva catyí ley chahnu.

¹⁷ Soco vityin tatu nducú yo cuhva nduvaha yo nuu Nyoo cha cuenda ra Cristo, cuñi chí catyí vatyí nacoto yo tyi iyó tucu cuatyí yo tari iyó cuatyí ñu cha ñima ñu Israel cuví. Tatu tyicuan caa, ¿atu cuñí chí catyí vatyí ra Cristo sacuví ra tyi iyó cuatyí yo vatyí sandoq yo ley ta nachino iñi yo chí ra? Ñima.

¹⁸ Soco tyehe ta naquehen tucu yo ley cha cha yaha sandoq yo, yucuan ndicha coo cuatyí yo.

¹⁹ Vatyí ley cuan sañahá chí chii vatyí tahán chí cuví, ta yucuan chaha sandihí tuhun cha nduquí cuhva caqui chihin ley cuan, ta chihí cha cuenda chí cuví cuan, tacuhva cuví coi cha cuenda Nyoo.

²⁰ Yuhu, tari cha chihí nuu cruzi in ri chihin ra Cristo. Ta ñima ca ñayivi mai iyé soco ra Cristo iyó ra añime. Ta ñayivi ra cha iyé vityin, iyé soco chihin cha chinó iñi chí

ra cha cuví ra Sehe Nyoo. Ican ra cuñí ra chii, ta chihí ra cha catyí cuatyí yuhu.

²¹ Ña cuñí yuhu sacuachiye cha vaha Nyoo. Vatyí tatu tyehe ta cuví cacu añima yo cha cuenda ley, ñahri tuhun chihí ra Cristo cuví chi cuan.

3

Naquehén yo Tatyí Ii Nyoo cha cuenda cha chinó ñíi yo chí ra Cristo

¹ ¡Ñana cha tondo iyó nyoho ñu canyicu Galacia chiña! ¿Yóo cha sativí chi ndo vatyí ña cuñí ca ndo quichaha ndo tuhun cha ndicha? Cachi xaan chahá ndi cuenda tuhun ra Jesucristo chi ndo. Ta cutuñí vaha ñíi ndo ñáa cuenda chihí ra nu cruzi.

² Noo ri cuñí ndaca tuhun chi ndo. ¿Atu naquehén ndo Tatyí Ii Nyoo cha cuenda cha sacuví ndo cha catyí ley ra Moisés, o cha cuenda cha chinó ñíi ndo tuhun ra Cristo cha chiñí ndo?

³ ¿Yoso caa cha tondo xaan iyó ndo vityin? Ta quiví xihna ri vaha xaan quichahá ndo chí Nyoo chihin tuncye ñíi Tatyí Ii ra. Soco vityin, ¿yoso caa cuñí ndo coo ndo ñayiví chaa chihin fuerza maa ndo?

⁴ ¿Atu cha caha ri nyehé ndo cha sacuví Tatyí Ii Nyoo chihin ndo? Ñima cha caha ri cuví, cahví ñíi.

⁵ ¿Ñáa tuhun chahá Nyoo Tatyí Ii ra chi ndo, ta sacuví ra milagru mahñu ndo? Ñima cha cuenda vatyí nducu ndo cuhva sacuví ndo cha catyí ley, soco cha cuenda vatyí chinó ñíi ndo tuhun ra Cristo cha chiñí ndo.

⁶ Ra Abraham, chinqo ñíi ra tuhun cahan Nyoo chihin ra, yucuan chaha cuví ra noo ra vaha nuu Nyoo.

⁷ Yucuan chaha tahán chi coto ndo vatyí ñu cha ndicha cuví ñayiví chí ra Abraham, ican ñu cuan chinó ñíi ñu chí Nyoo.

⁸ Ta cha naha ndoq tuhun Nyoo nu tutu. Ta catyí chí vatyí nu cuahán ca chí quiví, cusacuví Nyoo tyí nduvaha ñayiví cha ñima ñu Israel cuví nuu ra cha cuenda cha chinó ñíi ñu chí ra. Yucuan chaha catyí Nyoo chí ra Abraham ta cha naha: “Tandihí ri maa ñu cunasoque cha cuenda maun”, catyí Nyoo chí ra.

⁹ Yucuan chaha ñu cha chinó ñíi chí ra Cristo, Nyoo nasocó ra chí ñu ñin ri chihin ra Abraham, vatyí chinó ñíi tucu maa ra.

¹⁰ Ñu cha itá ñíi ley cha tyaa ra Moisés, cutachi tuñi Nyoo chí ñu. Vatyí tuhun Nyoo catyí. “Tandihí ñu cha ña sacuví tandihí cuii maa tuhun cha nyaá nu libru ley cuan, cutachi tuñi Nyoo chí ñu.”

¹¹ Ta ndicha vatyí yori yo nduvaha yo nuu Nyoo cha cuenda cha itá ñíi yo ley cuan. Vatyí tuhun Nyoo catyí chí: “Ra nduvahá nuu Nyoo cha cuenda cha chinó ñíi ra, coo ra ñayiví”, catyí tuhun Nyoo.

¹² Ta ley ra Moisés ña cu ñin ri chí chihin cha chinó ñíi yo chí ra Cristo. Vatyí catyí ley cuan: “Yóo ñu cha sacuví tandihí cuii ley ihya, coo ñu ñayiví cha cuenda cuan”, catyí chí.

¹³ Ra Cristo natava ra chí yo ndaha ley cha catyí tyi tahán chí cutuñi chí yo cha cuenda cuatyí yo. Vatyí maa ra nanduvi ra noo ra iyó cuatyí tyiño nuu yo. Vatyí catyí tuhun Nyoo: “Ñima ra vaha cuví ra cha chihí ta tacaá nu tutun.”

¹⁴ Tyicuan caa cuví tacuhva vatyí cha cuenda ra Cristo Jesús ta nasocó Nyoo chí ñayiví cha ñima ñu Israel cuví, tari catyí ra chí ra Abraham tyí cunasoco ra chí ra. Ta chihin cha chinó ñíi yo chí Nyoo, naquehén tandihí yo Tatyí Ii cha catyí Nyoo tyi cuhva ra chí yo.

Ley chahnu sañahá chí chí yo vatyí iyó cuatyí yo, soco ña sacacú chí chí yo

¹⁵ Yañi, cuacuhve noo cuhva chí ndo, cuhva iyó yo siqui ñuhu ñayiví ihya. Tatu noo ra catyí ra vatyí cucuhva ra cha cucuhva ra chí inga ra. Ta tatu cha yaha tyihí ra firma, yori cuví satani. Ta yori cuví natyiso suhva ca siqui.

¹⁶ Ta vityin, Nyoo catyí ra tyi cucuhva ra cha cucuhva ra chí ra Abraham ta chí nonga ra cha vachi tata ra. Ña catyí nu tutu Nyoo vatyí cuhva ra chí cuaha ra vachi tata ra, soco chí nonga ri ra. Ta ican ra cuan cuví ra Cristo.

¹⁷ Cha catyí yuhu, ican cuví ihya: Nyoo natyihí tahan ra tuhun chihin ra Abraham. Ta ñin ri tuhun cahán ra. Tyicuan ta yaha cumi ciento oco uchi cuiya ta chaá ley cha tyaa ra Moisés. Soco maa cuví casi ley cuan nu natyihí tahan Nyoo tuhun chihin ra Abraham. Ta ma cuví casi chí nu naquehén yo cha catyí Nyoo tyi cuhva ra chí yo.

¹⁸ Tyehe ta naquehén yo cha tahán chí chí yo cha cuenda ley ra Moisés, cha caha ri cuví tuhun natyihí tahan Nyoo chihin yo. Soco vatyí Nyoo catyí ra chí maa ra Abraham vatyí cuhva maa ra chí ra.

¹⁹ Tatu tyicuan caa, ¿ñáa cuenda vaha ley ra Moisés? Chahá Nyoo ley cuan soco cha yaha catyí ra tyi cuhva ra cha cucuhva ra chí yo. Vatyí ley cuan sanatuví chí cuatyí yo. Ta ndoq chí nyacua nya quiví quichí ra Cristo ra cuví tata ra Abraham. Ta chí maa ra Cristo catyí Nyoo tyi cuhva ra cha cucuhva ra. Ta ángel Nyoo chahá cuenda ley cuan chí ra Moisés. Ta ra Moisés chahá ra chí ñayiví.

²⁰ Soco Nyoo noo tuhun ri maa ra cahan ra chihin ra Abraham quiví cuan. Ta ña chiñuhú cha nducu ra noo ra nacatyí tuhun cuan chí ra Abraham.

²¹ ¿Atu cuñí chí catyí vatyí ley cha tyaa ra Moisés ña chachi tahan chihin cha catyí

Nyoo tyi cuhva ra chi yo? Ñima. Soco tyehe ta cuví coo yo ñáyiví chaa cha cuenda ley cuan, yucuan ndicha nduvaha yo nuu Nyoo cha cuenda chi. Soco ma cuví.

²² Vatyí catyí nu tutu Nyoo tyi iyó cuatyí tandihí cuií ñáyiví. Vatyí tyicuan caa ta ñu chinó iñi chí ra Jesucristo cuví ñihi ñu ñáyiví chaa cha catyí Nyoo tyi cuhva ra chi yo.

²³ Ta ni cumañi ca quichi tuhun cha chinó iñi yo chí ra Cristo, ley cuan chicumí chí chí yo tari cha ñohó yo vehe caa. Vatyí nyatu yo nyacua nya sañaha Nyoo chí yo yoso caa chino iñi yo chí ra.

²⁴ Ta ley cuan cuví tari noo ñu cha sahá cumi chí ra cuatyaa. Vatyí ley saha cumi chí yo tari ra cuatyaa nyacua nya quivi quichí ra Cristo. Ta cuví chinó iñi yo chí ra ta nduvaha yo nuu Nyoo.

²⁵ Ta vityin cha chaá quivi cha chinó iñi yo chí ra Cristo, ña sahá cumi ca ley cuan chí yo tari noo ra cuatyaa.

²⁶ Vatyí tandihí yo cuví yo sehe Nyoo vatyí chinó iñi yo chí ra Cristo Jesús.

²⁷ Ta tandihí yo condutyá yo ta ndu iñi yo chihin ra Cristo. Vatyí nyaá ra añima yo.

²⁸ Ña ñiñi xaan ca cha cuví yo, an ñu Israel, an ñu Grecia, an cuví ri yo ñu libre iyó, an cuví yo ñu iyó chitoho. An cuví yo rayii, an cuví yo ñusihí, soco ña chihuhu ca cuan. Vatyí cha iñi ri cuví yo chihin ra Cristo, noo ri cuví yo chihin ra.

²⁹ Ta tatu cuenda ra Cristo yihí ndo, ndicha cha ñáyiví vachi tata ra Abraham cuví ndo. Ta ñihí ndo cha catyí Nyoo chí ra Abraham tyi cuhva ra chí ra.

4

¹ Cuacuhve minoo cuhva chi ndo. Noo ra cuehe tatu chihí sutu cue, ta sandoó sutu cue tandihí cha tyayii ra chí cue, ra cuehe ihya ma cuví cotyíño ñaha cue cha tyayii sutu cue. Nyacua nya quivi cuahnu cue ta cuví cotyíño cue. Ta cha ni ri ca cha ta cuahnu ca cue, cuví cue tari noo musu ri. Vasi chí maa cue cuví tandihí cha tyayii sutu cue.

² Iyó ra cumí chí cue nyacua nya chaa cuiya cue cha catyí sutu cue, tyi naquehen cue cha tyayii cuan.

³ Ta tyicuan caa cuví maa yo. Cha ni ri ca cha ta quichí ca ra Cristo, cuví yo tari noo musu ri chí cha nyacá ñaha siqui ñuhu ñáyiví.

⁴ Soco quivi tahan chí, Nyoo tachí ra chí Sehe ra, sacacú noo ñaha sihi chí ra. Ta chinyacá ñaha ley chahnu chí ra.

⁵ Tachí Nyoo chí ra tacuhva sacacú ra chí yo ndaha ley cuan. Vatyí tyicuan caa ta Nyoo naquehén cuenda ra chí yo tari sehe ra.

⁶ Ta vatyí sehe ra nanduví yo, Nyoo tachí ra Tatyí Ii ra Cristo cunyaa añima yo. Ta cha cuenda Tatyí Ii ra caná chaa yo chí Nyoo ta catyí yo: “Sutu Mañi yuhu.”

⁷ Yucuan chaha sehe Nyoo cuvun ta ñima ca noo musu ri. Ta cha cuenda cha cuvún sehe Nyoo, chahá ra cha vaha cha tahán chí chuun cha cuenda ra Cristo.

Chicá xiñi ra Pablo cha cuenda ñu yihí cuenda Nyoo

⁸ Quivi ta cohon nuu ca ndo chí Nyoo, cuví ndo musu noo cha ñima Nyoo cuví.

⁹ Soco vityin ñohó nuu ndo Nyoo, o maa Nyoo ñohó nuu ra chí ndo. ¿Yoso caa cha cuñi ndo natiin tucu ndo noo tuhun ndahví cha ñima ri tuhun, ta nanduvi tucu ndo musu inga chaha?

¹⁰ Nyoho sanducahnú ndo quivi vico, quivi natyacú yoo, ta vico cuiya.

¹¹ Yuhví xain coto vaha ñahri maa tuhun sahá tyiñe chihin ndo.

¹² Yañi, chacú ndahví nuu ndo na nanduvi ndo tari mai (cha ña nyacá ñaha ca ley chí). Vatyí yuhu cha nanduví tari maa ndo, soco ñima cha sativi ndo chí.

¹³ Vatyí cha chitó ndo quivi chahan nui ñuu ndo yihí noo cuehe chí. Ta chahá chí cuhva cahin tuhun ra Cristo chihin ndo.

¹⁴ Ta cuehe cuan cuví tari noo prueba cha cuenda vatyí ña tyaa xiin ndo chí. Soco vaha naquehen cuenda ndo chí, tari noo ángel Nyoo, ta tari cha vatyí suri maa ra Cristo cuví.

¹⁵ ¿Nya nyaa cha sii xaan cuví chí ndo chihin vityin? Vatyí yuhu cuví cha ndaa vatyí quivi cuan, nyacua caña iñi ndo catava ndo chí nuu ndo ta cuhva ndo chí, tyehe ta cuví nduvahi chihin cuan.

¹⁶ Ta vityin, ¿atu cuñi maa ndo tyi nanduví yuhu noo ra cha xaan cahnu iñi ndo cha cuenda vatyí catyí cha ndicha chí ndo?

¹⁷ Ñáyiví cuan, cuñi xaan ñu chí ndo, catyí ñu. Soco ñima chihin cha vaha. Vatyí cha cuñi ñu cuan, cha sacanyaha ñu chí ndo chí ndi. Ta cunyicon ndo chí maa ñu.

¹⁸ Soco vaha cha cuñi yo chí ñáyiví, soco chihin cha vaha, ta tyicuan ri maa. Ta ñima iñi yaha ri cuhva cha nyaa ri yuhu chihin ndo.

¹⁹ Sehe luhli, inga chaha nyehí tindoho ta cha uhvi cha catyí ndo. Tari noo sihi cha yihí cha uhvi chí ña tatu cuacacu sehe ña. Ta cunyehe que tindoho nyacua nya ndunyeve vaha ndo chihin fuerza maa ra Cristo.

²⁰ Vaha tyehe ta nyaí chihin ndo vityin vityin. Tacuhva cuví cahan vii chihin ndo inga cuhva. Vatyí ña chité yoso caa caca xiñi cha cuenda ndo.

Nacoo yo cha cuenda Nyoo ta ñima ca cha cuenda ley chahnu

²¹ Nyoho cha cuñi ndo cha cunyaca ñaha ley ra Moisés chi ndo, catyi ndo chii. ¿Atu ta cuiñi ca ndo cha catyi ley cuan?

²² Catyi chi vaty ra Abraham chiyo uvi tahan sehe ra. Noo sehe ra chiyo chihin ñaha cha cuvji musu ñasihi ra. (Chinafi ña Agar.) Ta nonga sehe ra chiyo chihin cu Sara cha cuvji ñasihi vaha ra.

²³ Cacü sehe ñaha cha cuvji musu cuan tari cacü tandihi ra cuatyaa. Soco sehe ñasihi vaha ra Abraham cacü cue tacuhva chino cava cha catyi Nyoo chi ra Abraham vaty cuhva ra noo sehe chi ñasihi ra.

²⁴ Ta chihin ihya iyó noo cha cuñi chi catyi chi chi yo. Ninduvi ñusihi cuan cuvji ñu tari uvi tahan tuhun cha natyihj tahan Nyoo chihin yo. Noo tuhun cuan cuenda yucu Sinaí. Ta ñáyivi yihí cuenda ley cuan cuvji ñu tari cu Agar, vaty noo musu ri cuvji tucu maa ña chihin sehe ña.

²⁵ Tari cu Agar, ta tari yucu Sinaí cha nyaá Arabia, tyicuan caa tucu ñuu Jerusalén quivi vityin. Vaty ñáyivi ñuu cuan nyaá ñu ndaha ley chahnu. Tari noo musu ley cuan cuvji ñu.

²⁶ Soco nya andivi iyó inga Jerusalén, cha cuvji ñuu yo. Ta yori nyacá naha chi chi. Ta cuvji chi tari sihi yo.

²⁷ Ta catyi tuhun Nyoo:

Cusii iñi yoho, ñaha sihi cha ña cuvji coo sehe.

Yoho yori sehun.

Çana chaa chihin cha sii cuñun, yoho cha ña ñohö nuu cha uhvi cha cacu sehe.

Vaty ñaha sihi cha sanandoö yii chi, coo ca sehe ña ta ñima ca ñusihi cha iyó yii, catyi tuhun Nyoo.

²⁸ Yañi, yoó cuvji yo tari ra Isaac, ra cuvji sehe cu Sara. Cuvji yo sehe ra Abraham cuenda tuhun cha natyihj tahan Nyoo chihin ra.

²⁹ Ta ra cha cuvji sehe ñaha cha cuvji musu cuan vahan iñi ra chi ra Isaac cha cuvji sehe ñasihi xaara ra Abraham. Tyicuan caa cuvji tucu vityin. Ra cha cuñi vaty sacuvi yo cha catyi ley, xaan iñi ra ta chicán nyicon ra chi yo cha cuvji yo ñáyivi nacacü chaa chihin Tatyí Ii Nyoo.

³⁰ Soco ¿ñáá cha catyi tuhun Nyoo? Catyi chi: “Tava ñehe chi ñaha cha cuvji musu cuan chihin sehe ña. Vaty sehe ña ma cuvji naquehen cue cha tahán chi chi sehe ñasihi vaha ra Abraham”, catyi tuhun Nyoo.

³¹ Yucuan chaha, yañi, ñima tari sehe ñaha cha cuvji musu cuan cuvji yo. Soco cuvji yo tari sehe ñasihi vaha ra Abraham.

5

Ñihi cuinanyaa yo chihin cha ña nyacá ñaha ca ley chi yo

¹ Ra Cristo sacacü ra chi yo ndaha ley chahnu cuan. Yucuan chaha saha ndo cuenda coto nanduvi ndo musu inga chaha cuenda ley.

² Tyasoho ndo, yuhu ra Pablo catyi chi ndo. Tatu cuhva ndo cha saha ñu circuncidar chi ndo, ta cuñi maa ndo tyi cucacu ndo chihin cuan, ma cuvji tyinyee ra Cristo chi ndo.

³ Cuñi catyi inga chaha chi ndo vaty tandihi ra cha cuñi cacu chihin cha saha ñu circuncidar chi ra, cuñi chi vaty sacuvi ra tandihi cuii cha catyi ley ra Moisés ñandhi.

⁴ Tandihí nyoho cha nducú ndo nduvahá ndo nuu Nyoo cha cuenda ley cuan, cha sañá tahan ndo chihin ra Cristo cuvji cuan. Ta sañá ndaha ndo tumañi iñi cha chahá Nyoo chi ndo.

⁵ Soco yoó chihin cha tyinyee Tatyí Ii Nyoo chi yo ta chinó iñi yo chi ra Cristo. Ta itá iñi yo nduvahá yo nuu Nyoo.

⁶ Vatyí tatu iin ri cuvji yo chihin ra Cristo Jesús, ñahri tuhun cha sacuvi yo costumbre circuncisión, o cha ña sacuvi yo. Cha vale ca tatu chinó iñi yo chi ra Cristo. Ta chihin cha chinó iñi yo coo yo, chihin cha cuñi yo chi noo noo tahan yo.

⁷ Nyoho vaha cuahán ndo quivi cuan. ¿Yóó cha sativi chi ndo? Ta ña tyasohó ca ndo cha ndicha.

⁸ Tuhun cha sañahá ñu cuan, ñima tuhun Nyoo ra nacanā chi yo cuvji.

⁹ Vatyí tari nandaá yuchan pan chihin chiin ri yuchan iya, tyicuan caa tucu noo ri ñáyivi quiñi caa cuvji sativi ñu chi cuaha ñáyivi.

¹⁰ Nyoo cutachi tuñi ra chi ñáyivi cha sativi chi ndo. Ñahri cuenda ra yóó ñu cuvji ñu. Soco yuhu chitó vahí tyi Sutu Mañi yo cutyinyee ra chi ndo tacuhva vaty nyoho ma caca xiñi ndo inga cuhva cha ña sañahj chi ndo.

¹¹ Ta cha cuenda chi yuhu, yañi, tyehe ta catyi vatyí ñu chinó ini chi ra Cristo cuñi chi cha sacuvi ñu costumbre circuncisión, ra Israel ma caca nyicon ra chii. Ta ma cuquiñi ca cuñi ra chihin tuhun ra Cristo cha chihj nu cruzi cha catyi cuatyí yo.

¹² Soco ra sayangá chi ndo chiña, vaha cha quita ra nu nyicu ndo, tacuhva cha ma sayanga ca ra chi ndo.

¹³ Vatyí nyoho, yañi, nacanā Nyoo chi ndo vatyí coo ndo libre. Soco ñima cha cuenda cha iyó ndo libre ta cuvji sacuvi ndo ñáá ndihí cha cuñi coño ñuhu ndo. Soco sacuvi ndo tyiño nuu tahan ndo chihin cha cuñi ndo chi ñu.

¹⁴ Vatyí iyó noo tuhun Nyoo cha catyí chi: “Cuñi ndo chi tahan ndo tari cuñi ndo chi maa ndo”, catyí chi. Ta tatu ndicha ndicha cha cuñi yo chi tahan yo, ña yíi sacuví yo tandihí cha catyí ley chahnu.

¹⁵ Saha ndo cuenda vatyí tatu cahán ndo ta sataí iñi ndo chi tahan ndo, cutiví nu nyicu ndo.

Cuhva cuñi coño ñuhu yo ta cuhva iyó yo chihin Tatyí Ii Nyoo

¹⁶ Cha cuñi catyí chi ndo ican cuví ihya: Coo ndo chihin tunyee iñi Tatyí Ii Nyoo. Tyicuan caa ta ma cuví ca sacuví ndo cuhva ña vaha cuñi ndo.

¹⁷ Vatyí cha sacuví yo cha ña vaha cha cuñi yo, ñima cuhva cuñi Tatyí Ii Nyoo cuví. Vatyí Tatyí Ii Nyoo ña cuñi chi cha sacuví yo cha ña vaha. Ta coño ñuhu yo ña cuñi chi sacuví chi cuhva cuñi Tatyí Ii Nyoo. Ña nacachí tahan cha cuñi Tatyí Ii Nyoo chihin cha cuñi coño ñuhu yo. Ta yucuan chaha ma cuví sacuví yo cha cuñi yo.

¹⁸ Soco tatu sacuví yo cha catyí Tatyí Ii Nyoo chi yo, ma cuví ca cunyaca ñaha ley chí yo.

¹⁹ Ña xehe caa ñu sacuví cuhva ña vaha cha cuñi coño ñuhu. Yihí ra, iyó ñasihí ra ta iyó inga ñu chi ra. Ta yihí ñu iyó yíi ñu ta iyó inga ra chí ñu. Ta yihí ñu sacuví ñu cha ña vaha chihin coño ñuhu ñu ta iyó vicíu chí ñu.

²⁰ Yihí ñu sacahnú ñu xitohyo. Yihí ñu sataí ñu. Yihí ñu tasi cuñi nyehe ñu chí tahan ñu. Yihí ñu cañi tahan ñu. Yihí ñu cuiño ñu. Ta yihí ñu yatyin iñi ñu. Yihí ñu chicá xiñi ñu maa maa ri cha vaha chí maa ñu. Ta yihí ñu iyó división nu nyicu ñu. Vatyí cacañi tahan ñu. Ta tyicuan caa ta cusíin ñu.

²¹ Ta yihí ñu nyiyó iñi ñu cha tyayí. Ta yihí ñu cachahñi chí tahan ñu. Ta yihí ñu tuhva ñu chiñi. Ta yihí ñu chachí cuahyí ñu. Ta sacuví ñu cuaha ca cha sacuví ñu. Ta catyí chí ndo tari catyí chí ndo quiví cuan. Vatyí tandihí ñu cha sacuví tyehe caa ma cuví naquehen cuenda ñu nu nyacá ñaha Nyoo.

²² Soco cha chahá Tatyí Ii Nyoo, ican cuví ihya: cha cuñi yo chí Nyoo ta chí tahan yo, cha síi cuñi yo, cha taxí cuñi añima yo, cha cama iyó yo chihin ñáyiví, cha masu iñi yo, cha vaha ñáyiví cuví yo, cha ña cundihñi yo sacuví yo cha vaha chihin ñáyiví, cha chinó iñi yo chí ra Cristo.

²³ Ta inga cha chahá Tatyí Ii Nyoo chí yo, ican cuví ihya: cha ndahví sahá yo chí yo, cha ña sacuví yo cuhva cuñi coño ñuhu yo. Tatu sacuví yo tandihí cha vaha ihya, ní noo ley ta ma cuví catyí chí tyí iyó cuatyí yo.

²⁴ Ta yoó cha yihí yo cuenda ra Cristo Jesús, cha sandihí yo tuhun cha sacuví yo cuhva ña vaha cha cuñi coño ñuhu yo.

²⁵ Ta tari cha iyó yo ñáyiví chaa cha cuenda Tatyí Ii Nyoo, tyicuan caa cuñi tucu chí cha quichahá yo cha saquehen ityí ra chí yo.

²⁶ Ma cahnu saha yo chí yo. Ta ma sacañi tahan yo chí tahan yo. Ma quichi cuví iñi yo cha chíi inga tahan yo.

6

Tahan chí tyinyee yo chí tahan yo

¹ Yañi, tatu nanyehé yo sacuví noo tahan yo cuatyí. Nya yo cha ñihí nyaá yo chihin Tatyí Ii Nyoo tyinyee yo chí ñu na ndunee ñu inga chaha. Soco cuñi chí cahán víi yo chihin ñu chihin cha vita iñi yo. Ta cuñi chí sahá yo cuenda chí yo coto nducu nyehe tucu cuhna chí maa yo.

² Na tyinyee yo chí tahan yo ñáá cha cuví chí ñu. Tatu tyicuan caa sacuví yo, quichahá vaha yo chí ra Cristo cuví cuan.

³ Tatu nya noo yo cuñi maa yo vatyí cahnu ñu cuví yo, ta ñahri ñu cuví yo, suri chí maa yo sandaví ñaha yo.

⁴ Ma saha yo tuhun tyí vaha yo tari vaha noo hermano cha vaha chicá chihin Nyoo. Nasaha xihna yo cuenda tatu vaha cha nyacuví yo. Tyicuan ta coto yo tatu vaha sacuví yo ta cusíi cuñi yo.

⁵ Vatyí tahan chí cunyeé noo noo yo ñáá ndihí cha tyisó Nyoo síqui yo.

⁶ Ta cuñi chí tyinyeeé ndo chihin cha chíñuhú chí ra cha sañahá tuhun Nyoo chí ndo.

⁷ Ta ma sandaví ñaha ndo chí ndo. Nyoo yori cuví cuacu nyaá chí ra. Vatyí tandihí cha tachí ñáyiví, ican cuan cunaquehén ñu. Vatyí tatu sacuví ñu cha vaha, cha vaha naquehén ñu. Soco tatu sacuví ñu cha ña vaha, cha ña vaha cuñihí ñu.

⁸ Tatu noo ñáyiví nyacuví ñu cuhva ña vaha cha cuñi coño ñuhu ñu, suri maa cha sacuví ñu cusativí chí chí ñu. Soco tatu nyacuví ñu cuhva cuñi Tatyí Ii Nyoo, Tatyí Ii Nyoo cucuhva noo ñáyiví chaa cha ma naa ca maa tyí coo ñu.

⁹ Yucuan chaha ma cutatu yo cha sacuví yo cha vaha. Vatyí tatu ma ndu uvi iñi yo, coo quiví ta naquehen yo cha vaha.

¹⁰ Yucuan chaha tahan ri chaha cha chahá chí cuhva, na sacuví yo cha vaha chihin tandihí ri ñáyiví. Ta cha xihna cuii ri sacuví yo cha vaha chihin ñu yihí cuenda Nyoo.

Cusíi xaan cuñi ra Pablo vatyí nyehé ra tindoho cha cuenda ra Cristo

¹¹ Nyehe ndo ñana cha nahnu letra tyái chihin ndahi nu tutu ihya vityin.

¹² Ñu cha cuñí saniñí chi ndo vatyi sacuvi ndo costumbre circuncisión, saniñí ra chi ndo vatyi cuñí ra cuvaha ra nuu ñáyivi. Ña cuñí ra nyehe ra tindoho cha cuenda ra Cristo, ra chihí nu cruzi.

¹³ Vatyi ni maa ra cha sacuvi ra costumbre circuncisión cuan ta ña quichahá ra tandihí cha catyí ley. Soco cuñí ra cha sacuvi nyoho costumbre cuan. Vatyi tyicuan caa ta cuví sacahnu ra chi ra vatyi sacuvi ndo cuhva catyí ra.

¹⁴ Soco yuhu ña cuñí sacahni chii cha cuenda ñáá ndihí tuhun. Soco sii xaan cuñí cha chihí Sutu Mañi yo Jesucristo nu cruzi cha cuenda yuhu. Vatyi cha cuenda cha chihí ra nu cruzi, tari quivi cha yahá chihí cha quiñi caa cha iyó ñáyivi ihya. Ta cha yahá chihí tucu mai cha cuenda cuan.

¹⁵ Vatyi tatu nyicón yo chi ra Cristo Jesús, ña niñi xaan cha sacuvi yo costumbre circuncisión o cha ña sacuvi yo. Noo cha niñi ca, cha nanduví yo noo ñáyivi chaa.

¹⁶ Tandihí ndo cha iyó ndo tyehe caa, ñaquehen ndo cha taxi ri coo añima ndo. Ta na cundahvi cuñí ra nyehe ra chi tandihí ndo, ñu cha ndicha cuví ndo ñáyivi cuenda ra.

¹⁷ Cha vityin ta nu cuahán chi ityi nuu ca, ni nonga ndo ta ma cuhva ca ndo tisihi chii. Vatyi tandihí pehla cha nyaá coño ñuhi, cuñí chi catyi vatyi ndicha cha cuví yuhu noo ra chicá tyiño Sutu Mañi yo Jesús.

¹⁸ Yañi, Sutu Mañi yo Jesucristo na nasoco chi tandihí ndo. Ta tyicuan caa na cuví chi.

Carta Cha Sacuhun Ra Apóstol Pablo Chi ñáyivi Ñuu Éfeso Cha Yihí Cuenda Nyoo

*Nu sacuhún ra Pablo noo tutu chi ñu ñuu
Éfeso cha yihí cuenda Nyoo*

¹ Yuhu ra Pablo cuví noo apóstol ra Jesucristo. Vatyí yucuan cuhva cuñí maa Nyoo. Tyái noo carta ihya chí tandihí ndo cha yihí ndo cuenda Nyoo ñuu Éfeso chiña, ta ñí ñí ndo chinó ñí ndo chí ra Cristo Jesús. Ta ñn ri cuví ndo chihin ra.

² Na nasoco Nyoo ta Sutu Mañi yo Jesucristo chí ndo. Ta nacuhva ra cha taxi ri coo ñima ndo.

Cha ñn ri cuví yo chihin ra Cristo, Nyoo nasocó xaan ra chí yo

³ Na sacahnu yo chí Nyoo, ra cuví Sutu Sutu Mañi yo Jesucristo. Vatyí nasocó xaan ra chí yo chihin tandihí nuu cha vaha cha iyó andivi cha cuenda cha ñn ri cuví yo chihin ra Cristo.

⁴ Vatyí nyata ní cumañi ca savaha ra ñuhu ñáyivi ta nacachí vaha ra chí yo tyi cu ñn ri yo chihin ra Cristo. Vatyí tyicuan caa cundundí yo nuu ra chihin cha ñahri ca cuatyí yo. Cha cuenda cha cuñí ra chí yo,

⁵ ta nyata cha naha ta tyaá ra cuhva chí yo vatyí nanduvi sehe ra chí yo cha cuenda ra Jesucristo. Tyicuan caa sacuví ra vatyí yucuan cuhva cuñí maa ra.

⁶ Yucuan chaha tyicuan ri sacahnú yo chí ra. Vatyí vaha xaan ñáyivi cuví ra. Ta cahnu xaan tumañi ñí chahá ra chí yo. Vatyí sacu ñn ri ra chí yo chihin Sehe ra, ra cha cuñí xaan ra chí.

⁷ Ta cha cuenda cha cuñí xaan Nyoo chí yo, natavá ra chí yo ndaha ra ña vaha, tacuhva cha ma cutuñi chí yo. Vatyí chihin cha chati ñí Sehe ra, sandachí ra cuatyí yo. Ta tyicuan caa sahá Nyoo ticahnu ñí chí yo.

⁸ Ta vatyí cahnu xaan tumañi ñí sahá ra chí yo, chahá xaan ra cha chiñi tuñi ra chí yo.

⁹ Ta chahá ra cha cutuñi ñí yo tuhun ra cha ña chito ñáyivi. Vatyí sacotó ra chí yo yoso cuhva tyaá ra cuhva tyi sacuvi ra chihin tandihí cha iyó cha cuenda ra Cristo.

¹⁰ Vatyí coo quivi cuchino cava cha tyaá ra cuhva tyi sacuvi ra. Vatyí cusandu ñn ri ra tandihí cha iyó ihya ñáyivi ta cha iyó andivi, ta tandihí cucunyaa ndaha ra Cristo. Vatyí maa ra cucunyaca ñaha ra tandihí.

¹¹ Cha cuenda ra Cristo ñihí tucu maa yo cha tahán chí chí yo. Vatyí Nyoo nyata cha naha nacachí ra chí yo tyi cu ñn ri yo

chihin ra Cristo. Tyicuan caa tyaá Nyoo cuhva tyi cusacuvi ra. Ta maa ra sacuví tandihí yoso cuhva nyehé maa ra tyi vaha.

¹² Ta tyehe caa sacuví ra tacuhva vatyí nyuhu cha nachino ñí ndi chí ra Cristo cha xihna ri, coo ndi soco cha sacahnu ndi chí Nyoo cha cuenda cha cahnu cuví maa ra.

¹³ Ta tyicuan caa tucu nyoho. Vatyí quivi chiñi ndo tuhun Nyoo cha ndicha vaha, catyi ñu chí ndo tuhun ra Cristo yoso caa sacacú ra chí yo. Ta chingo ñí ndo chí ra. Ta ndu ñn ri ndo chihin ra. Ta tari cha tyaá Nyoo tuñi ra chí ndo cuví cuan, vatyí chaha ra Tatyí Ii ra cohon ñima ndo, tari cuhva catyi ra tyi sacuvi ra.

¹⁴ Ta ican maa Tatyí Ii cuví cha chaha quivi ri Nyoo chí yo tacuhva cuví naquehen ca yo cha cucuhva ra chí yo. Vatyí tyinyeé Tatyí Ii ra chí yo nyacua nya quivi ndihí sacacu ra chí yo, cha cuví yo ñáyivi chí ra. Ta tandihí ihya sacuví ra chihin yo tacuhva sacahnu yo chí ra. Vatyí maa ra cahnu ca ra cuví ra.

¹⁵⁻¹⁶ Yucuan chaha, cuhva cha chicán tahvi chí Nyoo, ña sandihí tuhun cha nacuhvé tyahvi nyoo chí ra cha cuenda ndo. Vatyí ñihí tuhun tyi chinó vaha ñí ndo chí Sutu Mañi yo Jesucristo. Ta cuñi xaan ndo chí tandihí ñu tahan yo ñu yihí cuenda Nyoo.

¹⁷ Chiquén chí Nyoo Sutu Sutu Mañi yo Jesucristo. Vatyí ican ra cuví ra cahnu ca. Ta chiquén chí ra nacuhva ra cha chiñi tuñi Tatyí Ii ra chí ndo, tacuhva cutuñi ñí ndo cha sañahá ra chí ndo. Vatyí cohon nuu vaha ca ndo chí ra.

¹⁸ Ta chiquén chí ra, na nuña ra cha chiñi tuñi xiñi ndo, na coto ndo ñáá cha cuñi ra cha naquehen ndo cha cuenda cha caná ra chí ndo. Ta na coto ndo ñana cha tyaqui ta tyayí cha chahá Nyoo chí yo ñu yihí cuenda ra.

¹⁹ Ta chiquén chí Nyoo tyi cuhva ra cha coto ndo ñana cha cahnu tunyee ñí iyó chí ra, nyacua ña cuví tyicuhva yo. Ta ican cuan tyinyeé chí yo cha chino ñí yo chí ra. Ta suri maa chihin tunyee ñí ihya

²⁰ Nyoo sanandoto ra chí ra Cristo. Ta cuatyaa ra chí ra chiyo vaha ra nya andivi.

²¹ Ta yucuan cuví nu sacahnú xaan ca Nyoo chí ra Cristo cha nuu tandihí ca cha nyacá ñaha siqui ñuhu ñáyivi ihya ta andivi ñandihí. Cuví ri tandihí rey, o cuví ri ra cuví tyiño nahnu, o cuví ri ángel andivi. Soco yori yóo ca ra cahnu ñáyivi ihya ta ñiri ñáyivi cha cua coo. Vatyí noo tuhun ri maa ra Cristo cuví ra cahnu cuví.

²² Ta tandihí cuí maa chaha Nyoo tyi cunyaca ñaha ra Cristo. Ta suri chí maa ra chaha Nyoo vatyí cuví ra xiñi o nuu chí ñu yihí cuenda ra.

²³ Vatyí yoó, cha yíhí yo cuenda ra, cuví yo coño ñuhu ra. Ta maa yo ta maa ra cuví chí noo coño ñuhu naní ra. Ta maa ra cuví ra sandunanií tandihi.

2

Sacacú Nyoo chí yo cha cuenda cha cuñí ra chí yo

¹ Nyoo chaha ra noo ñayiví chaa chí ndo tyi coo ndo quiví ndu ñin ri ndo chihin ra Cristo, vasi nicaa ni ñni ndo cuatyí quiví cuan. Ta tari maa cha chíhí añima ndo tyi ñahri maa ñayiví Nyoo chinyaá añima ndo.

² Ta chinyacuví ndo cuhva nyacuví ñáyiví ña ñohó nuu Nyoo. Ta chinyicon ndo chí cuihna ra cuví nuu. Ta ican ra cuví tatyí ña vaha cha tyiyuhú chí ñu ña quichahá nu cahán Nyoo.

³ Ta suri tyicuan caa chíyo tucu yoó quiví cuan. Vatyí chinyacuví yo cha ña vaha cha quichí cuví ñni yo cha cuñí coño ñuhu yo. Ta sacuví yo yoso cuhva chíca xiñi yo. Ta cha cuenda tuhun cha chinyacuví yo tahan chí tachi tuñi Nyoo chí yo inuu ri chihin tandihi ca ñu sacuví cha ña vaha.

⁴ Soco Nyoo cundahví xaan cuñi ra nyehe ra chí yo. Vatyí cuñi xaan ra chí yo.

⁵ Ta vasi cuaha xaan cuatyí yo quiví cuan, tari quiví cha chíhí añima yo chihin cuatyí cuan, soco Nyoo chaha ra cha conyito añima yo noo ñayiví chaa, vatyí sacú ñin ri ra chí yo chihin ra Cristo. Ta cha cuenda tumañi ñni cha saha Nyoo chí ndo ta cacú ndo.

⁶ Ta tari quiví cha sanandotó Nyoo añima yo quiví nandotó ra Cristo Jesús. Vatyí iyó yo noo ñayiví chaa cha chaha maa Nyoo tyi coo yo. Ta tari quiví cha cuatyaá ra chí yo andiví.

⁷ Ta sacuví Nyoo tyehe caa tacuhva vatyí nu cuahán ca chí quiví cusañaha ra chí tandihi ñáyiví yoso cuhva cha cahnu tumañi ñni chaha ra chí yo cha cuenda ra Cristo Jesús. Vatyí vaha xaan ñáyiví cuví ra chihin yo tyi sacú ñin ri ra chí yo chihin ra Cristo.

⁸ Vatyí cha sacacú Nyoo chí yo cuví chí noo cha chahá ra chí yo. Ta naquehén yo tumañi ñni cuan chihin cha chinó ñni yo chí ra. Ta cha sacacú Nyoo chí yo ñima noo cha cuví sacuví maa yo cuví. Vatyí yucuan cuví noo tumañi ñni cha sacuví ra chihin yo.

⁹ Ñima cha cuenda cha sacuví yo cha vaha ta cuita ñni yo cha sacacú cuan chí yo. Tyehe ta cuví chí tyicuan caa, cahnu cusaha yo chí yo.

¹⁰ Nyoo sacuví ra vatyí nduvahá añima yo chihin cha ndu ñin ri yo chihin ra Cristo Jesús. Ta sacuví ra tyehe caa tacuhva vatyí cuví sacuví yo cha vaha. Vatyí maa ra tyaa

ra cuhva nu quichi quiví vatyí tyicuan ri sacuví yo cha vaha.

Cuví ri yo ñu Israel, o cuví ri yo ñu inga ñuu, soco cha cuenda ra Cristo ñin ri ñáyiví chí Nyoo cuví tandihi yo

¹¹ Yucuan chaha ñicohon ñni ndo cuhva chíyo ndo nu quichí quiví, tyi cuví ndo ñáyiví cha ñima ñu Israel cuví. Ta catyí ñáyiví Israel tyi ñu cha ñima ri tuhun cuví ndo cha ña sacuví ndo costumbre circuncisión tari sacuví maa ra. Ta cha cuenda cuan cuñi maa ra Israel tyi vaha ra nuu Nyoo ta nyoho ña vaha ndo.

¹² Ñicohon ñni ndo vatyí nu quichi chí, yori ra Cristo chinyaá añima ndo. Ta ña ñin ri cuví ndo chihin ñu Israel. Ta ña chito ndo tuhun cha tyihí tahan Nyoo chihin ra Abraham: tuhun cha catyí Nyoo tyi cuhva ra cha ñicoo vaha yo chihin ra. Chíyo maa ndo ñuhu ñáyiví ihya chihin cha yori Nyoo nyaá chihin ndo, ta ña yihí ñni ndo cha cuñihi ndo.

¹³ Ta quiví cuan cañi xaan chinyaá ndo chihin Nyoo. Soco vityin ñin ri cuví ndo chihin ra Cristo Jesús. Maa ra Cristo chíhí ra. Ta chati ñni ra cha catyí ndo. Ta yucuan chaha cuví cuyatyn ndo nuu Nyoo.

¹⁴ Vatyí ra Cristo sanicoó vaha ra chí yo chihin Nyoo. Ta sandu ñin ri ra chí ñinduvi yo. Sandu ñin ri ra chí nyuhu cha cuví ndi ñu Israel chihin nyoho cha cuví ndo ñu inga ñuu. Ta sanduvahá ra cuhva iyó yo. Vatyí tari noo cha sanduvá ra noo nama vehe cha nanyaá mahñu, cha chasí nu cu ñin ri yo.

¹⁵ Maa ra Cristo sandihí ra tuhun ley chahnu chihin cha chaha cuenda ra coño ñuhu ra tyi cúvi ra nu cruzi. Vatyí tandihi ley cuan sasñin chí chí yo. Tyi nyuhu sacuví ndi costumbre cha catyí ley cuan. Ta nyoho ña sacuví ndo. Soco ra Cristo sandu ñin ri ra chí yo quiví chaha ra noo cuhva chaa tyi coo yo. Ta tyicuan caa sanicoó vaha ra chí yo.

¹⁶ Vatyí chíhí ra nu cruzi cha catyí cuatyí yo. Ta sacuví ra vatyí nanduvaha coo yo chihin Nyoo. Ta tyicuan caa sanaá ra cha ña cuñi nyehe yo chí tahan yo.

¹⁷ Ra Cristo quichí ra ta cahán ra tuhun vaha Nyoo chihin yo: chihin nyoho cha cañi ca chinyicu ndo chihin Nyoo ta chihin nyuhu ñu Israel, ñu chito tuhun Nyoo. Catyí ra chí yo vatyí na ñicoo vaha yo chihin Nyoo.

¹⁸ Vatyí chaha cha catyí cha chíhí ra Cristo cha cuenda yo cuví natuhva ñinduvi yo chí Nyoo Sutu yo. Vatyí noo ri Tatyí ñi ra nyaá añima yo: an cuví ri yo ñu Israel, an cuví ri yo ñu cha ñima ñu Israel cuví.

¹⁹ Yucuan chaha nyoho ña cuví ca ndo ñu inga ñuu. Soco nanduví ndo ñáyiví ñuu

Nyoo ñin ri chihin tandihí ñu yihí cuenda ra. Nanduví ndo ñáyivi chí ra.

²⁰ Ta cuví tucu ndo tari noo vehe. Ta ra apóstol, ta ra profeta, ra cachahá cuenda tuhun Nyoo cacuví ra tari ra catyihí yuu chaha vehe. Vatyí suri maa ra Cristo cuví yuu cha ñiñi ca cha yihí chaha vehe cuan.

²¹ Ta cha cuenda maa ra Cristo cuahan ndaa vehe cuan ta vehe cuan ican cuví maa yo ñin ri chihin ra. Ta cuahán sandu ñin ri ra chí tandihí yo ta nanduví yo tari noo vehe ñi nu nyaá maa Sutu Mañi yo.

²² Ta tyicuan caa tucu nyoho chihin tandihí ñu yihí cuenda Nyoo, nanduví ndo tari noo nu iyó Nyoo. Vatyí nyaá Tatyí li ra añima tandihí yo.

3

Nyoo tachí ra tyiño chi ra Pablo vatyí cahan ra tuhun ra chihin ñu cha ñima ñu Israel cuví

¹ Yucuan chaha yuhu ra Pablo ñohí vehe caa ihya vatyí sacoté tuhun ra Cristo Jesús chí nyoho cha ñima ñu Israel cuví ndo.

² Tahán chí natyihí tuñi ñiñi ndo tyi cahnu xaan tumañi ñi chahá ra chíi cha cuenda cha vaha chí ndo, tyi sacoté chí ndo.

³ Vatyí cha yaha catyí suhva chí ndo yoso caa sañahá Nyoo chíi noo tuhun xehe.

⁴ Ta tuhun cha sacuaaha ndo tuhun cha yahá catyí chí ndo, cuví coto ndo yoso caa chahá Nyoo tyi cutuñi ñiñi tuhun ra Cristo cha ña chitó ñáyivi.

⁵ Vatyí nu quichí chí, ña sañahá Nyoo chí ñáyivi, tari sañahá ra chí apóstol ta ra cacuví profeta cha vityin. Vatyí Nyoo chihin Tatyí li ra sañahá ra chí yo cha vityin.

⁶ Ta tuhun xehe cuan, ican cuví ihya: vatyí nyoho cha ña cuví ndo ñu Israel, ñin ri cha cutahan chí chí ndo chihin nyuhu cha cuví ndi ñu Israel. Vatyí noo ri coño ñuhu ra Cristo cuví yo. Ta cuñihí yo cha catyí Nyoo tyi cuhva ra chí yo cha cuenda maa ra Cristo Jesús.

⁷ Sahá Nyoo tumañi ñiñi chí yuhu vatyí chahá ra tunyee ñiñi ra chíi tyi sacoté tuhun vaha ihya chí ñáyivi.

⁸ Soco cha cuenda chí yuhu cuví noo ra luhlu, noo ra ndahvi ca cha nuu tandihí ca ñu yihí cuenda Nyoo. Soco sahá Nyoo tumañi ñiñi ihya chíi. Vatyí tacuhva cahin tuhun ra Cristo chihin ñu cha ñima ñu Israel cuví. Ta sacoté chí ñu ñana cha tyayii cha cuñihí ñu cha cuenda ra Cristo.

⁹ Tyatyíño Nyoo chíi tyi sacote chí tandihí ñáyivi yoso caa tyaa ra cuhva nyata ni cumañi ca savaha ra tandihí cha iyó. Ta cha naha ña chahá Nyoo cha coto ñáyivi tuhun ihya.

¹⁰ Tyicuan caa cuví tacuhva vatyí vityin tandihí ra nyacá ñaha andiví cunyehe yoso caa cha vaha cha sacuví Nyoo chihin yo

cha cuví yo ñu yihí cuenda ra. Ta cucoto ra tyi chíiñi tuñi xaan Nyoo.

¹¹ Tandihí ihya chachí tahan chihin cha tyaa Nyoo cuhva tyi sacuví ra chihin Sutu Mañi yo Jesucristo cha cuenda cha vaha chí yo.

¹² Ta cha cuenda maa ra Cristo iyó chí ityi chí yo cha chaá yo nuu Nyoo chihin cha ña yuhví yo. Vatyí chinó ñiñi yo chí ra Cristo.

¹³ Yucuan chaha chacú ndahvi nuu ndo tyi ma ndu uvi ñiñi ndo chí Nyoo cha nyehi tindoho cha cuenda ndo. Vatyí cuví chí cha cuenda cha vaha chí maa ndo. Ta cusiñi cuñi ndo cha cuenda ihya.

Chicán tahvi ra Pablo chaha ñu, na cohon nuu ca ñu chí ra Cristo

¹⁴ Yihí ñiñi yoso cuhva cha vaha cha tyaa Nyoo Sutu yo cuhva tyi cuhva ra chí yo. Ta yucuan chaha chicuñi chíi nuu ra.

¹⁵ Maa ra cuví ra Sutu tandihí ñáyivi cuenda ra: ñu cha cuahan coyo andiví, ta ñu cha iyó ca siqui ñuhu ñáyivi. Tandihí yo cuví yo ñáyivi chí ra.

¹⁶ Ta chíquén chí ra na sandunyee ra ñiñi ndo chihin Tatyí li ra cha nyaá añima ndo. Vatyí maa ra cahnu xaan ca cha tyayii ra chahá ra chí yo.

¹⁷ Ta na coo ra Cristo añima ndo vatyí chinó ñiñi ndo chí ra. Ta coo ndo chihin cha cuñi Nyoo chí ndo. Vatyí tari yihí vaha yoho noo yutun chichí ñuhú, tyicuan caa cunyaa vaha añima ndo chihin Nyoo.

¹⁸ Tyicuan ta cuacoo tunyee ñiñi ra chí ndo tacuhva cuví cutuñi vaha ñiñi ndo chihin tandihí ñu yihí cuenda ra vatyí cuñi xaan ra Cristo chí yo. Nyacua ña ñihí ca yo cuhva catyí yo yoso cuhva cha cuñi ra chí yo.

¹⁹ Vatyí yaha xaan cahnu cuan. Nyacua ma cuví cohon nuu yo yoso cha cuñi ra chí yo. Soco cuñi cha nacoto ndo yoso cha cuñi ra chí yo. Tyicuan ta ñahri ca cumañi chí ndo. Vatyí Nyoo nyaá maa ra chihin ndo.

²⁰ Ta vityin na sachahu yo chí Nyoo, ra cha iyó xaan ca tunyee ñiñi chíi. Vatyí cuaha vavaha ca cha cuví sacuví ra cha nuu cuhva cha chicán maa yo chí ra o cha nuu cuhva cha chicá xiñi yo. Vatyí suri chihin tunyee ñiñi ra cha iyó chí yo, sacuví ra tandihí.

²¹ Yoó ñu chino ñiñi chí Nyoo, na sachahu yo chí ra tyicuan ri maa, ta tandihí tyembu cha cuenda cha sacuví ra Cristo Jesús. Ta na cuví chí tyicuan caa.

4

Cha cuenda Tatyí li Nyoo ñin ri cuví tandihí yo cha yihí yo cuenda ra Cristo

¹ Yucuan chaha yuhu cha ñohí vehe caa cha cuenda Sutu Mañi yo chacú ndahvi nuu ndo na cachi coo ndo tari cuhva tahán chí coo ñu cha nacanañ Nyoo chíi. Vatyí chí

nyoho nacanā Nyoo tyi cuví ndo ñáyivi chi ra.

² Ndahvi sáha ndo chi ndo. Ta vaha çahan ndo chihin ñáyivi. Cama çuvi iñi ndo. Ta çunyee ndo ñáá cha sahá noo noo tahan ndo chi ndo chihin cha cuñi ndo chi ñu.

³ Nduçu ndo cuhva cha tyicuan ri cu iin ri ndo chihin tahan yo. Vatyí maa Tatyí li Nyoo tyinyeé chi yo, na coo vaha yo chihin tahan yo.

⁴ Vatyí iyó noo ri coño ñuhu ra Cristo. Ta ican cuan cuví tandihí yo. Ta tari cha noo ri Tatyí li Nyoo iyó, tyicuan caa tucu iyó noo cha chitó cachi yo tyi cunaquehen yo tyi nacanā ra chi yo.

⁵ Ta iyó noo ri Sutu Mañi yo nyacá ñaha chi yo. Ta noo ri chi maa ra chinó iñi tandihí yo. Ta noo ri cha cuenda maa ra condutya yo.

⁶ Ta noo ri Nyoo iyó ta maa ra cuví ra Sutu tandihí yo. Ta maa ra nyacá ñaha chi tandihí yo. Ta chotyíñó ra chi tandihí yo yoso cuhva cuñi maa ra. Ta nyaá ra añima tandihí yo.

⁷ Chaha ra Cristo noo cuhva chi noo noo yo, vatyí sacuvi yo tyiño nuu ra yoso cuhva cuñi maa ra cuhva ra.

⁸ Yucuan chaha çahan Nyoo tuhun ra Cristo nu catyí chi:

Cuví çasaha ra chi ra xaan iñi chi ra, ta nandaq xica ra andiví chihin ñu tavā ra ndaha ra ña vaha.

Ta chaha ra cuhva yoso cuhva cusaha tyiño ñu tyiño nuu ra, catyí chi.

⁹ ¿Ta ñáá cha cuñi chi catyí cha nandaq xica ra cuan? Cuñi chi catyí vatyí noq xihna ra nya yuvi ca nu ñuhu ñáyivi.

¹⁰ Ra cha noq cuan, nandaq tucu ra nya nu sucun ca andiví. Vatyí tyicuan caa ta cuví sacutu ra tandihí maa ta cunyaa ra chihin yo tandihí ityí.

¹¹ Ta suri maa ra Cristo chaha ra cha vaha chi yo. Chi suhva yo chaha ra tyi cuví yo apóstol ra. Ta chi inga yo chaha ra cha cuhva cuenda yo tuhun cha chahá ra chi yo, o saha yo profetizar cuví cuan. Ta chi inga yo chaha ra tyi sacoto yo chi ñáyivi yoso caa sacacú ra añima yo. Ta chi inga yo chaha ra cha quihí ndaha yo chi ñu yihí cuenda ra, ta chi inga yo chaha ra cha cuví sañaha yo tuhun ra chi ñu.

¹² Tyicuan caa chaha Nyoo tyiño chi yo vatyí cunyaa yo tyiño cha sandunyeé yo iñi tahan yo vatyí cuví yo coño ñuhu ra.

¹³ Nyacua nya cu iin vaha tandihí yo cha cuenda cha chinó vaha iñi yo chi Sehe Nyoo. Ta çohon nuu vaha yo chi ra. Tyicuan caa ta cutu yo chihin tandihí cha vaha cha chaha ra Cristo chi yo.

¹⁴ Yucuan ta ma cuví ca yo tari ra cuatyaa. Vatyí totyehe ri chino iñi ndotyin ñáá noo tuhun cha ñima ri tuhun sandaví ñaha ñu chi ndotyin. Ta coto cutondo xiñi yo tyicuan caa chihin tuhun cha ña ndicha cha sañahá ñu sandaví ñaha.

¹⁵ Soco cha nuu cha cuví yo tari ra cuatyaa, cuñi chi cha çahán yo cha ndicha chihin cha cuñi yo chi Nyoo ta chi ñáyivi. Ta ndunyeé ca añima yo chihin ndii cha vaha cha iyó chi Nyoo. Ta cuahnu yo chihin ra Cristo, cha cuví ra nuu chi yo.

¹⁶ Ta cha cuenda ra Cristo tandihí yo cha cuví yo coño ñuhu ra, iin ri cuví yo. Tari yihí tahan noo coño ñuhu, ta sahá tyiño tahan tahan nu yihí tahan chi, yoso cuhva tyiño cha çahán chi chi, ta tyicuan caa tyinyeé chi chi coño ñuhu, na coo vaha chi ta cuahnu chi, ta tyicuan caa yoó, cuñi yo chi tahan yo ta tyinyeé yo chi ñu.

Ñáyivi chaa cha tahán chi coo yo cha cuenda ra Cristo

¹⁷ Ican ihya cuví cha çahí cuenda chi ndo, catyí Sutu Mañi yo. Ta cuñi chi cha quichaha ndo. Ma coo ca yo tari iyó ñu ña ñohó nuu chi Nyoo. Vatyí maa ri maa cha chiñi tuñi tondo chicá xiñi ñu.

¹⁸ Ta ña cutuñi iñi ñu, tyí ñima ñáyivi Nyoo iyó ñu. Vatyí ña chitó ñu, cha cuenda cha ndava añima ñu.

¹⁹ Ña çahán ca nuu ñu cha sacuvi ñu cha ña vaha. Ta nacuhvā cuenda ñu chi ñu chi cha quiñi caa. Cuaha xaan cha ña vaha quichi cuví iñi ñu.

²⁰ Soco ñima tyicuan caa cutuhvā yo. Vatyí ñima tyicuan caa cuhva iyó ra Cristo.

²¹ Tatu ndicha tyi chiñi yo cha çahan ra chihin yo, ta cutuhvā yo cha ndicha cha sañaha ra chi yo,

²² ma coo ca yo cuhva chiyo yo quiví cuan. Vatyí chiyo yo ñáyivi çahnu quiñi caa. Vatyí cha quichi cuví iñi yo sandaví ñaha chí chi yo.

²³ Naçuhva cuenda yo chi yo chi Nyoo na nasama ra cuhva chicá xiñi yo.

²⁴ Ta naçoo yo noo ñáyivi chaa chihin noo añima chaa cha savahá Nyoo. Ta cuví yo noo ñu vaha cha ndicha ndicha, noo ñu cachi iyó nuu Nyoo tari maa ra.

²⁵ Yucuan chaha ma çahan ca yo cuendu. Çahan yo maa maa ri cha ndicha chihin tahan yo. Vatyí iin ri ñáyivi cuví yo.

²⁶ Tatu cuxaan yo, saha yo cuenda coto sacuvi yo cha ña vaha. Ta suhva ri cuhva cuxaan yo. Ma cuxaan yo ndiyaca.

²⁷ Ta ma cuhva yo cuhva chi ra ña vaha.

²⁸ Ra cha tuhvā suhu quiví cuan, ma suhu ca ra vityin. Soco saha tyiño vaha ra chihin ndaha ra. Tyicuan caa ta coo cha chíi ra, tacuhva cuví tyinyee ra chi ñu cha chiñuhú chíi.

²⁹Ma cahan yo cha quiñi caa. Cahan yo, soco maa ri cha vaha cha tyinyee ta sacuahnu chi ñu chiñi tuhun cahan yo.

³⁰Ta ma cuhva yo tucuihya iñi chi Tatyí Ii Nyoo. Vatyí chaha Nyoo Tatyí Ii ra chi yo tari noo tuñi ra tyaq ra añima yo nyacua nya quivi ndihi sacacú ra chi yo.

³¹Ta ma xaan cuñi yo. Ta ma cuxaan yo. Ta ma quihi tisihi iñi yo. Ma cana chaa yo siqui tahan yo. Ma cahan uhvi yo chi tahan yo. Ta ninoo cha ña vaha ma caca xiñi yo.

³²Soco vaha ñáyivi cuvi yo chihin tahan yo. Ta cundahvi cuñi yo nyehe yo chi ñu. Ta saha yo ticahnu iñi chi ñu, tari Nyoo sahá ra ticahnu iñi chi maa yo cha cuenda ra Cristo.

5

Yoso caa tahán chi coo ñáyivi yihí cuenda Nyoo

¹Yucuan chaha nanducu yo cuhva coo yo tari cuhva iyó maa Nyoo. Vatyí sehe ra cuví chi yo. Ta cuñi xaan ra chi yo.

²Vita cuvi iñi yo. Cuñi yo chi tahan yo, tari ra Cristo cuñi ra chi yo. Ta tari noo mbee luhlu cha tuhva tata sutu cachaha ra chi Nyoo ta cha naha, tyicuan caa chaha cuenda ra Cristo chi ra cha cuenda yo. Ta sii xaan cuñi Nyoo cha cuenda cha chaha cuenda ra chi ra.

³Soco vityin cha cuví yo ñáyivi yihí cuenda Nyoo, ña tahán chi sacuví yo cha quiñi caa chihin coño ñuhu yo. Ni ña tahán chi cha cahan yo cha quiñi caa. Ta ni ma nyiyo iñi yo.

⁴Ma cahan yo tuhun cha chahá ticahan nuu. Ni ri ma cahan yo noo tuhun cha ñima ri tuhun. Vatyí ña tahán chi cahan yo cha tyicuan caa. Soco cha nuu cha cahan yo cha ña tahán chi, na nacuhva yo tyahvi nyoo chi Nyoo.

⁵Vatyí cha chitó yo vatyí tandihi ñu cha sacuví cha quiñi caa, ma quihvi ñu nu nyacá ñaha ra Cristo chihin Nyoo. Ra iyó chihin ñasihi ta ñima ñasihi ra cuví, o ñu iyó chihin rayi ta ñima yii ñu cuví, ñu nyiyó iñi, ma quihvi ñu nu nyacá ñaha Nyoo. Vatyí cha nyiyó iñi yo tari cha sacahnú yo xitohyo cuví cuan. Vatyí tavá xiin yo chi Nyoo.

⁶Ma cuhva yo cha sandavi ñaha ñáyivi chi yo chihin tuhun cha ña ndicha, tuhun cha ñima ri tuhun. Vatyí tachí tuñi Nyoo chi ñu cha ña quichahá chi ra.

⁷Ta ni ma cutahan yo chihin ñu cuan.

⁸Vatyí chiyo yo nu ñaa iñi quivi cuan. Soco vityin iyó yo nu ndichin chihin Nyoo. Cachi coo yo tari tahán chi coo ñu chitó tuhun Nyoo.

⁹Vatyí Nyoo sacundichín ra añima yo tacuhva cuvaha añima yo ta sacuví yo cha vaha ta cha ndicha.

¹⁰Saniñi yo cutuhva yo cuhva tahán iñi Sutu Mañi yo.

¹¹Ma sacuvi yo cha nyacuví ñu nyicú nu ñaa iñi. Vatyí ñahri cha vaha ñihí ñu chihin cuan. Soco sacoto yo chi ñáyivi tyi ña vaha cuan.

¹²Vatyí cahan nuu yo cha cahan yo tuhun cha nyacuví ñu cuan cha xehe ri.

¹³Soco quivi quita cha ñohó xehe nu ndichin, tyicuan ta cucoto yo cha ndicha. Vatyí cha ndichin Nyoo sanatuví tandihi cha ñohó xehe.

¹⁴Yucuan chaha iyó nu catyí chi:

Yoho cha quixun, ndicuita mahñu nu nyicú ñu chihí chiña.

Ta ra Cristo cusacata ra ñuhu nu cuahún, catyí chi.

¹⁵Yucuan chaha saha yo cuenda cuhva iyó yo. Ta ma coo yo tari noo ra soho. Coo yo tari noo ra chitó.

¹⁶Ma sacunaa yo quivi yo. Na cahan yo tuhun Nyoo chihin ñáyivi. Vatyí vityin quiñi xaan caa ñáyivi iyó yo, ta ña naha ca iyó yo.

¹⁷Yucuan chaha ma tondo xaan cohon iñi yo. Soco nandichi xiñi yo cuhva cuñi maa Sutu Mañi yo tyi sacuvi yo.

¹⁸Ma coho yo ndixi. Vatyí ican cuan sativí chi yo. Soco cuhva yo na cunyaca ñaha vaha Tatyí Ii Nyoo añima yo.

¹⁹Cahan yo chihin tahan yo soco chihin cha sacahnú yo chi Nyoo. Çata yo salmo cuenda ra. Çata yo yaa cha chahá Tatyí Ii chi yo. Saçahnu yo chi Sutu Mañi yo chihin cha tandihi añima yo.

²⁰Tyicuan ri nacuhva yo tyahvi nyoo chi Nyoo Sutu yo cha cuenda tandihi maa, vasi sii cuñi yo, vasi nyehé yo tindoho. Nacuhva yo tyahvi nyoo chi ra chihin sivi Sutu Mañi yo Jesucristo.

Na coo vaha yo chihin tahan yo cuenda ra Cristo, catyí ra Pablo

²¹Quichaha yo nu cahan inga tahan yo cuenda ra Cristo. Vatyí sahá yo ñáyivi chi ra Cristo.

²²Nyoho ñu iyó yii quichaha ndo cha cahan Sutu Mañi yo. Ta tyicuan caa tucu quichaha ndo nu cahan yii ndo.

²³Vatyí rayi ican ra cuví nuu chi ñasihi ra, tari cuhva cuví ra Cristo nuu chi ñu yihí cuenda ra. Ta suri maa ra sacacú ra chi yo cha cuví yo coño ñuhu ra.

²⁴Soco tari tahán chi cha quichahá ñu yihí cuenda ra Cristo chi ra, tyicuan caa cuñi tucu chi cha quichahá ñasihi tandihi cha catyí yii ñu.

²⁵Ta rayi cuñi chi cha cuñi ra chi ñasihi ra, tari cuñi ra Cristo chi yo cha yihí yo cuenda ra. Ta chaha ra ñáyivi ra cha catyí yo.

²⁶ Tacuhva vatyi sandundii ra ańima yo. Ndii ańima yo vatyi nacatya ra quivi cha nachino ińi yo tuhun cahán ra ta condutya yo.

²⁷ Ndoq ańima yo tari ndoq noo sahma, ńa yacua ca chi, ńa tiyi ca chi. Vatyi ra Cristo sandundii ra chi yo cha cuvı yo ńu yihi cuenda ra. Tacuhva cuvı nacuhva cuenda ra chi yo chi Nyoo, soco vaha yo, ńahri ca cuatyi yo.

²⁸ Ta tyicuan caa tucu cuńi chi cha cuńi rayii chi ńasihı ra, tari cha cuńi ra chi cońo ńuhu ra. Vatyi tatu cuńi ra chi ńasihı ra, tari cha cuńi ra chi maa ra cuvı cuan.

²⁹ Vatyi yori noo yo cha ńa cuńi nyehe yo chi cońo ńuhu yo. Soco sacachi yo ta sacuihnó yo chi cońo ńuhu yo. Ta ra Cristo suri tyicuan caa sacuvı ra chihin ńu yihi cuenda ra.

³⁰ Vatyi cońo ńuhu ra cuvı yo. Ta noo noo yo cuvı yo suhva cońo ńuhu ra ta yiqui ra.

³¹ Catyi tuhun Nyoo: “Rayii sandoó ra chi sutu ra ta chi sihi ra. Ta ndu ın ri ra chihin ńasihı ra. Ta noo ri nanduvı ńu.”

³² Ta yuhu vatyi vatyi ihya cuvı noo tuhun xehe cha cahnu xaan. Ta cuńi chi catyi tyi ra Cristo ndu ın ri ra chihin ńu yihi cuenda ra.

³³ Ta siin ri cuńi tucu chi catyi vatyi tahan tahan ndo cuńi ndo chi ńasihı ndo, tari cuńi ndo chi maa ndo. Ta nyoho cha cuvı ndo ńusihı, saha ndo ńayivi chi yi ndo.

6

¹ Nyoho cha cuvı ndo sehe, tahán chi cha tyasoho ndo nu cahán sutu ndo ta sihi ndo. Vatyi cuńi ndo chi Nyoo.

²⁻³ Nu tutu Nyoo nyaá cha xihna ri sacuvı yo ta nańihı yo cha cucuhva Nyoo chi yo. Catyi chi: “Saha ndo ńayivi chi sutu ndo, chi sihi ndo. Tyicuan caa ta si xaan cuacoo ndo. Ta naha xaan cuacoo ndo ńayivi ihya”, catyi Nyoo.

⁴ Ta nyoho cha iyó sehe ndo, ma nanducu ndo cha cuxaan sehe ndo. Soco sańaha ndo tuhun Nyoo chi ńu, ta yoso caa quichaha ńu chi ndo ta chi Nyoo.

⁵ Ta nyoho cha cuvı ndo musu, quichaha ndo chi chitoho ndo siqui ńuhu ńayivi ihya. Saha ndo ńayivi chi ńu. Quichaha ndo chi chitoho ndo chihin cha ni ińi ndo. Tatu sacuvı ndo tyicuan caa, chi ra Cristo quichahá ndo cuvı cuan.

⁶ Ma saha tyińo ndo cuhva cha nyehe ri chitoho ndo tacuhva vatyi catyi ńu tyi vaha ndo. Soco saha tyińo vaha ndo tari cha vatyi sacuvı ndo tyińo nuu ra Cristo. Ta tyicuan caa sacuvı ndo cuhva cuńi Nyoo chihin cha ni ańima ndo.

⁷ Chihin cha iyó vaha ińi ndo sacuvi ndo. Tari cha sahá tyińo ndo nuu Sutu Mańi yo ta ńima nuu ńayivi.

⁸ Vatyi cha chitó yo tyi tahan tahan yo, an cuvı ri yo musu, an ńima, soco cutyiyahvi Sutu Mańi yo chi yo yoso cuhva cha vaha cha chinyacuvı yo.

⁹ Ta nyoho cha iyó musu ndo, suri vaha cgo ndo chihin musu ndo. Ta ma sayuhvi ndo chi ńu. Vatyi chitó ndo tyi ńa cahnu ca maa ndo cha nuu musu ndo. Inuu ri cuvı ndo nuu Nyoo ra cuvı chitoho yo nya andivi. Vatyi maa ra ńa cachi ra chi yo.

Tunyee ińi cha chahá Nyoo chi yo cha yihi yo cuenda ra

¹⁰ Ta vityin sandunyeeyo yo ińi yo chihin cha ın ri cuvı yo chihin Sutu Mańi yo. Vatyi iyó xaan tunyee ińi chi ra.

¹¹ Ta tari noo sindaro sahá cuenda ra chi ra, tyicuan caa tucu yoó, nasaha cuenda vaha yo chi yo chihin tandihı cha cuvı tyinyee Nyoo chi yo. Tyicuan caa ta cuvı chasaha yo chi cuihna. Vatyi nducú xaan ra cuhva sandavi ńaha ra chi yo.

¹² Tyicuan caa coo yo chihin tunyee ińi Nyoo. Vatyi ńima chihin ńayivi cańi tahan yo. Soco cańi tahan yo chihin tatyi ńa vaha cha ńa nyehé yo. Vatyi ıcan cuan cuvı cha nyacá ńaha chi ńayivi cha nyacuvı cha quıńi caa.

¹³ Yucuan chaha saha cuenda vaha yo chi yo chihin tandihı cha cuvı tyinyee Nyoo chi yo, tacuhva cuvı chasaha yo chi ra ńa vaha ńáá quivi nducu tiin ra chi yo. Coto cana cava yo saha ra.

¹⁴ Tari noo sindaro ńihı nanyaá ra chihin noo sincho yihi chichi ra, tyicuan caa ńihı cuinanyaa yo chihin tuhun cha ndicha vaha. Tari cacú noo sindaro vatyi tyaá ra noo caa pecho ra, tyicuan caa Nyoo cusacacu ra chi yo ndaha ra ńa vaha, tatu maa ri cha vaha sacuvı yo.

¹⁵ Ta tari natyihı sindaro bota chaha ra ta nyatú tuhva ra cha cuhun ra cuatyi, tyicuan caa cuatu tuhva yo chihin tuhun Nyoo. Na sacoto yo chi ńayivi yoso caa nicoo vaha ńu chihin ra.

¹⁶ Ta tari sindaro chası ra chi ra chihin noo caa tacuhva ma nańi nduva chi ra, tyicuan caa cuńi chi nachino vaha ińi yo chi Nyoo tacuhva cha cuvı chasaha yo tandihı cha sacuvı ra ńa vaha chi yo.

¹⁷ Ta tari sahá cuenda sindaro xińi ra chihin noo caa, tyicuan caa nacuhva cuenda yo chi yo chi Nyoo, na sacacu ra chi yo. Ta naquehen yo tuhun cha chahá ra chi yo. Vatyi tari noo mityi Tatyi Ii ra cuvı tuhun cuan. Vatyi chihin tuhun ra sahá ganaa yo chi cuihna.

¹⁸ Ta nyita ri cahan yo chihin Nyoo. Ta Tatyi Ii ra cuatyinyee chi yo tacuhva cacan

tahvi yo chi ra. Ta cuacu ndahvi yo nuu ra. Ta tyicuan caa cuatu tuhva ri yo. Ta mandu uvi iñi yo. Tyicuan ri çacan tahvi yo cha cuenda tandihí ñu yihí cuenda Nyoo.

¹⁹ Ta ñacuatu tucu ndo चाहि, tacuhva vatyí ñihí que tuhun cahin. Ta ma yuhvi sacote tuhun ra Cristo chí ñáyiví. Vatyí ta cha naha ña chito ñáyiví tuhun ra.

²⁰ Ta cha cuenda cha sacoté tuhun ra Cristo ñohí vehe caa ihya vityin. Soco Nyoo tachí chí vatyí cahin tuhun ra chíhin ra nyicú vehe caa ihya. Çacan tahvi ndo cha cuende, tacuhva cuví cahin chíhin cha ña yuhví, tari cuhva tahán chí cahin.

Tachí ra Pablo chí ra Tíquico tyi cuhun ra nu nyicu ñu

²¹ Ta ra Tíquico yañi yo, cunacatyí ra tandihí tuhín chí ndo. Maa ra ñi iñi ra sahá tyiño ra cuenda Sutu Mañi yo. Ta cuñi xaan yo chí ra.

²² Tachí chí ra nu nyicú ndo tacuhva sacoto ra chí ndo yoso caa iyó ndi ihya, tacuhva nduní ca iñi ndo chíno iñi ndo chí Nyoo.

²³ Ta Nyoo Sutu yo ta Sutu Mañi yo Jesucristo nacuhva ra cha taxi ri coo añima tandihí ra yañi yo. Ta na cuhva Nyoo cha chinó vaha iñi ra chí ra. Ta vityin suri Nyoo ñacuhva ra cha cuñí ca ra chí ra ta chí ñáyiví.

²⁴ Ta na nasoco ra chí tandihí yo cha nyita ri cuñí yo chí Sutu Mañi yo Jesucristo chíhin cha ñi iñi yo. Ta ñacuví chí tyicuan caa.

Carta Cha Sacuhun Ra Apóstol Pablo Chi Ñáyivi Ñuu Filipos Cha Yihí Cuenda Nyoo

*Ñohó ra Pablo vehe caa, ta tyaá ra noo carta
chi ñu yihí cuenda Nyoo ñuu Filipos*

¹ Yuhu ra Pablo ta ra Timoteo sacuví ndi tyiño nuu ra Jesucristo. Ta tyaá ndi carta ihya chi tandihí ndo cha cuví ndo ñu ñuu Filipos cha yihí cuenda Nyoo. Ta chi ra cayihí ndaha vehe ñuhu, ta chi ra canyehe tyiño vehe ñuhu, ta chi tandihí ndo.

² Na nasoco Nyoo Sutu yo ta Sutu Mañi yo Jesucristo chi ndo. Ta nacuhva ra cha taxi ri coo añima ndo.

*Nu chicán tahvi ra Pablo chaha ñu yihí
cuenda Nyoo ñuu Filipos*

³ Tahan ri cha nicohón iñi chi ndo, nacuhvá xain tyahví nyoo chi Nyoo cha cuenda ndo.

⁴ Ta chicán tahvi chi Nyoo cha cuenda ndo chihin cha sii cuñí añime.

⁵ Vatyí nyata quívi xihna ri cha chiñi ndo tuhun ra Cristo ta nya vityin ta ña sandihí ndo tuhun cha tyinyeé ndo chii. Vatyí ñin ri tuhun ra Jesucristo sacotó yo chi ñáyivi.

⁶ Quívi naquehen cuenda Nyoo añima ndo, maa ra chahá tunyee iñi chi ndo, na sacuví ndo tyiño nuu ra. Ta chité tyi tyicuan ri cuacuhva ra chi ndo nyacua nya quívi quichi ra Cristo inga chaha.

⁷ Tahan chi cha caca xiñi tyehe caa cha cuenda ndo, vatyí cuñí xain chi ndo. Vatyí ñin ri nasocó Nyoo chi yo. Vasi ñohí vehe caa, o vasi nanyái nuu ra cuví tyiño, soco sacoté tuhun Nyoo chi ra canyicú vehe caa ihya, ta chi ra cuví tyiño, na cacoto ra tyi ndicha tuhun ra Cristo.

⁸ Nyoo chitó ra vatyí cuñí xain chi tandihí nyoho tari cuñí ra Jesucristo chi ndo.

⁹ Ta chicán tahvi xain chi Nyoo na cuvita ca iñi ndo, ta cuñi ca ndo chi ñáyivi. Ta suri coo ca cha chiñi tuñi Nyoo chi ndo,

¹⁰ tacuhva vatyí tyicuan ri coto ndo nacachi ndo cha vaha ca. Ta tyicuan caa ta cachi coo ndo ta ma coo ca cuatyí ndo quívi quichi ra Cristo.

¹¹ Maa ra cutyinyee ra chi ndo. Ta tyicuan ri cusacuví ndo maa maa ri cha vaha, ta cha ndaa. Tyicuan caa ta cusacahnu ñáyivi chi Nyoo tyi cahnu xaan ca cuví maa ra ta sacuví ra tyicuan caa chihin ndo.

*Maa maa ri tyiño Nyoo sacuví ra Pablo vatyí
ñohó ra Cristo añima ra*

¹² Ta cuñí tyi coto ndo yañi vatyí tandihí cha cuví chii tyinyeé xaan chi chii nu cahín tuhun Nyoo chihin ñáyivi.

¹³ Vatyí chitó tandihí sindaro vehe rey ta tandihí inga ñáyivi ihya vatyí ñohí vehe caa cha cuenda cha nyiquén chi ra Cristo.

¹⁴ Ta cuaha xaan ra yañi yo cuenda Sutu Mañi yo cuní ca iñi ra cha cuenda cha ñohí vehe caa. Ta naá cha yuhvi ra vatyí cachitó ra vatyí tyinyeé Nyoo chi yo. Ta ñihi ca cacahán ra tuhun Nyoo chihin ñáyivi.

¹⁵ Ta ndicha vatyí yihí ra, cahán ra tuhun ra Cristo soco cha cuenda cha tasi cuñí ra nyehé ra chii, o cuñí ra na cunyicon ñáyivi chi ra. Soco yihí ra cahán ra tuhun ra Cristo chihin ñáyivi, soco chihin cha vaha chicá xiñi ra.

¹⁶ Yihí ra cacahán ra tuhun ra Cristo cha cuenda cha cuñí ra chi ra. Vatyí chitó ra vatyí maa Sutu Mañi yo quichi nyaca ra chii ihya. Vatyí cotyíño ra chii, ta sacoté chi ñáyivi tyi ndicha cha sacacú ra añima yo.

¹⁷ Soco inga ra cuan ñima cha ñi iñi ra cahán ra tuhun ra Cristo, soco cuñí ra cuhva ra tisihi chii nu ñohí vehe caa ihya.

¹⁸ Soco cha cuenda chi yuhu ñahri saha, vasi sacuví ra chihin cha vaha chicá xiñi ra o chihin cha ña vaha. Soco tuhun ra Cristo ican casacotó ra. Ta sii xaan cuñí cha cuenda cuan.

¹⁹ Ta cusii ca iñi vatyí chité vatyí chichi cha tandihí cha cuví chii. Nyoo cuasacacu ra chii. Tyahvi nyoo chi Nyoo vatyí chicán tahvi xaan nyoho cha cuende nuu Nyoo. Ta tyinyeé xaan Tatyí Ii ra Cristo chii.

²⁰ Chitó vahí vatyí Nyoo cutyinyee ra chii cha ma cucahan nui, ta ma yuhví cahín chihin cha ñi iñi tuhun ra Cristo. Ñahri cuende, an coo que ñáyivi, an cúvi, soco cuñí vatyí vityin ta ityi nuu ca saha ñáyivi cuenda cuhva iyé ta coto ñu tyi ra Cristo cahnu ca cuví ra.

²¹ Vatyí cha cuenda yuhu tatu iyé, sacuví tyiño nuu ra Cristo ihya siqui ñuhu ñáyivi. Soco tatu cúvi, cuñihi cha tyaqui cha iyó andívi.

²² Soco tatu iyó que, vaha xaan. Vatyí sahá tyiño que cha cuenda cha vaha maa Sutu Mañi yo. Yucuan chaha ña chité nya ityi kuhin, an kuhin ityi andívi, an kuhin cucahan que tuhun Nyoo chihin ñáyivi, ña chité.

²³ Yii xaan cote nya cha cuñí, vatyí iyó quívi cuñí cha coo que. Soco iyó quívi ña cuñí. Vatyí cha cuñí cunuhi cucunyai chihin ra Cristo. Vatyí vaha ca cuan.

²⁴ Soco cha cuenda cha vaha chi nyoho, vaha ca cha ndoi chihin ndo.

²⁵ Yucuan chaha chité vatyí cundoi suhva ca ñáyivi ihya. Vatyí cuñí chi cha tyinyeé que chi ndo tacuhva cuví cuhun ca

ndo ityi nuu ca ta cu si# cuñi ndo chihin cha chinó iñi ndo chi Nyoo.

²⁶ Ta quivi cunyehe nu nyicu ndo, tyicuan caa ta cuvi cusii ca iñi yo cha iin ri cuvi yo chihin ra Cristo.

²⁷ Cuñi chi cha coo yo yoso cuhva tahán chi coo noo ñu yihí cuenda Nyoo. Vasi nyaí chihin ndo, o cañi nyaí, soco cuñi cote tuhun ndo vatyí nyoho vaha cuahan ndo chihin Nyoo. Ta iin ri sahá tyiño ndo tacuhva nachino iñi ñáyivi tuhun ra Cristo.

²⁸ Ta ma yuhvi ndo ñáá cha sacuvi ñu xaan iñi chi ndo cuenda tuhun Nyoo. Vatyí cha tyicuan caa, cachi xaan sañahá chi chi yo vatyí cunaa ñu. Ta sañahá tucu chi chi yo vatyí cha cacú añima yo sahá maa Nyoo.

²⁹ Vatyí tari chahá ra Cristo ityi chi yo cha chinó iñi yo chi ra, tyicuan caa tucu chahá ra cha nyehé yo tindoho cha cuenda ra.

³⁰ Iin ri cuhva nyehé yo tindoho ta sacotó yo tuhun ra Cristo, ta cha chitó ndo yoso caa nyehi tindoho, ta vityin suri chitó ndo vatyí ña sañé cha sahá tyiñe tuhun Nyoo.

2

Tyayii xaan ra Cristo, soco quichi cúvi ra tari noo ra ndahvi

¹ Ndicha vatyí ra Cristo sanii xaan ra iñi yo cha iin ri cuvi yo chihin ra. Ta vaha cuñi yo cha cuenda cha cuñi ra chi yo. Ta ndicha tucu vatyí nyaá Tatyí Ii Nyoo chihin yo. Ta ndicha tucu cha ndahvi cuñi yo nyehé yo chi tahan yo.

² Tatu ndicha tandihí ihya, cuhva ndo cha cusii cuñi chihin cha iin ri cuvi ndo. Ta cuñi ndo chi tahan ndo tari cuñi ra Cristo chi ndo. Ta iin ri cuhva caca xiñi ndo. Ta iin ri cuhva sacuvi ndo.

³ Ma sacuvi ndo cha vaha chi maa ri maa ndo, soco sacuvi ndo cha vaha chi ñáyivi ñandihí. Ta ma cahnu saha ndo chi ndo. Ndahvi saha yo chi yo. Ta tahan tahan yo saha yo tuhun vatyí vaha ca inga ñáyivi ta ñima ca maa yo.

⁴ Ta tahan tahan yo caca xiñi yo cha cuenda cha vaha chi inga ñáyivi, ta ñima cha vaha chi maa ri maa yo.

⁵ Caca xiñi ndo tari chicá xiñi ra Jesucristo.

⁶ Vasi cuvi ra Nyoo, soco ña cahnu saha ra chi ra ta ña quichi cuvi iñi ra cha sacahnú ñáyivi chi ra, tari sacahnú ñu chi Nyoo Sutu ra.

⁷ Soco sandoo ra tandihí tunyee iñi ra ta tandihí cha tyayii ra iin chiyo xiin.

Ta quichi nanduví ra noo ñáyivi ndahvi quivi cacú ra siqui ñuhu ñáyivi.

⁸ Ta ndahvi saha ra chi ra, vatyí nanduví ra noo rayii ri.

Ta chihin cha iyó vaha iñi ra ta quichaha vaha ra chi Nyoo nyacua chaha ra cha cahñi ñáyivi chi ra.

Tari noo ra quiñi iyó saha ñu chi ra, vatyí nu cruzi chihí ra.

⁹ Yucuan chaha Nyoo sacahnú xaan ra chi ra.

Ta chahá Nyoo noo sivi chi ra, noo sivi cha cahnu xaan ca cuvi nuu tandihí maa sivi.

¹⁰ Vatyí tacuhva tatu cuiñi yo sivi ra Jesucristo, tandihí yo ta cuiñi chiti yo. tandihí cha iyó andivi.

Ta tandihí cha iyó siqui ñuhu ñáyivi, ta chichi ñuhú, cucuiñi chiti ta sacahnú chi ra.

¹¹ Vatyí tandihí cha iyó ta nacoto nuu vatyí ra Jesucristo cuvi ra nyacá ñaha chi tandihí maa cha iyó.

Tyicuan caa cunyehe chi tyi cahnu xaan ca cuvi maa Nyoo Sutu yo.

Ñu yihí cuenda Nyoo cuvi ñu tari noo cha ndichin siqui ñuhu ñáyivi ihya

¹² Yañi, cuñi xain chi ndo. Ta tari cha quichaha ndo chii quivi chinyai chihin ndo, quichaha tucu ndo chii vityin cha cañi nyaí. Ndyuc xaan ndo cuhva na nyehé ñáyivi tyi ndicha cha sacacú Nyoo chi ndo. Ta saha ndo cuenda cuhva coo ndo chihin ra.

¹³ Vatyí maa Nyoo sacacú cha vaha añima ndo. Ta tyinyee ra chi ndo tacuhva vatyí quichi cuvi iñi ndo quichaha ndo nu cahán ra, ta sacuvi ndo cuhva cuñi ra.

¹⁴ Tatu cuasacuvi ndo ñáá cha cuasacuvi ndo, ndyuc ndo cuhva cha ma coo tisihi, ta ma cañi tahan ndo.

¹⁵ Tyicuan ta ma coo ni noo cuatyí ndo. Cuvi ndo noo ñáyivi cachi iyó, cuvi ndo ñáyivi ñahri cuatyí, tari tahan chi coo ñáyivi cuenda Nyoo mahñu ñáyivi quiñi iyó ihya. Cuñi chi cha cuvi ndo tari noo ñuhu cha sandichin nu ñaa iñi siqui ñuhu ñáyivi ihya.

¹⁶ Cahan yo tuhun Nyoo chihin ñáyivi vatyí ican cuan chahá ñáyivi chaa cha iyó yo. Sacuvi ndo tyicuan caa, tyicuan ta quivi cuquichi ra Cristo, yuhu vaha coo iñi cha cuenda nyoho, vatyí ña sacotó cahí tuhun Nyoo chi ndo.

¹⁷ Ta vasi cahñi ñáyivi chi yuhu, cha catyi tuhun Nyoo, soco si# xaan cuñi ta cuñi cusii cuñi ndo chihin vatyí tyicuan caa sacañá tahan cha cucuhva cuenda yo chi Nyoo, cha cuenda cha chinó iñi ndo chi ra.

¹⁸ Ta tahán chi cha cusii iñi tucu nyoho chihin yuhu ñandihí.

Nu tachí ra Pablo chi ra Timoteo ta ra Epafrodito nu nyicu ñu yihí cuenda Nyoo ñuu Filipos cuan

¹⁹ Tatu Sutu Mañi yo ta cuñi ra cutachi chi ra Timoteo quichi nyehé ra nu nyicú ndo. Ta quivi ndichí ra nu nyaí cucusií

xaan cuñi. Vatyí cunacatyí ra chíi yoso caa nyicú ndo.

²⁰ Vatyí noo tuhun ri maa ra chicá xiñi ra cha cuenda cha vaha chí maa ndo tari chicá xiñi yuhu. Ta yori yóo ca ra chicá xiñi tyicuan caa.

²¹ Vatyí tandihí ca ra, maa maa ri cha cuenda chí maa ra nanducú ra. Ta ña nanducú ra yoso caa cuhva cuñi ra Jesucristo.

²² Chitó ndo vatyí ra Timoteo, vaha cuahan ra chíhin Nyoo, ta cha cuenda chí yuhu cuví ra tari noo sehi. Ta tyinyeé xaan ra chíi cha cahán ndi tuhun ra Cristo chíhin ñáyivi.

²³ Ta nyaá sacuhin chí ra nu nyicú ndo. Soco nya coto xihne ñáá catyí ra cuví tyiño, tatu ña naha ca ñohí.

²⁴ Vatyí chitó vahí tyi Sutu Mañi yo numi ri cuhva ra cha cuhin cunyehe ni nyicú ndo.

²⁵ Ta vaha cha cunuhu ra Epafrodito yañi yo nu nyicu ndo. Tachj ndo chí ra vatyí quichi tyinyee ra chíi nu tyiño sahí. Ta tñn tahan xaan ndi chíhin ra ña vaha cha cuví ndi sindaro ra Cristo.

²⁶ Ta cuñi xaan ra Epafrodito cunuhu ra nu nyicú ndo, vatyí chicá xaan xiñi ra cha chitó ndo tyi cuhví ra.

²⁷ Vatyí ndicha cuhvj xaan ra ta cha yatyin maa cha cuví ra. Soco Nyoo cundahví cuñi ra nyehe chí ra, ta chí yuhu ñandihí. Ta ña chahá ra cha cuví ra. Ña cuñi ra cha coo ca tucuihya iñi chíi.

²⁸ Yucuan chaha yuhu cuñi xain cha ndichí ra nu nyicú ndo. Vatyí chité tyi nyoho cundusii xaan cuñi ndo cha nanyehe ndo chí ra. Tyicuan ta ma caca ca xiñi tuhun ndo. Vatyí cha nanyehé ndo chí ra tyi iyó vaha ra.

²⁹ Yucuan chaha vaha naquehen ndo chí ra chíhin cha sii cuñi ndo, vatyí yañi yo cha cuenda maa Sutu Mañi yo cuví chí ra. Ta tyicuan ri sáha ndo ñáyivi chí yañi yo cha iyó tari caa cuhva iyó ra.

³⁰ Vatyí cha yatyin maa cha cuví ra cha cuenda cha sacuví ra tyiño ra Cristo. Soco ña yuhví ra vasi cuví ra cha cuenda cha tyinyeé ra chíi. Vatyí maa ndo ña cuví quichi tyinyee ndo chíi vatyí cañi xaan nyicu ndo.

3

Nu sañahá ra Pablo yoso caa ndu ndi yo nuu Nyoo

¹ Ta vityin yañi, cusii iñi ndo chíhin Sutu Mañi yo. Cha cuenda chí yuhu ñahri sahá cha cha yaha tyaj tuhun ihya chí ndo, cutyaa tiqui inga chaha. Vatyí cha vaha chí maa ndo cuví.

² Sáha ndo cuenda chí ndo chíhin ra cha quiñi iyó chíña. Nyacuví ra cuhva cuñi ra ña vaha. Vatyí catyí ra tyi cuñi chí sacuví yo costumbre circuncisión ta cacu yo.

³ Soco yoó noo circuncisión cha ndicha savahá Nyoo chí yo. Vatyí maa yo sacahnú yo chí ra chíhin Tatyí lí ra cha ñohó añaíma yo. Ta cusii cuñi yo vatyí cuenda maa ra Cristo Jesús yihí yo. Ta ña itá iñi yo tyi cacu yo chíhin cha sacuví yo costumbre.

⁴ Tyehe ta cuví cacu yo chíhin cha sacuví yo, yuhu vihi ca caquí cha nuu tandihí ñu sacuví tyicuan caa.

⁵ Vatyí uña quiví ta sahá ñu circuncidar chíi. Vatyí tata ra Israel vachí. Ta tata ra Benjamín sehe ra Israel cuví. Ta tata ñu cahán sahan hebreo cuví. Yucuan chaha yuhu hebreo cuví. Ta siin ri quichahá xain ley chahnu quiví cuan, vatyí fariseo cuví.

⁶ Ta cha cuenda cha cuñi quichahj ley, ta chícan nyicon xain chí ñu yihí cuenda ra Cristo. Ta ña cuñi nyehi chí ñu. Ta quichahj tandihí maa ley chahnu, vatyí nducú xain cuhva quichahj nu cahán ley cuan.

⁷ Soco tandihí cha cuñi mai vatyí vale xaan quiví cuan, vityin ña vale ca cuan. Vatyí maa ra Cristo cuví ra itá iñi.

⁸ Ta siin ri tandihí cha sacuvj, chitó mai vatyí ña vale cha cuenda cha chicohón nui chí ra Cristo Jesús, Sutu Mañi yuhu. Vatyí yucuan cuví cha tyayii xaan ca. Ta cha cuenda ra Cristo tandihí cha sacuví ta ityi chata ca cuví chí noo cha ñima ri tuhun vityin. Yucuan chaha sandoj in chiyo xiin tandihí cuan. Vatyí cuñi cohon nuu que chí ra Cristo.

⁹ Ta cha cuñi yuhu nacu in ri que chíhin ra. Vaha iyé cha cuenda tyi chinó iñi tyi sacacú ra chí yo. Ñima cha cuenda cha quichahí ley Nyoo ta vaha iyé, soco cha cuenda vatyí chinó iñi tuhun cahán ra, vatyí sacacú ra chí yo. Ta cha cuenda cha chinó ri iñi yo, ra Cristo naquehén cuenda ra chí yo.

¹⁰ Cha cohon nuu que chí ra Cristo yucuan cuví cha cuñi. Nyoo sanandoto ra chí ra Cristo chíhin tunyee iñi ra. Ta cuñi tyi coo ca tunyee iñi cuan chíi. Ta cuñi cunyeí tindoho cha tahán chí nyehí. Ta cuñi cha cuví tandihí cha ña vaha cha cuñi coño ñuhi, tari chíhí ra Cristo cha catyí cuatyí yo.

¹¹ Vatyí nanducú xain cuhva cha cunandote noo ñáyivi chaa chíhin Nyoo nya andivi.

Cuhun ca yo ityi nuu ca chíhin Nyoo

¹² Ñima tyi catyí chí ndo tyi ñahri ca cha cumañi chíi, ta vaha xain. Soco cuahin ityi nuu ca. Vatyí cuñi naquehin cha chahá ra Cristo chíi. Vatyí xihna ca maa ra naxita ra chíi ityi ra.

¹³ Yañi, ña catyí chi ndo tyi cha ñihí tandihi cha vaha cuan. Soco sanai ñi cha quichi ityi chata. Ta sañihí kuhin ityi nuu ca.

¹⁴ Tacuhva tyi chaí nu nyaá cha tahán chi chí. Vatyí caná Nyoo chí yo nya andivi. Vatyí cunaquehen yo cha catyí ra chí yo vatyí cuhva ra cha cuenda cha ñin ri cuví yo chíhin ra Cristo Jesús.

¹⁵ Tyehe caa tahán chí caca xiñi tandihi yo cha ñihí nyaá yo chíhin Nyoo. Soco tatu ñima tyehe caa chicá xiñi nya noo nyoho, Nyoo cucuhva ra cha cutuñi ñi ndo.

¹⁶ Soco noo ri tyi cuñí chí cha quichahá vaha yo tuhun cha cha yaha sacoto Nyoo chí yo.

¹⁷ Yañi, quehen ndo cuhva iyé ta cuhva cahín. Ta saha ndo cuenda chí ñu iyó tari cuhva sañahá ndi chí ndo.

¹⁸ Vatyí ticuñi chaha catyí chí ndo, saha ndo cuenda chí ra cuendu. Ta vityin catyí tiqui chí ndo inga chaha chíhin cha chaquí cha cuihya ñi, vatyí cuaha xaan ra xaan ñi chí ra Cristo. Vatyí catyí ra tyi noo cha ña ñiñi xaan cuví cha chíhí ra Cristo nu cruzi.

¹⁹ Soco quivi quichi tucu ra Cristo, cuhun coyo ra cuan anyaya. Vatyí sacuví ra cuhva cuñi coño ñuhu ra. Ta cahnu sahá ra chí ra chíhin cha tahán chí coo ticahan nuu nuu ra. Ta itá ñi ra maa maa ri cha iyó ihya ñayivi ri.

²⁰ Soco yoó nya andivi nyaá ñuu yo. Ta suri ityi cuan nyatú yo chí Sutu Mañi yo Jesucristo, ra sacacú chí yo.

²¹ Ta cuquehen ra coño ñuhu pehe yo. Ta cusananduvi ra chí yo tari coño ñuhu maa ra. Ta chíhin tunyee ñi cha iyó chí ra cha nyacá ñaha ra tandihi, cusacuví ra tyicuan caa.

4

Tyicuan ri na cusñi cuñi yo chíhin Sutu Mañi yo

¹ Yañi, cuñí chí ndo. Ta cuñí xain nyehi chí ndo. Ta sñi xaan cuñi chíhin ndo. Ta chité tyi ña cahán cahí tuhun Nyoo chíhin ndo. Vatyí ñi xaan ñi ndo nyicón ndo chí ra. Na cuiñyaña ca ndo chí Nyoo chíhin cha ñi ñi ndo.

² Ta vityin chiquén chí cu Evodia, ta chí cu Síntique, nanduva coo ñu chíhin tahan ñu. Ta na coo ñu tari cha cuhu ñu cuenda Sutu Mañi yo.

³ Yoho, yañi, ñi ñiñun sahá tyiñon chíhin, ta chiquén chuun na tyinyeun chí ñu tahan yo ihya. Vatyí tyinyee xaan ñu chí chíhin cha sacoto ñu tuhun Nyoo cha cacu ñima yo chíhin ra Clemente ta suhva ca ñu ñandihí. Ta nyaá sivi ñu nuu tutu Nyoo nya andivi.

⁴ Ta tyicuan ri maa cusñi ñi ndo chíhin Sutu Mañi yo. Ta catyí tiqui chí ndo inga chaha, na cusñi ñi ndo chíhin ra.

⁵ Ta tandihi ñayivi na nyehe ñu chí nyoho vatyí ndicha noo ñayivi vaha cuví ndo. Ta ñicohon ñi ndo vatyí cha nyaña yatyin quivi quichi Sutu Mañi yo.

⁶ Ta ma ndahvi xaan cuñi ndo ñáá ndihí cha cuví chí ndo. Nyita ri nacatyí ndo chí Nyoo ñáá ndihí cha cuví chí ndo. Ta cacan tahvi ndo chí ra ñáá ndihí cha chíñuhú chí ndo. Ta yaha cuan ta nacuhva ndo tyahvi nyoo chí ra.

⁷ Ta cha sacuví ndo tyehe caa, Nyoo cuhva ra cha taxi ri coo ñima ndo. Ta cahnu xaan ca cha vaha cuví cuan. Ta ni noo ñayivi ta ña cuví cutuñi ñi ñu yoso cuhva cha cahnu cuan. Ta cha taxi maa Nyoo cusaha cumi ñima ndo ta cha chíñi tuñi xiñi ndo. Vatyí ñin ri cuví ndo chíhin ra Cristo Jesús.

Na caca xiñi yo maa maa ri cha vaha

⁸ Yañi, nu ndihí tuhun caça xiñi ndo maa ri cha ndicha vaha, cha cachi iyó, cha ndoo iyó, cha ndi, cha ñahri cha quiñi caa, cha tyaquí, cha vaha. Caça xiñi ndo maa maa ri maa cha vaha tacuhva cuví sacahnu yo chí Nyoo.

⁹ Sacuví ndo cha sañahí chí ndo. Tuhun cha chíñi ndo cahín, cha nyehe ndo chinyacuví, sacuví ndo. Ta Nyoo ra chahá cha taxi coo ñima yo, cucunyya ra chíhin ndo.

Tyinyee ñu Filipos chí ra Pablo chíhin cha iyó chí ñu

¹⁰ Sñi xaan cuñi. Ta sacahni chí Sutu Mañi yo cha cuenda cha tyinyee ndo chí inga chaha. Ta chité vatyí tyicuan ri cuñi ndo tyinyee ndo chí. Soco ña chahá chí cuhva chí ndo.

¹¹ Ñima tyi catyí chí ndo tyehe caa ta cuñí ndo tyi iyó cha chíñuhú chí, vatyí yuhu cha cutuhve cha cusñi cuñi chíhin ñáá ri cha iyó chí.

¹² Vatyí yuhu chité yoso caa coo ndahvi ta chité yoso caa coo tyayí. Vatyí cha cutuhve coi chíhin cha iyó o chíhin cha ñahri cha cachi, o tatu nyacua ndoo ca, o tatu ñahri tucu, ndoi vaha.

¹³ Tandihí ta cuví chasahí vatyí maa ra Cristo cuví ra tyinee chí.

¹⁴ Soco nyoho yañi vaha xaan cha tyinyee ndo chí chíhin tindoho cha nyehé xain.

¹⁵ Cha chitó nyoho ñu Filipos yoso caa cuví quivi quichaha cahin tuhun Nyoo chíhin ndo. Ta quite Macedonia chíña tyi cuasacote tuhun Nyoo inga ñuu. Ta noo tuhun ri nyoho tyinyee ndo chí chíhin xuhun, vatyí vaha xaan cuñi ndo cha cahín tuhun Nyoo chíhin ndo.

¹⁶ Ta s̄in ri cha ñi ri ca cha chinyai
Tesalónica, cuaha ri chaha tyinyee ndo chii.

¹⁷ Ñima cha chicá xiñi cha cuenda cha
cuhva ca ndo chii, soco cha cuñi vaty
nyoho coo ca cha vaha chi ndo nuu Nyoo.

¹⁸ Ta vityin cuhva, ñahri cha cumañi chii.
Nyacua ndoo ca cha sacuhun ndo chii
chihin ra Epafrodito. Ta cha chaha ndo
cuan cuacuvi chi tari noo xico vixi, xico
vaha cha chaá nuu Nyoo. Yucuan cuvi cha
tahán ñi ra.

¹⁹ Ta Nyoo cuhva ra tandihí cha chiñuhú
chi ndo. Cha cuenda ra Cristo cucuhva ra
tandihí cha vaha cha tyayii cha cumí ra nya
andivi.

²⁰ Chi Nyoo Sutu yo na sacahnu yo
tyicuan ri maa. Ta na cuvi chi tyicuan caa.

Sacuhún ra Pablo nocumi chi ñu Filipos

²¹ Chahí nocumi chi tandihí ndo cha yihí
ndo cuenda ra Cristo chiña. Ta vachi tucu
nocumi chi ndo sahá yañi yo cuenda Nyoo
cha nyicú chihin ihya.

²² Ta ñáyivi cha nyicú vehe ra nyacá ñaha
ñuu Roma ihya, ta tandihí ca ñu yihí cuenda
Nyoo ñuu ihya chahá ñu nocumi chi ndo.

²³ Ta na nasoco maa Sutu Mañi yo
Jesucristo chi tandihí ndo. Ta na cuvi chi
tyicuan caa.

Carta Cha Sacuhun Ra Apóstol Pablo Chi Ñáyivi Ñuu Colosas Cha Yihí Cuenda Nyoo

*Nu sacuhún ra Pablo noo tutu chi ñáyivi ñuu
Colosas cha yihí cuenda Nyoo*

¹⁻² Yuhu ra Pablo cuví noo apóstol ra Jesucristo. Vatyí tyicuan caa cuhva cuñí maa Nyoo. Yuhu chihin ra Timoteo yañi yo, tyaá ndi noo carta ihya chi ndo ñu ñuu Colosas cha yihí vaha cuenda Nyoo ta cuenda ra Cristo. Nyoo Sutu yo nasoco ra chi ndo ta nacuhva ra cha taxi ri coo añima ndo.

*Nu chicán tahvi ra Pablo chaha ñu yihí
cuenda Nyoo ñuu Colosas*

³ Tyicuan ri cha chicán tahvi ndi chaha ndo. Ta nacuhvá ndi tyahvi nyoo chi Nyoo Sutu Sutu Mañi yo Jesucristo cha cuenda ndo.

⁴ Vatyí ñihí ndi tuhun vatyí chinó xaan iñi ndo chi ra Cristo Jesús. Ta cuñí xaan ndo chí tandihí ñu cha yihí cuenda ra.

⁵ Tyicuan caa sacuví ndo vatyí chitó vaha ndo vatyí cucoo ndo chihin Nyoo nya andivi. Nya quivi chihí ndo tuhun Nyoo cha ndicha vaha, quihí iñi ndo vatyí sacacú ra Cristo añima ndo.

⁶ Ta suri maa tuhun ra Cristo cha cahan ra Epafra chihin ndo, ican cuan chityá tandihí ri ityi tari chityá tucu nu canyicú ndo. Ta cuaña ñáyivi nacuhvá cuenda ñu chí ñu chí Nyoo, tari nacuhvá cuenda nyoho chí ndo ñandihí. Ta cuhva cha chihí ndo tuhun ra Cristo, ta chitó ndo vatyí ndicha vaha cha cuñí Nyoo chi yo.

⁷ Ican ihya sañaha yañi yo ra Epafra chí ndo. Vatyí ñn ri tuhun Nyoo sahá tyiño ndi chihin ra. Ta ican ra cuví ra sacuví tyiño nuu ra Cristo cha cuenda ndo.

⁸ Maa ra sacotó tuhun ndo chí ndi, vatyí cuñí xaan ndo chí tahan ndo. Vatyí maa Tatyí Ii Nyoo chahá cha vaha coo añima ndo.

⁹ Yucuan chaha nyacua nya quivi chito ndi tuhun ndo ta ña sandihí ndi tuhun cha nacuatú ndi chaha ndo. Ta chicán ndi chí Nyoo nacuhva ra cha chihí tuñi ra chí ndo cha cuenda Tatyí Ii ra. Ta cuacutuñi iñi ndo tacuhva coto vaha ndo ñáá ndihí cha cuñí Nyoo tyi sacuví ndo.

¹⁰ Tyicuan caa ta cuví coo ndo tari cuhva tahán chí coo ñu yihí cuenda Nyoo. Ta na sacuví ndo tari cuhva cuñí maa ra. Tacuhva sacuví ndo tandihí nuu cha vaha ta cohon nuu vaha ca ndo chí ra.

¹¹ Ta chicán tucu ndi vatyí na sandunyeecá ra chí ndo chihin tunyee iñi cahnú ra vatyí cuví cunyeecá ndo tandihí cuii chihin cha cama iñi ndo.

¹² Ta chihin cha sñi cuñí ndo, ta nacuhvá ndo tyahvi nyoo chí Nyoo Sutu yo, vatyí chahá ra cha coo ndo noo ñáyivi chaa. Vatyí natavá ra chí ndo nu quihí caa, ta nanyitá ndo nu ndichin nu nyacá ñaha ra chí tandihí ñu yihí cuenda ra. Ta cuhva ra tandihí cha vaha cha tahán chí chí ñu yihí cuenda ra.

¹³ Nyoo tavá ra chí yo nu ñaa iñi ta nacuhvá cuenda ra chí yo chí ra Cristo vatyí cunyaca ñaha ra chí yo. Vatyí ican ra Cristo cuví Sehe Nyoo. Ta cuñí xaan Nyoo chí ra.

¹⁴ Nasatá Nyoo chí yo chihin niñi ra Cristo ta sahá ra tucahnú iñi cuatyí yo.

*Nduvaha iyó yo chihin Nyoo cha cuenda cha
chihí ra Cristo cha catyi cuatyí yo*

¹⁵ Nyoo, ña nyehé yo chí ra. Soco nanduví ra ñáyivi tacuhva cuví cohon nuu yo chí ra. Ta ican ra cuví Cristo Sehe Nyoo. Nya ta ni cumañi ca chingó ñáyivi ta cha iyó maa ra Cristo.

¹⁶ Ta Nyoo chahá ra tyi savaha maa ra Cristo tandihí cha iyo andivi ta siqui ñuhu ñáyivi. Ta savaha ra cha cuví nyehe yo ta cha ña cuví nyehe yo. Savaha ra ángel. Ta savaha ra chí ra ña vaha ta chí tatyí ña vaha ñandihí. Ta tandihí cha nyacá ñaha siqui ñuhu ñáyivi ihya, maa ra savaha. Ta tandihí ihya chingó chí tacuhva cotyiño ra yoso cuhva cuñí maa ra.

¹⁷ Ra Cristo cha iyó maa ra nya ta ni cumañi coo tandihí maa cha iyó. Ta tyicuan ri chahá ra cha conyito tandihí maa cha savaha ra.

¹⁸ Ta maa yo cha yihí yo cuenda ra Cristo, ñn ri cuví yo chihin ra. Cuví yo coño ñuhu ra. Ta maa ra Cristo, cuví xiñi yo, vatyí maa ra cuví nuu chí yo. Ta ican ra cuví cha nandotó cha xihna ca. Yucuan chaha cuví ra nuu chí tandihí cha iyó.

¹⁹ Vatyí maa Nyoo cuñí ra tyi coo tandihí tunyee iñi ra chí ra Cristo.

²⁰ Ta cuñí tucu ra vatyí cha cuenda ra Cristo ta nicoó vaha tandihí cha iyó chihin ra. Yucuan chaha chahá Nyoo cha chihí ra Cristo. Ta chati niñi ra nu cruzi. Vatyí cuñí ra cha nicoó vaha tandihí cha iyó siqui ñuhu ñáyivi ta andivi chihin ra.

²¹ Ta nu quichí chí, xaan cuví iñi ndo chí Nyoo cuhva cha chichá xiñi ndo cha cuenda cha ña vaha cha chinyacuví ndo.

²² Soco Nyoo sanicoó vaha ra chí ndo chihin ra vatyí tachí ra chí Sehe ra, ra Cristo vatyí quichí cuví ra nu cruzi. Ta nyehé ra ñndoho chihin coño ñuhu ra ta

chihí ra, tacuhva vatyi cuhva cuenda ra chi ndo chí Nyoo, soco ñahri ca cuatyí ndo.

²³ Yucuan chaha cuñí chí vatyi sañihí ca ndo chinó iñi ndo. Ta ma sandihí ndo cha yihí iñi ndo tuhun ra Cristo cha chiñí ndo tyi cusacacu ra añima ndo. Ican tuhun ihya, cuví cha cacahán ra nicacahnu ñayiví. Ta sacuví Nyoo vatyi yuhu ra Pablo tyinyeí cahín tuhun ihya chihin ñayiví.

Nu catyí ra Pablo vatyi nyaá síqui ra cha sañahá ra tuhun ra Cristo tandihí ri vehe ñuhu

²⁴ Vityin cusí cuñí cha cuenda cha nyehí tindoho chihin coño ñuhi cha catyí ndo. Vatyi cha tyicuan caa sacañá tahín tindoho cha nyehe ca ra Cristo cha cuenda yo cha cuví yo coño ñuhu ra.

²⁵ Yuhu cuví noo ra cahán tuhun ra Cristo vatyi tyicuan caa tyinyeí chí tandihí ñu yihí cuenda ra. Vatyi maa Nyoo catyí ra vatyi cahín tandihí tuhun ra cha cuenda cha vaha chí ndo.

²⁶ Sañahí tuhun cha ñohó xehe nya ta tyembu chahnu, nya ta ni cumañi ca chino ñayiví. Nyoo chicumí xehe ra. Soco vityin cuñí ra cha coto tandihí cuii maa ñu yihí cuenda ra.

²⁷ Ta chí ñu cha ñima ñu Israel cuví tari nyoho, cuñí Nyoo sacotó ra noo tuhun vaha xaan, noo tuhun xehe chí ndo. Ta tuhun xehe cuan ican cuví ihya, vatyi ra Cristo ñohó ra añima ndo cha yihí ndo cuenda ra. Ta cha cuenda maa ra cuñihí ndo gloria nu cunyaa yo chihin Nyoo.

²⁸ Tuhun maa ra Cristo cahán ndi. Ta chahá ndi tuhun chí tandihí ñayiví. Ta sañahá ndi chí ñu tandihí cha chiñi tuñi, tacuhva cuahnu ñu ta nyacua nya cha ñahri ca cumañi chí ñu cha ñin ri cuví ñu chihin ra Cristo.

²⁹ Yucuan chaha tyi ní iñi sahá tyiñe chihin tunyee iñi ra Cristo ta ñihí xaan chotyíño tunyee iñi cuan chíi.

2

¹ Vatyi cuñí cha coto ndo vatyi chicá xiñi cha cuenda ndo. Ta chicán tahví xain cha cuenda tandihí ndo ta cha cuenda ñu Laodicea, ta tandihí inga ñu cha ta nyehe ca chíi.

² Chiquén chí Nyoo na cuní ca iñi ndo, ta cu ñin ri ndo chihin cha cuñí ndo chí tahan ndo. Ta cutuñi vaha ca iñi ndo yoso caa cohon nuu ca ndo chí ra Cristo. Vatyi ican ra cuví tuhun cumí xehe Nyoo ta cha naha. Soco vityin sacotó ra chí yo tuhun ihya.

³ Maa ra Cristo chahá ra tandihí cha vaha ta cha chiñi tuñi chí yo. Tatu ñohó nuu yo chí ra Cristo, ñohó nuu yo chí Nyoo.

⁴ Catyí chí ndo tyehe caa tacuhva cha ma sandavi ñaha ñayiví chí ndo chihin tuhun tyaqui.

⁵ Vasí ña nyaí chihin ndo, soco cohon iñi ndo vatyi ñohó iñi tuhun ndo. Ta sá cuñí nyehi chí ndo. Vatyi vaha xaan cuhva cuahán iyó ndo. Ta ní xaan iñi ndo cuahan ndo chata ra Cristo.

⁶ Yucuan chaha tari chinó iñi ndo chí noo tuhun ri maa ra Cristo quiví nañihí ndo chí ra, tyicuan caa cuñí tucu chí coo ndo ta ñin ri cuví ndo chihin ra.

⁷ Ta cuinyaña ca ndo chí ra. Ta quíhi vaha yoho ndo chihin ra. Ta saní ca ndo iñi ndo chihin cha chino iñi ndo, tari cuhva sañaha ñu chí ndo. Ta nyita ri nacuhvá ndo tyahví nyoo chí Nyoo.

Ñayiví chaa cha chahá ra Cristo chí yo

⁸ Saha ndo cuenda vatyi iyó ñayiví cuñí ñu sandavi ñaha ñu chí ndo chihin tuhun cha ndichí ri maa xiñi ñayiví, tuhun cha ña ndicha. Vatyi ñima chí ra Cristo chinó iñi ñu cuan. Noo costumbre ri nyicón ñu cuan. Ta nyicón ñu chí cha nyacá ñaha síqui ñuhu ñayiví ihya.

⁹ Soco cha sañahá ñu cuan, ñima cha ndicha cuví. Vatyi Nyoo ta tandihí cha cahnu cuví ra, tandihí cuan ta nyaá chihin ra Cristo. Vatyi maa ra Cristo cuví Nyoo.

¹⁰ Ta cha nyaá ra Cristo chihin ndo, tyitú añima ndo chihin Nyoo. Ta ra Cristo ican ra cuví ra nuu chí tandihí ángel ta tatyí cuihna cha nyacá ñaha.

¹¹ Quiví nañihí ndo chí ra Cristo, quihví ra añima ndo. Ña nduvahá ndo nuu Nyoo chihin costumbre circuncisión cha itá xaan iñi ra Israel. Maa ra Cristo sacuchiyó tandihí cha ña vaha cha tuhva ndo sacuví. Saha ra circuncidar añima ndo cuví cuan soco ñima chihin ndaha ra.

¹² Quiví condutya ndo chichi ndutya, tari quiví chihí ndo chihin ra Cristo cuví cuan. Tyicuan ta quita ndo chichi ndutya, tari quiví nandotó ndo chihin ra Cristo, vatyi chinó iñi ndo tyi Nyoo chihin tunyee iñi ra sanandotó ra chí ra Jesús.

¹³ Nu quichí chí ña ñohó nuu ndo chí Nyoo. Vatyi sacuví xaan ndo cuatyí. Ta cuví ndo tari noo ñayiví chíhí chihin cuatyí cuan. Ta ña saha ñu circuncidar chí ndo. Soco vityin Nyoo saha ra ticahnu iñi tandihí cuatyí ndo. Ta chaha ra cha coo ndo noo ñayiví chaa chihin cha ñin ri cuví ndo chihin ra Cristo.

¹⁴ Sanatuví ley chahnu cuan cuatyí yo. Ta catyí chí tyi tahán chí cuhun yo anyaya vatyi ña quichahá yo chí chí. Soco ley cuan Nyoo sacuachiyó ra quiví chihí ra Cristo nu cruzi.

¹⁵ Quiví cha chihí ra nu cruzi cuví chasaha ra chí cuihna ta chí tandihí tatyí ña

vaha cha nyacá ñaha. Chihin nuu tandihi maa ángel Nyoo sacotó ra vatyi cahnu ca cuví maa ra ta ñima ca cuihna.

Nu chahá ra Pablo tuhun tyi nanducú yo cha vaha cha chahá Nyoo

¹⁶ Yucuan chaha ña tahán chi quihí yuhu ñáyivi chi yo cha cuenda cha chachi yo o cha chihí yo, o cha cuenda cha ña naquehén vaha yo noo quivi vico. Cuví ri quivi cha natyacu yoo, o cuví ri quivi nyitatu yo.

¹⁷ Tandihí cuan cuví chi tari noo xiñahñu ri cha cuquichi ityi nuu. Ta vityin cha quichí ra Cristo ta ican ra cuví ra cha ndicha vaha sacacu chi yo.

¹⁸ Ma cuhva ndo cha casi ñáyivi nu naquehen ndo noo cha cuacuhva Nyoo chi ndo. Maa ñu ndahvi sahá ñu chi ñu soco ña ndicha ñu, ta sacahnú ñu chi ángel. Ta sahá ñu tyi ñyehe ñu cha sañaha Nyoo chi ñu. Ta cahnu sahá ñu chi ñu chihin cha chicá xiñi ñu tuhun ñayivi ihya.

¹⁹ Ñu cuan ñima chi ra Cristo ra cuví xiñi nyicón ñu. Yucuan chaha nyacuví ñu tandihí cuan. Soco yoó cha nyicón yo chi ra, maa ra cuví nuu chi yo. Ta sandu ñin ri ra chi yo chihin ra. Ta sacuhnú ca ra chi yo chihin tunyee ñiñi ra tari cuhva cuñí maa Nyoo.

²⁰ Tari quivi chihí coño ñuhu cuatyí ndo chihin ra Cristo cuví cuan. Ta ña nyacá ñaha ca tuhun ñuhu ñayivi ihya chi ndo. ¿Ñáá tuhun cha iyó ca ndo tari ca iyó ñáyivi cha ña ñohó nuu Nyoo? Ta quichahá ca ndo cha cahán ñu cha sacuví costumbre cuan.

²¹ Vatyi catyí ñu chi ndo tyehe caa: “Ma tiun ihya chihin ndahun, ma cachun ihya. Coto ma cacun”, catyí ñu.

²² ¿Ñáá tuhun cha quichahá ca ndo tuhun cahán ñu cuan? Vatyi maa maa ri cha ndichí xiñi ñáyivi cuví. Vatyi nyayu noo cha ñin yaha ri cuví. Ma tiví ndo nuu Nyoo cha cuenda cha cachi ndo.

²³ Ndicha vatyi costumbre ihya tari maa cha vaha cuví, cuñí maa ñáyivi. Vatyi sanyehé ñu tindoho coño ñuhu ñu. Ta cuñí ñu tyi vaha sacahnú ñu chi Nyoo tatu sacuví ñu tyicuan caa. Soco ña chaá cuan nuu Nyoo. Vatyi ma cuví tinyaa cuan cha quíñi caa cha cuñí coño ñuhu ñu.

3

¹ Chahá Nyoo noo ñayivi chaa chi yo vatyi nandotó ra Cristo. Ta vityin nyaá ra chiyo vaha Nyoo andívi. Yucuan chaha na nducu yo cha vaha cha chahá Nyoo chi yo nya andívi.

² Caca xiñi ndo cha vaha cha chahá Nyoo chi yo nya andívi. Ta ma caca xaan xiñi ndo tuhun cha iyó siqui ñuhu ñayivi ihya.

³ Vatyi nyoho cha yahá chihí ndo in caa ri chihin ra Cristo. Ta vityin iyó ndo ñin ri chihin ra chihin Nyoo.

⁴ Ta quivi quichi tucu ra Cristo, ra chahá ñayivi chaa cha iyó ndo, tyicuan ta cunyehe ñáyivi tyi cahnu xaan ca ra cuví maa ra. Ta cunanyehe tucu ñu chi nyoho in caa ri chihin ra. Ta cutahan tucu maa ndo quichi ndo nu tyaqui cuan chihin ra.

Yoso caa chiyo yo costumbre nu quichi chi ta yoso caa cuñí chi coo yo chihin Nyoo vityin

⁵ Yucuan chaha cuñí chi cha nanducú yo cuhva na cuví tandihí cha quíñi caa cha quichí cuví ñiñi coño ñuhu yo. Ta ni noo yo ta ma coo ri maa yo chihin ñusihí o chihin rayii. Ta ma sacuvi yo cha ña vaha cha cuñí coño ñuhu yo, o inga cha ña vaha. Ta ma nyiyo ñiñi yo cha tyayii. Vatyi tari cha sacahnú yo xitohyo, o tavá xiin yo chi Nyoo cuví cuan.

⁶ Cha cuenda tandihí cha ña vaha cuan cuxaán xaan Nyoo chihin ñu cha ña quichahá nu cahán ra. Ta cutachi tuñi ra chi ñu vatyi sacuví ñu cha ña vaha cuan.

⁷ Ta suri tyehe caa chinyacuví tucu maa ndo quivi ña ñohó nuu ndo chi Nyoo.

⁸ Soco vityin ma sacuvi ca yo tandihí cha ña vaha cuan. Ma cuxaan ca yo. Ma cahan uhvi ca yo chi tahan yo. Ta ma cahan cuehe yo chi tahan yo. Ta ma cahan ca yo cha quíñi caa. Ma quita tuhun quíñi caa yuhu yo.

⁹ Ma ñii ca yo cuendu. Vatyi quivi ta ityi chata ca, quivi ña ñohó nuu yo chi Nyoo, tyicuan caa chinyacuví yo. Soco vityin ña nyacá ñaha ca tandihí cuan chi yo.

¹⁰ Vatyi ñayivi cha iyó yo vityin, ñayivi chaa cuví. Noo ñáyivi chaa nanduví yo. Ta nduchaá ca yo tari cuhva caá Nyoo, ra savahé chi yo, nyacua nya cohon nuu vaha yo chi ra.

¹¹ Ña niñi cha cuví yo ñu Israel, an ñu Grecia, an ñu inga ñuu. Ta ña niñi cha sacuví yo costumbre circuncisión, an cha ma sacuvi yo. Cuví ri yo noo ra chiñi tuñi o cuví ri yo noo ra soho. Cuví ri yo ra iyó chitoho, o cuví ri yo ra yori nyacá ñaha chi yo, ña niñi xaan ca tuhun cuan. Niñi ca cha ñin ri cuví tandihí yo chihin ra Cristo, vatyi maa ra cuví tandihí.

¹² Nyoo cuñí ra chi yo ta nacachí vaha ra chi yo vatyi cuví yo ñáyivi chi ra. Yucuan chaha na coo yo ñayivi chaa tari tahán chi coo ñu yihí cuenda ra. Na cundahvi cuñi yo nyehé yo chi tahan yo. Na cuví yo ñáyivi vaha. Ndahvi saha yo chi yo. Na cumasu ñiñi yo. Cunyee yo tandihí tisihi tindoho chihin cha sii cuñí yo.

¹³ Na cucama ñiñi yo chihin noo noo tahan yo. Ta saha yo ticahnu ñiñi chi tahan yo tatu ñáá cha sacuví ñu chi yo. Tari sahá ra

Cristo tìcahnu iñi chi yo, tyicuan caa cuñi chi cha sacuví tucu maa yo.

¹⁴ Ta sñin ri cuñi yo chi tahan yo. Ta ndücu yo cuhva coo vaha yo chihin ñu. Vatyí ican cuan cuví cha sacu ñin ri chi yo. Ta ican cuan cuví cha ñiñi ca.

¹⁵ Ta cha taxi maa Nyoo na coo añima yo. Vatyí ra Cristo nyacá ñaha chi yo. Nyoo nacana ra chi yo vatyí tacuhva ñin ri cuví yo cuenda ra Cristo. Ta tyicuan ri ñacuhva yo tyahví nyoo chi ra cha cuenda ihya.

¹⁶ Ta tuhun ra Cristo na sacutu añima yo. Sañaha ca yo tuhun ra chi tahan yo. Ta sñini ca yo iñi tahan yo chihin cha chiñi tuñi Nyoo. Saçahnu yo chi Nyoo chihin cha cata yo yaa, o salmo. Ta çata yo yaa cha चाहá maa Tatyí Ii Nyoo chi yo chihin cha ñiñi añima yo. Ta tyicuan ri ñacuhva yo tyahví nyoo chi Nyoo.

¹⁷ Tatu ñáá tyiño sahá yo, o ñáá tuhun cahán yo, sacuví yo soco tari cha tyi tyiño maa Sutu Mañi yo Jesús sacuví yo. Ta ñacuhva yo tyahví nyoo chi Nyoo cha cuenda maa ra Cristo.

Chahá ra Pablo tuhun yoso caa nducú yo cuhva coo vaha yo chihin ñáyivi

¹⁸ Nyoho cha iyó yíi ndo, cuhva ndo cha cunyaca ñaha yíi ndo chi ndo. Vatyí yucuan cuhva tahán chi coo ndo, vatyí yihí ndo cuenda Sutu Mañi yo.

¹⁹ Ta nyoho rayíi, cuñi ndo chi ñasihí ndo. Ta ma nduxaan ndo chi ña.

²⁰ Nyoho cha cuví ndo sehe quíchaha ndo chi sutu ndo ta chi sihi ndo. Vatyí yucuan cuhva cuñi maa Sutu Mañi yo.

²¹ Nyoho cha cuví ndo sutu ta sihi, ma cahan xaan ndo chi sehe ndo, vatyí coto nducuihya iñi chi.

²² Ta nyoho cha cuví ndo musu, quíchaha ndo chi chitoho ndo. Ñima cuhva cha nyehé ri ra chi ndo quíchaha ndo chi ra, tacuhva vatyí vaha cuñi ra nyehé ra chi ndo. Soco sacuví ndo chihin cha tandihí añima ndo. Vasi ña nyehé ra. Vatyí Nyoo nyehé ra chi ndo.

²³ Tandihí ri tyiño sacuví yo, sacuví yo chihin cha ñiñi iñi yo. Saha yo tuhun tyi tyiño nuu maa Sutu Mañi yo sacuví yo. Ta ñima maa ri maa tyiño nuu ñáyivi.

²⁴ Vatyí chitó yo vatyí maa Sutu Mañi yo cucuhva ra noo cha tahán chi chi yo vatyí sacuví yo tyiño nuu ra Cristo. Vatyí ican maa ra cuví chitoho yo cha ndicha vaha.

²⁵ Soco tatu sacuví yo cha ña vaha, Nyoo cutachi tuñi ra chi yo cha cuenda cha ña vaha cha sacuví yo. Ta tandihí yo ñin ri ñáyivi cuví yo nuu ra. Vatyí Nyoo ña cachi ra ñáyivi cuñi ra.

4

¹ Nyoho cha iyó musu ndo, cuñi chi tyi vaha ñáyivi cuví ndo chihin musu ndo. Ñicohon iñi ndo vatyí iyó tucu noo chitoho maa ndo nya andiví. Ta maa ra nyehé ra chi ndo.

² Ta tyicuan ri çacan tahví ndo chihin cha ñiñi iñi ndo. Ta nacuhva yo tyahví nyoo chi Nyoo cha cuenda tandihí maa.

³ Çacan tahví ndo chaha ndi, vatyí nanuña ca Sutu Mañi yo xiñi ñáyivi ta tyasoho ñu tuhun ra Cristo cha cahán ndi nuu ñu. Vatyí tari noo tuhun xehe cuví tuhun ra Cristo chi ñu, vatyí ña chitó ñu tyi ican ra cuví ra sacacú chi yo. Ta cha catyí tuhun ihya ñohí vehe caa.

⁴ Çacan tahví ndo chahi tacuhva cuví sañahí chi ñu yoso cuhva cuví cutuñi vaha iñi ñu tuhun ra Cristo, tari cuhva tahán chi tyi sacuví.

⁵ Cachi coo ndo chihin ñu ña ñohó nuu chi Nyoo. Vatyí tyicuan caa ta cuví cahan ndo tuhun Nyoo chihin ñu.

⁶ Cuñi chi vatyí ndatuhún yo maa maa ri cha vaha, ta cha cachi, (ta cha tahán iñi ñáyivi) tari tahán chi cunyacuví yo cha yihí yo cuenda ra Cristo. Tyicuan ta cuví coto yo yoso caa cunacahan yo tatu ñáá noo tuhun ndacá tuhun ñu chi yo.

Nu sacuhún ra Pablo nocumi chi ñu ñuu Colosas cha yihí cuenda Nyoo

⁷ Ra Tíquico, yañi yo, ra sahá tyiño tyiño Sutu Mañi yo chihin, maa ra cunacatyí ra chi ndo yoso caa cuahán nyai.

⁸ Yucuan chaha tachi chi ra nu nyicu ndo vatyí nacatyí ra chi ndo yoso caa nyicú ndi. Ta sanduní ca ra iñi ndo.

⁹ Ta chihin ra Tíquico vachi tucu ra Onésimo, yañi yo. Ta ñi iñi ra. Ta cuñi yo chi ra. Cuví ra noo ra ñuu ndo. Maa ra cunacatyí ra chi ndo tandihí cha cuví nu nyai.

¹⁰ Ra Aristarco, ra tahin cha ñohó ndi vehe caa, saquichí ra nocumi chi ndo. Ta saquichí tucu ra Marcos, yañi cunducuatyi ra Bernabé, nocumi chi ndo. Ta cha sacoté chi ndo tuhun ra Marcos. Tatu chaa ra nu nyicu ndo, vaha çahan ndo chihin ra.

¹¹ Vachi tucu nocumi chi ndo sahá ra Jesús, ra cha nañi tucu Justo. Ta chichí cha tandihí ñu Israel cha yihí cuenda Nyoo, uñi tahan ri ra lhya sahá tyiño ra tuhun Nyoo chihin. Ta nduní xaan ca iñi sahá ra.

¹² Vachi tucu nocumi chi ndo sahá ra Epafras, ra ñuu ndo. Ta maa ra sacuví ra tyiño nuu ra Cristo. Tyicuan ri chicán tahví ra chaha ndo chi Nyoo tyi nacaca vaha ndo chihin Nyoo. Ñacuhva cuenda vaha ndo chi ndo chi Nyoo tacuhva cuví sacuví ndo cuhva cuñi ra.

¹³ Ta yuhu cuví cha ndaa vatyi ra Epafraś chicán tahvi xaan ra cuenda ndo, ta cuenda ñu cha nyicu nya ñuu Laodicea ta ñuu Hierápolis.

¹⁴ Vachi tucu nocumi chi ndo sahá ra Lucas, ra cha cuví doctor cha cuñí xaan yo chi. Ta vachi tucu nocumi chi ndo sahá ra Demas ñandíhi.

¹⁵ Cuhva ndo nocumi chi yañi yo ta tahan yo cha nyicu ñuu Laodicea. Ta cuhva ndo nocumi chi cu Ninfas ta chi tandíhi ñu yihí cuenda Nyoo cha ndu ñn ri vehe ña.

¹⁶ Tatu yaha sacuaaha ndo carta ihya, ta sacuhun ndo nu canyicu ñu yihí cuenda Nyoo nya Laodicea na sacuaaha tucu maa ñu. Ta sacuaaha tucu maa ndo carta cha sacuhin chi ñu Laodicea.

¹⁷ Cati ndo chi ra Arquipo vatyi na sacuvi vaha ra tyiño cha chahá Sutu Mañi yo chi ra tyi sacuví ra.

¹⁸ Yuhu ra Pablo saquichí nocumi ihya chi ndo. Ta ma naa ñni ndo cha ñohí vehe caa. Ta Nyoo na nasoco ra chi ndo. Ta na cuví chi tyicuan caa.

Carta Cha Xihna Ri Sacuhun Ra Apóstol Pablo Chi ñáyivi Ñuu Tesalónica Cha Yihí Cuenda Nyoo

Nu tyaq ra Pablo ta ra tahan ra noo tutu chi ñu yihí cuenda Nyoo

¹ Yuhu ra Pablo chihin ra Silvano ta ra Timoteo, tyaá ndi tutu ihya chi ndo cha cuví ndo ñu yihí cuenda Nyoo ñuu Tesalónica chiña. Vatyí ñin ri cuví ndo chihin Nyoo Sutu yo ta chihin Sutu Mañi yo Jesucristo. Ta Nyoo Sutu yo ta Sutu Mañi yo Jesucristo na nasoco ra chi ndo. Ta na cuhva ra cha coo cha taxi ri añima ndo.

Vaha xaan chinó iñi ñu Tesalónica cuan chi Nyoo

² Tyicuan ri nacuhvá ndi tyahvi nyoo chi Nyoo cha cuenda tandihí ndo. Ta nyita ri chicán tahvi ndi cha cuenda ndo.

³ Tyicuan ri yihí iñi ndi tuhun ndo nuu Nyoo Sutu yo ta nichón iñi ndi vatyí ñi iñi ndo chinó iñi ndo chí Nyoo ta sacuví ndo tyiño nuu ra. Ta ñihí sahá tyiño ndo cha cuenda cha cuñí ndo chí ra. Ta chihin cha ñi iñi ndo yihí iñi ndo cha cuañihí ndo cha cuenda ra Jesucristo.

⁴ Vatyí chitó ndi tyi Nyoo nacachí vaha ra chí nyoho yañi. Ta cuñí xaan ra chí ndo.

⁵ Vatyí quiví cahán ndi tuhun Nyoo yoso caa sacacú ra añima yo chihin ndo, ñima chihin tuhun yuhu ri cahan ndi, soco tyinyee xaan Tatyí Ii chí ndi, ta cuaha xaan sacuví ra chihin tunyee iñi ra. Ta cahán ndi chihin cha chitó vaha ndi tyi tuhun ndicha Nyoo cuví. Ta nyehe vaha ndo yoso caa chíyo ndi quiví chinyaq ndi chihin ndo. Tyicuan caa chíyo ndi cha cuenda cha vaha chí maa ndo.

⁶ Ta quichaha iyó ndo cuhva iyó ndi, ta cuhva iyó Sutu Mañi yo. Vatyí natin cuenda ndo tuhun Nyoo, vasi cuaha tindocho nyehe ndo cha cuenda cuan. Soco si xaan cuñí ndo vatyí maa Tatyí Ii chahá tusii iñi cuan chí ndo.

⁷ Ta cha tyicuan caa, tyinyee xaan ndo chí tandihí ñu yihí cuenda Nyoo nicahnu ityí Macedonia chiña ta nicahnu ityí Acaya ihya ñandihí, vatyí nyehé ñu cuhva iyó ndo chihin Nyoo.

⁸ Ñima ityí Macedonia ta Acaya ri, soco tandihí ri ityí nu chíñí ñu tuhun ndo chitó ñu tuhun Sutu Mañi yo ta chitó ñu vatyí chinó xaan iñi ndo chí Nyoo. Ta yucuan chaha nyacua ña ñiñi ca cha cahan ndi tuhun Nyoo chihin ñu.

⁹ Vatyí suri maa ñu nacatyí ñu chí ndi yoso caa cha vaha xaan tin cuenda ndo chí ndi quiví cuan. Nacatyí ñu yoso caa sandihí ndo tuhun cha sacahnu ndo xitohyo ta quichaha sacuví ndo tyiño nuu Nyoo nyitó, Nyoo cha ndicha.

¹⁰ Ta nacatyí tucu ñu yoso caa nyatú ndo naquichi tucu ra Jesús Sehe Nyoo inga chaha ityí andivi. Ican ra cuví ra cha sanandotó Nyoo chí. Ta maa ra cuví ra ra sacacú chí yo tacuhva cha ma tachi tuñi Nyoo chí yo quiví sacutuñi ra chí ñáyivi.

2

Tyiño sahá ra Pablo ñuu Tesalónica

¹ Nyoho yañi, chitó ndo vatyí ñima cha caha ri chahan ndi chichan ndi tuhun Nyoo ñuu ndo.

² Vatyí chitó ndo yoso caa nyehe ndi tindocho sahá ñáyivi ñuu Filipo cha ni cumañi ca chaq ndi ñuu ndo. Ta vasi nyehe xaan ndi tindocho ñuu cuan soco quiví chaq ndi ñuu ndo cahan tucu ndi tuhun Nyoo chihin ndo chihin cha ña yuhví ndi. Ta vasi xaan xaan nanduví ñáyivi ñuu ndo, soco tyinyee xaan Nyoo chí ndi ta sacotó ndi chí ndo yoso caa sacacú ra añima yo.

³ Vatyí tuhun cha chahá ndi chí ndo maa maa ri cha ndicha cuví. Ta ñahri cha quíñi caa chicá xiñi ndi. Ta ni ñima cha cuñí ndi sandavi ñaha ndi chí ndo.

⁴ Ñahri cha ña vaha cahan ndi, vatyí Nyoo nyehé ra chí ndi, ta maa ra tyatyíño ra chí ndi vatyí sacotó ndi chí ndo yoso caa sacacú ra añima yo. Ta yucuan cuví cha cahán ndi tari cuhva tyatyíño ra chí ndi. Vatyí ña cuñí ndi cuvaha ndi nuu ñáyivi, soco nuu Nyoo cuñí ndi cuvaha ndi, vatyí maa ra nyehé ra ñáá cha caa añima yo.

⁵ Ta nyoho chitó ndo vatyí ni noo chaha ña cahan ndi chihin tuhun tyaqui cha cuñí ndi sandavi ñaha ndi chí ndo. Ta ni ñima cha cuñí ndi saha ganaa ndi xuhun ta cahan ndi tuhun ihya chihin ndo. Nyoo cuví ra cha ndaa tyi ndicha cha cahín ihya.

⁶ Ta ni noo chaha ña nanducú ndi cuhva cha sacahnu ñáyivi chí ndi, ni nyoho, ni inga ñu. Ndicha, iyó ityí chí ndi cha cunyacá ñaha ndi chí ndo tyi maa ra Cristo tachí ra chí ndi, soco ña cuñí ndi coso ndi síqui ndo cha tyicuan caa.

⁷ Soco cuñí ndi tyinyee ndi chí ndo. Tari noo sihi sacuahnú ña chí sehe ña, sahá cuenda ña chí cue, tyicuan caa cuñí ndi tyinyee ndi chí ndo.

⁸ Cuñí xaan ndi chí nyoho, ta cahvi iñi ndi vatyí ñima tuhun Nyoo ri cuhva ndi chí ndo, soco nyacua nya ñáyivi ndi ñandihí, cha cuenda cha cuñí ndi chí ndo.

⁹ Nyoho yañi, nichón iñi ndo yoso caa sahá tyiño ndi quiví chinyicú ndi chihin

ndo. Sahá tyiño ndi ñicahñu ta cha cuaa vatyi ña cuñi ndi coso ndi siqui ni noo ndo cha ni ri ca cha cahán ndi tuhun Nyoo chihin ndo.

¹⁰ Ta nyoho cuví ndo cha ndaa, ta Nyoo ñandihí, vatyi maa ri cha vaha ta cha ndaa chinyacuví ndi quiví chinyaá ndi chihin ndo cha cuví ndo ñu chinó iñi chi ra Cristo. Maa maa ri cuhva cuñi Nyoo chinyacuví ndi, ta ña chahá ndi cuhva vatyi cahan ña vaha ndo siqui ndi.

¹¹ Ta chitó tucu ndo yoso caa sanduní ndi iñi noo noo ndo chihin tuhun chahá ndi chi ndo. Sandunyeé ndi iñi ndo tari noo ra chihin sehe ra.

¹² Ta catyi ndi chi ndo nacachi ço ndo tari tahán chi coo ñu yihí cuenda Nyoo. Vatyi maa ra nacana chi ndo vatyi coo ndo nu nyacá ñaha ra, ta nyehe ndo cha tyaqui gloria ra.

¹³ Yucuan chaha tyicuan ri nacuhvá ndi tyahví nyoo chi Nyoo, vatyi quiví chiñi ndo tuhun ra cha cahan ndi chihin ndo, natñin cuenda ndo vatyi nacoto ndo tyi tuhun Nyoo cuví ta ñima tuhun ñáyivi ri. Ta ndicha cha tuhun Nyoo cuví, vatyi sacuví chi vatyi chino iñi ndo chi Nyoo ta nasama ndo cuhva iyó ndo.

¹⁴ Yahá cuan ta nyehe tucu maa ndo tindoho sahá ñáyivi ñuu ndo, tari nyehe tucu ñu yihí cuenda ra Cristo Jesús nicahnu ityi Judea. Tyicuan caa sanyehe tucu ñu Israel ityi Judea cuan tindoho chi ñáyivi tahan yo cuenda ra Cristo cuan.

¹⁵ Ta ícan ñu Israel cuan cachahñi chi Sutu Mañi yo Jesús tari cachahñi tucu ñu chi ra profeta, ra cachahá cuenda tuhun cahán Nyoo ta ityi chata ca. Ñu Israel cuan tava ñehe ñu chi ndi. Ñima cuhva cuñi Nyoo iyó ñu. Ta tasi cuñi ñu nyehe ñu chi tandihí ñáyivi.

¹⁶ Tatu cuñi ndi cahan ndi tuhun Nyoo chihin ñu cha ñima ñu Israel cuví tacuhva cacu ñu, ña chahá ñu Israel cuan cahan ndi. Ta cha cuenda cha chasí ñu nu cahán ndi, cucuaha ca cuatyí ñu. Ta vityin nu ndihí tuhun cutachi tuñi xaan Nyoo chi ñu.

Nu catyi ra Pablo vatyi cuñi ra cunyehe ra nu nyicú ñu Tesalónica inga chaha

¹⁷ Yañi, cha yahá cha quitá ndi ñuu ndo vasi ña naha nyehe ndi chi ndo soco ñohó xaan iñi ndi chi ndo. Ta chihin cha ñi iñi ndi cuñi ndi cunyehe ndi nu nyicú ndo inga chaha.

¹⁸ Ta nducu ndi cuhva cahun ndi soco ña cuví. Ta yuhu ra Pablo ñandihí, cuaha xaan chaha nduquí cuhva cahun ndi, soco tahan ri chaha cha cuñi ndi cahun ndi ta ña chahá ra ña vaha.

¹⁹ Soco ¿yóó chi ita iñi ndi? Ta ¿yóó chi cuenda cusii cuñi ndi, ta vaha cuñi ndi?

¿Atu ñima cha cuenda maa ndo cusii xaan cuñi ndi nuu Sutu Mañi yo Jesucristo quiví quichi ra inga chaha?

²⁰ Vatyi cha cuenda cha vaha cuahan ndo chihin Nyoo ta nyehé yo tyi ña caha ri sahá tyiño ndi. Ta sii xaan cuñi ndi cha cuenda cuan.

3

¹ Ta yucuan chaha ña cunyeé que cha ma cote yoso caa cuahan ndo chihin Nyoo. Ta natyaji iñi tyi ndojí ñuu Atenas.

² Ta tachí chi yañi yo ra Timoteo na cahun ra cunyehe ra chi ndo. Maa ra sacuví ra tyiño nuu Nyoo vatyi iin ri chihin ndi cahán ra tuhun yoso caa cacú añima yo sahá ra Cristo. Tachí ndi chi ra nu nyicú ndo na sanduní ca ra iñi ndo ta sandunyeé ca ra iñi ndo tacuhva vatyi chinó ca iñi ndo chi Nyoo.

³ Tyicuan caa ta ni noo ndo ta ma ndu uvi iñi ndo cha cuenda cha nyehé ndo tindoho. Vatyi nyoho chitó ndo vatyi nyaá yo cha nyehe yo tindoho tyehé caa.

⁴ Vatyi ta ninyaá ca ndi chihin ndo, catyi ndi chi ndo vatyi cha cuñi quichi quiví cha nyehé yo tindoho. Ta chitó vaha maa ndo tyi tyicuan caa cuví.

⁵ Yucuan chaha ña cunyeé que cha cuñi cote tuhun ndo. Ta tachí tyiño chihin ra Timoteo na nyehe ra yoso caa cuhva cuahan chinó iñi ndo chi Nyoo. Vatyi yuhví coto sandavi ñaha cuhna chi ndo ta nandihví tucu ndo nu quíñi caa inga chaha. Vatyi tu tyicuan caa, cucunaa tandihí tyiño sahá ndi nu nyicú ndo.

⁶ Soco vityin cha nachahá ra Timoteo cha chahan ra nu nyicú ndo ñuu Tesalónica chiña. Ta nacatyí ra chi ndi vatyi ñi iñi ndo chinó iñi ndo chi Nyoo. Ta cuñi xaan ndo chi tahan ndo. Ta catyi ra tyi tyicuan ri nicohón iñi ndo chi ndi ta cuñi xaan ndo nyehe ndo chi ndi, tari nyuhu, cuñi tucu maa ndi nyehe ndi chi ndo.

⁷ Yucuan chaha, yañi, vasi cuaha cha cuví chi ndi ta nyehé ndi tindoho, soco vaha xaan cuñi ndi cha chitó ndi vatyi nyoho vaha chinó iñi ndo chi Nyoo ta ña sahá ndo chi ra.

⁸ Tari quiví cha nduchahá ñáyivi ndi, cuñi maa ndi cuhva cha nacoto ndi vatyi nyoho ñihi cuahan ndo chihin Nyoo.

⁹ Nyacua ña ñihí ndi cuhva nacuhva ndi tyahví nyoo chi Nyoo cha cuenda ndo. Vatyi sii xaan cuñi ndi nuu Nyoo cha cuenda vatyi vaha cuahan ndo chihin ra.

¹⁰ Chicán tahvi xaan ndi chi Nyoo ñicahñu ta cha cuaa, vatyi cuñi ndi cahun ndi cunyehe maa ndi chi ndo. Tyicuan ta cuví sandunaní ndi cha chinó iñi ndo.

¹¹ Ta vityin nyatú ndi na tyinyee maa Nyoo Sutu yo ta Sutu Mañi yo Jesucristo tacuhva cuvi cuhun ndi nu nycú ndo.

¹² Ta na tyinyee ca Sutu Mañi yo Jesucristo chi ndo tacuhva cuñi ca ndo chi noo noo tahan ndo ta chi tandihi ñáyivi tari cuñi nyuhu chi nyoho.

¹³ Tacuhva vatyí cuni ca iñi ndo ta cunduvii ndihi añima ndo. Ta ma coo ca cuatyí ndo nuu Nyoo Sutu yo quivi quichi tucu Sutu Mañi yo Jesucristo chihin tandihi ca ñu yihí cuenda ra.

4

Cuhva cha tahán iñi Nyoo cha coo yo

¹ Vityin yañi, chacú ndahvi ndi nuu ndo ta chahá ndi tuhun chi ndo chihin ndusu yuhu Sutu Mañi yo Jesucristo, na coo ca ndo tari cuhva sañahá ndi chi ndo, cuhva tahán iñi Nyoo. Ta sañihi ca ndo coo ndo tyicuan caa noo noo quivi.

² Nyoho cha chitó ndo yoso caa chahá ndi cuhva chi ndo tari chahá tucu maa Sutu Mañi yo Jesús cuhva chi ndi.

³ Cha cuñi Nyoo, ican cuvi ihya: Cha ñacuhva ndihi ndo chi ndo chi ra tacuhva sanduvii ndihi ra añima ndo. Ta ni noo ndo ta ma coo ndo chihin noo ñaha sihi o rayi tatu ñima ñasihi o yíi ndo cuvi.

⁴ Ta tahan tahan ndo cuñi chi coto ndo yoso caa coo ndo chihin ñasihi ndo. Coo vii ndo chihin ña chihin cha cuñi ndo chi ña.

⁵ Ñima chihin cha quichi cuvi iñi ndo cha quiñi caa tari nyacuví ñáyivi cha ña ñohó nuu chi Nyoo.

⁶ Ta ni noo ndo ta ma sandavi ñaha ndo chi yañi ndo ta coo ndo chihin ñasihi ra. Vatyí Sutu Mañi yo, ñihi xaan tachí tuñi ra chi ñu sacuví tyicuan caa, tari cuhva catyí ndi chi ndo.

⁷ Vatyí Nyoo nacanā ra chi yo vatyí tacuhva sacuvi yo cuhva cuñi maa ra, ta ñima noo cuhva quiñi caa.

⁸ Ta yucuan chaha yóo ñu cha ña cuñi tyasoho tuhun ihya, ñima tuhun ñáyivi ri ña tyasohó ñu, soco tuhun Nyoo ña tyasohó ñu. Vatyí suri maa Nyoo chahá ra Tatyí Ii ra chi ndo.

⁹ Soco tuhun cha cuñi yo chi tahan yo, ña chiñuhú cha tyai nu tutu ihya tuhun cuan. Vatyí suri maa Nyoo cha sañahá ra chi ndo vatyí cuñi yo chi tahan yo cuenda Nyoo.

¹⁰ Ta tyicuan caa cuñi ndo chi tandihi tahan yo ñicahnu Macedonia chiña. Soco chacú ndahvi nuu ndo yañi, vatyí na cuñi ca ndo chi ñu noo noo quivi.

¹¹ Nducu ndo cuhva coo vii ndo. Ta ma tyihí ndo chi ndo nu ña tahán chi, soco ñin ri tyiño maa ndo çaça xiñi ndo. Ta saha tyiño ndo chihin ndaha ndo tari cuhva catyí ndi chi ndo quivi cuan.

¹² Tyicuan caa sacuvi ndo tacuhva vatyí ñáyivi ña ñohó nuu Nyoo cuasaha ñu ñáyivi chi ndo. Ta ñahri cuacumañi chi ndo.

Yoso caa cucuvi quivi quichi Sutu Mañi yo Jesús inga chaha

¹³ Yañi, ña cuñi ndi cha ma coto ndo ñáá cha cuvi chi ñáyivi chihí, vatyí coto nducuihya iñi ndo tari nducuihyá iñi ñáyivi cha ma tahan chi nyehe chi Nyoo.

¹⁴ Ta tari cha chinó iñi yo vatyí chihí ra Jesús ta nandoto ra, tyicuan caa chinó tucu iñi yo vatyí Nyoo cusanandoto ra chi ñu ndiyi cha chinó iñi chi ra.

¹⁵ Yucuan chaha catyí ndi chi ndo tari sañahá Sutu Mañi yo chi ndi. Vatyí yoó cha nyitó yo nyacua nya quivi quichi ra, ñima xihna ca yo cuhun ican saha ñu cha yahá chihí.

¹⁶ Vatyí suri maa Sutu Mañi yo cunoo xica ra andivi, ta cucana chaa ra vatyí maa ra cuvi ra nyacá ñaha. Ta cucana chaa noo ra cuvi nuu chí ángel. Ta cunativí trompeta Nyoo. Tyicuan ta ñáyivi cha yihí cuenda ra Cristo ta chihí ñu, xihna ca ñu cunandoto.

¹⁷ Yahá cuan ta yoó cha nyitó ca yo cundaa xica yo ñin ri chihin ñu nu vico, nu cunañihi tahan yo chihin Sutu Mañi yo ityí andivi. Ta yucuan ta cucunyya yo chihin ra tyicuan ri maa.

¹⁸ Yucuan chaha sanduniñi ndo iñi tahan ndo chihin tuhun ihya.

5

¹ Soco ama o ñáá quivi cucuvi tuhun ihya, ña ñiñi cha cahin tuhun cuan chihin ndo yañi.

² Vatyí cha chitó vaha maa ndo vatyí ma tuvi ri iñi yo ta cuchaa quivi quichi tucu Sutu Mañi yo. Vatyí tari cuhva quihvi noo ra suhu vehe ñáyivi cha cha cuaa, tyicuan caa cucuvi.

³ Vatyí quivi cha catyí ñáyivi vatyí vaha xaan iyó ñu, ta ñahri maa cha yuhvi ñu, tyicuan ta sana iñi ñu ta quichi tindoho cuan siqui ñu. Tari noo ñaha sihi cha cuacacu sehe, sana iñi ña ta quihvi cha uhvi chi ña. Ta tyicuan caa cucuvi chi ñáyivi quivi quichi Sutu Mañi yo, vatyí ma cuvi cono ñu.

⁴ Soco nyoho yañi, ñima ca nu ñaa iñi nycú ndo ta catyí ndo vatyí sana iñi ndo ta cuchaa chi quivi Sutu Mañi yo, tari sana iñi ñáyivi tatu quihvi ra suhu vehe ñu.

⁵ Vatyí tandihi yo chitó yo yoso caa tahán chi coo yo vatyí Nyoo sandundichin ra añima yo, ta ña iyó ca yo nu ñaa iñi tari ñu ña ñohó nuu Nyoo.

⁶ Yucuan chaha ma cuvi yo tari inga ñu cuan. Tari quivi cha quixí ñu vatyí ña quichahá ñu cha ndichi Sutu Mañi yo. Soco yoó cuātu tuhva yo ta cachi coo yo.

⁷ Vatyí ñu quixí, quixí ñu cha cha cuaa, ta ñu chihí xaan ndixí, chihí ñu cha cha cuaa.

⁸ Soco yóo cha cuví yo ñu cuenda cha ñicahñu, nacachi cōo yo. Ta tari noo sindaro sahá ra cuenda chí ra chihin noo cha tyaá ra pechu ra, tyicuan caa saha yo cuenda chí yo chihin cha ñi ñi yo chinó ñi yo chí Nyoo, ta chihin cha cuñi yo chí tandihí ñáyivi. Ta tari sindaro sahá cuenda ra xiñi ra chihin noo caa, tyicuan caa cuñi chí cha sahá yo cuenda chí yo chihin cha yihí ñi yo tyi cacu yo.

⁹ Vatyí Nyoo ña tyaá ra cuhva chí yo vatyí tachi tuñi ra chí yo, soco nacachí ra chí yo vatyí cacu yo cha cuenda Sutu Mañi yo Jesucristo.

¹⁰ Vatyí ra Jesucristo chihí ra cha cuenda yo vatyí tacuhva coo yo ñin ri chihin ra. Ñahri saha vasi cha chihí yo o iyó ca yo, soco tandihí yo coo yo ñin ri chihin ra.

¹¹ Yucuan chaha sanduní ca ndo ñi tahan ndo ta sandunyeec ca ndo ñi ñu, tari cuhva cuahan nyacuví ndo vityin.

Nu chahá ra Pablo tuhun chí ñu

¹² Soco yañi, chacú ndahví ndi nuu ndo, na saha ndo ñáyivi chí ra sahá tyiño nu nycú ndo. Vatyí nyisó ra tyiño cuenda Sutu Mañi yo ta chahá ra tuhun chí ndo.

¹³ Cuñi chí cha saha xaan ndo ñáyivi chí ra chihin cha cuñi ndo chí ra. Vatyí sacuví ra tyiño Sutu Mañi yo. Ta vaha cōo ndo chihin tahan ndo cuenda Nyoo.

¹⁴ Ta tyatyíño ndi chí ndo yañi, vatyí cuhva ndo tuhun chí ñu cha ña cuñi saha tyiño. Ta sanduní ndo ñi ñu cha ña ñi ca ñi. Ta tyinyee ndo chí ñu vita cuñi vatyí ta chíno vaha ca ñi ñu. Ta cūcama ñi ndo chihin tandihí ñáyivi.

¹⁵ Saha ndo cuenda coto sacuvi ndo cha ña vaha chihin ñu nyacuví cha ña vaha chihin ndo. Ndūcu ndo cuhva sacuvi ndo cha vaha chihin tahan ndo cuenda Nyoo ta chihin tandihí ñáyivi.

¹⁶ Tyicuan ri cūsi cuñi ndo.

¹⁷ Ta çacan tahvi ndo tyicuan ri maa.

¹⁸ Naçuhva ndo tyahví nyoo chí Nyoo cha cuenda tandihí cha cuví. Vatyí ican ihya cuví cha cuñi Nyoo cha sacuvi yo cha cuví yo ñu chinó ñi chí ra Cristo Jesús.

¹⁹ Ma ndahva ndo ñuhú Tatyí li cha nyaá añima ndo.

²⁰ Ma cuacu nya ndo tuhun Nyoo cha cahán noo ra cahán tuhun chahá Nyoo.

²¹ Tñin cuenda ndo tandihí cha cahán ra. Ta naçuehen ndo cha vaha.

²² Cuaçhiyo ndo nuu tandihí cha quiñi caa.

²³ Ta maa Nyoo ra iyó cha taxi ri chii, na sanduvii ca ra añima ndo tacuhva vatyí ñin ri chí maa ra nacuhva cuenda ndo chí ndo. Ta na cocumi ra añima ndo ta cha chíni tuñi

ndo ta coño ñuhu ndo tacuhva vatyí ma coo ca cuatyí ndo quívi quichi tucu Sutu Mañi yo Jesucristo.

²⁴ Ra cha nacachí chí ndo, cuví cunyeec ñi yo chí ra, vatyí maa ra cusacuvi ra tandihí maa ihya.

Nu ndihí cahán ra Pablo ta chahá ra nocumi chí ñu

²⁵ Yañi, çacan tahvi ndo cha cuenda ndi.

²⁶ Ta naçuhva ndo nocumi chí tandihí yañi yo cuenda Nyoo.

²⁷ Tyatyíñé chí ndo chihin ndusu yuhu Sutu Mañi yo vatyí saçuaha ndo carta ihya nuu tandihí tahan yo cuenda Nyoo.

²⁸ Ta na nasoco Sutu Mañi yo Jesucristo chí ndo. Ta na cuví chí tyicuan caa.

Carta Cha Cu Uvi Cha Sacuhun Ra Apóstol Pablo Chi ñáyivi Ñuu Tesalónica Cha Yihí Cuenda Nyoo

Nu tyaq ra Pablo ta ra tahan ra noo tutu chi ñu ñuu Tesalónica cha yihí cuenda Nyoo

¹ Yuhu ra Pablo chihin ra Silvano ta ra Timoteo, tyaá ndi noo tutu ihya tyi sacuhun ndi chi ndo cha cuví ndo ñu yihí cuenda Nyoo ñuu Tesalónica chiña. Vatyí ñin ri cuví ndo chihin Nyoo Sutu yo ta chihin Sutu Mañi yo Jesucristo.

² Ta na nasoco Nyoo Sutu yo ta Sutu Mañi yo Jesucristo chi ndo. Ta na cuhva ra cha taxi ri coo añima ndo.

Nu catyi ra Pablo yoso caa cusacutuñi Nyoo chi ñu iyó cuatyí quivi quichi ra Cristo

³ Nyoho yañi, tyicuan ri cuñi chi cha nacuhva ndi tyahvi nyoo chi Nyoo cha cuenda ndo, vatyí tyicuan caa tahán chi cha sacuví ndi cha cuenda cha ñihi ca cuahan chinó ñi ndo chi Nyoo noo noo quivi, ta siin ri cuñi xaan ca ndo chi tahan ndo.

⁴ Yucuan chaha si cuñi ndi cahán ndi tuhun ndo chihin nuu ñu yihí cuenda Nyoo inga ca vehe ñuhu. Vatyí nyoho cama xaan ñi ndo ta vaha xaan chinó ñi ndo chi Nyoo cha ni ri ca yahá ndo tandihí tindoho sanyehé ñáyivi chi ndo.

⁵ Ihya sañahá chi yo vatyí vaha cuhva sacutuñi Nyoo chi yo, vatyí nu ndihí tuhun cusaha Nyoo tuhun vatyí naña tucu nyoho quihvi ndo nu nyacá ñaha ra. Vatyí cha cuenda tuhun ra, nyehe xaan ndo tindoho vityin.

⁶ Ta cha cuenda chi Nyoo, vaha cha cutyiyahvi ra chihin tindoho chi ñu sanyehé tindoho chi ndo.

⁷⁻⁸ Ta chi nyoho cha nyehé ndo tindoho sahá ñu, cuhva ra cha nyitatu ndo tari cuhva tucu ra chi nyuhu, quivi cuquichi tucu Sutu Mañi yo Jesucristo nya andivi chihin ángel cha iyó xaan tunyee ñi ra chi, quichi ra chihin ñuhu cha cayú. Vatyí cutachi tuñi ra chi ñáyivi ña ñohó nuu Nyoo, ñu ña quichahá tuhun ra, tyi cuví ra Sutu Mañi yo Jesucristo, ra quichí sacacu chi yo.

⁹ Ñu cuan, cundoho ñu ta ma ndihí maa cha ndoho ñu, ta cunaa ñu nuu Sutu Mañi yo Jesucristo vatyí ma nyehe ñu chi ra. Ni ma nyehe ñu ñana cha cahnu cuví ra chihin tunyee ñi ra

¹⁰ quivi cuquichi ra. Vatyí quivi cuan ñu yihí cuenda ra cusacahnu ñu chi ra, tandihí ri ñu chinó ñi chi ra. Ta mahñu ñu, ñohó

tucu nyoho vatyí chinó ñi ndo cha ndaa cha chahá ndi chi ndo.

¹¹ Yucuan chaha tyicuan ri chicán tahvi ndi chaha ndo, na tyinyee Nyoo yo chi ndo tacuhva na saha ra tuhun vatyí naña ndo cha cuví ndo ñáyivi nacachí ra. Ta chicán tahvi tucu ndi chaha ndo na tyinyee ra chi ndo tacuhva cuví sacuví ndo cha vaha chihin tunyee ñi ra. Ta tandihí tyiño sahá ndo nuu ra cuacacu vaha, suri cha cuenda tunyee ñi chahá ra chi ndo vatyí chinó ñi ndo chi ra.

¹² Tacuhva sacahnu ñáyivi sivi Sutu Mañi yo Jesucristo, vatyí nyehé ñu cuhva iyó ndo. Ta maa ra cusacahnu ra chi ndo nuu ñáyivi cha cuenda tumañi ñi cha chahá Nyoo chi ndo cha cuenda ra.

2

Ra cha ñahri maa ley Nyoo iyó chi

¹ Ta cha cuenda quivi cuquichi Sutu Mañi yo Jesucristo nu cusandu ñin ri ra chi yo, cuñi cahin vityin, nyoho yañi. Vatyí chacú ndahvi nuu ndo,

² ma vatyí xaan cutondo xiñi ndo. Ni ma nayuhvi ndo vatyí nyacua nya tatyí ñavaha ta cucatyí chi chi ndo vatyí cha chaa quivi Sutu Mañi yo, ta nyacua nya ra cahán tuhun Nyoo ta cucatyí ra vatyí cha chaa quivi cuan, ta cutyaa ra nu carta ta cucatyí ra tyi yuhu sacuhin carta cuan chi ndo.

³ Ni noo cuhva ma cuhva ndo cha sandavi ñaha ñu chi ndo. Vatyí cha ni cumañi ca chaa quivi cuan cuaha xaan ñu cusandihí ñu cha chino ñi ñu chi Nyoo ta cundicuita rayí ca ñahri ley Nyoo iyó chi, ra cacu vatyí cunaa cuví ra cuan.

⁴ Ican ra cuví ra xaan ñi chi Nyoo. Cundicuita ra siqui tandihí cha nyisó sivi Nyoo. Tandihí cuhva sacahnu ñáyivi chi Nyoo cunducuita ra siqui. Ta nyacua nya chichi vehe ñuhu cahnu Nyoo ta cucunyaa ra ta cunyaca ñaha ra, cusaha ra tyi Nyoo cuví ra.

⁵ ¿Atu ña nicohón ñi ndo vatyí ta ni nyaa que chihin ndo cahin tuhun ihya chihin ndo?

⁶ Soco vityin nyoho chitó ndo ñáá tuhun cha ña nducuita ñaha ra tacuhva vatyí nducuita ra soco nya quivi tahán maa chi.

⁷ Cha iyó tuhun cha ña quichahá ñáyivi chi Nyoo siqui ñuhu ñayivi, soco iyó xehe chi, vatyí iyó noo cha chasí, ta ña chahá cuan cha nducuaaha chi. Soco quivi canyaha cuan, cunduñihi cha quiñi caa cuan.

⁸ Tyicuan ta cundicuita ra quiñi caa cuan ta Sutu Mañi yo cucahvi ra chi ra chihin tatyí yuhu ra ta cusanaa ra chi ra chihin cha xiño ra quivi cuquichi ra.

⁹ Ra quiñi caa cuan, cuenda cuihna cuquichi ra. Ta tandihi tunyee iñi cuihna cucoo chi ra, ta cusandavi ñaha ra chi ñáyivi chihin seña ta milagru ta cha iyo.

¹⁰ Tandihí ri nuu cha ña vaha cucotyíño ra tacuhva cuvi sandavi ñaha ra chi ñáyivi cha cucunaa. Vatyí ñu cuan ña cuñí ñu quichaha ñu cha ndicha tacuhva cuvi cacu ñu.

¹¹ Ta yucuan chaha cucuhva Nyoo vatyí cusandavi ñaha cha ña vaha cuan chi ñu. Ta cuchino iñi ñu cha ña ndicha.

¹² Tacuhva vatyí cutachi tuñi ra chi tandihí ñu vatyí ña cuñí ñu chino iñi ñu cha ndicha. Ta tahán ca iñi ñu sacuví ñu cha ña vaha.

Nu cahán ra Pablo tuhun ñu cha nacachí Nyoo vatyí cacu ñu

¹³ Soco tyicuan ri cuñí chi cha nacuhva ndi tyahví nyoo chi Nyoo cha cuenda nyoho yañi. Vatyí cuñí xaan Sutu Mañi yo chi ndo. Vatyí Nyoo nacachí ra chi ndo nyata quívi xihna ri vatyí cuacacu ndo cha cuenda cha sanduvaha Tatyí lí ra añaíma ndo ta cha cuenda cha chinó iñi ndo cha ndicha.

¹⁴ Yucuan cuenda nacana Nyoo chi ndo quívi cahán ndi tuhun ra chihin ndo tacuhva vatyí cuñihi ndo chihin cha cahnu cuví Sutu Mañi yo Jesucristo.

¹⁵ Yucuan chaha sanii ndo iñi ndo, nyoho yañi. Ta ma naa iñi ndo tuhun cha sañaaha ndi chi ndo ta ni nyaa ca ndi chihin ndo. Ni ma naa iñi ndo tuhun cha tyaá ndi nu tutu cha sacuhun ndi chi ndo.

¹⁶⁻¹⁷ Sutu Mañi yo Jesucristo ta Nyoo Sutu yo cuví ra cha cuñí chi yo. Ta cha cuenda tumañi iñi cha chahá ra chi yo sanduní ra iñi yo tyicuan ri maa. Ta chahá ra cha cuita iñi yo coo yo chihin ra. Ta na nacuhva maa ra cha sii cuñi añaíma ndo. Ta na sandunanii ra iñi ndo, tacuhva cuvi cahán ndo ta sacuví ndo tandihí nuu cha vaha.

3

Nu ndihí cahan ra Pablo na cacan tahvi ñu chaha ra

¹ Nu ndihí tuhun, nyoho yañi, cacan tahvi ndo chaha ndi tacuhva vatyí numi ri chaa tuhun Sutu Mañi yo tandihí ri ityi. Ta na quichaha ñáyivi ta natiin cuenda ñu tari natiin cuenda nyoho.

² Cacan tahví tucu ndo tacuhva vatyí na cacu ndi ndaha ñáyivi ña vaha, ñu quiñi iyó. Vatyí ña tandihí ñáyivi chinó iñi ñu chi Sutu Mañi yo.

³ Soco Sutu Mañi yo ndicha ra. Ta maa ra cuasaquehen ityi ra chi ndo, ta cuasaha cuenda ra chi ndo coto tiin ra ña vaha chi ndo.

⁴ Ta cunyeé xaan iñi ndi chi Sutu Mañi yo vatyí nyoho sacuví ndo tari cuhva catyí ndi chi ndo, ta cusacuvi ca ndo.

⁵ Ta vityin na tyinyee ca Sutu Mañi yo chi ndo tacuhva cuñi ca ndo chi ñáyivi tari maa ra cuñí ra chi ñu. Na tyinyee ra chi ndo na cucama iñi ndo cuhva nyehe ndo tindoho, tari ra Cristo cunyeé xaan iñi ra nu nyehe ra tindoho.

Tahán chi cha saha tyiño yo

⁶ Ta vityin chihin ndusu yuhu Sutu Mañi yo Jesucristo, catyí ndi chi ndo, nyoho yañi, ma cutahan ndo chihin yañi yo ra ña cuñí saha tyiño, ta ña iyó ra cuhva sañaaha ndi chi ndo.

⁷ Vatyí nyoho chitó ndo yoso caa tahán chi coo ndo tari cuhva sañaaha ndi chi ndo. Vatyí nyuhu ña chinyicu ndi chihin ndo cha ña sahá tyiño ndi.

⁸ Ta ni ña chachí ndi cha chii ndo cha ña tyiyahví ndi. Soco sahá tyiño ndi ñicahñu ta cha cuaa vatyí ña cuñí ndi coso ndi siqui ni noo ndo.

⁹ Vasi iyó chi ityi chi ndi cha cacan ndi cha tyinyee ndo chi ndi, soco nyuhu sahá tyiño ndi vatyí cuñí ndi sañaaha ndi noo cuhva vaha cunyicon ndo.

¹⁰ Vatyí quívi chinyaa ndi chihin ndo, catyí ndi chi ndo vatyí ñu cha ña cuñí saha tyiño, ma cachi ñu.

¹¹ Cahán ndi siqui ihya vatyí ñihí ndi tuhun vatyí yihí ndo chicá noo yanga ri ndo ta ñahri maa tyiño sahá ndo.

¹² Chi nyoho cha iyó ndo tyicuan caa, catyí ndi chi ndo chihin ndusu yuhu maa Sutu Mañi yo Jesucristo, na casaha tyiño vaha ndo, ta yaha ndo noo noo quívi.

¹³ Yañi, ma cutatu ndo sacuvi ndo cha vaha.

¹⁴ Tatu iyó noo ra ña cuñí quichaha tuhun cahán ndi nu tutu ihya, saha ndo cuenda chi ra ta ma cutahan ndo chihin ra tacuhva na cucahan nuu ra.

¹⁵ Soco ma cuxaan iñi ndo chi ra, soco cuhva ndo tuhun chi ra vatyí yañi yo cuví ra.

Nu ndihí cahan ra Pablo

¹⁶ Sutu Mañi yo taxi ri iyó añaíma ra, ta suri maa ra na cuhva ra cha taxi ri coo añaíma ndo tandihí ri cuhva tandihí ri quívi. Ta nacuhva ndo cha cunyaa vaha ra chihin tandihí ndo.

¹⁷ Yuhu ra Pablo tyai nocumi ihya chi ndo chihin ndahi, ta chihin letre. Ta tyehe caa tyihí firme nu tandihí carte. Ta tyehe caa tuhvé tyai.

¹⁸ Ta Sutu Mañi yo Jesucristo na nasoco ra chi tandihí ri ndo. Ta na cuvi chi tyicuan caa.

Carta Cha Xihna Ri Sacahun Ra Apóstol Pablo Chi Ra Timoteo

Nu tyaq ra Pablo noo tutu chi ra Timoteo

¹ Yuhu ra Pablo cuví noo apóstol chi ra Jesucristo vatyí tachí ra chíi na caque tyiño ra. Maa Nyoo cuví ra sacacú chi yo. Ta ícan ra catyí tyí sacuvi tyiño ihya, ta Sutu Mañi yo Jesucristo ñandíhi. Vatyí maa ra cuví ra cha yihí ñiño yo.

² Tyaí tutu ihya chi yoho Timoteo vatyí sehe vahi cuví chuun cha cuenda cha chinó ñiñun tuhun ra Cristo cha sacoté chuun. Ta cuñí vatyí nasoco Nyoo Sutu yo ta Sutu Mañi yo Jesucristo chuun. Ta na nyehe ndahví ra chuun. Ta na coo ca cha taxi ri añimon saha ra.

Nu sañaha ra Pablo chi yo yoso caa saha yo cuenda tuhun cha ña ndicha

³ Quiví quite ñuu Éfeso chíña cha cuaquichí ityí Macedonia ihya, catyí chuun na ndqun Éfeso chíña ta catyun chi suhva ñu vatyí ma sañaha ñu tuhun cha ña ndicha. Ta vityin catyí tiqui chuun na sacuvi con tari cuhva catyí chuun quiví cuan.

⁴ Catyun chí ñu cuan vatyí ma tyaa ñu xiñi ñu tuhun tyis, ni tuhun cha cuví chi noo noo sutu chahnu ñu. Vatyí cha nuu cha tyinyeé chí chí yo, satondó chí xiñi yo. Maa maa ri cha ñima ri tuhun cuví yuhu yo. Ña tyinyeé chí chí yo cha chinó ñiño yo cha sacuví ca yo cha catyí Nyoo.

⁵ Soco tuhun cha catyí maa yo chí ñáyiví, cha cuñi yo chí tahan yo chíhín cha cacú añima yo cha sanduvahá Nyoo. Cuñi yo chí ñu chíhín cha vaha chicá xiñi yo ta chíhín cha ndicha chinó ñiño yo chí Nyoo.

⁶ Soco yihí ñu saña ñu tuhun ihya ta quita caxiín ñu chíhín tuhun cha ñima ri tuhun.

⁷ Cuñi ñu cuví ñu ñu sacuahá cuenda ley chahnu Nyoo soco ni maa ñu ta ña cutuñí ñiño ñu tuhun cahán ñu.

⁸ Chitó yo tyí ley cuan, vaha chí, soco cotyíño yo tari cuhva tahán chí.

⁹ Cuñí chí coto yo vatyí ni noo ley ña chicunyaq chí cha cuenda ñu vaha. Soco nyaá chí cha cuenda ñu sacahnú nu cahán Nyoo, ñu iyó cuatyí, ñu quiñi iyó, ñu ña saha ñáyiví chí Nyoo. Nyaá tucu chí cha cuenda ñu chahñí chí sutu, chí sihi, ta cha cuenda tandíhi ñu chahñí.

¹⁰ Nyaá ley cuan cha cuenda ñu iyó chíhín rayíi o ñusíhi ta ñima yíi ña o ñasíhi ra cuví. Nyaá chí cha cuenda ra ca iyó chíhín tahan yíi, ta cha cuenda ñu suhu cha chíi ñáyiví, ta ñu cuendu, ta ñu cha catyí: “Chito vaha Nyoo”, ta ña ndicha cha cahán ñu. Ta

suri nyaá tucu ley cuan cha cuenda yóo ñu cha ña nyicon cuhva cahan tuhún Nyoo.

¹¹ Ta tuhun tyaquí xaan cha sacoto Nyoo chí yo cha cuenda ra Cristo, ícan cuví tuhun cha nacuhva cuenda Nyoo chíi vatyí sacote chí ñáyiví. Maa ra cuví ra cha sacahnú yo.

Chahá ra Pablo tyahvi nyoo chí Nyoo vatyí nyehé ndahví ra chí ra

¹² Nacuhvé tyahvi nyoo chí Sutu Mañi yo Jesucristo cha cuenda tunyee ñiño cha chaha ra chíi ta nyehe ra chí tari noo ra chinó vaha ñiño, ta natyaa tyiño ra chíi vatyí sacuvi tyiño nuu ra.

¹³ Tyehe caa sacuvi ra chíhín vasi ta ityí chata ca yuhu cahán ña vahi siqui ra. Chica nyiquen chí ra ta cahán cuehi chí ra. Soco Nyoo cundahví cuñi ra nyehe ra chíi, vatyí yuhu ta chino ca ñiño chí ra, ta ña chite cha chinyacuví.

¹⁴ Ta tyinyeé xaan Sutu Mañi yo chíi. Ta chahá ra cha chino xaan ñiño yo chí ra, ta cha cuñi xaan yo chí ñáyiví vatyí ñin ri cuví yo chíhín ra.

¹⁵ Ta ndicha, cha ndicha vaha cuví tuhun ihya. Ta tahán chí cha chino ñiño yo, vatyí ra Cristo Jesús quichí ra siqui ñuhu ñáyiví ihya vatyí sacacú ra chí ñu iyó cuatyí. Ta yuhu cuví noo ra quiñi caa ca cha nuu tandíhi ñu cuan.

¹⁶ Yucuan chaha xihna que tava Nyoo chíi nu quiñi caa vatyí tacuhva sañaha ra Jesucristo chí ñáyiví tyí cuñi xaan ra chí ñu. Tacuhva vatyí nachino ñiño ñu ta cucoo ñu noo ñáyiví chaa cha ma naa ca maa.

¹⁷ Yucuan chaha na sacahnu yo chí ra cha tyicuan ri nyacá ñaha, ra cha ñahri tuhun chíhi iyó chí, ra cha ña cuví nyehe yo chí, ra cha noo ri maa ra cuví Nyoo ta chitó ra tandíhi cha chíñi tuñi. Na sacahnu yo chí ra ta na cunyaca ñaha ra tyicuan ri maa. Ta na cuví chí tyicuan caa.

¹⁸ Ihya tuhun chahí chuun, yoho Timoteo sehi, vatyí cañi tahan vahun chíhín tatyí ña vaha chíhín cha chinó ñiñun, ta chíhín cha vaha cuñi añimon tyí chitón tyí vaha sacuvun noo cha sacuvún vatyí suri tuhun ihya cachahá ra hermano chuun chíhín ndusu Nyoo.

¹⁹ Ta ma sandihun cha chinó ñiñun chí Nyoo ta sacuvun cha vaha na vaha cuñi añimon. Vatyí sava ra sandíhi ra tuhun ihya, yucuan chaha caquita xiin ra.

²⁰ Tyicuan caa sacuví tucu ra Himeneo ta ra Alejandro. Ta yucuan chaha nacuhva cuende chí ra chí cuhna, na cacutuhva ra yoso caa tahán chí sacuvi ra ta ma cahan ña vaha ca ra chí Nyoo.

2

Nu sañaha ra Pablo yoso caa cacán tahvi yo

¹ Catyí chi ndo vatyi cha nuu tandihí ca, tahán chi cha çacan tahvi ndo chi Nyoo cha cuenda tandihí ñáyivi. Ta naçuhva ndo tyahvi nyoo chi Nyoo cha cuenda ñu.

² Çacan tahvi ndo cha cuenda ra cacuvi rey ta cha cuenda tandihí ra cacuvi tyiño. Çacan tahvi ndo cha cuenda ra tacuhva cuví coo vaha yo, coo taxi yo, coo yo noo ñáyivi cachi nuu Nyoo ta nuu ñáyivi. Ta cusaha ñu ñáyivi chi yo.

³ Vatyi ihya cuví kuhva tahán iñi Nyoo ra cha sacacú chi yo.

⁴ Ta maa ra cuñi ra vatyi cacu tandihí ñáyivi. Ta cuñi ra cha nacoto ñu cha ndicha.

⁵ Vatyi iyó noo ri Nyoo. Ta iyó noo ri ra cuví chaa nuu Nyoo tyiño nuu yo. Ican ra cuví ra Cristo Jesús. Ta cuví ra ñáyivi tari maa yo.

⁶ Ta maa ra Jesucristo chaha ra ñáyivi ra tyiño nuu tandihí ñáyivi. Tyiyahví ra cuatyí yo tacuhva cuví cacu tandihí yo. Ta chinq cava cuan quivi tyaq maa Nyoo kuhva.

⁷ Cha cuenda ihya, tyatyño Nyoo chií, vatyi cahin tuhun ra, ta cuví apóstol ra, tachí ra chií vatyi sañahi chi ñu cha ñima ñu Israel cuví, yoso caa nachino iñi ñu cha ndicha. Ta nyoho chitó ndo tyi ña tuhvé cahin cuendu vatyi cuenda ra Cristo yihí.

⁸ Yucuan chaha cuñi vatyi çacan tahvi rayi tandihí ri ityi. Ta na coo ra noo ñáyivi ndi. Ta na sacahnu ra chi Nyoo chihin cha nacoñehe ra ndaha ra nuu Nyoo. Ta vaha çaca xiñi ra. Ta ma coo ra tisihi chihin ñáyivi. Ta ni ma xaan ra.

⁹ Tyicuan caa tucu ñusihi. Cachi kuhva cujhno ñu, tari kuhva tahán chi cuihno ñu yihí cuenda Nyoo. Ta ma iyo xaan cuihno ñu. Ma iyo xaan sanduvii ñu xiñi ñu. Ñima chihin xuhun cuan o yuu tyaqui, o chihin sahna yahvi xaan sanduvii ñu chi ñu.

¹⁰ Soco chihin cha cachi coo ñu ta chihin cha sacuvi ñu cha vaha na sanduvii ñu chi ñu, tari tahán chi sacuvi ñu nacuhva cuenda chi chi Nyoo.

¹¹ Ta taxi ri çunyaa ñusihi ta tyasoho ñu tuhun Nyoo. Ta saha ñu ñáyivi chi ra chahá tuhun chi ñu.

¹² Vatyi ña chahí cha sañaha ñusihi. Ni ña chahí cha cunyaca ñaha ñu chi rayi. Soco taxi ri na çunyaa ñu.

¹³ Vatyi xihna ca chi ra Adán savaha Nyoo ta yahá cuan ta chi cu Eva.

¹⁴ Ta ñima chi maa ra Adán sandavj ñaha ra ña vaha, soco chi ñasihi ra cuví sandavj ñaha ra ta chicoo cuatyí ña.

¹⁵ Soco ñusihi cucacu añima ñu cha cuenda cha sacacú ñu sehe ñu, ta sacuahnú vaha ñu chi chi. Soco tatu chinó vaha iñi ñu chi Nyoo ta cuñi ñu chi ra ta chi ñáyivi, ta cachi coo ñu nuu Nyoo ta nuu ñáyivi ñandihí.

3

Yoso caa tahán chi coo ra yihí ndaha chi ñu yihí cuenda ra Cristo

¹ Ndicha tuhun ihya: Tatu minoo ndo cuñi ndo quindaha ndo chi ñáyivi yihí cuenda ra Cristo, vaha xaan tyiño quichí cuví iñi ndo sacuvi ndo.

² Soco niñi cuñi chi vatyi ra yihí ndaha vehe ñuhu cuví ra noo ra ñahri cuatyí iyó. Ta cuñi chi cha coo noo ri ñasihi ra. Ta cuñi chi cha cuví ra noo ra tyihí tuñi vaha iñi yoso caa cunyacuví, noo ra vaha nuu ñáyivi. Ta cuñi chi vatyi vaha cuví ra chihin ñáyivi chaa vehe ra. Ta coto ra yoso caa sañahá ra.

³ Ma cuví ra noo ra tuhvé chihi ndixi, ni ma cuví ra noo ra nanducú tisihi. Ta ma cuví ra noo ra nducu xuhun noo kuhva ña vaha. Soco cuñi chi cha vaha ñáyivi cuví ra, ta cuví ra noo ra ña tuhvé cañi tahan. Ta ma cuví ra noo ra cuñi xaan xuhun.

⁴ Ta cuví ra noo ra yihí ndaha vaha ñasihi ta sehe: Noo ra nyacá ñaha chi sehe tacuhva vatyi quichaha ñu chi ra, ta saha ñu ñáyivi chi ra.

⁵ Vatyi tatu ña chitó ra cunyaca ñaha ra vehe ra, çyoso caa cusaha cumi ra vehe ñuhu Nyoo?

⁶ Ta noo ra nichaa chihin tuhun Nyoo ña tahán chi quindaha ra vehe ñuhu vatyi coto sacahnu ra chi ra ta tachi tuñi Nyoo chi ra, tari tachí tuñi ra chi cuihna vatyi cahnu sahá ra chi ra.

⁷ Ta siin ri cuñi chi vatyi cuví ra noo ñáyivi vaha nuu ñu ityi chata, coto tahan ra ticahan nuu ta cana cava ra chichi ndaha cuihna.

Yoso caa tahán chi coo noo ra tyinyee chihin tyiño vehe ñuhu

⁸ Ta tyicuan caa tucu ñusihi, cuñi chihin tyiño vehe ñuhu. Na cachi coo ra. Ma cuví ra noo ra cuendu, ta ma cuví ra noo ra tuhva chihi ndixi ñandihí. Ta ni ma nyiyo iñi ra saha canaa ra xuhun chihin noo kuhva ña vaha.

⁹ Cuñi chi vatyi cutuñi vaha iñi ra yoso caa tahán chi chino iñi yo chi Nyoo ta coto vaha ra tyi vaha cuahan ra chihin Nyoo.

¹⁰ Ta cuñi tucu chi cha nyehe xihna yo tatu vaha iyó ra chihin Nyoo tyicuan ta cuví sacuvi ra tyiño vehe ñuhu.

¹¹ Ta tyicuan caa tucu ñusihi, cuñi chi vatyi cuví ñu ñáyivi vaha. Ma ñiñi ñu cuendu. Ta cachi coo ñu. Ta niñi cuñi ñu chihin tandihí ri tyiño.

¹² Noo ra tyinyee chihin tyiño vehe ñuhu na coo noo ri ñasihi ra. Ta cuñi chi vatyi coto vaha ra cunyaca ñaha ra chi sehe ra ta ñáyivi nyicú vehe ra.

¹³ Vatyi ra tyinyee, tatu vaha sacuvj ra tyiño cha tahán chi sacuvi ra, cuahan ca ra

ityi nuu chihin Nyoo. Ta cuní ca iñi ra cahan ra tuhun cha chinó iñi ra chi ra Cristo.

Noo tuhun xehe cuenda cuhva chino iñi yo

¹⁴⁻¹⁵ Yihí iñi cha cuhin cha numi ri cunyeñi nu nyaún. Soco tatu cucuei, yucuan chaha tyai ihya chuun tacuhva coton yoso caa tahán chi coo ñáyivi cuenda Nyoo. Vatyí maa yo cuví yo vehe ñuhu Nyoo nyitó. Ta cuñi chi vatyí sañihi ca yo sañaha yo cha ndicha cha cumí yo chi inga ñáyivi.

¹⁶ Cha ndicha cuví vatyí yaha xaan cuhva cahnu tuhun xehe cha sanatuví Nyoo, vatyí coo yo tari iyó maa ra:

Nyoo nanduví ra rayi ta chicoq ra chichi noo coño ñuhu tari maa yo.

Ta catyí Tatyí li vatyí vaha ra.

Ta nyehe ángel chi ra.

Nicahnu ñuhu ñáyivi cahan ñu tuhun ra.

Ta chinó iñi ñáyivi chi ra nicacahnu ñuhu ñáyivi.

Ta cuanuhú ra nya gloria.

4

Nu catyí ra Pablo vatyí yihí ñu ma chino ca iñi ñu nu cuahan chí tyembu

¹ Soco cahan cachi Tatyí li ta catyí chi vatyí nu cuandihí tyembu yihí ñu ma chino ca iñi ñu chi ra Cristo vatyí cutyasoño ñu tuhun cahan tatyí ña vaha cha sandavi ñaha chí ñu. Ta cunyicon ñu ndusu ñuhu cuihna.

² Cutyasoño ñu tuhun cahan ñu cuendu. Ta ñu cuendu cuan ña tuví ca iñi ñu cuhva nyacuví ñu vatyí cha ndundavá xaan añima ñu. Tari cha cayú añima ñu chihin noo caa ihñi ta ndundavá chí cuví cuan.

³ Cucasi ñu cuan nu tandaha ñáyivi. Ta cucatyí ñu vatyí ña vaha cha cachi yo suhva nuu nyayu. Vasi chitó yo tyi tandihí nuu cha cachi yo, Nyoo savahá. Ta tandihí yo cha chinó iñi yo chí Nyoo ta chitó yo cha ndicha, cuví cachi yo ta nacuhva yo tyahvi nyoo chí ra.

⁴ Vatyí tandihí cha savahá Nyoo ta vaha. Ta ña tahán chí catyí yo tyi ña vaha. Cuví cachi yo tatu nacuhva yo tyahvi nyoo chí Nyoo.

⁵ Vatyí ndundií chí cha cuenda tuhun Nyoo ta cha cuenda cha chicán tahvi yo chí Nyoo.

Yoso caa noo ra vaha sacuví tyiño nuu ra Jesucristo

⁶ Tatu sañahun tuhun ihya chí tandihí yañi yo, cua cuvun noo ra vaha cahan tuhun ra Cristo Jesús. Ta tuhun cha chinó iñi yo ta tandihí tuhun ra Cristo cha nyicón, cua tyinyee chí chuun.

⁷ Soco ma quichahun tuhun cuendu, tuhun tondo cha iyó ñáyivi ihya. Vaha ca

sañahun chuun sacuvun maa maa ri cuhva cuñi Nyoo.

⁸ Cha sanívi yo ndunye coño ñuhu yo tyinyee chí suhva chí yo. Soco cha sanívi yo sacuví yo cuhva cuñi Nyoo, tyinyee chí chí yo tandihí ri cuhva, vatyí tyinyee chí chí yo ñáyivi ihya. Ta tyinyee tucu chí chí yo cha coo vaha yo nu cuchaa yo andivi.

⁹ Ta ndicha, cha ndicha vaha cuví tuhun ihya ta tandihí yo tahán chí cha chinó iñi yo.

¹⁰ Ta suri cha cuenda ihya sahá tyiño yo ta nyehe yo tindoho vatyí nyatú yo naquehen yo cha vaha cha chaha Nyoo nyitó chí yo. Vatyí maa ra cuví ra sacacú chí tandihí ñáyivi, ta xihna ca chí yoó cha chinó iñi yo chí ra.

¹¹ Ihya tuhun cua sañahun chí ñáyivi, ta cusañahun chí ñu na cutuhva ñu.

¹² Cachi sañahun chuun coto ma saha ñu ñáyivi chuun cha cuenda cha cuvún noo ra tyivaa. Soco sañahun noo cuhva vaha chí ñu chihin cuhva iyón, chihin cuhva cahun. Sañahun chí ñu, chihin cuhva cha cuñun chí Nyoo ta chí ñáyivi, chihin cuhva chicá xiñun, chihin cuhva chinó iñun, ta chihin cuhva sacuvún maa maa ri cha vaha.

¹³ Cha ni ri ca cha cumañi chai nu nyicú ndo, sacuaaha con tuhun Nyoo nuu ñu yihí cuenda Nyoo. Cuhva tuhun chí ñu ta sañahun chí ñu yoso caa caca vaha ñu ityi Nyoo.

¹⁴ Sañahun cuenda nyatu cha chahá Nyoo chuun quivi cha tyiso ra yindaha vehe ñuhu ndaha ra sicun ta cahan ra yoso cuhva chahá Tatyí li Nyoo chí ra.

¹⁵ Tyaa vaha xiñun tuhun ihya ta sacuvun. Tacuhva vatyí nyehe ñáyivi yoso caa cuahun ityi nuu ca chihin Nyoo.

¹⁶ Saha cuenda chuun chihin cuhva iyón. Ta saha cuenda cuhva sañahun chí ñáyivi ta ñaha saña ndahun cha vaha. Tatu tyicuan caa sacuvún cuacacun, ta cucacu ñu chiñí tuhun sañahun ñandihí.

5

Nu chahá ra Pablo tuhun chí ra Timoteo yoso caa cuhva ra tuhun chí ñu yihí cuenda ra Cristo

¹ Ma cahun chí noo ra chahnu, soco cuhva tuhun chí ra tari cha sutun cuví chí ra. Ta chí ra tyivaa cuhva tuhun chí ra tari cha yañun cuví chí ra.

² Ta chí ñu chahnu tari cha sihun cuví chí ñu. Ta chí ñu tyivaa, tari cha cuhvon cuví chí ñu. Ta sacuvun chihin cha vaha chicá xiñun.

³ Tyinyee chí ñu ndahvi ñu chihí yí tatu yori ñáyivi chí ñu cha tyinyee chí ñu.

⁴ Soco tatu iyó noo ñaha chihí yí ta iyó sehe ña, o sehe ñañi ña, cuñi chí cha cutuhva xihna maa ñu cha tyinyee ñu chí

ña. Na nichohon iñi ñu yoso caa saha cuenda sishi ñu chi ñu ta luhlu ñu. Ta tyicuan caa tahán chi cha saha cuenda tucu ñu chi ña vityin. Vatyí cha tyehe caa vaha xaan, ta cha tahán iñi Nyoo cuví.

⁵ Soco ñu chihí yíi cha ndooq noo tuhun ri maa, chi Nyoo tyihí ñu iñi ñu ta tyicuan ri chícán tahví ñu chi ra ñicahñu ta cha cuaa.

⁶ Soco noo ñaha chihí yíi cha nducú tusii iñi cha iyó ñayiví ihya, tari quiví cha chihí ña cha cuenda tuhun Nyoo cuví cuan, vasi iyó ña.

⁷ Sacoto tuhun ihya chi tahan yo tacuhva cha ma ñihi ñáyiví cuhva cahan ñu chi ñu.

⁸ Soco tatu yihí yo cha iyó ñáyiví chi yo cha chihí yíi ta ña chícá xíñi yo cha cuenda ñu, ta cha xihna ri cha cuenda ñu vehe yo, tari quiví cha ña chinó iñi yo chí Nyoo cuví cuan. Ta cahnu ca cuatyí yo ta ñima ca ñu cha ña chinó iñi chí Nyoo.

⁹ Nu tutu cha nyaá sivi ñu chihí yíi, na cunyaa sivi ñu, soco ñu cha yaha ca uñi xico cuiya. Ta cuví cunyaa sivi ñu tatu noo ri yíi ñu chiyo.

¹⁰ Ta cuñí chi tatu ñohó nuu vaha ñáyiví chí ñu cha cuenda cha vaha cha sacuví ñu: tatu sacuahnu vaha ñu sehe ñu, tatu chaha ñu cha cachi ñu chaa vehe ñu, tatu sacuví ñu tyiño nuu yañi yo chihin cha tandihí añima ñu chihin cha ndahví sahá ñu chí ñu, tatu tyinyee ñu chí ñu nyehé tindoho, tatu tyehe caa sacuví ñu tandihí nuu cha vaha, cuví cunyaa sivi ñu.

¹¹ Soco ma tyihí ndo sivi ñu cha ta chaa ca uñi xico cuiya coto coo quiví ta quichi cuví iñi ñu tandaha ñu inga chaha ta sandihí ñu tuhun sacuví ñu tyiño nuu ra Cristo.

¹² Ta tyicuan caa cucco cuatyí ñu vatyí ña sacuví ca ñu cuhva catyí ñu.

¹³ Ta siin ri tatu chícá noo suchan ri maa ñu tahan tahan vehe ñáyiví. Ta ñima yucuan ri soco chícá noo ndihí ñu chihin cuendu ñu. Ta tyihí ñu chí ñu noo nu ñahri cuenda ñu. Ta cahán ñu cha ña tahán chí.

¹⁴ Yucuan chaha vaha taxin ca na tandaha ñu inga chaha. Na coo sehe ñu. Na saha cuenda ñu vehe ñu. Ta ma cuhva ñu ityí chí ñu xaan iñi chí yo vatyí cahan nyaa ñu chí yo.

¹⁵ Tyehe caa catyí chuun vatyí yihí ñu cha sañá ñu chí Nyoo ta na nyicon ñu chí ra ña vaha.

¹⁶ Tatu noo ñu yihí cuenda Nyoo ta iyó noo ñáyiví chí ñu cha chihí yíi, cuñí chí cha tyinyee ñu chí ñu, tacuhva cha ma cuví ñu noo carga chí vehe ñuhu. Ta tyicuan caa ta cuví tyinyee ñu vehe ñuhu chí ñu chihí yíi cha ndicha ndicha chihuhú chí.

¹⁷ Ra chahnu ra nyisó tyiño vehe ñuhu, cuñí chí vatyí saha xaan ñu ñáyiví chí ra. Ta

cha xihna ca chí ra cahán tuhun Nyoo ta ra sañahá chí ñu.

¹⁸ Vatyí tuhun Nyoo catyí chí: “Ma tyihun yoho yuhu sindiquí nu saha tyiño tí tacuhva vatyí cuví cachi tí chiin.” Ta catyí tucu chí: “Iyó ityí chí ra cha sahá tyiño cha ñihí ra yahví ra.”

¹⁹ Tatu tyaá ñu cuatyí siqui noo ra chahnu ra nyisó tyiño vehe ñuhu, ta tatu ña quita uvi o uñi tahan cha ndaa, ma quichahun chí ñu tyaá cuatyí cuan.

²⁰ Soco ñu sañihi ca sacuví cuatyí cuñí chí cha catyí ndo chí ñu chihin nuu tandihí ñu nyicú vehe ñuhu tacuhva vatyí tandihí ca ñu na cuyuhví ñu sacuví ñu cha ña vaha.

²¹ Tyatyíñe chuun chihin nuu Nyoo ta chihin nuu Sutu Mañi yo Jesucristo, ta chihin nuu ángel cha nacachí ra. Ta catyí chuun vatyí quichahun cha catyí ihya ta ma cuhun tumañi iñi chí noo ra ta ní chí inga ra.

²² Ma numi xaan ri tyaa tyiño chí noo ra cha cuví ra tyiño vehe ñuhu. Coto ndoo cuatyí sacuví ra sicun. Saha vahun cuenda chuun chihin tandihí cha sacuvún ta ma cuhvon ityí chí cha ña vaha.

²³ Ta vatyí iyó noo cuehe chichun, ma cohun maa ri maa ndutya, soco cohun chíin vinu ñandihí.

²⁴ Yihí ñáyiví quetuví ri cuatyí ñu cha cumañi ca cutuñi chí ñu. Ta yihí ñu nya cha yaha cutuñi chí ñu ta cuquetuví cuatyí ñu.

²⁵ Ta tyicuan caa tucu cha vaha cha sacuví yo, ña xehe caá. Soco vasi ña tuví cha numi ri, ñima tyicuan ri cucohon xehe chí.

6

¹ Ñu cha cuví musu cuñí chí cha saha vaha ñu ñáyiví chí chitoho ñu. Tyicuan ta ma ñihi ñáyiví cuhva cahan ña vaha ñu siqui Nyoo ní siqui tuhun ra, cha sañahá yo.

² Ta tatu noo musu iyó chitoho ra cha yihí cuenda Nyoo, ña tahán chí cha ma saha ra ñáyiví chí ra vatyí yañi ra cuenda Nyoo cuví chí ra. Soco ñihi ca cuñí chí cha sacuví ra tyiño nuu ra, vatyí chinó tucu iñi maa ra chí ra Cristo, ta Nyoo cuñí ra chí ra. Sañaha tuhun ihya chí ñu hermano ta cuhva tuhun chí ñu na sacuví ñu.

Cuhva iyó yo ta cusíi cuñi yo

³ Tatu iyó noo ra cha sañahá inga tuhun cha ña chachí tahan chí chihin tuhun vaha cha sañahá Sutu Mañi yo Jesucristo, ta ní ri chihin tuhun vaha cha cuahan sacuaaha yo,

⁴ cuví ra noo ra cahnu sahá chí. Ta tahán xaan iñi ra cuví yuhu ra siqui noo cha ñima ri tuhun. Tari noo cuehe cuví cuan. Ta cha cuenda tuhun ihya cacú tisihí ta tuhun nyiyo iñi, tuhun cha cahán ña vaha chí tahan, ta tuhun cha ña vaha cuñí nyehe chí tahan.

⁵ Ta tyicuan ri cañi tahan ñu vatyí quiñi chica xiñi ñu, vatyí ña chitó ñu cha ndicha. Nyacua cuñi maa ñu tyi cusaha ganaa ñu xuhun chihin tuhun Nyoo. Ma cutahan ndo chihin ñu cuan.

⁶ Ndicha vatyí cha sacuvi yo cuhva catyí Nyoo ta ndoó yo vaha chihin cha cha chaha ra chi yo cuví chi tari noo cha tyayii iyó chi yo.

⁷ Vatyí ñahri nyiso yo vachi yo ihya ñayivi. Ta ñahri cuiso yo cunuhu yo quivi cúvi yo.

⁸ Soco tatu iyó cha cachi yo ta sahama ñihnó yo, na cusii iñi yo, ta na ndoo yo vaha chihin yucuan ri.

⁹ Soco ñu cuñi cutyayii, nducú nyehe ra ña vaha chi ñu. Caná cava ñu chichi xayu ra. Cutondó xiñi ñu chihin cha cuaha xaan cha quichi cuví iñi ñu. Ta sativi chi chi ñu ta nu ndihi tuhun cutivi ndihi ñu ta cunaa ñu.

¹⁰ Vatyí cha cuñi xaan yo xuhun, yucuan cuví nu caña tandihi ca nuu cha ña vaha. Ta yihí ñu cha tyehe caa cuñi xaan ñu xuhun, ta cha cuenda cuan sandihí ñu tuhun cha chinó iñi ñu tuhun Nyoo. Ta yucuan cuví nu suri chi maa ñu sanyehé ñu tindoho.

Lucha cha iyó chi yo cha chino iñi yo chi Nyoo

¹¹ Soco yoho cuvún noo rayii cuenda Nyoo. Caca cono chi tandihi cha quiñi caa cuan. Ta cūhun chata cha cuiti. Vaha cūn nuu Nyoo. Cūñi iñun chihin ra. Cūñun chi ñáyivi. Coo cha cama iñun chihin tandihi cha cuví chuun. Ta masu cūvi iñun.

¹² Ñihi sacuvun tyiño nuu Nyoo vatyí tyicuan caa tahán chi tyi chinó iñi yo chi ra. Ta ma saña ndahun ñayivi chaa cha ma naa ca maa cha chaha Nyoo chi yo. Vatyí ican cuenda cuan nacana Nyoo chuun, quivi catyí cachun tyi chinó iñun nuu cuaha xaan ra cuví cha ndaa.

¹³ Ta chihin nuu Nyoo, ra cha chaha ñayivi coo tandihi cha iyó, ta chihin nuu ra Cristo Jesús ra cha chaha vaha cuenda nuu ra Poncio Pilato, catyí chuun vityin,

¹⁴ na sacuvun tandihi cha catyí chuun tacuhva ma cuhvon cuhva cha cahan ñayivi chuun nyacua nya quivi quichi Sutu Mañi yo Jesucristo.

¹⁵ Na chaa maa quivi, Nyoo cusaquichi ra chi ra Cristo inga chaha. Ican ra cuví ra cha sacahnu yo, ta noo tuhun ri maa ra cuví Nyoo ra iyó xaan tunyee iñi chii. Rey cuví ra cuenda tandihi ca ra cuví rey. Ta nyacá ñaha ra chi tandihi ca ra cha nyacá ñaha.

¹⁶ Noo ri maa ra cuví ra ra ñahri tuhun chihí iyó chii. Ta iyó ra nu ndichin nu yori maa tuhva. Ta ni noo ñayivi ta nyehe ca ñu chi ra. Ta ni ña cuví nyehe ñu chi ra. Chi maa ra na sacahnu yo. Ta na cunyaca ñaha ra tyicuan ri maa. Ta na cuví chi tyicuan caa.

¹⁷ Ta ñu cha iyó cha tyayii chi ñayivi ihya, catyí chi ñu vatyí ma cahnu xaan saha ñu chi ñu. Ta ma cuita iñi ñu chi cha tyayii cha iyó chi ñu. Vatyí coto coo quivi ta ndihi cha tyayii cuan. Soco na cuita iñi ñu chi Nyoo nyitó, vatyí maa ra cuví ra chahá tandihi. Ta cuaha chaha ra chi yo tacuhva cusii cuñi yo.

¹⁸ Catyun chi ñu tyayii na sacuvi ñu cha vaha ta nii iñi ñu cūhva ñu cha iyó chi ñu chihin cha ma uhvi cuñi ñu.

¹⁹ Tyicuan ta coo cha tyayii ñu andivi ta cutyinyee chi chi ñu nu cuahan ca chi quivi. Ta tyehe caa cuví coo ñu ñayivi cha ma naa ca maa.

Nu ndihi chahá ra Pablo tuhun chi ra Timoteo

²⁰ Yoho Timoteo saha cumi vahun tyiño cha chaha Nyoo chuun. Ma tyasohun tuhun cha sñn caa, tuhun cha ñima ri tuhun. Ma quichahun tuhun cha catyí ñu vatyí cha chiñi tuñi cuví, vatyí ña ndicha.

²¹ Vatyí cha cuenda cuan yihí ñu cha quitá caxiin ñu ityi Nyoo. Ta ña chinó vaha ca iñi ñu cha ndicha.

Ta Nyoo na nasoco ra chi ndo.

Ta na cuví chi tyicuan caa.

Carta Cha Cu Uvi Cha Sacuhun Ra Apóstol Pablo Chi Ra Timoteo

Nu tyaa ra Pablo noo tutu chi ra Timoteo

¹ Yuhu ra Pablo cuví noo apóstol ra Jesucristo vatyí tachí ra chíi na caque tyiño ra. Vatyí tyicuan caa cuñí maa Nyoo, tyí cuñí ra cha sacote chí ñáyiví vatyí chahá ra noo ñáyiví chaa chí tandihí ñu cha ndu in ri chíhin ra Cristo Jesús vatyí nacuhva cuenda ñu chí ñu chí ra.

² Tyái tutu ihya chí yoho Timoteo. Ta cuñí xain chuun tyí tari cha sehi cuví chuun. Ta cuñí vatyí Nyoo Sutu yo ta Sutu Mañi yo Jesucristo na nasoco ra chuun. Ta na nyehe ndahví ra chuun. Ta na coo ca cha taxi ri cuñi añimon saha ra.

Nu catyí ra Pablo chí ra Timoteo tyí nacatyí ra chí ñáyiví tyí cuenda ra Cristo yihí ra

³ Tyicuan ri nicohón iñi tuhun yoho cuhva cha chicán tahví chí Nyoo ñicahñu ta cha cuaa. Ta nacuhvé tyahví nyoo chí ra cha cuendon. Nu maa ra sacuví yuhu tyiño chíhin cha vaha chicá xiñi, tari sacuví tucu ñáyiví chíi ta cha naha.

⁴ Tyicuan ri nicohón xaan iñi chuun ta nicohón xaan iñi tuhun yoso caa chacun quiví cuachiye chíña. Ta cuñí xain nyehi chuun inga chaha ta cusíi iñi chuhun.

⁵ Vatyí nicohón iñi yoso caa chingo xaan iñi cu Loida chiton chí Nyoo, ta cu Eunice sihun ñandihí. Tyicuan caa tucu yoho chinó xaan iñun vityin.

⁶ Yucuan chaha chahí tuhun chuun vatyí na saniun iñun ta cotyíño nyatu cha cahun tuhun Nyoo cha chahá ra chuun quiví tyisé ndahí sicun.

⁷ Nyoo ña chahá ra cha yuhví yo. Soco chahá ra noo tunyee iñi cahnú chí yo. Ta chahá ra vatyí cuñí yo chí tahan yo. Ta chahá ra cha cunyaca ñaha vaha yo chí yo.

⁸ Yucuan chaha ma cahan nuun cahun tuhun Sutu Mañi yo. Ta ni ri cha ma cahan nuu cha cuenda cha ñohí vehe caa cha cuenda ra. Soco chíhin tunyee iñi chahá Nyoo chuun ta chíhin cha iyó vaha iñun cunyeun tindoho cha vachí siquí yo cha cuenda tuhun Nyoo.

⁹ Vatyí ican ra sacacú chí yo. Ta nacana ra chí yo vatyí coo yo noo ñáyiví ii. Ñima cha cuenda cha vaha cha sacuví yo ta nacana ra chí yo, soco vatyí tyicuan caa tyaa ra cuhva nyata ni cumañi ca chingo ñuhu ñáyiví. Vatyí nya quiví cuan cuñí ra chí yo cha in ri cuví yo chíhin, ra Cristo Jesús.

¹⁰ Ta vityin cha quichí ra Jesucristo sacacú ra chí yo, nacotó yo vatyí tyicuan

caa cuñí ra chí yo. Ta nu quichí ra, sataní ra tandihí tunyee iñi cha iyó chí tuhun chíhi. Ta chíhin tuhun vaha cahan ra, tavá ra nu ndichin tuhun cha coo yo noo ñáyiví chaa cha yori cuví sativí.

¹¹ Nyoo tyaa ra tyiño chíi vatyí cahin tuhun ihya chíhin ñáyiví. Tachí ra chíi vatyí cuví noo apóstol chí ra, ta sañahí chí ñu cha ñima ñu Israel cuví.

¹² Yucuan chaha nyehí tandihí tindoho ihya. Soco ña cucahan nú vatyí chitó mai yóo chí chinó iñi. Vatyí nacuhvá cuende chíi chí ra, ta chitó vahí vatyí cuví saha cuenda ra chíi nyacua nya quiví quichí tucu ra.

¹³ Cunyicon tuhun vaha cha chahí chuun. Ta cõun chíhin cha chinó vaha iñun chí Nyoo. Tyicuan ri cuñun chí ñáyiví tahan yo. Vatyí yucuan cuví cha chahá Nyoo chí yo tyí in ri cuví yo chíhin ra Cristo Jesús.

¹⁴ Ta maa Tatyí li cha iyó añima yo na tyinyee chuun ta saha cumun tuhun vaha cha chahá Nyoo chuun.

¹⁵ Cha chitón vatyí tandihí ra ityí Asia chíña casandoq ra chíi, tari ra Fígelo ta ra Hermógenes.

¹⁶ Soco ra Onesiforo na nyehe ndahví Sutu Mañi yo chí ñáyiví chí ra vatyí cuaha xaan chaha quichí sandunyee ra iñi. Ta ña cucahan nuu ra cha cuenda cha ñohí vehe caa.

¹⁷ Soco quiví chinyaq ra ñuu Roma ihya, ña sandihí ra tuhun cha nanducu ra chíi nyacua nya cha ñañihí ra chíi.

¹⁸ Sutu Mañi yo nacuhva ra cha ñihi ra tumañi iñi quiví cha cutuñi chí yo nuu ra. Chitó vahun yoso cuhva tyinyee ra Onesiforo chí yo nya ñuu Éfeso chíña.

2

Noo sindaro vaha ra Jesucristo

¹ Ta yoho sehe luhli, sandunyee iñun chíhin tunyee iñi cha chahá ra Cristo Jesús chuun cha cuenda cha in ri cuví yo chíhin ra.

² Tuhun cha chíñun cha cahin nuu cuaha ñáyiví, nacatyí chí ra cha ni iñi chinó iñi chí Nyoo, ra cha cacuví sañaha chí inga ñu.

³ Ta cunyeun tindoho tari noo sindaro vaha ra Jesucristo.

⁴ Ni noo ra cuví sindaro ta ma cuví tyihí ra chí ra chíhin inga tyiño. Vatyí cuñí chí sacuví ra maa maa ri cha catyí ra cuví nuu chí ra.

⁵ Ta tyicuan caa tucu ra canyasiquí, ma saha canaa ra cha tahan chí saha canaa ra tatu ma cunyasiquí ra tari cuhva tahan chí.

⁶ Noo ra sahá tyiño chichí cuhu, tahan chí cha saha tyiño xihna ra, yucuan ta cachí ra cha quitá nu iyó tyiño sahá ra.

7 Caca xiñun tuhun cha catyí chuun ihya, ta maa Sutu Mañi yo cucuhva ra cha cutuñi iñun tandihi.

8 Nícohon iñi tuhun ra Jesucristo, ra cha nandoto cha yahá nyehe ra tindoho ta chihí ra. Cuví ra tata rey David. Ta ican ihya cuví tuhun Nyoo cha cacu añima yo cha chahá ra vatyi cahin tuhun.

9 Ta cha cuenda tuhun ihya cunyeí tandihi tindoho nyacua nuhñi chihin cadena tari noo ra quiñi iyó. Soco tuhun Nyoo ña nuhñi chi.

10 Yucuan chaha cunyei tandihi tindoho cha cuenda cha vaha chi tandihi ca ñu nacachí Nyoo chi, tacuhva vatyi cuví cacu tucu tandihi ñu. Chihin cha ndu ñin ri yo chihin ra Cristo cuacacu yo ta cuñihi yo noo nu tyaquí xaan cha ma ndihi ca maa.

11 Ihya cuví cha ndicha xaan:
Tatu cúvi yo cha cuenda ra, coo tucu yo chihin ra.

12 Tatu cunyeé yo tindoho, cucunyaca ñaha yo chihin ra.

Tatu catyí yo tyi ña yihí yo cuenda ra, maa ra cucatyí ra tyi ñima ñáyivi cuenda ra cuví chi yo.

13 Tatu sandog yo chí ra, soco maa ra tyicuan ri sacuví ra cuhva catyí ra.

Vatyi maa ra ña tuhvá ra nasama ra tuhun cahán ra.

Tatu sahá tyiño vaha yo, cuaquita vaha yo

14 Sanicohon iñi ñu tuhun ihya, ta catyun chí ñu chihin nuu Sutu Mañi yo na sandihi ñu cha cuví yuhu ñu cha ñima ri tuhun. Vatyi cha cuví yuhu ñu tyehe caa, ñahri maa tuhun. Tyi sativí ñu chí ñu tyasohó tuhun cahán ñu.

15 Saníñun ta cuhva cuendon chuun nuu Nyoo tari noo ra sahá tyiño vaha. Vatyi ñahri cha cucahan nuun tatu chotyíño vahun tuhun ndicha yoso cuhva tahán chi.

16 Ñaha tyasohun tuhun cha ñima ri tuhun ñáyivi ihya. Vatyi ñahri maa tyinyeé chí chí yo. Soco sativí ca chí chí yo nuu Nyoo

17 vatyi tari quiñi xico ndiyi noo nu cahvi, tyicuan caa cuví tuhun cuan vatyi sativí chí chí yo. Ta cuaha ñu cuativi cha cuenda cuan. Ican cuví cha cuví chí ra Himeneo ta ra Fileto.

18 Vatyi caquita caxiñ ra ityi vaha ta catyí ra vatyi tari quiñi cha yahá nandoto yo ta ma nandoto ca coño ñuhu yo. Ta tyicuan caa satondog ra cuhva chinó iñi suhva ñu.

19 Ta vasi yihí ñu nducaxiñ ñu, soco Nyoo chacun ra cha ndicha, ta yucuan cuví cha ma nasama maa. Ta nyisó chí noo seña cha catyí: “Sutu Mañi yo ñohó nuu ra chí ñu cuenda ra.” Ta catyí tucu chí: “Tandihí ñu

nyisó sivi ra Cristo na quita ñu nu quiñi caa.”

20 Chichi noo vehe cahnu, ñima maa maa ri ndaha tyiño ching chihin xuhun cuaan ta xuhun cuichin iyó. Iyó tucu cha chino chihin vitu ta chihin nyahyu. Yihí cuan chotyíño ñu chí nu vaha, ta yihí cuan cha chotyíño ñu nu ñima ri tuhun.

21 Tyicuan caa tucu maa yo tatu ña tñin cuenda yo tuhun cha ñima ri tuhun ñáyivi ihya, cuví yo noo ñáyivi cha chotyíño Nyoo chí, tari noo vaso xuhun cuaan. Ta cuñi chí vatyi cundií vasu cuan, tyicuan ta cuví cotyíño ra chí yo cha cuenda tandihi nuu vaha.

22 Ma caca xiñun tari chicá xiñi ra tyivaa ñáyivi ihya. Vatyi maa maa ri cha quiñi caa chicá xiñi ra. Coo noo ñáyivi cuiti. Chino vaha iñun chí Nyoo. Cuñun chí Nyoo ta chí ñáyivi. Coo taxi run chihin tandihi ñu yihí cuenda Nyoo, ñu cha chihin cha vaha añima chicán tahvi chí Sutu Mañi yo.

23 Ta ma quichahun tuhun cha ñima ri tuhun cha cuví yuhu ñáyivi. Vatyi chitón tyi chihin cuan cacú tisihi.

24 Ta noo ra sacuví tyiño nuu Sutu Mañi yo, ña tahán chí cañi tahan ra. Soco tahán chí cha vaha ñáyivi cuví ra chihin tandihi ñáyivi. Ta cuñi chí cha ñihi vaha ra cuhva sañaha ra tuhun Nyoo. Ta cuñi tucu chí cha cama cuví iñi ra chihin ñáyivi.

25 Ta chihin cha masu iñi ra cuñi chí cha sandundoo ra chí ñáyivi ndava iñi. Ta cuatu ra nasama Nyoo cuhva iyó ñu ta nacoto ñu cha ndicha.

26 Ta tyicuan caa ta cunducachi iñi ñu ta cuaquita ñu chichi ndaha ra cuví cuihna vatyi cha vityin nyacuví maa ra yoso cuhva cuñi ra chihin ñu.

3

Yoso caa cucoo ñáyivi nu cuandihí ca quiñi

1 Ta cuñi tucu chí cogon vatyi nu cuandihí tyembu cuquichi quiñi cha yñi xaan soo yo.

2 Vatyi cucoo ñáyivi ñu cuñi xaan suri chí maa. Ta cucuñi xaan ñu xuhun. Ta yaa xaan cucuvi ñu. Ta cahnu cusaha ñu chí ñu. Cucahan ña vaha ñu siqui Nyoo. Ta ma quichaha ñu nu cahán sutu ñu ta sihi ñu. Ma nacuhva ñu tyahvi nyoo chí Nyoo, ni chí tahan ñu. Ma quichaha ñu chí Nyoo.

3 Ma cuñi ñu chí tahan ñu. Ma coo ticahnu iñi chí ñu chihin ñáyivi. Cuñi ñu cuendu. Ma cuví cunyaca ñaha ñu coño ñuhu ñu. Xaan xaan cucuvi ñu. Ta ma cuñi nyehe maa ñu cha vaha.

4 Cunaxico tuhun ñu chí tahan ñu. Ta ndava xaan cucuvi iñi ñu. Ta cucaña iñi ñu sacuvi ñu ñáá ndihi cha cuñi ñu. Ta maa maa ri cha quichi cuví iñi ñu cunanducu ñu, ta ma nanducu ñu chí Nyoo.

⁵ Cunyicon ñu noo cuhva tari cha chinó iñi ñu chi Nyoo, soco ña ndicha ñu. Vaty chasí ñu cha sañahá Nyoo tunyee iñi ra. Ma cutahun chihin ñu caa tyicuan caa.

⁶ Vaty mahñu ñu ihya iyó ra cha quihvi ra chichi vehe ta sandavi ñaha ra chi ñusihi cha ñahri cha chifñi tuñi xiñi. Ta nyisó ñusihi cuan cuatyí, vaty nyicón ñu tandihi cha quichi cuví iñi ñu.

⁷ Tyicuan ri cuñí ñu coto ñu tandihi tuhun chaa soco ña cuví cutuñi iñi ñu ñáá cha cuví cha ndicha.

⁸ Ta ñu cucoo cha cahin tuhun ihya, cucuvi ñu tari maa ra Janes ta ra Jambres, ra tasi cha cachiyó ta cha naha. Ta cuñí ra saha canaa ra chi ra Moisés. Ta tyicuan caa tucu ñu cucoo nu cuahan ca chi. Ma tahan iñi ñu sacuvi ñu cha vaha. Quiñi cucaca xiñi ñu. Ta ma chino iñi ñu cha vaha.

⁹ Soco cuhva cunyacuví ñu ma cuví cutya chi vaty ña xehe caa tyi cha ñima ri tuhun cuví cha cusacuví ñu, tari cha chinyacuví ra Janes ta ra Jambres.

Nu ndihi tyatyíño ra Pablo chi ra Timoteo

¹⁰ Soco yoho chitó vahun tyi yuhu ñima tyicuan caa iyé. Vaty chitón tuhun cha sañahá, ta cuhva iyé. Ta chitón ñáá cha nanduquí ta yoso cuhva chinó iñi chi Nyoo. Ta chitó tucun yoso caa cunyeé iñi cha चाहन ñáyivi chii. Ta chitón yoso cha cuñí chi ñu.

¹¹ Ta chitón yoso caa cunyeé tindoho nu chicán nyicon ñáyivi chii. Chitón cha cuví chii, tandihi tindoho cha nyehi cha catyi tuhun Nyoo ñuu Antioquía, ta ñuu Iconio, ta ñuu Litra. Soco Sutu Mañi yo sacacu ra chii chichi tandihi cuan.

¹² Cha ndicha cuví vaty tandihi yo cha cuñí yo coo yo cuhva cuñi ra Cristo Jesús cunyehe yo tindoho saha ñáyivi.

¹³ Soco ñu quiñi iyó ta ñu sandavi ñaha, quiñi xaan ca cunanduvi ñu. Vaty cusandavi ñaha ñu chi ñáyivi ta cusandavi ñaha ñáyivi chi ñu.

¹⁴ Soco yoho sañihun coun chihin cha cutuhvon. Vaty chitón yóó cha sañahá chuun ta chitó vahun tyi cha ndicha cuví.

¹⁵ Nya ta ni luhlun ta chitón cha nyaá nu tutu tuhun Nyoo. Ta yucuan cuví cha chahá cha cutuñi ca iñun tacuhva cacun cha cuenda cha chinó iñun chi ra Cristo Jesús.

¹⁶ Tandihi tuhun cha nyaá nuu tutu Nyoo, ta maa Nyoo chahá. Ta tyinyeé xaan chi chi yo nacoto yo yoso caa tahan chi chinó iñi yo. Sañahá chi chi yo cuhva caa yo. Sandundoó chi chi yo. Ta sañahá chi chi yo yoso caa coo yo noo ñáyivi vaha nuu Nyoo.

¹⁷ Tyehe caa tyinyeé tuhun Nyoo chi yo tacuhva vatyí cuví yo noo ra cuiñi cuenda

Nyoo. Ta cuatu tuhva yo sacuvi yo tandihi cha vaha.

4

¹ Tyatyíne chuun nuu Nyoo ta nuu Sutu Mañi yo Jesucristo, vatyí maa ra cusandaa ra cuatyí ñu nyitó ta ñu chihí quivi quichi ra cunyaca ñaha ra chihin tunyee iñi ra.

² Cahán tuhun Nyoo chihin ñáyivi. Tyicuan ri sañihun sacuvun. Cahán tuhun Nyoo nuu ñu tatu chahá chi cuhva o vasi ña chahá chi cuhva. Cuhva tuhun chi ñu, catyi cuhva caa ñu tacuhva cunyicon vaha ñu chi ra Cristo. Ta cuatun nasama ñu cuhva iyó ñu chihin cha cama iñun. Ta sañahun chi ñu yoso caa tahan chi coo ñu.

³ Vatyí coo quivi ma cunyee ca iñi ñáyivi tyasoho ñu tuhun vaha. Soco cunducu ñu cuaha xaan ra sacuhá cha sañahá maa maa ri cha tahan iñi maa ñu cuiñi ñu.

⁴ Ta cusacuachiyó xiin ñu cha ndicha. Ta cucuñi ñu cuiñi ñu noo tuhun cha ña ndicha.

⁵ Soco yoho saha cuenda chuun chihin cha vaha chica xiñun. Cunyeun tindoho. Cahán tuhun Nyoo chihin ñáyivi. Sacuvi vahun tyiño chahá Nyoo chuun.

⁶ Yuhu cha cuñi cuiñi ri nacuhva cuende ñáyivi cha cuenda tuhun Nyoo, vatyí cha nyaña yatyin tuhun chihí chii.

⁷ Cha cañi tahin tari cuhva tahan maa chi ta cha sandihí tyiño cha chahá Nyoo chii. Ta ña sandihí tuhun cha chinó iñi chi ra.

⁸ Ta vityin nu cuahan ca chi quivi, nyatú tuhva noo cha tahan chi chii cha cuacuhva Sutu Mañi yo chii. Ta ñima chi maa ri mai cuhva ra, soco cuhva tucu ra chi tandihi ca ñu cha nyatú chi ra. Vatyí noo ri maa ra cuví ra vaha sacutuñi.

Nonga tyiño tyaq ra Pablo chi ra Timoteo

⁹ Sañiñi ta quichun cha numi ri, quichi nyehun nu nyaí.

¹⁰ Vatyí ra Demas sandoq ra chii vatyí cuñi ca ra cha iyó ñáyivi ihya. Ta cuahan ra nya ñuu Tesalónica. Ta ra Crescente cuahan ra nya ityi Galacia. Ta ra Tito cuahan ra ityi Dalmacia.

¹¹ Noo ri maa ra Lucas nyaá chihin. Nanducu chi ra Marcos ta na quichi ra chuhun quivi quichun. Vatyí chiñuhú xaan ra chii nu tyiño Nyoo.

¹² Tachí chi ra Tíquico ñuu Éfeso.

¹³ Quivi quichun cuison sahma cocon cha sandoq ñuu Troas vehe ra Carpo. Tyicuan caa tucu libri, quihí ndahun quichi. Ta cha niñi ca tuti.

¹⁴ Ra Alejandro ra cañi mityi cuan, cuaha xaan cha ña vaha chinyacuví ra chihin. Ta maa Sutu Mañi yo cutyiyahvi ra cha cuenda cha chinyacuví ra chihin.

¹⁵ Saha cuenda chuun chihin ra. Vatyí xaan xaan cuñí ra síqui tuhun Nyoo cha cahán yo.

¹⁶ Cha xihna ri quiví sacaquj chii nuu ra cuví tyiño, yori maa tyinyeē chii. Casandoq noo tuhun maa ra chii. Na saha Nyoo ticahnu ifi chi ra cha cuenda cuan.

¹⁷ Soco Sutu Mañi yo tyinyeē xaan ra chii. Ta chahā ra tunyee ifi chii tacuhva cuví cahan cachi tuhun ra nuu ñu, ta chiñi tandihí ñu cha ñima ñu Israel cuví. Ta sacacu Nyoo chii cha cachi ndicaha chii.

¹⁸ Ta cuasacacu ca ra chii ndaha tandihí cha ña vaha. Ta cuasaha cuenda ra chii nyacua nya nachaa quiví cunyai chihin ra nu nyaca ñaha ra. Chi maa ra na sacahnu yo tyicuan ri maa. Ta na cuví chi tyicuan caa.

Nu ndihí cahān ra Pablo ta chahā ra nocumi chí ñu

¹⁹ Ihya vachi nocumi chi cu Prisca ta chi ra Aquila ta chi ñáyiví chi ra Onesíforo.

²⁰ Ndoq ra Erasto ñuu Corinto. Ta ndoq ra Trófimo ñuu Mileto vatyí cuhví ra.

²¹ Saníñun ta quichun cha ni cumañi ca chaa yoo vichin.

Vachi nocumi chuun sahá ra Eubulo ta ra Pudente ta ra Lino ta cu Claudia ta tandihí ca ñáyiví tahan yo cuenda Nyoo ihya.

²² Na cunyaa Sutu Mañi yo chuhun. Ta Nyoo na nasoco ra chí tandihí ndo.

Carta Cha Sacuhun Ra Apóstol Pablo Chi Ra Tito

Nu tyaa ra Pablo noo tutu chi ra Tito

¹ Yuhu ra Pablo sacuví tyiño nuu Nyoo. Ta cuví noo apóstol ra Jesucristo, o cuñí chi catyi vatyí tyatyíño maa ra chíi vatyí tyinyei chí ñu nacachí maa Nyoo, na nachino iñi ñu chí ra, ta cohon nuu ñu cha ndicha, ta coo ñu cuhva cuñí Nyoo.

² Ta cuqtu tuhva ñu coo ñu ñáyivi chaa cha ma naa ca maa andivi. Vatyí ta ni cumañi ca chino ñuhu ñáyivi ta catyi Nyoo vatyí cucuhva ra noo ñáyivi chaa chí yo. Ta maa ra ña cuendu ra.

³ Ta vityin chaa quivi cha tyaa Nyoo cuhva tyí nacoto yo tuhun ra. Maa ra cuví ra sacacú chí yo, ta chaha ra tyiño chí yuhu cha cahin tuhun ra chihin ñáyivi.

⁴ Sacuhín tutu ihya chuun, Tito, vatyí tari noo sehe vahí cuví chuun cha cuenda tuhun Nyoo, vatyí in ri chinó iñi yo chí ra Jesucristo. Cuñí vatyí Nyoo Sutu yo ta Sutu Mañi yo Jesucristo, ra sacacú chí yo, na nasoco ra chuun, ta na nyehe ndahví ra chuun, ta na coo ca cha taxi ri añimon sahá ra.

Tyiño chaha ra Pablo chí ra Tito tyi sacuvi ra ñuhu Creta

⁵ Sandoj chuun ñuhu Creta vatyí sandaun tyiño Nyoo cha nyaá cundaa. Ta tyison ra chahnu ra quindaha vehe ñuhu tahan tahan ñuu tari cuhva catyi chuun.

⁶ Vatyí ra nyisó tyiño ihya cuñí chí coo ra noo cuhva cha ma cahan ñáyivi chí ra. Noo ri ñasihí ra coo. Ta tandihí sehe ra cuñí chí cha chinó iñi ñu chí Nyoo, ta cachi coo ñu ta ma ndava iñi ñu tacuhva cha ma tyaa ñáyivi cuatyí siqui ñu.

⁷ Vatyí ra yindahá chí ñu yihí cuenda Nyoo, Nyoo tyatyíño cuan chí ra. Yucuan chaha níñi cuñí chí vatyí cuví ra noo ra vaha. Ñima noo ra chahnu sahá chíi, ni ñima noo ra tyityí iñi, ni ñima noo ra tuhvá chíi. Ñima noo ra quixin cuatyí, ni ñima noo ra cuñí xuhun cha ña saha ganaa vaha ra.

⁸ Soco tyicuan ri sii cuví chí ra tatu chaa ñáyivi vehe ra. Ta tahan chí cuhva ra nu coo ñu. Cuñí chí cuví ra noo ra cha sacuví cha vaha. Noo ra chitó yoso caa nyaca ñaha ra chí maa ra. Na cuví ra noo ra ndaa iyó, noo ra sacahnú vaha chí Nyoo. Ta chitó vaha ra cuhva tahán chí sacuvi ra ta saníñi ra sacuvi ra.

⁹ Ta cunyicon vaha ra tuhun ndicha cha sañahá yo chí ra. Tyicuan ta coto ra sandun# ra iñi inga ñu chihin tuhun vaha ihya. Ta chí ñu catyí tyi ña ndicha tuhun

cahan yo, coto ra yoso caa sañaha ra chí ñu tyi ña vaha cahan ñu siqui tuhun Nyoo.

¹⁰ Vatyí cuaha xaan ra ndava iñi iyó. Cuaha ra cahan cha ñima ri tuhun, cuaha ra sandaví ñaha. Ta cuaha xaan ca ñáyivi Israel sacuví tyicuan caa.

¹¹ Cuñí chí cha casi yo yuhu ra cuan, vatyí cuaha xaan ñáyivi satondó ra xiñi. Vatyí cha cuenda cha cacuñí ra xuhun ta sañahá ra noo tuhun cha ña tahan chí.

¹² Ta suri maa noo ra Creta, noo ra chíiñi tuñi, ra cahan nuu ñu catyí ra tyehe caa:

“Ñu Creta, cuendu xaan ñu. Tari quiti cuví ñu. Cuahyi ñu ta suchan ñu”, catyí ra cuan.

¹³ Ta cha ndicha catyí ra cuan. Yucuan chaha cuñí chí cha cahan ñihun chihin ñu na saña ñu tuhun cuan, tacuhva vatyí vaha na chino iñi ñu chí ra Cristo.

¹⁴ Tacuhva cha ma tyasoho ca ñu tyisu cha ñima ri tuhun cha canasavaha ri maa ñu Israel. Ta ni ma tyasoho ca ñu tuhun cahan ñáyivi cha ña cuñí coto cha ndicha.

¹⁵ Cha cuenda ñáyivi cha vaha chicá xiñi, tandihí ta vaha chí ñu. Soco cha cuenda ñu cha ña chinó iñi ta ña vaha chica xiñi, ñahri maa cha vaha chí ñu vatyí nyacua nya cuhva chicá xiñi ñu ta cuhva tuví iñi ñu ta ña vaha ta quiñi caa.

¹⁶ Catyí ñu vatyí ñohó nuu ñu chí Nyoo, soco chihin cha ña vaha nyacuví ñu nyehé yo tyi ña ndicha ñu. Vatyí quiñi yihí iñi ñu ta ndava iñi ñu. Ta ma cuví sacuvi ñu noo cha vaha.

2

Tuhun vaha cha chaha Nyoo tyi sañaha yo

¹ Soco yoho, sañaha tuhun vaha tari cuhva sañahá tuhun Nyoo chí yo.

² Sañahun vatyí ra chahnu, cachi ço ra, tacuhva vatyí na saha ñáyivi ñáyivi chí ra. Ta tyicuan ri cachi caca xiñi ra. Vii çuhun ra chihin cha chino iñi ra. Cuñí chí cha cuñí ra chí Nyoo ta chí ñáyivi. Ta cunyeey iñi ra tandihí.

³ Ta tyicuan caa tucu ñu chahnu. Catyí chí ñu na coo ñu noo cuhva cha tahán iñi Nyoo. Ta ma ñii ñu cuendu. Ma coho ñu ndixi. Ta na sañaha ñu cha vaha iyó ñu,

⁴ na nyehe ñu nicaa tandaha. Tacuhva vatyí cuñí ñu chí y# ñu ta chí sehe ñu.

⁵ Na caca vaha xiñi ñu. Ta saha vaha ñu cuenda cuhva iyó ñu. Na saha cuenda vaha ñu vehe ñu. Ta vaha ñáyivi cuví ñu. Na cuhva ñu cha cunyaca ñaha y# ñu chí ñu tacuhva vatyí yori cuví cahan ña vaha siqui tuhun Nyoo.

⁶ Ta tyicuan caa tucu ra tyivaa. Cuhva tuhun chí ra na cacachi coo ra.

⁷ Ta maun cuñí chí cha sañahun maa ri cha vaha chihin cuhva iyón chí ra. Sañahun chí ra chihin cha cachi ta cha ndaa.

⁸ Maa ri tuhun vaha çahun tacuhva vatyi yori cuvi tyaa cuatyici sicun. Tyicuan ta ra xaan iñi chi ndo cucahan nuu ra vatyi ma ñihi ra cuhva cahan ña vaha ra siqui ndo.

⁹ Cuhva tuhun chi ra yañi yo ra iyó chitoho, na caquichaha ra chi chitoho ra. Na sacuvi vaha ra tandihi cha catyí ra. Ta ma na cahan ra nu cahan ra.

¹⁰ Ta ma tiin ri maa ra cha chii chitoho ra. Soco na saha vaha ra ñáyivi chi ra, tacuhva vatyi cunyehe ñáyivi vatyi vaha xaan tuhun Nyoo ra sacacú chi yo.

¹¹ Vatyi Nyoo sañahá ra vatyi vaha xaan ñáyivi cuví ra. Ta cuñi ra sacacu ra chi tandihi ñáyivi.

¹² Chihin cuan sañahá Nyoo chi yo vatyi na saña yo cha quini caa cha nyacuví ñáyivi ña ñohó nuu chi ra ta cha quichi cuvi iñi ñu. Ta cachi coo yo siqui ñuhu ñáyivi ihya, tari cuhva cuñi Nyoo.

¹³ Ta sañahá tucu ra chi yo yoso caa cuatu tuhva yo cha vaha cha cuñihi yo quivi quichi tucu ra Jesucristo. Vatyi cucusi xaan cuñi yo cuhva cha cunyehe yo cha tyaquí quivi quichi ra cuví Nyoo yo ra cahan ca, ra cha sacacú chi yo.

¹⁴ Chahá ra ñáyivi ra tyiño nuu yo tacuhva sacacu ra chi yo ndaha tandihi cha quini caa. Ta sandundi ra chi yo tacuhva na cuvi yo ñáyivi cuenda ra, ta cha yaha tuhun cuan cuñi ra vatyi sacuvi yo maa maa ri cha vaha.

¹⁵ Ican ihya cuñi chi sañahun chi ñáyivi. Sanduniun iñi ñu. Ta çahun nuu ñu chihin ndusu yuhu Nyoo tatu ña vaha sacuvi ñu. Ta ma sacuvun ni noo cha ña vaha. Tyicuan ta ma cuvi ñihi ñu cuhva cahan nyaa ñu chuun.

3

Cuhva cha tahán chi sacuvi ñu yihí cuenda Nyoo

¹ Sanicohun iñi ñu tahan yo cuenda Nyoo na quichaha ñu chi gobiernu ta chi ra cacuvi tyiño. Ta chihin cha ñi iñi ñu na sacuvi ñu ñáá tyiño vaha cha catyí ra cuví tyiño tyi sacuvi ñu.

² Ta ma cahan ña vaha ñu siqui ni noo ñáyivi. Na taxi ri coo ñu. Vaha ñáyivi na cuvi ñu. Na masu cuvi añima ñu chihin tandihi ñáyivi.

³ Vatyi nyacua nya maa yo ta tyicuan caa cuví yo ta ityi chata ca. Tondo xaan chiyo yo. Ta ndava xaan cuví iñi yo. Ñahri noo ityi vaha chica noo yo vatyi ra cuví cuihna sandahvi ñaha ra chi yo. Chinyacá ñaha cuhva ña vaha cha cuñi coño ñuhu yo chi yo. Ta chinyacuví yo tandihi maa cuhva cuñi chi. Tandihi cha iyó chi inga ñáyivi ta cuñi yo coo chi yo. Tasi cuñi yo nyehe yo chi tahan yo. Ta ñáyivi ña cuñi nyehe ñu chi yo.

⁴ Soco Nyoo vaha ñáyivi cuví ra ta sacacu ra chi yo. Yucuan cuví nu sañahá ra vatyi cuñi ra chi tandihi ñáyivi.

⁵ Ñima cha cuenda cha cachi iyó yo ta sacacu ra chi yo, soco cha cuenda cha ndahvi cuñi ra nyehe ra chi yo. Ta chihin ñiñi ra Jesús nacatya yo cuatyí yo ta nacacu chaa yo, ta chahá Tatyí Ii ra noo ñáyivi chaa coo yo.

⁶ Ta chahá xaan Nyoo cha coo Tatyí Ii ra añima yo cha cuenda maa ra Jesucristo ra sacacú chi yo.

⁷ Chihin tumañi iñi cha chahá ra chi yo ta sacuvaha ra chi yo nuu ra. Ta vityin nyatú yo cunanyehe yo noo cha cha yaha chahá ra chi yo, noo ñáyivi cha ma naa ca maa.

⁸ Tandihi tuhun ihya ndicha xaan. Ta cuñi vatyi cahun tuhun ihya nuu ñu chinó iñi chi Nyoo chihin cha ñi iñun, tacuhva na saha cuenda ñu chi ñu, ta sacuvi ñu cha vaha. Vaha xaan tuhun ihya, ta cuatyinyee chi chi tandihi ñáyivi tatu quichahá ñu.

⁹ Soco ma tyasohun nu cuví yuhu ñu tuhun cha ñima ri tuhun. Ma tyasohun tuhun cahan ñu vatyi ñu cuan ñañi xaan cuñi ñu coto ñu yoso caa vachi tata yo. Ma quichahun chi ñu cañi tahan cha cuenda ley cha tyaa ra Moisés ta cha naha. Ñahri maa tyinyee cuan. Cha ñima ri tuhun cuví.

¹⁰ Tatu iyó ñu cuñi ñu sacusiñ ñu chi ñu nyicú vehe ñuhu, çana chi ñu noo chaha o uvi chaha ta catyí chi ñu tyi ña vaha sacuvi ñu. Ta tatu ña quichahá ñu, çasi nu quichi ñu.

¹¹ Vatyi ma chihin yucuan ri chitón vatyi ña vaha añima ñu tatu tyicuan caa nyacuví ñu. Chicoo cuatyí ñu. Ta suri maa ñu sacunaá ñu chi ñu.

Tyiño tyaa ra Pablo chi ra Tito

¹² Cutachi chi ra Artemas, o chi ra Tíquico nu nyaún. Quivi chaa ra, nducu cuhva ta çahun ñuu Nicópolis vatyi cuñihi tahan yo yucuan. Vatyi tyai cuhva cuyahi yoo vichin yucuan.

¹³ Nducu cuhva tyinyeun chi ra Zenas ra chitó xaan ley, ta chi ra Apolos ta cuhva cha chiñuhú chi ra nu cachicá noo ra tuhun Nyoo.

¹⁴ Na cutuhva ñu yihí cuenda Nyoo sacuvi ñu cha vaha ta tyinyee ñu tatu iyó cha cumañi chi inga ñu. Tyicuan ta ña caha ri nyicón ñu chi Nyoo.

Nu ndihi cahan ra Pablo

¹⁵ Tandihi ra nyicu chihin, chahá ra nocumi chuun, Tito. Ta na cuhva nocumi chi tandihi ñu cuñi chi ndi cha cuenda cha ñi ri cuví yo cuenda Nyoo. Na nasoco Nyoo chi tandihi ndo.

Carta Cha Sacuhun Ra Apóstol Pablo Chi Ra Filemón

Nu tyaq ra Pablo noo tutu chi ra Filemón

¹⁻² Yuhu ra Pablo ta ra Timoteo yañi yo, tyaá ndi tutu ihya chi yoho, Filemón, tyi ra tahan ndi nu tyiño Sutu Mañi yo cuvún. Ñohí vehe caa ihya cha cuenda ra Jesucristo ta sacuhún ndi tutu ihya chuun ta chi ra Arquipo, ra cuvi sindaro ra Jesucristo chihin yo, ta chi cu Apia, ta chi tandihi ñu ndu iñ ri vehun.

³ Na nasoco Nyoo Sutu yo ta Sutu Mañi yo Jesucristo chi ndo. Ta na coo cha taxi ri cuñi añima ndo sahá ra.

Nu catyi ra Pablo vatyi ra Filemón vita xaan iñi ra ta chino vaha iñi ra chi Nyoo

⁴ Tyicuan ri nacuhvé tyahvi nyoo chi Nyoi cha cuendon nu nichón iñi tuhun, nu chicán tahvi chi ra.

⁵ Vatyi ñihí tuhun tyi chinó vaha iñun chi Sutu Mañi yo Jesucristo, ta cuñi xaan chi ra ta chi ñu yihí cuenda ra.

⁶ Ñáyivi cha sacotón yoso caa cuhva chinó iñun chi Nyoo, nachino iñi tucu maa ñu chi ra ta vityin chicán tahvi cha cuenda ñu, na coto vaha ñu tandihi cha vaha cha chahá Nyoo chi yo cha cuenda ra Cristo Jesús.

⁷ Sii xaan cuñi, ta vaha xaan cuñi añime vatyi cuñi xaan chi ñu tahan yo, ta sandunyeún iñi ñu.

Nu chicán ra Pablo noo tumañi iñi chi ra Filemón cha cuenda ra Onésimo

⁸ Vasi iyó chi ityi chii cha catyi chuun ñáá cha tahán chi sacuvun vatyi apóstol cuvi, soco ña cuñi saniñi chuun.

⁹ Vaha ca cha caquen noo tumañi iñi chuun cha cuenda cha cuñi yo chi Nyoo vatyi yuhu ra chahnu cuvi ta ñohí vehe caa cha cuenda ra Cristo Jesús.

¹⁰ Chiquén noo tumañi iñi chuun cha cuenda ra Onésimo vatyi nanduví ra sehi cha cuenda Sutu Mañi yo nu ñohí vehe caa ihya.

¹¹ Quivi cuan musu cuví ra chuun, ta chaha xaan ra tisihi, soco vityin musu vaha cuví ra, tyi vaha sacuví ra tyiño nuí ta tyicuan caa tucu cusacuvi vaha ra tyiño nuu maun.

¹² Ta vityin sacunuhí chi ra chuun. Ta cuñi vatyi naquehen cuenda vahun chi ra tari cha mai cuví.

¹³ Vasi cuñi cha ndoo ra ihya chihin, ta tyinyee ra chii tyiño nuu maun cha niri ca cha ñohí vehe caa cha cuenda tuhun Nyoo,

¹⁴ soco ña cuñi cha ndoo ra tyiño nuun tatu ña ndoun vaha, vatyi tacuhva sacuvun tumañi iñi chii soco chihin cha iyó vaha iñun ta ñima ca chihin cha saniñi chuun.

¹⁵ Ra Onésimo chahá xaan ra tisihi chuun quivi cuan, soco vaha xaan nanduví ra vityin, vasi yucuan cuenda canyahá ra chuun ta vityin nachaa ra nu nyaún vatyi cuacunyaa ra chuun tyicuan ri maa

¹⁶ soco ñima tari noo musu ri, soco tari noo ra vaha ca. Vatyi yañi yo cuví chi ra. Ta cuñi xain chi ra, ta vihi ca yoho, tahán chi cha cuñi con chi ra. Vatyi ñima noo yañun cuenda coño ñuhu ri cuví chi ra. Soco yañun cha cuenda Sutu Mañi yo cuví chi ra ñandihí.

¹⁷ Tatu ndicha cha ra tahun cuví chii, cuñi vatyi naquehun chi ra Onésimo tari cha chi yuhu naquehún.

¹⁸ Tatu iyó cha sacuví ra chuun, o tatu yosoyicá ra chuun, tyiyahvi mai.

¹⁹ Yuhu ra Pablo tyai tuhun ihya vatyi cutiyahvi cha yosoyicá ra chuun, cha nuu cha tahán chi catyi chuun vatyi yosoyicón nyacua nya ñayivun chii.

²⁰ Chiquén chuun, yañi, na sandusiun iñi ta naquehun chi ra Onésimo chihin cha vaha. Sanduchaa añime chihin cha iñ ri cuví yo cha cuenda ra Cristo.

²¹ Tyai tutu ihya chuun vatyi chité tyi cuaquichahun tuhun cahín. Ta chité vatyi ñima yucuan ri, soco cuaha ca cuasacuvun.

²² Ta nonga cha chiquén chuun tatu ma sanduvahun chiñ noo nu cuví cunyai chihin ndo. Ta cuñi vatyi caçan tahvun cha cuende, na cuhva Nyoo cha cuhin nu nyaá ndo.

Nu ndihi cahqn ra Pablo ta chahá ra nocumi chi ñu

²³ Vachi nocumi chuun sahá ra Epafras, ra ñoho chihin vehe caa cha cuenda ra Cristo Jesús.

²⁴ Ta vachi tucu nocumi chuun sahá ra Marcos, ta ra Aristarco ta ra Demas, ta ra Lucas, ra catyinyeé chii chihin tyiño Nyoo.

²⁵ Na nasoco Sutu Mañi yo Jesucristo chuun. Ta na cuví chi tyicuan caa.

Carta Cha Chino Cha Cuenda Ñáyivi Israel, Ñu Cahán Sahan Hebreo

Nyoo cahán ra chihin yo chihin yuhu Sehe ra

¹ Ta tyembu chahnu cahán Nyoo cuaha xaan chaha, ta cuaha xaan cuhva, chihin sutu chahnu yo, ñu chiyo ta cha naha. Cahán ra chihin yuhu ra cacuvi profeta, ra cha cachaha cuenda tuhun cahán ra.

² Ta vityin nu cua ndihi tyembu ihya, cahán ra chihin yo chihin yuhu Sehe ra. Ta tandihi maa ta natyaq ra ndaha Sehe ra. ñin ri cuvi ra chihin Sehe ra ta savaha ra ñuhu ñáyivi.

³ Cha cahnu ta cha tyaqui cuvi Nyoo iyó chi Sehe ra, vatyi suri ican ra cuvi maa maa xiñahñu Nyoo. Ta chihin tunyee ñiñi tuhun cahán ra, nyisó cuenda ra tandihi cha iyó. Ta cha yahá sandachj ra cuatyí yo, ta chicunyaq ra chiyo vaha Nyoo, ra cha cahnu ca cuvi. Ta vityin nyacá ñaha ra chihin ra nya andivi.

Cahnu ca cuvi Sehe Nyoo ta ñima ca ángel

⁴ Ta tyicuan caa cahnu xaan ca nanduvj Sehe Nyoo ta ñima ca tandihi ángel. Ta cahnu ca sivi chahá Nyoo chi ra ta ñima ca ángel cuenda ra.

⁵ Vatyi Nyoo ña catyí ra ni noo chaha chi ni noo ángel tyehe caa:

Yoho cuvún Sehi.

Ta yuhu chahí ñáyivi coun vityín.

Ta ni ña cahán ra tuhun ni noo ángel tyehe caa:

Yuhu cucuvi Sutu ra.

Ta maa ra cucuvi Sehi.

⁶ Soco quivi saquichj Nyoo chi Sehe nuu ra siqui ñuhu ñáyivi, catyí ra:

Na sacahnu tandihi ángel cuende chi ra.

⁷ Ta cahán tucu ra tuhun ángel cuenda ra ta catyí ra:

Sacuvi vatyi tatyí cuvi ángel cuende,

ta tari yaa ñuhu cuvi ra sacuvi tyiño nui, catyí Nyoo.

⁸ Soco tuhun Sehe ra catyí ra tyehe caa:

Nyoo cuvún, ta cua cunyaca ñahun tyicuan ri maa chihin cha ndaa ta chihin cha ndicha.

⁹ Vatyi cuñún cha vaha ta cutasi cuñún cha ña vaha.

Yucuan chaha vatyi yuhu, ra cha cuvi Nyoo cuendon, cuaha ca tusi ñiñi chahí chuun, ta ñima ca chi ra tahun.

¹⁰ Ta catyí tucu Nyoo chi Sehe ra tyehe caa: Yoho, ra nyacá ñaha cuvún. Ta quivi xihna ri savahun ñuhu ñáyivi ta chihin ndahun savahun andivi.

¹¹ Maa ñuhu ñáyivi ta andivi cundihi chi, soco yoho, cundoun tyicuan ri maa. Tandihi maa cuan cu cuchahnu tari sahna.

¹² Ta cunicava tahnu chi tari noo vestido. Ta cunasama chi tari nasamá ñáyivi sahna ñu.

Soco yoho suri maa ra cuvún tyicuan ri maa.

Ta ma ndihi maa ñáyivun, catyí Nyoo chi Sehe ra.

¹³ Nyoo ni noo chaha ña catyí ra chi ni noo ángel tari catyí ra chi Sehe ra tyehe caa: Cunyaun chiyo vahi nyacua nya cha caquin chi ra xaan ñiñi chuun chahun.

¹⁴ Soco tandihi ángel, tatyí cacuvi ra ta tyaq Nyoo tyiño chi ra cha caca ra ta tyinyee ra chi ñu cucacu añima.

2

Cahnu xaan cuvi tuhun cha sacacú Nyoo añima chi yo

¹ Yucuan chaha vatyi cuñí chi cha quichahá xaan ca yo tuhun ndicha cha chiñi yo, coto cunuhu yo ityi quiñi caa.

² Ta cha naha catyí Nyoo chi ángel, na cuhva ra ley ra chi ra Moisés. Nyoo catyí ra tyi tahán chi quichaha ñáyivi. Ta ñu casacuvj cuatyí ta ña quichahá ñu ley ra, tachj tuñi ra chi ñu tari cuhva catyí maa ley cuan.

³ Cahnu xaan cuhva sacacú Nyoo añima yo. ¿Yoso caa cucacu añima yo tatu sacunaa yo cuhva cuan? Cha xihna ri suri maa Sutu Mañi yo Jesucristo cahán ra tuhun yoso caa cuvi cacu añima yo. Ta yahá cuan ta ñu cha cachiñi tuhun cahán ra, chitó ñu tyi ndicha ta canacatyí tucu ñu chi maa yo.

⁴ Ta siin ri, Nyoo sañahá cachi ra chi yo chihin cuaha milagru ta cha iyo, vatyi ndicha cha sacacú ra chi yo. Ta chahá ra Tatyí Ii ra chi yo siin siin cuhva, yoso cuhva cha cuñi maa ra. Ta chihin tandihi cuan sañaha ra chi yo vatyi ndicha cha sacacu ra añima yo.

Ra Jesucristo cuvi ra cha cua sacacu añima yo

⁵ Nyoo, ña chahá ra cha cunyaca ñaha ángel chi ñuhu ñáyivi chaa cha cahán yo tuhun vityin.

⁶ Vatyi iyó noo nuu cahán chi nu tutu Nyoo tyehe caa:

Nyoo Suti ¿yóo ra cuvi rayi vatyi nichon ñiñun tuhun ra?

¿Yóo ra cuvi Sehe ra vatyi tiñ cuendon chi ra?

⁷ Vatyi suhva quivi, ndahvi ca sacuvun chi ra, ican saha ángel.

Soco yahá cuan sacahnu xauñ chi ra. Ta sahá xauñ ñáyivi chi ra.

Ta chahun cha cunyaca ñaha ra siqui tandihi cha savahun.

⁸Tandihi cuan natyaun ndaha ra. Tandihí maa, Nyoo chahá cha cunyaca ñaha ra, cuví chi cuan. Soco nyehé yo vatyi cumañi ca quichaha tandihí cuan chí ra.

⁹Soco nyehé yo chí ra Jesús vatyi suhva ri quivi, sanocuee Nyoo chí ra ican saha chí ángel. Soco cha cuenda cha cuñi xaan Nyoo chí yo, chahá cuenda ra chí ra Jesús cha cúvi ra cha cuenda tandihí yo. Ta vityin sahá xaan Nyoo ñáyivi chí ra ta sacahnú xaan ra chí ra cha cuenda tindoho cha nyehé ra quivi chí ra.

¹⁰Tandihi maa cha iyó, cha cuenda maa Nyoo cuví. Ta maa ra savahá. Ta cuñi ra vatyi tandihí sehe ra ta chí maa ñu cucuvi tandihí cha tyaqui cha iyó gloria. Ta chihin tindoho cha sanyehé ra chí ra Jesucristo Sehe ra, sacuvahá ra chí ra. Vaha xaan quita ra.

¹¹Sehe Nyoo cuví chí ra Cristo, ra sacacú añima ñáyivi. Ta suri sehe Nyoo nanduví chí ñáyivi ñu chinó iñi chí ra. Yucuan chaha vatyi ña cucahan nuu ra Cristo catyí ra yañi ra chí ñu, vatyi ñn ri sutu ra chihin ñu.

¹²Vatyi catyí ra Cristo nu tutu Nyoo tyehe caa:

Cucahin tuhun maun chihin yañi.
Ta cucate yaa cuendon nu ndú ñn ri ñu.

¹³Catyí tucu ra tyehe caa:

Yuhu cuita iñi chí Nyoo.

Ta catyí tucu ra:

Ihya nyai chihin sehi, cha chahá Nyoo chí, catyí ra.

¹⁴Ta tandihí yo cha cuví yo sehe ra, coño ñuhu cuví yo ta yihí niñi yo, yucuan chaha ra Jesús ñandihí, suri coño ñuhu ta niñi ñáyivi nyiso ra suhva quivi, tacuhva cuví chaa tuhun chihi chí ra, ta tyicuan caa ta satani ra chí cuihna, ra cha chiyo tunyee iñi chí cha chañi chí ñáyivi.

¹⁵Ta tyicuan caa sacacú ra chí ñu cha yuhví chí tuhun chihi. Chiyo ñu tari noo musu ra ña vaha vatyi yuhví ñu cha cúvi ñu.

¹⁶Cha ndicha vatyi ña quichí tyinyee ra chí ángel, soco chí ñáyivi tata ra Abraham quichí tyinyee ra.

¹⁷Yucuan chaha cuñi chí cha nduvi ra tari ñáyivi, tacuhva cuví ra noo ra ndicha cundahvi cuñi chí yo. Ta tyicuan caa cuví ra tata sutu cahnu cha cuenda yo nuu Nyoo. Ta tyicuan caa ta sacuachiyó ra cuatyí ñáyivi cha cuenda tindoho cha nyehé ra.

¹⁸Vatyi maa maa ra nyehé tindoho quivi nducú nyehé ra ña vaha chí ra, yucuan chaha, vityin cuví tyinyee tucu ra chí maa yo tatu nducú nyehé ra ña vaha chí yo.

¹Yañi, nyoho chahá cuenda ndo chí ndo chí Nyoo. Ta cuví tucu ndo ñu cha nacana Nyoo chii vatyi coo ndo chihin ra andívi. Ta cha cuenda cha nyehé ra Cristo Jesús tindoho tyiño nuu ndo, yucuan chaha, nyehé vaha ndo cuhva vaha iyó ra. Vatyi ican ra cuví ra cha saquichí Nyoo chí vatyi cuví ra tata sutu cahnu cuenda yo cha chinó iñi yo tuhun Nyoo.

²Ta maa ra quichahá ra tandihí cha catyi Nyoo cha sacuvi ra, tari quichahá tucu ra Moisés ta cha naha, ta sacuvi ra tyiño cha tahan chí sacuvi ra nuu ñáyivi sehe Nyoo.

³Ta ra Jesucristo cahnu ca ra cuví ra, ta ñima ca ra Moisés. Vatyi noo ra cha savahá vehe, cahnu ca cuví ra ta ñima ca maa vehe cuan.

⁴Tahan tahan vehe, iyó ra savahá chí chí, soco Nyoo cuví ra cha savahá tandihí maa cha iyó.

⁵Ra Moisés, quichahá vaha ra chí Nyoo ta sacuvi ra tyiño nuu ra cha cuenda ñáyivi Israel ta cahán ra tuhun cha cusacoto Nyoo nu cuahan ca chí ityi nuu.

⁶Soco ra Cristo ra cuví Sehe Nyoo, suri quichahá vaha ra chí Nyoo ta ican ra nyacá ñaha vehe Nyoo. Ta vehe cuan ican cuví maa yo, tatu saní ca yo iñi yo cuhun yo ityi nuu chihin Nyoo ta itá iñi yo chí ra nyacua nya nu ndihi, ta tyicuan ri cusí cuñi yo nyatú yo cha cuñihi yo.

Ñu chinó iñi chí Nyoo, nyitatu ñu chihin Nyoo

⁷Yucuan chaha cuñi chí saha cuenda yo chí yo, tari catyí Tatyí li Nyoo nuu tutu Nyoo tyehe caa:

Tatu chiñi ndo tuhun cahán Nyoo chihin ndo vityin,

⁸ma sandava ndo añima ndo, tari sacuvi ñu ña quichahá chí Nyoo quivi canducú nyehé ñu chí ra nu chicá noo ñu chiqui ndi cuan.

⁹Tyehe caa catyí Nyoo: Ñáyivi cuan nducú nyehé ñu chí,

vasi chichi cha uvi xico cuiya nyehé ñu cha sacuvi.

¹⁰Yucuan chaha cuxajin chí ñu, ta catyí tyehe caa: “Tyicuan ri chicá uvi iñi ñu,

ta ña cuñi ñu coto ñu ityi mai.”

¹¹Yucuan chaha cuxajin chí ñu, ta catyí cachi chí ñu,

vatyi ma quihvi ñu nyitatu ñu chihin, catyí Nyoo.

¹²Yañi, saha ndo cuenda chí ndo coto cu ña vaha añima ndo ta coto yoso ri caa ta sandoo ndo chí ra cuví Nyoo nyitó cha cuenda cha ña chinó ca iñi ndo chí ra.

¹³Soco saní ndo iñi tahan ndo tahan tahan quivi, cha ni ri ca cha chahá ca chí cuhva vityin, tacuhva vatyi ni noo ndo ta

3

Cahnu ca cuví ra Jesús ta ñima ca ra Moisés

ma sandava ñaha cha quiñi caa chi ndo, ta ndundava añima ndo.

¹⁴ Vatyí tatu sanií yo iñi yo chihin Nyoo nyacua nya nu ndihi ñayivi, yucuan ta ñin ri cuñihi yo cha vaha chihin ra Cristo.

¹⁵ Catyí chi nu tutu Nyoo vatyí saha yo cuenda chi yo tyehe caa: Vityin tatu nyoho ta chiñi ndo cha catyí Nyoo.

Ma sandava xaan ndo añima ndo, tari sacuvi ñu ña quichaha chii, catyí Nyoo.

¹⁶ ¿Yóo ñu cha cachiñi tuhun cahan Nyoo ta ña tyasohó ñu? Tandihí ñu Israel cha tava ra Moisés Egipto ta cha naha, ican ñu cuan.

¹⁷ Ta ¿yóo chi cuxaan Nyoo chichi cha uvi xico cuiya? Suri chi ñu cuan, ñu cha chicoo cuatyí. Ta cachiñi ñu nu chiqui ndi nu chica noo ñu.

¹⁸ ¿Ta yóo chi catyí cachi Nyoo tyi ma quihvi ñu, cunyitatu ñu chihin ra? Chi ñu cha ña tyasohó nu cahán ra.

¹⁹ Nyehe yo vatyí ña cuví quihvi ñu cuan vatyí ña chinó iñi ñu chi ra.

4

¹ Yucuan chaha, cha ni ri ca cha iyó ca quivi cuví quihvi yo cunyitatu yo chihin Nyoo, cuñi chi saha yo cuenda coto ma cuví quihvi nya noo nyoho nu cunyitatu yo chihin Nyoo.

² Vatyí chiñi tucu yoó tuhun Nyoo cha sacacú ra añima yo, tari chiñi maa ñu Israel cuan. Soco ñahri maa tuhun cha chiñi ñu, vatyí chiñi ndi ri maa ñu, ta ña chinó iñi ñu.

³ Soco yoó cha chinó iñi yo, ican yo cuví ñu quihvi nyitatu chihin Nyoo. Ta cha cuenda ñu ña chinó iñi cuví chi tari catyí Nyoo tyehe caa:

Yucuan chaha cuxajin chi ñu ta catyí cachi chi ñu vatyí ma quihvi ñu nyitatu ñu chihin, catyí Nyoo.

Soco cha nyaá nu nyitatu yo chihin Nyoo vatyí nyitatu Nyoo cha sandihí ra tyiño sahá ra nyata savaha ra ñuhu ñayivi.

⁴ Vatyí yihí nu catyí chi nu tutu Nyoo cha cuenda quivi nu ucha nu ndihi vitya. Tyehe caa catyí chi:

Nyoo nyitatu ra nu cu ucha quivi, vatyí ndihí tyiño saha ra.

⁵ Ta inga tucu chaha catyí chi nu tutu Nyoo tyehe caa:

Ni noo quivi ma quihvi ñu nu cunyitatu ñu chihin, catyí Nyoo.

⁶ Ñu cuan, ñu cha xihna ri cachiñi tuhun cha sacacú Nyoo añima yo, ña quihvi ñu cha cuenda vatyí nacahnú ñu nu cahán Nyoo. Soco nyaá cha quihvi inga ñu.

⁷ Vatyí cha yaha nacahnú ñu Israel cuan nu cahan Nyoo, natyaá tucu ra cuhva vatyí nya inga quivi cuví quihvi yo cunyitatu yo

chihin ra, ta ican cuví quivi vityin. Ta cahán Nyoo tuhun quivi vityin chihin cha catyí ra David. Nyaá chi nu tutu Nyoo tyehe caa: Vityin tatu nyoho ta chiñi ndo cha catyí, Ma sandava xaan ndo añima ndo, catyí Nyoo.

⁸ Tyehe ta chinyaca ra Josué chi ñu Israel cuan nu cunyitatu ñu chihin Nyoo, ma cahan ca Nyoo inga chaha tuhun cha cuenda inga quivi.

⁹ Soco nyaá ca nu cuví nyitatu ñu yihí cuenda Nyoo chihin ra.

¹⁰ Vatyí ñu quihvi nyitatu chihin Nyoo, ña chica ca iñi ñu soco nyitatu añima ñu tari nyitatu Nyoo quivi ndihí tyiño saha ra.

¹¹ Cuñi chi sanií yo chinó iñi yo chi Nyoo tacuhva cuví nyitatu yo chihin ra, coto yoso ri caa nya noo nyoho sacuvi ndo tari sacuvi ñu Israel cuan vatyí ña cuñi ñu chino iñi ñu chi ra.

¹² Vatyí tuhun Nyoo, nyitó chi, ta iyó tunyee iñi chi chi. Ta xaan ca chi ta ñima ca mityi cha xaan ninduvi chiyo yuhu, ta nyee chi nyacua nya chichi añima yo ta nyacua nya chichi cha chiñi tuñi xiñi yo, nyacua nya chichi tuhun xehe cha caá añima yo. Ta sañahá cachi Nyoo ñáá cha chica iñi yo ta ñáá cha caá añima yo tatu vaha o ña vaha.

¹³ Ñahri maa cha savaha Nyoo ta cuví tixehe nuu chi chi ra. Tandihí maa ta nyehé ra. Ta chi ra nyaá nacuhva cuenda yo cha sacuvi yo.

Ra Jesús cuví ra tata sutu cahnú cha cahán chaha yo nuu Nyoo

¹⁴ Ra Jesús Sehe Nyoo, cuví ra tata sutu cahnú cha cuenda yo, vatyí quihvi ra nuu Nyoo ta cahán ra chaha yo. Yucuan chaha cuñi chi cha ma sandihí yo cha chinó iñi yo chi ra.

¹⁵ Vatyí ra cuví tata sutu cha cuenda yo cuví naquehen ndahvi ra chi yo tatu cuihya cuñi yo chihin Nyoo, vatyí chitó tucu maa ra cha cuví tindocho cha nyehe yo vatyí nyehe tucu maa ra tandihí nuu tindocho, saha ra ña vaha cha nducú nyehe ra chi ra, soco maa ra Jesús, ñahri cuatyí ra chicoo.

¹⁶ Yucuan chaha cuví tuhva yo nuu nyaá Nyoo ta cahan yo chihin ra chihin cha ña yuhvi yo vatyí cuñi xaan ra chi yo, ta ndahvi cuñi ra nyehe ra chi yo. Ta cha cuenda cha vaha ñayivi cuví ra, tyinyeé ra chi yo nu nyehe yo tindocho.

5

¹ Tandihí ra cuví tata sutu cahnú ca cuenda ñu Israel, ñayivi cuví ra. Ta na cachi Nyoo chi ra vatyí cahan ra chaha tandihí ñu nuu Nyoo, ta cuhva cuenda ra cha chahá ñu chi Nyoo, ta cahñi ra quití cha cuenda cuatyí ñu.

² Ta suri vachi quiví ndahvi cuñí ra cacuvi sutu cha nducú nyehé ra ña vaha chí ra, yucuan chaha cuví cundahvi cuñi ra nyehé ra chí ñáyivi ña chitó maa, ta tyinyeé ra chí ñu quitá caxiun ityi vaha Nyoo, na ndu uvi iñi ñu cuatyí ñu.

³ Ta cha cuenda cuatyí ñáyivi, cachahñí ra quiti ta chahá cuenda ra chí Nyoo na cahnya ra cuatyí ñu.

⁴ Yori sacuvi ri maa sutu chi. Maa Nyoo cuví ra caná chí ra, ta chahá ra cha cuví ra tata sutu, tari sacuví ra chihin ra Aarón ta cha naha.

⁵ Ta tyicuan caa tucu ra Cristo, ñima maa ra sacuví ra sutu chí ra, soco maa Nyoo chahá cha cuví ra, tari catyí maa ra tyehe caa:

Yoho cuví Sehi.

Yuhu chahí ñáyivi coun vityin, catyí Nyoo chí ra Cristo.

⁶ Tari catyí tucu ra chí ra nu inga nu cahán chí tyehe caa:

Yoho cuvún tata sutu tyicuan ri maa.

Cuvún tari ra Melquisedec.

⁷ Ta quiví chiyo ra Cristo ihya síqui ñuhu ñáyivi, chican tahví ra chí Nyoo, ta chacu chaa ra ta cahan ra chihin Nyoo vatyi ican ra cuví ra iyó tunyee iñi chíi cha sacacú chí ra ndaha tuhun chíi. Ta Nyoo chiñí ra tuhun cahan ra vatyi sacuví ra tandihí cha catyí Nyoo.

⁸ Yucuan chaha vasi Sehe Nyoo cuví chí ra Cristo, soco cutuhvá ra cha quichaha ra chí Nyoo chihin cha nyehé ra tindoho.

⁹ Ta cha yahá cha sacuvahá Nyoo chí ra, tyicuan ta cuví ra ra sacacú añima ñáyivi tacuhva coo ñu chihin Nyoo tyicuan ri maa, tandihí ñu cha quichahá tuhun cahán ra.

¹⁰ Vatyi Nyoo tyaá tyiño chí ra cha cuví ra tata sutu cahnu, tari ra Melquisedec.

Yica xaan cha sandihí yo cha chinó iñi yo tuhun Nyoo

¹¹ Cuaha xaan nyaá cahan yo síqui tuhun ihya, soco yíi xaan nacatyí yoso caa cuahan, vatyi nyoho ña cuñí ndo cutuñi iñi ndo.

¹² Cha naha xaan chinó iñi ndo chí Nyoo, cuñí chí cha cuví ndo ra sacuahá ta sañaha ndo chí inga ñu. Soco nyoho ni cuñí chí cha nacatyí tucu ndi inga chaha chí ndo tuhun cha xihna ri chiñí ndo tuhun Nyoo. Tari cha lee cuví ndo chihin tuhun Nyoo, vatyi tari cha chaxin ca ndo cha nuu cha cachí ndo nyayu.

¹³ Ta ñu cuví tari cha lee cha chaxín, ta chaa ca ñu cutuñi iñi ñu yoso caa coo vaha ñu nuu Nyoo.

¹⁴ Soco nyayu vaha cuví chí cha cuenda ñu chahnu chihin tuhun Nyoo: ñu cha cutuñí vaha iñi tuhun ra, nacotó ñu nya cha vaha ta nya cha ña vaha.

6

¹ Yucuan chaha ma ndoo ri yo chihin cha xihna ri cutuhvá yo tuhun ra Cristo, cuhun yo ityi nuu ca tacuhva cuví yo ñáyivi chahnu chihin tuhun Nyoo. Ma ndoo ri yo chihin tuhun cha yahá cutuhva yo, ta cuñun tuhun cha ma nducu yo cuhva cha cuvaha yo nuu Nyoo chihin cha sacuví yo cha vaha, ta tuhun nachino iñi yo vatyi sacacú Nyoo chí yo.

² Ma ndoo yo chihin tuhun cha yahá sacuvi yo, tari cha condutya yo, tari cha tyisó yo ndaha yo síqui ñu chiñó iñi chí Nyoo na nasoco ra chí ñu, tari tuhun cha cunandoto tandihí ñáyivi cha yahá chíi, ta tari tuhun cha cucutuñi chí tandihí ñáyivi nuu Nyoo ta yihí ñu cuhun ñu anyaya tyicuan ri maa. Ma ndoo ri yo chihin tandihí cuan.

³ Soco tatu Nyoo ta chaha ra, sacuvi yo ihya: cuhun yo ityi nuu ca.

⁴⁻⁶ Vatyi ñu cha yahá naquehen cuenda cha ndichin Nyoo noo chaha, chitó ñu cha chahá Nyoo, ta nyaá Tatyí Ii Nyoo chihin ñu. Ta cha chitó ñu yoso caa cha vaha tuhun Nyoo, ta cha ñihi ñu tunyee iñi Nyoo. Ta chihin tunyee iñi cuan cunyaca ñaha Nyoo ñuhu ñáyivi chaa. Tatu cha yahá naquehen cuenda ñu tandihí cha vaha cuan noo chaha, ta yahá cuan ta sandihí ñu cha chinó iñi ñu chí Nyoo, ma cuví ca cha ndu uvi iñi ñu inga chaha. Vatyi suri maa ñu tari cha tyaá ñu chí ra Cristo nu cruzi inga chaha, vatyi chahá ñu cha cuacu nyaá ñáyivi chí ra.

⁷ Añima ñáyivi cuví tari noo ñuhú nu sahá tyiño ñu, vatyi noo ñuhú tahan ri chaha cha coon savi, chíi ñuhú cuan ndutya savi cuan. Tatu vaha ñuhú cuan ta vaha cuvaha cha tachí ñu nuu chí, cunasoco Nyoo chí ñuhú cuan.

⁸ Soco tatu cañá iñu ta cañá nyava nuu chí, ñahri maa tuhun. Ta cusoco Nyoo chí ñuhú ña vaha cuan ta cucayu chí. Ta tyicuan caa tucu cucuvi chí ñu cha sandihí cha chinó iñi chí Nyoo.

⁹ Yañi, vasi cahán ndi tyicuan caa, soco chitó vaha ndi vatyi nyoho sacuví ndo cha vaha, maa maa ri cha sacuví ñu cha cacú añima sacuví ndo, ta ña sacuví ndo tari ñu cuví tari ñuhú ña vaha cuan.

¹⁰ Vatyi Nyoo, ra vaha cuví ra, ta ma naa iñi ra cha sacuví ndo. Ta nyehé ra vatyi cuñí xaan ndo chí ñu yihí cuenda Nyoo, vatyi tyinyeé ndo chí ñu, ta tyinyeé ca ndo chí ñu nya vityin.

¹¹ Cuñí ndi vatyi na cuní ca iñi ndo nyacua nya quichi Sutu Mañi yo, tyicuan caa ta cuñihi ndo tandihí cha nyatú ndo.

¹² Ña cuñí ndi cha cusuchan ndo, soco saha ndo cuenda chí ñu cha chinó vaha iñi

chi Nyoo ta saçuvi ndo tari sacuvi ñu. Vatyí ñu chinó vaha iñi chi Nyoo chihin cha cama iñi ñu, ican ñu ñihí cha catyí Nyoo tyi cuhva ra chi yo.

¹³ Vatyí ta cha naha catyí Nyoo chi ra Abraham, vatyí cuhva ra noo cha cuhva ra chi ra. Ta Nyoo tyag ra cuhva cha cuhva ra, ta noo ri tuhun cahán ra vatyí maa ra, Nyoo cuví ra.

¹⁴ Ta tyehe caa catyí ra: “Cha ndicha vatyí cunasoco xain chuun ta cuaha xaan sehun cucuhve”, catyí ra chi ra Abraham.

¹⁵ Ta ra Abraham chihin cha cama iñi ra, nyatú ra tuhun cahán Nyoo chihin ra, ta tyicuan caa naqueheñ cuenda ra cha catyí Nyoo tyi cuhva ra chi ra.

¹⁶ Tatu noo ñáyivi cuacuhva ñu noo cha cuacuhva ñu chi tahan ñu ta tyanaha ñu sivi noo ra cahnu ca. Ma chihin yucuan ri.

¹⁷ Ta yucuan chaha vatyí Nyoo minoo ri tuhun cahán ra, vatyí cuñí ra cha coto ñáyivi vatyí ndicha tuhun cahán ra, ta ña nasamá ra tuhun cahán ra.

¹⁸ Yucuan chaha iyó uvi tahan cha ma cuví nasama chi. Noo cuví cha catyí Nyoo tyi cuhva ra nyatu chi ra Abraham, ta cha cu uvi, noo ri tuhun cahán ra vatyí maa ra, Nyoo cuví ra. Ta Nyoo ña cahán ra cuendu. Yucuan chaha tandihi yo cha nyañaá yo chi ra, ni iñi yo cunyeé iñi yo chi ra, ta nyatú yo cha tyaá ra cuhva cha cuhva ra chi yo.

¹⁹ Tari noo barcu cha nuhñí noo caa vee, coto cuhun chi chihin tatyí, ta tyicuan caa quihí iñi yo cha sacacú ra Cristo añima yo. Ta cha quihí iñi yo chi ra, nuhñí yo chihin Nyoo ra nyaá inga chiyo cortina, o nya gloria cuví Cuan.

²⁰ Vatyí ra Jesús cha quihví ra yucuan ta nuña ra ityi nu cuhun yo nu nyaá Nyoo. Ta ican ra Jesús cuví ra minoo tata sutu tyicuan ri maa, tari ra Melquisedec.

7

Ra Jesús cuví tata sutu tari ra Melquisedec

¹ Ra Melquisedec cha cahin tuhun, cuví ra rey ñuu Salém, ta cuví ra tata sutu cuenda Nyoo, ra cuví ra cahnu ca. Quivi cha cuandichi ra Abraham cha chahán ra chicañi tahan ra chihin suhva ra cacuví rey, ta cuví chasaha ra chi ra, tyicuan ta quitá ra Melquisedec ityi nuu ra ta nasoco ra chi ra.

² Ta ra Abraham uchi uchi tinyaa ra siqui cha saha ganaa ra nu chicañi tahan ra, ta chaha ra chi ra Melquisedec. Ta sivi ra Melquisedec cuan cuñí chi catyí: “Rey, ra cuví ra vaha.” Ta rey ñuu Salem cuan cuví ra, yucuan chaha cuví ra: “Rey vaha cha chahá cha taxi coo añima ñáyivi.”

³ Ña catyí tuhun Nyoo yóo cha cuví sutu ra ta sivi ra, ni ña cahán chi tuhun yóo

ñáyivi chi ra. Ni ri ña cahán chi tuhun ama cacu ra, ni ama chihí ra. Yucuan chaha cuví ra tari caá Sehe Nyoo, noo tata sutu tyicuan ri maa.

⁴ Soco, vityin nyehe ndo yoso cha cahnu cuví ra Melquisedec, vatyí ra Abraham tinyaa ra uchi uchi siqui cha saha ganaa ra chi ra cacuví rey cuan nu chicañi tahan ra, ta chaha ra chi ra Melquisedec.

⁵ Tyehe ta tata ra Abraham cuví ra Melquisedec, ta cuví ra sutu, ma catyí yo tyi ra cahnu ca cuví ra. Vatyí nu cuahan ca chi ityi nuu ta suri maa ley Nyoo saniñi chi ñáyivi tata ra Abraham nacuhva ñu uchi uchi cha saha ganaa ñu chi ra cacuví sutu tata ra Leví, vasi tata ra Abraham cacuví chi ra tari maa ñu.

⁶ Ta ra Melquisedec, ñima tata ra Leví cuví chi ra, ta ni ñima tata ra Abraham, soco vita ri tyi queheñ ra uchi uchi siqui tandihi cha ñihí ra Abraham. Ta nasoco ra Melquisedec chi ra Abraham, ra cha chaha Nyoo promesa chii.

⁷ Ta chitó cachi yo vatyí cahnu ca cuví ra cha nasoco cuan, ta ñima ca ra cha nasoco ra chi.

⁸ Nyehé yo vatyí cahnu ca ra cuví ra Melquisedec cha nuu inga ra caquehén cuenda uchi uchi siqui cha iyó chi ñáyivi, vatyí rayi ri cacuví ra cuan, ta tuhva chaa tuhun chihí chi ra. Soco tuhun ra Melquisedec cahán chi nu tutu Nyoo ta catyí chi tyi ñahri tuhun chihí iyó chi ra.

⁹ Ta ra Leví, chihin sehe ra, ra cacuví tata ra Abraham, ican ra cacuví tata sutu cha tahan chi caquehén cha uchi uchi siqui cha iyó chi ñáyivi. Soco tari quivi tyiyahví tucu ra Leví cuan uchi uchi cha saha ganaa ra chi ra Melquisedec cuví cuan, vatyí ra Abraham tyiyahví ra.

¹⁰ Vatyí ra Leví, tata ra Abraham cucuvi chi ra, vasi ta cacu ca ra quivi chisatahan ra Melquisedec chi ra Abraham.

¹¹ Ta ra cacuví tata ra Leví suri tata ra Aarón cacuví chi ra, ican ra cacuví sutu cuenda yo ñu Israel, ta cha cuenda ra cuan quichi ley chahnu Nyoo. Ta vityin tyehe ta cuví nduvaha coo yo chihin Nyoo cha cuenda cha sacuvi yo cha catyí ley cuan, yucuan ndicha ña niñi ca cha quichi ra Cristo ra cuví tata sutu tari ra Melquisedec, ta ñima tari ra Aarón.

¹² Vatyí tatu Nyoo ta nasama ra chi ra cuví sutu, cuñi tucu chi cha nasama ley ñandihí.

¹³ Ta Sutu Mañi yo cha cahán tutu Nyoo tuhun, ñima tata ra Leví ta ra Aarón cuví ra, soco tata inga sehe ra Israel cuví chi ra. Ta ni noo ra vachi tata cuan ta ña tuhvá ra cuví sutu.

¹⁴ Vatyí chitó vaha yo vatyí Sutu Mañi yo tata ra Judá, sehe ra Israel vachi ra, ta ra

Moisés ñahri maa tuhun tata ra Judá cahan ra quívi cahan ra tuhun ra cacuví sutu.

¹⁵ Ta yucuan nyehé vaha yo, vatyí Nyoo natyaa ra inga sutu tari ra Melquisedec.

¹⁶ Ñima tari catyí ley quichí ra, vatyí ley catyí chi yóo chí tata cua quichi noo ra cuví sutu, ta ña quichí ra tata cuan, soco quichí ra vatyí iyó cha ndicha ñuhu Nyoo chihin ra ta ñahri tuhun chíhi nyisó ra.

¹⁷ Vatyí ican ihya cuví cha cahan Nyoo tuhun ra:

Yoho cuvún tata sutu tyicuan ri maa, Tari ra Melquisedec.

¹⁸ Yucuan chaha sacuachiyó Nyoo ley chahnu cuan vatyí ña cuví maa tyinyee chi chí ñáyivi, ta ña chíñuhú.

¹⁹ Vatyí ley cha chahá Nyoo chi ra Moisés, ña sanduvahá maa chí añima yo. Ta vityin, tyiño nuu ley chahnu cuan, iyó inga tuhun vaha ca cha yíhi ñi yo. Ta chíhin ihya tuhvá yo chí Nyoo vatyí sanduvahá ra Cristo cuhva coo yo chíhin Nyoo.

²⁰⁻²¹ Nyoo tyaa ra cuhva ta tyanahá ra vatyí cuhva ra noo sutu cha cahnú ca chí yo. Soco sutu cha iyó vityin ña tyanahá Nyoo quívi tyisó ra chí ra. Vatyí nu tutu Nyoo catyí chí tyehe caa:

Sutu Mañi yo, ñin ri tuhun cahan ra, ta ma nasama ra cuhva catyí ra tyehe caa:

“Yoho cuvún Sutu tyicuan ri maa, tari cuví ra Melquisedec”, catyí Nyoo.

²² Yucuan chaha ra Jesús chahá ra noo tuhun vaha ca chí yo, ta ñima ca tuhun cha xihna ri cuan.

²³ Vatyí cha cuaha xaana ra cacuví sutu, soco chaha chí ri tuhun chíhi chí ra.

²⁴ Soco ra Jesús ñahri tuhun chíhi iyó chí ra, ta ña ndihi tuhun cha cuví ra sutu.

²⁵ Yucuan chaha tyicuan ri maa cuví sacacu ra añima ñu natuhvá chí Nyoo cha cuenda ra, vatyí iyó maa ra tyicuan ri maa, vatyí cacana tahvi ra chí Nyoo cha cuenda ñu.

²⁶ Yucuan chaha ra Jesús cuví sutu cha chíñuhú chí yo. Ta maa ra, ii ra, ñahri cha quíñi caa sacuví ra, ta ni ñahri cuatyí ra. Ta ña cutahán ra chíhin ñu iyó cuatyí. Ta sucun ca nyaá ra, ican saha andívi.

²⁷ Ñima tari inga ra cacuví tata sutu cuan, vatyí cuñí chí cha cacahñi ra chí quiti ta cuhva cuenda ra chí Nyoo ndí quívi. Ta cha xihna ri, na naa cuatyí maa ra, ta yaha cuan ta naa cuatyí ñáyivi. Soco ra Jesús noo ri chaha, chahá cuenda ra chí ra chí Nyoo na naa cuatyí tandíhi yo.

²⁸ Ley Nyoo cha quehen cuenda ra Moisés, tyisó chí chí ra cacuví nuu chí tata sutu, soco ra iyó cuatyí cacuví ra. Soco yahá cuan ta chahá Nyoo noo tuhun chaha, ta ñin ri tuhun cahan ra. Ta tyisó ra chí Sehe ra cha cuví ra Sutu cahnú ca, ta maa ra cuví ra noo ra vaha tyicuan ri maa.

8

Natyihí tahan Nyoo tuhun chaa chihin yo quívi chíhi ra Jesús cha cuenda yo

¹ Ta chíhí cha tandíhi cha cahnú nu tutu ihya, ican ihya cuví cha ñiñi ca tuhun: Ra cuví tata sutu cahnú chí yo cuví ra noo ra vaha tyicuan ri maa, ta chicunyaá ra nu tyayu chíhí gloria chíyo vaha Nyoo.

² Ta cuví ra Sutu noo nu cuví vehe ñuhu cha ndicha vaha nu nyaá Nyoo. Maa Sutu yo Nyoo savahá vehe cuan, ta ñima rayíi.

³ Tandíhi ra cacuví tata sutu tyisó Nyoo chí ra, vatyí cuhva cuenda ra ofrenda chí Nyoo ta cahñi ra quiti na naa cuatyí ñáyivi chíhin ñiñi ti. Ta yucuan chahá ñiñi cuñi chí cuhva cuenda tucu ra Jesucristo ñiñi ra chí Nyoo.

⁴ Tyehe ta síqui ñuhu ñáyivi nyaá ra cuví ra sutu, ni ñima sutu cuví ra tatu tyicuan caa. Vatyí síqui ñuhu ñáyivi, iyó ca ra cacuví sutu cha cachahá cuenda ofrenda chí Nyoo tari cuhva catyí ley cha tyaa ra Moisés.

⁵ Soco ra cacuví sutu síqui ñuhu ñáyivi, sacuví ra tyiño nuu Nyoo soco tari cuhva cuví andívi. Cuví chí noo xiñahñu tyiño sahá ra Cristo. Ta chíto yo vatyí tyicuan caa, vatyí quívi cha cua savahá ra Moisés vehe ñuhu cuan ta cha naha, Nyoo catyí ra chí ra tyehe caa: “Saha vaha cuenda, ta savahun tari cuhva caá cha sañahí chuun quívi chinyaun nu yucu cuan”, catyí Nyoo chí ra.

⁶ Soco ra Cristo ra cuví sutu cahnú chí yo, vaha ca cuhva sacuví ra, vatyí cha cuenda maa ra, natyihí tahan Nyoo noo tuhun vaha xaana ca chíhin yo, vatyí vaha ca cha cucuhva ra chí yo.

⁷ Vatyí tyehe ta cuví cacu añima yo chíhin tuhun xihna ri cha natyihí tahan Nyoo chíhin yo, ña chíñuhú ca cha natyihí tahan chaha ra tuhun chíhin yo cha cu uvi chaha.

⁸ Soco Nyoo nyehe ra vatyí ña vaha maa sacuví ñáyivi cuan, ta cahan ra tuhun ñu nu tutu ra tyehe caa:

Cuchaa chí quívi vatyí cunatyihí tahin tuhun chaa chíhin ñáyivi Israel ta ñu Judá, catyí Sutu Mañi yo.

⁹ Ñima tari natyihí tahin tuhun chíhin ñáyivi chahnu ñu, quívi tñin ndaha ñu ta tavé chí ñu ñuu Egipto.

Vatyí ña sacuví ñu tuhun cha natyihí tahin chíhin ñu,

ta yucuan chaha sañé chí ñu, catyí Sutu yo Nyoo.

¹⁰ Tuhun cha cunatyihí tahin chíhin ñu ñuu Israel nu cuahan ca chí, tyehe caa cucuví, catyí Sutu Mañi yo:

Chíhí cha chíñi tuñi xiñi ñu, cutyai ley mai, ta chíhí añima ñu cutyai.

Tyicuan ta mai cucuví Nyoo ñu, ta maa ñu cucuví ñu ñáyivi chíi.

¹¹ Tyicuan ta ña niñi ca cha sañahá ñu chi tahan ñu, ni chi yañi ñu, tacuhva vatyí cohon nuu ñu chi yuhu cha cuví Nyoo ñu.

Vatyí tandihí ñu, cucohon nuu ñu chii, nyacua nya ñu luhlu ca ta nyacua nya ñu chahnu ca.

¹² Ta cusahí ticahnu iñi cha quiñi caa cha sacuví ñu.

Ta ma nicohon ca maa iñi cuatyí ñu, catyí Sutu Mañi yo.

¹³ Quiví cha cahán Nyoo tuhun cha natyihí chaa ra tuhun chihin yo, cuñí chi catyí vatyí cha sacuchahnu ra cha xihna ri cuan. Ta numí ri cundihí tuhun cha cuví cha chahnu cuan.

9

Nu sañahá chi yoso caa vehe ñuhu cha iyó síqui ñuhu ñayiví ta vehe ñuhu nu cuví andiví

¹ Quiví natyihí tahan Nyoo tuhun cha xihna ri chihin ñáyiví, chaha ra cuhva chi ñu yoso caa sacahnu ñu chi ra, soco chichi noo vehe ñuhu cha nyaá síqui ñuhu ñayiví ihya.

² Tyehe caa chinq vehe ñuhu cuan: Chata noo cortina nyaá cuarto cha xihna ri nu tayucú cañileru, ta nanyaá mesa nu catuví pan ii. Ta chicunañi cuarto cuan Nu Ii.

³ Chata cortina cu uvi, yucuan cuví nu chicunañi Nu Ii Xaan Ca.

⁴ Ta yucuan nanyaá noo arta xuhun cuanu nu chahmí ra cutu. Ta nanyaá caja, cha natyihí tahan Nyoo tuhun chihin yo, ta iñi xuhun cuanu nicacahnu. Ta chichi cuan ñohó casitu xuhun cuanu cha ñohó maná. Ta ñohó yutun cha natyacú cha chindahá ra Aarón. Ta ñohó tucu yuu cha nyaá ndi uchi mandamientu.

⁵ Ta síqui caja cuan nyicú cha tari caa ángel, ta cuñí chi catyí vatyí nyaá Nyoo yucuan. Ta chihin ndichin ángel cuan cachasí ra nu cuví nu tuhva Nyoo saha ra ticahnu iñi cuatyí ñáyiví. Cha vityin ña cuví nacatyí ca ndi síqui tuhun ihya.

⁶ Ta tyicuan caa cuví vehe ñuhu cuan. Ta ndiquiví ri caquihví ra cacuví sutu chichi cuarto cha xihna ri nu nañi Nu Ii, tacuhva sacahnu ra chi Nyoo.

⁷ Soco cuarto cu uvi Nu Ii Xaan Ca cuan iyó maa minoo ra cuví nuu chi sutu, ta yucuan ra cuví quihví yucuan, noo chaha cha noo cuiya. Ta cuhva cha quihví ra, cuñí chi cuiso ra niñi quití vatyí cuhva cuenda ra chi Nyoo cha cuenda cuatyí maa ra ta cuatyí ñáyiví.

⁸ Ta cha tyicuan caa sañahá Tatyí Ii Nyoo chi yo vatyí, ta cuví ca chaa yo nuu Nyoo vatyí ni nyaá ca cuarto cha xihna ri cuan.

⁹ Tandihí maa ihya cuví chi tari noo xiñahñu ri cha cuenda tuhun chaa cha

chacun Nyoo vityin: vatyí noo cha chaha cuenda ñu chi Nyoo ña tyiñyee chi chi ñu na caca vaha iñi ñu.

¹⁰ Vatyí tandihí cuhva sacuví ra cacuví sutu cuan cahán chi maa ri cuenda ñáá cha cuví cachi ñáyiví, ta ñáá cha cuví coho ñu, ta yoso caa cundundi coño ñuhu ri ñu. Ta catuví cuhva cuan, nyatu chi nya quiví cacun Nyoo inga cuhva vaha ca.

¹¹ Soco vityin cha yaha quichí ra Cristo ta maa ra cuví tata sutu cahnu cha cuenda tuhun vaha ca cha chacun Nyoo. Quihví ra chichi vehe ñuhu vaha ca, ta ndi ca, vatyí maa ra cuví sutu. Ta ñima rayi savaha vehe ñuhu cuan o cuñí chi catyí, ñima vehe ñuhu ñuhu ñayiví ihya cuví.

¹² Ra Cristo quihví ra vehe ñuhu nu cuví gloria Nu Ii Xaan Ca. Soco ñima ca cha cuhva cuenda ra niñi mbee luhlu, o becerro, soco niñi maa ra chaha cuenda ra. Ta tyicuan caa quihví ra noo ri chaha nu ndihí tuhun, ta tyicuan caa ta cuví sacacu ra chi yo tyicuan ri maa.

¹³ Niñi toro, ta niñi ndixihyu, ta ñiyaa becerro cha cachahmí ra nu arta, tuhva ra catyicú ra chata ñu ca iyó cuatyí, ta coño ñuhu ri ñu sandundi chi cuan nuu Nyoo.

¹⁴ Ta tatu tyicuan caa, ¡Nana cha cahnu ca tunyee iñi iyó chi niñi ra Cristo! Vatyí tyinyee Tatyí Ii chi ra ta chaha cuenda ra chi ra chi Nyoo chihin cha ñahri cuatyí ra. Ta niñi ra sandachí chi cha ña vaha cha caá añima yo tacuhva ma cuita ca iñi yo ley cha chaha tuhun chihí chi yo, ta tyicuan caa ta cuví sacuví yo tyiño nuu ra cuví Nyoo nyitó.

¹⁵ Yucuan chaha ra Jesucristo cuví ra cha cahán chaha yo cha cuenda tuhun chaa cha natyihí tahan Nyoo chihin yo. Ta cha cuenda cha chihí ra, iyó ticahnu iñi cuatyí cha sacuví yo quiví chinyacá ñaha tuhun cha xihna ri cuan chi yo. Ta yoó, ñu nacana Nyoo chi cuví yo, cuví naquehen cuenda yo noo cha ma ndihí ca maa, cha catyí maa ra tyi cuhva ra chi yo.

¹⁶ Vatyí tatu iyó noo tutu cha sandoq noo ra chihí, ta catyí tutu cuan ñáá ndihí cha cuñihí ñáyiví chi ra tatu chihí ra; cuñí chi cha coto vaha ra cuví tyiño tatu ndicha cha chihí ra cha sandoq tutu cuan; tyicuan ta cuví sacaca ra tyiño cuan ta nasacha ra cha tahán chi chi ñu cuan.

¹⁷ Vatyí cha niri ca cha iyó ra cha sandoq tutu cuan, ma cuví cundaa tyiño cha quehen cuenda ñu cha tahán chi chi ñu, soco nya cúvi ra, tyicuan ta cuví quehen cuenda ñu.

¹⁸ Yucuan chaha chihí quití ta chatí niñi ti quiví natyihí tahan Nyoo tuhun cha xihna ri cuan chihin yo.

¹⁹ Quiví cuan, ra Moisés sacotq ra tandihí ley Nyoo chi tandihí ñáyiví. Yaha cuan ta quehen ra noo sahna cuaha cha chinq

chihin ixi mbee ta chihin noo soco yutun cha nañi hisopo, satyij ra nu niñi becerro ta nu niñi ndixihyu luhlu, nasaca ra chihin ndutya, ta tyicu ra chata libro ley Nyoo ta chata tandihi ñáyivi ñandihí.

²⁰ Tyicuan ta quichaha catyí ra chi ñu: “Ican ihya cuví niñi cha cuví cha ndaa vatyi natyihí tahan Nyoo tuhun chihin ndo”, catyí ra.

²¹ Ta suri tyicu tucu ra Moisés niñi nu cuví vehe ñuhu cuan, ta siqui tandihi cha cachotyíñó ra yucuan nu casacahnú ra chi Nyoo.

²² Tyicuan caa sacuví ra vatyi catyí ley Nyoo tyi tandihi ta chihin niñi, cuñi chi ndundí nuu Nyoo. Ta catyí tucu chi vatyi ma saha Nyoo ticahnu iñi cuatyí tatu ma cati niñi.

Niñi ra Cristo, ican cuan tinyaa cuatyí yo

²³ Ta yucuan chaha cuñi chi cha sacuví tata sutu tyicuan caa, vatyi ndundí tandihi cuan, vatyi cuví chi noo xiñahñu cha iyó ityi andívi. Soco tandihi cha cuenda ityi andívi, cuñi chi noo niñi vaha ca cha cuhva cuenda yo, ta ñima ca tari niñi quiti cuan. Cuñi chi niñi ra Cristo.

²⁴ Vatyi ra Cristo ña quihví ra chichi noo vehe ñuhu cha savaha ñáyivi cha cuví xiñahñu ri. Soco quihví ra chichi vehe ñuhu cha ndicha vaha cha cuví gloria. Ta vityin cahán ra chaha yo nuu Nyoo.

²⁵ Ra cuví nuu chi sutu cuenda ñu Israel quihví ra Nu Ii Xaan Ca cuan tahan cuiya vatyi cuhva cuenda ra niñi cha ñima niñi ra cuví. Soco ra Cristo, ña cuaha chaha cuñi chi cuhva cuenda ra chi ra.

²⁶ Vatyi tyehe ta tyicuan caa, cuaha chaha cuñi chi cha nyeha ra tindocho ta cúvi ra nyata chingó ñuhu ñáyivi ta nya vityin. Soco vityin cha cua cuyatyin cundihi tuhun ñáyivi, noo ri chaha quichí ra Cristo, ta chahá cuenda ra chi maa ra tacuhva vatyi cuví tinyaa ra cuatyí yo.

²⁷ Noo ri chaha, cúvi yo ta yaha cuan ta cucutuñi chi yo.

²⁸ Ta tyicuan caa tucu ra Cristo, noo ri chaha, chahá cuenda ra chi ra tacuhva tinyaa ra cuatyí cuaha xaan ñáyivi. Yaha cuan ta cuquichi ra cha cu uvi chaha, ñima ca cha quichi tinyaa ra cuatyí, soco cha quichi sacacu ra chi ñu cha nyatú chi ra.

10

¹ Vatyi ley Nyoo cha tyaa ra Moisés, cuví chi tari noo xiñahñu ri, cha cuenda cha vaha ca cha cuquichi. Soco ñima maa cha ndicha vaha cuví. Vatyi ley cuan, ma cuví maa sanduvaha chi chi ñu nanducú chi Nyoo. Vatyi tahan cuiya ri chahá cuenda ra cuví nuu chi tata sutu cuenda ley chahnu

niñi quiti. Soco ma cuví cacu añaima yo chihin cuan.

² Vatyi tyehe ta cuví sanduvaha ley cuan chi ñu, cundihi tuhun cha chahá cuenda ra niñi ndicuiya ri. Vatyi tatu cha ndundí ñu noo chaha cha cuenda tandihi maa, ma caca ca xifi ñu vatyi iyó cuatyí ñu ta ña chiñuhú ca cha cuhva cuenda ra inga chaha.

³ Soco tahan cuiya ri chahá cuenda ra niñi, ta ican cuan sanicohón chi iñi ñu vatyi iyó cuatyí ñu.

⁴ Vatyi niñi toro ta niñi ndixihyu, ma cuví maa tinyaa chi cuatyí yo.

⁵ Yucuan chaha ra Cristo, quívi cuaquichi ra siqui ñuhu ñáyivi ihya, catyí ra chi Nyoo tyehe caa:

Ña cuñun cha cahñi ñáyivi quiti ta cuhva cuenda ñu chuun, yucuan chaha savahun noo coño ñuhu chii. (Vatyi tyicuan caa ta cuví cuhva cuende chii chuun.)

⁶ Ta vatyi ña tahnán iñun cha cahmi ñu quiti ta cuhva cuenda ñu chuun cha cuenda cha tinyaa cuatyí ñu.

⁷ Catyí yuhu: “Ma yuhu, vachi ihya vatyi sacuvi cuhva cuñun, Nyoo Suti, tari cuhva cahán chi tuhun nu libro ley maun”, catyí ra Jesucristo.

⁸ Cha xihna ri, catyí ra Jesucristo vatyi Nyoo, ña cuñi ra cha cuhva cuenda ñu chi quiti chi ra. Ni cha cahmi ñu quiti cha cuenda cha tinyaa cuatyí ñu, ña cuñi Nyoo, catyí ra. Vasi maa ri tuhun cha catyí ley chahnu vatyi sacuví yo cuví, soco ña tahnán iñi Nyoo, catyí ra.

⁹ Ta yaha cuan ta catyí tucu ra: “Ma yuhu vachi ihya, vatyi sacuvi cuhva cuñun, Nyoo Suti.” O cuñi chi catyí, sacuachiyó Nyoo cuhva chahnu cuan, ta nacuvi chi inga cuhva chaa ihya.

¹⁰ Nyoo sandundí ra chi yo vatyi ra Jesucristo sacuví ra cuhva cuñi Sutu ra, ta chahá cuenda ra coño ñuhu ra. Noo ri chaha chihí ra ta ndihí tyiño saha ra.

¹¹ Tandihí ra cacuví tata sutu ñuu Israel, ndi quívi sacuví ra tyiño nuu Nyoo, ta tyicuan ri chahá cuenda ra suri maa cha tuhvá maa ra chahá cuenda chi Nyoo, vasi ña cuví tinyaa chi cuatyí yo.

¹² Soco ra Jesucristo, noo ri chaha chahá cuenda ra chi ra chi Nyoo cha cuenda cuatyí yo. Tyicuan ta chicunyaá ra tyayu gloria chiyó ndaha vaha Nyoo.

¹³ Ta yucuan nyatú ra nyacua nya cacun Nyoo chi ra xaan iñi chi ra chaha ra.

¹⁴ Vatyi chihin noo ri chaha cha chihí ra Cristo ta cuví sanduvaha ra añaima ñáyivi cuenda Nyoo, tyicuan ri maa.

¹⁵ Ta suri tyicuan caa catyí tucu Tatyí Ii Nyoo chi yo. Vatyi cha xihna ri catyí ra chi yo nu tutu tuhun Nyoo tyehe caa:

16 Tuhun cha cunatyihí tahir chihin ñu quívi cuan, tyehe caa cucuvi, catyí Sutu Mañi yo:

Cutyai ley mai chichi añima ñu, ta cutyai chichi cha chiñi tuñi xiñi ñu, catyí Nyoo.

17 Ta yaha cuan ta catyí tucu ra: Ma nicohon ca maa iñi cuatyí ñu, niri cha quíni caa cha chinyacuví ñu, catyí Sutu Mañi yo.

18 Ta cha yaha saha Nyoo ticahnu iñi cuatyí, ña cuñi ca chí cha cahñi ñáyivi chí quiti, ta cuhva cuenda ñu chí Nyoo cha cuenda cuatyí ñu.

Cuñi chí nanducu yo chí Nyoo

19 Yucuan chaha yañi, cuví quihvi maa yo Nu Ii Xaan Ca cuan nu nyaá Nyoo, cha cuenda vatyi cha chati ñiñi ra Jesucristo ta tinyaa ra cuatyí yo.

20 Cha nuña ra Cristo noo ityi chaa, ityi cuhun yo nu conyito añima yo. Vatyi maa maa cuhva cha chihí ra ta ndata cortina cha chasí nu chinyaa Nyoo. Cha tahnya cortina, ican cuví cha chihí ra, tacuhva nuña ityi quihvi yo ta chaa yo nu nyaá Nyoo.

21 Ra Jesús cuví sutu cha nyacá ñaha nu cuví vehe Nyoo andívi.

22 Yucuan chaha cuñi chí nanducu yo chí Nyoo chihin noo cha ndicha ta chihin cha ñi iñi yo chinó iñi yo chí ra, vatyi maa ra sandundi ra añima yo, tacuhva ma quihí ca iñi yo vatyi iyó cuatyí yo, vatyi tari cha nacatya ra coño ñuhu yo chihin ndutya cuii, na ndu ndi yo nu Nyoo.

23 Na cuní ca iñi yo chino iñi yo chí Nyoo ta ma ndu uvi iñi yo vatyi Nyoo cuhva ra cha catyi ra vatyi cuhva ra chí yo.

24 Ta cuñi chí nanducu yo cuhva tyinyee yo chí tahan yo, na cuñi ca ñu chí tahan ñu ta sacuvi ca ñu cha vaha.

25 Ña tahán chí quehen yo cuhva caá ñu cha sandihí cha quichi nu ndu in ri yo, soco cuñi chí cha sanduní yo iñi noo noo tahan yo. Ta yaha ca cuhva cuñi chí tyinyee yo chí tahan yo vityin cha nyehé yo vatyi Sutu Mañi yo cha cuñi chaa quívi quichi ra ta cucutuñi chí tandihí ñáyivi.

26 Vatyi tatu cha yaha chichohon nuu yo cha ndicha, ta ña quichahá yo ta tyicuan ri sacuvi ca yo cuatyí, ñahri ca cuhva coo ticahnu iñi cuatyí yo.

27 Ta cutachi tuñi Nyoo chí yo. Ta cutyihí ra chí yo nu cucayu ñáyivi cha xaan iñi chí ra, ta cundihí tuhun ñu.

28 Tatu noo ñáyivi Israel ña quichaha ñu cuhva catyi ley ra Moisés, ta chiyó uvi o uñi testigu, cúvi ñu cuan cha cuenda cuatyí ñu, ta yori cundahvi cuñi nyehe chí ñu.

29 Ta nyaca cuví ñu cha ña quichaha ca chí Sehe Nyoo ta sahá ñu tyi niñi ra cha

sanduvaha añima ñu cha ñima ri tuhun cuví. Ta chihin niñi cuan natyihí tahan Nyoo tuhun chihin yo. Soco cahán ña vaha ñu siqui Tatyí Ii Nyoo cha chahá tumañi iñi chí yo. Yaha ca cuhva cutachi tuñi Nyoo chí ñu cuan.

30 Vatyi chitó yo vatyi Sutu Mañi yo, ican ra catyi ra tyehe caa: “Yuhu tahán chí tachi tuñi chí ñáyivi, yuhu catyi cha cuvi chí ñu.” Ta catyi tucu ra vatyi cutuñi chí ñu nuu ra.

31 Ndicha cha iyó Nyoo, ta yucuan chaha tahán chí cuyuhvi yo chí ra, coto tachi tuñi ra chí yo cha cuenda cuatyí yo.

32 Soco ma naa iñi ndo quívi natin cuenda ndo cha ndichin Nyoo chichi añima ndo, vatyi quívi cuan cunyeé xaan iñi ndo cha nyehe ndo tindoho cha cuenda ra.

33 Yihí nyoho cahán ñáyivi chí ndo, ta sanyehe ñu tindoho chí ndo nu tuvi. Ta yihí nyoho uhvi xaan cuví chí ndo cha nyehe ndo cha cuví chí tahan ndo cha tyicuan caa, ta cunyeé xaan ndo.

34 Ta cundahvi iñi ndo chí ñu ñoho vehe caa, ta chihin cha sií cuñi ndo cunyeé ndo quívi tinyaa ñu cha iyó chí ndo, vatyi chitó ndo vatyi andívi iyó ca cha vaha ca cha cuenda ndo, ta ña ndihí maa cuan.

35 Yucuan chaha ma sandihí ndo cha quihí iñi ndo chí ra Cristo, vatyi nu cuahan ca chí ta cuñihí ndo cha vaha ca vatyi chinó iñi ndo.

36 Cuñi chí cha coo cha cama iñi ndo tacuhva cuví sacuvi ndo cuhva cuñi Nyoo, ta tyicuan caa ta naquehen ndo cha catyi ra tyi cuhva ra.

37 Vatyi nu tutu Nyoo catyi chí tyehe caa: Ña naha ca ta cuquichi ra cha tahán chí quichi, ta ma cucuee ca ra.

38 Ta catyi Sutu Mañi yo tyehe caa: “Ñu cha sanduvahí añima, chihin cha chinó ri iñi ñu chí yuhu, ta conyito añima ñu.

Soco tatu cunuhu chata ñu, ma cusí cuñi yuhu chihin ñu”, catyi Nyoo.

39 Soco maa yo ña sacuvi yo tari sacuvi ñu cuanaá añima, vatyi ñu chinó iñi chí Nyoo cuví yo, ta tyicuan caa cucacu añima yo.

11

Cuhva cuñi chí cha chinó iñi yo chí Nyoo

1 Cha chinó iñi yo chí Nyoo ican cuví cha chitó vaha yo tyi cuñihí yo cha nyatú yo, ta chitó vaha yo vatyi noo cha ndicha vaha cha ña nyehé yo vityin, cuñihí yo vatyi chinó iñi yo chí Nyoo.

2 Ñáyivi chiyó ta cha naha, chinq iñi ñu chí Nyoo, ta yucuan chaha quita vaha ñu nuu ra.

3 Cha cuenda cha chinó iñi yo chí Nyoo, ta chitó yo vatyi savaha ra ñuhu ñáyivi

chihin tuhun cahán ra. Ta chító yo vatyi tandihi cha nyehé yo vityin, chingó chi ta cha naha chihin cha ña tuhva yo nyehé.

⁴ Cha cuenda cha chingó iñi ra Abel chi Nyoo, ta chahá cuenda ra noo cha chahá ra chi Nyoo. Ta vaha ca cha chahá ra ta ñima ca cha chahá ra Caín, yañi ra. Ta yucuan chaha natíin cuenda Nyoo chi ra tari noo ra vaha, ta natíin cuenda ra cha chahá ra. Yucuan chaha vasi cha chihí ra Abel, soco tari quívi cahán ca ra tuhun chihin yo vityin, yoso caa tahán chi chino iñi yo chi Nyoo.

⁵ Cha cuenda cha chingó xaan iñi ra Enoc chi Nyoo, ta cuanuhú ra chihin Nyoo chihin cha ña chihí ra. Ta ña nañihí ca ñu chi ra, vatyi naquehen Nyoo chi ra. Ta nu tutu Nyoo, catyi chi vatyi cha ni cumañi ca naquehen Nyoo chi ra Enoc, sacuví ra maa ri maa cuhva tahán iñi Nyoo, yucuan chaha naquehen ra chi ra.

⁶ Soco ma cuví sacuví yo cha tahán iñi Nyoo tatu ña chinó iñi yo chi ra. Vatyi tatu cuñí yo nanducu yo chi ra, cuñí chi cha chinó iñi yo tyi iyó ra. Ta cuñí tucu chi chinó iñi yo vatyi cucuhva ra cha vaha chi ñu nanducú chi ra.

⁷ Cha cuenda cha chingó iñi ra Noé chi Nyoo, ta quichahá ra tuhun cahán Nyoo, cha catyi Nyoo chi ra noo cha cucuví tyi nuu ca. Ta vasi tañaha ca nyehe ra soco cha cuenda cha chinó iñi ra chi Nyoo, ta savahá ra barcu can ta sacacú ra chi ñáyivi chi ra. Ta cha cuenda cha chingó iñi ra chi Nyoo, sandoq ra cuatyí ñu siquí ñu cha ña quichahá chi Nyoo, na tachi tuñi ra chi ñu. Ta cha cuenda cha chingó iñi ra Noé chi Nyoo cuvahá ra nuu ra.

⁸ Ta cha cuenda cha chingó iñi ra Abraham chi Nyoo, ta quichahá ra chi ra quívi caná ra chi ra. Yucuan chaha quita ra ñuu ra ta cuahan ra nu cucuhva Nyoo ñuhú cha cundoo chi ra. Quita ra ñuu ra chihin cha ña chító ra nya cuahan ra.

⁹ Cha cuenda cha chinó iñi ra Abraham, yucuan chaha chiyó ra nu ñuhú cha ta cuhva ca Nyoo chi ra. Chiyó ra noo vehe sahma ri, ta suri tyicuan caa tucu ra Isaac, sehe ra, ta ra Jacob, sehe ñañi ra. Vatyi suri catyi tucu Nyoo chi ninduvi ra cuan tyi cucuhva ra ñuhú cuan chi ra.

¹⁰ Vatyi ra Abraham nyatú maa ra noo ñuu vaha ca cha cucuhva Nyoo chi ra, ta maa Nyoo chacun cuhva ñuu cuan ta maa ra savahá ra, ta chicha cimientu tyihi ra chaha.

¹¹ Ta suri chingó iñi tucu cu Sara cha catyi Nyoo chi ña cha cucoo sehe ña. Ta vasi cha chahnu xaan ña, soco chahá Nyoo fuerza ra chi ña, ta chicoq sehe ña. Tyicuan caa cuví vatyi chingó iñi cu Sara cha catyi Nyoo chi ña.

¹² Yucuan chaha vasi cha nyaña quívi cha cúvi ra Abraham, soco chicoq sehe ra. Ta yahá cuan cuaha xaan ñáyivi cacú cha cuví ñu tata ra. Tari cha cuaha tiño andivi, ta tari cha cuaha niyisti yuhu tyañuhu, vatyi ña cuví nacahvi yo.

¹³ Tandihí ñu cuan cachihí ñu cha ni cumañi ca naquehen cuenda ñu cha catyi Nyoo tyi cuhva ra chi ñu. Soco vasi ta naquehen cuenda ca ñu ta chihí ñu soco nyehe cachi vaha ñu chihin cha chinó iñi ñu. Ta si xaan cuñí ñu. Ta chihin cuan cutuñí iñi ñu ta cahán ñu tuhun vatyi noo ñu yahá ri siquí ñu ñáyivi ihya cuví ñu.

¹⁴ Vatyi ñu cacahán tyehe caa, cuñí chi catyi vatyi ni nanducú ñu noo nu coo ñu.

¹⁵ Tyehe ta chicá ca xiñi ñu ñuu nu quita ñu, totyehe cuví cunuhu ñu nyicuan.

¹⁶ Soco vatyi cuñí ñu noo ñuu vaha ca, o cuñí chi catyi nya gloria, yucuan chaha Nyoo ña cucahan nuu ra cha cuví ra Nyoo ñu. Vatyi cumí ra noo ñuu nu cuví coo ñu.

¹⁷ Ta cha cuenda cha chingó iñi ra Abraham chi Nyoo, yucuan cuenda quichahá ra nu cahan Nyoo ta tyaá ra cuhva cha cahñi ra chi sehe mañi ra ra Isaac, quívi nducu nyehe Nyoo chi ra tu ndicha cha chinó iñi ra, vasi suri maa Nyoo catyi ra

¹⁸ vatyi cuaha xaan ñáyivi cucuví tata ra chihin ra Isaac cuan.

¹⁹ Soco ña yuhví ra Abraham cuacuhva cuenda ra sehe ra chi Nyoo, vatyi chító ra vatyi Nyoo, iyó tunyee iñi chi ra nyacua nya cha sanandotó ra ndiyi. Ta tari quívi sanandotó Nyoo chi sehe ra, vatyi cha nyaá cha cua cahñi ra chi ra, ta nacuhvá Nyoo chi sehe ra chi ra inga chaha.

²⁰ Ta ra Isaac chingó tucu iñi ra chi Nyoo. Ta yucuan chaha catyi ra vatyi sehe ra, ra Jacob ta ra Esaú, cuñihi ra cha vaha nu cuahan ca chi.

²¹ Ta ra Jacob chingó iñi ra chi Nyoo, cuhva cha cua cúvi ra. Ta catyi ra vatyi tahan tahan sehe ñañi ra, sehe ra José, cuñihi ra cha vaha. Ta sachanu ra chi Nyoo nu nanyaá ra chihin yutun cha tuví ra.

²² Ta ra José ñandihí, chingó iñi ra chi Nyoo, ta catyi ra, cuhva cha cua cúvi ra, vatyi ñu Israel, ñáyivi chi ra, cu quita coyo ñu ñuu Egipto cuan nu cuahan ca chi. Ta sandoq ra tyiño chi ñu, vatyi na naquehen ñu yiqui ra quívi quita ñu ñuu cuan.

²³ Cha cuenda cha chingó iñi sutu ra Moisés ta sihi ra chi Nyoo, yucuan chaha quívi cacú ra, nyehe ñu tyi noo cha lee tyaqui xaan cuví ra. Ta yihí iñi ñu cha cusacacu Nyoo chi ra ta ma cúvi ra, vasi catyi rey cuan vatyi cúvi ndi ca cuatya. Ta ña yuhví ñu ta tixehé ñu chi cue uñi yoo.

²⁴ Ta ra Moisés tucu, chingó iñi ra chi Nyoo. Ta quívi cha chahnu ra, ña cuñí ca ra

cha cuvi sihi ra chi ñaha sehe rey ñuu Egipto cuan.

²⁵ Ta ni ña cuñi ra ndoo ra ñuu Egipto cuan vatyi cusii ñi ra o cunyacuvi ra cha quiñi caa. Vatyi chitó ra tyi tuhun ñi yaha ri cuvi cuan. Soco vaha taxin ca cuñi ra nyehe ra tindoho chihin ñáyivi cuenda Nyoo.

²⁶ Ra Moisés, vaha ca cuñi ra cha nyehe ra ticahan nuu cuenda ra Cristo vatyi cahnu ca cha tyayii cuvi cuan chi maa ra ta ñima ca tandihi cha tyayii cha iyó ñuu Egipto. Vatyi chitó ra tyi cua cuhva Nyoo cha vaha chi ra.

²⁷ Ta cha cuenda cha chinqo ñi ra Moisés chi Nyoo, ta quita ra ñuu Egipto, ta ña yuhvi ra cha cuxaán rey cuan. Ta sanyee xaan ra ñi ra. Tari cha vatyi nyehe ra chi Nyoo cha ña nyehé yo.

²⁸ Cha cuenda cha chinqo ñi ra Moisés chi Nyoo ta sanducahnü ra vico cha cahñi ñu noo mbee luhlu, ta tachj ra nacahyu ñu niñi ti yuvehe ñu, tacuhva vatyi ma cahñi ángel Nyoo chi ni noo sehe nuu ñu Israel.

²⁹ Ta cha cuenda cha chinqo ñi ñu Israel chi Nyoo ta yaha sava ñu Tyañuhu Cuaha, tari cha yaha ñu noo ñuhú ityi. Ta cuhva cha cacuñi tucu ra Egipto cayaha ra, ña cuvi yaha ra vatyi nacasi Nyoo tyañuhu cuan siqui ra ta cachihj ra chichi ndutya cuan.

³⁰ Ta cha cuenda cha chinqo ñi ñu Israel chi Nyoo, ta chico ñu ucha tahan chaha chata ñuu Jericó, ta tandihi cuii maa nu sama chata ñuu cuan canacoyo.

³¹ Ta cha cuenda cha chinqo ñi cu Rahab, ñaha cata ñi cuan, chi Nyoo, ta ña chihj ña ñi ri chihin ñu ñuu ña, ñu ña quichaha chi Nyoo, vatyi maa ña, tyinyee vaha ña chi ra Israel, ra chahan coyo chinyehe tatu cuvi chasaha ra tinyaa ra ñuu ña chi ra nyacá ñaha ñuu cuan.

³² ¿Ñáa ca cha cuvi catyi vityin? Cuaha xaan cuhva cucuñi chi chii tatu cahin tuhun ra Gedeón, ra Barac, tuhun ra Sansón, ra Jefté, ta tuhun ra David, ta ra Samuel ta tuhun ra cacuvi profeta Nyoo ta cha naha.

³³ Cha cuenda cha cachinqo ñi ra chi Nyoo, ta yihí ra saha ganaa ra chi inga ñuu nahnu. Ta yihí ra vaha xaan chinyaca ñaha ra ñáyivi cuenda Nyoo. Yihí ra ñihj ra cha catyi Nyoo tyi cuhva ra chi ra. Yihí ra chasi ra yuhu ndicaha.

³⁴ Yihí ra ña cayu ra chihin ñuhü chichi horno nu catyihj ra chi ra. Yihí ra cacu ra cha cahñi ñáyivi chi ra chihin mityi. Yihí ra cha ñahri fuerza chi ra, soco candunyeer, ta chiyó xaan fuerza chi ra chichi cuaty cuan, ta cuvi chasaha ra chi sindaro cuenda ñu xaan ñi chi ra.

³⁵ Ta chicoq suhva ñusihí, nandoto ñáyivi chi ñu.

Ta inga ñáyivi chihj ñu chihin cha cuaha xaan tindoho sanyehe ñáyivi chi ñu, soco ña sandoo ñu chi Nyoo vasi chihj ñu cha catyi ra, vatyi chitó ñu, vatyi tatu ma sandihí ñu cha chinó ñi ñu chi Nyoo, cunandoto ñu ta cucoo ñu noo ñáyivi vaha xaan ca.

³⁶ Ta inga ñu nyehe ñu tindoho cha cahán nyaa ñáyivi chi ñu ta cañi ñu chi ñu. Ta inga ñu chinuhñj ñu chihin cadena ta cuahan ñu vehe caa.

³⁷ Yihí ñu chihin yuu chahñj ñáyivi chi ñu. Yihí ñu chahnya ra chihin cierra chi ñu.

Yihí ñu nducy nyehe ñáyivi chi ñu. Yihí ñu chihj ñu cha chahñj ñáyivi chi ñu chihin mityi. Yihí ñu chicá noo ñu ta ñahri sahma ñu. Chihin ñu mbee ri ta ñu ndixihyu ñuhno ñu. Ndahvi xaan ñu. Ta cuihya xaan cuñi ñu. Ta sanyehe ñáyivi cha ña ñohó nuu Nyoo tindoho chi ñu.

³⁸ Ta ñáyivi ña ñohó nuu Nyoo ña nañá ñu cha cu ñi ri ñu chihin ñáyivi ndahvi cuan vatyi vaha ñu nuu Nyoo. Chicá noo ndahvi ñu ityi chiqui ndii, ityi yucu. Chiyó ñu chichi yavi yuu ta yavi ñuhú.

³⁹ Tandihí maa ñu vasi cahán vaha Nyoo siqui ñu cha cuenda cha chinó ñi ñu chi ra, soco ña ñihj ñu cha catyi Nyoo cha cuhva ra chi ñu.

⁴⁰ Vatyi natyaaq ra cuhva, cha cuhva ra nonga cha vaha ca chi ñu vatyi natyihj ra cuenda chi yo ta ñi ri cutahan chi chi yo chihin ñu cuan.

12

ñi ri chi ra Jesús tahan chi cuita ñi yo

¹ Tandihí ñáyivi cuan quita vaha ñu vatyi chinqo ñi ñu chi Nyoo. Ta vityin chihin cuan sandunii ñu ñi yo ta nyatú ñu nyehe ñu tatu quita vaha yo. Yucuan chaha cuñi chi cha sacuachiyó xiin yo tandihí cha sayangá chi yo, tandihí cuatyí cha nyicón chi yo. Ta chihin cha cama ñi yo ta tuhun yo ityi nuu ca chihin Nyoo.

² ñi ri chi ra Jesús quihí nuu yo, vatyi maa ra chahq ra cha chinó xaan ñi yo chi Nyoo, ta chahq ra tandihí cuhva tahan chi chino ñi yo. Ta cha ni cumañi ca cúvi ra, chitó ra vatyi sii xaan cucuvi chi ra cha yaha cúvi ra. Yucuan chaha, chahq ra cha cahñi ñáyivi chi ra. Ña quichaha ra ticahan nuu cha cúvi ra tari chíhi noo ra iyó cuatyí, ta vityin nyaá ra chiyó vaha Nyoo gloria.

³ Saha ndo cuenda cuhva chiyó ra Jesús, vatyi nyehe xaan ra tindoho saha ñu iyó cuatyí. Yucuan chaha ma cutatu ndo, ta ma ndu uvi ñi ndo cha nyicón ndo chi ra.

⁴ Vatyi nyoho ta chaa ca ndo nyehe ndo tindoho cha cuenda cha cañi tahan ndo

chihin cha quiñi caa, tari nyehe ra Cristo tindoho ta chihí ra.

⁵ ¿Atu cha naa iñi ndo tuhun chaha Nyoo chi ndo tari cha sehe ra chi ndo? Catyí ra tyehe caa nu tutu ra: Sehe luhli, ma cuxaun tatu saquehen ityi chuun.

Ma nducuihya iñun tatu cahín chuun.

⁶ Vatyí ra saquehén ityi yuhu chí, chaha cha cuñi chí ra, vatyí sehi cuví chí ra, catyí Nyoo.

⁷ Cunyee ndo ta cutuhva ndo tatu saquehen ityi ra chí ndo, vatyí tandihi, sehe vaha ra saha ra chí ndo. Vatyí tandihi ra iyó sehe, saquehén ityi ra chí sehe ra.

⁸ Vatyí tatu ña saquehén ityi Nyoo chí ndo, ñima sehe vaha ra cuví chí ndo, soco tatu saquehén ityi ra chí ndo, sehe vaha ra cuví chí ndo.

⁹ Ta sñin ri, ta nyihi yo, sutu yo ihya ñayiví saquehen ityi ra chí yo, ta saha yo ñayiví chí ra. Ta nyaca cuví Nyoo, tahán tucu chí saha yo ñayiví chí Sutu yo Nyoo, tyicuan ta coo añima yo tyicuan ri maa.

¹⁰ Sutu yo cuenda coño ñuhu yo, saquehen ityi ra chí yo suhva ri quiví, yoso cuhva cha cuñi chí. Soco Nyoo saquehén ityi ra chí yo cha cuenda noo cha vaha ca chí yo, vatyí sa ii ra chí yo tari maa ra, cha ii ra.

¹¹ Ndicha vatyí ña tahán iñi yo cha ndohó yo vatyí uhvi chí yo. Soco chihin cha ndoho yo, cutuhva yo coo yo noo ñayiví vaha.

Yica xaan tatu ma quichaha yo cha catyí Nyoo chí yo

¹² Yucuan chaha sandunye ndo iñi ndo, ta ma quiñi iñi ndo cha ma cuví cunyonon do chí ra Cristo.

¹³ Ta nanducu ndo cuhva coo vaha ndo chihin Nyoo, nanducu ndo cuhva caca ndoo ndo chihin ra. Tyicuan ta maa ra cuhva ra fuerza chí ndo ta nduvaha ndo nuu Nyoo ta ma cucuihya ca cuñi ndo.

¹⁴ Sñiniñi ndo coo vaha ndo chihin tandihi ñayiví. Ta coo ndo noo ñayiví cachi. Vatyí tatu ña cachi iyó yo, chihin Sutu Mañi yo Nyoo, ma nyehe yo chí ra.

¹⁵ Saha ndo cuenda chí ndo coto yihí ndo, ma ñihi ndo tumañi iñi cha iyó chí ra. Ta saha ndo cuenda chí ndo, coto cuví ndo tari noo yutun cha chahá chiti uva, ta coto quehen ñayiví cha caá ndo ta tiví ñu nuu Nyoo.

¹⁶ Ta ni noo ndo ta maa coo ndo chihin ñayiví tatu ñima ñasihi ndo o yñi ndo cuví. Ni ma cuñi ndo vatyí tuhun Nyoo noo cha ñima ri tuhun cuví, vatyí tyicuan caa sacuví ra Esaú, vatyí chihin noo nyayu ri, xicq ra tandihi cha tahán chí chí ra cha cuví ra sehe nuu sutu ra.

¹⁷ Ta chitó ndo vatyí cha yaha cuan ta cuñi ra Esaú cha nasoco sutu ra chí ra, soco

ña cuví ca. Ta vasi chacu vavaha ra, soco ña ñihí ca ra cuhva nasama ra cuhva cha chinyacuví ra.

¹⁸ Ta maa ndo chaq ndo nuu nyaá Nyoo soco ñima tari chaq ñu Israel cuan quivi chahan ñu noo yucu nu cuví yucu Sinaí. Ta yucuan nyehe ñi cayu ñuhu, ta nduñaa iñi, ta ñihi xaan tatyí.

¹⁹ Ta chihí ñu nativi cutu cuihya ta chahan Nyoo chihin ñu. Ta ñu cha chihí tuhun cahan ra, chacu ndahvi ñu tacuhva ma cahan ca ra chihin ñu, vatyí yuhvi xaan ñu

²⁰ cha cuenda vatyí ña cunyeq iñi ñu tuhun cha chahá ra chí ñu. Vatyí catyí ra tyehe caa: “Tatu quihvi noo ñayiví, cahíi ndo chí ñu chihin yuu o chihin lanza, cuví ri ñu ñayiví o quiti”, catyí Nyoo chí ñu.

²¹ Yuhvi xaan ñu cha nyehe ñu yucuan, vatyí nyacua nya ra Moisés ta catyí ra: “Ñihi xain chihin cha yuhví”, catyí ra.

²² Soco yoó ña nyehe yo cha yuhvi cuan vatyí noo yucu cha nañi Sión nu cuví ñuu Nyoo nyitó chaaq yo. O cuñi chí catyí ñuu Jerusalén cha nyaá andiví, nu nyicú cuaha mil ángel.

²³ Candú ñin ri yo vatyí sacahnu yo chí Nyoo vatyí ndú ñin ri tandihi ñu cha cuví sehe Nyoo cha nyicú sivi nu tutu nya andiví. Ta chaa yo nuu Nyoo cha cuví juee chí tandihi ñayiví. ñin ri nyicú yo chihin añima ñu vaha cha sanduvahá maa Nyoo.

²⁴ Ta natuhva ndo chí ra Jesús ra cuví ra cahán chaha yo vityin cha natyihí tahan Nyoo tuhun chaa chihin yo. Ta chati niñi ra. Ta ícan chí chahá noo cha vaha ca ta ñima ca cha chahá niñi ra Abel. (Vatyí ra Abel chihí ra ta tachí tuñi Nyoo chí yañi ra. Soco chihí ra Jesús, ta iyó tucahnu iñi cuatyí yo.)

²⁵ Yucuan chaha saha yo cuenda coto ma quichaha yo chí ra cha cahán chihin yo. Vatyí ñu Israel cuan, ña cacu ñu cha ña cuñi quichaha nu cahan Nyoo quivi cahan ra nu cuví yucu Sinaí ihya siqui ñuhu ñayiví. Ta nyaca cuví yoó, ma cuví maa cacu yo tatu nacuhva yo chata yo chí ra cha cahán chihin yo nya andiví vityin.

²⁶ Quiví cuan ndusu Nyoo sacanda chí ñuhu ñayiví. Soco vityin catyí chí tyehe caa: “Noo ri ca chaha cusacande ta ñima ñuhu ñayiví ri, soco andiví ñandihi.”

²⁷ Ta cha catyí ra vatyí cusacanda ra nonga chaha, cutuñi iñi yo vatyí cucuachiyó tandihi cha nyaá ii ri cha savahá Nyoo. Ta cundoo cha ma cuví nacanda.

²⁸ Nu chahá Nyoo cunyaa yo chihin ra nu nyacá ñaha ra, ma nacanda cuan. Yucuan chaha na nacuhva yo tyahvi nyoo chí ra, ta sacahnu yo chí ra chihin cha niñi iñi yo, ta chihin cha saha yo ñayiví chí ra, vatyí tyicuan caa tahán iñi ra.

29 Vatyí Nyoo cuenda yo, cuví ra tari noo ñuhú cha chahmí tandihí, ta tyicuan caa cusanaa ra tandihí cha ña vaha.

13

Na coo yo cuhva tahán iñi Nyoo

1 Ma sandihí ndo cha cuñi ndo chi tandihí ñu yihí cuenda Nyoo tari cha tahan ndo chi ñu.

2 Ta ma naa iñi ndo cha cuvaha ñáyivi cuví ndo chihin ñáyivi cha chaá vehe ndo. Vatyí iyó chaha cha cuenda cha vaha ñáyivi cuví ndo, ta chahá ndo nu coo ñáyivi; chí ángel, chahá ndo nu coo, ta ña tuví iñi ndo.

3 Ma naa iñi ndo chí ra ñohó vehe caa tari cha ñohó tucu maa ndo vehe caa chihin ra. Ta tyicuan caa tucu ñu nyehé tindoho sahá ñáyivi. Saha ndo tyi nyehé tucu maa ndo tindoho tari nyehé ñu, tyicuan ta cundahvi cuñi ndo chí ñu ta tyinyee ndo chí ñu. Vatyí chitó ndo yoso caa uhvi chí ñu cuan tyi ñáyivi cuví ñu tari maa ndo.

4 Cha tandaha ndo, noo cha vaha cuví. Ta nyoho cha tandahá ndo tahán chí saha ndo ñáyivi chí yí ndo o chí ñasihí ndo. Vii coo ndo chihin tahan ndo, vatyí Nyoo cutachi tuñi ra chí ñu iyó yí ta iyó inga ra chí ñu, o ra iyó ñasihí ta iyó inga ñusihí chí ra.

5 Ma cuñi xaan ndo xuhun. Ndo ndo vaha chihin cha iyó chí ndo, vatyí Nyoo catyí ra: “Ma sañe chuun ta ni ma sandoo ñihne chuun”, catyí ra.

6 Yucuan chaha cuví catyí yo chihin cha ñi iñi yo:

Sutu Mañi yo cuví ra tyinyee chí, Ma yuhvi ñáá cha sacuvi ñáyivi chíi.

7 Nícohon iñi ndo chí ra cayihí ndaha vehe ñuhu, ra cacahán tuhun Nyoo chihin ndo. Nacaca xiñi ndo vatyí maa ra cachi iyó ra nuu Nyoo, ta cunyicon ndo cuhva cha vaha xaan chinó iñi maa ra chí Nyoo.

8 Ra Jesucristo ña nasamá ra. Ican ra cuví ra ta tyembu chahnu, ta ican ra cuví ra vityin. Ta ican ra cuví ra nuu cuahan ca chí tyicuan ri maa.

9 Ma cuhva ndo cha sandavi ñaha ñáyivi chí ndo chihin tuhun siñ caa cha sañahá ñu. Vaha ca cha cu ñi iñi ndo chihin cha cuñi Nyoo chí yo, ta ñima ca tuhun cha sañahá ñu cuan: cha yíca cha cachi yo. Ña tyinyee maa cuan chí ñu nyacuví tyicuan caa.

10 Iyó noo arta cha cuenda yo. Nu chati ñiñi ra Cristo nu cruzi, ican cuan cuví. Ta ñu cuñi cacu chihin cha quichahá ñu ley chahnu cha quichahá ra cacuví sutu ta cha naha, ma cuví tyinyee ra Cristo chí ñu.

11 Ra cuví sutu cahnu cuenda ñu Israel chinyaca ra ñiñi quití Nu Ii Xaan Ca cuan cha cuenda cuatyí ñáyivi, soco coño tí chinyaca ra ityí chata ñuu vatyí cayu chí.

12 Ta tyicuan caa tucu ra Jesús, tyaa Nyoo tyiño chí ra cha nyehe ra tindoho ta cuví ra ityí chata ñuu Jerusalén, tacuhva vatyí sandundi ra chí yo chihin ñiñi ra.

13 Ma cahan nuu yo nyehe yo tindoho ticahan nuu cha cuenda ra Cristo, tari nyehe tucu maa ra cha cuenda yo quivi chahán ra chicúvi ra ityí chata ñuu Jerusalén. Tari quivi cha cuahan tucu yoó ityí chata ñuu cuví chí cuan tatu ña cahan nuu yo nyehe yo tindoho cha cuenda tuhun ra.

14 Vatyí ihya siqui ñuhu ñáyivi, ñahri noo ñuu cha tyicuan ri maa cucoo iyó. Soco nanducú yo noo ñuu cha cuquichi, cha yaha ndihí tuhun ñuhu ñáyivi ihya.

15 Yucuan chaha vityin cha ñohó ra Cristo añima yo, tahán chí cha saniñi yo ta sacahnu yo chí Nyoo chihin yaa, ta chihin cha cahan yo tuhun cha cahnu cuví ra.

16 Ta ma naa iñi ndo cha sacuví ndo cha vaha. Ta tyinyee ndo chí tahan ndo chihin cha iyó chí ndo, vatyí ican ihya cuví cha tahán iñi Nyoo.

17 Quichaha ndo tuhun cahan ra casaquehén ityí chí ndo, ta cuhva ndo chí ndo cunyaca ñaha ra vatyí nyicú ra tyiño casahá cumi ra añima ndo. Ta coo quivi cutahan chí cunacuhva ra cuenda tyiño casahá ra chí Nyoo. Nducu ndo cuhva sacuví ndo cha vaha, tacuhva vatyí chihin cha siñ cuñi ra cuhva ra cuenda ndo nuu Nyoo, vatyí tatu ña sacuví ndo cha vaha, chihin cha cuhya iñi ra cuhva ra cuenda ndo, ta nyoho, ma quita vaha ndo nuu Nyoo.

18 Vaha cuñi añima ndi chihin Nyoo, ta cuñi ndi cha cacan tahvi ndo chaha ndi vatyí cuñi ndi sacuví ca ndi cha vaha.

19 Ta chiquén noo tumañi iñi chí ndo cha cacan tahvi ndo chiñ chahí tacuhva vatyí nacuhva Nyoo cuhin cucunyai cha numi ri chihin ndo inga chaha.

Nu ndihí cahan ra ta nacuhva ra nocumi chí ñu

20 Nyoo ican ra iyó cha taxi chí ra, ican ra sanandoto ra chí Sutu Mañi yo Jesucristo, ra cuví ra sahá vaha cuenda chí yo tari cha cuví yo mbee sana ra. Ra Cristo chatí ñiñi ra, ta chihin cuan natyihí tahan Nyoo tuhun chaa cha ma ndihí ca maa chihin yo.

21 Na cuhva Nyoo cha vaha chí ndo tacuhva cuví sacuví ndo cuhva cuñi ra. Ta na sacuvi maa ra cha cuñi maa ra cha cuenda ra Jesucristo chihin tandihí maa yo. ¡Na sacahnu yo chí ra Cristo tyicuan ri maa! ¡Na cuví chí tyicuan caa!

22 Yañi, chacú ndahvi nuu ndo, na cunye xaan iñi ndo chihin tuhun cha chahí ihya chí ndo, vatyí ña cuaha xaan tyaj nu tutu ihya chí ndo.

²³ Coto ndo vatyi ra yañi yo, ra Timoteo, cha quitã ra vehe caa. Ta tatu nachaa ra cha numi ri, cuhun ra chihin, na cuhin cunyehe nu nyicú ndo.

²⁴ Cuhva ndo nocumi chi tandihi ra sañahá chi ndo, ta chi tandihi ra yañi yo cuenda ra Cristo. Ñu Italia ihya, tachí ñu nocumi chi ndo.

²⁵ Ta Nyoo na nasoco ra chi tandihi maa ndo. Ta na cuvi chi tyicuan caa.

Carta Cha Sacuhun Ra Santiago Chi Ñu Yihí Cuenda Ra Cristo

Nu chahá ra Santiago nocumi chi ñu

¹ Yuhu ra Santiago cuví noo ra sacuví tyiño nuu Nyoo ta nuu Sutu Mañi yo Jesucristo. Sacuhín nocumi chi ndo cha cuví ndo cha uchi uvi ityi ñáyivi Israel ñu yihí cuenda ra Cristo. Ta quití cuatyí ndo siin siin ñuu.

Cha chiñi tuñi cha chahá maa Nyoo

² Yañi, cuñi chi vatyí sií cuví chi ndo tatu cuaha nuu tindoho nyehé ndo.

³ Vatyí chitó ndo tatu nyehé ndo tindoho tari cha vatyí Nyoo nducu nyehé ra tatu ndicha cha chinó iñi ndo chi ra cuví cuan. Ta tyicuan caa ta cua cutuhva ca ndo cha cucama iñi ndo.

⁴ Saña ndo na quichi maa tindoho siqui ndo, vatyí ican cuví cha sacoo cha cama iñi ndo. Ta tatu cha chicoo cha cama iñi ndo ta cucuví ndo noo ñáyivi chicha chihin tuhun Nyoo, ta cuacunye ndo tandihi cuii maa tindoho cha vachí ca siqui ndo.

⁵ Tatu nya noo nyoho cumañi cha chiñi tuñi chi ndo, çacan ndo chi Nyoo. Ta Nyoo cuhva ra. Ta ñima chiin ri chahá ra chi ñu chicán chi ra. Ta ña tyicuhvá ra cuhva chahá ra. Ta ña natyihí ra nuu yo cha cuenda cha chahá ra chi yo.

⁶ Soco cuñi chi çacan yo chi ra chihin cha chinó vaha iñi yo. Ta ma quihí iñi yo vatyí ma cuhva ra chi yo. Vatyí ñu cha ña chinó vaha iñi, cuví ñu tari ndutya yuhu tyañuhú cha tyandahá tatyí chií siin siin ityi.

⁷⁻⁸ Ta tyicuan caa maa ñu cuan, siin siin cuhva chicá xiñi ñu, vatyí siin cha chicán ñu vityin ta siin cha chicán ñu tyaan, ta ña ñi iñi ñu sacuví ñu noo cha sacuví ñu. Ña tahán chi quihí iñi ñu vatyí cuñihí ñu cha cuacuhva Sutu Mañi yo chi ñu.

⁹ Tatu iyó noo ra yañi yo, ndahvi ra, cuñi chi cusii cuñi ra vatyí Nyoo nacoñehé ra chi ra.

¹⁰ Soco tatu noo ra yañi yo, tyayii ra, cuñi tucu chi cha cusii cuñi ra tatu ndundahvi ra, vatyí ra tyayii cuví ra tari noo ita cha nyaá nu cuhu, vatyí ña naha maa chiyó chi.

¹¹ Vatyí tatu caña ñanyii ta ihñi vavaha cuhu cuan, na ityi chi. Ta ita cuan canacavá ri ta ndihi cha tyaqui chi. Ta tyicuan caa tucu ra tyayii, cuquichi tuhun chihí chi ra ta ndoo maa tyiño sahá ra.

Yoso caa cunyeé yo tindoho

¹² Ñana cha sii cuví chi ndo cha cunyeé ndo chihin cha cama iñi ndo ñáá tindoho

cha vachí chi ndo. Vatyí tatu cunyeé ndo, cuñihí ndo tari noo corona. Vatyí Nyoo cucuhva ra chi ñu cuñi chi ra, cha coo ñu ñáyivi chaa chihin ra.

¹³ Tatu nya noo nyoho quichí cuví iñi ndo cha sacuví ndo cha ña vaha, ma cuñi ndo vatyí Nyoo sacuví cha caca xiñi ndo tyicuan caa. Vatyí Nyoo ña quichí cuví iñi ra sacuví ra cha ña vaha. Ta ni ña tyiyuhú ra chi yo cha sacuví yo cha ña vaha.

¹⁴ Soco tatu nya noo ndo quichí cuví iñi ndo sacuví ndo cha ña vaha, suri cha cuenda cha chicá xiñi maa ndo cha ña vaha, yucuan chaha canacava ndo nu cuatyí.

¹⁵ Tatu cuhva xaan yo cuhva cha quihí tuhun ña vaha iñi yo, cuacoo noo quivi ta cuasacuví yo cuhva ña vaha cuan, ta tyicuan caa cacu cuatyí yo nuu Nyoo. Ta Nyoo tachi tuñi ra cuatyí cuan ta cuchaa tuhun chihí chi yo.

¹⁶ Yañi yuhu, cuñi xain chi ndo. Ma sandavi ñaha ndo chi ndo.

¹⁷ Tandihí cha vaha ta cha vii cha ñihí yo, quichi chi nya ityi siqui vatyí maa Nyoo chahá ra. Ta maa ra savahá ra ñuhú cha iyó andivi: tiño, ta yoo, ta ñanyii. Ta Nyoo tyicuan ri cuví ra Nyoo, ta ni chiin ña tuhvá ra nasama ra cuhva cuví ra.

¹⁸ Ta chahá ra ñáyivi chaa cha iyó yo cha cuenda tuhun ndicha cha cahán ra. Vatyí xihna ca yo cuví cha nduchaá cha nuu tandihí ca cha savahá ra. Vatyí tyicuan caa cuñi maa ra.

Noo ityi cha ndicha cha tahán chi cuhun yo

¹⁹ Yucuan chaha yañi, noo noo yo ta cuñi chi cha yatyí çohon iñi yo cha tyasoho yo, soco cuñi chi cha ma yatyí xaan nacahán yo ta ma yatyí xaan cuxaan yo.

²⁰ Vatyí ñáyivi cha cuxaán, ña nyacuví ñu cha tahán iñi Nyoo.

²¹ Yucuan chaha saña ndo cha ña vaha ta cha quihí caa cha cuaha xaan iyó siqui ñuhú ñáyivi. Ta natin cuenda vaha ndo chihin cha masu iñi ndo tuhun Nyoo cha tachí ra añima ndo. Vatyí tuhun Nyoo cuan iyó tunyee iñi chi chi vatyí sacacú chi añima yo.

²² Soco sacuví yo yoso cuhva sañahá tuhun Nyoo. Ta ma cuñi ri maa yo vatyí tatu tacuhva chiñi ri maa yo, suri chi maa yo sandavi ñahá yo.

²³ Vatyí ñu cha chiñi ri maa tuhun Nyoo ta ña sacuví ñu, cuví ñu tari noo ñu cha nyehé chi nu ino.

²⁴ Ta nyehé ñu yoso caa nuu ñu, ta yaha cuan ta cuahan ñu ta naá ri iñi ñu yoso cuhva caá nuu ñu.

²⁵ Soco inga ñu cha nyita ri tyasohó tuhun Nyoo, vatyí sacuví vaha ñu cha chiñi ñu. Ta tyicuan ri sahá vaha ñu cuenda cha catyí ley Nyoo, cha cuví ley vaha ca, ley cha

chahá libertad chi yo tyi tava chi chi yo ndaha ra ña vaha. Ta ñu nyacuví tyicuan caa sñi xaan cucuvi chi ñu.

²⁶ Tatu nya noo ñáyivi cuñi maa ñu vatyi ityi Nyoo cuahan ñu, soco ña nyatú yuhu ñu cahan ñu, suri chi maa ñu sandahvi ñahá ñu. Ta cha catyí ñu tyi ityi Nyoo cuahan ñu, cha ñima ri tuhun cuví.

²⁷ Vatyi ityi ndicha, ityi vaha nuu Nyoo Sutu yo ican cuví ihya: Cha tyinyeé yo chí ñu nyehe tindoho, ñu yori sutu ta sihi, ta ñu chihí yí. Ta inga, cha sahá vaha yo cuenda chí yo coto sacuvi yo cha quíñi caa cha sacuvi ñu ña ñohó nuu Nyoo.

2

Ña tahan chi cuñi yo chi noo ñáyivi ta chi inga ñu ma cuñi yo. Inuu ri tahan chi cuñi yo chí ñu

¹ Yañi yuhu, nyoho chinó iñi ndo chi Sutu Mañi yo Jesucristo ra cha cahnu ca cuví, ta ña tahan chi cha vaha ca cahan ndo chihin noo ri ñáyivi, ta chihin inga ñu ma cahan ndo.

² Vatyi tatu quihvi noo ra tyayii nu nyicu ndo, yihí xehe xuhun cuaan ndaha ra, ta finu sahna ra, ta quihvi tucu nonga ra cha ñihno sahna chahnu ri.

³ Ta nyoho tatu vaha ca tyiñuhu ndo chi ra cha vaha ñihno cuan, ta catyí ndo chí ra: “Cunyaa ihya noo nu vaha.” Ta chi ra ndahvi cuan catyí ndo chí ra: “Yoho cuñanyaa yucuan o cunyaa ihya nu ñuhú”, catyí ndo chí ra.

⁴ Ña vaha tatu sacuvi ndo tyicuan caa, vatyi ña inuu ri sahá ndo ñáyivi chí ñu, ta cha tyicuan caa, ña vaha cha chicá xiñi ndo.

⁵ Yañi, tyasoho ndo tuhun ihya. Nyoo nacachí vaha ra chí ñu ndahvi ihya ñáyivi, vatyi ta cuhva cuví ñu ñu tyayii chihin cha chinó xaan iñi ñu chí Nyoo, ta cuñihi ñu nu vaha nu nyacá ñaha ra. Vatyi ican ihya cuví cha catyí ra tyi cuhva ra chí ñu cuñi chí ra.

⁶ Soco nyoho chahá ndo ticahan nuu chí ñu ndahvi. Ta ¿atu ña chitó ndo vatyi ñu tyayii, ican ñu cuví ñu cha chahñi ndahvi chí ndo? Ta chinyacá ñu chí ndo nuu ra cuví tyiño.

⁷ Ta ¿atu ña chitó ndo vatyi ican ñu cuví ñu cahan ña vaha siqui ra Cristo? Ta cuenda ra Cristo yihí ndo.

⁸ Tatu ndicha cha sacuvi ndo tandihi cha catyí ley Nyoo ra cuví rey cuenda yo, vaha nyacuví ndo. Tari catyí tuhun Nyoo: “Cuñi ndo chí tahan ndo tari cuñi ndo chí maa ndo.”

⁹ Soco tatu chí noo ri ñu cuñi ndo. Ta chí inga ñu ña cuñi ndo, chicoó cuatyí ndo. Ta iyó cuatyí ndo nu ley Nyoo.

¹⁰ Vatyi tatu noo ñáyivi sacuvi ñu tandihi cha catyí ley, ta cumañi ñu noo ri cha catyí

chí, cuví chí tari cha tandihi ley ña sacuvi ñu.

¹¹ Vatyi Nyoo catyí ra vatyi ma coo inga ñusihi o inga rayii chí ñu, tatu iyó yí ñu o iyó ñasihi ra. Ta suri maa ra catyí vatyi ma cahñi yo. Yucuan chaha tatu noo ñu ña sacuvi ñu cuatyí cha ña iyó inga rayii o inga ñusihi chí ñu soco chahñi ñu, suri ña quichahá ñu cha catyí ley.

¹² Soco yoó cucutuñi chí yo nu ley ra Cristo cha sacacú chí yo. Yucuan cuenda tahan chí nducu yo cuhva cahan yo ta nducu yo cuhva coo yo.

¹³ Vatyi ñu cha ña cundahvi cuñi nyehe chí inga ñu, Nyoo cusacutuñi ra chí ñu, soco ma cundahvi cuñi ra nyehé ra chí ñu. Soco ñu cha ndahvi cuñi nyehé chí inga ñu, cuquita vaha ñu cuhva cha cutuñi chí ñu.

¿Ñáa cha sacacú chí yo, cha chinó iñi yo o cha sacuvi yo cha vaha?

¹⁴ Yañi, ñáa ri tuhun tatu catyí ndo vatyi chinó iñi ndo, soco ñahri cha vaha nyacuví ndo. ¿atu cuví cacu ndo chihin cha chino iñi ri ndo chí Nyoo?

¹⁵ Vatyi tatu noo ñu tahan yo cumañi sahna ñu, cumañi cha cachi ñu,

¹⁶ ta minoo nyoho catyí ndo chí ñu:

“Cuañan ta Nyoo na cocumi ra chuun. Na coo ca sahmon ta cha cachun”, catyí ndo. Soco ña chahá ndo cha chiñuhú chí ñu.

¿Ñáa ri tuhun cuan?

¹⁷ Ñahri yahvi nyaa cha catyí yo vatyi chinó iñi yo chí Nyoo, ta ña tyinyeé yo chí tahan yo.

¹⁸ Vasi yihí ndo cua catyí ndo: “Yoho chihin cha chinó iñun chí Nyoo ta cuñun cacun, ta yuhu caqui soco chihin cha vaha ñáyivi cuví ta chihin cha tyinyeé chí tahan yo.” Vaha. Soco yuhu catyí chuun, ¿atu cuví sañahun chí tyi ndicha chinó iñun chí Nyoo tatu ña vaha ñáyivi cuvún ta ña tyinyeún chí tahan? Ma cuví. Soco yuhu chihin cha tyinyeé chí tahan yo sañahí chuun vatyi chinó vaha iñi chí Nyoo.

¹⁹ Ta yoho chinó vavaha iñun tyi iyó noo ri Nyoo. Vaha cha chinó iñun. Soco cuihna chinó tucu iñi ra cuan tyi iyó noo ri Nyoo.

Ta nihí ra chihin cha yuhví ra vatyi ma cacu ra.

²⁰ Ma tondo xaan caca xiñun. Na cutuñi iñun vatyi tatu chinó iñi yo ta ña sacuvi yo cha vaha, ñahri yahvi nyaa cha chinó iñi yo.

²¹ Ra Abraham sutu chahnu yo, cuví ra noo ra vaha nuu Nyoo cha cuenda cha sacuvi ra cha catyí Nyoo. Vatyi chahá ra chí sehe ra, ra Isaac chí Nyoo tari cuhva catyí Nyoo chí ra.

²² Nyehún vatyi chinó iñi ra Abraham chí Nyoo ta chaha cha chinó iñi ra ta sacuvi ra tuhun cha catyí Nyoo chí ra tyi sacuvi ra. Ta nu sacuvi ra cuhva catyí Nyoo chí ra,

yucuan cuvı̄ nu natuvi vaha cha chinó iñi ra chi Nyoo.

²³ Ta tyicuan caa chinq cava tari cuhva catyí nu tutu Nyoo tyehe caa: “Ra Abraham chinq iñi ra chi Nyoo ta yucuan chaha Nyoo saha ra tuhun tyi vaha ra nuu ra.” Ta iyó inga nu catyí chi: “Ra Abraham, nanduvı̄ ra amigo Nyoo.”

²⁴ Ta tyicuan caa nyehe yo vatyi vaha yo nuu Nyoo cha cuenda cha nyacuvi yo cha vaha, ta ñima cha cuenda cha chinó ri iñi yo chi ra.

²⁵ Ta tyicuan caa tucu cu Rahab ñaha cata iñi cha chiyo ta cha naha. Yahá cha sacuvı̄ ña cuatyı̄, sacuvı̄ ña cha vaha quivi chaha ña nu cacohon xehe ra cha tachı̄ ra Josué. Ta tyinyee ña chi ra cha cuhun ra inga ityi. Ta cha cuenda cuan Nyoo saha ra tuhun tyi vaha ña.

²⁶ Ta tyicuan caa tucu cuvı̄ noo coño ñuhu ñáyıvi. Tatu ñahri ca cha nyitó ñu yihı̄ chichi coño ñuhu cuan, ñahri ca vale chí. Ta tyicuan caa yoó, tatu ña sacuvı̄ yo cha vaha, ña vale cha chinó iñi yo.

3

Yoso caa saha cuenda yo cuhva cahan yo

¹ Nyoho yañi, ma yatyi xaan quichi cuvı̄ iñi ndo cuvı̄ ndo noo ra sañahá tuhun Nyoo. Vatyi nyuhu cha sañahá ndi tuhun Nyoo, tatu ña vaha sañahá ndi, cahnu ca cuatyı̄ cuvı̄, ta cuaha ca cutachi tuñi Nyoo chí ndi.

² Vatyi ni noo yo ta ña sacuvı̄ yo maa maa ri maa cha vaha. Soco tandihı̄ yo cuaha ri cuhva sacuvı̄ yo cuatyı̄. Soco tatu noo yo cuvı̄ cunyaca ñaha vaha yo cuhva cahan yo tacuhva ma coo cuatyı̄ yo cha cuenda cha cahán yo, cuñı̄ chí catyı̄ vatyi ñahri cuatyı̄ yo vatyi cuvı̄ tucu cunyaca ñaha yo tandihı̄ coño ñuhu yo.

³ Vatyi tatu tyihı̄ yo yoho yuhu caballo cuvı̄ cunyaca ñaha yo chí ti, vasi cahnu ti.

⁴ Ta tyicuan caa tucu noo barcu cahnu, vasi cahnu chí soco chihin noo vitu luhlu ri cha nyaá chata chí, cuvı̄ sacuhun ra chí chi nya ityi nu cuñı̄ maa ra, vasi ñihı̄ tatyı̄.

⁵ Ta tyicuan caa tucu yaa yo. Cuvı̄ chí noo cha luhlu ri. Soco cahnu xaan cahnu xaan nanduvı̄ noo tuhun luhlu ri cahan yaa yo. Tari nahnu cuvı̄ cayu chihin ñuhı̄ lee cha tyaa yo chichi cuhu ta ndi maa yutun cayu.

⁶ Vatyi tyicuan caa yaa yo tari noo ñuhı̄ luhlu cuvı̄ chí. Ta cuvı̄ chí tari noo cha quıñi caa cahnu cha ñohó chichi coño ñuhu yo, ta satıvı̄ chí chí coño ñuhu yo ta tandihı̄ cuhva iyó yo ñáyıvi, vatyi suri maa cuihna, ican tyiyuhú chí chí.

⁷ Ñáyıvi cuvı̄ samasu ñu tandihı̄ ri nuu quiti: saa, coo, ta quiti cha iyó chichi tyañuhu, ta samasú ñu chí ti.

⁸ Soco yori cuvı̄ samasu yaa yo. Vatyi cuvı̄ chí noo cha ña vaha cha ña chahá chí cha cunyaca ñaha yo chí chí. Tari noo coo, tyaá ti chí ñáyıvi, tyihı̄ ti venenu ti ta chihı̄ ñáyıvi. Ta tyicuan caa yaa yo.

⁹ Vatyi suri chihin yaa yo sacahnú yo chí Nyoo Sutu yo. Ta suri chihin cuan cahán ña vaha yo chí ñáyıvi cha savaha Nyoo tari cuhva caá maa ra.

¹⁰ Suri maa chihin yuhu yo sacahnú yo chí Nyoo. Ta suri chihin cuan cahán yo cha quıñi caa. Soco yañi, ña tahán chí cha sacuvı̄ yo tyicuan caa.

¹¹ Vatyi, ¿atu cuvı̄ quita ndutya vixi ta ndutya uva noo ndohyo? Ma cuvı̄.

¹² Yañi, ¿atu cuvı̄ quita papaya nuu noo tumangu, o cuvı̄ cuhva tupapaya noo mangu? Ma cuvı̄. Ta tyicuan caa ma cuvı̄ quita ndutya uhva ta ndutya vixi noo ndohyo.

Cha chiñi tuñi cha vaha ca

¹³ Tatu yihı̄ ndo cha chıtó ndo ta iyó cha chiñi tuñi chí ndo, sañaha ndo chihin cha cachi iyó ndo. Ta sacuvı̄ ndo cha vaha chihin cha ma cahnu saha ndo chí ndo, vatyi iyó cha chiñi tuñi Nyoo chí ndo.

¹⁴ Soco tatu iyó tuhun nyiyo iñi ña vaha chichi ñaima ndo, sacuvı̄ ndo cha sacuvı̄ ndo soco cha cuenda cha cuñı̄ ndo cuvaha ndo nuu ñáyıvi, ta cha tyicuan caa nyacuvı̄ ndo, ña tahán chí cuyaa ndo tyi iyó cha chiñi tuñi chí ndo, vatyi cha cuyaa ndo, sandavı̄ ñaha ndo cuvı̄ cuan, ta tixehe ndo cha ndicha.

¹⁵ Vatyi tatu chicá xiñi ndo tyicuan caa ñima cha chiñi tuñi Nyoo cuvı̄ cuan, soco cuhva chicá xiñi ñu ña ñohó nuu Nyoo cuvı̄. Cuenda cuihna cuvı̄.

¹⁶ Vatyi tatu nyiyo iñi ndo ta cuñı̄ ndo cuvaha ndo nuu ñáyıvi, yucuan cuvı̄ nu ican ñima nyicú ndo. Ta iyó tucu tandihı̄ inga nuu cha ña vaha nu nyicú ndo.

¹⁷ Soco tatu iyó cha chiñi tuñi Nyoo chí ndo, ndaa iyó ndo, cachi iyó ndo. Ta nanducú ndo cuhva coo vaha ndo chihin ñáyıvi chihin cha vita iñi ndo. Ta vaha ñáyıvi cuvı̄ ndo. Ta cachı̄ vaha chicá xiñi ndo. Ta cundahví cuñi ndo chí ñáyıvi. Ta nducú ndo cha vaha chí tandihı̄ ñáyıvi chihin cha ñi iñi ndo.

¹⁸ Tatu nanducú yo cha coo vaha yo chihin ñáyıvi, ta sañihı̄ yo coo taxi ri yo chihin ñu, cuacoo yo noo ñáyıvi cha cuiñi.

4

Ma sacuvı̄ yo cuhva cuñı̄ coño ñuhu yo

¹ ¿Ñáá tuhun iyó tisihi nu nyicu ndo? ¿Ñáá tuhun iyó cuatyı̄? Cha cuenda cha ña vaha cha cuñı̄ coño ñuhu ndo. Vatyi tyicuan ri iyó cha cuñi ndo ta yucuan sacañi tahan chí ndo.

² Nyoho cuñí ndo coo ñáá ndihí cha coo chí ndo. Ta ñahri iyó chí ndo. Tyicuan ta sata sí iñi ndo ta chahñi ndo tacuhva ñihí ndo. Iyo tahan ndo chihin cha nyiyo iñi ndo ñáá cha nyehé ndo soco ña cuví ñihí ndo. Tyicuan ta cañi tahan ndo. Iyó cuatyí ndo nyicú ndo soco ña ñihí ndo cha cuñi ndo. Vatyí ña chicán tahvi ndo chí Nyoo.

³ Ta tatu chicán tahvi ndo chí Nyoo, ni ri ña ñihí ndo cha cuenda vatyí ña vaha chicán ndo. Vatyí cuñi ndo soco cha sanaa ndo cha caca noo ri maa ndo cuhva cuñi ñáyivi.

⁴ Ña ndicha cha chinó iñi ndo chí Nyoo. ¿Atu ña chitó ndo vatyí tatu nyacuví ndo cuhva cuñi ñáyivi, ñu xaan iñi chí Nyoo cuví ndo vatyí ña nyacuví ndo cuhva cuñi Nyoo? Yucuan chaha tatu yihí ndo nyacuví ndo cuhva cuñi ñáyivi, ñu xaan iñi chí Nyoo cuví ndo.

⁵ ¿Atu cha caha ri catyí nu tutu Nyoo vatyí Tatyí Ii cha chahá Nyoo coo añima yo, cuñi xaan chí chí yo, ta cuiño xaan chí chí yo? Cuñi Nyoo cha ñn ri chí maa ra cua cuñi xaan yo.

⁶ Soco tyinyeé ca ra chí yo tacuhva vatyí cuví nacuhva ndihí yo chí yo chí ra. Yucuan chaha catyí tucu tuhun Nyoo vatyí Nyoo ña tahán iñi ra chí ñu cahnu saha chíi. Soco tyinyeé ca ra chí ñu nacotó tyi chíñuhu ra chí ñu.

⁷ Ican tuhun ñacuhva vaha ndo chí ndo chí Nyoo. Ma quichaha ndo nu cahán cuihna chihin ndo. Ta maa ra cucacacono ra nyehe ra chí ndo.

⁸ Tuhva yatyin ndo chí Nyoo ta maa ra tuhva yatyin ra chí ndo. Nyoho ñu iyó cuatyí, sandundí ndo chí ndo. Ta nyoho cha uvi nyaa xiñi ndo sandundí ndo iñi ndo ta cuhva ndo na sacutu Nyoo añima ndo chihin cha vaha, tyicuan ta cundundí ndo nuu ra.

⁹ Cucuihya cuñi ndo. Cuacu ndo. Na ndichí xiñi ndo vatyí ña vaha cuhva iyó ndo. Cha nuu cha cuacu ndo chihin cha síi cuñi ndo cuacu ndo chihin cha cuihya iñi ndo. Ta cha síi cuñi ndo na nanduvi chí tucuihya iñi.

¹⁰ Ndahví saha ndo chí ndo nuu Sutu Mañi yo, ta maa ra cusanducahnu ca ra chí ndo.

Maa nyehe nyaa yo chí tahan yo

¹¹ Yañi, ma cahan ña vaha ndo siqui noo tahan ndo. Vatyí ñu cha cahán ña vaha siqui noo tahan, o nyehé nyaa ñu chí ñu, siqui ley Nyoo cahán ña vaha ñu ta nyehé nyaa ñu. Vatyí tatu nyehe nyaun, juez nasahún chuun cha nuu cha quichahún nu cahán ley cuan.

¹² Vatyí noo ri ra cuví ra cha chahá ley cuan. Ta suri ra cuví ra juez. Ta suri maa ra

cuví ra ra sacacu chí yo, o sacunaa ra chí yo. Soco zyóó ñu cuví yoho vatyí nyehe nyaun chí inga ñu, ta sacutuñun chí ñu tari cha juez cuvún?

Ña chitó yo ñáá cha cucuvi chí yo tyaan, ta yucuan chaha ña tahan chí cahnu saha yo chí yo

¹³ Vityin cuiñi ndo tuhun ihya, nyoho cha catyí ndo: “Vityin o tyaan cuhun yo ñuu cuan, o inga ñuu cuan. Ta yucuan cunyaa yo noo culya vatyí sahatyiño yo ta saha ganaa yo xuhun”, catyí ndo.

¹⁴ Ta ni ña chitó ndo cha cucuvi tyaan. Vatyí ñayivi chí iyó yo cuví chí tari noo vico nuhu vatyí noo ri cuhva yihí chí, ta tañi ri ta cha naa tucu chí.

¹⁵ Soco tahán chí catyí ndo tyehe caa: “Tatu Sutu Mañi yo ta cuñi ra, coo yo ta sacuvi yo ihya o yucuan.”

¹⁶ Soco nyoho nyee xaan ndo cuñi maa ndo ta cahnu sahá ndo chí ndo. Ta ña vaha tyicuan caa.

¹⁷ Vatyí tandihí yo cha chitó yo sacuvi yo cha vaha ta ña sacuvi yo, chicoó cuatyí yo cha tyicuan caa.

5

Nu catyí ra Santiago ñáá cha cucuvi chí ñu tyayí

¹ ¡Cuiñi ndo tuhun ihya, nyoho ñu tyayí! Cuacu ndo chihin cha cuihya cuñi ndo, canachaa ndo cha cuenda tindoho cha cunyehe ndo.

² Vatyí cha tyayí cha sacayá ndo, cha cuñi tiví. Ta sahma finu ndo, ndí maa cha cuñi cachi tiqixin.

³ Xuhun cuan ndo ta xuhun cuichin ndo cuxi vavaha chí. Ta yucuan chahá chí noo seña cha chinyacuví ndo. Ta tari quivi chí cha cucahmi chí chí ndo tari cayu ñuhu vatyí cucunaa ndo. Tyi sacayá xaan ndo cha tyayí ndo tyi cotyiño ndo tyaan.

⁴ Ta ña tyiyahví ndo yahvi chí tahán chí chí ñu ndahví chí sahatyiño nu tyiño sahá ndo. Ta vityin chicán ñu cuatyí chaha ndo nuu Sutu Mañi yo ra nyacá ñaha ángel chí cuví sindaro cuenda ra. Ta maa Sutu Mañi yo chíñi ra tuhun cahán ñu ndahví cuan.

⁵ Ihya siqui ñuhu ñayivi tyaqui iyó ndo, tyayí iyó ndo. Ta sacuvi ndo yoso cuhva cuñi maa ndo. Tari nduxahan quini chí cucuvi, tyicuan caa nyoho, vatyí cucunaa ndo.

⁶ Ta nyoho tyaá ndo cuatyí chaha ñáyivi vaha. Ta chahñi ndo chí ñu. Ta ñu ndahví cuan ña cuví sacacu ñu chí ñu.

Cuatú yo chí ra Cristo chihin cha cama iñi yo

⁷ Yucuan chaha, yañi, nyatú yo chihin chí cama iñi yo nyacua nya quivi quichi Sutu Mañi yo. Tari noo ra cha sahá tyiño

chi cuhu nyatú ra nyacua nya cha coon savi cha xihna ri ta cha yaha savi nu ndihi, tyicuan ta naquehen ra ñáá cha tachí ra.

⁸ Ican tuhun cuatu ndo chi Nyoo chihin cha cama iñi ndo. Ta cuní ca iñi ndo vatyi cha cuyatyin cha quichi Sutu Mañi yo.

⁹ Yañi, ma tyaa ndo cuatyí chaha tahan ndo, coto tachi tuñi Nyoo chi ndo. Vatyi Nyoo, juez cuví ra. Ta cha cuñi quichi ra.

¹⁰ Yañi, saha ndo cuenda cuhva chiyo ra profeta cha chaha cuenda tuhun Sutu Mañi yo ta cha naha, vatyi cuhva cha canyehé ra tindoho, cacunyeexaan ra.

¹¹ Chitó yo vatyi sii xaan cuñi ra cha cunyeex tandihi nuu tindoho. Tari ra Job. Chiñi ndo tuhun yoso caa cunyeex ra tindoho cha nyehé ra. Ta chító ndo vatyi nu ndihi tuhun, cuaha xaan cha vaha chaha Sutu Mañi yo chi ra. Vatyi Sutu Mañi yo iyó xaan ticahnu iñi chi ra. Ta cundahvi cuñi ra nyehe ra chi yo.

¹² Soco yañi, ma tyanaha ndo tacuhva chino iñi ñáyivi vatyi ndicha cha sacuví ndo. Ma tyanaha ndo ni tuhun andivi, ni tuhun ñuhu ñayivi, ni ma catyi ndo: “Chító vaha maa Nyoo.” Tatu ndicha tuhun cahán ndo, ndicha catyi ndo. Soco tatu chító ndo tyi ña ndicha, catyi ndo tyi ña ndicha, vatyi coto tachi tuñi Nyoo chi ndo.

¹³ Tatu nya noo nyoho nyehé ndo tindoho, cacan tahvi ndo chi Nyoo. Ta tatu nya noo ndo sii cuñi ndo, cata ndo yaa Nyoo.

¹⁴ Tatu nya noo ndo cuhvi ndo, cuñi chi cana ndo chi ra nyisó tyiño vehe ñuhu vatyi cacan tahvi ra chaha ñu cuhvi cuan ta tyihi ra acetye chi ñu chihin sivi ra Cristo.

¹⁵ Ta tatu chinó vavaha iñi ra chi Nyoo cuhva cha chicán tahvi ra, ñu cuhvi cuan cucacu ñu. Ta Sutu Mañi yo cusanducuita ra chi ñu. Ta tatu sacuví ñu cuatyí, Nyoo cusaha ra ticahnu iñi cuatyí ñu.

¹⁶ Yucuan chaha nahma ndo cuatyí ndo nuu tahan ndo. Ta cacan tahvi ndo chaha tahan ndo vatyi na nduvaha ndo. Vatyi nu chicán tahvi noo ra vaha chicá chihin Nyoo iyó xaan tunyee iñi Nyoo.

¹⁷ Tari ra Elías ra profeta Nyoo ta cha naha. Cuví ra noo rayii tari maa yo. Ta chicán tahvi ra chi Nyoo vatyi ma coon savi. Ta ña coon savi uñi cuiya sisava.

¹⁸ Yahá cuan ta nacacán tahvi tucu ra chi Nyoo inga chaha. Ta nacoon savi inga chaha. Ta cuvahá chiti cha tachí ñáyivi nu ñuhú.

¹⁹ Yañi, tatu noo tahan ndo sandoo ñu tuhun ndicha Sutu Mañi yo, ta cuanuhu ñu ñayivi inga chaha, ta tatu tyinyeé ndo chi ñu na ndichi ñu ityi Nyoo inga chaha,

²⁰ coto ndo vatyi cha tyinyeé ndo chi ñu sacuví cuatyí cuan na ndihvi ñu ityi Nyoo inga chaha, sacacú ndo añima ñu ndahvi

cuan coto cuhun ñu anyaya. Ta sacuví ndo vatyi saha Nyoo ticahnu iñi tandihi cuatyí ñu.

Carta Cha Xihna Ri Cha Sacuhun Ra Apóstol Pedro Chi ñáyivi Yihí Cuenda Nyoo

Nu tyaa ra Pedro noo carta chi ñáyivi yihí cuenda Nyoo

¹ Yuhu ra Pedro cuví noo apóstol cuenda ra Jesucristo, ta cuñí chi catyí, vatyí maa ra tachí chii vatyí caque tyiño ra. Tyai noo tutu ihya chi nyoho cha ña iyó ndo ñuu ndo, vatyí iyó ndo noo noo ñuu ityi Ponto, ta Galacia, ta Capadocia, ta Asia ta Bitinia.

² Chi nyoho nacachí vaha maa Nyoo Sutu yo vatyí nyata cha naha chito ra vatyí tyicuan caa cuquichaha ndo chi ra. Maa Tatyí li tyinyee chi ndo vatyí cuví nacuhva ndo chi ndo chi Nyoo, ta tyicuan caa cuví quichaha ndo chi ra Jesucristo, ta ndundí ndo chíhin ñíñi ra. Na naquehen ndo cuaha ca cha vaha ta cha taxi ri coo ñíñi ndo sahá maa Nyoo.

Noo cha yihí vaha íñi yo vatyí cuñihi yo

³ Sacahnu yo chi Nyoo Sutu Sutu Mañi yo Jesucristo vatyí ndahvi cuñí ra nyehé ra chi yo ta chahá ra cha nacacu chaa yo inga chaha tacuhva coo yo ñáyivi chaa cha maa ca maa. Ta yucuan cuví cha chahá cha cuita íñi yo cha cuñihi yo vatyí cha nandoto ra Jesucristo.

⁴ Ta Nyoo cuacuhva ra tandihi cha tahán chi chi yo cha cumí vaha ra nya andívi. Ta cuví chi noo cha ma naa ta ni ma tiví, ta ni ma ndahva chi tari ndahva ita.

⁵ Ta vatyí chinó íñi yo chi Nyoo maa ra sahá cumi chi yo chíhin tunyee íñi ra nyacua nya cacu ndíhi ñíñi yo. Ta cusañaha ra chi yo ñáá cha cuñí chi catyí cha cacú yo nu cuandihi tyembu. Vatyí cha nyatú tuhva cuan chi yo.

⁶ Ta yucuan chaha sii xaan cuñí ndo, vasi tahán chi cha nyehé ndo ndíhi nuu tindoho suhva quívi.

⁷ Vatyí cha chinó íñi yo chi Nyoo, vaha ca ican saha xuhun cuaan. Vatyí xuhun cuaan cuví chi noo cha cundihi. Soco cuví nyehe yo chíhin ñuhú tatu vaha chi, vatyí chíhin cha íñi cundutya cha ta cucayu cha ña vaha yihí chíhin chi. Soco ndoó xuhun cuaan vaha cuan. Tyicuan caa tucu nyehé Nyoo chi ndo tatu vaha chinó íñi ndo chi ra. Yucuan chaha nyehé ndo tindoho vityin. Soco tatu ña ndu uví íñi ndo cha chinó íñi ndo chi ra, cutuvi ndo nuu ra ta cusacahnu ñáyivi chi maa ra ta chi maa ndo quívi quichí Sutu Mañi yo Jesucristo inga chaha.

⁸ Nyoho cuñí ndo chi ra Jesucristo vasi ta nyehe ca ndo chi ra. Ta vasi ña nyehé ndo chi ra vityin, soco chinó íñi ndo chi ra, ta sii xaan sii xaan cuñí ndo nyacua ña ñíñi ca ndo cuhva catyí ndo yoso cuhva cha sii cuñí ndo.

⁹ Vatyí cucacu ndíhi ñíñi ndo ta yucuan cuví cha cuñihi ndo vatyí chinó íñi ndo chi Nyoo.

¹⁰ Siquí cuan canducu tuhun ra profeta Nyoo ta cha naha. Ta canducu xaan ra cuhva coto ra ñáá cha cuví cuan. Ta catyaa ra nu tutu cuenda tumañi íñi cha cucuhva Nyoo chi yo.

¹¹ Ta Tatyí li ra Cristo sacoto chi chi ra ñáá ndíhi tindoho cunyehe ra Cristo, ta yaha cuan yoso caa cusanducahnu Nyoo chi ra. Ta profeta cuan canducu xaan ra cuhva cacoto ra yóo ra cucuvi ra Cristo cha cucuvi chi tyicuan caa, ta ama cucuvi tuhun cha catyí Tatyí li chi ra.

¹² Soco sacoto Nyoo chi ra vatyí tyiño cha casacuví ra, ñíñi cha vaha chi maa ra cuví, soco cha vaha chi maa yo cuví. Ta ican cuví cha sacoto ndi chi ndo vityin. Vatyí chíhin tunyee íñi maa Tatyí li cha saquichí Nyoo, cahán ndi tuhun ra Cristo nuu ndo yoso caa sacacú ra chi yo. Ta ángel cacuñí xaan ra cacoto ra tuhun ihya.

Nacana Nyoo chi yo vatyí coo yo noo ñáyivi cachi

¹³ Yucuan chaha saha vaha ndo cuenda cha cua sacuvi ndo, ta cachi coo ndo. Quíñi vaha íñi ndo cha cuacuhva Nyoo chi yo cha cuenda cha cuñí ra chi yo. Cuaha cuacuhva ra chi yo quívi quichi ra Jesucristo inga chaha.

¹⁴ Ta coo ndo tari noo sehe cha quichahá chi nu cahán sutu chí. Ma coo ndo tari chiyo ndo quívi ta ni cumañi ca cohon nuu ndo chí Nyoo. Vatyí cha ña vaha cha cuñí coño ñuhu ndo chinyaca ñaha chi chí ndo.

¹⁵ Soco coo ndo noo ñáyivi ndí, vatyí maa Nyoo, ra cha nacana chi ndo, ndí ra.

¹⁶ Vatyí tyicuan caa catyí Nyoo nu tutu ra. “Cundí ndo vatyí mai ndí”, catyí Nyoo.

¹⁷ Tatu tuhvá ndo chicán tahvi ndo chí Nyoo ta catyí ndo “Sutu Mañi yuhu” chi ra, saha ndo cuenda chí ndo ta saha ndo ñáyivi chí ra cha ni ri ca cha iyó ndo siquí ñuhu ñáyivi. Vatyí Nyoo ña sahá ra cuenda cuhva cahán yo. Soco sahá ra cuenda cuhva iyó noo noo yo, an cuví ri yo ñu tyayí, an cuví ri yo ñu ndahvi.

¹⁸ Nyoo nasama ra cuhva chiyo ndo, vatyí cuhva cuan ña vaha, Cuhva cha sanandoo Sutu chahnu ndo chí ndo cuví. Ta chitó ndo tyi Nyoo tyiyahvi ra tacuhva cuví cacu ñíñi yo. Soco ñíñi chíhin xuhun cuaan o xuhun cuichin. Noo cha cundihi noo quívi cuví cuan.

¹⁹ Soco cha tyiyahví maa Nyoo chihin niñi ra Cristo. Ta yucuan cuví noo cha vaha xaan ca. Ta ra Cristo cuví ra tari noo mbee luhlu quití vaha, ñahri nu pehe ti, tyicuan caa ra Cristo, ñahri cuatyí ra soco chihí ra.

²⁰ Ta nyata ni cumañi ca chinó ñuhu ñáyivi chícunyya cuhva cha cucuvi chi ra Cristo tyehe caa. Soco ña cuví cha numi ri. Nyacua nya vityin nu cuandíhi quivi, chingo cava tandíhi cuan cha cuenda cha vaha chí maa yo.

²¹ Cha cuenda ra Cristo ta chinó iñi ndo chi Nyoo. Vatyí ican ra sanandoto chi ra Cristo cha yahá chihí ra. Ta sacahnú Nyoo chí ra. Ta yucuan chaha chinó vaha iñi ndo chí Nyoo tyi cunaquehen ra chí ndo.

²² Maa Tatyí Ii Nyoo tyinyeé chí ndo ta cuví quichahá ndo tuhun cha ndicha. Yucuan ta cuví cuñi ndo chí tahan ndo cuenda Nyoo chihin cha niñi iñi ndo. Tyicuan caa cuñi chí cha cuñi ndo chí tahan ndo chihin cha vaha yihí añima ndo ta chihin tandíhi fuerza ndo.

²³ Vatyí tari quivi cha nacacu chaa ndo, ñima tari cacu ndo chihin sutu ndo ihya ñuhu ñáyivi, vatyí ra cuan numi ri chíhi ra, soco nacacu chaa ndo chihin tuhun Nyoo cha ña tuhvá chíhi vatyí tuhun Nyoo tyicuan ri maa iyó.

²⁴ Vatyí tyehe caa catyí tuhun Nyoo: Tandíhi ñáyivi iyó siqui ñuhu ñáyivi ihya cuví ñu tari cuhu.

Ta cha cahnu cha sacuvi ñu cuví chí tari ita. Vatyí cuhu cuan na ityi, ta coyo ita cuan.

(Ta tyicuan caa ñáyivi, chíhi ri ñu.)

²⁵ Soco tuhun Sutu Mañi yo tyicuan ri maa iyó.

Ican cuví tuhun cha cahán ndi chihin ndo: tuhun vaha cha sacacú Nyoo añima yo.

2

¹ Yucuan chaha na sandoo yo tandíhi nuu cha quiñi caa. Ma sandavi ñaha yo chí ñáyivi. Ma saha ri maa yo tyi vaha yo ta ña ndicha. Ma nyiyo iñi yo nyehe yo cha iyó chí inga ñáyivi. Ñahri cuendu cahan yo.

² Soco tari cha lee cha ni cacu, nanducú vavaha chí cha caxin chí, tyicuan caa nducu ndo tuhun Nyoo tacuhva vatyí chihin cuan cuahnu ndo ta cohon nuu ca ndo chí Nyoo, nyacua nya cacu ndíhi añima ndo,

³ tatu ndicha cha nacotó ndo vatyí Sutu Mañi yo, vaha xaan ñáyivi cuví ra chihin yo.

Tari yuu nyitó, tyicuan caa cuví ra Cristo

⁴ Sayatyin ca ndo chí ndo chí Sutu Mañi yo. Vatyí cuví ra tari noo yuu nyitó. Ñáyivi ña cuñi ñu cotyiño ñu yuu cuan. Soco Sutu Mañi yo cuví ra tari noo yuu tyaqui cha nacachí Nyoo.

⁵ Ta nyoho tucu cuví ndo tari yuu nyitó. Ta maa Nyoo tari noo ra savahá vehe cuví ra. Ta yucuan chaha cuhva ndo na sandu in ri ra chí ndo tacuhva cuví ndo tari noo vehe nu coo ra. Na cu in ri ndo ta cuhva ndo cha sandu ii Nyoo chí ndo tacuhva cuví sacuvi ndo tyiño nuu ra. Ta maa maa ri tyiño cha sacahnú ndo chí Nyoo cucunyya ndo. Vatyí yucuan cuví cha tahán iñi Nyoo sacuvi yo chihin tunyee iñi maa ra Jesucristo.

⁶ Vatyí catyí tucu nuu tutu Nyoo tyehe caa:

Nyehe xihna, yuhu nacachí noo yuu cha chíñuhú ca ta tyaqui xaan ca, ta chaquin yuu cuan nu cuasavahi vehi nya Sión.

Ta ñu chinó iñi chí ra cha cuví yuu cuan, ma quehen ñu ticahan nuu. Tyicuan caa catyí Nyoo tuhun ra Cristo nuu tutu ra.

⁷ Yucuan chaha, cha cuenda yoó cha chinó iñi yo chí ra Cristo ra cuví yuu cuan, chíñuhú xaan ra chí yo. Soco cha cuenda ñu cha ña chinó iñi chí ra, cuví ra tari noo yuu cha cahán Nyoo tuhun nu tutu ra ta catyí chí tyehe caa:

Yuu cha ña cacuñi ra casavahá vehe cotyiño ra, ican cuví yuu cha chíñuhú ca, catyí chí.

⁸ Ta catyí tucu chí:

Ican ra cuví yuu cha cuaha xaan ñu cunañi chaha ta nduva ñu.

Cuví ra noo cava cha sanduvá chí ñu, catyí chí nuu tutu Nyoo.

Tari cha nduvá ñu cuví cuan vatyí chíhi ñu tuhun Nyoo, ta ña quichahá ñu. Vatyí tyicuan caa nyaá vatyí cusacuvi ñu cuan.

Ñáyivi cha yihí cuenda Nyoo

⁹ Soco nyoho cuví ndo ñáyivi nacachí vaha Nyoo. Ta tari tata sutu cuví ndo tyi sacuvi ndo tyiño nuu Nyoo, ra nyacá ñaha. Ta cuví tucu ndo noo ñáyivi ii nuu Nyoo. Vatyí cuví ndo ñáyivi chí maa ra, tacuhva vatyí cahan ndo tuhun cha vaha cha sacuvi ra. Vatyí maa ra natavá ra chí ndo nu ñaa iñi ta vityin cuahan ndo nu ndichin nu tyaqui.

¹⁰ Ta quivi ca cuan, cuví ndo ñáyivi cha ñima ri tuhun. Soco vityin ñáyivi chí Nyoo cuví ndo. Ta quivi cuan yori cundahvi cuñi nyehe chí ndo, soco vityin Nyoo cundahvi cuñi ra nyehé ra chí ndo.

Nu catyí ra Pedro vatyí coo yo, soco sacuvi yo tyiño nuu Nyoo

¹¹ Yañi, cuñi xain chí ndo. Chicá noo ndo siqui ñuhu ñáyivi ihya, soco ñima ca ra ñuhu ñáyivi ihya cuví ndo. Soco andívi cuví ñuu ndo. Yucuan chaha catyí chí ndo ma cuhva ndo ityi chí coño ñuhu ndo vatyí sacuvi ndo

cha ña vaha cha cuñi chi. Vatyí tari quivi cañi tahan cuan chihin añima yo cuví cuan.

¹² Saha ndo cuenda cuhva iyó ndo mahñu ñu cha ña ñohó nuu Nyoo. Vatyí vasi cahán ña vaha ñu siqui ndo, ta catyí ñu vatyí ña vaha ndo, soco nyehé ñu cha vaha cha sacuví ndo ta cusacahnu ñu chi Nyoo nachaa chi quivi cha cuquichi nyehe ra cha sacuví yo.

¹³ Ta cha cuenda cha cuñi ndo chi Nyoo, quichaha ndo chi ra cuví tyiño ñuu nu iyó ndo. Quichaha ndo chi ra cuví tyiño, cuví ri ra rey cahnu ca,

¹⁴ O cuví ri noo ra tachi rey chi vatyí tachi tuñi ra chi ra iyó cuatyí o tatu ñahri cuatyí yo ma tachi tuñi ra chi yo, soco cucatyí ra tyi vaha yo.

¹⁵ Vatyí Nyoo cuñi ra vatyí chihin cha vaha nyacuví ndo ta sandihi ñu tondo cha cuví yuhu ñu, ñu cahán cha ña ndicha vatyí ña chitó ñu tuhun cahán ñu.

¹⁶ Coo ndo tari cha yori nyacá ñaha chi ndo, soco ñima cha cuenda cuan ta cusacuví tucu ndo cha ña vaha. Soco sacuví ndo tyiño nuu Nyoo.

¹⁷ Saha ndo ñáyivi chi tandihi ñáyivi. Cuñi ndo chi ñu yihi cuenda Nyoo. Saha ndo cuenda vatyí Nyoo nyehé ra tandihi cha sacuví ndo. Saha ndo ñáyivi chi ra nyacá ñaha.

Uvi tahan cuhva nyehé yo tindoho

¹⁸ Nyoho cha cuví ndo musu, cuhva ndo cha cunyaca ñaha chitoho ndo chi ndo, ta quichaha ndo chi ra, vasi xaan ra o vasi vaha ra.

¹⁹ Vatyí tatu cunyeé yo tindoho cha sanyehé ñáyivi chi yo cha cuenda cha sacuví yo cha vaha nuu Nyoo, yucuan cuví cha chaá nuu Nyoo.

²⁰ Soco tatu sacuví ndo noo cha ña vaha ta tachi tuñi ñu chi ndo, ñahri maa tuhun cha cunyeé ndo tindoho cha nyehé ndo cha cuenda cuan. Soco tatu nyehé ndo tindoho cha cuenda cha sacuví ndo cha vaha, ta cunyeé ndo chihin cha cama iñi ndo, ican ihya cuví cha vaha nuu Nyoo.

²¹ Vatyí nacana Nyoo chi yo vatyí coo yo tyehe caa. Vatyí tyicuan caa tucu nyehé ra Cristo tindoho cha cuenda maa yo, na cutuhva yo ta quehen yo cha caá ra.

²² Maa ra ni noo cuatyí ña sacuví ra. Ni noo chaha ña sandavi ñaha ra chi ninoo ñáyivi.

²³ Cuhva cha cahán ñu chi ra, ña nacahán xaan ra. Cuhva cha nyehé ra tindoho, ña tyanahá ra chi ñu. Soco natyaq ra chi ra ndaha Nyoo, vatyí Nyoo tuhvá ra sacutuñi ra chi ñáyivi chihin cha ndaa ta chihin cha ndicha.

²⁴ Vatyí chata maa ra Cristo nicoso ndi maa cuatyí tandihi yo cuhva cha caacá ra

nu cruzi cuan. Tyicuan caa cuví tacuhva vatyí ma sacuví ca yo cuatyí, ta coo yo noo ñáyivi vaha. Vatyí cha cuenda cha ñicuehe maa ra, yoó nduhava yo.

²⁵ Vatyí quivi cuan chica noo ndo tari mbee cha cuanaá. Soco vityin nacuhva cuenda ndo chi ndo chi ra Cristo, ra cuví pastor cha sahá cuenda añima yo.

3

Yoso caa tahan chi coo ñu tandaha

¹ Tyicuan caa tucu nyoho, ñu iyó yii. Quichaha ndo chi yii ndo. Vatyí tatu ña quichahá ra tuhun Nyoo soco cunachino iñi ra cha cuenda cha nyehé ra cuhva iyó ndo. Ta ña chiñuhú ri cha cuví yuhu xaan ndo chihin ra.

² Vatyí nyehé ra tyi cachi iyó ndo ta sahá ndo ñáyivi chi ra.

³ Ta ma caca iñi ndo tuhun cha sandutyaqui ndo chi ndo cuhva nyehé ndo, cuví ri chihin cha iyo xaan sanduvií ndo xiñi ndo, o cuví ri cha sandutyaqui ndo chi ndo chihin cha tyaa ndo xuhun cuaan chi ndo, o cuví ri cha cuihno ndo sahna vaha xaan. Ma nducu ndo tandihi cuan.

⁴ Soco nducu ndo cuhva ndutyaqui ndo chihin cuhva vaha iyó ndo. Vatyí cha vita iñi yo ta cha taxi ri iyó yo, yucuan cuví cha quitá chichi añima yo. Ta yucuan ña tuhvá cuan tivi. Vatyí ñahri nonga cha tyaqui ca nuu Nyoo tari cuan.

⁵ Vatyí tyicuan caa cuhva chiyo ñusihi cha yihi iñi chi Nyoo ta cha naha. Tyicuan caa sandutyaqui ñu chi ñu, ta quichahá ñu chi yii ñu.

⁶ Tari cu Sara, quichahá ña chi ra Abraham yii ña. Ta catyí ña: "Tata", chi ra. Ta nyoho tari sehe ña cuví chi ndo tatu sacuví ndo cha vaha tari maa ña. Ta ñahri cha yuhví ndo.

⁷ Ta tyicuan caa tucu nyoho ra iyó ñasihi. Cutuñi iñi ndo cuhva coo ndo chihin ñasihi ndo. Ta saha ndo ñáyivi chi ña, ñima vatyí yica ca ña cha nuu nyoho. Soco vatyí iin ri naquehen ndo tumañi iñi cha chahá Nyoo chi ndo. Ta yucuan cuví ñáyivi iyó ndo. Vaha coo ndo tyehe caa, tacuhva vatyí tiin cuenda Nyoo tuhun chicán tahvi ndo chi ra.

Nu catyí ra Pedro yoso caa tahan chi coo yo

⁸ Nu ndihi tuhun, cuñi chi cha iin ri cuhva caca xiñi tandihi ndo. Ta cundahvi cuñi ndo nyehé ndo chi tahan ndo. Cuñi ndo chi tahan ndo cuenda Nyoo tari cha yañi ndo cuví. Vita cahan ndo chihin ñu. Ta ma cahnu saha ndo chi ndo. Vaha ñáyivi cuví ndo.

⁹ Ma sacuví ndo cha ña vaha chihin ñu sacuví cha ña vaha chihin ndo. Ni ma cahan ndo chi ñu tatu cahán ñu chi ndo. Soco cha vaha sacuví ndo chihin ñu. Vatyí

Nyoo nacanaꝝ ra chi ndo vatyi cunaquehen ndo cha vaha cha iyó chi ra.

¹⁰ Vatyi catyí tuhun Nyoo tyehe caa: Ñu cha cuñí coo noo ñayiví chihin tusíi ñíi, cuñí chi saha ñu cuenda cuhva cahán ñu. Ta ma cahan ñu cha ña vaha, ta ni ma cahan ñu cuendu.

¹¹ Ta cuñí chi cha sandoo ñu cha ña vaha ta sacuví ñu cha vaha.

Nanducu ñu cuhva coo taxi ri ñu. Ta ma saña ñu.

¹² Vatyi Sutu Mañi yo sahá cuenda ra chi ñu vaha.

Ta tyasohó ra nu chicán tahvi ñu chi ra. Soco ñu sacuví cha ña vaha, xaan cuñí ra nyehé ra chi ñu.

¹³ ¿Yóo cha cuví sacuví cha ña vaha chihin ndo tatu nyoho tyicuan ri nducú ndo cuhva sacuví ndo cha vaha?

¹⁴ Soco vasi nyehé ndo tindoho cha cuenda cha sacuví ndo cha vaha, soco cucusí cuñí ndo. Ta ni ma nayuhvi ndo tatu tyanaha ñáyiví chi ndo.

¹⁵ Soco chichi añima ndo sacahnu ndo chi ra Cristo ta cuhva ndo na cunyaca ñaha ra chi ndo. Tyicuan ri caça ñíi ndo tuhun Nyoo tacuhva vatyi tatu ndaca tuhun noo ñu chi ndo ñáá tuhun chinó ñíi ndo chi ra, soco cuví nacuhva ndo cuenda chi ñu chihin cha ña cahnú saha ndo chi ndo ta chihin cha ndicha sahá ndo ñáyiví chi ra.

¹⁶ Cachi coo ndo tacuhva cha ma yuhvi añima ndo nuu Nyoo, vatyi tatu cahán ña vaha ñáyiví síqui ndo cha cuenda cuhva vaha iyó ndo chihin tuhun ra Cristo, soco suri maa ñu cucahan nuu ñu cha cuenda tuhun cahán ñu síqui ndo.

¹⁷ Tatu maa Nyoo cuñí ra cha nyehe yo tindoho, vaha ca cha nyehé yo cha cuenda cha sacuví yo cha vaha ta ñima ca cha cuenda cha sacuví yo cha ña vaha.

¹⁸ Vatyi suri ra Cristo nyehe ra tindoho ta chihí ra ñin chaha cuiri cha cuenda cuatyí yo. Ra vaha cuví ra ta chihí ra cha cuenda yo ñu iyó cuatyí. Vatyi tyicuan caa nuña ra ityi nachaa yo ityi nuu Nyoo. Chihí coño ñuhu ra, soco nandotoꝝ tucu ra chihin Tatyí li ra.

¹⁹ Tyicuan ta chihin Tatyí li ra chahan ra chichahan ra chihin añima cha ñohó vehe caa.

²⁰ Ta ican ñu cuan cuví ñu ña quichahá chi Nyoo quiví chiyo ra Noé ta tyembu chahnu. Ta nyatú Nyoo chi ñu nandu uvi ñíi ñu cuatyí ñu cha ni ri ca cha cuahan chino barcu cha savaha ra Noé. Soco ña cuaha ñu cacú quiví sahvi ndutya ñuhu ñáyiví. Uña tahan ri ñu cacú chihin ndutya vatyi nandaꝝ barcu nu ñohó ñu nu ndutya cuan.

²¹ Ta tyicuan caa tucu maa yo tari quiví cacú yo chihin ndutya nu condutya yo.

Cacú yo soco ñima cha cuenda cha nacatya yo coño ñuhu mecu yo. Soco cha cuenda cha chicán tahvi yo chi Nyoo na sanduvii ra añima yo ta sacacu ra chi yo cha cuenda cha nandotoꝝ ra Cristo.

²² Ta nandaa xica ra andiví, ta nyaá ra chiyo vaha Nyoo. Nyacá ñaha ra chi ángel ta tandihí cha nyacá ñaha chi ñáyiví.

4

Na sacuvi yo tyiño nuu tahan yo yoso cuhva chaha Nyoo chi yo

¹ Yucuan chaha tari nyehe ra Cristo tindoho chihin coño ñuhu ra, sandunyeen ndo ñíi ndo tacuhva cuví cunyeen ndo nyehé tucu nyoho tindoho. Vatyi ñu nyehé tindoho chihin coño ñuhu, ña sacuví ca ñu cha quiñi caa cha cuñí coño ñuhu ñu.

² Tacuhva vatyi cuví coo ñu cuhva cuñí Nyoo. Ta ma sacuví ca ñu cuhva cuñí coño ñuhu ñu.

³ Vityin cha yaha chinyacuví xaan ndo cha quiñi caa nu quichi chi. Sacuví ndo cuhva tahán ñíi ñu ña ñohó nuu Nyoo. Ta chiyo ndo yoso cuhva cuñí ndo, cuaha viciu sacuví ndo, cuaha cha quichi cuví ñíi coño ñuhu ndo cha quiñi caa chinyacuví ndo. Chihí ndo chihin ndixi. Maa maa ri vico chiyo ndo. Ta quiñi xaan sacahnú ndo xitohyo cha ña tahán chi sacahnú ndo.

⁴ Ta vityin iyo cuñí ñu ña ñohó nuu Nyoo vatyi ña cutahán ca ndo chihin ñu ta ña sacuví ca ndo cha quiñi caa cuan. Ta yucuan chaha cahán ña vaha ñu síqui ndo.

⁵ Soco nyaá nacuhva ñu cuenda chi ra cha nyatú tuhva quiví sacutuñi ra chi ñu nyitó ta chi ñu chihí.

⁶ Yucuan chaha sacotoꝝ ra Cristo tuhun vaha chi ñu ndiyi ñandihí. Vatyi tacuhva cuví coo añima ñu tari iyó Nyoo, vasi cha cutuñí chi ñu tari cutuñí chi tandihí ñáyiví iyó síqui ñuhu ñáyiví quiví chihí coño ñuhu ñu.

⁷ Soco cha cuyatyin cha cundihí tandihí maa. Yucuan chaha cachi coo ndo ta cunyaa vaha ndo tyiño cha chicán tahvi ndo.

⁸ Ta cha xihna ri tahán chi cha cuñi xaan ndo chi tahan ndo. Vatyi tatu cuñí yo chí tahan yo, cuaha xaan chaha cusaha yo ticahnu ñíi chi ñu, tyi maa Nyoo cuñí ra chi yo ta cuaha xaan chaha sahá ra ticahnu ñíi chí yo.

⁹ Tatu chaá noo ñáyiví vehe ndo, vaha tyíñuhu ndo chí ñu ta ma cuñí ndo tyí sayangá ñu chí ndo.

¹⁰ Ta tahan tahan yo na sacuvi yo tyiño nuu inga yo, yoso cuhva cha chahá Nyoo chí yo. Vatyi cuñí chí cha cotyiño yo sin sin cha vaha cha chahá ra chí noo noo yo cha cuenda cha vaha chí inga tahan yo.

¹¹ Tatu chahá Nyoo vatyi ñihi vahun tuhun cahun chihin ñáyivi, cahan soco maa maa ri tuhun cha chahá Nyoo. Tatu chahá ra tyi sacuvun tyiño nuu ñáyivi, na sacuvun chihin fuerza cha chahá ra. Tandihí cha sacuvi ndo, sacuvi ndo tacuhva vatyi chihin tandihí cha nyacuví ndo sacahnú ndo chi Nyoo cha cuenda ra Jesucristo. Chi maa Nyoo tahán chi sacahnu yo. Ta na cunyaca ñaha ra chihin tunyee ifi ra tyicuan ri maa. Ta na cuvi chi tyicuan caa.

Cuvi cusii cuñi yo tatu nyehé yo tindoho cha cuenda ra Cristo

¹² Yañi, cuñi xain chi ndo. Ma iyo xaan cuñi ndo tatu vachi tindoho ñihi siqui ndo. Ma cuñi ndo vatyi ña tahán chi nyehé ndo tindoho.

¹³ Soco cusii cuñi ndo vatyi cuvi nyehé ndo tindoho tari nyehé ra Cristo tindoho. Vatyi tyicuan caa ta cuvi cusii tucu cuñi ndo na nyehé ndo cha cahnu cuvi ra quivi cuquichi ra.

¹⁴ Tatu cahán ña vaha ñu siqui ndo vatyi nyicón ndo chi ra Cristo, cusii cuñi ndo, vatyi tyaqui xaan nyaá Tatyí Ii chihin ndo. Maa ñu cuan cahán ña vaha ñu siqui ra Cristo, soco nyoho sacahnú ndo chi ra.

¹⁵ Soco tatu nyehé ndo tindoho cha tyicuan caa, vaha, ta ñima ca cha nyehé ndo tindoho cha cuenda cha chahñi ndo, o cha suhvi ndo, o cha sacuví ndo cha ña vaha, o cha tyihí ndo chi ndo nu ña tahán chi.

¹⁶ Soco tatu nyehé ndo tindoho cha cuenda cha yihí ndo cuenda ra Cristo, ma cucahan nuu ndo. Soco sacahnu ndo chi Nyoo, vatyi chahá chi kuhva nyehé ndo chiin tindoho cha cuenda maa ra Cristo.

¹⁷ Vatyi cha chaá quivi cha quichahá sacutuñi Nyoo chi tandihí ñáyivi. Ta xihna ca chi yoó cha cuvi yo ñu yihí cuenda ra. Soco tatu tyehe caa tachí tuñi Nyoo chiin ri chi maa yo, ¿yoso caa cucuvi chí ñu cha ña quichahá tuhun Nyoo?

¹⁸ Tatu yii cacú añima ñu vaha, ¿yoso caa cucuvi chí ñu quiñi iyó, ñu iyó cuatyi?

¹⁹ Yucuan chaha tatu nyehé ndo tindoho kuhva cuñi Nyoo, cuñi chí cha sañihi ca ndo sacuvi ndo cha vaha. Ta tyaq ndo añima ndo ndaha Nyoo. Maa ra savahá chi yo, ta maa ra ndicha tuhun cahán ra ta cusacuvi ra tari kuhva catyí ra.

5

Nu chahá ra Pedro tuhun chi yo

¹ Yucuan chaha chahí tuhun chi ra chahnu nu nyicú ndo. Vatyi ra chahnu cuvi tucu yuhu. Ta cuvi cha ndaa vatyi nyehí tandihí tindoho cha cuvi chí ra Cristo. Ta cucutahin chihin tandihí ca ra quivi cunyicu yo chihin ra Cristo na quichi ra inga chaha chihin cha cahnu cuvi ra.

² Tari noo ra sahá cumi mbee, tyicuan caa saha cumi ndo chí ñu yihí cuenda Nyoo ñu yihí ndaha ndo. Ta sacuvi ndo chihin cha iyo vaha ifi ndo tari kuhva cuñi Nyoo, ta ñima chihin fuerza. Ta ni ñima cha cuenda cha cuñi ndo xuhun. Soco sacuvi ndo tyiño chihin cha ñii ifi ndo.

³ Ta ñima tari cha maa ndo nyacá ñaha ndo chí ñu sahá cumi ndo. Soco chihin kuhva vaha iyó ndo chihin Nyoo, sañaha ndo chí ñu cuvi mbee sana Nyoo yoso caa tahán chi coo ñu.

⁴ Ta quivi quichi ra cuvi nuu chí ra sahá cumi mbee, cunaquehen ndo noo cha vaha, noo cha tyaqui cha cucuhva Nyoo chí ndo. Noo cha ma tiví ca maa.

⁵ Tyicuan caa tucu nyoho ñu tyivaa, quichaha ndo chí ñu chahnu. Ta ñima iin ri maa ñu tyivaa soco tandihí ri ndo quichaha ndo chí tahan ndo. Ta ndahvi saha ndo añima ndo. Vatyi:

Nyoo ña cuñi nyehé ra chí ñu cahnu sahá chi.

Soco tyinyeé ra chí ñu ndahvi sahá chii.

⁶ Ndahvi saha ndo añima ndo nuu Nyoo. Ta kuhva ndo chí ndo na cunyaca ñaha ra chí ndo tacuhva cuvi sacahnu ra chí ndo quivi cha tahán chi. Tyi maa ra iyó xaan fuerza chí ra.

⁷ Kuhva ndo tandihí tindoho cha chicá xiñi ndo chí Nyoo. Vatyi maa ra ñiñi cuñi ra chihin ndo.

⁸ Cachi cohon ifi ndo ta saha vaha ndo cuenda nya cha vaha ta nya cha ña vaha, vatyi cuihna, ra xaan ifi chí ndo, chicá noo ra tari noo ndicaha xaan nanducú ti yóó chí cachi ti, tyicuan caa chicá noo ra ña vaha, nducú xaan ra kuhva saha ganaa ra chí ndo.

⁹ Soco ñihi cunjanyaa ndo chihin cha ñii ifi ndo chinó ifi ndo chí Nyoo tacuhva cuvi chasaha ndo chí ra ña vaha. Ta ñacoto ndo vatyi tandihí ñu ñohó cuenda ra Cristo ñicahnu ñuhu ñáyivi, nyehé tucu ñu cuan tindoho tari maa ndo.

¹⁰ Soco Nyoo tyinyeé ra chí yo, ta cha yahá nyehé ndo tindoho suhva ri quivi, Nyoo cusanducuiti ca ra chí ndo, ñihi ca cunicunyyaa ndo chihin ra ta cunacuhva ca ra fuerza chí ndo. Ta ican Nyoo cuvi ra chahá tandihí cha vaha chí yo ta maa ra caná chí yo tyi cu iin ri yo chihin ra Cristo tacuhva coo yo nu tyaqui chihin ra tyicuan ri maa.

¹¹ Na sacahnu yo chí ra ta na cunyaca ñaha maa ra tyicuan ri maa. Ta na cuvi chí tyicuan caa.

Nu ndihi chahá ra Pedro nocumi chí ñu

¹² Sacuhín carta ihya chí ndo chihin ra Silvano, yañi yo. Ta cha cuenda chí yuhu, maa ra cuvi noo ra ñii xaan ifi nyicón chí

ra Cristo. Tyaj̄i suhva nu tutu ihya chi ndo
vatyi chahí tuhun chi ndo ta catyí chi ndo
vatyi cha vaha cha ñihí ndo cuví cha ndicha
vaha cha chahá Nyoo chi yo cha cuenda
cha cuñí ra chi yo. Ma saña ndo ihya.

¹³ Vachi nocumi chi ndo sahá ñu yihí
cuenda Nyoo nya nu cuví ityi Babilonia.
Tari nacach̄i Nyoo chi maa ndo, tyicuan
caa nacach̄i tucu ra chi ñu cuan. Ta vachi
nonga nocumi sahá ra Marcos sehi cha
cuenda Sutu Mañi yo.

¹⁴ Cuhva ndo nocumi chi noo noo tahan
yo chihin cha cuñí ndo chi ñu.

Na coo cha taxi ri cuñi añima tandih̄i ri
ndo cha ñin ri cuví ndo chihin ra Jesucristo.
Ta na cuví chi tyicuan caa.

Carta Cha Cu Uvi Cha Sacuhun Ra Apóstol Pedro Chi ñáyivi Yihí Cuenda Nyoo

Nu tyaá ra Pedro noo tutu chi ñu yihí cuenda Nyoo

¹ Yuhu ra Simón Pedro sacuví tyiño nuu ra Jesucristo. Ta cuví noo apóstol chi ra. Cuñi chi catyí tyi tachí ra chíi vatyi caque tyiño ra. Tyaí tutu ihya chi nyoho cha chinó ñi ndo chí Nyoo tari cuhva cha tyaquí chinó ñi nyuhu. Vatyi yucuan cuví cha chino ñi yo vatyi vaha ra Jesucristo, ra cuví Nyoo, ra sacacú chi yo.

² Na naquehen ca ndo cha vaha cha chahá Nyoo chi yo. Ta na coo ca cha taxi ri añima ndo cha cuenda cha ñohó nuu ndo chí Nyoo ta chí Sutu Mañi yo Jesús.

Yoso caa coo ñu yihí cuenda Nyoo

³ Nyoo chihin tunyee ñi ra, chahá ra tandihí cha chiñuhú chi yo tacuhva cuví coo cachi yo nuu ra ta saha yo ñáyivi chí ra. Tandihí ihya ñihí yo cha cuenda cha chicohon nuu yo chí ra cha caná chí yo. Vatyi chicohon nuu yo tyi cahnu cuví ra ta tyaquí xaan cha sacuví ra.

⁴ Ta chihin tandihí ihya, chahá ra cha catyí ra tyi cucuhva ra chí yo. Ta cahnu xaan ta yahvi xaan nyaá cuan. Vatyi cha cuenda ihya nanduví yo tari maa ra. Vatyi sacanyaha ra cha quiñi caa cha quichí cuví ñi yo, ta ma tiví yo tari tiví ñáyivi iyó siqui ñuhu ñáyivi ihya.

⁵ Ta yucuan chaha cuñi chí cha chinó ca ñi yo chí Nyoo ta nducu yo cuhva cha coo cachi yo. Yaha cuan cuñi chí cha nducu yo cuhva ta cutuñi vaha ñi yo cuhva cuñi Nyoo chihin yo.

⁶ Ta yaha cuan cuñi chí cha saniñi yo cha cunyaca ñaha yo coño ñuhu yo ta cuhva chicá xiñi yo. Yaha cuan ta nducu yo cuhva cha cucama ñi yo. Yaha cuan ta nducu yo cuhva cha cuítí ca coo yo nuu Nyoo.

⁷ Yaha cuan ta nducu yo cuhva cha cuñi yo chí tahan yo. Yaha cuan nducu yo cuhva cha cuvita xaan añima yo chihin tandihí ñáyivi.

⁸ Tatu tyehe caa iyó ndo ta tyicuan ri nducú ndo cuhva cha coo tandihí ihya chí ndo, Nyoo cucotyíño xaan ra chí ndo. Ta tatu sacuví ndo tyehe caa, ña caha xaan ri chicohon nuu ndo chí Sutu Mañi yo Jesucristo.

⁹ Soco ñu cha ñahri ihya iyó chí, cuví ñu tari noo ra cuaa. Ña cutuñi ñi ñu cha tahán

chi coto ñu. Ta naá ñi ñu tyi sandachí Nyoo cuatyí ñu ta ityi chata ca.

¹⁰ Yucuan chaha yañi, saniñi ndo coo ndo tyehe caa. Tyicuan ta cundicha vaha tyi caná Nyoo chí ndo ta nacachí ra chí ndo. Vatyi tatu sacuví ndo tyehe caa, ma canacava maa ndo.

¹¹ Tyicuan caa ta totyehe ri cuhva Nyoo cha quihvi ndo nu nyacá ñaha Sutu Mañi yo Jesucristo tyicuan ri maa. Maa ra cuví ra sacacú chí yo.

¹² Yucuan chaha cuasanicohon que ñi ndo tuhun ihya, vasi cha chitó ndo, ta ñi ñi ndo sacuví ndo tuhun ndicha cha cutuhva ndo.

¹³ Ta cuhva cha cuñi mai, vatyi cha ni ri ca cha iyé, vaha sanicohin ñi ndo coto naa ñi ndo tuhun ihya.

¹⁴ Vatyi chité tyi ña naha ca ta cusandoi ñáyivi ihya. Vatyi tyicuan caa sacoto Sutu Mañi yo Jesucristo chíi.

¹⁵ Soco cuasaniñi tacuhva vatyi tatu yaha chihí soco nicohón ñi ndo tuhun ihya.

Nu nacatyí ra Pedro yoso caa nyehe ra cha cahnu cuví ra Cristo

¹⁶ Ñima tyisu ri canatava ndi quivi sacoto ndi tuhun ra Jesucristo chí ndo. Vatyi cha nyehe vaha ndi chihin chíi nuu ndi cuví. Vatyi nyehe ndi cha cahnu xaan cuví Sutu Mañi yo Jesucristo. Ta sacoto ndi chí ndo tyi iyó xaan tunyee ñi chí ra ta cuquichi ra inga chaha.

¹⁷ Vatyi nyehe ndi nu sacahnú xaan Nyoo Sutu yo chí ra. Ta tyaquí xaan tyaquí xaan cuví nu cahan Nyoo ta catyí ra: "Ican ihya Sehi. Ta cuñi xain chí ra. Ta siñ cuñi chihin ra", catyí Nyoo tuhun ra Jesús quivi cuan.

¹⁸ Ta nyuhu chihí ndi ndusu Nyoo cha quichí ityi andivi quivi cha nyicú ndi chihin Sutu Mañi yo nu yucu ii cuan.

¹⁹ Ta siñ ri cumí yo nonga tuhun cha ndicha vaha cha catyaa ra profeta. Nyaá vaha nu tutu nu cahan chí tuhun ra Cristo. Ta vaha sacuví ndo tatu quichahá vaha ndo tuhun ihya. Vatyi cuví chí tari noo ñuhú ndichin cha cayú nu ñaa ñi nyacua nya cundichin ta caña ra Cristo tari caña tiño cahnu cha ñaa ca, vatyi sandichín ra añima yo.

²⁰ Soco coño vaha ndo vatyi cha minoo tuhun ri yo, ma cuví catyí yo ñaa cha cuñi chí catyí noo tuhun cha nyaá nu tutu Nyoo.

²¹ Vatyi ra cacuví profeta ta cha naha, ña cahan ra cuhva cuñi ri maa ra. Soco cuhva cuñi Nyoo cahan ra. Ta Tatyí Ii saquehen ityi chí ra.

2

*Ra casañahá cha ña ndicha
(Judas 4-13)*

¹ Soco cachiyo tucu ra profeta cuendu nu nyicu ñu Israel ta cha naha, cacatyí ra tyi cuví ra profeta Nyoo. Ta tyicuan caa cuacoo tucu ra sacuahá ra sañahá cuendu nu nyicu ndo. Xehe ri cuasañaha ra tuhun cha ña ndicha cha cuví sativi chí ndo. Ta cuacatyí ra tyi ña ndicha Sutu Mañi yo ra sacacú chí ra. Yucuan chaha numi ri cucunaa ra cuan.

² Ta cuaha xaan ñu cucunyicon ñu chí ra chihin cha quiñi caa cha sacuví ra. Ta cuaha xaan ñu cucahan ña vaha ñu siqui tuhun cha ndicha vaha ra Cristo.

³ Ta chaha cha iyo cuñi ra xuhun, ta cusandavi ñaha ra chí ndo chihin cha casañahá ra maa ri cha ña ndicha. Soco nyatú Sutu Mañi yo tachi tuñi ra chí ra vatyi cha naha iyó maa tuhun cha cunaa ra.

⁴ Vatyi ni ri chí ángel cha chicoo cuatyí quiñi cuan ta ña saha Nyoo ticahnu iñi. Soco tuchí ra chí ra anyaya. Ta sandoo ra chí ra nu ñaa iñi, nuñi ra chihin cadena nyacua nya quiñi cutuñi chí ra nuu Nyoo.

⁵ Ta ni ña saha Nyoo ticahnu iñi chí ñu chiyo ta cha naha. Yucuan chaha tachi ra savi xaan siqui ñáyivi quiñi iyó cuan. Ta sacacú ra chí noo tuhun ri maa ra Noé, ra cha cahan tuhun vatyi coo yo noo ñayivi cachi. Ta cacú tucu ucha ca ñáyivi ñandihí.

⁶ Ta tyicuan caa tucu sacunaa Nyoo ñuu Sodoma ta ñuu Gomorra. Vatyi chahmí ra nyacua nya cha ndihí maa nduvj ñiyaa. Tacuhva vatyi cunyehe ñáyivi quiñi iyó cha cucoo nu cuahan ca chí.

⁷ Soco sacacú ra chí ra Lot vatyi cuví ra noo ra vaha nuu ra. Ta cuihya cuñi ra Lot nyehé ra kuhva iyó ñu quiñi iyó cuan.

⁸ Ta ndi quiñi cuihya cuñi añima ra Lot quiñi chiyo ra ñuu cuan, cha cuenda cha nyehé ra ta chíñi ra cha quiñi caa nyacuví ñu cuan. Vatyi maa ra, ra vaha cuví ra. Ta maa ñu maa maa ri cha ña vaha nyacuví ñu.

⁹ Ta tyicuan caa cuví sacacu Nyoo chí yo tatu iyó yo kuhva cuñi ra. Ta ñu quiñi iyó naquehén vaha Nyoo chí ñu vatyi cutachi tuñi ra chí ñu quiñi cutuñi chí ñu nuu ra.

¹⁰ Ta yaha ca cutachi tuñi Nyoo chí ñu nyicón cha ña vaha cha cuñi coño ñuhu, ñu ña cuñi cha cunyaca ñaha Sutu Mañi yo chí. Ta cahnú sahá ñu chí ñu ta sacuví ñu maa ri kuhva cuñi maa ñu. Ta ñu cuan ña yuhví ñu cahan ña vaha ñu siqui ra nahnu ca ican saha maa ñu cuví ri siqui ángel, cuví ri siqui vatyi ña vaha, cuví ri siqui Nyoo.

¹¹ Soco ángel, cahnú ca cuví ra cha nuu ñáyivi, soco ña cacañá iñi ra cahan ña vaha ra siqui ra nahnu ca cuan chihin nuu Sutu Mañi yo.

¹² Soco ra cahan cuendu nu nyicú ndo cuví ra tari quiñi cha ña cutuñi iñi ta sacuví ti kuhva cuñi maa ti. Vatyi quiñi, ¿ñáa cuenda iyó ti? Iyó ti vatyi tiñ rayi chí ti, ta

cahñi ra chí ti. Tyicuan caa maa ra cuan. Cacahán ña vaha ra siqui cha ña cutuñi iñi ra. Ta cucúvi ra tari chíñi quiñi.

¹³ Cunyehe ra tindoho tari sanyehé maa ra tindoho chí inga ñáyivi. Ta si xaan cacuñi ra chihin cha quiñi caa nyacuví ra nu tuví. Ticahan nuu chahá ra, tatu cha cutahan ra chihin ndo nu iyó ndo vico. Nyaá vavaha ra tusi iñi. Soco ña ndicha kuhva sañahá ra.

¹⁴ Ta tandihí ri ñusihí cha nyehé ra ta quichi cuví iñi ra. Ña chitatú ra cha casacuví ra cha quiñi caa. Casandavi ñaha ra chí ñu ña ñihí nyaá chihin Nyoo. Yatyí xaan ra cha nducu ra kuhva maa maa ri cha cuenda maa ra. Nyaá cha cunaa ndihí ra minoo quiñi.

¹⁵ Casandoo ra cuan ityi vaha ta naquehen ra ityi nu cucunaa ra. Casacuví ra tari sacuví ra Balaam sehe ra Beor. Vatyi cuñi ra Balaam saha ganaa ra xuhun chihin cha ña vaha cha nyacuví ra.

¹⁶ Tyicuan ta noo burra nacahan ti chihin ra, tari cahan ñáyivi, ta ña chahá ti cha kuhva ca ra Balaam chihin kuhva loco chicá xiñi ra.

¹⁷ Ta tyicuan caa tucu maa ra cha nyicú chihin ndo. Cacuví ra tari noo yavi ityi cha ñahri ndutya ñohó. Ta cuví ra tari noo vico cha tyandaha vatyi ñihí chí. Soco cha nyaá cha cohon ra nu ñaa iñi cahnú tyicuan ri maa cha cuenda cha nyacuví ra tyicuan caa.

¹⁸ Yaa vavaha cahan ra soco tandihí tuhun cahan ra cha ñima ri tuhun cuví. Ta chihin vicio ta chihin cha quichi cuví iñi coño ñuhu yo casandavi ñaha ra chí ñu cha yaha quitá mahñu cha quiñi caa.

¹⁹ Ta tyiyuhú ndihí ra chí ñu na cunyacuví ca ñu cha quiñi caa vatyi yori nyacá ñaha chí ñu, catyi ra. Soco suri maa ra chahá ra cha cunyaca ñaha cha quiñi caa chí ra. Vatyi tatu chahá yo cha cunyaca ñaha noo cha cunyaca ñaha chí yo, musu cuan cuví chí yo.

²⁰ Vatyi ñu cha chicohon nuu chí Sutu Mañi yo Jesucristo, ra sacacú chí yo, cha yaha sandoo ñu cha quiñi caa ñáyivi ihya. Soco tatu natiñ tucu ñu tuhun ñáyivi ihya inga chaha, quiñi ca nanduví ñu ta ñima ca ta cuví maa.

²¹ Vaha taxin ca tyehe ta ña chicohon nuu ñu ityi vaha cuan, ta ñima ca cha yaha chicohon nuu ñu ta nacuhva ñu chata ñu tuhun cha chahá Nyoo chí ñu.

²² Soco cuví chí ñu tari kuhva catyi noo tuhun cha iyó ñáyivi: “Ina nduchan ti, ta nacachí tucu ti cha nduchan ti. Ta quini chityí ti, ta ndihví tucu ti nu nyahyu inga chaha.”

Carta Cha Xihna Ri Cha Tyaa Ra Apóstol Juan

Ñayiví chaa coo yo

¹ Ihya tyaá ndi tuhun cha cha iyó maa quiví cha quichahá tandihi. Ta cuví chi tuhun cha chiñi ndi ta cha nyehé ndi chihin nuu ndi; vatyi nyehé ndi ta tñin ndi chihin ndaha ndi. Ta ican tuhun ihya cuví tuhun cha chahá ñayiví chaa coo yo.

² Ñayiví chaa ihya quetuví quiví quichí ra Cristo. Maa ndi nyehé ndi ta chahá ndi cuenda tuhun chi; ta sacotó ndi tuhun ñayiví chaa cha ma naa ca maa ihya chi ndo. Vatyi ñayiví ihya, nyaá chi chihin Sutu yo Nyoo, ta vityin tuví chi nu nyicú yo.

³ Nacatyí ndi chi ndo cha nyehé ndi ta cha chiñi ndi tacuhva na cu ñin ri ndo chihin ndi, tari maa ndi, ndicha cuui vatyi ñin ri cuví ndi chihin Sutu yo Nyoo ta chihin Sehe ra, ra Jesucristo.

⁴ Ta tyaá ndi tuhun ihya chi ndo tacuhva na coo tandihi tusi ñi cha chahá Nyoo chi ndo.

Nyoo, ñuhu ndichin cuví ra

⁵ Ican ihya cuví tuhun cahán ra Cristo chihin ndi. Ta chiñi ndi ta sacotó ndi chi ndo: Nyoo maa ri ñuhu ndichin iyó nu nyaá ra. Ta ñahri cha ñaa ñi, (ñahri cha ña vaha yihí ñi ra cuví cuan).

⁶ Tatu catyí yo vatyi ñin ri cuví yo chihin ra, soco sacuví yo cha ña vaha, nu ñaa ñi chicá noo yo cuví cuan. Sandaví ñaha yo. Ta ñahri tuhun ndicha cahán yo.

⁷ Soco tatu nu ndichin iyó yo, tari maa Nyoo iyó ra nu ndichin, tyicuan ta ñin ri cuví yo chihin tahan yo, ta ñiñi ra Jesucristo Sehe Nyoo, nacatyá chi ndi cuui maa cuatyí yo.

⁸ Tatu catyí yo vatyi ñahri cuatyí yo, suri chi maa yo sandaví ñaha yo, ta ñahri cha ndicha nyaá aña yo.

⁹ Soco tatu nahmá yo cuatyí yo nuu Nyoo, yihí ñi yo chi ra vatyi vaha ra ta ña sandaví ñaha ra, soco sacuví ra cuhva catyí ra, ta cusaha ra ticahnu ñi cuatyí yo ta cusandachi ra ndi cuui maa cha quiñi caa yo.

¹⁰ (Nyoo catyí ra tyi iyó cuatyí yo), ta tatu catyí yo vatyi ñahri cuatyí yo, sahá yo tuhun tyi Nyoo, cuendu ra. Ta tuhun cahán ra, ñahri maa nyaá aña yo.

2

Ra Cristo cuví ra cahán chaha yo

¹ Sehe nyihí, sacoté tuhun ihya chi ndo, tacuhva ma sacuví ndo cuatyí. Soco tatu chicoq cuatyí minoo ndo, ma yuhví ndo,

vatyí iyó ra cahán chaha yo nuu Nyoo. Ta ican ra cuví ra Jesucristo, ra vaha.

² Ta maa ra cuví ra chahnyá cuatyí yo, vatyi chihí ra tyiño nuu yo cha cuenda cuatyí yo. Ta ñima cha cuenda maa ri maa yo, soco cha cuenda tandihi ñayiví.

³ Tatu quichahá yo tuhun cahán Nyoo, ñohó nuu yo chi ra.

⁴ Soco tatu noo ra catyí ra: “Yuhu, ñohó nui chí Nyoo”, soco tatu ña quichahá ra tuhun cahán ra, cuví ra noo ra cuendu. Ta ñahri tuhun ndicha caá aña ra.

⁵ Soco ñu naquehén vaha tuhun cahán Nyoo, ican ñu cuan cuví ñu cuñí chi ra chihin cha ñi aña ñu. Ta cha tyicuan caa chitó yo tyi ñin ri cuví yo chihin ra.

⁶ Yóo cha catyí vatyi ñin ri cuví chihin Nyoo, tahan chí coo ra tari cuhva chiyó maa ra Jesucristo quiví chicá noo ra siqui ñuhu ñayiví.

Tuhun chaa cha cuñí yo chi tahan yo

⁷ Yañi yo, ñima noo tuhun chaa sacoté chi ndo, soco cuví chi noo tuhun chahnu cha chitó ndo nyata quiví xihna ri. Ta ican tuhun chahnu ihya cuví tuhun chiñi ndo.

⁸ Soco tari noo tuhun chaa cuví chi. Ta sacuví ra Cristo, ta chahá ra cha sacuví tucu maa ndo ñandihí. Ta cha tyicuan caa, cha ñaa ñi cuahan nocuee chi. Ta cha ndichin Nyoo cha sandundichín chi.

⁹ Ñu cha catyí vatyi nyaá ñu nu ndichin, ta ña cuñí nyehé ñu chí tahan ñu, ni nyaá ca ñu nu ñaa ñi.

¹⁰ Ta ñu cuñí chí tahan, nu ndichin nyaá ñu. Ta ñahri maa cha cuví sanacava chí ñu nu cuatyí.

¹¹ Soco ñu cha ña cuñí nyehé chí tahan, nu ñaa ñi nyaá ñu. Ta ña chitó ñu nya ityi cuahan ñu vatyi ña cuví nyehé ñu vatyi tari cha cuaa ñu.

¹² Sacuhín tuhun ihya chí nyoho, ra cuatyaa sehi. Vatyi cha yahá saha Nyoo ticahnu ñi cuatyí ndo cha cuenda cha chihí ra Jesucristo tyiño nuu ndo.

¹³ Ta chí nyoho, cha cuví ndo sutu, sacuhín tuhun ihya chí ndo, vatyi ñohó nuu ndo chí ra iyó nyata cumañi cacu ñuhu ñayiví. Ta chí nyoho, ra tyivaa, sacuhín tuhun ihya vatyi cuví chasaha ndo chí ra ña vaha.

Ta chí nyoho, cha cuví ndo ra cuatyaa sehi, sacuhín tuhun ihya vatyi ñohó nuu ndo chí Sutu yo Nyoo.

¹⁴ Sacuhín tuhun ihya chí nyoho cha cuví ndo sutu, vatyi ñohó nuu ndo chí ra cha iyó nyata cacu ñuhu ñayiví. Ta sacuhín tuhun ihya chí nyoho ra tyivaa vatyi nyaá xaan fuerza chí ndo. Ta tuhun Nyoo caá aña ndo. Ta cuví chasaha ndo chí ra ña vaha.

¹⁵ Ma cuñi ndo cha quiñi caa cha iyó ñayiví ihya. Ni ma cuñi ndo cha iyó siqui

ñuhu ñayiví. Vatyí ñu cuñí tandihí ihya, ña cuñí ñu chí Nyoo.

¹⁶ Vatyí tandihí cha iyó ñayiví ihya, cha ña vaha cha quichí cuví iñi coño ñuhu yo, ta cha nyehe yo ta quichí cuví iñi yo coo chí yo, ta cha cuñí yo cuyaa yo chihin cha iyó chí yo, tandihí ihya ñima cuhva chahá Sutu yo Nyoo chí yo cuví, soco maa maa ri cha chahá ñayiví ihya cuví.

¹⁷ Ta ñayiví ihya cuahan sandihí chí, chihin tandihí cha quiñi caa cha quichí cuví iñi ñayiví. Soco ñu cha sacuví cuhva cuñí Nyoo, tyicuan ri maa cuacoo ñu chihin ra.

Ra xaan iñi chí ra Cristo

¹⁸ Sehe nyihí, cha nyaá yo nu cuandihí quiví. Ta nyoho chiñí soho ndo vatyí vachi noo ra cha ña cuñí nyehe chí ra Cristo, ta vityin cha cuaha xaan ra ña cuñí nyehe chí ra Cristo iyó vityin. Yucuan chaha nacoto yo vatyí cha nyaá yo nu cuandihí quiví.

¹⁹ Maa ra nu nyicú yo quita coyo ra, vatyí ñima ra cuenda yo cuví chí ra. Vatyí tyehe ta ra cuenda yo cacuví chí ra, candoó ra chihin yo. Soco cuahan coyo ra tacuhva quetuví vatyí ña tandihí ñayiví ta cuenda yo cuví ñu.

²⁰ Soco chí nyoho chahá ra Cristo Tatyí Ii Nyoo cunyya aña ndo. Ta chitó ndo tandihí.

²¹ Sacuhín tuhun ihya chí ndo ñima cha cuenda vatyí ña chitó ndo cha ndicha, soco vatyí chitó ndo. Ta ni noo cuendu ma quita cahan ñu sacuví cha ndicha.

²² ¿Yóo cha cuví ñu cuendu? Ñu catyí vatyí ra Jesus ñima ra Cristo cuví ra. Ta ñu cha catyí tyehe caa, ñu xaan iñi chí ra Cristo cuví ñu. Vatyí ña chinó iñi ñu chí Sutu yo Nyoo, ta ni ri chí ra Jesucristo Sehe Nyoo.

²³ Tandihí cuví ñu ña chinó iñi chí Sehe Nyoo, yori Sutu yo Nyoo nyaá chihin ñu. Soco ñu catyí vaha chí ñayiví vatyí ra Jesucristo cuví Sehe Nyoo, iñ ri cuví ñu chihin Nyoo ñandihí.

²⁴ Yucuan chaha nyoho, tuhun cha chiñí ndo nya quiví xihna ri, naquehen vaha ndo chichí aña ndo. Tatu ndoó chí chichí aña ndo, iñ ri cuví ndo chihin Sehe Nyoo ta chihin Sutu yo Nyoo ñandihí.

²⁵ Ta ra Jesucristo catyí ra vatyí cuhva ra noo ñayiví chaa cha ma naa ca maa coo yo.

²⁶ Sacuhín tuhun ihya chí ndo cha cuenda vatyí cuaha xaan ra sandaví ñaha chí ndo iyó.

²⁷ Soco ra Jesucristo chahá ra Tatyí Ii Nyoo cha cunyya aña ndo, ta ña chiñuhú ca cha sañaha ni noo ñayiví chí ndo. Vatyí suri maa Tatyí Ii Nyoo sañahá chí ndo ndii cuví maa tuhun. Ta cha ndicha cuví, ñima cuendu cuví. Yucuan chaha sañahi ca ndo cu iñ ri ndo chihin ra Cristo tari cuhva sañahá Tatyí Ii Nyoo chí ndo.

²⁸ Ta vityin nyoho, ra cuatyaa sehi, cunyyaañaa yo chí ra Cristo tacuhva vatyí nachaa chí quiví quichí ra, ma cutucu cuñí yo chihin ra. Ta tyicuan caa tucu maa ra chihin yo. Ta iñ ri tacuhva cha ma tahan yo ticahan nuu ra quiví quichí ra.

²⁹ Cha chitó ndo vatyí ra Cristo vaha ra. Chitó tucu ndo vatyí tandihí ñu cha nyacuví cha vaha, sehe Nyoo cuví chí ñu.

3

Ñu cha cuví sehe Nyoo

¹ Nyehe ndo, yoso cha cuñí Sutu yo Nyoo chí yo, vatyí nasaha ra sehe ra chí yo. Ta catyí ra: “Nyoho, sehi cuví chí ndo.” Yucuan chaha ñayiví, ña cuñí nyehe ñu chí yo vatyí tyicuan caa tucu, ña cuñí nyehe ñu chí maa ra.

² Yañi, vityin cha cuví yo sehe ra. Soco ta coto ca yo yoso caa cucuvi yo. Soco chitó yo vatyí nachaa chí quiví quichí ra Jesucristo, cucuvi yo tari maa ra, vatyí cunyehe vaha yo chí ra tari cuhva caá ra.

³ Ta tandihí yo cha nyatú yo cha cucuvi tyehe caa, nducú yo cuhva ta sandundií ca yo aña yo, tari ndii maa Sutu Mañi yo Jesucristo.

⁴ Tandihí ñu sacuví cuatyí, ña quichahá ñu ley Nyoo. Vatyí cha sacuví yo cuatyí, ña quichahá yo ley Nyoo cuví chí cuan.

⁵ Cha chitó ndo vatyí ra Cristo quichí ra ñayiví tacuhva tinyaa ra cuatyí yo, ta maa ra ñahri cuatyí ra.

⁶ Tandihí yo cha iñ ri cuví yo chihin ra, ña sacuví yo cuatyí. Soco ñayiví cha sacuví cuatyí, ta quehen cuenda ca ñu chí ra, ni ta cohon ca ra aña ñu.

⁷ Sehe luhli, ñaha sandaví ñaha ñayiví chí ndo, vatyí ñu cha sacuví cha vaha, vaha ñu, tari maa ra Cristo vaha ra.

⁸ Soco ñu cha sacuví cuatyí, cuenda ra ña vaha yihí ñu. Vatyí ra ña vaha sacuví ra cuatyí nyata quiví xihna ri. Soco yucuan chaha quichí ra Jesucristo, ra cha cuví Sehe Nyoo, tacuhva vatyí satani ra ndii cuví cha sacuví ra ña vaha.

⁹ Tandihí yo cha cha yaha nacacu chaa yo, nanduví yo sehe Nyoo, ta ña sacuví ca yo cuatyí, vatyí ñayiví Nyoo iyó yo. Yucuan chaha ña sacuví ca yo cuatyí, vatyí cha yaha nacacu chaa yo ta sehe Nyoo cuví chí yo.

¹⁰ Ta tyehe caa cuví nichon nuu yo chí ñu cha cacuví sehe Nyoo, ta ñu vaha sehe cuhna. Vatyí yóo ñu sacuví cha ña vaha o ña cuñí nyehe ñu chí tahan ñu, ñima ñayiví cuenda Nyoo cuví ñu.

Na cuñi yo chí noo noo tahan yo

¹¹ Vatyí ican ihya cuví tuhun cha chiñí ndo quiví xihna ri: Cha cuñi yo chí noo noo tahan yo.

¹² Ña tahan chi sacuvi yo tari cuhva sacuvi ra Caín. Cuví ra noo ra cuenda ra ña vaha. Ta chahñi ra chi yañi ra. ¿Ñáá tuhun chahñi ra chi ra? Cha cuenda vatyi vaha cuhva sacuví yañi ra, ta maa ra Caín chinyacuví ra cha ña vaha.

¹³ Yañi yo, ma iyo cuñi ndo tatu ña cuñi nyehe ñáyivi chi ndo.

¹⁴ Yoó chító yo vatyi tari minoo ra chihí ta nandoto cuví yo vatyi iyó yo noo ñáyivi chaa vatyi cuñi yo chi tahan yo. Ñu cha ña cuñi chi tahan, tari quivi ni cuví ca ñu tari noo ra chihí, ta ta nandoto ca ñu.

¹⁵ Yóó ñu cha xaan iñi chi tahan, tari noo ñu chahñi ñáyivi cuví ñu. Ta chító ndo vatyi ni noo ñu chahñi, ma cuhva Nyoo ñáyivi chaa cha ma naa ca maa coo aña ñu.

¹⁶ Nicohón nuu yo ñáá cha cuví cha cuñi yo chi tahan yo vatyi ra Jesucristo sañaha ra chi yo. Vatyi maa ra cuñi ra chi yo, ta chaha ra ñáyivi ra cha catyi yo. Ta tyicuan caa tucu maa yo, cuñi yo chi tahan yo ta cuhva yo ñáyivi yo cha cuenda ñu.

¹⁷ Ta tatu yihí yo iyó chiin chi yo siqui ñuhu ñáyivi ihya, ta nyehé yo cumañi cha cumañi chi tahan yo, ta sahá ri yo cha ña nyehé yo, ¿atu cuñi yo chi Nyoo cha sacuví yo cha tyicuan caa? Ña cuñi yo chi ra cuví chi cuan.

¹⁸ Ra cuatyaa sehi, ñima chihin tuhun yuhu ri yo, cuñi yo chi tahan yo, soco na cuñi yo chi ñu chihin cha sacuví yo tumañi iñi, ta chihin cha ñi iñi yo.

Yoso caa sacuvi yo ta coo vaha yo chihin Nyoo

¹⁹ Tatu sacuví yo tyicuan caa, chító yo tyi yihí yo tuhun ndicha. Ta vaha iyó yo chihin Nyoo.

²⁰ Tatu chichi aña yo ta tuví iñi yo tyi iyó cuatyí yo, vihi ca cuví Nyoo, chító ra cha caá aña yo.

²¹ Yañi, tatu tuví iñi yo tyi ñahri cuatyí yo, ma yuhvi cuñi yo nyehe yo chi Nyoo.

²² Ta ñáá ri cha cacan tahvi yo cuacuhva ra chi yo, vatyi quichahá yo tuhun cahán ra, ta sacuví yo cuhva tahan iñi ra.

²³ Ta ican ihya cuví tuhun chaha ra chi yo: Cha chño iñi yo vatyi ra Jesucristo cuví Sehe ra. Ta cha cuñi yo chi noo noo tahan yo vatyi tyicuan caa tuhun cha chaha ra chi yo.

²⁴ Ta ñu cha quichahá tuhun chaha ra chi yo, iyó ñu cha iñi ri cuví ñu chihin ra, ta maa ra iyó ra chichi aña ñu. Ta cha cuenda Tatyí li ra cha chaha ra chi yo, chító yo vatyi nyaá ra chihin yo.

4

Tatyí li Nyoo ta tatyí ña vaha

¹ Cuñi xain chi ndo, yañi. Ma chino iñi ndo tandihi ñáyivi cha catyi tyi cuenda Nyoo cahán ñu. Nyehe xihna ndo tatu nacachí tahan cha cahán ñu chihin tuhun Nyoo. Vatyi cuaha xaan ra cha catyi vatyi Nyoo sañahá chi ra. Soco ña ndicha.

² Soco tyehe caa cuví nichohon nuu ndo tatu Tatyí li Nyoo sacahán chi ra o ñima. Tandihí ra cha catyi vatyi quichí ra Jesucristo nya gloria ta cacu ra chihin coño ñuhu ñáyivi ihya, ican ra cuan, sacahán Tatyí li Nyoo chi ra.

³ Soco ndi cuii maa ñáyivi cha catyi vatyi ra Cristo ña chica noo ra chihin coño ñuhu ñáyivi ihya, ñima Nyoo sacahán chi ñu cuan, soco tatyí ña vaha, cha xaan iñi chi ra Cristo, ican sacahán chi ñu. Cha chihí ndo vatyi nyaá quichi cuan. Ta vityin cha chicá noo chí siqui ñuhu ñáyivi.

⁴ Ra cuatyaa sehi, ñáyivi chi Nyoo cuví ndo. Ta cuví chasaha ndo chi ra xaan iñi chi ra Cristo. Vatyi cahnu ca ra Cristo, ra nyaá aña ndo ta ñima ca ra ña vaha, ra cha chicá noo siqui ñuhu ñáyivi ihya.

⁵ Maa ñu cuan, ñu cuenda ñáyivi ri ihya cuví ñu. Yucuan chaha cahán ñu tuhun ñáyivi ihya. Ta ñu cuenda ñáyivi ihya tyasohó ñu tuhun cahán ñu.

⁶ Soco yoó cuví yo ñu cuenda Nyoo. Ta ñu cuenda Nyoo tyasohó ñu tuhun cahán yo, soco ñu yihí tatyí ña vaha aña, ña cuñi ñu tyasohó ñu. Ta tyicuan caa cuví nichohon nuu yo chi ñu yihí Tatyí li Nyoo ta ñu yihí tatyí ña vaha.

Nyoo cuñi xaan ra chi tandihí ñáyivi

⁷ Yañi yo, na cuñi yo chi tahan yo, vatyi Nyoo sañahá ra chi yo yoso caa cha tahan chi cuñi yo chi ñu. Tandihí yo cha cuñi yo chi tahan yo sehe Nyoo cuví chi yo, ta ñohó nuu yo chi Nyoo.

⁸ Soco ñu cha ña cuñi chi tahan, ta cohon nuu ca ñu chi Nyoo, vatyi Nyoo cuñi xaan ra chi yo ta chi tandihí ñáyivi.

⁹ Ta sañaha Nyoo vatyi cuñi ra chi yo chihin cha chaha ra noo Sehe mañi ra tyi quichí ra siqui ñuhu ñáyivi ihya, vatyi cuhva ra noo ñáyivi chaa coo yo.

¹⁰ Nyehe xihna, yoso cha cuñi Nyoo chi yo. Ñima vatyi xihna ca yo cuñi yo chi ra, soco xihna ca maa ra cuñi ra chi yo. Ta tachí ra chi Sehe ra vatyi tacuhva cúvi ra tyiño nuu yo ta cahnya ra cuatyí yo.

¹¹ Nyoho yañi, tatu cuñi Nyoo chi yo cha tyicuan caa, tahan tucu chi cuñi maa yo chi tahan yo.

¹² Vasi ni nonga ñáyivi, ta nyehe ca ñu chi Nyoo, soco tatu cuñi yo chi noo noo tahan yo, Nyoo nyaá ra aña yo. Ta tyicuan caa ñi vaha iñi yo cuñi yo chi ra.

13 Ta chító yo vatyi nyaá yo chichi ndaha ra, ta maa ra nyaá añima yo vatyi chahá ra Tatyí li ra cunyaa añima yo.

14 Ta nyuhu nyehé vaha ndi ta cuví ndi cha ndaa vatyi Sutu yo Nyoo saquichí ra chí Sehe ra tacuhva vatyi sacacú ra chí yo cha cuví yo ñáyivi iyó siqui ñuhu ñayivi.

15 Tandihí ñu nachinó ñi chihin cha ñi ñi ñu ta catyí ñu vatyi ra Jesús cuví ra Sehe Nyoo, Nyoo nyaá ra chichi añima ñu. Ta maa ñu nyaá ñu chichi ndaha ra.

16 Ta yoó cha nacoto yo ta nachino ñi yo tyi Nyoo cuñi ra chí yo, ta chí tandihí ñáyivi. Ta ñu cha cuñi chí tahan, chichi ndaha Nyoo nyaá ñu. Ta Nyoo nyaá ra chichi añima ñu.

17 Vatyi tatu cuñi yo chí Nyoo chihin cha ñi ñi yo ma yuhví cuñi yo nyehé yo chí ra, nachaa chí quivi cutuñi chí tandihí ñáyivi nuu ra. Vatyi tari cuhva iyó maa ra Jesucristo, tyicuan caa iyó yo siqui ñuhu ñayivi ihya.

18 Nyoo cuñi ra chí yo, ta tatu cuñi yo chí ra, ñahri maa cha yuhví yo. Tatu ñi ñi yo cuñi yo chí Nyoo ña nuña ca nu quihí tuhun yuhví añima yo, vatyi Nyoo tavá ñehé ra tandihí maa cuan. Vatyi tatu yihí cha yuhví cuñi yo, yihí cha cuenda vatyi iyó cuatyí yo. Ta yuhví yo cha cutachi tuñi Nyoo chí yo. Vatyi tatu yuhví cuñi yo, yuhví yo vatyi ña cuñi vaha yo chí Nyoo.

19 Yoó cuñi yo chí Nyoo vatyi xihna ca maa ra cuñi ra chí yo.

20 Tatu yoó cha catyí: "Yuhu cuñi chí Nyoo", catyí ñu, soco ña cuñi nyehé ñu chí tahan ñu, noo ñu cuendu cuví ñu. Vatyi tatu ña cuñi nyehé ñu chí tahan ñu cha nyehé ñu, ¿atu cuví cuñi ñu chí Nyoo cha ña nyehé ñu? Ma cuvi.

21 Ta Nyoo chahá ra tuhun ihya chí yo: Ñu cha cuñi chí Nyoo, tahán chí cha cuñi tucu ñu chí noo noo tahan ñu ñandihí.

5

Cha ñi ñi yo chinó ñi yo chí Nyoo sahá ganaa yo chí cha ña vaha

1 Tandihí ñu chinó ñi tyi ra Jesús cuví Cristo cha saquichí Nyoo, sehe Nyoo cuví chí ñu; ta tatu cuñi yo chí noo sutu, cuñi tucu yo chí tandihí sehe ra.

2 Tatu cuñi yo chí Nyoo ta sacuví yo cha catyí ra, chító yo vatyi cuñi tucu yo chí ñu sehe Nyoo.

3 Vatyi cha cuñi yo chí Nyoo ican cuví cha quichahá yo tuhun chahá ra chí yo. Ta tandihí tuhun cha chahá ra chí yo ña yii sacuvi yo.

4 Vatyi tandihí yo cha cuví yo sehe Nyoo, cuví chasaha yo chí cha ña vaha cha iyó ñayivi ihya chihin cha chinó ñi yo chí Nyoo.

5 Ñu cha chinó ñi vatyi ra Jesús cuví Sehe Nyoo, ican ñu cuan cuví chasaha chí cha ña vaha cha iyó ñayivi ihya.

Tatyí li Nyoo cuví cha ndaa cuenda ra Jesús ra cuví Sehe Nyoo

6 Ra Jesucristo quichí ra siqui ñuhu ñayivi ihya. Ta chító yo tyi ndicha cha Sehe Nyoo cuví chí ra nu condutyá ra, ta nu chatí ñiñi ra ñandihí. Ñima noo ri nu condutyá ra. Soco nu chatí ñiñi ra ñandihí. Ta Tatyí li Nyoo cuví cha ndaa tyi tyicuan caa cuví. Ta maa ri cha ndicha cahán Tatyí li Nyoo.

7 Iyó uñi tahan testigu cha nyaá andivi: Sutu yo Nyoo ta ra Cristo ra cuví Tuhun Cahán Nyoo, ta Tatyí li Nyoo. Ta nduñi tahan ihya cuví noo ri, ta ñiñi ri cuhva cahán nduñi tahan.

8 Ta iyó uñi tahan testigu siqui ñuhu ñayivi ihya: Tatyí li Nyoo cha nyaá añima yo catyí vatyi ican ra Jesús cuví Sehe Nyoo. Yucuan cuví noo. Ta nu condutyá ra Jesús, Nyoo catyí ra vatyi ican ra cuví Sehe ra. Yucuan cuví cha cu uvi. Ta nu chatí ñiñi ra Jesús, yucuan cuví cha cu uñi cha sañahá chí vatyi ra Jesucristo cuví ra Sehe Nyoo. Ta tyicuan caa nduñi tahan cuan ñiñi ri cuhva cahán.

9 Yoó tuhvá yo naquehen yo tuhun cahán ra cuví testigu siqui ñuhu ñayivi ihya. Soco Nyoo cahnú ca cuví ra ta ñima ca ra ñuhu ñayivi ihya. Ta ican ra catyí ra vatyi ra Jesús cuví Sehe ra.

10 Ñu cha chinó ñi tyi Sehe Nyoo cuví chí ra Jesús, cható ñu chichi añima ñu tyi ndicha. Ñu cha ña chinó ñi chí ra, tari quivi cha sahá ñu tuhun tyi Nyoo ra cuendu cuví ra, vatyi ña cuñi ñu chino ñi ñu cha cahán Nyoo tumañi ñi cuenda Sehe ra, ra Jesús.

11 Ta ican ihya cuví tuhun cahán Nyoo chihin yo: Catyí ra tyi chahá ra noo ñayivi chaa coo yo tatu chinó ñi yo vatyi ra Jesucristo cuví Sehe ra.

12 Ñu cha nyaá Sehe Nyoo añima, iyó ñu ñayivi chaa ihya. Ta ñu cha yori Sehe Nyoo nyaá añima, ñahri ñayivi chaa cuan iyó ñu.

Nu ndihí chahan ra Juan ta chahá ra tuhun chí ñu

13 Sacuhín tuhun ihya chí nyoho cha chinó ñi chí ra Jesús Sehe Nyoo, tacuhva coto ndo tyi cha iyó ndo ñayivi chaa cha maa ca maa.

14 Cunyeé xaan ñi yo chí Nyoo vatyi chító yo vatyi tatu chicán yo cha chicán yo chí ra ta cuhva cuñi ra cuví, maa ra chíñi ra tuhun cahán yo.

15 Ta tatu chító yo tyi chíñi ra tuhun cahán yo, chító tucu yo tyi cha ñiñi yo cha chicán yo chí ra.

16 Tatu nyehé yo noo ñu tahan yo sacuví ñu noo cuatyí, soco noo cuatyí cha ña sacunaá chí chí ñu nuu Nyoo, cuví cacán

tahvi yo chi ra cha cuenda ñu. Ta cusaha ra ticahnu iñi cuatyí ñu tacuhva coo ca ñu nuu ra. Soco iyó noo cuatyí cha sativí chi ñáyivi nuu Nyoo. Ña tahán chi cacan tahvi yo cha cuenda ñu cha sacuvi cuatyí cuan.

¹⁷ Tandihí cha ña vaha cha sacuví ñáyivi, cuatyí cuví. Soco iyó cuatyí cha ña sativí ndihí chi chí yo nuu Nyoo.

¹⁸ Chitó yo vatyí ñu cha nacacu chaa saha Nyoo, ña sañihí ñu sacuvi ñu cuatyí. Vatyí Sehe Nyoo sahá cuenda chí ñu ta ña chahá ra cha tñn ra ña vaha chí ñu.

¹⁹ Ta yoó chitó yo tyí cuenda Nyoo yihí yo. Tandihí ca ñáyivi, cuenda ra ña vaha yihí ñu, vatyí nyacá ñaha ra chí ñu.

²⁰ Chitó tucu yo vatyí cha quichí Sehe Nyoo. Ta chahá ra cha chíñi tuñi vatyí cohon nuu yo chí Nyoo, ra ndicha vaha. Ta nyaá yo chichi ndaha ra cuví cha ndicha, ra cuví Sehe Nyoo, ra Jesucristo. Ican ra cuví Nyoo cha ndicha, ican ra cuví ñáyivi chaa cha ma naa ca maa.

²¹ Nyoho ra cuatyaa sehi, saha ndo cuenda chí ndo chíhin cha sacahnú ñáyivi, ta ni ñima Nyoo cuví.

Ta na cuví chí tyicuan caa.

Carta Cha Cu Uvi Cha Tyaa Ra Apóstol Juan

*Nu catyí ra Juan vatyí cuñí xaan ra chi ñu
yihí cuenda Nyoo*

¹ Nyoo nacachí ra chuun, yoho Hermana. Ta yuhu cha cuví ra chahnu vehe ñuhu, sacuhín tutu ihya chuun ta chí tandihí sehun. Ta cuñí xain chí ndo chihin cha ñiñi. Ta ñima yuhu ri cuñí chí ndo soco tandihí ca ñu cha nacotó cha ndicha ñandihí.

² Cuñí chí ndo cha cuenda cha ndicha cha ñohó chichi añima yo. Ta tyicuan ri maa cunyaa cha ndicha cuan chihin yo.

³ Sutu yo Nyoo ta Sutu Mañi yo Jesucristo Sehe Nyoo na nasoco ra chí ndo ta na nyehe ndahvi ra chí ndo. Ta na coo cha taxi ri añima ndo, chihin cha ndicha, vatyí cuñí xaan ra chí ndo.

⁴ Sií xaan cuñí cha chité tuhun suhva sehun ta nyehí vatyí iyó ñu tari cuhva catyí cha ndicha, tari cuhva catyí Sutu yo Nyoo tyí sacuví yo.

⁵ Ta vityin, Hermana, chacú ndahvi nuun, na cuñí yo chí noo noo tahan yo. Ican ihya cuví cha tyai nu tutu ihya. Ta ñima noo tuhun chaa cha chahá Nyoo chí yo cha vityin ri cuví cha cuñí yo chí noo noo tahan yo. Soco ican ihya cuví tuhun cha catyí Nyoo chí yo nyata quivi xihna ri.

⁶ Ta cha cuñí yo chí ra, ican cuví cha sacuví yo tandihí cha catyí ra chí yo. Ican ihya cuví cha catyí Nyoo tyí sacuví yo. Ta nyoho, chíñi ndo tuhun ihya nya quivi xihna ri. Na coo ndo chihin cha cuñí ndo chí Nyoo ta chí ñáyivi.

*Nu catyí ra Juan vatyí saha cuenda yo chí yo
chihin ñu chicá noo sandavi ñaha*

⁷ Catyí chuun tyehe caa vatyí cuaha xaan ra casandaví ñaha cachicá noo ra nicahnu siqui ñuhu ñayivi. Cacatyí ra vatyí ña ndicha cha quichi cacu ra Jesucristo chihin coño ñuhu ñayivi ihya. Ra cacatyí tyicuan caa, sandaví ñaha ra chí ñáyivi. Ta cuví ra noo ra xaan iñi chí ra Cristo.

⁸ Yucuan chaha, saha ndo cuenda chí ndo chihin tuhun cha sañahá ra coto sacunaa ndo cha vaha cha sacuví ndo, ta coto ma ñihi ca ndo tandihí cha cuacuhva Nyoo chí ndo.

⁹ Yóo ñu cha ña ndoó vaha chihin cha sañahá ra Cristo chí yo ta sañahá ñu inga tuhun, yori Nyoo nyaá chihin ñu cuan. Soco ñu ndoó vaha ta quichahá tuhun cha sañahá ra Cristo, nyaá Sutu yo Nyoo ta ra Jesucristo Sehe ra chihin ñu cuan.

¹⁰ Tatu chaa noo ra vehe ndo, cua nyehe ra nu nyicú ndo ta cuñí ra sañaha ra tuhun cha ña sañahá ra Jesucristo, ma cuhva ndo vehe ndo cunyaa ra, ni ma tyinyee ndo chí ra.

¹¹ Vatyí tari quivi cha ñin ri cha ña vaha sacuví yo chihin ra tatu naquehén cuenda vaha yo chí ra cuan.

Nu ndihí cahan ra Juan

¹² Cuaha xaan ca tuhun tyai cuhva sacote chí ndo, soco ña cuñí sacote chí ndo chihin tutu. Soco nyatí cuhin nu nyicú ndo. Tyicuan ta ndatuhun vaha maa yo, tacuhva cusii ca cuñi yo.

¹³ Ihya vachi nocumi chuun sahá sehe cuhin. Nacachí tucu Nyoo chí maa ña ñandihí.

Carta Cha Cu Uñi Tyaa Ra Apóstol Juan

Nu catyí ra Juan vatyí ra Gayo vaha cuahan ra chihin Nyoo

¹ Yuhu cha cuví ra chahnu vehe ñuhu, sacuhín carta ihya chí yoho, Gayo, vatyí yoho cuvún noo ra tahín cha cuñí xain chihin cha ñi ñi.

² Yañi, chicán tahvi chí Nyoo cha cuendon vatyí na coo vahun. Ta tari cuhva cuahan vahun chihin Nyoo, ta tyicuan caa tucu, na nasoco Nyoo chuun tacuhva cha ma tìn cuehe chuun.

³ Vatyí cusí xaan cuñí quivi quichí coyo suhva ra yañi yo. Ta canacatyí ra vatyí cha ndicha vaha iyón cuhva cha sañaha ra Cristo. Ta ican cuví cha ndicha vaha.

⁴ Ñahri ca cha sñi cuñí tari cha chité vatyí sehi sacuví vaha ñu cuhva catyí tuhun ndicha.

⁵ Cuñí xain chuun, yañi. Vaha xaan sacuvún, vatyí tyiñuhún chí ra yañi yo, ta cha vaha xaan ca cha sacuvún vatyí tyiñuhún chí ra yañi yo inga ñuu cha chaa vehun.

⁶ Chihin nuu tandihí ñu vehe ñuhu canacatyí ra vatyí cuñí xaun chí ra. Ta sãha tumañi ñi, yoho Gayo, tyinyee con chihin cha chiñuhú chí ra yañi yo vatyí sañihi ca ra cuhun coyo ra nu cuahan ra. Vatyí tyicuan caa tahán ñi Nyoo cha sacuvi yo.

⁷ Vatyí tyiño nuu Jesucristo cachicá noo ra. Ta ña cacuñí ra cha tyinyee ñáyivi cha ña ñohó nuu Nyoo chí ra.

⁸ Yucuan chaha vatyí maa yo tahán chí nyehe yo ñáá ndihí cha chiñuhú chí ra. Ta tyicuan caa ta cutahan yo chihin ra nu cahán ra tuhun ndicha.

Nu catyí ra Juan vatyí ra Diótfefes, ña vaha sacuví ra

⁹ Yuhu sacuhín noo carta chí ñu nyicú vehe ñuhu, soco ra Diótfefes sacuví ri maa ra nuu chí ra, ta ña tyasohó ra tuhun cahín.

¹⁰ Yucuan chaha tatu cuhin chiña, cusandai tyiño chihin ra cha cuenda tuhun cahán ra, vatyí cahán ña vaha ra siqui yo. Ta sñin ri tatu yóó hermano chaa, ña naquehén cuenda ra chí ra. Ta tatu ñu nyicú vehe ñuhu naquehén cuenda ñu chí ra, chasí ri ra, ta tavá ñehe ra chí ñu vehe ñuhu.

¹¹ Cuñí xain chuun, yoho yañi. Ma sacuvun cuhva ña vaha tari cha sacuví ra, soco sacuvun cha vaha. Vatyí ra sacuví cha vaha, ra cuenda Nyoo cuví ra, soco ra sacuví cha ña vaha, ña ñohó nuu ra chí Nyoo.

Nu catyí ra Juan vatyí vaha xaan cuhva chinó ñi ra Demetrio

¹² Tandihí ñu ta vaha cahán ñu siqui ra Demetrio. Ta vaha xaan quichahá ra tuhun Nyoo, ta suri ican cuan sañahá chí tyi ra vaha cuví ra. Ta sñin ri nyuhu tucu cuví ndi cha ndaa cha cuenda ra, ta nyoho chitó ndo vatyí tuhun ndicha cahán ndi.

Nu ndihí cahan ra Juan

¹³ Cuaha xaan tuhun tyaí cuhva sacote chuun, soco ña cuñí sacote chuun chihin tutu.

¹⁴ Soco nyatí cuhin nu nyaún cha numi ri, tyicuan ta ndatuhun vaha ca maa yo.

¹⁵ Na coo cha taxi ri añimon. Ra tahan yo cha iyó ityi tyehe saquichí xaan ra nocumi chuun. Ta sañun tumañi ñi cuhvon nocumi chí noo noo ra tahan yo cha iyó ityi chiña.

Carta Cha Sacuhun Ra Apóstol Judas Chi Ñáyivi Yihí Cuenda Nyoo

*Nu tyaq ra Judas noo tutu chi ñu nacana
Nyoo chi*

¹ Yuhu ra Judas cuví noo ra sacuví tyiño nuu ra Jesucristo. Ta yañi ra Jacobo cuví chii. Tyaí noo carta ihya chi ndo cha cuví ndo ñáyivi cha nacana Nyoo Sutu yo. Ta naquehén vaha ra chi ndo vatyi cuví ndo ñáyivi cuenda ra. Ta vityin cumí vaha ra chi ndo cha cuenda cha iin ri cuví ndo chihin ra Jesucristo.

² Nyoo na nyehe ndahvi ra chi ndo. Ta na cutuñi ca iñi ndo yoso caa cha cuñi ra chi yo. Ta na coo cuaha ca cha taxi ri cuñi añima ndo, saha ra.

*Nu cahān ra Judas siqui ñáyivi cha sañahá
cha ña ndicha
(2 Pedro 2.1-17)*

³ Cha naha xaan yihí iñi tyai noo carta chi nyoho yañi, vatyi cuñi cahin chihin siqui yoso caa sacacu Nyoo añima yo. Soco vityin cuñi chi cha tyai tutu ihya chi ndo vatyi saniñi chi ndo cuní iñi ndo chihin tandihí fuerza ndo ta cahun ndo ityi nuu ca chihin cha chinó iñi ndo tuhun vaha cha chaha Nyoo chi yo. Vatyi noo ri chaha chaha ra ta iin caña ri chaha ra tandihí cha tahán chi chi yo vatyi chinó iñi yo cha cuví yo ñu yihí cuenda ra.

⁴ Vatyi yihí ra quihví xehe ra nu nyicu ndo. Ta cuñi ra sandavi ñaha ra chi ndo. Catyi ra vatyi cha yaha saha Nyoo ticahnu iñi chi yo ta yucuan chaha cuví sacuvi yo yoso cuhva quichi cuví iñi coño ñuhu yo. Soco ra canyacuví tyicuan caa, cuví ra noo ra cucunaa. Vatyi tyicuan caa catyi Nyoo nya tyembu chahnu, vatyi canyacuví ra cha quñi caa cha ña tahán chi sacuvi ra. Vatyi ña caquichahá ra chi Nyoo ta ña chinó iñi ra cha Nyoo cuví noo ra cahnú ca, ra nyacá ñaha chi yo. Ta ni ri ra Jesucristo Sutu Mañi yo, ña cahnú xaan cuví ra, cacatyí ra.

⁵ Vasi cha chitó ndo cha sacuví Nyoo ta cha naha, soco cuñi sanicohín iñi ndo vatyi Sutu yo Nyoo tavā ra chi sutu chahnú yo ñu Israel ñuu Egipto, sacacu ra chi ñu ndaha ñáyivi ñuu Egipto cuan. Soco yaha cuan sanaq ra tandihí maa ñu cha ña chinó iñi chi ra.

⁶ Ta tyicuan caa tucu ángel. Ii ra. Ñahri cuatyi ra. Soco suhva ra caquita ra nu cuatyaq Nyoo chi ra cha cuenda cha ña quichahá ra chi ra. Yucuan chaha Nyoo cumí ra chi ángel cuan, nuñi ra chihin

cadena nu ñaa iñi. Nyatú ra cha sacutuñi Nyoo chi ra na chaa chi quivi cahnú.

⁷ Tyicuan caa tucu ñáyivi ñuu Sodoma ta ñuu Gomorra, ta ñu ñuu cuatyaq cha chiyó nicachico ñuu cuan. Sanaq Nyoo chi ñu cha cuenda cha quñi caa cha chinyacuví ñu. Ca chiyó ri maa ra chihin ñusihi. Ta ñusihi ca chiyó ri maa ñu chihin noo ra ta chihin inga ra. Ta cuaha ca cha quñi caa chinyacuví ñu vatyi rayi ca chiyó ra chihin tahan yi ra ñandihí. Soco cha cuenda cuan, nyehe ñu tindoho nu cayu ñu, quivi chahmi Nyoo ñuu ñu. Ta yucuan sañahá chi chi yo vatyi ñu sacuvi cha quñi caa, cucayu ñu chihin ñuhv cha ma ndahva ca maa.

⁸ Ta tyicuan caa tucu ra cacuñi sativi chi ndo. Vasi cha chitó vaha ra cha sacuví Nyoo ta ityi chata ca, soco maa ra chicá iñi ra vatyi tyaqui xaan cuacoo ra nu cuahan ca chi chihin cha nyacuví ra tyicuan caa. Soco ndahvi ra vatyi tari quivi cha tahán ra noo ñumahna tyaqui cuví cuan. Sativi ra coño ñuhu ra ta ña cuñi ra cha cunyaca ñaha Sutu Mañi yo chi ra. Ta cahán ña vaha ra siqui ra nahnú ca cha nuu maa ra, cuví ri siqui ángel, cuví ri siqui tatyí ña vaha, cuví ri siqui Nyoo.

⁹ Soco ángel Miguel cha cuví ra noo ra cahnú nuu Nyoo, ta ña caña iñi ra sacuví ra tyicuan caa. Vatyi quivi cañi tahan ra chihin ra ña vaha cha cuenda coño ñuhu ra Moisés, ña caña iñi ra cahān ña vaha ra siqui ra ña vaha. Noo ri cha catyi ra chi ra: “Maa Sutu Mañi yo na tachi tuñi ra chuun cuenda cha ña vaha cha nyacuvún”, catyi ángel Miguel cuan chi ra.

¹⁰ Soco ra cha sayangá chi ndo cuan, cahán cuehe ra vatyi ña chitó ra. Ta sacuví ra tari sacuví quiti. Vatyi quiti ña cutuñi iñi ti. Nyacuví ri maa ti cha cuñi coño ñuhu ti. Ta tyicuan caa tucu ra cuan. Chihin cha quñi caa nyacuví ra, sativi ra chi ra.

¹¹ ¡Ndahvi ra ndahvi cuan! Vatyi quehen ra cha caa ra Caín. Ta cha cuenda cha cuñi ra saha ganaa ra xuhun, quita caxiin ra tari quita caxiin ra Balaam. Ta cucunaa ra tari cuanaa ra Coré, vatyi chihí ra cuan cha cuenda cha nacahnú ra na cahán ra cuví nuu chi ra.

¹² Ra cha sayangá chi ndo chahá ra ticahan nuu chi ndo nu ndu iin ri ndo. Vatyi chachí ra ta chihí ra, chihin cha si cuñi ra. Ta ña cahán nuu ra cha ña sahá ra ñáyivi chi Nyoo. Ta noo ri maa ra sacuvahá ra chi ra. Cuví ra tari noo vico cha tyandahá tatyí chi, ta cuñi maa yo tyi cha coon savi, ta ña coón ra. Cuví ra tari noo yutun cha ña chaha chiti. Vatyi noo yutun cha ña chahá chiti cuví tun tari noo yutun chihí vasi nyitó tun. Ta siin maa cha cucuvi vaha tun vatyi cucahnaya ñáyivi chi tun. Tari cha uvi

chaha chihj tun cuví cuan. Ta tyicuan caa maa ra, tari cha uvi chaha chihj ra vatyi chitó ra tuhun vaha ta ña cuñí ra sacuvi.

¹³ Tari ndutya yuhu tyañuhu tatu cha nduxaan chi, iyo xaan nicuinanyaa chi. Soco iin yaha ri tyicuan ta ndoo maa ri maa tiñi ta mihin nu niyiti cuan. Tyicuan caa maa ra, sandoó ra cha quiñi caa añima ñáyivi. Ta cuví ra tari tiño andivi cha cuanaa. Soco cha nyaá maa cha cundoo ra nu ñaa iñi cahnu tyicuan ri maa.

¹⁴ Tuhun maa ra cuan cañan ra Enoc ta cha naha. Ra Enoc tata cu ucha ra Adán cuví ra. Ta cañan ra tuhun cha chaha maa Nyoo chi ra, ta catyi ra: “Nyeñi chi Sutu Mañi yo cha vachí ra chihin cuaha mil ángel cuenda ra

¹⁵ vatyi nyehe ra cha sacuvi tandihi ñáyivi. Ta tachi tuñi ra chi tandihi ñu quiñi iyó cha cuenda tandihi cha ña vaha cha chinyacuví ñu, ta cha cuenda tuhun quiñi caa cha cacahán ñu siqui ra”, catyi ra Enoc ta cha naha.

¹⁶ Ra cha sayangá chi ndo, ña ndoó ra vaha chihin cha chahá Nyoo chi ra. Cahán ra chi Nyoo ta chi ñáyivi ta iyó ra tari cuhva quichi cuví iñi coño ñuhu ra. Cahán ra chihin cha cahnu sahá ra chi ra. Tatu cañan vaha ra chihin noo ñáyivi soco cha cuenda cha cuñí ra cuvaha ra nuu ñu.

Nu chahá ra Judas tuhun chi ñu yihí cuenda Nyoo

¹⁷ Soco nyoho yañi, ma quichaha ndo chi ra cuan. Soco nichohon iñi ndo tuhun cha cañan ra apóstol cuenda Sutu Mañi yo Jesucristo.

¹⁸ Cacatyj ra chi ndo vatyi nu cuasandihí ca chi quivi ta cuaco ra cucuacu nyaa tuhun Nyoo. Ta coo ra yoso cuhva quichi cuví iñi maa ra chihin cha quiñi caa ra.

¹⁹ Ta ican ra ihya cacuví ra cuñi sacusiñ chi yo. Vatyi quichahá ra cuhva cuñi coño ñuhu ra ta ñahri Tatyj li Nyoo nyaá chihin ra.

²⁰ Soco nyoho yañi, cunñi ca iñi ndo chihin cha chinó iñi ndo chi ra Cristo. Ta cañan tahvi ndo chi ra chihin tunyee iñi Tatyj li maa ra.

²¹ Ta tyicuan ri ñihi cunnyañaa ndo chi Nyoo, ta coto ndo vatyi cuñi xaan ra chi ndo. Ta cuatu tuhva ndo quivi chaa yo nu coo yo ñayivi chaa cha ma naa ca maa. Vatyi ican cuví cha cuacuhva Sutu Mañi yo Jesucristo chi yo cha cuenda cha ndahvi cuñi ra nyehé ra chi yo.

²² Ta ndahvi cuñi nyehe ndo chi ñu cha ña niñi vaha iñi.

²³ Ta inga ñu, tyinyee ndo chi ñu tacuhva cacu ñu. Tari quivi cha tava ndo chi ñu nu cayú ñuhj. Ta chi inga ñu cundahvi cuñi ndo nyehe ndo chi ñu, soco saha ndo

cuenda chi ndo chihin cha quiñi caa cha sacuví ñu, coto sacuvi ndo tari sacuví ñu. Nyacua nya sahma ñihno ñu ta ña vaha cha cuenda cha sacuví ñu cha quiñi caa.

Nu ndihí cañan ra Judas ta sacahnu ra chi Nyoo

²⁴⁻²⁵ Noo ri Nyoo iyó, ta chihí tuñi xaan ra. Ta ican ra cuví ra cha sacacú chi yo. Ta iyó xaan tunyee iñi chi ra cha sahá cuenda ra chi yo ta sanduví ra chi yo cha ñahri cuatyj yo coo quivi cunyaca ra chi yo nu nyaá ra chihin cha cahnu cuví ra. Ta siñ xaan cucuvi chi yo.

Na coto yo ñana cha cahnu xaan ca cuví ra. Chi maa ra na sacahnu yo vatyi cahnu xaan ca maa ra. Ta iyó xaan ca tunyee iñi chi ra. Noo tuhun ri maa ra nyacá ñaha tandihi. Nyacá ñaha ra ta itiy chata ca, vityin. Ta tyicuan ri maa cunyaca ñaha ra. Ta na cuví chi tyicuan caa.

Cha Sañaha Ra Jesucristo Chi Ra Apóstol Juan

Cha nyehe ra Juan

¹ Ican ihya cuví noo cha catyí Nyoo chi ra Jesucristo vatyí na sacoto ra chi ra casacuví tyiño nuu ra. Sañaha ra ñáá ndihi cha cucuvi cha numi ri. Noo ángel tachí ra Jesucristo vatyí sañaha ra chi yuhu ra Juan.

² Ta cahín cha ndaa ta cha ndicha cuenda tandihi cha nyehí. Ta cuví cha ndaa cuenda tuhun Nyoo ta cuenda tandihi cha sacoto ra Jesucristo.

³ Sii xaan cuñí ñu sacuaaha tuhun cha nyaá nu tutu tuhun Nyoo ihya. Ta sii xaan cuñí ñu chiñí tuhun cha cahán chí ta quichahá ñu, vatyí tandihi tuhun cha nyaá nuu tutu Nyoo, cha nyañaa yatyin quivi cha cunyehe yo.

Nu sacuhun ra Juan tutu chi ndi ucha tahan vehe ñuhu

⁴ Yuhu ra Juan sacuhín tutu ihya chi ndi ucha vehe ñuhu ñuu cha nyicú ityi Asia. Nyoo ta ndi ucha tahan Tatyí Ii ra cha nyicú nuu ra nu nyaá ra nyacá ñaha ra nu tyayu chichi gloria, na nasoco ra chi ndo. Ta na coo cha taxi ri añima ndo sahá ra. Nyoo ican ra cuví ra iyó vityin, ta iyó maa ra quivi quichahá tandihi, ta ican ra cuquichi.

⁵ Ta naquehen tucu ndo cha vaha cuan sahá ra Jesucristo ñandihí. Vatyí ican ra cuví ra cha ndaa vaha ta ra ndicha. Ta cuví tucu ra noo ra cha nandoto cha xihna ri ta tyicuan ri maa cucoo ra. Ta iyó ityi chí ra ta nyacá ñaha ra chí ra cacuví rey cha iyó siqui ñuhu ñayivi ihya. Ican ra cuví ra cha cuñí xaan chí yo. Ta sandachí ra cuatyí yo chihin niñi ra.

⁶ Ta sacuví ra rey chí yo. Ta sacuví ra tata sutu chí yo tacuhva vatyí sacuví yo tyiño nuu Nyoo Sutu ra. ¡Na sacahnu yo chí ra. Ta na cunyaca ñaha ra tyicuan ri maa! Ta tyicuan caa na cuví.

⁷ ¡Nyehe ndo! ¡Cha vachi ra Cristo nu vico andivi! Tandihí ñáyivi cunyehe ñu chí ra. Nyacua nya ñu cha sañicuehe chí ra ta cunyehe ñu chí ra. Ta tandihí ñu cucuacu chaa ñu chihin cha yuhví ñu na nanyehe ñu chí ra inga chaha vatyí suri maa ra cuví. Cha ndicha, tyicuan caa cucuvi.

⁸ Catyí Nyoo:

—Yuhu cuví ra xihna cuiuri, ta yuhu cuví ra cundoo nu ndihí tuhun —catyí Sutu yo Nyoo, ra iyó tandihí tunyee iñi chí. Ican ra cuví ra iyó vityin. Ta iyó maa ra nu quichahá tandihí, ta ican ra cuquichi.

Noo cuhva tyaqui cha sañaha Nyoo chí ra Juan cuenda ra Cristo

⁹ Yuhu ra Juan cuví yañi nyoho. Ta ñin ri nyehé yo tindoho. Ta ñin ri nyacá ñaha Nyoo chí yo. Ta ñin ri cunyee xaan yo ñáá ndihí cha cuví chí yo vatyí tyinyee ra Jesucristo chí yo. Ñoho yuhu vehe caa noo ñuhú cha nañi Patmos cha nyaá mahñu tyañuhu. Ñohi vehe caa cha cuenda vatyí cahín tuhun Nyoo cha quichí sañaha ra Jesucristo.

¹⁰ Ta cuví chí noo quivi cha sacahnú yo chí Sutu mañi yo. Ta ñihi xaan chinyaá Tatyí Ii Nyoo chihin. Ta chiñi noo ndusu ñihi xaan ityi chate, tari noo ndusu cha ñihi xaan tari ndusu trompeta.

¹¹ Ta catyí chí chii tyehe caa:

—Yuhu cuví ra xihna cuiuri, ta yuhu cundoi nu ndihí tuhun. Tyaá nuu noo libru tuhun cha nyehun, yoho Juan. Ta sacuhun chí ndi ucha vehe ñuhu cha nyicú ityi Asia. Sacuhun chí ñu nyicú vehe ñuhu ñuu Éfeso, chí ñu vehe ñuhu ñuu Esmirna, chí ñu vehe ñuhu ñuu Pérgamo, ta chí ñu vehe ñuhu ñuu Tiátira, ta chí ñu vehe ñuhu ñuu Sardis, ta chí ñu vehe ñuhu ñuu Filadelfia, ta chí ñu vehe ñuhu ñuu Laodicea —catyí ndusu cuan.

¹² Tyicuan ta nanyocave vatyí cuñi nyehí yó chí ndusu cha cahán chihin cuan. Ta nanyehí ucha tahan cañileru xuhun cuaan.

¹³ Ta mahñu ucha tahan cañileru cuan, nyehí chí noo ra cha caá tari caá noo rayi ñuhu ñayivi ihya. Ñihno ra noo sahna cañi nya nu chaha ra. Ta yihí ra noo sinchu xuhun cuaan, ta nya nu nyaá pechu ra chitahan sinchu cuan.

¹⁴ Ta cuichin ixi xiñi ra, tari ixi mbee cuichin, tari cha cuichin catyí. Ta tari cha cayú ñuhú chiti nuu ra.

¹⁵ Ta xiño chaha ra tari xiño noo caa cha nañi bronce cha tuhva nducuaaha nu cayú ñuhú chichi noo horno. Ta ñihi xaan ndusu ra tari ndusu cha cuaha vavaha yuvi nahnu.

¹⁶ Ta yihí ndaha ra ucha tahan tiñoo andivi chiyo vaha ra. Ta tari caa noo mityi cha xaan nanduvi chiyo yuhu, (tyicuan caa tuhun cahán ra cha quitá yuhu ra). Ta tari caá cha ñihi xaan nyehé ñanyii cha xiño vavaha, tyicuan caá nuu ra.

¹⁷ Cuhva cha nanyehí chí ra, nduve chaha ra tari maa cha chihí. Soco maa ra tyiso ra ndaha chiyo vaha ra siqui, ta catyí ra chii:

—Ma yuhvun. Yuhu cuví ra xihna cuiuri, ta yuhu cundoi nu ndihí tuhun.

¹⁸ ¡Quen cuví ra cha nyitó. Ta vasi chíhi soco vityin cuacoi tyicuan ri maa. Ta iyó ityi chíhi cha catyí ama tahan chí tuhun chíhi chí noo noo ñáyivi, ta iyó ityi chíhi cha catyí tatu huhun ñu anyaya.

¹⁹ Tyaá nu libru tandihí cha nyehún, cha iyó vityin, ta cha cucoo nu cuahan ca chí.

²⁰ Ican ihya cuví tuhun xehe cuenda ndi ucha tiñoo andívi cha nyehún yihí ndaha chiyo vahi, ta cha cuenda ndi ucha cañileru xuhun cuaan cuan: Ndi ucha tiñoo andívi cuan cuñí chi catyi: ra cha cahán tuhín ucha tahan vehe ñuhu cuan. Ta ndi ucha cañileru cuan cuñí chi catyi ndi ucha vehe ñuhu cuan.

2

Tuhun cha sacuhun ra chi ñu nyicú vehe ñuhu ñuu Éfeso

¹ Sacuhun tutu chi ra cahán tuhín chihin ñu nyicú vehe ñuhu cha nyaá ñuu Éfeso. Ta catyun chi ra tyehe caa: “Tyehe caa catyi ra cha yihí ndaha ucha tiñoo chihin ndaha chiyo vaha ra. Ta chicá noo ra mahñu ndi ucha cañileru xuhun cuaan:

² Yuhu chité tandihí cha sacuví ndo. Chité vatyi ñihi xaan tyiño sacuví ndo. Ta cunyeé xaan iñi ndo. Ta chité vatyi ña cunyeé iñi ndo nyehé ndo chi ñu quiñi iyó. Ta chité vatyi tuhva ndo nducu nyehé ndo chi ra cha catyi vatyi tyiño Nyoo chica noo ra soco ña ndícha ra.

³ Cunyeé xaan iñi ndo. Ta nyehé xaan ndo tindoho ta cha sahá tyiño xaan ndo cha cuende chihin cha ña ndu uvi iñi ndo.

⁴ Soco iyó noo cha caá ndo nui. Vatyi ña cuñí vaha ca ndo chii tari quivi xihna ri.

⁵ Yucuan chaha ñichon iñi ndo nya maa maa cuví nu ña vaha sacuví ndo. Ta ñasama ndo cuhva iyó ndo. Ta sacuvi ndo tari cuhva chiyo ndo quivi natiñ cuenda ndo notuhun Nyoo. Tatu ma nasama ndo cuhva iyó ndo, numi ri cuhin nu nyaá ndo, ta tinyai cañileru ndo nu nyaá chí. Soco tatu ndu uvi iñi ndo cuatyí ndo, ma tinyai.

⁶ Soco iyó tucu cha vaha nyacuví ndo. Vatyi ña cuñí nyehé ndo cha quiñi caa cha sacuví ñu yihí cuenda ra Nicolás. Tyicuan tucu yuhu ña cuñí nyehí yucuan.

⁷ Ta nyoho cha cutuñi iñi ndo, tyasoho ndo ñáá cha catyi Tatyí Ii Nyoo chí nyoho ñu nyicú vehe ñuhu. Catyi ra tyehe caa: Tatu cuví chasaha ndo chi ra ña vaha, cuhve cha cachi ndo chiti yutun cha chahá cha conyito añima ndo. Ta yutun cuan nanyaá tun nya nu iyó Nyoo andívi, ta cuñihí ndo tandihí cha vaha cha iyó yucuan.”

Tuhun cha sacuhun ra Jesucristo chí ñáyivi nyicú vehe ñuhu ñuu Esmirna

⁸ Sacuhun tucu tutu chi ra cahán tuhín chihin ñu nyicú vehe ñuhu cha nyaá ñuu Esmirna, ta catyun chi ra tyehe caa: “Tyehe caa catyi ra cuví cha xihna cui, ra cundoo nu ndihí tuhun, ra cha chihí ta nandoto:

⁹ Yuhu chité tandihí cha sacuví ndo. Ta chité tindoho cha nyehé xaan ndo. Ta chité cha ndahví ndo. Soco chihin tuhun Nyoo,

tyayíi ndo. Ta chité yoso caa ñu cha catyi vatyi ñu Israel cuví ñu, ta cahán ña vaha ñu siqui ndo. Ta ni ñima ñu Israel cuví ñu vatyi noo ityi ñu yihí cuenda ra ña vaha, ra nañi Satanás, cuví ñu.

¹⁰ Soco ma yuhvi ndo cha cunyehe ndo tindoho. Vatyi ra ña vaha cutyihí ra vehe caa chí suhva nyoho, vatyi cunducu nyehé ra chí ndo tatu cusaña ndo chí Nyoo. Ta uchi quivi cunyehe ndo tindoho. Soco cunyicon vaha ndo chí Nyoo nyacua nya quivi cuví ndo. Ta yuhu cuhve ñayivi coo ndo chihin Nyoo.

¹¹ Ta nyoho cha cutuñi iñi ndo tyasoho ndo ñáá cha catyi Tatyí Ii Nyoo chí nyoho ñu nyicú vehe ñuhu. Catyi ra tyehe caa: tatu cuví chasaha ndo chí ra ña vaha, ña tahán chí cuhun ndo anyaya, nu cutachi tuñi Nyoo chí añima ña vaha.”

Tuhun cha sacuhun ra Jesucristo chí ñu nyicú vehe ñuhu ñuu Pérgamo

¹² Sacuhun tucu tutu chi ra cahán tuhín chihin ñu nyicú vehe ñuhu ñuu Pérgamo. Ta catyun chi ra tyehe caa: “Tyehe caa catyi ra cha nyisó mityi cha xaan ndanduvi chiyo yuhu:

¹³ Yuhu chité tandihí cha sacuví ndo. Ta chité vatyi iyó ndo nu nyacá ñaha cuihna, ra nañi Satanás. Soco tyicuan ri chinó iñi ndo chii. Ta vasi nu canyicú ndo chiña chahñi ñu chí ra Antipas, ra cha cuví noo cha ndoo cuende, vatyi chiña chicá noo ra cha nañi Satanás cuan. Soco ni ri maa chahñi ñu chí ra, nyoho ña sandihí maa ndo tuhun cha chinó iñi ndo chí.

¹⁴ Soco catyiví suhva cha caá ndo nui: Vatyi nu nyicú ndo nya Pérgamo chiña, yihí ra cha ña cacuñi ra saña ra cuhva cha sacuví ra Balaam. Ta maa ra Balaam tyiyuhú ra chí ra Balac, na sacachi ra chí ñu Israel nyayu cha chiyo nu sacahnú chí xitohyo. Tyiyuhú ra chí ra nacatyí ra chí ñu vatyi ñahri caa cha coo ñu chihin tahan ñu vasi ñima yí ñu cuví, o vasi ñima ñasihí ra cuví.

¹⁵ Ta suri iyó suhva ñáyivi mahñu ndo cha ña cacuñi ñu saña ñu cuhva sañahá ra cuenda ra Nicolás. Ta yuhu ña cuñí nyehi cuhva sañahá ra cuan.

¹⁶ Yucuan chaha numi ri ñasama ndo cuhva iyó ndo. Vatyi tatu ma nasama ndo cuhva iyó ndo, cuquichi siqui ndo cha numi ri ta cucañi tahin chihin ñu cuan chihin cha tari mityi cha quitá yuhi.

¹⁷ Ta nyoho cha cutuñi iñi ndo, tyasoho ndo ñáá cha catyi Tatyí Ii Nyoo chí nyoho ñu nyicú vehe ñuhu: tatu cuví chasaha ndo chí ra ña vaha, cucuhve cha cachi ndo noo pan maná cha ñohó xehe. Ta cucuhve noo yuu cuichin chí ndo. Ta nu yuu cuan cucunyyaa noo sivi chaa cha yori chitó. Ta

noo tuhun ri ñu cuquehen cuenda cuan cucoto.”

Tuhun cha sacuhun ra Jesucristo chi ñu nyicú vehe ñuhu ñuu Tiatira

¹⁸ Sacuhun tucu tutu chi ra cahán tuhín chihin ñu nyicú vehe ñuhu cha nyaá Tiatira. Ta catyun chi ra tyehe caa: “Tyehe caa catyí Sehe Nyoo, ra cha caá chiti nuu tari noo cha cayú ñuhu. Ta tari caá noo caa finu cha nañi bronce cha xiño xaan, tyicuan caa chaha ra:

¹⁹ Yuhu chité tandihí cha sacuví ndo. Ta chité yoso cuhva cha cuñi ndo chi ñáyivi. Ta chité cuhva cha chinó xaan iñi ndo chii. Ta tyinyeé ndo chi tahan ndo. Ta cunyeé xaan iñi ndo. Ta chité vatyi cuaha ca cha vaha sacuví ndo vityin ta ñuma ca ta nu quichaha.

²⁰ Soco iyó noo cha caá ndo: Vatyi chahá ndo ityi chí ñaha cha nañi Jezabel na sañaha ña chí ndo. Catyí ña vatyi cuenda Nyoo cahán ña. Soco chihin tuhun cha sañahá ña, sandaví ñaha ña chí ñu sacuví tyiño nui. Vatyi sañahá ña cha coo ñu chihin inga rayii o ñusihi ta ñuma yii ñu o ñasihi ra cuví. Ta sañahá ña cha cachi ñu nyayu cha chiyo nu sacahnú ñu chí xitohyo.

²¹ Yuhu cha nyatu xain cha nasama ña cuhva iyó ña, soco ña cuñi ña nasama ña. Vatyi ta sandoo ca ña cha iyó ña chihin rayii ta ñuma yii ña cuví.

²² Ta vityin cua quehen noo cuehe chí ña. Ta cua cuhvi ña. Ta ma cuví nducuita ña. Ta ñu sacuví cha quiñi caa chihin ña, tatu ma ndu uvi iñi ñu, cucuhve noo tindoho nyehe ñu.

²³ Ta cucahñi chí sehe ña. Ta tyicuan caa, coto tandihí ñu nyicú vehe ñuhu, vatyi yuhu chité tandihí cha chicá xiñi ñu, ta tandihí cha caá añima ñu. Ta chí tahan tahan nyoho cucuhve cha tahán chí chí ndo yoso cuhva cha sacuví ndo.

²⁴ Soco chí tandihí ca nyoho ñuu Tiatira, cha ña quehen ndo cuhva cha sañahá ña, ni ña sacuví ndo cha catyí maa ñu tuhun nahnu cuenda ra ña vaha, ña tyai inga tuhun cha yii siqui ndo.

²⁵ Soco ma saña ndo cuhva cha vaha nyacuví ndo nyacua nya quichi.

²⁶ Ta nyoho tatu cuví chasaha ndo chí ra ña vaha, ta sacuví ndo cuhva cuñi nyacua nya nu ndihí tuhun, cucuhve ityi chí ndo cha cunyaca ñaha ndo chí ñu ñuhu ñáyivi.

²⁷ Tari chahá Suti ityi chíi cha cunyaca ñahi, tyicuan caa cucunyaca ñaha ndo. Tari cha chihin noo yutun caa cutachi tuñi ndo chí ñu. Tari tahvi cuatyí minoo quisí ñuhú, tyicuan caa cusacuví ndo chihin ñu.

²⁸ Ta kuhve tiño cahnu andivi cunyaa chihin ndo. Ta ican yuhu cuví cuan.

²⁹ Ta nyoho cha cutuñi iñi ndo tyasoho ndo ñáá cha catyí Tatyí Ii Nyoo chí nyoho, ñu nyicú vehe ñuhu.”

3

Tuhun cha sacuhun ra Jesucristo chi ñu nyicú vehe ñuhu ñuu Sardis

¹ Sacuhun tucu tutu chí ra cahán tuhín chihin ñu nyicú vehe ñuhu ñuu Sardis. Ta catyun chí ra tyehe caa: “Tyehe caa catyí ra cha yihí ndaha ndi ucha Tatyí Ii Nyoo ta ndi ucha tiño andivi: Yuhu chité tandihí cha sacuví ndo. Ta vasi catyí ñáyivi tyi nyitó ndo soco cha cuenda chí yuhu, chihí ndo.

² Saha cumi vaha ndo chiin ri ca cha vaha cha iyó chí ndo. Vatyi cha cuñi ndihí tuhun nu nyicú ndo. Vatyi nyehí vatyi cha sacuví ndo, ña vaha maa nuu Nyoo.

³ Nícohon iñi ndo tuhun vaha cha cutuhva ndo. Cunyicon ndo cuhva cuan, ta nasama ndo cuhva iyó ndo. Vatyi tatu ma naquehen vaha ndo cha vaha, sana iñi ndo ta cuquichi siqui ndo, tari tuhva ra suhu quichi.

⁴ Soco iyó suhva nyoho ñu Sardis chiña cha ña sacuví ndo cha quiñi caá. Ña sacanyahyu ndo sahma ndo cuví cuan. Ta maa ndo cucuihno ndo sahma cuichin chihin. Ta cucaca noo ndo chihin, vatyi tyicuan caa tahán chí chí ndo.

⁵ Ta nyoho tatu cuví chasaha ndo chí ra ña vaha, cucuihno ndo sahma cuichin chihin. Ta ma sanai sívi ndo nu libru ñu cuaconyito chihin Nyoo. Ta cucacoto nui chí ndo, chihin nuu Suti, ta chihin nuu ángel.

⁶ Ta nyoho cha cutuñi iñi ndo, tyasoho ndo ñáá cha catyí Tatyí Ii Nyoo chí nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu Filadelfia

⁷ Sacuhun tucu tutu chí ra cahán tuhín chihin ñu nyicú vehe ñuhu ñuu Filadelfia. Ta catyun chí ra tyehe caa: “Tyehe caa catyí ra ii, ra ñahri cuatyí, ra cha ndicha vaha, ra cha ndaha ndaha ticu rey David, ra cha nuña yuvehe ta ni noo ñu ta ma cuví nacasi ñu. Ta tatu nacasi ra, ni noo ñu ta ma cuví nuña ñu. Tyehe caa catyí ra:

⁸ Yuhu chité tandihí cha sacuví ndo. Ta nuu ndo nuñe noo yuvehe. Ta yori cuví nacasi, (vatyi chahí cha cahán ndo tuhun Nyoo chihin ñáyivi, ta yori cuví casi). Ta vasi chiin ri fuerza ndo, soco quichahá ndo tuhun cahán, ta ña catyí ndo vatyi ña ñohó nuu ndo chíi.

⁹ Ta ñu cuenda ra ña vaha, ñu cuendu, ñu catyí vatyi ñu Israel cuví ñu, ta ñuma, cusacuiñi chíi chí ñu nuu ndo, tacuhva coto ñu tyi yuhu cuñi chí ndo.

¹⁰ Ta sacuví ndo cha catyí, vatyí cunyee iñi ndo. Ta yucuan cuenda cusaha cuende chi ndo chihin tindoho cahnu cha cusaquichi siqui tandihí ñáyivi, vatyí cunducu cote chihin tandihí ñu iyó siqui ñuhu ñáyivi tatu cuñí ñu chii.

¹¹ Numi ri cuquichi. Saha vaha ndo cuenda cuhva iyó ndo, coto yóo cha tinyaa premio cha cuñihi ndo.

¹² Nyoho tatu cuví chasaha ndo chi ra ña vaha, cahnu ca tyiño cucuvi ndo nuu Nyoi. Ta ma canyaha ca ndo nu nyaá Nyoo. Ta cutyai sivi Nyoi chi ndo, ta sivi ñuu Nyoi, ñuu Jerusalén chaa cha cusaquichi Nyoi nya andivi, ta suri cutyaa tiqui sivi chai chi ndo ñandihí.

¹³ Ta nyoho cha tutuñi iñi ndo, tyasoho ndo ñáá cha catyí Tatyí Ii Nyoo chí nyoho ñu nyicú vehe ñuhu.”

Tuhun cha sacuhun ra Jesucristo chí ñu nyicú vehe ñuhu ñuu Laodicea

¹⁴ Sacuhun tucu tutu chi ra cahán tuhin chihin ñu nyicú vehe ñuhu ñuu Laodicea. Ta caryun chi ra tyehe caa: “Tyehe caa catyí ra cha ndicha vaha, ra cuví cha ndaa vaha cha cahán cha ndicha, ra cha savaha tandihí cha iyó chihin Nyoo.

¹⁵ Yuhu chité tandihí cha sacuví ndo. Ta chité vatyí ni ña cuñí vaha ndo chii. Ta ni ña cuñí tucu ndo saña ndihí ndo chii. Vaha tyehe ta saña ndihí ndo chii, o sañihi ndo quichaha ndo tuhun cahin, vaha.

¹⁶ Soco vatyí chiin ri cuñí ndo chii, ta ni ña saña ndihí ndo chii, ta ni ña cuñí ndo sacuví ndo tuhun cahin, yucuan chaha cusanaa ndihí iñi tuhun ndo.

¹⁷ Vatyí nyoho catyí ndo tyehe caa: Yuhu tyayí, vaha iyé, ta ñahri ca maa cha chiñuhú chii, catyí ndo. Ta ña chító ndo vatyí cuví ndo noo ra ña sii cuñí, noo ra ñahri iyó chí, noo ra ndahvi, noo ra cuaa, noo ra vityiyaa cuví ndo.

¹⁸ Yucuan chaha chahí tuhun chí ndo vatyí chí mai sata ndo xuhun cuaan vaha cha yaha nu ñuhu ta ña cayú, tacuhva na cutyayí ndo. Ta chí mai sata ndo sahma cuichin vatyí cuihno ndo, tacuhva cha ma cucahan nuu ndo vatyí vityiyaa ndo. Ta tyjhi ndo colirio chiti nuu ndo tacuhva na nanyehe ndo.

¹⁹ Yuhu chahí tuhun chí ñu cha cuñí xain chí. Ta tachí tuñi chí ñu ñandihí. Yucuan chaha catyí chí ndo, ñasama ndo cuhva iyó ndo ta sacuví ndo cha vaha.

²⁰ Yuhu nanyaí yuvehe añima ñáyivi ta sacachén. Tatu nya noo ñu chifí ñu ndusi, ta nuña ñu yuvehe, yuhu quihvi ta cuxiñi chihin ñu. Ta maa ñu cuxiñi ñu chihin mai.

²¹ Cucuhve cha cunyaa ndo chihin nu nyacá ñahi tatu cuví chasaha ndo chí ra ña

vaha. Tari yuhu cuví chasahi chí ra, ta vityin nyaí chihin Suti nu nyacá ñaha ra.

²² Ta nyoho cha cuví cutuñi iñi ndo, tyasoho ndo cha catyí Tatyí Ii Nyoo chí nyoho ñu nyicú vehe ñuhu” —catyí ra Jesucristo.

4

Noo cuhva cha sacahnú ñu chí Nyoo nya gloria

¹ Cha yaha tuhun cuan, ta nyehi noo yuvehe tacoho nya andivi. Ta noo ndusu cha tari caa ndusu trompeta chiñi cha cahán chihin cha xihna ri ta catyí chí chii:

—Ndáa ihya ta cusañahi chuun cha cuacuví nu cuahan ca chí —catyí ndusu cuan chí.

² Ta caa cuhva ri cuan ta tuví iñi vatyí ñihi vavaha nyaá Tatyí Ii Nyoo chihin. Ta nanyehi noo tyayu nanyaá nya andivi. Ta nyaá noo ra nuu tyayu cuan.

³ Ta ra nyaá cuan, xiño nuu ra tari xiño noo yuu vaha cha ñañi jaspe ta cornalina. Ta nicachico yuhu tyayu cuan nyaá noo coo yahnyí, ta xiño ti tari yuu cha ñañi esmeralda.

⁴ Ta nicachico tyayu cuan nyehi oco cumi ca tahan tyayu. Ta nyicú oco cumi tahan ra cha vaha chahnu. Cañihno ra sahma cuichin. Ta yihí corona xuhun cuaan xiñi ra.

⁵ Ta nu nanyaá tyayu cha nyaá mahñu cuan, yucuan quitá minoo tacha. Ta vaa ri ca maa cuví. Ta ñihi xaan cahán savi. Ityi nuu tyayu cuan cayú ucha tahan ñuhu. Ta ucha tahan Tatyí Ii Nyoo cuví cuan.

⁶ Ta ityi nuu tyayu cuan iyó tucu noo cha tari caa tyañuhu, xiño xaan tari ino.

Nicachico yuhu tyayu cuan ta mahñu tyayu cuan, tayucú cumi tahan cha nyitó cha tari caa quiti ta tari caa ñáyivi caa. Ta cuaha xaan chiti nuu cuan nyicú, tari ityi nuu ta tari ityi chata.

⁷ Cha xihna ri cha nyitó ihya, tari caá noo ndicaha caá. Ta cha cu uví tari caá noo sindiqui caá. Ta cha cu uñi, tari caá nuu rayí caá nuu. Ta cha cucumi tari caá noo tasu cha cuahan ndava, tyicuan caá.

⁸ Ta ndi cumi tahan cha nyitó ihya, tahan tahan chí ta nyaá iñu tahan ndichin chí. Ta nicahnu maa chí nyaá chiti nuu chí, tari ityi chata chí ta tari ityi chichi ndichin chí. Ta ndiyaca ta ñiyaca ta ña chicuita chí catyí chí tyehe caa:

Ra ii xaan cuvún, ra ndii xaan cuvún, ra ñahri cuatyí cuvún,

Sutu Mañi yuhu, Nyoo, iyó tandihí tunyee iñi chuun.

Ra cha iyó nu quichaha tandihí cuvún, Ta ra iyó vityin. Ta ra cha nyaá cha cuquichi.

⁹ Ta cachahá ndi cumi tahan cha nyitó cuan gloria chi Nyoo. Ta sacahnú chi chi ra, ta canacuhvá chi tyahvi nyoo chi ra nyaá nu tyayu cahnu cuan, ra cha iyó tandihi tyembu. Ta tahan ri chaha cha casacuvj chi tyicuan caa,

¹⁰ ta ndi oco cumi ra cha vaha chahnu cuan chicuifñi chitj ra ta casacahnu ra chi ra iyó tandihi tyembu. Ta catyihj ra corona ra nu tyayu cahnu cuan. Ta cacatyí ra tyehe caa:

¹¹ Sutu Mañi nyuhu, Nyoo cuvún chi ndi. Chi yoho tahán chi cha cuhva ndi gloria, ta sacahnú ndi chuun.

Ta tahán chi cha cunyaca ñahun.

Vatyí maun savahá tandihi cha iyó.

Ta cha cuenda cha iyó iñi maun ta chicoo tandihi, cacatyí ra.

5

Nu nyehe ra Juan noo libru ta noo Mbee Luhlu cha cuví ra Jesucristo

¹ Tyicuan ta chiyo vaha ra cha nyaá nu tyayu cahnu cuan, nyehj yihí ndaha ra noo libru tari caá noo tutu cha natuvj yo. Ta nyaá letra ityi nuu ta ityi chata. Ta nyasí chi chihin ucha tahan sellu.

² Ta nyehj noo ángel cha nyee xaan. Ta chaa xaan cahán ra ta ndacá tuhun ra: —¿Yóo ra tahán chi nuña libru ihya ta sacanyaha ra sellu ihya? —catyí ra.

³ Soco ni ityi andívi ta ni ityi nu ñuhu ñayivj, ta ni ityi chichi ñuhú, ta yori maa cha cuví nuña libru cuan. Ta ni cha nyehe ñu nuu, ta ma cuví.

⁴ Ta yuhu chacu chaa xain, vatyí yori maa quita cha cuví nuña libru cuan. Yori maa cuví sacuhva, ta yori cuví nyehe nuu chi.

⁵ Tyicuan ta noo ra cha vaha chahnu cuan catyí ra chii:

—Ma cuacu con. Vatyí ra cuví ndicaha o cuñi chi catyí, ra nyacá ñaha, ra vachi tata ra Judá, ra vachi tata rey David, ican ra cuvj chasaha ra tacuhva cuví nuña ra nu libru cuan ta cahnya ra ndi ucha sellu cuan —catyí ra.

⁶ Tyicuan ta mahñu tyayu cuan ta mahñu ndi cumi cha nyitó cuan, ta mahñu ra cha vaha chahnu cuan, nyehj chi noo Mbee Luhlu. Nanyaá ti ta caa ti cha chahñj ñayivj chi ti. Ucha tahan ndiqui ti ta ucha tahan chiti nuu ti nyaá. Ta chiti nuu cuan ican cuví ndi ucha tahan Tatyí Ii Nyoo cha tachj ra nicacahnu siqui ñuhu ñayivj.

⁷ Ta ra cuví Mbee Luhlu cuan chahan ra ta quehen ra libru cuan cha yihí ndaha chiyo vaha ra nyaá nu tyayu cuan.

⁸ Cuhva cha quehen ra libru cuan, ndi cumi cha nyitó cuan ta ndi oco cumi ra cha vaha chahnu cuan cachicuifñi chiti ra nuu

ra cuví Mbee Luhlu cuan. Ta tahan tahan ra cha vaha chahnu cuan nyisó ra arpa, noo cha tari caá guitarra caá. Ta canyisó tucu ra copa xuhun cuaan tyitu yihí cutu. Ta tucu cuan cuví chi tandihi cha chican tahvi ñu cuenda Nyoo.

⁹ Ta chachitá ra noo yaa chaa, ta catyí ra tyehe caa:

Yoho cuví ra tahán chi cha quehun libru ihya, ta cahnyon ndi ucha sellu cha nyaá nu chi.

Vatyí chihun saha ñáyivi. Ta chihin niñun saton chi ndi vatyí coo vaha ndi chihin Nyoo.

Ta cuví ndi ñáyivi ñuu nyihí ta ñuu nahnu nicacahnu ñuhu ñayivj, ñáyivi siin siin sahan cahán, ñáyivi siin siin tata.

¹⁰ Chahun ityi chi ndi vatyí cuví ndi rey ta cuví ndi sutu cha cuenda Sutu yo Nyoo.

Ta cucunyaca ñaha ndi chi ñáyivi iyó siqui ñuhu ñayivj, cacatyí ra, chitá ra.

¹¹ Yaha cuan ta nanyehj, ta chiñj ndusu cha cahán cuaha xaan ángel, tayucú ra nicachico yuhu tyayu cahnu cuan, ta nu nyicú cumi tahan cha nyitó cuan, ta nu nyicú ra cha vaha chahnu cuan. Ta cuenda millón ángel nyicú cuan, nyehj.

¹² Ta chihin cha ñihi cahan ángel cuan, ta cacatyí ra:

Ra cuví Mbee Luhlu cha chahñj ñáyivi, tahán chi cha cunyaca ñaha ra, ta naquehen cuenda ra cha tyayii.

Tahán chi naquehen cuenda ra cha chiñi tuñi.

Tahán chi cha naquehen cuenda ra tandihi tunyee iñi.

Tahán tucu chi cha cuhva yo gloria chi ra, ta sacahnu yo chi ra.

Ta cahnu xaan ca ra cuví maa ra, cacatyí ángel cuan.

¹³ Ta chiñj tiqui cha cahán tandihi cha savahá Nyoo, tandihi cha iyó andívi, ta siqui ñuhu ñayivj, tandihi cha iyó chichi ñuhú, ta chichi tyañuhu, tandihi cha savaha Nyoo catyí chi tyehe caa:

Cahnu xaan ca cuví ra cha nyaá nu tyayu.

Cahnu xaan ca cuví ra cuví Mbee Luhlu.

Ta nacuhva yo gloria chi ra.

Ta na cunyaca ñaha ra tandihi maa tyembu, catyí tandihi cha savahá Nyoo.

¹⁴ Ta ndi cumi cha nyitó cuan catyí chi:

—jTyicuan caa na cuví! —catyí chi.

Ta ndi oco cumi ra cha vaha chahnu cuan, cachicuifñi chiti ra ta casacahnu ra chi ra iyó tandihi tyembu.

6

Nu chahnyá ra Jesucristo ndi ucha tahan sellu

¹ Tyicuan ta nyehj nu chahnya ra cuví Mbee Luhlu cuan sellu cha xihna ri chichi cha ndi ucha tahan cuan. Ta chiñi cahán noo cha nyitó cha cumi tahan cuan, chihin noo ndusu cha tari caá cha cahán savi ta catyí chi:

—jÑaha, ta nyehun! —catyí chi chii.

² Tyicuan ta nanyehj ta nyehj noo caballu cuichin, ta ra yosó chi ti cuan ndaha ra noo arco. Ta ñihj ra noo corona quihj xiñi ra vatyí saha ganaa ra, ta cuasaha ganaa ca ra.

³ Ta cuhva cha chahnya ra cuví Mbee Luhlu cuan sellu cu uvi, chiñi cha catyí cha nyitó cu uvi cuan tyehe caa:

—jÑaha ta nyehun! —catyí cuan chii.

⁴ Ta quitá inga caballu, tyacu cuaha. Ta ra cha yosó chi ti chicoo ityi chi ra vatyí tinyaa ra cha taxi ri iyó ñayivi, tacuhva cahñi ñu chi tahan ñu. Ta ñihj ra noo mityi cahnu quindaha ra.

⁵ Ta cuhva cha chahnya ra cuví Mbee Luhlu cuan sellu cu uñi, ta chiñi cha catyí cha nyitó cu uñi cuan tyehe caa:

—jÑaha ta nyehun! —catyí cuan chii.

Ta nanyehj, ta nyehj noo caballu toon. Ta ra yosó chi ti, yihí ndaha ra noo ticatya.

⁶ Ta chiñi noo ndusu mahñu cumi tahan cha nyitó cuan, ta catyí cuan:

—Tari cuhva xuhun yahvi ñu cha noo quivi, yucuan cuhva yahvi noo litru nuñi. Tyicuan caa tucu uñi litru cebada. Ta ma sativun acetye ta vinu —catyí ndusu cuan.

⁷ Ta cuhva cha chahnya ra cuví Mbee Luhlu cuan sellu cu cumi, chiñi cha cahán cha nyitó cucumi cuan, ta catyí chi, tyehe caa:

—jÑaha ta nyehun! —catyí chi.

⁸ Ta nanyehj ta nyehj noo caballu cuaan. Ta ra yosó chi ti nañi ra Tuhun Chihí. Ta chata ra vachi inga ra cha nañi Ra Nyacá Ñaha Nu Nyicú Ndiyi. Ta cañihj ra tunyee iñi cha cahñi ra chi cuaha xaan ñayivi iyó siqui ñuhu ñayivi. Vatyí chichi cha sava ñayivi iyó siqui ñuhu ñayivi, cucahñi ra sava ñu. Ta cucahñi ra chi ñu chihin cha sanacanda ra cuatyí, ta chihin tama, ta chihin cuehe, ta chihin quitu xaan iyó siqui ñuhu ñayivi.

⁹ Cuhva cha chahnya ra cuví Mbee Luhlu cuan sellu cu ohon, nyehj xiu arta. Yucuan ñohó añima ñu cha chihj cha cuenda tuhun Nyoo tyi sacoto ñu tuhun ra chi ñayivi.

¹⁰ Ta tyehe caa catyí ñu chihin noo ndusu chaa xaan:

—Sutu Mañi yuhu, ra ii cuvún. Ta sacuvún cha catyún. ¿Ama cutachi tuñun chi ñayivi cha chahñi chi ndi cha catyí tuhun maun? —catyí ñu.

¹¹ Tyicuan ta cañihj noo noo ñu cuan sahna cuichin cuihno ñu. Ta catyí ra chi ñu na canyitatu ñu suhva ca quivi, nyacua nya cha caña tahan tandihj ca tahan ñu, ñu

sacuví tyiño nuu ra Cristo, ñu cha tahan chi cucuví tari cuhva chihj maa ñu.

¹² Cuhva cha chahnya ra cuví Mbee Luhlu cuan sellu cu iñu, nanyehj ta quichi noo cha taán cahnu. Ta nduñaa ñayivi, tari sahna ñu nyaá tucuihya iñi, toon xaan nduvj. Ta yoo andivi cuan nanduvj tari niñi.

¹³ Ta tiño andivi canacoyo ti nya nu ñuhu ñayivi. Tari sanacoyo tu higo chiti yutya tun tatu yahá noo tatyí ñihj.

¹⁴ Tari natuvj yo noo tutu tyicuan caa cuanaa ri andivi. Ta tandihj yucu ta tandihj ñuhú cha nyicú mahñu tyañuhu nacanda chi ta nasama chi nu nyaá chi.

¹⁵ Ta tandihj rey cha iyó siqui ñuhu ñayivi in ri chihin ra nahnu, ta ra tyayii, ta ra cacuví nuu chi sindaro, ta ra iyó xaan fuerza chi, ta tandihj ñu cacuví musu, ta ñu cha ña cuví musu, tandihj ri ñu cuan caquihvi xehe ñu chichi yavi yuu cha iyó yucu nahnu, ta chichi yavi ñuhú.

¹⁶ Ta catyí ñu chi yucu cuan ta chi yuu cuan tyehe caa:

—Canacoyo ndo siqui ndi, ta tixehe ndo chi ndi nuu ra nyaá nu tyayu andivi, coto tachi tuñi ra cuví Mbee Luhlu cuan chi ndi.

¹⁷ Vatyí cha chaá quivi cahnu cha cutachi tuñi ra chi ndi. ¿Ta yóo cuví cha cuví cunye cuan? —catyí ñu.

7

Nu ñihj ñu Israel sellu cunyaq tyaan ñu

¹ Cha yahá tuhun ihya ta nyehj cumi tahan ángel catayucú ra ndi cumi chiyu no quichi tatyí siqui ñuhu ñayivi. Ta ña chaha ra yaha tatyí cuan vatyí cava chi siqui ñuhu ñayivi. Ni ña chaha ra cha cava chi nuu tyañuhu, ni siqui yutun catayucú nuu ñuhú.

² Ta nyehj tiqui inga ángel, vachi ra ityi nu caña ñanyii, ta nyisó ra sellu Nyoo nyitó. Ta ángel cuan canachaq ra chihin cha ñihj ndusu ra chi inga cumi ca ángel cuan, ra cha ca iyó ityi chi vatyí casativí ra nuu ñuhu ñayivi ta nuu tyañuhu. Ta catyí ra chi ra:

³ —Ma sativi ñaha ndo nuu ñuhu ñayivi, ni nuu tyañuhu, ta ni nuu yutun cha ñiri ca cha ta sañaha ca ndi yóo ñu cuví musu Nyoo, vatyí cutyaa ndi noo sellu tyaan ñu —catyí ángel cuan.

⁴ Ta chiñi nacatyí ra yoso tahan ñayivi tyaa ra sellu cuan: cientu uvi xico cumi mil tahan ñu Israel.

⁵ Uchi uvi mil ñu tata ra Judá chicunyaq sellu, ta uchi uvi mil ñu tata ra Rubén, inga uchi uvi mil ca ñu cuenda tata ra Gad,

⁶ uchi uvi ca mil cuenda tata ra Aser, uchi uvi mil ca cuenda tata ra Neftalí, uchi uvi mil ñu tata cuenda ra Manasés,

⁷ ta uchi uvi mil cuenda tata ra Simeón, uchi uvi mil cuenda tata ra Leví, ta uchi uvi mil cuenda tata ra Isacar,

⁸ uchi uvi mil ñu cuenda tata ra Zabulón, ta uchi uvi ca mil ñu cuenda tata ra José, ta uchi uvi mil ca ñu cuenda tata ra Benjamín. Tandihí ñu cuan ta chicunyaá sellu Nyoo chí ñu.

Nu nyehe ra Juan chi ñu ñihno sahma cuichin

⁹ Cha yaha tuhun cuan ta nanyehí ta nyehí cuaha xaan ñáyivi nyicú. Ta yori cuví nacahví chí ñu, vatyí nyicú ñáyivi tandihí ri ñuu nyihí ta ñuu nahnu iyó siqui ñuhu ñáyivi. Ta nyicú ñáyivi siin siin sahan cahan. Ta nyicú ñáyivi tandihí ri tata. Ta catayucú ñu nuu ra nyaá nu tyayu, ta nuu ra cuví Mbee Luhlu. Ta cañihno ñu sahma cuichin. Ta cayihí ndaha ñu ndaha ñoo.

¹⁰ Ta tandihí ñu chihin cha ñihí ndusu ñu, ta canachaa ñu ta catyí ñu:

—Sutu yo Nyoo, ra nyaá nu tyayu gloria, ta ra cuví Mbee Luhlu, ican ra sacacú chí yo —cacyí ñu canachaa ñu.

¹¹ Ta tandihí ángel catayucú ra nicachico yuhu tyayu cuan, ta nicachico chata ra cha vaha chahnu cuan, ta nicachico chata ndi cumi tahan cha nyitó cuan. Ta cacticuifí chiti ra chihin nuu ra nya nu ñuhú nuu ra nyaá tyayu cuan. Ta casacahnú ra chí ra. Vatyí Nyoo cuví ra.

¹² Ta cacatyí ra:

Tahán chí tyehe caa chuun:
Sacahnú ndi chuun ta chahá ndi gloria chuun vatyí chíñi tuñi xaun.

Nacuhvá xaan ndi tyahvi nyoo chuun.

Ta sacuvahá ndi chuun vatyí iyó xaan tunyee ifí chuun, ta cuaha xaan fuerza iyó chuun, Nyoo Sutu ndi cuví chuun. Ta tyicuan ri na cuví chí tandihí tyembu, catyí ra.

¹³ Tyicuan ta noo ra cuví ra cha vaha chahnu cuan ndaca tuhun ra chíi ta catyí ra:

—¿Yóo ñu cañihno sahma cuichin ihya?

¿Ta nya ityí quichí coyo ñu? —cacyí ra.

¹⁴ Ta yuhu catyí chí ra:

—Tata, yoho chitón.

Ta catyí ra chíi:

—Ican ñu ihya cuví ñu cayaha nu tindoho cahnu. Ta canacatyá ñu cuatyí ñu, ta nducucichin sahma ñu chihin ñihí ra cuví Mbee Luhlu.

¹⁵ Yucuan chaha nyicú ñu ityí nuu tyayu nu nyaá Nyoo. Ta sacuví ñu tyiño nuu ra ndiyaca ta ñiyaca chichi vehe ñuhu ra. Ta ican ra cuví ra nyaá nu tyayu gloria ta cusaha cumi ra chí ñu vatyí cua cunyaá ra chihin ñu.

¹⁶ Ta ma nyehe ca ñu tindoho chihin soco, ni chihin cha ityí ñu ndutya. Ta ni ma

cahmi ca ñanyii chí ñu. Ni ma sayanga ca cha ihñi chí ñu.

¹⁷ Vatyí ra cuví Mbee Luhlu cha nyaá mahñu tyayu cuan cusaha cumi ra chí ñu, tari sahá cumi yo mbee. Ta cunyaca ra chí ñu nu coho ñu ndutya cha chahá cha cuconyito ñu tandihí tyembu. Ta Nyoo cunacuhva ra tandihí ndutya nuu ñu —cacyí ra chíi.

8

Nu chahnyá ra Jesucristo sellu cu ucha ta quitá noo ángel chihin noo cuu xuhun cuaan

¹ Cuhva cha chahnyá ra cuví Mbee Luhlu sellu cu ucha nu libro cuan, ndutaxin ri nya andiví tari noo cha sava hora.

² Yaha cuan ta nyehí chí ndi ucha ángel catayucú ra nuu Nyoo. Ta caquehen cuenda ra ucha tahan trompeta.

³ Yaha cuan ta quichí inga ángel chihin noo cuu xuhun cuaan cha tuhvá yihí cutu. Ta chicuinanyaá ra ityí nuu arta cuan. Ta quehen cuenda ra cuaha xaan cutu, vatyí cuhva cuenda ra ñin ri chihin cha chicán tahvi ñáyivi chí Nyoo. Nuu arta xuhun cuaan cha nyaá ityí nuu tyayu Nyoo, yucuan chahá cuenda ra.

⁴ Ta quitá ñuhma cutu cuan, nandaá chí nu nyaá Nyoo ñin ri chihin cha chicán tahvi ñu cuenda ra.

⁵ Tyicuan ta ángel cuan quehen ra cuu cuan. Tyicuan ta sacutú ra chihin titi ñuhú cha quitá arta cuan. Ta tuchí ra siqui ñuhu ñáyivi. Ta quichaha cahan savi, ta iyo cuví. Ta quihví tacha, ta quichaha taan.

Nu tiví ángel trompeta

⁶ Tyicuan ta ndi ucha ángel cha canyisó ndi ucha trompeta cuan, cha nyatú tuhva ri ra vatyí cativi ra.

⁷ Ángel cha xihna ri cuan quichaha tiví ra trompeta ra. Ta quichaha coon savi yuu ta saca ñihí chihin chí, ta saca ñuhú cha cayú chihin. Ta cayú cha yatyin cha sava ñuhu ñáyivi. Ta cha yatyin cha sava yutun cayú chihin tandihí cuhu cuii.

⁸ Ta ángel cu uvi cuan tiví tucu ra trompeta ra. Ta canacava tari noo yucu cha cayú ñuhú mahñu tyañuhu. Ta cha yatyin sava tyañuhu cuan nduví chí ñihí.

⁹ Ta cha yatyin sava quiti cha iyó chichi tyañuhu cuan chihí ti. Ta cha yatyin sava barcu cha iyó cuan, catahvi cuatyí.

¹⁰ Ta ángel cu uñi tiví ra trompeta ra. Ta canacava noo tiño cahnú andiví, suri cayú ñuhú chí ti tari ñuhú ñiti. Canacava ti siqui cha yatyin ri sava yuvi nahnu ta siqui cha yatyin ri sava ndohyo.

¹¹ Ta tiño cahnú cuan nañi ti Ajenjo. Ta cha yatyin ri sava ndutya cha iyó, nanduví chí Ajenjo cha cuví noo veneno cha uva

xaan. Ta cuaha xaan ñáyiví chihí cha cuenda ndutya cuan, vatyi ndu uva chi.

¹² Ta ángel cu cumi cuan nativí ra trompeta ra ta cha yatyin sava ñanyii nduña, ta cha yatyin sava yoo, ta cha yatyin cha sava tiño andivi cuanaa ti. Ta cha cuenda cha nduña suhva ñanyii cuhva cuan, nduña cumi tahan hora cha noo noo quívi. Ta cha cuenda cha tiví yoo ta tiño, yucuan chaha ña cacuvi sandichin chi cumi tahan hora cha noo noo ñuu.

¹³ Yahá cuan ta nanyehí ta chiñí vatyi noo ángel ndavá ra mahñu andivi. Ta chihin cha ñihi ndusu ra ta catyí ra tyehe caa:

—¡Ndahvi cuví ñu uvó siqui ñuhu ñayiví vatyi nyaá tiví uñi ca tahan ángel trompeta ra! —catyí ángel cuan.

9

¹ Ta ángel cu ohon cuan nativí ra trompeta ra. Ta nyehí chi noo ra cuan, tari tiño andivi caá ra. Ta canacava ra siqui ñuhu ñayiví. Ta quehen cuenda ra cuan ndaha ticu cha cuenda yavi cono cha ñahri maa nu chitahan chi.

² Tyicuan ta nuñá ra yavi cuan. Ta cuaha ñuhma nandaá tari maa ñuhma cha quitá chichi noo horno cahnu. Ta ñuhma cuan chasí chi nuu ñanyii ta nasacá noo chihin tatyí. Ta nduña ñayiví.

³ Ta mahñu ñuhma cuan caquitá coyo pinchi. Ta candava coyo ti siqui ñuhu ñayiví. Ta chicoq ityi chi ti vatyi tyaa ti chi ñáyiví tari tisuhma cha iyó siqui ñuhu ñayiví.

⁴ Quehen ti tuhun vatyi ma satasi iñi ti, ni chi cuhu cha iyó nu ñuhu ñayiví, ta ni noo cuhu cuii, ta ni noo yutun, soco chi ñáyiví cha ñahri sellu Nyoo nyaá tyaan ñu. Chi ñu cuan cutyaa ti.

⁵ Soco ñahri ityi iyó chi ti cha cahñi ti chi ñáyiví, soco tacuhva tyaa ri ti chi ñu. Ta coo xico uhvi chi ñu chichi cha ohon yoo. Ta cha uhvi cuan, tari caá xico tisuhma cha tyaa chi ñáyiví tyicuan caá.

⁶ Ta quívi cuan ñáyiví cunanducu ñu tuhun chihí. Soco ma nañihi ca ñu. Ta vasi cuñí ñu cúvi ñu, soco tuhun chihí cucono ri chi chi ñu vatyi ma cúvi ñu.

⁷ Tari caá caballu nahnu cha cachicá cuatyí, tyicuan caá pinchi cuan. Ta xiñi ti yihí tari caá noo corona xuhun cuaan. Ta tari caá nuu rayii, caá nuu ti.

⁸ Ta ixi xiñi ti tari caá ixi xiñi ñusihí caá. Ta tari caá noho ndicaha caá noho ti.

⁹ Ta soo ti tari caa, tyicuan caa. Ta ñihi xaan cachan ndichin ti. Tari cachan cha cuaha xaan carreta caballu cuhva cha cachinó ti nu iyó cuatyí.

¹⁰ Ta tari caá suhma tisuhma caá suhma ti, vatyi yihí iñu. Ta chihin cuan cuví tyaá ti chi ñáyiví chichi cha ohon yoo.

¹¹ Ta pinchi cuan iyó noo ra cuví nuu chi ti. Ta ican cuví noo ángel cha nyacá ñaha yavi cahnu ta cono cha ñahri nu chitahan. Ta cha chihin sahan hebreo nañi ra Abadón. Ta chihin sahan griego nañi ra Apolión, ta cuñi chi catyi: Ra Sanaa.

¹² Yahá noo tindoho cuan, soco cumañi uvi ca.

¹³ Ta ángel cu iñu cuan nativí ra trompeta ra. Ta chiñí noo ndusu cha quitá chichi ndi cumi ndiquí tutun arta xuhun cuaan cha nyaá nuu Nyoo.

¹⁴ Ta ndusu cuan catyi chi ángel cu iñu cha nyisó trompeta cuan, tyehe caa:

—Ndachi chi ndi cumi ángel cha canuhñi yatyin yuhu yuvi cahnu Eufrates —catyí ndusu cuan.

¹⁵ Tyicuan ta ndachí ndi cumi ángel cuan, vatyi cha nyatu tuhva xaan ra maa maa cuhva cuan maa maa quívi cuan, maa maa yoo cuan, maa maa cuiya cuan, vatyi cahñi ra chi cha yatyin cha sava ñáyiví iyó siqui ñuhu ñayiví.

¹⁶ Ta chiñí yoso tahan sindaro chihin caballu ra, ta quitá uvi cientu millón tahan ra.

¹⁷ Ta tyicuan caa nyehí caballu cuan chihin visión, cha sanyehé Nyoo chii. Ta pechu ra cayosó chi ti cuan, yihí noo caa tyacu cuaha, tyacu azu ta tyacu cuaan. Ta tari caá xiñi ndicaha caá xiñi caballu ra. Ta chichi yuhu ti quitá ñuhú ta ñuhma ta azufre.

¹⁸ Ta cha yatyin sava ñáyiví iyó siqui ñuhu ñayiví cachihí chihin uñi tahan cha caquitá yuhu caballu cuan; ñuhú ta ñuhma ta azufre.

¹⁹ Vatyi tunyee iñi cha iyó chi ti, chichi yuhu ti ta suhma ti nyaá. Vatyi tari caá coo, caá suhma ti. Tari noo xiñi coo tyicuan caa nuu suhma ti. Ta chihin cuan sañicuehé ti chi ñáyiví.

²⁰ Soco tandihí ca ñu cha candoq, cha ña cachihí chihin cuehe cuan, ña sacucuitá ñu cha sacuví ñu cha ña vaha. Ta ni ña sacucuitá ñu cha sacahnú ñu chi tatyí ña vaha ta chi xitohyo. Vatyi cuví cuan noo xuhun cuaan, xuhun cuichin, bronce, yuu, yutun. Cha ña cuví nyehe, ni ña chiñi ta ni ña cuví caca cuví cuan.

²¹ Ni ña casandihí ñu cha chahñi ñu, ta cha satasí ñu. Ta ña sandihí ñu cha iyó ñu chihin rayii ta chihin ñusihí ta ñima yii ñu cuví, ta ñima ñasihí ra cuví. Ta ña sandihí ñu cha suhú ñu.

10

Ángel cha nyisó libro luhlu

¹ Tyicuan ta nyehí inga ángel cha iyó xaan tunyee iñi chii, cha vachi noó ityi andivi mahñu noo vico. Ta noo coo yahnyí nyaá

xiñi ra. Ta xiño xaan nuu ra tari ñanyii. Ta tari cha cayú ñuhu chaha ra, tyicuan caá.

² Ta yihí ndaha ra noo libru luhlu cha tanuña nuu. Ta chinanyaa ra chaha chiyo vaha ra nu tyañuhu. Ta chaha chiyo satyin ra chinanyaa ra siqui ñuhu ñayivi.

³ Tyicuan ta ñihi xaan cana chaa ra, tari ndusu ndicaha cha nduxaan ti. Ta kuhva cha canachaa ra, chiñi ucha tahan ndusu cha siin siin caa tari cha cahán savi, tyicuan caa ndusu ra.

⁴ Ta cha yahá cha chiñi cha cahán ndi ucha ndusu cuan, tyicuan ta cuatyai nuu tutu. Soco chiñi noo ndusu ityi andivi, ta catyí chi chii tyehé caa:

—Cocumi xehun tuhun cha chiñun cahán ndi ucha ndusu cuan. Ta ma tyaun nuu tutu —catyí ndusu cuan chii.

⁵ Tyicuan ta ángel cha nyehi cha chañi nuu tyañuhu ta siqui ñuhu ñayivi, nacoñehé ra ndaha chiyo vaha ra ityi andivi.

⁶ Ta ángel cuan tyanaha ra vatyi cahan ra noo cha ndicha cuenda Nyoo, ra nyitó tyicuan ri maa, ra cha savaha andivi ta ñuhu ñayivi ta tyañuhu ta tandihi cha iyó nuu chi. Ta catyí ra:

—Ñahri ca cha cucuee.

⁷ Vatyi kuhva cha cuquichaha tivi ángel cu ucha cuan trompeta ra, yucuan kuhva cuchino cava tuhun xehe cha yihí iñi Nyoo tyi sacuvi ra, tari kuhva sacotó ra chi ra casacuví tyiño nuu ra, ra cacuví profeta cuenda ra —catyí ángel cuan.

⁸ Ta ndusu cha chiñi yuhu, cha quitá ityi andivi, cahán tucu chi chíhin inga chaha, ta catyí chi chii tyehé caa:

—Cuahan, ta quehun libru luhlu cha tanuña nuu, cha yihí ndaha ángel cha chañi nuu tyañuhu ta nu ñuhu ñayivi —catyí chi.

⁹ Tyicuan ta chahin nu nyyáá ángel cuan ta chíquen libru luhlu cuan nacuhva ra chii, ta catyí ra chii:

—Quehen, ta cahun, vixi xaan tari tyañuhu. Soco chíhun cundu uva chi —catyí ra chii.

¹⁰ Tyicuan ta quehin libru luhlu cha yihí ndaha ángel cuan, ta chachí. Vixi xaan tari tyañuhu. Soco cha yahá cha chachí, uva xaan nduvi chi chichi.

¹¹ Tyicuan ta catyí ra chii:

—Cuñi chi cha cunacatyun inga chaha tuhun cha cahán Nyoo siqui ñayivi cuaha xaan ñuu nyihi ta ñuu nahnu, ta siqui ñayivi siin siin sahan cahan, ta siqui ra cacuví rey —catyí ra chii.

11

Uvi tahan ra cacuví cha ndaa

¹ Tyicuan ta cachaha ra noo ndoo cha tari caá noo yutun cha tyicuhvá chi. Ta cacatý ra chii tyehé caa:

—Ndūcuita ta tyicuhvon vehe ñuhu Nyoo ta arta ra, ta naçahvun yoso tahan ñu tuhvá sacahnú chi Nyoo yucuan.

² Soco ma tyicuhvon nuquehe cha nyyáá ityi chata vehe ñuhu cuan. Vatyi cha cuenda ñu inga ñuu cuví. Ta ican ñu cuan cucuaca chaha ñu ñuu ii cuan chichi cha uñi cuiya sisava.

³ Ta yuhu cutachi uvi testigu cucahan ra cha cuende cha ni ri ca cha chichi noo mil uvi cientu uñi xico quivi. Ta cacuihno ra sahma tucuihya iñi.

⁴ Ta ican ninduvi testigu cuan cuví uvi tahan yutun olivo ta uvi tahan cañileru cha tayucú nuu Sutu Mañi yo, ra nyacá ñaha siqui ñuhu ñayivi.

⁵ Tatu yóó ñu cuñi satasi iñi chi ninduvi testigu cuan, cuquita ñuhu yuhu ninduvi ra, ta cahmi chi tandihi ñu xaan iñi chi ra. Ta tyicuan caa cucuvi ñu cuñi satasi iñi chi ra.

⁶ Testigu cuan iyó ityi chi ra cha cacasi ra nu ma coon savi cha niri ca cha cachahá cuenda ra tuhun cahán Nyoo chi ñayivi. Ta iyó tucu ityi chi ra cha casananduvi ra niñi chi ndutya. Ta iyó tucu ityi chi ra cha casanyehé ra tindoho chi ñu iyó siqui ñuhu ñayivi chíhin tandihi ri nuu cuehe, yoso tahan chaha cha cacuñi maa ra.

⁷ Soco kuhva cha cua ndihi kuhva cuenda ra tuhun Nyoo chi ñayivi, cuquita noo quiti xaan yavi cono cuan, ta cucañi tahan ti chíhin ninduvi testigu cuan. Ta cucuvi chasaha ti chi ra. Ta cucahñi ti chi ra.

⁸ Ta coño ñuhu ra cundoo maa cava calle ñuu nu chíhi Sutu Mañi yo nu cruzi. Ta tari Sodoma ta Egipto nanduvi ñuu cuan, (cha cuenda cha ña vaha cha sacuví ñayivi ñuu cuan).

⁹ Ta chichi cha uñi quivi sisava, cunyehe tandihi ñayivi coño ñuhu ra, ñayivi tandihi ñuu nyihi, ñayivi tandihi ri tata, ta ñayivi siin siin sahan cahán, ta ñayivi ndihi ri ñuu nahnu, cunyehe ñu coño ñuhu ra. Ta ma kuhva ñu cha quihí coño ñuhu ra chichi ñuhú.

¹⁰ Ta ñu cha iyó siqui ñuhu ñayivi cu cusii xaan cuñi ñu cha cuenda cha cachihí ra cuan. Ta nyacua cutachi ñu regalo chi tahan ñu cha sii cuñi ñu, vatyi cachihí ninduvi rayi cha cachaha cuenda tuhun cahán Nyoo chi ñu. Vatyi chaha xaan ra tindoho chi ñu cha kuhva cha cuñi maa ñu.

¹¹ Soco cha yahá cha uñi quivi sisava, Nyoo sanandotó ra chí ra, ta candicuita tucu ra inga chaha. Ta tandihi ñu nyehé canandotó ra, canayuhvi xaan ñu.

¹² Tyicuan ta ninduvi testigu cuan cachihí ra noo ndusu ñihi xaan ityi andivi. Ta catyí chi chi ra tyehé caa:

—Ndáa ndo ityi siqui ihya —catyí ndusu cuan chi ra.

Ta candaꝯ ra ityi andiví chichi noo vico. Ta canyehe ñu xaan ifi chi ra nu canandaá ra.

¹³ Ta cuhva cuan quichí noo cha taꝯ cahnu. Ta chichi ñuu cuan canacoyo cuaha xaan vehe. Ta chichi cha uchi uchi tahan vehe, canacoyo noo noo. Ta cha tandihí chichi ñuu cuan chihí ucha mil ñáyiví cha cuenda cha taꝯ cuan. Ta ñáyiví ña chihí, casacahnú ñu chi Nyoo, ra nyaá andiví, cha cuenda cha yuhví ñu.

¹⁴ Yaha tindocho cu uvi cuan, soco numi ri cuquichi tindocho cu uñi.

Nu tiví ángel trompeta cu ucha

¹⁵ Ta ángel cu ucha nativí ra trompeta ra. Ta canatyacu ndusu ñihí xaan ityi andiví, ta catyí chí tyehe caa:

Tandihí nu nyacá ñaha rey siqui ñuhu ñáyiví ihya, cha yaha nanduví chi Sutu yo Nyoo ta chí ra Cristo.

Ta maa ra cucunyaca ñaha tyicuan ri maa, catyí ndusu cuan.

¹⁶ Tyicuan ta ndí oco cumi ra cha vaha chahnu, ra canyicú nuu tyayu nu nyaá Nyoo, cachicuñí chiti ra chihin nuu ra nya nu ñuhu. Ta casacahnú ra chí Nyoo.

¹⁷ Ta cacatyí ra:

Nacuhvá ndí tyahvi nyoo chuun, Sutu Mañi nyuhu.

Nyoo ra iyó tandihí tunyee ifi chii cuvún.

Yoho iyón vityin, ta iyón nu quichaha tandihí ta nyaa cha cuquichun.

Vatyí cha naquehen cuendon tunyee iñun. Ta cha quichahun nyaca ñahun vityin.

¹⁸ Ta ñáyiví tandihí ñuu nahnu cuxaꝯ ñu. Soco cha chaꝯ quiví cha tachi tuñun chí ñu. Ta cha chaꝯ quiví cha cucutuñi chí ñu ndiyi. Ta cucuhvon cha vaha cha tahán chí chí ñu sacuví tyiño nuun, ñu chahaꝯ cuenda tuhun cahún,

ñu cha nacuhvá cuenda añima chí maun, ta sacahnú ñu sivun.

Vasi cahnu ñu cuví ñu ta vasi ndahvi ñu.

Ta chaꝯ cuhva cha sanaun chí ñu sativí chí ñáyiví siqui ñuhu ñáyiví, cacatyí ra.

¹⁹ Tyicuan ta nuña yuvehe ñuhu Nyoo cha nyaá andiví, ta chichi vehe ñuhu natuví cajú cuenda cha natyihí tahan ra tuhun chihin yo. Ta quihví tacha. Ta vaa ri maa cuví, ta cahán savi. Ta chiyó noo cha taan. Ta ñihí xaan coꝯn savi yuu.

12

Nu chican nyicon noo coo cahnu chí noo ñaha sihi

¹ Tyicuan ta tuví noo seña cahnu andiví. Vatyí quita noo ñaha sihi ta siquí noo ña ñanyii tari cha ñihno ña vestido. Ta chañí ña siquí yoo. Ta yihí noo corona cha uchi uvi tiño andiví xiñi ña.

² Ta ñaha sihi ihya ñohó sehe ña. Ta chacú chaa vavaha ña chihin cha uhvi cha cacú sehe ña, vatyí nyehé xaan ña tindocho cha cua cacú sehe ña.

³ Tyicuan ta quita nonga seña ityi andiví. Ta nyehí noo coo cuaha cahnu. Ta nyaá ucha xiñi ti, ta uchi ndiquí ti. Ta tahan tahan xiñi ti yihí noo corona.

⁴ Ta chihin suhma ti sanacoyo ti cha yatyin cha sava tiño andiví siquí ñuhu ñáyiví. Ican coo ihya chicuñi ti nuu ñaha cha cua cacú sehe cuan, vatyí ta cha cacú ri cue ta cachi ti chí cue.

⁵ Ta ñaha cuan sacacú ña noo rayii. Ta ican ra cuacunyaca ñaha tandihí ñáyiví iyó siquí ñuhu ñáyiví. Ñihí xaan cua cunyaca ñaha ra tari cha chihin noo yutun caa vee. Ta cha yahaꝯ cacú ra, naxita Nyoo chí ra nu nyaá ra nu tyayu ra.

⁶ Ta ñaha cuan chingo ña cuahan ña noo ñuhú ityi, nu sanduvaha Nyoo noo nu coo ña, vatyí yucuan cucuhva ra cha cachi ña cha ni ri ca cha noo mil uvi cientu uñi xico quiví.

⁷ Yahaꝯ cuan ta chiyó noo cuatyí nya andiví, nu cañi tahan ángel cahnu Miguel ta tandihí ángel cuenda ra chihin coo cahnu cuan. Ta coo cuan ta tandihí tatyí ña vaha cuenda ti, cacañi tahan chihin ra Miguel.

⁸ Soco ña saha ganaꝯ ti cha cañi tahan ti. Ta ña ñihí ca ti nu ndoo ti nya andiví chihin tatyí ña vaha cha candihí chihin ti.

⁹ Tyicuan ta tava ñehe Nyoo chí ti, cuví ti Coo Chahnu, cha nañi cuihna ra cuví nuu, ra cha sandaví ñaha chí tandihí ñáyiví iyó siquí ñuhu ñáyiví. Maa ra ta tatyí ña vaha cuenda ra cacacacoyo ra nya nu ñuhu ñáyiví.

¹⁰ Tyicuan ta chiñi noo ndusu ñihí nya andiví. Catyí chí tyehe caa:

—Cha chaꝯ nu cacú añima yo vityin. Cha saha ganaꝯ tunyee ifi Nyoo. Cha nyacá ñaha Nyoo yo vityin chihin ra Cristo Sehe ra. Vatyí cha tava ñehe ra chí ra cha tyaa xaan cuatyí siquí ra yañi yo ndiyaca ta ñiyaca nuu Nyoo.

¹¹ Ta ra yañi yo cacuví chasaha ra chí ra chihin ñihí ra cuví Mbee Luhlu, ta chihin tuhun Nyoo cha cacahán ra tuhun chihin ñáyiví. Vatyí ña yuhvi ca ra cha cucúvi ra.

¹² Yucuan chaha cusí cuñi nyoho cha iyó ndo andiví. Soco jndahvi nyoho ñu iyó siquí ñuhu ñáyiví ta nu tyañuhu! Vatyí cuihna canacavaꝯ ra nya andiví ta nyacua nya siquí ñuhu ñáyiví nu nyicú ndo. Ta xaan xaan ra vatyí chitó ra vatyí suhva ri ca quiví ra nyaá.

¹³ Ta cha nyehé coo cahnu cuan vatyí nacavaꝯ ti nu ñuhu ñáyiví, chica nyicon ti chí ñaha cha sacacú sehe cuan.

¹⁴ Soco ñaha cuan ñihĩ ña uvi tahan ndichin nahnu tasu, tacuhva cuvĩ ndava ña ta cono ña chi coo cuan nyacua nya ñuhu ityi cuan. Ta yucuan cuvĩ nu cuñihĩ ña cha cachi ña chichi cha uñi cuiya sisava.

¹⁵ Ta coo cuan tuchĩ ti ndutya chihin yuhu ti, vatyi cono noo yuvi cahnu, vatyi satyañi chi ñaha cuan.

¹⁶ Soco ñuhu ñayivĩ tyinyee chi ña, vatyi ndata chi ta quihvi yuvi cahnu cha tuchĩ coo cahnu cuan chihin yuhu ti.

¹⁷ Ta cha cuenda cha ña cuvĩ chasaha ti chi ña, cuahan ti cua cañi tahan ti chihin ñáyivĩ vachi tata ña, ñu cha quichahá tuhun cahán Nyoo, ñu nyción cha ndicha cha cahán ra Jesucristo chihin cha ñi ñi ñu.

13

Nu nyehe ra Juan uvi quitĩ quiñi caa

¹ Chicuinanyaj nu ñiti yuhu tyañuhu cuan. Ta nyehĩ quitá noo quitĩ quiñi xaan caa nuu tyañuhu. Ta nyaá ucha xiñi ti, ta uchi ndiqui ti. Ta tahan tahan ndiqui ti yihĩ noo corona. Ta xiñi ti nyaá noo tuhun cha cahán ña vaha siqui Nyoo.

² Quitĩ quiñi caa ihya caá ti tari caá noo cuñi. Ta tari caá chaha yihĩ caá chaha ti. Ta yuhu ti tari caá yuhu ndicaha caá. Ta coo cahnu cuan chahá ti ityi chi quitĩ quiñi caa cha cunyaa ti nu tyayu ti. Ta chahá ti ityi chi ti cha cunyaca ñaha ti chi ñáyivĩ.

³ Ta noo xiñi quitĩ quiñi caa cuan tari maa cha nyaá noo nu cahvi cahnu. Soco nu cahvi cuan nduvahá. Ta iyo xaan cuñi tandihĩ ñáyivĩ iyó siqui ñuhu ñáyivĩ. Ta nanyicón ñu chi quitĩ quiñi caa cuan.

⁴ Ta sacahnú tucu ñu chi coo cahnu cuan, vatyi chahá ti ityi chi quitĩ quiñi caa cuan. Ta sacahnú tucu ñu chi quitĩ quiñi caa cuan, ta catyí ñu:

—¿Yóo cha cuvĩ chi tari cuvĩ chi quitĩ quiñi caa ihya? ¿Ta yóo cha cuvĩ cañi tahan chihin ti? —catyí ñu.

⁵ Ta ñihĩ tucu quitĩ quiñi caa cuan ityi vatyi cahan ña vaha ti ta cahan quiñi caa ti siqui Nyoo. Ta cua cunyaca ñaha ti chichi cha uvi xico uvi yoo.

⁶ Ta tyicuan caa sacuvj ti. Cahán ti siqui Nyoo. Ta cahán ña vaha ti siqui nu nyaá Nyoo. Ta cahán ti chi ñu nyción andivi.

⁷ Ta chicoo tucu ityi chi ti cha sacoo ti catyí siqui ñu cuenda Nyoo nyacua nya cuvĩ chasaha ti chi ñu. Ta chicoo ityi chi ti siqui ñáyivĩ ndihĩ ri tata, ñáyivĩ siin siin sahan cahan, ñáyivĩ tandihĩ ri ñuu nyihĩ, tandihĩ ri ñuu nahnu.

⁸ tandihĩ ñu cha ma ñihĩ ñáyivĩ chaa coo chihin ra cuvĩ Mbee Luhlu, ra cha chihj. Ma ñihĩ ñu vatyi nyata ni cumañi ching ñuhu ñáyivĩ ta ñahri sivi ñu nyaá nu libru ra.

Tandihĩ ñu cuan cusacahnu ñu chi quitĩ quiñi caa cuan.

⁹ Ta ñu cutuñi ñi, na quichaha ñu tuhun ihya:

¹⁰ Ñu cunyaca vehe caa chi inga ñu, suri cuhan tucu maa ñu. Ta ñu cha cachahñi chihin cha xaan, suri chihin cuan cucúvi tucu maa ñu. Yucuan chaha cuñi xaan chi cha cunyeer xaan ñi ñu cuenda Nyoo. Ta cuñi chi cha chino ñi ñu chi ra.

¹¹ Yahá cuan ta nyehj inga quitĩ quiñi caa. Quitá ti chichi ñuhú. Quiti ihya nyaá uvi ndiqui ti cha tari caá ndiqui mbee luhlu. Soco tari cahán noo coo xaan vavaha cahán ti.

¹² Ta nyacá ñaha ti tari nyacá ñaha quitĩ quiñi caa cha xihna ri cuan. Suri chihin nuu quitĩ cha xihna ri cuan nyacá ñaha ti. Ta tyiyuhu ti chi ñuhu ñáyivj ta ñu iyó siqui na sacahnu ñu chi quitĩ quiñi caa cha xihna ri cuan, quitĩ cha nduvahá nu cahvi cahnu cha chinyaá chi ti.

¹³ Ta cuaaha xaan milagru sacuvj ti. Nyacua cuvĩ sanacoyo ti ñuhu cayú ityi andivi chihin nuu ñáyivĩ.

¹⁴ Ta sandavj ñaha ti chi ñáyivĩ iyó siqui ñuhu ñáyivĩ chihin seña cha cuvĩ sacuvj ti chihin nuu quitĩ quiñi caa cha xihna ri cuan. Ta tachj ti nachino noo xiñahñu quitĩ quiñi caa cha tahnya cahvi chihin mityi, soco ña chihj ti.

¹⁵ Ta quitĩ quiñi caa cu uvi cuan chicoo ityi chi ti cha cuhva ti cha conyito xiñahñu quitĩ quiñi caa cha xihna ri cuan, vatyi xiñahñu cuan cuvĩ cahan. Ta tachj xiñahñu cuan nacúvi tandihĩ ñáyivĩ ña cuñi sacahnu chi chi.

¹⁶ Ta siin ri catyí ti vatyi na cunyaa noo tuñi chi tandihĩ ñáyivĩ, tandihĩ ñu nyihĩ, ñu chahnu, ñu tyayii, ñu ndahvi, ñu yori chitoho, ta ñu iyó chitoho. Ta cucunyaa tuñi cuan ndaha chiyo vaha ñu o tyaan ñu.

¹⁷ Ta yori maa cuvĩ sata ta xico tatu ñahri tuñi cuan nyaá chi ñu. O tatu ñahri sivi ti, o número sivi ti nyaá chi ñu.

¹⁸ Tuhun ihya cuñi xaan chi cha chiñi tuñi. Ñu cutuñi ñi, na saha ñu cuenda número quitĩ quiñi caa cuan. Vatyi número noo rayii cuvĩ. Ta número ra cuan ican cuvĩ ñi ñu cientu uñi xico ñu.

14

Nu sacahnú cientu uvi xico cumi mil ñáyivĩ chi Nyoo chihin cha chitá ñu

¹ Yahá cuan ta nyehj chi ra cuvĩ Mbee Luhlu, nanyaá ra nu yucu Sión. Ta chihin ra tayucú cientu uvi xico cumi mil ñáyivĩ cha nyaá sivi ra tyaan ta sivi Sutu ra.

² Tyicuan ta chihj noo cha cayu cha quichi ityi andivi, tari cayu cuaha yuvi nahnu. Ta tari cahán saví cha ñihĩ xaan, o

tari noo ndusu cha cuaha xaan ra casacuacú arpa.

³ Ta cachitá ñu noo yaa chaa nuu tyayyu Nyoo, ta nuu ndi cumi cha nyitó cuan, ta nuu tandihi ra cha vaha chahnu cuan. Ta yori cuví cutuhva yaa cuan, ñin ri maa cientu uvi xico cumi mil ñu cha cacú añima siqui ñuhu ñayiví.

⁴ Ican ñu ihya cuví ñu cha ña chicoq cuatyí ñu chihin inga rayíi ta ni ri rayíi chihin inga ñusihí, vatyí ii ndoo ñu, ta nyicón ñu chí ra cuví Mbee Luhlu tandihi ri ityi nu cuahan ra. Cacú añima ñu ta cuví ñu ñu xihna ca chahq cuenda ñu chí ñu chí Nyoo ta chí ra cuví Mbee Luhlu.

⁵ Yori cuví catyi vatyí cuendu ñu, vatyí ni noo cuendu ña tuhvá ñu cahan. Yucuan chaha ñahri cuatyí ñu nuu Nyoo.

Tuhun cha sacoto uñi tahan ángel

⁶ Tyicuan ta nyehí inga ángel cuahan ndava ra andiví. Ta nyisó ra tuhun Nyoo cha ma ndíhi ca maa, ta ican tuhun ihya cuví cha sacacú ra Cristo añima yo, Vatyí cusacoto ra tuhun ihya chí ñáyiví iyó siqui ñuhu ñayiví, ñáyiví ndíhi ri ñuu nahnu, ta ndíhi ri ñuu nyihí, ta ñáyiví ndíhi ri tata, ta ñáyiví siñ siñ sahan cahan.

⁷ Ta ñihí xaan cahan ra ta catyi ra:
—Na yuhví ndo chí Nyoo, ta sacahnu ndo chí ra. Vatyí cha chaq cuhva cha cua cutuñi chí ñáyiví. Sacahnu ndo chí ra savaha andiví ta ñuhu ñayiví, ta tyañuhu ta ndohyo ndutya.

⁸ Tyicuan ta cuahan inga ángel cuan chata ra, ta catyi ra:

—Cha canacavá ñuu Babilonia cahnu vityin, cha taní chí. Vatyí ñu iyó ñuu cuan sañahq ñu chí inga ñáyiví iyó siqui ñuhu ñayiví cha quiñi caa tari sacuví maa ñu. Tari quiñi cha sacuiñi ñu chí ñu chihin vinu ña vaha cuví cuan.

⁹ Ta nacahan ángel cu uñi chihin cha ñihí ndusu ra ta catyi ra:

—Tatu nya noo ñi sacahnú ñu chí quiñi quiñi caa cuan ta chí xiñahñu ti, o chahá ñu chí ñu cha cunyaa tuñi ti tyaan ñu, o ndaha ñu,

¹⁰ cunyehe xaan ñu tindoho vatyí cutyihí Nyoo chí ñu nu ñuhu, ta nu azufre tari cha cusacoho Nyoo noo vinu xaan chí ñu. Ta chihin nuu ángel ta chihin nuu ra cuví Mbee Luhlu cucuví cuan.

¹¹ Ta ñuhma cha quitá nu nyehé ñu tindoho cuan tyicuan ri maa cuquita chí. Ta ma nyitatu maa ñu ndiyaca ta ñiyaca nu cohon ñu yucuan, vatyí sacahnú ñu chí quiñi quiñi caa cuan ta chí xiñahñu ti, o chahq ñu cha cunyaa tuñi sivi ti chí ñu.

¹² Yucuan chaha ñu yihí cuenda Nyoo, ñu quichahá tuhun cahán ra, ñi ñi ñu chinó ñi ñu chí ra Jesús ta cuñí chí cha cunye

xaan ñi ñu cha nyehé ñu tindoho sacuví inga ñáyiví.

¹³ Tyicuan ta chíñi noo ndusu cha quichí ityi andiví, ta catyi chí chíi tyehe caa:

—Tyaa tuhun ihya: “Vityin ta ityi nuu ca, sii xaan cucuví chí ñu chíñi ta chinó ñi ñu chí Sutu Mañi yo.” Ndicha, catyi Tatyí Ii Nyoo vatyí cunyitatu ñu chihin tyiño sahá ñu. Ta ñin ri cuhun cha vaha cha sacuví ñu chihin ñu.

Nu cutachi tuñi Nyoo chí ñáyiví

¹⁴ Tyicuan ta nanyehí ta nyehí noo vico cuichin. Ta siqui vico cuan nyaá noo rayíi cha ndicha cuíi maa cha quichí nya gloria. Ta yihí noo corona xuhun cuan xiñi ra. Ta yihí ndaha ra noo mityí cutya ta xaan.

¹⁵ Ta quitá nonga ángel chichi vehe ñuhu ta chaa canachaa ra chí ra nyaá siqui vico cuan. Ta catyi ra:

—Vityin saha tyiñon chihin mityun, ta na satacon cosecha cha iyó siqui ñuhu ñayiví. Vatyí cha chaq cuhva, ta cha iyó siqui ñuhu ñayiví cha chityí chí —catyi ra.

¹⁶ Tyicuan ta ra cha nyaá siqui vico cuan sayaha ra mityí ra siqui ñuhu ñayiví, ta nasataca ra cha iyó nuu chí.

¹⁷ Tyicuan ta inga tucu ángel quitá chichi vehe ñuhu cha nyaá andiví. Ta nyisó tucu maa ra noo mityí cutya cha xaan vavaha.

¹⁸ Ta nu nyaá arta quitá tucu nonga ángel cha iyó ityi chí cha cunyaca ñaha chí ñuhu cha cayú. Ta canachaa ra ta cana ra chí ra cha nyisó mityí cutya cha xaan cuan. Ta catyi ra chí ra:

—Saha tyiñon chihin mityí xaan cha nyisón chíña, ta na satacon vatu tichaha ndiví cha iyó siqui ñuhu ñayiví, vatyí cha chityí —catyi ra.

¹⁹ Ta ángel cuan sayaha ra mityí ra siqui ñuhu ñayiví ta chahnya ra tichaha ndiví cha iyó siqui ñuhu ñayiví. Ta tyihí ra noo nu tyihí ra vatyí cucuhñi ra ta quita ndutya chí. Ta cha tyehe caa cuñí chí catyi cha cutachi tuñi Nyoo chí ñáyiví.

²⁰ Ityi chata ñuu cachahñi ra tichaha ndiví cuan, ta cuñí chí catyi vatyí cachihí cuaha xaan ñáyiví, ta nu cuví cuan, cama xaan cama xaan ñiñi ñu chati. Ta chaa chí nya nu sucun nu nyaá frenu yuhu caballu ta tari cuhva noo uñi cientu kilómetro chinó ñiñi cuan.

15

Nu quitá ángel chihin ucha ca tahan tindoho cha cunyehe ñáyiví nu ndíhi tuhun

¹ Nyehí nonga seña cahnu andiví, ta yuhví xain cuví, vatyí nyehí ucha tahan ángel chihin ndí ucha tindoho. Chihin ihya cuví nu ndíhi tindoho vatyí cundihi cha cuxaan Nyoo chihin ñáyiví cha ña quichahá ñu tuhun cahán ra.

² Ta nyehe tiqui noo cha tari caa tyañuhu, xiño tari caá ino, nasaca chi chihin ñuhu cha cayú. Ta ñu cha yaha cuví chasaha chi quití quiñi caa cuan ta chi xiñahñu ti, ñu cuví chasaha cha ma cunyaa número sivi ti cuan chi ñu, tandihi ñu tayucú ñu yuhu tyañuhu cha xiño cuan. Ta ndahá ñu arpa, cha chahá Nyoo chi ñu.

³ Ta chitá ñu yaa ra Moisés, ra sacuví tyiño nuu Nyoo, ta yaa ra cuví Mbee Luhlu. Ta tyehe caa catyí ñu:

Cahnu ta iyo xaan caá tandihi maa cha sacuvún.

Nyoo, Sutu ndi, iyó tandihi tunyee iñi chuun.

Ndoo xaan ta ndicha xaan ityun.

Yoho Rey cuvún cuenda tandihi ñáyivi iyó siqui ñuhu ñáyivi.

⁴ ¿Yóó cha ma yuhvi chuun, yoho Sutu Mañi nyuhu?

¿Yóó cha ma sacahnu chuun?

Vatyí noo tuhun ri maun cuví ra ii.

Ta cuquichi coyo ñáyivi tandihi ñuu, ta cusacahnu ñu chuun.

Vatyí cha nyehe ñu cha vaha cha sacuvún, catyí ñu chitá cuan.

⁵ Cha yaha tuhun ihya ta nanyehj nuña yuvehe ñuhu nya andívi nu cumi vaha ñu tabla cha nyaá ley.

⁶ Ta chichi vehe ñuhu cuan quitá coyo ndi ucha ángel cha canyisó ndi ucha tindoho cuan. Ta cañihno ra sahma finu, cuichin ta xiño. Ta cayihí ra sincho xuhun cuaan ta nya pechu ra chitahan.

⁷ Tyicuan ta noo cha nyitó cuan, chahá cuan noo noo copa xuhun cuaan chi ndi ucha tahan ángel cuan. Ta chichi copa cuan tyitu maa yihí cha xaan Nyoo cha cutachi tuñi ra chi ñáyivi. Ta ican ra iyó ra tyicuan ri maa.

⁸ Ta chichi vehe ñuhu cuan chitú maa chihin ñuhma cha cuenda cha cahnu xaan cuví Nyoo ta cha cuenda tunyee iñi iyó chi ra. Ta yori maa cuví quihvi chichi vehe ñuhu cuan cha niri ca cha cumañi ndihi ndi ucha tindoho cha nyisó ndi ucha tahan ángel cuan.

16

Copa cha yihí tindoho cha cua saquichi ndi ucha tahan ángel cuan

¹ Tyicuan ta chihñi noo ndusu ñihi cha quitá vehe ñuhu nu nyaá Nyoo. Ta catyí chi chi ndi ucha ángel cuan:

—Cuañan ndo cua coyo ndo cha ñohó chichi copa chihña siqui ñáyivi iyó siqui ñuhu ñáyivi, vatyí Nyoo cutachi tuñi ra chi ñu —catyí ndusu cuan.

² Ángel cha xihna ri cuan chahán ra ta coyo ra cha ñohó chichi copa cuan siqui ñáyivi cha nyaá tuñi quití quiñi caa cuan

chi, ñu cha sacahnú xiñahñu ti. Ta quitá noo nu cahvi xaan chi ñu, ta uhvi xaan.

³ Ta ángel cu uvi cuan coyo ra cha yihí chichi copa ra nu tyañuhu. Ta ndutyá tyañuhu cuan nanduví niñi tari niñi noo ndiyi, ta tandihi cha nyitó chichi tyañuhu cuan cachiñi.

⁴ Ta ángel cu uñi cuan coyo ra cha yihí chichi copa ra siqui yuvi nahnu ta siqui ndohyo ndutyá ta cananduví chi niñi.

⁵ Tyicuan ta chihñi cha cahán ángel cuenda ndutyá tyehe caa:

—Sutu Mañi yuhu, yoho cuvún noo ra vaha vatyí tachí tuñun chi ñáyivi tyehe caa, Sutu Mañi yuhu, Nyoo ii cuvún ta iyón vityin ta nu quichaha tandihi.

⁶ Vatyí maa ñu cachati ñu niñi ñáyivi cuendon ta niñi ra cacuví profeta cuendon. Ta vityin yoho tari cha cunasacohun niñi chi ñu vatyí tyicuan caa tahán chi chi ñu —catyí ángel cuan.

⁷ Ta chihñi tiqui vatyí cahán noo cha cahán ityi nu nyaá arta Nyoo tyehe caa:

—Ndicha, Sutu Mañi yuhu Nyoo, iyó tandihi tunyee iñi chuun. Vityin cha yaha tachí tuñun chi ñáyivi chihin cha ndicha ta chihin cha ndaa —catyí cuan.

⁸ Ta ángel cu cumi cuan coyo ra cha yihí chichi copa ra nu ñanyii. Ta chicoq ityi chi ñanyii cuan vatyí cahmi chi chi ñáyivi chihin ñuhu chi.

⁹ Ta tandihi ñu, quiñi xaan chahmj ñanyii chi ñu. Soco ña canasamañ ñu cuhva iyó ñu, ni ña casacahnú ñu chi Nyoo. Ta chahán ña vaha ñu siqui Nyoo ra cuví sanyehe tindoho chi ñu tyehe caa.

¹⁰ Ta ángel cu ohon cuan coyo ra cha yihí chichi copa ra siqui tyayu quití quiñi caa cuan. Ta nduñaa ri nu nyacá ñaha ti. Ta ñáyivi cuenda ti, nyacua nacachi yihí ñu yaa ñu cha cuenda cha nyehé xaan ñu cha uhvi.

¹¹ Soco ni tyicuan caa ta ña sandihí ñu cha sacuví ñu cha ña vaha. Ta chahán ña vaha ñu siqui Nyoo ra nyaá andívi cha cuenda cha uhvi chi ñu ta cha cuenda nu cahvi chi ñu.

¹² Ta ángel cu iñu cuan coyo ra cha yihí chichi copa ra siqui yuvi cahnu Eufrates. Ta yuvi cuan na ityi chi tacuhva vatyí nuña noo ityi cha yaha ra cacuví rey cha vachi coyo ityi nu caña ñanyii.

¹³ Tyicuan ta nyehj cha quitá yuhu quití quiñi caa cuan ta yuhu coo cahnu cuan ta yuhu ra cuví profeta cuendu. Vatyí caquita coyo uñi tahan tatyí ña vaha yuhu ra cuan. Tari caá sahva caá tatyí ña vaha cuan.

¹⁴ Ican ihya cuví tatyí cuihna cha casacuví milagru nahnu. Ta quitá coyo chi vatyí sandu in ri chi tandihi rey cha iyó siqui ñuhu ñáyivi, vatyí cacañi tahan ra quivi cusañaha Nyoo tyi iyó tandihi tunyee iñi chi ra.

¹⁵ Ta catyí Nyoo:

—Nyehe ndo vatyi yuhu cha vachi tari noo ra suhu. Vatyi sana ri iñi ndo ta quihvi ra suhu vehe ndo. Sií xaan cucuvi chí ñáyivi nyatú tuhva ri quivi quichi. Ta vii cumí ñu sahma ñu (o cuñí chí catyí añima ñu) tacuhva cha ma cuvityiyaa ñu nu cua quichi, ta ma cucahan nuu ñu, catyí Nyoo.

¹⁶ Ta cundu in ri ra cacuvi rey nu nañi chí chihin sahan hebreo Armagedón.

¹⁷ Tyicuan ta ángel cu ucha cuan coyō ra cha yihí chichi copa ra nu tatyí, ta nya vehe ñuhu andivi nu nyaá Nyoo nu tyayu ra, quitā noo ndusu chaa xaan ta catyí chí:

—Cha cuví vityin —catyí ra.

¹⁸ Tyicuan ta vaa ri maa cuví ta cahán savi ta quihví tacha. Ta ñihi xaan tañ siqui ñuhu ñáyivi. Ta ndaha chicoō ñáyivi siqui ñuhu ñáyivi, ta ña tuhva taan cha ñihi xaan tyicuan caa.

¹⁹ Ta nu tañ cuan ndata ñuu cahnu cuan, uñi nu ndata. Ta tandihí ca ñuu siqui ñuhu ñáyivi canacoyo. Ta Nyoo nichoñ iñi ra chí ñuu cahnu Babilonia cuan vatyi quiñi xaan sacuvi ñu. Ta sanyehe xaan ra tindoho chí ñu vatyi cuxaan xaan ra chí ñu.

²⁰ Tandihí ñuhú cha iyó chichi tyañuhu ta tandihí yucu, ndihi tuanaa.

²¹ Ta nahnu xaan tucu savi yuu coon ityi andivi siqui ñáyivi. Ta vee xaan. Tari noo cha uvi xico kilu vee noo noo savi yuu cuan. Ta ñáyivi cahán ña vaha ñu siqui Nyoo cha cuenda tindoho savi yuu cuan, vatyi cuví chí noo tindoho cahnu xaan cha cuenda ñu.

17

Nu cua tachi tuñi Nyoo chí noo ñaha cata iñi

¹ Tyicuan ta chichi cha ucha tahan ángel cha cayihí ndaha ucha copa cuan, quichí noo ra nu nyaí, ta catyí ra chíi:

—Ñaha tyi cusañahi chuun yoso caa cucutuñi chí ñaha cata iñi cahnu cha nyaá siqui tyañuhu.

² Vatyi ra cacuvi rey siqui ñuhu ñáyivi casacuví ra cha quiñi caa chihin ña, ta ñáyivi cha iyó siqui ñuhu ñáyivi, tiví xaan ñu chihin cha quiñi caa cha sacuví ña —catyí ra chíi.

³ Tyicuan ta nyehí noo cha sañaha Tatyí Ii Nyoo chíi, ta chinyaca ángel cuan chíi chiqui ndi nu yori maa ñáyivi iyó, ta yucuan nyehí chí noo ñaha, yosó ña siqui noo quiti cuaha quiñi caa. Ta nyicú sivi cha cahán ña vaha siqui Nyoo chí ti. Ta ucha tahan xiñi ti nyaá ta uchi ndiqui ti.

⁴ Ta ñaha cuan ñihnó ña noo sahma tyacu nyaa ta tyacu cuaha. Ta cuaha xaan xuhun cuaan iñi chí ña, yuu tyaqui ta perla ñandihí. Ta yihí ndaha ña noo copa xuhun

cuaan tyitú yihí chihin cha ña vaha ta cha quiñi caa cha sacuvi ña.

⁵ Ta tyaan ña nyaá noo sivi cha cuví noo tuhun xehe cha ña cutuñi iñi ñáyivi. Vatyi catyí chí: “Ican ñaha sihi ihya cuví ñuu Babilonia cahnu, sihi tandihí ñu cha cata iñi ta tandihí cha ña vaha cha iyó siqui ñuhu ñáyivi.”

⁶ Tyicuan ta tuví iñi vatyi ñaha cuan chíñi ña chihin cha chíñi ña niñi ñu cuenda Nyoo, ta ñu cha cachihí cha cuenda cha cahán ñu tuhun ra Jesús. Ta cha nyehí cuan, iyo xaan cuñí.

⁷ Tyicuan ta catyí ángel cuan chíi:

—¿Ñáá tuhun cha iyo xaan cuñín? Cua sacote chuun ñáá cha cuñi chí catyí tuhun xehe ñaha sihi ihya ta quiti quiñi caa cha yosó ña, quiti cha nyicú ucha xiñi ta uchi ndiqui.

⁸ Quiti quiñi caa cha nyehun cuan, cuví ti noo quiti cha chiyo ta vityin yori ca ti iyó. Soco cuquita ti chichi yavi cono xaan cha ñahri nu chítahan. Yucuan ñohó ti cha ni cumañi ca ndihi tuhun ti. Ta ñáyivi iyó siqui ñuhu ñáyivi iyo xaan cucuñi ñu na nanyehe ñu chí quiti quiñi caa cha chiyo tyicuan, soco vityin yori ca ti iyó, soco cuquichi ti inga chaha. Ñu cua nyehe chí ti cuan, cuví ñu ñu cha ñahri sivi nyaá nu libru Nyoo nyata cuvivi chino ñuhu ñáyivi. Ican libru cuan cucatyi yóó ñáyivi cuconyito tyicuan ri maa.

⁹ Ihya cuví noo cha cuñi chí nacoto ndo: Ndi ucha xiñi ti cuan cuñi chí catyí ucha tahan yucu cha nyaá ñaha cuan siqui.

¹⁰ Ta xiñi ti cuñi tucu chí catyí ucha tahan rey. Ta ohon tahan rey cuan cha yaha chinyaca ñaha ra. Ta rey cu iñu nyacá ñaha ra vityin. Ta ra cu ucha, cumañi ca cucunyaca ñaha ra. Ta quivi quichi ra nu ndihí, ña naha cucunyaca ñaha ra.

¹¹ Ta chichi cha ucha tahan rey cuan, cunanyita noo ra inga chaha, ta ican ra cucuvi ra rey cu uña. Ta ican tucu ra cuví quiti quiñi caa cha chiyo quivi cuan, ta vityin yori ca ti soco cunanyita ti inga chaha. Ta cha yaha cunyaca ñaha tucu ti, yucuan cuví nu cua ndihi tuhun ti.

¹² Ta ndi uchi tahan ndiqui cha nyehun cuan, cuñi chí catyí ndi uchi tahan rey cha cumañi ca cacunyaca ñaha. Soco cucoo ityi chí ra cha cunyaca ñaha ra noo ora, in ri chihin quiti quiñi caa cuan.

¹³ Ndi uchi tahan rey cuan in xaan ri cuhva cucaca xiñi ra. Ta cunacuhva ra tunyee iñi ra chí quiti quiñi caa cuan. Ta tandihí ityi cha iyó chí ra cunacuhva ra chí ti.

¹⁴ Ta cucacañi tahan ra chihin ra cuví Mbee Luhlu. Soco ra cuví Mbee Luhlu cuan, cucuvi chasaha ra chí ra. Vatyi ican

ra cuví nuu chi tandihí ra nyacá ñaha. Ta cuví tucu ra nuu chi tandihí ra cacuví rey. Ta ñu nyicú chihin ra, Nyoo nacana chi ñu ta nacachí ra chi ñu. Ta ñi xaan iñi ñu nyicón ñu chi ra.

¹⁵ Ta catyí tucu ángel cuan chíi ñandihí:

—Tandihí tyañuhu cha nyehun cuan, cha nyaá ñaha cata iñi cuan siqui, ican cuví ñáyivi tandihí ñuu nyihi ta tandihí ñuu nahnu, ñu siin siin sahan cahan.

¹⁶ Ta ndi uchi ndiquí cha nyehun xiñi quití quiñi caa cuan cha cuví uchi tahan rey cuan, ican ra cuan cuasatasi iñi chi ñaha cata iñi cuan. Ta cusando ra chi ña cha notuhun ri maa ña. Ta cusanduvityi yaa ra chi ña. Ta cucachi ra coño ñuhu ña. Ta cutyihí ra chi ña nu cayú ñuhu.

¹⁷ Vatyí Nyoo sana ndaha ra añima rey cuan vatyí casacuví ra cuhva cuñi maa ra. Vatyí ñn ri cuhva cucaca xiñi ra, ta cucuhva ra ityí chíi quití quiñi caa cuan cha cunyaca ñaha ti tari rey nyacua nya chino cava tuhun cahán maa Nyoo.

¹⁸ Ñaha sihi cha nyehun cuan, ican cuví ñuu cahnu cha nyacá ñaha chíi tandihí ra cuví rey siqui ñuhu ñáyivi.

18

Nu cua tiví ñuu Babilonia

¹ Cha yaha tuhun ihya ta nyehí inga ángel cha vachí noó ityí andiví ta iyó xaan ityí chíi ra. Ta ñuhu ñáyivi ndichin xaan nduví chihin cha ndichin ra.

² Ta ñihi xaan ndusu ra ta canachaá ra, ta catyí ra:

—Cha yaha tuhun ñuu Babilonia cahnu cuan. Ta cha nanduví chíi nu iyó ra ña vaha. Vehe tandihí nuu tatyí ña vaha cha nanduví. Ta taca saa ña vaha nanduví ñandihí.

³ Vatyí tandihí ñáyivi tiví ñu cha cuenda cuatyí sacuví ñuu Babilonia cuan. Ta ra cacuví rey, ra nyacá ñaha siqui ñuhu ñáyivi tari cha cachiyó ra chihin ñaha cuan cha cuví ñuu Babilonia. Casacuví ra cuatyí chihin ña. Ta ra cha cuahan cuanaxico ñuu Babilonia cuan candutyayí ra chihin cha xicó ra chíi ñu ñuu cuan vatyí tandihí cuhva ta sanaa ñu xuhun ñu chihin cha cata iñi ñu.

⁴ Tyicuan ta chíñi nonga ndusu ityí andiví. Ta catyí chíi:

—Qujta ndo ñuu chíña, nyoho cha cuví ndo ñáyivi chíi, tacuhva cha ma cutahan ndo sacuví ndo cuatyí chihin ñu chíña, tacuhva ma cutahan ndo ndoho ndo tari maa ñu.

⁵ Vatyí cha caá ticuití cuatyí ñu ñuu cuan, nyacua cha chaá chíi nu nyaá Nyoo. Ta Nyoo cha nicohon iñi ra cha ña vaha sacuví ñu.

⁶ Cuhva ndo chíi ñu suri maa cha chaha ñu chíi inga ñáyivi. Ta uvi ca chaha sananyehe ndo tindoho siqui cha sacuví ñu. Cuhva ndo noo tindoho cunyehe ñu cha ñihi uvi ca chaha ican saha cha chaha maa ñu chíi inga ñáyivi.

⁷ Yucuan chaha cuhva ndo cha iyo xaan tahan ñu chihin ta sanyehe xaan ndo tindoho chíi ñu tari cuhva cha sacahnu xaan ñu chíi ñu ta cusíi xaan iñi ñu. Vatyí catyí ñuu cuan chichi añima chíi: “Ihya nyaí tari noo reina. Ñima ñaha chíi yíi cuví, ta ni ma cunyehe tindoho”, chícá iñi chíi.

⁸ Yucuan chaha chíi cha noo ri quiví cuquichí tindoho siqui ñuu cuan, cuquichí tuhun chíi, cuquichí tucuihya iñi ta coo tama ñuu cuan, ta cucayu chíi chihin ñuhu. Vatyí iyó xaan tunyee iñi chíi Nyoo Sutu yo ta cutachi tuñi ra chíi ñu ñuu cuan.

⁹ Ra cacuví rey siqui ñuhu ñáyivi ihya tari cha cachiyó ra chihin ñaha cha cuví ñuu cuan, cuacu chaa ra, cunducuihya xaan iñi ra na cananyehe ra ñuhma cha cayú ñuu cuan.

¹⁰ Ta nya sava ri cucuitayucu ra cha cuenda cha cayuhvi ra tindoho cuan. Ta cucatyí ra:

—¡Ndahvi yoho, ñuu cahnu Babilonia, ñuu cha chíyó xaan tunyee iñi chíi! Vatyí noo tuhun cuhva ta chaá tindoho nyehun —cucatyí ra.

¹¹ Ta ra cha canaxicó ñáá ndihí cha canaxicó, suri cucuacu chaa ra ta canducuihya iñi ra cha cuenda ñuu cuan. Vatyí yori ca sata cha canaxicó ra.

¹² Vatyí xicó ra xuhun cuan, xuhun cuichin, yuu tyaqui, perla, sahma lino finu, sahma seda, ta sahma tyacu nya, ta tyacu cuaha. Ta nyisó tucu ra tandihí nuu vitu cha vixi chahán ta ñáá ndihí cha chíñó chihin noho landa, vitu tyaqui, ta caa cha cuví bronce, ta caa cha cuví hierro, ta yuu cha cuví mármol.

¹³ Ta nyisó tucu ra canela, ñáá ndihí ca cha vixi chahán, tari cutu, mirra, perfume, vinu, acetey, yutyí paan finu, ta trigo. Ta suri nyisó tucu ra quití cuenda carga, ta mbee, caballu, carru. Ta nyacua nya añima ndahvi cha cuví musu ra ta caxico ra.

¹⁴ Ta catyí ra chíi ñáyivi ñuu cuan tyehe caa:

—Ñahri ca cha tyaqui cha chíyó chuun, cha tahán xaan iñun. Ta cha cuachiyó tandihí cha tyayun. Ta ma cunañihi ca maun tandihí cuan —catyí ra.

¹⁵ Ra cha caxicó tandihí ihya, candutyayí ra cha cuenda cha sata ñu ñuu cuan cha xicó ra. Cañi cucuitayucu ra chihin cha cayuhvi ra cha cunyehe ñu cuan tindoho. Ta cucuacu chaa ra ta cunducuihya iñi ra.

¹⁶ Ta cucatyí ra:

—¡Ndahvi ñuu cahnu cuan! Cuví chi tari noo ñaha sihi cha ñihmó sahma lino ñinu, sahma tyacu nyaa ta tyacu cuaha. Ta iyo yihí ña xuhun cuaan, ta yuu tyaquí ta perla.

¹⁷ ¡Vatyi noo tuhun ri cuhva ta ndihí cha tyayíi xaan cuan! —cucatyí ra caxico cuan.

Ta tandihí ra cuví capitán cuenda barcu, chihin ñu cañoño chichí, tandihí ñu casahá tyiño nu tyañuhu, nya sava candoó ñu.

¹⁸ Ta cha cananyehé ñu ñuhma cha cayú ñuu cuan, canachaa ñu, ta catyí ñu:

—¿Ñáá nonga ñuu chiyo tari ñuu cahnu ihya? Ñahri ca —cucatyí ñu.

¹⁹ Ta tyicú ñu niyaca xiñi ñu, ta chacú chaa ñu. Ta cuihya iñi ñu, ta canachaa ñu ta catyí ñu:

—¡Ndahvi nduví yo cha cuanaa ñuu cuan! Vatyi chihin cha tyayíi ñuu cahnu cuan ndutyayíi tandihí yo, ñu chicá noo nu tyañuhu chihin barcu. ¡Ta vityin noo tuhun cuhva luhlu ri ta cuanaa chí! —catyí ñu.

²⁰ Soco cúsii cuñi nyoho cha cuenda ñuu cuan, nyoho cha iyó andiví, nyoho ñu yihí cuenda Nyoo ta nyoho ra cachicá tyiño ra Cristo ta nyoho ra cacuví profeta Nyoo. Cúsii cuñi ndo vatyi cha cuenda ndo ta tachí tuñi Nyoo chí ñu cuan, ta cha cuenda cha ña vaha cha sacuví ñu chihin ndo.

²¹ Tyicuan ta noo ángel cha iyó xaan tunyee iñi chí, nacoñehé ra noo yuu molino cahnu xaan ta tuchi ra cuahan nu tyañuhu, ta catyí ra:

—Suri tyehe caa cundihí tuhun ñuu Babilonia cahnu, Ta ni inga ca chaha ta ma nyehe ca ndo chí ñu.

²² Ta ma cuiñi con yaa ityi chichi ñuu cuan, vatyi yori ca cusacuacu arpa, ta ni flauta, ta ni trompeta, ta ma tiví ca ñu. Ta ni ma coo ca ra casahá tyiño ñáá ndihí tyiño. Ta ni ma tyacu ca cha cayu molino.

²³ Ta ni nonga ñuhú tima, ta ma cayu ca chichi ñuu cuan. Ta ni nonga chaha ta ma cuiñi yo ndusu ñu cha iyó ñu vico tandaha. Vasi ra canaxicó cha chiyo ñuu cuan, ican ra cuví ra cahnu ca cuví nuu ñáyiví iyó siqui ñuhu ñayiví. Nyoho ñu Babilonia, sandaví ñaha xaan ndo chí tandihí ñáyiví iyó siqui ñuhu ñayiví chihin cha satasi ndo.

²⁴ Vatyi cuaha xaan niñi ra cacuví profeta Nyoo iñi chichi ñuu cuan vatyi चाह्णí ñu chí ra. Ta iñi tucu niñi ñu cuenda Nyoo, ta niñi tandihí ñu cha cachahñí ñáyiví nicahnu ñuhu ñayiví.

19

¹ Cha yahá cuan, ta chiñi noo ndusu cha cuaha vavaha ñáyiví nya andiví. Ta catyí ñu:

¡Cahnu xaan cuví Nyoo! Sutu Mañi yo, Nyoo cuví ra ra sacacú chí yo. Ta chí maa

ra tahán chí cha sacahnu yo, tyi iyó xaan tunyee iñi chí ra.

² Vatyi vaha sacutuñí ra chihin cha ndaa ta chihin cha ndicha.

Tachí tuñi ra chí ñaha cata iñi cuan.

Vatyi sativí xaan ña chí ñáyiví iyó siqui ñuhu ñáyiví chihin cha quiñi caa cha sacuví ña chihin ñu.

Ta yucuan chaha tachí tuñi ra chí ña, ta cha cuenda cha चाह्णí ña chí ñu sacuví tyiño nuu ra.

³ Ta quichaha catyí ñu inga chaha:

—¡Cahnu xaan cuví Nyoo! Ñuhma cha cayú ña, ma cucuita ca maa cha ndaa chí ityi siqui —catyí ñu.

⁴ Ta ndi oco cumi ra cha vaha chahnu ta ndi cumi tahan cha nyitó cha nyicú nu nyaá tyayu Nyoo, cachicuiñí chiti ra nya nu ñuhú. Ta casacahnú ra chí Nyoo nu nyaá ra nu tyayu ra. Ta catyí ra:

—¡Na cuví chí tyicuan caa! ¡Cahnu xaan cuví Nyoo! —cacatyí ra.

⁵ Ta nu nyaá tyayu Nyoo, tyacu noo ndusu, ta catyí chí:

Sacahnu ndo chí Sutu yo Nyoo
Tandihí nyoho cha sacuví ndo tyiño nuu ra,
ta quichahá ndo chí ra, vasi nyihí ndo, o
chahnu ndo.

Nu cua tandaha ra cuví Mbee Luhlu chihin ñáyiví chinó iñi chí ra

⁶ Ta chiñí tiquí noo ndusu tari cha cuaha vavaha ñáyiví cahán, tari ndusu nu cuaha xaan yuvi ndutya, ta tari cha ñihi xaan cahán savi. Ta catyí chí:

¡Cahnu xaan cuví Sutu yo Nyoo! Vatyi cha quichahá nyaca ñaha ra ta iyó tandihí tunyee iñi chí ra.

⁷ Na cusii cuñi yo ta na cutu yo chihin tusii iñi. Na sacahnu yo chí ra.

Vatyi cha chaa cuhva cha cua coo yo vico tandaha ra cuví Mbee Luhlu.

Ta yoó cuacuví yo tari noo ñasihí ra, cha nyatú tuhva ri yo quiví tandaha yo chihin ra.

⁸ Ta maa yo cucuihno yo sahma linu ñinu, ndii ta cuichin.

Vatyi sahma linu ñinu cuan cuñi chí catyí cha vaha cha sacuví ñáyiví cuenda ra.

⁹ Tyicuan ta quichaha catyí ángel cuan chí:

—Tyaa tuhun ihya nu tutu: “¡Sii xaan cuví chí ñu cha nyaá cahun vico tandaha ra cuví Mbee Luhlu!”

Ta catyí tucu ra chii tyehe caa:

—Ican ihya cuví tuhun ndicha Nyoo —catyí ra chii.

¹⁰ Tyicuan ta chicuiñí chiti chaha ángel Nyoo cuan vatyi sacahni chí ra, soco catyí ra chii:

—Ma sacahnun chii, vatyi musu Nyoo cuví tucu yuhu tari yoho, ta tari tandihí ra

yañi yo cha nyicón tuhun ndicha ra Jesucristo. Chi Nyoo tahán chi sacahnu yo —catyí ra chii.

Vatyí tuhun ndicha ra Jesús, ican cuví cha chahá cuhva chi ra cacuví profeta, ra cha cachahá cuenda tuhun cahán Nyoo chihin yo.

Nu sañahá chi cuenda ra cha yosó caballu cuichin

¹¹ Tyicuan ta nyehj tanuña andivi. Tyicuan ta tuvj noo caballu cuichin. Ta ra yosó chi ti nañi ra Ra Ndicha Cha Nii Iñi Sacuvi Tyiño Nuu Nyoo. Vatyí chihin cha ndaa sacutuñi ra chi ñáyivi, ta cañi tahan ra chihin cha ña vaha chihin cha ndaa.

¹² Xiño xaan chiti nuu ra tari cha cayú ñuhu. Ta cuaha xaan corona yihí xiñi ra. Ta nyaá noo sivi chi ra cha noo tuhun ri maa ra chitó ra ñáá sivi nyaá chi ra.

¹³ Ta ñuhó ra noo sahna iñi ñiñi. Ta maa ra nañi ra Tuhun Cahán Nyoo.

¹⁴ Ta canyicón sindaro andivi chi ra, cañihó ra sahna linu finu, sahna cuichin ta ndii. Ta cayosó ra caballu cuichin.

¹⁵ Ta chichi yuhu ra nañi Tuhun Cahán Nyoo cuan, quitá noo mityi cha xaan ni nduvi chiyo yuhu, vatyí chihin tuhun cahán ra cusañicuehe ra ñáyivi iyó siqui ñuhu ñayivi. Ta ñihi cunyaca ñaha ra chi ñu tari chihin noo yutun caa. Maa ra cutachi tuñi ra chi ñu tari noo ra cha sacunyihi tichaha ndivi chihin chaha ra. Ta cusacoho ra vinu uva chi ñu, ta ihya cuñí chi catyí tyi cuxaan Nyoo chihin ñu ta cutachi tuñi ra chi ñu vatyí chaha xaan ñu tisihi chi Nyoo ra iyó tandihi tunyee iñi chii.

¹⁶ Ta nu sahna ra ta nu sihin ra cuan nyaá letra cha catyí tyehe caa: “Ihya cuví Ra cuví nuu chi tandihi rey. Ta ican ra cuví nuu chi tandihi ra nyacá ñaha.”

¹⁷ Tyicuan ta nyehj chi nonga ángel nanyaá ra nu ñanyii. Ta chihin tandihi fuerza ra canachaq ra chi tandihi saa cha candavá ityi andivi, ta catyí ra chi ti:

—Ñaha ndo ta candu ñin ri ndo vatyí cuxiñi ndo cha chahá Nyoo cachi ndo.

¹⁸ Vatyí cachi ndo coño ra cacuví rey ta ra cuví nuu chi sindaro ta chi ra ndachan xaan saha chii. Ta cachi ndo coño caballu ta coño ñuhu ra cha cayosó chi ti. Cachi ndo coño tandihi ra, vasi ra yori chitoho o ra iyó chitoho, vasi ra nyihi o ra chahnu —catyí ra chi saa.

¹⁹ Tyicuan ta nyehj chi quití quiñi caa cuan ta chi ra cacuví rey cha iyó siqui ñuhu ñayivi chihin sindaro cuenda ra, vatyí candu ñin ri ra chi cacafi tahan ra chihin ra yosó caballu cuichin cuan ta chihin sindaro cuenda ra.

²⁰ Ta tijñ ra chi quití quiñi caa cuan ñin ri chihin ra cuví profeta cuendu cuan, vatyí

chihin nuu quití quiñi caa cuan ta sacuví ra cuendu cuan milagru, ta sandavi ñaha ra chi ñáyivi cha chahá chi cunyaa tuñi quití quiñi caa cuan, ta chi ñu sacahnú chi xiñahñu ti. Ta nyitó nyitó ra ta tuchi ra yosó caballu cuichin chi ñanduvi ra nu ñuhu cha cayú chihin azufre.

²¹ Ta tandihi ca ñu cachihj ñu chihin mityi xaan cha quitá yuhu ra cha yosó caballu cuichin cuan. Ta tandihi maa saa, cachachj xaan ti coño ñu.

20

Nu sañahá chi cuenda noo mil cuiya

¹ Cha yahá tuhun cuan ta nyehj chi noo ángel vachi noó ityi andivi ta yihí ndaha ra ndaha tucu yuvehe yavi cono cuan. Ta yihí tucu ndaha ra noo cadena cahnu.

² Ángel ihya tijñ ra chi coo cahnu cuan, quití cha cuví Coo Chahnu cuan, cha cuví cuñha. Ta chahñj ra chi ti chihin cadena noo mil cuiya.

³ Ta tuchj ra chi ti yavi cono cuan. Ta yucuan nacasj ra chi ti. Ta tyaq ra noo sellu yuvehe cuan tacuhva cha ma sandavi ñaha ca ti chi ñáyivi iyó siqui ñuhu ñayivi, nyacua nya cha yaha noo mil cuiya. Ta cha yaha noo mil cuiya cuan ta cundachi tucu ti suhva ca quivi.

⁴ Yahá cuan ta nanyehj cuaha xaan tyayu tayucú. Ta nuu chi nyicú ñu cha chicoq ityi chi vatyí tachi tuñi ñu chi ñáyivi. Ta nyehj tiqui añima ñu chahnya ñáyivi xiñi cha cuenda cha cahán ñu tuhun Nyoo cha chahá cuenda ra Jesús chi ñu. Ta maa ñu, ña sacahnú ñu chi quití quiñi caa cuan, ni chi xiñahñu ti, ni ña chahá ñu chi ñu cha cunyaa tuñi ti tyaan ñu, ni ndaha ñu. Nyehj vatyí ican ñu ihya, canandoto ñu ta chicunyaq ñaha ñu chihin ra Cristo noo mil cuiya.

⁵ Ican ñu ihya cuví cha nandoto cha xihna ca. Soco inga ityi ndiyi ña nandoto ñu nyacua nya cha yahá mil cuiya cuan.

⁶ Jsi xaan cuñi ñu ii cuenda Nyoo, ñu cha tahán chi nandoto cha xihna ri! Ta ma cuhun ñu tuhun chihi cu uvi nu cuví anyaya nu tachí tuñi Nyoo chi añima ña vaha. Vatyí cucuvi ñu sutu cha cuenda Nyoo ta cuenda ra Cristo. Ta cucunyaq ñaha ñu mil cuiya chihin ra.

⁷ Ta cha yaha mil cuiya cuan, tyicuan ta cundachi cuñha nu ñohó ra vehe caa.

⁸ Ta cuquita ra, ta cusandavi ñaha ra chi ñáyivi nicahnu siqui ñuhu ñayivi. Cuquita ra vatyí cusandavi ñaha ra chi ñáyivi Gog ta Magog, ñu xaan iñi chi Nyoo. Ta cusandu ñin ri ra chi sindaro ñuu cuan vatyí cuhun ra cuatyí. Cuaha xaan ra, tari maa ñiti yuhu tyañuhu.

⁹ Tyicuan ta cuahan coyo ra nicahnu siqui ñuhu ñayivi. Ta cachasi cutya ra nu iyó

ñu cuenda Nyoo ñuu Jerusalén nu cuñí xaan Nyoo. Soco Nyoo cusaquichi ra ñuhu ityi andivi ta cucahmi chi chi tandihi sindaro cuan.

¹⁰ Ta cuihna cha sandaví ñaha chi ñu, cutuchi Nyoo chi ra chichi anyaya cahnu nu cayú ñuhu chihin azufre, nu tuchi tucu ra chi quití quiñi caa cuan ta chi ra cha cuví profeta cuendu. Ta yucuan cunyehe ra tindoho tyicuan ri maa ndiyaca ta ñiyaca.

Nu cua cutuñi chi ñáyivi nu tyayu cuichin nu nyaá Nyoo

¹¹ Tyicuan ta nyehi noo tyayu cuichin cahnu. Ta nyehi chi ra nyaá nuu tyayu cuan. Ta chihin nuu ra ta cuanaa ñuhu ñayivi ta andivi. Ta ñahri ca maa nu cucunyata chi.

¹² Ta nyehi chi tandihi ñu ndiyi, ñu chahnu ta ñu nyihi, tyacú ñu nuu Nyoo. Tyicuan ta canuñá libru cha nyaá tandihi cha sacuví ñu quiñi chiyo ñu ñayivi. Ta nuña tucu inga libru cha nyaá sivi ñu cha cuconyito tyicuan ri maa chihin Nyoo. Ñu ndiyi cuan cuacutuñi chi ñu ñáá ndihi cha chinyacuví ñu cha nyaá nu tandihi libru cuan.

¹³ Ta tyañuhu nacuhva cuenda chi chi ndiyi cha cumí chi. Ta tandihi nu nyicú ñu chihí nu nyacá ñaha Tuhun Chihi, nacuhva cuenda chi ndiyi cha cumí chi. Ta tandihi ñu cuatahan chi chi ñu yoso cuhva cha casacuví ñu.

¹⁴ Tyicuan ta cundihí Tuhun Chihi cuan ta ñahri ca nu cuacunyicu ñu chihí, vatyí cutuchi Nyoo chi ninduvi tahan cuan chichi anyaya cahnu nu cayú ñuhu. Ta ican ihya cuví Tuhun Chihi Cu Uvi.

¹⁵ Ta yucuan tuchi ra chi ñu cha ñahri sivi nyaá nu libru cha cuenda ñáyivi cha cua conyito chihin Nyoo tyicuan ri maa.

21

Nu nyehé ra Juan andivi chaa ta ñuhu ñayivi chaa

¹ Yahá cuan ta nyehi noo andivi chaa ta noo ñuhu ñayivi chaa, vatyí andivi ta ñuhu ñayivi cha xihna ri cuanaa chi. Ta tyicuan caa tucu tyañuhu, cuanaa tucu cuan.

² Yuhu ra Juan nyehi ñuu ii Jerusalén chaa cha vachi noó ityi andivi nu nyaá Nyoo. Ta tyaqui xaan nduvij chi tari noo ñaha cha cua tandaha chihin noo ra, tyicuan caa nduvij chi.

³ Ta chiñi noo ndusu ñihi cha quitá ityi andivi, ta catyi chi:

—jNyehé ihya! Nyoo, iyó ra mahñu ñáyivi. Ta cua coo ra chihin ñu. Ta maa ñu cua cuví ñu ñuu ra. Ta cua cunyata ra chihin ñu. Ta cua cuví ra Nyoo cuenda ñu.

⁴ Ta Nyoo cunacuhva ra ndutya nuu ñu. Ta ma cuví ca ñu. Ta ma cucuihya ca iñi ñu.

Ma cuacu ca ñu vatyí ma nyehé ca ñu tindoho. Ta ma nyehé ca ñu cha uhvi. Vatyí tandihi cha chiyo, cha yahá tuhun —catyi chi.

⁵ Tyicuan ta Nyoo, ra cha nyaá nu tyayu cahnu, vatyí ra:

—Nyehé. Sanduchaj tandihi maa cha iyó.

Ta catyi tucu ra:

—Tyaa tuhun ihya, vatyí tuhun cahín ihya, ndicha. Ta cuví cuní iñu vatyí tuhun cahín cuchino cava —catyi Nyoo chii.

⁶ Yahá cuan ta catyi tucu ra chii:

—Cha tandihi chingo cava vityin. Yuhu cuví ra xihna cuiri, ta yuhu cundoí nu ndihi tuhun. Ñáyivi cha ityi ndutya cha cuñí ñu tuhun yuhu, cucuhve ndutya cha chahá ñayivi cha ma naa ca maa coho ñu, ta ñahri cutiyahvi ñu.

⁷ Ñu cha cuví chasaha chi ra ña vaha, cuñihi ñu tandihi ihya, tari noo cha cundoo chi ñu. Ta yuhu cucuvi Nyoo cuenda ñu ta maa ñu cucuvi ñu sehi.

⁸ Soco ñáyivi cha yuhví xaan, ñu cha ña chinó iñi, ñu cha quiñi iyó, ñu cha chahñi ñáyivi, ñu iyó chihin rayi, ta ñima yí ñu cuví, o ra iyó chihin ñusihí ta ñima ñasihí ra cuví, ñu tasi, ñu casacahnú xitohyo, ta tandihi ñu cuendu, tandihi ñu cuan, tahán chi cuhun ñu chichi anyaya cahnu nu cayú ñuhu chihin azufre, nu cuví Tuhun Chihi Cu Uvi, nu tachi tuñi Nyoo chi añima ña vaha.

Nu nyehé ra Juan yoso caa cucuvi ñuu Jerusalén chaa

⁹ Tyicuan ta quichí noo ángel cha ucha tahan cuan, ra cha canyisó ndi ucha copa tyitú chihin ndi ucha tahan tindoho cuan. Ta cahán ra chihin ta catyi ra:

—Ñaha, ta cusañahi chuun yóo ñu cuví ñu yihí cuenda ra Cristo, ñu cha cuví tari ñasihí ra, tyi ra cuví Mbee Luhlu cuví ra —catyi ra chii.

¹⁰ Ta Tatyí Ii Nyoo chinyaca chii noo yucu cahnu ta sucun. Ta sañahá ra ñuu ii, ñuu Jerusalén cahnu cuan chii. Maa maa cuhva cha vachi noó ñuu cuan ityi andivi nu nyaá Nyoo, sañahá ra chii.

¹¹ Xiño xaan ñuu cuan chihin cha tyaqui Nyoo. Xiño xaan tari caá noo yuu tyaqui, tari caá yuu jaspe, ta xiño tari ino.

¹² Nicachico ñuu cuan sucun xaan sama. Ta iyó uchi uvi tahan yuvehe. Ta noo ángel nanyaá tahan tahan yuvehe. Ta ndi uchi uvi tahan sivi tata ñáyivi Israel nyaá yuvehe cuan.

¹³ Uñi tahan yuvehe cuan nyaá ityi nu caña ñanyii. Ta uñi tahan ityi norte. Ta uñi tahan ityi tyañuhu. Ta uñi tahan ityi nu quee ñanyii.

¹⁴ Uchi uvi tahan yuu yihí nu sama ra nu cacú chaha chi. Ta nuu yuu cuan nyaá sivi

ndi uchi uvi apóstol cuenda ra cuví Mbee Luhlu.

¹⁵ Ta ángel cha cahán chihin cuan, yihí ndaha ra noo yutun xuhun cuaan, vatyí chihin cuan cutyicuhva ra ñuhú ñuu cuan, ta yuvehe ta nu sama nicachico ñuu cuan.

¹⁶ Cumi tahan tutun ñuu cuan nyaá. Ta inuu ri cuhva cha quehen ta cha cañi. Ta ángel cuan tyicuhva ra ñuu cuan chihin yutun xuhun cuaan cuan. Ta tyicuhva ra, ta quitá uvi mil uvi ciento kilómetro. Ta inuu ri cha cañi ta cha sucun ta cha quehen.

¹⁷ Tyicuan ta tyicuhva ra nu sama nicachico ñuu cuan. Ta quitá uñi xico cumi metru cha cocon, tari tyicuhvá ñáyivi, tyicuan caa tyicuhva ángel cuan.

¹⁸ Chihin yuu jaspe sama yuhu ñuu cuan. Ta maa maa ri xuhun cuaan cuví ñuu cuan. Tari caá noo ino cha ndi vavaha, tyicuan caa.

¹⁹ Ta yuu cha cuví cimientu cuan tandihi ri maa nuu yuu tyaqui cuví: yuu cha xihna ri cuví jaspe; yuu cha cu uvi cuví yuu zafiro; yuu cha cu uñi cuví yuu ágata; yuu cha cu cumi cuví yuu esmeralda;

²⁰ ta yuu cu ohon cuví yuu ónice; ta cha cu iñu cornalina; ta cha cu ucha crisólito; ta cha cu uña berilo; ta cha cu ñin topacio; ta cha cu uchi crisoprasa; ta cha cu uchi ñin jacinto; ta yuu cu uchi uvi cuví amatista.

²¹ Ndi uchi uvi yuvehe cuan cuví chi uchi uvi tahan perla. Tahan tahan yuvehe cuan, ta ching chi chihin noo ri perla. Ta nu cuví ityi cahnu ñuu cuan, maa ri maa xuhun cuaan cuví, tari ino cha xiño.

²² Ni noo vehe ñuhu ña nyehí chichi ñuu cuan, vatyí Sutu yo Nyoo, ra iyó tandihi tunyee iñi chii, ican cuví vehe ñuhu ñu cuan, ta tyicuan caa tucu ra cuví Mbee Luhlu.

²³ Ñuu cuan ña chiñuhú cha sacundichín ñanyii. Ta ni cha ndichin yoo ta ña chiñuhú. Vatyí suri maa cha ndichin Nyoo chihin ra cuví Mbee Luhlu cuví cha sacundichin chichi ñuu cuan.

²⁴ Tandihí ñu cha cacú añima, cucaca noo ñu nu ndichin ñuu cuan. Ta ra cacuví rey siqui ñuhu ñáyivi cunyaca ra cha tyayii ra ta cuhva cuenda ra tandihí cha cahnu cacuví ra chi ñuu cuan.

²⁵ Ta ma nacunyasi yuvehe cha ñicahñu, ta yucuan ma coo cha cha cuaa.

²⁶ Ta tandihí cha tyayii, ta cha cahnu, cha iyó siqui ñuhu ñáyivi chuchaa chi nya ñuu cuan.

²⁷ Soco ma cuví quihvi cha quiñi caa. Ni noo ñu sacuví cha quiñi caa, ni ñu cuendu ma cuví quihvi ñu. Noo ri maa ñu nyaá sivi nu libru ra cuví Mbee Luhlu cuquihvi ñu, vatyí cuconyito ñu chihin ra tyicuan ri maa.

22

¹ Tyicuan ta sañaha ángel cuan noo yuvi cuii vavaha chii. Nduytya cha chahá cha conyito yo cuví. Cuii vavaha tari noo yutyi finu. Ta quitá yuvi cuan nuu nyaá tyayu Nyoo ta nu nyaá ra cuví Mbee Luhlu.

² Mahñu ityi cahnu ñuu cuan ta ninduvi chiyo yuvi cuan, nanyaá yutun cha chahá cha conyito yo. Ta uchi uvi chaha cha noo cuiya chahá tun chiti. Tahan tahan ri yoo chahá tun chiti. Ta ndaha tun, vaha cha cuví tatan chi ñáyivi iyó siqui ñuhu ñáyivi.

³ Ñuu cuan, ñahri maa cha ña vaha cucco vatyí yucuan nyaá Nyoo nu tyayu ra ta cucunyaca ñaha ra chihin ra cuví Mbee Luhlu. Ta cusacahnu ñu cuenda ra chi ra.

⁴ Ta cunyehe ñu chi ra chihin nuu ñu. Ta cua cunyaca sivi ra tyaan ñu.

⁵ Ta ma coo ca cha cha cuaa yucuan. Ta ñu coo yucuan ma cuchíñuhu ñuhú lámpara chi ñu, ni ñuhú ñanyii. Vatyí Nyoo Sutu yo cusacundichin ra nu nyicú ñu. Ta maa ñu cucunyaca ñaha ñu chihin ra tyicuan ri maa.

Nu sañahá chi vatyí cha cuyatyin quichi ra Cristo

⁶ Tyicuan ta catyí ángel cuan chii:

—Ihya tuhun ndicha cuví, ta cuví cunii iñun vatyí cuchino cava tuhun ihya. Ta suri maa Sutu yo Nyoo ra cahán chihin yuhu ra cacuví profeta cuenda ra ta cha naha, ican ra tachí ra chí ángel ra, vatyí sañaha ra chí ñu sacuví tyiño nuu ra yoso caa cucuvi cha numi ri —catyí ra.

Ta catyí Sutu Mañi yo:

⁷ —¡Cha cuñí quichi! —catyí ra.

¡sii xaan cuñi ñu cha sacuví cuhva cahán tuhun Nyoo cha nyaá nu libru ihya!

⁸ Yuhu ra Juan, chiñí tuhun ihya. Ta nyehí tandihí ihya. Ta cha yaha nyehí ta chiñí, chicuñí chiti chaha ángel cha sañaha cuan chii, vatyí sacahni chi ra.

⁹ Soco maa ra catyí ra chii:

—Ma sacahnun chii, vatyí yuhu, musu Nyoo cuví, tari yoho. Ta yañun cuví, tari ra yañi yo cha cacuví profeta cuenda Nyoo, ta tari tandihí ñu quichahá tuhun cha nyaá nu libru ihya. Chi Nyoo tahán chi sacahnu yo —catyí ra chii.

¹⁰ Ta catyí tucu ra chii:

—Ma tixehun tuhun Nyoo cha nyaá nu libru ihya, vatyí cha cuyatyin quivi cha cuchino cava chi.

¹¹ Soco saña chí ñu quiñi iyó, na sacuví ca maa ñu cuhva cuñi maa ñu. Ta ñu sacuví cuatyí na sacuví ca maa ñu. Soco ñu sacuví cha vaha, na sacuví ca ñu cha vaha. Ta ñu ii, ñu nachuva cuenda añima chí Nyoo, na cu ñi ca iñi ñu chihin ra —catyí ra chii.

¹² Ta Sutu Mañi yo catyí ra:

—Nyēhe ndo. Cha cuyatyin quiví quichi. Ta cutyiyahvi chí tahan tahan ñáyiví yoso cuhva cha sacuví ñu, tatu cha vaha o cha ña vaha.

¹³ Yuhu cuví ra xihna cuiri ta yuhu cundoi nu ndihi tuhun, yuhu iyé nu quichaha tandihi ta cucoo que nu cundihí tuhun —catyí Sutu Mañi yo.

¹⁴ Sii xaan cucuvi chí ñu sanduvii sahma o añima cuví cuan, vatyí coo ityi chí ñu cachi ñu chíti yutun cha chahá cha conyito añima yo tyicuan ri maa. Ta cuví quihvi ñu yuvehe ñuu cuan.

¹⁵ Soco ñu cha sacuví cha quiñi caa, ñu tasi, ñu cha iyó chihin tahan, ta ñima ñasihi ra o yii ñu cuví, ñu chahñi ñáyiví, ñu sacahnú xitohyo, ta tandihí ñu ñii cuendu ta sandavi ñaha ñu, tandihí ñu cuan, cundoo ñu ityi chata ñuu cuan.

¹⁶ Ta catyí tucu Sutu Mañi yo:
—Yuhu ra Jesús, sacuhin chí ángel cuende vatyí sacoto ra tandihí tuhun ihya chí ñu nyicú vehe ñuhu. Yuhu cuví ñáyiví chahnu chí rey David. Ta vachi tiqui tata ra ñandihí. Ta cuví tiqui tiño cahnu cha xiño, cha caña cha ñaa ca —catyí ra.

¹⁷ Tatyí Ii Nyoo ta ñasihi ra cuví Mbee Luhlu cha cuví ñu cuenda ra, catyí ñu tyehe caa:

—Ñaha, Sutu Mañi yuhu —catyí ñu.

Ta ñu chiñí tuhun ihya, ta catyí ñu chí ra:

—Ñaha —catyí ñu.

Ta ñu ityi ndutyá cha conyito yo chihin, ta tandihí ñu cuñí quichi, na quichi ñu ta coho ñu ndutyá cha chahá cha conyito añima yo, ta ñahri cutyiyahvi ñu.

¹⁸ Ta yuhu catyí chí tandihí ndo cha chiñí ndo tuhun Nyoo cha nyaá nu libru ihya, yuhu sacoté chí ndo noo tuhun ihya: Tatu nya noo ñáyiví sanducuaha ca ñu tuhun ihya, Nyoo cunatyiso ca ra tindoho cha nyaá nu libru ihya siqui ñu.

¹⁹ Ta tatu nya noo ñáyiví tinyaa ñu suhva tuhun Nyoo cha nyaá nu libru ihya, Nyoo cu tinyaa ra cha tahán chí chí ñu cha nyaá nu libru cha cahán chí tuhun cha cuconyito ñu tyicuan ri maa ta cucoo ñu ñuu ii cuan. Ta ma tahan ca chí chí ñu cha vaha cha cahán nu libru ihya.

²⁰ Ta Sutu Mañi yo ra cha chahá cuenda ihya catyí ra tyehe caa:

—Cha ndicha vatyí cha cuñí quichi —catyí ra.

Ta yuhu catyí:

—Na cuví chí tyicuan caa. Ñaha, Sutu Mañi yuhu, Jesús —catyí yuhu.

²¹ Na naquehen tandihí ndo cha vaha chahá Sutu Mañi yo Jesucristo chí yo. Ta na cuví chí tyicuan caa.